


# Diospan Tsain



New Testament in Sharanahua (PE:mcd:Sharanahua)

**Diospan Tsain  
New Testament in Sharanahua (PE:mcd:Sharanahua)**

copyright © 2008 Wycliffe Bible Translators, Inc.

Language: Sharanahua

Translation by: Wycliffe Bible Translators, Inc.

Sharanahua [mcd], Peru

**Copyright Information**

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

    You must give Attribution to the work.

    You do not sell this work for a profit.

    You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Sharanahua

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

    You include the above copyright and source information.

    You do not sell this work for a profit.

    You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 11 Nov 2022 from source files dated 29 Jan 2022  
8402923d-fd05-5a85-a7ae-203f04ecb375

## Contents

Mateo . . . . .	1
Marcos . . . . .	62
Lucas . . . . .	97
Juan . . . . .	161
Hechos . . . . .	204
Romanos . . . . .	255
1 Corintios . . . . .	280
2 Corintios . . . . .	309
Gálatas . . . . .	327
Efesios . . . . .	337
Filipenses . . . . .	347
Colosenses . . . . .	354
1 Tesalonicenses . . . . .	361
2 Tesalonicenses . . . . .	366
1 Timoteo . . . . .	369
2 Timoteo . . . . .	377
Tito . . . . .	383
Filemón . . . . .	387
Hebreos . . . . .	389
Santiago . . . . .	413
1 Pedro . . . . .	421
2 Pedro . . . . .	430
1 Juan . . . . .	435
2 Juan . . . . .	441
3 Juan . . . . .	442
Judas . . . . .	443
Apocalipsis . . . . .	446

## Mateo Jesushuunoa Cununi

*Jesucristo ahuun shunifo*

*Lc 3.23-38*

<sup>1</sup> Un mato Jesucristohuunoa tsain shara tapimai. Ahuun shunifoan aton anufo un mato yoiqui tau huai. Ahuun shuni David yafi Abraham.

<sup>2</sup> Abraham facu Isaac ini.

Isaac facu Jacob ini.

Jacob facu Judá yafi ahuun yorafo ini.

<sup>3</sup> Judápan facu Fares yafi Zara ini. Aton ahuari Tamar ini.

Fares facu Esrom ini.

Esrom facu Aram ini.

<sup>4</sup> Aram facu Aminadab ini.

Aminadab facu Naasón ini.

Naasón facu Salmón ini.

<sup>5</sup> Salmón facu Booz ini. Ahuun ahuari Rahab ini.

Boozpan facu Obed ini. Ahuun ahuari Rut.

Obed facu Isaí ini.

<sup>6</sup> Isaí facu David ini. Nan David Israelifoan aton niaifocoin ipaoni.

David facu Salomón ini. Salomón ahuafin Uriaspan ahuin ipaoniquin.

<sup>7</sup> Salomón facu Roboam ini.

Roboam facu Abías ini.

Abías facu Asa ini.

<sup>8</sup> Asa facu Josafat ini.

Josafat facu Joram ini.

Joram facu Uzías ini.

<sup>9</sup> Uzías facu Jotam ini.

Jotam facu Acaz ini.

Acaz facu Ezequías ini.

<sup>10</sup> Ezequías facu Manasés ini.

Manasés facu Amón ini.

Amón facu Josías ini.

<sup>11</sup> Josías facu Jeconías yafi ahuun yorafo ini.

Nantianri Babilonia anoa niaifoan ahuun ranushumuaf nichini Israelifo rutushon atirifi ahuun mai ano ihuushonafoanno ahuun oinmatifo huanon. <sup>12</sup> Chipofin Babilonia anoashu futsafori cainni.

Jeconías facu Salatiel ini.

Salatiel facu Zorobabel ini.

<sup>13</sup> Zorobabel facu Abiud ini.

Abiud facu Eliaquim ini.

Eliaquim facu Azor ini.

<sup>14</sup> Azor facu Sadoc ini.

Sadoc facu Aquim ini.

Aquim facu Eliud ini.

<sup>15</sup> Eliud facu Eleazar ini.

Eleazar facu Matán ini.

Matán facu Jacob ini.

<sup>16</sup> Jacob facu José ini.

José ahuin María nan Jesús ahua ini. Jesús Upa Diosin catonni nocon Numamisi inon. Nan non Cristoran huamisi. <sup>17</sup> Abraham ahuun funafo catorce ahuun unutani David

ini. David ahuun funafori catorce ahuun unutani Babilonia anoshon ato achinifo ato mai ano inonfo. Nanfoan ahuun funafori catorce ahuun unutani Cristo cainni.

### *Jesús cainni*

*Lc 2.1-7*

<sup>18</sup> Jesucristo cainfin iscaniquin. José María yoini, —Non fiananon, —ishon. Ascafia fiananfotaima María man facu nanua ini. José ayamafian Diosin Yoshin Sharapan nanumana. <sup>19</sup> Ascashon José Dios tanasharacoinshon ahuun chain ahuin rafini huacasmaquin yorafoan ointaifi yoicasmani. <sup>20</sup> Nanscara ahuun nomuranshon shinanfiaino ahuun namapan Diosin ahuun oinmatinin afu nai muran imisi aqui oshon yoiquin isca huani, —José minfin David funaquin. Ascacun shinanchacaquima María fihu. Nan facu nanuafin Diosin Yoshin Sharapan nanumanaquin. <sup>21</sup> Ascan nan caianofin anuqui Jesusran min huashquicain. Nantonmain ahuun yorafo chaca soashofain ato numashquiamaiton, —ishon yoini. <sup>22</sup> Diosinhuunshon inon pacoai yoimisifoan cununifo cuscan man aaquin. <sup>23</sup> Nanfoan cunuquin isca huani,

“Nicapon. Ainfo funuoma tsoa afu iyamaflamisi facu nanushquin. Caiano furonanfacu iishquin. Ahuun anufin Emanuel (Onicoinnin tsainman Diosinnofu icaran) ishquiquin,”

ishon Dioshuunshon inon pacoai yoimisi cununi.

<sup>24</sup> Ascaino José moinacahuatan nan Diosin oinmatinin afu nai muran imisi yoia cuscan María fini. <sup>25</sup> Fiiflashocai afu ipaonima furun caiyain chain. Ascashu furun cincun José anuqui Jesusran huani.

## 2

### *Nocofunu tapicoianfo fari oaiquirinoashu Jesús oinpai funifo*

<sup>1</sup> Ascano Herodes niaifoaitian Jesús Belén anoashu cainni. Nan Belén Judea muran ini. Nantianri fishifohuunoa tapicoianfo fari oaiquirinoashu fucani Jerusalén ano noconifo.

<sup>2</sup> Ascano nococashon ato yocanifo, —Raniashumun a facu caianquin Judiofoan aton niaifo ishquiai. Non fishi oianhuunshon non tapia facu caincun. Man nonfin ahuun fishi fari oai aria oianquin. Ascacufin non aqui unimai oaquin. Min nocon niaforan ishon oinpai non oaran, —ishon ato yocanifo.

<sup>3</sup> Ascaifoan niaifo Herodes ahuun ointi fucashriscatani. Jerusalén anoa yoraforifi Herodes icai cuscan arifi muunifo. <sup>4</sup> Ascacun ahuun yorafohuunshon Diosin cu-fimisifoan niaifo yafi Moisés cununi cuscan tapimamisifo Herodes ato yoimaquin isca huani, —Uqui fucahuun, —ishon ato yoimanano aqui fuaifoan ato yocaquin —¿Raniashumun Cristo cainshquiquin? —ishon Herodes ato yocani. <sup>5</sup> Ascaiton cumacaquin, —Belén Judea murannoashu cainshquin, —nannori Diosinhuushon inon pacoai yoimisifoan cunuquin isca huani.

<sup>6</sup> “Belén anoafoan ua nicasharacahuun. Maton mai Judea muran. Maton pushu ichapayamafiano nannoashu niaifo uhuapacoin cainshquin. Uhuun yora Israelifoan aton cushumisi iishquiran,”

icashu cununi.

<sup>7</sup> Ascacun Herodes a fishifohuunoa tapicoianfo tsoa yoitama tsain ato fomaquin isca huani, —Fucahuun. Un matofu tsainon, —ishon ato yoimani. Ascano nocotoshiaifoan ato yocaquin, —¿Ahuutianmun man fishi oinquin tau huaquin? —ishon ato yocaiton. Tapimanifo ahuutianmain oinqui tau huafquin. <sup>8</sup> Ascashon aton yoini, —Belén ano focashon facu funatacahuun. Fuchicashon nasofuratan ua yoi fuushcaquin. Urifi un ahuun noicanon, —ishon Herodes ato yoini.

<sup>9-10</sup> Ascano niaifoan ato yona cuscan nicatan fishifohuunoa tapicoianfo fonifo. Focaquin oianfo fishi fari oaiquirinoashu oaiton oincani unimacoinnifo. Ascatac muufocaquin oianfo facu raca manaon nituni. <sup>11</sup> Ascaiton oincani pushu muran

iquifainshon facu yafi ahua María fuchinifo. Ascashon ratoconun mai chachishon facu yoinifo isca huaquin, —Minfin fasi sharashtacoinquin. Min nocon Ifo, —ishon yoinifo. Ascacatan aton mao fupucashon ahuara chicoin inancoinnifo. Oro inanfain ahuun inti shara inanfain inti sharacapa futsa ahuun anu mirra nanri inannifo. <sup>12</sup> Ascashu nanno oshayoafuan aton namapan Diosin ato yoiquin isca huani, —Afanan Herodes ari foyamacahuun. Fai futsan mato mai ari fotacahuun, —ishon Diosin ato yoini. Ascacuai Jerusalén ano fonifoma.

### *José futan María furun Belén anoshon Egipto ano ichoquinifo*

<sup>13</sup> Man fishihuunoa tapicoianfo atomaquinoashu foafono Diospan oinmatinin afu nai muran imisi José ahuun namapan yoiquin isca huani, —Funinaca huahuun. Nan facu yafi ahua Egipto ano iyoriscatahuun. Ascashu nanri iyohuu nan un mia afanan yoiaitian. Nan Herodes facu funaiqui rutushquin, —ishon Diospan oinmatinin José yoini. <sup>14</sup> Asca huaino moinacahuatan facu ahua futan yamu Egipto ano ichoquinifo. <sup>15</sup> Ascashu nanno iyopaonifo nan Herodes naitian. Ascacun Diosihuunshon inonpacocai yoimisiton cunushoni isca huaquin,

“Unfin uhuun facu Egipto anoa afanan yoimanicain,”  
ishon yoini cuscacoin man aaquin.

### *Herodes ahuun ranushumuaf yononi facumishtifo rutunonfo*

<sup>16</sup> Ascano fishihuunoa tapicoianfo fai futsan foafo nicai, —Ua paraforan, —icashu Herodes fasi sinacoinni. Nan fishifohuunoa tapicoianfoan yoiafo man fari rafu caano fishi oinquin tau huafo. Ascacun Herodes ranushumuaf yononi, —Belén anoafu yafi a chaima icafoan aton furonanfacufo fari rafu yafo non yomumishti rutuqui cuyotacahuun, —ishon ato yononi. <sup>17-18</sup> Ascano

“Ato nicafo Ramá anoashu uaicani aton facuhuunoashu uaiyanan shoraras-caifoan nicacaquin. Aton ointi main huamapaicaquin, ‘Uaiyamacahuun,’ ato huafainfonu aton facu manocani unupainifomaran,”

ishon Jeremías Diosihuunshon inonpacocai yoishomisiton cununi cuscacoin man aaqui.

<sup>19</sup> Ascashu man Herodes naano Diosin oinmatinin afu nai muran icaton José ahuun namapan yoiqui isca huani, <sup>20</sup> —Moinacahuahuu. Facu yafi ahua afanan Israelifo muran ato nasoquishquin. A facu rutupaimisifo man naafoquin, —huani. <sup>21</sup> Ascaino moinacahuatan José ahua yafi furun Israeli mai ano afanan ato iyoni. <sup>22</sup> Caaquin nica Herodes man naano ahuun facu Arquelao Judea muranhoa niaifo nicai José musuni. Ascaiton Diosin oinmati afu nai muran imisiton afanan ahuun namapan yoini, —Judea muran caquima futsanori catahuun, —huani. Ascano Judea muran catama Galilea anori fonifo. <sup>23</sup> Ascashu Nazaret pushurasi muran fonifo. Diosihuunshon inon pacocai yoimisiton nannori cunuquin isca huani,

“Cristofin Nazarenon ishquiquin,”

ishon cununi.

## 3

### *Nan ato unu muran iquimamisi Juan tsoa istaipama ano ipaoni*

*Mr 1.1-8; Lc 3.1-9, 15-17; Jn 1.19-28*

<sup>1</sup> Ascatan man fari ichapa finoanno nan Juan yorafo unu muran iquimamisi tsoa istaipama Judea ano cani. <sup>2</sup> Ascano nannoshon ato yoiquin isca huani, —Nantifi yorafoan ua nicacahuun. Maton chaca shatucoincashon Diosin tsain nicacoincahuun. Samamashta Diosin mato yonoshqui oquin, —ishon Juanpan oi ashcafchin ato yoini.

<sup>3</sup> Nan Isaías Diosihuunshon inon pacocai cuscan yoimisi ipaoni. Nanton Juanhuunoa yoini isca huaquin,

“Tsoan istaipamashon Diosin yonoa cuscan oi ashcafinin yoiquin isca huanonpacoin, ‘Nocon Ifo nocoqui ooshquin. Ascacun itisharacahuun. Maton chaca shatucoincahuun,’ ”  
ishon Isaías Juanhuunoa cununi.

<sup>4</sup> Ascano camello inapan ahuun rani sahuuti huashon Juanpan sahuua ini. Ascashon yoina fichein aqui nanushumuni. Ascatan ocutsuru pifain afuchi fona ayani. <sup>5</sup> Ascano Jerusalén anoaflo yafi unu Jordán ano icafo non Judea muran icafori ahuun tsain nicapaicani aqui funifo. <sup>6</sup> Ascashon aton chaca shatupaicaquin yoiaifoan Juanpan unu Jordán muran ato iquimapacuni afanan ipaoni cuscan huatama ismanonfo.

<sup>7</sup> Ascaíno Fariseofo yafi Saduceofo Juanqui funifo yorafo ato unu muran iquimanaiton oin fucani. Nanfori Israelifo ini. Ascaiton oinquin Juanpan ato yoini isca huaquin,—Manfin rono paupaton facu cuscaracoinfoquin. Icoinra huayamaifoan Diosin atoqui sinaquin ato omitsiscapanonfo. Ascan manfin omitsiscapanacaflo muran focasmafiaqui maton chaca man shatupaima. <sup>8</sup> Ascacun chaca shatucoincashon Diosin mato yoia cuscan nicacoincahuun. Man ipaoni cuscari afanan ayamacahuun. Man ascaiton yorafoan ointirofo man afanan chaca huapaitama Dios fusti man tanasharaiton.

<sup>9</sup> Ascashon maton nomuran shinanquin isca huayamacahuun, “Nonfin Abraham funafo non ahuun caforiquin. Diosin Abraham yoiyotiani cuscan nocorifi ashoto. Ascan Diosin noco onaintimashquimaran,” ishon anori shinanyamacahuun. Diosin onihuapaiquifin na unu cusumunnoa toquirifo Abraham ahuun funafo oni huatiroquin. <sup>10</sup> Fana fimi sharayamaiton ifoan ahuun tapo nantifi ruratinin shatuquin cuyoshon chi muran potatiro coi futsunon. Nanscarifiai natianri Diosin man itishara chaca shatutama man isharayamacaiyaiton mato omitsiscamapacushquin.

<sup>11</sup> Ascacun un mato unu muran iquimapacua maton chaca shatucoinshon natian Diosin tanasharashon man ismanon. Ascafia futsa matoqui chipo oi. Naantofin ua fasi finoncoianquin. Ahuamamishti huatiro. Nantorifi ahuun Yoshin Shara mato ya rafumapacunaca. Ascano ahuunshon maton nomuran man shinansharanon. Matofu rafuano nantifi ahuara chacafo ahuunshon shatuashu a cuscara shara man inon. Ascan uncai a cuscarama. Un ahuara shara huahuu rafanancai un ahuun oinmatima. Ascatama uhuun ramapaiyamainoricaí un ahuun oinmati icuanama. <sup>12</sup> Ascano naantorifi chipo a icoinra huaflo yafi a nicacasmaifo ato pashcanan huaashquin. Nan icoinra huafosi a icari ato ihuicoinsquin afu isharapacushanonfo. Ascan nan nicacasmamisifo chi urumanhuan muran ato potai anoashu omitsiscai unupacunacafomaran,—ishon Juanpan nan Fariseofo yafi Saduceofo yoini.

### *Jesús unu muran iquimani*

*Mr 1.9-11; Lc 3.21-22*

<sup>13</sup> Ascaíno Jesús Galilea anoashu unu Jordán ano cani. Nan Juanpan ato unu muran iquimana nanno cani naanrifi iquimanon. <sup>14</sup> Ascashu aqui nocoaiton Juanpan Jesús yoini,—Uacaiarocon mian acafin shara icuanaquin,—huaiton. <sup>15</sup> Jesús cumani,—Upa Diosin noco yonoa cuscan fusti nantifi non aca shara itiro. Ascan natian ua iquimahuu,—huaiton. —Ascan min ua yoiai cuscan un mia unu muran iquimairan,—ishon Juanpan yoini. <sup>16</sup> Asca huatan Jesús unu muran iquimana cainna cahuan mapuinifoanni. Ascatapaiyaino Dios ica ariashu nai fupuini. Nai fupuicaino Diospan Yoshin Shara ruhui cuscara Jesusqui fotopacu cahuani. <sup>17</sup> Ascano nanno niafoan nai muranno Upa Diosin ahuun oi nicanifo yoiquin isca huaiton,—Nan uhuun Facu un catoan. Un fasi ahuun noi. Un fasi aqui unimacoinran,—ishon Apa Diosin yoini.

## 4

*Yoshin chacanun Jesús chaca huamapaini  
Mr 1.12-13; Lc 4.1-13*

<sup>1</sup> Ascano Jesúis Diosin Yoshin Sharapan tsoa istaipama ano iyoni. Nannoshon nan yoshin chaca Satanás cuarenta oshatan chaca huamapaifafainni. <sup>2</sup> Nan cuarenta os-hatan piqui tununi. Ascashu fasi fonaincoinni. <sup>3</sup> Ascaíno nan yora chaca huamapaimisi aqui nocoshon yoini isca huaquin, —Min Diospan facumainquin na toquirifo misi onihuahuu, —ishon Satanás yoiaiton. <sup>4</sup> Jesúis cumani, —Noncái misi fustihuunoashu ipatiroma. Diosin tsain fusti non yopacoin. Nan noco yoia cuscan fustihuunoashu non isharatiroquin, —huaiton.

<sup>5</sup> Nicaquin Satanás Jesúis Jerusalén pushurasi shara Diosin ahuun yorafofu imisi ano iyoni. Nan Israelifoan aton Diosfu tsainti pushu pumancaya cuyacoin iyoshon yoiquin, <sup>6</sup> —Minmain Diospan facuquin nuriashu pacuaintahuun. Diosin tsain mihuunoa cununi isca huaquin,

“Diosifin ahuun oinmatifo afu nai muran icafo yonoquin min pacuaiton mia cushunonfo. Min tauri toquirifoquin rutunonma mia achinonfo,” nannorifi Diosin tsain mihuunoa cununiquin, —ishon Satanás yoiaiton. <sup>7</sup> Afanan Jesúis cumani, —Ascafia Diospan tsain cununiri isca huaquin, Ahuara musunicoin huaquin shinanyamacahuun uatsi Diosin cushuiquin ishon. Ascacunasca huayamahuu ishon cununiran, —Jesúis huani.

<sup>8</sup> Ascaiton afanan Satanás Jesúis machi cuyamamaquin iyoshon nan manifoti sharashtacoin oinmani. <sup>9</sup> Ascashon yoini, —Oinpon Mian ratoconun mai chachishon ua yoiquin, “Minfin uhuun Ifoquin,” mian huaitofin nan na maitio un mia inantiroquin, —ishon yoiaiton. <sup>10</sup> Afanan Jesúis cumaqui, —Diospan tsain cununiri “Nan nocon Ifo Diosin fustifin non ratoconun mai chachishotiroquin. Nan fustimain nocon Ifocun,” ishon cununi. Ascan umaquinoashu cariscatahuun Satanás, —ishon Jesúis yoini.

<sup>11</sup> Asca huaino Satanás Jesusmaquinoashu caino Diosin ahuun oinmatifo afu nai muran icafo aqui fotonifo pimashcaquin.

*Jesúis Galilea anoshon ato tapimaquin tau huani  
Mr 1.14-15; Lc 4.14-15*

<sup>12</sup> Ascashu nan Juan ranushumuafaoan cunu muran iquimanafó nicatan Jesúis Galilea ano nasoni. <sup>13</sup> Nan Nazaret anoashu pushconi. Nannoashu Capernaum ano cani atofu iyoicai. Nan Galilea ian cusumunri Capernaum ini. Nannori mani rafutan ato mai Zabulonfo yafi Neftalifo icafo. <sup>14-16</sup> Jesúis nanno inon pacuai cuscan nan Isaías inon pacuai yoimisiton ahuunoa cunuquin isca huani,

“Zabulonfo yafi Neftalifo Galilea ian ano icafo. Nanno aton mai. Unu Jordán ocuma futsa. Nannori Dios icoinra huamafo atofu icafo. Ascashu nanfo faquish muran ica shinantsafo. Ascafia samamashta oianfo shafariscatani cafiscashqui. Nanscarifiai numamisimaisi omitsiscapanacafo muran focuanafo. Ascacun Cristo atoqui nocorisca ato numashquiran,” icashu atohuunoa cununi.

<sup>17</sup> Nannoshon Jesúis ato yosiquin tau huaquin isca huani, —Nocon Ifo Diosin matoqui samamashta nocoyoi. Ascacun maton chaca shatucahuun. Chaca huatamarocon Diosin tsain nicacoincahuun, —ishon Jesúis ato yoini.

*Jesúis rafu non rafuri nushumisifo ato cunani afu fononfo  
Mr 1.16-20; Lc 5.1-11*

<sup>18</sup> Ascano ato yoitan Jesúis ianmanhuan cusumun cani. Caquin Simón chipocu Andrés futan nushutinin nushuaifoan ato ointoshini. Nan Simón ahuun anu futsa Pedro. Nan rafutafin nushumisicoin inifoquin. <sup>19</sup> Ascaiton ato yoiquin, —Ufu fucahuun. Manfin nushumisicoinquin. Man shiman ichaparasi nushutinin fia cuscan natian man uqui

yora ichapa ihuushqui un aton Ifo inon, —ishon Jesús ato yoini. <sup>20</sup> Ascaino nushuti huafaicani afu fonifo.

<sup>21</sup> Ascashu chaimashta catan Zebedeo facu rafuri fuchini. Nan rafuri nanu rafu Santiago yafi Juan. Nan rafutan apa futan shasho naquishon nushuti icushaifoan atori yoini, —Ufu fucahuun, —ato huaino. <sup>22</sup> Samamashta apa shasho naqui nichifainifocani afu fonifo.

### *Jesús yorahuanrasi ato yosini*

*Lc 6.17-19*

<sup>23</sup> Ascatan afu foafoanno nantishon Galilea ano cahuancacaiquin. Judiofoan ichananti pushu muranshon Jesús ato Apa Diosin tsain shara yoiquin isca huafaofafaini, —Itisharacahuun. Upa Diosin mato iquishquin oiran, —ishon ato yoifoafafaini. Ascashon pau futsa futsatapafoan icaifoan ato caya huamani. <sup>24</sup> Ascaiton Siria mai anoafaoanri ahuunoa nicakashon isinincaifo aqui ihuunifo ato cayahuamapacunon. Ascashon isipaunun icaiton caya huamafain yoshin chaca atomaquinoa potafain nisofori caya huamafain yoratisho charishi futsuari caya huamapaoni. Nantifi ato caya huamapacuni. <sup>25</sup> Ascaiton yorafoan mufainifo. Atirifi Galilea anoashu fuaino atirifi Decápolis anoashu fuaino atirifi Jerusalén anoashu fuaino atirifi Judea anoashu fuaino atirifiri unu Jordán quirinoashu fucatan Jesús mufainifo.

## 5

### *Jesús machi anoshon ato yosini*

*Lc 6.20-23*

<sup>1-2</sup> Yorahuanrasi aqui fuaifoan oin Jesús mapufaintan machi pochinin tsaoni. Nanno tsaoano ahuunshon tapiafo a shinain caiton noco yosiquin isca huani.

<sup>3</sup> —Tsoa futsan aton nomuran shinanquin isca huai, “Ufcai un isharatiroma. Un Dios yopacoinran,” icaiton

Diosin ato unimamashquin. Ascashu uhuun Upa Diosin niaifo ano afu ipatirofquin.

<sup>4</sup> Ascan tsoara futsa uaiquin omitsiscafashu chipo unimatiro.  
Diosin atohuun ramapaiquin aton ointi main huamatiro.

<sup>5</sup> Cacapaimisi itamarocon futsa ahua huamisima. Mato ahuun nomuran shinanquin isca huai, “Ufi apaiyai cuscan atama Diosin ua amapaiyai cuscan fusti un atiordan,” ishon shinanfafainaiton Diosin ato unimamatiro.

Nan cuscarafo Diosin yoiyotiani cuscan ato inanshquin. Diosin icano arifi afu inonfo. Ascashu nantifi ahuunari atonari iishquin.

<sup>6</sup> Ascan nan ratoranfo Diosifu ipaiquin ahuun tsain tapipaiquin finaifo a cuscara shara iishcaquin.

Nan cuscarafoan fuchipaiyaifo cuscan Dios ato imatiro a cuscara shara inonfo.

<sup>7</sup> Ascan nan futsafihuun ramapaiquin ato shara huaiton Diosin man tapia.  
Ascacun nanrifi ahuun ramapaiqui a shara huashopacunaca arifi unimanon.

<sup>8</sup> Ascan nan Dios fusti tanasharashu ahuun nomuran shinansharamisi.  
Nan cuscarafoan chipo Dios ointirofo. Ascaiton Diosin ato ointi unimamashquin.

<sup>9</sup> Ascan tsoan nan noicasmatanainfoan ato raunan huaino afanan rau huantananofo.  
Nan cuscarafo Diosin yoiquin, isca huaqui, “Min uhuun facuran,” ishon ato yoiaino fasi unimacoinshcani.

<sup>10</sup> Tsoa Diosin yonoa cuscan aiton futsafoan omitsisca huafiainfoan tunua.  
Nan cuscarafo Diosin ato unimamashquin. Ascashon nan Diosin niaifo icariafo nanfori atona iishquin.

<sup>11-12</sup> Ascan futsafoan uhuunshon mato roaquin omitsiscamafain matohuunoa chani futsa futsatapafo yoifiaifoanno shinanchacayamacahuun. Mato omitsisca huaifo cuscan mato shunifori nan Diosin tsain yoimisifo omitsisca huapaonifo. Ascan man uhuunoashu omitsiscifiashu Upa Diosiqui man nocoaitian fasi sharacoin mato imashquin man afu ipashanon. Ascacun unimacahuun.

*Jesús icoinra huafao sao yafi shafa cuscara  
Mr 9.50; Lc 14.34-35*

<sup>13</sup> Ascan manfin nan nuno mai anoa sao cuscaraquin. Nami saomua shara payocotiroma. Nanscarifiai yora chacafo muran ishon marifi man ato shinamasharatiro chaca huanonfoma. Ascan nami saomuamaci shara itiroma. Paismacoin itiro. Ascafia afanan nami shara iyamainoricai saori shara itiroma. Afananci ahuashta itiroma. Nanscara non potatiro puamanonfo. Nanscarifiai afanan man ua tanasharayamainocai matohuunshon tsoan ato chaca shatutiroma isharashquin. Man ua tanasharaya-mashu man funocointiro.

<sup>14</sup> Ascafia manfin nan manifoti ato chasha cuscaraquin. Machi cuya mamaquinoa pushurasi fasi chaicushon shafacafi ointirofo. Onuciai atiroma. Nanscarifi aquin man ua tanasharaino mato oinquín matohuunshon ua icoinra huatirofo shafacafi iishcaquin. <sup>15</sup> Nanscarifi aquin tsoancai faquishiano oinpaifiaquin lamparina tapa camaqui otashon cutipan fupomisima. Ascatamarocon otashon tapa camaqui huatiro shafacafi tsaocun pushu muran iquicaquin oinsharanonfo. <sup>16</sup> Ascacun nantifi yoraflo shara huacoincahuun. Man ato shara huai cuscan oinquín shinantirofo isca huaquin, “Diospan yoraflo fasi noco shara huafafaincani. Apa Diosin ato yosisharamisi. Asca aton Upa Dios fasi sharacoinran,” ishon shinantirofo. Anori shinancaquin maton Upa Dios nai muran ica yoitirofo isca huaquin, “¡Aicho! Upa Diosin tsoa futsacai mia cuscara sharama. Min nantifi finoncoianran,” ishon yoishquicani. Afan yoitiro isca huaquin, “Dioshuunshon noco shara huashomisifo. Ascan aton Dios sharacoinran,” ishon yoishquicani.

<sup>17</sup> Isca huaquin man shinan raca, “Moisés Diosin yononi cuscan cunushoni yafi Diosin tsain yoimisi futsafoan cununi cuscan potapaimarooni man cununifo cuscan un huamashquin un oa. <sup>18</sup> Un mato shafacafi yoi. Diospan tsain cunushoni cuscan nannorifi Diosin yonoi. Ato yonoquin cunushopaoni cuscan nan fustishtacai funopacunacama. Nai yafi maitio cuyoyamainon nanscasi apanaca ahuun tsainri inonpacooai cununshoni cuscan nantifi fustishtacai cuyopacunacama aqui tau huani cuscan.

<sup>19</sup> Ascan tsoa Diosin yononi cuscan fustishta potashu non futsafoi potamashu Dios icano aacai ahuama itiro. Ascafiaquin tsoan Diosin tsain nicasharafafainquin futsafoi Diosin tsain shafacafi yosicun nan Upa Diosin icano niaifo patashari itirofoquin. <sup>20</sup> Ascano nan Fariseofo non Judiofo aton niaifofo futsafoanri, “Nonfin fasi shara imisiran,” ifianmisishacaquin Diosin yononi cuscan tanacoianfoma. Diosin yononi cuscan huacoinmisifoma. Manca ato finoanshuma Diosin yononi cuscan man huashuma Upa Diosin icano man nocopacunacama.

*—Sinayamacahuun, —ishon Jesús ato yosini  
Lc 12.57-59*

<sup>21</sup> Moisés nocon shunifo yononi cuscan man nicamisi isca huaquin, “Tsoa rutuya-macahuun. Man futsa rutucun niaifofo ano mato iyotiro matori copiquiri namatirofo,” ishon Moisés nocon shunifo yononi. <sup>22</sup> Cayacafi anori yonofianicun un mato tsain futsa cayacafiri yoinon. Oinfain. Tsoa futsaqui sinaiton a niaifo ari iyotiro a onaintimanon. Ascan tsoan futsaqui tsain chaca huaiton isca huaquin, “Mincaí ahuama. Min ahua

tapiamaran,” ishon yoiaiton niaifofo ari iyotiro a onaintimanonfo. Ascafia tsoan futsa chaca huai isca huaquin, “Minfin mapo chacaquin. Min nisoncoinran,” huaiton Diosin a omitsiscapanacafo muran nan chi muran potatiro anoashu capashononma.

<sup>23-24</sup> Ascacufin man Dios cufiaitian nantianri man shinanquin isca huaquin, “¡Ohua! Un futsa chaca huaran,” ishon shinancun. Afanan Dios cufitamarocon iquisi nan futsa min chaca huaa ano catahuun. Aqui nocoshon yoisharahuu mia rauhuanon. Asca huano afanan min nasotiro Upa Dios cufishquin.

<sup>25</sup> Man futsa nifishon matoqui nocaiton isca huaquin, “Min ua nifian cuscacai mian inanma. Natian un mia niaifo ano iyoiran,” ishon mia yoicun. Afu caquin niaifo ano noocoataima rufofo aroshararisca huahuun. Asca huaiyamaiton mato niaifo ano iyotiro. Nocoshon niaifoan ranushumua yoitiro, “Na nocofunun futsa nifian cuscan inanma. Ascan cunu muran iquimatahuun,” huatiro. <sup>26</sup> Un mato icon yoicoin. Mato iquimanano man cainritiroma nifian cuscan atifi inanshuma. Nanscarifi aqui man Dios chaca huamisiquin. Oataima arorisca huahuu mato omitsiscahuapanonma.

### *—Maton ahuinma oincaquin chotapaiyamacahuun, —Jesús ato huani*

<sup>27</sup> Moisés nocon shunifo yononi cuscan man nicamisi isca huaquin, “Maton ahuinma chotayamacahuun. Ainfofoan maton funuma chotamayamacahuun,” ishon yononi.

<sup>28</sup> Aafin iconquin. Ascarifi un mato yoirifi huai. Tsoa ainfo ahuun ahuinma oinquin ahuun nomuran shinain, “Un nan ainfo chotapainonran,” ishon nannori shinanquin a chotacoin shinantsai. <sup>29</sup> Ascan man oinquin man chaca huapaiquin maton furon ocuma futsa shara tsucashon potahuu afanan chacanonma. Man mumafiacun omitsiscapanacafo muran mia potacun nancai sharamafinquin. Ascaquimarocon man mumamaflashu Dios icari nocoshon nanno afu ipashanon nan sharacoin. <sup>30</sup> Nanscarifiai min mumiorishon min mucuman min ahuara min chaca huaiton, min mushtua shara icuana. Man mumaflashu omitsiscapanacafo muran mia potacun nancai sharamafinquin. Ascaquimarocon man mumamaflashu Dios icari nocoshon nanno afu ipashanon nan sharacoin.

### *Nocofunu yafi ainfo ununantirofihuunoa Jesús ato yosini*

*Mt 19.9; Mr 10.11-12; Lc 16.18*

<sup>31</sup> Nocon shuni Moisés nocon shunifo yonoqui isca huani, “Tsoan ahuun ahuin unushquin iquisi cunushotiro isca huaquin, ‘Un afanan mia fipaima. Un natian mia unuiran,’ ishon cunushotiro.” <sup>32</sup> Nannori Moisés yonofianicun un mato tsain futsa yoinon. Ratoran futsan ahuun ahuin nocofunu futsa fu iyamafiaiton unuquin chaca huaino. Nan ainfoan nocofunu futsa fu fiananquin fasi chaca huai. Asca huaquin nan funu fu iqui shinantsai. Funumain afi unucun. Ascafia nan funun ahuin unua nan ainfo nocofunun fiquin aarifi chaca huai. Asca huaquin nan ahuun ahuinma fu iqui shinantsa huai.

### *—Man yoitiani cuscan acahuun, —ishon Jesús ato yoini*

<sup>33</sup> Nocon shuni Moisés afanan tsain futsa nocon shunifo yoini. Nanri man nicamisi isca huaquin, “Man Diosin yoitiani cuscan acahuun. Man Diosin yoitiani cuscan ayamashu nancai sharamafinquin,” ishon Moisés nocon shunifo yoini. <sup>34</sup> Mato anori yoini. Un afanan mato yosinon nicacahuun. Yora futsafona yopaquin ato yoiquin, “Un mia yoia cuscan un acunma Upa Diosin ua onaintimatiroran,” ishon afanan anori yoiyamacahuun. “Un mia yoia cuscan un acunma nantifi nai muranshon ua nicatiro Upa Diosin ua onaintimatiroran,” ishon afanan anori yoiyamacahuun. Diosin nai muran ica. Ascan anori yoiyamacahuun.

<sup>35</sup> “Un mia yoia cuscan un acunma nuno mai anoa ua onaintimatiroran,” ishon afanan anori yoiyamacahuun. Nantishon mai Upa Diosinna. Ascan anori yoiyamafain, “Un mia acunma nocon pushurasi Jerusalén ano ua copitiroran,” ishon afanan anori

yoiyamacahuun. Nan pushurasi Jerusalén nocon niaifocoin Diosina. <sup>36</sup> “Uhuun mapon un shinain cuscan un mia acunma ua onaintimatiroran,” ishon yoiyamacahuun. Maton shinanhunshon maton fo fiso iyamarai osho imatiroma. <sup>37</sup> Ascan maton yora ahuara yoipai ato yoihuu isca huaquin, “Un mia yoia cuscan iconcoin,” iyamarai “Nan iconmaran,” ishon ato yoicahuun. “Un mia acunma ahuara ua onaintimatiroran,” ishon anori yoiyamacahuun. Na yoshin chaca Satanasfin chanimisicoinquín. Ahunshon yora anori yoitiro.

*Tsoamain futsa copitiro Jesús ato tapimani*

*Lc 6.29-30*

<sup>38</sup> Ascan nocon shuni Moisés afanan tsain futsa nocon shunifo yononi cuscari man man nicamisi yoiquin isca huanicun, “Futsa mia asca huaiton niaifo ano min iyotiro mia copishonon. Min furo ocuma futsa mia tsucacun copiquiri niaifoan ahun furo tsucamatiro. Ascan mia sutuquin min shuta fusti tucucun niaifoan copiquiri ahun shuta fusti tucuntiroran,” ishon Moisés yononi. <sup>39</sup> Nocon shunifo nannori yonofianicun un mato tsain futsa yoiaiton ua nicacahuun. Tsoan mato chaca huafia ato copiyamacahuun. Mato tapasaiton ato copitamarocon nanno nishohuun mia ocuma futsari afiaiton tunuhuu.

<sup>40</sup> Futsan mia niaifo ano iyocun min camisa mia fiainton min sahuuti cushtopari inanhun. <sup>41</sup> Ascano ranushumuaton iyamarai futsan mato yonoquin isca huai, “Uhuun forusa kilometro fusti ua foshoicahuun,” ishon mato yonoaiton shinantaquima kilometro rafu foshoihuun. <sup>42</sup> Tsoanran mato ahuara yocaiton ayashon ato inancahuun. Futsan mato yoiquin isca huai, “Ua inanyopun,” mato huaiton inanriscayocahuun. Fishcotama.

*—Mato noicasmphiaifoan atohuun noicahuun, —ishon Jesús ato yoini*

*Lc 6.27-28, 32-36*

<sup>43</sup> “Ascashon naan maton yorafihuun noicoincahuun. Ascan a mato noicasmphiafori copiquirifi ato noicasmacahuun,” ishon nocon shunifoan yoinifo cuscan man man nicamisi. <sup>44</sup> Nannori yoifianifo un mato yoiquin isca huai, Naan mato noicasmphiaifoan atohuun noicoincahuun. Tsoan mato omitsisca huairi Dios cufishocahuun. <sup>45</sup> Diosin fari onihuani yora sharafo yafi chacafori chashashonon. Nanscarifi huaquin Diosin oirifi onihuani nan yora sharafo yafi chacafori ato onihuashoni. Diosifin nan tanaifo yafi a chaca huaiforifi ato shara huamisi. Ascacun marifi nanscarifi huacahuun a mato shara huaifo yafi mato chaca huaiforí shara huacahuun. Asca huaifin marifi man Diospan facucoinfoshon futsafori man ato ismatiro.

<sup>46</sup> A matohuun noiaifosi copiquirifi man atohuun noiainocai aacai ahuama. Yora chacaforifi ascarifiaifoanno. Man ascainocai Dios mato yoima man shara huaran ishon. <sup>47</sup> Maton yorafu fustisi man tsain shara yoiaino aacai ahuama. Yora Dios icoinra huaamafori nanscarifiaifoanno. Man ascainocai Diosin mato yoima “Man shara huaran,” ishon. <sup>48</sup> Ascano maton Upa Diosin nai muranshon nantifi yorafu noia cuscan marifi nansca huacahuun. Upa Diosin shinansharamisi cuscan marifi shinansharacahuun.

## 6

*—Ahuuomafo atohuun ramapaiquin inanhun, —Jesús ato huani*

<sup>1</sup> Oinfain. Man futsafo shara huaino maton nomuran man shinain isca huaquin, “¡Aicho! Un ato shara huacun futsafo ua oincani uqui shinansharonforan,” ishon anori man shinancái Upa Diosin matoqui unimaima. Mato ahua inainma. <sup>2-4</sup> Nan paramisifo cuscara iyamacahuun. Nanfoan atohuunoa yorafu shinansharamacani isca huaquin, “Nan yora fasi sharacoin. Futsafo shara huashoanran,” ishon nannori futsafo atohuunoa shinanmapai. Nantifi ato ointaifi yora shara huapai ato oinonfo. Ascará

chaca. Upa Diosin atoqui unimaima. Futsafoan ato, “Min shararan,” huatirofiaino Upa Diosincai atohuunoa tsain shara yoishquima. Atoqui unimaima. Ascan marifi ato cuscara iyamacahuun. Futsafo ato ointaifi ahuuoma inanpaicahuun mato oinonfo. Ascaquimarocon tsoa futsa oinyamaino man ahuuoma inanquin Upa Diosin oin matoqui unimai mato ashosharatiro.

*Jesús afu rafuafo yosini ahuuscashomain Upa Dios cufitirofoquin*

*Lc 11.2-4*

<sup>5</sup> Man Upa Dios cufiaitian nan paramisifoan cufimisifo cuscan huayamacahuun. Nanfoanfin nishon yora ichananfo anoshon yafi ichananti pushu muranshonri ato ointaifi Upa Dios cufipaicani ato nicanonfo. Upa Dios shinancointamarocon nannoafio atohuunoa shinansharamapaicani. Ascaifoan oinquin futsafoan atohuunoa shinansharatirofia Diosincai atohuunoa shinansharatiroma. Ascashocai ato ahuashta inansharashquima.

<sup>6</sup> Ascacun marifi ato cuscara iyamacahuun. Man Dios cufiaitian tsoa yamaino Upa cuficahuun. Ascafiacon Upa fustiton mato ointiro. Ascashu matoqui unimacoinquin man yopai cuscan mato inansharashquin. <sup>7</sup> Man cufiaitianri nan tsain fustisi yoiriamacahuun. Nan icoinra huamafoan cashmancoin cufimisifo cuscan. Ascashon yoimisifo. “Un nan tsain nannorisi yoiriaiton ua Upa Diosin nicatiroran,” ishon shinamisifo. Asca huafiainfoanci Diosin ascaran tsain nicapaima. <sup>8</sup> Ascacun marifi ato cuscara iyamacahuun. Man Upa Dios yocataima man yopai cuscan man tapiaquin.

<sup>9</sup> Ascashon cufinquin isca huacahuun,  
“Nocon Upa nai murannoaton min fasi sharacoin.

Nantififain mihuunoa yoisharapainon.

<sup>10</sup> Min apaiyai cuscan min ica

nai muranshon samamashta arisca huamisifo.

Nanscarifi nuno manifoti anaoafoan huanonfo cuscan  
nanscacoainrifi nuno mai ano anonfo.

Manifotiton aton niaifo iishquin mia ifoannonfo.

<sup>11</sup> Shafatifi nocon tushu non yopai cuscan noco inanhun.

<sup>12</sup> Nan noco chaca huaifoan

non ato rauhua cuscan huafain

nocon chacafori noco rauhuashohuun, Upa.

<sup>13</sup> Satanás yoshin chacapan noco chaca huamapaifaiton

nocoqui cumatima huahuu.

Nansca huaquin,”

ishon cuficahuun ato huani.

<sup>14</sup> Ascacun futsafoan mato chaca huafiacun ato rauhuacahuun. Ascacufin maton Upa Diosin nai muranshon man aquí chaca huaa cuscari rau huatiroquin. <sup>15</sup> Ascafia futsafoan mato chaca huaa cuscan man ato rau huayamaiton manrifi chaca huacun Uparicai mato rauhuashoima.

*Piqui tunumisifohuunoa Jesús ato yosini*

<sup>16</sup> Ascano tsain futsari un mato yoi man tapinon. Man piqui tunuaitian nan paramisifoan amisifo cuscan huayamacahuun. Nanfoan aton fuso chocayamafain puusimisifoma piqui tunucani. Dioshuunoa shinantama atohuunoarocon yorafo shinansharamapaicani. Yorafoan atohuunoa shinanqui isca huanonfo, “¡Oincapon! Naton fuso Dios shinanquin piqui tunui puusiquimaran,” ishon. Ascashon atohuunoa shinansharafoanno unimacani. Ascafiafoanno Dioscái atoqui unimaqui ato ahuara inainma. Ascacun marifi ato cuscara iyamacahuun. <sup>17-18</sup> Ascatamarocon man piqui tunuaitian fuchoquimucain foshti isharashon Dios shinancahuun. Man ascaitocai futsafoan mato oinfiaquin tsoan tapitiroma man piqui tunufaiton. Ascafia Diosin fustichifin tapitiroquin. Ascashon nan icari man nocaitian mato ahuara sharashta inanshquin.

*—Upa Dios icanoa ahuara sharacoinfo mato mucushotiroran, —ishon Jesús ato yosini  
Lc 12.33-34*

<sup>19</sup> Ascan nuno mai ano niyoshon mafo ichapa mucuyamacahuun. Nanfo chacanai futsuaino man funotiro. Yomutsoiri maton pushu muran iquishon nantifi maton mafo onuntiro. Ascaino marifi man funocoin. <sup>20</sup> Ascatamarocon Dios fu rafufafaincahuun mato amapaiyai cuscan ashquin. Manasca huaiton Dios nan icanoshon mato ahuara sharacoinfo mucushoni. Nanfocai chacanapacunacama. Tsitsa iquiyamacai yomut-  
soricai iquitrioma maton onunshquin. <sup>21</sup> Ascan man mafo fusti shinanfafainquifin nan fusti man noicain. Ascan man Diosihuunoa fustisi shinanfafainquin nanrifi man yonoshosharatiro ahuun noicoinquin. Ascashu man afu isharapacusharatiro.

*Nocon furo nan lamparina cuscara huunoa Jesús ato yosini*

*Lc 11.34-36*

<sup>22</sup> Afanan tsain futsa un mato yoi man tapinon. Nocon furo rafu nocon cayan lamparina cuscara. Nan rafu shara non oinsharatiro. Ascashon nocon caya cushusharatiro non ahuuscanonma. Nanscarifiai mato nomuranshon man shinansharai man ishara-  
cointiro. <sup>23</sup> Ascafia nocon furo chacanocai non oinsharatiro. Faquishcoin itiro. Nanscarifiai nocon nomuranshon non shinanchacaicain non isharatiro. Ascacun oinfain. Man Dios shinain isharafiahu chipo Upa Diosin ahuun tsain man cachiquiri huashucui afanan man isharacointiro. Ascashu nan faquish muran ica shinantsain man funocointiro.

*Dios yafi pui*

*Lc 16.13*

<sup>24</sup> Ascan oinmatinincai ahuun ifo nanno rafu nantian yonoshotiro. Futsa noifain futsa noicasmatiro iyamarai futsa nan yoia cuscacoin huashotiro. Ascashon futsa, “Nacai ahuamaran,” ishon shinantiro. Tapicai huatiroma ratocaimain nicasharaiquin. Nanscarifiai Dios yonoshopaiquicai man pui noitiroma maton ifo inon.

*—Upa Diosin ahuun facufo cushushararan, —ishon Jesús ato yoini*

*Lc 12.22-31*

<sup>25</sup> Afanan un mato yoisharanon. Isca huaqui shinanyamacahuun, “Non ahua pitama nonricai ahua ayaimaran,” ishon shinanchacayamacahuun. Ahuaricai non sahu-  
umaran iyamacahuun. Non ahuara pifain non sahuuatocai noco imasharatiro. <sup>26</sup> Shinancapon. Nan puiyafioancai ahua fanayamafain ahua chintumisifoma ahuaricai fotsuyamafain ahuamafofiacun Diosin ato pimamisi. Nanscarifi aquin Diosin mato-  
huun noiquin nan puiyafio aca finonmafain mato cushushara. <sup>27</sup> Ascacun shinancha-  
cayamacahuun. Non shinanchacatocai shafa fusti noco nimayotiroma.

<sup>28</sup> Ascashon shinanquiri isca huayamacahuun, “¡Ohushta! Raniamun un sahuuti fii  
nan sahuushqui,” ishon shinanyamacahuun. ¡Shinancapon! Charofocai yonoyamafain sahuuti icushumisifoma. <sup>29</sup> Ascatama sharamishticoin foaicafo. Nocon shuni niaifo Salomón sahuuti sharashtacoin sahuufiapaonicai nan charo sharashtacoinfo cuscarama. <sup>30</sup> Diosin charo sharashtacoinfo onihua. Foai sharafia supashon samamashta tsasicun coatirofo. Nanfo finonmafain mato noiquin mato camisa sahummashquin. Ascafia mancái icoíra huasharacinnama.

<sup>31</sup> Ascacun shinanquin isca huayamacahuun, “¡Ohushta! Unmun ahua piquin uhuun tushuyamaino. ¿Unmun ahua ayaicai? Unricai ahua sahuuimaran,” ishon shinancha-  
cayamacahuun. <sup>32</sup> Ascan nannori nan icoíra huamafoan shinanchacamisifo. Ahuara pifain sahuupaiyafio fustisi shinamisifo. Ascan maton Upa Diosifin tapiaquin man yopai cuscan. Ascacun mato inanshquin. <sup>33</sup> Ascacun Diosicairocon shinancahuun. Mato yonomapaiyai cuscan nan fusti shinanfafainaahuun. A cuscara shara ipaicahuun. Nancai shinanquin tau huafafaincahuun. Man ascaiton ahuara futsa man yopai cuscan Upa Diosin mato inanshquin. <sup>34</sup> Ascacun shinanchacaqui isca huayamacahuun. “¡Ohushta! Uncaí tapiama funamanri ahuara chaca finoainno raca un tunuima,”

ishon anori shinantama shinanquirocon isca huafafaincahuun, “Upa Diosin shafatifi ua cushusharamisi cuscan funamanriri ua cushusharairan,” ishon shinanfafaicahuun.

## 7

### *Futsafihuunoa shinanchacayamacahuun*

*Lc 6.37-38, 41-42*

<sup>1-2</sup> Futsafihuun shinanchacaqui yoiquin isca huayamacahuun. “Nanton chaca huai cuscan onaintimapainonran,” ishon futsafihuunoa yoiyamacahuun. Man ascara yoiaiton Diosin mato onaintimai. <sup>3</sup> ¿Ascacun ahuuscai yora ahuara pasnanshta fuostamua man futsupaiyain marifi sapa uhuapa fuostamufashocai man muima? Nanscarifiai min chaca huairan futsa huafiaquin mancaifin fasi finacaiaquin. <sup>4-5</sup> Ascashon man yoiqui isca huai, “Uhuun yorashtan, un min furo murannoahuara pasnanshta un mia futsunon,” man huamisi. Ascafashocai man tapiama man sapa fuostamufafainna. Man fuparamitsapaimisi. Ascacun sapa futsucumucahuun. Asca huashon oinsharafain marifi man futsa pasnanshta futsutiro. Nanscarifi aqui futsafoan ato chaca man shatumapaifiaquin marifi man chaca huaa. Man fasi paran. Ascacun iquisi maton chaca shatucahuun. Ascashon marifi man futsafo chaca shatumatiro.

<sup>6</sup> Tsain futsari un mato yoi man tapinon. Pashna pofu iyamarai yahua pofu non tushu inansharatiroma. Non mucuman tushu inansharapaifaiton nan pitama nocorocon mocotiro. Nanscarifi aquin ratoranfoan man ato tsain shara Dioshuunoa yoipaifaiton nicacasmacaquin mato chaca huatirofo. Ascacun ascarafo ato yoiyamacahuun. Man yoisharapaifaiton Diosin tsain potatirofoquin.

### *Dios yocafain funafain cunahuu*

*Lc 11.9-13*

<sup>7</sup> Afanan ahuara futsa un mato yoiai cuscan nicacahuun. Ahuara yopaquin Upa Dios yocacahuun mato ashonon. Man yocain cuscan funaquima manasharacahuun nan Diosin mato ashoaitian. Ascacun Upa Diosin cufifafaincahuun man cufiai cuscan mato inanon. <sup>8</sup> Tsoan Upa Dios yocariai fishquin. Ascan tsoan ahuara shara fasi fuchipaiyai cuscan Diosin ato fuchimatiro. Ascan tsoan Upa Dios cufiriaiton ashoshquin. <sup>9</sup> ¿Ascan maton facun mato yoa yocaiton man toquiri inantiromun? Ma. Mancaí maton facu asca huatiroma. <sup>10</sup> ¿Maton facuri mato shiman yocaiton man rono inantiromun? Ma. Mancaí maton facu asca huatiroma. <sup>11</sup> Ascacun tapicahuun. Man chaca huamisifiashon maton facufo man inansharamisi. Man ascaiton maton Upa Diosin nai murannoaton man yocai cuscan finacaia mato inansharashquin. <sup>12</sup> Man futsafo matohuunoa shara huemapaiyai cuscan nanscarifi huaqui futsafoi shara huashofafaincahuun. Moisés cununi cuscan yafi Diosin tsain yoimisifoanri nannori cununifo man shara huashofafainon.

### *Caincaiti atsoshta*

*Lc 13.24*

<sup>13</sup> Ascashon tsain futsari un mato yoinon. Nannofin fai rafuquin. Nan fai tohuaica uhuapton yorahuanrasi ahuunsi fomisifo. Ascafia nan mau fai tanashu ahuun unutaqui omitsiscapanacafo muran iquishcani. Ascacun mau fai uhuapton catama fai atsoshta tanacahuun. <sup>14</sup> Nan fai tohuaica uhuapama atsoshtacoin. Ascan nanfin fustirasiton fuchitirofo. Nan atsoshta tanafainashu omitsiscatirofofia ahuun unutaqui Dios ari nocoshcani nipasharashcaquin.

### *Ihui ahuun fimihuunshon non onantiro*

*Lc 6.43-44*

<sup>15</sup> Oinfain. Paramisifo matoqui fucashon mato yoiqui isca huacani, “Nonfin Diosin tsain yoimisifoquin,” ishon yoifiacani afocanai Diosin tsain yoimisifoma. Ascan nanfin nan chashoan cuscarafofiashu ato nomuran nan masharo pofu cuscarafoquin.

Ascacun ato nicayamacahuun. <sup>16</sup> Un mato tapimaquin isca huai. Fanafoti ahuun fimifohunshon non onantiro ahuu cuscarafo mainquin. Ihui moshayafohuuncu uva foaicun non tuscutiroma. Nanhuafaquisihuunricai shopa foaicun non tuscutiroma. <sup>17</sup> Ascafia ihui sharano ahuun fimiri shara itiro. Ihui chacano ahuun fimiri chaca itiro. <sup>18</sup> Nanscarifiai ihui sharacai ahuun fimi chaca itiroma. Ihui chakanocai ahuun fimi shara itiroma. <sup>19</sup> Ascacun ihuin ahuun fimi sharamacun ifoan rurashon̄ coatirofo. <sup>20</sup> Ascacun fimi chaca iyamarai sharacun onantirofo ahuu cuscaramain ihuiquin. Nanscarifiai nan tapimamisifoan amisifo cuscan man onantiro yora sharafo iyamaraimain chacafoquin.

*Atificai Upa Dios icano iquitirofoma*

*Lc 13.25-27*

<sup>21</sup> Ascano atirifiton ua Ifo huafiahucu ahuun Upa Diosin ato amapaiyai cuscan amisifoma. Nan cuscarafo Upa icari nocotirofoma. Nan uhuun Upa nai ari icaton afi ato amapaiyai cuscan huamisifo nanfo fusti uhuun Upa ari nocotirofo afu nipashcaquin. <sup>22</sup> Ascacun Upa Diosin nantifi icoingra huamafo onaintimaitian nantianri yora ichapaton ua yoiqui isca huashcani, “Ifoshta, shinanhun. Non min anuhunshon non yorafo mihiunoa tapimamisi. Min anuhunshonri yoshin chacafo non futsafomaquinoa potamisi. Min anuhunshonri tsoan atiroma cuscan non huapaoni. ¿Iconmamun, Ifon?” ishon yoishquicani. <sup>23</sup> Ascaifoan un ato cayacafi cumaqui isca huashquin, “Mancai uhuun yorafo imisima. Manfin paramisifoquin. Chaca fustisi man huamisi. Ascacun umaquinoashu fotacahuun,” un ato huashquin.

*Futsan pushu mutsisipa huaino futsan pushu mutsisipama huatiro*

*Mr 1.22; Lc 6.47-49*

<sup>24</sup> Ascacun un mato tapimai un mato yoimisi cuscacoin aashucu man funopacu-nacama. Nanscarafu nan pushu mutsisipa huamua cuscarafo. Pushu huaquin ahuun quishi mai tuiqui nocoa. <sup>25</sup> Ascano fasi oi ichapa fucain faitahuan pushu naman foannaino fuhuanri nocofiaquicai pushu mutsisipa paon huaquia. Nanscarifiai nan uhuun tsain nicacoianfo nan un yoia cuscan acani. Ascashu ahuara ahusscarafainocai umaqui itirofoma. <sup>26-27</sup> Ascafia pushu futsa mai puuuqui fuquenishta huaa ahuun quishi mai tuiqui nocoama. Ascano fasi oi ichapa fucain faitahuan pushu naman foannaino fuuhuanquiri pushu mutsisipama paon huaqui chacana huatiro. Nanscarifi aqui tsoan uhuun tsain nicafiaquin un ato tapimana cuscacoin aimai. Aatocai shinansharama. Ascashu ahuun unutaqui arifi nantifi funoshqui omitsiscairan,—ishon Jesús ato yoini.

<sup>28-29</sup> Jesús tsainqui anaitiano yorahuanrasi anoshon nicacanashu yoinannifo,—¡Aira! ¡Nicacpon! Ahuun tsain sharacoin. ¿Ahuuscashon anori noco yositiromun? Ahuun tsain shara iquina. Nocon tapimamisifoan Moisés cununi cuscan noco yosimisi cuscan aacai anori noco yositamarocon niaifo tapia cuscan noco yosiaran,—ishon yoinannifo.

## 8

*Jesús nocofunu yoratisho rashquishi futsua caya huani*

*Mr 1.40-45; Lc 5.12-16*

<sup>1</sup> Ascatain Jesús ato yoiquin anaititan machi tunanmanri tusuriqui cainaiton yorafoan mufainifo. <sup>2</sup> Jesús caino nocofunun ahuun yoratishon ranimamishti rashquishi futsua Jesusqui nocoshon ratoconun mai chachipacufoan yoini isca huaquin,—Ifon, ua caya huapaiquifin mian cayahuatiroquin,—huaiton. <sup>3</sup> Jesús aqui mupishon yoini,—Icon un mia caya huai. Ascan natianfin min cayaquin,—huaino a rashquishi futsua cayariscatani. <sup>4</sup> Cayacun Jesús yoini isca huaquin,—Un mia caya huaa cuscan tsoa yoiyamahuu. Nocon caifohunshon Dios cufimisi ismatahuun. Ascashon Moisés noco yononi cuscan chashoanun facu a inantahuun mia rutushonon. Min chaca soafain min

caya cuscan ato ismashquin. Ascano tapitirofo Moisés noco yononi cuscacoin min aiton, —ishon Jesús yoini.

*Romano ranushumua niaifoan ahuun oinmati Jesús caya huani*

*Lc 7.1-10*

<sup>5</sup> Asca huafaini Capernaum ano cani. Ascaino nanno ranushumua niaifo noconi ahuunshon ahuun oinmati caya huamapai. <sup>6</sup> Aqui nocoshon yoiqui isca huani, —Ifon, uhuun oinmati isininqui. Uhuun pushu ano furoiquima raca. Fasi omitsiscairan, —huaiton. <sup>7</sup> Jesús cumani, —Un canonqui cayahuashquin, —ishon yoiaiton. <sup>8</sup> —Ifon, uncai ahuama. Min nocofunu tsoa cuscaramacoin. Uhuun pushu muran capaiyamaquin. Min tsainmansi uhuun oinmati ua cayahuashohuun. <sup>9</sup> Ascan uarifi uhuun niaifoan ua yonomisi. Ascacun urifi ranushumuafu un yonotiro. Ascan un futsa, “Catahuun,” huaino cariscatiro. Un futsa, “Ohuu,” huaino uqui oriscatiro. Uhuun oinmatiri, “Ua ashohuun,” un huaiton ua ashoriscatiro. Ascan minfin ahuamamishti huatiroquin. Ascacun min tsainmansi yoihoo uhuun oinmati cayanon, —ishon yoini.

<sup>10</sup> Ascaiton nicai Jesús afu foaifo yoini, —¡Aira! Nicacapon. Israelimafashion naton ua yoiai cuscacai tsoa futsan ua icoindra huacoinmisima. Israeli anoafaoanricai ua icoindra huacoinmisifoma. <sup>11</sup> Ascacun un mato shafacafi yoi. Mani futsafori anoshon nan Dios icoindra huafoti nocon shunifo Abraham yafi Isaac non Jacobori Dios icano nai murannoashu atofu ichananshcani Diosin yorafo iishcaquin. <sup>12</sup> Ascafia atirifi nocon caifon Israelito Diosin ahuun yorafo ato imapaifiacai tsoan icoindra huafoma. Ascacanashucal Dios icano nocotirofoma. Ascacun Diosin ato faquish muran potashquin. Nannoashu uaiqui omitsiscapanacaforan, —ishon Jesús ato yoini.

<sup>13</sup> Ascashon Jesús Romanon ranushumua niaifo yoini, —Min ua icoindra huaino min oinmati man caya. Ascan natian min pushu ano catahuun, —ishon yoini. Jesús yoiaitian ahuun oinmati cayariscatani.

*Pedro ahuun raisi yoshafo Jesús caya huani*

*Mr 1.29-31; Lc 4.38-39*

<sup>14</sup> Asca huatan Jesús Pedro pushu ano cani. Nanno caquin oian Pedronun ahuun raisi yoshafo fasi yonacoin oshati camaqui raca ini. <sup>15</sup> Ascaiton Jesús yoshafoan ahuun mucuqui mupiaino ahuun yona matsiriscatanaino funinaca huan nan isinincama ointscacai Jesús pimashquin tushu huani.

*Jesús yora ichapa caya huamani*

*Mr 1.32-34; Lc 4.40-41*

<sup>16</sup> Ascaino man fari caino isinincuai futsa futsatapafo yorafo aqui ihuunifo ato cayahuamapacunon. Atirifi yoshin chacafo atohuun nuufafaina Jesús ahuun tsainmansi atomaquinoa potano caya sharanonfo. <sup>17</sup> Jesús nantifi ato caya huani cuscan nannori ahuunoa Diosin tsain yoimisi Isaías inon pacoui cuscan cunuqui isca huani, —Cristofin ahuara isin futsafoan noco isinincmai cuscan noco caya huaquin. Nocon isinfori nocomaquinoa potaran, —ishon Isaías cununi cuscan Jesús huani.

*Jesús tanasharapaiyaifo*

*Lc 9.57-62*

<sup>18</sup> Ascashon Jesús oian yorahuanrasi aqui fuaifoan afu rafuaifo yoini, —Non ian ocuma futsa fonon focahuun, —ato huaino. <sup>19</sup> Nantianri Moisés yononi cuscan tapimamisi aqui cashon yoiquin isca huani, —Tapimamisiton, min raquirac Caino urifi un mifu cahuacacainon, —huaiton. <sup>20</sup> Jesús cumaquin, —Marifi quiniyaquin. Puiyafori naayaofiano uncai pushu yama, —ishon yoini. <sup>21</sup> Ascaiton a tanamisi nocofunu futsan Jesús yoiquin isca huani, —Ifon, natian un mifu capaifiai uhuun pushu ano un cayotanon ua nichiyopun. Nan uhuun upa naitian un mai huayotan un mia tanasharashquinon, —huaiton. <sup>22</sup> —Ascaquima ua tanahuun. Ua ifoamaofin nan yora

naa cuscarafoquin. Ascashon nanfoan ato yora naacun mai huatirofo. Ascan minfin natian ua tanaicain,—ishon Jesús cumani.

*Jesús fuuhuan yafi ian fuchomanhuan nishma huani*

*Mr 4.35-41; Lc 8.22-25*

<sup>23</sup> Asca huatan Jesús shasho naqui nanuano norifi afu rafuafo non afu nanuaini. <sup>24</sup> Ascashu ianmanhuan non pocuaino fuuhuan nocouqui noconi. Nantian Jesús shasho murannoashu osha ini. Ascano ian fuchomanhuanquin shasho muran unu iquimani. <sup>25</sup> Ascaiton non moinni. —Moihuu, Ifon, noco numashqui. Man non asai futsuicai, —ishon non yoini. <sup>26</sup> Ascaino moinacahuan noco yoini —¿Ahuuscai man ratuain? Man ua icoira huasharashucai man ratucuanama, —ishon noco yoini. Ascatan fuuhuan yafi ian fuchomanhuan yoiqui isca huani, —Fuun nishmahuu, —huafain, —Fuchomanhuan nishmahuu —huaino fuu yafi ian fuchoa nishmafaini. Asacatan ianmanhuan pusiquima racani. <sup>27</sup> Ascaiton oin non yoinanni, —Ahuu cuscara nocofunushonmun nocon Ifoan isca huaiquin. Fuuhuan yafi ian nan yoiai cuscan man nishma huaquin,—icashu non yoinanni.

*Gadara mai anoa nocofunu rafuhuun yoshin chaca nuua ini*

*Mr 5.1-20; Lc 8.26-39*

<sup>28</sup> Ascatan ianmanhuan pocufaini Gadara mai ano non nocotan Jesús no fu caino nocofunu rafu yoshin chacafo atohuun nuumisi aqui funifo. Nan rafu fasi musucoin ini. Nantifi yorafo atoqui musumisifo. Ascan nan rafu icafoanno cai tsoan ato finontiro imisima. Ascacun atoqui turocomumisifo. Nan mahua quini muran naafo mai huamisifo ano nan rafu inifo. <sup>29</sup> Jesús fuchicatan oi ashcafainin yoinifo, —Minfin Diospan facuquin. ¿Min noco ahuuasca huapai oamun? Min noco omitsisca huaitian icataiyamafiano min noco omitsisca huai oamun, —ishon Jesús yoinifo.

<sup>30</sup> Ascaino nantianri ato chaimashon yahua inafoan piinifo. <sup>31</sup> Ascashon yoshin chacafoan Jesús yoicaquin, —Min na nocofunu rafumaquinoa noco potaimancai yahuarashiun noco nichipun, —huaifoan. <sup>32</sup> Ascaiton —Yahuafihuun fotacahuun, —Jesús ato huaino. Nan nocofunu rafumaquinoashu yoshin chacafo yahuafu muran fonifo. Ascaino yahuahuanrasi ian muran maocofaini asai futsunifo. <sup>33</sup> Ascaifoan oinfaincani yahua cushumisifo ichonifo pushufoti anoafu ato chani huai focani. Ascatan nococashon Jesús nocofunu rafumaquinoa yoshin chacafo potaiton oianfo cuscan futsafo yoifoanfafainifo. <sup>34</sup> Nicacani nantifi nan pushufoti ano icafo Jesusqui funifo. Ascashon yoinifo, —Nuno noco mai anoashu catapun, —huanifo.

## 9

*Jesús nocofunu funitiroma caya huani*

*Mr 2.1-12; Lc 5.17-26*

<sup>1</sup> Ascatan Jesús shasho naqui nanuaini ian mahuan pocufaini ahuun pushurasi ano noconi. <sup>2</sup> Asca caini pushu muran iquicun rafu non rafuri nocofunufoan aton caifo isinincuai afi raqui caiyamacai afiri ahua huatiroma Jesús shinanmaqui shuhua naratashon ihuunifo a cayahuamanon. Ascaiton Jesús oian nan nocofunu isinincaiton ahuun yorafoan fasi icoira huaifoan oinquin isinincuai yoiqui isca huani, —Uhuun yorashta, ratuyamahuu. Natian mun mia chaca soashona, —huaiton.

<sup>3</sup> Nicacani Moisés cununi cuscan tapimamisifoan aton nomuranshon shinanquin isca huanifo, —Ajaa. Natocai chaca soatiroma. Fasi Dios chaca huai. Diosin fustitofin chaca soatiroquin. Asca noco paraquin. “Un Diosiran,” noco huamapai, —ishon aton nomuranshon shinanchacanifo.

<sup>4</sup> Ascaifoan onanshon Jesús ato yoiquin isca huani, —¿Ahuuscai maton nomuranshon man amaquiri shinanchacaimun? <sup>5-6</sup> Unfi Cristoquin yorafoan aton chaca un

soashotiro. ¿Ascan ahuuscacaimun un huaicai? Un chaca soashoyamaraquin un cayahuai. Ascacun un mato ismai Upa Diosin ua catoan. Ahuunshofin un chaca soafain un yorafo caya huacointiroquin, —ishon ato yoini. Ascatan Jesús nan nocofunu afi raqui cayamacai afri ahua huatiroma yoini, —Min pushu ano min shuhua ya funi-caitahuun, —ishon Jesús yoiaino. <sup>7</sup> Funinaca huatan ahuun pushu ano cani. <sup>8</sup> Ascaiton oincani nantifi mustaiaricatan yoinifo, —Ahuuscashomun Diosin isca huaiquin. Diosin fasi sharacoin tsoa cuscarama. Ahuun yonohuunshon na nocofunu isinincreíble Jesús ahuun tsainmansi caya huafain ahuun chacari soashonaran, —ishon yoinifo.

*Jesús Mateo cunani*

*Mr 2.13-17; Lc 5.27-32*

<sup>9</sup> Nanscacaini caaquin Jesús ua oinni. Unfin noco niaifo pui fishofafainmisi iniquin. Ascan uhuun anufin Mateoquin. A muranshon aton pui fianti pushun facu muran un tsaoa ini. Ascaiton Jesús ua yoini, —Un fu cahuun ua tanamisi iishquin, —Jesús ua catonquin huani. Uaasca huaino un afu cani.

<sup>10</sup> Ascashon Jesús uhuun pushu muranshon un pimani. Yorafori no fu cani. Niaifo pui fishomisi futsafo non icoingra huamafo futsafoan atohuunoa shinanchacamisifo yafi non afu rafuafori cani. Ascashon nanfoan no futan piinifo. <sup>11</sup> Ascaiton oincaquin Fariseofoan Jesús fu rafumisifo yoini, —¿Ahuuscaí maton tapimamisi Jesús nan niaifo pui fishomisifo non chaca futsafo futan piimun? —huanifo.

<sup>12-13</sup> Ascaifoan nicaquin Jesús ato cumani, —A isinincreíble cayahuamamitsamisi yopacanima. Ascan nan isinincreíble foti fasi cayahuamamitsamisi yopacan. Ascarifi aquin, “Uncái ahua chaca huamisima. Un Numamisi yopaimaran,” icaifocai un aton chaca soashotiro. Ascan tsoan yoiqui isca huai, “Un fasi chaca huamisi. Un numamisi yopacoinran,” icaifoan un ato chaca soashotiro. Ascacun Diosin tsain cununi cuscan tapitacahuun. Cunuqui isca huani, “Ua man ina fushomisi un mato chaca soashonon. Nan fusticai un fuchipaima. Ascatamarocon man futsafohuun ramapaiyai nancaifin un fasi fuchipaiquin,” ishon Diospan tsain cununi. —Jesús ato huani.

*Piqui tunuaihuunoa*

*Mr 2.18-22; Lc 5.33-39*

<sup>14</sup> Ascashon ato yoiaino Juan fu rafumisifo aqui fucashon yocanifo. —¿Ahuuscaí Fariseofo futan non piqui tunumisifiano mifu rafuafoan piqui tunumisimamun? —ishon Jesús yocaifoan. <sup>15</sup> Ato cumani, —Nocofunu fu ainfo fianainnoricai unimai fusicaquin tsoan piqui tunutirom. Nanno funu anocai ahuun yorafoan piqui tunutirofoma. Ascafia funu amaqi rutuafono shinancaquin piqui tunutirofo.

<sup>16</sup> Sahuuti shunicoin fashnucun poto funapan icushumufia ustuashu fasi chakanai finatiro. Tsoancai afanan ascara icushpaitirom. Nanscarifiai un mato tsain funa shara yosia cuscan nicacoinshocai man apaoni cuscan afanan man huatirom. Tsoan ua tanacoianshu ipaoni cuscan cachiquiri huacointiro. Ascashu funa cuscara shara iishquin.

<sup>17</sup> Nanscarifiai tsoancai fichi tutso shuni muran vino funa nanutirom. Fichi tutso toshacainaino vino funa chakanai cuyofotiro. Nanscarifiai maton shunicofoan mato yosimisi cuscan yafi un mato yosiai cuscacai nan rafu ositirofoma. Un mato yosiai cuscacoin nannori Diosin tsain shara. Ascafia mato shunifoan mato yosimisifo cuscacai anorima. Nan tanashocai Diosin mato amapaiyai cuscan man huatirom. Nan rafu osishon nicapaiquicai man shinansharatirom. Fichi tutso funa muran vino funa nanua sharacoin itiro. Nanscarifiai ratoranfoan apaoni cuscan unucatan un ato tsain funa shara yosiai nan fusti tanasharacun Diosin ato funa shara imai, —ishon Jesús yoini.

*Jairo shotocofacu caya huafain ainfoan Jesús sahuuti muunni cayashquin  
Mr 5.21-43; Lc 8.40-56*

<sup>18</sup> Ascashu Jesús tsaincai muran Israelifoan ichananti pushu anoa aton niaifo Jesusqui noconi. Nocoshon ratoconun mai chachishon yoiqui isca huani, —Uhuun shotocofacu man naaquin. Un fu capun. Min mucupan uhuun facu mui caashquin cayatan ninon, —ishon niaifoan Jesús yoini. <sup>19</sup> Asca huaino Jesús niaifo fu caino non acho non afu cani.

<sup>20</sup> Nannori ainfon imi imitiani doce fari man aqui cafiano nusu yamacai. Jesús caiton nan ainfoan acachorishori ahuun sahuuti muunni. <sup>21</sup> Mun ataima ahuun nomuran shinanqui isca huani, —Un ahuun sahuuti muuanshu un cayatiroati, —ishon shinanni. <sup>22</sup> Ascashon muuaiton Jesús ifiacucahuatan ainfo fuchishon yoini —Achishtan, ratuyamahuu. Min ua icoinra huashufin min caya sharaquin, —ishon yoiaino ahuun imi nusuriscatani. Ascaiton mua man caya sharacoian ini.

<sup>23</sup> Asca huatan Jesús niaifoan pushu muran iquicaiquin nica yorafoan aton shainti manuaifoanno futsafo shorarascacani. Fasi achacoin uaican. <sup>24</sup> Ascaifoan Jesús ato yoini, —Chifi caintacahuun. Na facucai naama. Oshafinquin, —ato huaiton osanifo. <sup>25</sup> Ato caimatan shotocofacu mutsoinifoannaino samamashta funinaca huani. <sup>26</sup> Ascano Jesús shotocofacu man naafiacun funia nicacani pushufoti chanifoan-fafainifo.

*Jesús fusho rafu cayahuani*

<sup>27</sup> Ascano Jesús niaifo pushu anoashu caiton fusho rafutan mufainifo. —Min nocon niaifo ipaoni nan David ahuun funa. Nocohuun ramapaihuu, —oi ashcafiniti cunarianifo.

<sup>28</sup> Asca huaifono Jesús pushu futsan muran iquicun fusho rafuri afu iquinifo. Iquiafoan Jesús ato yocani, —¿Un mato caya huanon man icoinra huaimun? —huaiton. —Ai, Ifon, non mia icoinra huai, —huaifoan. <sup>29</sup> Aton furo munquin yoini, —Ua icoinra huashufin man cayaquin, —ato huani. <sup>30</sup> Asca huaino oinsharariscatani. Oinsharaifoan Jesús ato yoisharaquin —Ua nicacaquin. Un mato cayahua tsoa yoiyamacahuun, —ishon yoini. <sup>31</sup> Anori yoifiacun nan rafutan nantifi nanno icafo atoqui chaninifo.

*Jesús nocofunun tsaintiroma caya huani*

<sup>32</sup> Nan rafu pushu murannoashu foaifono futsafoan nocofunu yoshin chaca ahuun nua ascacai tsaintiroma Jesusqui ihuunifo cayahuamanon. <sup>33</sup> Jesús yoshin chaca amaquinoa potano nocofunu tsainon. Nanno icafo mustairitan yoinannifo, —¡Aira! ¡Oincapon! Nocon mai nan Israeli anoshon Jesús rama aca cuscan tsoa oinmisimaran, —icanashu yoinannifo. <sup>34</sup> Asca huafiainfoan Fariseofoan yoinifo, —Nanton yoshin chacafo aton niaifohuunshon yoshin chacafo potatiroran, —ishon yoinifo.

*Jesús yorafohuun ramapai*

<sup>35</sup> Ascaiton Jesús pushurasifotí nanno Judíofo icano cahuacacaini. Judíofoan ichananti pushu muranshonfin Jesús ato Diosin tsain shara yoiquin isca huani, —Itisharacahuun. Diosin nuno maton niaifo ipairan, —ishon ato yoifoanfafaini. Pau futsa futsatapafo caya huani. <sup>36</sup> Yorahuansrasí aqui fuainfoan oin atohuun ramapaini. Aton nomuran omitsiscaifoan. Ascan Jesús shinanquin isca huani, —Chashohuan cushumisioma nanscarifiai na yorafo cushumisiomaforan, —ishon shinannquin. <sup>37-38</sup> Ascashon non afu rafuafo nocó yoini, —Yora ichapafoan uhuunoa nicayamafiano ichapamatón ua yonoshocani uhuunoa ato yoishcaquin nanfu nipashquin. Ascashon fasi Úpa Dios cuficahuun ahuun yonoshomisifo catonquin uhuunoa ato yoinonforan, —ishon Jesús ato yoini.

## 10

*Jesús doce nocofunufo catonni afu rafunonfo  
Mr 3.13-19; Lc 6.12-16*

<sup>1</sup> Ascatan afu rafuafo noco cunani, —Uqui fucahuun, —noco huaino. Aqui fuaifoan noco yononi ahuuscashomain yorafo ahuunshon cayahuamafain yorafohuun yoshin chaca nuucun atomaquinoa potatiroquin. Ascashon pau isi futsa futsatapaforimain ahuuscashon caya huatirofoquin. <sup>2-4</sup> Nonfin doce iniquin. Nocon anufo un mato yoi. Futsa Simonfiacun ahuun anu futsa Jesús tuqui huani Pedro. Nanton chipocu Andrés. Futsafoan aton anu Santiago non Juan. Nan rafu Zebedeopian facu. Futsafoan Felipe non Bartolomé un Mateo non Tomás non Santiago Alfeopian facu non Simón futsari nanton ahuun caifo futsafo futan Romanonfo potapai afanan Israelifo yonononfoma. Futsan ahuun anu Judas Santiago facu futsarifi Judas Iscariote nanton Jesús potashon ato achimani. Nocofosi Jesús noco catonni non ahuun rafumisi inon non ahuunshon tsain tapishquin.

*Jesús afu rafuafo doce nichini Dios niaifo icainomain ahuu cuscara iishquicain ishon ato tapimanonfo*

*Mr 6.7-13; Lc 9.1-6*

<sup>5</sup> Noco catonshon Jesús noco yonoquin isca huani, —Nan noco caifomafoan aton mai ano foyamacain Samaritanon icafo anorifi foyamacahuun. <sup>6</sup> Ari fotamarocon nocon caifo Israelifo muransi fotacahuun. Nanfofin chashoan funoa cuscaraoquin. <sup>7</sup> Ascano focashon ato yoiqui isca huacahuun, “Nocon Ifo Dios samamashta nocoyoshquin noco niaifo iishqui,” ishon ato yoitacahuun. <sup>8</sup> Ascashon isinincaifori uhuun curush-huunshon ato cayahuamafain man yora nafiacun funimafain yora nami rashquishi futsuafo ato cayahuamafain yoshin chacafo yorafohuun nuucun nanfori uhuunshon atomaquinoa potacahuun. Diosin mato cashman ahuun curush inan cusca huafain futsaforifi caya huasho ato ahua yocayamacahuun.

<sup>9-10</sup> Ascashon foquaquin mato ahua foyamacahuun. Pui foyamacain mato sahuuti yafi sapatori foyamacain forusa yafi poquitiri foyamacahuun. Nan man nuta fustiya fotacahuun. Man uhuunshon uhuun tsain shara ato tapimanaiton arifi man yopai cuscan mato inantirofo.

<sup>11</sup> Ascan nan man pushurasi ano nocofunun Dios tanasharacoian funacahuun nan fuchiashu ahuun pushu muran iyoshon ato yoifoanfafaincahuun nan man caitian. <sup>12</sup> Ascatan ahuun pushu muran icaquin nan pushu ano icafo ato yoiquin isca huacahuun, “¡Aicho! Min pushu muran non oiran,” huacahuun. <sup>13</sup> Ascasho nan pushu ifo futan ahuun yorafaoanari mato shara huano ato yoihue isca huaqui, “Dios mato ointi shinanshara huamashquiran,” ishon. Ascafia mato tanasharayamaifoancai Diosin aton ointi shinanshara huamashquima. Ascano Diosicai mato ointi shinanshara huamaqui unuima.

<sup>14</sup> Ascan rato pushu futsa iyamarai pushurasi anoafaoanari mato nicacasmaifoan atomaquinoashu foquaquin maton sapato tatashacahuun. Ascaquifin man ato ismatiroquin mato nicacasmafain Diosirifi nicacasmaifo cuscan. <sup>15</sup> Un mato icon yoi. Diosin nantifi nan chaca huamisifo ato yoipacuaitian nan Sodoma yafi Gomorra ano ipaonifori ato onaintimashqui. Ascashon nan mato nicacasmafori natian ato onaintimaquin finacoinshquin.

*Diospan tsain ato yoiaifoan nicacasmaqua ato omitsisca huanifo*

<sup>16</sup> Chashoanfo masharonun pipaitiro. Nanscarifiai nan icoindría huamafoan mato chaca huapaitirofo. Ascafia nanfo muran un mato nichi. Ascacun nan rono onanya cuscara marifi icaahuun. Ruhuincal ahua shinanchacamisima cuscan marifi nanscarifi isharacahuun.

<sup>17</sup> Ascacun oinfain. Nan yora chacafo masharo pofu cuscarofo mato achimatirofo. Ascano achicashon aton niaifofo ano mato iyotirofo. Asca huashon aton ichananti pushu muranshon mato ihuin futsa coshamatirofo. <sup>18</sup> Ascashori niaifofo ano mato iyocani uhuunshon mato nansca huacani. Ascafia nanfo yafi caifo futsafori nan tsain shara uhuunoa man ato yoitiro. <sup>19</sup> Ascatan mato achifiafo shinanchacayamacahuun ahuuscashomain man ato cumasharaicai. Ascashon niaifofoan ointaifi mato yocaifoanno nantianri Upa Diosin mato shinanmani man ato cumasharanon. <sup>20</sup> Man ato yoiaitancai mafi man ato yoima. Maton Upa Diosifin aficoин yoi cafisca huaiquin ahuun Yoshin Sharapan man ato yoipai cuscan mato huashoi.

<sup>21</sup> Ascano nantianri nocofunufoan ahuun yora afu nanuafu achimacani niaifofoan ato rutumanon. Apafoanri aton facufo achimacani ato rutunonfo. Nanscarifi huaquin facufoan aton apa yafi ahua nicacasmacaquin ato achimani niaifofoan ato rutunonfo. <sup>22</sup> Ascasho nantifi yorafoan man ua icoинra huacun uhuunshon mato noicasmacani. Ascan omitsiscafiaquin man ua potama nan man naitian uhuun tsain tanasharashu Upa Dios fu man ipasharaiqui. <sup>23</sup> Ascan pushurasi futsa anoshon mato omitsisca huaifoanno pushurasi futsa ano ichotacahuun. Ascacun un mato cayacafi yoi. Ua nicasharacahuun. Israel pushurasifo atirifi ari man cataima un afanan matoqui nasoshquin.

<sup>24-25</sup> Ascano ahuunshon tapiafoancai ato tapimamisi finontiroma. Oinmatifoanricai ato ifo finontirofoma. Ascashu marifi man ua cuscara iishqui. Ua chaca huamisifo cuscan matorifi nansca huashcani. Nanfoan ua noicasmacaquin ua yoimisifo isca huaquin, “Minfin yoshin chacafoan ato niaifoquin,” ishon ua yoimisifo. Un mato ifofiacun ua asca huamisifo. Ascan matocaifin asca huaquin finacaicaniquin.

### *Tsoaquimain man ratutiroquin*

*Lc 12.2-7*

<sup>26</sup> Ascacun mato omitsisca huafiaifoanno atoqui ratuyamacahuun. Nanfoan ahuarashta onupaifiamisi nantifi Diosin ato puashoshquin. Ahuarari fomanpaimisifo nanfori ato puashoshquin. <sup>27</sup> Ahuara un mato fusti yoimisi nanfo nantifi yorafo cayacafi ato yoisharacahuun. <sup>28</sup> Ascasho mato rutupaifiaifoanno ratuyamacahuun. Mato rutufiatirofocai maton yoshin tsoan ahuusca huatiroma. Ascacun atoqui ratucaquimarocon Dios fustiqui musucahuun. Nantofin noco rutufain nocon yoshin omitsiscapanacafo muran potatiroquin. <sup>29</sup> Ascano tsitsipio rafu inanmitsashon toro fustishtaraca fitiro. Ascafia mato Upa Diosin asca huapaiyamaquicai fustishta namatiroma. <sup>30</sup> Diosin nantifi tapicoian. Nocon foori tanan huani. <sup>31</sup> Ascashon Upa Diosin tsitsipiofo shinamisi cuscan fasi mimacai mato shinanfafainiquin. Ascacun ratuyamacahuun. Matocaifin tsitsipio aca finonmafain Diosin matohuun noiquin. Cushushon mima huaquin mato cushusharamisiquin.

### *Yorafoan ointaifi, —Jesús uhuun Iforan, —huaa*

*Lc 12.8-9*

<sup>32</sup> Ascano yorafoan ointaifi, “Jesús uhuun Iforan,” ishon ato yoiafin uhuun Upa Dios nai muran icanoshori ahuun ointaifi, “Naafin uhuun yoraquin,” ishon un yoishquin. <sup>33</sup> Ascafia tsoan yorafoan ointaifi, “Jesús uhuun Ifomaran,” ishon yoia. Nantocai ua icoинra huamisima. Nanscarifi huaquin uhuun Upa Diosin nai muranshon ahuun ointaifiri “Nacai uhuun yoramaran,” ishon un yoishqui.

### *Jesushuunoacai yorafoan anorisi shinanfoma*

*Lc 12.51-53; 14.26-27*

<sup>34</sup> Man shinamun nantifi manifoti anoafu uhuunoashu unimanonfo un oni. Ma. Ascaramafiqui. Un mato yoi cuscacai tsoan nannorifosi shinancanima. Asca nan ua icoинra huafoan sharafosi shinainfoanno nan ua icoинra huamafoan ahuara chaca futsafosi shinancani.

<sup>35</sup> Ascashon apa ua icoindra huaino furumun ua icoindra huashuma apaqui sinatiro. Ahuanri ua icoindra huaino ainfacun ua icoindra huashuma ahuaqui sinatiro. Ahuun yayan ua icoindra huaino ahuun raru ua icoindra huashuma ahuun yayaqui sinatiro. Un nai murannoashu matoqui oyamanicai tsoa ascacuanafoma. <sup>36</sup> Nanscarifi aquicai tsoan nannorifosi uhuunoa shinancanima. Ascano tsoan ua icoindra huacun ahuun yoracinfoan nan noicasmatirofo.

<sup>37</sup> Ascan tsoan ua finonmafain apa yafi ahua noiashucal uhuun yora itiroma. Nanscarifiai tsoan furu yafi ainfacu ua finonmafain noiashucal uhuun yora itiroma.

<sup>38</sup> Ascan unfin mato ihui coyán iquinanquin nashoshquicain. Ascafia tsoan yoiqui isca huaima, “Natian un Jesús tana. Ascacun nai omitsiscafiaquicai un shinanchacaimaran,” ishon tsoan anori yoicasmaicai uhuun yora itiroma. <sup>39</sup> Ascashon tsoan shinanqui isca huai, “Un Jesús tanaiton raca ua omitsisca huacanicati,” ishon shinanqui uhuun tsain cachiquiri huashu nanscara yorafo naashu omitsiscapanacafo. Asca tsoa uhuunoashu omitsiscafiaqui ua potama nanscara yorafori naashu ufu isharapacu-nacafo.

### *Ahuara shara noco Diosin inain cuscan*

*Mr 9:41*

<sup>40</sup> Ascano ratoranfoan mato nicafain mato shara huaifo. Nanfoanfin nan uacoin shara huai cafisca mato huacaniquin. Nanscarifi aquin tsoan nan un yoiai cuscan nicacoin yafi nan ua nichini uhuun Upa Dios nicacoin cafisca huaiquin. <sup>41</sup> Ascashon tsoanri Diosin tsain yoimisi ahuun tsain nicacoinfain shara huacun Diosin nanrifi nan ahuun tsain yoimisi inanshara cuscan huaquin nan shara huarifi inansharashquin. Ascashon nan Dios tanamisi yora shara futsan ahuun tsain nicasharafain shara huacun, Diosin nan a tanamisi inanshara cuscan huaqui nan shara huarifi inansharashqui. <sup>42</sup> Ascano tsoan ua rama icoindra huashon ua tanaiton futsan a shara huaqui unu matsi ayamacun. Ascacun Diosin arifi a futsa shara huua. Ahuara shara inanshquiain cuscacai funotiromaran,—ishon Jesús noco yoini.

## 11

### *Nan Juanpan atounu muran iquimapacumisiton a tanamisifo Jesusqui nichini*

*Lc 7:18-35*

<sup>1</sup> Ascatañ non afu rafumisifo doce noco yoiqui anaititan pushurasi futsaño Jesús noco iyoni. Nannoafori ato yosifain ato tapimaicai ahuuscashumain non Dios fu ipatiroquin. <sup>2-3</sup> Ascano nantianri Juanpan nan unu muran ato iquimapacuni ranushumuafoan cunu muran iquimanifo. Nan muranshon Jesús acaí cuscan nicaquin ahuunoa fasi tapisharapaiqui. Nan cunu muranshon a tanamisifo nichini Jesús yocanonfo. Ascano nan Juanpan ato yonoa cuscan focashon Jesús yocaquin isca huanifo, —¿Iconmun nan minmun nan non manamisi iyamarai futsa raca non manaicai? —ishon Jesús yocanifo.

<sup>4</sup> Ascatañ Jesús ato cumaquin isca huani,—Nan man nica cuscan yafi man oian cuscarí Juan tapimatacahuun. <sup>5</sup> Yora fushoco info un ato cayahua afanan oinsharanonfo. Nipaiqui ranainfori un ato cayahua nisharanonfo. Ato yoratisho coyo cuscara tocoi futsafori un ato caya huaa afanan imisi cuscan ato nami shara inonfo. Pastocoinfori un ato cayahua nicasharanonfo. Man yora naacoinnafori un afanan ato funimana. Ascashon ahuuomafori tsain shara un ato yoifafainmisi ahuuscashumain Dios fu ipatirofoquin. <sup>6</sup> Ascan tsoan ua icoindra huacoinshon ahuara futsa shinainma. Nan cuscara yorafofin unimacointiroquin. Nannori ua Juan yoishotacahuun,—ishon Jesús ato yoini.

<sup>7</sup> Ascatan man foafono Juanhuunoa Jesús nanno niafo ato yoini, —¿Ahuuscai tsoa istaipama ano Juan oin focani fonifomun? Juancai nan faca tahua pui ninhuun focu focu acai cuscarama. Nanscarifiai man man tapia Juancai nocofunu ointi ranainyama. <sup>8</sup> ¿Ascacun ahuuscai Juan oinpai man fonimun? ¿Man shinanmun a nocofunun sahuuti sharacapa sahuucun oin foi man foni? Ma. Juanpacai sahuuti sharacapacoan sahuumisima. Niaifofoanfin aton pushu muranshon sahuuti sharashtacoan sahuutirofoquin. <sup>9</sup> ¿Ascan ahuuscai oinpai man fonimun? Man shinanraca Diosin tsain yoimisi Juan oincai man cani. Ascafia nan icon. Juanpan Diosin tsain yoimisifia nanton yoimisi cuscacai tsoa futsafoan anori yoimisima. <sup>10</sup> Ascacun nanhuunoa Diosin tsain cununi isca huaquin,

“Min nai ariashu mai ano fotoataima iquisi uhuun tsain yoimisi un nichiqui tau huai. Mihuunoa ato yoiaino itisharashon mia nicanonfo,”

ishon cununi. <sup>11</sup> Un mato icon yoi. Tsoashtacai Juan finoanma. Ascashon Juanpan tsain yoimisi cuscaricai tsoan ascara yoiyomisima. Ascafia Dios niaifo icanaofoan yoisharatirofo cuscacai Juanpan nicayamafain nanfoan oianfo cuscaricai Juanpan oinyomisima. Ascashon nantifi Dios icanaofoan Juan finoanfo. <sup>12</sup> Nan Juanpan ato unu muran iquimapacunitian natianri yorafo Dios icano fasi iquipaicoincani. Ascashon shinanqui isca huafo, “Diosin niaifoan ahuun yora urifi un ipai afu nipashquin. Ascacucai ahuashtaton ua nitun huatiroma un ahuun yora icaiton,” ishon shinancani. <sup>13</sup> Diosin tsain yoishomisifo futan Moisés cununi cuscan yoiquin isca huanifo, “Nan nocon numamisi noco niaifo oshquiran,” ishon yoinifo. Ascan natian Juanrifi man matoqui nocoa ahuunoari mato yoishquin. <sup>14</sup> Nanfoan cununifo cuscan icoinala huashon man tapitiro Juan arifi Diosin tsain yoimisi nan Elías cuscara. Ascacun Diosin tsain yoimisifoan cunuqui isca huanifo, “Un matoqui Elías nichishquiran,” ishon Diosin yoini. Ascan nanfin Juanquin. <sup>15</sup> Manmain ua nicatiroquin ua nicacahuun. Uhuun tsain maton nomuran nanushcaquin.

<sup>16</sup> Ascashon natian niyoafu ahuu cuscrafomainquin un mato yoi man tapinon. Nanfotin nan facu cashumisifo cuscrafoquin. Facufo cashucaquin afu facu fut-safo oi ashcafinitin cunatirofo. Nanscarifiai nanfotin nanscarafoquin. <sup>17</sup> Nan facu cashumisifoan yoitirofo isca huaquin, “Man non shanti manufiainocai monopaicanima. Fanainka omitsiscati cuscara non fanaifiaocai man uaipaimaran,” ishon nan facu cashumisifoan yoitirofo. <sup>18-19</sup> Nanscarifi aquin nanfoanri Juan yafi uqui tsain chipufafaini. Ascafia Juanpacai piqui tunufain fimi unu pau ayamisima. Ascacun ahuunoa yoiqui man isca huamisi, “Juan nisocoin. Yoshin chaca ahuun nuaran,” ishon yoimisifo. Asca unfin pii sharafain un aya sharamisiquin. Ascafia uhuunoari yoiqui isca huamisifo, “¡Cuu! Jesús pitsicoin fasi ichapari ayatiroran huafain Roma anoa niaifo puifishomisifo yafi yora chacafo furi rafuiran,” ishon uhuunoa chaca yoimisifo. Ascafia nanfoanri yoiqui isca huamisifo, “Tsoamain shinansharafain icaquin non onantiro. Nan yorafin isharacoianquin shinansharamain huaifin,” ishon nannori yoimisifo. Nannori yoifiaquicai uhuunoa ascara yoipaimisifoma. Ascatamarocon uqui tsain chaca fusti huamisiforan, —ishon Jesús ato yoini.

### *Pushurasi anoafu nicayosmashunifo Lc 10.13-15*

<sup>20-21</sup> Ascano ato yoiqui anaititan Jesús nan pushurasi anoafu ato yoiqui isca huani, —¡Ohua! Man Corazín anoafu yafi Betsaida anoafuan man chipo fasi omitsiscuai. Tsoan oinyomisima cuscara shara un mato ismafiano mancái chaca shatupaima. Ascan nan Tiro anoafu yafi Sidón anofori un mato isma cuscan un ato ismaiton nanfoan aton chaca shatucuanafu. Ascasho yoicuanafu isca huaqui “¡Ohua! Non fasi chaca huamisi. Ascacun natian Diosiqui nasoshon non nicasharanoncahuun,” ishon yoicuanafu. <sup>22</sup> Ascafia

Diosin nantifi icoinra huamafo onaintimaitian nan Tiro anoaflo yafi Sidón anoafori onaintimafiaquicai mato onaintimaquin finai cuscan ato huaima.

<sup>23</sup> ¿Ascan man Capernaum anoafaoan man shinamun man nai muran Dios ari foicai? Ma. Omitsiscapanacafo muranrocon mato potai. Tsoan oiyomisima cuscara shara un mato ismafiaitocai maton chaca man shatupaima. Ascan nan un mato isma cuscan Sodoma anoaflo un ato ismaiton aton chaca shatu cuanifo. Tsoaricai cuyocuanama. Nantianri aton pushurasi icuana. <sup>24</sup> Un mato yoi. Diosin nantifi icoinra huamafo onaintimaitian nan Sodoma anoafori onaintimafiaquicai mato onaintimaquin finai cuscan,—ishon Jesús noco yoini.

*Uqui fucahuun. Un mato ointi fiananan huashonon man afanan shinanchacanonma  
Lc 10.21-22*

<sup>25</sup> Ascano ato yoiqui asca huatan Jesús apa cufini,—Upa Diosin, min fasi sharacoin. Nantifi nai murannoaflo futan mai anoafaoan aton Ifofin minquin. Ascano nan mapo sharayafo yafi cunu tapiafocai min tsain shara min ato tapimanama. Ascafia nan cunu tapiamafashion un ato isma cuscan un ato yoiai cuscan ua icoinra huafo. Nanfofin min ato tapimanquin. <sup>26</sup> Icon, Upan, minfin nanscara fuchipaiaqui,—ishon apa yoini.

<sup>27</sup> Ascashon Jesús afanan ato yoiquin isca huani,—Upa Diosin tapia cuscan uarifi nantifi tapimani. Unfin Diospan facuquin. Diosin fustitofin ua onancoianquin. Nanscarifi aqui urus fusti Upa Diosin un onancoian. Nanscarifi aqui urifi un futsafo Upa Diosihuunoa onanmanai cuscan nanfoanri Upa Diosin onantirofoquin.

<sup>28-29</sup> Ascacun uqui fucahuun ua tapishashcaquin. Unmain ahuu cuscaraquin un mato tapimai. Unfin yorafohuun ramapaimisiquin. Uhuun nomuranricai un ahuashta shinanchacayamafain un isharacoin fustimisi. Ascashon un mato yonomapaiyai cuscacai curushma. Nanricai ahua ihuuma. Ascacun maton nomuran ihuucuin mui uqui fucahuun un maton ointi fiananan huashonon man afanan shinanchacanonma.

<sup>30</sup> Ascano uqui oshon man mutiro un mato curush yonomaima. Ascatamarocon ua tanasharacoinyashu mato ointi fiananan huashon man isharacointiroran,—ishon Jesús ato yoini.

## 12

*Jesús fu rafumisifoan tunutitian trigo fimi mutusnifo  
Mr 2.23-28; Lc 6.1-5*

<sup>1</sup> Ascatan Israelifoan aton tunutitian Jesús yafi afu rafumisifo mau mamaqui focaquin trigo mutuscashon fonaincoincuin piyaifoan. <sup>2</sup> Oincaquin Fariseofoan Jesús yoinifo,—¿Ahuiscai nocon shuni Moisés yononi cuscacai minhuunshon tapimisifoan nicapaicanimamun? Tunutitian trigo mutuscaniran,—huaifoan.

<sup>3</sup> Jesús ato cumaquin isca huani,—¿Davidhuunoa cununi cuscan man man oinmisimun? ¿Fonainquin nocon shuni David ahuun yoraflo futan ani cuscan man man nicamisimun? <sup>4</sup> Dios fu tsanti pushu muran iquicaishon amuranno misifo ato piquini fasi fonicoinquen. Ano tushu futsa yamaino. A misifofin nan Diosin tsain yoimisinafosi iniquin. Tsoa futsacai a misi pitiro inima. Nannori yonofianifo fasi fonicoinquen David afu rafuaflo futan pini.

<sup>5</sup> ¿Ascashon Moisés cununi cuscari man man oinmisimun? Cunuqui isca huani, “Dios fu tsanti pushu muranshon tunutitian ahuun tsain yoimisifoan yonotirofo. Nanfoan yonofiaquicai ahua chaca huacanimaran,” ishon Moisés cununi. <sup>6</sup> Ascatan un mato yoi. Dios fu tsanti pushu fasi sharashtafia uncaifin fasi shara finacaiaquin. <sup>7</sup> Upa Diosin yoini cuscan cununi isca huaquin, “Man ua inafo rutushomisi un maton chaca soashonon. Nan sharafia man futsafohuun ramapaiquin man ato shara huai. Nancaifin fasi shara finacaiaquin. Nan fusti un fasi fuchipaiairan,” ishon yoini. Ascacun nan tapicoinhocai man ufu rafumisifohuunoa yoicuanama, “Nanfoan chaca huaforan,”

ishon. Afoantsi ahua chaca huacun. <sup>8</sup> Uafin uhuun Upa Diosin catonniquin. Ascacufin urusu fusti un yoitiro ahuamain tunutitian man huatiroquin, —ishon Jesús ato yoini.

### *Nocofunu mucu musufiquia*

*Mr 3.1-6; Lc 6.6-11*

<sup>9-10</sup> Ascatan Jesús Israelifoan aton ichananti pushu muran iquini. Nanno iquishon ato yosialino nantianri nocofunu musufiquiaton arifi nicani. Ascano nan Fariseofoan Jesushuunoa ahuara chaca yoipaicaquin nan yocanifo. —¿Nocon shuni Moisés yononi cuscumun tunutitian non yora caya huatiro iyamarai non caya huamatiromanmun? —ishon yocaifoan. <sup>11</sup> Jesús ato cumani, —¿Man chashoan ayano tunutitian quini muran pacucun man ihuiriscatiromamun? Ma. Ascatama manrocon ihuiriscatiro. <sup>12</sup> Nanscarifi huaquin fasi noicoinquin nocofunuuhuunoa tunutitianfiacun non shinantiro. Moiséscai noco yononima tunutitian non yora cayahuanonma, —ishon ato cumani.

<sup>13</sup> Ascashon nan nocofunu musufiquia yoiqui isca huani, —Mushahuun, —huaino. Mushatanaino nantian ahuun mucu muma sharacoin iriscatani. Nan ahuun mucu ocuma futsa cuscara shara ini. <sup>14</sup> Ascaiton oincanashu Fariseofo focashon shinannifo —¿Ahuuscashomun non Jesús achitiroquin rutushquin? —icashu yoinannifo.

### *Upa Diosin ahuun facucoin catonni ahuun oinmati cuscara inon*

<sup>15</sup> Jesús tapitan a rutupaiyaifoanno anoashu cani. Yorahuanrasiton mufainifo. Ratomain isinincuai nanfo cayahuamani. <sup>16</sup> Ato cayahuatan ato yoini, —Uhuunoa tsoa yoiyamahuu, —ato huani. <sup>17</sup> Nannori ato yoi Isaías cununi cuscan icocoin inon. <sup>18</sup> Isaiasin Diosin tsain cununi isca huaquin,

“¡Oincapon! Naquian uhuun oinmati cuscara un catonni. Un fasi ahuun noi. Un aqui unimacoin. Uhuun Yoshin Shara un afu rafumamisi. Nan manifoti uhuun tsain nicasharacun atorifi aton chaca yama huashotiro uhuun yora inonfo. <sup>19</sup> Acai yora futsa fu fochishmanantanainma. Tsain isininpatorn yoishquima. <sup>20</sup> Nan yora omitsiscrai afanan tunutirofoma ato potaima ato cushusharai tunumashquin. Tsoan icoingra huapai ato yoisharashquin icoingra huacoinonfo. Ascan huaino afanan mai ano oaitian nantifi chacafoti unumashquin ahuunshon nantifi ishara fustisintonfo. <sup>21</sup> Nantifi manifoti ahuunoa nicaquin isca huacani shinanshcaquin, ‘Nan fustiton noco numatiro non ahuunoashu Upa Dios fu nipanon,’ ishon yoishquicaniran,” Isaías cununiquin.

—*Satanashuunshon Jesús yoshin chacafo potairan, —ishon yoinifo*

*Mr 3.20-30; Lc 11.14-23; 12.10*

<sup>22</sup> Ascatan nocofunu fusho icain tsaintiroma. Ahuun nuushon yoshin chakanun tsainmapaonima nan Jesusqui ihuunifo caya huanon. Ascacun Jesús nan nocofunu afanan oinmasharafain tsainmani. <sup>23</sup> Ascaiton oincani mustaiaricatan afiran yoinancaquin yoinifo, —Jesús ahuamamishti shara huatiro. Asca nan naraca David ahuun funa. Nan Upa Diosin catonni, —ishon yoinifo.

<sup>24</sup> Ascaifoan nicaquin Fariseofoan yoinifo, —Ma. Atocai Upa Dioshuunshon yoshin chaca potama. Yoshin chacafoan aton niaifo Satanashuunshon yoshin chaca yorafohuunoa potatiroran, —ishon yoinifo. <sup>25</sup> Ascano nan shinainfo cuscan onanshon Jesús ato yoini, —Mani futsafo afi ranan rutunain cuyotirofo. Nanscarifiai pushurasi anoa icafo iyamarai pushu fusti muran icafo afi ranan chaca huatananfafaincani paschcanantirofo afanancai tsoa anosi itiroma. <sup>26</sup> Nanscarifiai Satanás niaifoan afu yoshin chacafo potaquin ahuun yono chacana huatiro. Asca huaquin ahuun yono cuyocointiro afu yoshinfocai afanan afu itirofoma. <sup>27</sup> Ascafia manfin yoimisiqui Satanás curushhuunshon yoshin chaca potaran ishon man yoimisiquin. ¿Un asca huaino tsohuunshon mato yorafoan yoshin chacafo atomaquinoari potafomun? Ascacun nanfohuunshon

man tapitiro man uhuunoa amaquiri shinanchacai cuscan. <sup>28</sup> Un Diospan Yoshin Sharahuunshon yoshin chacafo atomaquinoa potaino maton Numamisi Diosin catonni cuscan matoqui nocoa.

<sup>29</sup> Afanan mato yoi nicasharacahuun. Ahuuscashomain yorafoan nocofunu mutsisipaton ahuun pushu cushu ano ahuun mafo onutiroma. Ascafaino finoncaia aqui nocoshon achifain munushquin ahuun mafofo cuyonfiaitocai ahuusca huatiroma.

<sup>30</sup> Tsoan unfu rafupaiquima ua nicacasmai. Tsoan uhuun tsain nicacasmaifin ua noicasmaiquin. <sup>31</sup> Ascano un mato icon yoiquin. Ratoran ahuara chaca huai Diosquiri Upa Diosin rau huashotiro. Ascanfia ratoranton yoia isca huaquin, “Nanton aca cuscan Satanashuunshon acaran,” huafishu Diospan Yoshin Sharahuunshon aca. Nanton Diospan Yoshin Sharahuunoa tsain chaca huaa. Asca huacun Upa Diosin ahuun chaca rau huanacama. Ahuun chaca ahuun nuupacunaca. <sup>32</sup> Tsoan ua chaca huafin un ahuun chaca rau huashotiroquin. Ascan tsoan Upa Diospan Yoshin Sharaqui tsain chaca huacai Upa Diosin rauhuanacama. Ahuun chaca ahuun nuupacunaca. Natian naitianri ahuun chaca ahuun nuupacunaca.

### *Fimi fana ahuun fimihuunshon non onantiro*

*Lc 6.43-45*

<sup>33</sup> Ascano shinancapon. Fimi fana naman non orosharaino fana foaisharatiro. Ascashu ahuun fimirifi sharacoin itiro. Ascan non fana naman oroamacai fana foaisharatiroma. Ascashu ahuun fimiri chacacoin itiro. Fimi fana ahuun fimihuunshon non onantiro ahuu cuscaramainquin. <sup>34-35</sup> Nanscarifiai nocofunu sharapan ahuun nomuranshon ahuara sharafosi shinain cuscan ahuun tsainrifi sharacoin itiro. Nanscarifiai nocofunu chacapan ahuun nomuranshon ahuara chacafosi shinain cuscan ahuun tsainri chacacoin itiro. Ascano nocon ointi muranshon non shinain cuscan nan-noricoi non yoitiro. Ascan manfin nan rono paupaton facu cuscarafoquin. Ascacun ahuuscashotsi chacacoinflashon man ahuara shara yoitiro.

<sup>36</sup> Ascacun un mato yoi. Ratoran shafatan Diosin nantifi yorafo ichanan huaitian ato yoipacushqui ratotonmain icoinra huamisi iyamarai icoinra huamisimaquin. Nantianri ahuashta shinantama yoimisifo cuscan ato puashoshquin. <sup>37</sup> Ascashon man niyoano nantifi man yoimisi cuscan Upa Diosin mato nicamashquin. Ascan mato tsain-huunshon man afu ipatiro iyamarai mato omitsiscapanacafo muran mato potairan,—ishon Jesús ato yoini.

—*Tsoan atiroma cuscan noco ismahuu non mia icoinra huanon, —ishon yora cha-cafoan Jesús yoinifo*

*Mr 8.12; Lc 11.29-32*

<sup>38</sup> Ascaiton Fariseofo futan Moisés cununi cuscan tapimamisifoan yoinifo, —Tapimamisiton, tsoan atiroma cuscan noco ismahuu min Dios ariashu oa non mia icoinra huanon, —ishon yoiaifoan.

<sup>39</sup> Jesús ato cumani, —Manfin chaca shinanfain Dios cachiquiri huamisiquin. Ascacun tsoan atiroma cuscan noco ismahuu ishon man ua yoia. Ascafia nan Diosin tsain yoimisi mato shuni Jonás ani cuscacoin un chipo mato ismaiton nan fusti man oinshquin. <sup>40</sup> Jonás shimanoo shaqui muran osha rafu non fusti iyoni cuscan. Nanscarifiai un Diospan Facu mai muran osha rafu non fusti un iyoshqui. <sup>41</sup> Ratoran shafatan Diosin nantifi yorafo ichanan huaitian ato yoipacushquin ratotonmain icoinra huamisi iyamarai icoinra huamisimaquin. Ascaino nantianri Nínive ano ipaonifoan matohuunoa yoishcani isca huacaquin, “Jonás noco Diosin tsain yoini cuscan non nicacoinshon nocon chaca shatucoinshon non Dios icoinra huani. Asca man manfin Diospan furucoin nicafiaflashocai maton chaca man shatumisimaran,” ishon mato yoishquin. Nan icon un Jonás finonfiacucai man ua nicapaimisima.

<sup>42</sup> Nanscarifiai Diosin nantifi yorafo ichanan huaitian ato yoipacushquin ratofomain afu ipatiro iyamarai omitsiscapanacafo muran foshquicaniqui. Ascaino nantianri nan ainfo Sabafoan ato niaifo ipaoniton matohuunoa yoiquin isca huashquin, “Salomón tapicoian cuscacai tsoan futsan tapipaonima. Ascacun ahuun tsain nicapaicoin un aqui chaicunoashu cani. Ascan mancái nan Diospan Furun nicapaima. Ascatamarocon man nicacasmapaoniran,” ishon matohuunoa yoishquin. Nan icon Salomón tapicoian ipaonifia uncaifin fasi Salomón finoncoinfiacun mancái ua nicapaima.

*Yoshin chaca afanan yoraqui nasotiro*

*Lc 11.24-26*

<sup>43-44</sup> Yoshin chaca nocofunumaquinoashu cai tsoan istaipama ano cani shara futsa funai cai anoshon tunushquin. Ascafia fuchiamacaiqui yoshin chacanun afanan shinanqui isca huani, “Unfin nan nocofunuuhun ipaoniquin. Ascacun un afanan aqui nasoiran,” ishon shinanni. Ascatan aqui nocoshon oian tsoa futsacai afu rafua inima. <sup>45</sup> Ascacun nan yoshin chacanun afu yoshin chacafó siete atoihuuni nan fasi chaca finacaiafo. Ascashon ato yoiqui isca huani, “Nocofunu un mato ismai non ahuun nomuran iquitiroran,” ishon ato yoini. Ascatan aqui focanashu iquicainaifoanno nan nocofunu fasi mimacai chacacoin ini. Manmain aqui rananri focun. Nanscarifiai maton shunifoan chaca huafiapaonifo mancaifin fasi chaca huaquin finacoianquin,— ishon Jesús ato yoini.

*Jesús ahua yafi ahuun ushtofo*

*Mr 3.31-35; Lc 8.19-21*

<sup>46</sup> Ascatan Jesús yorahuanrasi yoi tsainci muran ahua yafi chipocofo noconi. Ascano aqui iquishon ahuara yoipaifiacaquin chifishon mananifo. <sup>47</sup> Ascaiton futsan yoini,—Min uhua futan ushto rananun chifi nishon mia ahuara yoipai fuaforan,—ishon yoiaiton. <sup>48</sup> Jesús cumani,—Un mato tapimai ratofomain uhuun uhuafó yafi uhuun ushtofoquin,—ishon yoini. <sup>49</sup> A tanamisifo oinyacuquin ato yoini,—Nafofin uhuun uhua cuscarafo yafi uhuun ushto cuscarafoquin. <sup>50</sup> Nan uhuun Upa Dios nai ari icaton ato amapaiyai cuscan huaifo nanfofin uhuun ushtofo yafi uhuun chicofo non uhuun uhuafóquin,—ishon Jesús ato yoini.

## 13

*Fimi ushu saacaihuunoa cuscara ato Jesús yosini tapinonfo*

*Mr 4.1-9; Lc 8.4-8*

<sup>1</sup> Ascatan nan shafatari Jesús pushu murannoashu cai ian cusumun tsaoni. <sup>2</sup> Ascaino aqui yorahuanrasi funifo ahuun tsain nicapai cani. Ascaino shasho muran nanuinacahuán ahuun cusha camaqui tsaoshon ato yoini. <sup>3</sup> Ascashon ahuara futsahuunoa cuscara ato yoini ato tapimashquin. Yoini isca huani,—Nocofunun ahuun noshati murannoá fimi ushu fishon ahuun mau mamaqui saani. <sup>4</sup> Saacano ushufo fai nushmancayan pacua puiyafoan piinifo. <sup>5</sup> Ascano ushu ranan toquiri camaqui pacua mai ichapamashta anoashu samamashta ushu foaica. <sup>6</sup> Fari tsacaqui yositimahuaino man naa. Ahuun taporicai chai foama ini. Ascashu fanafó nai cuyoá. <sup>7</sup> Ascaino ushu rananri tasha murannoashu foaiflashuaci ushu futsa foaisharanima. <sup>8</sup> Ushu rananri mai shara ano saaca nan mai sharanoashu nantifi foaisharashu fimi ichapayacoin ini. Futsa cien fimiya icaino futsa sesenta aya icaino futsari treinta fimiya ini. <sup>9</sup> Ascan manmain ua nicatiroquin ua nicacahuún uhuun tsainri maton nomuran nanucoincahuún,—ato huani.

*Ahuuscaquimun futsafo yoiflashon Jesús afu rafuafosi shafacafí ato tapimaniquin*

*Mr 4.10-12; Lc 8.9-10*

<sup>10</sup> Ascaino non afu rafua aqui fucashon yocanon, —¿Ahuuscai shafacafi ato yoitama ahuahuunoa cuscara min yorafo ato tapimashquinmun? —ishon non yocani. <sup>11</sup> Jesús ato cumani, —Ahuuscashomain Upa Diosin ahuun yorafo iquiniquin mato fusti tapimai. Ascan nafocai ato tapimaima. <sup>12</sup> Ascan tsoan Diosin tsain nicasharafain ahuun nomuran nanucoian naanfin Upa Diosin paratamari tapimashquin. Ascafia tsoan ichapama tapiflashon Diosin nicasharayamafain nan yoia cuscan aima nanfin funoshquiquin. <sup>13</sup> Ascacun nan yorafo un ahuara futsahuunoa cuscara un ato tapimashquin oinfiacashon tapinonfoma. Nicafiaquiri tapinonfoma. <sup>14</sup> Nannori Isaías nan Diosin tsain yoimisi ipaoniton atohuunoa inon pacuai yoiqui isca huani,

“Man nicafafaifiacuicai Diosin ato yoiai cuscan tapinacafoma. <sup>15</sup> Nan yorafoan aton ointi curushcoinyashu nicayosmashunifo. Diosin tsain man nicamisi-fiashu nan nicama cuscarafo. Uhuun yonoshara oinfiacani nan futsoi cafiscaafo. Ascashon un ato isma cuscan oianfoma. Ascayamacanashu uqui fucuanafu un ato chaca soashonon uhuun yora sharafo iishcaqui,”  
ishon Diosin yoini cuscan Isaias cununi.

<sup>16</sup> Ascafia nannori Isaías cunufiani mancái ascarama. Ascatamarocon un mato oinmana cuscan man icoinra huafain un mato yoia cuscan man nicacoinmisi. Ascashu maton nomuran man unimacoinna. <sup>17</sup> Un mato icon yoi. Man oian cuscacai uhuun Upa Diosin ahuun tsain yoimisifo futan a tanamisi futsafoanri fasi oinpaifiacuicai tsoan oinpaonima. Un mato yoimisi cuscan fasi nicapaifiacuicai tsoan nicapaonima.

*Fimi ushu saamisihuunoa yoifiashon shafacafi afu rafuafu tapimani*

*Mr 4.13-20; Lc 8.11-15*

<sup>18</sup> Nan fimi ushu saamisihuunoa un ato yoia cuscan natian shafacafi un mato tapimai. Ascacun ua nicasharacahuun tapisharashquin. <sup>19</sup> Ascan nan Dios ahuun yorafo iquinai cuscan nicafashion tapiama. Nanfofin nan ushufo fai ano pacua cuscarafoquin. Diosin tsain ato nomuran man nanufiafo nan yoshin chaca Satanás atoqui oshon nicafo cuscan ato fiantiro afanan afohuunoa shinanonfoma. <sup>20-21</sup> Ascano futsafoanri Diosin tsain nicaquin tau huai unimacoinyofiashu samamashta ahuun tsain cachiquiri huaa. Ascan nanfofin nan ushufo toquiri camaqui pacua cuscarafoquin. Nanfori nan ushufo toquiri camaquinoashu foaifia ahuun tapo chai foama. Samamashta nai cuyotiro. Nanscarifiai nanfoancai Diospan tsain aton nomuran nanu sharafoma. Ascashon ahuara chaca finonyamarai futsafoan ato omitsisca huaino samamashta Dios cachiquiri huatirofo. <sup>22</sup> Ascan ushu futsafo moshafu muran pacuashu foaisharatiroma. Nanscarifiai futsafoan Diospan tsain nicafashion ahuara nan acai cuscan fustisi shinain. Ascashon pui ichapa yafi mafo ichapa noi afi paramuquicai afanan Dioshuunoa shinantiroma. Ascaquicai Diosin ato amapaiyai cuscan futsafo shara huatiroma. <sup>23</sup> Ascafiaquin ushu futsa mai shara ano saacano foaiquin yosiashu fimi ya itiro. Nanscarifiai futsafo Diospan tsain nicafain tapicanashu nan yoia cuscan aafo. Ascashon nanfoanfin futsafori Diospan tsain yoiquin icoinra huamatirofoquin. Futsan treinta iyamarai sesenta iyamarai cien yorafo icoinra huamatiroran, —ishon Jesús ato yoini.

<sup>24</sup> Afanan Jesús ato tsain futsa yoini tapinonfo. Isca huaqui, —Diosin nantifi iquinano nanscarifi aquin nocofunun ushu sharafo fana. <sup>25</sup> Fana sharafiahuun noicas-mamisiton yamu ahuun mau ano caa. Mau ifo ahuun oinmatifo oshano noicas-mamisiton tashafori mau ano fana. Fanatan mau anoashu caa. <sup>26</sup> Chipofin nan ushu shara foaicaino tashafori foaini. <sup>27</sup> Ascano aqui fucashon mau ifo ahuun oinmatifoan yoinifo, “¿Ifon, min ushu shara min mau ano fanamamun? ¿Ahuuscaimun natian tashafori foaicaquin?” ishon yocanifo.

<sup>28</sup> “Noco noicas-mamisiton acaran,” huaiton. “¿Ascan nan tashafo non tsucai fotiron-mun?” huaifoan. <sup>29</sup> “Ma. Man tasha tsucaino nan fana sharafori tsucapaiyamafiaquin man afori tsucatiro. <sup>30</sup> Nanscanonquin. Chitummisitian tashafo yafi fana sharafori

foaitiro. Nantian un mau yonomisifo yoishquin isca huaquin, ‘Iquisi nan tashafo tsucacahuun. Nantifi nushasharahuu coashquinon. Asca huatanfin nan fanasharafori uhuun tapasi muran ua fushotacahuun,’” mau ifoan yoiaran, —ishon Jesú ato yoini.

### *Mostaza ushuhuunoa Jesú ato yoini*

*Mr 4:30-32; Lc 13:18-19*

<sup>31-32</sup> Ascasho Jesú mostaza ushuhuunoa ato yoini ahuara futsa ato tapimashquin. Ato yoiqui isca huani, —Nocofunun ahuun mau ano mostaza ushu fanani. Rato fimi ushu futsacai mostaza ahuun ushu uhuapamashtatioma. Ascafia foaica fasi cuya itiro. Rato pushu umainti fimi charo fanacai mostazatioma. Ihui noconan rafutiro. Ascataan yosiano puiyafu ahuun tushpahuu tsaotiro. Nanscarifiai Diosin ahuun yorafo iquisi fustirasi ifiashu chipo paratama caitioran, —ishon ato yoini.

*Jesú misifarashatihuunoa ato yoini nanhuunshon Diosin nantifi yorafo iquinai cuscan tapinonfo*

*Lc 13:20-21*

<sup>33</sup> Ascan Jesú ahuara futsa ato yoini Diosin nantifi yora iquinai cuscan tapinonfo. Afanan ato yoiqui isca huani, —Diosinmain ahuun yorafo ahuusca huatiroquin un mato tapimai. Diosin ahuun yorafo nantifi ato iquifain ato yonotiro. Ainfoan farashati ichapamashta harinaya osishon camisconano farashinitiro. Nanscarifiai Diospan yorafoan nan icoingra huamafo muranshon nantifi ato shara huatiro, —ishon ato yoini.

### *Jesú ato yoiái cuscan ahuara futsa tapinonfo*

*Mr 4:33-34*

<sup>34</sup> Ascataan ahuarahuunoa yoiqui Jesú ato yoini tapinonfo. <sup>35</sup> Nannori Diosin tsain yoimisiton nan Jesú yoinon pacuai cuscan cunuqui isca huani, “Un ato ahuara futsahuunoa ato yoi ato tapimashquin. Upa Diosin nantifi onihuani chain tsoan ascara nicayomisima cuscarafo un ato yoishquiran,” ishon yoini cuscacoin man aa.

### *Trigo yafi faasi foaitirohuunoa Jesú shafacafi ato tapimani*

<sup>36</sup> Ascataan yorahuanrasi anoashu cai pushu muran iquini. Ascano non afu rafuafu aquí caashon non yocani, —Ifon, min trigo muran faasi foaitirohuunoa yoia cuscacai non tapiama. Shafacafi noco yoihoo non tapisharanon, —ishon non yocani.

<sup>37</sup> Ascaiton noco cumani, —Diosifi ua nichiniquin. Un nan ushu fanamisi shara cuscara inon. <sup>38</sup> Nan maufin nantifi manifotihuunoaqui. Ascan nan ushu sharafofin Diospan yorafohuunoaquin. Ascan faasifin icoingra huamafona nan yoshin chaca ahuun yorafoquin. <sup>39</sup> Ascan nan mau ifo noicasmamisi nanfin Satanaskuin. Ascan nan fana fiaifotianhuunoafi nan manifoti cuyotirohuunoaquin. Nan fana fimisfofin Diospan oinmatifo afu nai muran icafo.

<sup>40</sup> Nan faasi mushashon coafo cuscan huaquin. Nan manifoti cuyoaitian. <sup>41</sup> Uhuun oinmatifo ufu nai muran icafo un nichishquin nantifi futsa chaca huamamisifo yafi nan chaca huafafainaifo uhuun yorafomaqui ato pashcashcany. <sup>42</sup> Ascashon nan omitsiscapanacafu chi urumanhuan muran ato potano nannoashu fasi uaicani omitsiscacoinshcany. <sup>43</sup> Ascaino nantianri Diospan yora shara icoingra huafoti aton Upa Dios icanoashu fari chasha cuscarafo. Ascacun manmain ua nicatiroquin ua nicacahuun. Uhuun tsain maton nomuran nanucoincahuun.

### *Ahuara sharashta onuahuunoa cuscarafin ato yoini*

<sup>44</sup> Nocofunu mai futsa ano caa. Nannoahuara sharashta paratama ahuun pui nuua fuchia. Ascan fuchishon nannori afanan onua. Ascashu fasi unimacoinquin nan aya cuscati inanmitsashon nannoahuara mai fia nan ahuarashta paratama ahuun pui nuuari ahuuna inon. Nanscarifiai Diospan yorafo nantifi aya cuscan afiri inanmutiro Dios fu ipashcaquin.

*Perla funoahuunoa Jesús ato ahuaro futsa tapimani*

<sup>45-46</sup> Diosin ahuun yorafo ahuu cuscaramainquin afanan un mato yoiqui isca huai. Mafo inanmitsamisi cahuancacaini macush cuscara perla oshopa sharashtafo funafoanfafainni. Ascashon man futsa anoa fuchia ahuun pui paratama nuua fuchishon nan aya cuscati inanmitsashon ahuun rafanan nan perla fii ahuunacoin inon. Nanscarifiai Diospan yorafo nantifi aya cuscan afiri inanmutiro Dios fu ipashcaquin.

*Nushutihuunoa Jesús ato yoini ahuara futsa ato tapimashquin*

<sup>47-48</sup> Ascano nushumisiton ahuun nushuti uhuapa pochishon shiman futsa futsata-pafo fiini. Ahuun nushutinhuan shiman fospiano unuhuan cusumun cashon nini funi. Ascashon nan shiman chacafu nushuti muranno tsucashon potani. Ascanshon nan piti sharafosi shihuati muran nanuni. <sup>49</sup> Nanscarifiai manifoti cuyoaitian Diospan oinmatifo afu nai muran icafo nococashon nan chacafu yafi sharafo pashtcanan huashcani. <sup>50</sup> Ascashon nan chacafoti chi urumanhuan muran ato potashquin nannoashu uaiqui fasi omitsiscapashanonfo, —ishon Jesús ato yoini.

<sup>51</sup> Ascatan afu rafuafonon Jesús noco yocaiton, —¿Un mato yoia cuscan nantifi man man tapiamun? —ishon noco yocaiton. —Ai. Min noco yoiai cuscan nantifi man non tapiaran, —non huaiton.

<sup>52</sup> —Ratoran futsafoan Moisés yononi cuscan tapimamisifo nan Diosin ahuun yorafo iquinai cuscan tapiafo. Ascan nanfotin nan mafo inanmitsamisi cuscarafoquin. Mafo inanmitsamisiton yorafo nan yopaifo cuscan inantiro. Ahuara shunifo iyamarai funa ato inantiro. Nanscarifiai tsoan Moisés cununi cuscan yafi un mato rama Diospan yorafohuunoa tapimanai cuscan huafain marifi man futsafo tapimatiroran, —ishon noco yoini.

*Jesús afanan Nazaret ano cani*

*Mr 6.1-6; Lc 4.16-30*

<sup>53-54</sup> Ascano noco yoia cuscan ahuara futsa tapinonfo anaititan Jesús nan pushconi pushurasi ano nasoni. Ascatan Israelifoan aton ichananti pushu muran iquishon ato yoiaiton ahuun tsain nicacani mustairicatan yoinifo, —¿Ahuuscai na nocofunun fasi tapi sharacoianmun? Tsoan atiroma cuscan huapaiquifin atiroquin. ¿Tsoanco Jesús ascara tapimanamun? <sup>55</sup> Nanfin ihui sapa yonomisiton ahuun facuquin. Ahuun ahuan María. Ahuun ushtofori Santiago yafi José non Simón non Judas. <sup>56</sup> Ahuun poifori no fu imisifo. Man nonfin Jesús onanquin. Aacai ahuama. ¿Ascan ahuuscashomun ahuamamishti huatiroquin? —icashu yoinannifo. <sup>57</sup> Ascashon nannori ahuunoa shinanchacaquicai tsoan icoinra huapainima.

Ascaton Jesús ato yoiqui isca huani, —Nantifi mai anoshon Diosin tsain yoimisiton yoiai cuscan nicapaitirofo. Ascafia nan cainni anoshon fusticai tsoan nicapaitiromaran, —ishon ato yoini.

<sup>58</sup> Ascano nannoshon icoinra huaiyamaifoan tsoan atiroma cuscan fustirasi huani.

## 14

*Juanpan yorafounu muran iquimapacutan nani cuscan*

*Mr 6.14-29; Lc 9.7-9*

<sup>1-2</sup> Ascano nantian Herodes nan Galilea mai anoa ato niaifoan Jesushuunoa nicaquin ahuun oinmatifo yoini isca huaquin, —Nanfin Juanqui. Un tushtumayamua afanan man funia. Ascashofin Diospan curushuunshon tsoan atiroma cuscan huafafainiquin, —ishon ato yoini.

<sup>3-4</sup> Herodes Juan rutumanataima yoiqui isca huani, —Niaifo Herodes, min ushto Felipe ahuun ahuin min fia. Ascaquicai min shara huama. Nocon shuni Moisés Diosin tsain cunuqui isca huani, “Futsan ahuin min fitiromaran,” ishon Moisés cununiran,

—ishon Juanpan Herodes yoini. Ascaiton nicaí Herodes fasi sinacoinquin ahuun ranushumuafó yononi Juan achishon cunu muran iquimanonfo. <sup>5</sup> Ascashon Herodes Juan ruturiscapaifiaquicai funa rutunima yorafoanmain Juan fuchipaiyaifoanfin. Ascaiton nanfoanri yoinifo, —Juanfin Diospan tsain yoimisiquin, —ishon ahuunoa yoinifo. Ascacun Herodes shinanquin isca huani, —Un Juan rutucun ua yorafoanasca huatiroran, —ishon shinanni. Yorafoqui ratuquin Herodes Juan cunu muran iquimafiahocai funa rutunima.

<sup>6-7</sup> Ascano Herodes cainnitian yorafo ichananni fuusishcaquin. Ascashu ichananfoanno Herodías ahuun facu shomaya arusu aton ointaifi mononi. Nan Herodías Herodes ahuun ushto ahuin ini. Ascashu shomaya monoaino Herodes fasi unimacoinquin yoini, —¡Aicho! Min monoai cuscan un fasi miqui unimai. Ahuarashta fipaiquin ua yoihoo un mia inanon. Diosin tapia un mia icon yoliaiton min fipaiyai cuscan un mia inantiroran, —ishon yoini.

<sup>8</sup> Ascashon cashon shomayaton ahua yoini. Ascacun nan ahuan yoia cuscan nasocura niaifo Herodes yoini, —Juan nan yorafo unu muran iquimapacumisi tushtuhuu. Purato naratahon ahuun mapo ua inanhun, —huaino. <sup>9</sup> Niaifon Herodes puusinima. Puusitama ahuun nomuran shinanqui isca huani, —¡Ohua! Un Juan tushtumapaima. Ascafia yorafoan un shomaya yoia cuscan man nicafo. Ascacun un asca huapaiyamafiaqui un aquicairan, —ishon shinanni. <sup>10</sup> Ascashon niaifoan ahuun ranushumua yononi, —Juan tushtushon ahuun mapo ua fushotahuun, —huani. <sup>11</sup> Ascaíno cashon ranushumuaton Juan tushtushon ahuun mapo purato naratahon funi. Fushon niaifo inancun nan niaifoanri shomaya inanni. Ascano shomayaton arifi ahua inanni. <sup>12</sup> Ascashon afu rafumisifoan Juan nicacani focashon ahuun caya mai huanifo. Ascacun focanashu Jesusqui chaninifo.

### *Jesús cinco mil nocofunufo pimani*

*Mr 6.30-44; Lc 9.10-17; Jn 6.1-14*

<sup>13</sup> Ascashon Herodes Juan tushtuma nicaí Jesús shashon tsoa icama ano cani. Jesús caa nicacani pushufoti anoashu yorahuanrasiton naman mufainifo. <sup>14</sup> Ascashu nocooquin Jesús oian yorahuanrasi oin atohuun ramapaini. Nannoshori isinincái futsafo ato cayahuapacuni.

<sup>15</sup> Ascano man fari caino non afu rafuafo aqui cashon non yoini, —Yorafo nichihuun. Man fari caiquin. Fonaincaniquin. Pushurasi ano yafi a chaima icafoanno ato nichihuun anoshon tushu huanonfo, —ishon non yoini.

<sup>16</sup> Ascaiton noco cumani, —Ma. Noncái ato nichima. Mafirocon ato piimacahuun, —noco huaiton. <sup>17</sup> —Nonfin nuno misi siete yafi shiman rafu ayaquin, —ishon non yoini. <sup>18</sup> Ascaiton, —Ua fishotacahuun, —noco huani. <sup>19</sup> Ascashon yorahuanrasi yoini, —Nanno faasi camaqui tsaocahuun, —ato huani. Ascacun shiman rafu yafi misi mucu fustiti tsomashon nai ari foisinifoantan Apa Dios cufinquin, —¡Aicho! Upan, mihiunshon un ato pimai. Min fasi sharacoincun, —huatan. Misi torupacutan shiman rafu ya osishon noco inanni non ato pashtcanan huapanon. <sup>20</sup> Ascashon picani mayancoinnifo. A picaquin tushu huafó non afu rafumisifoan doce shihuati fospi huani. <sup>21</sup> Nan piaifo cinco mil nocofunufoosi ini. Ainfofo yafi facufocai non tanan huanima. Asca nanfoanri ato futan piinifo.

### *Jesús unu fumancayan cani*

*Mr 6.45-52; Jn 6.16-21*

<sup>22</sup> Ascashon ato pimaquin anaititan Jesús noco yoiquin isca huani, —Shashon rufofo oquiri pocui focahuun. Un na yorafo ato nichiyonon, —ishon noco yoini. <sup>23</sup> Ascashon man ato nichiqui anaititan arus fusti machi ano caashon Apa Dios fu tsainni. Man fari

caino arus fusti ini. <sup>24</sup> Ascatac afu rafuafo shasho caino ian nushmancayan nocoqui fuuhuan noconi. Ascashu ian fuchquin noco catima huani.

<sup>25</sup> Ascashu man faquishiaino non oian Jesús ian fumancayan nocoqui ofiaitocai non onannima. <sup>26</sup> Onanshma ratucoin non fiisini. "Yoshiran," icashu non fiisicaiton. <sup>27</sup> — Unqui. Ratuyamacahuun, —ishon Jesús noco yoini.

<sup>28</sup> Ascatac Pedronun yoini, —Ifon, minmainquin uarifi mia ano cunahuu. Urifi un ian fumancayan canon, —huaiton. <sup>29-30</sup> —Ohuu, —Jesús huaino Pedro shasho naquinoashu fotopacucahuun ian fumancayan Jesús ari caafiaiñ oian fuunhuaquin ian fuchaoiton oin ratui iquipacucahuunqui yoini, —Ifon, ua ari mutsoinifoanhun, —Pedronun huani. <sup>31</sup> Ascatac Jesús samamashta mutsoinifoanquin yoini, —Miancái ua icoinra huacoinnama. Ahuuscaquimun mian icoinra huamaquin, —ishon Jesús yoini.

<sup>32</sup> Ascatac nan rafu shasho muran nanuinfoanafono fuu nishmapacufoanni.

<sup>33</sup> Ascana non shasho murannoafó fasi aqui unimacoinquín non yoini, —Iconfinquin min Diospan Facu, —ishon non yoini.

### *Genesaret anoshon Jesús isinincaifo ato caya huapacuni*

*Mr 6.53-56*

<sup>34</sup> Ascatac ian pocufaini Genesaret ano non noconi. <sup>35</sup> Ascashu non nocoaiton nannoafan samamashta Jesús onancashon a chaima icafori ato tapimanaino nicafuracani fucaquin aton yora isinincaifo Jesusqui ihuunifo. <sup>36</sup> Ascana fucashon Jesús yoinifo, —Noco yora isinincaifo min sahuuti cupanan fusti ato muumahuu cayanonfo, —ishon yoinifo. Ascatac ahuu sahuuti muuncanashu cayapacunifo.

## 15

### *Nocofunun ahuara chaca huatiro cuscan*

*Mr 7.1-23*

<sup>1</sup> Ascana Fariseofo yafi Moisés cununi cuscan tapimamisifori Jerusalén anoashu Jesusqui funifo. <sup>2</sup> Fucashon yoinifo, —¿Ahuuscaimun nocon shunifoan piataifoma muchoquimupaonifo cuscacai mifu rafuafoanasca huapaicanimaran? —ishon yoiaifoan.

<sup>3</sup> Jesús arifi ato yocani, —Ascana ahuuscai marifi maton fuyamisi fustisi man tana-paiyain. Ascashofin Diosin yononi cuscan huatamarocon nan maton shunifoan amaqiri yosimisifo cuscan marifi man nansca huamisiquin. <sup>4</sup> Ascacun Upa Diosin yonoqui isca huani, "Maton upa yafi uhua nicasharafain ato shara huacahuun. Ascana tsoan apa iyamarai ahuaqui tsain chaca huacun ato rutumacahuun," ishon yononi.

<sup>5-6</sup> Nannori yononifianicun manfin noco yorafo yoiquin isca huamisiquin, "Maton upa iyamarai mato uhua man yoiqui isca huatiro, 'Nantifi uhuun pui un aya cuscan mun Dios inan. Ascacun un mia ahuara inanpaifiaquicai un mia inainmaran,' " ishon yoiquiricai mato upa yafi uhua man afanan ahua inantiromaran, ishon man fasi ato amaqiri yoimisi. Anori yoiquiricai Diosin yononi cuscacoin man aimá. Ascaquifin nan mato fuyamisi fusti man tanaqui. <sup>7</sup> Ascashufin man paramitsamisifoquin. Nan Diosin tsain yoimisi Isaías inon pacuai cuscan icocoinquín matohuunoa yoiqui isca huani,

<sup>8</sup> "Nan yorafoan uhuunoa yoisharamisifashocai aton nomuranshon ua shinancoianfoma. <sup>9</sup> Ipaitsi ichananshu fanaincaí ua cuficani. Yorafo tapimamisifo cuscacai Diosin tsaincoquinma. Nanfoan aton nomuran shinainfo cuscan futsafori yosimisiforán,"

—ishon Isaías cununi.

<sup>10</sup> Ascashon nannori Fariseofo yafi Moisés cununi cuscan tapimamisifo ato yoitan Jesús yorahuanrasi cunaquin isca huani, —Uqui fucahuun un mato yoinon. Ua nicafain un mato yoiái cuscan tapisharashcaquin. <sup>11</sup> Ahuarafo non piatocai noco ointi chaca huatiroma. Nocofununfin ahuun nomuranshon nan shinain cuscan yafi nan yoia cuscan chaca huatiroquin, —ishon ato yoini.

<sup>12</sup> Ascaíno non afu rafuafo aqui cashon non yocani; —¿Ifon, man min tapiamun nan rama min Fariseofo yoiai cuscan nicacani sinacaniran? —ishon non yoini. <sup>13</sup> Ascaiton noco yoiqui isca huani, —Mau ifoancai ahuara chacafo fanatiroma. Ascatama afin foaicun tsucashon potatiro. Nanscarifi aqui uhuun Upa Dios nai muran icatocai nan Fariseofo yonoama futsafo ahuun tsain tapimanon. Ascacun nanfo chipo omitsiscapanacafo muran ato potashquin. <sup>14</sup> Ascacun nanfo shinanyamacahuun. Fushocai afu fusho raqui iyotiroma. Iyopai afu shato muran pacutiro. Nanscarifiai Fariseofoancai Diosin tsain tapishoma futsafo yositiroma atofu funotiro. Ascashu Dios ari tsoa nocopacunacafomaran, —ishon ato yoini.

<sup>15</sup> Ascaiton Pedronun yoini, —Min ato yoia cuscan shafacafi noco tapimahuun, —ishon yoini.

<sup>16</sup> Ascaiton Jesús noco yoiqui isca huani, —¿Ascan marifimun man nicasharama? <sup>17</sup> ¿Man tapiamamun ahuara man piacai mato shaqui muran nituima? Ascatama manrocon aya poitiro. Ascan nantocai mato chaca huamatiroma. <sup>18</sup> Ascashon mato nomuran man shinanchacai cuscan huafain yoashuri man chacacoin itiro. <sup>19</sup> Ascano aton nomuranshon ahuara chaca shinanfo cuscan nanscacoин huatirofo. Shinanchacafain rutumitsamisi icain aton ahuinma fu nocofunufo icaifoanno ainfofori nanscarifiaifoanno. Ascashon ahuarari onufain futsahuunoa ahuara chaca yoiqui parafain roanmitsamisi itirofo. <sup>20</sup> Nan chacafoanfin yorafo chaca imatiroquin. Ascan nan noco shunifoan apaonifo cuscan muchoquimushoma non piatocai nocon nomuran noco shinanchacamatromaran, —ishon Jesús noco yoini.

### *Ainfoan patasharinoaton Cananea anoaton Jesús ico inra huani*

*Mr 7.24-30*

<sup>21</sup> Ascacaini Jesús nocofu anoashu cai nan pushurasi Tiro ano yafi Sidón ano cani. <sup>22</sup> Nannoashu Cananea anoa ainfo Jesusqui noconi. Nocoshon yoini, —Ifon, minfin David ahuun funaquin. Uhuun ramapaihuu. Uhuun facu ainfofosta fasi omitsiscai. Yoshin chaca ahuun nuushon omitsisca huamisi. Uhuun facu ua caya huashopun, —ishon yoiriani. <sup>23</sup> Ascaiton nicafiaquicai Jesús cumanima. Ascaiton non afu rafuafoan yoini, —Ifon, na ainfoan mia yocariaquin noco fucash huaiquin nichihuun, —ishon non yoini. <sup>24</sup> Ascashon Jesús ainfo yoini, —Uhuun Upa Diosin ua Israel ano fusti nichini. Nanfomain nan chashoanun facu funoa cuscarafocun. Ascan uacai caifo futsa ano nichinima, —huaiton.

<sup>25</sup> Nicaiyainfo Jesús naman ratoconun mai chachipacufoan yoini, —Ifon, uhuun facushta ua cayahuashopun, —huani. <sup>26</sup> Ascaiton Jesús afanan cumani, —Apacai ahuun facufoan tushu pashnafo inantiroma. Ascaracai sharama. Nanscarifi aqui Upa Diosin ua yona cuscan un Israelifo fusti un shara huashonon. Ascacucai un caifo futsa ano catiroma ato shara huashoshquin. Un asca huaino nan Israelifo funotiro, —ishon yoiaiton. <sup>27</sup> Ainfoanri yoini. —Icon, Ifon. Ascafia ahuara piqui tushu huafo sapa camaquinoashu potomishti pacuaiton pashnafoan pitirofo. Nanscarifi aquin Upa Diosin mia Israelifo ano nichini min ato shara huashonon. Ascafia mani futsafo mi qui noco ainfoan nanfori min ato caya huatiro. Ascashon min ato shara huashoainocai Israelifori funotromaran, —ishon yoiaiton. <sup>28</sup> —Min ua fasi ico inra huacoinna. Ascacun min ua yoca cuscan un mia ashoiran, —ishon Jesús nan ainfo yoini. Asca huatanaino ainfo ahuun facu cayariscatani.

### *Jesús yora ichapa isinincaifo ato caya huapacuni*

<sup>29</sup> Asca huatan anoashu Jesús no fu cai Galilea ian cusumunri cani. Nannoashu cai machi ano inashu tsaoni. <sup>30</sup> Ascano yorahuanrasi aqui funifo. Fucaquin isinincaifo ihuunifo Jesús ato caya huanon. Isinincai futsa futsatapafo. Futsafo nipaiqui ranainfo ihuufain fushofo ihuufain ahuun caya mumamafo ihuufain tsaintiromafo ihuufain isinincai futsafoi Jesusqui ihuunifo. Ascacun nantifi Jesús ato cayapacuni. <sup>31</sup> Ascashon

ato caya huaa oincani mustairicatan yorafo afi ranan yoinancaquin yoinifo, —Noncai iscara oinyomisima. Tsaintiromafo natian tsaincani. Ahuun caya mumamafori natian man niisharafo. Nipaiqui ranainfori natian niisharatirofo. Jesusfin ahuamamishti huatiroquin. Israelifoan nocon Dios fasi sharacoinran, —ishon yoinifo.

*Jesús cuatro mil nocofunufo pimani*

*Mr 8.1-10*

<sup>32</sup> Ascatac non afu rafuafo noco cunashon Jesús noco yoiqui isca huani, —Un na yorafohuun ramapai. Ufu rafu non fusti oshatan icafo. Afanan tsoa tushu ayama. Ahuashtacai picanima. Ascacun uncai ato tushuoma nichipaima. Fasi fonaincani shaca fuatiroforan, —ishon noco yoini. <sup>33</sup> Ascaiton non cumani, —Nuno tsoa icamanocai non tushu fuchitiroma na yorahuanrasi pimashquin, —ishon non yoiaiton. <sup>34</sup> Noco yocani, —¿Ahuuti misi man ayamun? —noco huaiton. —Siete non shiman ranananri non ayaran, —ishon non yoini.

<sup>35</sup> Ascaiton Jesús yorafo yoiqui isca huani, —Nanno tsaocahuun, —ato huani. <sup>36</sup> Ascatac ato yoia cuscan tsaoafoanno Jesús misi siete non shiman rananri finifoantán Apa Dios cufini, —¡Aicho! Upan, mihiunshon un ato pimai. Min fasi sharacoinquin, —huatan. Misi yafi shiman torupacutan non afu rafuafo noco inanni. Ascacun yorahuanrasi norifi non ato pashcashopacuni. <sup>37</sup> Ascashon nantifiton picani mayancoinnifo. Ascano man piqui tushu huafu siete shihuati non fospi huani. <sup>38</sup> Ascan nan piaifo cuatro mil nocofunufoosi ini. Ainfofo yafi facufocai non tanan huanima. Ascafia nanfoanri ato futan piinifo. <sup>39</sup> Ascatac Jesús nantifi yorahuanrasi nichitan. Noco nanuquifaini cai mai futsa ahuun anu Magadán ano no cani.

## 16

*Fariseofo futan Saduceofoan Jesús yocanifo, —Tsoan atiroma cuscan noco ismahuu, —huanifo*

*Mr 8.11-13; Lc 12.54-56*

<sup>1</sup> Ascashu Magadán ano man non nocano Fariseofo yafi Saduceofori Jesusqui funifo. Ascano fucashon yocanifo. —Minmain Diospan facucoinquin nan Diosin nai aria icahuunshon tsoa atiroma cuscan noco ismahuu non mia icoinra huanon, —ishon yoinifo. Ahuunoa ahuara chaca ato niaifofo yoipaicaquin. <sup>2</sup> Ascaifoan Jesús ato cumani, —Manfin yoiquin isca huamisiquin, “Man fari caino imi poshnan. Ascan funamanrifi nai shara itiroquin,” ishon man yoimisi. <sup>3</sup> Ascashon shafaino nai choshtacun man yoimisi, “Nai choshtapan fupoa. Ascan natian oi fuiran,” man huamisi. Ascashon nai foisquin man tapitiro oi fuyamaraimain ahuuscaquin. Ascan ahuuscaquitsi Diosin mato yoiai cuscan man icoinra huapaima. Natian ahuara ahuuscarai cuscacai man tapiama. <sup>4</sup> Man ua icoinra huayamafain chacafashion man ua yocai. Ascafia tsoan atiroma cuscan un Diosihuunshon huatirofiacai un mato ismaima. Man oinpaifaiton. Nan Diosin Jonás ani cuscan nan fusti man chipo oinshquiran, —ishon Jesús ato yoini. Ascatac atomaquinoashu cani.

*Fariseofoan yositirofo cuscahuunoa*

*Mr 8.14-21*

<sup>5</sup> Ascano man ian pocufaini cashon non shinanni, —Non tushu ointiaquimacuraran, —ishon non yoini. <sup>6</sup> Non ascaiton onanshon Jesús noco yoini, —Oinfain. Fariseofo futan Saduceofoan aton misi farashati cuscara fiyamacahuun, —ishon noco yoiaiton. <sup>7</sup> Nicai nofi ranan non yoinanni, —¿Ahuuscaimun Jesús noco yoiqui isca huaiquin, “Fariseofo futan Saduceofoan aton misi farashati fiyamacahuun,” noco huai? Non tushu fucuma racan noco isca huaiquin, —icashu non yoinanni.

<sup>8</sup> Ascano nan non yoiai cuscan onanshon Jesús noco yoini,—¿Ahuuscaquimun tushuhunoasi man yoicai? Mancai ua icoinra huaa sharacoiantaima. <sup>9</sup> Ascashon mancai tapisharataima. ¿Un mucus fustiti misihuunshon cinco mil nocofunufo un pimaita nan man shinainmamun? ¿Ahuuti shihuati fospia tushuita man ointiaquimamun? <sup>10</sup> ¿Nan siete misihuunshori un cuatro mil yorafo pimaita nanri man man ointiaquimanamun? ¿Ahuuti shihuati fospia tushuitamun man ointiaquimamun? <sup>11</sup> ¿Ascan ahuuscai un mato tushucoinhuunoa yoiyamafaiton man tapimamun? Unfi tushuhuunoa yoi cafisca huaquin nan Fariseofo futan Saduceofoan yosiaifo cuscahuunoa un mato yoiqui,—ishon noco yoini. <sup>12</sup> Ascashon Jesús noco yoiai cuscan nicaquin non tapini tushucoinhuunoa yoitama naan Fariseofo futan Saduceofoan noco amaquiri tapimapaiyai cuscan Jesús noco yoini.

*Pedronun,—Jesús Diospan facuran,—huani*

*Mr 8.27-30; Lc 9.18-21*

<sup>13</sup> Ascatacán Jesús no fu mai futsari cani. Nan mai ahuun anu Cesarea Filipo. Nanno nocoshon Jesús noco yoini,—Unfin Diospan Facufiashu un nocofunucoinquín,—ishon yoitan afanan noco yocani,—¿Yorafoan shinamun un tsoaquin?—ishon noco yocaiton. <sup>14</sup> Non cumaquein isca huani,—Futsafoan yoaifin min Juanquin. Nan yorafo unu muran iquimapacumisi, ishon yoiaifoanno futsafoanri yoiquivin min Eliasquin. Ascano futsafoanri yoafo minfin Jeremiasqui. Ascan futsafoanri yoafo minfin nocon shunicaifo Diosin tsain yoimisi futsa afanan funiaquin,—ishon noco yocaiton. <sup>15</sup> Afanan noco yocani,—¿Asca marifi man shinamun un tsoaquin?—noco huaiton. <sup>16</sup> Ascaiton Pedronun cumani,—Minfin Cristoquin. Nan Diosin nipanacaton mia catonni min ahuun facuran,—ishon yoaiton. <sup>17</sup> Ascaiton Jesús cumani,—Simón, minfin Jonás ahuun facuquin. Diosin mia noiquin mia shara huaa. Rato nocofununcaí mia tapimanama un Diospan facu. Uhuun Upa Diosin nan nai muran icaton mia tapimana.

<sup>18</sup> Un mia afanan yoi. Minfin Pedroquin,—ishon Jesús yoini. Ascan Pedrofin Israeli tsainman toquirininhuan. Tsoan putsiquitiroma. Ascasho Jesús afanan yoiqui isca huani,—Min yoaia cuscahuunshon futsafoan aarifi icoinra huashquicani. Ascaifoan uhuun yorafo un ato imashquin. Yoshin chacafoan aaton curush huahuunshon ato namapaiafiaquicai ato shatuyamafain aato finontiroma. <sup>19</sup> Tsoan shafi ya fupotifuputiro yorafo pushu muran iquimashquin. Nanscarifi aquin un mia yonoi uhuunshon min yorafo uhuunoa yoitiro uhuun yorafo inonfo. Ascashu uhuun Upa icano iquitirofo. Min yorafo yosiai cuscan tsoa nicacasmai uhuun yora itiroma Upa Dios fu ipashcaquin. Nannori Diosin yoini. Ascan min yorafo yosiai cuscan tsoa icoinra huai uhuun yora itiro Upa Dios fu ipashquin. Nannori Upa Diosin yoini. Ascacun un mia yonoi min futsafo tapimatiro Upa Dios icano iquinonfo. Un mia shafi inain cafisca huai min ato fupushotiro iquiahu afu ipanonfo. Ascashon tsoan min yoiai cuscan icoinra huayamashocai iquitiroma afu ipashquin. Ascan tsoan min yoiai cuscan icoinra huacinnashu afu ipashquin,—ishon Jesús Pedro yoini. <sup>20</sup> Ascatacán non afu rafuaflo futsafori noco yoiqui isca huani,—Unfin Cristoquin tsoa yoiyamacahuun,—noco huani.

*—Unfin chipo naashquicai,—ishon Jesús ato yoini*

*Mr 8.31–9.1; Lc 9.22-27*

<sup>21</sup> Ascatacán nantian yafi nan achiaifotian Jesús noco shafacafi yoiqui isca huayofafainpaoni,—Un Jerusalén ano cai. Nannoshon nocon niaifofoan ua omitsisca huafain ua ato rutumafiafo osha rafu non fustitan un afanan funishquiran,—ishon noco yoini. <sup>22</sup> Ascaiton Pedronun Jesús mutsofaitan yoini,—Ifon, ascayamahuu. Miacai tsoan rutupacunacama,—huaiton.

<sup>23</sup> Jesús ifiacucahuán Pedro yoini, —Satanás catahuun. Min ua amaqiri shinanchacamapai. Upa Diosin shinain cuscacai shinantama nan nocofunufoan shinainfo cuscan min shinanran, —ishon Jesús yoini.

<sup>24</sup> Ascatan non afu rafua futsafori noco yoiqui isca huani, —Tsoan ua tana-paisharaquicai afi apaiyai cuscan huatiroma. Ascatama nan un yoiai cuscacoin huatiro. Ascashon shinanqui isca huatiro, “Ua omitsisca huafiaifoanno uncai uhuun Ifo potapacunacama. Ahuunshon ua rutufiaifoanno un tanaqui unupacunacamaran,” ishon man shinantiro. <sup>25</sup> Ascan tsoan shinanqui isca huai, “¡Ohua! Un Jesús tanaiton raca ua omitsisca huacanicati,” ishon shinanquin uhuun tsain cachiquiri huaa. Nanscara yorafo naashu omitsiscapanacafo. Ascan tsoa uhuunoashu omitsiscacai naa. Nanscara yorafofin nacanashu ufu isharapacunacafoquin. <sup>26</sup> Ascan ratoran futsa nantifi manifoti anoafu ahuara fia ahunacoin ifiashu amaqui naino nantifi ahuunafo funotiro. Ascashu nantifi ahuuna iyopaonifia omitsiscapanacafo muran cainocai afanan ahuashta itiroma. Ahuaracai Dios inantiroma afu ipashqui.

<sup>27</sup> Ascatan un chipo nai murannoashu mai ano fotoaino nan uhuun Upa cuscaracoin iishqui. Ascashu un chasha curanaino uhuun oinmatifo ufu nai muran icafo ufu fotoshcani. Nantianri un nantifi yorafoan aton niaifoco iishquin. Ascashu nan yorafoan acafo cuscan un ato inanpacushquin. Nan shara huamisifo un ato inansharafain un ato unimamashquin. Ascan nan chaca huamisiforici un ato ahua inansharashquima. <sup>28</sup> Ascacun icon un mato yoi. Man futsa nuno ufu niaton naataishoma un maton niaifo Upa Dios cuscaracoin un icaiton man oinshquiran, —ishon Jesús noco yoini.

## 17

### *Jesús fianananriscatani* *Mr 9.2-13; Lc 9.28-36*

<sup>1</sup> Ascano man seis osha finontan Jesús Pedro non Juan non Santiago machi cuya pochininshon ato iyoni. <sup>2</sup> Ascan nannoashu aton ointaifi Jesús ahuun yora mumacoin fianananriscatanaino ahuun fusori fasi chashacointani. Nan fari chashai ointsa. Ahuun sahuutiri oshopacoin nan yoa rama furoa ointsa ini. <sup>3</sup> Ascaino nantianri Moisés yafi Elías aqui niriscatanifo. Ascashu nan rafu Jesús fu tsaincaiton oinnifo. <sup>4</sup> Ascaiton Pedronun yoini, —Ifon, nuno non icashara itiro. Man ascapaiyaiton un mato tapasi rafu non fusti huashotiro. Mina futsa non Moisésna futsa non Eliasna futsa un mato ashotororan, —ishon yoini.

<sup>5</sup> Ascashu Jesús fu tsaincaino coin osho sharacoin atoqui cuyopacuni. Ascaino coin murannoai nicanifo yoiqui isca huaiton, —Nanfin uhuun Facuquin. Un fasi ahuun noi. Nanfin un catoanquin. Un aqui unimacoin. Ascacun a nicacoincahuun, —ishon Upa Diosin yoini. <sup>6</sup> Ascaiton nicacani fasi ratucoincani fuopacufoannifo. <sup>7</sup> Ascaifoan Jesús ato pumanqui yoini, —Funicahuun. Ratucaquima, —ishon ato yoini. <sup>8</sup> Ascaiton foisinifoanquin oianfo Jesús fusti nia ini.

<sup>9</sup> Ascatan machi pochininnoashu fotoshon Jesús ato yoiqui isca huani, —Nan man rama oian cuscan tsoashta yoiyoyamacahuun. Nan un naashu afanan funiano man rama oian cuscan man yorafo yoitiroran, —ishon ato yoini.

<sup>10</sup> Ascaiton nicacaquin afu rafuafo yocanifo, —¿Ascan ahuuscaquimun Moisés cununi cuscan tapimamisifoan noco yoimisifo isca huaquin, “Nocon Numamisi Cristo nan Diosin catoan nocoqui oataima rufofo Elías oshquiran,” ishon noco yoimisifor? —huaifoan. <sup>11</sup> Jesús ato yoini, —Icon. Elías rucun oitautiro. Oshon nantifi ato imasharapai aton chaca shatunonfo. <sup>12</sup> Ascan man ofiacucai tsoan onannima. Nan chaca huapaiyaifo cuscan fusti nan chaca huanifo. Nanscarifi aquin ua omitsisca huashcaniran, —ishon Jesús ato yoini. <sup>13</sup> Ascaiton nicacani afu rafuafoan shinantani nan Juan yorafo unu muran iquimapacumisihiuunoa ato yoiai cuscan tapinifo.

*Jesús furonan facuhuunoa yoshin chaca nuua caya huani  
Mr 9.14-29; Lc 9.37-43*

<sup>14</sup> Ascatañ machi anoashu fotocuranaíno yorahuanrasi aquí noconifo. Ascaíno nannoshon nocofunun ratoconun mai chachipacufoan Jesús yoini, <sup>15</sup> —Ifon, uhuun facuhuun ramapaihoo. Yoshin chaca ahuun nuushon fasi omitsiscamai. Chii muran potafain unu muranri potatiro. <sup>16</sup> Uhuun facu mifu rafuafo ano un iyofiacai tsoan caya huama, —ishon yocaiton. <sup>17</sup> Ascatañ Jesús non afu rafuafo noco yoini, —¡Ohua! Mancaí ua icoinra huacoinnama. Man fasi amaqiri shinamisi. ¿Ahuitia un matofu icamun man ua nicayamacaiyai? —ishon noco yoini. Ascatañ facun ahuun apa yoini, —Min facu ua ihuushonhuun, —huani. <sup>18</sup> Ascatañ furun ihuushocun Jesús yoini, —Minfin yoshin fasi chacacoinquin. Na facumaquinoashu catahuun, —ishon Jesús curushcain yoiaino cayariscatani.

<sup>19</sup> Ascatañ non afu rafuafosi Jesús fu tsaintan non yocani, —¿Ahuuscaimun norifi non yoshin chaca facumaquinoa potamaquin? —ishon non yocaiton. <sup>20</sup> Noco afanan yoini. —Manfin ichapama ua icoinra huaquin. Ascacun un mato icon yoinon. Nan mostaza ushu uhuapamashtacoinfia foaicashu yosia uhuapacoin itiro. Nanscarifiai man ua ichapama icoinra huaquin tau huatiro. Ascan chipo uhuun tsain maton nomuran nanucoinshon man ua fasi icoinra huaqui finacointiro. Ascashon man machi yoitiro shucuaitahuun man huaino shucucaini futsa ano catio. Ascaíno ua icoinra huacoinshon nan man apaiyai cuscacoin man huatiroquin. <sup>21</sup> Ascan man Upa Dios cufiyanan píqui tunuyamashocai nan na cuscara yoshin chaca man potatiromaran, —ishon Jesús noco yoini.

*Jesús nashquiai cuscan afanan yoi futsani  
Mr 9.30-32; Lc 9.43-45*

<sup>22-23</sup> Ascatañ Galilea ano nocofu caquin afanan Jesús noco yoiquin isca huani, —Un mato yoimisi cuscan afanan un mato yoi. Futsan ua ato achimashquin ua rutunonfo. Ascafia osha rafu non fustitan un afanan mai murannoashu funishquiran, —ishon Jesús noco yoini. Ascatañ nicaquin non fasi shinancoinni nocon nomuran noconi.

*Israelifoan pui inantiro cuscan Dios fu tsanti pushu cushusharanonfo*

<sup>24</sup> Ascatañ nannoashu non cai Capernaum pushurasi ano non noconi. Nanno non nococun nan Dios fu tsanti pushu murannoa pui fimisifoan Pedro yocanifo. —Man min tapia nocon caifoan faritifi pui inanfo Dios fu tsanti pushu muran yonoafoan nan yopaifo cuscan ahuun finonfo. ¿Ascan mato Ifo Jesús arifi man inanmisimun? —ishon Pedro yocaiifoan.

<sup>25</sup> Pedronun ato cumani, —Aifain. Naanfin inanmisiquin, —ishon ato yoini. Ascashu Jesús man pushu muran iquiano Pedro arifi iquini. Ascatañ Jesús Pedro yoini. —¿Maifoti anoa niaifofoanmun ahuun caifocoin pui fiapai iyamarai mai futsa ariafo yocaiqui? ¿Pedro, asca min raquiri shinainmun? —ishon Jesús Pedro yocaiton. <sup>26</sup> —Mai futsa ariafo fiantiroran, —ishon Pedronun cumani. <sup>27</sup> Ascatañ yoini, —Min ua cuma cuscan iconfia non na pui fimisifo nocoqui shinanchacamapaima. Ascacun ian ano catahuun shuamaquin shiman fiishquin. Ascashon ahuun shaqui murannoa toro fuchishon min fitiro uhuuna yafi mina nan Dios fu tsanti pushu murannoa pui fimisifo nocohuunshon ato inanshquin, —ishon Jesús yoini.

## 18

*Ratotocaimun Dios icari fasi finoncoianquin  
Mr 9.33-37; Lc 9.46-48*

<sup>1</sup> Ascatañ non Jesús yocani. —¿Ifon, ratotocaimun Dios icari fasi finoncoianquin? —ishon non yocaiton.

<sup>2</sup> Jesús facu cunani, —Facushta, nuri ohuu, —huaino ocun ato nastui nimani.  
<sup>3</sup> Ascashon ato yoini, —Un mato icon yoi. Man shinan futsayamashu nan facu cuscara man iqui. Man ascayamacai Dios icari man noconacama. <sup>4</sup> Ascacun na facu apa yafi ahua nicafain icoinra huatiro cuscan ratoran futsan ua icoinra huacoinnashu nanfin uhuun Upa Dios icariashu fasi finoncoian iishquiquin. <sup>5</sup> Asca ratoran futsan uhuunshon facufo shara huafin nan uari shara huai cafisca huai.

*Futsafoan noco chaca huaquinaino fasi musucoin*

*Mr 9.42-48; Lc 17.1-2*

<sup>6</sup> Ascafia ratoranfoan ua icoinra huafuna futsan chaca huamai nancaifin fasi on-aintimaquin finacoinquin. Chaca huamataima toquiriya tunushushon unu noacoin muran potafin shara icuanaquin. <sup>7</sup> Ascano nan icoinra huamafoan futsafo chaca huamamisi. Ascafia nanfocaifin fasi omitsiscacoinshcaniquin. Ascashon mato chaca huamapaifafaincani. Ascafia nan futsa chaca huamafocaifin fasi omitsiscai finacoinshcaniquin. <sup>8</sup> Ascano mato mucuman man chaca huacun mushatumushon potacahuun afanan chaca huashquima. Man raquira caquin chaca huashon mato tau shatuhuu potashquin afanan chaca huashquima. Man mumamaflashu Dios icano caafin sharacaiqui. Mumaflashu man omitsiscapanacafo muran cacuana. Nanno chii urumanhuan matsinacama. <sup>9</sup> Nanscarifiai ahuara oinquin chaca huashon mato furo tsucahuu potashcaquin afanan chaca huashquima. Niyoashu furo fustiya man Dios icano caafin sharacaiqui. Ascan niyoashu furo rafuya man omitsiscapanacafo muran cacai sharama. Nanno chii urumanhuan matsinacama.

*Chashoan fusti funoahuunoa Jesús ato ahuara futsa tapimani*

*Lc 15.3-7*

<sup>10</sup> Facufohuunoa isca huaqui shinanyamacahuun, “Na facucai ahumarán,” ishon atohuunoa shinanyamacahuun. Un mato cayacafi yoi Upa Diosin ahuun oinmatifoan facufo cushusharafafainmisifo. Nan oinmatifori Upa Dios fu ifafaincani. <sup>11</sup> Ascacun nantifi yora funoafu numayoifin un oaquin. Ascashon un aton chaca soashona ishara-pacushanonfo un oni.

<sup>12</sup> Ascano un mato yoinon. Ratoran futsa cien chashoan ayafiano fustishta amaqi funoano atirifi nan noventa y nueve faasi fununun potayofaintio a fusti funoa funayoicaquin nan fuchaitian. ¿Ascan man ahuu cuscara shinantiromun? <sup>13</sup> Ascashu noventa y nueve ahuun chashoanfoqui unimafiaicai nan funoa fusti fuchiaquicaifin fasi unimai finacoinquin. <sup>14</sup> Nanscarifiai maton Upa Dios nan nai muran icatocai nan ua rama icoinra huafu fustishta funopaima.

*—Ahuuscashumain Diospan yora rafu raunantirofoquin, —ishon Jesús ato yoini*

*Lc 17.3*

<sup>15</sup> Ascacun tsain futsari un mato yoi. Ua icoinra huaa futsan mia chaca huacun aqui cashon mia chaca huaa cuscan nan fusti yoihu. Min yoiai cuscan nicashquin yoinon, “Ai. Mian yoia cuscan icon. Un mia chaca huaa. Ascacun ua rau huapun,” ishon yoitiro. Ascaquifin mihuunoashu afanan Diosqui nasoquin afanan mifu rafushquin.

<sup>16</sup> Asca min yoiai cuscan mia nicacasmaiton icoinra huaa fusti iyamarai rafu iyohuu nan nocofunun yoiai cuscan nicaquin arifi icoinra huanonfo. <sup>17</sup> Ascafia nan rafuri nicapaiyamaiton icoinra huafu ichanainfotian nannoshon nantifi tapimahuu. Asca nan ichananfori nicacasmaiton nanfoan yoitirofo, “Aacai afanan Diospan yoracoin cuscaramaran,” ishon.

<sup>18</sup> Ascacun un mato icon yoi. Ahuara man nunoshon yoia cuscan arifi Dios nan icanoshon nannori yoi. Nanscarifiai man ahuara nunoshon yoiyamaino arifi Dios nan icarishon yoitiroma. <sup>19</sup> Afanan un mato yoi. Man rafu nuno mai ano ichananshon nannori rafu shinanqui man ahuara yocaiton nan uhuun Upa Dios nai muran icaton

mato ashoshqui. <sup>20</sup> Ascashu rafu iyamarai rafu non fusti yora ua icoinra huashu ichanainfoanno urifi un atofu ichanainran,—ishon Jesús noco yoini.

<sup>21</sup> Ascaiton Pedronun yocani —¿Ifon, futsan ua chaca huafafainaitomun un rau huaquin ahuuti huatiroquin? ¿Siete un rau huaquin huatiromun? —huaiton. <sup>22</sup> Jesús cumani,—Ma. Siete huaquima. Nan mia chaca huafafainaiti min rau huatiroran,—ishon yoini.

### *Oinmatinin futsa rau huapainimahuunshon ato yoini*

<sup>23</sup>—Ascacun un mato yoiai cuscan nanfohuunshon man tapitiro ahuu cuscaramain Diosin ahuun yorafo iquifain ato yonotiroquin. Isca huaquin mato tapimai. Niaifoan ahuun oinmatifo cunani nan nifiafo cuscan inanonfo. <sup>24</sup> Ascano nan oinmati futsan ahuun niaifo fasi ichapacoin millones nificun aqui ihuunifo. <sup>25</sup> Nan nifian cuscacai ahua inantiro inima. Ascacun ahuun niaifoan yoiqui isca huani, “Min ua ahua inantiroma. Ascacun un mia niaifo futsa inain min ahuun yonomati inon. Nanton mihuun rafanan ua pui inanon. Ascacun un mia inanfain min ahuin yafi min facufo non min mafofori nantifi min aya cuscan un inanmitsai ahuun rafanan min ua nifian cuscan fishquin,” ishon niaifoan yoiaiton. <sup>26</sup> Nicaquin oinmatinin ahuun ratoconun mai chachishon yoiqui isca huani, “Ifon, uhuun ramapaihuu. Funayamapun. Un mia nifian cuscafin un mia chipo nantifi inainqui,” ishon yoini. <sup>27</sup> Asca huaiton nicai niaifo ahuun ramapaiquin yoini, “Afanan ratuyamahuu. Natian min ua nifian cuscan un afanan shinainma. Min ua inanyamafiaiton nantifi un soai min ua afanan nifinonma. Ascacun casharatahuun,” huani.

<sup>28-29</sup> Ascano niaifoan ahuun pushu murannoashu caqui afu oinmati futsa fuchini. Nantori nan ichapamashta nifian ini. Shafa fusti yonona nifian ini. Ascafiacon aqui nocoshon tumosfain achishon yoini. “Mian nifian cuscan ua inanriscahuu,” huaiton ratoconun mai chachishon yoini, “Funayamapun. Un mia inanon,” huani. <sup>30</sup> Asca huafiaitocai futsa manapainima. Ascataama futsanrocon cunu muran iquimani nan nifian cuscan inaintian amuran iyonon. <sup>31</sup> Ascaiton oincani oinmati futsafo fasi ahuun ramapaicoinnifo. Ascano focashon nan acaiton oian cuscan niaifoqui chaninifo. <sup>32</sup> Ascano focashon yoiaifoan nicaquin niaifoan ahuun oinmati cunashon yoini, “Minfin fasi chacacoinquin. Mian fasi ichapacoin nififiashon min yoiqui isca huaa, ‘Ifon, manayopun. Un mia nifian cuscan un mia inanon,’ ishon mian yoiaiton un mia nantifi soashona. <sup>33</sup> Ascacun un mihiun ramapaia cuscan nanscarifi aqui mifu oinmati futsa min ahuun ramapaia shara icuana. Ascataamarocon min ahuun ramapaiamaran,” ishon niaifoan yoini. <sup>34</sup> Ascashu fasi sinacoinquin niaifoan oinmati cunu muran iquimafain fasi onaintimashqui. Ascashon ahuun oinmatifo yonoqui isca huani, “Nan ua nifian cuscan nantifi ua inanyamaiton cunu muranshon cainmayamacahuun,” ishon nan yora omitsisca huamisifo ato huani.

<sup>35</sup> Nanscarifi huaquin ratoran futsan mato chaca huafiacun man ato rau huayamaino niaifoan ahuun oinmati chaca onaintimana cuscan huafain nanscarifi aquin nan uhuun Upa Diosin nai muran icaton matori onaintimashquiran,—ishon Jesús noco yoini.

## 19

### *Nocofunu yafi ainfo ununantirofihuunoa Jesús ato yosini Mr 10.1-12; Lc 16.18*

<sup>1</sup> Ascano tsainqui anaititan Jesús nocofu Galilea anoashu Judea mai unu Jordán ocuma futsa cani. <sup>2</sup> Ascaiton yorahuanrasiton mufaincun nannoshon nan isinincaifoti ato caya huani.

<sup>3</sup> Ascaino Fariseofo Jesusqui funifo. Amaquiri cumamapai fucani. Ascacun yocanifo, —¿Moisés cununi cuscan nocofunun ahuin unupaiquin unutiromun? ¿Nocofunun ahuin ahuuascarashtha aiton unutiromun? —ishon yocaifoan.

<sup>4</sup> Jesús ato cumani, —¿Man Moisés cununi cuscan oinmisimamun? Diosin nantifi onihuani. Tau huaquin nocofunu yafi ainfo onihuani. <sup>5-6</sup> Ascano Diosin yoiqui isca huani, “Ascacun nocofunun ainfo fiaino apa yafi ahuamaqui pashcashu ahuin fu itiro. Ascashu nan fusti shinantsa ashcaquin,” ishon cununiquin. Ascacun Diosin ato fianan huaa cuscan afanan tsoa pashcanantiromaran, —ishon ato yoaiton.

<sup>7</sup> Yocanifo, —¿Nan iconfiacunasca ahuuscaquimun Moisés yonoquin isca huanquin? “Tsoan ahuin unupaiquin iquisi cunushoquin isca huatiro, ‘Un afanan mia fipaima. Mun mia unuiran,’ ” ishon Moisés cununiran, —huaifoan. <sup>8</sup> Afanan ato cumani, —Manfin nan maton shunifo cuscaraquin. Nanfoanri Dios nicacasmapaonifo. Nanscarifi huaqui marifi man nicacasmai. Ascacun rama man yoia cuscan nannori Moisés cununi. Ascaficai Diosin tau huaqui anori yononima. <sup>9</sup> Ascacun un mato cayacafi yoi. Ratoran futsan ahuun ahuin nocofunu futsa fu iyamafiacun ahuin unui futsa fishquin. Asca huaquifin nanton chaca huaiquin. Nan ahuun ahuinma fu iquin cafiscairan, —ishon Jesús ato yoini. <sup>10</sup> Ascaiton nicaquin non afu rafuafoan yoini, —Nanscaracun nocofunu yafi ahuin fiananfoma shara icuanaran, —non huaiton.

<sup>11</sup> Jesús noco cumani, —Un yoiai cuscacai atirifi yorafoan tapitirofoma. Nan Diosin ato shinanmanafoansifin tapitirofoquin. <sup>12</sup> Ascano atirifi nocofunufocaiyainfo fu fianantirofoma. Atirifi nan cainni cuscan ainfo fu itiroma. Ascan futsafoan atirifi chaca huatiro ainfo fu inonfoma. Ascaino atirificaiyainfo fu fiananfoma Dios yonoshashoshcaquin. Ascacun tsoa ahucionma itiromainquin nan un mato yoiai cuscan nicacahuun, —ishon Jesús ato yoini.

*Jesús apa Dioshuunshon facufo shara huani  
Mr 10.13-16; Lc 18.15-17*

<sup>13</sup> Ascaino yorafoan aton facumishti Jesusqui ihuunifo ato manmanpacuquin Apa Dios cufishonon. Asca huafiaifoan non afu rafuafoan ato yoini, —Maton facufo ihuutan nocon Ifo fucash huayamacahuun, —ishon non ato yoaiton. <sup>14</sup> Jesús noco yoini, —Ato nitun huayamacahuun uqui funonofo. Uhuun Upa Dios niaifo icariafofin nan facumishti cuscaraforiquin, —ishon yoini. <sup>15</sup> Ascashon facufo manmanpacutan Jesús cani.

*Pushcohauai mafo ichapaya Jesús fu tsainni  
Mr 10.17-31; Lc 18.18-30*

<sup>16</sup> Ascano pushcohauai Jesusqui caashon yocani, —Tapimamisiton minfin sharacoinquin, ¿Unmun ahua shara huatiroquin Dios fu ipashashquin? —ishon yocaiton. <sup>17</sup> Jesús cumani, —¿Ahuuscaquimun mian yocaiquin ahuara sharahuunoa? Nannofin fustiquin shara. Naanfin Diosiquin. Ascan min Dios fu ipapaiquin nan noco yononi cuscan nicacoinfain nan yoia cuscacoin min huatiroran, —huaiton. <sup>18</sup> —¿Rato noco yononicaimun un nicacoinfain nan yoia cuscan un huaiiqui? —ishon yocaiton. Jesús yoini, —Futsa rutuyamahuu. Min ahuinma fu iyamahuu. Ahuara onuyamahuu. Chaniri yoyiamahuu. <sup>19</sup> Upa yafi uhua nicasharafain ato shara huahuu. Nan mifiri min noiai cuscan futsafohuunri noihuu, —ishon yoaiton. <sup>20</sup> —Nantifi min ua yoiai cuscan mun nanscacoin huaa. ¿Ascan ahua futsamun un ahuusca huatiroquin ahuunoashu isharashquin? —huaiton.

<sup>21</sup> Afanan yoini, —Min Dios cuscara shara ipaiqui nantifi min aya cuscan inanmitsashon ahuun rafanan pui fihuu ahuuomafo ato inanshquin. Min ascaitonfin Upa Diosin nai muranshon mia ahuara sharacoin mucushoniquin. Asca huatan ua tanasharahuu, —ishon Jesús yoini.

<sup>22</sup> Asca huaiton nicai nan pushcohuai puusinima. Mafo ichapayashu ahuun mafofo inanmitsacasmai. Ascantan Jesusmaquinoashu cani. <sup>23</sup> Ascashu man caano Jesús noco yoiqui isca huani, —Un mato icon yoi. Yora mafo ichapaya fustirasi uhuun Upa Dios niaifo ari nocopafiacani nocotirofoma. Nanfoan aton mafo ichapa shinanquicai tsoan Dios shinantiroma. <sup>24</sup> Ascacun afanan un mato yoi. Nan ina camellocai acoya shoi muran finontiroma. Mimacaifi nocofunu mafo ichapaya Diosin niaifo ari nocotiromaquin, —ishon noco yoini.

<sup>25</sup> Ascaiton nicacaquin non afu rafuafo mustairitan non yoini. —¿Ascan tsoa Dios fu nipatiromun? —ishon non yocaiton. <sup>26</sup> Jesús nocoqui fusoacuhuan noco cumani, —Nocofunucai afiri numatiroma. Diosin fustitofin yorafo numatiroquin. Nantofin ahuamamishti huatiroquin. Nocofunufoan atiroma cuscan nan Diosin huatiroran, —ishon noco yoaiton. <sup>27</sup> Pedronun yoini, —Ifon, nonfin nocon ahuarao nantifi yafi nocon yorafo non pota furani mifu oaquin. ¿Ascan Diosimun noco ahua inainquin? —ishon yocaiton.

<sup>28</sup> Afanan Jesús noco yoiqui isca huani, —Un mato icon yoi. Un chipo nantifi manifoti iquinaitian nantifiton ua oinshquicani uhuun Upa Dios cuscara sharacoin icaiton. Nantianri marifi nan ua tanamisi nocon caifo doce shoco Israelifo marifi man ato iquishquin. <sup>29</sup> Ascataris tsoan uhuunshon ahuun pushu yafi ahuun yorafo potafain apa potafain ahuari potafain ahuun facufo yafi ahuun mairi potashon ua tanapaisharai. Nanscara yorafin uqui nocoaitian fasi paratama fiishquiquin. Ascashu ufu ipanaca. <sup>30</sup> Ascafia yora ichaparasi niyoashu nan niaifo cuscarafo. Ascan naashucal afanan tsoa ahua ishquima. Nanscarifiai atirifi niyoashu nan ahuama shinantsafo. Ascafia naashu u futan futsafori iquishcani.

## 20

### *Mau yonomisifohuunoa ahuara futsa Jesús ato tapimani*

<sup>1</sup> Ascano ahuu cuscaramain Upa Diosin ahuun yorafo iquinai cuscaraquin afanan un mato tapimai isca huai. Mau ifoan funamanrishta nocofunufo funai cani ahuun mau uhuapa ano yonoi fononfo. <sup>2</sup> Ascano ato fuchishon yoiqui isca huani, “Uhuun mau ano yonoi focahuun. Nan man shafa fusti yonoa cuscan un mato inain. ¿Ascan sharamun?” ato huaiton. “Ai. Sharafinquin,” huanifo. Ascashon ahuun mau ari ato nichini.

<sup>3</sup> Ascantan man fari cuyainano mau ifoan caaquin oian plaza ano nocofunufo nia ini tsoa yonoima. <sup>4</sup> Ascaiton mau ifoan ato yoini, “Uhuun mau ano yonotacahuun un mato ahuun rafan inansharanon,” ato huaiton. Nicacani fonifo yonoi focani. <sup>5</sup> Ascano mau ifo afanan fari masafinin racano caaquin oian atirifi nocofunufoan ahuushta huatama niafo oinquín. Ato yoini, “Uhuun mau ari fotacahuun,” ato huaino man foafono. Afanan man fari cushca cainnaino macushcamuano atirifi fuchishon nanscarifi huaquin ato nichini. <sup>6</sup> Ascantan man yatai fari nii manaon caano mau ifoan afanan caaquin atirifi fuchini yonocanima niafoan. Ascaiton ato yocani, “¿Ahuuscaimun nan shafatisho yonotama man niaquin?” ishon ato yocaiton. <sup>7</sup> Cumanifo, “Tsoan ahuashta noco yonoamaran,” huaifoan. “Ascacun marifi uhuun mau ari ua yonoshotacahuun,” ato huani.

<sup>8</sup> Ascashon man yamuaino mau ifoan yonona niaifo patashari yononi, “Ua yonoshonaifo cunahuu nan yonoafo rafanan ato inanshquin. Ascashu ato inanqui tau huahuu nan ahuun unutaqui foafo yafi nan foi tauafo,” ishon yononi. <sup>9</sup> Ascaino man fari nii manaon caano foafo. Nanfo ato inanni naan shafa fusti yonoa shinantsa huaquin. <sup>10</sup> Ascano nan funamanrishta yonoi tauafoan oincaquin yoinifo, “Mau ifoan ato inanshara. Ascan nonfin paratama yonoaque. Ascacun noco fasi paratamacoin inainran,” ishon shinannifo. Ascafia nan chipo iquiafo ato inan cuscari ato inanqui huani. <sup>11</sup> Ascashon ato yonohuunshon ato inainton fiicani mau ifoqui tsain chaca

huacani afi ranan yoinancaquin yoinifo. <sup>12</sup> “Ascan nonfin nan shafatishon yonoaquin. Fari isicoin muran. Ascan man fari caino chipo fuafu min ato inan cuscan huaquin nocorifi min inainran,” ishon yoiaifoan. <sup>13</sup> Mau ifoan futsa cumaqui isca huani, “Uhuun yorashta. Uncai mia inanqui chaca huama. ¿Ascan manmun u futan shara huama man shafa fusti yonoaihuunoa? Man manfin ‘Shararan’ huaaquin. <sup>14</sup> Ascan naquian min pui fihuuy min pushu ano catashquin. Ascan nan fari man nii manaon caano yonoafo nan un mia inain cuscan nanfori un ato inansharapai. <sup>15</sup> Nan un ato inanpaiyai cuscan un ato inantiro. Nanmain uhuun puicufin. ¿Ascan ahuuscaquin nan faricaino yonoafo yafi man uqui shinain chacaimun? Unfin futsafori shara huapaiquin,” ishon mau ifoan ato yoini.

<sup>16</sup> Ascan nanscarifiai Upa Diosin nan icoinra huaqui tau huafu ato shara huaa cuscan huaquin nan chipo icoinra huafori nanscarifi ato shara huairan,—ishon Jesús ato yoini.

### *Naashquiai cuscahuunoa afanan Jesús yoi futsani*

*Mr 10.32-34; Lc 18.31-34*

<sup>17</sup> Ascashu Jesús Jerusalén ano caquin doce non afu rafuafu noco fusti futsano iyoni nannonshon noco yoiquin isca huani, <sup>18</sup> —Non Jerusalén ano canon. Nannoshon futsan ua ato achimai nan nocon niaifo futan Moisés tsain tapimamisifoanri ua chaca huacaquin yoicani isca huacaquin, “Jesús rutucahuun,” ishon yoifocani. <sup>19</sup> Ascashon caifo futsafori ua inancani nanfoan ua cashu mutsama huafain fichi cunoqui tuchiaton ua coshacani. Ascatac ihui coyan iquinanqui ua mastacani un nanon. Uaasca huafiafo osha rafu non fustitan Upa Diosin afanan ua funimairan,—ishon noco yoini.

### *Juan futan Santiago ahuan yocani cuscan*

*Mr 10.35-45*

<sup>20</sup> Ascano Zebedeo ahuun facu rafu Juan yafi Santiago ahuan ato Jesusqui iyoni. Ascatac aqui nocoshon ahuan Jesús ratoconun mai chachishoni. Ahuara futsa yocapaiquin. <sup>21</sup> Ascaiton Jesús yocani,—¿Min ahua yoipaimun un mia ashonon? —huaiton. —Ifon, Upa Dios icari nantiffain min aton niaifo icaitian uhuun facu rafu mifu niaifo patashari ato imahuu. Ascatac niaifoan ahuun tsaoati ano min tsaoaitian uhuun facu rafutan mia naqui huashu tsaoononfo, —ishon yoiaiton. <sup>22</sup> —Man ua yocai cuscacai man tapiama. ¿Un omitsiscashquiai cuscan man ufu omitsiscatiromun? —ishon Jesús ato yocaiton. Cumanifo, —Ai. Non mifu itiroran, —huaifoan. <sup>23</sup> Ato cumani, —Icon marifi man omitsiscai. Ascafia uncai yoitirona tsoanmain ua naqui huashu tsaoicai. Uhuun Upa Diosin fustitofin tapiaquin. Nan catoanfosi ufu nanno tsaoitiroran,—ishon ato yoini.

<sup>24</sup> Ascaiton nicai non afu rafuafu atirifi mucu rafuti nan nanu rafuqui non fasi sinacoinni Jesús naqui huashu tsaoaiyaifoan nicai. <sup>25</sup> Non ascaiton tapishon Jesús noco cunashon yoiqui isca huani, —Uqui fucahuun un mato yoinon. Nan icoinra huafoma niaifoan ato curushcain yonofafainmisifo. Aton niaifo patasharifoanri ato yoiqui isca huamisifo, “Nonfin mato ifoquin. Ascacun non mato yoia cuscan man noco ashorisca huatiroran,” ishon curushcain ato yoimisifo. <sup>26</sup> Ascafiaifoanno ato cuscara iyamacahuun. Man ratoran futsan niaifo ipaiqui maton oinmati man shara huafafainmisi itiro. <sup>27</sup> Ascatac man futsan futsafori finonpaiyaino ahuun yonomati man itiro. <sup>28</sup> Nanscarifiai futsa ua ashononcái un oama. Ascataamarocon un futsafo ashoyoi ua oa. Ascatac un atohuunoashu naashquin un oni afanan Satanás ato ifon inonma,—ishon noco yoini.

### *Jesús fusho rafu caya huani*

*Mr 10.46-52; Lc 18.35-43*

<sup>29</sup> Ascatac non Jericó anoashu caiton yorahuanrasifain noco mufainifo. <sup>30</sup> Ascaino nannori fai cusumun fusho rafu tsaoafo ini. Jesús fain caiton nicaquin nan rafutan

cunanifo isca huaquin,—Ifon, minfin David ahuun funaquin. Nocohuun ramapaipun,—ishon cunanifo. <sup>31</sup> Ascaifoan yorahuanrasifain atoasca huanifo afanan tsainonfoma. Atoasca huafainfoanno oi ashcafínin afanan cunanifo,—Ifon, minfin David ahuun funaquin. Nocohuun ramapaipun,—huariaifoanno. <sup>32</sup> Jesús nituacucahuan ato cunashon yocani,—¿Un mato ahua ahuuusca huashotiro mun?—ishon ato yocaiton. <sup>33</sup>—Ifon, non fasi oinpaicoin,—huaifoano. <sup>34</sup> Jesús atohuun ramapaiquin aton furo muainno cayariscatan oinsharanifo. Ascashon nan rafutari Jesús mufainifo.

## 21

*Jesús Jerusalén ano cani*

*Mr 11.1-11; Lc 19.28-40; Jn 12.12-19*

<sup>1</sup> Ascatañ non Jesús fu cai Jerusalén chaima non noconi. Nan chaimari pushurasi futsa ahuun anu Betfagé machi Olivo tunanman ini. Nanno nocoti chaima Jesús afu rafuafo rafu pushurasi Betfagé ano ato nichini. <sup>2</sup> Ato nichiatima ato yoiqui isca huani,—Nan pushurasi ano fotacahuun. Nanno nocoshon man oian burro facuya nushua man fuchicai. Nan tupushon nuri ua ihuushotacahuun. <sup>3</sup> Futsan mato yocaiton ato yoicahuun, “Nocon Ifo yopaiton non iyoshoni cai. Ascafia non mato nasorisca huairan,” ishon ato yoitacahuun,—Jesús ato huani.

<sup>4</sup> Jesús acai cuscan huaquin nannori ahuunoa Diosin tsain yoimisiton cununi.  
<sup>5</sup> Ascano cunuquin isca huani,

“Jerusalén anoafó yoihúu isca huaquin, ‘Oincapon. Mato niaifocoin matoqui oi. Nan burropan facu camaqui tsaoashu matoqui oi. Nancaí nocofunu ahuaton curafiapaitama shara fustisi oitsii huafain fusti yoitiroran,’”

ishon Diosin tsain yoimisiton ahuunoa cununi.

<sup>6</sup> Ascatañ nan rafutan Jesús ato yoia cuscacoin huashonifo. <sup>7</sup> Ascashon burro yafi ahuun facu Jesús iyoshonifo. Iyoshocata burropan facu camaqui ato camisa fucashonafoanno acamaqui Jesús tsaoinacahuani. <sup>8</sup> Ascatañ caiton yorahuanrasifoan fai naman cayan afufori aton camisafo fucashonifo. Ascaíno atirifiton shupa shatushon nan caifufori nichinifo. <sup>9</sup> Ascano nan yorahuanrasi afufori foaifo futan acachori foaifoan nantififain oi ashcafínin yoinifo.

*¡Aicho! David nocon niaifo ipaoniton ahuun funa nocoqui oi. Nanfin Dioshuunoashu nocoqui oiquin. Ascacun Upa Diosin nan shara huahuu,*  
 ishon yoinifo.

<sup>10</sup> Ascashu Jesús Jerusalén ano caiton nicacani nantifi yorafo mustairicatan afi ranan yocanonannifo,—¿Tsoamun naaquin?—icashu.

<sup>11</sup> Ascaifoan nan Jesús fu foaifoan yoinifo,—Nanfin Jesusquin. Diosin tsain yoimisi. Nanrifi pushurasi Nazaret nan Galilea anoquin,—ishon yoinifo.

*Jesús Dios fu tsainti pushu muranshon ahuara chacafo potani*

*Mr 11.15-19; Lc 19.45-48; Jn 2.13-22*

<sup>12</sup> Asca huatan Jesús Israelifoan Dios fu tsainti pushu muran iquitoshiquin oian amurannoashu ahuara inanmitsashon pui fiaifoan oinqui nan sapa acamaquishon pui fiaifo finifoan arasaquin futsani. Ascashon nan ruhui inanmitsaifoan aton tsaotiri finifoan potaquin futsani. <sup>13</sup> Ascashon Jesús ato yoini,—Diospan tsain cunuquin isca huani, “Ú fu tsainti pushu muranshon man ua fusti cufitiroran,” ishon cunuifiáni nan yomutsofoan ichananti cuscara man huapairan,—ishon ato yoini.

<sup>14</sup> Ascaíno fushofo yafi nipaiqui ranainfo Dios fu tsainti pushu muran Jesús qui funifo. Ascacun ato caya huani. <sup>15</sup> Ascaiton nan Dios fu tsainti pushu muranshon unimacaquin facufoan oi ashcafínin yoinifo,—¡Aicho! Nan David ahuun funa Jesús fasi shara. Ascacun nan shara huahuun, Upa Diosin,—ishon yoinifo. Tsoan atiroma cuscan

huaquin Jesús ato shara huashomisiascaifoan nicaí Israelifoan niaifofo yafi Moisés tsain tapimamisifo sinacoinnifo. <sup>16</sup> Ascashon nanfoan Jesús yoinifo, —¿Nan facufoan yoiaifo cuscan min nicaimamun? —ishon yocaifoan ato cumani, —Aifain. Munfin nicaiquin. ¿Ascan marifi nan Diosin tsain cununi cuscan man man nicamisimun? Cunuqui isca huani,

“Mihuunshon facufoan mihuunoa tsain shara yoicaniran,”  
—ishon cununi.

<sup>17</sup> Anori ato yoitan atomaqinoashu no fu cai pushurasi ahuun anu Betania ano cani. Nanno osha fustiyoni.

*Fana higuera fimi yama cai yaiton Jesús ahun tsain mansi namani*

*Mr 11.12-14, 20-26*

<sup>18</sup> Iyoconaino Jesús Jerusalén ano cai fonaincoinni. <sup>19</sup> Ascashu caquin oian fai cusumunri fana higuera fuchini. Ahuun fimi pipaifia ahuun puifosi ini. Ascacun nan fana Jesús yoiqui isca huani, —Afanancai min fiminacamaran, —ishon yoini. Yoiquin asca huaino fana tsasisiriscatani.

<sup>20</sup> Ascaiton oin non afu rafuafo non mustairini. Ascashon non yoini, —¿Ahuuscashumun nan fana tsasiriscaquin? —ishon non Jesús yocaiton.

<sup>21</sup> Noco yoini, —Un mato icon yoinon. “Un icoinra huai iyamarai un icoinra huaimaran,” ishon shinantama man icoinra huacoinshon un fana tsasi huaa cuscan marifi man nanscarifi huatiro. Ascashon machiri man yoitiro, “Tsucucai. Unuhuan muran pacuhuu,” man huaino unuhuan muran pacuriscatiro. <sup>22</sup> Ascacun man icoinra huacoinshon ahuarashta man Upa Dios yocaiton mato ashotororan, —ishon Jesús noco yoini.

*Jesús noco yonotiro*

*Mr 11.27-33; Lc 20.1-8*

<sup>23</sup> Asca huatan Jesús Israelifoan aton Dios fu tsainti pushu muran iquishon ato yoiaino Israelifoan aton niaifofo aqui funifo. Aqui fucashon yocanifo, —¿Min acai cuscan tsoan mia yonoamun? —ishon yocaifoan. <sup>24-25</sup> Jesús ato cumani, —Urifi un mato yocai. ¿Juanpan yorafo unu muran iquimapacuni tsoan yonoa asca huanimun? ¿Diosin iyamarai nocofunufoan yononifomun? Man ua cumasharaiton urifi un mato cumatiroran, —ishon ato yocaiton. Nicacani afiranayoinannifo —Diosin Juan nichiniran non huaiton Jesús noco yoitiro, “¿Ascan ahuuscaquin man Juan icoinra huamamun?” noco huatiro.

<sup>26</sup> Ascan Juan nocofunufoan nichiniran non huaino yorafo nocoupi sinatirofo. Nantifi yorafoanmain yoimisifo “Juanpan Diosin tsain yoimisiran,” ishon. Ascacun noco asca huatiroforan, —icashu niaifofo yoinannifo atoqui musucani. <sup>27</sup> Ascashon Jesús yoinifo, —Noncái tapiama tsoanmain Juan yonoquin, —ishon yocanifo. Jesús afiri ato yoini, —Urificai un mato yoima tsoanmain ua yonoa un ahuarafu huaiquin, —ishon Jesús ato yoini.

*Pushco rafuhuunoa ahuara futsa ato yoini*

<sup>28</sup> Asca huatan ato yocani, —¿Man raquiri shinainmun? Nocofunu facu pushcohuai rafuya ini. Ascashon furu iyoa apan yoini, “Upashta, nocon mau ano yonotahuun,” huaiton. <sup>29-30</sup> Furumun cumani, “Ma, upa, un yonoicaimara,” huafashu chipo shinan futsashu cani. Ascashon furu chipocuri yoini, “Upashtan, nocon mau ano yonotahuun,” huaiton. “Ai, upa. Mun yonoicairan,” huafashucai canima. <sup>31</sup> ¿Ascan rato ahuun facu rafu nan apa yoia cuscacoin animun? —ishon Jesús ato yocaiton. —Nan iyoaran, —ishon cumaifoan. Afanan ato yoini, —Un mato icon yoi. Nan yora chacafo niaifo pui fishomisifo yafi ainfo furomafoanri ua icoinra huacanashu nanfo Diosin nantifi iquinai ano iqui tautirofo. Ascan mancái ari iquitiro. <sup>32</sup> Juanpan mato yoisharapaoni isca huauquin, “Man chaca huamisi cuscan shatufain natian Dios shinancahuun,” ishon mato

yoipaoni. Ascafacai man icoindra huanima. Nan niaifo pui fishomisifo futan ainfo furomafaonri icoindra huaifoan oinfiaquicai maton chaca shatuyamafain man icoindra huamisimaran,—ishon Jesús ato yoini.

*Mau yonomisi chacafohuunoa ahuara futsa ato yoini  
Mr 12.1-12; Lc 20.9-19*

<sup>33</sup> —Nicacahuun un afanan ahuara futsahuunoa un mato yoi mato tapimashquin. Mau ifoan ahuun mau ano fimi ahuun anu uva fanani. Ascashon ahuun fimi ica cuscan toquiri cunuacuni ahuun fimi fana ahuatón chaca huanonma. Asca huatan mai quini huashon amuran uva huashon ahuun tau puama puama anifo ahuun fimi unu fishcaquin. Ascashon toquiri cuyacoin masoni anoshon ahuun yonomatinin cushushonon. Asca huaquin anaitishon futsafo yoini ahuun mau cushushononfo. Asca huafaini mau ifo mai futsa ano cayoni. <sup>34</sup> Ascashu man fimi ano mau ifoan ahuun oinmati futsafo mau ano nichini ahuun fimi fishononfo. <sup>35</sup> Ascano noocoafaoan fimi cushumisifoan ato achicashon futsa sutufain futsa rutucinfain futsari toquirinin tsacaqui futsanifo. <sup>36</sup> Ascano mau ifoan ahuun oinmati ichapama nichiqui tau huani. Ascashon afanan acachori fasi paratama nichini. Ascafia nanfori ato chaca huanifo. <sup>37</sup> Ascashon mau ifoan shinanni, “Uhuun facucoin un nichicuraca nicatirofoati,” ishon ahuun unutaqui furucoin nichini. <sup>38</sup> Ascashon apa nichian caiton oincani nan fimi cushumisifo ahuun yoinancaquin yoinifo, “¡Oincapon! Mau ifoan ahuun facu oi. Na maufin apanaquin. Ascafia apa chipo ahuun facu inanshquin. Ascacun non rutunoncahuun nocona mau inon,” icashu yoinannifo. <sup>39</sup> Ascatan furu iquicuranaiton achicashon mau tsisumun sharafoshon rutunifo.

<sup>40</sup> ¿Ascan mau ifo oshon nan fimi cushumisifo ato ahuuasca huashquimun? —ishon ato yocaiton. <sup>41</sup> Cumanifo, —Nan yora chacafo rutui atohuun ramapaitama nanonfo. Ascashon ahuun mau futsafo cushumani cushusharashononfo. Nanfoan man fimecun cashcu futsa mau ifo inanonfo,—ishon yoiaifoan.

<sup>42</sup> Jesús afanan ato yoiqui isca huani,—¿Diosin tsain cununi cuscan man man oinmisi-mamun? Isca huaquin cununi,

“Pushu yonomisifoan pushu quishi shara potanifo. ‘Nan sharamaran’ ishon potafiafo pushu ifoan afanan fiini nanhuunoashu pushu mutsisipa inon.” Nanscarifiai niaifofaoan Diospan facuhuunoa isca huaqui yoishquicani, “Nacai ahuama. Sharamaran,” ishon yoiqui potashcani. Ascafia Upa Diosin ahuun facu catoan ahuunoashu nantifi ahuun yorafo nipanonfo. Ascacun non yoitiro “Diosin Furunhuunshon aca cuscan fasi shararan,” ishon cununi.

<sup>43</sup> Ascacun Diosin maton niaifocoin ipai ahuun yorafo ato iquifai ato iquipacushquin. Ascafia man Dios nicacasmaiton futsafo catonshquin a fu ipanonfo. <sup>44</sup> Unfin nan pushu quishi cuscaraqui. Futsafoan uhuunoa cayacafi tapimana cuscan icoindra huayamashu funocoinshcani. Un atoqui sinaqui omitsiscapanacafo muran un ato potashquin,—ishon Jesús ato yoini.

<sup>45</sup> Ascaiton nicacani Israelifoan aton niaifofo futan Fariseofoan tapinifo atohuunoa Jesús yoiaiton. Nanfoan icoindra huafomahuunoa ato yoini. <sup>46</sup> Ascano ahuun yoinan-nifo,—¿Ahuuscashomain non Jesús ato achimanan ranushumuaton rutunon? —ishon shafatifi shinannifo. Ascafiaifoanno yorafoan yoinifo Jesús Diospan tsain yoimisiran ishon ahuunoa yoinifo. Ascacun na yorafoan yoiaifo cuscan tapinifo niaifofo yafi Fariseofoan yorafoqui musucaquin Jesús achimatai inifoma.

<sup>1-2</sup> Afanan Jesús ato yoiqui ahuara futsa ato tapimanon isca huani, —Upa Diosin niaifoan ahuun yorafo iquinaimain ahuu cuscaraquin un mato yoinon. Ua nicacahuun. Niaifoan ahuun facu ainfo fiaino ato chanihuani ichananshon ato futan pifain atofu fasi unimashquin. <sup>3</sup> Ascano man itisharashon ahuun oinmatifo nichini nan ato chani huaifo ato ihuitanonfo. Ascafiai tsoan opainima. Fucasmarocon anifo. <sup>4</sup> Ascatac afanan oinmati futsafori nichiqui yoini, “Ato yoitacahuun. ‘Uhuun facu ainfo fiaino mun tushu itishara huaquin. Moi rafu rutufain yoina shoa sharari un rutuaqui pii funonfo.’ Nannori ato yoitacahuun,” ato huani.

<sup>5</sup> Ascano focashon ato yoifiafo afanan fucasmanifo. Atirifi aton mau ari fonifo, pashaifocani. Atirifiri ato inanmitsati ari fonifo. <sup>6</sup> Ascan atiri nanno nituafoan niaifoan ahuun oinmatifo achicashon ato sutufain atirifi ato rutucoinnifo. <sup>7</sup> Ascano ahuun oinmatifohuunoa nicai niaifo fasi sinacoinquin ahuun ranushumuafu nichini a rutumitsamisifo ato rutuqui cuyofain aton pushufo coanonfo.

<sup>8</sup> Asca huatan niaifoan ahuun oinmati futsafo yoini, “Uhuun facu ainfo fiaino un tushu ichapa itishara huaa ato futan piishquin. Ascafia futamarocon fasi chaca huafo. Asca huashucuai afanan futirofoma. <sup>9</sup> Ascacun nan fai uhuapafo nanno nan yora ichapa fotirofo ano fotacahuun. Ratoran futsafo fuchicashon ato yoicahuun Funonfo,” ishon yoini. <sup>10</sup> Ato asca huaino focashon nan fai uhuapafo anoa ratoran futsafo fuchicashon ato ihuunifo. Yora sharafo ihuufain yora chacafori ihuunifo. Ascano nan niaifoan ahuun facun ainfo fiai pushu muran yorahuanrasi fospicoinnifo.

<sup>11</sup> Ascatac niaifo pushu muran iquini nantifi fuafu ato oinpai. Ascashon oian nantififain sahuuti shara sahuuafu ini. Niaifoan ahuun facu ainfo fiaino sahuuti funa sharacoin ato sahuumani. Ascafiaquin oian nocofunu futsan sahuuti shuni sahuua niaifoan fuchini. <sup>12</sup> Fuchishon yoiqui isca huani, “Ahuiscai sahuuti sharacoin un ato sahuumana cuscan min sahuuamamun. ¿Ahuiscai ascara min iquiamun?” ishon yocafainocai nan nocofunu pusinima. <sup>13</sup> Ascaiton niaifoan ahuun oinmatifo yononi, “Nan nocofunu munushfain onushushon faquish muran potacahuun. Nannoashu uaicaifoanno omitsiscapashanon,” ishon ato yoini.

<sup>14</sup> Nanscarifiai Upa Diosin yora ichapa cuna a icano funonfo. Nan ahuun facu noiaifosi afu ipanacafo. Ascafia Upa Diosin fustirasi ato catoin nan icoinra huafosi afu ipashanonfo, —ishon Jesús ato yoini.

### *Niaifoan aton caifofo pui yocamisifohuunoa*

*Mr 12.13-17; Lc 20.20-26*

<sup>15</sup> Ascatac Jesús ato yoiai cuscan nicacani Fariseofo Dios fu tsanti pushu muranoashu chifi focanashu yoinannifo, —Non Jesús ahuara yocanon. Noco amaquiri cumaquin chaca huaiton non cunu muran iquimanon, —icashu ahuun yoinannifo.

<sup>16</sup> Ascashon Herodes ahuun tanamisifo yafi atohunshon tapimisifori Jesusqui nichinifo cucun huaquin yocatanonfo. Ascano focashon yocaqui isca huanifo, —Tapimamisiton, man non tapian min icocoin fusti noco yoifafainmisi. Upa Diosin noco amapaiyai cuscan nannoricoin min noco cayacafi yoimisi. Mincai ahuara yoipai ranomisimari. Nan min noco yoiai cuscan cayacafi min yoimisi. Ahuaricai min fomamisima. Yora ahuaton cunama min yoimisi cuscan huaquin niaifofori min yoitiro.

<sup>17</sup> Ascacufin min shinain cuscari noco tapimahuu. ¿Nan Romanonfoan aton niaifo Cesari pui inanfo cuscan norifi non inantiromun? —huaifoan. <sup>18</sup> Nan fuparamitsamisifoan cucun huaquin yoiaifo cuscan onanshon Jesús ato yoini, —Fuparamitsamisifoan manfin ua amaquiri cumamapaiquin ranushumuafuan ua achicashon ua cunu muran iquimanonfo, —ishon ato yoitan. <sup>19</sup> —Toro ua ismacahuun. Nan man ahuunshon niaifo inanmisi, —ato huaiton. Toro fushonifo. <sup>20</sup> Ascashon Jesús ato yocani, —¿Tsoa ointsa torohuun nuamun? ¿Tsoan ahuun anuri nuamun? —ishon ato yocaiton. <sup>21</sup> —Niaifo

Cesarinnaran, —huaifoan. —Ascan Cesarinacun nan inancahuun. Ascan Diosinacun Diosiri inancahuun, —ishon ato yoiaiton.

<sup>22</sup> Nicacani fasi mustairicatan yoinifo, —Jesús yoiai cuscacai tsoan tafitiromaran, —icashu afi ranan yoinannifo. Ascatacamaquinoashu pashcafaini fonifo.

*Yora naashu afanan funitirofihuunoa yocanifo*

*Mr 12.18-27; Lc 20.27-40*

<sup>23</sup> Ascano nan shafatari Saduceofo Jesusqui funifo. Nanfoan shinanquin isca huamisifo, —Yora naashucuai afanan funinacamaran, —ishon yoinifo. <sup>24</sup> Ascan nanfo Jesusqui fucashon yocanifo, —Tapimamisiton, noco shuni Moisés noco cunushoqui isca huani,

“Nan ratoran futsa ahuin futan facu acashma naano afu nanua futsan ahuun facahua fitiro a futan facu aashqui,”

ishon cununi. <sup>25</sup> Un mia yoinon. Siete nanupacuafihuunoa. Nanfo nocofu iyopaonifo. Aton iyoacoin ahuinyain tauni. Ascafiaflashon a futan facu acashma nani. Ascano chipocuton ahuun facahua fiini. <sup>26</sup> Ascashu arifi a futan facu acashma naani. Ascano chipocu futsari fiini. Arifi a futan facu acashma naani. Nanscasiai. Ascapacutan amaqui nai cuyonifo. Aqui facu ayamacaina. <sup>27</sup> Ascatacamaquinoashu unutani ainfori naani. Facu nanuyamacai. <sup>28</sup> ¿Ascan ratotocaimun nai muranshon nan yorafo naashu funiaifotian fishquiquin nan fusti fipashquin amaqui nai cuyoaf? —ishon yocaifoan.

<sup>29</sup> Jesús ato cumani, —Man man funoa. Mancaí Diosin tsain tapiamafain ahuun yonoricai man tapiama. Ascashofin amaquiri man ua yoiquin. <sup>30</sup> Naacanashu funiafocai Dios icari nocotan afanan fianannacafoma. Nantifi Diospan oinmatifo afu nai muran icafo cuscara iishquicani. <sup>31</sup> ¿Ascacun yora naashu funishquiaifihuunoa Diosicoinin mato cunushoni cuscan man man oinmisimun? <sup>32</sup> Isca huaquin Diosin yoini, “Unfin Abraham non Isaac non Jacob afoan aton Diosiquin,” ishon yoini. ¿Yora naashu afanan funiyamaino ahuuscashumun Dios fu itiroquin? Ascacia ascarama. Yora man naafianishaquin afanan nia nanfofin Dios fu itirofoquin. Ascacun Upa Diosifin aton Diosiquin, —ishon Jesús ato yoini.

<sup>33</sup> Jesús Saduceofo yoiai cuscan nicacani mustairicatan yoinifo, —¿Ahuuscashomun iscara tsain noco yoiquin? Tsain sharacoin iquinaran, —ishon yoinifo.

*Diosin yononi cuscan nantifi sharafiaшу nan fusti shara finaciaia*

*Mr 12.28-34*

<sup>34</sup> Ascano Jesús Saduceofo tsain shatumana nicacani Fariseofo afanan aqui funifo yocai fucani. <sup>35</sup> Ascacun Moisés yononi cuscan tapicoian futsan Jesús amaquiri cumamapaiquin yocani, <sup>36</sup> —¿Tapimamisiton, Moisés Diosin yonoa cuscan cununi. Ascan nan ratocaimun fasi shara finaciaiaquin? —ishon yocaifoan. <sup>37</sup> Jesús cumaqui isca huani,

“Nocon Ifo Dios noi qui fasi mato ointi muranshon noifain fasi mato nomuran-shori noifain mato shinanco yashon fasi noi huu,”

ishon Moisés cununi. <sup>38</sup> —Nan yononicaifi fasi shara finaciaiaquin. <sup>39</sup> Futsari nan-scaracuana yonoqui isca huani,

“Nan mifiri min musu huamuai cuscarifi aquin mia chaima icafori noi huu.”

<sup>40</sup> Nantifi Moisés yononi cuscan yafi Diosin tsain yoimisifoan yosipaonifo nan Diosin yononi rafuhuunoa cununifo. Dios yafi futsafo noicoinquifin nantifi Diosin yononi cuscacoin man aiquin, —ishon Jesús ato yoini.

*Tsoancaimun Cristo ahuun shuni ipaoniquin*

*Mr 12.35-37; Lc 20.41-44*

<sup>41</sup> Ascashu Fariseofo afu ichananfoan Jesús ato yocani, <sup>42</sup> —¿Nan Diosin catonni Cristo-huunoa ahuu cuscara man shinamun? ¿Tsoan funacaimun? —ishon ato yocaiton. —David ahuun funaran, —huaifoan. <sup>43</sup> Ato yoini —¿Asca ahuuscai David Diospan Yoshin Sharahuunshon nan Diosin catonni yoiqui isca huanimun?

<sup>44</sup> “Upa Diosin uhuun Ifo Cristo yoini isca huaquin, ‘Minfin ufu niaifocoinquín. Mia noicasmaifoan min ato finoncoian. Un ato shatumashquin mia afanan ahuusca huatiroma. Min ato iquiniran,’”

ishon Diosin yoini cuscan David cununi. <sup>45</sup> ¿Criston David Ifono ahuuscashucon ahuun funa itiromun? —ishon Jesús ato yoiaiton. <sup>46</sup> Nicaquicai tsoan ahuashta cumatiro inima. Ascashu nantifi puusinifoma. Ascan anantiancái tsoan afanan Jesús ahuashta yocanima. Ato cayacafi cumaiton nicacanashu aqui ranonifo.

## 23

*Fariseofo futan Moisés cununi cuscan tapimamisifoan chaca huamisifo cuscan Jesús yoini*

*Mr 12.38-40; Lc 11.37-54; 20.45-47*

<sup>1</sup> Asca huatan Jesús afu rafuafo yafi nanno niafo yoini, <sup>2</sup> —Moisés cununi cuscan tapimamisifo futan Fariseofoan Moisés yononi cuscan mato tapimacani. <sup>3</sup> Ascan mato tapimanaifo cuscan huacahuun. Ascaflashon nanfoan acai cuscan huayamacahuun. Nanfoan Moisés cununi cuscan mato tapimafiaquicai Moisés yononi cusca-coin acanima. <sup>4</sup> Mato ahuara ihuucuin papimafiaflashocai aton mucuman ahuashta mupaicanima. Nanscarifiai Moisés yononi cuscan nantifi huacahuun. “Fustishta finonmayamacahuun,” ishon mato yonoafo. Moisés yononi cuscan fasi finonmafain mato huamacani. Ascano marifi apaifiaquicai man atiroma. Ascashu maton nomuran man omitsiscrafaitocai matohuun ramapaicanima. Mato yonomisifo cuscacai aafi acanima. <sup>5</sup> Ascashon nanfoan acaifo cuscan futsafoan yoiqui isca huacani, “Nanfotin sharaquin,” ato huamapaicani. Diosin tsain fichiqui cunushon fumananqui nutafain ato sahuuti poyan ocuma rafu nutafain sahuuti chainipari sahuuafó. <sup>6</sup> Ascatañ picani ichananshu nan niaifoan ahun tsaotí ano tsaoafó nantififain ato oinonfo. Nanscarifiai aton ichananti pushu anori shafacafi tsaotiofo. <sup>7</sup> Ascashu nan yora ichaparasi anori fopaicani atohuunoa yoisharanonfo. Nanscafín apaicaniqui. “Tapimamisiton,” ato huaifoan nicapaicani.

<sup>8</sup> Ascacun “Tapimamisiton,” ato huayamacahuun. Nocon tapimamisifin fustiquin. Naan nocon Ifo Dios. Ascashufin man nantifi yorahuantananquin. <sup>9</sup> Ascashori tsoa nuno mai anoa Upa huayamacahuun. Nan nocon Upacoinfi nai ari icaquin. Nan fusti non upa huatiro. <sup>10</sup> Ascatañ “Iforan” ato huayamacahuun. Nocon ifofin fustiquin. Nan nocon Upa Dios. Nan man Iforan huatiro. <sup>11</sup> Ascatañ nan man ratoran futsa niaifo ipaiyaifi nantifiton ato oinmati itiroquin <sup>12</sup> Tsoan nantifi finonpaifafaini naanfin Diosin ismashquiquin aacai ahuama. Ascan tsoa futsafoan ato oinmati cusrashon ato shara huafafainai nanfin Upa Diosin chipo niaifocoim imashquiquin, —ishon Jesús ato yoini.

<sup>13</sup> Ato asca huatan Jesús Moisés cununi cuscan tapimamisifo yafi Fariseofori yoiqui isca huani, —¡Ohua! Moisés cununi cuscan tapimamisifo futan Fariseofoan ua nicas-haracahuun. Manfin fuparamitamisicinfoquin. Upa Dios icano man yorafo iquim-paifiaquicai man ato iquimatiroma. Ascashu marificai man iquitiro. Iquipaifiaifoan man ato catima huua. Ascacun Diosin mato fasi onaintimaquin finacoinsquin. <sup>14</sup> Ascashon man futsafo matohuunoa shinansharamapaifiai man fasi chacacinfo. Ainfo tatuomafori parashon man pushu ato fian. Ascatañ fasi chaicoinri man cufiriatiro matohuunoa shinansharanonfo. Ascafia manfin fasi fuparamitsamisicinfoquin.

<sup>15</sup> Ascashu man foanfafaitia man shinain cuscan yoraforishinanmashquin. Ascaqui fusti fuchishon man icoinra huaa cuscan nanrifi man icoinra huama mato cuscara inon. Ascashon man futsa mato cuscara imano fasi chaca finacaia iiquin. Manfin fasi chacacoinfoquin. ¡Ohuashta! Nanrifi matofu omitsiscapanacafo muran cai.

<sup>16</sup> ¡Ohua! Ascacun Diosin mato fasi onaintimai. Manfin nan fusho cuscarafoflashon man futsafo tapimapaiqui ahuuscashomain Dios tanatirofoquin. Ascan ato tapimapaiquiaquicai marifi man tapiama. Ascashon futsafo man yoiqui isca huamisi, “Tsoan yoiqui isca huai, ‘Dios fu tsanti pushu ahuun anuhuunshon un mia yoia cuscan un mia ashonon,’ huaflashon chipo man shinan futsashon man yoi ‘Nanscanonquin,’ ishon. Ascafia nan Dios fu tsanti pushu murannoa orohuunshon un mia ashoiran futsa huashon. Nanscaco coin huashohuun. Ascan nan non yoia cuscan huashoyamaino ahuara chaca finontiroran,” ishon man yoimisi. <sup>17</sup> Asca nan icon. Manfin nan fushon futsa iyopaiyai cuscarafoquin. Maton mapo curushcoin. Mancai ahua tapiama. ¿Ascan rato shara finacaiamun Dios fu tsanti pushu murannoa oro iyamarai Dios fu tsanti pushucoin? Nan Dios fu tsanti pushuanofin Dios itiroquin. Ascan nancaifin shara finacaiaquin.

<sup>18</sup> Ascashon marifi man yoiqui isca huamisi, “Tsoan yoiqui isca huai, ‘Nan cufiti camaqui ahuara coamisifohuunshon un mia yoia cuscan un mia ashonon,’ huaflashon chipo man shinan futsashon man yoi nanscanonquin ishon. Ascafia, ‘Nan cufiti camaqui un Dios ahuara inanhunshon un mia yoia cuscan un mia ashoiran,’ futsa huashon nanscaco coin huashocahuun. Ascan nan min yoia cuscan huashoyamaino ahuara chaca finontiroran,” ishon man yoimisi. <sup>19</sup> Manfin nan fusho cuscarafoquin. Mancai cayacafi shinantiroma. ¿Ascan ratocaimun shara finacaiaquin? Nan cufiti camaqui ahuara man inan iyamarai nan cufitico. Man cufiahuunshon ina man coashonaino Diosin matoqui unimatiro. Ascafia nan cufiticaifin fasi shara finacaiaquin. <sup>20</sup> Ascashon Dios fu tsanti pushu murannoa cufitihuunshon futsa man yoiquifin nan cufiti camaqui ahuara man inan nancoin yoi cafisca man huaiquin. <sup>21</sup> Nanscarafi aqui tsoan Dios fu tsanti pushuhuushon futsa ahuara yoiquifin nan Diosicoin yoi cafisca huaiquin. Nan muranmain Diosicun. <sup>22</sup> Nanscarifi aqui tsoan Dios ica muranhunshon futsa ahuara yoiquifin nan Diospan tsaotihuunshon yafi nan Dioscoinhunshon man yoi cafisca huaiquin.

<sup>23</sup> ¡Ohua! Moisés yononi cuscan tapimamisifo futan Fariseofoan manfin fuparamitsamisicoinfoquin. Ascacun Upa Diosin mato fasi onaintimashqui. Moisés yononi cuscan nantifi mato fanafo atirifi man Dios inanmisi. Man asca huafiaquicai ahuara shara finacaia man huamisima. Ascashucái man futsafohuun ramapaiyamacain atori man shara huacoianmisima. Mato yorafoan ahuara chaca finonfiacun man ato shara huatamarocon man ato potamisi. Ascan man futsafohuun ramapaicai ato shara huafain ahuara ahuuscarafiaino man ato potayamaino Diosin matoqui unimatiro. Ahuara futsafo Moisés yononi cuscan man huamisi cuscan man shara. Ascafia ahuara shara finacaiarocon huacahuun. <sup>24</sup> Ascafia manfin nan fusho cuscarafoquin. Fushocai oinsharatiroma yora iyoshqui. Nanscarifiai marificai man cayacafi shinantiroma yorafo tapimashquin. Motsa muran napun pacucun man nushfitiro aya shuashquima. Ascafia man nan ina uhuapa camello shuai cafisca huai. Asca huaquifin ahuaraofoan yora imasharatiroma man shinanfafainiquin. Ascafiaflashon yorafo ahuara yopacoiainfo cuscacai man ato ashomisima.

<sup>25</sup> ¡Ohua! Ascashufin man fuparamitsamisicoinfoquin. Maton cucho yafi purato fumancayan chocha sharafiaquicai ocumuran man chocamisima fasi choshtacoin. Nanscarifiai man yorafo shinanmapai yorasharaforan mato huanonfo. Ascafia maton nomuranshocai man shinansharamisima. Man shinanchaca fustumisi. Ahuara fipaiqui futsa chaca huashon man fianmisi. Futsafo yopai cuscan atohuunoa shinantamarocon

mafi man fipaiyai cuscan fusti man shinanfafaini. <sup>26</sup> Fariseofoan mancái cayacafí shinansharamisima. Ascacun iquisí mato nomuran cayacafí shinansharacahuun isharrashcaquin. Man ascaiton nantifiton ointirofo man yora sharacun.

<sup>27</sup> ¡Ohuashta! Ascashufin man fuparamitsamisicoquin. Mahua quini muran yorafo nacun mai huamisifo. Amuran yorafoan shao suyacoinfo. Nan ahuun fupoti toquirininhuan raishamisifo oshopa sharashta inon. <sup>28</sup> Nanscarifiai futsafoan mato oinqui shinantirofo man yora shara ointsa man sharayamafiacun. Manfin fuparamitsamisicoquin. Mato nomuranshon ahuara chacacoinfo man shinammisi. <sup>29</sup> ¡Ohua! Moisés yononi cuscan tapimamisifo futan Fariseofoan. Manfin fasi fuparamitsamisicoquin. Ascacufin Diosin mato onaintimaquin finacoinquin. Ascashon manfin mato shuni Dios tsain yoimisifo mai huanifo ano man ahuara toquiri onihuamisiqui ato shinanshquin. Ascashori maiafo manaon man charofo huamisi. <sup>30</sup> Ascashon man yoimisi isca huaquin, “Nocon shunifoan Diosin tsain yoimisifo rutunifo cuscan nantian norifi niyoshocai non ato rutu cuanimaran,” ishon man yoimisi. <sup>31</sup> Ascan nan man yoia cuscan icon. Maton shunifo rutumistsamisifoan. Marifi man ato cuscaracon. <sup>32</sup> Nanfoan ato chaca huafafainqui ato rutunifo. Ascan marifi man ato cuscaraquin na Diosin matoqui nichiarifi man rutushquiquin.

<sup>33</sup> Ascashu manfin rono cuscarafoquin. Rono paupaton facu cuscarafo. Diosin yoini cuscan nan omitsiscapanacafo muran marifi man iquishcami. Tsoancai mato nitun huatiroma. Marifi nanno man catio. <sup>34</sup> Ascacun un afanan Diosin tsain yoimisifo yafi Diosin tsainhuunshon cayacafí shinansharamisifo non ahuun tsain tapimamisiforí un matoqui nichishqui. Nanforifi man ato rutushquin. Futsan ihui coyan iquinanqui man mastashquin nanon. Ascashon atirifi maton ichananti pushu muranshon man fichi cunoqui tuchiaton man coshashquin. Ascaquin man ato omitsisca huai nan pushufoti cafoquin man ato omitsisca huafocaiquin. <sup>35</sup> Ascashofin nantifi Dios icoinra huafó rutunifoqui. Nan Abel shara rutuqui tau huafain ahuun unutaqui nan Zacarías Berequiaspan facu rutunifo. Nanfin Dios fu tsainti pushu muranshon. Anoshon cufiti chaimashon man rutunifo. Ascan manfin nantifi nan rutunifo cuscan marifi man rutui cafisca huaiquin. Ascacun Diosin atohuunshon mato omitsisca huaqui finacoin. <sup>36</sup> Ascacun un mato icon yoi. Nantifi Diospan yorafo chaca huapaonifo cuscan natian man niyoano atohuunshon mato omitsisca huaqui finacoin.

### *Jerusalén anoashu Jesúis yorafohuunoashu uaini*

*Lc 13.34-35*

<sup>37</sup> ¡Ohua! Jerusalén ano icafoan. Manfin Diosin tsain yoimisifo rutufain nan Diosin matoqui nichian futsaforí man toquirinín ato tsacaqui nanonfo. ¡Ohua! Tacaranun ahuun facufo ahuun pui naman onutiro cuscan huaquin un mato yorafoya cushupaifia mancaifin ua nicacasmamisiquin. Manricai uqui fumisima un mato cushunon. <sup>38</sup> Ascan natiancai tsoan mato cushuima. Diosiricai afanan mato cushuima. <sup>39</sup> Ascacucai man ua afanan oinnacama nan Diosin matoqui nichian un nai murannoashu oaitian. Man yoiqui isca huaino, “Dios nocoqui nichian fasi shara finacaia. Upa Diosin a shara huapanacaran,” ishon man uhuunoa yoishquin, —ishon Jesúis ato yoini ahuunoa.

## 24

### *Jesúis yoini Dios fu tsainti pushu paoinshquiran ishon*

*Mr 13.1-2; Lc 21.5-6*

<sup>1</sup> Ascacan Jesúis Dios fu tsainti pushu murannoashu caiton non afu rafuafoan yoini, —Ifon, oinpon. Nocon Dios fu tsainti pushu fasi sharashtacoinran, —non huaiton. <sup>2</sup> Noco cumani, —Ai. Nan icon. Natian Dios fu tsainti pushu toquiri putsamuashu cunuacua sharashtacoin. Ascafashi nan man oiain chipo paoincanocai afanan rato toquirishta

tushushquima, putsamushquima. Nantifi paoinquin cuyocoinshiran,—ishon Jesús noco yoini.

*Nan cuyoaitian ahuarao iishquiae cuscan*

*Mr 13.3-23; Lc 21.7-24; 17.22-24*

<sup>3</sup> Ascatan machi Olivo ano mapufaintan Jesús tsaoni tsoa futsa anomano non afu rafuafoan yocaqui isca huani, —¿Nan min yoiai cuscan ahuitian ishquimun? ¿Ahuus-cashomun non tapitiroquin nantifi cuyoaitian min afanan oshquiai? Noco yoihuú,—non huaiton.

<sup>4</sup> Jesús noco cumani,—Oinfain mato paranonfoma. <sup>5</sup> Yora ichapafoan “Un Cristoran,” ishon mato parapaishcani. Ascashon yora ichapafori parashcani. <sup>6</sup> Ascaíno mani futsafo ya futsafo rutunainfoan man nicashquin. Ascará nicacani ratuyamacahuun. Un mato yoimisi cuscan nancacoin aíquin. Ascafía nantifi cuyoaitian icataima. <sup>7</sup> Mai futsa ariafo fu futsafo ya rutunainfoanno mani futsafori mani futsafo ya rutunashquicani. Ascaíno mai futsafoanri yora tushuomafo icaifoanno. Mai futsafo ari fasi mai nayanaiyaishquin. <sup>8</sup> Nanscaífin omitsiscaí taushcaniquin. Ascafía chipo fasi finacai omitsiscashcani.

<sup>9</sup> Ascano mato achicashon omitsisca huaquin mato rutushcani. Uhuunshon manifotiton mato noicasmashcani. <sup>10</sup> Ascaíno nantianri atirifi yorafoan ua cachiquiri huashquicani afanancái tsoan ua icoíra huashquicanima. Nanfo afiranán achinan-tananshcani noincasmatanancani. <sup>11</sup> Ascaíno nan fuparamitsamisifoan yoíqui isca huashcani, “Unfin Diospan tsain yoimisíquin,” ishon mato yoishcani. Afocai Diosin tsain yoimisiyamafashon yora ichapafo ato icoíra huamashcani. <sup>12</sup> Ascaifoanno fasi yora chaca huaquin finacoinshtcani. Ascashocai afanán atirifi yorafoan Diosi noishcanima. <sup>13</sup> Ascafía nan omitsisca huafiaifoan tsoan ua cachiquiri huatama tunufain uhuun tsain tanasharacun un cushusharatiro Uhuun Upa Diosin icano afu ipasharanon. <sup>14</sup> Ascano nan tsain shara Diosin nantifi yorafo iquinai cuscan manifoti uhuun tsain yoimisifoan yoiaítian un afanán oshquin.

<sup>15-16</sup> Ascacun Daniel nan Diosin tsain yoimisiton inon pacuai cuscan cunuquí isca huani,

“Dios fu tsainti pushu muran ahuara fasi chacacoinfo futsafoan huanonpacoin-ran,”

ishon cununi. Ascacun nan tapicahuun. Daniel cununi cuscacoin aiton oin nan Judea ano icafoan machi ari ichoriscatacahuun. <sup>17</sup> Ascan tsoa pushu fomancayan niashucái afanán ahuun pushu muran iquitíroma ahuara fiishquin. Ascatama ichoriscatacahuun. <sup>18</sup> Nanscarifiai tsoacai mau ano yonofiai afanán ahuun pushu ano nasotiroma ahuun sahuuti fishquin. <sup>19</sup> Ascacun ohua ainfo nan facu nanuafó yafi aton facu yomumishti chocho acaifo omitsiscaashcani. <sup>20</sup> Ascacun Upa Dios cuficahuun nan omitsiscaitian oipacutian yafi tunutitianri ascanonma. Ascan nantian ascayamaino man ichoima. <sup>21</sup> Nan omitsiscaitiancai tsoan ascara oinyomisima cuscara fasi yorafo omitsiscaí fina-coinshtcani. Diosin yora onihuaquin tau huani chaincái tsoa omitsiscaí ascayomisima. Ascashucái tsoari afanán omitsiscaí ascancacama. <sup>22</sup> Ascashu nan omitsiscaifotian nantifi yorafo cuyocuashquin. Diosin ahuun yorafo nan catoanfo atohuun ramapaiqui omitsiscaifotian ato shatumariscashquin. <sup>23-25</sup> Ascacun ua nicasharacahuun. Omitsiscaifotiancai icataima iquisi un mato yoiyoi. Nan omitsiscaifotianri nan fuparamitsamisifo fucani. Fucashon yoíqui isca huacani, “Un Cristoran,” ishon yoi yamarai “Un Diospan tsain yoimisiran,” ishon nanfoan yoishcani. Ascashon nanfoanri Satanashuunshon tsoan atiroma cuscara mato ismaquin mato parapaishcani. Ascan Diosin nan catoanfo ato cushuyamaino nanfoanri nan fuparamitsamisifo icoíra huaacuana. Ascaíno nantian mato yoishcani, “¡Oincapón! Nanfin nocon Cristoqui,”

ishon yoi iyamarai, “Nanno chaimashta Cristo nocoqui oaran,” ishon yoiaifoan ato icoinra huayamacahuun.

<sup>26</sup> Ascashon nanfoanri yoicani, “Cristo tsoan istaipama ano nocoaran,” ishon mato yoiaifoanno ari foyamacahuun. Nanscarifi aquin mato yoishcani, “Criston nan pushu cunu muran iquieran,” ishon mato yoiaifoan ato icoinra huayamacahuun. <sup>27</sup> Úfico un oaiton man ua shafacafi oinshquin. Canan facaicaiton shafacafi nantio non oinriscatatiro. Nanscarifiai unfin Diospan Facuquin un afanan oaiton nantifi yorafoan ua shafacafi oinshcani. <sup>28</sup> Ahuara naa nanno cotocotofo nocoriscatiro. Nanscarifiai un nocoaitian ua tanamisifo uqui furiscashcani.

### *Diospan facu nasoaitian*

*Mr 13.24-37; Lc 21.25-28*

<sup>29</sup> Ascashu nan omitsiscaifo cuscan anaitiano fari afanan chashayamafain oshuricai afanan chashashquima faquishicoin iishquin. Ascaino fishifori nai ariashu pacui futsushquin. Nantifi nai murannoafori nayanaiyaishquin. <sup>30</sup> Ascashon ahuarao nai arishon un ismai cuscacoin aiton tapitirofo un afanan mai ano nasoai cuscan nantifi yorafoan tapinonfo. Un Diospan facushon un nantifi iquinai cuscan. Un nai murannoashu coin camaqui fotoaiton oincani manifoti nan icoinra huamafo fasi ratucani uaishcani. Uhuun curushhuunoashu un fotoaiton oincani. <sup>31</sup> Ascaino nantianri uhuun oinmatifo ufu nai muran icafo un nichishquin aton manuti fasi curushcai chaan chaan acaino uhuun yorafo manifoti anoaflo yafi nai murannoafori uqui fushcani.

<sup>32</sup> Ascacun un mato fana huiguerahuunoa ahuara futsa yoinon. Ua nicasharacahuun. Huigera pui risquisi futsuaiton man tapitiro faritian itiro cuscan. <sup>33</sup> Nanscarifiai nan un mato yoiai cuscacoin aiton tapicahuun mun oti chaima nanscacoin aquin. <sup>34</sup> Ascacun un mato icon yoi. Ahuarao un mato yoiai cuscacoin aiton nataishoma oinyocani. <sup>35</sup> Ascaino nai yafi mai cuyoshquin. Uhuun tsain cayacafi iconcoin fianananci apanacama. Un mato yoiai cuscacoin aashquin.

<sup>36</sup> Ascafia ahuutiaran un nai ariashu afanan fotoainocai tsoan tapiama. Diosin oinmati afu icafoanricai tapiafoma. Urifi uhuun Upa Diosin facuflashocai un tapiama. Nan uhuun Upa Diosin fustitofin tapiaquin. <sup>37</sup> Noco shuni Noé niyoano inifo cuscacoinrifiai afanan un oaitian nanscarifi ashcani. <sup>38</sup> Ascano nantian tsoan Dios shinantama pii sharafain ayafain fianansharacainaifoanno. Fai tahuan noconi. Nanscasi ariaifoanno Noé ahuun shashohuan muran iquin. <sup>39</sup> Ascashu iquifiaitocai tsoan tapinima fai tahuan nocoai. Ascashu nantifi yorafo asai futsunifo. Nanscacoinrifiai aashcani un afanan oaitian. Ua shinantama afi apaiyaifo cuscasi huariaifoanno. <sup>40</sup> Ascaino nantianri nocofunu rafu mau ano yonocani futsa uari cai yamariscatanaino. Futsa nitushquin omitsiscapanacafo muran caashquin. <sup>41</sup> Nanscarifiaiyainfon rafu nanincani. Futsa uari cai yamariscatanaino futsa nitushquin omitsiscapashquin.

<sup>42</sup> Ascacun itisharacahuun. Un maton ifofiacuai marifi man tapiama ahuutiamain un afanan matoqui oshquicain. Un mato yoimisi cuscan nanscacoin acahuun. <sup>43</sup> Ua nicasharacahuun tapishcaquin. Pushu ifoan iquisi itisharashon yomutso yamu ahuscaraaino ahuun pushu muran iquiai tapishocai iquimatiroma. <sup>44</sup> Nanscarifiai marifi itisharacahuun. “Iscaino nocon Ifo oimaran,” ishon shinanyamacahuun. Ahuscara atanaino un matoqui nocoriscaquin.

### *Oinmati rafu futsa ifoan yonoai cuscacoin aino futsa nan yonoai cuscacoin aimar*

*Lc 12.41-48*

<sup>45</sup> Man tapinon un mato yoi ahuu cuscaramain oinmati shara itiroquin. Niaifocoin mai futsa ari caquin niaifo patashari yoitiro isca huaquin, “Uhuun oinmati futsafo ato tushu shafatifi inanhuan. Nanticoin rafu ato paschcananshara huahuun. Ascashon ua ato cushusharashohuun,” huafaini catiro. <sup>46</sup> Ascatan niaifocoin afanan nocoshon oian ahuun niaifo patashari nan yoia cuscacoin aano fasi aqui unimacointiro. Ascashon

naan shara huatiro. <sup>47</sup> Ascacun un mato icon yoi. Nan niaifoan ahuun oinmati yoi, “¡Aicho! Natian nantifi uhuunafo mian cushusharashotiroran,” ishon yoitiro. <sup>48</sup> Ascafia niaifo patashari chacapan ahuun nomuran shinanquin isca huatiro, “Uhuun ifo funa nasoimaran,” ishon shinanquin. <sup>49</sup> Oinmati futsafo nantifi sutuqui futsatiro. Ascashon shafatifi nan paunmisifo ya pauncain monocai. <sup>50</sup> Ascashon shinantiro isca huaquin, “Natiancái uhuun niaifo oimaran,” ifiaino samamashta nocoriscatiro. <sup>51</sup> Ascashon niaifoan nan niaifo patashari fasi onaintimai. Asca huatan ahuun oinmati futsafo yonoqui isca huai, “Nan omitsiscapanacafo muran fuparamitsamisifo ano nan chaca potacahuun,” ishon ato yoishquin. Ascan nannoashu uaíqui omitsiscapanaca.

## 25

### *Diez shomayafohuunoa Jesús ato yoini ahuara futsa ato tapimashquin*

<sup>1</sup> Ascatan diez shomayafohuunoa un mato yoi un oaitian ahuu cuscaramainquin un mato tapimashquin. Ascatan nan diez nan nocofunun rama ainfo fiai manafo atofu fuuishcaquin. Ascafia nan nocofunun ahuun ahuin fiicashu nasoataimacai tsoa afi ranan fuusi tauafoma. Nan diez shomayafoan iquisi lamparina foafo. Nocofunu manai focani. <sup>2</sup> Nan muci fustiti shomayafoain tsoancai cayacafi shinansharayamafain itisharafoma. Asca nan muci fustiti futsafoan shinansharafain iquisi itisharafo. <sup>3</sup> Nan shinansharaimafoancai aton lamparina fofiaquin tsoan kerosene foama. <sup>4</sup> Ascafia nan shinansharafain itisharafoan aton lamparina fofain iquisi keroseneri foafo. <sup>5</sup> Ascafia nan nocofunun ahuun ahuin fiaicai funa nocoyamaino nan shomayafoan manariacani fasi oshapaicoincani oshafo. <sup>6</sup> Ascashu oshafoanno futsan yamu nacucahuainaino oi ashcafinin ato cuna, “Nan ainfo fiacitan man oiquin. Moinifoancahuun. Non ihui sharanon,” ato huua. <sup>7</sup> Ascaino shomayafo moinifoan aton lamparinafo otaqui futsafo. <sup>8</sup> Ascashon nan muci fustiti shinansharaimafoan nan itisharafo yocani “Maton kerosene ichapamashta noco inancahuun. Man nocon lamparina nocaiquin,” ishon ato yocaifoan. <sup>9</sup> Nan itisharafoan ato cumani, “Ma. Noconariraca itiroma. Ascan kerosene inanmitsafo ari fotacahuun fiishcaquin,” ato huanifo. <sup>10</sup> Ascaino kerosene fii focani foaifoanno nan ahuun ahuin fiai nocotan iquicainaino nan shomaya itisharafo afu pushu muran iquiafo fuuishcaquin. Ascashon caincaiti fupoafó.

<sup>11</sup> Ascaino chipo shomaya futsafo nococashon yoiafo, “Ifon. Noco fupushohuun non iquinon,” huaifoan. <sup>12</sup> “Un mato fupushotiro. Icon un mato yoi. Uncai mato oinmisima,” ishon ato yoini. <sup>13</sup> Nanscarifiai ahuitiaran un afanan matoqui oshquicain tsoan tapiama. Ascacun itisharacahuun.

### *Puihuunoa yoiqui Jesús ahuara futsa ato tapimani*

#### *Lc 19.11-27*

<sup>14</sup> Afanan un mato ahuara futsahuunoa yoi. Nocofunu ahuun pushu anoashu chai caquin ahuun oinmatifo cunashon yoiquin isca huani, “Uhuun pui ua cushusharashocahuun,” ato huafaini cani. <sup>15</sup> Ascashon ahuun oinmati rafu non fusti ato pui inanni. Futsa cinco mil pui inanfain futsa dos mil pui inanfain futsari mil inanni. Nan tapiafo cuscan ato inanpacua. Ascan ato inantan mai futsari cani. <sup>16</sup> Niaifoan caquin nan cinco mil inan cuscahuunshon samamashta ahuarafo fiashu afanan inanmitsashon ahuun rafanan cinco mil fia. Asca huaquin diez mil man fia. <sup>17</sup> Nanscarifi aqui nan pui dos mil fiaton afanan dos mil fia. <sup>18</sup> Ascan nan oinmati mil pui fusti fiaton funocasmaquin mai poquishon amuran ahuun niaifo pui huashoan.

<sup>19</sup> Ascashu fari ranan finontan afanan niaifo ahuun pushu ano nasoni. Nasoshon nan rafu non fusti ahuun oinmati ato cuna ahuutimain fishoafquin ato yocashquin. <sup>20</sup> Ascano nan cinco mil pui inanniton yoiqui isca huani, “Niaifon, mian cinco mil pui inanni. Ascafia mun mia natian afanan cinco mil fishoan. Ascan oinpon. Naquian,” ishon inanni. <sup>21</sup> Ascaiton ahuun niaifoan yoini, “¡Aicho! Mian fasi shara huua. Un

mia yoia cuscacoin min huaa. Un mia ichapama inanfia ahuunshon min yonocoin shara. Ascacun nan un aya cuscan mian cushusharashotiro. Un unimai cuscan mirifi nanscarifiai min ufu unimatiro. Ascacun iquiyohuu,” ishon yoini.

<sup>22</sup> Ascano nan dos mil pui inanniton arifi yoiqui isca huani, “Niaifon, Mian dos mil pui inanni. Ascafia mun mia natian afanan dos mil fishoan. Ascan oinpon. Naquian,” ishon inanni. <sup>23</sup> Ascaiton nanrifi ahuun niaifoan yoini, “¡Aicho! Mian fasi shara huua. Un mia yoia cuscacoin min huaa. Un mia ichapama inanfia ahuunshon min yonocoin shara. Ascacun nan un aya cuscan mian cushusharashotiro. Un unimai cuscan mirifi nanscarifiai min ufu unimatiro. Ascacun iquiyohuu,” ishon yoini.

<sup>24</sup> Ascan nan mil pui inanniton arifi yoiqui isca huani, “Niaifo, mun tapian mincái tsoa shinainma. Minricai nocohuun ramapaima. Non mia yonoshofiaitocai min noco ahua inantiroma. Mina fusti itiroran. <sup>25</sup> Ascacun un ratuqui min ua inan cuscahuunshon ahuarao fipaifiai un funotiroracati, ishon un shinan. Ascacun nan mian inan cuscan un mai muran onua. Ascan natian mun mia fishoan. Oinpon. Naquian,” huaiton.

<sup>26</sup> Ahuun niaifoan cumani, “Min fasi chacacoin. Minfin oinmati shanishuniquin. ¿Min shinamun un futsafo shinainmaquin? ¿Uaraca futsafoan yonoshonaiton un ato ahua inanma? <sup>27</sup> ¿Ascan nannori shinanfiaquin ahuuscaquin mai muran min pui huamun? Asca huatamarocon nan pui huamisifoanno min huacun un nocoshon paratamari un flicuanaran,” ishon niaifoan yoini.

<sup>28</sup> Ascashon ahuun niaifo patashari yononi, “Nan oinmati shanishuni ahuun pui fianhuun futsa nan cinco mil aya inanshquin. <sup>29</sup> Ascano nan ua icoinra huacoinnafin un fasi paratamacoin inainquin. Ascan nan ua icoinra huama ichapama aya cuscan futsan fiaín. <sup>30</sup> Ascacun nan oinmati ahua tapiama chaca faquish muran potacahuun. Nannoashu fasi omitsiscái fasi uainon,” ishon niaifoan yoini.

### *Cuyoaitian Jesúsyoishquin ratofomain afu ipatiro iyamarai omitsiscapanacafo muran focaniquin*

<sup>31</sup> Ascacun un mato afanan yoi. Unfi Dios ariashu mai ano fotoniquin. Ascashu un afanan oaitian nantififain aton niaifocoin un iishqui. Un Diospan Facucoincun nantififain ua oinshcani. Uhuun oinmatifo ufu nai muran icafoya un oaiton. Nantianri un ato yoishquin ratofomain Diospan yorafo iyamarai ahuun yorafomaquin.

<sup>32</sup> Ascashu nantifi manifotifi uqui fushcani. Chashoan cushumisiton ahuun chashoanfo yafi nan chashoan ointsafo aton anu cabra aton ichanan huai. Nan chashoanfosi tiri futsa huafain nan cabrafori tiri futsa huai. <sup>33</sup> Ascashon ahuun mumihuuri chashoanfo huafain ahuun mushquihuuri cabrafo huai. Nanscarifiai ua tanamisifo un tiri futsa huafain nan ua icoinra huamafo un tiri futsa huai. Ua tanamisifo uhuun mumihuuri huafain uhuun mushquihuuri nan ua icoinra huamafo ato huashquin.

<sup>34</sup> Ascatacun un Niaifoshon nan ua tanamisifo un yoiqui isca huashquin, “Uqui fuc-ahuun. Uhuun Upa Diosin mato unimamanon. Nan mai onihuaitian matohuunoa shinanquin isca huani, ‘Un icano un ato iquimanonpacoi uhuun yorafo inonfo. Uhuunafori atona inonpacoiran,’ ishon Upa Diosin shinanyoni.

<sup>35</sup> “Man ua shara huamisi. Ascacun uhuun Upa Diosiri mato shara huashquin. Un fon-aicaiton man ua pimamisi. Un nomiaiton man ua ayamamisi. Un matoqui nocoiton ua oinyamafiamisishaquin man ua yoiqui isca huamisi, ‘Uhuun pushu muran iquiyohuu. Un mia pimafain min nuno uhuun pushu muran oshatiro.’ <sup>36</sup> Un sahuutiromacuri man ua sahuuti sahumi. Un isininciatori man ua cushusharamisi. Ua cunu muran iquimanafoanno man ua oin camisiran,” ishon ua tanamisifo un yoishqui.

<sup>37</sup> Ascacun ua tanamisishafo uhuun Upa Diosin aton chaca soashona. Nanfoan ua cumacaquin isca huashcani, “¿Ifon, ahuutian non mia oinmisimun min fonaincaiton non mia pimafain min nomiaitorí non mia ayamamisi? <sup>38</sup> ¿Ahuutianritsi min nocouqui nocoiton non mia oinyamafiamisishaquin non mia nocon pushu muran iquimafain

min sahuutiromacuri non mia sahuuti sahuumamisi? <sup>39</sup> ¿Ascan ahuutianritsi mia cunu muran iquimanafoan non mia oincani?” ishon ua yoishcani.

<sup>40</sup> Ascaifoan un aton niaifoan un ato yoiqui isca huashquin, “Uhuun yorafo nan ua icoinra huafo futsafoan atohuunoa yoiqui isca huamisi ‘Nancai ahuamaran,’ ishon man yoimisi. Asca nan uhuun yora ahuamaflashu man ato shara huamisi cuscafin nan uari shara huai cafisca man ato huamisiquin,” ishon un ato yoishquin.

<sup>41-43</sup> Ascashon nan ua icoinra huamafo tiri futsa niafoan un ato yoiqui isca huashquin, “Manfin ua chaca huamisiquin. Un fonainfiaitocai man ua pimamisima. Un nomiaitoricai man ua ahuara ayamamisima. Un matoqui nocofiaitocai ua oinyamafiamisshaquin man ua pimayamafain un sahuutiromafiacuri man ua sahuumamisima. Un isininctoricai man ua cushumisima. Ua cunu muran iquimanafoanno cai man ua oincamisima. Ascacun umaquinoashu fotacahuun. Nan yoshin chaca Satanás yafi afu yoshin chaca futsafo Upa Diosin ato chi urumanhuan itishara huashoan nannori mato potai. Nannoashu nanfoya man omitsiscapashquin,” ishon un ato yoititon.

<sup>44</sup> Nan ua icoinra huamafoan ua cumaquin isca huashcani, “¿Ifon, ahuutiamun non mia oinmisiquin min fonaincaiton non mia pimayamafain min nomiaiton non mia ayamamisima? ¿Ahuutianmun min nocoqui nocofiaiton oinyamafiamisshaquin non mia cushusharayamafain min sahuutiromacun non mia sahuumamisima? ¿Ahuutianritsi min isininctaiton mia cushuyamafain mia cunu muran iquimafiafo non mia oincamisimamun?” ishon ua yocashcani.

<sup>45</sup> Ascaiton un ato cumaquin isca huashquin, “Un mato icon yoinon. Nan ua icoinra hua futsafo man yoimisi isca huaquin, ‘Nancai ahuamaran,’ ishon atohuunoa man yoimisi. Ato asca huaquifin nan ua shara huaima cafisca man huamisiquin,” ishon un ato yoishquin.

<sup>46</sup> Un ato nannori yoiaino umaquinoashu omitsiscapanacafo muran foschani. Ascaino nan ua icoinra huafu uhuun Upa Diosin aton chaca soashonafo un icano ufu foschani ufu ipashcaquin,—ishon Jesús ato yoini.

## 26

### *Jesús rutushcaquin afi ranan yoinannifo*

*Mr 14.1-2; Lc 22.1-2; Jn 11.45-53*

<sup>1</sup> Ascano noco yoiqui anaititan Jesús afanan afu rafuafosi tsain futsa noco yoiqui isca huani, <sup>2</sup> —Man man tapian nocon fusiti shafa man nococuana. [Diosin ahuun oinmati nan afu ica yonoa Egipciofoan aton furun iyoafofosi rutuqui futsani. Ascafiaquicai nocon shunifoan aton furun iyoafofosi finonmani ato rutuquima.] Nan non shinamisi nocon fusiti osha rafutan iqui. Ascan nantianri ua ato achimacani ua mastanonfo,—ishon Jesús noco yoini.

<sup>3</sup> Ascan nantianri nocon yorafohuunshon Dios cufimisi niaifofo futan Moisés cu-nuni cuscan tapimamisifo non Dios fu tsainti pushu cushumisifo Caifás pushu ano ichanancani. Nan Caifás nocon yorafohuunshon Dios cufimisi niaifocoin ini. <sup>4</sup> Ascashu ichanancashon shinannifo, —¿Ahuuscashomain non Jesús achinoanti rutushquin? —ishon ahuara chanishtahuunshon rutupaicaquin. <sup>5</sup> Ascacun yoinifo, —Fusititiancái non achitiroma yorafo fasi mucacani nocoqui sinatiroforan,—icashu yoinannifo.

### *Ainfoan Jesusqui ininti ocani*

*Mr 14.3-9; Jn 12.1-8*

<sup>6</sup> Ascatan non Jesús fu Betania ano cani. Caashu Simón pushu muran non iquini. Nan Simón nami tocoi futsua ini. <sup>7</sup> Jesús nannoshon noco futan piaino ainfo ininti tsomashu oni aqui ocashquin. Nan moticanun ahuun anu alabastro. Amuran ahuun ininti fasi paratamacoin ahuun pui nuua. Ascashon ainfoan Jesús ahuun mapoqui ininti ocani.

<sup>8</sup> Ocaiton oin non afu rafuafo ainfoqui non sinacoinqui yoini, —¿Ahuuscaimun nan inti fasi paratamacoin ahuun pui nuua na ainfoan ocaiqui? <sup>9</sup> Nan inti ocatama inanmitsashon ahuun rafanan pui fishon nan yora ahuuomafo inanshara icuanaran, —icashu non yoinanni.

<sup>10</sup> Ascaiton non yoiai cuscan Jesús onanshon noco yoini, —¿Ahuuscaimun na ainfoqui man tsain chipuicain? Uafin nanton fasi shara huaquin. <sup>11</sup> Manfin yora ahuuomafo fu ipanacaquin. Ratoran shafatan man ato ahuara shara huashotiro. Ascafia uncai nuno mai ano matofu ipanacama. <sup>12</sup> Ascan nan ainfoanfin uqui inti ocaquin. Nan yora maiamamaquin inti ocamisifo cuscan un nataiyamafaiton na ainfoan ua shinanquin uqui inti oca. Uhuun caya iquisi itishara huapai ua mai huashquiaifo cuscan. <sup>13</sup> Ascacun un mato icon yoi. Nan tsain shara uhuunoa manifiton yoishcani. Nan ainfoan ua rama aca cuscari yoishcani. Ascashon ua shara huua cuscan ahuunoa shinanpacushcaniran, —ishon Jesús noco yoini.

### *Judaspan Jesús ato achimani*

*Mr 14.10-11; Lc 22.3-6*

<sup>14</sup> Noco nannori Jesús yoaino non afu rafuafo doce futsan ahuun anu Judas Iscariote nocon yorafohuunshon Dios cufimisi niaifo ano cani. <sup>15</sup> Ascacaini cashon ato yoiqui isca huani, —¿Un mato Jesús achimacun ahuuti pui man ua inantiromun? —ishon ato yocaiton. Cumanifo, —Non mia treinta toro oshopafo inantiroran, —ishon yoinifo. Asca huatan inannifo. <sup>16</sup> Ascano nantian Judaspan ahuun nomuran shinanqui tau huani, —¿Ahuuscashomain un ato Jesús achimanoanti? —ishon shinanriani.

### *Ahuun unutaqui Jesús afu rafumisifo futan pini*

*Mr 14.12-25; Lc 22.7-23; Jn 13.21-30; 1Co 11.23-26*

<sup>17</sup> Ascano noco fusiti shafan man noocoano nan shafa misi farashati maisi non pimisi. Nantian non afu rafuafo Jesusqui cashon non yocani, —Ifo, na shafan nocon fuusititian. Nan nocon shunifoan ato facu iyoafifo Diospan nai oinmati finonmani ato rutuquima nan non shinanmisi. ¿Ascan rani min noco nichipaimun non mia itishara huashonon no futan anoshon piishquin? —ishon non yocani.

<sup>18</sup> Jesús noco cumani, —Jerusalén ano fotacahuun. Nanno nocofunu futsaqui nocoshon yoiqui isca huacahuun. “Nocon tapimamisiton mia tsain fomaqui isca huaa, ‘Un naitian man nocoti chaimashaqui. Nocon fusititian non min pushu muranshon piiran,’ ishon noco Jesús yoiaran,” —ishon yoitacahuun noco huani. <sup>19</sup> Ascashon nan noco yoia cuscacoin huaquin cunu muran non itishara huani. Nannoshori chashoanun facu non pichani piishquin.

<sup>20</sup> Man fari caino non afu rafuafoya Jesús sapa ano tsaoni. <sup>21</sup> Nannoshon non piaiton Jesús noco yoini, —Un mato icon yoi. Nan ratoran futsan man ua ato achimairan, —noco huaiton. <sup>22</sup> Nicai non pusinima. Ascashon non yocani, —¿Umun, Ifon? —ishon nantifiton non yocapacuni.

<sup>23</sup> Ascaiton noco yoini, —Nan man ufutan taso muranno misi pocotan piaitofin man ua ato achimaiquin. <sup>24</sup> Ascan Upa Diosin tsain inon pacuai uhuunoa cununi cuscacoinfin un naicain. Ascafia nan nocofunun ua ato achimanai cainyamanifin shara icuanaquin, —ishon Jesús noco yoiaiton.

<sup>25</sup> Nicaquin Judas, nan ato achimaiton Jesús yocani, —¿Umun, Ifon? —huaiton. —Aifain. Minfiqui, —huani.

<sup>26</sup> Ascashon piaifoanno Jesús misi finifoantan iquisi apa Diosin cufiyoni —¡Aicho! Upa, min noco cushusharafafainiran, —huatan noco yoini, —Na uhuun caya cuscara. Picahuun, —ishon torupacushon nocoti inanni.

<sup>27</sup> Ascashon cucho finifoan afanan Apa cufini,—¡Aicho! Upa, min noco cushushararan, —huatan cuchoqui fimi unu manuta noco inanqui yoini. —Nantififain na ayacucahuun, —noco huani. <sup>28</sup> Asca huatan noco yoini, —Naafin uhuun imi cuscaraquin. Uhuun imi focain un nai. Nantifi yorafoan chaca huamisihuunoashu un nai aton chaca soashonon. Un ascano yora ichapafo Diosin potapacunonma. <sup>29</sup> Ascacun un mato icon yoi. Uncai funa afanan mato futan ayaima. Nan uhuun Upa Diosin niaifoan nantifi iquinaitian un afanan maton futan ayashquin, —noco huani.

<sup>30</sup> Ascano man ahuun tsain yoiqui anaititan Diosin tsain non fanainni. Ascatan machi ahuun anu Olivo ano non cani.

—*Pedro min futsafo, “Un Jesús oinmisimaran,” ishon min yoiran, —Jesús huani*  
*Mr 14.26-31; Lc 22.31-34; Jn 13.36-38*

<sup>31</sup> Ascashon afanan noco yoini, —Na yamutafin nantififain man ua potafaini ichoi caiquin. Diosin tsain cununi isca huaquin,

“Unfi chashoanfo cushumisi rutuicain. Ascaino chashoanfo ichoi futsucaniran,” icashu cununi. Nanscarifiai ua rutuaifoanno na yamutan man uhuunoashu ratufaini ichoicai. <sup>32</sup> Ascafia un funiashu Galilea ano un cai tauicai. Ascano man uqui chipo nocoicashquiran, —ishon Jesús noco yoiaiton.

<sup>33</sup> Pedronun Jesús cumani, —Nantifiton mia potafiaifoannocai un mia potaimaran, —huaiton. <sup>34</sup> Jesús Pedro yoini, —Un mia icon yoi Pedro. Tacara cuoataima min ato yoiqui “Uncai Jesús oinmisimaran,” ishon min ato yoiqui rafunon fusti huairan, —huaiton.

<sup>35</sup> —Ma, Ifo. Un mifu nafiaquicai un ato yoinacama un mia oinmisimaran, —ishon Pedronun yoini. Ascaiton norifi nantifiton non nannori yoini.

*Jesús Getsemaní anoshon apa cufini*  
*Mr 14.32-42; Lc 22.39-46*

<sup>36</sup> Ascatan ihuifo mapoano ahuun anu Getsemaní nanno Jesús no fu cashon noco yoini, —Nuno tsaoahuun. Uhuun Upa un cufiyotanon, —noco yoini. <sup>37</sup> Ascatan Pedro yafi Zebedeo ahuun facu rafu Santiago yafi Juan nan rafu non fusti ato iyoni. Nan fasi omitsiscai tauai cuscan shinain fasi ahuun nomuran isicoinni. <sup>38</sup> Ascashon ato yoini, —Un fasi omitsiscai cuscan uhuun nomuranshon shinain mun naacuana. Ascacun nunoshon oinyocahuun. Oshacaquima, —ishon ato yoini.

<sup>39</sup> Ato asca huatan chaimashta caashu fuopacuahuun Apa Dios cufini, —Upa un omitsiscai cuscan mian numatiromainquin ua numahuu. Ascafashion un apaiyai cuscan huaquima nan min apaiyai cuscan fusti ua huahuu, —huani.

<sup>40</sup> Ascashon apa cufinquin anaititan afanan atoqui oquin oian man oshafo ini. Ascaiton Jesús Pedro yoini, —¿Man u futan Diosin cufiyotiomamun? <sup>41</sup> Oshacaquima. Dios cuficahuun Satanás mato chaca huamapaiyai cuscan huashcaquima. Ascashon Diosin mato amapaiyai cuscan marifi huapaifiäquicai Diospan curushyamainocai man atiromaran, —ishon Jesús ato yoini.

<sup>42</sup> Ato asca huatan afanan apa Dios cuficaicani. Cashon apa yoini, —Upa, min ahuara futsa yorafo numashqui atiromamainquin nan min apaiyai cuscan huahuu. Unfi man itisharaqui atohuunoashu omitsiscacaini naashqui, —ishon Jesús apa cufini.

<sup>43</sup> Ascashu afanan atoqui oquin oian afu rafuafu afi oshafo ini. Fasi osha murancoianfo. <sup>44</sup> Ascaino afanan ato anoashu cashon apa Dios cufini. Nan cufia cuscacoin afanan nannori cufini.

<sup>45</sup> Ascatan afanan oquin oian afi oshafo ini. Ascaiton ato yoini, —¿Manmun afi moiam? Natianfin nan chaca huamisifoan ua ato achimai fucaniquin. <sup>46</sup> Funicahuun. Non canon. Nan nocofunun ua ato achimai man oquin, —ato huani.

*Jesús achinifo**Mr 14.43-50; Lc 22.47-53; Jn 18.2-11*

<sup>47</sup> Ascaíno nan Judas Jesús fu rafumisi futsan oaino a yorahuanrasi nopus yafi coshatifo tsomacanashu funifo. Nocon yorafohuunshon Dios cufimisi niaifofoan futan Dios fu tsainti pushu niaifo patasharifoan ato yonoa funifo. <sup>48</sup> Nan Judaspan yorafo iquisi yoiqui isca huani, —Un Jesús tamoqui tsoacaiton tapicahuun nanfin Jesusquin achicahuun, —ato huani. <sup>49</sup> Ato yoiquiasca huatan samamashta Judas Jesusqui nocoshon ahuun tamo tsoacatan yoini, —Tapimamisiton, man yamuaran —ishon yoaítion.

<sup>50</sup> Jesús cumani, —Uhuun yoran, nan mian apaiyai cuscan ua huahuu. Nanscayoi min oaquin, —huani. Ascaítion nan Judas fu fuafoan Jesús achinifo niaifofo ano iyoshcaquin. <sup>51</sup> Ascaítion Jesús fu rafua futsan nopus fitan nocon yorafohuunshon Dios cufimisi niaifocoinin ahuun oinmati pashtufain rurani.

<sup>52</sup> Ascaítion Jesús yoini, —Unuhuu. Min nopus ahuun ona muran huahuun. Nan nopus yora rutuafin arifi nopus natiroquin. <sup>53</sup> Uhuun Upa Dios un yocaitofin ahuun oinmatifo afu icafo 72,000 ua nichishotiroquin ua cushui funonfo. <sup>54</sup> Ascan uafin uhuun Upa Diosin ahuun nai oinmatifo ua nichishotiroquin ua cushui funonfo. ¿Ascafia ahuuscashumun Diosin tsain uhuunoa cununi cuscan un yorafohuunoashu natiromaquin? Ascan uncai Upa Dios cufima ua ahuun oinmatifo afu icafo ua cushunon, —ishon Jesús ato yoini.

<sup>55</sup> Ascaíno nantianri Jesús achipaiyáifoan ato yoini, —¿Unmun yora pofu cuscaracun man ua nopus yafi coshatifo yashon achi fua? Shafatifi un Dios fu tsainti pushu muranshon un mato yoiflaitocai man ua achipaiti huama. <sup>56</sup> Ascafia nan man ua acai cuscan Diosin tsain yoimisifoan uhuunoa cununifo cuscan nancacoin man ua huairan, —ishon Jesús ato yoini. Ascaíno non afu rafuafo nantifi non amaqi ichoni.

*Jesús niaifofoan ointaifi iyónifo**Mr 14.53-65; Lc 22.54-55, 63-71; Jn 18.12-14, 19-24*

<sup>57</sup> Ascano achicashon nocon yorafohuunshon Dios cufimisi niaifocoinin ahuun pushu ano iyónifo. Nan niaifoan ahuun anu Caifás. Nannori niaifofo ichanannifo. <sup>58</sup> Ascaíno Pedro acachori cani. Acachori cafiai fishtatama cani. Dios fu tsainti pushu cushumisifoya Pedro niaifoan umainti ano tsaoni Jesusmain ahuusca huacaniquin ishon oinpai.

<sup>59</sup> Nannoshon niaifofoan shinapainifo, —¿Nonmun raquiri huatiroquin Jesús ahuara chaca huaran ishon rutushquin? Ahuacai ahuusca huaiton non nicayomisima non rutuai, —icananshu nocon niaifofo afi ranan yoinannifo. <sup>60-61</sup> Yora ichapafoan, —Jesús ahuara chaca huaran, —ishon ahuunoa tsain chaca yoinifo. Paracaquin. Ascafia niaifofoancai Jesushuunoa ahuara chaca iconcoin nicanifoma rutushcaquin. Ascahón futsafoan Jesushuunoa tsain chaca huaquin anaitiafoanno chipo nocofunu rafutan niaifofoan ointaifi Jesusqui tsain chaca huanifo. —Man non nicaitan na nocofunun isca huaquin yoia, “Nocon Dios fu tsainti pushu yorafao aca cuscan unfi choquatiroquin. Ascahón osha rafu non fusti finontan un afanan futsa huatiro. Uncai tsotutan atiroma. Urus fustifin un atiroquin,” Jesús iquitaran, —ishon nan rafutan yoinifo. <sup>62</sup> Ascano yorafohuunshon Dios cufimisifo aton niaifocoin nan Caifás Jesús yocani, —¿Miqui tsain chaca huafó cuscan icon iyamarai iconmamun? —ishon yocaino. <sup>63</sup> Jesús puusinima. Ascaítion afanan yoini, —Diosin nan nipamisi ahuun anuhuunshon ua yoihoo. ¿Minmain Diospan Furunquin nan Diosin mia catonnimainquin? Ascan natian nannori un mia yonoi. Ua icon yoihoo, —ishon yocaiton.

<sup>64</sup> Jesús cumani, —Nan mian yoiai cuscafin unquin. Un mato yoinon. Upa Diosin ahuamamishti huatiro cuscan chipo man ua oinshquin. Uhuun Upa Diosin niaifo fu un icun. Uriñimain un afu niaifocoianshu. Ascacun un nai ariashu coininfo camaqui oaiton man ua oinshquiran, —ishon Jesús ato yoini.

<sup>65</sup> Ascaiton nicaí nocon yorafohuunshon Dios cufimisi niaifocoin, —Un Diospan Fururan, —Jesús icaiton nicaí fasi sinacoinni. Ascacun ahuun sahuuti fashnuqui yoini, —Noncaí afanan yorafaoan Jesusqui tsain chaca huai yopaima. Manmain noficoín ahuun tsain chaca nicayamaifin, “Un Diospan fururan,” iquifin Dios chaca huaquin. <sup>66</sup> ¿Ascacun man ahuusca Jesús huapaimun? —ishon aton niaifocoinin ato yocaiton. Nantififain, —A rutucahuun, —huanifo.

<sup>67</sup> Asca huatan ahuun fusoqui cumo michofain sutufain futsan tapasni. Ascashon cashu mutsama huacaquin. <sup>68</sup> Yoinifo, —Min Cristomainquin min nantifi tapicoian. Asca tsoan mia acamainquin noco yoihoo, —ishon cashu mutsama huanifo.

—*Un Jesús oinmisimaran, —ishon Pedronun yoini*

*Mr 14.66-72; Lc 22.56-62; Jn 18.15-18, 25-27*

<sup>69</sup> Ascaíno Pedro pushu umainti caashu tsaoni. Ascano nocohuunshon Dios cufimisi niaifoan ahuun oinmati shomayaton Pedro fuchishon yoini, —Jesús Nazaret anoa fu mirifi min afu oaquin, —huaiton. <sup>70</sup> —Ma. Mian yoiai cuscacai un tapiamafinquin, —Pedronun aton ointaifi huani.

<sup>71</sup> Asca huafaini caincaiti ano caacun nannoshori shomaya futsanri Pedro fuchishon ato yoini, —Na nocofunufin Jesús Nazaret anoa fu imisiquin, —ishon yoiaiton.

<sup>72</sup> Afanan Pedronun yoini, —Ma. Min yoiai cuscafin Diosin tapiaquin uncaí na nocofunu oinmisimaran, —ishon yoini.

<sup>73</sup> Sama racatan afu niafoan Pedro yoinifo, —Icon. Minfin mirifi Galilea anoaquein. Min tsainhuunshon non mia onanran, —ishon yoiaifoan.

<sup>74</sup> Afanan ato yoini, —Uncaí mato paratiroma. Diosin ua oin. Un chanicun Diosin ua chii uru muran potatiro. Nantonfin tapiaquin un mato icocoin yoiaiton. Ascan uncaí na nocofunu Jesús oinmisimaran, —ishon Pedronun afanan ato yoini. Ascaíno samamashta tacara cuoni. <sup>75</sup> Tacara cuoaino Jesús yoia cuscan Pedronun shinantani. —Pedron un mia yoi. Na yamutan tacara cuoataima min ato yoiqui rafu non fusti huai, “Un Jesús oinmisimaran,” —ishon Jesús yoia cuscan shinantani chifi caashu Pedro fasi uaini.

## 27

*Pilato ano Jesús iyónifo*

*Mr 15.1; Lc 23.1-2; Jn 18.28-32*

<sup>1</sup> Ascaíno funamanrishta nocon niaifofoan shinanpainifo, —Ahuuscashomain non Jesús rutumatiroquin, —icashu yoinannifo. <sup>2</sup> Ascatan munushcashon nan Romanon niaifoan ahuun anu Pilato ano Jesús iyónifo.

*Judas nani cuscan*

<sup>3</sup> Asca huashon Judaspan Jesús rutuaifoan nicaquin fasi shinanni. —¡Ohua! Un Jesús ato achimanama shara icuanaran, —ishon shinanni. Ascashu nocon yorafohuunshon Dios cufimisi niaifofo yafi Dios fu tsainti pushu niaifofo ano cani treinta toro parata-macoin ahuun pui nuua ato nasoin cai. Ascacainicashon ato yoini. <sup>4</sup> —Unfin chaca huaquin. Jesuscái ahua chaca huayamafiamisicun un ato parashon achimanaran, —ishon ato yoiaiton. Cumanifo, —Ahuuscaquitsi min noco anori yoiyoa. Noncaí ascara tapipaima. Mififin min shinanquin, —huaifoan. <sup>5</sup> Nicaquin nan Dios fu tsainti pushu muranshon ato naman torofo saafaini caashu afiri rusfipan tunushumuacuhuatán nani.

<sup>6</sup> Asca huatan Judas cai cachiori niaifofoan nan torofo topinifo. Ascashu niaifofo afi ranan yoinannifo, —Nocon shunifoan yononi cuscan non ahuun rafanan yora rutumana nan puicai non Dios fu tsainti pushu muran huatiroma. Nan pui huati murancái non huatiroma. <sup>7</sup> Na torofohuunshon nan cuti huamisi ahuun mai non finon. Nanno yora futsafo non mai huanon, —icashu yoinannifo. <sup>8</sup> Ascasho nan mai anunifo

—Imi maiiran,—huanifo. Natianri nannori yoiafo. <sup>9-10</sup> Ascano nan Diosin tsain yoimisi Jeremías inon pacuai cununi cuscan natian man nanscacock huaaf. Isca huaquin cununi,

“Israelifoan yoinifo, ‘Non treinta toro inantiro nan nocofunun noco achi-mashocun,’ ishon yoiafo. Nan torofohuunshon cuti huamisiton ahuun mai fiafo. Uhuun Ifoan ua yononi cuscan un cuti huamisiton ahuun mai fia. Nanscarifi aqui nanfoanrifi aton torofohuunshon cuti huamisiton ahuun mai fiaforan,”

ishon Jeremías cununi.

### *Pilato ano Jesús iyonifo*

*Mr 15.2-5; Lc 23.3-5; Jn 18.33-38*

<sup>11</sup> Ascashu Romanon niaifoan ahuun anu Pilato fu Jesús nia ini. Nan niaifoan Jesús yocani,—¿Minmun Judiofoan niaifocoin? —ishon yocaiton. —Nan min ua yoiac cuscafin unquin, —Jesús huani. <sup>12</sup> Ascashon nocon yorafohuunshon Dios cufimisi niaifofo yafi Dios fu tsanti pushu niaifofoanri Jesús ahuara chaca huamisiran huafiaifoannocai puusinima. <sup>13</sup> Ascaiton Pilato yoini, —¿Yorafoan mia chaca huaifo cuscan min nicaimamun? ¿Min ato cumapaimamun? —ishon yoini. <sup>14</sup> Asca huafiaitocai Jesús cumanima. Tsain ichapa aqui chaca huafiaifoanricai fustishta ato cumanima. Ascaiton Pilaton ahuun nomuran shinanni, —¡Aira! ¿Ahuuscai ato cumapaimamun? —ishon shinanni.

### *Niaifoan ato yononi Jesús rutunonfo*

*Mr 15.6-20; Lc 23.13-25; Jn 18.38-19.16*

<sup>15</sup> Nan fusititian faritifi a cunu muran iquiafo fusti caimaquin Pilato ato yocapaoni. —¿Ratocai man caimapaimun? —ishon yorafo yocapaoni. <sup>16</sup> Nantianri cunu muran iquia nocofunu fasi popu rutumitsamisi. Ahuun anu Barrabás ini. <sup>17-18</sup> Jesús ahua chaca huaiyamafiacun. A icai cuscan apaicaquin nocon niaifofo Jesusqui sinacaquin Pilato ano iyonifo. Nan acaifo cuscan Pilato man tapian ini. Ascacun Pilato nanno yora ichananfo yocani, —¿Ratocaimun un mato cainmashotioquin? ¿Barrabás iyamarai Jesús nan Cristo Diosin catoanran man huamisi? —ishon ato yocaiton. <sup>19</sup> Ato yocatan tsaoshon manani cumaifoan nicapaiquin. Ascaino ahuin cunu fuma aqui noconi. Cunun yoiqui isca huani, —Nan nocofunu Jesús shara. Ahua chaca huamaquin. Ahuusca huayamahuu. Uhuun namapan un oian ahua chaca huayamafiaflashu omitsiscacoinna. Ascacun ahuusca huayamahuu, —ishon Pilato ahuin cunushoni.

<sup>20</sup> Ascafiacon nocon yorafohuunshon Dios cufimisi niaifofo yafi Dios fu tsanti pushu cuchumisifoan nanno ichananfo ato yosiquin isca huanifo, —Jesús noco cainmashotamarocon Barrabás noco cainmashohuun. Ascashon Jesús rutuhuu ishon Pilato yoicahuun, —ishon ato yononifo.

<sup>21</sup> Ascacun Pilato ato yocani, —¿Nan rafu ratocaimun man fuchipaiquin un mato caimashonon? —ishon ato yocaiton. “Barrabasquian,” huaifoan. <sup>22</sup> —¿Un Barrabás caimashomun un Jesús nan Cristo Diosin catoan un ahuusca huaicai? —ishon ato yocaiton. Afanan nantifiton yoinifo, —Mastahuun, nanon, —huaifoan.

<sup>23</sup> Ascaifoan Pilato ato cumani, —¿Ahuuscacufin? ¿Ahuamun chaca huaquin? —ishon ato yocaiton. Ascafia fasi curushcain yoirianifo, —Mastahuun, nariscanon, —huanifo.

<sup>24</sup> Ascaiton Pilato oian tsoan nicapaitama fasirocon mucai finaifoan. Masu fitan aton ointai muchoquimuni. Muchoquimutan ato yoini, —¡Oincapon! Uhuun nuama. Un Jesús cainmapaifiaiinocai man cainmapaima. Manrocon fasi rutupai. Ascan matohunfi nuuaquin, —ishon ato yocaiton. <sup>25</sup> Nantififain cumanifo, —Nanscanon. A nai nocohuun nuunonquin. Nocon facufohuunri nuunon, —ishon yoinifo.

<sup>26</sup> Ascaifoan nicaquin Pilato Barrabás ato cainmashoni. Ascashon ahuun ranushumuafo yononcun fichi cunoqui tuchiaton Jesús coshaqui futsanifo. Asca huashon mastanonfo iyonifo. <sup>27</sup> Nan ranushumuafaoan Jesús iyoafó anofín niaifoan ahuun pushu iniquin. Ascano nan niaifo cushumisifoan ranushumuafó chifinoafó cunani Jesús oin funonfo. <sup>28</sup> Ascashon ahuun sahuuti shorifain futsa shonan sahuumanifo. <sup>29</sup> Ascatañ mosha chainipafo maiti huashon maimafain poquiti ahuun mumihuuri tsomamashon ratoconun mai chachishon yoinifo, —¡Aicho! Minfin Judíofoan aton niaifoquin, —ishon cashu mutsama huanifo. <sup>30</sup> Ascashon aquí cumo michofain ahuun poquiti fiantan ahuun coshapacunifo. <sup>31</sup> Ascashofín cashu mutsama huacatan nan sahuuti shonan pucashon ahuun sahuuticoin afanan sahuumanifo. Asca huatan mastai focaquin iyonifo.

*Jesús ihui coyan iquinanqui mastanifo  
Mr 15.21-32; Lc 23.26-43; Jn 19.17-27*

<sup>32</sup> Focani nan nocofunu Simonqui noconifo. Nan Simonfin Cirene anoashu cain-niquin. Ascan nan ranushumuaton yononi. —Ihui coyan iquinan noco foshoicahuun, —ishon iyamafainifo. <sup>33</sup> Gólgota ano fonifo. Gólgota yoia mapo shao. <sup>34</sup> Nanno nococashon Jesús fimi unu pau tashipia osia ayamapaiyaifoan muutacai Jesús apainima. <sup>35</sup> Asca huatan Jesús iyocashon mastanifo. Mastacatan ahuun sahuuti fianpacunifo. Toquiri tocoro rafuya cashuqui nan finonmanaton ahuun sahuuti fiqui tau huani. Ascashon cuyonfianifo. <sup>36</sup> Asca huatan tsaocashon a Jesús mastafó foisnifo.

<sup>37</sup> Ascano man ihui coyan iquinanqui mastacashon amanaonri cununifo isca huaquin,

#### NAN JESUSFIN ISRAELIFOAN ATON NIAIFOCOINQUIN

ishon cununifo. Nannori Jesús icaran ishon mastanifo. <sup>38</sup> Ascashon yomutso rafuri mastanifo. Ocuma futsa futsafain ocuma futsa futsa anifo. <sup>39-40</sup> Ascashon camacaquin isca huanifo, —¡Cuu! Minfin yoimisiquin nocon Dios fu tsainti pushu min choquiacai. Ascatañ osha rafu non fustitan min afanan futsa huairan min imisi. Mifin numatan ihui coyan iquinanmaquinoashu fotohoo. Min Diospan facumainquin, —ishon roanifo.

<sup>41</sup> Nannori nocon yorafohuunshon Dios cufimisi niaifofo yafi Dios fu tsainti pushu cushumisifo futan Moisés cununi cuscan tapimamisifoan Jesusqui cashumutsamanifo. <sup>42</sup> Ascashon yoinifo, —Nanton futsafo numafatirosaquin aficai numatiroma. Ascan minmain Israelifoan aton niaifoquin ihui coyan iquinanmaquinoashu fotohoo. Min ascaiton oinquifin non mia icoindra huaicain, —ishon roanifo. <sup>43</sup> Ascasho niaifofoan nanno niafo ato yoinifo isca huaquin, —Jesús noco yoimisi, “Unfin Diospan facuqui,” ishon noco yoimisi. Nantofin Dios icoindra huamisiquin. Ascan Upa Diosin a fuchipaiquifin numatiroquin, —ishon aquí tsain chaca huanifo. <sup>44</sup> Ascano afu masta rafutan aquí tsain chaca huacaqui roanifo.

*Jesús nani cuscan  
Mr 15.33-41; Lc 23.44-49; Jn 19.28-30*

<sup>45</sup> Ascano fari masafinin racafiašhu nan maitio faquishpacuahuani. Ascashu man fari caino afanan shafani. <sup>46</sup> Ascaíno nantianri Jesús fasi oi ashcafínin apa cunani, —¿Elí, Elí lema sabactani? —nan yoipai, —¿Uhuun Diosin, Uhuun Diosin, ahúuscai mian potamun? —huani.

<sup>47</sup> Jesús ascaiton yorafoan mapo cashon nicacaquin yoinifo, —Nicacapon. Elías cunaiton, —huanifo. <sup>48</sup> Ascaíno futsa ichoni fimi unu focash muran mishan nanupacufoantan faca tahuá shatun mishan tunhuuinfoan Jesús inanpaiquin. <sup>49</sup> Inanpaiyaiton atirifoan yoinifo, —Unuhuu. Elías oshomain fotomaicai non oinon, —huanifo.

<sup>50</sup> Ascano Jesús fasi fiisinacahuani. Fiisinacahuatan naani.

<sup>51</sup> Ascashu Jesús natapaiyaino a Judiofoan Dios fu tsanti pushu murannoaa pano puta pochimua aficoi fashnupacucahuani. Nanscatapaiyaino mai nayanaiyainquin. Toquirininhuanfo torufafaini. <sup>52-53</sup> Ascaino nan Diospan yorafo naacun mahua quini muran mai huanifo. Nan toquirinin huafu fupucui futsuaino Diosin afanan ato nimani. Ascashu Jesús funiaitian nanfori nan mahua quini murannoashu Jerusalén muran iquinifo. Ascaiton nanao yora ichapafoan oinnifo.

<sup>54</sup> Ascaino ranushumua niaifo yafi a futan Jesús cushuafoan mai nayanaiyacaino ahuara futsafori ahuascaraiton oincani fasi ratucoincaquin yoinifo, —Iconfinquin. Nanfin Diospan facuquin, —ishon yoinifo.

<sup>55-56</sup> Ascaiton nannoshon ainfo ichapafoan chaicushon oinnifo. Nan María Magdalena non María futsa nan Santiago futan José ahua non Zebedeo facufoan aton ahuari. Nantifi nan ainfo Galilea anoashu Jesús fu foanfafainmisifoan nan apaiyaito cuscan ato huashomisifo.

### *Jesús mai huani*

*Mr 15.42-47; Lc 23.50-56; Jn 19.38-42*

<sup>57</sup> Ascataan man fari caino nocofunu ahuashta yopatanaima ahuun anu José nan Arimatea anoashu cainni. Nantorifi Jesús tanamisi sharacoin ini. <sup>58</sup> Nan José niaifo Pilato ano cashon yoiquin isca huani, —Niaifon, un Jesús toquirininhuan quini muran mai huapai. Un mia yocayoaran, —ishon yoini. Ascaiton, —Jesús ahuun caya José inancahuun, —ishon Pilato yononi. <sup>59</sup> Ascaiton José Jesús ahuun caya pano oshopa sharacoinchi raconi. <sup>60</sup> Racoshon toquirininhuan quini muran Jesús mai huani. A murancai tsoa maiyomisima muran mai huani. Ascashon toquirininhuanun fupofaini cani. <sup>61</sup> Nannoshori María Magdalena futan María futsan tsaoshon oinnifo.

### *Ranushumuafaoan nan mahua quini ano cushunifo*

<sup>62</sup> Iyoconaino tunutitian yorafohuunshon Dios cufimisi niaifo yafi Fariseofo Pilatoqui fonifo. <sup>63</sup> Focashon yoinifo, —Niashu nan Jesús chanishunin yoimisi, “Un naashu osha rafu non fustitan un afanan funitiroran,” imisi. <sup>64</sup> Ascacun min ranushumuafao a maia toquirininhuan quini ano ato nichihuun cushunonfo. Min asca huaiyamaitofin afu rafuafoan ahuun caya onui futirofoquin. “Man funiaran,” icashu chanishcaquin. Jesús chani tauyomisi. Ascan chipocaifin fasi chani finacointirofoquin, —huaifoan. <sup>65</sup> Pilato ato yoini, —Manfin mato Dios fu tsanti pushu murannoaa maton ranushumuafao a toquirininhuan quini ano ato nichicahuun cushutanonfo, —ishon ato yoini. <sup>66</sup> Ascaiton a toquirininhuan quini ano ranushumuafao nichinifo. Nanfoan toquirininhuan sapa tocoro fuposhon ahuara tuipaton tanyacunifo. Ranushumuafao nanno nichifurani funifo nannoshon cushunonfo.

## 28

### *Jesús funini cuscan*

*Mr 16.1-8; Lc 24.1-12; Jn 20.1-10*

<sup>1</sup> Ascano Israelifoan noco tunutitian nan Domingo anaitia iyoconaino nan maia ano oin focani fonifo. <sup>2</sup> Ascaino nantianri mai fasi curushcain nayanaiyacaino nocon Ifo Diosin ahuun oinmati afu icafo nai ariashu fotoni. Fototan toquirininhuan fuputan acamaqui tsaoni. <sup>3</sup> Ascaino ahuun fuso fasi chashacoinni. Naan canan facaica ointsa. Ahuun sahuutiri fasi oshopa yoa rama furoa ointsa. <sup>4</sup> Ascaiton oincani ranushumuafao fasi ratui tari taricani aton ratupasi nayonifo. Nan naa shinantsa anifo.

<sup>5-6</sup> Ascaiton Diospan oinmatinin afu nai muran icaton María rafu yoini, —Ratuyamacahuun. Mun tapia man Jesús funai yoa. Jesús man mastafaitafo natian nunoma. Mato yoimisi cuscan man funia. Oin fucapon quini muran. Nan racaitano. <sup>7</sup> Ascashon afu rafuafo ato yoiriscatacahuun, “Jesús naafiaitashaqui man funiaquin.”

Galilea ano cai tauicai anoshon mato manashqui. Nannoshon man ointiro.” Un mato yoiai cuscan ato yoiriscatacahuun,—ishon Diosin nai oinmatinin ainfo rafu yoini.

<sup>8</sup> Ascaiton nicatan nan ainfo rafu toquirinhuan quini anoashu ichonifo. Ratufiacani aton nomuran fasi unimacoincaquin afu rafuafo yoi focani ichonifo. <sup>9</sup> Ichoaifoanno Jesús atoqui niriscatani. Ascashon, —Mun moiyan, —ishon ato yoini. Ascaiton nan ainfo rafutan taicopacufoantan, —Min nocon Iforan —huaifoan. <sup>10</sup> — Ratuyamacahuun. Ascatamarocon uhuun ushtofo ua yoishotacahuun Galilea ano fononfo. Nannoshon ua oinshcaquin,—ishon ato Jesús yoini.

### *Ranushumuafaon yorafo chani huani cuscan*

<sup>11</sup> Ascatan ainfofo Jesús anoashu foaifoanno ranushumuafori yorafohuunshon Dios cuvimisi niaifofoqui nan oianfo cuscan atoqui chaninifo. <sup>12</sup> Ascaiton nicacani niaifofo ichanancashon shinannifo, —Nonmun ahuesca huaicai, —ishon. Ascashon ranushumuaf yoinifo, —Non mato yoiai cuscan nannoricoirifi futsafo yoicahuun non mato pui ichapa inanon. <sup>13</sup> Ascacun ato yoiqui isca huatacahuun, “Jesús fu rafumisifoan non oshano fucashon Jesús ahuun caya man onuaforan,” ato huatacahuun. <sup>14</sup> Ascaiton niaifocoinin nicaquin Jesús ahuun caya anoma nical raquirira icaiton non yoisharaicanon mato ahuesca huanonma,—ishon niaifofoan ranushumuaf yoinifo. <sup>15</sup> Ascashon ato pui inanfoanno focashon nan niaifofoan ato yoafo cuscan nannoricoirifi yoinifo. Ascaiton nan maifoti anoafu futan Israelifoan nicanifo. Ascano nantian icoirifa huanifo ranushumuafan ato yoaifo cuscan nicacaquin.

### *Jesús ahuun unutaqui a rafuafo yononi cuscan*

*Mr 16.14-18; Lc 24.36-49; Jn 20.19-23*

<sup>16</sup> Ascashu non afu rafuafo once nan Jesús nocu yoiai cuscan machi Galilea ano non cani. <sup>17</sup> Ascashon oinquen non yoini,—¡Aicho! Min nocon Ifo Jesús. Non mia fasi noirán, —ishon non yoini. Ascafaitocai futsafoan icoirifa huacuana. <sup>18</sup> Ascano nocuqui chaimashta oshon nocu yoini,—Uhuun Upa ua yonoi nantifi nai ariafo yafi mai anoafori un yononon. <sup>19</sup> Ascacun manifoti anoafu yoifoanfafaitacahuun ua icoirifa huafain ua tanasharanonfo. Uhuun Upa Diosin ahuun anuhuunshon yafi uhuun anuhuunshon non Diospan Yoshin Sharahuunshonri yorafo unu muran iquimashcaquin. <sup>20</sup> Ascashon nantifi un mato yonoi cuscan huafain yorafori yosicahuun icoirifa huafain ua nicasharanonfo. Unfin matofu iquicai. Ascashu nan un afanan oaitian un mato furi ipanacaran,—ishon nocu Jesús yoini. Nanti.

## Marcos Jesushuunoa Cununi

*Juan yorafo unu muran iquimamisi tsoa istaipama ini  
Mt 3.1-12; Lc 3.1-9, 15-17; Jn 1.19-28*

<sup>1</sup> Natian tsain shara Jesucristo Diospan Furunhuunoa un mato cunushoni man tapinon. Nuno mai ano niyoashu ini cuscan un mato tapimai.

<sup>2</sup> Cainyataima fari ichapa inonpacoai cuscan ahuunoa nocon shuni Isaías cununi. Chipo inaca cuscan yoiyomisi. Upa Diosin Furun yoiyoni cuscan Isaías aqui cununi isca huaquin,

“Upashtan, min yorafoan mia onantaima uhuun tsain yoimisi un atoqui nichicain mihuunoa ato yoinon. Itisharanonfo mia nicashquin,”  
ishon Upa Diosin Furun yoini cuscan aqui cununi. <sup>3</sup> Diosin tsain yoimisihuunoari cununi.

“Tsoan istaipamashon ahuun yorafo yoishquin isca huaquin, ‘Nocon Ifo os-hquiquin. Itisharacahuun. Maton chaca shatucoincahuun isharashcaquin,’ atofin ato yoishquiquin,”  
ishon Juan cainyataima fari ichapa inaca cuscan Isaías ahuunoa cunushoni. <sup>4</sup> Ascan cununi cuscacoin aa. Tsoan istaipamanoashu Judea mai ano Juan oni. Ascano aqui furifurinifo. Furifuriaifoan ato yoiquin isca huani, —Maton chaca shatucoincahuun. Man ascaiton Upa Diosin maton chaca rau huanon afanan shinanshquinma. Asca huatan maton chaca shatucoinshon futsafori ismashcaquin un mato unu muran iquimanon, —ishon Juanpan ato yoini. <sup>5</sup> Ascano Jerusalén anoaflo yafi Judea anoashuri aqui funifo. Ahuun tsain nicipai funifo. Fucashon atirififoan aton chaca yoiaiton Juanpan ato unu Jordán naquishon iquimatan cainmapacuniquin.

<sup>6</sup> Camello inapan rani ahuun camisa huashon Juanpan sahuua ini. Ascashon yoinaton fichi aqui nanushumuni. Ascashori ocutsuru pifain afuchi fona ayani. <sup>7</sup> Ascano isca huaquin yoini, —Nocofunu futsan samamashta mato tapimai oshquin. Ua fasi finoncaia. Ahuamamishti huatiro. Uncaiasca huatiroma. Un ahuara shara huahuu rafanancai un ahuun oinmatima. Uhuun ramapaiyamainocai un ahuun oinmati icuanama. <sup>8</sup> Un mato unu muran iquimatan cainmanaquein maton chaca shatushon man Dios tanasharanon ascashon man ato oinmanon. Atofin ahuun Yoshin Shara matoya rafumapacuquin, —ishon Juanpan ato yoini.

*Juanpan Jesús unu muran iquimani  
Mt 3.13-17; Lc 3.21-22*

<sup>9</sup> Ascano Jesús Galilea anoashu unu Jordán ano cani. Nannoshon Juanpan unu muran iquimatan cainmani. <sup>10</sup> Ascatacapaiyaino naicoin finoinnifoantan Upa Dios icariashu nai fupuini. Nai fupuicaino Diospan Yoshin Shara ruhuin cuscara Jesusqui fotopacuahu-naiton oinnifo. <sup>11</sup> Fotoaino nai muranno Upan Diosin ahuun oi nicanifo isca huaiton, —Minfin uhuun Facuquin. Un mihiun fasi noicoin. Un miqui fasi unimacoinran, —ishon Apa Diosin yoini.

*Satanasin Jesús chaca huamapairiani  
Mt 4.1-11; Lc 4.1-13*

<sup>12</sup> Ascano tsoan istaipamashon ano Diosin Yoshin Sharapan Jesús iyoni. <sup>13</sup> Anocai tsoa icai inima. Yoinafosi nanno icai ini. Nannoshon Satanás cuarenta oshatan chaca huamapairiani. Ascatacina maquinoashu caino Upa Diosin ahuun oinmatifo afu icafo Jesusqui fotonifo cushushcaquin.

*Galilea anoshon Jesús ato yosiquin tau huaniquin*

*Mt 4.12-17; Lc 4.14-15*

<sup>14</sup> Ascano Juan ranushumuafoan cunu muran iquimanano Jesús Galilea ano nasocaini Diospan tsain shara yorafo yoishquin. <sup>15</sup> Ato yoiqui isca huani, —Nocon Ifo Diosin matoqui oshquiquin. Maton chaca shatucahuun. Chaca huaquima Diosin tsain shara icoinra huacahuun, —ishon Jesús ato yoini.

*Jesús afu rafumisi rafu non rafuri catonquin tau huani*

*Mt 4.18-22; Lc 5.1-11*

<sup>16</sup> Ato yoitan ianmanhuan Galilea cusumun cani. Caquin Simón chipocun Andrés futan nushutinin nushuaifoan ointoshini. Nan rafutanfin nushumisi inifoquin.

<sup>17</sup> Ascaiton, —U fu fucahuun. Manfin nushumisicoinquin. Man shiman ichaparasi nushutinin fia cuscan natian uhuunshon man uquin yora ichapa ihuushqui aton Ifo un inon, —ishon Jesús ato yoiniquin. <sup>18</sup> Ascaino nushuti huafaini afu fonifo.

<sup>19</sup> Jesús chaimashta catan Zebedeo facu rafu fuchini. Nan nanu rafutan Santiago futan Juanpan shasho naquishon nushuti icushnifoquin. <sup>20</sup> Ato fuchishon, —Un fu fucahuun, —ato huani. Ascaino samamashta apa yafi ahuun oinmatifo shasho naqui nichifaini focani afu fonifoquin.

*Jesús yoshin chaca nocofunumaquinoa potani*

*Lc 4.31-37*

<sup>21</sup> Ascano Capernaum mai ano fonifo. Judiofoan aton tunutitian ichananti pushu muran atofu ichanannifo. Ichananfoan Jesús ato yosiniquin. <sup>22</sup> Ascaiton nicacani —¡Aira! Nicacapon. Tsoancai anori noco yosimisima. ¿Ahuuscashon nunori noco yosisharaimun? Ahuun tsain sharacoin nanua. Moisés cununi cuscan nocon tapimamisifoan anori noco yositamarocon niaifoan tapicoian cuscara noco yosiaran, —ishon yoinifo.

<sup>23</sup> Ascano nanno ichananti pushu murannoia nocofunu yoshin chacanun ahuun nuushon fiisimani. <sup>24</sup> Fiisimaino, Jesús fuchini. Fuchishon yoiquin, —¿Ahuuscain min noco fucash huai oamun, Jesús Nazaret anoaton? ¿Min noco omitsiscapanacafo muran min noco potai oamun? Man non mia onan. Diosin mia catonni. Mincai chaca huamisima, —ishon yoshin chacapan yoini.

<sup>25</sup> Ascaiton, —Tsainyamahuu. Amaquinoashu catahuun, —ishon Jesús yoshin chaca curushcain nichini. <sup>26</sup> Ascainofin yoshin chacapan nocofunu fasi musta mustaimatan amaquinoashu fiisicaini cani. <sup>27</sup> Ascaiton oincani, —¡Aira! Jesús fasi ahuamamishti huacointiro. Iscaracai ahuashta non oinyomisima. ¿Ahuuscashomun ahuun tsainman yoshin chacapan nicacasmafiaiton nan yoia cuscacoin huaquin? —icashu yoinanifoquin. <sup>28</sup> Ascatañ chanifoanfafainifo Jesús aca cuscan ahuunoa Galilea anoafó yoifoanfafainifo.

*Simón ahuun raisi yoshafo Jesús caya huamani*

*Mt 8.14-15; Lc 4.38-39*

<sup>29</sup> Ascacaini Judiofoan ichananti pushu murannoashu Santiago yafi Juan fu focani Simón futan Andrés pushu ano noconifo. <sup>30</sup> Nanno Simón ahuun raisi yoshafo fasi yonaiton Jesús tapimanifo. <sup>31</sup> Ascano Jesús mutsoinfoannaino funinaca huani. Funinaca huatan yona matsiriscatan nan yoshafoan ato pimashquin pichacufaini.

*Jesús yora ichapa caya huamani*

*Mt 8.16-17; Lc 4.40-41*

<sup>32</sup> Ascatañ man fari caino isinincái futsa futsatapafo yafi yoshin chacafo atohuun nuufafaina yorafoan Jesusqui ihuunifo ato cayahuamapacunon. <sup>33</sup> Nan pushurasi anoashu Jesusqui funifo. <sup>34</sup> Isinincái futsa futsatapafo ato cayahuamapacuano. A yoshin chacafo atohuun nuufafaina atomaquinoa potani. Jesús Diospan facun yoshin chacafoan onainfoan —Tsainyamacahuun, —ato huani.

*Jesús ichananti pushu muranshon Apa tsain ato yoini**Lc 4.42-44*

<sup>35</sup> Ascataン shafacuaino pushu murannoashu Apa Dios cuficai tsoan istaipama cani.

<sup>36</sup> Caano Simón non afu rafuafoan Jesús funai focani fonifo. <sup>37</sup> Fuchicashon, —Nantifi yorafoan mia funairan, —huanifo.

<sup>38</sup> —Pushurasi futsafo ano non canon un atori Upa Diosin tsain yoinon. Ascacun uhuun Upa Dios ariashu nuno un oaquin, —Jesús ato huaniquin. <sup>39</sup> Ascashu nantishon Galilea ano cahuacacaini Israelifoan aton ichananti pushu muranshon Diosin tsain ato yoini. Nan yoshin chaca atohuun nuuafu atomaqinoa potaniquin.

*Jesús nocofunu nami rashquishi futsua caya huamani**Mt 8.1-4; Lc 5.12-16*

<sup>40</sup> Ascataン nocofunu futsa yoratishon ranimamishti rashquishi futsua Jesusqui nocoshon. Ratoconun mai chachishon yoini, —Ua caya huapaiquifin mian caya huatiroquin, —huaiton. <sup>41</sup> Ahuun ramapaiquifin ahuun mucuman ramanni, —Ai Un mia caya huai. Ascan natianfin min caiyaicain, —huainofin. <sup>42</sup> A rashquishi futsua cayariscani. <sup>43-44</sup> Cayacun yoini, —Un mia caya huaa tsoa yoiyoyamahuu. Nocon caifo-huunshon Dios cufimisi a ismatahuun. Moisés mato yononi cuscan chashoanun facu a inanhun mia rutushonon. Min chaca soafain min caya ato oinmashquin. Ascano tapinonfo Moisés noco yononi cuscan min aiton, —ishon Jesús yoifia. <sup>45</sup> Nicatamarocon samamashta ato yoifoanfafaini, —¡Oincapon! Jesús ua caya huashara, —ishon ato yoifoanfafaini. Ascaiton nicacani yorahuanrasi Jesusqui fupaifiacani Jesús iquitiroma ini. Ascano tsoan istaipama caano pushurasiti aqui cuyo funifo.

## 2

*Jesús nocofunu charishi futsua caya huani**Mt 9.1-8; Lc 5.17-26*

<sup>1</sup> Ascano osha ranantan afanan funifo. Capernaum ano nasofuracani. Nanno pushu muran iquicun nicanifo. <sup>2</sup> Nicacani yorahuanrasi aqui funifo ato Diosin tsain yoinon. Pushu fospicoianno tsoa futsa afanan iquitiroma ini. Umaintiri yora ichapacoin yuruicafono afanan tsoa iquitiroma ini. <sup>3</sup> Ascano nocofunu rafu non rafuriton aton yora charishi futsua shuhua narataшон ihuunifo Jesús caya huamanon. <sup>4</sup> Iquimapaiificaquin yorahuanrasi pushu fospiano iquimanifoma. Ascashon pushu fomancayan tapa tsucashon Jesús nia naman fotomapacufoannifo. Nanno yorahuanrasi nastui shuhua ya ratapacufoannifo. <sup>5</sup> Jesús oian nan nocofunu yoratishon charishi futsua ahuun yorafoan fasi icoinra huaifoan. Oinquin a yoratishon charishi futsua yoini, —Uhuun yorashta, mun mia chaca soashona, —huani.

<sup>6</sup> Ascano Moisés cununi cuscan tapimamisifo nanno tsaoafu ini. Aton nomuran shinancani, <sup>7</sup> —¡Ajaal! ¿Ahuuscaин na nocofunun anori yoimun? Diosin fustitofin chaca soatiroquin. Nocofin fuparaniquin. “Un Diosiran,” ishon. Anori yoiquifin “Upa Diosin chaca huaiquin,” —ishon aton nomuran shinannifo.

<sup>8</sup> Ascaifoan shinainfo cuscan Jesús onanshon ato isca huani, —¿Ahuuscaquimun maton nomuran amaquiri man shinaincain? <sup>9-10</sup> Unfin Cristoquin un yorafo aton chaca soashotiroquin. Un chaca soafain un ahuamamishti huatiro un mato oinmanicain. Upa Diosin ua catoan. Ahuunshonfin un yorafo aton chaca soashotiroquin, —ishon ato yoini. Asca huatan nocofunu yoratishon charishi futsua yoini, <sup>11</sup> —Min pushu ano min shuhua ya funicaitahuun, —huani. <sup>12</sup> Asca huatanaino nanno icafoti aton ointaiyi funinaca huantan ahuun shuhua chishtofaini cani. Ascacainaитon oincani nantifi yoinain futsunifo, —¡Aira! Diosin ahuamamishti huatiroquin. Noncái iscara oinyomisima. Diosin sharaquin, —icashu yoinannifoquin.

*—Uqui ohuu. Ua tanamisi ishquin, —Jesús Mateo huani  
Mt 9.9-13; Lc 5.27-32*

<sup>13</sup> Jesú nanscacaini afanan ian cusumunri caino yorahuanrasi afanan aqui funifo. Ascano ato yosini. <sup>14</sup> Ian cusumun cahuanquin Alfeopan facu ahuun anu Mateo Jesús oinni. Nanton niaifo pui fishofafainmisi. Pushu facu muran tsaoa ini. Ascaiton Jesús a yoiquin, —Uqui ohuu. Ua tanamisi ishquin, —huani. Asca huaino funinaca huatan afu cani.

<sup>15</sup> Ascaino Mateon Jesús yafi afu rafumisifo ya ahuun pushu ano iyoni ato pimashquin. Niaifo pui fishofafainmisifo non Moisés cununi cuscan tapificashon tanapainifoma Jesús fu foanfafainmisifo ahuun tsain nicapaicani. Afori Mateon pushu muran iquinifo ato futan pishcaquin. <sup>16</sup> Ascano Moisés cununi cuscan tapimamisifo nanfofin Fariseofo inquin. Oincaquin Jesús tanamisifo yoini, —¿Ahuuscain Jesús na niaifo pui fishomisifo yafi Moisés tsain tapimafiacashon tanapainifoma futan piimun? —huanifo.

<sup>17</sup> Ascaifoan nicaquin Jesús ato cumani, —A isinincreifoma caya huamamitsamisi yopacanima. Ascan nan isinincreifoti fasi caya huamamitsamisi yopacoincani. Ascarifi aquin, “Uncai ahua chaca huamisimaran,” icaifoan un aton chaca soashotiroma. Ascan, “Unfin fasi chaca huamisiquin. Un imisi cuscan un afanan apaimaran,” icaiton un ato yoitiro, “Uqui fucahuun. Un maton chaca soashotiroran,” —ishon Jesús ato yoini.

*Piqui tunumisifohuunoa Jesús yocanifo  
Mt 9.14-17; Lc 5.33-39*

<sup>18</sup> Ascano iyoco futsaino nan Juanhuunshon tanamisifo non Fariseofoan piqui tununifoquin. Ascaiton futsafoan Jesús yocanifo, —¿Ahuuscain Juanhuunshon tapimisifo futan Fariseofoanri piqui tunufiajino minhuunshon tapimisifoancai piqui tunucaniamun? —ishon yocaifoan.

<sup>19</sup> Jesú ato cumani, —Yora unimaifoancai chaca shinancanima. Ascacuai piqui tunutirofoma. Funun ato chani huafoanricai piqui tunutirofoma. Fununmain ato fucunfin. Ascaino unimacaquin. <sup>20</sup> Ascafiajino funu chipo atomaqui cano shinancaquin piqui tunutiroforan, —ishon Jesús ato yoini.

<sup>21</sup> Tsain futsari ato yoini isca huaquin, —Camisa shunishta fashnucun funa potonun icushumua poto funa chopi futsuashu camisa fasi uhuai finacointiro. Tsoancai afanan ascara icushpaitiroma. Nanscarifi aqui un mato tsain funa yosian cuscan nicacoinshon man apaoni cuscan man afanan apaitiroma. Tsoan ua tanacoinshocai apaoni cuscan huatiroma. Ascashu funa cuscara shara itiro. <sup>22</sup> Nanscarifi aqui tsoancai fichi tutso shuni muran vino funa a muran manutiroma. Toshacainaino fichi tutso chacanatiro. Vinori cuyofotiro. Nanscarifi aquin maton shunicaifoan mato yosimisi cuscan yafi un mato yoiai cuscan nan rafucai ositiroma. Un mato yosiain cuscacoin nannori. Diosin tsain shara. Ascan maton shunicaifoan yosia cuscacai anorima. Anori tanashucai Diosin mato imapaiyai cuscan man atiroma. Nan rafu osishon nicapaiquicai man shi-nansharatiroma. Vino funa fichi tutso funa muran manua shara itiro. Nanscarifi aquin ratoranfoan apaoni cuscan unutan un ato tsain funa yosiain cuscan fusti tanacointirofo Diosin ato funa shara imatiroran, —ishon Jesús ato yoini.

*Tunutitianhuunoa Jesús ato yosini  
Mt 12.1-8; Lc 6.1-5*

<sup>23</sup> Ascatan Israelifoan aton tunutitian Jesús yafi ahuunshon tapimisifo mau mapai fucaquin trigo mutuscashon fonicoinkaquin plainfoan. <sup>24</sup> Fariseofoan oincaquin Jesús yoinifo, —¡Oincapon! ¿Ahuuscain nocon shuni Moisés yononi cuscacai man aimá? Tunutitian trigo man mutuscaniran, —huaifoan.

<sup>25</sup> Ascaiton Jesús ato cumaquin, —¿Davidhuunoa cununi cuscan man oinmisimamun? ¿Fonainquin nocon shuni David afu rafuafo futan ani cuscan man nicamisimamun?

Nicacapon un mato yoinon. <sup>26</sup> Abiatar nocon yorafohuunshon Dios cufimisi niaifocoin ini. Nantianri David yafi afu rafuafo Diosin tsain cufiti pushu muran iquinifo. Iquicatan amuranno misifo ato piquini fasi fonicoinquín. Tushu futsa yamaino, misifofin nan nocon yorafohuunshon Dios cufimisi niaifocoinnaasi ini. Tsoa futsan pitiroma. Nannori yonofiani fasi fonicoinquín David pini. Ascashon afu rafuafori pimani.

<sup>27</sup> Ascan un mato yoinon. Upa Diosincai nunori shinannima. Isca huaquin, “Un tunutitian yonoyonon. Chipo un yorafo onihuai tunutitian yonononfomaran,” ishon anori shinannima. Ascatama Upa Diosin yorafo shara huapaiquin Moisés yoini isca huaquin, “Ato yonohuun semanantifi shafa fusti yonononfoma. Tunuyononfo ua shinancaquin,” ishon Upa Diosin yoini. <sup>28</sup> Ascacun un yoitiro ahuuscamaín tunutitian man atiroquin. Uafin Upa Diosin catonniquin,—ishon ato yoini.

### 3

#### *Jesús tunutitian nocofunu musufimua cayahuani*

*Mt 12.9-14; Lc 6.6-11*

<sup>1-2</sup> Ascatan tunuti futsaino Jesús Israelifoan aton ichananti pushu muran iquini. Iqui-cun Fariseofo yafi Moisés cunu tapimamisifoanri Jesús aasi oinnifo ahuuscashomain nocofunu musufimua tunutitian caya huaicain. Ahuunoa ahuara chaca yoipaicaquin.

<sup>3</sup> Ascan Jesús a nocofunu musufimua yoini. —Aton ointaifi nuno nihuu, —huani.

<sup>4</sup> Ascaíno nocofunun ato nishoni,—Un mato yocain man ua cumatiromainquin. ¿Raquiri Moisés tsain nocó yonoamun? ¿Tunutitian non ahuara huatiromun? ¿Nonraca sharatiro? ¿Nonraca chacatiro? ¿Tunutitian non yora cayahuatiromun? ¿Yora isinin icai oamun non cayahuaimun? Non caya huamama natiro. Nocohuun nutiro. ¿Non rutua shinantsain? ¿Ascamun shara?—ishon ato yocani. Ascafiaíno puusinifoma.

<sup>5</sup> Ascatan sinaquin ato oiancutan ahuun nomuran fasi shinain, —¡Ohushta! ¿Ahuuscashon aton nomuran shinanchacamisifomun? Ua icoíra huacatama, —ishon shinanni. Ascashon a nocofunu musufimua yoini, —Min mucu mushan huahuun, —huaino. Yonoa cuscan mushaniquin. Ascashu ahuun mucu muma sharacoin iriscatani.

<sup>6</sup> Ascaíno Fariseofo amaquinoashu Herodes ahuun yorafo ano fonifo,—¿Ahuuscashomain non Jesús achimanain rutunonfo? —icashu yoinannifo.

#### *Jesús fu yorahuanrasi ian cusumun fonifo*

<sup>7-8</sup> Ascatan Jesús yafi afu rafumisifori nannoashu ianmanhuan Galilea ano fonifo. Foaifoanno yorahuanrasi Jesusqui funifo. Galilea anoashu fuaifo Judea anoashu fuaino Jerusalén anoashu fuaino Idumea anoashu fuaino unu Jordán chaimashta icafori fuaino Tiro yafi Sidón anoashuri aquí funifo. <sup>9-10</sup> Yora ichapa caya huamamisi tapicanashu isininjaifo ichaparasi aquí funifo. —Norifi non Jesusqui mupiashu non cayatiroran,—icashon shinannifo. Jesús oinquin afu rafuafo yoini,—Ua shasho fushocahuun. Ipaishoma un yopaicai. Yorahuanrasiton ua yuruatiroquin, —Jesús huani. <sup>11</sup> Yora yoshin chacafo atohuun nuáfo Jesús fuchicatan fuopacufoannifo. Ascashon yoinifo,—Minfin Diospan facuquin, —huaiifoan. <sup>12</sup> —Tsainyamacahuun. Un Diospan facuqui tsoa yoiyamacahuun,—ato curushcái huaniquin.

#### *Jesús afu rafuafo tanamisifo doce catoan*

*Mt 10.1-4; Lc 6.12-16*

<sup>13</sup> Ascatan Jesús machi mapufaitan afu rafuafo cunani, —Uqui fucahuun, —ato huani. <sup>14</sup> Aquí fuafoan doce catonshon ato yoini, —Man uhuun yonomisifo itiro ufu rafufafaincahuun. Un mato nichicai man yorafo Upa Diosin tsain ato yoinon. <sup>15</sup> Un mato yonoshqui uhuunshon yoshin chacafo futsafohuun nuucun atomaquinoa man potatiroran,—ishon ato yoini. <sup>16</sup> Nan doce Jesús catonni afoan aton anufo un mato tapimanon. Futsan Simonfiacun ahuun anu futsan Jesús tuqui huani Perdo. <sup>17</sup> Futsafo

Zebedeo facu rafu Santiago yafi Juan. Aton anu tuqui huani Moanurquisi, onicoinnin tsainmanfin nocofunufo curushcoin nan turuica cuscara. <sup>18</sup> Futsanfoan aton anu Andrés non Felipe non Bartolomé non Mateo non Tomás non Alfeopan facu Santiago non Tadeo non Simón futsan nanton fasi Diosin tsain tanasharacoinpaiyaino. <sup>19</sup> Futsan ahuun anu Judas Iscariote nanton Jesús potashon ato achimani.

*Jesús yafi Satanás*

*Mt 12.22-32; Lc 11.14-23; 12.10*

<sup>20</sup> Ascatan Jesús yafi afu rafuafo pushu muran iquinifo. Iquiano yorahuanrasi a nicapaicani aqui funifo. Ascano ato yosiaino a futan afu rafuafoan ahua piinifoma.

<sup>21</sup> Ascano ato yosifaiquin, yosifaiquin huaiton. —¡Uru! Jesusfin nison cuscaracoinquin, —icashu ahuun yoinannifo. Acaifoan nicai ahuun yorafo funifo. Ihuipaicani.

<sup>22</sup> Asca Moisés tsain tapimamisifori Jerusalén anoashu nicapai aqui funifo, Ascashon yoicaquin —Jesusfin Satanashunshon ahuardo huaiquin. Satanás yoshin chacafoan aton niaifo. Ahunshon nocofunumaquinoa yoshin chacafo potairan, —ishon yoinifo.

<sup>23</sup> Ascano Jesús ato cunani. Ato ahuara futsafihuunoa yoishquin ato tapimanon. Yoini isca huaquin, —¿Ahuuscashumain Satanás afiri potatiroquin? <sup>24</sup> Caifofo afi ranan rutunain cuyotirofo. <sup>25</sup> Yorafori afi ranan rutunain cuyotirofo. <sup>26</sup> Nanscarifi aqui Satanás afín ahuun yoshin chacafo potaino arifi funotiro. Asca huaino ahuun yono chacanatiro arifi cuyotiro. <sup>27</sup> Shinancapon. Nocofunu mutsisipacoinin ahuun pushu cushuanocai tsoa iquitrioma ahuun mafo onunshquin. Ascafaino rufofo achifain munushushon ahuun mafo onutiro, —ishon Jesús ato yoini. <sup>28-30</sup> —Jesuscái Diospan Yoshin Sharahuunshon yorafo caya huamama yoshin chacahuunshon ato caya huamaran, —ishon yoinifo. Ascafiaifoan Jesús ato yoini, —Icon un mato yoinon. Ua nicacahuun. Ratoran futsan futsafo tsain chaca huafain Diosquiri chaca huacun Upa Diosin nantifi chaca huaa cuscan rau huashotiro. Ascafia tsoan Dios nicacasmaiton yoiquin isca huatiro, “Naton aca cuscan Satanashunshon acaran,” huafaino Diospan Yoshin Sharahuunshon atiro. Nanton Diospan Yoshin Sharahuunoa tsain chaca huacun Upa Diosin ahuun chaca rau huanacama. Chaca huaa cuscan ahuun nuupacunacaran, —ishon Jesús ato yoini.

*Jesús ahua yafi ahuun chipocufo*

*Mt 12.46-50; Lc 8.19-21*

<sup>31</sup> Ascano Jesús icano ahua yafi chipocufo noconifo. Pushu fospiaifono chifishon niafo futsa amuran nichini a yoinonfo. <sup>32</sup> Yorahuanrasiton cufuacunifo. Ascano futsan yoini, —Min uhuan futan ushto rananun chifi nishon mia ahuara yoipai fuaforan, —ishon yoiaiton. <sup>33</sup> —Un mato tapimai ratofomain uhuun uhua yafi uhuun ushtofoquin, —ishon ato yoini. <sup>34</sup> Ascano cufuacufoannaifoan ato oiancufainquin, —Nafo uhuun uhua cuscarafo yafi uhuun ushtofoquin. <sup>35</sup> Uhuun Upa Diosin ato amapaiyai cuscan afofin uhuun ushtofo cuscara non uhuun chicofo cuscarafo non uhuun uhua cuscarafoquin, —ishon Jesús ato yoini.

## 4

*Ushu saamisihuunoa Jesús ato ahuara futsa yosini*

*Mt 13.1-9; Lc 8.4-8*

<sup>1</sup> Ascano iyoco futsaino ian cusumunshon Jesús ato yosiaiton nicacani yorahuanrasi funifo. Fuafono shashon naqui nanupacucahuán cushan camaqui tsaoshon ato yoini. Ascano ian cusumun maponifo ahuun tsain nicacani. <sup>2</sup> Ahuun tsainman ato ichapa yosini isca huaquin, <sup>3</sup> —Uhuun yoramishtichin ua nicasharacahuun un mato yoinon. Nocofunun ahuun noshati murannoá fimi ushu fishon ahuun mau mamaqui. <sup>4</sup> Saacano ushufo fai nushmancayan pacua puiyaoan piinifo. <sup>5</sup> Ushu rananri toquiri camaqui pacua maima ano pacuni. Samamashta ushu foaicano <sup>6</sup> farin tsacaqui yositima huani.

Ascano nani. Ahuun tapo chaimashta foanno fanafu nai cuyoni. Tsasi futsuni. <sup>7</sup> Ushu rananri tasha murannoashu foaisharanima. Ascatari fiminima. <sup>8</sup> Ascan ushu rananri mai shara ano saaca. Foaisharashu fimi. Futsa foasharashu treinta ahuun fimi icaino ushu futsa sesenta ahuun fimi icaino futsa cien ahuun fimi ini,—ishon yosini.

<sup>9</sup> Ascano Jesús ato yoiquin,—Man pafiqui yaquin ua nicasharacahuun,—ato huani.

*Jesús yorahuanrasi yoini cuscan chipo afu rafuafo shafacafi yosini*

*Mt 13.10-17; Lc 8.9-10*

<sup>10</sup> Ascano chipo yorafo amaqinoashu fonifo. Foafono afu rafuafo doce fucashon yocanifo, —Ifon, min rama fimi ushu saamisihuunoa ahuara nocu tapimashquin non tapisharamaquin. Noco shafacafi yosihuu, —huaifoan. <sup>11</sup> Asca huaifoan Jesús ato cumani, —Upa Diosin a icanoshon ahuun yorafo iquinai cuscan un mato fusti shafacafi tapimai. Ascashon futsafo ahuaraofo cusraruunshon fustisi un ato yoiaquin. <sup>12</sup> Nicasharaifoan Upa Diosin aton chaca soashocuana ato rau huashquin. Ascan oinfiaquicai tapitirofoma. Nicafiaquicai tapitirofoma. Tapicashon aton chaca shatucuanafo Diosin tsain icoira huashquin. Ascaiton un aton chaca soashocuana,—ishon ato yoini.

*Jesús ushu saamisihuunoa ato tapimasharani*

*Mt 13.18-23; Lc 8.11-15*

<sup>13</sup> —¿Nanfo un saamisihuunoa ahuara futsa ato tapima cuscan man nicayamaiton ahuuscashomun man tsain futsafoi nicatiroquin? <sup>14</sup> Nicasharacahuun un mato tapi-manon. Nan ushu saamisi Diosin tsain yoimisi cusrara. <sup>15</sup> Ushufo fai nushmancayan pacua puiyaoan samamashta piinifo. Nanscarifiai Diosin tsain yoimisiton aton nomuran nanupaifiai aton nomuran fai curush cusraracoin. Ascan Satanás ato tsain futsa yoiquin afanan Diosin tsain nicanonfoma ahuun ointi muran funomana.

<sup>16-17</sup> Ascan futsafoan aton ointi toquiri cusrara. Ushu toquiri camaqui pacuni anoashu ahuun tapo chaimashta foanno samamashta fanafu nai cuyoni. Tsasi futsuni. Nanscarifiai futsafoan Diosin tsain tau huaquin nicaiyoi unimacoinflashon samamashta ahuun tsain cachiquiri huatirofo. Diosin tsain nicafiacatan aton nomuran nanucoianfoma. Ascan ahuara chaca finonshon iyamarai omitsiscaifoanno afanan Diosin tsain nicapaitirofoma. Dios afanan tanapaitirofoma. <sup>18-19</sup> Ascan un mato yoiai cuscan ushu futsa tasha muran foaicasu foaisharanima. Nanscarifiai futsafoan Diosin tsain nicafiai chipo ahuara futsa chaca shinanquin. Shinanchacafain pui ichapa noifain, “Un pui ichapayashuraca un isharatiroatin,” ishon amaquiri shinanquin. Diosin tsain afanan shinainma. Ascano Diosin tsain nicafiaquin ahuara futsa shinaintocai ahua Dios ashontiroma.

<sup>20</sup> Ascanfiaquin ushu futsafoan mai shara ano saacano foaiquin yosiashu man fimi ichapa ya. Nanscarifiai futsafoan Diosin tsain nicacoinpaiquin ahuun tsain aton nomuran nanucontiro. Futsan ahuun tsain nanusharaino Diosin yoini cuscacoin atiro. Futsanri ahuun tsain nicacoinquin finacointiro. Futsanri fasi mima huacointiroran,—ishon Jesús ato yosiniquin.

*Jesús lamparinahuunoa yoi cafiscani*

*Lc 8.16-18*

<sup>21</sup> Ascano afanan ahuara futsan ato yosiquin isca huani,—Tsoancai faquishaino oin-paiquin lamparina otashon cutipan fupotirofoma. Tsoanricai oshati nanman huatiroma. Ascatama tapa camaqui huatirofo shafacafi oinsharanonfo. Nanscarifiai Diosin nocon imapaipayai cuscan apaiquicai non ahuun tsain casho muran iyamarai raniran futsa non onutiroma. Ascatama shafacafi oinsharatiro Diosin yoia cuscan huafain. <sup>22</sup> Ascashon non shinanmisi cuscan nocu nantifi Diosin puashoshquin. Tsoancai afanan ahuarashta fomantiroma. Diosin nantifi yorafoti aton ointaifi puashoyoshquin. <sup>23</sup> Man pafiqui yaquin ua nicasharacahuun.

<sup>24</sup> Ascacun oinfain. Uhuun tsain nicasharacahuun. Amaquiri nicayamacahuun. Un mato yoia cuscan aashquin. Ascaquin man fasi uhuun tsain tapicointiro. <sup>25</sup> Asca tsoan uhuun tsain nicasharai ahuun nomuran nanucoiainno Upa Diosin mima huacoinquin tapimashquin. Ascan tsoan uhuun tsain nicafiai un yoia cuscan aiyamashu nan cuscarafonantifi funcani. Upa Diosin funomanano ahuashtayacanimaran, —ishon Jesús ato yoini.

*Jesús ushuhuunoa yoicoín cafiscaní*

<sup>26</sup> Ascatafan ahan ahuara futsan ato yosini. —Ahuu cuscaramain Upa Diosin nantifi iquinnaquin un mato yoicain. Nocofunun ahuun mau ano ushufo fana. <sup>27</sup> Shafatifi non yamutifiri nan ushufo foaicaino yosishara. Ascan mau ifoancaino nan ushufo foaimatiroma shafatan yafi yamuri afi yositiroquin. Ahuuscashumain afin foaitiroquin non tapiama. <sup>28</sup> Mai muran ushu foanno iquisi ahuun tapo foaitiro. Ascashu chipo shuqui fimi ya itiro. Ahuun unutani shuqui choshitiro.

<sup>29</sup> Ascan shuqui choshiano mau ifoan shuqui samamashta chituntiro. Nanscarifiai tsoa icoínra huamafoan icoínra huacani itisharacani samamashta Diosin mai ano nocotiro nantifi iquishquin, —ishon Jesús ato yoini.

*Jesús ihui mostaza ushuhuunoa yoicoín cafisca huani*

*Mt 13.31-32; Lc 13.18-19*

<sup>30</sup> Ascatafan ahan Jesús ato yoiquin isca huani, —¿Ahuuscashomain un mato yositiroquin Diosin ahuun yorafoti yonofain iquinaquin? ¿Rato tsain futsacaimun un mato yosicain man tapinon ahuu cuscaramain Upa Diosin nantifi iquinaquin? Ua nicacahuun. <sup>31</sup> Mostaza ushu uhuapamashta. <sup>32</sup> Ascafia yosiashu fasi uhuapacoin itiro. Rato ihuicai mostazatioma. Ahuun tushpafori fasi uhuapacoin. Ahuun tushpahuu puiya futsa futsatapafo tsaotiro. Nanno mostaza ahuun puifoan ahuun tushpafo ihuaquin futsa fari tsacanonma. Nanscarifiai Diosin icoínra huafo tau huaquin ichapamatón nicayotirofo. Chipo fasi ichapafain tanacointirofo Diosqui nocosharashcaquin, —ishon Jesús ato yoini.

*Jesús tsain futsahuunoa ato ahuarafó yosini*

*Mt 13.34-35*

<sup>33</sup> Ascatari tsain futsahuunoa ichapa ato yoini ato tapimanon. Afihuunshon ato Diosin tsain tapimani. Tapitirofo cuscan ato tapimani. <sup>34</sup> Ahuarafó ato yosipaini tsain futsahuunoa nanfotisi ato yoini. Ascafia chipo afu rafumisifo atotisi tsain futsahuunoa shafacafi ato yosini.

*Nihuyafi ian fuchomanhuanri Jesús ahuun tsainmansi nishma huani*

*Mt 8.23-27; Lc 8.22-25*

<sup>35</sup> Ascatari man fari caino Jesús afu rafuafó yoini, —Ianmanhuan oquiri non fonon, —ato huani. <sup>36</sup> Ascaino yorafomaquishon afu rafumisifoan Jesús iammanhuan oquiri iyonifo. Chipo atirifiton mufainifo. <sup>37</sup> Shashon pocuaifono atoqui fuuhuan noconi. Fuchomanhuan uno fospini. <sup>38</sup> Ascaino Jesús shasho tsispacamaquinoashu oshano afu rafumisifoan moinnifo. —Nocon tapimamisiton moihiu. ¿Min noco shinainmamun? Man non asai futsuicai, —ishon moinnifo.

<sup>39</sup> Asca huaifoanno moinacahuatan ninacahuán fuu nishma huani. —Fuun nishmahuu. Fuchomanhuan pusiyamahuu, —Jesús huani. Asca huaino fuun nishmafainaino ian pusiquima racani. <sup>40</sup> Afu rafuafó yoiquin isca huani, —¿Ahuuscain man ratu ain? Un ahuamamishti huatiro mancái icoínra huataimacai, —ato huani.

<sup>41</sup> Ascaino aton nomuran fasi shinancani, —¡Aira! ¿Ahuu cuscara nocofunushonmun nocon Ifon? Na fuuhuan yafi ian fuchomanhuan nan yoiai cuscan huaquin. Man nishma hua, —icashu afu rafuafó yoinannifo.

## 5

*Nocofunu yoshin chacafo ahuun nuucun Jesús caya huani  
Mt 8.28-34; Lc 8.26-39*

<sup>1</sup> Ascano ianmanhuan pocufainifo. Gerasafoan aton mai ano fonifo. <sup>2</sup> Nocotan Jesús mapufaini. Ascaino nocofunu yoshin chaca ahuun nua aqui noconi. Mahua quini muran naafio mai huapaonifo murannoashu aqui noconi. <sup>3-4</sup> Nan nocofunu mahua quini muran ipaoni. Yorafoan cunopan munushfain onushfain huafiafo cuno tusaqui futsani. Tsoan afanan achitiroma munushfain onushushquin. <sup>5</sup> Yamutifi yafi shafatifiri mahua quinifo muran icain machi ano cahuacacaipaoni. Nannoashu toquirinin afiri tsacai futsuni fiisiyanan.

<sup>6</sup> Jesús chaicunoa fuchitan aqui ichoni. Ichotan fuopacucahuatan. <sup>7-8</sup> Ascano Jesús yoini,—Minfin yoshin chacacoquin. Na nocofunumaquinoashu catahuun,—huaiton. —¿Mian ahuusca huapaimun, Jesús? Diosin nai muran icaton ahuun Facufin minquin. Diosinhunshon yoihui min ua omitsisca huamashquima. Yoipun, —nocofunun yoshin chaca ahuun nuaton yoini.

<sup>9</sup> Ascaino amaquinoashu cataima Jesús yocani, —¿Min ahuunumun? —ishon yocaiton. Yoshin chacanun cumani, —Uhuun anufin ichapaquin. Urus fusticai na nocofunu muran un icama. Un fu yoshin chaca ichaparasi amuran ica. <sup>10</sup> Mai futsa ano noco nichiyamapun,—huariani.

<sup>11-12</sup> Na machi mananunshon yahua inafoan picanquin. —Ato muran noco nichipun, —yoshin chacafoan huaifoan. <sup>13</sup> —Yahuafu muran fotacahuun, —Jesús ato huani. Asca huatanaino nocofunumaquinoashu dos mil yahuafu muran fonifo. Yahuafuhun nuui focani. Ascaino nantifi yahuahuanfo ian muran maocofainni. Ascashu asai futsunifo.

<sup>14</sup> Ascaifoan oinfaincani yahuahuanfo cushumisifo ichonifo. Pushurasi ari chani focani. Pasohuatofori chaninifo. Ascaiton nicacani yorahuanrasi yahua asai futsua oinpaicani funifo. <sup>15</sup> Fucaquin oianfo Jesús yafi nocofunu ahuun yoshin chacafo a muran imisi tsaoa ini man amaquinoa Jesús yoshin chacafo potano. Afanan imisi cuscan chitoria inima. Man sahuuti sahuua. Afananricai nison inima. Shinansharacoinni. Ascaiton oincani ratucoinnifo. <sup>16</sup> Ascashon atirifoqui chaninifo nan oianfo cuscan huafain chaniaifoan. <sup>17</sup> Nicacaquin Jesús isca huanifo, —Nocon mai anoashu catapun, —huanifo.

<sup>18</sup> Asca huaifono Jesús shashon nanucaini cani. Nanuataima, —Uari iyoicapun. Un mifu capaicai, —a yoshin chaca amaquinoa potaton huaiton. <sup>19</sup> —Ma. Min pushu ano cashon min yorafo yoitahuun. Upa Diosin mia ashoan cuscan huafain minhuun ramapaia cuscan ato yoitahuun, —huani. <sup>20</sup> Asca huaino cashon Jesús aca cuscan mucu rafuti pushurasi ano yoifoanfafaini. Ascaiton nicacani, —¡Aira! ¡Nicacapon! Tsoan anori nicayomisimaran, —icanashu nantifi yoinannifo.

*Jairo ahuun ainfacu naafiacun Jesús funinini non ainfoan Jesús ahuun sahuuti muuan-shu cayani*

*Mt 9.18-26; Lc 8.40-56*

<sup>21</sup> Ascatacán Jesús fu afu rafuafo afanan ian mahuan pocufurannaino yorahuanrasi cusumun aqui noconi. <sup>22</sup> Ascaifono Judíofoan ichananti pushu anoa aton niaifo ahuun anu Jairo Jesús fuchitan fuoshopacuhuaquin yoini, <sup>23</sup> —Uhuun facushta isinin ishoinquin. Uhuun pushu ano ufu capun. Uhuun facushta ua maiatashoshquin cayanon, —huani. <sup>24</sup> Ascatacán cani. Ascaino yorahuanrasi afu fonifo. Focani fasi yuruinfainifo. <sup>25</sup> Nannori ainfo imi imitiani atofu cani. Doce fari man aqui caano nusuyamacai. <sup>26</sup> Doctor rasi ano cata cataquin nantifi ahuun pui ato inanquin anaitini. Ascafashu cayatamarocon finacoinni.

<sup>27</sup> Ascano Jesushuunoa yoliaifoan nicaquin ainfoan acachorishon ahuun sahuuti muunniquin cayashquin. <sup>28</sup> —Un ahuun sahuuti muuanshuraca un cayatiroati, —ishon

ahuun nomuran shinanni. <sup>29</sup> Ascatac aqui mupiashu imi shatariscatani. Afanan isinin inima.

<sup>30</sup> Ascano Jesús ahuunoashu ainfo cayano yorahuanrasí muran ifiacucuhuan ato yocani, —¿Tsoan ua muamun? —ishon ato yocani. <sup>31</sup> Ascaiton cumanifo, —¿Min oianmamun yorahuanrasiton mia yuruacafo? ¿Ahuuscaquimun min noco yocaicain? — a fu rafumisifoan huanifo. <sup>32</sup> Ascaifoan Jesús ato oiancuni, —¿Tsoan ua muamun? — ini tapipai. <sup>33</sup> Ascaino ainfo man caya huaa tapiashu ratui fuopacucuhuaquin. Nantifi ahuunoa imisi cuscan yafi ramashta acai cuscari yoiniquin. <sup>34</sup> Nicaquin yoini, — Achishtan, mian icoinra huashu min cayaquin. Ratuyamahuu. Min ointi muran unimahuu. Min afanan omitsiscaimacai. Min pushu ano casharatahuun, —ishon Jesús ainfo yoini.

<sup>35</sup> Jesús tsaincaino Jairo pushu anoashu futsanfo aqui fucashon yoinifo, —Min facu man naaquin. Non ahuusca huatiromaquin. Nocon tapimamisi afanan catima huayamahuu, —ishon futsanfoan Jairo yoinifo.

<sup>36</sup> Jesús Jairo yoini, —Aton tsain nicayamahuu. Ratuquima. Ua fusti icoinra huahuu, —ishon Jesús yoini.

<sup>37</sup> Ascano Jesús yorahuanrasí nichitan, —Pedro non Juan non Santiago non atiri ufu fucahuun, —ato huani. <sup>38</sup> Ascatac Jairo pushu ano nocoquin nica amurannoashu uaicani shorarascaino manocani. Ascaiton Jesús oinni. <sup>39</sup> Ointan pushu muran iquicaitan, —¿Ahuuscain man shorarascaimun? Na facucai naamafinquin. Oshafinquin, —ato huani. <sup>40</sup> Ascaiton osanifo. Osaifoan ato chifi caimatan apa yafi ahua non afu rafuapro rafu non fusti cunu futsa muran ato iyoni. Nanno shotocofacu doce fari aqui caa. Raca ini. <sup>41</sup> Jesús shotocofacu mutsoinifoan yoiquin, “*Talita, cum:*” Onicoinnin tsainmanfin “*Facushtan, funinaca huanhuun,*” huaino. <sup>42</sup> Samamashta funinaca huanaino apa yafi ahua mustairinifo. Ascatac, —¡Aira! Nocon facushta afanan man funia. Oianmaquicai non icoinra huacuanamaran, —icashu yoinannifo. <sup>43</sup> —Maton facu man naacoinfiacun un funimana tsoan yoitama piimacahuun, —Jesús apa yafi ahua yoini.

## 6

*Nazaret anoafaoancai Jesús pushconi anoshon icoinra huanifoma  
Mt 13.53-58; Lc 4.16-30*

<sup>1</sup> Ascatac Jesús afu rafumisifo ya anoashu pushurasi ano nasonifo. Nannoashu Jesús pushconi. <sup>2</sup> Ascano Israelifoan aton tunutitian Jesús aton ichananti pushu muran iquishon ato yosaiton. Nicacani, —¡Aira! ¡Nicacapon! ¿Ahuuscain na nocofunun fasi tapicoin sharamun? Tsoan oinyomisima cuscara huapaiquifin ahuamamishti huatiroquin. ¿Tsoancon Jesús ascara yosiamun? <sup>3</sup> Nanfin ihui yonomisiquin. María facu. Chipocufo Santiago non José non Judas non Simón. Ahuun poifori nuno no fu imisifo. Nonfin Jesús onanquin. Aacai ahuama. ¿Ahuuscashomun ahuamamishti huatiroquin? —icashu yoinannifo. Nannori shinancashon aqui shinanchacaino. Acai cuscerocon huacani. Afanan Jesús nicapainifoma.

<sup>4</sup> Ascano Jesús ato yoini isca huaquin, —Nan maitio Diosin tsain yoimisi nicatirofo. Ahuunoa yoisharamisifo. Nan cainni anoafó non ahuun yorafoancai nanfoansicai nicapaicanimarán, —ishon ato yoini. <sup>5</sup> Ascano isinin icaifo fustirasi manmanshon ato cayahuamani. Futsafori cayahuamapaifiaquin icoinra huayamaifoan anima. Diosihuunshon tsoa futsan atiroma cuscan ato ashopaifiaquin anima. <sup>6</sup> —¡Aira! Ahuunscaín ua oinfiamisishaquin ua icoinra huapaicanimarán, —ishon Jesús shinanni. Ascaiton pushurasiti Israelifo icano cahuancacaini ato Diosin tsain shara yosin.

*Jesús afu rafuapro doce ato nichini  
Mt 10.5-15; Lc 9.1-6*

<sup>7</sup> Ascatañ afu rafuafo doce cunani, —Uqui fucahuun, —ato huaino. Aquí fuafoan ahuunshon yoshin chacafo yorafohuun nuucun atomaquinoa potanon. Ascashon ato rafurasisi nichini yorafo caya huamanonfo.

<sup>8-9</sup> Ato nichataima ato yonoquin isca huani, —Maton tushu foyamafain maton forusari foyamafain puin foyamafain maton sapato nan man sahuua fusti fofain maton sahuuti nan man tsahuua fusti ya fotacahuun. Poquit fusti ya fotacahuun. <sup>10</sup> Pushurasi muran nocotan nan pushu fusti muransi oshacahuun. <sup>11</sup> Pushu futsan icanoafoan yafi pushurasi muran icanoafori mato iquimapaiyamaino iquiyamacahuun. Mato nicacasmaifoan maton sapato potapota sacaquin. Asca huaquin man oinmatiro mato nicacasmaifo. Ascan Diosin tsainri nicacasmacaniran, —ishon Jesús ato yoini.

<sup>12</sup> Ascano ato yoiquin anaitiano pushurasiti anoafó ato yoifoanfafainifo. —Maton chaca shatucahuun Diosin tsain nicasharacahuun, —ato huaifoan. <sup>13</sup> Yoshin chacafo yorafohuun nuucun atomaquinoa potanifo. Isininciafori shuniyashon fumanfain Upa Dios cufishonifo Jesushuunshon caya huafoanfafainifo.

*Juanpan nan yorafo unu muran iquimapacumisi nani cuscan*

*Mt 14.1-12; Lc 9.7-9*

<sup>14-16</sup> Ascatañ Jesús ahuamamishti atiro cuscan nantifi yora nicacani. Ahuunoa yoifoanfafaini. Atirififoan yoinifo, —Jesusfin Juanquin nan ato unu muran iquimamisiquin. Afanan man funia. Ascacufin tsoan atiroma cuscan Jesús Diosinhuunshon ahuamamishti huatiroran, —icashon atirifiton yoinifo. Atirifoanri yoiquin, —Jesusfin Eliasquin, —huanifo. Atirifiton yoini, —Jesús Diosin tsain yoimisiquin. Nocon caifo Diosin tsain nocon shunifoan yoini cuscan Jesusri nanscacoin huaquin yoiaran, —ishon yoinifo. Ascano niaifon Herodes afo nicashon yoini, —Naanfin Juanquin. Mun tushtuifiati afanan funiaran, —ishon yoini.

<sup>17-18</sup> Juan Herodes rutuataima yoini, —Niaifon Herodes, min ushto Felipe ahuin, Herodiasi, min fian. Ascan mincái shara huama. Nocon shuni Moisés noco Diosin tsain cunushoni cuscan isca huani, “Futsan ahuin min fitiromaran,” ishon Moisés cu-nuniran, —ishon Juanpan Herodes yoini. Anori nicacasmaquin ahuun ranushumuafó yononi Juan achishon cunu muran iquimanon. <sup>19</sup> Herodespan ahuin Herodiasin nicaní Juanpan ahuunoa yoiaiton nicaí aqui fasi sinai. Rutumariscapaificaquicai ahuun funu Herodes, —Ma. Mincái Juan rutumatiromaran, —ishon yoini. <sup>20</sup> Juan nocofunu shara Dios tanasharamisi niaifon Herodes tapishon cushusharani.

<sup>21</sup> Funun cushusharafaino ahuinin ahuuscashoma Juan rutupaini. Funun cainnitian Juan rututiro punin shararan. Isca huaquin. Cainnitian ahuun niaifofo patashari non ranushumua niaifofo non niaifofo Galilea mai anoafori ichanannifo fuuishoshcaquin. <sup>22</sup> Piainfono Herodes ahuin Herodiaspan facu shomaya arusu mononi. Herodes yafi a futan piaifoan oincani fasi unimanifo. Ascano niaifoan yoini, —¡Aicho! Min monoaiton oin un fasi unimai. Ahuarashta fipaiquin ua yoihoo un mia inanon. <sup>23</sup> Diosin tapia un mia icon yoiaiton min fipaiyai cuscan ua yoihoo un mia inanon, —ishon yoini.

<sup>24</sup> Nicatan shomayaton ahua yoini. —¿Un niaifo ahua yocaimun? —ahua huaiton, —“Juan tushtumahuu. Ahuun mapo ua inanshquin,” niaifon yoitahuun, —ishon yononi.

<sup>25</sup> Ascano shomaya niaifoqui nasoni. —Juan tushtuhuu. Purato naratashon ahuun mapo ua inanshquin. Natian ua ashoriscahuun, —huani.

<sup>26</sup> Nicaí niaifon puusinima. Juan fasi shinain. Ahuun nomuran shinanquin isca huani, —¡Ohua! Ún asca huapaima. Ascafia yorafoan un shomaya yoia cuscan nicacashon un asca huapaiyamafiaqui un aqui cairan, —ishon shinanni. <sup>27</sup> Ascaiton futsa yononi, —Juan tushtushon ahuun mapo ua fishotahuun, —niaifoan ranushumua yononi. Ascano cai cunu muran iquishon Juan tushtushoni. <sup>28</sup> Tushtushon purato naratashon funi. Fushon shomaya inanni. Ascano shomayaton ahua inanni. <sup>29</sup> Asca huano Juanhuunshon tanamisifoan nicacatan focashon ahuun caya mai huanifo.

*Jesús cinco mil nocofunufo ato pimani*  
*Mt 14.13-21; Lc 9.10-17; Jn 6.1-14*

<sup>30</sup> Ascano Jesusqui afu rafuafo afanan naso furanifo. Acafo cuscan yafi ato yosia cuscarí Jesús tapimashcaquin. <sup>31</sup> Ascaifono yorahuanrasi Jesusqui furi furinifo. Ascaquin ato pitimacoin huanifo. Afu rafumisifo yafi ato yoini, —Tsoa icama ano non fonon focahuun. Anoshon non tunuyonon, —ato huani. <sup>32</sup> Ascano shashohuanun tsoa icama ano fonifo. <sup>33-34</sup> Ascaiton yorafoan ato oinnifo. Ascataín Jesús yafi afu rafuafo nocataima ian cusumunri yorahuanrasi atoqui fuainfoan oin Jesús atohuun ramapaini. Ascashon Jesús shinanquin isca huani, —Chashohuanfo cushumisioma nanscarifiai na yorafo cushumisiomaforan, —ishon shinanniquin. Ascashon ato ichapa yosini.

<sup>35</sup> Ascano man fari caino afu rafuafoan yoinifo, —Nuno pushu yafi tushu yamai. Na yorafo nichihuun. Man fari caiquin. <sup>36</sup> Fonaincaniquin pushurasi ari yafi pushu patashari ato nichihuun anoshon tushu huanonfo, —ishon Jesús yoinifo.

<sup>37</sup> —Mafin ato piimacahuun, —ato huaiton. —Noncaí ahua ato pimatiroma. Nocofunun oshu ranan yonoahuunshon ahuun rafanan fishon nan yorafo pimashquin. ¿Nantimun non atohuunshon potaicai? —huaifoan. <sup>38</sup> —¿Ahuuti misi man ayamun? Oinyocahuun, —Jesús ato huaino. Oinshon yoinifo, —Misi mucu fustiti yafi shiman rafusi non ayaran, —huaifoan.

<sup>39-40</sup> Nicataín Jesús ato yononi isca huaquin, —Ato yoicahuun futsano cincuenta tsaohuaifono futsa anori cien tsaononfo, —ato huani. Ascano yorafo faasi camaqui tsaoacunifo. Ato yonoa cuscan tsaoshoacunifo. <sup>41</sup> Ascaíno nan shiman rafu yafi misi mucu fustiti tsomashon nai ari foisinifoantán Apa Dios cufini, —¡Aicho! Upan, mihiunshon un ato pimaicain. Min fasi sharacoincun, —huatan. Misi torupacutan shiman rafu ya osishon ahuunshon tapimisifo ato pashcanan huapani. <sup>42</sup> Ascaíno picani mayacoinnifo. <sup>43</sup> A misi yafi shiman tushu huafu afu rafuafoan doce shihuati fospi huani. <sup>44</sup> Ascano cinco mil nocofunufoan piinifo.

*Jesús ian fumancayan cani*  
*Mt 14.22-27; Jn 6.16-21*

<sup>45</sup> Ascano ato pimaquin anaititan Jesús afu rafuafo yoini, —Shashon rufofo oquiri pushurasi Betsaida ano pocui focahuun. Un na yorafo nichiyonon, —ato huani. <sup>46</sup> Ato nichitan arus fusti machi mamaqui caashu Apa Dios fu tsainni.

<sup>47</sup> Man fari caino afu rafuafo ian nushmancayan shashon nocoaifono arusu ian cusumunshon Apa cufiyoni. <sup>48-50</sup> Ato oian ian nushmancayashon fuun huaquin ato catima huani. Man faquishiaíno Jesús ian fumancayan atoqui cani. Ato finonquin rashquini. Ascaitocai onannifoma. Onanshma ratucani. —Yoshin shafain, —fiisinifo. Ascaiton —Unquin. Ratuyamacahuun, —ato huani. <sup>51</sup> Ascataín shasho muran atoqui nanuinacahuani. Nanuano fuu nishmapacufoanni. Ascaiton afu rafuafoan, —¡Aira! ¿Ahuuscashocon Jesús isca huaimun? —huanifo. <sup>52</sup> Tapiyonifoma Jesús Diospan facu ahuamamishti huatirofiacun cinco mil nocofunufo piimaiton oinfiaitashacaquin Jesús onanyonifoma. Diospan facufiacun aton nomuran tapiyonifoma.

*Genesaret anoshon Jesús isinin icaifo caya huani*  
*Mt 14.34-36*

<sup>53</sup> Ascataín ian pocufainifo Genesaret cusumunri nocoshon. Nanno shasho nushanifo. <sup>54</sup> Ascataín mapuinifoannaifoan nannoafaoan samamashta Jesús onannifo. <sup>55</sup> Onantan ichonifo pushurasifo patashari chani focani. Isinin imisifo shuhua naratashon Jesusqui ihuunifo. <sup>56</sup> Nantiocushon isinin icaifo aqui ihuunifo. —Uhuun yora isinin icaiton min sahuuti cupanan mia munpaicani. Ato yoipun anonfo cayashcaquiran, —ishon yoinifo. Ahuun sahuuti muuncanashu cayapacunifo.

## 7

*Ahuarafoan noco nomuran chaca huamatiro cuscan*

*Mt 15.1-20*

<sup>1</sup> Ascano Fariseofo yafi Moisés tsain tapimamisifori Jerusalén anoashu Jesusqui fucashon. <sup>2</sup> Oianfo Jesús fu rafumisifo piataifoma muchoquimupaonifiacashon aton shunifoan yononi cuscacai anifoma. <sup>3</sup> Israelifo aton shunifoan piataifoma aton fuuyamisi cuscan muchoquimupaoni. Ascan aton shunifoan apaonifo cuscan Fariseofo yafi nantifi Israelifoan nansca huamisifo. <sup>4</sup> Tushu inanmistsamisifo anoashu aton pushu ano nococashon aton shunifoan apaoni cuscan atorifi piataifoma muchoquimunifo. Aton shunifoan ahuarafo futsa fuuyamisi cuscan nanfoanri nanscari apaonifo. Aton shunifoan cuchofo non aqui unu manutifo non paninrafori chocamisi cuscan nanscara fuuya huanifo.

<sup>5</sup> Ascano nanfoan Jesús yocani, —Ahuuscaquimun nocon shunifoan piataifoma mu-chocomushoma pipaonifo cuscacai mifu rafuafoanasca huacanima, —ishon yocain-foan. <sup>6</sup> Ato cumani, —Isaías nan Diosin tsain yoimisiton iconcoin inaca cuscan matohuunoa yoini. Manfin fuparapaimisifoquin. Matohuunoa yoini isca huaquin,

“Nan yorafoan uhuunoa yoisharafiaquin aton nomuran ua shinancoian-foma. <sup>7</sup> Ipaitsi ichananshu fanaincani ua cufiyanan. A yorafo tapimapaiyai cuscacai uhuun tsainma. Nanfoan aton nomuran afi shinain cuscan aton yorafo yoicaniran,”

ishon Isaías Diosin tsain cununi. <sup>8</sup> Diosin yononi cuscan atama maton shunifoan amaquiri shinamisifo cuscan marifi man ascamisi. <sup>9</sup> Maton fuyamisi fusti man tanapai. Ascacucai Diosin mato yononi cuscan afanan man shinainma. <sup>10</sup> Nocon shuni Moisés yononi isca huaquin,

“Maton upa yafi uhua nicasharafain ato shara huacahuun. Tsoan apa iyamarai ahua tsain chaca huai ato rutumacahuun,”

ishon yoini. <sup>11</sup> Anori cunufiani man ato yoiquin, “Maton upa yafi uhua man yoitiro isca huaquin, ‘Upa futan uhuashtan un mato inanpaisharafiaqui un Dios inainran,’ ” man imisi. <sup>12</sup> Anori yoitacai Diosin yononi cuscan man ato yosima. “Maton upa yafi uhua cushusharacahuun,” mato huafiani mancái anori ato shinanmapaima. <sup>13</sup> Ascashon Diosin tsain man ato tapimatamarocon maton shunifoan yonopaoni cuscan nan fusti man ato tapimapai. Asca huaquin Diosin tsainmaquin man ato imai. Nanscara chaca futsafori man huamisiran, —ishon Jesús ato yoini.

<sup>14</sup> Ato yoitan afanan Jesús yorahuanrasi cunani ato ahuara futsa yoishquin. —Uqui fucahuun un mato yoinon. Ua nicasharafain tapisharacahuun. <sup>15-16</sup> Ahuarafo non piatocai nocon nomuran chaca huatiroma. Ascataama maton nomuran shinansharashoma ahuara man chaca huatiroquin, —ishon Jesús ato yoini.

<sup>17</sup> Ascatan yorahuanrasi anoashu cai pushu muran iquiano a rafuafo aqui funifo yocain fucani, —Min yorafo min tapima cuscan nocori shafacafi yoihoo non tapinon, —huaifoan. <sup>18</sup> —¿Ahuuscaquimun marifi man tapisharataimacain? ¿Man tapiamamun ahuara non piatocai nocon nomuran noco shinanchacamatiroma? <sup>19</sup> Maton nomurancái tushu nitutiroma. Maton shaqui muranfin itiroquin. Chipo man aya poitiroran. Nantifi tushu sharafin non pisharatiroquin, —ishon ato tapimani.

<sup>20</sup> —Maton nomuran man shinanchaca cuscan man yoitiro. Nanfohuunoa shinanquin man chaca huatiro. <sup>21</sup> Yorafoan aton nomuran ahuara shinanchaca cuscan huatirofo. Isca huaquin, shinanchacafain nocofunu yafi ainfo chaca huatanantirofoquin yomutso icain rutumitsapaimisi icain aton ahuinma chotafain aton funumari chotamafain <sup>22</sup> Futsana fianpaifain chaca futsa futsatapafo huafain paramitsamisi icain rafipaitama ahuara chacafo huafain man ahuarayafashi ahun unimatama futsa fuchipaifain futsaqui tsain chaca huafain cacapaimisi icain Diosin tsain nicacasmamisi.

<sup>23</sup> Na chacafo aton nomuranshon shinainfo cuscan ato chaca huamashquiran, —ishon ato yoini.

*Ainfon mani futsa fustiton Jesús icoinra huani*  
*Mt 15.21-28*

<sup>24</sup> Ascatain Jesús nannoashu pushurasi ahuun anu Tiro chaimashta caani. Caashu pushu futsa muran iquini tsoa tapimapaima. Ascafaiton samamashta nanno icafoan nicanifo pushu muran icun. <sup>25-26</sup> Ascano ainfocai Israeli anoa shafo inima Sirofenicia anoa ini. Nan ainfoan nicani Jesús oaiton. Ascatain aqui iquicaini nan yoshin chaca ainfacuhuun nuucun. Jesús cufini, —Ifon, uhuun facu shotocofacushta fasi omitsiscai. Yoshin chaca ahuun nuua. Na yoshin chaca amaqinoa ua potashohuun. Uhuun facushta ua cayahuashopun, —ishon yoiriani.

<sup>27</sup> Ascaino Jesús yoini, —Uhuun yorafo un ato tau huamanon. Tsoancai facufo aton tushu fiantan pashnafo potatiroma, —huaiton.

<sup>28</sup> —Ai, Ifon. Mian yoia cuscan icon. Ascafia facufoan piqui tushu huafo sapa camaquinoashu potomishti pacuaiton pashnafoan pitirofo. Nanscarifi huaquin min yorafo min caya huamayotirofashion nocori min caya huamatiro. Min nocori caya huainocai min caifori funotiromaran, —ishon cumaiton.

<sup>29</sup> —¡Aicho! Mian cumasharaquin. Natian min pushu ano min catiro. Yoshin chaca min facumaquinoashu man caaquin, —ishon Jesús yoini.

<sup>30</sup> Ascano ahuun pushu ano nocoshon oian ahuun facu shara racaini man amaqi yoshin chaca caano.

*Nocofunun tsaintiroma icain nicatiroma Jesús caya huani*

<sup>31</sup> Ascano Jesús Tiro anoashu cai Sidón finonfaini ianmanhuan Galilea cusumunri cani. Cai pushurasi anoafu aton anu Decápolis ano noconi. <sup>32</sup> Nanno yorafoan nocofunu tsaintiroma icain nicatiroma aqui ihuunifo. —Nocon yoran nicatiromacoin noco manmansohuun, —ishon yoinifo.

<sup>33</sup> Ascatain Jesús nocofunu nicatiroma atomaqui chaimashta iyoni. Iyoshon ahuun mutotinin ahuun pacho rafu munni. Ascashon cumo michotan ahuun mutotinin ana munni. <sup>34</sup> Ascashon nai ari foisinifoantan fasi shacaitan yoini, “Efata,” Onicoinnin tsainmanfin: “Cayasharahuu,” huani. <sup>35</sup> Ascano nocofunun nicasharariscani. Tsain cayacafi shara ato yoini. Afanan ahuun ana curushma.

<sup>36</sup> Ascano Jesús yorahuanrasi yoini, —Un nocofunu nicatiroma caya huama cuscan tsoa yoiyamacahuun, —ato huafia nantifiton yorafo chanifoanfafainifo. <sup>37</sup> —¡Aira! Jesús acai cuscacai tsoan oinyomisima. Ahuamamishti huatiroquin. Nantifi yoinifo cuscan fasi sharacoinquin. Yoran nicatiroma caya huamafain tsaintiromafori caya huamaran, —ishon yoinifo.

## 8

*Jesús cuatro mil yorafo pimani*  
*Mt 15.32-39*

<sup>1</sup> Ascatain nantianri afanan yorahuanrasi Jesusqui funifo. Ahuun tsain nicacaquin ahua piinifoma. Ascano afu rafuafo cunani ato yoishquin. <sup>2</sup> —Un nan yorafohuun ramapai. U fu rafu non fusti oshatan nuno icafo. Natian aton tushu man cuyo. Ahuashta pitirofoma. <sup>3</sup> Atirifi chaicunoashu nuno fuafu. Ascacun un aton pushu ano nichicain fasi fonaincani napuitirofo tacayomancani, —ato huaiton.

<sup>4</sup> —Nuno tsoa icamano non tushu fuchitiroma nan yorahuanrasi pimashquin, —huaifoan. <sup>5</sup> —¿Ahuuti misi man ayamun? —ishon yocaiton. —Siete non ayaran, —huanifo.

<sup>6</sup> Anori yoliaifoan Jesús nan yorahuanrasi yoini, —Nuno tsaocahuun, —ato huani. Tsaoafono Jesús misi siete tsomashon Apa Dios cufiyoni, —¡Aicho! Upan, minhuunshon un ato pimaicain. Min fasi sharacoincun, —huatan. Misi torupacutan afu rafuafo inanni. Inanno yorahuanrasi pashcananpacunifo. <sup>7</sup> Shiman uhuapamamishti fuchishon Jesús inanfoanno Apa Dios afanan aicho huatan shimanri torupacutan afu rafuafo inanni. Inanno yorahuanrasi pashcananpacunifo. <sup>8</sup> Ascashon picani mayacoinnifo. Ascashon a tushu huafo siete shihuati fospicoian ini. <sup>9</sup> Cuatro mil yora icuanafo nanno inifo. Piafono Jesús aton pushu ari ato nichini. <sup>10</sup> Nanucainicai a fu rafuafo fu mai futsa ahuun anu Dalmanuta ari cani.

*—Yorafoan atiroma cuscan noco ismahuu, —Fariseofoan Jesús huanifo*

*Mt 16.1-4; Lc 12.54-56*

<sup>11</sup> Nocoafono Fariseofo Jesusqui funifo yocain fucani. Fochishmanantanpai funifo. —Minmain Diospan facucoinquin Diosin nai ariashu icahuunshon tsoan atiroma cuscan noco ismahuu non mia icoingra huanon, —ishon yocacaquin chaca huanifo. <sup>12</sup> Ascaino Jesús fasi shacaini. Ascashon ato yoini, —Ahuuscain tsoa futsan atiroma cuscara man oinpaifafainquin. Un mato icon yoi. Diosin fustiton atiro cuscacai un mato ismaimaran, —ishon ato yoini. <sup>13</sup> Asca huatan ato anoashu afanan shasho nanucaquin ian pocufaini cani.

*Fariseofoan amaquiri yoinifo*

*Mt 16.5-12*

<sup>14</sup> Ascano ian pocufain cashon afu rafuafoan yoini, —¡Ohua! Non ointiaquima. Non tushu fuamaran, —huanifo. Ascashon misi fustishta shasho muranno fuchinifo. <sup>15</sup> —Oinfain Fariseofo yafi niaifo Herodes aton misi faranshati piyamacahuun, —Jesús ato huani. <sup>16</sup> Nicacani yoinannifo, —Ahuuscain Jesús noco yoiai Fariseofo non Herodes aton misi faranshati piyamacahuun. Non tushu fucunma anori noco yoiran, —icashu yoinannifo.

<sup>17</sup> Yoliaifo cuscan Jesús onanshon ato yoini, —¿Ahuuscaquimun tushuhuunoa man yoinaincain? Mancai ua tapisharataima. Maton ointi muran curushcoin uacai man icoingra huataima. <sup>18-19</sup> Man oinfiaquin man tapiama. Nicafiaquicai man nicacolianma. ¿Un muci fustiti misihuunshon cinco mil nocofunu pimaita ahuuti shihuati misi fospicoinyamain tushuitaquin? —ishon ato yocani. —Ascano doceran, —huanifo. <sup>20</sup> —Un siete misifo un cuatro mil yora pimaita. ¿Ahuuti shihuati misi fospicoinyamain tushuitaquin? —ishon ato yocaiton. —Sieteran —huanifo. <sup>21</sup> —¿Ascan ahuuscain man tapiataimamun? —ato huani.

*Jesús Betsaida anoa nocofunu fushocoin caya huani*

<sup>22</sup> Ascano Betsaida ano noconifo. Nannoafu nocofunu fushocoin Jesusqui ihuunifo. Ihuunshon yoinifo, —Ifon, nocon yora fushocoin noco caya huashopun, —huanifo.

<sup>23</sup> Ascano Jesús fusho mutsoinfoantan pushurasi pasoato iyoni. Nannoshon ahuun furoqui cumo michotan ayashon furo muunni. Ascashon yocani, —¿Min oinsharaimun? —ishon yocaiton.

<sup>24</sup> Foisininfoantan, —Ai. Un yorafo oin. Matacoin. Ihui foro cahuanai ointsa, —ishon cumaiton.

<sup>25</sup> Afanan furo munni. Ascano oinsharacoinni. Man cayahuamacoian. Shafacaficoin nantifi oinsharani. <sup>26</sup> —Pushufo ari cayamahuu. Min pushu ano cayacafi catahuun, —ishon Jesús yoini.

*—Jesús, minfin Cristo Diospan Facuquin, —Pedronun huani*

*Mt 16.13-20; Lc 9.18-21*

<sup>27</sup> Ascatañ Jesú yafi afu rafuafo anoashu focani Cesarea de Filipo pasoato pushurasifo ano fonifo. Foaifoan Jesú ato yocani, —¿Yorafoan man shinamun un tsoaquin? —ishon ato yocaiton. <sup>28</sup> Cumanifo, —Futsafoan yoiafin min Juanquin. Nan ato unu muran iquimapacumisi. Asca futsafoanri yoiafotin minfin Eliasquin. Asca futsafoanri yoiafin minfin nocon shunicaifoan Diosin tsain yoimisiquin. Man min afanan funiaran, —huaifoan.

<sup>29</sup> —¿Anori uhuunoa shinanfiafonomun manri shinamun un tsoaquin? —huaiton. Ascaiton Pedronun cumaquin, —Minfin Cristoquin. Upa Diosin mia catonni nocoqui nichishquiran, —ishon yoiaiton. <sup>30</sup> —Un Cristoqui tsoa yoiyamacahuun, —ato huani.

—*Chipo ua rutushcaniran, —ishon Jesú ato yoini*

*Mt 16.21-28; Lc 9.22-27*

<sup>31</sup> Ascatañ ato yoiquin tau huani, —Nocon caifoan Dios fu tsainti pushu cushumisifo non Moisés cununi cuscan tapimamisifo non yorafohuunshon Dios cufimisi niaifofoan ua omitsisca huashcaniquin. Nan nocon niaifofoan ua nicacasmacaquin ua rutumashcani. Ua rutumafiafo osha rafu non fusti finontan un afanan furnishquiran, —ishon ato tapimaní. <sup>32</sup> Anori shafacafí icaiton Pedronun Jesú pashaquifain yoini, —Ifon, ascayiamahuu. Miacai rutupacunacafoma, —huaiton.

<sup>33</sup> Jesú tapacucahuan afu rafuafo oinyoni. Ascatañ afanan ifiacucahuan, —Satanás uhuunoashu catahuun. Upa Diosin ahuun nomuran shinain cuscacai min shinainmacai. Anori min shinantama nocofunufoan shinain cuscan nannori min shinainran, —ishon Jesú Pedro yoini.

<sup>34</sup> Asca huatan yorahuanrasi yafi afu rafuafori cunani, —Uqui fucahuun un mato yoinon. Tsoan ua tanapaisharaquicai afin apaiyai cuscan huatiroma. Un yoiai cuscafí nicatiroquin. Tsoan ua tanapaiquin isca huatiro, “Ua rutufianfoannocai un uhuun Ifo potapacunacama. Ahuunshon ua rutufianfoanno un tanapacunacaran,” ishon yoitiro. <sup>35</sup> Ascan tsoan yoiquin isca huai, “¡Ohua! Un Jesú tanaino uaraca rutucaniquin,” ishon yoitan. Ascashon uhuun tsain cachiquiri nan cuscara yora naashu omitsiscapanaca. Ascan tsoan uhuun tsain futsafo yoiaifin uhuunoashu rutushquiquin. Nan cuscara yora uhuunoashu naashu unfu isharapacunaca.

<sup>36</sup> Ratoranfo manifoannati ahuunacoinfiano naanocai afanan ahuunacoin itiroma. Nantifi funocointiro. Niyoshon Diosin tsain tanatama imisishaquin. Ahuun nomuran omitsiscatiro. <sup>37</sup> Ahuun yoshin nipanoncai ahuara inantiroma. <sup>38</sup> Yorafoan fasi chaca huamisifo. Upa Diosin tsain cachiquiri huafo. Tsoan uhuun rafipaiquin uhuunoa yoicasmai uhuun tsainhuunoari yoicasmaiquin. Chipo un uhuun Upa Diosinhuunoashu un nai murannoashu mai ano un fotoaino uhuun Upa cuscacoin un chasha curannaino uhuun Upan oinmati afu ica sharafori ufu fotoshcaniquin. Fotoshon nan uhuun rafiaifofin ua Ifo huapaicanima. Uhuun tsainri yoicasmacani unrifi un atohuun rafitiro. Afocai “Uhuun yoraran,” un huanacama —ishon Jesú ato yoini.

## 9

<sup>1</sup> Afanan ato yoiquin isca huani, —Icon un mato yoinon. Man futsan nuno ufu niaton nayoshoma Diosin ahuamamishti atiro cuscan man oincain. A icano ahuu cuscaramainquin man oincain, —ishon ato Jesú yoini.

*Jesú ahuun yora mumacoin ahuun sahuutifoya fianananriscatanaíno chashatani*  
*Mt 17.1-13; Lc 9.28-36*

<sup>2-3</sup> Asca huatan seis osha finontan Jesú Pedro non Santiago non Juanri machi cuya pochinin iyoni. Nanfo fusti nanno ini. Nannoashu aton ointaifi Jesú ahuun caya mumacoin sahuutifoya fianananriscatanaíno ahuun sahuuti oshopacoin chashacoinni yoa rama furoamua ointsa iriscatani. Tsoacai sahuuti ya ascatiroma. <sup>4</sup> Ascaíno Moisés yafi Elías nitariscatan Jesú fu tsainnifo.

<sup>5</sup> Ascaiton Pedron yoini,—Tapimamisiton, nuno non isharatiro. Non pushu facu rafu non fusti mato huashotiro. Mina futsa non Moisésna futsa non Elisna futsa. Santiago futan Juanpan non mato ashotoran,—ishon Pedron yoini. <sup>6</sup> Raquirira huapaifiacani ratucoinnifo.

<sup>7</sup> Ascatanaino naicoin atoqui cuyopacuni. Naicoin muranno ahuun oi nicanifo,—Nanfin uhuun Facuquin. Un ahuun noi. A nicacoincahuun,—Upa Diosin huani.

<sup>8</sup> Asca huatan nan rafu non fusti samamashta oinnifo Moisés yafi Elías yamariscatani Jesú斯 fusti atofu nia ini.

<sup>9</sup> Ascano machi cuya pochininnoashu fotoshon Jesú斯 ato yoini,—Man rama oian cuscan tsoashta yoiyoyamacahuun. Nan naashu un afanan funiano rama man oian cuscan man yorafo yoitiroquin,—ishon ato yoini. <sup>10</sup> Ato yoia cuscan tsoa futsa yoiyonifoma. Tapiamafiaashu yoinannifo,—Ahuacon Jesú斯 noco yoiamun naashu afanan furnishquiran. Noco huua cuscan non tapiamaran,—icashu yoinannifo.

<sup>11</sup> Ascatan Jesú斯 yocanifo,—¿Ahuuscaquimun Moisés tsain tapimamisifoan yoimisiquin isca huaquin? “Nocon Numamisi Cristo Diosin catonni nocoqui oataima Elías rufofo nocoqui oshquiran,”—ishon noco yoinifo. <sup>12-13</sup> —Icon. Elías rucun oitautiro. Oshon nantifi isharamapai aton chaca shatunonfo. Ascafia tsoan onannima. Juanfiacun tsoan onannima. Nan chaca huapaiyai cuscan chaca huanifo. Nannori ahuunoa cununi cuscan. Nanscarifi aquin unfin Dios ariashu un nocofunucoin cainfianicun ua omitsiscamacani. Nannori Diosin tsain yoimisifoan uhuunoa cununiforan,—ishon ato yoini.

### *Jesús furonanfacu ahuun yoshin chaca nua caya huani*

*Mt 17.14-21; Lc 9.37-43*

<sup>14</sup> Ascatan machi tununman fotocatan yorahuanrasi nastui Jesú斯 fu rafumisifo yafi Moisés tsain tapimamisifo fu fochishmanantanannifo. <sup>15</sup> Ascano yorafoan Jesú斯 fuchishon,—¡Oincapon! Jesú斯 afanan oi. Tsoa futsacai a cuscarama. Ahuamamishti huatiroran,—icashu yoinannifo. Yoitan aqui ichonifo. <sup>16</sup> —¿Ahuuscain Moisés tsain tapimamisifo fu man fochishmanantainmun? —ishon ato yocani. <sup>17</sup> Ato yocaiton nocofunu futsa cumani,—Tapimamisiton, uhuun furonanfacushta un mia ihuushona. Yoshin chaca ahuun nuucun tsaintiroma. <sup>18</sup> Achitan mipuani ahuun ashfapan facoshurasi atispomumisi. Shucurushui futsutan charishi futsua. Uhuun facushta mifu rafuafu ano un ihuufia ua tsoa caya huashotiromaran,—ishon nocofunun Jesú斯 yoini. <sup>19</sup> Ascaiton Jesú斯,—¡Ohua! Mancai ua icoinra huaima. Man fasi amaquiri shinamisi. ¿Ahuutia un matofu ipamun ua man nicayamacaiquin? —Jesú斯 ato huani.—Min facu ua ihuushonhuun,—Jesú斯 apa huani. <sup>20</sup> Ihuuafono yoshin chacanun furonanfacu musta mustaimani. Ascatan taramuacucaini facosh atispomutan pacuni.

<sup>21</sup> Ascashon Jesú斯 apa yocani,—¿Ahuutiamun iscamiciquin? —ishon yocaiton.—Nan facuaitian tauniran,—huani. <sup>22</sup> —Yoshin chacanun uhuun facu chi muran potafain unu muran man potamisi rutupaiquin. Min uhuun facu ua caya huashotiromainquin nocohuun ramapaihuu,—huaiton. <sup>23</sup> —¿Ahuuscain mian anori huaimun? Tsoan ua icoinra huacoian un ato ahuamamishti ashotoro,—Jesú斯 huaiton.

<sup>24</sup> —Un mia icoinra huai. Ua paratama icoinra huamahuu,—ishon apa yoiaiton.

<sup>25</sup> Ascano yorahuanrasi oinpai atoqui ichonifo Jesú斯 yoshin chaca curushcain yoini,—Minfin yoshin chacaquin. Nan facu min pastomafain tsaintiroma. Amaquinoashu catahuun. Mincai afanan a muran ipanacamaran,—ishon Jesú斯 yoshin chaca curushcain yoini.

<sup>26</sup> Asca huaino yoshin fisicaini cani. Facu musta mustaimafaini amurannoashu cani. Ascaino oianfo furonanfacu naa shinantsacun yoinifo,—Man facu naaran,—ishon yoinifo. <sup>27</sup> Ascafia Jesú斯 furonanfacu mutsoinifoannaino funininacahuani.

<sup>28</sup> Ascashu Jesús pushu muran iquini. Iquiano afu rafuafo aqui funifo. Ascashon yocanifo, —¿Ahuuscashomun nofi non yoshin chaca facumaquinoa potatiromaquin? —huaifoan. <sup>29</sup> —Na cuscara yoshin chaca man Upa Diosin cufinyamaquicai man potatiromaran, —ishon Jesús ato yoini.

*Afanan Jesús ato yoini, —Ua rutushquicaniran, —ishon yoini  
Mt 17.22-23; Lc 9.43-45*

<sup>30-31</sup> Ascatac anoashu Jesús yafi afu rafuafo Galilea mai finonfaini. Nantian afu rafuafoси tapimani. Ascashon tsoa futsan tapimayopainima. Ato yoini, —Un mato yoimisi cuscan un Dios ariashu mai ano fotoni nocofunucoin cainshquin. Ascafiacon futsan ua achimashquin ua rutunonfo. Ua rutufiafo osha rafu non fusti finontan un afanan mai murannoashu furnishquiran, —ishon Jesús ato yoini. <sup>32</sup> Ato yoifiaiton tapinifoma. Ratucaquin tsoancai afanan yocanima.

*¿Ratocaimun fasi shara finacoianquin?  
Mt 18.1-5; Lc 9.46-48*

<sup>33</sup> Ascatac Capernaum ano noconifo. Pushu muran iquicashon Jesús afu rafumisifo yocani, —¿Ahuuscai fai anoashu man fochishmanantanainmun? —ishon ato yocaino.

<sup>34</sup> Fuaifoan yocani, Ratocaimun fasi shara finacaiaquin fochishmanantanancanashu rafinifo tsoancai Jesús cumanima. Puusinifoma.

<sup>35</sup> Puusiyamaifoan Jesús ato onanni. Ascashon tsaoshon ato yoini, — Nicasharacahuun un mato cayacafi yoinon. Tsoan ahuun yorafo fasi finonpaiquin nantifi yorafo aton oinmati itiroran, —ishon ato yoiniquin.

<sup>36</sup> Ascatac aton ointaifi ato nushmancayan facu nichipacufoanni. Ascatac chishto infoantán ato yoini. <sup>37</sup> —Tsoan uhuunshon facu cushusharaifin nanscarifi ua huaiquin. Nanscarifiai tsoan ua shara huaquin uhuun Upa Diosiri nanscari huairan, —ishon ato yoini.

*Tsoan noco chaca huapaitama noco shara huai  
Mt 10.42; Lc 9.49-50*

<sup>38</sup> Ascano Juanpan Jesús yoini, —Tapimamisiton, non oian nocofunun min anuhuunshon yoshin chacafo atomaquinoa potaiton. Nancai no fu rafumisima. Ascacun non yoiquin isca huai, “Mincai no fu rafumisima. Asca min yoshin chaca yorafomaquinoa potatiromaran,” ishon non yoiaran, —ishon Juanpan Jesús yoini.

<sup>39</sup> Ascaiton Jesús cumani, —Na nocofunu shutiyamacahuun. Tsoancai uhuun anuhuunshon ahuamamishti yorafoan atiroma cuscan huaitocai uhuunoari tsain chaca huatiroma. <sup>40</sup> Tsoan noco nicacasmaquia noco futan aqui. <sup>41</sup> Un mato icon yoi. Tsoan ahuun nomuran matohuunoa shinanquin isca huaiquin, “Afin Cristo ahuun yoraquin. Ascacun un shara huairan,” ishon yoitirofo man nomiaiton mato unu ayamatiro. Mato ascara shara huacun Diosin inanpaiyai cuscan funotiroma.

*Futsafoan noco chaca huamatiro  
Mt 18.6-9; Lc 17.1-2*

<sup>42</sup> Ua rama futsa icoinra huafiacun futsan chaca huamaiton nancairocofin toquiri uhuapa tuhummashon unuhuan noa muran potanon.

<sup>43-44</sup> Asca huatan min mucuman ahuara chaca huai mifiri min mushatumua shara icuana. Mucu rafuya omitsiscapanacafo muran catama mucu fusti ya Upa ari min nocotiro nipashquin. Nan shara. Omitsiscapanacafo muran a chicai nocanacama. Nanscasi apanaca. Acai sharama.

<sup>45-46</sup> Nanscarifi aquin min tau rafu yashon min raquira capai ahuara chaca huapai mifiri oshatumua shara icuana. Min tau rafu ya omitsiscapanacafo muran catama min tau fusti ya Upa ari nocotiro nipashquin. Nanscara shara itiro.

<sup>47-48</sup> Nanscarifi aquin ahuara chaca oinquin min ahuara chaca huaiton mifiri min futsucumua shara icuana. Min furo rafu ya omitsiscapanacafo muran catama min furo fusti ya Upa ari min nocotiro nipashquin. Nanscarafin shara itiro. Nan chi uru muran caashu fasi min omitsiscacointiroquin. Nanscasi apanaca. Nan chiicai nocanacama.

<sup>49</sup> Tsoancai anori capanacama.

<sup>50</sup> Ascan sao fasi shara itiro. Nami saomua funa payocotiroma. Ascan saomui chacano nami payocotiro. Nanscarifiai tsoa ufu rafushocai chaca huatiroma. Futsafori ua icoindra huamatiro. Ascafaino tsoa ufu rafuyamaino afanan chacacoin itiro. Ua futsafori afanan icoindra huamatiroma. Ascacun ufu rafupacucahuun. Fochishmanantanacaquima. Isharacahuun,—ishon Jesús ato yoini.

## 10

*Funu yafi ahuin ununainhuunoa Jesús ato tapimani*

*Mt 19.1-12; Lc 16.18*

<sup>1</sup> Ascatac anoashu a rafuafu afu Judea mai nan unu Jordán ocuma futsa fonifo. Ascano afanan yorahuanrasi aqui funifo. Amisi cuscan afanan Jesús ato yosinon.

<sup>2</sup> Ascano Fariseofo Jesusqui funifo. Aqui fucashon amaquiri cumamapainifo. Fuparapaicaquin. Ascashon yocacaquin,—¿Nocon shunifoan Diosin tsain cununi cuscan nocofunun ahuin unupaiquin unutiromun? —ishon yocaifoan.

<sup>3</sup> —¿Moisés ato yononi cuscan raquiri yoiamun? —huaiton.

<sup>4</sup> —Moisés cunuquin isca huani, “Tsoan ahuin unupaiquin acataima cunushotiro isca huaquin, ‘Un afanan mia fipaima. Munfin mia unuicain,’ ishon yoitiro.” Anori Moisés ato yononiran,—huaifoan.

<sup>5</sup> —Maton shunifo mato cuscarari. Nanfo Diosin yonoquin tau huani cuscan nicasmacani. Ascashon Moisés tsain futsan yononi cuscan maton shunifo cunushoni.

<sup>6</sup> Ascafaino Diosin nocofunu yafi ainfon onihuashocai anori shinannima. Ato onihuakin tau huani funu yafi ahuin potananonfoma. <sup>7</sup> Ascano Diosin yoini isca huaquin, “Ascan nocofunun ainfo fiashu apa yafi ahuamaqui pashcatiro. Oshati fusti muran afu iishquin. <sup>8</sup> Ascashu ano rafu niishcaquin. Fusti ica shinantsa aashquin. Afanan rafuma.” <sup>9</sup> Ascacufin Diosin ato cumanan huaa afanan tsoa pashcanantiromaran, —ishon Jesús ato yoini.

<sup>10</sup> Ascano afanan pushu muran iquiano a rafuafoan Jesús yocani —Min rama yorafo yosia cuscan nocori yoihhuu,—huanifo. <sup>11</sup> Ascaiton ato cumani isca huaquin,—Ratoran futsan ahuin unuquin futsa fishquin chaca huai ahuinma fu iquin. <sup>12</sup> Nanscarifi aquin ainfoan funu unutan futsa fishquin arifi chaca huaiquin funuma fu iquin, —ishon Jesús ato cumani.

*Jesús facumishtifo yoisharapacuni*

*Mt 19.13-15; Lc 18.15-17*

<sup>13</sup> Ascano yorafoan aton facumishti Jesusqui ihuunifo ato manmanpacuquin Upa Dios cufinon. Ascaifoan oinquin Jesús fu rafuafoan yoinifo isca huaquin, —Maton facufo ihuutan nocon Ifo fucash huayamacahuun, —ishon yoinifo. <sup>14</sup> Anori huafiaffono nicatama Jesús atoqui unimatama yoini, —Asca huayamacahuun. Facufo uqui funonfo. Ato nitun huayamacahuun. Uhuun Upa Diosin niaifo icanori facumishti cuscaraforiquin. Facufoan ua icoindra huacoinnafo. Nai muran Uhuun Upa icanon nanscarifi aafquin, —ishon ato yoini. <sup>15</sup> —Un mato icon yoiquin. Facufoan ua icoindra huamisi cuscan tsoan nanscarifi aquin ua icoindra huashuma uhuun Upa niaifo icanon afu ipanacamaran, —ishon Jesús ato yoini. <sup>16</sup> Ato yoiquin facufo shatsaomushon manmanpacuquin, —Upa Diosin, na facumishti shara huahuu, —ato huapani.

*Nocofunu mafo ichapaya ahuashta yopaima ini  
Mt 19.16-30; Lc 18.18-30*

<sup>17</sup> Ascano nocofunu aqui ichotoshini. Ichotoshitan ratoconun mai chachishon yoini, —Tapimamisiton, minfin sharacoinquin. ¿Unmun ahuuscatiroquin Dios fu ipashquin? —ishon yocaiton.

<sup>18</sup> —Ahuuscaquimun mian “sharacoinran” huaicai. Fusticoinfin sharaquin. Nanfin a Diosiquin. <sup>19</sup> Diosin yononi cuscan min tapian. Isca huaquin noco yoini, “Futsa rutuyamacahuun. Maton ahuinma fu iyamacahuun. Ascanori maton funumafuri iyamacahuun. Ahuara onuyamacahuun. Chaniri yoiyamacahuun. Fuparayamacahuun. Maton upa yafi uhua nicasharafain ato shara huacahuun,” —ishon Jesús yoini. <sup>20</sup> Ascaiton cumani, —Tapimamisiton. Nantifi nan Diosin yononi cuscan facushon un nicainifoanna, —huaiton.

<sup>21</sup> Jesús oianan noiquin. Yoini isca huaquin, —Fustiricai min nicataima. Nantifi min ahuara ya cuscan inanmitsatahuun ahuun rafanan pui fiishon ahuuomafo inanshquin. Min asca huaiton Upa Diosin nai muranshon mia ahuara sharacoin mucushoshquin. Asca huatan ua tanahuun, —huaiton.

<sup>22</sup> Nicai nocofunu puusinima. Mafo ichapayashu ahuun mafo inamitsacasmai puusinima. Ascatac Jesusmaquinoashu cani.

<sup>23</sup> Caiton oinquín tanatan ifiacucahuun afu rafuafo yoini, —Yora mafo ichapaya Uhuun Upa Dios niaifo ari atirifi nocotiroma. Aton mafo ichapa potacasmacaquin Diosiquiri shinanpaicanimaran, —ishon ato yoiaiton.

<sup>24</sup> Nicacani afu rafumisifoan ahuun tsain tapipainifo. Ascano Jesús afanan ato yoini, —Uhuun facumishtichin, icoconcoin mafo ichapayafo Dios icano fustirasi nocotirofo. Dios shinantama aton mafo fusti shinanco. <sup>25</sup> Ina uhuapa camellocai acoya shoi muran finontiroma. Mimacaifin nocofunu mafo ichapa ya Diosin niaifo ari fustirasi nocotiro, —ishon yoiaiton. <sup>26</sup> Nicacani ahuun tsain fasi tapipaicani yoinannifo, —¡Aira! ¿Mafo ichapa ya Dios fu ipatiromainquin tsoa futsamun Dios fu ipatiroquin? —icashu yoinannifo.

<sup>27</sup> Jesús atoqui fusoacucahuán yoini, —Nocofunufocai afinri numatiroma. Diosin fustitofin yorafo numatiroquin. Diosifin ahuamamishti huatiroquin. Nocofunufoan atiroma cuscan Diosin huatiroquin, —huaiton.

<sup>28</sup> Nicaquin Pedro yoini, —Ifon, nonfin nocon mafo yafi nocon yorafo nantifi nocona non pota furanaquin mia tanayoquin, —huaiton.

<sup>29</sup> —Un mato iconquin yoi. Tsoan ahuun pushu potafain ahuun ochifo potafain ahuun ushtofo potafain ahuun poifo potafain ahua potafain apa potafain ahuun facufo potafain ahuun mauri potafurashon ua tanapaisharatiro uhuun tsain shara futsafo yoishquin. <sup>30</sup> Nanscaraoan niyocashon Diosin ato fumimacoin inain. Pushufo non ochifo non poifo non ahuaflo non facufo non maufori ato inain. Ato inansharafiaino ahuunoashu nantianri omitsiscashquin. Ascatac chipo Upa Dios fu ipasharashcani. <sup>31</sup> Ascafia yora ichapa natian isharacoinfiashu naashu funocoincani. Nanscarafiai atirifi natian ahuama shinantsa. Afo naashu Upa Dios fu ipasharashcaniran, —ishon ato yoini.

*Afanan Jesús ato yoini, —Ua rutushquicaniquin, —ishon yoini  
Mt 20.17-19; Lc 18.31-34*

<sup>32</sup> Ascano Jerusalén ano fonifo Jesús rucun caiton afu rafumisifoan mufainifo. —¡Ohuashta! Ahuuscain nocon Ifo Jesús Jerusalén ano caimun. Nanno musucoinran, —icashu yoinannifo. Futsafoanri mufainifo. Nanfori ratucoinrifo. Ascano Jesús fu rafumisifo doce futsa chaimashta ano atotisi iyoni atofu tsainshquin. Ahuara ahuuscarashquin fiaiton ato yoini isca huaquin, <sup>33</sup> —Ua nicacahuun. Non Jerusalén ano canon. Nanno futsan ua achimashquin nocon yorafohuunshon Dios cufimisi niaifofo

yashon Moisés tsain tapimamisifoan ua tsain chaca huashcani. “Jesús ato fasi chaca huamisi. A rutucahuun,” icashu uhuun yoinanshon. Mani futsafoan ua iyoshcani ua rutunonfo. <sup>34</sup> Nanfo uqui cashupaicain uqui paran nashquicani uqui cumo michofain ua fichi cunoquin tuchiaton ua coshashcani. Uaasca huacatan ua ihui coyan iquinanqui mastashcani un nanon. Ascafia osha rafu non fusti finontan Upa Diosin ua afanan funimashquiran,—ishon Jesús ato yoini.

*Santiago futan Juanpan Jesús yocanifo cuscan*

*Mt 20.20-28*

<sup>35</sup> Ascano Zebedeo facu rafutan Santiago futan Juanpan oinomashta Jesús yoinifo,—Tapimamisiton, non mia yocain cuscan noco ashopun,—huanifo.

<sup>36</sup> —¿Ahua man ua yocapaimun un mato ashonon? —huaiton.

<sup>37</sup> —Nantifiton niaifo min iqui nocori min icano niaifo patashari noco imahuu. Min yorafo yonoaitian min tsaoano non mifu tsaonon. Nocori catonhuun,—huaifoan.

<sup>38</sup> —Ua man yocan cuscacai man tapiama. ¿Un omitsiscashquiain cuscan manrifi man omitsiscatiromun? —Jesús ato huani.

<sup>39</sup> Ascaiton cumanifo, —Ai. Nonfin itiroquin, —huaifoan. —Icon. Un omitsiscai cuscan marifi man omitsiscaicain. <sup>40</sup> Ascafia tsoanmain ua naqui huashu tsaotirofoqui uncai tsoa yoitiroma. Uhuun Upa Diosin fustiton tapia. Nan Upa Diosin catoan fosi nanno tsaotiroforan,—ishon ato cumani.

<sup>41</sup> Santiago futan Juanpan ato finonpaiyaiton Jesús naqui huashu tsaopainifo afu rafumisi diez futsafoan nicacanashu atoqui sinanifo. <sup>42</sup> Ascano Jesús ato yoini,—Uqui fucahuun un mato yoinon. Yora futsafo nocon caifoma aton niaifofoan ato curushcain yonofafainmisifo. Aton niaifo patasharifoanri ato yoimisi isca huaquin, “Nonfin mato ifoquin. Non mato yoiai cuscan man noco ashorisca huatiroran,” ishon yoimisifo. <sup>43</sup> Asca huafiamisifo mancai ato cuscara itiroma. Nan man ratoran futsa niaifo ipai maton oinmati itiro. Maton shara huafafainmisi itiro.

<sup>44</sup> Ascatari nan man futsan finonpai maton oinmati itiro. Shinanqui isca huamisitiro, “Un futsafo shara huapai. Man yopa cuscan un ato ashopairan,” ishon anori yoitirofo.

<sup>45</sup> Urifi anori shinan. Un Upa Diosin ariashu mai ano fotoni urifi nocofunucoin cainshquin. Un Diospan facufiacun ua man amanon un oama. Ascatamarocon un futsafo ato ashomisi. Un yora ichapari un atohuunoashu nashoshquin Satanás afanan aton ifon inonma un oaquin,—ishon Jesús ato yoini.

*Nocofunu fusho ahuun anu Bartimeo Jesús caya huani oinsharanon*

*Mt 20.29-34; Lc 18.35-43*

<sup>46</sup> Ascatan Jericó pushurasi ano noconifo. Nannoashu Jesús fu rafuafo non yorahuan-rasi fonifo. Timeopan facu fushon ahuun anu Bartimeo fai cusumunri tsaoa ini ahuara ato yocashquin. <sup>47</sup> Jesús nan pushurasi Nazaret pushconi fain caiton nicai oi ashcafainin cunani,—Jesús, minfin David funaquin. Uhuun ramapaihuu,—huani.

<sup>48</sup> Ascaiton yora ichapafaoan yoinifo,—Tsainyamahuu,—curushcain huanifo. Anori huafiainfo fasi curushcain oi ashcafainin afanan cunani,—Minfin David funaquin. Uhuun ramapaihuu,—huaiton.

<sup>49</sup> Nicai Jesús nituacucahuani. Nituacucahuani,—Yoihuu uqui onon,—ato huani. Yorafoan yoinifo,—Natian min unimatiro. Funihuu. Jesús mia cunaquin,—ishon yoiaifono. <sup>50</sup> Nicaquin ahuun camisa potatan funiriscatan Jesusqui oni. <sup>51</sup> —Un mia ahua ahuousca huashotiromun ua yoipaiquin ua yoihuu,—Jesús huani. Ascaiton cumani,—Tapimamisiton, un oinpai. Afanan un fusho ipaima,—huaiton.

<sup>52</sup> —Mian icoinra huashu min cayaquin. Casharatahuun,—Jesús huani. Catan oinsharan. Ascashon fai Jesús mufaini.

## 11

*Jesús Jerusalén pushurasi ano nocotoshiniquin  
Mt 21.1-11; Lc 19.28-40; Jn 12.12-19*

<sup>1</sup> Ascatan Jesús fu focani Jerusalén chaima noconifo. Nannori chaima pushurasi futsan ahuun anu Betfagé. Nan pushurasi rafu machi cuya ahuun anu Olivo ano inifo. Noco cuatan Jesús afu rafuafo rafu ano ato nichini. <sup>2</sup> Ato yoini,—Nan pushurasi chaima sharaqui fotacahuun. Nocoshon man inapan facu nushua man oincai. Tsoacai na burro camaqui caiyomisima. Tupushon nuri ua ihuunshotacahuun. <sup>3</sup> Ascan ratoran futsan mato yocaiton, “¿Ahuuscaquin man muropán facu man iyoimun?” ishon mato yocaiton. “Nocon Ifo yopaiton non iyoshoni cairan,” ishon ato yoicahuun,—Jesús ato yoini.

<sup>4-5</sup> Ato nichian focatan pushu caicainti ano muropán facu nushua fuchitoshinifo. Man tupuaifoan nannoa niafoan ato yocani, —¿Ahuuscaquin man burro cahuashara tupuimun? —huaifoan. <sup>6</sup> Jesús ato yoia cuscan cumacaquin, —Nocon Ifo yopaiton non tupuyoaran, —huanifo. Ascaiton, —Iyotacahuun, —ato huani. <sup>7</sup> Ascano Jesús ano ihuushontan camisa muropán catu camaqui fucashonifo. Fucashonafoanno acamaqui Jesús tsaoинacahuani. <sup>8</sup> Jerusalén ano caino yorahuanrasifoan fai naman cayan afoforin aton camisafo fucanifo. Futsafoan shupa shatushon nan cai fufori nichiacunifo. <sup>9-10</sup> Ascan nan yorahuanrasí afofori yafi acachori foaifoan nantififain oi ashcafínin curushcái yoinifo,

*¡Aicho! Noco numai oiquin. Upa Diosin Jesusqui unimai. Ascan nocon Ifon Dioshuunoashu nocoqui oa. Nocon shuni David nantifi yorafoan aton niaifo cuscara. Arifi nocon niaifo ishquin oa. ¡Aicho! Nocon niaifo shara nantifi iquinaran*

ishon oi ashcafínin yoinifo.

<sup>11</sup> Ascatan Jesús Jerusalén ano nocotan Dios fu tsanti pushu muran iquitoshini. Amuran nantifi ato oian. Man yataino. Afu rafumisifo doce fu Betania ano fonifo nanno oshashquin.

*Fana higuera Jesús tsasi huani*

*Mt 21.18-19*

<sup>12</sup> Iyoconaino Betania anoashu Jerusalén ano fonainquin naso curanquin. <sup>13</sup> Oian chaima fana ahuun anu higuera nia fuchini. Fuchishon ahuun fimi apaiquin oian ahuun puifosi. Fimiama ini. Fimitiataima. <sup>14</sup> Ascaiton yoini,—Afanan min fimiran, —ishon Jesús yoini. Yoiai cuscan a rafuafoan nicanifo.

*Jesús Dios fu tsanti pushu murannoashu inanmitsaifoan ato potani*

*Mt 21.12-17; Lc 19.45-48; Jn 2.13-22*

<sup>15</sup> Ascano afanan Jerusalén anoashu cai Jesús Israelifoan Dios fu tsanti pushu muran iquitoshini. Iquitoshiquin oian ahuarao a murannoashu inanmitsaifoan. Fuchitan ato chifi cainmaquin futsani. Pui fiainfoan aton acamaquishon pui fitiri finifoan arasacaquin futsani. A ruhui inanmitsaifori aton tsaotiri finifoan arasacaquin futsani.

<sup>16</sup>—Na Dios fu tsanti pushu murannoashucai non ahuara inanmitsatiromaran,—ishon tsain curushcain ato yononi. <sup>17</sup> Ato tapimaquin yoini,

—Diospan tsainhuunoa isca huaquin cununi. “Uhuun tsanti pushu muranshon nantifi manifoti iquitiro ua cufishcaquin,” ishon cunufianicun yomutsofoan ichananti cuscara man huapairan,—ishon ato yoini.

<sup>18</sup> Ascan Israelifoan aton yorafohuunshon Dios cufimisi niaifofo non Moisés cununi cuscan tapimamisifo Jesús yocaiton nicacaquin rutupainifo. Ascaiton futsafoan Jesús yocai cuscan nicapaicoinnifo. Ahuun tsain nicai, —¡Aira! Ascaran tsain shara tsoan nicayomisimar, —icashu yoinannifo. Ascano aton niaifofo Jesusqui ratunifo. Rutupaiquiaquicai tapinifoma ahuuscashomain rututirofoquin.

<sup>19</sup> Ascatañ man fari caino Jesús yafi a rafuafo Jerusalén murannoashu patashari fonifo.

*Fana higuera tsasi futsua*

*Mt 21.20-22*

<sup>20</sup> Ascano iyoco futsaino afanan nasoquin fana higuera fuchitoshinifo. Man tsasi futsua. Ahuun tapofori man naa. <sup>21</sup> Oinquin Jesús higuera yoita cuscan Pedronun shinanquin yoini, —Tapimamisiton, oinpon. Na fana higuera min yoitan cuscan man tsasiaran, —ishon yoiaiton.

<sup>22</sup> —Upa Dios icoira huacahuun. <sup>23</sup> Un mato icon yoinon. Maton nomuran man icoira huacoinshon na machi man isca huatiro, “Tsucucain. Unuhuan muran pacuhuu,” man huaino man yoia cuscanasca huariscatiro. <sup>24</sup> Ascacun un afanan mato yoinon. Man icoira huacoinshon ahuarashta man yocaiton Upa Diosin mato inantiro. Matonna inon. <sup>25-26</sup> Ascano man Upa Dios cufipaiquin iquisi futsan mia chaca huaa cuscan rau huayohuun. Man ascaiton Upa Diosiri maton chaca rauhuatiro. Ascan man Upa Dios nai murannoia man cufiai cuscan mato ashotororan, —ishon Jesús ato yoini.

*—¿Tsoanmun mia yonoaquin? —ishon niaifofoan Jesús yocani*

*Mt 21.23-27; Lc 20.1-8*

<sup>27</sup> Ascano afanan Jerusalén ano nococatan Jesús Israelifoan aton Dios fu tsainti pushu muran caino. Yorahuunshon Dios cufimisi yafi Moisés cununi cuscan tapimamisifo fu Dios fu tsainti pushu cushumisifo aqui funifo. <sup>28</sup> Aqui fucashon yocanifo, —¿Min acai cuscan tsoan mia yonoamun? Min inanmitsamisifo nocon ichananti pushu muranshon min ato pota. ¿Tsoan mia yonoamun min atoasca huaa? —ishon yocaifoan.

<sup>29-30</sup> —Urifi un mato ahuara yocain. ¿Juanpan yorafounu muran iquimapacuniquin tsoan yonocumun? ¿Diosin yonoyamaraquin nocofunufoan yonoafomun huani? Man ua cumasharaiton urifi un mato cumasharatiroquin, —ishon yoiaiton.

<sup>31</sup> Jesús yoia cuscan nicacani yoinanannifo. —Diosin Juan nichiaran non huaiton Jesús noco yoishquin, “¿Ascan ahuuscaquin man Juan icoira huamamun?” ishon noco yoitiro. <sup>32</sup> Ascafia Juan nocofunufoan nichini Diosincái nichinima ishon yoiaiton yorafo nocouqui sinatirofo. “Juanpan Diosin tsain yoimisiran,” ishon yoiaiton nocoasca huatiroran, —icashu niaifofo yoinannifo.

<sup>33</sup> Ascashon yoinifo, —Tsoanmain Juan yonoaquin noncái tapiama. Non mia yoipanan, —ishon Jesús huaifoan. —Ascarifiatan un acai cuscamaín tsoan ua yonoaquin uncaí mato yoima, —ato huani.

## 12

*Ahuarafo yoiai cusraruunshon Jesús ato yosini*

*Mt 21.33-46; Lc 20.9-19*

<sup>1</sup> Ascano nantianri Jesús ahuarafo cusraruunoa ato yosini. Isca huaquin, —Nocofunu futsan ahuun mauano fimi ahuun anu uva fanani. Ascashon fimi cun aquitoquiri cunucuni ahuaton chaca huanonma. Mai quini huashon prensa mafishtamani. Ascashonri toquiri cushuti cusrara cuya masoa anoshon cushusharashquin. Anaitishon mau yonomisifo ifoan ato inanyoa ahuun mau cushusharanonfo. Ato inanyotan mai futsa ano cayoni. <sup>2</sup> Fimiatián ahuun oinmati futsan ahuun mauano nichini fimi atirifi fishonon.

<sup>3</sup> Nocoaítón mau cushuafoan achinifo. Achicashon sutunifo. Ascanshon fimi inanya-maifoanno oinmati ahuun ifoano nasoni. <sup>4</sup> Ascano mau ifoan ahuun oinmati futsa atoqui nichifain arifi mapo sutunifo. Fasi chaca huacaquin namaquirashquinifo.

<sup>5</sup> Ascano mau ifoan ahuun oinmati futsa atoqui nichini. A rutunifo. Ichapa nichian futsa sutufain futsa rutucoinifio.

<sup>6</sup> Ahuun unutani Furun fusti tushuni. Nan Furun fasi noifiaquin ahuun unutaquin atoqui nichini. “Uhuun facucoinfin nicacoinshcaniquin,” ishon mau ifoan yoini.

<sup>7</sup> Ascashori shinanfiaquin ahuun facucoin nichini. Ascano caiton mau cushumisifoan fuchinifo. Fuchishon yoinifo, “¡Oincapon! Mau ifoan ahuun furun oi. Apana na mau. Ascan ahuun facuna chipo iishquin. Ascacun non rutunoncahuun nocona mau inon,” ishon yoinifo. <sup>8</sup> Ascatan furun iqui curannaiton achicashon rutunifo. Rutushon mau tsisumun sharafoshon ratanifo.

<sup>9</sup> ¿Ahuamun man shinaincain? Mau ifoanfin tapiaquin ato rutumaquin cuyoai. Futsafo inanshquin cushunonfo. <sup>10</sup> ¿Diosin tsain yoini cuscan man oinmisimamun? Ascashon yoiquin isca huani,

“Pushu yonomisifoan toquiri quishi shara oincaquin yoinifo, ‘Nacai sharamafinquin,’ ishon potafo. Man potafiafoan pushu ifoan catonni nan toquiri quishihuunoashu pushu nisharanon. Nanscarifi aquin Diospan Furunhuunoa niaifofoan yoimisifo, ‘Nancai ahuamaran,’ ishon man potafo. Ascafíacun Upa Diosin catonni ahuun yorafoti ahuunoashu nipanonfo. <sup>11</sup> Ascan Diosin aca cuscan oinshon non yoitiro, ‘¡Aicho! ¡Diosin ahuun Furunhuunshon aca cuscan fasi sharacoinran!’ ishon non yoitiroran,”

—ishon Jesús ato huani.

<sup>12</sup> Nicacani Israelifoan aton niaifofo fasi sinanifo. Jesús atohuunoa yoiai tapicanashu Jesús achipaifiacani yorafoqui ratunifo achinifoma. Asca huatan amaquinoashu fonifoquin.

### *Niaifofoan noco inanmamai cuscahuunoa Jesús ato yosini*

*Mt 22.15-22; Lc 20.20-26*

<sup>13</sup> Ascatan chipo ichanancashon yoinifo,—Non Jesús ahuara yocanon noco amaquiri cumaimancai. Noco cumaquin chaca huaiton non cunu muran iquimanon,—ishon yoinifo. Asca huacatan Herodes niaifo ahuun tanamisifo non Fariseofo aton tanamisifori Jesusqui nichinifo a yocanonfo. <sup>14</sup> Aquin nococashon yocanifo,

—Tapimamisiton, man non tapian min iconcoin fusti min noco yoifafainmisi. Upa Diosin noco amapaiyai cuscan nannori min noco cayacafi yosimisiquin. Min ahuara yoipaicain min ranoima. Nan min noco yoiai min cayacafi yoi. Ahuashta min fomainma. Min yora ahuuoma yoia cuscan nanscarifi huaquin min niaifofo yoitiro. Nan rafu min ato Diosin tsain iconcoin yoi. Ascacufin noco tapimasharahuu. ¿Romanonfoan aton niaifo Cesari nocon pui noco yoca cuscan non inantiro iyamarai non inantiromamun? Noco tapimahuu,—huaifoan.

<sup>15</sup> Ascashon Jesús onanni nan fuparamitsapaimisifo. —¿Ahuuscain ua amaquiri cumamapaicanimun? Uhuunoa ahuara chaca niaifofo man yoipaicain ua cunu muran iquimanonfo. Man toro inanmisi ahuunshon ahuara finon. Futsan ua fishoriscahuun un oinon,—huaiton. <sup>16</sup> Toro fushoan. —¿Tsoa ointsamain torohuun nuaquin? Tsoan ahuun anu nutamun,—ishon ato yocaiton. “Niaifon Cesarinraran,” huaifoan.

<sup>17</sup> —Ascan Cesarina inancahuun. Diosinna Dios inancahuun,—ishon ato yoini.

Nicacani mustairinifo,—¡Aira! Ahuun tsain tsoancai taftiromaran,—icashu yoinaninfo.

### *—¿Yora naa afanan funiashu ahuuscatiromun? —ishon Jesús yocanifo*

*Mt 22.23-33; Lc 20.27-40*

<sup>18</sup> Ascatacun shafatari Saduceofo aqui funifo. Nanfori Israelifo. Shinanquin isca huanifo,—Yora naashu afanan funipacunacamaran,—ishon yoinifo. Nanfoan yocapaicani Jesusqui funifo.

<sup>19</sup> —Tapimamisiton, Moisés noco cunushoni isca huaquin, “Nan ratoran iyoa naano ahuun ahuin facuoma imisino chipocuton fishon a futan facu ashquin,” ishon cununi.

<sup>20</sup> Ascano siete nanupacuafihuunoa non mia yoinon. No fu iyopaonifo. Aton iyoacai

ahuinyain tauni. Ascaflashon a futan facu acashma nani. <sup>21</sup> Ascano chipocu futsan arifi ahuun ochin ahuin fini. Ascashu arifi a futan facu acashma naani. Ascaino chipocuton futsan arifi ahuun ochin ahuin fini. Arifi a futan facu acashma nani. <sup>22</sup> Ascapacutan amaquisi nai cuyonifo. Aqui facu ayamacai. Ascatori ahuun unutani ainfo nani facu nanuyamacain. <sup>23</sup> ¿Funiaitian nai arishon rato futsacaimun fiicaiquin? —ishon yocaifoan.

<sup>24</sup> Ascan Jesús ato cumani, —Mancai Diosin tsain tapiama. Ahuun yonori man tapiama. Ascashofin man ua amaquiri yoiaquin. <sup>25</sup> Yora naashucal funiafo Dios ari nocotan afanan fiananpacunacafoma. Nantifi Diospan oinmatifo afu icafo cuscarafosi iishcaniquin. <sup>26</sup> Ascan yora naashu furnishquiaifohuunoa Diosin mato yoini. ¿Yoiai cuscan Moisés mato cunushoni man oinmisimamun? Diosin fana urumanhuan muranshon ahuun oi nica cuscan mato cunushoni isca huaquin, “Upa Diosin chofo urumanhuan muran ua yoiquin, ‘Unfi Abraham non Isaac non Jacob afoan un aton Diosiquin,’” ishon Moisés yoini. Nan rafu non fusti yamashtafiacanashu natian Dios fu niafo. <sup>27</sup> Nayofianishaquin natian niafo. Diosin noco tapima nantifi niafo. Nocon yoshin cuyopacunacama. Ascan manfin amaquiri shinamisisquin, —ishon Jesús ato yoini.

### *Diosin yonoa cuscan futsa fasi shara finacaian*

*Mt 22.34-40*

<sup>28</sup> Ascatan Jesús fu Saduceofo yoinanannifo cuscan Moisés tsain tapimamisiton nican. Nicaquin ahuun nomuran shinanni, —Jesús ato cayacafi shara cumaran, —ishon shinanni. Ascashon arifi Jesús yocani, —¿Diosin yononi cuscan aafo Moisés cunushoni ratofomain fasi shara finacaiaquin? —ishon yocaiton.

<sup>29</sup> —Israelifoan, nicasharacahuun. “Nocon Ifo Diosin fusti nocon Ifoquin. Futsan yamai. <sup>30</sup> Nocon Ifo Dios maton ointi muranshon noifain maton nomuranshonri noifain man shinansharai cuscan ahuun noifain fasi mutsiscain maton Ifon Dios noicahuun,” ishon Moisés cununi. <sup>31</sup> Futsari nannoricoin yononi isca huaquin, “Nan mifiri min musu huamuai cuscarifi aquin mia chaima icafori noihu.” Nan rafu Diosin mato yononi cuscan fasi shara finacaianran, —ishon Jesús ato yoiaiton.

<sup>32</sup> —Tapimamisiton, mian cayacafi shara cuma. Icon min yoia Dios fusti. Tsoa futsacai Diosima. <sup>33</sup> Noncái Dios ahuashta inantiroma ahuun rafanan nocohuun noinon. Min yoia cuscan fusti shara. Ascacun non nocon Ifo Dios nocon ointi muranshon noifain nocon shinansharayashon noifain non fasi mutsiscain nocon Ifo Dios noinofiri non musu huamuai cuscarifi aquin non nocon chaima ica noiaino. Ascaran fasi shara finacaianran, —ishon yoini.

<sup>34</sup> Jesús nicashon cumasharani. Ascashon yoini, —Natian Upa Diosin ahuun yorafo imapaipayai cuscan mirifi min tapicuana afu nipashquin, —ishon Jesús yoini. Ascaiton nicacani puusinifoma. Afanancai tsoanshta Jesús ahua yocanima. Nantian yafi nan Jesús naitian afanan tsoan ahuashta yocanima. Ato cayacafi cumaiton nicacani tsoan cumanima aqui ranonifo.

### *—¿Tsoamun Cristoquin? —huanifo*

*Mt 22.41-46; Lc 20.41-44*

<sup>35</sup> Ascatan Jesús Israelifoan aton Dios fu tsainti pushu muranshon ato yosianan yocani, —¿Ahuuscain Moisés tsain tapimamisifoan yoimisi isca huaquin? “Criston David ahuun funaran,” ishon yoini. <sup>36</sup> Diospan Yoshin Sharanun David ahuun nomuran shinanmana cuscan yoini,

“Upa Diosin uhuun Ifo Cristo yoini isca huaquin, ‘Minfin ufu niaifocoquin.

Mia noicasmaifoan min ato finoncoian. Un ato shatumashquin mia afanan ahuusca huatiroma. Min ato iquiniran,’”

ishon Diosin yoini cuscan David cununi.<sup>37</sup> ¿Criston David Ifono ahuuscashucon ahuun funa itiromun? —Jesús ato huani. Yorahuanrasi Jesús yoiai cuscan nicacani fasi unimanifo.

*—Moisés cununi cuscan tapimamisifoan chaca huaforan, —ishon Jesús ato yoini  
Mt 23.1-36; Lc 11.37-54; 20.45-47*

<sup>38</sup> Ascano nicatoshinifo Jesús ato yoiaiton, —¡Oinfain! A Moisés cununi cuscan tapi-mamisifoan saya chainipafo sahuushon ato oinmafoanfafaincani. Fasi tapicoianforan ato huamapaicani. Yora ichaparasi ano foanscanifo “Sharacoinforan,” ato huamapaicani. Fasi cacapaimisifo.<sup>39</sup> Ichananti pushu muran iquitan shafacafi tsaonifo. “Noco oinonfo, non tsaotiroran,” ishon shinannifo. Ichananshon piyainfoannori shafacafi tsaopainifo.<sup>40</sup> Ainfo funuomafo, “Non mia shara huairan,” huafashion paranifo. Aton ahuarao onushcaquin. Fuparacaquin. Fasi chaicoin cufirianifo atoqui oinanpaiquin. Dioshuunshoncai cuficoinnifoma. Nanscarafo Upa Diosin ato fasi onaintimacoinquin, —ishon Jesús ato yoini.

*Ainfomaqui man funu naa ahuuomashtacun Dios inansharani  
Lc 21.1-4*

<sup>41</sup> Yoitan fuhuunina cahua Jesús oinni Dios fu tsainti pushu muranshon yorahuanrasiton pui nanuti muran nanuiniyaifoanno. Yora mafo ichapayaton atirifoan paratama pui nanuti muran nanunifo. <sup>42</sup> Ascano ainfomaqui funu naano ahuuomashtaton toro chimashta rafusi pui nanuti muran nanuni.

<sup>43</sup> Oinquín Jesús fu rafumisifo cunashon yoini. —¡Oincapon! Un mato iconquin yoinon. Na ainfo funuoma ahuuomashtafashion yora futsan inan cuscan aafin paratama nanua cuscara. <sup>44</sup> Ascano mafo ichapayafoan inanfiacaquin ichapa tushu huanifo. Ascafia nan ainfoan nantifi ahun pui nanuqui cuyoni. Inanqui anaititan. Afanancái ahuahuunshon ahun tushu fitiromaran, —ishon Jesús ato yoini.

## 13

*—Dios fu tsainti pushu paon ishquinran, —ishon Jesús ato yoini  
Mt 24.1-2; Lc 21.5-6*

<sup>1</sup> Ascano Jesús Dios fu tsainti pushu murannoashu caiton afu rafumisifo futsan yoini, —Ifon, oinpon. Nocon Dios fu tsainti pushu fasi sharashtacoin. Toquiri cunu putsamuashu cunuacua uhuapacoin fasi sharashtaran, —ishon yoiaiton. <sup>2</sup> —¡Ai! ¡Oincapon! Natian Dios fu tsainti pushu toquiri putsamuashu cunuacua sharashtacoin. Ascafia na man oiain chipo paon ishquin. Afanancái toquirifo putsamua ishquima. Ratoshtacain putsamua tushuimaran, —ishon Jesús ato yoini.

*Jesús oti chaima ahuarao ahuuscarashquiai cuscan ato yoini  
Mt 24.3-28; Lc 21.7-24; 17.22-24*

<sup>3</sup> Ascano machi ahun anu Olivo ano mapufaintan Jesús tsaoni nanno ishon Dios fu tsainti pushu ointiro ini. Tsoa futsacai ano inima Pedro non Santiago non Juan non Andrés non afo aqui funifo. <sup>4</sup> —¿Nan min yoiai cuscan ahuitian ishquimun? ¿Ahuuscashomun non tapitiroquin? ¿Icataima non ahua ointiromun tapishquin? Noco tapimahuu, —huaifoan.

<sup>5</sup> —Oinfain mato paranonfoma. <sup>6</sup> Yora ichapafoan. “Un Cristoran,” ishon mato parapaishcani. Ascashon ichapafoi parashcani. <sup>7</sup> Mani futsafo ya futsafo rutunainfoan man nicashquin. Icataimari anori man nicaiyoicai. Anori nicai ratuyamacahuun. Un mato yoimisi cuscan nanscacoai aiquin. Ascafia Jerusalén cuyoataima. <sup>8</sup> Mai futsan fu yorafo mai futsari ya rutunainfo mai futsafo anori fasi mai naiyanaiyaishqui icaifono mai futsanoafoi yora tushuomafo icaino. Nanscái taushcani. Ascafiachipo omitsiscái finacaishcani.

<sup>9</sup> Ascan itisharacahuun. Mato achishon mato niaifofoan maton ichananti pushu muranshon mato fasi coshashcaniquin. Niaifofoan aton ointaifi mato iquimashcani. Mato asca huacani. Uhuunshon man ato yoishquin. <sup>10</sup> Ahuun unutani nan omitsiscacoinschquiai cuscan icataima uhuun tsain shara uhuunoa atirifiton nicataicanima. Uhuun tsain shara manifotiton nicacoiainfo un afanan ooshquin. Nantianri ua icoingra huaafu afanan omitsiscashquiai.

<sup>11</sup> Ascano chipo mato achimashquin matohuunoa tsain chaca yoishcaquin. Nantianri, “¿Raquiri non huaimun?” ishon shinanyamacahuun. Nan nocoaiton un mato tapimashquin man cumasharanon. Mafincai man cumaima. Diospan Yoshin Sharahuunshon ahuun tsain maton nomuran nanumashquin man niaifofo cayacafi cumasharanon.

<sup>12</sup> Nantianri iyoaton chipocuqui tsain chaca huashquin achinonfo rutushcaquin. Nanscarifi aqui chipocuton ahuun ochiqui tsain chaca huashquin achinonfo rutushcaquin. Nanscarifai facufoan aton apa yafi ahua afanan nicacasmashcani niaifofo yoishcami ato rutunonfo. <sup>13</sup> Uhuunshon mato noicasmacani man ua tanasharaiton, manifotifoan mato noicasmacani. Ascashon mato omitsiscahuafiainfoanno tsoan uhuunoashu omitsiscafiaquin tunucuin uhuun tsain tanasharaqui unupacunacama. Nanfo un cushusharatiro uhuun Upa Dios icano nipasharanon.

<sup>14</sup> Ascacun Diosin ahuun yorafo fu imisi ano futsafoan ahuara fasi chaca huai. Nan un mato yoiai cuscan tapicahuun. Nanfo oin man ratoran futsa Judea mai anoashu machi ano ichotacahuun. <sup>15</sup> Tsoan pushu osa futsa niashu afanan pushu muran iquiyotiroma ahuara fipai. <sup>16</sup> Tsoan aton mau ano yonoi afanan pushu ano nasoyotiroma ahuun sahuuti fipai. <sup>17</sup> ¡Ohua! Ainfon facu nanuafu yafi aton facu yomumishtifo omitsiscashcami.

<sup>18-19</sup> Natian yorafo omitsiscuai cuscan tsoan ascara oinyomisima. Fasi finacaia yora omitsiscuaiquin. Diosin yora tau huaquin onihuani chain cai tsoan ascara omitsiscuai oinyomisima. Tsoaricai afanan ascai omitsiscanacama. Ascan Upa Dios cuficahuun oipacutian ascanonma. <sup>20</sup> Nan omitsiscatifian yorafoti cuyocuancani. Diosin yonoyamaino nan yorafoti cuyocuanafo. Ahuun yorafo nan catoanfo atohuun ramapaiqui omitsiscaitian shaturiscamashquin.

<sup>21-23</sup> Ua nicasharacahuun. Omitsiscashquiaitian nocoataima un mato yoiyoi. Man omitsiscaitian fuprapaimitsamisifoin matoqui oshon. Mato yoitiro isca huaquin, “Unfin Cristoquin,” ishon yoiyamaraguin, “Unfin Diospan tsain yoimisiquin,” ishon mato yoishcami. Satanashunshon yora atiroma cuscan mato ismai. Mato parapaishcaquin. Diosin nan catoanfo cushuyamaino atorifi nan fuprapaimitsamisifo icoingra huacuana. Ascano nantian tsoan mato yoiquin isca huai, “¡Oincapon! Naafin nocon Cristoquin. Cristo nocoqui oaran,” ishon yoiaifoan ato icoingra huayamacahuun.

### *Jesús nan Diospan Furun afanan mai ano fotoshquin*

*Mt 24.29-35, 42, 44; Lc 21.25-36*

<sup>24-25</sup> Ascan nan omitsiscuai cuyocoiainfo fari faquishcoin ishquin oshuri faquishcoin icaino fishifo nai ariashu pacui futsushquin. Nantifi nai murannoafu naiyanaiyainqui futsushquin. <sup>26</sup> Nantianri un nai ariashu fuufoya camaqui mai ano fotoaino uhuun Upa Diosin ahuun yonohuunoashu un afanan matoqui fotoshquin. Nantifain ua oinshcami unfin Diospan facuquin. Un oaino fasi chashapacucahuanshquin. <sup>27</sup> Nantianri uhuun oinmatifo ufu nai muran icafo un nichishquin uhuun yorafo manifoti uqui ihuunonfo.

<sup>28</sup> Ascatan nii ohuamisifohuunoa ahuara un mato tapimanon. Ua nicasharacahuun. Casho pui risquisi futsuaiton man tapitiro faritian. <sup>29</sup> Nanscarifai nanfo un mato yoiai cuscain futsuaiton man onantiro mun oti chaima nuno mai anoa niaifocoin iishquin. <sup>30</sup> Un mato icon yoi. Ahuarafu un mato yoia cuscan a mai anoafoan naiyocashoma oinshcaniquin. <sup>31</sup> Nocon nai yafi mai cuyoai cuscan fianananain futsuin. Uhuun tsain

ascatamarocon cayacafico. Iiconcoin. Uhuun tsain un mato yoiai cuscan nanscaco. aiquin. Fianannanpacunacama.

### *Ahuutiaran Jesús afanan nai murannoashu mai ano fotoi tsoancai tapiama*

<sup>32</sup> Ascafia ahuutiaran un nai murannoashu afanan fotoicain tsoancai tapiama. Diosin oinmati afu nai muran icafoanricai tapiafoma. Urifi un Upa Diosin facufiashocai un tapiama. Nan uhuun Upa Diosin fustitofin tapiaquin. <sup>33</sup> Un afanan oaitian tsoan tapiama. Ascacufin oinfain. Itisharacahuun. <sup>34</sup> Shinancapon. Nocofunu mai futsa ari caquin iquisi ahuun oinmatifo yoitiro, “Un mato yoiai cuscan uhuun pushu cushusharacahuun. Yonosharacahuun. Futsan uhuun pushu anoshon cushutiro un afanan nasoaitian un oinno,” ishon ato yoitiro. <sup>35</sup> Nanscarifiai marifi itisharacahuun. Ahuutiaran un afanan matoqui nasoshquin tsoan tapiama. Fari caino iyamarai yamu nacucuanaino iyamarai tacaranun acaino iyamarai shafaino un nocoriscatiro. <sup>36</sup> Oinfain. Un noocoaitian oshacaquima ua yonosharashocahuun. <sup>37</sup> Un mato yoiai cuscan un nantifi yorafo yoi, “Itisharacahuun,” —ishon Jesús ato yoini.

## 14

### *—Ahuuscashomain non Jesús rututiroquin, —ishon shinannifo Mt 26.1-5; Lc 22.1-2; Jn 11.45-53*

<sup>1-2</sup> Ascano Jesús ato yoini natianri fusiti shafa nococuanaino. Nannoshon misi farashati maisi piinifo. [Nan fusiti Israelifoan Egipto mai anoashu fonifo shinantacani. Nantianri Egipciofoan aton facu furonanfacu iyoafofosi Diosin namaquin cuyoquin. Israelifo ato muran ipaonifiacanashu Egipciofoan aton facufo namafiaquin Israelifoan aton facufo finonmani.

Ascan faritifi ichanancashon Upa Diosin aton shunifoan aton facufo finonmani nanonfoma shinantacani. Ascan nan fuusiti anumisifo nocon shunifoan aton facufo finonmaniran.] Nantianri nocon yorafohuunshon Dios cufimisi niaifofoan Moisés cu-nuni cuscan tapimamisifo futan ichanancashon isca huaquin yoinifo, —¿Ahuuscashomun non Jesús rutumatiroquin? ¿Ahua chacamain ahuunoa non yoiqui rutumashquin? Natian fusimuanocai non achimatiroma. Yorafo fasi sinacani mucatirofo, —icashu yoinannifo. Jesús onushta rutumapaicani.

### *Ainfoan ahuun inti paratamacoin pui nuua Jesusqui ocani Mt 26.6-13; Jn 12.1-8*

<sup>3</sup> Ascano Jesús Betania ano cani. Cai Simón pushu muran iquini. Nan Simón nami rashquishi futsua ini. Nannoshon Jesús Simón acamaquishon piti ano tsaocun ainfoan toquiri moti tsomashu otan aqui ocashquin. Nan toquiri ahuun anu alabastro moti huamua. A muran inti fospi huani. Inti ahuun anu nardo fasi pui nua. Ascano ainfoan motica fuputan Jesús ahuun mapoqui inti ocani. <sup>4</sup> Atirifoan oincani sinanifo, —¿Ahuuscaimun na ainfoan inti paratamacoin ahuun pui nuua potaquin? <sup>5</sup> Nan inti inanmitsashon ahuun rafanan pui ichapa fishon yora ahuuomafo inanshara icuanaran, —ishon yoinifo. Yoicatan ainfoqui curushcain tsainnifo.

<sup>6</sup> —¿Ahuuscain na ainfoqui man tsain chipuain? Fucash huayamacahuun. Ua fasi shara huaquin. <sup>7</sup> Yora ahuuomafo matofu ipanacafo. Ratoran shafatan man ato shara huashotiro. Ascafia un nuno matofu ipanacama man ua shara huanon. <sup>8</sup> Na ainfoan nan oiainshta ua shara huua. Yora maiaquin inti ocamisifo cuscan un nataiyamafaiton na ainfoan ua shinanquin uqui inti ocayo. Ua ashquiai cuscan uqui ocaquin tau huua. <sup>9</sup> Un mato icon yoinon. Na tsain shara uhuunoa manifoti yoishcaquin. Nantianri na ainfoan ua aca cuscari ato yoishcaquin. Ascatacua shara huua cuscan ahuunoari shinanpacushcaquin, —ishon Jesús ato yoini.

*Judas yoini,—Un mato Jesús achimairan,—ato huani  
Mt 26.14-16; Lc 22.3-6*

<sup>10</sup> Ascano Jesús ato yoiquin afu rafumisifo doce futsan nan Judas Iscariote nocon yorahuunshon Dios cufimisi niaifo ano cani Jesús ato achimashquin. <sup>11</sup> Nicacani niaifo fasi unimanifo. —¡Aicho! Min noco Jesús achimaicai. Ascacun ahuun rafanan non mia pui inainran, —huano. Asca huaifono nannoshon Judaspan shinanquin tau huainifoanni, —¿Ahuuscashomain un Jesús ato achimanoain? —ishon shinainyofafaini.

*Jesús ahuun unutaqui afu rafumisifo futan pini  
Mt 26.17-29; Lc 22.7-23; Jn 13.21-30; 1Co 11.23-26*

<sup>12</sup> Ascano shinantani Israelifoan aton fuusitian nocoaino misi farashati maisi pimisifotian. Nantianri chashoanun facu piinifo. Nan chashoan facu faritifi rutupaonifo Diosin aton shunifo cushuni shinanonfo. Ascano Jesús fu rafumisifo aqui fucashon yocanifo,

—Ifon, Diosin nai oinmati nan afu imisiton nocon shunifoan aton facu iyoafofosi finonmani aton rutuquima. Non faritifi ichananmisi anori shinanshquin. Afanan natian non atiroquin. ¿Ascan rato pushu muran non mia itishara huashoimun nannoshon mi futan chashoanun facu piishquin? —ishon yocaifoan.

<sup>13</sup> —Pushurasi ano fotacahuun. Nanno nocofunununu tutsaomushon fuaiton fuchishcaquin. Aqui nocashu afu fotacahuun. <sup>14</sup> Nan iquiai ano afu iquifainshon pushu ifo yocacaquin, “Nocon tapimamisiton mia yocan, ‘¿Rato cunu muranshon ufu rafumisifo futan non chashoanun facu piimun?’ ” <sup>15</sup> Man yocaiton mato cunu uhuapa fomancayan ismaiquin. Nan cunu muranfin nan non yopaiti mato ismaiqui. Nannoshon noco ati shara huashotacahuun, —Jesús afu rafumisi rafu yononi.

<sup>16</sup> Ascano nan rafu pushurasi ano fonifoquin. Pushurasi ano focashon Jesús ato yoia cuscan nanscacoiainton oinnifo. Ascashon chashoanun facu pichanshonifo.

<sup>17</sup> Man fari caino Jesús yafi afu rafuafo doce pushu ano noconifo. <sup>18</sup> Fomancayan focashon acamaquishon piti ano tsaoshon piaifoan Jesús ato yoini, —Icon un mato yoinon. Nuno u futan piai futsan ua achimaiquin, —ato huaiton.

<sup>19</sup> Nicacaquin aton ointi noconifo. Fasi shinannifo. Ascashu puusinifoma. —Ifon, uncai mia ashquimaran, —ishon nantifain yocapacunifo. <sup>20</sup> —Nan man nocofunu doce u futan piai futsan uqui yonoafin ua achishcaniquin. <sup>21</sup> Unfin Diosin ariashu nuno mai ano fotoniquin. Un nocofunucoin cainshquin. Diosin tsain uhuunoa inon pacuai cununi cuscan un nai cai. Ascafia na nocofunun ua ato achimashufin arifi omitsiscapanacaquin. Caianmafin shara icuanaquin, —ishon Jesús ato yoini.

<sup>22</sup> Piainfoanno Jesús misi finifoantan iquisi apa Dios cufiyoni, —Upan, aicho, min noco shara huafafaini, —huani. Apa asca huatan afu rafumisifo yoiqui isca huani, —Na uhuun cayan cuscara. Picahuun, —ishon. Misi torupacushon atoti inancuniquin.

<sup>23</sup> Ascatain Apa Dios afanan cufinquin, —¡Aicho! Upan, min noco shara huaquin, —huani. Cuchori finifoantan aqui fimi unu fuatan ato inancuniquin. Ascaiton nantifain ayapacunifo.

<sup>24</sup> Ascashon ato yoiquin, —Naafin uhuun imi cuscaraquin. Uhuun imi foquin mun nai. Nantifi yorafoan chaca huamisifoanno un atohuunoashu nai cai. Un ascaino yora ichapaflo Diosin ato potapacunacama. Un ato nashoincai aton chaca soashoshquin.

<sup>25</sup> Un mato icon yoi. Un nunoshon afanan mato futan un ayaima. Mun nai ari cai. Nan uhuun Upa Dios niaifoco ica anoshon un afanan ayashquinran, —ishon ato yoini.

*—“Uncai Jesús oinmisimaran,” min ato huashquicain, —ishon Jesús Pedro yoini  
Mt 26.30-35; Lc 22.1-34; Jn 13.36-38*

<sup>26</sup> Ascano ahuun tsain yoiqui anaititan Diosin tsain fanainnifo. Anaititan machi Olivos ano fonifo.

<sup>27</sup> Ascatan Jesús tsain futsan ato yoini, —Nantififain man ua potafainicaiquin. Diosin tsain cununi isca huaquin, “Unfin chashoanfo cushumisi un rutuicai. Ascano chashoanfo ichoi futsuiqui,” ishon cununi. Nanscarifiai ua rutuaifoanno man uhu-unoashu ratufaini foi ichoshquin. <sup>28</sup> Ascan un funiano Galilea ano man uqui nocoi foshquiran, —ishon Jesús ato yoini. <sup>29</sup> Ascaiton Pedronun Jesús cumani, —Nantifiton mia potafiaifoannocai un mia potanacamaran, —ishon yoiaiton.

<sup>30</sup> —Pedron, un mia icon yoicain. Na yamutan tacara cuoi rafuamano min ato yoiqui rafu non fusti huaicai, “Un Jesús oinmisimaran,” —ishon min ato yoicain. <sup>31</sup> —Ma, Ifon. Un mifu natirocai un ato yoinacama un mia oinmisimaran, —ishon Pedronun yoini. Nantifiton afu rafumisifoan nannori yoinifo.

*Jesús Getsemaní anoshon Apa Dios cufini  
Mt 26.36-46; Lc 22.39-46*

<sup>32</sup> Ascano nanno ihuifo mapoa ano ahuun anu Getsemaní ano Jesús afu rafumisifo ya cani. Jesús ato yoquin, —Nuno tsaoshon ua manacahuun. Uhuun Upa fu un tsainyotanon, —ishon ato yoini. <sup>33</sup> Ascano Pedro non Santiago non Juan non afo ato iyoni. Fasi shinanquin ahuun nomuran omitsiscái tauai. <sup>34</sup> Ato yoquin, —Unfin fasi oimitsiscái. Uhuun nomuran un fasi shinain. Mun muucoin un nai cuscan. Nunoshon ua manayocahuun. Un futan oinyocahuun, —ato huani. <sup>35-36</sup> Ato yoitan chaimashta catan fuopacucahuan Apa Dios fu tsainni. —Uhuun Upashtan, ua rutushcani. Un omitsiscái cuscan mian numatiromainquin ua numahuu. Ascaflashon un apaiyai cuscan huaquima. Min apaiyai cuscan ua huahuu, —huani.

<sup>37</sup> Ascatan Apa fu tsainqui anaititan afanan atoqui oni. Oquin ato oian man oshafo ini, —¿Pedron, min oshamun? ¿Min u futan Dios cufimamun? <sup>38</sup> Oshaquima. Dios fu tsainhuun Satanás mato chaca huemapaiyai cuscan anonma. Maton nomuran Diosin mato imapaiyai cuscan marifi nanscasi huapaifiaquicai mafin man atiromaquin, —ishon Jesús Pedro yoini.

<sup>39</sup> Ascashu afanan Apa fu tsainqui cai chaimashta cani. Apa cufian cuscan nannori afanan cufini. <sup>40</sup> Ascashon afanan atoqui nasoquin oian afanan afu rafuafu oshafo ini. Fasi oshapan noicani moipaiquin ranannifo. Raquirimain Jesús ato yoicai tapinifoma. Ascan puusinifoma.

<sup>41</sup> Ascaino afanan atomaqi chaimashta cashon Apa Dios cufitani nasoquin oian afanan man oshafo ini. Ascaiton ato yoini, —¿Man man afanan oshamun? Nanscanon. Man oshatiro. Ascaflashu man afanan natian oshatiroma. Natianfin man ua achi fucaniquin. Na nocofunun ua yora chacafo achimani oiquin. <sup>42</sup> Funicahuun. Non canon. Na nocofunun ua noicasmaifo ua ato achimani oiquin, —ato huani.

*Jesús achinifo  
Mt 26.47-56; Lc 22.47-53; Jn 18.2-11*

<sup>43</sup> Ascano Judas nan Jesús fu rafumisi futsan aqui oni. Yorarasi Judas fu nopus yafi coshati tsomacanashu funifo. Israelifoan aton yorafohuunshon Dios cufimisi niaifofo non Moisés tsain tapimamisifo ato yonoa funifo. <sup>44</sup> Judaspan yorafo Jesús achimashquin yoini, —Un Jesús tsoacaiton tapicahuun nanfin Jesusquin. Achiti sharaqui. Achicatan niaifofo ano iyocahuun, —ato huani. <sup>45</sup> Asca huatan samamashta nocoshon tsoaqui. Tsoatan, “Tapimamisiton,” ishon yoini. <sup>46</sup> Ascano nan Judas fu fuafoan Jesús achinifo. Achicashon niaifofo ano iyoshquin. <sup>47</sup> Ascaino Jesús chaimashta futsan nicun. Nopus fitan nocon yorafohuunshon Dios cufimisi niaifocoinin ahuun oinmati pashtufain rurani.

<sup>48</sup> Ascaiton Jesús ato yoini, —¿Man shinan un yomutsocunmun coshatifo ya nopus ya man ua achipai fua? <sup>49</sup> Shafatifi un Dios fu tsainti pushu muranshon un mato yosifaitocai man ua achiyoti huama. Natian man ua acai cuscan Diosin tsain uhuunoa

cununi cuscacoin man ua huairan,—ishon Jesús ato yoini. <sup>50</sup> Ascaino afu rafumisifoan potafaini amaqi ichonifo.

<sup>51-52</sup> Ascano pushcoai man Jesús mufainaiton achiaifoanno ahuun piracomua shorfaini chitoria ichoni.

*Israeli aton niaifofoan Jesús yocanifo, —¿Min ahua chaca huamisimun? —ishon yocani  
Mt 26.57-68; Lc 22.54-55, 63-71; Jn 18.12-14, 19-24*

<sup>53</sup> Ascano achicashon Israelifoan yorafohuunshon Dios cufimisi aton niaifocoinin pushu ano Jesús iyonifo. Nanno nan niaifofo non Moisés cununi cuscan tapimamisifo ichanannifo. <sup>54</sup> Ascaino Pedro ato cachiori chaima cani. Nocon yorafohuunshon Dios cufimisi niaifocoin ahuun pushu unmanti ranushumuaf oyoaino Pedrori atofu yooni.

<sup>55</sup> —¿Nonmun raquiri huatiroquin Jesús ahuara chaca huaran ishon rutushquin? Ahuacai ahuusca huaa non nicayomisima non rutuai,—icashu Israelifoan aton niaifo yoinannifo. Nanno pushu muran nantifi Israelifoan aton niaifofo ichanannifo. <sup>56</sup> Yora ichapafaoan,—Jesús chaca huaran,—ishon yoifiacaquin nannorisi shinannifoma. Paracaquin.

<sup>57</sup> Yoiti huaquin anaitiafono nocofunu futsafoan niaifofoan aton ointaifi Jesusqui tsain chaca huanifo. Chanican. <sup>58</sup> —Non nicaino na nocofunu iscaita, “Nocon Dios fu tsainti pushu yorafoan acafo. Un choqui ashquin. Ascashofin osha rafu non fusti finontan un afanan futsa huashquicain. Unfin un atiroquin. Tsoan nocofunun u futan aquima. Urus fustifin un ashquicai,” ishon Jesús yoitaran, —ishon yoinifo.

<sup>59</sup> Yoifiacaquin tsoan anorisi yoinifoma.

<sup>60</sup> Ascano nocon yorafohuunshon Dios cufimisi niaifocoinin aton ointaifi Jesús yocani, —¿Miqui tsain chaca huafo cuscan icon iyamarai iconmamun? ¿Min ato cumaimamun? —ishon yocaino. <sup>61</sup> Jesús puusinima. Ascaiton afanan yoini, —¿Diosin sharapan mia catonnimun min ahuun facu inon? ¿Icon min ahuun facucoinmun? —ishon niaifocoinin yocani.

<sup>62</sup> —Mian yoiai cuscafín unquin. Upa Diosin ahuamamishti huatiro. Chipo man ua oinshquicai uhuun Upa niaifo fu un icaiton. Uriemain afu niaifocoianshufin. Un nai ariashu nai coin camaqui un oaiton man ua oinshquicai. Un mai ano fotoshquinran, —ishon Jesús ato yoini.

<sup>63-64</sup> Nicatan Israelifoan aton niaifocoin Jesusqui fasi sinaquin. —Man man nica Jesús fasi chaca huaa. “Un Diospan facuran,” icaiton man man nica. Ascano non tsain futsa yopaima a onaintimashqui. ¿Na nocofunun non ahuusca huaimun? —ishon niaifoan ato yoini. Ascashon nantifain, —Diosquiri chaca huaquin nanonquin, —ishon yoinifo.

<sup>65</sup> Asca huatan ahuun fusoqui cumo michofain funushfain sutunifo. Sutucashon cashu huanifo, —Min Cristomainquin min nantifi tapicoian. Ascan tsoan mia suntuamainquin noco yoihoo, —ishon cashu mutsama huanifo. Ascatan ranushumuafonri Jesús fasi coshanifo.

*Pedro, —Uncái Jesús oinmisimaran, —ato huani  
Mt 26.69-75; Lc 22.56-62; Jn 18.15-18, 25-27*

<sup>66</sup> Ascainofin Pedron nocon yorafohuunshon Dios cufimisi niaifocoinin pushu umaiti ano atofu yooaiton niaifoan ahuun oinmati shomayaton Pedro fuchiniquin.

<sup>67</sup> Fuchishon yoini, —Na nocofunufin Jesús Nazaret anoa min afu rafumisiquin, —huani.

<sup>68</sup> —Ma. Mian yoiai cuscacai un tapiamaquin, —Pedronun shomaya huani. Yoiqui asca huatan shoi caincaiti ano caani.

<sup>69</sup> Ascashon nan oinmati shomayaton Pedro fuchia afu niafo yoini, —Na nocofunun arifi Jesús fu rafumisiquin, —huaiton. <sup>70</sup> —Ma. Uncái Jesús fu rafumisimaran, —ishon Pedronun yoini. Samaracatan Pedron fu niafoan yoinifo, —Icon. Mirifi min Galilea mai anoashu oa. Ascan minfin Jesús fu rafumisiquin, —ishon yoinifo.

**71** —Un mato paratiroma. Un chanicun ua Diosin chii uru muran potatiroquin. Diosin tapiafin un mato iconcoin yoiaquin. Uncai na nocofunu Jesús oinmisimaran, —ishon Pedro ato yoini.

**72** Ascaino samamashta afanan tacara cuoni. Cuoaino Jesús yoia cuscacoin Pedronun shinantani. —Pedro, un mia yoi. Na yamutan tacara cuoi rafuamano min ato yoiqui rafu non fusti huaicain, “Un Jesús oinmisimaquin,” —ishon Jesús yoia cuscan Pedronun shinantani. Ascashu fasi uaini.

## 15

### *Pilato ano Jesús iyonifo*

*Mt 27.1-2, 11-14; Lc 23.1-5; Jn 18.28-38*

**1** Ascano shafa acuaino nocon yorahuunshon Dios cufimisi niaifofo yafi Moisés cununi cuscan tapimamisifo Dios fu tsainti pushu cushumisifo fu ichanancashon shinanpainifo, —¿Ahuuscashomain non Jesús rutumaicai? Nan Pilato Romanonfoan aton niaifon ahuun mai arishon nooco nichini nocon niaifo inon. Non Pilato ano Jesús iyoicanon, —icashu yoinannifo. Ascatan munushcashon Pilato ano iyonifo.

**2** —¿Minmain Israelifoan aton niaifocoinquín? —ishon Pilaton Jesús yocani. —Aifain. Nan min ua yocain cuscafin unquin, —Jesús huani.

**3** Ascano nocon yorahuunshon Dios cufimisi niaifofoan Jesusqui tsain chaca huanifo.

**4** Ascashon Pilaton yoini, —¿Yorafoan mia chaca huaifo cuscan min nicaimamun? ¿Min ato cumapaimamun? —ishon yoini.

**5** Asca huaino puusinima. Aqui tsain chaca huafiaifono puusinima. Ascaino Pilaton ahuun nomuran shinanquin, —¡Aira! ¿Ahuuscain ato cumapaimamun? —ishon shinaniquin.

### *Pilaton ato Jesús inanni rutunonfo*

*Mt 27.15-31; Lc 23.13-25; Jn 18.38-19.16*

**6** Ascatan aton fuusititian faritifi cunu muran iquiafo fusti ato caimapaoni. —¿Ratocai man caimapaimun? —ishon Pilato fuusititian ato faritifi yocapaoni. **7** Nantianri nocofunu Barrabás cunu muran ini. Nanton yorafo shinanchacamani. —Romanonfoan aton niaifofo non potanon, —ato huani. Fasi ato mucumati huapaoni. Asca yora ichapafoan Romanon niaifo potapainifo. Nantianri Barrabás yora rutuni. Ascaiton ranushumuafaoan cunu muran iquimanifo. **8** Ascatan man Jesús achiafono Israelifoan Pilato yoicaquin, —Min noco faritifi fuusititian ashopaoni cuscan afanan noco huashohuun. Afanan cunu muran iquia futsan noco caimashohuun, —huanifo.

**9-10** —Jesuscai ahua chaca huamisima. Ato ashaoan cuscacai Israelifo aton niaifofoan atiroma. Ascacufin Israeli niaifofo Jesusqui sinacaniran, —ishon Pilato ahuun nomuran shinannquin. Ascashon ato yoini, —¿Maton niaifo Jesús man caimapaimun? Un mato caimashonon, —ishon ato yocafashion. **11** Israelifoan aton niaifofo nannosi ichanannifo ato shinanchacamapaicani. —“Jesús noco caimashotama Barrabás noco caimashohuun,” ishon Pilato yoicahuun, —ishon niaifofoan yorafo yononi.

**12** Nannori, —Israelifoan, man yoimisi Jesús maton niaifo. —Ascacufin un Barrabás caimashomun un Jesús ahuisca huaicai? —ishon ato yocani.

**13** Nantifishon, —Ihui coyan iquinanqui mastahuun, —ishon oi ashcafchin yononifo.

**14** —Ahuuscacufin. —Ahuamun chaca huaquin? —ishon yocani. Ato yocafaiton fasi curushcain, —Ihui coyan iquinanqui mastahuun nariscanon, —huarianifo.

**15** Sinaifoan oinquin Pilato ato rau huapaiquin Barrabás caimaniquín. Ascashon ato yona fichi cunoqui tuchiaton Jesús coshaquin futsanifo. Ascatan mastashcaquin iyonifo.

*Ranushumuafaoan Jesús cashu mutsama huanifo*

<sup>16</sup> Ranushumua Romanonfoanfin Jesús iyonifoquin. Niaifoan ahuun pushu chaimashta. Nannofin ranushumuafoan aton pushurasi iniquin. Nanno iyonifo. Ascashon niaifo cushumisifo ranushumuafoan ato chifi cunganifo oin funonfo. <sup>17</sup> Ascashon ahuun sahuuti pucanifo. Pucatan futsa shonan sahuumanifo. Ascatarí mosha chainipafu maiti huashon maimanifo. <sup>18-19</sup> Ascashon yoicaquin, —¡Aicho! Minfin Israelifoan aton niaifoquin, —icashu aqui cashupainifo. Asca huacatan ratoconun mai chachishonifo. Aqui cashupaiqui poquiti ahuun mapo cosharianifo. Ascatac aquí cumo michonifo. <sup>20</sup> Ascashon aquí paranaquin cashushonifo. Cashushoncatanfin sahuuti shonan pucashon ahuun sahuuticoín afanan sahuumanifo. Ascashon ihui coyan iquinanqui mastai focaquin iyonifoquin.

*Jesús mastanifo cuscan*

*Mt 27.32-44; Lc 23.26-43; Jn 19.17-27*

<sup>21</sup> Jesús iyocaquin oianfo pushurasi patasharifo nocofunu Simón oaiton fuchishon ato finonfoanpaiton ranushumuafoan achishon yoini, —Minfin ahuun ihui coyan iquinan foicaicain —ishon ranushumuafoan iyamafaini. Nan Simón Cirene mai anoashu oa iniquin. Ahuun facu rafu Alejandro yafi Rufo. <sup>22</sup> Gólgota ano Jesús iyonifo. Gólgota onicoinnin tsainmanfin mapo shao. <sup>23</sup> Nanno nococashon fimi unu pauntashipia osia Jesús ayamapaiyaifoan ayanima. <sup>24</sup> Ascatac Jesús ihui coyan iquinanqui mastanifo. Mastacatan ahuun sahuuti fianshcaquin. Toquiri tocoro rafu ya cashuqui potapacunifo. Nan finonmanaton ahuun sahuuti fiqui tau huani. Asca huapatan cuyonfianifo.

<sup>25</sup> Man fari nai pochinin racano mastanifoquin. <sup>26</sup> Man mastacashon amanaonri ihui coyan iquinanqui cununifo isca huaquin,

**ISRAELIFOAN ATON NIAIFOCOINQUIN**

ishon amanaonri cununi. <sup>27</sup> Ascashon yomutso rafuri mastanifo. Ocuma futsa futsafain ocuma futsa anifoquin. <sup>28</sup> Nannori ahuunoa cunuyoni cuscan, —Shinanfo arifi chaca shafai, —ishon Diosin tsain inonpacocai cuscacoin aquin cununiquin. <sup>29-30</sup> Ascashon camacaquin, —¡Cuu! Minfin yoimisiquin nocon Dios fu tsainti pushu min choquiacai. Ascatafanfi osha rafu non fusti finontan min afanan futsa huairan min ica. Iconmainquin mifiri numatan fotohuu. Ihui coyan iquinanmaquinoashu fotohuu, —ishon roanifo.

<sup>31</sup> Ascano nanscarifiai nocon yorafohuunshon Dios cufimisi niaifofo yafi Moisés cununi cuscan tapimamisifoan aqui cashupai yoinannifo, —Nanton futsafosi numafiatiroshaquicai aficai numatiroma. <sup>32</sup> Iconmainquin aafin Criston Diospan Furun Israelifoan nocon niaifoashu ihui coyan iquinanhunoashu fotoaiton non oinquifin non icoinra huaicai, —icashu yoinannifo. Ascashon afu ihui coyan iquinanqui masta rafutari aqui tsain chaca huaquin roanifo.

*Jesús nani cuscan*

*Mt 27.45-56; Lc 23.44-49; Jn 19.28-30*

<sup>33</sup> Ascatac fari masafinin racano nan maitio faquishpacuahuani. Ascashu man fari caino afanan shafani. <sup>34</sup> Nantianri Jesús oi ashcafchin apá cunani, —*Eloi, Eloi, ¿lema sabactani?* —oinicoinin tsain manfin, —*¿Uhuun Diosin, uhuun Diosin, ahusscain mian potamun?* —huani.

<sup>35</sup> Yorafoan mapo casho Jesús nicacaquin, —Nicacapon. Elías cunaiton, —huanifo.

<sup>36</sup> Ascaínofin nocofunu futsan ichoniquin. Fimi unu focash muran nashan nanushon ficai ichotan fitani oshon faca tahuá shatun tuhuunifoantán Jesús inanpaíyaiton yoini, —Non oinyonon. Elías oshomain fotomaicai. Non oinyonon, —ishon cashu mutsama huanifo.

<sup>37</sup> Ascaínofin Jesús fasi fiisinacahuaniquin. Fiisina cahuatanfin naaniquin.

<sup>38</sup> Nanscatapaiyaino Israelifoan aton Dios fu tsainti pushu murannoaa pano putan pochimua afincoin fashnupacu cahuaniquin. <sup>39</sup> Ascaiton, —Iconfinquin na nocofunufin Diospan Furunquin, —ishon ranushumua niaifoan Jesús naa cuscan oinshon yoini.

<sup>40</sup> Nannoshori ainfofoan chai mapo casho oinnifo. Futsan María Magdalena non María futsan Santiago non José aton ahua non Salomé. <sup>41</sup> Nan rafu non fusti ainfofo futsafoanri chai mapo casho oinnifo. Galilea anoashu Jesús fu foanfafainmisifo cushusharashcaquin. Ainfofo futsafoanri Jerusalén ano afu funifo. Ato furi nanno nia ini.

### *Jesús mai huanifo cuscan*

*Mt 27.57-61; Lc 23.50-56; Jn 19.38-42*

<sup>42-43</sup> Ascatañ sabado fainaca shafatan Israelifoan nan shafan anunifo, —Itisharati shafaran, —ishon anunifo. Nan itisharati shafatan man fari caino nocofunu José ratutama Pilato niaifo ano cani. Nan José arifi Israelifoan aton niaifo futsan. Arimatea mai anoa ini. Nanton manamisi Cristo Diosin catoanton aton niaifo inon. Nanscacaini cashon Josén Pilato yoini, —Niaifon, un Jesús ahuun caya ihui coyán iquinanmaquinoa fotomapai mahua quini muran mai huai cashquin. Un mia yocai oa, —ishon yoini. <sup>44</sup> Pilaton nicatan, —¡Aira! ¿Ahuuscai Jesús samamashta naamun? —ishon shinanni. Ascashon ranushumua cunani yocashquin, —¿Iconmun man Jesús naamun? —ishon yocaiton. —Ai, man naaran, —ishon ranushumuaton cumani. <sup>45</sup> Ascaiton nicaquin, —Jesús ahuun caya Josén fotomatiro mahua quini muran mai huashquin, —ishon Pilaton ranushumua yononi. <sup>46</sup> Ascatañ José pano oshopa sharacoin fiini. Fiitan a mastafó ihui coyán iquinanmaquinoa Jesús ahuun caya fotomapacufoan ahuun yoratishon nan pano oshopa sharacoinchi raconi. Racoshon toquiri mahua quini muran mai huani. Mai huashon toquirininhuanun fuponifo. <sup>47</sup> Mai huaifono María Magdalena futan María futsan José futsan ahuan nannoshon oinnifo.

## 16

### *Jesús maiašhu funini cuscan*

*Mt 28.1-10; Lc 24.1-12; Jn 20.1-10*

<sup>1</sup> Ascano Israelifoan aton tunutitian cuyoano María Magdalena non María futsan Santiago ahuan non Salomé non afoan ininti sharashta finifo Jesús ahuun cayaqui ocashcaquin. <sup>2-3</sup> Ascano iyoconaino nan Domingoai shafatan funamarishta ainfo rafu non fusti Jesús mai ano fonifo yoinanfonifo, —¿Nocomain tsoa toquirininhuan quini fupushonan? —icashu ainfo rafu non fusti yoinannifo.

<sup>4</sup> Nococaquin oianfo quini ahuun fupoita toquirininhuan toromahuan man fupucuaini. <sup>5</sup> Ascaino iquifainpaiquin oianfo nocon mucicayahuuri man ointiaca quini muran tsaoan ini. Sahuuti osho sharashta sahuuashu. Fuchitan mustai irinifo.

<sup>6</sup> Ascaiton ato yoini, —Ratuyamacahuun. Man Jesús funicainaquin. Man funai Jesuscái nunoma. Mastafaitafo man funiaquin. Na quini muran raca iquitano. Oin fucapon. <sup>7</sup> Afu rafumisifo yoitacahuun. Pedrori yoifain. “Jesús Galilea ano caiyoi tauicaiquin. Anoshon mato manai. Mato yoimisi cuscan nannoaa man ointiroran,” ishon man ointiaca Upa Diosin atoqui nichiaton, —ato yoini.

<sup>8</sup> Nicafaini nan ainfo rafu non fusti mahua quini murannoashu ichonifo. Ichoainfoancai icoinra huaquin rashquinifoma. Ratufaini focaquin rama oianfo cuscan tsoa yoinifoma.

### *Jesús María Magdalena oinmaquin tau huani*

*Jn 20.11-18*

<sup>9</sup> Ascano Jesús Domingo funamanrishta funini. Funiashu María Magdalenaqui nocoi tauni. Jesús naataima Mariamaquinoa yoshin chaca siete potani. <sup>10</sup> Jesús oian cuscan

afu rafuafo ano cani ato tapimashquin. Atoqui nocoshon oian Jesús shinancani uainifo. <sup>11</sup>—Un rama Jesús oian. Man funiaran,—ishon María ato yoifiaiton nicacaquin tsoan icoinra huanima.

*Jesús afu rafumisifo rafu oinmani*

*Lc 24.13-35*

<sup>12</sup> Ascano ahuun tanamisi rafu fai foaifoanno Jesús atoqui niriscatani. Ascaitocai onannifoma. <sup>13</sup> Onancanashu afu rafumisi futsafo ano fonifo ato tapimashquin. —Non Jesús oianran,—ishon ato yoifiaifoan tsoan atori icoinra huanima.

*Jesús afu rafumisifo once yononi cuscan*

*Mt 28.16-20; Lc 24.36-49; Jn 20.19-23*

<sup>14</sup> Ascatañ chipo piyainfoanno Jesús atoqui nocoriscatani. Ascashon ato yoini, —¿Ahuuscain un afanan funia man icoinra huamamun? Futsanfoan ua oinshon mato yoifiaiton man ato icoinra huamaran,—ishon afu rafumisifo once yoini.

<sup>15</sup> Ascano ato yoiquin,—Mun funia. Atohuunoashu naiyofiašhu un afanan funia aton chaca soashoshquin ufu nípanonfo. Manifoti ato yoitacahuun. <sup>16</sup> Ratoran futsanfoan uhuun tsain shara icoinra huatanunu muran iquimamuashu ufu Upa Dios icano nípatiroquin. Ascafia ratoran futsafoan nan tsain shara uhuunoa icoinra huayamashu ahuun chaca ahuun nupacunaca. Ascashufin omitsiscapanaca muran fotirofoquin. <sup>17</sup> Ascano ratoran ua icoinra huashon uhuunshon yoshin chaca futsamaquinoa potafain tsain shara tsoan nicayomisima cuscara yoifain <sup>18</sup> rono paupan tsomashu yotucuyamarain rao paupan ayashu ahuuscayamacain isinin imisifo manmanshon caya huamashquiran,—ishon Jesús ato yoini.

*Jesús nai muran Apa ari cani*

*Lc 24.50-53*

<sup>19</sup> Ato yoitan Upa Diosin atomaquishon nocon Ifo Jesús nai muran ihuini afu níafocoin inon. <sup>20</sup> Ascatañ afu rafumisifo maitio foanfafaincaquin Jesushuunoa ato yoiaifono, nocon Ifon atofu yononi ahuamamishti ahuunshon huanonfo. Ascano nocon Ifoan tsainhuunoa ato yoini cuscan icoinra huanifo. Nanti.

## Lucas Jesushuunoa Cununi

*Lucaspan tau huaquin ahuun tsain cununi cuscan*

<sup>1-2</sup> Teófilo un mia cunu fomai futsafoan Jesucristohuunoa cunuafu cuscan mirifi min icoinra huacoinnon. Jesús acaiton oinmisifo cuscan yafi ahuun tsain yoimisifoan noco yoinifo cuscan nannori futsafoan aqui cununifo. <sup>3</sup> Ascano urifi un nantifi yocapacuni Jesushuunoa aqui cunushquin. Nan caini cuscan huafain nan ahuamamishti huayopaonishaquin apa ari nai muran naso caini cani. Ascacun afu rafuafu un ato yoca urifi tapisharashqui. Ascashon cayacafi cunushon mia fomashquin. <sup>4</sup> Ascacun uhuun cunuuhunshon mia futsafoan yosiainfo cuscan min icoinra huacointiro.

*Diosin nai oinmatinin nan Juan yorafo unu muran iquimapacumisi caiantaima ahuun apa tapimayoni*

<sup>5</sup> Ascacun natian un nica cuscan un mia yoinon. Herodes Judea anoa niaifoatian nantianri Zacarías nocofunu shara nanno ini. Naanfin Aarón ahuun funaquin. Ascashu nannoah ahuun caifohuunshon Dios cufimisi ipaoni. Aarón ahuun funafo shoco ranan. Nan shoco futsafoan aton niaifo Abías. Nanrifi Zacarías ahuun niaifo ini. Nan Zacarías ahuin Isabel arifi Aarón funa. <sup>6</sup> Ascashon nan rafutan Diosin tsain cununi cuscan nicasharacoinpaonifo. Nantifi Diosin yononi cuscan tanasharamisifo. Nan rafutan tanasharaifoan Diosin oinpaoni. Ascacucui tsoan ato ahuashta rafatiro ipaonima. <sup>7</sup> Ascafiaflashu facuoma rafu. Zacarías anifo icaino ahuinri yoshafo toosma ini.

<sup>8</sup> Ascano Abías ahuun shocofo nan ahuun yorafohuunshon Dios cufimisifo ato yoini isca huaquin, —Manfin natian siete oshatan Dios cufiti pushu muranshon man yonoshonicai, —ishon ato yoini. Ascano nannori Zacarías atofu ini. <sup>9</sup> Nantianri Zacarías catonni Dios fu tsainti pushu muran iquishon ininti shara coanon. Nan ininti ahuun anu incienso. Nanscara cufimisifoan aton fuyamisi ipaoni. <sup>10</sup> Nan incienso fiin cuscara coaino yora ichapafo cufiti pushu umainti ano nishon Dios cufishcaquin.

<sup>11</sup> Ascashon Dios cufiti camaqui incienso coa ahuun mumihuuri Diospan oinmati afu nai muran ica Zacariasqui niriscatani. <sup>12</sup> Ascaino Zacarías mustairitan fasi ratucoinni. <sup>13</sup> Ascafaiton Diosin oinmatinin afu nai muran icaton yoini isca huaquin, —Ratuyamahuu, Zacarías. Min cufainton Diosin man mia nica. Min ahuin Isabel chipo furonanfacu nanushquin. Ascan caincun min anuquin Juanran min huashquin. <sup>14</sup> Ascashu min fasi aqui unimasharacoinshquin. Ascaino yorafori fasi aqui unimacoinshquin caiano. <sup>15</sup> Ascano Upa Diosirifi aqui unimashquin. Nocofunu fasi shara-coin iishquin. Ascashocai ahuara pau ayapacunacama. Fimiunu pau ayayamafain ayati futsa pauri ayashquima. Caiyaintian Diosin Yoshin sharapan nan iquishquin. <sup>16</sup> Nan nocofunaitian ahuun caifo Israelifo Diosin tsain shara ato yoishquin ato chaca shatunonfo. Ascano aton Ifo Diosiqui nasononfo.

<sup>17</sup> Ascashu nan Juan Elías ipaoni cuscara arifi iishquin. Elías Dioshuunshon ahuun yorafo cayacafi icocoin tapimapaoni cuscan nanscarifi aqui Juanpan ahuun yorafo arifi ato tapimashquin. Ascano ahuun tsainhuunoashu ato apafo yafi aton facufo afanan noinanshcani. Ascashu nan Diosin tsain nicacasmamisifoan arifi aton chaca shatucashon Dios icoinra huafain shinansharashcani. Ascacun Juanhuunoashu ahuun caifo itisharashcani Diospan furun atoqui nocoitian a nicasharashcaniran, —ishon yoiaiton.

<sup>18</sup> Nicaquin Zacarías cumani, —¿Ahuuscashomun min yoiai cuscan un icoinra huatiroquin? Unfi anifocoinquin. Uhuun ahuinrifi yoshafoquin, —huaiton.

<sup>19</sup> Afanan cumaquin, —Unfi Gabrielquin. Un Dios fu imisi. Ascacun nanton ua nichian un ahuun tsain shara mia yoinon. <sup>20</sup> Ascan un mia yoiai cuscacai mian icoinra

huaima. Ascan natiancai min afanan tsainyoima nan min facu caiyaintian. Un mia yoiai cuscafin nan apaiyaitian Diosin huaashquiquin, —ishon Diosin nai oinmatinin yoini.

<sup>21</sup> Ascaino yorafoan Dios fu tsainti pushu umaintishon cufinquin anaiticatan Zacarías mananifo. Ascafiaino Zacarías atoqui funa caiamaino yoinifo, —¿Ahuuscaín Dios cufiti pushu murannoashu Zacarías saman huaimun? —icashu yoinannifo. <sup>22</sup> Ascariaifoanno atoqui cainfiaflashocai ato tsainquinima. A pucutiroma muuquin ahuun mucupan ato yoi fustini. Ascaiton onannifo Dios fu tsainti pushu muranshon Zacarías namapan cuscara oianran, icashu ahuun yoinannifo.

<sup>23</sup> Ascashu yorafohuunshon Dios cufimisifo ato yono anaiticatan Dios cufiti pushu murannoashu fonifo. Ascaino Zacarías arifi ahuun pushu ano cani. <sup>24</sup> Ascashon chipo ahuinin facu nanuni. Ascashucai ahuun pushu murannoashu mucus fustiti oshu raqui caipainima. <sup>25</sup> Ascashon Isabel shinanquin isca huani, —¡Aicho! Diosihuunshon uhuun funun ua facu nanumana. Diosin ua ashooan. Afin ua nanumapaiyaitian ua facu nanumana. Uhuun ramapaiquin. Asca natiancai afanan uhuunoa yorafoan yoitiroma isca huaquin, “Nacai facuyanacamaran,” ishocai yoitirofomaran, —ishon shinanni.

### *Jesús cainshquiai cuscan Diosin nai oinmatinin yoini*

<sup>26-27</sup> Ascano seis oshu Isabelqui man caano Diosin nai oinmati Gabriel Mariaqui niriscatani. Nan María funuoma ini. José fu fianafotaima afu iyopaonima. Tsoaricai afu imisima. Ascan José ahuun shunifin David iniquin. Nan Israelifoan ato niaifo ipaoni. Ascacun Diosin ahuun oinmati afu nai muran icaton yoini isca huaquin, —Galilea mai Nazaret pushurasi muran Mariaqui catahuun, —ishon ahuun oinmati Gabriel nichini. <sup>28</sup> Ascano aqui nocoshon yoini, —Un miqui oa. Diosin oian min fasi sharacoincun. Mia fasi noicoin. Nocon Ifo mifu icaran, —ishon yoini.

<sup>29</sup> Ascaiton nicaquin María ahuun nomuran shinanpaini, —¿Raquiri ua yoipaimun? —ishon shinanni. <sup>30</sup> Ascaiton afanan cumani, —Maria, ratuyamahuu. Diosin mihiun noifain miqui unimasharai. <sup>31</sup> Ascan minfin natian furonanfacu nanuicai. Ascashu caincun min anuquin Jesusran, huaashquin. <sup>32</sup> Ascano caianshu niaifocoin iishquin. Diosin nai murannoaton ahuun shuni David niaifo ipaoni cuscan arifi apahuunoashu niaifocoin iishquin. <sup>33</sup> Ascashu naanfin Israelifoan aton niaifo unupacunacamaran, —ishon Gabriel yoitaiton.

<sup>34</sup> Afanan María cumani, —Uncai funuyamafinquin. Uacai tsoan tanamisima. ¿Ascan ahuuscashomun un facu nanutiroquin? —huaiton.

<sup>35</sup> Diosin oinmatinin afu nai muran icaton afanan María cumani, —Diosin ahuun Yoshin Sharapan miqui oshon mia facu nanumashquin. Nanto ahuun curushhuunshon ahuamamishti huatiro. Nanhuunshon mia facu nanumashquin. Ascan nan facu cainshquiaifin shara fustisi imisiquin. Ahuashtacai chaca huamisima. Naanfi Diospan facuquin. <sup>36</sup> Min yaya yoshafoancai facu nanumisima. Ascan toosmaran huafiamisifo natian man facu nanua seis oshu man aqui caa. <sup>37</sup> “Ascacun ahuacai Diosin aquimarcasai,” non huatiroma. Nantofi ahuamamishti huatiroquin, —ishon yoini.

<sup>38</sup> Ascaiton afanan María cumani, —Unfin uhuun Ifoan oinmatiquin. Afifin nan apaiyai cuscan ua huatiroquin. Nan mian yoiai cuscan ua huanonquin, —ishon María yoiaino amaquinoashu yamariscatani.

### *Marián Isabel oin cai cani*

<sup>39</sup> Ascano man shafa ranan finontan María ahuun yaya ano cai fasi coshi cani nocoriscapai. Nan Judea muran pushurasi ano machihuanrasifo ini. <sup>40</sup> Nocotan Zacarías ahuun pushu muran iquitoshiquin ahuun yayan Isabel yoini, —Yayan, un mia oinyoiran, —huani. <sup>41</sup> Ascaiton nacai Isabel ahuun shaqui muranshon ahuun facun potapotani. Asca huaino Diosin Yoshin Sharapan ahuun nomuran shinansharamani.

<sup>42</sup> Ascaino oi ashcafchin Isabel ahun raru María yoini isca huaquin, —¡Aicho! Rato ainfo futsacai mia acai cuscan Diosin catoanma. Fasi mia shara huacoinna. Min facu chipo cainyano Apa Diosin aqui unimacoinkui a cushusharashquin. <sup>43</sup> Ascan un ahuara shara huaa rafananci Diosin ua shara huama. Ascashon uhuun Ifoan ahun ahua uqui nichian ua oinyonon. <sup>44</sup> Ascano min tsain nicai unimaqui uhuun shaqui muranshon uhuun facun ua potapotaca. <sup>45</sup> Upa Diosin nan min ishquiai cuscan mia iquisi tapimanaiton nantifi ahun tsain min icoinra huaa. Ascacun Diosin mia unimamaran, —ishon Isabel ahun raru María yoini.

<sup>46</sup> Ascaiton María arifi ahun yayan yoini,  
“Uhuun nomuranshon un shinanqui isca huaa,  
‘Ifon min sharacoin. Tsoa futsacai mia cuscara sharama.

<sup>47</sup> Min uhuun Numamisi  
Diosiran icashu uhuun nomuran un fasi unimacoinkna.

<sup>48</sup> Ascashu un ahun oinmati.  
Un ahuamafiacun uhuun ramapaiquin ua oinfafainni.  
Ascacun ua Diosin shara huaa cuscan yorafoan uhuunoa yoipacunacafo.

<sup>49</sup> Diosin ahuamamishti huamisiton ua ahuara sharashtacoin ashoan.  
Aafin shara fustisiquin.

<sup>50</sup> Ascan ratoran futsan Diosihuunoa nicaquin ahuunoa shinansharafafainai.  
Nan cuscara yorafohuun Diosin ramapaipacunaca.

<sup>51</sup> Diosin ahun shinanpan ahuamamishti huamisi.  
Ascashon nan cacapaimisifoan aton nomuran shinanchacamisifo cuscan Diosin ato shatumafain atori onaintimai.

<sup>52</sup> Ascatan niaifofori Diosin ato shatumana afanan niaifo inonfoma.  
Ascashon nan ahuamafo ato shinansharamana nanfoan tapinonfo ahun facufocashon.

<sup>53</sup> Ratoran futsa ahuuomafo foni cuscarafo fasi Diosihuunoa tapipai tanasharashcaquin.

Nanscarafo Diosin ato cushusharatiro.  
Ascashon ahuara yopai cuscan ato inansharafain a tanasharaifoanri ato unimamashquin.

Ascashon ahuara ichapa ayafoflashu Diosihuunoa shinanyamaifo copquirifi ato ahuara inainma.

Man mafo ichapayaflashu ato nomuran shinansharayamafain tsoa unimamisima.

<sup>54-55</sup> Ascafiaifoanno nocon caifofo Israelifofin Diospan oinmatifoquin.

Ascashon non ahuara acai cuscan nocoo ashomisi.

Nonfin nocoo shuni Abraham ahun funafoquin.

Ascacun nocohuun ramapaipacunaca.

Nannori Upa Diosin nocon shunifo yoiyotianiran,’ ”  
ishon María yoini.

<sup>56</sup> Ascashu oshu rafu non fusti ahun yayan Isabel fu iyoni. Ascatan María ahun pushu ano nasoni.

### *Nan yorafo unu muran iquimapacumisi Juan Caini cuscan*

<sup>57</sup> Ascashu Isabel ahun facu caiyaintian furonanfacu cainni. <sup>58</sup> Ascaiton a chaima icafo futan ahun yorafoan nicanifo nocon Ifo Isabelhuun ramapaiqui facu cainmashara. Ascashu afu unimacoinnifo. <sup>59-60</sup> Ascatan ocho osha finontan Zacarías pushu ano ahun yorafo funifo facushta ahun foshqui rupa shatuni fucani. Ascashon apa anuquiri Zacariasran huapaifiaifoan ahua Isabel yoini, —Ma. Anoricai ahun anu iquima. Juan ishqiran, —ishon ahuan yoititon.

<sup>61</sup> Cumanifo, —Ma. Rato min yorafoan ahun anucai Juanmaran, —ishon yoinifo.

<sup>62</sup> Ascashon Zacariasrifi yocanifo ato mucumansi raquinimain ahuun facun anuicai. Ascafiaifoan tsaintiroma muuqui ahuun mucumansi mutoacufaini ahuun anu tapi-paifainfoan. <sup>63</sup> Ato papio yocain muci mushan mushainni. Ascaiton inanfo cunutan ato ismaiton oianfo Juan ini. Ascara oincani mustairitan, —Icon ahuun anu Juan ishquiran, —ishon shinannifo. <sup>64</sup> Ascano ahuun facun anu cunutapai Zacarías afanan tsainnacahuani. Ascashon Dioshuunoa shara yoini. <sup>65</sup> A chaima icafo futan Judea muran machi ichapa ano icafoan nicacaquin Diosin aca cuscan fasi sharacoin. — Noncái ascara nicayomisimaran, —icashon Zacarías yafi ahuin Isabel non aton facu Juanhuunoa yoiquin futsanifo. <sup>66</sup> Ascashon nan nicafoan yoinifo, —¿Ahuu cuscaramun nan facu iishquiquin? Man non oian facufiacun Diosin Yoshin Sharapan iquinaiton, —icashu yoinannifo.

### *Zacarías fanainni cuscan*

<sup>67</sup> Ascano facu ahuun apa Zacarías Diosin Yoshin Sharapan iquinaiton inon pacoai cuscan yoini isca huaquin,

<sup>68</sup> “Uhuun caifo Israelifoan nocon Diosin fasi sharacoin.  
Nocoqui oa noco numashqui.

<sup>69</sup> Diosin nocon Numamisi nan ahuamamishti huamisi nocoqui nichian.  
Noco shunifoan aton niaifo David ipaoni.

Nanton ahuun funa nocoqui nichian noco niaifocoin ipashanon.

<sup>70</sup> Nannori ahuun tsain inon pacoai yoimisisharafohuunshon Diosin yoiyoni.

<sup>71</sup> Ascashon yoiquin isca huani, ‘Un mato cushui.

Nan mato noicasmamisifoan afanan mato ahussca huanonfoma.

Ascacun un mato Numamisi matoqui nichiran,’ ishon Diosin inon pacoai yoimisifohunshon noco yoini.

<sup>72-75</sup> Ascashu noco shunifohuun Diosin ramapaipaoni.

Abraham yoiyoni cuscacai Diosin ointi aquimanama.

Yoiquin isca huani, ‘Un min funafo numashqui ato noicasmaifoan ato ahussca huanonma.

Ascano ratutama ua yonoshopacutirofoquin,’ ishon Diosin yoiyoni.

Nocon Ifoan yoiyotiani cuscacoin man noco ashoin non isharacoincain non ahuun tsain tanapacushanon,’

ishon Zacarías yoini. <sup>76</sup> Ascashon ahuun facu yomushtafiacun pushcoashu ishquiai cuscan yoiqui isca huani,

“Uhuun facushtan, ‘Mirifi min Diosin tsain yoishomisiran,’ mia huaashquicani.

Diosin nai murannoaton ahuun Yoshin Sharahuunshon ishquiai cuscan  
min ato yoifoanfafainquin isca huashquin.

‘Nocon Ifo oshquiquin itisharacahuun.

Maton chacari shatucahuun a nocoaiton nicasharashcaquin.

<sup>77-79</sup> Diosin fasi nocohuun ramapaiqui  
nocon Ifohuunshon noco chaca soashona non afu ipashanon,’  
ishon noco caifo min ato yoishquin.

Nii muran faquishiaainocai non oinsharatiroma.

Chashamatimaisicai non fai tanasharatiroma nocosharapaiquin.

Nanscarifiai nocon Ifo oataimano tsoan Diosin fai tapiataima.

Shafaino fari otiro afanan faquish inonma.

Nanscarifiai nocon Ifo nai murannoashu oataima nan faquish cuscara.

Ascafia nan nocoqui oaitian nan chashamati cuscara shara iishquin.

Ascashon Diospan fai noco oinmashquin

ahuunoashu non Dios fu rafunon.

Nonricai nai afanan ratutiroma.

Naashumain non Upa Dios fu ipasharatiro.

Non nicuri noco cushusharafain nocon ointi fucash huanonma non isharashquin,” ishon Diosin Yoshin Sharahuunshon Zacarías yoini.

<sup>80</sup> Ascashu nan Juan facu pushcoco coin sharani. Ascashon shara fustisi tanapaiquin ahuun nomuran Diosin tsain shara nanuco inni. Tsoa istaipama anori iyopaoni ahuun caifo nan Israelifo Diosin tsain yoiquin tau huaitian.

## 2

### *Jesús cainni cuscan*

*Mt 1.18-25*

<sup>1</sup> Nan Juan caiyaintianri Romanonfoan aton niaifoan ahuun anu Cesar Augusto. Nanton ahuun yorafo yononi maitio ato tanan huashon aton anufo cununonfo ahuuti yoramainquin tapipaiquin. <sup>2</sup> Nantianri Siria anoafaoan ato niaifo ahuun anu Cirenio ini. Ascan nan Cirenio niaifoaitian ato tanan huaquin tau huani. <sup>3</sup> Ascano nantifi focanashu aton mai anoashu cununifo.

<sup>4</sup> Ascacun José yafi María Nazaret pushurasi Galilea murannoashu focani Belén pushurasi Judea mai ano noconifo. Nan Belén David ahuun mai ini. José David ahuun funa. Ascacun arifi Belén ano cani. <sup>5</sup> María fu aton anu cunui focani fonifo. Ascashu man yoinanfo ini afu fiananshquin. Ascafia nantianri man facu nanua ini. <sup>6</sup> Belén ano nocoaitian facu cainti sunuin ini. <sup>7</sup> Nannoashu furonanfacu caianshu facuyai tauni. Nantifi pushu fospifafainano tsoan ato iquimapaiyamaino inafoan pimisifo pushu facushta murannoashu furun cainni. Caincun ahuun rashutinin rashuni. Ascashon inafoan piafo muran furun ratani.

### *Diosin nai oinmatifo yafi chashoan cushumisifo*

<sup>8</sup> Nan Belén chaimashon chashohuan cushumisifoan nan yamutari aton inafo faasi funununshon cushushinifo. <sup>9</sup> Ascaino atoqui nocon Ifoan ahuun oinmati afu nai muran icafo fotoi chashapacucahuani. Faasi funununnoafo Diosihuunshon ato chashariscatani. Ascaino nan chashoanfo cushumisifo fasi ratui futsunifo. <sup>10</sup> Ascaifoan ato yoini, —Ratuyamacahuun. Un mato tsain fasi sharaco ino yoiyo aquin. Nicai man unimaino manifoti anoafori unimanonfo. <sup>11</sup> Na yamutafin Belén nan mato shuni David cainni anoashuri maton Numamisi cain huanquin. Naanfin Upa Diosin matoqui nichiaquin. Nan maton caifoan manamisifo. Nanrifi maton Ifoquin. <sup>12</sup> Ascacun un mato yoi ahuuscashomain man fuchitiroquin. Nan facu ahuun rashutinin rashucai inafoan pimisifo muran racacun man fuchitiroquin, —ishon Diosin nai oinmatinin ato yoini.

<sup>13</sup> Ato yoi qui unutapaiyaino samamashta atirifi Diosin oinmati afu nai muran ica atoqui cuyopacunifo. Ascashon Diosihuunoa yoisharacaquin isca huanifo.

<sup>14</sup> “*Diosin fasi shara. Nai murancoin ica. Atirifoqui Diosin unimai. Nafo aton nomuran unimasharacaniran,*”

icashon yoinifo.

<sup>15</sup> Ato yoi qui anaiticatan atomaquinoashu Diosin oinmatifo nai muran fonifo. Ascaino nan chashoan cushumisifoan yoinifo, —Non Belén ano canon. Nocon Ifoan noco yoia cuscan non oin fonon, —icanashu yoinannifo.

<sup>16</sup> Ascashu ichocaqun María yafi José fuchitoshiquin oianfo facu inapan pimisifo muran fasi toca racai ini. <sup>17</sup> Ascataan nan facu oianfo cuscan huafain ato yoifoan-fafainifo. <sup>18</sup> Ascan nan chashohuan cushumisifoan ato yoiaifoan nicacaquin yoinifo, —¡Aira! ¿Ahuuscashomun ascara shara noco yoiafoquin? —inifo. <sup>19</sup> Ascacun María ahuun nomuran fasi shinanpaoni nan nicafain oian cuscan. Ascashori, —¡Aicho! Diosin noco shara huashoanran, —ishon shinanpaoni. <sup>20</sup> Ascashu nan chashohuan cushumisifo ato yoifoan-fafaintacani aton inafo ano naso furacashon yoinifo isca huaquin, —¡Aicho! Dios

fasi shara. Nan noco yoia cuscan huafain nanscaracoin man non oianran, —icashu yoinannifo.

*Dios fu tsainti pushu muranshon apa futan ahuan aton facu Jesús Dios inannifo*

<sup>21</sup> Jesús cainta ocho oshatan nan facun ahuun foshqui rupa shatuni. Nantianri anuquin Jesusran huani. Nannori María facu nanuataima Diospan oinmatinin afu nai muran icaton yoiquin tau huani.

<sup>22</sup> Moisés Israelifo yononi isca huaquin, —Maton ahuin facu caianshu cuarenta oshatan Dios fu tsainti pushu muran iquiyotiromaran, —ishon ato yononi. Ascacun María futan José aton facu man cuarenta oshatan Jerusalén ano iyonifo. Dios fu tsainti pushu muranshon apa Dios inanshcaquin. Ascano Dios fu tsainti pushu muran iquicashon yoinifo isca huaquin, —Upa Diosin nocon facu non mia ihuushona mia inainyoshquin mia yonoshopacushanon, —ishon yoinifo. <sup>23</sup> Ascacun nannori nocon Ifoan yononi isca huaquin, —Nan furonanfacu cain tauafo nocon Ifo Diosina. Ascashon afi amapaiyai cuscan ato huapashanon, —ishon cununi. <sup>24</sup> Nantianri José yafi María Diosin yononi cuscaín ruhui rafu iyamarai ruhui cuscara rafu foni nan ahuun caifohuunshon Dios cufimisi María inanni a rutushonon. Ahuun chaca soapaiyaiton Diosin ashonon. Ascashon a tanasharafain ismanon.

<sup>25</sup> Ascan nantianri Jerusalén anoa nocofunun shara ahuun anu Simeón. Diosin Yoshin Sharapan iquina. Nanton Dios tanasharashon cufifafainpaoni. Ascashon nan Diosin catoan Israelifoan aton Numamisi manafafainpaoni. <sup>26</sup> Ascacun Diosin Yoshin Sharapan ahuun nomuran yoini, —Min naataishoma nan Diosin catoan maton Ifo Cristo min oinshquiran, —ishon yoini. <sup>27</sup> Ascashon Diosin Yoshin Sharapan shinamani cuscan Israelifoan Dios fu tsainti pushu muran iquiní. Ascaíno José yafi María arifi aton facuya iquifainnifo. Diospan tsain yononi cuscan aton facu huashoshcaquin iquinifo. <sup>28</sup> Ascano Simeón atoqui otan yoini, —¡Aicho! —ianan facu chishtoinifoanni. Ascatan Dios yoisharaquin isca huani,

<sup>29-30</sup> “Ifon, min nantifi tapicoian.

Mian yoiyotiani cuscan mun oian. ¡Aicho!

Natian unimacaini un nai manmain min facu nan nocon Numamisi mun oianmashu.

<sup>31</sup> Nantifi manifotiton aton Numamisi min nocoqui nichian.

<sup>32</sup> Ascacun nocon caifomafoan mia onanyamafiamisishaquin  
min facuhuunshon mia onanshquicani.

Ascafia nonfin min yora Israelifoquin non tapicoinshquin  
na facuhuunoashu Diosin nocohuun ramapaiyaiton.

Ascano ahuunshon min noco yoiyoatiani cuscan noco huashoshquiran,”  
ishon Simeón yoini.

<sup>33</sup> Ascaiton nicacaquin José futan Marían aton nomuranshon shinanquin isca huanifo, —¡Aira! Noncái iscara nicayomisimaran, —ishon shinannifo. <sup>34-35</sup> Ascashon Simeón Diospan Yoshin Sharahuunshon ahua María yoisharaquin isca huani, —Min facu nan nocon caifo Israelifo atirifoan nicacasmacanashu omitsiscapanacafo. Ascan min facu nicacasmaifoanno min fasi shinanshquin. Ascafia nocon caifo atirifoan min facu icoinra huacanashu fasi unimacoinshcani. Ahuunshon yora ichapafain aton nomuranshon shinainfo cuscan puashcaniran, —ishon Simeón yoini.

<sup>36</sup> Nannori ainfoan ahuun anu Ana, Fanuel facu. Nanton arifi Dioshuunshon inon pacoai cuscan yoipaoni. Nanrifi Aser ahuun caifo ini. Siete fari funun fipaoni. Ascafiahu amaqui funu naniano man Ana yoshafoshta ini. <sup>37</sup> Ascashucai ochenta cuatro fari funuya. Nantianri Dios fu tsainti pushu muranshon Dios cufinquin piqui tunufafainpaoni. Nan muransi ipaoni ahuun Ifoan amapaiyai cuscan aashquin. <sup>38</sup> Ascano José yafi María Simeón fu tsaincaifoanno nantianari atoqui Ana oni. Oshon facu fuchitoshiquin yoini, —¡Aichoran! Upa Diosin, natian min facu min nocoqui nichian

nocon Numamisi ipashanon, —ishon yoini. Ascashon nan facu oian cuscan Jerusalén anoafó nan manamisifo Anapan yoiqui isca huani, —Mun nocon Numamisi oincoian. Man nocoaran, —ishon ato yoipacuni.

### *Nazaret ano naso furanifo*

<sup>39</sup> Ascano José fu María Diosin tsain yononi cuscaín aton mai Nazaret ano nasonifo. Nan Nazaret Galilea muran. <sup>40</sup> Nannoashu facu mutsisipacoin yosini. Shafatifi ahua-mamishti tapicoinfafaíni. Diosin ahuun noiquin shara fusti huamafafainni.

### *Facushtafashu Jesús Dios fu tsainti pushu muran iquini*

<sup>41</sup> Ascano nan faritifi Jesús apa yafi ahua Jerusalén ano fopaonifo. Diosin nai oin-matinin aton shunifoan furonanfacu iyoafosi ato finonmashoni shinantacani. <sup>42</sup> Jesús man doce fari aquí caano apa futan ahuan nan imisifo cuscan fuusin focaquin iyonifo.

<sup>43</sup> Ascashu man fuusi anaiticatan María yafi José aton pushu ano naso furanaifoanno. Jerusalén ano nan facu Jesús atomaqui nitufiaitocai apa futan ahuan tapinifoma.

<sup>44</sup> Ascano atofu cai shafain icashon. Man shafa fusti fofoacatan ifiacucahua oian yamaiton. Funacufaincaquin ahua futan apa ahuun yorafo yafi afu rafuafo yocanifo, —¿Man Jesús oianmamun? —ato huaifoan. —Ma. Noncái oianmafínquin, —huaifoanno.

<sup>45</sup> Afanan nasofaincání fonifo Jerusalén ano funai focani.

<sup>46</sup> Ascano focashon rafu non fusti oshatan funacaquin Israelifoan Dios fu tsainti pushu muranshon. Moisés cununi cuscan tapimamisifo ya tsaoshon yoiaifo cuscan nicaquin ato yocariaiton apa futan ahuan fuchinifo. <sup>47</sup> Ascaiton nicacaquin yoinifo, —Nicacapon. ¿Ahuuscashomun na furonanfacu ato cayacafi cumasharaiquin? Fasi tapisharacoian, —ishon nan nicafo cuscan afi ranan yoinannifo. <sup>48</sup> Ascano ahua futan apan fuchicashon yoinifo, —Oinpon. Nocon facu iyoafifo nastui tsaoa. ¿Ahuuscaimun noco facu icuscaíquin? —huanifo.

Ascashon ahuan cunani, —Cocan, ¿Ahuuscái upa yafi min noco funamanain? ¿Min tapiamamun upa futan un mia funai? Non fasi ratua, —huaiton.

<sup>49</sup> Jesús ahua cumani, —¿Uhuán, ahuusca huaashquin man ua funaiquin? Man tapiamamun nuno uhuun Upa cufiti pushu muran un iquia ahuun tsain nicasharashquin, —huani.

<sup>50</sup> Furumun yoiai cuscacai ahua futan apa tapinifoma.

<sup>51</sup> Ascashu ahua yafi apa fu Nazaret ano nasoni. Ascashon nantifi apa futan ahuan yonoaifo cuscan yafi yoiaifo cuscan nicacoinni. Ascáton furumun yoia cuscan ahuan ahuun nomuran shinanfafaini. <sup>52</sup> Ascashu Jesús pushcosharacoinni. Diosin ahuun shinapan shinanmasharamanaino mapo sharayacoin ini. Ascacún Apa Diosin ahuunoa shinansharaquin yoini isca huaquin, —Uhuún facun Jesús fasi sharacoin. Un ahuun noicoinran, —ishon yoini. Yorafoan arifi Jesushuunoa nannorisí shinannifo.

## 3

### *Nan atounu muran iquimamisi Juan tsoa istapamashon ani*

*Mt 3.1-12; Mr 1.1-8; Jn 1.19-28*

<sup>1</sup> Nantianri Tiberio Romanonfoan aton niaifocoin ini. Quince fari niaifoyoni. Nantifton aton niaifocoin. Ascano rafu non rafuri niaifo patasharinoa nannori afu ipaonifo. Futsan ahuun anu Poncio Pilato nan Judea mai anoafóan aton niaifo. Galilea mai anoafóan aton niaifo Herodes ipaoni. Chipocu Felipe Iturea yafi Traconite anoafóan aton niaifo ipaoni. Abilinia anoafóan aton niaifo Lisanias ipaoni. <sup>2-3</sup> Nantianri Anás yafi Caifás ahuun caifohuunshon Israelifo Dios cufimisi aton niaifo rafu ipaonifo. Ascaifono Juan tsoa istapamashon icamanoshon Diosin yononi. —Min caifo yoitahuun isca huaquin, “Matón chaca shatucahuun. Man chaca shinain cuscan afanan shinanya-macahuun. Diosin mato yoa cuscan nicacahuun. Man ascaiton Diosin mato chaca rau

huashotiro. Ascacun un mato unu muran iquimapacutiro maton chaca shatushon man ismanon.” Anori ato yoitahuun, —ishon Diosin Juan yononi. Ascacun Diosin yoini cuscan Juanpan unu Jordán cusumunshon ato yoiriani. <sup>4</sup> Nannori Juanhuunoa Isaías inon pacuai cuscan yoimisiton cunuquin isca huani,

“Tsoashta icamanoshon Diosin yononi cuscan oi ashcafinitin yoiquin isca huanonpaco, ‘Nocon Ifo nocoqui samamashta ooshqui. Ascacun itisharacahuun. <sup>5</sup> Un tsoa cuscaramaran iyamacahuun. Ascatamarocon uncai ahuama. Uhuun numamisi un yopacoinran,’ icahuun. Ahuara onushon afanan nasocahuun. Cayacafi isharashcaquin. Man ipaoni cuscan afanan ayamacahuun. Nantifi mato chaca potacahuun nocon Ifo fusti tanasharashcaquin. <sup>6</sup> Nan Diosin catoan nocon Numamisi oaiton nantifiton oinshquicaniran,”

ishon Isaías cununi.

<sup>7</sup> Ascano yorahuanrasi Juanqui funifo ato unu muran iquimapacunon. Ascashon ato yoiquin isca huani, —Manfin rono paupaton facu cusracoinfoquin. Icoinra huayamaifoan Diosin atoqui sinaqui amaquishon ato potano omitsiscapanacafo. Ascan manfin nanscarafoquin. Omitsiscapanacafo muran focasmafiaquicai maton chaca man shatupaima. <sup>8</sup> Ascafia chaca shatucoincashon Diosin mato yoia cuscan nica-coincahuun. Man ipaoni cusrari afanan ayamacahuun. Man ascaiton yorafoan ointirofo afanan chaca huapaitama Dios fusti man tanasharaiton. Maton nomuran shinanquin isca huayamacahuun, “Nonfin Abraham funafo non ahuun caiforiquin iyamacahuun. Diosin Abraham yoiyotiani cuscan nocorifi ashoto. Ascan Diosin noco onaintimashquimaran,” ishon anori shinanyamacahuun. Diosin onihuapaiquin na unu cusumunnoa toquirifo Abraham ahuun funafo oni huatiroquin. <sup>9</sup> Fana fimi sharayamaiton ifoan ahuun tapo nantifi ruratinin shatuquin cuyoshon chii muran potatiro coi futsunon. Nanscariflai natianri Diosin man itishara chaca shatutama man isharayamacaiyaiton mato omitsiscampacushquiran, —ishon Juanpan ato yoaiton.

<sup>10</sup> Nicacaquin cumanifo, —¡Ohua! ¿Nonmun ahuuscaicain? —huaiton

<sup>11</sup> Ascan Juanpan yoiquin isca huani, —Nan sahuuti rafuyaton futsa ahuuomacoincun inancahuun. Nanscarifi aquin nan tushuyaton a futsa tushuomacun inancahuun, —icaiton nicacani.

<sup>12</sup> Niaifo pui fishomisifori aqui fucashon yocanifo, —¿Tapimamisiton, nonmun ahuuscatiroquin unu muran iquimamushquin? —huaifoan.

<sup>13</sup> Ato cumani, —Afanan maton niaifoan yonoamati finonmafain pui fiyamacahuun, —huaiton.

<sup>14</sup> Ascaino atirifi ranushumuafaoanri yocanifo, —¿Ascan nonmun norifi ahuuscatiroquin? —huaifoan atori yoiquin isca huani, —Pui fianpaiquin ato asca huayamacahuun. Pofuyamacahuun. Man tapiflashon yora futsan ayamafiacun, “Nanto acaran,” ishon maton niaifo yoiyamacahuun. Nan mato niaifoan mato inantisya unimacahuun. Tsain chipuyamacahuun, —ishon ato yoini.

<sup>15</sup> Ascaiton nan Cristo manamisifoan Juan nicacani ato nomuranshon shinannifo, —Nanracafin Cristoquin. Nan Diosin catonni, —ishon shinannifo. <sup>16</sup> Ascaifoan Juanpan ato cumani, —Uncái Cristoma. Unfin mato unu muran iquimapacuaquin. Ascan nantofin ahuun Yoshin Shara matoya rafumapacui oquin. Ahuun shinansharapan maton nomuran shinamanon. Ascashu matofu rafuano nantifi ahuara chacafo ahuunshon shatuashu a cusrara shara ishcaquin. Naanfin Diosin catoanquin. Nantofin ua fasi finoncoian. Ahuamamishti huatiro. Ahuashta chaca huayomisima. Uncái ascarama. Un ahuara shara huahuu rafanancai un ahuun oinmatima. Uhuun ramapaiyamainoricai un ahuun oinmati icuanama. <sup>17</sup> Ascan natian man itishara a icoinra huafu yafi a nicacasmamisifo ato pashcanan huashquin. Ascashon nan icari nan icoinra huafosi ihuicoinsquin afu isharapacunonfo. Asca nan nicacasmamisifo

chii urumanhuan muran ato potai anoashu omitsiscai unupacunacafomaran,—ishon Juanpan ato yoini.

<sup>18</sup> Ascashon tsain futsafori ato yoiriani aton nomuran nanumapaiquin chaca shatunonfo. —Nocon Ifo Cristo nocoqui oi noco numashqui, —ishon ato yoini.

<sup>19-20</sup> Ascashon Juanpan nan niaifo Herodes yoiqui isca huani, —Ushto ahuin fianfain ahuara chacafori min huaran, —ishon yoini. Asca huaiton nicaquin Herodes Juan cunu muran iquimani. Ahuara chacafo huafiamishaquin Juan iquimaquicaifin fasi chaca huaquin finacoinniquin.

*Juanpan Jesús unu muran iquimani*

*Mt 3.13-17; Mr 1.9-11*

<sup>21-22</sup> Juan cunu muran iquiataima yorafo unu muran iquimapacuni nantianri Juanpan Jesusrifi unu muran iquimani. Asca huatan cainmainifoannaino Jesús Apa Dios cufini. Ascaino nai murannoashu ruhui cuscara Diospan Yoshin Shara nai ariashu aqui fotopacucahuani. Fotoaino nai murannoa oi nicani yoiquin isca huaiton, —Min uhuun Facucun fasi un mihiu noicoin. Un miqui unimacoinran, —ishon Apa Diosin yoini.

*Jesucristo ahuun shunifo*

*Mt 1.1-17*

<sup>23</sup> Jesús treinta fariatian tau huaquin yorafo yosini. Ascano yorafoan shinancaquin Jesús José ahuun facuran, huafiainfonocai ahuun facucoin inima.

José ahuun apa Elí ini.

<sup>24</sup> Elí ahuun apa Matat.

Matat ahuun apa Leví.

Leví ahuun apa Melqui.

Melqui ahuun apa Jana.

Jana ahuun José.

<sup>25</sup> José ahuun apa Matat.

Matat ahuun apa Amós.

Amós ahuun apa Nahúm.

Nahúm ahuun apa Esli.

Esli ahuun apa Nagai.

<sup>26</sup> Nagai ahuun apa Maat.

Maat ahuun apa Matatías.

Matatías ahuun apa Semei.

Semei ahuun apa Josec.

Josec ahuun apa Judá.

<sup>27</sup> Judá ahuun apa Joanán.

Joanán ahuun apa Resa.

Resa ahuun apa Zorobabel.

Zorobabel ahuun apa Salatiel.

Salatiel ahuun apa Neri.

<sup>28</sup> Neri ahuun apa Melqui.

Melqui ahuun apa Adi.

Adi ahuun apa Cosam.

Cosam ahuun apa Elmadam.

Elmadam ahuun apa Er.

<sup>29</sup> Er ahuun apa Josué.

Josué ahuun apa Eliezer.

Eliezer ahuun apa Jorim.

Jorim ahuun apa Matat.

<sup>30</sup> Matat ahuun apa Leví.

Leví ahuun apa Simeón.  
 Simeón ahuun apa Judá.  
 Judá ahuun apa José.  
 José ahuun apa Jonam.  
 Jonam ahuun apa Eliaquim.  
<sup>31</sup> Eliaquim ahuun apa Melea.  
 Melea ahuun apa Mena.  
 Mena ahuun apa Matata.  
 Matata ahuun apa Natán.  
<sup>32</sup> Natán ahuun apa David.  
 David ahuun apa Isaí.  
 Isaí ahuun apa Obed.  
 Obed ahuun apa Booz.  
 Booz ahuun apa Sala.  
 Sala ahuun apa Naasón.  
<sup>33</sup> Naasón ahuun apa Aminadab.  
 Aminadab ahuun apa Admin.  
 Admin ahuun apa Arni.  
 Arni ahuun apa Esrom.  
 Esrom ahuun apa Fares.  
 Fares ahuun apa Judá.  
<sup>34</sup> Judá ahuun apa Jacob.  
 Jacob ahuun apa Isaac.  
 Isaac ahuun apa Abraham.  
 Abraham ahuun apa Taré.  
 Taré ahuun apa Nacor.  
<sup>35</sup> Nacor ahuun apa Serug.  
 Serug ahuun apa Ragau.  
 Ragau ahuun apa Peleg.  
 Peleg ahuun apa Heber.  
 Heber ahuun apa Sala.  
<sup>36</sup> Sala ahuun apa Cainán.  
 Cainán ahuun apa Arfaxad.  
 Arfaxad ahuun apa Sem.  
 Sem ahuun apa Noé.  
 Noé ahuun apa Lamec.  
<sup>37</sup> Lamec ahuun apa Matusalén.  
 Matusalén ahuun apa Enoc.  
 Enoc ahuun apa Jared.  
 Jared ahuun apa Mahalaleel.  
 Mahalaleel ahuun apa Cainán.  
<sup>38</sup> Cainán ahuun apa Enós.  
 Enós ahuun apa Set.  
 Set ahuun apa Adan.  
 Nan Adán ahuun apa Dios. Nan Adán Diosin onihuani.

<sup>1</sup> Ascano Jesús unu Jordán anoashu nasoni. Ascashon Diosin Yoshin Sharapan iquinaino tsoanshta icamano cani. <sup>2</sup> Nannoashu cuarenta oshatan nannoshon Satanás nan yoshin chacapan chaca huamapaipaoni. Ascano nantianri ahuashta pia inima. Ascashu fasi fonicoinni.

<sup>3</sup> Ascaiton Satanás yoini, —Min Diospan Facumainquin na toquirifo misi onihuahuu, —huaiton.

<sup>4</sup> Jesús cumaque, —Uhuun Upa Diosin tsainhuunoa cununi isca huaquin, “Noncái misi fustihuunoashu ipatiroma. Diosin nocó yoiai cuscan nan fusti non fasi yopacoinran,” —ishon yoiaiton.

<sup>5</sup> Satanás Jesús nai sumunmun iyoshon arishon manifoti ismariscatani. <sup>6-7</sup> —Oinpon. Ua ifoafain mian yonoshonaitofin nan min oiainfo un mia inantiroquin. Ascashu nantifi manifoti sharashtacoinfoan aton niaifo min itiro. Nantifi na maifotifi uhuuna. Ascacufin un tsoara inanpaiquin un inantiroquin ahuuna inon, —ishon yoiaiton.

<sup>8</sup> Jesús cumani, —Ascafia Diosin tsainhuunoa cununi isca huaquin, “Matón Ifo Dios fustifin man ratocoñun mai chachishotiroquin. Nan fustimain nocó ifocun. Ascashon non yoitirori ‘Min uhuun Ifocun. Un mia fasi noicoinran,’ ishon non yoitiroran,” —huaiton.

<sup>9</sup> Jerusalén ano Jesús iyoni. Nannoshon Dios fu tsainti pushu pumancaya cuyacoin iyoshon yoiquin isca huani, —Minmain Diospan facuquin nuriashu pacucaintahuun. Diosin tsain mihuunoa cunushoni cuscan aquin.

<sup>10</sup> “Nantofin ahuun oinmatifo afu nai muran icafo yonoaino mia cushuiquin min ahuuscanonma. <sup>11</sup> Min pacuaiton mia achicani. Min toquirifoqui pacui rutunonma. Ahuuscatama,”  
nannorifi Diospan tsain cununiquin, —ishon Satanás yoiaiton.

<sup>12</sup> Afanan Jesús cumani, —Ascafia Diospan tsain cununiri isca huaquin, “Ahura musunicoinquin shinanyamahuu uatsi Diosin cushuiquin,” cununiran, —ishon Jesús yoini.

<sup>13</sup> Jesús chaca huamapairiashu caaquin Satanás shinanni, —Un chipo afanan Jesús chaca huamayoshquiran, —ishon shinanni.

### *Jesús Galilea anoshon ato tapimaquin tau huani*

*Mt 4.12-17; Mr 1.14-15*

<sup>14</sup> Ascatañan Jesús Galilea ano nasoni. Diosin Yoshin Sharapan a iquinaino ahuunoa nicanifo. Galilea ano icafoan nicaifoanno a chaima icafoanri nicanifo. <sup>15</sup> Israelifoan aton ichananti pushufo muranshon ato yosifoanfainaiton oincani fasi aquí unimacoinifo, Ascashon, —Na nocofunun sharacoinran, —ishon yoinifo.

### *Jesús afanan Nazaret ano cani*

*Mt 13.53-58; Mr 6.1-6*

<sup>16</sup> Ascacaini cai nan pushconi Nazaret ano cani. Nannoashu Israelifoan aton tunutitian nan imisi cuscan ato ichananti pushu muran iquishon ninacahuán Diosin tsain Jesús ato yoini. <sup>17</sup> Nan Isaías Diosin tsain yoimisiton cununi cuscan Jesús inainfoan fupoacufoan nan yoipaiyaino fuchitan ato yoiqui isca huani.

<sup>18</sup> “Diospan Yoshin Shara ufu ishon ua catoan. Ascashon ua nichian un ahuuomafo tsain shara yoifain nan cunu muran iqui cafiscaafó un ato caimanon. Ascashon fushofori un caya huai oinsharanonfo. Omitsiscaifori un numai afanan omitsiscatama isharanonfo. <sup>19</sup> A mia nicasharaifo ato yoihúu isca huaquin, Natian Upa Diosin unimayanan mato shara huafain mato numashquiran,”

ua huaran ishon Isaías cununi cuscan Jesús ato yoini.

<sup>20</sup> Ascashon ato Diosin tsain yoiqui anaititan ahuun libro fupoacufoan nocofunu futsa inantan tsaopacuhuani. Ascaiton nantifiton oinquin futsanifo.

<sup>21</sup> Ascaiton ato yoiqui isca huani, —Na rama un mato yoiai cuscan uhuunoa Isaías cununi cuscacoin natian man aaran —ishon Jesús ato yoini.

<sup>22</sup> Ascaiton nicacani mustairicatan yoinifo, —Ahuun tsain fasi sharacoin. ¿Nocofunu sharacoinflashon ahuuscashon iscara tsain shara noco yoimun ahuamaflashon? Naanmun José ahuun facu, —ishon yoinifo.

<sup>23</sup> Ascaifoan Jesús ato yoini, —Noco shunifoan yoini cuscan marifi raca man ua yoiqui isca huapai, “Min caya huamitsamisimainqui min futsafo caya huaa cuscan mifiri caya huamuhuu,” ishon raca man ua yoipai. Ascashon man raca ua yoipai isca huaquin, “Man non nica min Capernaum anoshon tsoan atiroma cuscan min ato huashoan. Ascan nuno min pushconi anoshori noco nanscarifi huashohuun,” ishon raca man ua yoipaiqui. <sup>24</sup> Ascacun un mato icon yoi. Diosin tsain yoimisiton cainni anoshon tsoancai nicapaima. <sup>25</sup> Un mato cayacafi yoi. Nocon shuni Elías niyopaonitian nocon mai Israeli ano ainfon funu amaqui naa funuomafo ichapa ini. Nantianri fari rafu non fusti nushmancayan oi funima. Ascano tushu yamacoin ipaoni. <sup>26</sup> Ascafia Upa Diosicai noco shuni Elías nocon caifo funuomafo ano nichinima. Ascatamarocon Sarepta mai anoa funuomaqui nichini pimanon. Nan pushurasi Sidón chaimashta. <sup>27</sup> Nan Israel anori yora ichapa isinincani cooyo cuscara tocoi futsuafiafocai nocon shuni Diosin tsain yoimisi Eliseocai nocon caifo caya huatama. Nan Siria mai anoa fusticoin caya huani. Nancai Israeli inimaran, —ishon Jesús ato yoini. <sup>28</sup> Ascano ato caifo caya huatama caifo futsa fusti caya huani nicacani fasi Jesusqui sinacoincaquin. <sup>29</sup> Achicashon Nazaret pasoato iyonifo. Nanno mahua cuyacoin anoshon potapaicaquin. <sup>30</sup> Ascafia potapafiaquicai tsoan anima. Jesusrocon ato rahuin yocofaini atomaquinoashu cafiaitocai tsoan puusanima.

*Nannori nocofunu yoshin chaca ahuun nua icai ini*

*Mr 1.21-28*

<sup>31</sup> Ascashu Jesús Capernaum mai ano cani. Nan Capernaum Galilea muran ini. Nannoshon Israelifo tunutitian ato yoini. <sup>32</sup> Ascaiton nicacani, —Nicacapon. Ahuun tsain sharacoin. ¿Ahuuscashucon iscara tsain noco yoimun? Ahuun tsain niaifoan tsain cuscararan, —ishon yoinifo.

<sup>33</sup> Ascaino Judiofoan ichananti pushu muranshon nocofunu yoshin chacanun ahuun nuushon fisimani. <sup>34</sup> Asca huatan nan yoshin chacanun Jesús yoini, —Minfin Jesús Nazaret anoaquin. ¿Min noco fucash huai oamun? Noncai mi futan ahua huatiroma. ¿Omitsiscapanacafo muranri min noco potai oamun? Unfin mia onanquin. ¡Ohua! Noncai mia ahuusca huatiroma. Miamain Diosin catoancun, —ishon yoshin chacanun yoini.

<sup>35</sup> Ascaiton, —Tsainyamahuu. Nocofunumaquinoashu catahuun, —ishon yoshin chaca Jesús curushcain nichini. Asca huaiton nan yoshin chacapan nocofunu mipuafain potafaini amaquinoashu yoshin chaca cafeteriai ahuusca huanima.

<sup>36</sup> Ascaiton oincani mustairicatan afi ranan yoinancaquin yoinifo, —Jesús fasi ahua-mamishti huatiro. Iscaracai ahuashta non oinyomisima. ¿Ahuuscashomun ahuun tsainmansi curushcain yoshin chacafo atomaquinoa potaquin? —icashu yoinannifo.

<sup>37</sup> Ascatan nan Jesús aca cuscahuunoa yorafo yoifoanfafainifo.

*Simón Pedronun ahuun raisi yoshafo Jesús caya huani*

*Mt 8.14-15; Mr 1.29-31*

<sup>38</sup> Ascacaini Israelifoan ichananti pushu murannoashu cai Pedro pushu muran noconi. Nanno Pedro ahuun raisi yoshafo fasi yonai omitsiscacoinnaiton Jesús yoishonifo, —Na isinincai cayahuapun, —huaifoanno. <sup>39</sup> Amanaon ota catipacucahuan yoini, —Ahuun yona matsiriscahuun, —huaino samamashtacoin a yonai matsiriscatani. Ascano funinacahuan nan isinincama ointsa sharacain ato pimashquin pichacufaini.

*Isinincaifo ichapa Jesús ato caya huamapacuni  
Mt 8.16-17; Mr 1.32-34*

<sup>40</sup> Ascano man fari caino isinincai futsa futsatapafo yorafoan aqui ihuunifo ato cayahuemapacunon. Ascacun ahuun mucuman ato ramanpacuaino cayai futsunifo. <sup>41</sup> Atirifi yoshin chacafo atohuun nuufafaina Jesús atomaquinoa potaino fiisifainfainquin yoinifo, —Minfin Diospan Facuquin, —ishon yoshin chacafoan Jesús yoinifo. Ascaiton Jesús curushcain atoasca huani, —Tsainyamacahuun. Uarifi anuya-macahuun, —ato huaino manmain tapiafoanfin a Diosin catonicun.

*Ichananti pushu muranshon Jesús ato yoini  
Mr 1.35-39*

<sup>42</sup> Ascashu shafacuaino Jesús Apa Dios cuficai tsoan istaipama ano cani. Ascacun yorafoan funaquin fuchicashon yoinifo, —Nocomaquinoashu afanan cayamapun. Nuno no fu ipun, —huaifoan. <sup>43</sup> Jesús ato cumani, —Un nan pushurasi futsafo muranri uhuun Upa Diosin tsain shara un ato yoifoanfafainon ua nichini. Ahuu cuscaramain uhuun Upa Diosin niaifoan ahuun yorafo iquinai cuscaraqui. Un nanscanon ua nichini un ato tapimanon, —huani. <sup>44</sup> Ascashon Judea maitio Israelifoan ichananti pushu muranshon ato Diosin tsain yoiriani.

## 5

*Jesushuunshon tsoan atiroma cuscan shiman finifo  
Mt 4.18-22; Mr 1.16-20*

<sup>1</sup> Shafa futsaino Jesús ianmanhuan Genesaret cusumun ini. Ascaino yorahuanrasi aqui funifo. Diospan tsain nicai fucani. <sup>2</sup> Nan chaimanoa shasho rafu rutica Jesús fuchini. Ifofoan aton nushuti choaifono. <sup>3</sup> Ascatacun nan futsa muran Jesús nanuinacahuani. Nan shasho Simonna ini. Ascashon nan yoini, —Ua onanshta shasho putsiquishohuun. Un anoshon ato yosinon, —ishon yoini. Ascatacun shasho cusha camaqui tsaoinecahuani ato yosini. <sup>4</sup> Ato yoiquin anaititan Jesús Simón yoini, —Simón, noa ano focashon mato nushuti potacahuun shimanfo fiishcaquin, —huani.

<sup>5</sup> Ascaiton Simón cumani, —Tapimamisiton, non nushushifiaquicai shiman fustishta non fiishiama. Non fasi yonoshina. Ascafia min noco yoiai cuscan natian non huaicai, —ishon Simón yoini.

<sup>6</sup> Ascashon aton nushutinhuan pochinifo. Pochishon muafu shimanfoan nushutinhuan fospicoinsiton fashnuqui rashquini. <sup>7</sup> Ascaiton a shasho futsa murannoafu atirifo cunaquin ato mushananni ato futan inamashcaquin. Ascaino furiscatan ato muran nanuinfoan rananfaitan shasho muran nanunifo. Ascashon shimanrasi shashohuan rafu fospicoinni shashohuan rafu shimanfoya iqui cuani.

<sup>8-10</sup> Nan Simón Pedro futan nushumisi rafu Santiago yafi Juan Zebedeo facu rafu inifo. Nan rafu non fustifain nushumisicoinfo. Ascaiton ato futan nushumisi futsafoanri shasho rafu fospicoian oincani mustairicatan yoinifo. —¡Oincapon! ¿Ahuuscashomun shiman ichaparasi fiafoquin? —icashu atoqui yoinannifo. Ascaiton oin Pedronun shasho naquishon Jesús ratoconun mai chachishon yoini, —¡Ohua! Ifon ufin nocofunu chacaquin. Asca minfin sharacoinquin. Chaca yafi sharacai ositiroma. Ascacun umaquinoashu catapun, —Pedronun huaiton. Jesús cumaquin, —Ratuyamahuu. Min shafatifi nushumisiflashon natian min uhuun Yoshin Sharahuunshon uqui yorafo ihuushqui ua icoinsra huanonfo, —ishon Jesús Pedro yoini.

<sup>11</sup> Nicacatan aton shasho rafu cusumun corafainnifo. Ascashon nantifi aton ahuarafoya ato yorafori potafaini Jesús fu fonifo.

*Nocofunu yoratisho rashquishi futsua Jesús caya huani  
Mt 8.1-4; Mr 1.40-45*

<sup>12</sup> Shafa futsaino Jesús pushurasi ano ini. Nannoshon nocofunu ahuun yoratishon ranimamishti rashquishi futsuaton cahuanquin Jesús fuchitan fuopacucahuan yoini, —Ifon, ua caya huapaiquifin mian caya huatiroquin, —huaiton.

<sup>13</sup> Jesús aqui mupishon yoini, —Icon un mia caya huapai. Asca natianfin min cayaicain, —huaino. A rashquishi futsua cayariscatani. <sup>14</sup> Cayacun Jesús yoini isca huaquin, —Un mia cayahua cuscan tsoa yoiyamahuu. Noco caifo ahuunshon Dios cufimisi ismatahuun. Ascashon Moisés noco yononi cuscan chashoanun facu a inantahuun mia rutushonon. Min chaca soafain min caya cuscan ato ismashquin. Ascano tapitirofo Moisés noco yononi cuscan min aiton, —ishon Jesús yoini.

<sup>15</sup> Asca huafiaino ahuunoa nantifi yoifoanfaini. Ascaiton nicacanashu Jesusqui funifo ato caya huemapacunon. <sup>16</sup> Ascacaini cashon tsoan icamanoshon Apa Dios cufin capaoni.

*Nocofunu afi cayamacai ahuari afi huatiroma Jesús caya huani*  
*Mt 9.1-8; Mr 2.1-12*

<sup>17</sup> Shafa futsaino Jesús ato yosini Fariseofo yafi Moisés yononi cuscan tapimamisifori nanno tsaoacunifo. Ascaino pushurasiti Galilea anoafó yafi Judea mai anoafó non Jerusalén anoashuri aqui funifo. Diosin curushhuunshon Jesús isinincaifo nannoshon ato caya huapacuni. <sup>18-19</sup> Ascaino nocofunu afi raqui cayamacai afiri ahua huatiroma ahuun yorafoan Jesús shinanmaqui shuhua naratashon iquimapafiafo yorahuanrasi fospicoian ini. Ascano foman caya ina cashon tapa tsucashon Jesús nia naman yora huanrasi nastui shuhua ya ratapacufoannifo. <sup>20</sup> Ascaiton Jesús oian ahuun yorafoan fasi icoinra huaifoan oinquin Jesús a isinincái yoiquin isca huani, —Uhuun yorashtan, natian mun mia chaca soashona, —huaiton.

<sup>21</sup> Nicacani Fariseofo yafi Moisés yononi cuscan tapimamisifoan yoinifo, —¡Aja! ¿Na nocofunumun tsoaquin? Fasi Dios chaca huai. Natocai chaca soatiroma. Diosin fustitofin chaca soatiroquin. Ascan naton noco parapai. “Un Diosiran” noco huemapai, —ishon aton nomuranshon shinanchacanifo.

<sup>22</sup> Ascaifoan onanshon Jesús ato yoiquin isca huani, —¿Ahuuscaquimun mato nomuranshon man amaquiri shinanchacaiquin? <sup>23-24</sup> Unfin Cristoquin yorafoan aton chaca un soashotiro. ¿Ascan ahuuscacaimun un huaicai? Un chaca soashoyamaraquimun un caya huaiquin. Ascacun un mato ismai Upa Diosin ua catoan. Ahuunshofin un chaca soafain yorafo un caya huacointiroquin, —ishon ato yoini. Ascatan a nocofunu afi raqui cayamacai afiri ahua huatiroma yoini, —Min pushu ano min shuhua ya funicaitahuun, —ishon Jesús yoiaino.

<sup>25</sup> Funinaca huantan ahuun shuhua papifaiquin yoifoni, —¡Aicho! Min ua caya huaa sharaquin. Fasi Dios sharacoin, —huani. <sup>26</sup> Ascaiton oincani nantifi mustairicatan yoiquin isca huanifo, —Dios tsoa cuscarama. Fasi sharacoin. Non oinyomisima cuscara non oianran, —ishon yoinifo.

*Jesús Leví cunani*  
*Mt 9.9-13; Mr 2.13-17*

<sup>27</sup> Nanscacaini caaquin Jesús oian Roma anoa niaifo pui fishomisi tsaoa ini. Nan nocofunun ahuun anu Leví. Ascaiton Jesús yoini, —U fu cahuun, —huaino. <sup>28</sup> Funina cahuatan nantifi potafaini afu cani. <sup>29</sup> Ascashu afu cai ahuun pushu ano nocoquin Leví Jesús yoini, —Nuno uhuun pushu muran iqui ohuu. Uhuun yorafo yoimanashu un ato futan mia fuuishonon, —huani. Ascaino yorahuanrasi aqui funifo. Roma anoa niaifo pui fishomisifo yafi futsaforifi aqui funifo ato futan pishcaquin. <sup>30</sup> Ascaifoan Fariseofo futan Moisés yononi cuscan tapimamisifoan Jesús fu rafumisifo yoini, —¿Ahuuscaín man pui fimmisifo yafi yora chacafo futan man piiyain? —ato huanifo. <sup>31</sup> Ascaifoan nicaquin Jesús ato cumani, —A isinincáifomacai caya huamitsamisi yopacanima. Asca

nan isinincaifofin fasi caya huamamitsamisi yopacaniquin. <sup>32</sup> Nanscarifi aquin, “Uncai ahua chaca huamisimaran,” icaifocai un ato chaca soashotiroma. Asca tsoan yoiqui isca huai, “Unfin fasi chaca huamisiquin. Un Numamisi yopacoinran,” icaifofin un ato chaca soashotiroquin, —ishon Jesús ato huani.

*Piqui tunuahuunoa*

*Mt 9.14-17; Mr 2.18-22*

<sup>33</sup> Ascaiton futsan Jesús yocani, —¿Ahuuscai mifu rafuafoan piqui tunumisimamun? Juan fu rafumisifoan piqui tunufain Dios cufimisifo. Nanscarifi Fariseofo yafi afu fomisifoan huamisifo. Ascan manfin pifain ayafain huamisiquin, —huaifoan.

<sup>34</sup> Ato cumani, —Nocofunu fu ainfo fianainnoricai unimai fusicaquin tsoan piqui tunutiroma. Nanno funu anocai ato chani huaifoan piqui tunutirofoma unimamain acaquin. <sup>35</sup> Ascafaino funu amaqui rutuafono shinancaquin piqui tunutiroforan, —ishon Jesús ato yoini.

<sup>36</sup> Ascashon afanan Jesús ato yoquin isca huani, —Tsoancai sahuuti shuni fashnucun poto funapan icushtiroma. Asca huashon poto funapan icushuano ustui futsuashu chancanai finatiro. Aquirifi sahuuti shuni anaitiriscatiro. Afanancai funa cuscara itiroma. Nanscarifiai un mato yosiae cuscan nicacoinshocai man apaoni cuscan afanan man huatiroma. Tsoan ua tanacoinsion ipaoni cuscan cachiquiri huacointiro. Ascashu funa cuscara shara iishquin. <sup>37</sup> Ascashon tsoancai fichi tutso shuni muran vino funa nanutiroma. Fichi tutso toshacainaino vino funa cuyofoi chacanai futsutiro. Nanscarifiai maton shunifoan mato yosimisi cuscan yafi un mato yoiai cuscacai nan rafu ositiroma. Un mato yosiain cuscacoin nannori Diospan tsain shara. Ascafia mato shunifoan mato yosimisifo cuscacai anorima. Nan tanashucai man isharatiroma. Nan rafu osishon nicapaiquicai man shinansharatiroma. <sup>38</sup> Ascacun vino funa fichi tutso funa muranri nanua sharacoin itiro. Nanscarifiai ratoranfoan ipaonifo cuscan unucatan un ato yosiain nan fusti tanashu isharacointirofo. <sup>39</sup> Tsoan puti pau ayatiashocai afanan fata ayapaitiroma. Nanscarifi aquin yorafoan yoiqui isca huatirofo, “Un ipaoni cuscan un afanan apai. Uhuun shunifoan ua yosia cuscan shara. Nan fusti un tanapai. Ascacun tsain futsan un yopaimaran,” —ishon shinantirofo.

## 6

*Jesús fu rafumisifoan trigo mutusnifo*

*Mt 12.1-8; Mr 2.23-28*

<sup>1</sup> Ascatac Israelifoan tunutitian Jesús yafi afu rafuafo mau mapai focaquin trigo mutuscashon rashaquiri ashon piyaifoan. <sup>2</sup> Oinquin Fariseofoan ato yoinifo —¿Ahuuscai Moisés noco yononi cuscan tunutitian trigo man mutusimun? —ato huaifoan.

<sup>3</sup> Nicaquin Jesús ato cumaquin isca huani, —¿Davidhuunoa cununi cuscan man man oinmisimun? ¿Fonainquin nocon shuni David ahuun yorafo futan ani cuscan man man nicamisimun? <sup>4</sup> Dios fu tsainti pushu iquicaishon a muranno misifo ato piquini fasi fonicoinquen. Ano tushu futsa yamaino. A misifofin nan Diosin tsain yoimisifo naasi iniquin. Tsoa futsacai a misi pitiro inima. Nannori yoifianifo fasi fonicoinquen David pini. Ascashon afu rafuafori pimani. <sup>5</sup> Ascan uafin uhuun Upa Diosin catonniquin. Ascacun urusu fusti un yoitiro ahuamain tunutitian man huatiroquin, —ishon Jesús ato yoini.

*Nocofunun muci musufimua*

*Mt 12.9-14; Mr 3.1-6*

<sup>6</sup> Ascatac tunuti futsaino Jesús Israelifoan aton ichananti pushu muran iquini. Nanno iquishon ato yosiaino nantianri nocofunun ahuun muci mumiori musufimuaton arifi nicani. <sup>7</sup> Ascaino Fariseofo futan Moisés cunu tapimamisifoanri nannoshon oincaquin

shinannifo,—Non tapinon Jesusmain tunutitian nocofunu caya huai iyamarai Moisés noco yononi cuscacoinmain aiquin,—ishon Jesushuunoa shinannifo. Ato niaifofoqui chanipaicaquin. <sup>8</sup> Ascashon a shinainfo cuscan onanshon Jesús a nocofunun musufimua yoini,—Funinaca huahuun. Mia oinonfo,—ishon yoiaino nan yoiai cuscacoin ani.

<sup>9</sup> Ascaiton Jesús ato yoini,—Un mato yocain. ¿Moisés yononi cuscan tunutitian non shara huatiro iyamarai non chaca huatiromun? ¿Ascayamarai non futsafo nimatiro iyamarai non namatiromun?—ishon ato yoini.

<sup>10</sup> Ascashon ato oiancutan a nocofunu musufimua yoini,—Mushahuun,—huaino. Nan yoia cuscan huatanaiton oianfo ahuun mucu muma sharacoin ini. <sup>11</sup> Ascaiton oincani Fariseofo yafi Moisés cunu tapimamisifo fasi aquí sinacoincaquin yoinifo —¿Nonmun ahuuscashon Jesús shatumatiroquin afanan isca huanonma?—icashu ahuun yoinannifo.

### *Jesús doce nocofunufo catonni afu rafunonfo*

*Mt 10.1-4; Mr 3.13-19*

<sup>12</sup> Shafa futsaino Jesús machi ano mapuni Apa Dios cufishquin. Ascano nannoshon yamutishon apa cufishini. <sup>13</sup> Ascashu iyoconaino a tanamisifo yoini,—Uqui fucahuun,—ato huaino aqui fuaoan doce ato catonni afu rafunonfo. <sup>14</sup> Nan docefain ato anufo. Futsa Simonfiacun Jesús ahuun anu tuquihuashoqui, Pedroran, huani. Nanton chipocu Andrés. Futsafoan ato anu Santiago non Juan non Felipe non Bartolomé non <sup>15</sup> Mateo non Tomás non Santiago Alfeopan facu Simón futsari nanton ahuun caifo futsafo futan Romanonfo potapai afanan Israelifo yonononfoma. <sup>16</sup> Futsan ahuun anuri Judas, Santiago ahuun facu. Futsarifi Judas Iscariote nanton Jesús potashon ato achimani. Nanfosi Jesús ato catonni.

### *Jesús yora ichapaforasi tapimani*

*Mt 4.23-25*

<sup>17</sup> Machi tununman fotoaino aquí yorahuanrasi funifo. Ascaino a tanamisifo yafi Judea anoafó atirifi fuaino Jerusalén anoafori fuaino ianmanhuan cusumunnoa Sidón yafi Tiro pushurasi anoafori funifo. <sup>18</sup> Ahuun tsain nicashcaquin fuaoan atirifi a isinincaifo ato cayahuafain a yoshin chacapan ato fucash huaifori Jesús atomaquinoa potapacuni. <sup>19</sup> Ascashon nan isinincaifo futan nan yoshin chaca atohuun nuafoan shinannifo,—Non ahuunoashu cayanonmun Jesús noco ramanmapainon,—ishon shinannifo. Nanfoan tapinifo Diosin ahuun curushhuunshon Jesús ato caya huapacua.

### *Tsoa unimatirofo yafi unimatirofoma Jesús ato yosini*

*Mt 5.1-12*

<sup>20</sup> Ascataín Jesús afu rafumisifo oinquín ato yoini isca huaquin,—Man ahuuomafiashu chipo Dios niaifo icari matonari iishquin.

Ascacun ahuuomafiashu unimacahuun.

<sup>21</sup> Man natian Dios fu rafupaicain ahuun tsainri man tapipaiquin finai a cuscara shara iishcaquin.

Man ascafia Diosin chipo mato imasharai a cuscacoin man inon.

Natianri man uaifiashu chipo man shuchitiro.

Ascacun unimacahuun.

<sup>22-23</sup> Futsafoan uhuunshon mato noicasmaquin mato potafain mato roafain matohunoa tsain chaca yoicani.

Nanscarifi nan Diosin tsain yoimisifo mato shunifo omitsisca huapaonifo.

Ascan matori omitsisca huafiaifoanno chipo man Upa Diosqui nocoaitian fasi sharacoin mato inanshquin man afu ipanon.

Ascacun unimacoincahuun,—huani.

<sup>24</sup> Ascacun futsafo Jesús yoiqui isca huani,

—¡Ohua! Manfin natian mafo ichapayashu unimaicain.

Ascafia naashu man chipo omitsiscapanaca. Mancai afanan unimanacama.

<sup>25</sup> ¡Ohua! Natian man shinanquin isca huaa, “Un ahuara yopaima. Un ica cuscan shara. Uncai ahua futsa shinanpaimaran,” ishon man shinan.

Ascafia ohua. Man chipo mato nomuran shinansharapaifiashu man omitsiscapanaca.

Man fasi numamisi yopapacunaca. Natian man shuchisharai. Dios shinantama. Ascafiashu chipo uaiqui man omitsiscapanaca.

<sup>26</sup> Nantifi yorafoan mato yoiqui isca huacani, “Na nocofunu fasi ishara. Ahuacai yopaimaran,” ishon matohuunoa yoiafo. Ascafia ¡Ohua! Nanscarifi aquin Diosin tsain yoifiaquin afi shinainfo cuscan yoimisifo. Nanfo mato shunifoan nannori atohuunoa yoipaonifo. Ascan manfin atofu omitsiscapanacaquin,—ishon Jesús ato yoini.

### *Mato noicasmaifaifoan atohuun noicahuun*

*Mt 5.38-48; 7.12*

<sup>27</sup> —Ascan nan man ua nicaifo un mato yoi. Mato noicasmaifo atohuun noico-ncahuun. Tsoan mato noicasmai ato shara huacahuun. <sup>28</sup> Tsoan mato chaca huai copitama rau huafain ato yoisharacahuun. Tsoan mato roafiacun ato Dios cufishocahuun. <sup>29</sup> Tsoan mato tapasiai ato copitamarocon nanno nishohuun mato ocuma futsari afiaiton tunucahuun. Futsan mato niaifo ano iyocun mato sahuuti mato fiainton mato sahuuti custopari inancahuun. <sup>30</sup> Tsoanran mato ahuara yocaiton ayashon ato inancahuun. Futsan mato ahuara fiano shinanchacayamacahuun matori nasoyamafaino. <sup>31</sup> Man futsafo shara huemapaiyai cuscan marifi futsaforifi shara huashocahuun.

<sup>32</sup> A matohuun noiaifosi copiquirifi man atohuun noiainocai acai ahuama. Yora chacafori nanscarifiaifoanno. Man ascainocai Diosin mato yoima, “Man shara huaran,” ishon. <sup>33</sup> A mato shara huaifosi copiquirifi man ato shara huaino acai ahuama. Yora chacafori nanscarifiaifoanno. Man ascainocai Diosin mato yoima, “Man shara huaran,” ishon. <sup>34</sup> Ascashon man yora ahuara inanyopaiquin shinanqui isca huai. “Un inanyocun ua nasotiro. Ascan nanscara yorafo fusti un inanyotiroran,” ishon man shinain. Aacai ahuama. Yora chacafoanri nannorifi shinantirofo cuscan. Marifi man anori shinainnocai Diosin mato yoima, “Man shara huaran,” ishon.

<sup>35</sup> Ascacun un mato yoi. Mato noicasmaifo atohuun noicaquin ato shara huacahuun. “Ato ahuara inanyoshon ua nasoimaran,” ishon shinanchacayamacahuun. Mato nasoyamafia, “Nanscanonran,” ishon yoicahuun. Man ascacoinnashu Upa Dios ari man nocoaiton matoqui unimaqui ahuara fasi sharacoin mato inanshquin. Diosi nai muran isharacointsia. Diosin nantifi yorafo shara huaa. Tsoan “¡Aicho! Upa Diosin,” huayamafiaifoan nanfihuunri fasi noi. Yora chacafohuuri noi. Marifi nanscarifi aquin man futsafo ismatiro man Diospan facufo. <sup>36</sup> Maton Upa Diosin nantifihuun ramapaia cuscan marifi nanscarifi acahuun.

### *Futsafihuunoa shinanchacayamacahuun*

*Mt 7.1-5*

<sup>37</sup> Futsafihuunoa shinanchacaqui futsafori yoiyamacahuun. Man futsafihuunoa yoisharayamaino Diosiricai matohuunoa yoisharashquima. Ascashon yoiquin isca huayamacahuun, “Nanton chaca huaa. Ascacun Diosin iconquin onaintimairan,” ishon yoiyamacahuun. Nan onaintimapainonran, ishon man futsahuunoa shinanyamaino Diosiricai mato onaintimaima. Man futsafo rau huacuri Diosirifi mato rau huashquin.

<sup>38</sup> Ascacun yorafo shara huacahuun. Man yorafo shara huacun Diosin matorifi shara huai. Ascacun futsafo inansharaqui finacoincahuun. Matsiquimacoinquin. Maniriqui futsunon. Man futsafo asca huacun Diosin arifi mato nanscacoin huaashquin,—Jesús huani.

<sup>39</sup> Jesús ahuardo yoiai cuscarahuunshon ato yosini, —Fushocai afu fusho raqui iyotiroma. Iyopai afu shato muran pacutiro. Nanscarifi aqui futsan Diosin tsain tapishomacai mato tapimatiroma. Matofu afiri funotiro. Mato amaqiri yoitirofoquin.

<sup>40</sup> Ahuunshon tapiainfoancai tapimamisiton tapian cuscan tapiafoma. Ascafia nan ahunshon tapiainfoan chipo tapiaino nan tapimamisi cuscara itirofo.

<sup>41</sup> ¿Ascan ahuancai yora ahuara pasnanshta fuostamua man futsupaiyain marifi sapa uhuapa fuostamufiashon? Ascashon min chaca huairan futsa huafiaquin mancaifin fasi finacaiaquin. <sup>42</sup> Ascashon man yoiqui isca huai, “Uhuun yorashtan, un min furo murannoah uhuara pasnanshta un mia futsunon,” man huamisi. Ascafashocai man tapiama man sapa fuostamufafainna. Man fuparamitsapaimisi. Ascacun sapa futsucumuhuun. Asca huashon oinsharafain marifi man futsa pasnanshta futsutiro. Nanscarifi aquin futsafoan ato chaca shatumapaifiaquin marifi man chaca hua. Man fasi paran. Ascacun iquisi mato chaca shatucahuun. Ascashon marifi man futsafo chaca shatumatiro.

*Ihui ahuun fimihuunshon non onantiro*

*Mt 7.17-20; 12.34-35*

<sup>43</sup> Ihui sharafoan ahun fimeicai chaca itiroma. Ihui chacafoan ahun fimeicai shara itiroma. <sup>44</sup> Ascano ihuifoti ahun fimeihuunshon non onantiro ahuu cuscrafomainquin. Ihui moshayafohuunoacai shopa foaicun non tuscutiroma. Nanhuafaquisihunricai uva foaicun non tuscutiroma. <sup>45</sup> Nanscarifiai nocofunun sharapan ahun nomuranshon ahuara sharafosi shinain cuscan ahun tsainrifi sharacoin itiro. Nanscarifiai nocofunun chacapan ahun nomuranshon ahuara chacafosi shinain cuscan ahun tsainri chacacoin itiro. Ascashon nocon ointi muranshon non shinain cuscan nannoricoiun non yoitiro.

*Futsan pushu mutsisipa huaino futsan pushu mutsisipama huatiro*

*Mt 7.24-27*

<sup>46</sup> ¿Ahuuscai Ifo ua huafiamisishaquin un mato yoia cuscan man aimamun? <sup>47</sup> Ascacun un mato yoi ahuu cuscaramain tsoan ua nicasharashu nan un yoia cuscacoin aaiquin.

<sup>48</sup> Tsoan pushu huaquin ahun quishi nichishquin iquisi mai puuhuqui mai tuiqui nocoo. Ascashon pushu anaitiano ananmanriunu foanfiaquicai pacutiroma. Fasi pushu mutsisipacoin. Nanscarifiai nan uhuun tsain nicacoianfo nan un yoia cuscacoin acani. Ascashu ahuara ahuancafaainocai umaqui itirofoma.

<sup>49</sup> Ascan un yoiai cuscan nicafashu tsoaascaima ahuuscramain acanicain un mato yoi. Yoran pushu huaqui ahun quishi nichifiaquin mai puuhuqui tuiqui nocoo. Fuquinishtacoin huaa. Ascashon pushu anaitiano ananmanriunu fai foanquin pushu paoanquin chacana huatiro. Nanscarifiai tsoan uhuun tsain nicafiai ascashuma ahun unutani nantifi funocani. Omitsiscashcaniran, —ishon Jesús ato yoini.

## 7

*Romano ranushumua niaifoan ahuun oinmati Jesús caya huani*

*Mt 8.5-13*

<sup>1</sup> Yorafu yoquin anaititan Jesús Capernaum ano cani. <sup>2</sup> Nannoah ranushumua niaifoan ahuun oinmati nan ahuun noicoian fasi isininqui finacoin ini. <sup>3</sup> Ascacun Jesús ahuamamishti huatiro nicaquin ranushumua niaifoan shinanquin isca huani, —Unciai Israelima. Ascacun un niaifofo ato yoi ua Jesús yoishonafo oshon uhuun oinmati ua caya huashoyoi onon, —ishon shinanni. <sup>4-5</sup> Ascano ato yonoa focani Jesusqui nocoshon yoinifo isca huaquin, —Ranushumua niaifoan noco yonoa non mia yoi onon. Nan nocofunu shara. Nocon caifohuuri fasi noimisi. Nanton nocon ichananti pushu huamashona. Noco shara huashomisi. Ascacun mirifi asharashoicapun ahuun oinmati caya huashoshquin, —ishon Israeli niaifofoan yoinifo.

<sup>6-7</sup> Ascano Jesús atofu cani. Ranushumua niaifoan ahuun pushu chaimashta man fuaifoan afanan ahuun yorahuafó Jesusqui nichini yoiqui isca huanonfo,—Ifon, un mia fucash huapaima. Un cai ahuama. Min nocofunu tsoa cuscaramacoin. Uhuun pushu ari capaiyamaquin. Min tsainmansi uhuun oinmati ua caya huashohuun. <sup>8</sup> Ascan uafin uhuun niaifoan ua yonomisiquin. Urifi ranushumuafó un yonotiro. Unmain ato yonoainofin un futsa, “Catahuun,” huaino cariscatiro. Un futsa, “Ohuu,” huaino uqui oriscatiro. Uhuun oinmatiri, “Ua ashoriscahuun,” un huacun ua ashoriscahuun. Asca minfin ahuamamishti huatiroquin. Ascacun min tsainmansi yoihoo uhuun oinmati cayanon,—ishon yoini.

<sup>9</sup> Ascaiton nicaquin Jesús a mufaina yorafo yoiqui isca huani,—¡Aira! ¡Nicacapon! Tsoa futsacai naton acai cuscan ua icoindra huacoinmisima. Israeli anoafaoanricai ua isca huaqui icoindra huacoinmisifoma,—ishon Jesús ato yoini. <sup>10</sup> Ascano a ranushumua niaifoan ato nichiafo Jesús tsainqui anaitiano afanan naso furan oianfo ahuun oinmati man cayasharacoian ini.

### *Ainfomaqui ahuun funu naa ahuun facu man naafiacun Jesús funini*

<sup>11</sup> Ascano chipo shafa futsa Jesús pushurasi Naín ano caino afu rafuafó yafi yorahuan-rasi afu fonifo. <sup>12</sup> Ascashu Naín ano nocoti chaima oian pushcohuai naa mai huai focani ahua fu yora ichapa fonifo. Nan pushcohuai ahuan ahuun facu fusticoin. Nan ahuanmaqui funu naani ini. <sup>13</sup> Ascashu uaicaiton oin Jesús ahuun ramapaicoinquín yoini,—Uaiyamahuu,—huani. <sup>14</sup> Asca huatan pushcohuai ahuun ihuafó aqui racati muuainno nitunifo. Ascaiton Jesús yoini,—Pushcoshtan. Un mia yoi. Funihuu,—huaino. <sup>15</sup> Pushcohuai tsaoinacahuun tsainni. Ascaiton ahuun ahua Jesús yoini,—Naquian. Min facu afanan man nia. Iyosharatahuun,—huani.

<sup>16</sup> Ascaiton oincani yorafo fasi ratucoininfo. Ratu nishmapacuquin Dios yoisharaqui isca huanifo,—Diosin tsain yoimisi noco muran Diosin nichian. Diosin ahuun yorafo ashoin oaran,—ishon yoinifo. <sup>17</sup> Ascashon nan Jesús aca cuscan yoifoanfafainfo. Judea anoafó futan mai futsa ariafoan ahuunoa nicaquin futsanifo.

### *Nan yorafounu muran iquimamupacuni Juanpan afu rafuafó Jesusqui nichini*

*Mt 11.2-19*

<sup>18-19</sup> Juanpan tanamisifoan Jesús ahuarafó huaiton oianfo cuscan Juan yoi focani cunu muran iquinifo. Ascaiton nicaquin Juanpan a tanamisifo rafu yoini,—Nanmain Diosin catonniquin ointacahuun. Ascashon yocaquin isca huatacahuun, “Nan miamun Diosin catonni nocoqui nichishquin. Ascayamarai futsa raca non manaicai noco Numamisi inon,” ishon ua yocashotacahuun,—Juanpan ato huani.

<sup>20</sup> Ascano nan rafutan focashon Jesús yoinifo,—Nan yoraunu muran iquimamisi Juanpan noco nichian non mia yocayonon. Ascacun non mia yocai. Nan miamun Diosin catonni nocoqui nichishquin. Ascayamarai futsaraca non manaicain nocon Numamisi inon,—ishon yocanifo. <sup>21</sup> Ascaíno nantianri Jesús nan isininki omitscaifo caya huafain yoshin chacafo atohuun nuuafó atomaquinoa potafain fushoforifi oinmasharapacuni.

<sup>22</sup> Ascashon nan Juanpan ato nichian rafu Jesús yoini,—Un acaiton man oian cuscan uhuunoa man nacai cuscan Juan yoitacahuun. Ascashon fushofo un caya huaa oinsharaifo cuscan yoifain pastocoinfori un caya huaa nicasharanonfo nanrifi yoifain ato yoratisho coyo cuscara tocoi futsuafori caya huafain yora nipaiqui ranainfori un ato caya huaa yoifain man nacoinnafori un ato funimana. Ascashon yora ahuuomafori tsain shara un ato yoifafainmisi ahuuscashumain Diosin niaifo fu ipatirofoquin, ishon un ato yoimisi. <sup>23</sup> Ascan nanfo un mato yoiái cuscan Juan yoitacahuun tsoan ua icoindra huacoinshocai afanan ahuara futsa shinainma. Nan cuscara yorafofin fasi unimacointirofoquin,—ishon Jesús ato yoini.

<sup>24</sup> Ascatan man foafoanno Juanhuunoa Jesús nanno niafo yora huarasi yoini, —¿Ahuuscai istaipama ano Juan oin focani fonifomun? Juancai nan facatahua pui ninhuun focu focu acai cuscarama. Nanscarifiai man man tapia Juancai ointi rananyama.

<sup>25</sup> ¿Ascan ahuuscai Juan oinpai man fonimun? Itsairaca nan nocofunun sahuuti shara-capacoin sahuucun oincai man foni. Ma. Juanpacai sahuuti shara sahuumisima. Niaifofoanfin ato pushu muranshon sahuuti sharacapacoin sahuutirofoquin. <sup>26</sup> Nan Diosin tsain yoimisiraca oincai man foni. Ascafia nan icon Juanpan Diosin tsain yoimisifia nanton yoimisi cuscacai tsoa futsan anori yoimisima.

<sup>27</sup> Ascacun nanhuunoa Diosin tsain cununi isca huaquin, “Min nai ariashu mai ano fotoataima iquisi uhuun tsain yoimisi nichiqui tau huai mihuunoa ato yoiaino itisharashon mia nicanonfo,” ishon cununi. <sup>28</sup> Un mato icon yoi. Tsoashtacai Juan finoanma. Ascashon Juanpan tsain yoimisi cuscaricai tsoan ascara tsain yoiyomisima. Ascafia Dios niaifo icanoafoan yoisharatirofo cuscacai Juanpan nicayamafain nanfoan oianfo cuscaricai oinyomisima. Ascashon nantifi Dios icanoafoan Juan finoanfo, —ishon Jesús yoini.

<sup>29</sup> Ascashon nan Jesús nicaifo futan Roma anoa niaifo pui fishomisifo Juanpan ato unu muran iquimapacuni aton chaca shatunonfo. Ascano nanfoan Jesús yoiiton nicaquin yoinifo, —Jesús noco cayacaficoin yoi. Diosin noco yonoa cuscan nan iconran, —ishon yoinifo. <sup>30</sup> Asca huafiaifoan Fariseofo futan Moisés cununi cuscan tapimamisifoancai Diosin ato amapaiyai cuscan nicapainifoma. Ascasho nanfoanri yoinifo, —Juanpan noco yoiayai cuscacai anorima. Nocoricaid unu muran iquimatiromaran, —ishon yoinifo.

<sup>31</sup> —Ascashon afanan un mato tapimai. Natian niyoafu ahuu cuscaraoquin. <sup>32</sup> Nanfomin nan facu cashumisi cuscaraoquin. Facufo cashucaquin afu facu futsafu oi ashcafinin cunatirofo. Nanscarifiai nanfomin nanscaraoquin. Ascan nan facu cashumisifoan yoitirofo isca huaquin, “Man non shanti manufiaainocai monopacanimaran,” ishon yoifain “fanaina omitsiscati cuscara non fanaifiaainocai man uaipaimaran,” ishon nan facu cashumisifoan yoitirofo.

<sup>33-34</sup> Nanscarifi aqui nanfoanrifi Juan yafi uqui tsain chipufafainmisi. Ascafia Juanpacai piqui tunufain fimi unu pau ayamisima. Ascacun ahuunoa yoiqui isca huamisifo, “Juan nisocoin. Yoshin chaca ahuun nuaran,” ishon yoimisifo. Asca unfin piisharafain un ayasharamisiquin. Ascafia uhuunoari yoiqui isca huamisifo, “¡Cuu! Jesús pitsicoin fasi ichapari ayatiroran huafain Roma anoa niaifo puifishomisifo yafi yora chacafo furi rafuiran,” ishon uhuunoa chaca yoimisi. <sup>35</sup> Nanscarifi aquin nanfoanri yoiqui isca huamisifo, “Tsoanmain shinansharafain icaquin non onantiro. Nan yorafin ishara-coianquin shinansharamain huaifin,” ishon nanori yoimisifo. Nannori yoifiaquicai uhuunoa ascara yoipaimisifoma. Ascatamarocon uqui tsain chaca fusti huamisiforan, —ishon Jesús ato yoini.

### *Jesús Simón pushu muran iquini nan Simón Fariseo ini*

<sup>36</sup> Ascano Fariseo futsan Jesús yoini, —Tapimamisiton, uhuun pushu ano cahuun un mia pimanon, —huani. Ascaino ahuun pushu ano cashon a futan pini. <sup>37</sup> Nan pushurasi anori ainfo furomacoin ica ini. Ascashon Fariseo pushu muranshon Jesús piaiton nicai arifi nan pushu muran iqui caini. <sup>38</sup> Ininti motica tsomashu Jesús cachiori nitishoni. Nan moticanun ahuun anu alabastro a muran ahuun ininti fasi paratamacoin ahuun pui nua ini. Ascatan amanaon niashu uaiqui ahuun fuonpan Jesús tau muchana huani. Ascashon ahuun foo chainipaton otucuruaqui shara huatan ahuun tau tsoatan ininti ahuun tauqui ocani.

<sup>39</sup> Asca huaiton nan Fariseo Jesús piimaiton shinanquin isca huani, —Na nocofunu Diosin tsain yoimisicoinsion na ainfoan muai cuscan onancuana na ainfomain ahuun cuscarauquin, —ishon ahuun nomuran shinanni.

<sup>40</sup> Ascaiton onanshon Jesús Fariseo yoini, —Simón, un mia ahuara futsa yoiran, —huaiton. Simón cumani, —Tapimamisiton, ua yoihoo, —huani.

<sup>41</sup> Ascaiton Jesús yoini. —Ato pui inanyomisiton nocofunu rafu pui inancun nan rafutan ahuun rafanan nifinifo. Futsan quinientos denario nifianino futsan ichapama nifini cincuenta denario. <sup>42</sup> Ascafia nan rafutan nan nifian cuscan nasopaifiacai tsoa puiya inima. Ascacun nan ato pui inanyomisiton ato yoisharani afanan tsoan a nifinonma. Ascan nan rato futsacaimun fasi ahuun noiqui finacaiquin, —ishon Jesús yocaiton.

<sup>43</sup> Simón cumani, —Nan paratama nifiatocairaca fasi noiqui finaiquin, —ishon yocaiton.

<sup>44</sup> Afanan Jesús cumaqui isca huani, —Min cayacafi yoiaran, —huatan ifiacucahuán yoini, —Oinpon. Na ainfoan fasi ua noicoin. Min pushu muran un iquifiaitocai mian ochoama. Asca na ainfoanfin fasi uhuun noiquin ahuun fuonpan uhuun tau muchana huafain ahuun foon ua otucuruacaquin. <sup>45</sup> Nocon fuyamisi cuscaricai mian uhuun tamo tsoama. Asca na ainfoanfin min pushu muran un iquiaitian uhuun tauqui ua tsoariaiquin. <sup>46</sup> Ascan mianricai uhuun mapoqui shuni ocama. Asca na ainfoanfin uhuun tauqui ininti ocaquin.

<sup>47</sup> Ascacun un mia yoi. Na ainfoan ahuara ichapa chaca huafiamisicun natian ahuun chaca mun soashona. Ascashori mun rau huacoinna uhuun fasi noiaiton. Asca tsoan shinanquin isca huai, “Uncái ichapa chaca huamisima. Ascacun uari uhuun chaca ichapama ua rau huashotiroran,” ishon shinaintocain ua ichapa noimaran, —ishon Jesús Fariseo yoini.

<sup>48</sup> Ascashon ainfo Jesús yoini, —Natian mun mia chaca rau huashoanran, —huani.

<sup>49</sup> Ascaino Fariseo pushu murannoafó afi ranan yoinannifo, —¿Tsoamun na nocofunuquin? Fasi chaca huamisifo ato chaca soashofain ato rau huatiroran, —icashu yoinannifo.

<sup>50</sup> Ascashon Jesús afanan ainfo yoiqui isca huani, —Mian icoinra huaitofin un mia numaquin. Caasharatahuun, —ishon Jesús yoini.

## 8

### *Jesús futan ainfofoan apaoni cuscan*

<sup>1</sup> Asca huatan chipo Jesús pushurasiti ato yoifoanfafaini ahuu cuscaramain Upa Diosin niaifoan ahuun yorafo iquinai cuscaraquin. Ascaino doce afu rafuafori afu fonifo. <sup>2</sup> Ascaino ainfofori afu fonifo. Nanfo isinincái yoshin chaca atohuun nuucun Jesús ato caya huapaoni. Nan futsan ahuun anu María Magdalena. Nanhuun siete yoshin chacafo ahuun nuucun Jesús amaguinoa potani. <sup>3</sup> Futsan ahuun anu Juana nan Cuzapan ahuin ini. Nan Cuza niaifo Herodes ahuun niaifo patashari ini. Ainfon futsan ahuun anu Susana. Ascashu ainfo futsaforifi Jesús yafi afu rafuafo fu fonifo. Nan ainfofoan Jesús yafi afu rafuafo pui inannifo ahuun rafanan tushu finonfo.

### *Jesús fimi ushu saamisihuunshon ahuarao ato yosini*

*Mt 13.1-9; Mr 4.1-9*

<sup>4</sup> Pushurasifoti anoashu ahuun tsain nicapaicani yorahuanrasi aqui fuaifoan ahuarao yoiai cuscaraahuunshon ato tapimani isca huani, <sup>5</sup> —Nocofunun ahuun noshati murannoá fimi ushu fishon ahuun mau mamaqui saaca ushufo fai nushmancayan pacucun puamanaoanno puiyafaoanri piinifo. <sup>6</sup> Ushu rananri toquiri camaqui pacua mai ichapamashta anoashu foaifia fari tsasi huani unun muchana huaiyamaino nai cuyoni. <sup>7</sup> Ascaino ushu rananri tasha murannoashu foaifiashucai ushu futsa foaisharanima. <sup>8</sup> Ushu rananri mai shara ano pacuafó foaisharashu fimi ichapayacoin iniran, —ishon Jesús ato yoitan oi ashcafinin ato yoiqui isca huani, —Manmain ua

nicatiroquin ua nicafain uhuun tsainri maton nomuran nanucoincahuun,—ishon ato yoini.

*Ahuuscaquimain Jesús futsafo ahuarao futsahuunoa yoini ato yosinon  
Mt 13.10-17; Mr 4.10-12*

<sup>9</sup> —Min ato saamisihuunoa ahuara futsa tapima ato yoia cuscan noco shafacafi tapimahuu,—ishon afu rafuafoan Jesús yocaifoan. <sup>10</sup> Jesús ato cumani,—Upa Dios a icanoshon ahuun yorafo iquinai cuscan un mato fusti shafacafi tapimai. Ascan nanofin ahuarao cusrarahuunshon fustisi un ato yoiaquin. Ascashon nanfoancai un ato oinmana cuscan oinfiaquicai tapiafoma. Nicafiaquiricai tapisharafoma.

*Fimi ushu saamisihuunoa ahuara yoiflashon shafacafi afu rafuafo tapimani  
Mt 13.18-23; Mr 4.13-20*

<sup>11</sup> Un saamisihuunoa ahuara futsa un ato yoia cuscan un mato shafacafi tapimai. Nan ushufo Diospan tsain cuscara. <sup>12</sup> Nan fai curushu yorafoan aton ointi cuscara. Ascashon nanfoan Diospan tsain nicafain ato nomuran nanufiafo nan yoshin chaca Satanás atoqui oshon nan nicafo cuscan ato fiantiro icoinra huayamafain Dios fu ipanonfoma.

<sup>13</sup> Ascan nan toquiri camaqui mai ichapama cuscan nanscarifiai yorafoan Diosin tsain nicaquin tau huai unimacoinyoflashu ahuara ahuuscaraino samamashta cachiquiri huatiro. Nanfoan Diospan tsain icoinra huaqui chai huashoma ahuara chaca finonquin samamashta Dios cachiquiri huatirofo. <sup>14</sup> Ascan nan ushu futsafo moshafo muran pacuashu foai sharatiroma. Nanscarifiai futsafoan Diospan tsain nicaflashon ahuara nan acai cuscan fustisi shinanfain pui ichapa yafi mafo ichapa noiqui itiashmashtafi Dios cachiquiri huai. Ascaquicai Diosin ato amapaiyai cuscan huacanima. Ahuarao futsafihuunshosi ato nomuran afi unimamapaicani. <sup>15</sup> Ascafia ushu futsafo mai shara ano pacuashu foaiquin yosiashu fimi ya itiro. Nanscarifiai futsafoan Diospan tsain nica cuscan icoinra huashu ahuun nomuran sharacoin. Ascaquicai Diospan tsain nicafo cuscan cachiquiri huacanima. Ascashon nanfoanri futsafo icoinra huamatirofo.

*Lamparinahuunoa cuscara Jesús ato yoini  
Mr 4.21-25*

<sup>16</sup> Tsoancai tapa camaqui lamparina otashon paninranun fupomisima. Asca huatama otashon tapa camaqui huaa pushu muran iquiafoan oinsharatirofo.

<sup>17</sup> Nanscarifiai man shinamisi cuscan ahuara huafashon man fomanmisi cuscari nantifi mato puashoshquin. Anoshocai ahuashta afanan man fomantiroma.

<sup>18</sup> Ascacun oinfain. Uhuun tsain nicasharacahuun. Tsoan uhuun tsain njcasharacoiyan paratamari Dioshuunoa tapisharatiro. Ascan tsoan uhuun tsain nicaflashu ascacoiyanma ascashu nan nicamisi cuscari funoshqui,—ishon Jesús ato yoini.

*Jesús ahua yafi ahuun ushtofo  
Mt 12.46-50; Mr 3.31-35*

<sup>19</sup> Ascatan Jesús ahua yafi chipocufo aqui iquipai oianfo yorahuanrasi fasi fospiafono iquinifoma. <sup>20</sup> Ascaiton futsan yoini,—Min uhua futan ushto rananun mia oinpai fuafu chifi niaforan,—ishon yoiaiton.

<sup>21</sup> Jesús cumani,—Nan uhuun Upa Diosin yoiai cuscacoin aafofin uhuun uhuafu yafi uhuun ushtofoquin,—ishon yoini.

*Jesús fuuhuan yafi ian fuchomanhuan nishma huani  
Mt 8.23-27; Mr 4.35-41*

<sup>22</sup> Shafa futsa Jesús afu rafuafo yoini,—Non ianmanhuan oquiri fonon focahuun,—ato huaino afu nanufainifo. <sup>23</sup> Ascashu foaifono atoqui fuuhuan noconi. Nantian Jesús shasho tsispa camaquinoashu osha ini. Ascano fuuhuanquin ianmanhuan fuchoquequin unu shasho muran iquimani. Fasi musucoin ini.

<sup>24</sup> Ascaiton afu rafuafoan moinnifo, —Moihuu, Ifon, man non asai futsuicai, —ishon yoyaifoanno moinacahuatan ninacahuani. Ascashon yoini isca huaquin, —Fuun nishmahuu huafain fuchomanhuanun nishmahuu, —Jesús huani. Ascaitano ian fuchoi nishmafaini. Manasca huano ian pusiquima racani. <sup>25</sup> Ascaiton ato yoini, —¿Ahuuscai un nunofiano ua icoinra huatama man ratuai? —ishon Jesús ato yoini. Ascaitano fasi ratucani mustairicatan afi ranan yocanonannifo. —¿Noco ifomun tsoaquin? Fuuhuan yafi ian nan yoiái cuscan man nishma hua, —icashu afu rafuafo yoinannifo.

*Gerasa mai anoa nocofunu yoshin chaca nuua ini  
Mt 8.28-34; Mr 5.1-20*

<sup>26</sup> Ascatain ianmanhuan pocufaini Galilea ocuma futsa Gerasa mai ano noconifo. <sup>27</sup> Ascashu shasho murannoashu Jesús fotocainaino nocofunu yoshin chaca ahuun nuua aqui noconi. Sahuuti sahruu sahutianima. Pushu muranricai imisima. Mahua quini muransi iitiani. Nan mahua quini muranri naafo mai huamisifo. <sup>28</sup> Jesús fuchitan ratoconun mai chachipacufoan oi ashcafainin yoiquin isca huani, —¿Mian ahuusca huapaimun, Jesús? Diosin nai muran ica nantifi finoncoianton ahuun Facufin minquin. Ua omitsisca huayamapun, —ishon yoshin chacahuunshon nocofunun Jesús yoini. <sup>29</sup> Nannori yoini Jesusmain yoshin chaca amaquinoa potayamaiton. Asca aqui Jesús nocoataima yoshin chacapan nocofunu achiriapaoni. Ascaiton yorafoan cadenanun munushfain onushushon cushufiafo nanfo tusaqui futsafaini ichopaoni. Ascashon yoshin chacanun tsoan istaipama iyoni.

<sup>30</sup> Ascaiton Jesús yocani, —¿Min ahuanumun? —ishon yocaiton. Yoshin cumani, —Nocon anufin ichapaquin. —Anori yoini yoshin chacafo main ichapa ahuun nuucun. <sup>31</sup> Ascashon yoshin chacafoan Jesús yoinifo, —Omitsiscapanacafo quinhuan muran noco potayamapun, —huananifo.

<sup>32</sup> Ascaitano nantianari machi mananunshon yahua inafoan piinifo. Ascacun yoshin chacafoan Jesús yoicaquin isca huanifo, —Noco yahuarasihuun nichipun, —huaifoan. —Ascaiton yahuafohuun fotacahuun, —Jesús ato huaino. <sup>33</sup> Nocofunu yoshin chacafo yahuafohuun fonifo. Ascaitano yahua huanrasi ian muran maocofainni asai futsunifo.

<sup>34</sup> Ascaifoan oinfaincanyahua cushionisifo ichonifo pushurasi ano chani focani. Pushu patashari icafo yafi chaima icafoquiri chaninifo. <sup>35</sup> Ascaiton nicacani yorahuanrasi yahua asai futsuaiton oinpaicani funifo. Fucaquin oianfo Jesús naman nocofunu ahuun yoshin chacafo nuumisi tsaoa ini. Man amaquinoa Jesús yoshin chacafo potano. Afananricai imisi cuscan chitoria iyamacain nison inima. Shinansharaco inni. <sup>36</sup> Atirifi atoqui nocoifoan Jesús amaquinoa yoshin chaca potaiton oianfo cuscan futsafoqui chaninifo. <sup>37</sup> Ascaitano Gerasa anoifoan nicacani ratucoincaquin yoinifo, —Nocomaquinoashu catapun, —huaifoanno Jesús shashon nanucaini cani. <sup>38</sup> Jesús cataima a yoshin chaca amaquinoa potaton yoini, —Uari iyoicapun. Un mifu capaicai, —huafaiton. <sup>39</sup> Jesús yoiquin, —Ma. Min pushu ano cashon min yorafo mia Diosin ashoan cuscan huafain yoitahuun, —huani. Asca huaino cashon Jesús ashoan cuscan yoifoanfafaini. Pushurasi muran yafi patashari icafo chaima icafori yoifoanfafaini.

*Jairo shotocofacu caya huafain ainfoan Jesús ahuun sahuuti muunni cayashquin  
Mt 9.18-26; Mr 5.21-43*

<sup>40</sup> Asca huatan ianmanhuan pocufurannaiton yorahuanrasiton cusumunshon Jesús mananifo. Fasi aqui unimacaquin —Nocoqui ohuu, —huanifo. <sup>41-42</sup> Nannori nocofunun ahuun anu Jairo. Israelifoan ichananti pushu anoa aton niaifo ini. Nanton ahuun shotocofacu fustishtacoin doce fari aya ini. Ascano Jesús shasho murannoashu foto curanaiton Jairo fuoshopacucahuan yoini, —Uhuun facushta isininki man naiquin uhuun pushu ano ufu capun. Uhuun facushta ua caya huashoshquin, —ishon Jairo

yoiaino Jesús afu caino yorahuanrasi atofu focaquin fasi yuruanifo. <sup>43</sup> Nannori ainfo atofu cani. Nan ainfo imi imitiani doce fari man aqui caafiano nusuyamacai. Cayapaiqui nan aya cuscan doctorfo ato inanfiacucai tsoanshta caya huamamisima. <sup>44</sup> Ascashu Jesús caiton ainfoan acachorishori ahuun sahuuti cupanan muunni. Muuan-shu imi shaturiscatani. <sup>45</sup> Ascaiton Jesús ato yocani, —¿Tsoan ua muamun? —ato huaiton.

Nantifiton yoinifo, —Non mia muamaran, —ishon futsan yoicun futsan yoicun huanifo. Ascaiton Pedronun yoini, —Tapimamisiton, yorahuanrasiton mia yuruafain mia putsiquinaforan, —huaiton.

<sup>46</sup> Afanan ato yoini, —Ratoran futsan man ua mua. Uhuun curushhuunoashu nan ratoran man cayaran, —ishon. <sup>47</sup> Jesús yoiaino ainfoan tapini Jesús man onan. Ascacun raquicai onutiroma oin ratui taritari iyanan yora huanrasiton ointaifi Jesús nia naman ratioconun mai chachishon nan ica cuscan yoini, —Un imi imitiani doce fari man uqui caa. Tsoancai ua caya huamamisima. Ascacun min sahuuti muashu un imi shaturiscaran, —ishon ainfoan Jesús yoini. <sup>48</sup> Ascaiton, —Achishtan, ua icoinra huashufin min cayaquin. Caasharatahuun, —ishon Jesús yoini.

<sup>49</sup> Ascashu Jesús tsaincai muran niaifoan pushu anoashu aqui oshon futsan yoini, —Min facu man naaqui. Natian nocon tapimamisi afanan fucash huayamacahuun, —ishon futsan niaifo yoini.

<sup>50</sup> Ascaiton nicaquin Jesús yoini, —Ratuyamahuu. Min ua icoinra huaino min facu cayaiquin, —ishon yoini.

<sup>51</sup> Ascatan pushu ano nocoshon Jesús yoini, —Pedro yafi Juan non Santiago non facun ahuun apa non ahuari marusu ufu pushu muran iquicahuun, —ato huani. <sup>52</sup> Ato asca huaino iquifainquin oianfo uaicaní shorarascanifo. Manocani. Ascaifoan Jesús ato yoini, —Uayamacahuun. Na facucai naama. Oshafinquin, —ishon ato yoiaiton.

<sup>53</sup> Jesús osanifo. Man facu naacoina oinfainfoan. <sup>54</sup> Ascashon Jesús shotocofacu mutsoinfoanquin oi ashcafainin yoiquin isca huani, —Facushtan, funinaca huanhuun, —huaino. <sup>55</sup> Afanan funinaca huatan shotocofacusha nini. Ascaiton, —Piimacahuun, —Jesús ato huani. <sup>56</sup> Apa yafi ahua aton facu funia oincani fasi unimacoinnaifoan ato yoini, —Maton facu naacoinfiacun un funimana cuscan tsoa yoiyamacahuun, —ishon Jesús ato huani.

## 9

*Jesús afu rafua doce nichini Diosi niaifo icanomain ahuu cuscara iishquicai ishon ato tapimanonfo*

*Mt 10.5-15; Mr 6.7-13*

<sup>1</sup> Shafa futsaino Jesús doce afu rafuafo cunaino aqui funifo. Ascano aqui fuafoan ato yoiqui isca huani, —Uhuun curushhuunshon yoshin chacafo yorafohuun nuucun atomaquinoa potafain pau futsa futsatapafori uhuunshon man ato caya huatiro.

<sup>2</sup> Ascashon uhuun Upa Dios niaifohuunoari ato yoifain isinincaifori ato caya huatahuun.

<sup>3</sup> Ascacun mato ahuara foyamacahuun. Mato poquiti non forusa non tushu non puiri foyamafain mato sahuuti futsafori foyamacahuun. <sup>4</sup> Ascan ratoran pushurasi ano man noocoano tsoa aton pushu muran mato iquimai nan fusti muran iyocahuun nan man caitian. <sup>5</sup> Asca rato pushu futsa iyamarai pushurasi anoafaoanri mato nicacasmaifoanno atomaquinoashu focaquin maton sapato tatashacahuun. Ascaquifin man ato ismatiroquin mato nicacasmafain Diosirifi nicacasmaifo cuscan. Diosin tsain icoinra huamaforan, —ishon Jesús ato yoini. <sup>6</sup> Ascashon ato yoiquin anaitiano pushurasifoti ano Upa Dios niaifohuunoa yoifain isinincaifori Jesushuunshon ato caya huafafainifo.

*Niaifo Herodescái nannorisi shinannima*  
*Mt 14.1-12; Mr 6.14-29*

<sup>7</sup> Ascano nan niaifo Herodes a Jesús aca cuscan nicashu, —¿Tsoamun na nocofunuquin? —ishon shinanni. Atirifoan yoinifo, —Nanfin Juanqui man afanan funia, —ishon yoinifo. <sup>8</sup> Futsafoanri yoicaquin, —Naanfin Eliasquin, —huaino. Futsafoan yoicaquin, —Ma. Nantofin noco shuni caifo Diosin tsain yoimisi ipaoniquin man afanan funiaran, —ishon yoinifo. <sup>9</sup> Ascafiaifoan Herodes yoini, —Ma. Nancai Juanma. Munfin Juan tushtumayamuaquin. ¿Asca nan nocofununmun tsoaquin? —ishon yoini. Asca nan niaifoanri fasi Jesús oinpaicoinni.

*Jesús cinco mil nocofunufo pimani*  
*Mt 14.13-21; Mr 6.30-44; Jn 6.1-14*

<sup>10</sup> Ascashu chipo afu rafuafo Jesusqui naso cashon nan acafo cuscan Jesús yoinifo. Ascaiton nicaquin Jesús ato yoini, —Pushurasi Betsaida ano nocotisi non fononfocahuun, —ishon ato yoini. <sup>11</sup> Ascafia yorahuanrasi Jesús yafi afu rafuafo nan foafo ano tapicanashu atoqui funifo. Ascashu nocoaifoan Jesús ato yoini, —¡Aicho! Man uqui fui. Uhuun Upa Dios niaifo icanomain ahuu cuscaraqui un mato yoinon, —ishon ato yoini. Nannoshori ratoran futsa isinincuai fuafo ato caya huapacuni.

<sup>12</sup> Ascashu man fari caino afu rafuafo doce aqui fucashon yoinifo, —Yorafo nichihuun. Pushurasi ano yafi a chaima icafoanno fotanonfo. Fonaincaniquin. Anoshon tushu fifain ranimain oshacanicain shara futsa fuchinonfo. Nuno tsoa yamaiquin, —ishon yoinifo. <sup>13</sup> Ascaiton ato cumani, —Ato piimacahuun, —ishon a rafuafo yoiaiton. —Nonfin misi mucu fustiti yafi shiman rafusi ayaquin. Min shinamun na yorafo pimashquin non tushu ichapa fiicaiquin, —ishon yoinifo. <sup>14</sup> Nanno cinco mil nocofunufosi ini. Ainfofo yafi facufocai tanan huamunima. Ascaiton ato yoiqui isca huani, —Ato yoicahuun futsano cincuenta tsaohuaifono futsa anori cincuenta tsaononfo. Nanscasi anonfo, —ato huani.

<sup>15</sup> Nan ato yoiai cuscan tsaoacunifo. <sup>16</sup> Ascaino shiman rafu yafi misi mucu fustiti tsomashon nai ari foisinfoantan apa Dios cufinquin isca huani, —¡Aicho! Upan, mihiunshon un ato pimai. Min fasi sharacoincun, —huatan. Misi torupacutan shiman rafu ya osishon afu rafuafo ato inanni ato pashtcanan huapanonfo. <sup>17</sup> Ascashon picani mayancoinnifo. A picaquin tushu huafo afu rafuafoan doce shihuati fospi huanifo.

*Pedronun, —Jesús Diospan facuran, —huani*  
*Mt 16.13-19; Mr 8.27-29*

<sup>18</sup> Ascatañ shafa futsa Jesús afu rafuafo ointaifi apa Dios cufini. Cufinquin anaititan ato yocani, —¿Yorafoan shinamun un tsoaquin? —ishon ato yocaiton.

<sup>19</sup> Cumanifo, —Futsafoan yoiafin min Juanquin. Nan yorafounu muran iquimapacumisi. Asca futsafoanri yoiafofin min Eliasquin. Asca futsafoanri yoiafofin min noco shuni nan Diosin tsain yoimisi ipaoniquin man min afanan funiaran, —huaifoan.

<sup>20</sup> —¿Asca marifi man shinamun un tsoaquin? —ishon ato yocaiton. Pedronun cumani, —Minfin Cristoquin. Nan Diosin mia catonniran, —ishon yoiaiton. <sup>21</sup> —Ascacun tsoashta yoiyamacahuun, —Jesús ato huani.

*—Unfin chipo naashquicai, —ishon Jesús ato yoini*  
*Mt 16.20-28; Mr 8.30-9.1*

<sup>22</sup> Ascatañ afu rafuafo yoiqui isca huani, —Un chipo fasi omitsiscashquin. Nocon yorafohuunshon Dios cufimisi niaifofo non Dios fu tsainti pushu cushumisifo Moisés cununi cuscan tapimamisifo futan ua icoinra huashquicanima. Ascashon ua ato rutumafiafo osha rafu non fusti finontan un afanan furnishquiran, —ishon Jesús ato yoini.

<sup>23</sup> Ascashon nantifi yorafo yoiqui isca huani, —Tsoan ua tanapai sharaquicai afin apaiyai cuscan huatiroma. Ascatama nan un yoiai cuscacoin huatiro. Ascashon shafatifiri shinanqui isca huatiro, “Ua omitsisca huafiaifoanno uncai uhuun Ifo potapacunacama. Ahuunshon ua rutufiainfoanno un tanaqui unupacunacamaran,” ishon shinantiyo. <sup>24</sup> Ascan tsoan shinanquin isca huai, “¡Ohua! Un Jesús tanaitonraca ua omitsisca huacanicati,” ishon shinanquin uhuun tsain cachiquiri huaa. Nanscara yorafo naashu omitsiscapanacafo. Ascan tsoan uhuunoashu omitsiscrai naa. Nanscara yorafofin nacanashu ufu isharapacunacafoquin. <sup>25</sup> Ascan ratoran futsan nantifi manifoti anoafu ahuara fia ahuunacoin ifiashu amaqui naino nantifi ahuunafo funotiro. Ascashu nantifi ahuuna iyopaonifia omitsiscapanacafo muran cainocai ahuashta itiroma. <sup>26</sup> Ascan tsoa uhuun rafipaiquin uhuun tsainri uhuunoa yoicasmaifo. Nanscarafahuun urifi un chipo uhuun Upa Dios cuscaracoin iicaino uhuun Upa Diospan oinmati afu nai muran ica sharafoya chasha curani un fotoaitian un nanscara yorafohuunri un rafipaishqui. “Nacai uhuun yoramaran,” ishon un yoishqui. <sup>27</sup> Ascacun icon un mato yoi. Man futsa nuno ufu niaton naataishoma Upa Dios niaifo icano cuscara man oinyoshquiran, —ishon Jesús ato yoini.

*Jesús fianananriscatani*

*Mt 17.1-8; Mr 9.2-8*

<sup>28</sup> Ascashu ocho osha finontan Jesús Pedro non Juan non Santiago nan rafu non fusti ato machi ano iyoni. Apa Dios cuvi caquin. <sup>29</sup> Ascashon Apa Dios cufiaino ahuun fuso fianananriscatani. Ahuun sahuutiri chashariscatani nan yoa rama furoa ointsa. Fasi osho sharacoin facafacai ini. <sup>30</sup> Ascaino nocofunu rafu aqui niriscatan afu tsainnifo. Nan rafu Moisés yafi Elías ini. <sup>31</sup> Ascashu nan rafuri chashariscatishotan nan Jesús Jerusalén anoashu omitsiscacai naashquiai cuscan afi ranan yoinannifo.

<sup>32</sup> Ascaiton oincani Pedro yafi afu rafua rafutari oshapaifiacaquin osha tunucinnifo. Jesús chashariscatanaiton nan rafutari oinnifo. <sup>33</sup> Ascashu nan rafu man Jesusmaqui caino Pedronun yoini, —Ifon, nuno non ica shara itiro. Non mia tapasi rafu non fusti huashonon. Mina futsa non Moisésna futsa non Eliasna futsari non huashonon, —ishon yoifiashocai Pedronun tapinima raquirimain huaquin.

<sup>34</sup> Ascashu nan tsaincain muran atoqui coin manipacufoannaino coin muran nii futsuashu ratucinnifo. <sup>35</sup> Ascashon nan coin murannoari oi nicanifo yoiqui isca huaiton, —Naanfin uhuun facuquin. Nan un catonni. Ascacun a nicacoincahuun, —Upa Diosin ato huani.

<sup>36</sup> Diosin tsainqui anaititanaino oianfo arus fusti Jesús nia ini. Ascafiaflashocai tsoashta yoinifoma arus fusti aton nomuranshon shinannifo.

*Jesús yoshin chaca furonan facuhuun nuua caya huani*

*Mt 17.14-21; Mr 9.14-29*

<sup>37</sup> Ascatan iyoco futsaino machi anoashu fotocaini Jesús caino aqui yorahuanrasi funifo oinpai fucani. <sup>38</sup> Nanno yorahuanrasi muranshon futsan Jesús cunani. —Tapimamisiton, uhuun facu fusti ua oinshoniyopun. <sup>39</sup> Yoshin chaca ahuun nuushon. Uhuun facu fasi musta musta imayanan fiisimafain ahuun ashfapan facoshurasí at-sispomamisi. Yoshin chacacai uhuun facumaquinoashu capaima. Nanscaquisi man rutui. <sup>40</sup> Un mifu rafuafo yoia isca huaqui, “Na yoshin chaca uhuun facumaquinoa ua potashocapun,” un ato huafiacai tsoan atiro icamaran, —ishon nocofunun Jesús yoini.

<sup>41</sup> Ascaiton Jesús afu rafuafo yoini. —¡Ohua! Mancaí ua icoinra huacoinnاما. Man fasi amaqiri shinamisi. ¿Ahuutia un matofu icamun man ua nicayamacayai? —ishon ato yoini. Ascan facun ahuun apa yoini, —Min facu ua ihuushohuun, —huani.

<sup>42</sup> Ascashon furun ihuushonaino yoshin chakanun afanan musta mustaimaini-foanaino pacuni. Ascaiton Jesús yoini, —Minfin yoshin fasi chacacoquin. Na

facumaquinoashu catahuun, —ishon Jesús curushcai yoaino facu cayani. Ascaiton Jesús apa yoini, —Naquian min facu. Iyosharatahuun, —huani. <sup>43</sup> Ascaino oincani mustairicatan, —Diosin ahuamamishti huatiroran, —icashu yoinannifo.

*Jesús nashquiai cuscan afanan yoi futsani*

*Mt 17.22-23; Mr 9.30-32*

<sup>44</sup> Nan acaiton oian cuscan shinansharaifoan Jesús afu rafuafo yoiqui isca huani, —Un mato yoiai cuscan nicacoincahuun. Futsafin ua ato achimashquiquin, —ishon Jesús ato yoini. <sup>45</sup> Ascashon ato yoiai cuscacai tsoan tapinima. Diosin ato nomuran ato shinantima huaino. Ascacuai yocapaifia ratucaqui yocanifoma shafacafi ato tapimanon.

*Tsoacaimun fasi shara finacaiaqui*

*Mt 18.1-5; Mr 9.33-37*

<sup>46</sup> Ascashu chipo afu rafuafo afi ranan fochishmanantanannifo. Ascan non rato futsacaimun non fasi shara finacaiaqui ishon yoipacunifo. <sup>47</sup> Ascashon nan shinainfo cuscan onanshon Jesús facu mutsofuran yoiqui isca huani, —Facushtan, nuno ufu niyyohuu, —ishon yoini. <sup>48</sup> Asca huatan afu rafuafo yoiqui isca huani, —Tsoan uhuunshon na facu shara huaifin nan uari shara huai cafisca huaiquin. Nanscarifiai tsoan ua shara huaquifin nan ua nichini uhuun Upa Diosiri shara huaqui. Ascan ratoran man futsa oinmati cuscara ahuuamafasho man yora shara huamisi nanfin fasi shara finacaiaquin, —ishon Jesús ato yoini.

*Tsoan noco chaca huapaitama noco shara huai*

*Mr 9.38-40*

<sup>49</sup> Ascaiton Juanpan yoini, —Tapimamisiton, non oian nocofunun min anuhuunshon yoshin chacafo atomaquinoa potaiton. Nancai no fu rafumisima. Ascacun nan non yoiquin isca huaa, “Asca huayamahuu. Min no fu rafumisimaquin. Asca yoshin chaca yorafomaquinoa min potatiromaran,” ishon non yoiaran, —Juanpan huani. <sup>50</sup> Ascaiton Jesús cumani, —Asca huayamahuu. Tsoan noco chaca huapaitama noco shara huaifin sharaquin, —ishon Jesús Juan yoini.

*Jesús Santiago yafi Juan, —Asca huayamahuu, —ato huani*

<sup>51</sup> Afanan Apa Dios icari cati chaima Jesús Jerusalén ano cayoni. Ascaitocai tsoashta nitun huatiro inima. Manmain tapicufin a Jerusalén anoashu noco nashoyoai Apa Diosin yonoa cuscan. <sup>52</sup> Ascacun a rafuafo rafu rucun nichini. Nan pushurasi Samaria ano focashon itishara huashononfo. <sup>53</sup> Ascafia nannoafaoan ato yoiquin isca huani, —Nuno iquiyamacahuun. Non mato oinpaimaquin, —ishon ato yoinifo. <sup>54</sup> Ato asca huaifoan nicashon afu rafuafo rafu Santiago futan Juanpan Jesús yoinifo, —¿Ifon, min noco yonopaimun atohuunshon non Upa Diosin cufinon nan pushurasi nai muranshon chii atoqui pota nai cuyononfo? —ishon yoiaifoan. <sup>55</sup> Jesús ato cumani, —Asca huayamacahuun. Man shinain cuscacai un shinapaima, —ishon Jesús ato yoini. <sup>56</sup> Asca huatan pushurasi futsa ano cani.

*Jesús tanasharapaiyaifo*

*Mt 8.19-22*

<sup>57</sup> A fu caquin nocofunu futsan Jesús yoini, —Ifon, min raquiracaino urifi un mifu cahuacacainon, —huaiton. <sup>58</sup> Jesús cumaquin, —Marifi quiniyaquin puiyafori naa yaofiano uncai pushu yama, —ishon yoini. <sup>59</sup> Ascashon nocofunu futsa Jesús yoiquin isca huani, —U fu cahuun, —huaiton. Cumaquin, —Ifon, ua manayohuu. Nan uhuun upa naitian iquisi mai huayotan un mia tanasharashquinon, —huaiton. <sup>60</sup> —Ascaquima ua tanafafainhuun. Ua ifoamafofin naa yora naa cuscarafoquin. Ascashon nanfoan

ato yora naacun mai huatirofo. Ascan minfin uhuun Upa Dios niaifohuunoa ato yoifafainicain,—ishon yoitaiton.

<sup>61</sup> Futsan yoini,—Ifon, un mia tanapai. Ascafia iquisi uhuun pushu ano un cayotanon uhuun yorafo ato yoioicai,—huaiton. <sup>62</sup> Jesús cumaquein,—Tsoan ua yonoshofiaquin apaoni cuscan afanan huapai, nanscara yorafocai itisharafoma uhuun Upa Dios niaifo ano iquishcaquin,—ishon Jesús yoini.

## 10

### *Jesús setenta y dos nocofunufo nichini*

<sup>1</sup> Ascatañan Jesús setenta y dos nocofunufo catonni. Ascashon rafurasi ato nichipacuni. Nan pushurasi patasharifo ato rufofo nichini nanno chipo arifi atoqui caashquin.

<sup>2</sup> Ascashon Jesús ato yononi isca huaquin,—Yora ichapafoan uhuunoa nicataiyamafiashon ichapamaton ua yonoshocani uhuunoa ato yoishcaquin. Ascacun fasi Upa Dios cuficahuun ahuun yonoshomisifo catonon uhuunoa ato yoinonfo. <sup>3</sup> Ascacun fotacahuun. Un mato yona cuscan chashoanfo masharonun pipaitiro cuscan nanscarifi huaquin uhuunoashu man isharafiacun yora chacafoan mato chaca huapaicaniquin.

<sup>4</sup> Ascashori a muran pui huati yafi forusa non mato sapatori foyamacahuun. Focaquin yorafo finonfaincahuun. A fu tsainyoashu man funa nocotiromaquin.

<sup>5</sup> Pushu futsa muran iquishon ato yoicahuun, “Diosin mato shara huacoinnon. Isharacahuun,” ishon ato yoicahuun. <sup>6</sup> Asca nan pushu muran ica futsa isharacoincun naanfin “Diosin shara” huacoinnaquin nan man yoia cuscan. Asca man yoiai cuscan a pushu muran icafoan mato nicacasmaifocai Diosin ato ointi unimamatiroma. Ascashu funocani. Ascafia man ato yoiai cuscacairocofin Diosin matoqui unimaiquin. <sup>7</sup> Ascatañan pushurasi muran nocoashu pushu fusti muransi oshacahuun. Nannoshon mato pimafain mato ayamanaifoan acahuun. Diosinhuunoashu yonomisifo nan yopaifo cuscan nan nicamisifoan ato inantirofo.

<sup>8</sup> Ascashu man pushurasi muran man nocoaiton mato ihui sharafain mato pimafain mato ayamanaiton acahuun. <sup>9</sup> Nannoshon isinincaifo uhuunshon ato cayahuamachuun. Ascashon ato yoicahuun isca huaquin, “Natian Diosin niaifoan ahuun yorafo iquinai cuscan chaimashtaran,” ishon ato yoicahuun. <sup>10</sup> Ascan mato nicacasmaifoanno ato fai ano fotacahuun nannoshon ato yoicahuun isca huaquin, <sup>11</sup> “Maton chaca nocohuun nuama. Matohuunfin nuaquin. Ascafaino Diosin maton Ifo ipairan,” ishon ato yoicahuun. <sup>12</sup> Un mato yoinon. Diosin Sodoma anoafó ato namaqui cuyoni. Ascan nan mato nicacasmaifofin ahuutiaran nan Sodoma anoafó ani finonmacaifain ato omitsisca huaquin finacoinskquin.

### *Pushurasi anoafó yoitimacoinfo*

#### *Mt 11.20-24*

<sup>13</sup> ¡Ohua! Man Corazín anoafó yafi Betsaida anoafóan man chipo fasi omitsiscái. Tsoan oinyomisima cuscara shara un mato ismafiano mancaí chaca shatupaima. Ascan nan Tiro anoafó yafi Sidón anoafó un mato isma cuscan un ato ismaiton nanfoan ato chaca shatucuanafó. Ascashon yoicuanafó isca huaquin “¡Ohua! Non fasi chaca huamisi. Ascacun natian Diosiqui nasoshon non nicasharanoncahuun,” ishon yoicuanafó. <sup>14</sup> Ascafia Diosin nantifi icoinra huamafo onaintimaitian nan Tiro anoafó yafi Sidón anoafori onaintimafiaquicai mato onaintimaquin finacoinskquin. <sup>15</sup> Ascan man Capernaum anoafóan man shinamun man nai muran Dios ari foicai. Ma. Omitsiscapanacafo muranrocon mato potai,—Jesús yoini.

<sup>16</sup> Asca huatan Jesús ahuun tanamisifo afanan ato yoiqui isca huani,—Tsoan man yoiai cuscacoin mato nicaquifin nan uacoin nicaí cafisca huaiquin. Ascan tsoan mato nicacasmaquifin uarifi nicacasmaiquin. Ascan tsoan ua nicacasmaquifin nan ua nichini uhuun Upan Diosiri nicacasmaiquin,—ishon Jesús ato yoini.

*Setenta y dos nocofunufo Jesús yonoa cuscan afanan naso furanifo*

<sup>17</sup> Ascano chipo nan setenta y dos ahuun tanamisifo afanan aqui naso furacani fasi unimacoincani fucashon yoinifo isca huaquin, —Ifon, yoshin chacafoanfin min anuhunshon noco nicacointirofoquin. Ascacun yorafomaquinoa non mihuunshon potaran, —huaifoan.

<sup>18</sup> Jesús ato cumani, —Aifain. Dios icanoashu nan cana piishicai cafiscái Satanás mai ano pacutanaiton un oian. <sup>19</sup> Ascano un mato yonoainocai uhuunshon mato ahuaraton ahuusca huatiroma. Rono paupan futan inapapiaton mato ahuusca huanonma un mato cushutiro. Ascashon nan Satanás noco noicasmamisi uhuunshon man finoncointiro mato ahuusca huanonma.

<sup>20</sup> Ascacun nan man yoshin chaca potahuunoashu unimayamacahuun Diosifin nai muranshon mato anu ahuun libro muran cunuauquin man ahuun facufocun ato is-mashquin. Nan shinainfin man unimatiroquin, —ishon Jesús ato yoini.

*Uqui fucahuun. Un maton ointi unimamatiro*

*Mt 11.25-27; 13.16-17*

<sup>21</sup> Ascano ato yoiqui anaititan Diosin Yoshin Sharahuunoashu unimacoinquin Apa Dios yoiquin isca huani, —Upa Diosin, min fasi sharacoin. Nantifi nai murannoafó futan mai anoafaoan aton Ifofin minquin. Ascano nan mapo sharayafo yafi cunu tapiafocai min tsain shara min ato tapimanama. Ascacia nan cunu tapisharafoma nan facu cuscarafouqui. Ascashon nanfoan un ato isma cuscan yafi un ato yoiai cuscan ua icoira huafo. Nanfotin min ato tapimanaquin. Icon, Upan, minfin nanscara fuchipaiquin, —ishon apa yoini.

<sup>22</sup> Ascashon cufinquin anaititan Jesús nantifi yoini, —Uhuun Upa Diosin tapia cuscan uarifi nantifi tapimani. Unfin Diospan facuquin. Diosin fustitofin ua onancoianquin. Nanscarifi aquin urus fusti Upa Diosin un onancoian. Nanscarifi huaquin urifi un futsafo Upa Diosihuunoa tapimanai cuscan nanfoanri Upa Dios tapitirofoquin, —ishon Jesús yoini.

<sup>23</sup> Ascashon ifiacucahuan ahuun tanamisifo fusti yoini, —Diosin matohuun noiquin ahuun yono mato isma. Ascacun mato shara huacoinna. <sup>24</sup> Man oian cuscan Diosin tsain yoimisifo futsafo futan niaifofoanri oinpafiaquicai oinpaonifoma. Man nicai cuscarí nicapaifiacaquin tsoan nicapaonimaran, —ishon Jesús ato yoini.

*Samaritanon sharahuunshon Jesús ato ahuara futsa tapimani*

<sup>25</sup> Ascano nocofunu futsa Moisés cununi cuscan tapicoian Jesusqui oni yocayoi. Tapipaiquin Jesusmain cayacafi cumaiquin ishon. Ascashon yocani, —¿Tapimamisiton, unmun ahuuscatiroquin Dios fu ipashquin? —huaiton. <sup>26</sup> Jesús cumani, —¿Raquiri Moisés cununimun? —ishon yoiaiton. <sup>27</sup> Cumani, —“Nocon Ifo Dios nocon ointi muranshon fasi noifain, nocon nomuranshori fasi noifain, fasi curushcái Dios noifain nocon shinanfoyashori Dios noihiuu. Ascatañan mifiri min noiai cuscan aquin mia chaima icafori noicoinhuun,” ishon Moisés cununiran, —huaiton. <sup>28</sup> Ascaiton Jesús yoini, —Min ua cayacafi cumashara. Nanscacoín atahuun. Ascashufin min Dios fu ipatiroquin, —ishon yoini.

<sup>29-30</sup> Asca huaiton cumani, —¿Ascan tsoafomun ua chaima icafoquin afihuun un noiai? —ishon yocani. Ascan nantocai atifihuun noinima. Ascacun Jesús a nocofunun shinain cuscan onanshon cumaquin isca huani, —Nocofunu Jerusalén anoashu Jericó ano caiton. Yomutsofoan achicashon sahuuti shoriquin futsatan sutuquin futsacaquin nama cuanifo. Ascashon fai cusumun ratafaini yomutso ranan ichonifo. <sup>31</sup> Ascano ahuun caifohunshon Dios cufimisi oquin oian fai cusumun racacun oinfiaquin fai ocuma futsa caquin tanafainima.

<sup>32</sup> Ascano nocofunu futsa Levita arifi oquin oian racacun nantorifi rahuinfainni.  
<sup>33</sup> Ascaino nan fainri chipo Samaritanon oquin fuchitan ahuun ramapaitoshini.  
<sup>34</sup> Ascashu chipacopacucahuatan ahuun yoratishon shuni ya cayati futsa osishon ahuun ratucuraquin futsatan. Ahuun ina camaqui ratainifoantan iyoshon pushu muranshon cushushoni. <sup>35</sup> Ascatan iyoconaino ahuun rafanan toro paratamacoin ahuun pui tua rafu inanni. Ascashon pushu ifo yoquin isca huani, “Na nocofunu ua cushusharashohuun. Afanan oshon un mia rafuri inanyoshquinon. Min cushusharaiton finonmafaintan afanan oshon un mia pui inanyoshquinon,” huani.

<sup>36</sup> ¿Ascan rato nocofunu rafu non fusti caimun a chaima icafo cuscaracaquin a nocofunu omitsiscapishtai? —ishon yocaiton. <sup>37</sup> Nan Moisés tsain tapimamisiton cumani, —Ahuun ramapaiyaifin a chaima ica cuscaraquein, —ishon yoiaiton. Jesús yoini, —Caashon mirifi nanscarifi huatahuun, —ishon yoini.

### *Marta futan María ahuun pushu ano Jesús ini*

<sup>38</sup> Ascatan Jesús cai pushurasi muran noconi. Nanno ainfoan ahuun anu Marta ica ini. Nanton ahuun pushu muran Jesús iquimasharani. <sup>39</sup> Ascano nan Marta chipocufin María iniquin. Nanton Jesús tsain yoiaiton nicashquin icashu Jesús naman tsaotoshini nicasharashquin. <sup>40</sup> Ascafaitocai Marta nicanima nan tushu huaisi shinanni Jesús pimashquin. Ascacun nan Martan Jesús yoini, —¿Ifon, mian shinainmamun? Urusu fusti un tushu huai. Uhuun chicocai u futan apaima. Ua yoishohuun u futan aquiyonon, —huaiton. <sup>41</sup> —Martashtan, minfin tushu fusti shinanquin. Ahuarao futsa huaquicai mian nicaima. Nan uhuun tsain sharafin María catoanquin. Ua nicaquin. <sup>42</sup> Uhuun tsain fusti shinanquin. Nan fusti yopaiquin. María ahuun nomuran uhuun tsain nanushon aquimashquimaran, —ishon Jesús yoini.

## 11

—Raquirimain non Upa Dios cufiqui huatiroquin, —ishon Jesús ato yosini

*Mt 6.9-15; 7.7-11*

<sup>1</sup> Ascano shafa futsa Apa cufiqui anaitiano afu rafua futsan yocani, —Ifon, raquirimun non Upa cufiqui huatiroquin. Noco tapimahuun. Juanpan afu rafuafo tapimani cuscan nocorifi tapimahuun, —ishon yoiaiton. <sup>2</sup> —Isca huacahuun, —ishon Jesús ato yosini,

“Nocon Upan nai murannoaton min fasi sharacoin.

Manifotiton aton niaifo iishquin mia ifoannonfo.

<sup>3</sup> Shafatifi nocon tushu non yopai cuscan noco inanhuan.

<sup>4</sup> Nan noco chaca huaifoan non ato rau huaa cuscan huafain  
nocon chacafori noco rau huashohuun, Upan.

Satanás yoshin chacapan noco chaca huamapaifaiton  
nocoqui cumatima huahuu.

Nansca huaquiquian,”

ishon Jesús ato yosini.

<sup>5</sup> Ascatan afanan ato yoquin isca huani, —Manmun mato yorahua yamunacuahuainino mato ano nococun maton yora futsa yoa yocashoquin isca huaquin, <sup>6</sup> “Ua yoa rafu non fusti inanpun. Un mia nasonon. Un natian yopaicai uhuun yorafo chaicunoashu uqui nocoano un ahuashta pimaimacain,” ishon yocaiton.

<sup>7</sup> ¿Ascaiton cumaquimun isca huatiro, “Mun uhuun facufo ya iquia caincaitiri man fupoa. Asca ua fucash huayamahuu,” ishomun anori cumatiro? <sup>8</sup> Ma. Ascacai huatiroma. ¿Raquiri huatiromun? Un mato yoi. Ahuun yorahuaton inanyamai shafai fasi manariaiton inanyamacuatan inantiro. Funinaca huatan nan yoca cuscan inantiro.

<sup>9</sup> Afanan ahuara futsa un mato yoiai cuscan nicacahuun. Ahuara yopaquin Upa Dios yocacahuun mato ashonon. Man yocain cuscan funaquima manasharacahuun nan Diosin mato ashoitian. Ascacun Upa Dios cufifafaincahuun man cufiai cuscan mato inanon. <sup>10</sup> Tsoan Upa Dios yocariai fishquin. Ascan tsoan ahuara shara fasi fuchipaiyai cuscan Diosin ato fuchimatiro. Ascan tsoanri Upa Dios cufiriaiton ashoshquin.

<sup>11</sup> ¿Ascan maton facun mato shiman yocaiton man rono inantiromun? Ma. Mancaí maton facuasca huatiroma. <sup>12</sup> ¿Maton facuri mato tacara to yocaiton man inapapia inantiromun? Ma. Mancaí maton facuasca huatiroma. <sup>13</sup> Ascacun tapicahuun. Man chaca huamisifiashon maton facufo man inansharamisi. Man ascaiton finacaiya maton Upa Diosin nai murannoaton man yocai cuscan ahun Yoshin Shara mato inanshquin, —ishon Jesús yoini.

—*Yoshin chaca ato niaifoan ahuun curushhuunshon Jesús yoshin chacafo potatiroran, —huanifo*

*Mt 12.22-30; Mr 3.20-27*

<sup>14</sup> Ascano yoshin chaca nocofunuuhun nuushon tsainmatiroma Jesusqui ocun. Amaquinoa yoshin chaca potano tsaiinnaca huanaiton oincani mustairinifo. Ascashon atirifiton, —¡Aicho shararan! —huaifoanno. <sup>15</sup> Futsafoan yoinifo, —Satanás curushhuunshon Jesús yoshin chacafo yorafomaquinoa potatiroran, —ishon. <sup>16</sup> Futsafoan Jesús yoiquin isca huani, —Dioshuunshon nai muranno nocoo ahuara futsan ismahuu non mia icoinra huanon Diosin mia catoanquin, —huaifoan.

<sup>17</sup> Ascano nan shinainfo cuscan onanshon Jesús ato yoini, —Mani futsafo afi ranan rutunain cuyotirofo. Nanscarifiai pushu fusti muran icafori afi ranan chaca huatanan-fafaincani pashcanantirofo afanancai tsoa anosi itiroma. Ascashuricai afanan tsoa yorahuatanantirofoma. <sup>18</sup> Nanscarifiai Satanás niaifoan afu yoshin chacafo potaquin ahun yono chacana huatiro. Asca huaquin ahun yono cuyocointiro afu yoshinfocai afanan afu itiroma. Un nannori yoia manmain yoiquin isca huayamacun, “Satanashunshon yoshin chacafo potaran,” ishon man uhuunoa yoia.

<sup>19</sup> Ascafia manfin uhuunoa yoimisiquin. “Satanás curushhuunshon yoshin chacafo potaran,” ishon man yoimisi. ¿Un asca huaino tsonhuunshon mato yorafoanri yoshin chacafo atomaquinoa potafomun? Ascacun nanfohuunshon man tapitiro man uhuunoa amaquiri shinanchacai cuscan. <sup>20</sup> Ascafia Diospan Yoshin Sharahuunshon un yoshin chacafo atomaquinoa potaiton man tapitiro maton Numamisi Diosin catonni man matoqui nocoa. <sup>21</sup> Ascan nocofunu mutsisipacoinin tucuti yashon ahun pushu cushuanocai tsoan ahun ahuashta muntiroma. <sup>22</sup> Ascafia nan finoncaia fasi mutsisipacoin aqui nocoshon achifain ahun cunoti mufishon ahun ahuaraofo cuyonfiaitocai ahuisca huatiroma. Ascashu ahun ahuaraofo pashcanain futsutirofo.

<sup>23</sup> Tsoa ufu rafucasmaquifin uhuun tsain nicacasmacaniquin. Nanfoan futsafo ua icoinra huamapaicanima. Ascaquifin Diosimaqui ato imacaniquin.

*Yoshin chaca yoraqui afanan nasotiro*

*Mt 12.43-45*

<sup>24</sup> Yoshin chaca nocofunumaquinoashu cai tsoa istaipama ano cani shara futsa funai cai anoshon tunushquin. Ascafia fuchiamacaiqui yoshin chakanun afanan shinanqui isca huani, “Unfin nan nocofunuuhun ipaoniquin. Ascacun un afanan aqui nasoiran,” ishon shinanni. <sup>25</sup> Aqui nocoshon oian tsoa futsacai afu rafua inima. Nan pushu matsomua shara ointsa. <sup>26</sup> Ascacun nan yoshin chakanun afu yoshin chacafo siete ato ihuuni nan fasi chaca finacaiafo. Ascashon ato yoiqui isca huani, “Nocofunun un mato ismaicai non ahun nuifonon,” ishon ato yoini. Ascatac aqui foshon iquinaifoanno nan nocofunu fasi mimacai chacacoin ini. Manmain aqui rananri focun, —ishon Jesús

ato yoini. —Asca huaifoanno nan nocofunu afanan finacaipacucahuani. Mimacai fasi omitsiscai finacoincun, —ishon Jesús ato yoini.

*Nicafu cuscan unimacoincani*

<sup>27</sup> Ascaiton ato yoiaino ainfoan nan yorahuanrasi muranshon oi ashcafinitin Jesús yoi qui isca huani, —Min uhua mia cainshon mia shoma amani. Ascacun min uhuaquimun Upa Diosin unimasharapainon, —ishon yoini.

<sup>28</sup> Ascatan Jesús cumani, —Ai, nan min yoiai cuscan iconfiashu tsoan Diosin tsain nan nica cuscacoin Diosin nan unimamatiro finacoian, —ishon cumani.

*—Tsoan atiroma cuscan noco ismahuu non mia icoinra huanon, —ishon yoinifo*

*Mt 12.38-42; Mr 8.12*

<sup>29</sup> Ascatan fasi paratama yorahuanrasi Jesusqui fuaifoan. Ascaiton ato yoini, —Natian niafo fasi chacacoinfo. Ascashon ua yoimisifo isca huacaquin, “Tsoan atiroma cuscan noco ismahuu min Dios ariashu oa non mia icoinra huanon,” ishon ua yoimisifo. Ascafia nan Diosin tsain yoimisi Jonás ani cuscacoin un chipo mato ismaiton nan fusti man oinshquin. <sup>30</sup> Ascan Jonás tsainhuunshon Nínive anoafaoan Dios icoinra huanifo cuscan nanscarifi huaquin natian niafo un mato yoi marifi man icoinra huanon.

<sup>31</sup> Ascashon Diosin nantifi yorafo ichanan huaitian ato yoipacushquin ratofomain afu ipatiro iyamarai omitsiscapanacafo muran foshcaniquin. Nantianri nan ainfo Sabafoan ato niafo ipaoniton matohuunoa yoiquin isca huashquin, “Salomón tapi-coian cuscacai tsoa futsan tapipaonifoma. Ascacun ahuun tsain nicapaicoin un aqui chaicunoashu cani cuscan mancái nan Diospan Fururi asca huapaipaonima. Ascata-marocon man nicacasmaapaoniran,” ishon matohuunoa yoishquin. Nan icon Salomón tapicoian ipaonifia uncaifin fasi Salomón finoncoinfiacon mancái ua nicapaima.

<sup>32</sup> Nanscarifi huaquin Diosin nantifi yorafo ichanan huaitian ato yoi pacushquin ratofomain afu ipatiro iyamarai omitsiscapanacafo muran foshcaniquin. Nantian Nínive ano ipaonifoan matohuunoa yoishcani isca huaquin, “Jonás noco Diosin tsain yoiai cuscan nicacoinsnon non nocon chaca shatucoinfain non Dios icoinra huani. Asca man manfin Diospan furucoin nicafiashocai maton chaca man shatupainimaran,” ishon mato yoishcani. Nan icon un Jonás finonfiacu man ua nicapaimisima.

*Nocon ointi sharaquin non shinansharatiro*

*Mt 5.15; 6.22-23*

<sup>33</sup> Asca huatan afanan ato yoiquin isca huani, Tsoanbai lamparina ihuashon otaya-mafain paninaranunri fupoima. Asca huatamarocon shafacafi tsaoi nan iquiaifoan oinsharanonfo.

<sup>34</sup> Nanscarifiai nocon furo rafu noco cayan lamparina cuscara. Nan rafu sharano non oinsharatiro. Ascashon nocon caya cushusharatiro non ahuuuscanonma. Nanscarifiai mato nomuranshon man shinansharai man isharacointiro. Ascafia maton furo chacanocai man oinsharatiro. Ascashu nan faquish muran ica shinantsain. Nanscarifiai maton nomuranshon man shinanchacaicain man isharatiro. Man funocointiro. <sup>35</sup> Ascacun oinfain. Tapicahuun mato nomuranshon man shinansharai cuscan chaca shinantama. <sup>36</sup> Ascashu shafacafi man icafin nan chashamatinin mato chashama cuscaraquin. Nanscara ano man icacai faquish itiroma. Nanscarifiai maton nomuranshon man Dioshuunoa fusti shinansharaino man ahuara chaca shinantiro-marai, —ishon Jesús ato yoini.

*—Manfin chacafoquin, —Fariseofo yafi Moisés cunu tapimamisifo Jesús ato yoini*

*Mt 23.1-36; Mr 12.38-40; Lc 20.45-47*

<sup>37</sup> Ato yoiqui anaitiano Fariseonun Jesús yoimani pimashquin. Ascano ahuun pushu muran oashu tsaoni. Ascaino pishcaquin Fariseofo ato shunifoan ato tapimani cuscan ahuun mucu chocayoni. Asca Jesuscái Fariseo imisifo cuscan anima. <sup>38</sup> Ascaiton

oinquin Fariseon ahuun nomuran shinanni, —¡Ajaa! Nocon shunifoan noco tapimani cuscacai Jesús aimaran, —ishon shinanni.

<sup>39</sup> Ascaiton Jesús ahuun nomuran onanshon yoiqui isca huani, —Ua nicahuu. Man Fariseofoancai maton mucus chocafiaquicai man maton nomuran ahuara shara shinainma. Yora futsafohuunoa shinantama. Man ahuara futsa futsa tapasi noicoin. Maton nomuran chaca futsa futsatapafo fospicoianran, —ishon ato yoini. <sup>40</sup> — Manfin fasi amaqiri shinamisiquin. ¿Man tapiamamun tsoan noco caya fumancayan onihuafain noco nomuranri onihua? <sup>41</sup> Ascacun ahuuomafohuun ramapaicain ato inansharacahuun. Man ascaiton tapitirofo Diosin maton chaca mato soashotiro man sharacoin inon. Ascashu man shinain cuscan shara fustisi iishquin.

<sup>42</sup> ¡Ohuashta! Fariseofoan mato Diosifin onaintimashquiquin. Mato fanafo atirifi man Dios inanmisi. Man asca huafiaquicai man futsafo shara huamisima. Ascaquifin man Diosiri noicoianmaquin. Man mato fanafo atirifi Dios inanmisi cuscan sharafia futsafo shara huafain Diosiri noicoincahuun.

<sup>43</sup> ¡Ohua! Fariseofoan Diosin mato onaintimai. Ichananti pushu muran iquitan shafacafi man tsaofafaini mato oinquín, “Sharacoinforan,” mato huanonfo. Yorafoan mato finonfoancaquin, “Noco tapimamisiton,” mato huaifoanno man unimanon.

<sup>44</sup> ¡Ohua! Ascafia Diosin mato onaintimai. Manfin naan yora naa cuscaraoquin. Yora mai huafain manaon cahuaqui futsafoan tapishoma puamafoantirofo. Nanscarifiai yorafo matoqui nocoflashocai tapiafoma maton nomuran man chacacoinfiacun, —ishon Jesús Fariseofo yoini.

<sup>45</sup> Ascaiton nicacaquin Moisés cununi cuscan tapimamisi futsan cumani, —Tapimamisiton, min anori yoiquifin nocori min roaiquin, —huaiton.

<sup>46</sup> Jesús cumani, —¡Ohua! Moisés cununi cuscan tapimamisifoan matori Diosin onaintimai. Man maton caifo yoiqui isca huamisi, “Moisés cununi cuscan nantifi huacahuun. Fustishta finonmayamacahuun,” ishon man ato yonoflashucarifin man ascacoinyama. Ascatamarocon Moisés yononi cuscan finonmafain man ato huama. Ascano apaifiaquicai tsoan atiroma. Ascafiaifoancai maton mucuman ahuashta ato futan man huapaiyama. Ascashu aton nomuran omitsiscafiaifoancai man atohuun ramapaiyama.

<sup>47</sup> ¡Ohua! Diosin mato onaintimacoin. Man mato shunifo nan Diosin tsain yoimisifo maiafo ano man ahuara toquiri onihuamisi ato shinanshquin. Man asca huafia mato shunifoan ato rutupaonifo. <sup>48</sup> Mato shunifo Diosin tsain yoimisifo rutunifo. Man amisi cuscan huaquin man yorafo ismai nan maton shunifoan apaonifo cuscan huaquin marifi atofu niyoshon man asca huacuana. Ascashufin marifi man rutumitsamisi cuscaraquin. Diosin tsain yoimisifo maton shunifoan rutunifo. Ascacun maiafo ano man toquiri onanti huaquin fufoa. <sup>49</sup> Ascacun Diosin onancoinshon matohuunoa yoiqui isca huani, “Uhuun tsain yoimisifo yafi uhuun facu fu rafuaflo ato yoisharanonfo un ato nichishqui. Ascafia atirifi ato rutufain atirifi ato omitsiscia huashcaniran,” ishon Diosin matohuunoa yoini.

<sup>50-51</sup> Ascan nan icon un mato yoi. Nantifi Diosin tsain yoimisifo ato rutupaonifo nan Diosin ato onihuauqui tau huanitian yafi natian. Ascacun atohuunshon Diosin matoqui nutashquin. Nan Abel rutuqui tau huafain ahuun unutaqui Zacarías nan Dios fu tsainti pushu muranshon cufiti chaimashon man rutunifo. Ascashon nantifi Diospan yorafo chaca huapaonifo cuscan natian man niyoano matoqui nutashon mato omitsiscia huaqui finacoinshqui.

<sup>52</sup> ¡Ohua! Moisés yononi cuscan tapimamisifoan Diosin tsain cununi cuscan onui cafisca man huau futsafoanri tapisharanonfoma. Mancaí Diospan tsain icoínra huacoinnáma. Ascashon futsafoanri tapipaifiaiton man ato shutia icoínra huanoñfoma. Ascacufin Diosin fasi mato onaintimaquin finacoinquin, —ishon Jesús ato yoini.

<sup>53-54</sup> Nicacanashu Fariseofo yafi Moisés cunu tapimamisifori fasi aqui sinacoincaquin aqui tsain chipunifo. Fasi ichapafain yocanifo. Ahuarashta amaquiri ato cumaiton nicapaicaquin. Amaquiri ato yoitanaino niaifofoquin chanipaicaquin Jesús cunu muran iquimanonfo.

## 12

### *—Fuparamitsapaimisi iyamacahuun, —Jesús ato yosini*

<sup>1</sup> Ascaino yorahuanrasi aqui fucani yurui furanifo. Ascaifoan Jesús afu rafuafo yoiqui isca huani, —Oinfain. Fariseofoan, “Sharaforan,” mato huamapaicani. Sharafomafinquin. Sharafo shafain man ica sharafoyamaflacun. Nanfo fuparamitsamisifo. Ascacun ato cuscara iyamacahuun. <sup>2</sup> Ascafia ahuarashta onupaifiamisifo nantifi Diosin ato puashoshquin. Ahuarari fomanpaimisifo nanfori ato puashoshquin. <sup>3</sup> Futsafo fomanfain arusu fusti shinanfiamisifo nanfori Diosin ato puashoshquin. Cunu muranshon onushta yoifafo nanfori ato puashoshquin nantififain tapinonfo.

### *Tsoquimain man ratutiroquin*

*Mt 10.26-31*

<sup>4</sup> Uhuun yorafoan un mato yoi. Mato rutupaiyaifoanno ratuyamacahuun. Mato caya fusti rutucaniquin. Asca maton yoshinfocai tsoan ahuusca huatiroma. <sup>5</sup> Ascacun atoqui ratuquimarocon Diosiqui ratucahuun. Nantofi mato rutufain maton yoshinfori omitsiscapanacafo muran potatiroquin. Nanno chi urumanhuan matsinacama. Naan icon un mato yoi. Dios fustiquifin man ratutiroquin. <sup>6</sup> Ascano tsitsipio mucu fustiti inanmitsashonraca toro rafu fitirofo. Ascafia Diosicai fustishtahuun ointiaquimanima. <sup>7</sup> Nan icon un mato yoi. Diosin nantifi tapicoian. Mato foori man tanan huani. Ascasho Upa Diosin tsitsipiofo shinanmisi cuscan fasi mimacaia matohuunoa shinanfafaini. Ascacun ratuyamacahuun. Matocaifin tsitsipio aca finonmacaifain Diosin matohuun noiquin.

### *Tsoan yorafoan ointaifi, —Jesús uhuun Iforan, —huaa*

*Mt 10.19-20, 32-33*

<sup>8</sup> Ascano tsoan yorafoan ointaifi, “Jesús uhuun iforan,” ishon ato yoiafin uhuun Upa Diosin ahuun oinmatifoan afu nai muran icafoan ointaifi, “Naanfin uhuun yoraquin,” ishon un yoishquin. <sup>9</sup> Asca tsoa yorafoan ointaifi, “Jesús uhuun ifomaran,” ishon yoia nantocai ua icoira huamisima. Nanscarifi huaquin Diospan oinmati afu nai muran icafo ointaifi, “Naancai uhuun yoramaran” un yoishquin. <sup>10</sup> Tsoan ua chaca huafin Upa Diosin rau huashotiroquin. Asca tsoan Diospan Yoshin Sharaqui tsain chaca huacai rauhuanacama. Aton chaca atohuun nuupacunaca.

<sup>11</sup> Ascano ichananti pushu muran mato iyocashon niaifofoan ahuun ointaifi raquirira mato huafiaifoan shinanchacayamacahuun. <sup>12</sup> Nantianfin Diosin ahuun Yoshin Sharapan mato shinanmatanaino mato tsain chaca huaifo Diospan Yoshin Sharahuunshon man ato cumasharanon, —ishon Jesús ato yoini.

### *Yora mafo ichapaya musucoinquin*

<sup>13</sup> Nannoia nia futsan Jesús yoini, —Tapimamisiton, uhuun yora ua yoishohuun nocon upan noco inan cuscan uari pashcashonon, —huaiton.

<sup>14</sup> Jesús cumani, —Uhuun yoran. Uncai tsoa yoimisima futsa pashcashonon. Tsoanri-cai ua catoanma un ato pashcanan huanon, —ishon yoitan.

<sup>15</sup> Afanan ato yoiqui isca huani, —Ua nicacahuun. Matonama fuchipaiyamacahuun. Ahuara ayafashion afanan finonmafain fipairiyamacahuun. Mafo ichapayahu-unoashucai non unimatiroma. Nocon mafocai nocon ointi unimamatiroma. Nocon mafohuunoashucai non isharatiromaran, —ishon ato yoini. <sup>16</sup> Ascashon nocofunun ichapayahuunshon Jesús ato ahuara yosini isca huani, —Nocofunu futsa mafo ichapaya

ahuun mau ano ahuun yono sharafori ichapaya ini. <sup>17</sup> Ascacun nan nocofunu mafo ichapayaton shinanqui isca huani, “¿Umun uhuun yonofo ahuusca huaiquin? Uhuun tasha pushufo murancai uhuun yonofo icoinama. <sup>18</sup> Ascacun uhuun tasha pushufo pucashon un afanan uhuapacoin huai. A muran uhuun yonofo yafi uhuun mafo icoionon. <sup>19</sup> Uhuun nomuran un shinanqui isca huaa, ‘Uhuun ahuara ichapa iquisi mucushon chipo un tunusharafain ayafain aqui pifain monocain un unimasharacoin-niran,’” ishon ahuun nomuran shinanni.

<sup>20</sup> Ascashon anori shinanfiaiton Diosin yoini, “Mincai ahua tapiama. Na yamutafin min naicain. ¿Min naanomun na min mucuafu ahuuscaquin?”

<sup>21</sup> Nanscafín yora ahuara ichapayashon Diosin shinantama imisishaquin. Naashuaci afanan ahuaya iquima. Nan ahuuoma cuscara iishquin, —huani.

### *Diosin ahuun facufo cushushara*

*Mt 6.25-34*

<sup>22</sup> Ascaíno Jesús afu rafumisifo yoiquin isca huani, —Afanan un mato yoisharanon. Ua nicasharacahuun. Isca huaqui shinanyamacahuun, “Non ahua pimara,” ishon shinanchacayamacahuun. Ahuaricai non sahuiimaran iyamacahuun. <sup>23</sup> Non ahuara pifain non sahuiatocai noco imasharatiroma. <sup>24</sup> Shinancapon. Nan puiyafoancai ahua fanayamafain ahua chitunmisifoma ahuaricai fotsuyamafain ahuamafofiacun Diosin ato pimamisi. Nanscarifi aquin Diosin matohuun noiquin nan puiyafo aca finonmafain mato cushushara. <sup>25</sup> Ascacun shinanchacayamacahuun. ¿Non shinanchacatocai shafa fusti noco nimayotiro? <sup>26</sup> Asca shinanchacahuunshoncái ahuaton noco nimay-otiro. Asca ahuara futsari shinanchacahuunshon noco imatiroma. Asca ahua shinanchacayamacahuun.

<sup>27</sup> Ascashon shinanquiri isca huayamacahuun, “¡Ohuashta! Raniamun un sahuuti finanzi sahuushqui,” ishon shinanyamacahuun. ¡Shinancapon! Salomón sahuuti sharash-tacoin sahuufiapaonicai nan charo sharashatacoinfo cuscarama. Charofoancai yonoya-mafain sahuuti icushuima. <sup>28</sup> Diosin charo sharashatacoinfo onihua. Foaisharafia supashon samamashta tsasicun coatirofo. Nanfo finonmacaifain mato noiquin mato sahuuti sahuumashquin. Ascafia mancaí icoínra huasharacoinnáma.

<sup>29</sup> Ascacun shinanquin isca huayamacahuun, “¡Ohuashta! Unmun ahua piishquin uhuun tushuyamaino. Unricai ahua sahuiimaran,” ishon shinanchacayamacahuun.

<sup>30</sup> Ascan nannori nan icoínra huamafoan shinanchacamisifo. Ahuara pifain sahui-paiyáifo fustisi shinanmisifo. Ascan maton Upa Diosifin tapiaquin man yopai cuscan. Ascacun mato inanshquin. <sup>31</sup> Ascacun Diosicairocon shinancahuun. Mato yonomapaíyai cuscan nan fusti shinanfafainačahuun. A cuscara shara ipaicahuun. Nancaí shinanquin tau huafafainačahuun. Man ascaiton ahuara futsa man yopai cuscan Upa Diosin mato inanshquin.

### *Diosin icarishon ahuara sharacoinfo noco mucushotiro*

*Mt 6.19-20*

<sup>32</sup> Ascano uhuun yorafoan ratuyamacahuun. Maton Upa Diosin mato cushushara. Nantifi ahuuna matori inain. Unimacai mato inanshquin. <sup>33</sup> Maton mafo inanmitsacahuun ahuun rafanan pui fishon yora ahuuomafo inanshcaquin. Man ascaiton Diosin nan icanoshon mato ahuara sharacoinfo mucushoni. Nanfocai cuyopacunacama. Coroisin nanfo piquin chacana huayamainocai yomutsori ano iquitiro ahuara mato fianshquin. <sup>34</sup> Asca man mafo fusti shinanfafainquifin nan fusti man noicain. Ascan man Dioshuunoa fustisi shinanfafainquin nanrifi man yonoshosharafafaintiro ahuun noicoinquin. Ascashu man afu isharapacupaitiro.

### *Iquisi itisharacahuun*

<sup>35</sup> Ascacun itisharacahuun. Un mato anoashu un chipo nai muran caiquin. Ascafashu ratoran shafatan iyamarai yamu un matoqui afanan nasoshquin. Yamu yora futsa nocaiton manaquin lamparina otatiro itisharashon. Asca nanscarifai itisharacahuun. <sup>36</sup> Oinmatifoan aton ifo fusititian mai futsa ari cano futsafoan a pushu anoshon manasharatirofo. Ascano ifoan nocoshon ato cunaiton yoitirofo, “¡Aicho! Iquiyohuu,” huatirofo.

<sup>37</sup> Ascaino Ifoan nocoshon oian ahuun oinmatifo itisharafoanno unimacointiro. Nanforifi a unimatirofo. Ascan un mato icon yoi, Nan ifoan atoqui nocoshon ato pimaquin yoiqui isca huai, “¡Aicho! Fucahuun. Un mato pimapaiquin,” ishon ato yoitiro.

<sup>38</sup> Ascashu man rama osha pacuaino iyamarai yamunacucahuaino iyamarai shafa matsi matsicaino ifo nocaiton oin ahuun oinmatifo itisharashu fasi aqui unimacointirofo. <sup>39</sup> Ua nicasharacahuun tapishcaquin. Pushu ifoan iquisi itisharashon yomutso yamu ahusscaraino ahuun pushu muran iquiai tapishocai iquimatiroma. <sup>40</sup> Nanscarifai marifi itisharacahuun. “Iscaino nocon ifo oimaran,” ishon shinanya-macahuun. Ahuuscara atanaino un matoqui nocoriscaquin,—ishon Jesús ato yoini.

*Oinmati rafu futsa ifoan yonoai cuscacoin aino futsa nan yonoai cuscacoin aim  
Mt 24.45-51*

<sup>41</sup> Ascaiton Pedronun yocani, —¿Ifon, min ahuarao yoiai cuscan noco fusti min tapimapai iyamaraimun nantifi yorafori min tapimapaiquin? —ishon yocaiton.

<sup>42</sup> Jesús cumani, —Man tapinon un mato yoi ahuu cuscaramain oinmati shara itiroquin.

Niaifocoin mai futsa ari caquin niaifo patasharinoaton yoitiro isca huaquin, “Uhuun oinmati futsafo ato tushu shafatifi inanhuan. Nanticoin rafu aton pashcanan huahuun,” huafaini catiro. <sup>43</sup> Ascatac niaifocoin afanan nocoshon oinquín ahuun niaifo patasharinoa nan yoia cuscacoin aano fasi aqui unimacointiro. Ascashon nan shara huacointirori.

<sup>44</sup> Ascacun un mato icon yoi. Nan niaifoan ahuun oinmati yoi, “¡Aicho! Natian nantifi uhuunafo min ua cushusharashotiroran,” ishon yoitiro. <sup>45</sup> Ascafia nan niaifo patashari chacapan ahuun nomuran shinanqui isca huatiro, “Uhuun niaifo funa nasoimaran,” ishon shinanquin oinmatifo futsafo nocofunufo yafi ainfofori ato chaca huaqui fut-sani. Ascashu shafatifi pauncain monoi. <sup>46</sup> Ascaino ahuun niaifocoin samamashta nocorisca-tiro. Nan oinmati chaca itisharamano ahuun niaifo nocoshon a onaintimai. Ascashon niaifoan oinmati futsafo yonoqui isca huai, “Nan oinmati chaca icoinra huamafoanno potacahuun omitsiscapashanon,” ishon yoishqui.

<sup>47</sup> Ascan nan oinmati ahuun niaifoan yoia cuscan man tapiflashu ascayamacai itisharayamacun ahuun niaifoan nocoshon a fasi curushcain coshaquin futsai. <sup>48</sup> Asca nan oinmati futsa ahuun niaifoan yoia cuscan tapishoma chaca huacun nan icoquin ahuun niaifoan ichapama coshashquin. Nanscarifai tsoa Diosin ichapa tapimana aqui nococun yocaqui isca huai, “¿Un mia ichapa tapimana cuscan man mian nanscacoain aa-mun? ¿Ascashon futsafori un mia yoia cuscacoin min huashoamun?” ishon yocashquin. Ascacoin huaiyamashu funotiro.

*Yorafoancai Jesushuunoa nannorisi shinantirofoma  
Mt 10.34-36*

<sup>49</sup> Un nantifi manifotifi chaca shatumani yoi un oa. Atirififoan ua icoinra huaifoanno futsafoan ua icoinra huacanima. Nan icoinra huamafo Diosin ato onaintimai. Uhuun Upa Diosin ua mai ano yonomai cuscan natian cuyo a shara icuana. <sup>50</sup> Ascafia cu-matohuunoashu naashqui un oni. Un nataima iquisi un omitsiscacoinshquin. Ascashu u omitsiscacaini naashquin. <sup>51</sup> Ascan man shinanmun nantifi manifotí anoafó uhuunoashu unimanonfo un oni. Ma. Ascaramafiqui. Un mato yoiai cuscacai tsoan

nannorifosi shinancanima. Asca nan ua icoinra huafoan sharafosi shinainfoanno nan ua icoinra huamafoan ahuara chaca futsafosi shinancani.

<sup>52</sup> Ascashu pushu fusti muran mucus fustiti icafoan rafutasi ua icoinra huaifoannocai nannorisi atirifiton tsoan shinantiroma. Nanscarifiai rafutan iyamarai rafu non fus-tifain ua icoinra huaifoannocai nannorifosi atirifiton tsoan shinantiroma. <sup>53</sup> Apa ua icoinra huaino furumun ua icoinra huashma apaqui sinatiro. Ahuan ua icoinra huaino ainfacu ua icoinra huashma ahuaqui sinatiro. Ahuun yayan ua icoinra huaino ahuun raru ua icoinra huashma ahuun yayaqui sinatiroran, —ishon Jesús afu rafuafo yoini.

### *Nai foisquin non tapitirohuunoa*

*Mt 16.1-4; Mr 8.11-13*

<sup>54</sup> Asca nannori yorahuanrasi mapoafoan afanan ato yoiquin isca huani, —Fari iquiai anori nai choshtacoin foancuaiton oinquin, “Oi fuiran,” man huano. Oi futiro.

<sup>55</sup> Ascasho manri yoimisi, “Fuu fari cai istafari fasi shana iishquiran,” man huamisi. Ascan nan icon fasi shanacoin itiro. <sup>56</sup> Ascafia mancái man yoia cuscacoin amisima. Nai foisquin man tapitiro oi fui iyamaraaimain fuimacai. Ascafia mancái Diosin mato yoia cuscan icoinra huapaima. Natian ahuara ahuuscarai cuscacai man tapiama.

### *Tsoan mia chaca huemapaiyai shara huarisca huahuu*

*Mt 5.25-26*

<sup>57</sup> ¿Ahuuscain mafiri man cayacafi shinansharaimamun? <sup>58</sup> Tsoara futsan mato yoiqui isca huai, “Min ua chaca huaa cuscan. Un miqui niaifo yoicairan,” ishon mia yoicun. Niaifo ari cataima rufofo shara huacahuun. Man asca huayamacun niaifoan mato cunu muran iquimatiro. <sup>59</sup> Mato iquimanancocai man cainritiroma nifian cuscan nantifi inanshu man caintiro. Nanscarifiai man Dios chaca huamisiquin. Oataima iquisi mato yoia cuscan acahuun mato omitsiscahanonma, —ishon Jesús yoini.

## 13

### *Nocon chaca shatushon Jesús noco amapaiyai cuscan fusti non yopacoin*

<sup>1</sup> Nantianri futsafo Jesusqui fucashon yoiqui isca huafo, —¿Tapimamisiton, man min tapiamun Pilatonun Galilea anoaflo rafu rutua? Ascashon Dios fu tsainti pushu muran aton imi yafi inafoan ahuun imi osia Dios cufiti camaqui huaran, —ishon yoiaifoan.

<sup>2</sup> Jesús ato cumani, —¿Man shinamun nan Galilea anoa rafutan chaca huaqui fina ahuun caifofoan acama cuscan huaquin? <sup>3</sup> Ma. Ascaramafinquin. Marifi maton chaca shatutama nan man shinanpaoni cuscasi shinanriaqui Dios icoinra huashuma marifi man omitsiscapanaca.

<sup>4</sup> Man shinanrimun nan dieciocho yorafoqui pushu cuyacoin ahuun anu Siloé atoqui paoinquin atoti rutuni. Nanfoanmun fasi chaca huaquin finacaimisifo nan Jerusalén anoaflo acama cuscan finonmafain. <sup>5</sup> Ma. Ascaramafinquin. Marifi maton chaca shatutama nan man shinanpaoni cuscasi shinanriaqui Dios icoinra huashuma marifi man omitsiscapanacarán, —ishon Jesús ato yoini.

### *Huiguera fana fimiomahuunoa Jesús ato yoini*

<sup>6</sup> Ascashon ahuara futsahuunoa ato yoiquin ato tapimanon isca huani, —Nocofunun ahuun mau mamaqui fimi fanani ahuun anu huiguera. Ascan chipo fimimisitian fii capaquin oian fimiama ini. <sup>7</sup> Ascacun nan mau ifoan ahuun mau cushumisi yoini, “Rafu non fusti fari na huiguera fimiataima. Un ahuun fimi fipaifialino fimiama. Ascan natian rurahuu. Non ahuara futsa nanno fananon,” ishon yoiaiton. <sup>8</sup> Nan mau cushumisiton yoini, “Ifon un afanan mana futsayononhuun. Afanan na fari fusti non manayonon. Un natian cushusharafain ahuun tapo ano un ahuara futsafo huayonon fimisharanon.” <sup>9</sup> Nan un asca huainomain fimi qui non oinon. Ipaishoma na fari

anaitiano man fimi ya shara itiroquin. Ascan fimiymaiton min ua ruramatiroran,” ishon mau cushumisiton yoiniran, —Jesús ato yoini

*Jesús tunutitian ainfo putoco caya huani*

<sup>10</sup> Ascano chipo Israelifoan ichananti pushu muranshon tunutitian ato Diosin tsain yoini. <sup>11</sup> Ascashon ato yoiaino nannori ainfo putoco dieciocho fari isinintiani atofu nanno ini. Yoshin chacanun nan ainfo nansca huaa. Cayacaficai nimisima. <sup>12</sup> Nanno a fuchishon Jesús yoini, —Ainfoshtan, natianfin min cayaiquin, —ishon yoitan. <sup>13</sup> Ahuun mucuman manmainno samamashta cayacafi ninacahuani. Ascatan, —¡Aicho! Diosin ua cayahuaquin. Dios fasi shararan, —ainfoan huani.

<sup>14</sup> Ascafaino ichananti pushu murannoa niaifo fasi sinaquin ato yoini, —Seis shafatan non yonotiro. Ascan na shafata tunutitiancai tsoa cayayotiroma. Cayapai shafa futsan otiro cayashquin, —ishon ato yoini.

<sup>15</sup> Ascaiton nocon Ifo Jesús a cumaquin isca huani, —Manfin fuparamitsamisifoquin ¿Asca manmun tunutitianfiacun maton moi iyamarai burro man tuputiro unu ano iyoquin ayanonfo? <sup>16</sup> Ascano na ainfofin nocon caifoquin. Abraham ahuun funa. Satanashuunoashu dieciocho fari putocoa. Cayacafi niisharamisima. ¿Asca ahuuscaimun un tunutitian na ainfo cayahuatiromaquin? —ishon Jesús yoaiton. <sup>17</sup> Nicacani Jesús noicasmaifo fasi rafipaicaquin tsoan cumanima. Jesús ahuara sharafo huaiton oincani atirifo aqui unimacoinnifo.

*Mostaza ushuhuunoa Jesús ato yoini*

*Mt 13.31-32; Mr 4.30-32*

<sup>18</sup> Ascaifoan Jesús ato yocani, —¿Ahuu cuscaramun Diosin ahuun yorafo nantifi ato iquifain ato yonotiroquin? ¿Ascan ahua futsarimain Diosin ahuun yorafo cuscaraquin? Un mato tapimai. <sup>19</sup> Nocofunun ahuun pushu umainti mostaza ushu fanani. Asca foaica ihui tio ica. Puiyafu ahuun tushpahuu tsaoafo. Nanscarifiai Diosin ahuun yorafo taui fustirasi ifiashu chipo paratama caitorian, —ishon ato yoini.

*Misi farashatihuunoa Jesús ato ahuara futsa yosini*

*Mt 13.33*

<sup>20</sup> Afanan Jesús ato yocaquin, —¿Ahua futsamun Diosin nantifi iquina cuscaraquin? Un mato tapimai. <sup>21</sup> Diosin ahuun yorafo nantifi ato iquifain ato yonotiro cuscan un mato tapimai. Ainfoan farashati ichapamashtaya harina osishon camisconano farashuinitiro. Nanscarifiai Diospan yorafo taucani fustirasi ifiashu paratama itirofo. Ascashu icoinra huamafo muran ishon ato shara huaino atirifiton ahuunshori icoinra huatiroforan, —ishon Jesús ato yoini.

*Caincaiti atsoshtahuunoa Jesús ahuara futsa ato yosini*

*Mt 7.13-14, 21-23*

<sup>22</sup> Ascashon Jesús pushurasiti ano yoifoni Jerusalén ano nocopaiquin. <sup>23</sup> Ascaiton futsan yocani, —¿Ifon, fustirasitomun aton chaca soacaniquin Upa Dios fu nipashcaquin? —ishon yocani.

<sup>24</sup> Ascaiton Jesús ato cumaquin isca huani, —Uhuun Upa icanocai atirifi iquitirofoma. Ascacun nan un mato yoiai cuscacoin nantifi huacahuun. Nan fai atsoshta tanashcaquin. Ascashon marifi Diosin tsain tanasharacoincahuun iquisharashcaquin. Yora ichapafo iquipaifiacanicaí iquitirofoma. <sup>25</sup> Nan pushu Ifo Diosin ahuun cunu fupotí fupoanocai tsoashta afanan iquitirofoma. Ascacun chifi nishon yoiqui isca huatirofo, “Ifon, noco cunu fupushohuun. Min icano non canon,” huariacani. Tuyuyun ifiaifoancái ato fupushotirofoma. Fuputama ato yoiqui isca huatiro, “Mancaí uhuun yorafoma,” ato huafaino.

<sup>26</sup> Yoicaquin “Non mi futan pifain ayafain huamisi. Min noco yosiaino,” ishon yoishquicani. <sup>27</sup> Ascafiaifoan afanan ato cumaquin isca huashquin, “Mancaí uhuun

yorafoma. Uncai matofu rafumisima. Manfin chaca huamisifoquin. Ascacun umaquinoashu fotacahuun,” ishon ato yoishquin.

<sup>28</sup> Ato asca huaino nannoashu uaicani omitsiscai futsushcani. Dios fu rafuafu Abraham non Isaac non Jacob non nantifi Diosin tsain yoimisifo Dios fu icafo oin atoqui capai man fasi uaiqui. Yoishquin isca huaquin, “Ahuuscashucai non catioma. ¡Ohua! Ahuuscain un Dios nicacasmamisishaquin. Un omitsiscapanacaran,” ishon man yoishquin. Man ascafaiton Diosimaquishon mato potashquin.

<sup>29</sup> Ascaino manifoti anoashu Diosin niaifoan ahuun yorafo iquina ano nococanashu afu unimashcani. Ascaifoan Diosin ato yoiquin isca huashquin, “Uqui fucahuun. U fu ipasharashcaquin,” ishon Diosin ato yoishquin. <sup>30</sup> Shinancapon. Futsafocai natian Diosin ahuun yorafoma. Chipo icoira huacanashu ahuun yora ishquicani. Futsafoan man Diosin tsain nicafiamisishaquin tsoa ascacoinyafoma. Afocai afu itirofomaran, —ishon Jesús ato yoini.

### *Jesús Jerusalén anoafohuun ramapai uaini*

*Mt 23.37-39*

<sup>31</sup> Nantianri Fariseofo Jesusqui fucashon yoinifo, —Nunoashu mai futsa ari cariscatahuun. Nan niaifo Herodes mia ato rutumapai oiquin, —huaifoan.

<sup>32</sup> Jesús ato cumani, —Nan onanya yoitacahuun. “Uncai nunoashu funa caima. Na shafata yafi shafa futsa un yorafo yoshin chaca atohuun nua un ato caya huafain isinincaifori un ato cayahuayoi. Uhuun yonofo anaititan nan un nocopai ari un nocoicai. <sup>33</sup> Un natian uhuun Upa ua yonoa cuscan nan fusti un yonoyoi nan un naitian. Man man tapia Diosin tsain yoimisifo Jerusalén anoshon fusti ato rututirofo.”

### *Jerusalén anoa yorafohuunoashu Jesús uaini*

<sup>34</sup> ¡Ohua! Jerusalén ano icafoan. Manfin Diosin tsain yoimisifo rutufain nan Diosin matoqui nichian futsafori man toquirinin ato tsacaqui nanonfo. ¡Ohua! Tacaranun ahuun facufo ahuun pui naman onutiro cuscan huaquin un mato yafi mato yorafo cushupaifia mancai ua nicapaimisima. Manricai uqui fumisima un mato cushunon.

<sup>35</sup> Ascan natiancái tsoan mato cushuima. Diosiricai afanan mato cushuima. Ascacuái man ua afanan oinnacama Diosin matoqui nichian un nai murannoashu oaitian. Man yoiqui isca huaino, “Diosin nocoqui nichian fasi shara finacaia. Upa Diosin a shara huapanacaran,” ishon man uhuunoa yoishquin, —ishon Jesús ato yoini.

## 14

### *Jesús nocofunun ahuun poyan rafu yafi ahuun quishi ocuma rafuri quihuashica caya huani*

<sup>1</sup> Man ascano chipo Fariseo niaifoan ahuun pushu muranshon Jesús tunutitian pими. Ascaino yora futsafori afu pushu muran iquinifo. —Jesusmain ahua huaicain non oinno, —icanashu. <sup>2</sup> Ascaino nannori nocofunu poyan rafu farashicain quishi rafuri farashiqui futsua. Ato fu iquia oincaquin atirifoan shinannifo, —Jesusmain cayahuaicain non oinno, —ishon. <sup>3</sup> Ascaiton Fariseofo yafi Moisés cunu tapimamisifo Jesús ato yocani, —¿Tunutitianmun non ahua ahuuasca huatiroma? ¿Moisés cununi cuscan tunutitian non yora caya huatiromanmun? —ishon. <sup>4</sup> Ato yocafainocai tsoa puusinima. Ato asca huatan a isinincái Jesús mutsoano cayariscani. Ascacun Jesús a nichini.

<sup>5</sup> Ascashon Jesús ato yocani, —¿Rato man futsamun tunutitian maton facu futsa iyamarai maton moi mai quini muran pacucun man ihuirisca huatiromaquin? —ishon ato yocaino. <sup>6</sup> Tsoa puusinima.

### *Nocofunun yafi ainfo fianaintian piitirofohuunoa ato yoini*

<sup>7</sup> Ascashon Jesús oinni shafacafi tsaopaiyaifoan —Noco oinsharanonfo, —icanashu. Ascaifoan oinquin Jesús ato yoini, —Ua nicasharacahuun un ahuara futsa mato yoi man tapinon. <sup>8</sup> Tsoan mato piimaino pushu ifo tsaoano tsaoyamacahuun. Un tsoa cuscaramaran ato huemapaiyamacahuun. Min pushu ifo fu tsaoaiton mia yoitiro, “Nuno min tsaotioma yora futsa nuno tsaoyoi. Nan mia finoncoian. Ascan minfin futsano tsaotiroquin.” <sup>9</sup> Aton ointaifi pushu ifoan mia anori acaino min fasi rafipaicai. Shararocoai min pasotain tsaotiro. <sup>10</sup> Ascan ifoan mia tsaopaiquin a chaima mia cunatiro. Miaasca huaiton oinonfo a mia shara huai cuscan.

<sup>11</sup> Ascan tsoa oinanpaimisi chipo Diosin ismashquin acai ahuacuma. Ascan tsoa oinanpaimisima naanfin yorafoan ointaifi Diosin yoitiro isca huaquin, “Ua chaima tsaoyohuu. Ufu nipashquin,” ishon yoishquiran, —Jesús ato yoini.

<sup>12</sup> Atoasca huatan nan pimai Jesús yoiqui isca huani, —Min yorafosi yafi yora mafo ichapayafo pimapaiquin nanfosi cunayamahuu. Nanfoanri mia copiquiri aton pushu anoshon mia piimacani. <sup>13</sup> Ascatamarocon man yorafo man pimapaiyai cuscan a yora ahuuomafo yafi yora nipaiqui ranainfo non a fushofori piimacahuun. <sup>14</sup> Nanfoan mato copiquiri shara huapaifiaquicai atirofoma. Ascashu man Dios icari nococun man ato shara huaiton oian cuscan Diosin nantian mia shara huacoinshquiran, —ishon Jesús Fariseo yoini.

### *Nocofunun tushu sharacapacoin yorafo pimapaiyaihuunoa Jesús ato ahuara futsa yosini*

#### *Mt 22.1-10*

<sup>15</sup> Futsan sapa ano tsaoshon Jesús yoini, —Ifon, Upa Diosin nantifi yorafo iquinai ano atofu iquiahu fasi ipasharashquiran, —ishon yoiaiton.

<sup>16</sup> Jesús cumani, —Nocofunu futsan tushu ichapa itishara huashon yora ichapafa chanihuani a futan piishquin. <sup>17</sup> Ascano man itishara huashon ahuun oinmati nichini ato yoitanon. Yoiqui isca huani. “Nan un chani huafu ato yoi foanfafaintahuun isca huaquin, ‘Man nantifi itishara huaqui. Fucahuun,’ ishon ato yoitahuun,” huani.

<sup>18</sup> Asca huano caashon ato yoiaiton, “Un cayotromaran,” ishon yoipacunifo. Futsan yoiquin isca huani, “Un rama mau fia. Natian un mau ari capai oincal. Ascacun un mia yoi un ari cayotromaran,” ishon yoini.

<sup>19</sup> Futsanri yoiqui isca huani, “Un rama moi rafurasi nushua mucus fustiti un fia. Un natian ato yonomapai yonosharacanimainquin un ato oinpai. Ascacun un ari cayotromana mi futan piishquin,” ishon yoini.

<sup>20</sup> Ascano futsan yoiquiri isca huani, “Un rama ainfo fia. Ascacun un ari cayotromana mi futan piishquin,” ishon yoini.

<sup>21</sup> Asca huaifoanno oinmati ahuun ifo ano nasoshon nan yoiafo cuscari yoini. Ascaiton nicai pushu ifo atoqui sinacoinni. Afanan ahuun oinmati nichiqui yoini, “Natian pushurasi anoa faifoti ano cariscatahuun yora ahuuomafo yoifain nipaiqui ranainfo yoifain fushofori yoiriscatahuun un ato pimanon,” ishon yoini.

<sup>22</sup> Asca huano afanan cashon nan yoia cuscacoin ahuun oinmatinin huashotani oi. Naso cura ahuun ifoqui oshon yoini. “Ifon, mian yoia cuscan mun ato yoia. Ascan natian man fucani. Ascafia min pushu fospicanima. Tushufori tushuiran,” huaiton.

<sup>23</sup> Pushu ifoan afanan yoini, “Afanan fai futsafo ari cariscatahuun ua ato yoishoshquin funonfo. Ato yoihhuu isca huaquin, ‘Uhuun ifoan pushu ano nitutama furiscacahuun mato pimapaiquin,’ ishon ato yoitahuun uhuun pushu fospifunonfo.

<sup>24</sup> Nan yorafo un tau huaqui ato pimapaiyafoancai u futan pinacafoma,” ishon pushu ifoan yoiniran, —Jesús ato huani.

### *Cristo tanapaifi yora itisharatiroquin omitsiscashoshquin Mt 10.37-38*

<sup>25</sup> Yorahuanrasi afu foaifoan. Ifiacucahuan ato yoini, <sup>26</sup> —Tsoan ua finonmacaifain apa yafi ahua non ahuin non ahuun facufo non ahuun yorafo non poifo afiri noiashucai ua tanamisi itiroma. <sup>27</sup> Ascan unfin mato ihui coyán iquinanqui nashoshquicain. Ascafia tsoan yoiqui isca huaima, “Natian un Jesús tana. Ascacun nai omitsiscafiaquicai un shinanchacaimaran,” ishon tsoan anori yoicasmai acai ua tanamisi itiroma.

<sup>28</sup> Nanscarifiai tsoan pushu huapaiquin iquisi shinanyotiro ahuun pui itiromainquin. <sup>29</sup> Ascano pui iyamaitocai pushu huatiroma. Quishifo fusti nichiano yorafo aqui cashutiofo. <sup>30</sup> “¡Cuu! ¡Oincapon! Na nocofunun ahua huatiroma. Ahuun quishifo fusti nichian. Pushu anaitima. Ascaracai sharamaran,” icashu aqui cashutiofo. Nanscarifiai nan man naitian ua tanacahuun. Nan man naitian ua tanapaiyamaquin “Un Jesús tananon,” iyamacahuun.

<sup>31</sup> Nanscarifiai niaifo rafu noconain aton ranushumuafu rutunanonfo. Futsa diez mil ranushumuafu aya icaino futsa veinte mil ahuun ranushumuafu ya. Ascacun nan diez mil ranushumua ayaton iquisi fasi shinainyotiro ahuuscamaín acanicain. <sup>32</sup> Ascacun afu niaifo tsain fomayotiro isca huaqui, “Non rutunainmaquin. Nanscanon. Min noco rutuyamacun min fipaiyai cuscan mia inantiroran,” icashu raunantirofo. <sup>33</sup> Nanscarifiai ratoranfoan uhuunshon nantifi ahuunafo potayamashucai ua tanamisi itiroma.

### *Sao sharacunma non fipaitiroma*

*Mt 5.13; Mr 9.50*

<sup>34</sup> Ascacun shinancahuun. Sao sharacun non tototiro. Asca sao sharamacai non tototiroma. Chacacun. <sup>35</sup> Nanscaracai tsoanshta yopaima. Potacani. Nanscarifi aquin tsoan uhuunshon ua tanasharayamacai uhuun nuusharaima. Chacacoin iqui. Tsoanmain man pafiqui sharayaquin ua nicasharacahuun,—ishon Jesús yoini.

## 15

*Chashoan cushumisiton ahuun chashoan funoa fuchiahuunoa Jesús ato ahuara futsa yosini*

*Mt 18.10-14*

<sup>1</sup> Asca nantiantanri niaifo puifishomisifo yafi yora chaca huamisifo aqui funifo ahuun tsain nicai fucani. <sup>2</sup> Ascaino Fariseofo yafi Moisés cunu tapimamisifo Jesusqui tsain chaca huaquin yoinifo isca huaquin, —¡Oincapon! Jesús yora chacafo fu rafutiro ato futan piaiton,—ishon yoinifo.

<sup>3</sup> Ascaifoan onanshon Jesús ato yoiqui isca huani ahuara futsa ato tapimanon, <sup>4</sup> —Ratoran man futsa cien chashoan ayafiano fustishta amaqi funoano atirifi nan noventa y nueve fasi fununun man potayofaintio. A fusti funoa funaiyoicaqui nan man fuchiaitiam. <sup>5</sup> Ascano fuchishon unimacain chishtoinifoan man iyafaintiro ahuun pushu ano foi caquin. <sup>6</sup> Asca huatan ahuun pushuano nocoshon man atoti chanihuai a chaima icafo yafi afu rafuafo ato cunaqui isca huatiro, “U fu unimai fucahuun. Uhuun chashoan funoa mun fuchiaquin,” ishon man ato yoitiro. <sup>7</sup> Ascacun un mato yoi nanscarifiai futsan ahuun chaca shatucoianshu afanan ipaoni cuscan atama Dios ifoacoinna oincani nantifi Dios icanoafo fasi unimacoincani. Noventa y nueve yora sharafo nanfocai tsoa Diosqui nasoima manmain tanasharacanashufin. Ascan nanfogui unimafiacani nan chaca huamisiton Diosin icoinra huanocaifin fasi aqui unimai finacoincaniquin.

### *Ainfoan ahuun toro funoa fuchiahuunoa Jesús ato ahuara futsa yosini*

<sup>8</sup> Nanscarifiaiyainfo futsa mucu rafuti toro paratamacoin ahuun pui nuua aya ini. Pushu muran fusti funoni. Ascano lamparina otani ahuun tapa ano matsoyanan funashquin. Ascashon funariaquin fuchini. <sup>9</sup> Fuchishon ahuun yorahuafu yafi a chaima icafo cunashon ato yoiqui isca huani, “Uhuun yorafoan ufu unimacahuun. Uhuun

toroshta mun funofiaflashon natian mun fuchiaran,” ishon ato yoini. <sup>10</sup> Nanscarifiai tsoan ahuun chaca shatuashma man funoa. Ascaflashon Diosin icoinkra huaino Diospan oinmatifo nai murannoashu fasi aqui unimacoincaniran,—ishon Jesús ato yoini.

*Apa furu rau huaa cuscahuunoa Jesús ato ahuara futsa yosini*

<sup>11</sup> Afanan Jesús ato yoiqui ahuara futsa ato tapimaquin isca huani, —Nocofunu futsa facu rafu ya ini. <sup>12</sup> Ascano chipocuton apa yoini, “Upan, nan naaquin mian inanfainonpacoai natian iquisi ua inanhuan,” huani. Ascaiton apan ahuun pui cashcu futsa ahuun facu chipocu inanni.

<sup>13</sup> Ascano shafa ranan finontan ahuun facu chipocuton nan apa inan cuscan nantifi ahuun rafanan pui fiananan huani. Asca huatan mai futsa chaicoin ari cani. Nanrishon ahuun pui shafatifi potani monocain pauncaiyainfo furomafo fu icai. <sup>14</sup> Asca huaqui nantifi ahuun pui potaquin anaitini. Ascashon nantianri a mai ano tushu yamacoin ini. Ascashu arifi chipo tushu yamaino fasicoinni. <sup>15</sup> Ascano nan mai ariashu nocofunu futsa ano cashon yono yocaqui isca huani, “Un mia yonoshopairan,” ishon yocani. Ascaiton pushu ifoan nichini yahuarasi faasi funununshon pimanon. <sup>16</sup> Ascashon yahuarasi maropa ahuun shacafo pimani. Ascaino nantian fasi fonicoinquin arifi piqui rashquini. Tsoancai a pimanima.

<sup>17</sup> Ascaquicai nan chaca shinanpaoni cuscan afanan shinanpainima. Nantian cay-acafi shinanquin isca huani, “¡Ohua! Uhuun upa ahuun oinmatifoan natian man piisharafo. Aton tushufori man tushu huafu. Asca unfin nunoashu fonicoin naicain.

<sup>18</sup> Asca natian un afanan uhuun Upa ari cai. Nocoshon uhuun upa un yoitiro isca huaquin, ‘Upan, un Dios chaca huafain miari chaca huamisi. <sup>19</sup> Ascan uncai natian min facu cuscara itiroma. Natian min yonoshomisi cuscara un itiroran,’ ishon uhuun upa un yoishquin.” <sup>20</sup> Nannori shinantan apa ari cani.

Ascashu caiton chai cunoa apan ahuun facu fuchini. Fuchitan fasi ahuun rama-paicon aqui ichoni. Aqui nocoshon icoacufoan tsoatoshini.

<sup>21</sup> Ascaiton apa yoiqui isca huani, “Upan, un Dios chaca huafain miari un chaca huamisi. Asca un afanan natian min facu cuscara itiromaran,” ishon yoifiaino. <sup>22</sup> Apan ahuun oinmati yoini, “Ichoriscatahuun. Sahuuti sharacapacoin yafi anio fifain sapatori firiscatahuun. Uhuun facu ua sahuumashoshcaquin. <sup>23</sup> Ascashon moipan facu shoasharari ua rutushocahuun uhuun facu un pimanon. Noco sharano non fasi aqui unimanon. <sup>24</sup> Uhuun facu man naa shinantsa amisishaquin afanan man nasoquin. Natian afanan ufu nuno nia. Man funofiani natian afanan man non fuchiaquin. Non ichananon nantifi aqui unimaquin pifain non mononon. Noco manutifo non manunon,” ishon apan yoini.

<sup>25</sup> Ascaino iyoa mau ano yonofaishu nasoqui pushu chaimashon nicani fasi manuti manuaino monoafioan. <sup>26</sup> Ascaiton nicaquin ahuun oinmati cunashon yocani, “¿Uhuun upa pushu anoshon ahua huacanimun?” ishon yocaiton. <sup>27</sup> Ahuun oinmatinin yoini, “Min ushto rama nocoano min upa fasi unimacoinquin ato ichanan huaa moipan facu shoashara ato pimafain manuti manufain ushto ahuuscatama noco sharano unimaquin upa aquiran,” ishon yoini.

<sup>28</sup> Ascaiton nicai iyoa fasi sinacoin pushu muran iquinima. Ascaino chifi catan apa ahuun facu iyoa yoini, “Upashtan, pushu muran iquiyopun. Min ushto rama noco sharaquin,” ishon yoititon. <sup>29</sup> Cumataama apa yoini, “Shinanpon. Un fari ichapa min oinmati cuscara un mia yonoshomisi. Ascashu min ua yoiai cuscacoin un huamisi. Uncai yoitimamisima. Ascafiacucai mian chashoanun facu rutushomisima uhuun yorafo fu un ichananshon unimaqui un pinon. <sup>30</sup> Asca min facu chipocu min inan cuscan nantifi man pota. Ainfo furomafo fu iqui. Ascaflashu afanan miqui nocoaino unimaqui min a moipan facu rutushonaran,” apa huaiton.

<sup>31</sup> Apan yoini, “Upashtan, miancai potamisima. Min ufu iitiani. Nan uhuunafofin minariquin. <sup>32</sup> Ascafia min ushto man naa shinantsa amisishaquin natian man noco shara. Man funofiani man non afanan fuchia. ¿Asca ahuuscacumun non ichanainmacain aqui unimashquin?” ishon apan furu iyoa yoini, —ishon Jesús yoini.

## 16

### *Niaifo patashari ahuun niaifocoinin yoia cuscacoin anima*

<sup>1</sup> Ascatac Jesú afu rafuafo yoiquin isca huani, —Nocofunun futsa mafo ichapayaton ahuun oinmati futsa niaifo patashari huani. Ascashon chipo nica ahuun oinmatinin ahuunafo cushusharashocuma. <sup>2</sup> Nicaquin cunashon yocani, “¿Ahuuscai uhuunafo min cushusharamisimamun? Natian min afanan uhuun niaifo patashari iquima. Asca nantifi uhuun cunufo ua nifiafo ati shara huashohuun. Ahuutimain ua nifiafoquin ua ismashquin,” ishon ahuun niaifoan yoini.

<sup>3</sup> Asca huaiton nicaquin ahuun oinmatinin shinanni, “¡Ai timafin! ¿Unmun natian ahuuscaquin? Uhuun niaifoan ua pota. Uncai afanan a yonoshonima. Unfin nan papio fusti yonoqui fuya huamisiquin. Uncai curushcain yonotiroma un mau huapanan. Unricai yocacamisi ipaima. Un fasi rafipaitiro. <sup>4</sup> ¡Aira! Natian mun shinanshara. Ratoran futsafoan uhuun niaifo ichapa nifiafo un aton shucashopacufoanni ichapama nifinonfo. Un ascaino uqui unimanonfo. Uhuun niaifoan ua potafaino nan futsafoan ua shara huatiroforan,” ishon shinanni.

<sup>5</sup> Ascatac nan niaifo nifiafoti cunani. Asca futsa taui aqui ocun yocani, “¿Uhuun niaifo ahuuti min nifiamun?” ishon yocaiton. <sup>6</sup> “Ocho cientos galones de shuni un nifiaran,” huaiton. “Min papio futsaqui ahuu. Cuatro cientos galones de shuni cunuhuu,” ishon niaifoan ahuun oinmatinin futsa yoini. <sup>7</sup> Asca niaifo nifian futsari aqui ocun yocani, “¿Uhuun niaifo ahuuti min nifiamun?” ishon yocaiton. “Cien forusa trigo un nifiaran,” huaiton. “Min papio futsaqui ahuu. Ochenta forusa un nifiaran, ishon cunuhuu,” huani.

<sup>8</sup> Ascano niaifoan ahuun oinmatinin acai cuscan oinquin yoini, “Minfin fasi onaiancoianquin. Min aca cuscan futsafoan mia shara huacaniran,” ishon yoini. Ascano icon nan icoinra huamafoan fasi tapicoianfo yorafu parashcaquin. Nanfoan tapia cuscacai nan ua icoinra huafuan tapiafoma. Ascafia nan icoinra huafuancai tsoa parapaitirofoma icocoin fusti yoitirofo.

<sup>9</sup> Un mato yoinon isca huaquin. Man pui ayashon nan Diosin tanamisifo yopaifoan ato inancahuun. Man ato shara huacun mato noinonfo. Ascafia naashucat afanan man pui yopaima man Dios ari nocaiton nan man pui inannifoan mato yoiqui isca huatirofo, “¡Aicho! Min ua shara huamisi. Natian min nocofu Dios ari nocoa. Noco fu ipahuun,” ishon mato yoitirofo.

<sup>10</sup> Ratoran futsa ichapama ayafiashon nanshtahuunshon nan icaiti ahuunshon fisharashori ichapayashon nanscarifi huatiro ahuun fisharaquin. Parashquima. Ascano ichapamayaflashon ahuun rafanan fisharashoma parain. Nanscarifi huaqui ichapayafiashon fasi finacaiqui ahuun rafanan fisharashoma paratiro. <sup>11</sup> Ascacun nuno mai anoashu man aya cuscan afohuunshon man shara huamaqui man pota. Diosiri mato inanpaiyai cuscacai mato inantiroma. Matoricai icoinra huatiroma. Mato inanpaiyai cuscan nanfori man potatiro. <sup>12</sup> Nanscarifiai futsana man cushusharayamaiton. Tsoan mato inancointiromun matonacoin inon.

<sup>13</sup> Ascano oinmatincai ahuun ifo nanno rafu nantian yonoshotiro. Futsa noifain futsa noicasmatiro iyamarai futsa nan yoia cuscacoin huashotiro. Ascashon futsa, “Nacai ahuamaran,” ishon shinantiro. Tapicai huatiroma ratocaimain nicasharaiquin. Nanscarifiai Diosin yonoshopaiquicai man pui noitiroma maton ifo inon, —ishon Jesús yoini.

<sup>14</sup> Nan Fariseofoan pui noiaifohuunoa Jesús ato yoiaiton nicacani aqui cashupaiqui yoinifo. —¡Cuu! Ahuuomafashion noco yoiran, —icaifoan. <sup>15</sup> Onanshon Jesús ato yoini, —“Nafofin sharafoquin” man yorafo huamapaifaiton Diosin man mato onan. Manfin yorafo paratiroquin “Nafoanfin shara huacaniquin,” ishon yorafo man shinanmapaifaiton Diosin man mato onancoinshon ahuun nomuran shinain, “Nafoan fasi chaca huacaniran,” ishon Diosin matohuunoa shinain, —ishon Jesús ato yoini.

### *Moisés cununi cuscan yafi Diosin nantifi ahuun yorafo iquinai cuscan*

<sup>16</sup> —Moisés Dioshuunshon cununi cuscan yafi Diosin tsain yoimisifoan cununifo cuscacoin Juan nocaitian futsafoan mato yoimisi. Juanpan tsain shara futsa noco yoiquin tau huaquin isca huani, “Diospan Furun matoqui chipo oi. Ascacun maton chaca shatucahuun. Man ipaoni cuscan afanan ascayamacahuun. Natian Dios fusti shinancahuun,” mato huamisi. Urifi un mato nannori yoimisi. Asca tsoan ascaran shinancanashu Dios niaifo ari iquitirofo. Nan fusti shinanshu Diospan yora itirofoquin.

<sup>17</sup> Diosin yonoa Moisés cununi cuscacoinashu non icoinsharanon. Noco yononi cuscaricai non unutiroma ahuara sharafo huaquin. Mai yafi nai cuyotirofiashucal Diospan tsain cuyopacunacama.

### *—Funun ahuin unuyamaino ainfoanricai funu unuttiromaran, —ishon Jesús ato yoini Mt 19.1-12; Mr 10.1-12*

<sup>18</sup> Ratoran futsan ahuun ahuinunuquin futsan fiishquin man chaca huai ahuun ahuincoinmafu icaino. Ainfon ahuun funu man unuquin futsan fiishquin arifi man chaca huai ahuun funucoinmafu icaiton, —ishon Jesús ato yoini.

### *Nocofunu mafo ichapa yafi Lázaro ahuuomashta ini*

<sup>19</sup> Ascashon afanan Jesús ato yoiqui isca huani, —Nocofunu futsa mafo ichapayaton sahuuti mapash sharacoin sahuufain tushu sharacapafo shafatifi pisharamisi.

<sup>20-21</sup> Asca futsan ahuun anu Lázaro nocofunu mafo ichapayaton ahuun cunu caincaiti ano tsaoni. Yoratishon coyoashu tsaocun pashnan aqui oshon ahuun coyo ano tashoni. Asca Lázaro ahuuomaton shinanni, “Na nocofunu mafo ichapayatomain nan tushu huua ua inanpainonrati,” ishon shinanni.

<sup>22</sup> Ascashu Lázaro naani. Naacun Diosin oinmati afu nai muran icafoan ahuun yoshin Dios icari iyonifo. Nannori Abraham ica ini. Ascashu nan mafo ichapayari arifi naacun mai huanifo. <sup>23</sup> Ascano omitsiscapanacafo muran cashon nan mafo ichapayaton Abraham yafi Lázaro foisquin oian icafo ini. Arishon chii isin tunuyamacaiquin cunani. <sup>24</sup> “Uhuun Upan, Abraham, uhuun ramapaihuu. Ua Lázaro nichishohuun. Ahuun mutotinin ua ana muchana huanyonon. Un nunoshon chii isin tunuimaquin,” ishon cunaiton.

<sup>25</sup> Abraham cumani, “Upan, min shinainmamun min mai anoashu isharapaoni. Asca Lázarofin omitsiscapaoniquin. Asca natianfin Lázaro man isharaquin fasi unimashara-coinquin. Asca minfin natian fasi omitsiscaiquin. <sup>26</sup> Mia ari capaifiaicai non ahussashu catiroma. Mirificai min ahuuscashu nuno nocoqui otioroma. Manhuanhuan rafutan noco naquihua. Tsoan finontiromaran,” ishon Abraham yoiaiton.

<sup>27-28</sup> Afanan cumani, “Upa Abraham, unfin mucu fustiti yora yaquin. Asca Lázaro ato ano nichihuun ato Diosin tsain yoiaiton nicacoinonfo nuriashu omitsiscai futirofoquin,” ishon yoiaiton.

<sup>29</sup> “Nanfomin man ayafoquin Moisés futan Diosin tsain yoimisifoan cununifo cuscan huafaifin afi ointirofoquin,” Abraham huaiton. <sup>30</sup> “Ma. Upan, yora naashu funiaton uhuun yorafo yoiaitofin nicatirofoquin. Ahuara chaca huamisifo cuscan shatutiro Dios icoingra huashcaquin,” ishon yoiaiton. <sup>31</sup> “Ascan nan Moisés cununi cuscan nicayamafain Diosin tsain yoimisifoan yoiaiton nicayamashomun nan ratoran futsa

naashu funiaricai icoinra huatirofomaran,” ishon Abraham yoiniran,—ishon Jesús ato huani.

## 17

### *Non chaca huaino fasi musucoin*

*Mt 18.6-7, 21-22; Mr 9.42*

<sup>1</sup> Asca huatan Jesús afu rafuafo yoini isca huaquin, —Ahuaraoan mato chaca huamapaifafainshcani. Ascafia nan futsa chaca huamafocaifin fasi omitsiscai fina-coinshcaniquin. <sup>2</sup> Ascashon ua icoinra huafuna futsan chaca huamai nancaifin fasi onaintimaquin finacoinquin. Ascacun chaca huamataima toquiri ya tunushushon noacoin muran potafin shara icuanaquin.

<sup>3</sup> Asca oinfain. Tsoan futsa chaca huamaino fasi musucoin. Mi futan tanamisi futsan mia chaca huaiton rauhuahuu afanan mia asca huanonma. Ascashon min yoiaiton nicaquin yoinon isca huaquin, “¡Ohua! Ua rauhuahuu. Un afanan ascaran chaca huanonma,” ishon mia yoiaiton a rauhuahuu. <sup>4</sup> Nan shafata fusti mia chaca huaquin ichapa huafashion nan chaca huati mia rauhuapairaiton rau huafafaincahuun,—Jesús ato yoini.

### *Non icoinra huaiton Dios noco ahuamamishti huashotiro*

<sup>5</sup> Asca huatan afu rafuafoan Jesús yoinifo,—Ifon, non mia fasi icoinra huapaiquin noco finonmafain icoinra huamahuu,—ishon yoiaifoan.

<sup>6</sup> Jesús ato cumani,—Nan mostaza ushu uhuapamashtacoinfiashu foaicanu uhuapa-coin yositiro. Nanscarifiai taui man ua icoinra huashon uhuun tsain man tapisharay-otiroma. Chipo uhuun tsain maton nomuran man nanucoinshon ihui uhuapa ahuun tapofoya tsucucain “Ununhuan muran pacuhuu,” man huaino a muran afanan fanainacahuan man yoia cuscan atiro.

### *Ahuun oinmatinin ifoan yoia cuscacoin ashotiro*

<sup>7</sup> Ascacun tsain futsa un mato yoinon. ¿Man oinmati yashomun mato maumamaqui oro yamaraquin chashoanfo cushuashu yatashta pushu ano nasoaitomun ahuun ifoan yoitiromun? “Piyohuu,” huatiromun. <sup>8</sup> Ma. Ascarama. Asacatamarocon man yoitiro isca huaqui, “Ua pichashoniyohuu. Ascan man icun mian yoitiro un picanon. Mun piqui anaitiano min chipo pitiroran,” ishon man oinmati yoitiro. <sup>9</sup> ¿Asca ahuun oinmati nan yoia cuscacoin aino ahuun niaifoan yoitiro “¡Aichoran! Min fasi shara huaran,” ishon yoitiromun? Ma. Afi tau huafaincái acama. Ahuun ifoan yonoa cuscan huaa. <sup>10</sup> Nanscarifiai Diosin mato yonoa cuscacoin aquin marifi yoicahuun isca huaquin, “Noncái ahuama. Nofi tau huafaincái non acama. Nocon Ifoan noco yonoa cuscan non acaran,” ishon yoicahuun,—Jesús ato huani.

### *Jesús mucus rafuti nocofunufo aton nami tocoi futsua cayahuani*

<sup>11</sup> Jerusalén ano caaquin Jesús nan fai Samaria yafi Galilea shatsocamun rafu finon-faini. <sup>12</sup> Ascashu pushurasi ano nocano mucus rafuti nocofunufo aton nami tocoi futsuafo aqui noconifo. <sup>13</sup> Ascatan ato chaima caiton oi ashcafinin cunganifo,—Nocon Ifo Jesús, nocohuun ramapaihuu,—huaifoan.

<sup>14</sup> Ato oinquin Jesús ato yoini,—Diosin yoimisifo ano fotacahuun. A man cayashara ato ismashcaquin,—ato huaino focani cayariscatanifo.

<sup>15</sup> Ascaíno fustiton mua man caya sharashu afanan Jesusqui naso curan oi ashcafinin yoini,—¡Aicho! Dios shara. Ua cayahua shararan,—ishon yoini. <sup>16</sup> Ascatan Jesús naman fuopacuahuan,—¡Aicho! Jesús, min ua cayahua. Min fasi sharacoinran,—ishon yoini. Naanfin Samaritanon iniquin.

<sup>17</sup> Ascaiton Jesús yoini,—Un mucus rafuti nocofunufo cayahuafia na fustiton ua shinanquin ua yoishara yoa. <sup>18</sup> ¿Ahuuscaimun na nocofunu uhuun caifomafiahuun nan fusti

uqui nasoa Dios shara huapai futsafo uqui nasoyamafiaino? —ishon Jesús yoini. <sup>19</sup> Asca huatan a Jesús yoini, —Funicaitahuun. Min ua icoinra huashufin min cayasharaquin, —ishon Jesús yoini.

*Ahuuscashumain Diosin nantifi iquinai cuscan iiishquicain*

*Mt 24.23-28, 36-41*

<sup>20</sup> Ascano Fariseofoan Jesús yocanifo. —¿Ahuutianmun manifotiton ato niaifo Dios iishquiquin? —ishon yocaifoan. Jesús ato cumaqui isca huan, —Ahuuscashocai Diosin yorafo iquinai cuscan man ointiroma. <sup>21</sup> Ascashu Upa Diosin mato nomuran mato niaifo itiro mato yonoshquin. Ascacucai tsoan yoitiroma isca huaquin, “Diosin niaifo nuno noco mai ano icaraca,” tsoan huatiroma. Futsaricai yoitiroma isca huaquin, “Diosin mai futsaria niaifo icaran,” ishoncái tsoan yoitiroma, —ato yoitan.

<sup>22</sup> A fu rafuafori yoiqui isca huan, —Chipo un mato anoashu matomaqui caano fasi man ua shinancoinquín yoishquin isca huaquin, “Nocon Ifo no fu ipainon. Fasi non oinpaicoinran,” ishon yoifiaquicai man ua oinshquima. <sup>23</sup> Ascano futsafoanri mato yoishqui isca huaquin, “Nanfin Cristoquin. Oa ono icaran,” ishon futsafoan yoiaino futsafoanri, “Nuno icaran,” ishon yoiaifoanno. Ari foyamacain atori tanayamacahuun. <sup>24</sup> Uficoín un oaiton man ua oinshquin. Caná facaicaiton shafacafí non oinriscatatiro. Nanscarifiai un oaiton shafacafí man oinshquin. <sup>25</sup> Ascafiašhu taui un fasi omitsiscainshquin. Natian nia yorafoancai ua niaifo huapaicanima.

<sup>26</sup> Noé niyoano inifo cuscacoinrifai un afanan oaitian nanscarifi ashcani. <sup>27</sup> Ascan nantian Dios shinantama pisharafain ayafain fianansharacainaifoanno faitahuan noconi. Nanscasi ariaifoanno. Noé ahun shashohuan muran iquitapaiyaino oinhuanrasí furiai unuyamacaiyaino faitahuanun nantio manifoti unuhuan marafumuni. Ascaino asai futsunifo.

<sup>28</sup> Nanscacoínrifi nan nocofunu Lot niyoano nanscacoínnifo. Dios shinantama pisharafain ayafain inanmitsashon ahuarafó fifain mau fanafain pushu huapaonifo.

<sup>29</sup> Nanscarifi ariaifoanno Lot Sodoma anoashu caani. Diosin yonoa cuscan. Nantianri Diosin yononi nai murannoashu chihuan atoqui pacunon. Ascaino Sodoma anoafó cuyocoínnifo. <sup>30</sup> Nanscacoínrifi aashqui un afanan oaitian. Ua shinantama afi apaiyaifo cuscasi huariaifoanno.

<sup>31</sup> Ascan tsoa pushu fomancayan niashucái afanan ahun pushu muran iquitiroma ahun ahuara fiishquin. Ascatama ichoriscatahuun. Nanscarifiai tsoacai mau yonofiai afanan pushu ano nasotiroma ahun sahuuti fiishquin. <sup>32</sup> Ascacun Lotpan ahuihu-unoa shinancahuun. Naanton ahun ahuarafosi shinain ifiacucahuun oinpai nariscani cuscan marifi ascayamacahuun.

<sup>33</sup> Ascan tsoan shinanqui isca huai, “¡Ohua! Un Jesús tanaiton raca ua omitsisa huacanicati,” ishon shinanquin uhuun tsain cachiquiri huaa. Nanscara yorafo naashu omitsiscapanacafo. Ascan tsoa uhuunoashu omitsiscacai naa. Nanscara yorafofin nacanashu ufu isharapacunacafoquin. <sup>34</sup> Ascacun un mato yoinon un oaitian yora rafu mosquitero muranfiashu fusti ufu cariscatanaino futsa nitushquin. <sup>35</sup> Nanscarifiaiyainfo rafu nanincani futsa ufu uari cai yamariscatanaino futsa nituashu omitsiscashquin. <sup>36</sup> Ascaino nantianri nocofunu rafu mau ano yonocani futsa uari cai yamariscatanaino futsa nitushquin omitsiscapanacafo muran caashquin, —ishon Jesús ato yoini.

<sup>37</sup> —¿Ifon, raqui focanimun? —ishon yocaifoan. Jesús ato cumaqui isca huan, —Ahuarafó náa nanno cotocotofo nocoriscatatiro. Nanscarifiai un nocooaitian ua tanamisifo uqui furiscatashcaniran, —ishon Jesús ato yoini.

<sup>1</sup> Afanan Jesús ahuara futsahuunoa ato yoini ato tapimashquin, —Upa Dios unutama cufiriai atsananonfoma. <sup>2</sup> Pushurasi futsa aria niaifo ini. Nan niaifo Diosqui ratutama yorafuhunri noinima. <sup>3</sup> Ascafaino ainfomaqui funu naa aqui oshon yoiriapaoni, “Ua noicasmamisiton ua chaca huaiquin ua yoishohuun ua afananasca huanonma,” ishon yoifiaino <sup>4</sup> niaifo ahun ramapaitama. Puusinima. Asca huafaino aqui ihuan ihuanpaoni. Ascaiton niaifoan yoini isca huaquin, “¡Cuu! Na ainfo funuoma fasi ua fucash huarai. Uncai Diosqui ratuima. Na ainfohuuricai un ramapaiyamafaino <sup>5</sup> fasi ua fucash huarai. Ascacun afanan ua fucash huanonma un aroshoniran,” ishon niaifoan yoini.

<sup>6</sup> Ascano a niaifo chacapan yoini cuscan nicacahuun. Chacafashion nan ainfo funuoma yoiriaiton man aroshoni. <sup>7</sup> Asca Diosicai a niaifo chaca cuscarama. Ascata-marocon fasi nocoo ncapai. Noco nicaicain atsanatiroma. A catoanfoan shafatishon yafi yamutishon cufiaifo cuscan ato nicacasmaima. <sup>8</sup> Ascacun un mato yoi nan manamisifo mato aroshoriscatashquin. Ascan nan mato noicasmamisifo onaintimashqui. Ascafia un chipo afanan uhuun Upa Dios icariashu mai ano oaino fustirasiton ua icoinra huacaniraca, —ishon Jesús ato yoini.

### *Fariseo yafi niaifo pui fishomisihuunoa Jesús ato ahuara futsa yosini*

<sup>9</sup> Ascan afanan ato ahuara futsa yoini ato tapimashquin, —Unfin sharaquin. Uncai chaca huamisima. Yora futsafo ua cuscaramaran, —ishon shinanmisifohuunoa Jesús ato yoiquin isca huani, <sup>10</sup> —Nocofunu rafu Israelifoan Dios fu tsanti pushu muran iquinifo Dios cufishcaquin. Futsan Fariseo icaino futsan niafo pui fishomisi ini. <sup>11</sup> Nan Fariseo ninacahuan cufiqui isca huani, “Uncai tsoa cuscarama. Unfin nocofunu sharaquin. ¡Aichoran! Upa Diosin, uncai na nocofunu niaifo pui fishomisi cuscarama. Uncai yora chacafo cuscarama. Unricai yomutsoma. Uncai tsoa paratiroma. Unfin yora futsa shara huatiroquin. Uncai uhuun ahuinma furi imisima. <sup>12</sup> Nan semantanifi un piqui tunuquin rafu huafafaini. Nan un fiashtafin un mia pashtashofafainiquin, Upa Diosin,” ishon Fariseo yoini.

<sup>13</sup> Ascafainocai nan niaifo pui fishomisiton anori yoitama. Mananquiri foistamari. Tutipacutishon shochi sutu sutuaquin yoini, “¡Ohua! Diosin, un mia fasi chaca huamisi. Uhuun ramapaihuu. Un chacaquin,” huani.

<sup>14</sup> Un mato cayacafi yoi. Nan pui fishomisi Diosin ahun chaca soashofain ahun yora ima. Ascafiaquicai nan Fariseo ahun chaca soashonima. Ascan tsoan ahuunoa yoiqui isca huai, “Un shararan,” ishon futsafo shinanmapai nanscara yorafo chipo Dios ismashquin arifi chaca huamisicun. Ascan tsoan yoiqui isca huaa, “Unfin chaca huamisiquin,” ishon yoicun nanscara yorafotin Diosin aton chaca soashotiroqui afu ipanonfo, —ishon Jesús huani.

### *Jesús Apa Diosihuunshon facufo shara huani*

*Mt 19.13-15; Mr 10.13-16*

<sup>15</sup> Asca yorafuan aton facumishti Jesusqui ihuunifio ato manmanpacuquin Apa Dios cufishonon. Asca huafiaifoan afu rafuafoan ato yoini, —Maton facufo ihuutan nocon Ifo fucash huayamacahuun, —ishon yoinifo. <sup>16</sup> Asca huafiaifoan Jesús facufo cunani, —Uqui fucahuun, —ato huatan afu rafuafo yoini, —Unuahuun uqui funonfo. Ato nitun huayamacahuun. Uhuun Upa Dios niaifo icariafotin nan facumishti cuscaraforiquin. <sup>17</sup> Ascacun un mato icon yoi. Nan facumishtifoan Dios icoinra huacoin-nafo cuscan tsoan icoinra huashmacai Dios icari iquinacafomaran, —ishon Jesús ato yoini.

### *Nocofunu mafo ichapaya Jesús fu tsainni*

*Mt 19.16-30; Mr 10.17-31*

<sup>18</sup> Ascaino Israelifoan aton niaifo futsa Jesusqui oshon yocaquin isca huani, —Tapimamisiton, minfin sharacoinquin. Ua tapimahuu. ¿Unmun ahuuscatiroquin Dios fu ipashquin? —ishon yocaiton.

<sup>19</sup> Jesús cumani, —¿Ahuuscaquin mian “shararan,” huaimun? Dios fusti sharaquin. <sup>20</sup> Diosin yononi cuscan man min tapian. Yonoqui isca huani, “Min ahuinma fu iyamahuu. Futsa rutuyamahuu. Ahuara onuyamahuu. Chaniri yoiyamahuu. Ascashon upa yafi uhuardi nicasharafain ato shara huahuu,” —ishon yoiaiton.

<sup>21</sup> —Nantifi mian yoiai cuscan facushon un nicainifoannaran, —huaiton.

<sup>22</sup> Afanan Jesús cumaque, —Fustiricai min nicataima. Nan yoiqui isca huaa. Ahuarafo inanmitsashon ahuun rafanan pui fihuu ahuuomafo inanshquin. Min ascaitofin Upa Diosin nai muranshon mia ahuara sharacoin mucushoniquin. Asca huatan ua tanasharahuu, —ishon Jesús yoiaiton.

<sup>23</sup> Nicai puusinima. Mafo ichapayacoinsion ahuun mafofo potacasmal. <sup>24</sup> Ascaiton oinquin Jesús ato yoini, —Yora mafo ichapaya Uhuun Upa Dios niaifo ari nocopaifiacani nocotirofoma. Fustirasifin nocotirofoquin. <sup>25</sup> Nan ina camellocai acoya shoi muran finontiroma. Mimacaifi nocofunu mafo ichapaya Diosin niaifo ari iquitiromaquin, —ishon Jesús ato yoini.

<sup>26</sup> Ascaiton nicacaquin —¿Ascan tsoa Dios fu nipatiromun? —ishon yocaifoan.

<sup>27</sup> —Nocofunucai afinri numamutirofoma. Diosin fustitofin yorafo numatiroquin. Diosinfin ahuamamishti huatiroquin. Nocofunufoancai asca huatiroma cuscan Diosin huatiroquin, —huaiton.

<sup>28</sup> Pedronun yoini, —Ifon, nonfin nocon ahuarafo nantifi nocon yorafo potafurani mifu non oaquin, —ishon yoiaiton.

<sup>29</sup> Jesús afu rafuafo yoiqui isca huani, —Un mato icon yoi. Tsoan Dioshuunshon ahuun pushu yafi ahuin non ahuun yorafo non apa yafi ahua non ahuun facufori potashon ua tanapaisharai. <sup>30</sup> Nanscara yorafofin Upa Diosin finacaiqui ato shara huaiquin. Ascano naashu Dios fu ipasharashcani, —ishon Jesús ato yoini.

### *Nashquiai cuscahuunoa afanan Jesús yoi futsani*

*Mt 20.17-19; Mr 10.32-34*

<sup>31</sup> A fu rafuafo doce futsano atotisi iyoni nannoashu atofu tsainquin iscani, —Ua nicacahuun uhuun yoramishtichin. Non Jerusalén ano fononfocahuun. Nan Diosin tsain yoimisifoan uhuunoa cununifo cuscan nanscacoin aiquin. <sup>32</sup> Nannoshon nocon caifoan futsafo ua ato inancani. Nanfoan ua cashu mutsama huafain fasi ua chaca huacani. Uqui cumo michofain fichi cunoqui tuchiaton ua coshacani. Ascatan ua rutucani. <sup>33</sup> Ua asca huafiafo osha rafu non fustitan un afanan funiran, —ishon ato yoini.

<sup>34</sup> Ato asca huafiaitocai tsoa tapinima ato yoiai cuscan. Man nicaquiaquiricai tapisharanifoma. Diosin ato tapimanataima.

### *Jesús Jericó anoshon fusho caya huani*

*Mt 20.29-34; Mr 10.46-52*

<sup>35</sup> Ascaino Jesús Jericó ano nocoataima fusho fai cusumun tsaoa ini. Nannoashu pui yocacamisi. <sup>36</sup> Ascano nan fai cusumun tsaoshon yorahuanrasi foannaiton nicaquin ato yocani, —¿Tsoafo na iscai foancanimun? ¿Ahua huacanimun? —ishon ato yocaiton.

<sup>37</sup> Yoinifo, —Jesús Nazaret anoa cahuaniran, —huanifo.

<sup>38</sup> Ascaiton nicaquin yoini, —Jesús, minfin David ahuun funaquin. Uhuun ramapaipun, —ishon cunani.

<sup>39</sup> Ascano Jesús fu foaifoan asca huanifo afanan tsainonma. Asca huafiaifoanno fasi oi ashcafinitin yoiriani, —Minfin David ahuun funaquin. Uhuun ramapaipun, —huariaino.

<sup>40</sup> Jesú斯 nituacucahuán ato yoini, —Nuri ua ihuushocahuun, —ato huaiton aquí ihuunifo.

<sup>41</sup> Ascaiton Jesú斯 yocani, —¿Un mia ahua ahuusca huashotiro mun? —ishon yocaiton. Cumani, —Ifon, un fasi oinpaicoinran, —huani.

<sup>42</sup> Ascaiton afanan Jesú斯 cumani, —Ua icoinra huashon natian min oinsharairan, —huani.

<sup>43</sup> Ascaino nantian oinsharariscatan yoini, —¡Aicho! Man mian caya huaa shara. Dios shararan, —icashu afu caiton oincaquin futsafoan arifi, —¡Aicho! Ó Dios fasi sharacoinran, —ishon yoinifo.

## 19

### *Jesú斯 yafí Zaqueo*

<sup>1-2</sup> Asca huatan Jesú斯 Jericó anoashu cahuanaino nanno nocofunu ahuun anu Zaqueo ini. Nantofin ahuun niaifo pui fishomisi iniquin. Pui fishomisi futsafoan aton niaifo ini. Nanrifi ahua yopatanaimaco in. <sup>3</sup> Jesú斯 yorafoan naqui huano cahuannaiton ahuuscashoma oinpaiquin fuai mishtoshtacoianshu, —¿Ranishomain un oinnanti? —ini. <sup>4</sup> Ahuuscashoma oinpaiquin ranain. Ascacun rusoatori ichoni finoantaima. Ichotan fai cusumun ihui niahun ichoinacahuani. Inainacahuatan ahuunshon Jesú斯 cahuanaiton oinshquin icashu inacun. <sup>5</sup> Nan ihui nia naman finonfainquin foisinifoantan fuchishon, Jesú斯 yoini

—Zaqueo, fotoriscahuu. Un min pushu ano osha fusti yoi canon, —ishon yoaiton.

<sup>6</sup> Nicai Zaqueo fotoriscani. Fasi unimasharacoinquin ahuun pushu ano iyoni. —¡Aichoran! Min uhuun pushu ano oiquin. Iquiyohuu, —Zaqueo huani. <sup>7</sup> Ascaiton oincaquin yorahuanrasiton yoinifo, —¡Ajaa! ¡Oincapon! ¿Ahuuscaimun Jesú斯 yora chacapan ahuun pushu ano caiquin? —icashu afi ranan yoinannifo. <sup>8</sup> Ascafiaifoanno Zaqueo Jesú斯 yoini,

—Ifon, natiantafin un yora ahuuomafo cashcu futsa un ato inanpacuicain. Nan un finonmafaintan fia cuscan onushori un ato finonmafaintan ato inanpacuiquin. Un diez soles fianshonfin cuarenta soles un ato inainquin. Ascan veinte soles ato fianshonfin ochenta soles un ato inaincain. Un ato onuyofiamisishaquifin un ato asca huapaiquin, —ishon Zaqueo yoini.

<sup>9</sup> Ascaiton Jesú斯 Zaqueo yoiqui isca huani, —Zaqueo, na shafata min chaca un mia soashona min Diospan facu ica afu nipanonran, —ishon yoini. Ascan nanno pushu murannoafori ato yoini, —Na nocofunu Zaqueo arifi Abraham ahuun funa. Abraham Dios icoinra huaa cuscan arifi natian icoinra huaa. <sup>10</sup> Ascan tsoa funoa un ato fai shara ismayoi uhuun Upa Dios anoashu un oni nanfo Dios fu ipasharanonforan, —ishon ato yoini.

### *Puihuunoa Jesú斯 ato ahuara futsa yosini*

*Mt 25.14-30*

<sup>11</sup> Nan nicatan focani Jerusalén chaima nocoshon shinanfo, —Nan Diosin niaifo ahuun yorafo iquinai cuscan nocoti chaimaran, —ishon shinannifo.

<sup>12</sup> Ascaifoan Jesú斯 ahuara futsahuunoa ato yoiqui ato tapimaquin isca huani. —Nocofunu niaifo cuscara ini. Nan nocofunu mai futsa ari caani niaifo huashu afanan naso curashquin. <sup>13</sup> Cataima ahuun oinmatifo mucu rafuti cunashon yoiqui isca huani, “Un mato pui paratamacoin inanfainicai. Nan puihuushon ahuara fiashu inanmitsashon finonmainifoan ahuun rafanan man finon nan un nasoaitian,” ishon ato yoini. <sup>14</sup> Ascaiton ahuun caifo futsafoan nan noicasmacoinnifo. Ascashu caiton yorafo achon nichinifo. Nan niaifocoin yoiqui isca huanonfo, “Nan nocofunu non niaifo huapaimaran,” huanonfo.

<sup>15</sup> Asca huafiaifoanno niaifocoinin catoan niaifotan afanan ahuun mai ano naso curani. Ascashu nocotan ahuun oinmatifo cunatoshini ahuuti pui man fiafomainquin tapipaiquin.

<sup>16</sup> Ascaino futsan aqui oi taushon yoiqui isca huani, “Ifon, mian inan cuscan mucu rafuti finonmainifoan un mia fishoaran,” huani.

<sup>17</sup> Ascaiton niaifoan yoini, “¡Aicho! Minfin oinmati sharaquin. Mian yonoshon shara. Un mia ichapama inanfia finonmafain mian fishoano un miqui fasi unimai. Un mia yoia cuscacoin min aano. Ascacun pushurasifo mucu rafuti anoafoan ato niaifo min iquiran,” ishon yoini.

<sup>18</sup> Ascaino futsanri aqui oshon yoini, “Ifon, mian pui inan cuscan mucu fustiti finonmainifoan un mia fishoaran,” ishon yoiaiton.

<sup>19</sup> Nicaquin nanrifi yoini, “Mirifi mucu fustiti pushurasi anoafoan ato niaifo min iquiran,” ishon yoini.

<sup>20</sup> Ascaino oinmati futsari aqui oshon arifi yoini, “Ifon, naquian min pui. Un mia rashushon huashoan. Min ua inan cuscan finonmafain fiamafashucái un funoama.

<sup>21</sup> Un miqui ratuqui un mia mucushona. Mun tapia mincai tsoa shinainma. Minricai nocohuun ramapaima. Non mia yonoshofaitocai min noco ahua inantiroma. Mina fusti itiroran,” ishon yoini.

<sup>22</sup> Ascaiton nicaquin ahuun ifoan yoini, “Min fasi chacacoin. Minfin shanishuniquin. Min tsainhuunshon un mia onaintimai. ¿Min shinanmun un futsafo shinainmaquin? ¿Uaraca futsafoan yonoshofaiton un ato ahua inanma? Un fimisi ua mian huaa. <sup>23</sup> ¿Ascan nannori shinanfiaquin ahuuscaquin min rashushon huamun? Asca huatamarocon nan pui huamisifoanno min huaa shara icuana paratama finonmainifoan fishquin,” ishon niaifoan yoini.

<sup>24</sup> Asca huatan nanno niafo niaifoan ato yoiqui isca huani, “Nan oinmati chaca ahuun pui flashon nan mucu rafuti finonmainifoan fiarocon inancahuun,” ishon ato yoiaiton.

<sup>25</sup> Cumanifo “Ifon, nanfin ichapayacaiquin,” huaifoan. <sup>26</sup> Afanan niaifoan ato cumani, “Un mato icon yoi. Nan ratoran futsan ua icoinra huacoinafin un fasi paratamacoinri inainqui. Ascan nan ua icoinra huamafin nan ichapama aya cuscan futsa fiainquín. <sup>27</sup> Ascashon nanfoanfin ua noicasmacaquin yoiafoquin, ‘Noncái mia niaifo huapaimaran,’ ishon uhuunoa yoiafo. Ascacun ato ihuucahuun uhuun ointaifi ato rutushcaquin,” ishon yoiniran, —Jesús ato huani.

### *Jesús Jerusalén ano cani*

*Mt 21.1-11; Mr 11.1-11; Jn 12.12-19*

<sup>28</sup> Asca huatan Jesús Jerusalén ano caino. Achon ahuun tapimisifo fonifo. <sup>29</sup> Machi ahuun anu Olivo tunanman pushurasi rafu Betfagé yafi Betania ini. Nanno chaima noconifo. Nocoshon afu rafua rafu nichini.

<sup>30</sup> —Pushurasi ano fotacahuun. Nocoshon man burro cahuashara nushucun man fuchicaicain. Tsoacai na burro camaqui cayomísima. Tupushon nuri ua ihuushotacahuun. <sup>31</sup> Futsan mato yocaiton, “¿Ahuuscaquin man burro cahuashara tupuimun?” yocaifoan ato yoiquin. “Nocon Ifo yopaiton non tupuyoaran,” ishon ato yoitacahuun, —Jesús ato huani.

<sup>32</sup> Ato nichiafocatan nococashon Jesús ato yoia cuscan nanscacoin huaquin fuchitoshinifo. <sup>33</sup> Man tupuafoanno muropán ifofoan ato yocani, —¿Ahuusca huashquimun man nocon burro cahuashara tupuaquin? —anoa ifofoan ato yocani.

<sup>34</sup> Ascaiton cumacaquin, —Nocon Ifo yopaiton non tupuyoaran, —huanifo. <sup>35</sup> Nan burro cahuashara Jesús ihuushonifo. A fu rafuafoan aton sahuuti muropán catu camaqui fucashonafoanno acamaqui Jesús tsaoinfoannifo. Ascaino cani. <sup>36</sup> Cahuanaiton fai naman cayan afofori sahuuti fucashonifo. Niaifo cahuanaiton apaonifo cuscan

Jesusrifi cahuanaiton afofori sahuuti fucashonifo. <sup>37-38</sup> Machi Olivo tusirimucaitan ahuunshon tapimisifo aqui noconifo. Unimacaquin oi ashcafinitin Jesús yoinifo,  
—¡Aicho! ¡Diosin shararan!

Dioshuunshon ahuamamishti min huaiton non oian. ¡Aicho! Nocon niaifo nocouqui oquin. Diosin shara huamafafainni. Diosin yononi Jesús nocon Niaifocoin inon. Ahuunshon Diosin nantifi shara huanon. Ascarifiatan ahuun nai oinmatifoan nai muranshon yoicani, “Diosifin sharacoinsion yorafoqui ahuun Furun nichiniquin ato numanon,” man huaicain —ishon oi ashcafinitin yoinifo.

<sup>39</sup> Asca huacatan Fariseofoan yorahuanrasi muranshon Jesús yoini, —Tapimamisiton, minhuunshon tapimisifo yoihui ascanonfoma, —huaifoan.

<sup>40</sup> —Un mato yoinon. Ua yoisharayamaifoan na toquirifoan ua oi ashcafinitin tsain shara ua yoicuanaforan, —ishon Jesús ato yoini.

<sup>41</sup> Machi tusirimupacuquin nan pushurasi Jerusalén anoa icafo oin atohuun ramapai Jesús uaini. <sup>42</sup> Ascashon yoiquin isca huani, —¡Ohua, Jerusalén icanoafoan! Ua icoira huashufin man isharapacucuanaquin. Mancaí tapiama natian Diospan Facu nocoa. Mancaí ua niaifo huapaima. Un mato numapaifaiton man ua tanacasmái. Natiancái un afanan mato numatiroma. Man fasi finoan. <sup>43-44</sup> Mancaí tapiama un mato cushunon Diosin ua catonfiacun, tsoancai mato noicasmamisifoan mato ahuuscara huaiton mato numatiroma. Mato chituacuafó nantia iqui furancatan mato rutuquin anaitishocani. Matofó yafi maton facufo rutuqui cuyoshcani. Maton pushufo paoinquin futsui. Diosin ua matoqui nichifiacun man ua nicacasmaiton mato asca huashcaniran, —ishon Jesús ato yoini.

*Jesús Dios fu tsainti pushu muranshon ahuara chacafó potani*

*Mt 21.12-17; Mr 11.15-19; Jn 2.13-22*

<sup>45</sup> Asca huatan Jesús Israelifoan Dios fu tsainti pushu muran iquitoshiquin oian a murannoashu ahuarafo inanmitsaifoan fuchitan ato chifi cainmaqui futsani.

<sup>46</sup> Ascashon ato yoiqui isca huani, —Diospan tsain cunuquin isca huani, “U fu tsainti pushu muranshon man ua fusti cufitiroran,” ishon cunufianicun nan yomutsofoan ichananti cuscara man huapairan, —ishon ato yoini.

<sup>47</sup> Asca huatan shafatifi Israelifoan Dios fu tsainti pushu muranshon Jesús ato yoini. Ascafiaiton nocon yorahuunshon Dios cufimisi niaifo futan Moisés cununi cuscan tapimamisifo non Israeli niaifo futsafoanri Jesús rutupainifo. <sup>48</sup> Asca huafiaifoan ato caifo futsafoan nan Jesús yoiai cuscan nicapaicoinnifo. Ascacuacai a rutupaifiaquin tsoan tapinima ahuuscashomain rututirofoquin.

## 20

*Jesús noco yonotiro*

*Mt 21.23-27; Mr 11.27-33*

<sup>1</sup> Ascatañ shafa futsaino Jesús Israelifoan Dios fu tsainti pushu muranshon ahuun tsain shara ato yoifain ahuuscashumain Dios fu ipatirofoquin ato yoiaino nocon yorafihuunshon Dios cufimisi niaifo Moisés cununi cuscan tapimamisifo non Dios fu tsainti pushu cushumisifoan Jesús yocanifo.

<sup>2</sup> —¿Tsoan mia yonoamun min isca huanon? —ishon yocaifoan.

<sup>3</sup> Jesús ato cumani, —Urifi un mato yocai. ¿Juanpan yorafounu muran iquimapacuni tsoan yonoa asca huanimun? <sup>4</sup> ¿Diosin iyamarai nocofunufoan yononifomun? —ishon ato yocaino.

<sup>5</sup> Afi ranan yocanonannifo. —“Diosin Juan nichiniran,” non huaiton Jesús noco yoitiro. “¿Ascan ahuuscaquin man Juan icoira huamamun?” —noco huatiro. <sup>6</sup> Ascan —“Juan nocofunufoan nichiniran,” non huaino yorafo nocoqui sinatirofo. Nantifi yorafoanmain yoimisifocun “Juanpan Diosin tsain yoimisiran,” ishon yoiafo. Ascan

“Juan Diospan yonoamaran,” non icaiton toquirifoan noco rututiroforan, —icashu yoinannifo.

<sup>7</sup> Ascashon Jesús yoinifo, —Noncai tapiama tsoanmain Juan yonoaquin, —huaifoan.

<sup>8</sup> Jesús ato yoini, —Urificai un mato yoima tsoanmain ua yonoa un ahuarafu huaiquin —ishon ato yoini.

*Yonomisi chacafohuunoa Jesús ato yosini*

*Mt 21.33-44; Mr 12.1-11*

<sup>9</sup> Ascashon Jesús ato ahuara futsan tapimani isca huaquin,

—Nocofunu futsan ahuun mau fanafaini mai futsa ari caano. Futsafoan cushushon-ifo. Nasoshon ahuun fana atirifi pashcashoshquinon. <sup>10</sup> Fimimisitian mau ifoan ahuun oinmati nichini ahuun fana fimifo fishotanon. Mau cushumisifoan a oinmati sutucashon ahuuoma nichinifo. <sup>11</sup> Ascashon futsari nichian nanrifi sutunifo. Sutu-afono maisi cani. <sup>12</sup> Ascashon afanan futsari nichini. Nanri nanscari huacashon. Maumamaquishon potanifo.

<sup>13</sup> Ascashon mau ifoan shinan futsani, “¿Un ahuusca huaimun? Uhuun facucoin nan un ahuun noiai un nichicai. Nanraca nicacointirofo,” huani.

<sup>14</sup> Ascano ahuun facucoin mau ano oaiton fuchinifo, “Ahuun facucoin oiquin. Non rutucoinon. Apa naano naafo ahuun facu ifoaiquin. Non rutunoncahuun. Afin aton apa fiama noncairocon non fianon,” ishon yoinannifo. <sup>15</sup> Asca ocun achicashon mau pasotain iyoshon rutucoinnifo. ¿Asca a mau ifoan nicatamun ahuun facu rutuafu ato ahuusca huaiquin? <sup>16</sup> Oshon mau cushumisifo ato rutuquin anaitishon futsafoan ahuun mau cushumaniran, —ishon Jesús ato yoini. Nicacatan, —Ascanacama ipainonran, —inifo.

<sup>17</sup> Ascaifoan Jesús atosi oinquin ato yocani. —¿Asca ahuuscaquimun Diosin tsain nunori yoiquin?

“Pushu yonomisifoan, ‘Ahuun quishi chacaran,’ ishon potafiacun ifoan afanan shara catonshon nichiano pushu onitiro.”

Nanscarifiai man Diospan Furun pota. “A chacaran,” huafo. Ascafiaiun Diosin man catoan ahuunoashu fustisi yorafo Upa Diosin fu nipatirofoquin. <sup>18</sup> Ratoran futsa a nicacasmaifo omitsiscatiro. Asca ratoran futsanfoan nicacasmariamisicun naitian a omitsiscapanacafo muran potashquinran, —ishon Jesús ato yoini.

<sup>19</sup> Nicacanashu Moisés tsain tapimamisifo yafi nocon yorafohuunshon Dios cufimisi niaifofoan Jesús achipainifo cunu muran iquimashcaquin. Atohuunoa yoiaiton nica-cani aqui sinanifo. Ascafiaflashocai a nicapaiyaifoqui musucaquin tsoan achinima.

*Niaifofoan ato caifofo pui yocamisifohuunoa*

*Mt 22.15-22; Mr 12.13-17*

<sup>20</sup> Ascacun nan fuparamitsamisifo Jesús fu foanfafainmisifo ahuun tsain nicipaicaní ahuarashta amaquiri yoiaiton ato niaifoqui chanishcaquin Jesús achinonfo. Asca nanfo Jesusqui nichinifo cuncun huaqui yocatanonfo.

<sup>21</sup> Ascano nanfoan focashon Jesús icon tsainman yocanifo, —Tapimamisiton, ahuara icocoin fusti min noco yoifafainmisi. Nan atirifi min yoiayi cuscan nannoricoinrifi min noco yoifafainmisi. Ascashon icon fustisi min nantifi yorafo Diospan tsain yoifafaini. Minricai ahuara yoipai ranomisima. Nantifi min ato cayacafi yoia. <sup>22</sup> Asca sharamain-quin noco yoihu. ¿Norifimun non Romanonfoan aton niaifo Cesari non pui inainquin? —ishon yocaifoan.

<sup>23</sup> Nan fuparamitsamisifoan yoiaifo cuscan onanshon Jesús ato yoini.

<sup>24</sup> —Ua mato toro fusti ismacahuun, —ato huaiton. Ismaifoan ato yocani, —¿Tsoa ointsa torohuun nuuamun? ¿Tsoan ahuun anuri nuuamun ua yoicahuun? —ishon ato yocaiton. <sup>25</sup> —Niaifo Cesarnaran, —huaifoan.

—Ascan Cesarnacun nan inancahuun. Ascan Diosinacuri Dios inancahuun, —ishon ato yoiaiton. <sup>26</sup> Nicacani fasi mustairicatan yoinifo, —Nan yoiai cuscacai tsoan tafitiroma. Fasi tapisharacoianran, —icashu ahuun yoinannifo. Ascacucai yorafoan ointaifi, —Jesús amaquiri noco cumaran, —ishon tsoan yoitiroma. Ascashu afanan tsoa puusinima.

*Yora naashu afanan funitirofihuunoa yocanifo  
Mt 22.23-33; Mr 12.18-27*

<sup>27</sup> Ascano nannori Saduceofo ini. Nanfoan shinanquin isca huamisifo, —Yora naashucái afanan funinacamaran, —ishon yoimisifo. Ascan nanfo Jesusqui fucashon yocanifo.

<sup>28</sup> —Tapimamisiton, Noco shuni Moisés noco cunushoqui isca huani, “Ratoran futsan ahuin futan facu acashma naano afu nanua futsan ahuun facahua fitiro a futan facu aashquin,” ishon cununi. <sup>29</sup> Ascacun un mia yoinon. Siete nanupacuao ini. Nan iyoacoinnin iyoacaichin ainfo fiqui tau huani. Ascafiaflashon a futan facu acashma naani. <sup>30</sup> Ascano chipocu futsan arifi ahuun facahua fini. Arifi aqui facu acashma naani. <sup>31</sup> Ascano chipocu futsanri arifi fini. Nanrifi afutan facu acashma naani. Nanscasiai amaqui nai cuyonifo. Aqui facu acashma. <sup>32</sup> Ascatan ahuun unutani arifi ainfo naani. Facu nanuashma. <sup>33</sup> ¿Ascan ratotocaimun nai muranshon nan yorafo naashu funiaifotian fiishquiquin nan fusti fipashu amaqui nai cuyoafó? —ishon yocaifoan.

<sup>34</sup> Jesús ato cumani, —Yorafo nuno mai ano niyoashu nocofunufo yafi ainfofi fiananmisifo. <sup>35</sup> Asca ratoranfoan Diosin tsain icoinra huacun Diosin ato imasharatiro afu ipanonfo. Asca nanfo naashu afanan funiashu Dios icari nocotan afanan fianantirofoma. <sup>36</sup> Afananricai tsoa natiroma. Nanfo Diospan oinmati afu nai muran ica cuscarofo. Ascashu Diospan facufo. Naashu funicatan Dios fu nipanacafo.

<sup>37</sup> Ascan Moisésirifi noco yoini yora naashu afanan funitiro nipashashquin. Ascashon noco yoiquin isca huani, “Chofo uru manhuain murannoia Diosin oi un nican. Ua yoiqui isca huaiton, ‘Unfin Abraham non Isaac non Jacob non afoan aton Diosiquin natian ufu niafo,’ ” ishon Moisés yoini. <sup>38</sup> Yora naashu afanan funiyamaino ahuuscashumun Dios fu itirofoquin. Ascafia ascarama. Yora man naafianishaquin afanan nanfotin Dios fu ipatirofoquin. Ascacun Upa Diosifin ato Diosiquin. Diosinafin nantifi niafoquin, —ishon Jesús ato yoini.

<sup>39</sup> Ascaiton nicacani Moisés cununi cuscan tapimamisifoan yoinifo. —Tapimamisiton, min ato cayacafi yoiran, —huanifo.

<sup>40</sup> Ascashocai afanan tsoan yocapainima. Ato cumasharaino aqui ranonifo.

*Tsoan funamun Cristo  
Mt 22.41-46; Mr 12.35-37*

<sup>41</sup> Ascatan Jesús ato yocani, —Asca ahuuscaimun “Cristo David ahuun funaran,” huamisifoquin. <sup>42</sup> Nan Davidcoinin fanainti cunuqui isca huani,

“Upa Diosin uhuun Ifo Cristo yoini isca huaquin, ‘Minfin ufu niaifocoquin.

<sup>43</sup> Mia noicasmaifoan min ato finoncoian. Un ato shatumashquin mia afanan ahuusca huatiroma. Min ato iquiniran,’ ”

ishon Diosin yoini cuscan David cununi. <sup>44</sup> ¿Criston David Ifono ahuuscashucon ahuun funa itiromun? —Jesús ato yoini.

*Moisés cununi cuscan tapimamisifoan chaca huamisifo cuscan Jesús yoini  
Mt 23.1-36; Mr 12.38-40; Lc 11.37-54*

<sup>45</sup> Ato asca huatan afu rafuafori ato yoiaiton yora huarasifain arifi nicanifo ato yoiqui isca huaiton.

<sup>46</sup> —Oinfain. Moisés cununi cuscan tapimamisifoan sahuuti chainipafo sahuusho ato oinmafoanfaaicani fasi tapicoianforan ato huamapaicani. Yora ichaparasi ano

foanscacani “Sharacoinforan” ato huamapaicani. “Nanfoan fasi Diosin tsain tapicoian-ran” ato huanonfo. Ichananti pushu muran iquitan shafacafi tsaotiofo ato oinonfo. Ichananshon piyainfoannori shafacafi tsaopacani. <sup>47</sup> Ascasho ainfomaqui funu naafu parashon pushu ato fiancani. Ascataan fasi chaicoinri cufiriatirofo atohuunoa shinansharanonfo. Ascafia nanfo fasi fuparamitsamisicoinfo. Nanfocaifin Dios ato onaintimaquin finacoinshquiquin,—ishon Jesús afu rafuafo yoini.

## 21

*Ainfomaqui funu naa ahuuomashtacoinfiacun Dios inansharani*

*Mr 12.41-44*

<sup>1</sup> Ato yoitan fuhuunina cahuan Jesús oinni yora mafo ichapayafoan pui ichapa nanuti muran nanuiniyaifoanno. <sup>2</sup> Asca huaifoanno ainfo funuoma otan arifi nanuni. Toroshta rafusi a muran nanuni.

<sup>3</sup> Ascashu oiainfoan Jesús ato yoini, —Un mato icon yoi. Na ainfo funuoma ahuuomashtafashion inancoian. Ahuun toroshta rafu cuyoina. Ascacun na ainfo funuomashta fasi Dioshuun noicoinquin inanshara. <sup>4</sup> Asca ichapayafoancai Dios inanficaquin atirifi tsoan inanqui cuyoafoma tushu huafo. Na ainfoan Dios inain cuscacai ichapa yafoan inansharacoianfoma. Ascafia na ainfo funuoma ahuuomafashion nantifi ahuun pui man inanquin cuyoina. Man inanqui anaitia afananciai ahuahuunshon ahuun tushu fitiromaran,—ishon Jesús ato yoini.

*Jesús yoini,—Dios fu tsainti pushu paoinshquiran,—ishon ato yoini*

*Mt 24.1-2; Mr 13.1-2*

<sup>5</sup> Ascano afu rafuafo afiranayoina yoina, —Nocon Dios fu tsainti pushu toquiri putsamuashu cunuacua fasi sharashtacoin. Yorafoan ahuara sharashta Dios inancoianfo cuscan nutamuacua, —icashu yoinannifo. <sup>6</sup> Ascaifoan Jesús ato yoini, —Nan man oiai toquiri putsamuashu cunua Dios fu tsainti pushu chipo paoinsquin. Afananciai toquirifo putsamushquimaran,—ishon ato Jesús yoini.

*Nan cuyoaitian ahuarao ishquiai cuscan*

*Mt 24.3-28; Mr 13.3-23*

<sup>7</sup> Ascaiton cumanayo, —Tapimamisiton, ¿Nan min yoi cuscamun ahuitian iishquiquin? ¿Ahuuscashomun non tapitiroquin a ishquiai cuscan? ¿Diosimun nocoo ahua futsa ismaiquin non tapinon? —ishon yocaifoan.

<sup>8</sup> Jesús ato cumani,—Oinfain. Mato parapaicaniqui. Yora ichapafaon, “Un Cristoran,” ishon mato parapaishcani. Ascashon nanfoanri yoishcani, “Un mato yoi cuscan Cristo samamashtacoin oiran,” ishon mato yoiifoan ato tanayamacahuun. <sup>9</sup> A man nica yorafo rutunainfoanno ratuyamacahuun. Man nica futsaifoan aton niaifo potashu arifi niaifo ipaiyaiton nicai ratuyamacahuun. Nan un yoiainfin nanscacoan aashquiquin. Ascafia nantifi cuyoaitian nocoataima.

<sup>10</sup> Iquisi mai futsa fu yorafo rutunainfoanno mani futsafori mani ya futsafori rutunainfoanno. <sup>11</sup> Ascaino mai futsafoari fasi mai nayanaiyaicaino mai futsafoariri yora tushuomafo icaifoanno. Mai futsafoariri pau isininpacoinfoan ishquicani. Ahuara chaca futsatapafo icaino yorafo fasi ratucoinshcani. Nai ari tsoan oinyomisima cuscara oincani fasi ratucoinshcani.

<sup>12</sup> Ascataima achicashon mato ichananti pushu muran iyoshcani niaifofoan mato yocanon. Ascashon chipo mato cunu muran iquimashcani. Asca huatan niaifo futsaifoan ointaifiri afanan mato asca huashcani. Uhuunshofin mato asca huashquicani.

<sup>13</sup> Mato asca huafiaifoan man ato uhuunoa yoitiro. <sup>14</sup> Ascan man niaifofo ano cataima shinanchacayamacahuun nanfoan matohuunoa tsain chaca yoishcani. <sup>15</sup> Ascafia unfi mato cayacafi yoimamaicain man ato cumasharanon. Uhuun tsain shara un mato

nomuran nanumashquin. Ascano nan mato noicasmaifoan tsoan mato cumayamafain matori taftirofoma. Ascashori tsoancai anorimaran mato huaima.

<sup>16</sup> Ascashon mato upafo futan uhuafu non mato yoracoinfo non man yorahuan futsafoanri mato achimashon atirifi mato rutumashcani. <sup>17-18</sup> Ascano uhuunshon nantifi yorafoan mato noicasmaifiaifoan Upa Diosin mato cushusharafafainshquin. Ascashon mato rutufiafocai ahuashta man funotrioma. <sup>19</sup> Ascan omitsiscafiaquin man ua potama nan man naitian uhuun tsain tanasharashu Upa Dios fu man ipasharashquin.

<sup>20</sup> Mato noicasmaifo aton ranushumuafaon Jerusalén chituacuaifoan oinquin man tapitiro man samamashta Jerusalén cuyo. <sup>21</sup> Nanscara oincani Judea mai anoafaoan machi ari ichotacahuun Jerusalén anoafomaqui. Patashari icafo Jerusalén muran fuyamacahuun. <sup>22</sup> Nantifi Diosin tsain cununi cuscan Jerusalenhuunoa nanscacoin aiquin. Nantian Jerusalén anoafao Diosin ato onaintimai. <sup>23</sup> Ascacun ohua. Ainfo facu nanuafu yafi aton facu yomumishti shoma acaifoya nantifi Israel anoafao fasi omitsiscaashcani. Yora futsafo fasi atoqui sinacoincaquin atoasca huashcani. <sup>24</sup> Ato rutufain atirifi achicashon mai futsafoari ato nichishcani. Atoasca huatan a Israelifoma Jerusalén ano iyoshcani. Nan Diosin ato nasopaiyaitian Israelifo afanan Jerusalén ano fushcani. Yora futsafo afanan aton niaifo inonma.

### *Diospan facu nasaaitian*

*Mt 24.25-35, 42-44; Mr 13.24-37*

<sup>25</sup> Ascaíno nantianri fari yafi oshu non fishifo nan imisima cuscaíno futsushcani. Ascaíton nuno mai anoafaoan oincani fasi ratucoincaquin yoishcani, “¿Ahuuscaimun unuhuan fasi fuchoaíno ahuun oi achacoíquin? Noncaí iscara oinyomisímaran,” icashu ratucani afiranán yocanonanshcani. <sup>26</sup> Ascaíton oincani yorafo ato ratupan naiyoshcani. Nai ari yafi mai ano ahuara chacafo tsoan oinyomisíma cuscarafo oincani. <sup>27</sup> Ascaífoanno nantianri un nai ariashu coin camaqui mai ano fotoshquin. Ascaíton nantifiton ua oinshcani. Un Diospan facuashu uhuun curushhuunoashu un fotoaiton ua oinshcani. Un nantifi iquinai cuscan. <sup>28</sup> Ascacun nan un mato yoiai cuscacoin tau aino nan ua icoinra huafu unimacain ua manasharayanan itisharacahuun. Nanscacoin aino un matoqui oti chaimaquin mato numayoi,—ishon Jesús ato yoini.

<sup>29</sup> Ascashon afanan ato yoiqui isca huani,—Nan fana higuera yafi nii futsafihuunoari shinancahuun. Nanhuunshon mato ahuara futsa tapimanon. <sup>30</sup> Nan nii pui risquisi futsuaiton man tapitiro manmain fariaitonfin. <sup>31</sup> Nanscarifiai nan un mato yoiai cuscacoin aiton tapicahuun Diosin niaifoan ahuun yorafo iquinai cuscan man nocoti chaima.

<sup>32</sup> Ascacun un mato icon yoi. Ahuarafu un mato yoiai cuscacoin aiton nataishoma oinyoshcani. <sup>33</sup> Ascaíno nai yafi mai cuyoshqui. Uhuun tsain cayacafi iconcoin. Fiananancái apanacama. Un mato yoiai cuscacoin aashquin.

<sup>34</sup> Ascacun oinfain. Un matoqui nocoriscatashquin. Man itisharayamano ahuarafu ahuuscarai futsui. Ascacun ahuara chaca huayamacahuun. Paunyanan monofafainyamacahuun. “¡Ohua! Un ahuuscarairan,” ishon shinanfafaiyamacahuun. Nanscafin nan ua icoinra huamafofo aaquin. Afo itisharafomano un nocoriscatashquin. Afo icai cuscan ayamacahuun. Oinfain. Masharo nicatsashu cunu muran iquitiro cuscan ayamacahuun. <sup>35</sup> Ahuarafu ahuuscarai futsuaino nan maitio omitsiscaí futsushcani. <sup>36</sup> Ascacun itisharayanan Upa Dios cufifafaincahuun omitsiscaitian ahuun curushhuunshon mato amapaiyai cuscacoin huashcaquin. Ascashu man chipo uqui nocoitian un matoqui unimatiroran,—ishon Jesús ato yoini.

<sup>37</sup> Ascatañ shafatifi Israelifoan Dios fu tsainti pushu muranshon ato yoini. Yamutifi machi ahuun anu Olivo ano oshani. <sup>38</sup> Funamanritifi aquí fupaonifo Dios fu tsainti pushu muranshon nicashcaquin.

## 22

*Jesús rutushcaquin afi ranan yoinannifo  
Mt 26.1-5, 14-16; Mr 14.1-2, 10-11; Jn 11.45-53*

<sup>1</sup> Nan noco caifo Israelifoan ato fusititian shinanpaonifo Diosin nai oinmati ato facu iyoafofosi finonmani rutuquima. Ascan nan fusiti shafa anunifo pan farashati maisiran ishon anunifo man nocoti chaima. <sup>2</sup> Ascan nantianri nocon yorafohuunshon Dios cufimisi niaifofo yafi Moisés cununi cuscan tapimamisifo ichanancashon shinanqui isca huanifo, —¿Ahuuscashomun non Jesús ato rutumatiroquin? ¿Ahuara chaca ahuunoa non yoitiro ato rutumashquin? Non cashman rutuaino yorafio fasi mucacani noco raca asca huatirofo, —icashu yoinannifo.

<sup>3</sup> Ascaino nantianri Judaspan ahuun nomuran Satanás shinanchacamariscatani. Nan Judaspan ahuun anu futsa Iscariote nanrifi Jesús fu rafua futsa ini. <sup>4</sup> Ascashu niaifofo ano cani atofu tsainquicai. Ascano cashon ato yoini, —Unmun ahuuscashon Jesús ato achimatiroquin matoqui ihuunonfo, —ato huaiton. <sup>5</sup> Nicacani fasi unimacoincequi yoinifo, —¡Aicho! Non mia pui inain min noco Jesús ato achimashocun, —ishon Judas yoiaifoan. <sup>6</sup> Judas ato cumani, —Ai. Man ua yoia cuscan un mato Jesús achishotiroran, —ishon yoini. Ascacun nantian Judaspan shinanni ahuuscashomain un Jesús ato achishotiroquin. Yorahuanrasi yamaino achimapai.

*Ahuun unutaqui Jesús afu rafumisifo futan pini  
Mt 26.17-29; Mr 14.12-25; Jn 13.21-30; 1Co 11.23-26*

<sup>7</sup> Asca noco fusititian non misi farashati maisi pimisi. Diospan nai oinmatinin nocon shunifoan ato facufo rututamarocon Diosin ato yononi cuscan chashoanun facufo rutunifo. Ascacun nocon fusititian norifi chashoanun facu rutumisi nocon shunifoan ani cuscan shinanshquin. <sup>8</sup> Ascacun Jesús Pedro yafi Juan nichiqui ato yoini isca huaquin, —Itishara huatacahuun. Non chashoanun facu picanon, —ato huaiton.

<sup>9</sup> Cumanifo, —¿Rato pushu muran caashon non ati shara huaicaimun? —ishon yocaifoan.

<sup>10</sup> Jesús ato cumani, —Jerusalén ano nocoshon man oian nocofunununu tutsaomushon foaiton nan mufaitacahuun. Ascashu nan iquiajino afu iquifainshon pushu ifo man yoiqui isca huatiro, <sup>11</sup> “Nocon tapimamisiton mia yocaqui isca huaa, ‘¿Rato cunu muranshon ufu rafuafo futan non chashoanun facu picaimun?’ ” ishon man yoaition. <sup>12</sup> Mato cunu uhuapa fomancayan ismai. Nan cunu muranfin nan non yopaiti mato ismaiquin. Nannoshon atishara huacahuun, —Jesús ato huani.

<sup>13</sup> Ascaino nan rafu Jerusalén ano focashon nan Jesús ato yoia cuscacoin oinnifo. Nannoshon chashoanun facu pichashonifo.

<sup>14</sup> Ascashon man itishara huashoafono Jesús yafi afu rafuafo ari fonifo. Nococatan nantifi sapa ano tsaonifo.

<sup>15</sup> Ascashu tsaoafoan Jesús ato yoini, —Un matomaqui nataima un fasi mato futan chashoanun facu piiyopaimisi. <sup>16</sup> Ascacun un mato iquisi icon yoiyoi uncai afanan mato futan piiyoima. Nan man Upa Dios niaifoan nantifi iquina ano nocoitian yafi natian un acai cuscan ahuu cuscaramainquin man tapishquin, —ishon ato yoini. <sup>17</sup> Ascatan cucho finifoan Apa Dios cufiyoni, —¡Aicho! Upan —huatan. Ato cucho inanqui yoini, —Ayapacucahuun. <sup>18</sup> Un afanan mato futan na fimiunu ayaima nan un nasoitian uhuun Upa Dios fu nantifiton niaifo un iishquiran, —ato huani.

<sup>19</sup> Asca huatan Jesús misi finifoan afanan Apa cufiyoni, —¡Aicho! Upan, —huatan. Torupacushon atoti inanqui afanan ato yoini, —Naafin uhuun caya cuscaraquin. Un nantifi yorafohuunoashu nai. Ascacun nan man piaitian ua shinanfafaicahuun, —ishon ato yoitan.

<sup>20</sup> Nanscarifi huaquin cucho finifoantan ato ayamapacuquin yoini, —Na ayatihuunshon un mato ahuara funa shara yoi isca huaquin, “Uhuun imi foaino un matohunoashu nai man ufu uhuun Upa Dios ari ipanon,” —ishon ato yoini.

<sup>21</sup> Ascashon Jesús afu rafuafo yoiqui isca huani, —Nuno ufu sapa ano tsaoan futsan ua ato achimai. <sup>22</sup> Ascan Upa Diosin tsain inon pacoai uhuunoa cununi cuscacoinfin un naicain. Ascafia nan nocofunun ua ato achimanai cainyamanifin shara icuanaquin, —ishon Jesús ato yoini.

<sup>23</sup> Ascaiton nicacani afu rafuafo yocanonannifo, —¿Rato futsacaimun non achi-maiquin? —icashu afi ranan yoinannifo.

### *Tsoacaimun fasi shara finacaiquin*

<sup>24</sup> Ascatan rato futsacaimun fasi finoinnifoan niaifocoan ishquiquin icashu fochish-manantanannifo.

<sup>25</sup> Ascaifoan Jesús ato yoini, —Nan icoira huama niaifofoan ato curushcain yonofafainmisifo. Atoasca huafiacaquein yoimisifo, “‘Noco shara huashofafainmisiforán,’ ishon nocohuunoa yoicahuun,” ato huamisifo. <sup>26</sup> Asca huafiamisifo marifi ato cuscara iyamacahuun. Ascatamarocon facu pushco cuscara icahuun. Nanfo nan iyofofoan ato yonoafo cuscan ato ashotoirofo. Ascatari niaifopaicaquin futsafo shara huacahuun. Asca nan mato shara huafafainmisi nanfin niaifo iishquiquin. <sup>27</sup> ¿Ascan ratotocaimun futsafo finoanquin? ¿Futsafo yonomafafainmisi iyamarai ato yonoshomisi? Nan icoira huamafoan yoimisifo nan yonomitsamisitocaifin futsafo finoanquin ishon yoimisifo. Anori yoifiafo uncaifin mato yonoshomisiquin.

<sup>28</sup> Ascafia ahuara chacafo finonfiaqui man ua potama. Man uhuun nuua. <sup>29</sup> Ascacun uhuun Upa Diosin ua catoan un afu niaifo inon. Nanscarifi aquin un mato catoan man ufu niaifo inon. <sup>30</sup> Ascano un mato yoiai cuscan un niaifoanno marifi man ufu niaifo iishqui. Nocon Upa Dios ari man ichanaintian marifi man ufu tsaoshquin. Ufutan pifain man ufutan ayashquin. Ascashu nocon caifo Israelifoan aton niaifo man iishqui. Nan doce shoco noco caifofoan ato niaifo man ishquiran, —ishon Jesús afu rafuafo yoini.

—*Pedro min futsafo, “Un Jesús oimisimaran,” ishon yoiran, —Jesús huani*  
*Mt 26.31-35; Mr 14.27-31; Jn 13.36-38*

<sup>31</sup> Asca huatan Jesús Pedro nan ahuun anu futsa Simón yoini, —Simón, Satanás Dios yocashon mia chaca huamapai. Umaqui mia imapaiquin. <sup>32</sup> Ascafia un mia Upa Dios cufishona min ua icoira huafain afanan ua tanasharanon. Ascan min afanan uqui nasoaino ufu rafua futsafori min ato yoisharatiro ua tanasharanonfo, —ishon yoiaiton.

<sup>33</sup> Pedronun cumani, —Ifon, mia cunu muran iquimanaifoanno urifi un mifu iquitiro. Ascashon mia rutuaifoannori urifi un mifu natiroran, —huaiton.

<sup>34</sup> Afanan yoini, —Pedro, un mia yoi. Tacara cuoataima min ato yoiquin, “Un Jesús oimisimaran,” ishon min ato yoiqui rafu non fusti huairan, —ishon Jesús yoini.

<sup>35</sup> Asca huatan Jesús ato yocani, —¿Un mato nichiyamuatian pui non forusa non sapato futsan maisi nichiano man ahuara futsari yopaiyamuamun? —ishon ato yocaiton.

Cumanifo, —Noncai ahuara futsa afanan yopayamuama, —huaifoan.

<sup>36</sup> —Asca natian pui ayashon mato pui fofain maton forusari fotacahuun. Asca nopus yopaquin maton sahuuti shochiquirinoa futsahuunshon nopus ficahuun.

<sup>37</sup> Ascacun uhuunoa cununifo isca huaquin, “Arifi yoicaquin ‘man chaca huamisiran,’ huashquicani,” ishon uhuunoa cununi. Uhuunoa icon yoiyamafiaquin nan icocoin yoi cafisca huaifo. Ascano uquin cununi cuscan samamashtacoin aiquin, —ishon ato yoiaiton.

<sup>38</sup> A fu rafuafoan yoinifo, —Oinpon. Na nopus rafu, Ifon, —huaifoan.

—Un mato yoipaiyai cuscacai man tapiama. Ascacun non afanan aya tsain-quimaquin,—ishon ato yoini.

*Jesús Getsemaní anoshon apa cufini*

*Mt 26.36-46; Mr 14.32-42*

<sup>39</sup> Nan camisi cуссан machi Olivo ano caino afu rafuafo achon fonifo. <sup>40</sup> Nanno nocoshon ato yoini,—Upa cuficahuun Satanás mato chaca huamapaiyai cuscan huash-caquima. Ascacun ua potashcaquima cuficahuun,—ato huani.

<sup>41</sup> Atoasca huatan chaimashta atomaqi caashon Apa cufinquin isca huani ahuun ratoconun mai chachipacufoan Apa cufini.

<sup>42</sup> —Upan, min ahuara futsa yorafo numashqui atiromamainquin nan min apaiyai cuscan huahuu. Unfi mun itisharaquin atohuunoashu omitsiscacai naashquin,—Apa huaino.

<sup>43</sup> Ahuun oinmati afu nai muran ica aqui niriscatan mutsismaininfoanni.

<sup>44</sup> Asca huaino fasi curushcain Jesús Apa cufini fasi ahuun nomuran nan omitsiscai cuscan shinanquin. Ascaino imi foya niscan maiiqui futosomuni.

<sup>45</sup> Ascacaini afanan afu rafuafo ano caaquin oian man oshafo ini. Fasi aton Ifon omitsiscaiton shinancani oshafainnifo.

<sup>46</sup> Atoqui nocoshon oian oshafoan ato yoini,—Ahuuscain Upa cufitama man oshariai. Ascaquima Upa cuficahuun yoshin chacapan mato chaca huamapaiyai cuscan huash-caquima. Ua potashquimari cuficahuun,—ato huani.

*Jesús achinifo*

*Mt 26.47-56; Mr 14.43-50; Jn 18.2-11*

<sup>47</sup> Nan ato yoiai muran yorahuanrasi nocotoshinifo. Nan afu rafumisi futsa Judas-caifin rufofo oaino acho yora huanrasi funiquin. Nocotan Judaspan tamo tsoacatoshini.

<sup>48</sup> Ascaiton Jesús Judas yoini,—¿Judas, nan Diosin ua catoancaimun ua tamoqui tsoacai-huunshon mian ato achimaicai? —huani.

<sup>49</sup> Asca huaiton oincaquin afu rafuafoan Jesús yocanifo,—¿Ifon, non ato nopu rurapa-cutiomun? —ishon yocanifo.

<sup>50</sup> Asca huatan futsan nopu fifaitan nocon yorafohuunshon Dios cufimisi niaifocoин ahuun oinmati pashtufain rurani.

<sup>51</sup> Ascaiton Jesús yoini, —Unuhuu, —huatan afanan ahuun pafiqui funa futsa panichirishcatani.

<sup>52</sup> Ascashon Jesús nocon yorafohuunshon Dios cufimisi niaifofo yafi ranushumuаfo yafi Dios fu tsainti pushu cushumisifo yocani,—¿Ahuuscain nopu yafi coshatifo ya man uqui fuamun? <sup>53</sup> Shafatifi Dios fu tsainti pushu muran un matofu icanocai man ua achipaiti huama. Asca na yamu man uqui fua Satanás maton ifoanno,—Jesús ato huani.

*—Un Jesús oinmisimarán, —ishon Pedronun yoini*

*Mt 26.57-58, 69-75; Mr 14.53-54, 66-72; Jn 18.12-18, 25-27*

<sup>54</sup> Ascafaiton achicashon nocon yorafohuunshon Dios cufimisi niaifocoин ahuun pushu ano iyonifo. Ascaino chipo achon Pedro cafiaquin fishtanima. <sup>55</sup> Umainti chii cutuhuashu yooaifoanno Pedrori atofu yooni. <sup>56</sup> Ascaiton niaifoan ahuun oinmati shomayaton Pedro fuchini. Chii uruquin fuchashaiton ahuun fuso onanshon yoini,—Naafin nan Jesús fu imisiquin,—huaiton.

<sup>57</sup> Pedronun cumani,—Ma, ainfon. Uncái Jesús oinmisima,—huani.

<sup>58</sup> Man ascano futsanri afanan onanshon yoini,—Minfin nan Jesús fu imisi futsaquin,—huaiton. —Ma. Unmafinquin,—Pedronun huani.

<sup>59</sup> Man ascano chipo afanan futsanri onanshon yoini,—Nancoinfquin. Jesús fu cahuacacaimisi. Nanrifi Galilea anoaran,—ishon nocofunu futsan yoiaiton.

<sup>60</sup> —Min yoiai cuscacai un tapiama. Uncai Jesús oinmisimaran, —itapaiyaino tacara cuoni. <sup>61</sup> Nanscatanaino ifiacucahuan Jesús Pedro fuistani. Fuistanaiton nan Ifoan yoia cuscan shinanriscatani, —Tacara cuoataima min yoiquin rafu non fusti huai, “Un Jesús oinmisimaran,” —Jesús huacun Pedro shinantani. <sup>62</sup> Umaintinoashu chifi caicaintan fasi uaicoinni.

*Jesusqui cashupainifo  
Mt 26.67-68; Mr 14.65*

<sup>63</sup> Ascaino nan cushuafo Jesusqui cashu mutsamai taunifo. <sup>64</sup> Ascano fufoposhon sutucashon yocanifo, —¿Mia tsoan acamainquin? Oinyamafashion noco yoihoo, —huanifo. <sup>65</sup> Asca huashon roaqui futsanifo.

*Niaifoan Jesús yocanifo  
Mt 26.59-66; Mr 14.55-64; Jn 18.19-24*

<sup>66</sup> Shafatapaiyaino Israelifoan niaifofosi nan yorafohuunshon Dios cufimisi niaifofo non Moisés cununi cuscan tapimamisifoan ichanannifo atoqui Jesús iyoafaoan yocashcaquin.

<sup>67</sup> Ascashon atoqui iyoafaoan yocanifo, —¿Minmun Criston? ¿Diosin mia catonni? Noco yoihoo, —ishon niaifofoan yocaiton.

Jesús ato cumani —Un mato, “Ai,” huaitocai man ua icoindra huaima. <sup>68</sup> Ascashon un mato yocaitoricai man ua cumaima. <sup>69</sup> Ascacun natian yafi nantishon tapiquin uhuun Upa Diosin ahuamamishti huatiro futan un nantifi ato iquipacunacaran, —ishon yocaiton.

<sup>70</sup> Afanan yocanifo, —¿Ascan minmun Diospan facu? —ishon yocaifoan.

—Nan man yocain cuscafin unquin, —ato huani.

<sup>71</sup> Ascaiton nicacaquin yoinifo, —Nicacapon. Afanancai ahuunoa tsain chaca huaifoan non yopaima. Naan yoiai cuscan noficoindra man non nicairan, —icashu yoinannifo.

## 23

*Jesús Pilato ano iyonifo  
Mt 27.1-2, 11-14; Mr 15.1-5; Jn 18.28-38*

<sup>1</sup> Ascatain Israeli niaifofoan Jesús aton niaifocoin shinanmaqui iyonifo. Nan Pilato niaifofin Romanonfoan ato niaifo iniquin. <sup>2</sup> Ascano niaifofoan Jesús tsain paranacaquin yoinifo, —Na nocofunun fasi noco yorafo fucash huaquin ato yoia, “Romanon niaifoan mato pui yocaiton inanyamacahuun,” ishon yoifain “Un Diospan facu un mato niaiforan,” noco huaran, —ishon Pilato yoinifo. <sup>3</sup> Ascaiton Pilatonun yocani, —¿Minmun Israelifoan niaifo? —ishon yocaiton.

Jesús cumani, —Nan mian yoiai cuscafin unquin, —huani

<sup>4</sup> Ascaino Pilato nocon yorafohuunshon Dios cufimisi niaifofo yafi nanno niaifofin ato yoini, —Na nocofunun fasi noco yorafo fucash huaquin ato yoia, —Ahuashtacai ahuun nuama non iquimanai, —ishon ato yoini. <sup>5</sup> Ascafaiton fasi curushcain cumanifo, —Na nocofunun fasi ato yoiquin Judea maitio fasi ato fucash huafoanfafaini. “Romanonfoan niaifo non potanon,” ishon yoiaquin. Tau huaqui Galilea anoafio yoiqui fucash huatan nunorifi man oaran, —huanifo.

*Jesús Herodes ano iyonifo*

<sup>6</sup> Ascaifoan nicaquin Pilato afanan ato yocani, —¿Na nocofunumun Galilea anoafio? —ishon ato yocaiton. <sup>7</sup> —Aifain, —huaifoan. —Asca un Herodesqui Jesús nichinonquin. Nan Galilea anoafio yocanifo. Ahuuscamain huaicai afi noco yoinon, —ishon Pilato yoini. Nantianri Herodes arifi Jerusalén ano oni.

<sup>8</sup> Jesús aqui nocoaiton fuchitan Herodes unimacoinni. Fasi oinpaimisishaquin. — Ahuamamishti noco ismapainonran, —ishon ahuun nomuran shinanni. <sup>9</sup> Ascashon fasi ahuaraofo Jesús yocapaifiaitocai cumanima. <sup>10</sup> Ascaino nocon yorafohuunshon Dios cufimisi niaifofo yafi Moisés cununi cuscan tapimamisifo Herodesqui fasi chanirianifo chaca huacaquin. <sup>11</sup> Ascaino Herodes futan ahuun ranushumuafoanri fasi cashumutsama huaquin roarianifo. Niaifoan sahuuti sahuumatan Pilato ano afanan nichinifo. <sup>12</sup> Pilato fu Herodes shara huantananyamafiamisishaquin nantian shara huantanannifo. Jesús achicanisi raunannifo.

*Niaifoan ato yononi Jesús rutunonfo*  
*Mt 27.15-26; Mr 15.6-15; Jn 18.39-19.16*

<sup>13</sup> Ascacun Pilato afanan ato cunani. Nocon yorafohuunshon Dios cufimisi niaifofo yafi niaifofo futsafori ichanan huashquin. <sup>14</sup> Ascano ato ichanan huashon ato yoini,

—Man uqui na nocofunu ihuua. Man ua yoia naton yorafo tsain chaca yosian Romanonfoan aton niaifo non potanon, icaran ishon man ua yoia. Ascafiai ascarama. Maton ointaifi un yocafiaitocai man ua yoiai cuscan ua cumaqui chaca huama.

<sup>15</sup> Herodesricai ahuunoa ahua chaca nicama nan man yoiai cuscan. Ascacun Herodes nocoqui afanan Jesús nichian. Na nocofununcai ahua chaca huamafinquin naashquin.

<sup>16</sup> Ascacun un onaintimaiyoi catanon, —ishon ato yoini.

<sup>17-18</sup> Ascaino mucainifoannifo. —Na nocofunu rutuhuu. Barrabás noco cainmashohuun, —huaifoan. Fuusititiansi Pilato a cunu muran iquiafo fusti ato caimapaoni. Faritifi nan yorafoan cainmapaiyaifo Pilaton ato cainmashopaoni.

<sup>19</sup> Nan Barrabasfin yora rutumisi iniquin. Nantori yoini, —Romanonfoan niaifo non potanon, —ishon yorafo yoini. Ascaiton cunu muran iquimanifo. <sup>20</sup> Ascaifoan afanan Pilatonun ato yoini Jesús nichipaiquin. <sup>21</sup> Ascafiai afanan mucainifoan yoinifo,

—Mastahuun, —huarianifo.

<sup>22</sup> Ascaifoan afanan Pilato ato yoini, —Ahuuscacufin. Ahuacai chaca huamafinquin. Ahuashtacai chaca huatananma napanan. Unfin onaintimashon nichiqui catanon, —ishon ato yoini.

<sup>23</sup> Ascafiai afanai ashcafainin, —Mastahuun, —huarianifo. Yoquin unuyamacaiyaifoan Pilato shinantani ascaiton, —Mafin acahuun. <sup>24</sup> Man fasi yoiriaicai asca nan man apaiyai cuscan huacahuun, —ato huani. <sup>25</sup> Nan Barrabás yora rutufain niaifo potapafiamisicun nancai cunu murannoai cainmafain Jesusrocon ato inanni nan apaiyaiifo cuscan huanonfo.

*Jesús ihui coyán iquinanqui mastanifo*  
*Mt 27.32-44; Mr 15.21-32; Jn 19.17-27*

<sup>26</sup> Jesús iyocaquin oianfo Simón pushurasi patasharinoashu oaiton fuchitan Simón Cirene anoa yononifo, —Ihui coyán iquinan noco foshoicahuun, —ishon iyamafainifo. Jesús rucucaino achon iyashon foni.

<sup>27</sup> Ascaino yorahuanrasifo ya ainfofori achon fonifo. Nan ainfofo uaifonifo aton Ifo manocani. <sup>28</sup> Ascaifoan ifiacucahuán Jesús ato yoini, —Jerusalén anoa ainfofoan, uhuunoashu uaiyamacahuun. Mafiri uaicain maton facufohuunoashu uaicahuun.

<sup>29</sup> Manfin chipo omitsiscaquin yoishquiquin isca huaquin, “Non facuomaofi shara icuanaquin no fu omitsiscanonfomaran,” ishon man yoishqui. <sup>30</sup> “Machi nocoqui maocoano non nai futsuafin shara itiroquin. Omitsiscashquima,” ishon nannori man yoishqui. <sup>31</sup> Un ahua chaca huayamafiamisicun ua isca huacani. Ascan tsoan ahuara chaca huaquin unuyamacaiyaifofin fasi finacaicani omitsiscamashcaniquin, —ishon Jesús ato yoini. Ascashon Jesús iyonifo mastaufocaquin. <sup>32</sup> Ascashon yomutso rafuri iyonifo Jesús ya mastaufocaquin

<sup>33</sup> Ascatan anoshon mastaifoanno noconifo. Nanno ahuun anu mapo shao ini. Nannoshon Jesús mastanifo. Ascashon nocofunu chaca rafuri ocuma futsa futsafain ocuma futsari futsa mastanifo. <sup>34</sup> Ascashon mastaifoan Jesús Apa cufini,

—Upan, ato rau huahuu. Ua isca huaifo cuscan tsoan tapiamaquin. Un min facufiacun tapiafoma, —ishon Jesús apa cufini.

Mastacatan ahuun sahuuti pashcananshcaquin. Aya cashuti ya cashunifo nan finonmanaton ahuun sahuuti fiqui tau huani. <sup>35</sup> Nanno yorahuanrasi mapo cashon oinnifo. Ascashon niaifofoanri roaqui futsacaquin yonifo,

—Non oinon. Futsafo numamisi cuscemain afiri numaiquin nan Diosin catonni Cristo huashuforan afiri numaicain futsafo numamisi cuscan, —ishon yoinifo.

<sup>36</sup> Ascaino ranushumuafu aqui cashupainifo. Fimi unu focashcoin muran mishan pocotan inanpaicaquin.

<sup>37</sup> Ranushumuafu yoinifo, —Minmain Israelifoan niaifoquin mifiri numahuu, —huani.

<sup>38</sup> Ascashon ahuun mapo manaonri aqui cununifo.

#### ISRAELIFOAN NIAIFORAN

ishon.

<sup>39</sup> Ascaino afu masta futsan Jesusqui tsain chaca huani.

—Minmain Cristoqui mifiri numacain nocori numahuu, —huaiton.

<sup>40</sup> A fu masta futsan yoini, —Asca huayamahuu. ¿Minmun Diosqui ratuimacai? <sup>41</sup> Non chaca huamisicufin noco mastafquin. Asca Jesuscái ahua chaca huayamafiamisicun mastaforan, —ishon futsan yoini.

<sup>42</sup> Ascashon nantori yoini, —Ifon, Dios niaifo ari nocoshon ua shinanhuan, —huaiton.

<sup>43</sup> Jesús cumani, —Icon un mia yoi. Na shafatan min ufu ari iquicaiquin. Nanno fasi sharacoin. Min ufu unimacoin sharapacunacaran, —huani.

#### *Jesús nani cuscan*

*Mt 27.45-56; Mr 15.33-41; Jn 19.28-30*

<sup>44</sup> Asca huatanaino fari masafinin racafiahuu nan maitio faquishpacuahuani.

<sup>45</sup> Ascainocai fari chashayonima. Ascashu man fari caino afanan shafani. Ascaino nantianri Dios fu tsainti pushu murannoia Dioshuunoashu panomanhuan pochimua aficoiu nushmancayan fashnupacuahuani. <sup>46</sup> Ascaino Jesús Apa cunainifoanni oi ashcafinin,

—Upan, miari ua ihuicoinhuan, —huatan shacaica unufaini naani.

<sup>47</sup> Ascaiton ranushumua niaifoan yoiquin. —Icocoinfinquin na nocofununca ahua chaca huayomisima. Fasi sharacoin. Nan non oian cuscan nantifi Diosin acaran, —ishon ranushumua niaifoan yoini.

<sup>48</sup> Ascaiton oincani fasi manocoincani fonifo. <sup>49</sup> Ascaiton ahuun yorahuafu yafi nan ainfo Galilea anoashu afu foafoan chai nishon oinnifo.

#### *Jesús mai huani*

*Mt 27.57-61; Mr 15.42-47; Jn 19.38-42*

<sup>50</sup> Nannori nocofunun ahuun anu José Israelifoan aton niaifo ini. Nan nocofununfin Dios tanasharapaicoinniquin. <sup>51</sup> Nantoricai niaifo futsafoan shinainfo cuscan shinannima. A niaifofín Arimatea mai anoa iniquin. Arimatea nan pushurasi Judea muran ini. Nantorifi Cristo nan Diosin catoan manapaoni aton niaifo inon.

<sup>52</sup> Ascashu cashon José Pilato yocani. —Un Jesús ahuun caya toquirininhuan quini muran mai huapairan, —ishon. <sup>53</sup> Ascano yocafaini cashon a ihui coyán iquinanqui mastafo fotomapacufoan ahuun yoratishon racoshon toquirininhuan quini muran mai huani. Jesús naataima quini puhuunifo nan murancai tsoa maiyomisima muran Jesús mai huani. <sup>54</sup> Tunutitian man nococuanaino Jesús mai huani. Nan shafatan itishara huamisifotian ini.

<sup>55</sup> Ascaino nan Galilea anoashu ainfofo Jesús fu fuitafoan José Jesús mai huaiton oinshcaquin mufainifo. Ahuuscashomain rataicain oinsharanifo. <sup>56</sup> Ascashu nan ainfofo afanan aton pushu ano nasofainifo. Ininti shara itishara huai focani. Unupa yafi mutopa inin shara fii focani fonifo. Jesús ahuun caya camaqui ocashcaquin. Ascafiaino tunutitian nasoyonifoma. Finonyocani. Israelifoan yononi cuscan tunutitian tsoa raqui cayotiroma ini. Ascacun nan nicacoinnifo.

## 24

### *Jesús funini cuscan*

*Mt 28.1-10; Mr 16.1-8; Jn 20.1-10*

<sup>1</sup> Israelifoan tunutitian iyoco futsaino funamanrishta aton ininti rafu ya Jesús maia ano fonifo. Iquisi ininti ati shara huafaincani. <sup>2</sup> Nococaquin oianfo quini ahuun fupoita toquirinhuan tocoro man fupucua ini. <sup>3</sup> Ascaino iquifainpaiquin oianfo aton Ifo Jesús ahuun cayacai ano inima. <sup>4</sup> Ascaiton oinquin aton nomuran shinannifo, —¿Raquimun ahuun caya foafoquin? —ishon shinanpaiyaitoanno nocofunu rafu ato sahuutifoya chashatanaino atoqui niriscatanifo.

<sup>5</sup> Ascaino ainfofo fasi ratucoinca ni fuoi futsunifo. Ascaifoan Diospan oinmati rafutan ato yoini, —¿Ahuuscaquimun yora nia man funaicain nan yora naacun mai huamisifo muranno? <sup>6</sup> Afanancal nunomafinquin. Manfin funiaquin. <sup>7</sup> ¿Galilea ano matofu iyoshon mato yoimisimun man shinainmacai? Mato yoimisi isca huaquin, “Chacafoan ua achishon ua mastafa un naafiahua osha rafu non fusti finontan un afanan funishqiran,” mato huamisi nammun man shinainmacai, —ishon ato yoinifo.

<sup>8</sup> Ascaiton nan Jesús ato yoimisi cuscan shinanriscatanifo. <sup>9</sup> Ascatan ainfofo nasafoinca ni once nocofunufo Jesús fu rafumisifoquin chanitoshinifo. Nanno futsaforifi nan rama oinfainafo cuscacoin ato yoinifo. <sup>10</sup> Nanfotín María Magdalena non Juana non Santiago ahua María non ainfo futsafori nanfo atoqui chanitoshinifo. <sup>11</sup> Ascafiaifoanca ato icoinra huanifoma. —Icon yoicanimaran, —ato huanifo.

<sup>12</sup> Ascaiton nicafaini Pedro ichoni toquirinin huaa quini muran oinca. Nocotan tucupacuhuan quini naisquin oian ahuun racoita fusti nanno mania ini. Ascaino Pedro —¿Ahuuscamun aaquin? —icaini cani.

### *Jesús Emaús fain cani cuscan*

*Mr 16.12-13*

<sup>13</sup> Nan shafatanri Jesús tanamisi rafu pushurasi Emaús ano fonifo. Emaús Jerusalén chaima ini. <sup>14</sup> Nan rafu focaquin Jesús aquitafo cuscan afi rafu yoinanfonifo.

<sup>15</sup> Ascaifoanno Jesuscoin afanan atoqui nocotan. <sup>16</sup> Ato fu cafiaitocai tsoan onannima. Diosin ato onantima huaino. <sup>17</sup> Ascaiton Jesús afincion ato yocani,

—¿Nocofunu rafutan, raquiri man yoinanfoi caimun? —ato huaino. Pusitama nituriscatanifo.

<sup>18</sup> Ascaiton naan Cleofas fustiton cumani,

—Mirus fusti Jerusalén ano min icatoracafin min tapiamaquin na rama iquitan cuscan, —huaiton.

<sup>19</sup> —¿Ahua ahuuascaitamun? —ishon ato yocaiton.

—Jesús Nazaret anoaya non tsainquin. Nanfin Diosin tsain yoimisiquin. Diosin ahuun curushhuunshon noco yoimisi. Dioso huunshon ahuamamishti noco huashomisi. Ahuun tsainman yora caya huafain ahuara sharafo noco huashomisi. Nan acai cuscan nantifi man non oian. Diosin yafi nantifi man non oian. Nocofunu sharacoinfin non oinmisi. <sup>20</sup> Ascafiaiton nocon yorafihuunshon Dios cufimisi niaifofo non nocon niaifofoan achicashon mastaitafo. <sup>21</sup> “Nancairocon nocon caifo Israelifo nocon Numamisi ipainonran,” non huamisi. Asca natian man naita shafa rafu non fusti man finoan.

**22** Na funamanri ainfofoan no fu focashon man funatanafo ahuun caya quini muran yamaiton.

**23** Ascashon naso furan noco yoiafo ahuun caya anocuma. “Ahuun oinmati afu nai muran ica rafutan yoiafo Jesús man afanan niaran,” noco huafo. Ascacun non shinan “¿Ahuuscamun aaquin?” ishon. **24** Ascaíno nocomaquinoashu rafu ichocashon oiancái ano Jesús ahuun caya icama. Naan ainfofoan yoiafo cuscan iconcoinran, —ishon non yoia.

**25** Ascaifoan ato yoiqui isca huani, —¡Ohua! Manfin tatimacoinfoquin. Diosin tsain yoimisifoan yoinifo cuscan mancái icoínra huacuanama. **26** Man cununi isca huaquin, “Diosin yonoa nan catoan Cristo omitsiscayotan. Apa Dios fu niaifocoin iishquiran,” icashon ahuunoa cununiran, —ishon Jesús ato yoini.

**27** Ascacun tau huaquin ahuunoa Moisés cununi cuscan yoifain Diosin tsain yoimisifoanri ahuunoa cununifo yoifain nantifi Diosin tsain ahuunoa cununi cuscan atofu cafoquin shafacafi ato yoifoni.

**28** Ascano Emaús ano man nocoti chaima nan rafutan shinannifo, —Noco finonfaini cairan, —ishon shinannifo. **29** Ascátan nan rafutan yoinifo —Cayamahuu. Man fari caiquin. No fu iyopun, —huariaifoanno atofu caani. **30** Ascátan piaifoanno Jesús misi finifoantán Apa Dios yoiqui isca huani, —¡Aicho! Upan, non yopai cuscan min noco inanmisiran, —huatan. Misi torupacushon aton inanni. **31** Ato inainton Dioshuunshon Jesús onanriscatanifo. Onantapaiyáifoanno atomaquinoashu yamariscatani. Afanancái tsoan oinnima. **32** Ascano afi rafu yoinannifo, —Noco fu fain oquin Diosin tsainhuunoa cununi cuscan noco yoi fuaino non mua nocon ointi fupuisharatanaítón. Ahuun tsain sharacoinran, —icashu yoinancatan.

**33-34** Ascashu Jerusalén ano nasoriscafuranifo nan Jesús fu rafuafó once funashcaquin. Ascashon ato fuchinifo ichananshu nan once yoinainfoanno, —Icon, nocon Ifo funia. Pedro man oinmanaran, —ishon yoinifo.

**35** Ascaifoanno nan rafu Emaús anoashu fua rafutari yoinifo, —Noficoinri Jesús man non oian Emaús fain non caino noco ahuunoa Diosin tsain yoia. Ascátan noco misi torupacushonaiton man non onanriscatanaran, —ishon nan rafutari ato yoinifo.

### *A fu rafuafóqui Jesús niriscatani*

*Mt 28.16-20; Mr 16.14-18; Jn 20.19-23*

**36** Nan yoiriaifo muran Jesús afanan atoqui niriscatani. Ascashon ato yoini, —Matón ointi unimacain isharacoincahuun, —ato huani.

**37** Ascaíno —Yoshiran, —icashon shinannifo. Fasi mustairitan ratucoinnifo.

**38** Ascaifoan Jesús ato yoini, —¿Ahuuscaí man ratuain? ¿Ahuuscaí matón nomuran man icoínra huaimamun? **39-40** Ua oincahuun. Uhuun mucun yafi uhuun tau oincoincahuun. Pirico tohua. Nan uncoinfiquin. Yoshincaí ua cuscara namiyacain shaoyamafinquin. Man manfin oincain shao yacain un nami yaran, —ishon ato yoini. Ato yoiquinasca huatan ahuun mucun tohua yafi ahuun tau ato ismani. **41** Ascaítón oincaquin ato nomuran shinannifo, —Namaparaca non oincatin, —ishon shinannifo. Icoínra huacuatama fasi aquí unimacoinnifo. Ascaítón nan iconcainran huacaicainonfo ato tushu yocani.

**42** Ascaítón shiman shoi inannifo. **43** Ascano aton ointaifi pini.

**44** Ascashon afanan ato yoini, —Munfin mato yoiyomisiquin. Uhuunoa Moisés non Diosin tsain yoimisifoan non fanainti uhuunoa cununifo cuscan nanscacoinfin un aiquin, —ishon Jesús ato yoini.

**45** Ahuun shinapan aton nomuran nanumana aquí cununifo cuscan tapisharanonfo. **46-47** Ato yoini, —Diospan tsain cununi isca huaquin, “Cristo nan Diosin catoan naafiaflashu afanan osha rafu non fusti finontan furnishquin.” Ascacun uhuunshon ato yoifoanfafaintacahuun aton chaca shatucashon shinansharaifoan un ato chaca

soashonon. Jerusalén ano ato yoiqui tau huatacahuun. Ascashon nan manifoati ato yoifoanfafaishcaquin.

<sup>48</sup> Ascashon un mato yoiaiton man oian cuscan yafi man nica cuscan futsafori yoipacushacahuun. <sup>49</sup> Ascafia nuno Jerusalén ano oinyocaquin. Upa Diosin yoiyotiani cuscan un ahuun Yoshin Shara matoqui nichishqui. Ascano matoqui nocoshon ahuun curush mato inain. Nantian un mato yonoa cuscan man futsafo uhuunoa ato yoitiro, —ishon Jesús yoini.

*Jesús nai muran cani cuscan*

*Mr 16.19-20*

<sup>50</sup> Ascashon Jesús Jerusalén anoshon Betania pasoato ato iyoni. Betania pasoato nococashon Jesús mushainacahuan yoini, —Upa Diosin, fasi uhuunshon tapimisifo cushusharapacuhuun, <sup>51</sup>—huatan atomaquinoashu Jesús nuinacahuan Apa Dios icano ari cani. <sup>52</sup> Ascaino nanno amaquinoashu naso furanifo. Yoinifo, —Jesús, min nocon Ifo fasi sharacoin. Non minhuun noiran, —ishon yoinifo. Yoicatan Jerusalén ano naso furancatan fasi unimacoinnifo. <sup>53</sup> Dios fu tsanti pushu muranshon Dios yoishararia-paonifo. Nanti.

## Juan Jesushuunoa Cununi

### *Jesucristohuunoa Juanpan cununi*

<sup>1-2</sup> Natian Jesucristohuunoa un mato yoicain man tapinon. Ahuashta oniataima Cristo Apa Dios fu iyopaoni. Arifi Diosin. Apa Diosin shinain cuscar arifi shinamisiquin. Nannori fusti ahuun tsain. <sup>3</sup> Ahuunshon Upa Diosin nantifi onihuaniquin. Cristohuunoamacai ahuashta onihuaniima. Arusu fusti Apa futan nantifi onihuaniquin. <sup>4</sup> Ahuunoashu fusti yora nitirofoquin. Aafin chashamatii cuscaraquin. Upa Diosin ahuu cuscaramainquin arus fusti yorafo oinmatiro. <sup>5</sup> Faquish muran chashamatinin noco oinmasharatiro. Nanscarifiai yora chacafo murannoari Cristo noco oinmatiro non Dios tanasharanon. Nan chacafoancai Cristo unumatiroma.

<sup>6-7</sup> Ascano Upa Diosin Juan nichini Jesucristohuunoa yorafo yoinon. — Jesushuunoashu yorafo Dios fu ipatiro. Upa Diosin mato tapimapaiyai cuscan Jesushuunshon mato tapimatiroran, —ishon Juanpan ato yoini. Nannori ato yoini icoinra huanonfo. <sup>8</sup> Juanpacai yorafo Dios ya imapacutiroma. Diosifin man Juan nichiniquin ato yoinon. —Jesucristo fustichifin noco Dios ya imapacutiroquin, —ishon ato yoinon. <sup>9</sup> Yoiyoni cuscan atoqui noconi. Criston iconquin Dioshuunoa tapimatiro. Diosin nantifi yorafoti imapaiyai cuscan ato tapimamisi.

<sup>10</sup> Nanton mai yafi yorafoti onihuafianicucai atoqui nocoaiton tsoan onannifoma. <sup>11</sup> Ahuun mai ano nocofiaitocai ahuun yora Israelifoan oinpainifoma. <sup>12</sup> Asca huafainfoanno, nan noiaifoan icoinra huanifo. Ascaiton ato yoini isca huaquin, —Man ua icoinra huaashu Upa Diosin Facu man itiroran, —ishon ato yoini. <sup>13</sup> Yorafoancai Diosin Facu huatiromoma Diospan Facu inon. Ascashon tsoancai yoiqui isca huatiroma, —Uhuun ahuin un facu nanumatiro. Caianshu Diospan Facu inon, —ishoncai tsoan anori yoitiroma. Diosin fustiton ahuun facufo cainmatiro. Noncái asca huatiroma. Upan Diosin apaiyai cuscan Jesús icoinra huafoti aton nomuran fiananantiro ahuun facufo ishcaquin.

<sup>14</sup> Ascan Criston Apa Dios icanoashu mai ano oni yoracoin ishquin. Nocoashu no fu iyopaoni. Nantifi yorafo noimisi. Nocohuun ramapaicoin. Ahuun tsain iconcoin. Arusu fustifin Upa Diosin facucoinquin. Apa Dios shara imisi cuscan arifi nanscacoinmisiquin. Man non oinpaoni. <sup>15</sup> Ahuunoa Juanpan yoini isca huani, —Ua nicacahuun. Nanhuunoa un mato yoimisiquin. Un mato Diospan tsainhuunoa yoiyofiamisi natian aficoi man matoqui nocoa. Un mato yoimisi cuscan nanfin Diospan facu oinquin. Unmaquian. Un caiantaima Apa Dios fu iyopaoniquin. Ascan ua fasi finoncoian, —ishon Juanpan ato yoiniquin.

<sup>16</sup> Jesús nantifi noco shara huamisiquin. Nocohuun noiquin noco shara huafafaini. Nantififain man non mumisiquin. <sup>17</sup> Upa Diosin noco yonopaiyai cuscan Moisés nocon shunifo yoiniquin. Ascaiton ahuunshon norifi non tapitiroquin. Moisés nanfo noco tapimafiaino Jesucristo nocoqui oni nocohuun ramapaicain aafin iconmisicoinquin noco ismapaoni. <sup>18</sup> Tsoancai Upa Dios oinmisima. Ascafia ahuun Facu fu rafumisiton ahuunoa noco yoimisiquin. Ahuunshon non tapitiro ahuu cuscaramain Upa Diosiquin.

### *Juanpan yorafounu muran iquimapacumisiton Jesucristohuunoa ato yoiniquin Mt 3.11-12; Mr 1.7-8; Lc 3.15-17*

<sup>19</sup> Ascano nocon caifo Israeli niaifofoan Jerusalén anoshon nan nocon yorafohunshon Dios cufimisifo non ato fu niaifo patasharinoafó Juan icano nichinifo. — Juan yocatacahuun, “¿Min tsoamun?” ishon yocatacahuun, —ato huaafó focashon.

<sup>20</sup> Juan yocaifoanno pusitama shafacafi ato cumani,—Uncai Diospan Furunma. Unricai Cristoma,—huaiton.

<sup>21</sup> —¿Ascan min tsoamun? ¿Minmun Elías? —huaifoan. —Ma. Uncai Eliasma, —huaiton. —¿Ascan minmun Diosin tsain yoimisi nan nocoqui oiran Moisés noco huamisi? ¿Nan non manamisi minmun? —huaifoan. —Ma. Unmafinquin,—huaiton.

<sup>22</sup> —¿Ascan min tsoamun? Noco yoihoo noco nichiafo non ato tapimanon. Mihuunoa noco tapimahuun,—huaifoan.

<sup>23</sup> Isaías cununi cuscan nannoricoín Juanpan ato yoini isca huaquin,—Diosin mato yoipaiyai cuscan ua tapimana un mato yoinon. Tsoan istaipamashon un oi ashcafínin yoimisi isca huaquin, “Nocon Ifo nocoqui oshquiquin. Nocoataima itisharacahuun. Man ipaoni cuscan afanan ayamacahuun. Nantifi maton chaca potacahuun. Cayacafi isharashcaquin,”—ishon ato yoini.

<sup>24-25</sup> Nicacashon nocon caifo Fariseofoan ato Juanqui nichinifo yocanonfo, —¿Min Cristo iyamacain, min Elías iyamacain nan non manamisi Diosin tsain yoimisicai min ahuuscashocon min yorafounu muran iquimapacuamun? —ishon yocaifoan.

<sup>26</sup> Ascaiton Juanpan ato cumaquin,—Unfin ato unu muran iquimapacuaquin. Ascafíano nuno noco muran futsan nocoa. Mancaí onanma. <sup>27</sup> Un natian mato Diosin tsain yoifafaini. Ascafía afincóin chipo mato yoishquin. Fasi ua finoncoian. Un ahuara shara huua rafanancái un ahuun oinmatima. Uhuun ramapaiyamainocai un ahuun oinmati icuanamaran,—ishon Juanpan ato cumani.

<sup>28</sup> Nan pushurasi Betania unu Jordán oquirishtashon Juanpan nannoshon ato unu muran iquimapacuuni. Nannoashuri atofu tsainni.

### *Jesúsfin Diospan Chashoan Facu cuscaraquin*

<sup>29</sup> Ascátan iyoconaino Juanpan Jesús aquí oaiton oinni. Ascanshon yorafo yoini isca huaquin, —¡Oincapon! Nan Diospan Chashoan Cahuashara cuscaraconoi. Nanton nantifi yorafo nan icoínra huafotisi aton chaca soashonpacunaca. <sup>30</sup> Un mato ahuunoa yoimisi cuscan, un mato yoiqui anaitiano nocofunu shara matoqui nocoi. Un caiantaima iyomisi. Ascan ua fasi finoncoian. <sup>31</sup> Unrifi un onansharayamafashion un yorafo unu muran iquimapacuaquin a nocon caifo Israelifoan a onanonfo, —ishon Juanpan ato yoiniquin.

<sup>32</sup> Jesushuunoa Juanpan ato yoini isca huaquin,—Diospan Yoshin Shara nai muran-noashu ruhui cuscara Jesusqui fotopacucahuanaiton. Uficoín un oian. <sup>33</sup> Un onantaima Upa Diosin ua yoia isca huaquin, “Tsoan ua icoínra huafio min unu muran iquimapacutiro. Futsa miqui oaino uhuun Yoshin Shara nan nocofunu unu muran iquimapacuashquin. A fu nitushquin. Nan oinquin min tapitiro uhuun Yoshin Shara matoya rafumashquin ahuun shinanshara maton nomuran shinamaniran,” ishon ua yoia. Upa Diosin ua anori yoiyamacuai Jesús nan Diospan Furun urifi un onancuanama. <sup>34</sup> Ascafashion mun oian. Ascan un mato icoíncoín yoiquin nancaífin Diospan Furunquin, —ishon Juanpan ato yoini.

### *Jesús icoínra huaquin tau huanifo*

<sup>35</sup> Iyoconaino afanan nanno Juan yafi ahuun tananmisifo rafu. <sup>36</sup> Niafoanno Jesús ato finonfainaiton Juanpan oinquin ato yoini,—¡Oincapon! Nan Diospan Facu Chashoan Facu cuscara,—ishon ato yoini.

<sup>37</sup> Nicacatan nan rafutan Jesús mufainifo. <sup>38</sup> Ascaiton Jesús ifiacucahuán ato oinquin yoini. —¿Ahua man funaimun? —ishon ato yocaiton. —¿Tapimamisiton, rani min iquimun? —huaifoan.

<sup>39</sup> —Fucahuún un mato ismanon,—ishon ato yoini. Ascátan afu focaquin oianfo ica ini. Nanno afu yatapacunifo.

<sup>40</sup> Nan rafu Juanpan ato yoia cuscan nicacatan Jesús mufainifo futsan ahuun anu Andrés. Nan Andrés ahuun ochi Simón Pedro. <sup>41</sup> Jesús icano nococatan Andrés samamashta ahuun ochi Simón funai cani. Aqui nocoshon yoini, —Upa Diosin noco yoiyoni, “Un maton Numamisi matoqui nichishquiran,” ishon noco yoiyoni. Nan man non fuchia. Nanfin Cristoquin. Oinyohuu, —huani.

<sup>42</sup> Ascantan foaifoanno Andrés Simón Jesusqui yioni. Aqui nocoshon Jesús Simón oinquin yioni, —Minfin Simonquin Juanpan facu. Natian un mia anu futsa tuquihuanon. Non mia Cefas huairan, —ishon yioni. Cefas nahua tsainmanfin Pedro.

### *Jesús Felipe yafi Natanael cunani afu fononfo*

<sup>43</sup> Ascan iyoconaino Jesús shinanni isca huaquin, —Un Galilea ano cairan, —ishon shinanni. Caquin Felipe fuchitan yioni, —U fu cahuun, —huani. Nicatan afu cani.

<sup>44</sup> Felipe non Andrés non Pedrori pushurasi ahuun anu Betsaida ano inifo. <sup>45</sup> Ascantan Felipen Natanael fuchishon yioni, —Moisés Diosin yononi cuscan cununi isca huaquin, “Un Numamisi matoqui nichishquiran,” ishon Diosin yioni cuscan Moisés aquí cununiquin. Nannorifi Diosin tsain yoimisi futsafoan yoinifo. Nancaí man non fuchiaran. Jesusfin José ahuun facu Nazaret anoaquein, —huaiton.

<sup>46</sup> —¿Ahuatomun noco Nazaret ano shara huashotiroquin? —Natanael huaiton. —Ohuu, Oinshquin, —Felipe huani.

<sup>47</sup> Natanael aquí nocoaiton Jesús ahuunoa yioni, —Naafin Israelicoinquín. Diospan yora ipaicoín. Nantofin iconcoin shinanfafaimisiquín. Paracai huamisimaran, —ishon Jesús ahuunoa yioni.

<sup>48</sup> Nicatan Natanael cumani, —¿Ahuuscashomun ua oinyamafiamisishaquin min ua onantiroquin? —ishon yocaiton. —Felipe mia cunataima un anoyamafiaflashon ihui huiguera namannoá un mia oian, —Jesús huaiton.

<sup>49</sup> Ascaiton, —Tapimamisisiton. Felipe ua yoia cuscan iconcoin. Minfin Diospan Furunquin. Nocon caifo Israelifo min nocon niaifoquin, —huaiton.

<sup>50</sup> Jesús cumani, —Min fimi huiguera ihui naman raca. Un ano yamafiaflashon un mia oian. Un anori mia yoiaiton mian icoíra huaa. Min ahuara shara finacaia min oinshquin.

<sup>51</sup> Iconcoin un mia yoinon. Min Upa Diosin nai muran icano oinshquin. Uhuunoashu Upa Diosin ahuun oinmati afu nai muran icafo mai arishon nai muran Diosin icano furnishquin. Ascaiton min oinshquin. Upa Diosin icanoashuri mai ano fotoaino min ato oinshquiran, —ishon Jesús Natanael yioni.

## 2

### *Jesús ahuun tsainmansi unucoin fimi unu onihua*

<sup>1-2</sup> Man osha rafu ano Caná ano Galilea muranshon nocofunun ainfo fiaino yorafó anosi ichanannifo. Jesús non ahua non norifi afu rafumisifori noco yoimanifo. Ascano non cani. <sup>3</sup> Fimi unu man nutsoafono Jesús ahuan yoiquin, —Na focai afanan fimi unu yamafinquin, —huaiton. <sup>4</sup> Ascaiton, —Uhuashtan, funayamahuun. Uhuun yono un ato ismataimacai, —huani. <sup>5</sup> Ascaiton ahuan oinmatifo yoiquin, —Nan mato yonoai cuscan huashocaquin, —huani.

<sup>6</sup> Nanno mai cutimahuan seis funupafo chaimashta tsaonifo. Fasi funupafo bidóntirofo. Treinta galones a muran iquitiro. Nocon caifo Israelifoan aton muchoquimuti anoashu muchoquimui futsunifo. Shinanpaoni, —Non iscain muchoquimauino Upa Dios nocoqui unimatiroran, —ishon shinanpaonifo. Nocon shunifoan nannori noco yonopaoni.

<sup>7</sup> Ascashon Jesús oinmatifo yonoqui, —Na cutimahuanfo muran unu fospí huacahuun, —huaiton. Fospí huacaquin cufirisacoinnifo. <sup>8</sup> Ascantán Jesús yononi, —Ichananfo cushumisi fuafaintan mumatahuun, —huaiton.

<sup>9</sup> Nicaquin oinmatinin ichananfo cushumisi fuashon inainton muacai unuma. Fimi unucoin ini. Ichananfoan cushumisitocai Jesús aca cuscan onannima. Oinmatifoansi Jesús aca cuscan huaquin onannifo. <sup>10</sup> Ichananfoan cushumisiton Jesús fimi unu onihua onanshma nan rama ainfo fian cunashon yocani, —Na fimi unufin sharacoinquin. Nan ichananfoti aquifin rufofo shara nutsocashon chipo onanshta ichapama shara amisifo. Ascan huafainfoan minfin nan sharacai ahuun unutaquin fasi sharacapacoin noco amaiquin, —huani.

<sup>11</sup> Ahuamamishti yora atiroma cuscan huatiroshaquin Jesús nanno nan pushurasi Caná ano tau huaquin noco ismaniquin. Ato ismani aamain Diospan Facucoinshofin ahuunshon ahuamamishti tsoan oinmisima cuscara huatiroquin. Ascano oincashon non afu rafumisifoan man non icoinra huani. —Icoinfín Jesús Diospan Facucoinran, —ishon non shinanniquin.

<sup>12</sup> Ascantán Jesús ahua non ahuun ushtofo norifi afu rafumisifo nan pushurasi ahuun anu Capernaum ano non cani. Nanno osha rananyoni.

*Jesús Dios fu tsanti pushu muranshon ahuara chacafó potani*

*Mt 21.12-13; Mr 11.15-18; Lc 19.45-46*

<sup>13</sup> Diosin ahuun oinmati afu imisiton nocon shunifoan aton furun iyoafofosi finonmani rutunonma. Faritifi nanfohuunoa shinanpaonifo. Israelifoan noco fusititian. Nan fusiti nocoti chaima Jesús nan pushurasi Jerusalén ano cani. <sup>14</sup> Nannoashu Dios fu tsanti pushu murannoashu moifo non chashoanfo non ruhuinfo ya inanmitsacashon ahuun rafanan pui fishcaquin. Nannori pui fiananan huamisifo tsaonifo.

<sup>15</sup> Ascaiton Jesús ato fuchitan fichi coshatiqui tuchia atoqui sannaino. Chashoanfo non moifo non aton ichonquin futsani. Sapa camaqui aton pui machiafori arasaquin futsani. Sapari cushca huaiacufoan potani. <sup>16</sup> Nan ruhui inanmitsamisifo potashon ato yoini, —Nafo ya Uhuun Upa Diosin pushu murannoashu fotacahuun. Ahuuscaimun uhuun Upa pushu murannoashu man ahuarafo inanmitsaicain ahuun rafanan pui fishcaquin. Afanan uhuun Upa pushu murannoashu ahuarafo inanmitsayamacahuun. Uhuun Upa Diosin ahuun pushucái a murannoashu inanmitsati pushumafinquin, —ishon ato yoini.

<sup>17</sup> Oincatan non afu rafumisifoan non shinanni isca huaquin, —Icon Diosin tsain nannori ahuunoa cununiquin isca huaquin, “Upa Diosin un min pushu cushusharapai a muranshon mia fusti shinanonfo. Ahua futsa a muranshon anonfoma. Ahuara futsacai min pushu murannoia un oinpaimaran,” —ishon cununiquin. <sup>18</sup> Jesús ascaiton Israelifoan nocon niaifofoan a yocanífo, —¿Ahuuscain Dios fu tsanti pushu muranshon min ato potamun? Diosin mia yonoaiton ahuara tsoan atiroma cuscan noco ismahuu non mia icoinra huanon, —ishon yoiaifoan. <sup>19</sup> —Man na pushu paonhuaca afanan osha rafu non fusti finontan un afanan mapoinnifoanshquin. Ufin ashquin, —ishon Jesús ato cumani.

<sup>20</sup> —¡Cuu! Nocon shunifoan cuarenta seis fari afianifo. ¿Ahuuscashocon osha rafu non fustisi min aquimun? —ishon cumanifo. <sup>21</sup> Ascafiaitocai tapinifoma Jesús Dios fu tsanti pushuhuunoacai yoinima. Ahuun cayahuunoa afiri yoimuni. <sup>22</sup> Ascan chipo Jesús naafiashu osha rafu non fustitan funiano noco yoiyoni cuscan non shinanni, —Icon Jesús yoini, “Nan pushu paonhuaca unfin shafa rafu non fusti un afanan funimashquicain,” ishon yoini. Nantian man non tapia ahuun cayahuunoa yoiran, —ishon non shinanni. Ascano Diosin tsain cununi cuscan huafain Jesús yoini cuscari non icoinra huani.

*Jesús nantifi yorafo onancoinni*

<sup>23</sup> Ascan tsoanshta atirofoma cuscan huaquin Jerusalén anoshon Jesús ani. Ascan nanfo oincatan yorahuanrasifoan, —Nan Diospan Facucoinran, —ishon icoingra huanifo. <sup>24</sup> Ascanfiashon afoan shinainfo cuscan Jesús ato onancoinni. Icoingra huaiyamaifoan. <sup>25</sup> Yorafoan aton nomuran shinainfo cuscacai tsoan Jesús yoitiroma. Afincoinmain nantifi onancoiainton. Aton nomuran shinainfo cuscan onancoinni. Icoingra huayofianishaquin tapini samamashta shinan futsaifoan.

### 3

#### *Jesús Nicodemo tapimaniquin*

<sup>1</sup> Nan nocofunufin Fariseo iniquin ahuun anu Nicodemo. Nanrifi Israelifoan aton niaifo patashari. <sup>2</sup> Nantori Jesusqui yamu oshon yoini, —Tapimamisiton, non tapiafin Upa Diosin mia nichiniquin min noco tapimanon. Man nonfin tapiaquin tsoan atiroma cuscan min huaiton Dios fu rafuamatocaiasca huatiroma cuscafin min huaquin, —ishon yoini. <sup>3</sup> Ascaiton cumani, —Unfin iconquin mia yoicain. Nocofunu afanan cain futsanyamacai Diosin niaifo ano nocotiromafinquin, —huaiton.

<sup>4</sup> Ascaiton afanan yocaquin, —¿Ahuuscashumun afanan nocofunun cain futsantiroquin? ¿Man anifofiashu ahuuscashucon ahuan shaqui muran afanan nanutiromun cain futsashquin? —huaiton.

<sup>5</sup> Ascaiton afanan Jesús cumani, —Unfin iconquin mia yoicain. Yora unu muran iquimamutama ahuun chaca shatutama afanan Diospan Yoshin Sharahuunoashuri cain futsanyamashuricai Dios niaifo ari nocotiroma. <sup>6</sup> Futsafin futsa cainmatiroquin ahuunfin canon. Nanscarifi aquin Diospan Yoshin Shara fustiton nocon cainma futsatiroquin. Norifi non ahuunfin canon. <sup>7</sup> Un mia yoiai cuscarifi, cain futsatiroquin, huaiton. “¡Aira! ¿Ahuuscashucon non cain futsatiromun?” iyamahuu. <sup>8</sup> Fuufin nan fopaiyaiquiri fotiroquin. Fuun nicaquiaquicai man tapitiroma raquiriashu futanmain raquiri foicain. Nanscarifiai yorafo Diospan Yoshin Sharapan ato cainma futsatiro. Ahuuscashomain cainma futsatiroquin tsoancai tapitiroma. Manricai tapitiroma ahuutianmain cainma futsaicain, —huaiton.

<sup>9</sup> —¿Ahuuscashucon ascatiromun? —Nicodemo huaiton. <sup>10</sup> —¿Min Israelifoan tapimamisiflashomun na un mia yoiai min tapimacain? <sup>11</sup> Un mia iconquin yoi. Nan un nica cuscan huafain un oian cuscan un mia yoi. Ascafiai un mato yoia cuscan man icoingra huama. <sup>12</sup> ¿Nuno mai anoa ahuaraofo icai cuscan un mia yoiai icoingra huayamashu ahuuscashon Diosin nai muran icariafo un mia yoiaiton min icoingra huatiromun?

<sup>13</sup> Tsoacai nai muran camisima. Urus fustifin un nai murannoashu fotoaquin nocofunucoin iquiyoi. Un afanan chipo nasocainicain. <sup>14-15</sup> Nocon caifo Israelifoan tsoan istaipamashon chaca huapaonifo. Ascaiton oinquin Diosin rono paupan atoqui nichini ato nasanon. Ascanori Moisés Diosin yononi ihuiqui rono ointsa huashon yayomashon nimainifoanni a oincanashu cayanonfo. Nanscarifi aquin uarifi ihui coyán iquinanqui nimainifoanshcaniquin nan ua icoingra huafu uhuunoashu Dios fu isharapacunonfo.

#### *Upa Diosin nantifi yorahuun fasi noiquin*

<sup>16</sup> Unfin Upa Diosin Facu fustiquin. Ascafiai nantifi yorafohuun fasi noiquin ua nichini atohuunoashu un nanon. Nan ua icoingra huafoti omitsiscapatamarocon Upa Dios fu ipasharanonfo. <sup>17</sup> Ua mai ano nichini un ato onaintimatama un aton chaca soashonon uhuunoashu nidanonfo. <sup>18</sup> Ua icoingra huafocai Upa Diosin ato omitsiscamatapacunacama. Ascan tsoan ua icoingra huayamacun Upa Diosin ato onaintimai yoiyoni cuscan. Unfin Upa Diospan Facu fustiquin. Tsoan ua icoingra huayamashu ositiroma. Nanscarifiai unfin Diospan Facu sharaquin. Ahua chacacai ufu itiroma. Upa Diosin ua nichini nan maitio shafa cuscara un imanon chaca shatunonfo. Ascafiai yorafoan aton chaca potacasmacanifin uqui fucasmacani isharashcaquin. Ascacun Upa

Diosin ato onaintimai. Aton chaca noicanicai uqui fupaicanima chaca shatucanashu isharashcaquin. <sup>20</sup> Faquish noiiquicai tsoa shafa oinpaitiroma. Nanscarifi aquin chaca noicanicai uqui fupaicanima. Uqui ranocani uqui oshon chaca huaifo cuscan tapicasmacani. Chaca huaifo cuscan ato oinmacasmacani. <sup>21</sup> Tsoa icoinsharapaiyaifofin uqui fucaniquin Upa Diosin ato amapaiyai cuscan aquifin futsafoti oinmacaniquin, —ishon Jesús yoini.

### *Juanpan nan yorafounu muran iquimapacumisiton Jesushuunoa ato yoini*

<sup>22</sup> Ascatac chipofin Jesús yafi afu rafumisifo Judea mai ano non cani. Nanno atofu iyoni. Nannori aton chaca shatupaiyaifoan non ato unu muran iquimapacuniquin. <sup>23-24</sup> Juan cunu muran iquimanataifoma arifi futsafo unu muran iquimapacuniquin. Nan Enón pushurasi chaimashtari Salim ini. Ano unu noa sharacoin. Anoshon ato unu muran iquimapacuni. Nanno furi furiaifoan ato unu muran iquimapacuni. <sup>25</sup> Nantianri Juanpan tanamisifo ya nocofunu nocon caifo futsa fu fochishmanantanano-nifo. Ahuuscashucaimun unu muran iquimamutiroquin icashu fochishmanantanano-nifo.

<sup>26</sup> Ascatac Juan ano fonifo. Nococashon yoinifo, —Tapimamisiton, non mia tapimapai. Unu Jordán oquirishon min na nocofunu Jesusqui nocotan, “Nan Diospan Facu. Nocoqui nocoaran,” ishon min yoita. Arifi natian yorafo unu muran iquimapacui. Nantifi yora aqui focaniran, —inifo.

<sup>27</sup> Nicaquin Juanpan ato cumani isca huaquin, —Diosin fustitofin catontiroquin ahuuscamacain huaicain. <sup>28</sup> Uncái Cristoma. Upa Diosin ua yonoa un Cristohuunoa yorafo tapimanon aton chaca shatunonfo Cristo nocoaiton icoira huashquin. Nannori un mato yoiaiton man nicamisi. <sup>29</sup> Afanan un mato yoi ua nicacahuun. Man man tapia nocofunun afu rafua yoitiro isca huaquin, “¡Aicho! Na ainfo min ua fuchimana natian un rama fia uhuun ahuin inon. Un aqui unimacoinran,” ishon funun yoiaino afu rafuan aqui unimatiro. Nanscarifiai un Cristo yamafiacun futsafoan nan Cristo Jesús nicacoiainfoanno un fasi unimacointiro. <sup>30</sup> Aafin Cristocoinquin. Uncái Cristoma. Ascan afanan un yoiqui chaihuaima ua tanatama Cristo fusti shinancoinonfo.

### *Nan Upa Dios icariashu oai*

<sup>31</sup> Criston Dios icariashu mai ano fotoni. Nantonfin tsoamamishti finoanquin. Un na mai anoashu caiantonfin na mai anoa ahuu cuscaramainquin un tapiaquin. Nan fustihuunoasi un yoitiroquin. <sup>32</sup> Ascafia Jesús oinmisi cuscan nicamisi cuscan noco yoifiaiton fustirasiton icoira huaafó. <sup>33</sup> Ascafia tsoan ahuun tsain icoira huacashofin nanfoanfin tapitirofoquin Diosin tsain fasi iconcoin. <sup>34</sup> Upa Diosin ahuun Yoshin Shara Jesusqui nichini afu rafupacunon. Nantifi ahuun curushu inanni. Diosin yoia cuscan nantifi nocori tapimani. <sup>35</sup> Upa Diosin ahuun Furun fasi noicoinquin. Yonoa nantifi nai muranno yafi mai anoafoan aton ifo inon.

<sup>36</sup> Ascan tsoan Diospan Facu icoira huashu afu ipatiro. Ascantarifi tsoan Diospan Facu icoira huayamashu Diosin aqui sinaquin omitsiscampacunaca. Ascan nan Jesús icoira huafoma naacanashu afu ipatamarocon faquish muran omitsiscapanacaforan, —ishon Juanpan ato yoiniquin.

## 4

### *Jesús ainfo Samaritanonqui noconi*

<sup>1-3</sup> Ascano isca huaquin yoinonannifo, —Nan Jesús yorahuanrasifoan icoira huaifoan ato unu muran iquimapacui. Juanpan aca finonmafain iquimapacuiran, —icashu yoinannifo. Nan yorafoan Jesushuunoa yoini cuscan Fariseofoan nicafiacaquin aririma. Jesuscái afincoin ato unu muran iquimapacunima. Nonfin afu rafumisifoquin

non ato iquimapacuni. Nan yorafoan ahuunoa yoini cuscan tapiashu no fu Judea anoashu Galilea ano nasoni. <sup>4</sup> Galilea anoashu Samaria mapaicaini.

<sup>5</sup> Ascatan Samaria ano mapaicaini nanno pushurasi ahuun anu Sicar ano non noconi. Nanno chaimashta nan mai nocon shuni Jacob ahuun facu José inanni. <sup>6</sup> Nannori Jacob mai poquini a muranno unu fishqui. Ascaino fari masafinin racano Jesús arusu nanno noconi. Fasi chai cunoashu oashu atsanacoin. Ascashu nanno tsaoyoni.

<sup>7-8</sup> Non afu rafumisifo nantianri pushurasi ano cashon non tushu fini. Jesús nomifiaquicai ahuaqui unu fitiro inima. Ascaino nantianri ainfon Samaritanon shafo nan pozo ano noconi ahuun cuti muran unu fiishquin. Ascan Jesús yocani, —Ua unu inanpun, —huaiton.

<sup>9</sup> Nocon caifo Samaritanon oincasmanifo. Ato futancai piinifoma. Ascan nan ainfoan cumani, —Minfin Israelifoquin. Unfin Samaritanonquin. ¿Ascano ahuuscain mian unu yocaimun? —huaiton.

<sup>10</sup> —Diosin mia inanpaiyai cuscan onanfain tapishonfin min ua unu yocacuanaquin. Na unun mia nimapacutiro, —Jesús huaiton.

<sup>11</sup> —Min cuti yafi rusfi yamai. Na pozo fasi noacoin. ¿Ascaiton ahuuscashomun min na unun yora nimapacutiro min fitiroquin? <sup>12</sup> Nocon shuni Jacob pozo non a muranno unu finon. Arifi nan unu ayani. Ascaino ahuun facufoanri ayanifo. Ahuun inafori ayamani. ¿Min nocon shuni Jacob finoanmun? —huaiton.

<sup>13</sup> —Tsoan na pozo muranno unu ayafashu chipo afanan nomitiro. <sup>14</sup> Ascafia tsoan na unu un ato ayamacai afanan nomipacunacama. Iconcoin na unu un inanquin a muran unu tsosi shara fuchoi cafiscrai. Ayashu nan unuhuunoashu ipasharacointiro, —huaiton.

<sup>15</sup> —Min nocofunu shara. Na unu shara ua inanhuan un afanan nomipacunonma un afanan nuno unu fiyononma —huaiton.

<sup>16</sup> —Min funu ihuitahuun afanan nasoshquin, —huaiton.

<sup>17</sup> —Uncai funuyamafinquin, —huaiton.

—Icon mincai funu fustiyama. Minfin funu rananyaquin. <sup>18</sup> Min funu mucu fustiti mia fimisifo. Natian min futsa fu ica. Min funucoinma fu. Icon min ua yoia, —huaiton.

<sup>19</sup> —Natian un tapia min Diosin tsain yoimisi. <sup>20</sup> Nocon shunifoan nuno machi anoshon Dios cufimisi inifo. Ascafiano min caifo Israelifoan yoimisi isca huaquin, “Jerusalén anoshon non Dios cufitiroran,” ishon yoimisifo, —huaiton.

<sup>21</sup> —Un mia yoinon ua icoinra huahuu. Chipo ahuutiaran tsoan afanan shinainma isca huaquin, “¿Ranishomun un Upa Dios cufitiroquin na machi anoshon iyamarai Jerusalén anoshon?” ishon afanan anori shinanshcaquima. <sup>22-24</sup> Non ranishora cufiainocai non chipo ascaran shinainma. Na machi ano iyamarai Jerusalén anocai non ascainocai ahuama. Ahuuscashomain non Dios cuficain, nan Diosin tapipai. ¿Nocon nomuran non Dios cuficoimun? ¿Ahuun Yoshin Sharahuunshon non Dios cuficoimun? Nan Diosin nicacoinpai. Aafin Yoshin Sharaquin. Non Dios cuficoainton ahuun Yoshin Shara fustiton noco tapimatiro non cufisharanon. Ahuun Yoshin Sharahuunshon non Upa Dios cufiaiton nanscara Upa Diosin fuchipai.

Ascafashu manfin Samaritanonfoquin cufipaifiaquicai nocon Upa Dios man tapisharafoma. Asca nonfin Israelifoquin non nocon Upa Dios tapicoian. Man non tapiari nan Numamisi arifi Israeli iishquin, —huaiton.

<sup>25</sup> —Mun tapia Upa Diosin chipo nocofunu nocoqui nichishquin. Aafin chipo no-coquin ooshquin. Ahuun anu futsa Cristo. Afin nocoshon noco nantifi shafacafi tapimashquin, —afanan ainfoan yoini.

<sup>26</sup> —Unfin Cristoquin, —ishon Jesús cumani.

<sup>27</sup> Ascan Jesús ainfo fu tsaincaino non afu rafumisi aqui noconi. Jesús ainfo fu tsaincaiton oin non mustairini. Ascafashon non yocanima, —¿Ahuuscain min ainfo fu

tsainquinmun? —ishoncai non yocanima. —Min ainfo yoia cuscan noco tapimahuu, —ishoncai non anori yoinima.

<sup>28-29</sup> Ascantan nan ainfo ahuun cuti potafainicai ahuun pushurasi ano cani. Nocoshon ahuun yorafoti yoini, —Nocofunun uqui nocoshon un amisi cuscan nantifi ua yoiaquin. Nanraca Cristo. Oin fucapon, —ishon ato yoiniquin. <sup>30</sup> Nicacatan nan pushurasi anoashu Jesusqui funifo.

<sup>31</sup> Nantianri non afu rafumisifoan non yoini, —Tapimamisiton, piyohuu, —non huaino.

<sup>32</sup> —Unfin tushuyaquin. Un tushu ya cuscacai man ahuunoa tapiama, —ishon noco yoini.

<sup>33</sup> Ascaiton nicai non yocanonanni, —¡Aira! ¿Tsoancainco tushu fishoamun? —ishon non yoini.

<sup>34</sup> —Uhuun Upa Diosin ua nichini un ahuun yono ashonon. Afin ua amapaiyai cuscan nantifi un ashoin. Nanfofin uhuun tushu cuscarafoquin. <sup>35</sup> Man yoimisi isca huaquin, “Yono noco mau ano fanafu cuscara oshu rafu non rafuri finontan non chitutiroran,” ishon man yoimisi. Nanscarifiai man shinan raca chipo non yora Dioshuunoa yoitiro a Ifo huua afu ipashcaquin. Oinyocahuun. Yora ichaparasi natian itisharacani Diosin icoinra huashcani.

<sup>36</sup> Futsan yonoshotanfin chitushotiroquin. Nancai mau ifoa inansharatiro. Nanscarifiai futsan Diosin tsain icoinra huamano Upa Dios fu ipasharatiro. Nancaifin ahuun ointi muran unimasharatiroquin. Upa Diosin a inansharacoinsquin. Icoinra huataima futsan yosiyomisi. Nan yosimisiri ahuun ointi muran unimashquin. Upa Diosin arifi inansharashquin. Ascaiton Diosin tsain yosimisifo yafi icoinra huamamisifo nanscaracoin rafu. Upa Diosin ato inansharashquin aton ointi muran unimanonfo. <sup>37</sup> Ascano iconco yosimisifo isca huaquin, “Futsan fanano chipo futsan nan yono chitutiroran,” ishon yosimisifo.

Nanscarifiai futsan Diosin tsain yoiquin tau huano futsanri chipo yoiaino nantocaifin icoinra huamacointiroquin. <sup>38</sup> Mancai mai futsa ano yosiamafiaiton un mato nichian nanno man ato icoinra huamanon. Futsafoan nannoshon fasi curushcain yonoa Diosin tsain ato yosicaquin. Mancai nanno yonoama. Ato yosiqui chai huayamafashion man ato icoinra huama. Futsafoan aton yonohuunshon man ato icoinra huamaran, —ishon Jesús ato yoini.

<sup>39</sup> Ascaino nan ainfo Samaritanon ahuun caifoan pushurasi ano nocoshon ato yoini, —Un imisi cuscan nantifi ua puashoan. Ua oinyamafiamisishaquin ua onancoianran, —ishon ato yoiaiton Jesús icoinra huanifo. <sup>40</sup> Ascano nan ainfoan ato yoiaiton nicacani Jesusqui funifo ahuun tsain nicai fucani. Aqui nocoshon, —No fu nuno iyopun, —huanifo. Ascaiton nicai Jesús atofu osha rafuyoni. <sup>41</sup> Ahuun tsain nicacaquin futsafoan icoinra huanifo.

<sup>42</sup> Ascano icoinra huacashon ainfo isca huanifo, —Min noco yoifiaitocai non icoinra huama. Noficoan non ahuun tsain nicashon non icoinra huai nanton nantifi yorafu manifoti nocon Numamisiran, —ishon yoinifo.

### *Jesús niaifoan ahuun oinmatinin facu cayahuamani*

<sup>43</sup> Ascano nan osha rafu yotan Jesús no fu nan Samaritanonfoan pushurasi anoashu Galilea ano cani. <sup>44</sup> Jesús arifi Galilea anoashu pushconi. Nannoashuri yonopaoni. Ahuun yorafotifi nanno inifo. Ascano Jesús yoini, —Diosin tsain yoimisiton ahuun pushurasi ano ahuunoa isca huaquin shinanfo, “Acai tsoamaran,” —ishon shinanfo.

<sup>45</sup> Ascantan Galilea ano noconi. Atirifi Galilea ano Jerusalén ano fusititian fonifo. Nannoshon tsoan atiroma cuscan Jesús Diosihuunshon huani. Nantifi Jesús acai cuscan oinnifo. Ascan atoqui noocoano aqui unimanifo. —¡Aicho! Man min oaquin, —ishon Galilea anoafaoan yoinifo.

<sup>46</sup> Ascano pushurasi ahuun anu Caná Galilea ano Jesús nasoni. Nanno fari futsan Jesús ahuun tsainmansi unucoinfiacun fimi unu onihuani. Nantianri afanan nanno noconi. Nanno niaifon futsa ica ini. Pushurasi futsan ahuun anu Capernaum ano furun isininni.

<sup>47</sup> Ascaiton niaifoan nica Jesús Judea anoashu Galilea muran Caná ano oaiton nicaí aqui oshon yoini, —Ifon, uhuun facu isiniqui man nai. Uhuun facushta ua oinshoyopun ua cayahuashoshquin, —ishon yoini. <sup>48</sup> —¡Ohuashta! ¿Ahuuscain yoran atiroma cuscan un huaiton man oinfiacaquicai man ua icoira huaima? —ishon Jesús ato yoini.

<sup>49</sup> Ascan afanan nan niaifoan Jesús yoini, —Ifon, U fu cayoicapun uhuun facu nanonma, —ishon yoini. <sup>50</sup> Ascaiton Jesús cumani, —Min facu ano catahuu. Min facucaí naima. Niifinquin, —ishon Jesús yoini. Jesús yoia cuscan icoira huafaini cani. <sup>51</sup> Nanscatan caino ahuun oinmatifo aqui nococashon yoinifo, —Min facu man caya. Naima man niaran, —ishon niaifo yoinifo. <sup>52</sup> Ascaiton ato yocani, —¿Ahuutia farimun uhuun facu cayafaitaquin? —ishon ato yocaiton. —Fari masafinin racano ahuun yona matsifitanran, —huanifo. <sup>53</sup> Yoliaifoan nicatan apan shinanni, —Icon Jesús fari masafinin racano ua yoita, “Min facucaí naimafinquin. Niifinquin,” ua huaitaran, —ishon shinanni. Ascano ahuun yorafo yashon nantifiton Jesús icoira huanifo.

<sup>54</sup> Ascano Jesús Judea anoashu Galilea ano nocoshon afanan tsoan atiroma cuscan ato oinmaniquin. Ato oinmaquin rafu huani.

## 5

### *Jesús nocofunu isinimisi Betzata anoshon cayahuani*

<sup>1</sup> Ascano chipo Jesús Galilea anoashu Jerusalén ano no fu cani nocon caifo Israelifo fu fuuscai. <sup>2</sup> Nanno chashoanfoan aton iquiti cunu ini. Nanno chaimashta ianman facushta ini. Cusumun pushu cahuan sharamishti mucu fustiti tsaoacuaf. <sup>3-4</sup> Nannori isinin imisifo ichaparasi racanifo. Fushofo non chatofa non yoratisho quicurushui futsuafori racanifo.

Ascaino Diospan oinmati afu nai muran icaton nanno ian man facushta ano oi fustirasi ipaoni. Nanno nocoshon Diospan oinmatinin ianman facu fuchomapaoni. Nan ianman facushta fuchoaí muran isinin icai futsa iqui tauashu cayapaoni. Ascan nantifi isinin imisifoan manaifono Diospan oinmatinin ian fuchomanaino ian muran iquitaunon. <sup>5</sup> Ascano Jesús nanno nocotoshiqui oian nocofunu treinta ocho fari isinin itianiquin noconi. Yoratisho quicurushui futsua nipaiqui ranainton fuchini. <sup>6</sup> Futsan Jesús yoishoni na nocofunu treintiocho fari isinin imisiran. Huaiton yocani, —¿Min cayapaimun? —ishon Jesús yocaiton.

<sup>7</sup> Nicaquin cumani, —Tsoancai ua ianman facushta muran iquimamisima Diosin nai oinmatinin ian fuchoaíno. Un iqui taupaiyaiton ua shutimisiforán, —ishon yocaiton.

<sup>8</sup> Ascaiton Jesús cumani, —Funinaca huahuun. Min oshati ya catashquin, —ishon yononi. <sup>9</sup> Ascaiton nicaí funinaca huan ahuun oshati ya cani. Nan sabadoai shafatan yoratisho quicurushui futsua Jesús caya huani. <sup>10</sup> Ascano nocon caifo niaifoan oian nan nocofunun ahuun oshati foaiton oincaquin yoinifo, —¿Ahuuscain min oshati Sabadoaino min foain? —¿Min tapiamamun nocon shuni Moisés noco yononi non Sabadoaino ahuashta huatiroma? Ascan min oshaticai na Sabadoaino min fotiromaran, —ishon yoinifo.

<sup>11</sup> Ascaiton ato cumani, —Na nocofunun ua caya huamashon. Ua isca huua “Min oshati fotahuun,” ishon ua yonoaran, —ato huaiton.

<sup>12</sup> —¿Tsoamun na nocofunuquin anori mia yonoa? —ishon yocanifo.

<sup>13</sup> Yoratisho quicurushui futsuatocain tapinima tsoanmain caya huamaquin. Asca huafainicai Jesús samamashta amaquinoashu yorahuanrasi muran cani. Ascaitoncái afanan tsoan oinnima.

<sup>14</sup> Man ascano chipo Jesús nan nocofunu caya huama Dios fu tsanti pushu anoa fuchishon yoini, —Shinanhuun. Min afanan isinin iquimaquin. Man min cayasharaquin. Ascan min chaca huamisi cuscan afanan ayamahuu. Min chaca nantifi shatuhuu. Min chaca shatuyamashu ahuara chaca finacaia min ahuuscaratiroquin, —ishon Jesús yoini. <sup>15</sup> Ascaiton nicafainicai nan nocofunu Jesusmaquinoashu cani. Caya huamano nocon caifo Israelifoqui chanicai cani.

<sup>16</sup> Ascano Jesús sabadoaino yora caya huamana nicacani nocon niaifofo Jesusqui sinanifo. Sinaquin Jesús fucash huanifo. Aqui tsain chaca huarianifo. <sup>17</sup> Ascaiton Jesús ato yoini. —Uhuun Upa Diosin shafatifi yora shara huafafainmisi. Nanscarifi aqui urifi uhuun Upan acai cuscan un huafafainiran, —ishon ato yoini. <sup>18</sup> Ascano amaqiri shinannifo. Shinancaquin Jesús yoiti huanifo. —Nocon shuni Moisés yononi cuscan non Sabado ahua huatiroma. Jesús Moisés yononi cuscan aquima. Yoiari Dios ahuun Upacoin. ¡Cuu! Jesús shinamun afi Upa Dios cuscacoin. Ascan ahuuscashomain non Jesús ato rutumatiroquin. Non shinanoncahuun, —icashu nocon niaifofoan ahuun yoinannifo.

### *Jesusfin Diospan Facuquin. Ascacufin nan yonopaiyai cuscan atiroquin*

<sup>19</sup> Nan shinainfo cuscan Jesús onanniquin. Onanshon ato yoini isca huaquin, —Un mato icon yoinon. Ua nicacahuun. Uficai un ahuashta huaima. Uhuun Upa Diosin acai cuscan mun oinmisi. Nanscacion urifi un huai. Ahuunshon fusti un aquin. <sup>20</sup> Unfin Diospan Facuquin. Ua noicoian. Afin acai cuscan ua oinmai urifi un anon. Ahuara futsa fasi finacaia chipo ua ismashquin. Ascaiton man oin man mustairishquin. <sup>21</sup> Upa Diosin yora naacoinfiacun funimapaiquifin afanan nimasharatiroquin. Un ahuun Facu. Nanton acai cuscanrifi un huatiroquin.

<sup>22-23</sup> Upa Diosin uhuunoa nan yorafoti shinansharamapai unfin ahuun Facuquin. Nanhunoa yorafoan shinansharamisifo cuscarifi uhuunoari ato shinansharamapai. Ascan Upa Diosin afinciai yoima ratocaimain afu ipatiro iyamarai ratofomain faquish muran omitsiscapanacaquin. Ua yononi. “Min yorafoti yoitiro ratofomain ufu nipayamarai faquish muran omitsiscapanacaquin,” ishon ua yononi. Nannori ua yononi. Upa Diosin nicapai uhuunoa shara yoiafoan. Ua nichini. Ascan tsoan “Min Diospan Facu Shararan,” ishon ua yoicasmaiton Upa Diosihuunoari yoisharama.

<sup>24</sup> Un mato iconcoin yoinon. Tsoan uhuun tsain nicasharafain Upa Diosin ua nichini icoingra huafin Upa Dios fu ipasharapacunacaquin. Un nan cuscara yora onaintimaima. Afananciai Satanás ahuun yora itiroma. Omitsiscapatamarocon natian afi Upa Diosin ahuun yoracoinquin afu ipashquin. <sup>25</sup> Un ahuara futsa iconcoin mato yoinon. Natian nan naa shinantsain uhuun tsain nicacoiashu ufi Diospan Facu icoingra huashu afanan Diosimaquin itamarocon afu nipasharatiro.

<sup>26</sup> Tsoan futsacai Upa Dios nimama. Afu nipamisi. Nanscarifiai Upa Diosin un ahuun Facucun ua yononi cuscan ufin nipamisiquin. Tsoa futsacai ua nimama. <sup>27</sup> Unfin Diospan Facuquin. Ascan ua yoiqui isca huani, “Min yorafoti yoitiro ratofomain ufu nipatiro iyamarai aton chaca shatuashma omitsiscapanacafoquin,” ishon ua yononi.

<sup>28-29</sup> Un mato yoia cuscan mustairiyamacahuun. Chipo nafoan uhuun oi nicashcani. Nicacani furnishquicani. Ratoranfo niyoashu isharamisifo funiashu nipasharashcani. Ascanrifiai ratoranfoan niyocashon chaca huamisifo funiashuri omitsiscapashcani.

### *Jesushuunoa yoimisi*

<sup>30</sup> Urus festicai un apaiyai cuscan un shinainma. Upa Diosin nanton ua nichini. Ascan afi ua amapaiyai cuscan un huapai. Ascafiai ucai urus fusti un ahuara huatiroma. Upan Diosin ua tapimana cuscan un nicaquin un yorafoti yoitiro. Nantifi onancoianquin. Ascan ua tapimana cuscan un cayacaficoin yorafoti yoitiro ahuu cuscrafomainquin.

Urus fusticai un apaiyai cuscan un shinainma. Uhuun Upa Diosin ua nichini afi amapaiyai cuscan ua huamashquin.

<sup>31-33</sup> Ufcoinc uhuunoa un yoisharaitocai tsoan nicasharapaima. Ascafiacai aririma. Urus fusticai uhuunoa un yoimisima. Juanpan arifi uhuunoa yoisharamisiquin. Manfin Juanqui yorafo nichiaquin. Nanton uhuunoa icon fusti yoisharamisi. Un Cristocun nanton mato tapimana. Futsanrifi uhuunoa yoisharamisi. Nan Upa Diosiri uhuunoa yoisharamisi. Nan uhuunoa yoimisi cuscan iconcoin mun tapia.

<sup>34-36</sup> Juanpan uhuunoa iconcoin yoifiamisi unfin tsoan atiroma cuscan un huaiton man man oinmisiquin. Tsoan uhuunoa yoiamaiton oinquin nanfohuunoa man tapitiro un mato iconcoin yoimisi. Ascafia Juanpan uhuunoa yoimisi cuscan un afanan mato shinanmai maton chaca man shatunon omitsiscapatamarocon Upa Dios fu ipashashquin. Juan nocofunu fasi sharacoin. Ahuunshon Diosin mato yoipaiyai cuscan nanton mato tapimayoni. Chashamatinin man chashashon man faquish muran fai ointiro casharashquin.

Nanscarifiaquin Juanpan mato tapimana ahuuscashomain man chaca shatuashu Dios fu ipatiroquin. Mato yoimisi cuscan man shinandin isca huai, “¡Aicho! Juanpan noyo cayacafi Diosin tsain yoiaiton. Non nicasharanon,” ishon man anori shinanyomisi. Juanpan uhuunoa yoimisi iconflashu uhuun Upa Diosin Juan finoncoian. Afincion ua yonoa. Uhuun Upa ua nichini ua amapaiyai cuscan un anon. Ua amapaiyai cuscan cuyocointan un unutiro. Natianri ua yonoa cuscan un aaquin. Ascan un acai cuscan oinquin man tapitiro Upa Diosin ua nichini ahuunshon un yononon. <sup>37</sup> Upa Diosin matoqui ua nichini arifi uhuunoa yoimisi. Manca Upa Diosin ahuun oi nicayamafain man oinmisima. <sup>38</sup> Diosin ua nichifianicucai man ua icoinra huaima. Ascan ahuun tsaincrai maton nomuran man nanumisima.

<sup>39-40</sup> Man Diosin tsain fasi oinfafainmisishaquin man Dios fu nipatiroran ishon man shinamisiquin. Anori man shinanfiaquicai Diospan tsain uhuunoa cunufiacashon mancrai uqui fupaicanima un mato nimapacunon.

<sup>41-42</sup> Un mato onancoian. Manca maton nomuran man Upa Dios noima. Ascacun man uhuunoa shinansharai iyamarai man uhuunoa shinain chacafainocai un shinainma. <sup>43</sup> Uhuun Upa Diosin ua matoqui nichini ahuu cuscaramainquin uhuun Upa uhuunshon man onancoion. Ua matoqui nichifiani mancrai ua icoinra huatamarocon ua oincasmacani. Uacairocon icoinra huatama futsan matoqui oshon mato parapaifaiton nancaifin man icoinra huashquin, “Unfin Cristoquin,” icaiton nancaifin man icoinra huai. Upa Diosin nichiamafiacun nancaifin man icoinra huashquin. <sup>44</sup> Mafi ranan futsan tsain sharasi man nicapai. Asca Upa Diosin matohuunoa yoipaiyai cuscacai man shinainma. Ascacufin Upa Diosin ua nichini mancrai icoinra huamisima.

<sup>45</sup> Man ua icoinra huayamafiacun uhuun Upa Dios ointaifi un mato puashoshquin. Man shinamisi isca huaquin, “Moisés tsain nicashu non Upa Dios fu nipatiro-  
ran,” ishon. Man anori yoifialino Moisés aficoinc matohuunoa Upa Dios yoishquin isca huaquin, “Nafoan uhuun tsain icoinra huamisifomaran,” ishon matohuunoa yoishquin. <sup>46</sup> Moisés uhuunoa cununi cuscan icoinra huashon ahuun tsainri man icoinra huacuanaquin. Uarifi man icoinra huacuanaquin. <sup>47</sup> Ascafiafocai Moisés cununi cuscan man icoinra huama. Asca un mato yoia cusracai man icoinra huamaran, —ishon Jesús nocon niaifofo yoini.

## 6

*Jesús cinco mil nocofunufo ahuun tsainmansi ato pimani*

*Mt 14.13-21; Mr 6.30-44; Lc 9.10-17*

<sup>1-2</sup> Ascano ato yoiquin anaititan Jesús afanan no fu ian ahuun anu Galilea pocufaini cani. Ahuun anu futsa Tiberias. No fu cusumunri noyo yorahuanrasi aqui funifo.

Isinin imisifo aqui fuafoan ahuun tsainmansi ato caya huani. Ato caya huaiton oincani aqui funifo. <sup>3-4</sup> Nocon caifo Israelifoan nocon fusititian Diosin ahuun nai oinmatinin nocon shunifo aton furu iyoafofosi finonmani nanonfoma. Nan shafan nocoti chaima. Nantianri Jesús cusumunri nocoshon nonfin afu rafumisifori machi ano caashu nanno non tsaoyoni.

<sup>5-6</sup> Nanno non tsacano yorahuanrasi funifo. Aqui fuaifoan atoquiri fusoshon Jesús oinni. Ato oinquin shinantani nan yorafo fonicoincani. Ahuuscashomain ato pimaicain afifin tapiniquin. Ascashon Feliperifi icoinra huamapaini ahuuscashomain ato pimaicain. Ahuun tsainmansi ahuamamishti atiro tapimapaini. Ascano Jesús Felipe yocani, —¿Raniamun non tushu fiicai na yorahuanrasi pimashquin? —ishon yocaiton.

<sup>7</sup> Nicaquin Felipe cumani, —Ifon, non siete oshu yonoshon pui fiiyonon. Aticai itiromaquin na yorahuanrasi non piimaino, —ishon yoini.

<sup>8-9</sup> Ascano non Jesús fu rafumisifo futsan Andrés nan Pedronun ushton yoini, —Ifon, oinpon. Nuno furonanfacu misi uhuapamashta mucu fustiti yafi shiman rafuri uhuapamashta. Ascafia nuno yora ichaparasi. Ahuun tushu itiromaran, —ishon yoini.

<sup>10</sup> Ascaino Jesús noco yononi isca huaquin, —Ato yoihuus tsaononfo, —ishon yoini. Nannorifi faasifo ini. Ascaino Jesús ato yoia cuscan faasi camaqui tsaohuacunifo. Cinco mil nocofunufocuana tsaohuacunifo. <sup>11</sup> Ascano tsaoafono Jesús mucu fustiti misi fitan Apa Dios yoiquin isca huani, —¡Aicho! Upan, min ua nicaran, —ishon Apa Diosin yoini. Yoitan misi yafi shiman rafu tucupacutan noco inanni. Anoshon non ato pashcashonpacunon. Ficashon picani maiancoinnifo. <sup>12</sup> Ascano nantifi yorafo maiancoianfono Jesús noco yononi, —Nan misi yafi shiman tushu huafo fiitacahuun. Shihuati muran nanutacahuun ahuashta funononma, —ishon noco yoini. <sup>13</sup> Ascaiton nicashon misi yafi shiman tushuafo non fini. Doce shihuati non fospi huani.

<sup>14</sup> Ascan Jesús ahuun tsainmansi shiman rafu non mucu fustiti misi nantifi cinco mil nocofunufo piimaiton oincashon yoinifo, —Iconcoin Jesús Diosin ahuun tsain yoimisi. Nanton Upa Diosin noco yoiyotiani cuscan nancoin nocoqui nichiaran, —icashon yoinannifo. <sup>15</sup> Ascaiton Jesús nan shinainfo cuscan onanshon ahuun nomuran shinanniquin isca huani, —Na yorafoan ua curushcain aton niaifocoin ua imashcaniran, —ishon onanni. Ascatan atomaquinoashu arusu machi ano cani.

### *Jesús ian fumancayan cani*

*Mt 14.22-27; Mr 6.45-52*

<sup>16-17</sup> Ascano man fari caino non afu rafumisifo non afu shashon nanufaini ian pocufaini foi. Pushurasi Capernaum ano non nocopaini. Faquishiajino Jesús nocoqui nocoataima. <sup>18</sup> Fuuhuan nocoano ian fuchoque. <sup>19</sup> Ian mahuan naisti chainhuan nushmancayashon fuchomanhuaquin oquiri cusha futsan noco catima huani. Jesús ian fuman cayan ofaintocai non onannima. Onantama non mustairicoinni. Ascashu non fasi ratucoinni. <sup>20</sup> Ascaiton, —Unquin. Ratuyamacahuun, —Jesús noco huani. <sup>21</sup> Ascaiton nicaquin, —¡Aicho! Shasho muran nanuyohuun, —non huani. Jesús nanuano samamashta nan non nocopaiyaiquiri ian cusumunri non noconi.

### *Yorafoan Jesús funanifo*

<sup>22</sup> Ascano iyoconaino yorahuanrasifoan nan Jesús ato pimaitafoan shinannifo Jesús arus fusti nituaiton. Oinnifo Jesús no fu shasho muran nanuyamaiton. Tapinifoma arifi chipo yamu nocoqui noconi. Nantianri shasho fustiton non afu rafumisifo non foni. Ahuuscashucon Jesús caimun ishon shinannifo. <sup>23</sup> Nantianri Tiberias chaimanoashu shashorasi muran fuafo. Nan Jesús yorahuanrasi pimaita anoashu funifo. <sup>24</sup> Ascan nan yorahuanrasifoan Jesús norifi non afu rafumisi anoma tapicanashu shasho muran nanuinifoancatan Capernaum ano Jesús funai fonifo.

—Unfi tushu cuscaraquin. Urus fustifin un yora nimapacutiroquin, —ishon Jesús ato yosiniquin

<sup>25</sup> Fuchicashon yoinifo, —¿Tapimamisiton, ahuutiancon min nuno nocoamun? —ishon yocanifo.

<sup>26</sup> Ascaiton ato cumani, —Iconcoin un mato yoi. Tsoan atiroma cuscan un mato ismafaiton mancai afihuunoa shinainma. Ascacucai man ua funaima. Uaricai man icoira huataima. Nan un mato tushu pimafaita nantifi man mayancointan. Ascano man afanan ua funai fua un mato pimanon. <sup>27</sup> Shinancapon. Manfin tushuhuunoasi shinanfafainicain. Nan tushu chacanatiro manmain cuyoifin. Ascan nan cuscara tushu fusti fuchipaiquimarocon nan cuscara futsafin unquin. Unfin Diospan Facuquin, un mato inantiro nancai fuchipaicahuun. Nan cuscara cuyopacunacama. Nan piashu man nipasharatiro. Uhuun Upa Diosin ua catoanshu uqui unimamisi. Matoquirifi ua nichini na tushu cuscara un mato inanon, —ishon ato yoiaiton.

<sup>28</sup> Nicacaquin yoinifo, —¿Ahuuscashomain norifi non yonoshotiroquin Upa Diosin nocoqui unimanon? —ishon yocaifoan. <sup>29</sup> —Upa Diosin ua matoqui nichini. Ascan man Upa Diosin unimamapaiquin ua icoira huacahuun, —ato huaiton.

<sup>30-31</sup> Diosin tsain cununi isca huaquin, —Tsoa futsan atiroma cuscan huafain Moisés ato tushu fariña cuscara fatan shara ato pimani. Nan tushu shafatifi nai murannoashu pacupaoni. Nan tushu ahuun anu nocon tsainman manán. Nanfo nocon shunifoan tsoa istaipamashon piinifo. Ascan mirifi tsoan atiroma cuscan noco ahuamamishti ismahuu Upa Diosin mia nichini non mia icoira huanon, —huaifoan.

<sup>32</sup> —Un mato iconquin yoi man tapinon. Moiséscái nan tushu ahuun anu manán nocon shunifo inannima. Upa Diosin nai muranshon tushu ato niriashoni picanashu niisharanonfo. Ascan natian Upa Diosin ahuun tushucoin nai muranshon mato inanpai.

<sup>33</sup> Nocofunu Upa Diosin nai muranshon mai ano nichini manifotifi ato nimapacunon. Nanfin tushucoinquin, —huaiton.

<sup>34</sup> —Ifon, nan tushu noco inanfafainpun, —huaifoan.

<sup>35</sup> Ascaiton Jesús ato cumaquin, —Unfin nan tushucoinquin. Tsoan fonicoín cafiscái ua onancoinpaiquin ua tanaino aton nomuran fucashtamarocon isharapacunaca. Nanscarifiai tsoan nomicoin cuscara ua fasi fuchipaitan ua icoira huacun un ato nimapacunaca. Acaí afanan funopacunacama. Isharapacunaca. <sup>36</sup> Ascafia un mato yoia cuscan ua oinfashocai man ua icoira huaima. <sup>37</sup> Nan ratoranfo uhuun Upa Diosin uqui nichiafin uqui fucaniquin. Ascan nanfofin un ato cushusharapacunacaquin. Un ato potapacunacama.

<sup>38-39</sup> Uhuun Upa Diosin ua isca huaniquin, “Tsoan un mia ya imapaiyai mifu ishqui funopacunacama. Nan mia icoira huafó namisifo min afanan nai ariashu mai ano fotoaino furnishcani no fu ipashquin. Nanscara un fuchipairan,” ishon Upan Diosin ua yoini. Ascan ufcái un apaiyai cuscan un huaima. Un mai ano fotoni Upa Diosin ua amapaiyai cuscan huashquin. <sup>40</sup> Nan ratoranfoan un Diospan facun ua icoira huaashufin no fu Upa Dios icari ipasharatiroquin. Un afanan mai ano oaitian a namisifo un ato funimashquin ufu nipasharanonfo. Ascarafin uhuun Upa Dios fuchipaiquin, —ishon Jesús ato yoini.

<sup>41-42</sup> —Unfin tushu cuscara un nai murannoashu oniquin. Un yora imapacushquin, —ishon yoini. Ascaiton nocon caifo Israelifoan nicafiacashocai icoira huanifoma. Jesusqui tsain chipunifo. —¡Cuu! ¡Nicacapon! Aafin Jesusquin. Apa José ahuari non oinmisi. Ascan aacai ahuama. Galilea anoashufin cainniquin. Ascanflashon, “Un nai murannoashu Diosin icariashu fotoaran,” noco huaiquin. Tsoancai na tsain icoira huatiroma, —ishon yoinifo.

<sup>43</sup> Ascaifoan Jesús aton nomuran shinainfo cuscan onanshon ato yoini, —Uqui tsain chipuyamacahuun. <sup>44</sup> Icon Upan Diosin ua nichini. Ascanfiacai tsoan Upa Diosin

aton nomuran shinanmayamainocai ua icoingra huatirofoma. Ascan un afanan nai murannoashu mai ano nasoaitian ua icoingra huafoti un funimashquin Upa Dios fu ipanonfo. <sup>45</sup> Diospan tsain yoimisiton ahuun tsain cununi isca huaquin, “Upa Diosin afincoin yorafo ato tapimashquiran,” ishon cununi. Ratoranfoan Upa Dios nicaifoan-fin ahuunshon tapicaniquin. Upa Dios nicacashonri uarifi icoingra huashcaniquin. <sup>46</sup> Tsoancai Upa Dios oinmisima. Urus fustifin un Upa Dios oinmisiquin. Nanton ua nichini. <sup>47</sup> Unfin mato iconcoinc yoicain. Tsoan ua icoingra huai Upa Dios fu nipashquin. <sup>48</sup> Unfin nan tushu cuscara. Ua icoingra huafoti un ato nimapacushquin.

<sup>49</sup> Nocon shunifo Moisés fu tsoan istaipama ipaonifo. Nan tushu ahuun anu manán fipaonifo pishcaquin. Pifiapaonishacaquin fari futsa nai cuyonifo. <sup>50-51</sup> Ascafia un nai murannoashu Uhuun Upa Diosin icariashu un oni. Unfin na tushucoinquin. Tsoan ua icoingra huashu napanaca. Nan tushu ahuun anu manán nai murannoashu pacua nocon shunifoan pifianicai ato nimapacumisima. Nantian Upa Diosin afanan tushu nai muranshon mai ano fotomani. Nan tushu piashu yora nipatiro. Unfin nan tushuquin. Un nantifi yora manifoti ano ato nashoshquin nipasharanonfo, —ishon Jesús ato yoini.

<sup>52</sup> Ascaiton nicacani nocon caifo Israelifo fochishmanantanannifo. —¿Ahuuscashomun na nocofunun ahuun nami noco inantiroquin non pinon? —icashu yoinannifo.

<sup>53</sup> Jesús ato yoini, —Iconcoinc un mato yoi. Unfin Diospan facuquin. Man uhuun nami piyamafain uhuun imi ayayamashu man nipatiroma. <sup>54</sup> Ratoranfoan uhuun nami pifain uhuun imi ayafain ufu nipashcaniquin. Ascan un afanan nai murannoashu oaitian un ato funimashquin Upa Dios icari nipasharanonfo. <sup>55</sup> Uhuun nami tushucoin yafi uhuun imi ayaticoin. <sup>56</sup> Ratoranfoan uhuun nami pifain uhuun imi ayai ufu rafupacunaca.

<sup>57</sup> Nan uhuun Upa napanacaton ua nichini. Urifi ahuunoashu un napanon. Ascano tsoaran ufu rafucacaini uhuunoashu ipasharatiroquin. <sup>58</sup> Afanan un mato yoi. Nocon shunifoan nan tushu ahuun anu manán piinifo. Nan pifiapaonishacaquin nai cuyonifo. Ascan Upa Dios ariashu un matoqui oni. Unfin ahuun tushucoinquin. Tsoan ua piashucai nanacama. Uhuunoashu nipasharatiroquin, —ishon Jesús ato yoini. <sup>59</sup> Nocon caifo Israelifoan nocon ichananti pushu muranshon ahuun anu Capernaum anoshon nan tsain noco yosini.

### *Jesushuunoashu yora nipatiro*

<sup>60</sup> Atirifi tanamisifoan yoini, —¡Ohua! Jesús noco yoia cuscacai tsoan tapitiroma. Noncái na cuscara tsain nicipaitiromaran, —ishon yoinifo.

<sup>61-62</sup> Ascaiton Jesús onanni rama noco yoia cuscan atirifi a tanamisifo nicacasmaiton. Ascan noco yoini, —¿Un rama mato yoia cuscan man nicipaimamun? ¿Afanan man ua icoingra huaimamun? ¿Nan nical man umaqui ipaiquin raquiri man shinanshquimun ua afanan oinquin un nai muran Upa Dios icari un funicainaiton? <sup>63</sup> Diospan Yoshin Shara fustiton yora nimapacutiro. Mafiricai man nimapacutiro. Uhuun tsainri Diospan Yoshin Sharahuunshon un mato yoimisi. Ascacufin uhuun tsain icoingra huashu man ufu nipatiroquin. <sup>64</sup> Ascafia man futsacai ua icoingra huaimaran, —ishon Jesús noco yoini. Noco catoaintian afincoin tapiyoni ratotomain achimanicain. <sup>65</sup> Ascan afanan noco yoini, —Ascacun un mato yoiqui isca huai, “Upa Diosin tsoan ahuun nomuran shinanmayamaitocai ua icoingra huatiromaran,” —ishon noco yoini.

<sup>66</sup> Ascano Jesús noco yoiai cuscan nicatan a tanamisi futsafoan potacashon afanan tanannifoma.

<sup>67</sup> Ascano Jesús nocori doce catonni non afu foanfafainnon noco yocani, —¿Marifi man umaqui capaimun? ¿Man ua potapaimun? —noco huaiton.

<sup>68</sup> Pedronun cumani, —Ifon, non rato futsacai non catiroma. Mirus fusti min noco yoitiro ahuuscashumain non nipasharatiroquin. <sup>69</sup> Minfin Dios ariashu nocoqui onquin. Min Dios cuscara shara. Nan non icoingra huairan, —huaiton.

<sup>70</sup> —Un mato doce catonni. Un mato catonfiani matofu rafumisi futsan Satanás yoshin chaca ahuun nuumisiton, —ishon noco yoini. <sup>71</sup> Nan Simón Iscariote ahuun facu Judashuunoa noco yoini. Jesús noco doce catonni. Judasrifi catonfianicun Jesús ato achimaniquin.

## 7

*Jesús ahuun ushtofoan icoinra huanifoma*

<sup>1</sup> Ascashu chipo Jesús Galilea maitio cahuancacaini ato tapimafoanfafaini. Norifi non afu cani. Judea ano non cayonima. Nocon caifo Israeli nocon niaifofoan Jesús rutupaiyafono. <sup>2-5</sup> Nocon caifoan fusititian tapaspaonifo. Nan fusiti nocoti chaima Jesús Judea ano catama Galilea ano nituni. Ahuun ushtofori nanno Galilea ano afu ini. Ahuun ushtocoinfofiacashon Jesucristofiacuncai tsoan icoinra huanifoma. Ascanshon yoinifo isca huaquin, —Nunoashu Judea ano catahuun. Nantifi minhuunshon tanamisifo min ato ashomisi cuscan oinonfo. Min acai cuscan min ato oinmayamaino atirifoancai minhuunoa tapitirofoma. Min ahuamamishti atiro nantifi yorafoti ismafotahuun —huaifoan.

<sup>6</sup> —Uncái ari cayoataima. Uhuun Upa ua nichiataima. Ascafia ahuutianran man capaiyaitian man catiro. <sup>7</sup> Nan icoinra huafoma nan ua noicasmai. “Manfin chaca huamisiran,” un ato huamisiquin. Ascacun ua noicasmacani. Ua noicasmafiacaquicai mato noicasmatirofoma. <sup>8</sup> Ascacun natian fusitacahuun Jerusalén ano fotacahuun. Ucái cayoataima. Uhuun Upa Diosin ua nichiataimaran, —ishon Jesús ahuun ushtofo yoini. <sup>9</sup> Ato yoitan Galilea ano nituyoni.

*Jesús fusititian nannori ini*

<sup>10</sup> Ascafiaíno ahuun ushtofo nan fusi ishcaquin Jerusalén ano foaifoanno. Ascaíno arifi chipo caani. Tsoa yoiashuma Jerusalén ano noocoitocai tsoashta tapinima. <sup>11</sup> Nanno nocon caifo Israeli niaifofoan Jesús funacaquin yoinifo, —¿Ranimun na nocofunu? —huanifo.

<sup>12</sup> Nannori yorahuanrasi. Atirifoan isca huanifo, —Jesús nocofunu sharacoinran, —ishon yoinifo. Ascafiainfoan atirifoan yoiquin isca huani, —Ma. Na nocofunucai sharama. Yorafo paramisiran, —icashon yoinifo. <sup>13</sup> Ahuunoacai aton ointaifi yorafoan yoisharanifoma. Nocon niaifofoqui musucaquin oinomashta yoinannifo.

<sup>14</sup> Fusiti anaitiataimano Jesús Dios fu tsanti pushu muran iquini a muranshon ato yosicai. <sup>15</sup> Nocon caifo niaifofoan nicashon yoinifo, —¡Aira! ¡Nicacapon! ¿Ahuuscaimun na nocofunun cunu tapicoianmaflashon tsain fasi tapicoianquin? —icashu yoinannifo. <sup>16</sup> Yoiaifo cuscan onanshon Jesús ato yoini, —Un mato yosiain cuscan uhuun nomuranshontai un mato yoima. Ascatamarocon Upa Diosin ua nichini, nanton ua shinanmana cuscan nannoricoin un mato yosiaquin. <sup>17</sup> Tsoan Diosin yoia cuscan apaiquin afi tapitiroquin ufi shinain cuscan un mato yosi iyamarai Upa Diosin afi ua shinanmanaino un mato yosia.

<sup>18</sup> Tsoan ahuun nomuran shinain cuscan yosiquin nanton yorafo ahuunoa shinanmapai isca huaquin, “Na nocofunun fasi tapicoian. Afin fasi sharacoinquin,” ishon ahuunoa ato shinanmapai. Ascanfiatan uncaí ascarama. Un mato yoiqui isca huai. “Nan uhuun Upa Dios ua nichini. Nancaifin fasi sharacaiquin.” Anori un mato yoimisi ahuunoa man shinansharanon. Nanscacufin man icoinra huatiroquin un mato iconcoin yoi un yorafocai paramisima. <sup>19</sup> Nocon shuni Moisés mato Diosin tsain yonofiani tsoashtacai nicasharamisima. Ascacufin ahuuscaín man ua rutupaiyain un nocofunu tunutitian cayahuafiacun, —huaiton.

<sup>20</sup> —¡Cuu! ¿Tsoantsi mia rutupaiquin? Minhuunfin yoshin chaca nuuaquin, —huaifoan.

<sup>21</sup>—Un nocofunu tunutitian caya huaiton man oinquin. Ascan “¡Ajaa! Ahuuscain Jesús tunutitian nocofunu caya huamamun,” ishon uhuunoa man yoia. <sup>22</sup> Un tunutitianfiacun ahuara shara huaa cuscan marifi tunutitian ahuara man huamisi. Moisés noco yononi cuscan manfin maton furonanfacufo rama caian ocho osha finoanno maton furonanfacufo man ato foshqui rupa shatumisiquin. <sup>23</sup> Ascan tunutitianfiacun maton furonanfacufo man ato foshqui rupa shatumisi. Ascafia Moisés yononi cuscan man aimá. ¿Ascacufin ahuuscain man uqui sinai tunutitianmain un nocofunu caya huasharacunfin? <sup>24</sup> Afanan un ahuara shara huaiton oincaquin, “Chaca huaran,” ua huayamacahuun. Cayacafi shinansharacahuun,—Jesús ato huani.

### *—Jesús nocon Numamisi Cristomun, —ishon yocaifoan*

<sup>25</sup> Ascatan atirifi Jerusalén anoashu yoinannifo, —¿Naamun nocon niaifofoan rutupiafo? <sup>26</sup> Ascanfiacanashu yorahuanrasi aton ointaifi ato yoifiaquicai tsoan ahuun tsain shatumanama. Ascacuri natian niaifofoan man shinanraca aafin nocon Numamisi Cristoquin. <sup>27</sup> Ascafiancai Jesús nocon Numamisi itiroma. Nocon Numamisicoin oaiton non tapitiroma raniashumain oicain. Ascan nan nocofunu Jesús raniashu oemainquin man non tapiaran,—ishon yoinifo.

<sup>28</sup> Jesús Dios fu tsainti pushu muranshon ato yosifiatan ahuunoa yoiafo cuscan onancoinshon ato cumani isca huaquin, —¿Icommun man ua onan? ¿Un raniashu oemainquin man tapiamun? Ufi shinanfaincái un oama. Ascafia uhuun Upa ua yonoa un oa. Nantofin ua nichiniquin. Nanfin iconcoinquín. Mancaí uhuun Upa onanmisima. <sup>29</sup> Un ahuunoashu oni. Ua nichini. Ascan un Dios onancoianran,—ishon ato yoini.

<sup>30</sup> Nicacani aqui sinanifo. Ascashon achipainifo cunu muran iquimashquin. Ascafiaquicai tsoan ahuusca huayonima. Nantiancai achiaifotian nocoatai inima. <sup>31</sup> Nan yorahuanrasi Jerusalén anoafan yoinifo, —Tsoa futsan atiroma cuscan Jesús Diosinhunshon ahuamamishti shara noco isma. Nan nocofunun tsoan asca huatiroma cuscan huatiro. ¿Nocon Numamisi oshon finonmafain ashquimun? —ishon yoinifo. Ascan anori yoiaifoan icoinra huanifo.

### *Fariseofoan Jesús achipainifo*

<sup>32</sup> Nan yorahuanrasiton Jesushuunoa tsain shara yoiaifoan Fariseofoan nicanifo. Ascan nocon caifohuunshon Dios cufimisi niaifofoan futan ranushumuafó nichinifo Jesús achicashon cunu muran iquimanonfo.

<sup>33</sup> Ascan Jesús ato yoini,—Un matofu ichaipacuima, Un samamashta uhuun Upa Dios ari cai. Nantofin ua nichiniquin. Un samamashta aqui cai. <sup>34</sup> Un mato anoashu caitocai man ua funafiaquin ua fuchishquima. Un cai aricai man catiromaran,—ishon ato yoini.

<sup>35</sup> Ascaiton nicacani nocon caifo Israeli niaifofo yoinannifo, —¿Ranimun na nocofunu caiquin noncái fuchitiroma? ¿Nocon yorafo Grecia pushurasi ano pashcafainnifo ano caimun? ¿Nanno Greciafo tapimaicairaca? <sup>36</sup> ¿Raquiri noco yoimun isca huaquin? “Man ua funafiaquicai man ua fuchishquima. Uncaí aricai man catiromaran,” ishon noco yoia. ¿Raquiri noco yoipaimun? —icashu yoinannifo.

### *Diosin Yoshin Sharapan yorafo nimapacutiro*

<sup>37-39</sup> Ascano fusitin ahuun unutaquin Jesús yorahuanrasi muran ninacahuan oi ashcafinin ato yoiquin isca huani,—Nicapon. Un mato yoinon.

Diosin mato yonomapaiyai cuscan man huashopai uqui fucahuun. Ua icoinra man huacun un mato Diospan Yoshin Shara mato ya rafumapacunaca. Tsoan ua icoinra huaiton Diospan tsain cununi cuscan ahuun shaqui muran unu tsosia shara cuscara a muran foiran,—ishon Jesús ato yoini. Unucoinhuunoacai yoinima Diospan Yoshin Sharahuunshon ato tapimani isca huaquin,—Tsoan ua icoinra huaiton Upa Diospan Yoshin Shara afu rafupacunaca. Ascan Diospan Yoshin Sharahuunshon ahuun nomuranshon yorafo yoishquin afoanrifi icoinra huacanashu nipasharanonfo,—ishon ato

tapimani. Jesús apa Dios ari nasoataima yorafoan aton niaifo inon. Ascan nan icoinra huafoti Diospan Yoshin Shara atoqui nichataima.

### *Jesushuunoacai nannorifosi shinannifoma*

<sup>40</sup> Nicacashon atirifoan yoinifo,—Iconcoin na nocofunu Diospan tsain yoimisiran,—ishon yoinifo.

<sup>41</sup> Atirifoanri yoinifo,—Naanfin Cristoquin,—ishon yoinifo. Ascafaino futsafoan yoini,—Ma. Nacai Cristoma. Cristocai Galilea anoashu cainshquima. <sup>42</sup> Diospan tsain cununi cuscan, “Cristo David funa inon. David ipaoni nannoashuri Cristo cainshquiran,” ishon Diospan tsain cunushoni. Ascan Cristocai Galilea anoashu caintiromaran,—ishon yoinifo. <sup>43</sup> Nanscafiacun nan yorafoan Jesushuinoa nicafiacashocai anorifosi shinannifoma. <sup>44</sup> Atirifoan Jesús achipainifo cunu muran iquimashcaquin. Asca huapaifiacaquicai tsoan Jesús ahuusca huaiyonima.

### *Israeli aton niaifofoan Jesús icoinra huanifoma*

<sup>45</sup> Ascata ranushumuafaoan aton niaifofo yafi Fariseofoqui nasocashon ato yoinifo. Nocoafono nanfoan ranushumuafio yocani,—¿Ahuuscaquimun man Jesús achiamaquein noco ihuushoshquin?—ishon ato yocanifo.

<sup>46</sup> Cumacaquin,—Na nocofunun ahuun tsain shara cuscara tsoancai anori yoiyomismaran,—ishon yoinifo.

<sup>47-49</sup> Ascaiton ato nicacashon niaifofoan ato yoini,—¡Cuu! Ascan Jesús matori paramisi. Shinancapon. Nonfofin Fariseofo yafi maton niaifofoanri Moisés cununi cuscan fasi non tapicoianquin. Nonfoancai tsoashtan Jesús icoinra huamisima. Na yorafoan man rama Jesús nica nanfoan Moisés Diospan tsain cunushoni cuscan tapiafoma. Diosin ato onaintimapainonran,—ishon ato yoinifo.

<sup>50-51</sup> Asca huafiaifoanno Nicodemus nan shafa futsa Jesús ano cani ahuara yocaicain. Arifi Fariseonfiashon afu Fariseofo yoini,—Uhuun yorafoan, nocon shuni niaifoan yononi cuscan non ratoran nocofunun nicasharayoataima non yoitiroma isca huaquin, “Naton chaca huaa. Non onaintimanonran,” ishoncai non ascatiroma,—huaiton.

<sup>52</sup> —Min tsain Galilea anoafaoan tsain cuscarari. Shinanhun. Tsoashtacai Galilea anoashu Diosin tsain yoimisi fuafoma. Nannoricoin Diosin tsain noco yoicinni. Oinyotahuun tapinon,—ishon Nicodemo cumanifo.

<sup>53</sup> Anori yoicatan aton pushufoanri fonifo.

## 8

### *Ainfon ahuun funuma fu icaiton niaifofoan achinifo*

<sup>1</sup> Asca huafaini Jesús machi ahuun anu Olivo ano cani. <sup>2</sup> Shafaino Dios fu tsainti pushu muran Jerusalén ano nasoni. Nanno yorahuanrasi afanan aqui funifo. Nicai fucani. Ascata tsaoshon ato yosini. <sup>3-5</sup> Ato yosiajino Moisés cununi cuscan tapimamisifo yafi Fariseofoanri ainfo ahuun funuma fu icaiton fuchicashon Jesusqui ihuutan yorahuanrasifain ointaifi ainfo nimainifoannifo nantififain oinonfo. Asca huacashon Jesús yoinifo,—Tapimamisiton, na ainfoan fasi chaca huaa. Ahuun funuma fu icaiton fuchiafo. Moisés isca huaquin noco yononi, “Ainfo ahuun funuma fu icaiton fuchicashon toquirinin a tsacacahuun nanon,” ishon Moisés noco yononi. ¿Mirifi min nannori noco yonopaimun?—Jesús cuparananshon yocaifoan. <sup>6</sup> Raquirirashta icaiton ahuun chaca inifoan niaifoano iyopaicaquin. A yocaifoanno Jesús tutishon ahuun mutotinin mai cununi.

<sup>7</sup> Yocariaifoanno Jesús atoqui fuhuuni inacahua yoini isca huaquin,—Man ratotonmain man ahuara chaca huamisimaquin na ainfo toquirinin tsacaqui tau huahuun,—Jesús ato huani. <sup>8</sup> Ascan ato yoitan afanan ahuun mutotinin mai cununi. <sup>9</sup> Ascano ato yoia cuscan nicacatan nantifi nan ainfoqui tsain chaca huafu fustirasi foriforinifo. Nan

iyaofofo fosi rufofo foriforinifo. Chipo atirifi cuyo fonifo. Jesús fusti nanno ainfo aqui nituano. <sup>10</sup> Ascan Jesús afanan fuhuuninacahuan ainfo yocani,—Uhuun shafoshta. ¿Na nocofunufoan mia chaca huaa man foafomun? ¿Tsoa fusti nituamamun afanan mia tsain chaca huai? —ishon yocaiton.

<sup>11</sup> —Ifon. Fustishtacai nituamaran, —ishon yoiaiton. —Unricai mia tsain chaca huaima. Natian min catiro. Ascafiaflashu min chaca huamisi cuscan afanan asca huayamahuu, —ishon Jesús ainfo yoini.

### *—Unfin chashamati cuscaraquin —ishon Jesús ato yosini*

<sup>12</sup> Ascatac ainfomaqui caashon Jesús afanan yorahuanrasi yosini isca huaquin, —Unfin chashamati cuscaraquin. Un manifoti anoafu un ismasharatiro nipasharanonfo. Tsoan ua tanamisi icashucuai funotrioma. Uhuunshon fai oinsharatiro Upa Dios ari noco sharashquin. Faquish muran ipashquima, —ishon Jesús yoini.

<sup>13</sup> Ascaiton nicacaquin Fariseofoan yocanifo, —Min noco yoiai cuscacai tsoa futsan mihuunoa noco anori yoimisima. Mirus fusti minhuunoa min noco yoiai cuscacai tsoa icoinra huatiroma, —huaifoan.

<sup>14</sup> Jesús ato cumani, —Un tapian raquiashumain un oaquin ascataci raquimain un caicain. Ascacun uhuunoa un yoitiro uhuun tsain iconcoin. Ascafia mancái tapiama raquiashu oashumain raquiriri un caicain. <sup>15</sup> Tapishoma un yosaiton man icoinra huama. Uncaí tsoaquin shinanchacaima tsain chaca huashquin. <sup>16</sup> Ascafiacon uhuun Upán shinain cuscan nannoricoainrifi un mato yoi. Ascan un iconcoin yoimisiquin. Uhuun Upán ua nichini. Un futsahuunoa yoiquicai unrusu un yoima. Uhuun Upán ua tapimana cuscan un yoi. Ascan un futsahuunoa yoia cuscan iconcoin. <sup>17</sup> Moisés mato yononi cuscan isca huaquin cununi. “Nocofunu rafutan nannorisi yoiaiton man icoinra huatiroran,” ishon mato yononi. <sup>18</sup> Ascan uficoín uhuunoa un mato yoimisi. Ascafiacon uhuun Upán ua nichini nanton uhuunoa nannorisi yoimisi, —huaiton.

<sup>19</sup> Nicacashon yocanifo, —¿Ranimun min Upa? —huaifoan.

—Mancái ua yafi uhuun Upa man onanmisima. Ua onanshon uhuun Upári man onancuana, —ishon ato yoini.

<sup>20</sup> Jesús Dios fu tsainti pushu muranshon yorafo yosini. Nan cunu muranri nocon pui nanuti. Diosin tsain yonomisifo inanonfo. Nanno ato yoifiani tsoancai Jesús achinima cunu muran iquimashcaquin. Jesús rutuafotaima. Ascan rutushquiafon shafan nocoataima tsoan ahusca huayonima.

### *Un cai aricai man catiroma*

<sup>21</sup> Ascan tsoancai achinifoma Jesús afanan nocon caifo aton niaifofo yoini. —Un chipo chai cai. Un caino man ua funafiaquicai man ua fuchishquima. Maton chaca potayamashu nanscasiai man nai. Ascaiton un cai anori cai man catiroma, —ishon ato yoini.

<sup>22</sup> Nicacani yoinannifo, —¿Afirimun rutushquiquin? Ascashori noco yoi, “Un cai anoricai man catiromaran,” noco huaiquin, —icashu nocon niaifofoan yoinannifo.

<sup>23</sup> Ascaiton Jesús ato cumani, —Manfin na mai ano iitianiquin. Ucaí mai ano ipaonima. Ufin nai muran iitianiquin. <sup>24</sup> Un mato yoiai cuscan maton chaca potayamashu nanscasiai man nai. Un mato uhuunoa yoia cuscan icoinra huayamashu maton chaca ya man nai. Man naino maton chaca mato ya ipanaca, —ishon Jesús yoini.

<sup>25</sup> —¿Ascan minmun tsoaquin? —ishon yocaifoan. —Nan un mato yoimisi cuscafin unquin. <sup>26</sup> Matohuunoa un ichapa yoitiro. Man chaca huaa cuscan huafain un mato yoifiatiro nan ua nichinicai man icoinra huatiro. Afi ua yoimisi cuscan un nantio maifoti un ato yoifoanfafainon, —ishon Jesús ato yoini.

<sup>27-28</sup> Apa Dioshuunoa ato yoiflaitocai tsoan tapinifoma. Ascan Jesús ato yoini, —Man ua ihui coyan iquinanqui funinifoanshquiaitian man ua tapishquin umain tsoaquin.

Nantianri man tapitiro uhuunoa fusticai un mato yoimisima Upa Diosin ua yoimisi cuscan nan fusti un mato yoi. <sup>29</sup> Nan ua nichini ufu imisi. Uacai potamisima. Afi ua amapaiyai cuscan un amisiquin. Ascacun uqui unimacoin, —ishon ato yoini. <sup>30</sup> Yoiai cuscan nicacashon atirifoan a icoinra huancoinnifo.

*Diospan facufo Diosin aton ifo. Yora chaca huamisifo chaca fustisi aton ifo*

<sup>31</sup> Ascano Jesús nocon caifo nan icoinra huafu yoini, —Un mato yoiai cuscan nica-coianshufin uhuun tanamisicoin man itiroquin. <sup>32</sup> Uhuun tsain nicashon iconcoin tapishon maton nomuran man isharacointiro. Ahuara iconma afanan maton ifo inonma, —ishon Jesús ato yoini.

<sup>33</sup> Ascan Jesús icoinra huamisifoan ato yoiaiton niaifofoan nicacashon yoinifo, —Nonfin Abraham ahuun funafoquin. Tsoa futsacai nocon ifo imisima. Noncái tsoan oinmati imisima. Ascacufin ahuuscain, “Ahuara iconma maton ifo itiroma man icoinsharanon,” noco huaran, —huaifoan. <sup>34</sup>—Iconcoin un mato yoinon. Tsoan chaca huamisifin ahuara chacafoan aton ifo iishquiquin. Nanrifi chacafoan aton yonoshomisi iishquiquin. <sup>35</sup> Man man tapia ahuun yonoshomisicai ifoan pushu muran ipanacama. Pushu ifoan ahuun facu pushu muran ipatiro.

<sup>36</sup> Ascan unfin Diospan Furunquin maton chaca soashonano afanan ahua chaca futsa maton ifo itiroma. Man Dios fu isharapashcaquin. <sup>37</sup> Mun tapia maton shuni Abraham. Man ahuun funafoflashon uhuun tsain man nicacasmai. Ascashon man ua rutupai. <sup>38</sup> Uhuun Upan amisi cuscan mun oinmisi. Nanfohuunoa un mato yoimisi. Ascan marifi maton upa mato yoimisi cuscan nannori man huamisi, —huaiton.

<sup>39</sup> —Nocon shunifin Abrahamquin, —huaifoan. —Man Abraham funafoshofin nanton apaoni cuscan marifi nanscarifi man huacuanaquin. <sup>40</sup> Upa Diosin ua yoimisi cuscan un mato icon yoifaino man ua rutupai. Abrahamcai ascapaonima. <sup>41</sup> Maton upa acai cuscan marifi man amisiquin, —ato huaiton. —Noncái upa ichapayama. Nocon upacoin fustifin Diosiquin, —huaifoan. <sup>42</sup> —Unfin Upa Dios fu imisiquin. Un Dios icanoashu un oni. Ufi shinanfaincái un mai ano onima. Uhuun Upan ua nichiano. Ascan maton upacoin Diosicunfin man uarifi noicuanaquin. <sup>43</sup> Ahuuscain uhuun tsain man shafacafifiacucai man tapiama. Futsanfin mato nicatima huaquin. <sup>44</sup> Nanfin maton upa Satanasquin. Ascan maton upan apaiyai cuscan marifi man huapaiquin. Aafin taui rutumitsamisi ipaoniquin. Iconcái yoimisima. Atocái ahuara icon yoimisima. Ahuun nomuran chani fusti shinantiro. Nancashori chani fusti yoitiro. Afin chanimisicoinquin. Chanimisifoan aton apacoin. <sup>45</sup> Uncái a cuscarama. Un mato iconcoin yoifiaiton mancái ua icoinra huaima. <sup>46</sup> ¿Ratoran futsamain un chaca huaa yoitiroquin? Uncái chaca huamisima. ¿Un mato icon yoifiaitocái ahuuscáquin man ua icoinra huaimacain? <sup>47</sup> Ratoranfoan Diosin ahuun yoracoin ahuun tsain nicatiro. Mancái Diosin ahuun yorama. Ascan uhuun tsain man nicaimaran, —ishon Jesús ato yoini.

*Abraham Caiantaima Cristo iyoni*

<sup>48</sup> Nicacashon nocon caifo Israelifoan cumanifo, —Icon man non yoimisi. Minfin Samaritanonquin. Yoshin chaca mihuun nuumisi, —huaifoan. <sup>49</sup> —Yoshin chaca uhuun nuumisima. Un uhuun Upa Diosihuunoa tsain shara fusti yoimisifin unquin. Manfin uhuunoa tsain chaca yoimisiquin. <sup>50</sup> Ascanfiatan mancái uhuunoa yorafo tsain shara yoipaimisima. Upa Diosin fusti iconcoin yorafohuunoa tsain shara yoitiro. Uhuunoa yorafo yoisharamapai. Nantonri yoitiro ratofomain shara iyamarai chacafoquin. <sup>51</sup> Iconcoin un mato yoinon. Tsoan uhuun tsain nicacolianfin nacointamarocon nipanacaquin, —huaiton.

<sup>52</sup> —Natian man non tapicoin minfin yoshin chacayaquin. Abraham non Diosin tsain yoimisifori man naafianicun min noco yoia, isca huaquin, “Tsoan uhuun tsain nica-coianshu nacointamarocon nisharapacunacaran,” ishon min noco yoia. <sup>53</sup> Nocon shuni

Abraham non Diosin tsain yoimisifori man nani. ¿Ascan min Abraham finoncoianmun? ¿Min shinanmun min nantifi finoan? —huaifoan.

<sup>54</sup> —Unfincoin un uhuunoa yoisharainocai ahuama. Upa Diosin fustitofin uhuunoa yoisharamisiquin, “Nanfin nocon Uparan,” man huamisiquin. <sup>55</sup> Mancaí uhuun Upa Dios onanmisima. Ascafiacon unfin uhuun Upa onancoianquin. Uhuun Uparan un iyamafin Un mato cuscara chanimisiri icuanaquin. Ascatamarocon un Upa Diosin onancoian. Ua yoiai cuscan un huamisi. <sup>56</sup> Maton shuni Abraham, yoini, “Un chipo Cristo ointiro. Oianshu un fasi unimashquinran,” ishon yoini. Ua oinni ascan fasi unimani, —Jesús huaiton.

<sup>57</sup> —Mincaí cincuenta fari icataima. ¿Ascan ahuuscashomun min Abraham oinmisiquin? —huaifoan. <sup>58</sup> —Iconcoin un mato yoinon. Abraham caiantaima unfin iyopaoniquin, —ishon Jesús ato yoini. <sup>59</sup> Ascaiton nicacani nocon niaifofo fasi sinaco-incaquin toquiri ficatan Jesús tsacapainifo rutupaicaquin. Ascan huapaiyaifono Jesús ato murannoashu cani. Dios fu tsainti pushu murannoashu atomaqi cafiaitocai tsoan oinnifoma.

## 9

### *Nocofunu fusho cainfianicun Jesús caya huamani oinsharanon*

<sup>1</sup> Jesús caaquin oian nocofunu fusho nanscarapan caini oinni. <sup>2</sup> Ascaiton non afu rafumisifoan yocatoshini. —Tapimamisiton, ¿Ahuuscaimun na nocofunu fushoquin nanscarapan caini? Ahuara chaca huamisishaquinraca fusho cainni. ¿Ascayamarai apa futan ahuan chaca huamisianoraca fusho cainimun? —ishon non Jesús yocani. <sup>3</sup> Ascaiton Jesús noco yoiquin isca huani, —Ahua chaca huayamafiamisishaqui afincoin fusho cainni. Apa futan ahuan chaca huanocai fusho cainnima. Nanscarapan cainnucun chipo Diosin ahuamamishti huatiro cuscan ahuunoa ismashquin.

<sup>4</sup> Diospan ua nichiniquin non yonoshononcahuun. Non shafata fusti yonoshotiroquin. Yamucai non yonoshotiroma. Nanscarifiai ratoran shafatan nocoqui nocoano afanancaí tsoanshtan na mai anoshon Dios yonoshotirofoma. <sup>5</sup> Un na mai ano iyoashufin un shafa cuscaraquin. Un ato oinmani ahuuscashumain isharatirofoquin, —ishon noco yoini.

<sup>6</sup> Asca huatan maiquin cumo michotan. Miscoacufoantan ayashon futucurani. <sup>7</sup> Asca huatan, —Siloé carayanun nashitahuun, —huani. Carayan ahuun anu futsa —Nichiaran —yoimisifo. Asca huaa caashu nashianan fuchocomutan oinsharacufainiquin. Ascatan naso curani. <sup>8</sup> Nan oinmisifoan isca huanifo, —¿Nan fusho tsaoashu ahuara yocacaiton non oinmisimun? ¿Na nancaimun? —huaifoan. <sup>9</sup> —Ainfain. Nanfinquin, —atirifiton huanifo. Atirifiton yoicaquifin, —Aamafinquin. Nan ointsacoinfinquin, —huanifo. Afiri ato yoini, —Unfinquin. Unfin fusho imisiquin. Ascafiaflashofin natiantan un oinsharaiquin, —ato huaiton.

<sup>10</sup> —¿Ahuuscashomun min natian oincaín? —huaifoan. <sup>11</sup> —Na nocofunu Jesusran huaafaoanfin ua maiqui cumo michotan a yashon ahuun mucuman ua futucuracaquin. Ascashufin “Siloé naquinoashu nashitahuun,” ua huaano. Siloé carayanun nashianan un fuchoquimushofin un oinshara acufainnaquin, —ato huaiton. <sup>12</sup> Ascaiton, —¿Ranimun na nocofunu Jesusquin? —ishon yocaifoan. —Un tapiama. Raquiran man caaran, —ato huani.

### *Nan fusho cainniton oinsharaiton Fariseofoan yocanifo*

<sup>13</sup> Ascano Fariseofo icano nan nocofunu iyonifoquin. <sup>14</sup> Jesús nan nocofunu tunutitian cayahuano. <sup>15</sup> Fariseofoan nan nocofunu yocacaquin, —¿Ahuuscacai ashumun min furo cayaquin? —huaifoan. —Ua maiquin cumo michotan ayashon ua futucuraca. Nashianan fuchoquimushofin un oinshara acufainnaquin, —ato huaiton.

<sup>16</sup> Nicacaquin Fariseo atirifoan isca huanifo —Acaico Dios ariashu ocufin tunutitian yora cayahuama, —huanifo. Ascaiton atirifiton yoiquin isca huani —Yora chacapancai naton acai cuscan huacuanamaran, —ishon atirifiton yoinifo. Ascaiton atirifoan shinancaquin, —Jesuscái sharama, —huaifono. Atirififain, —Jesusfin sharaquin, —huanifo. Jesushuunoacai nannorisi shinannifoma.

<sup>17</sup> Ascaiton afanan a nocofunu fusho cainni yocacaquin. —¿Minmun ahuuscacai aaqui na nocofunun mia cayahua? ¿A mia furo cayahuamamun tsoanquin? —huaifono. —Naantofin inon pacoai cuscan huafain Diosin tsain yoimisiquin, —ato huaiton.

<sup>18</sup> Ascaitoncai nocon niaifofoan icoinra huanifoma nan fusho nanscarapan cainni. Ascaiton fushon apa yafi ahua cunashon yocanifo. <sup>19</sup> —¿Nan na aamun min facu fusho caini? ¿Ascafiahomun ahuuscashon natian oinquín? —huaifono. <sup>20</sup> —Nanfin nocon facuquin. Nanscarapan cainni. Nan non tapiafin nocon facuquin. <sup>21</sup> Ahuuscashomun oinquín noncái tapiamafinquin. Ahuuscashumain cayaquin. Facumafinquin. Manfin nocofunuaquin. Afifin mato yoitiroquin ahuuscashumain cayaquin. Nan yocacahuun, —ahua futan apan ato huani. <sup>22</sup> Nocon niaifofoquin musucaquin anori yoinifo. —Tsoan “Diosin Jesús catonniran,” huacai nocon ichananti pushu muran afanan iquitirofomafinquin, —niaifofo icaiton nicaí ahua yafi apa atoqui musunifo. <sup>23</sup> —Afanan facumaquin, Nancoin yocacahuun, —huanifo.

<sup>24</sup> Ascano afanan a nocofunu fusho ipaoni yoimashon yoini, —Yoihoo. “Diosin ua cayahuaran,” ihuu. Jesuscaicon sharacufin. Chacafinquin. “Diosinfín sharaquin,” huahuu. “Jesús shararan,” huayamahuu. Non tapiafin Jesús chacaquin, —huaifono. <sup>25</sup> —Utsan. Uncain tapiama chaca iyamarai sharamainquin. Un tapia fustifin un fusho iyofiamisishaquin natian un oinsharaicain, —huaiton. <sup>26</sup> —¿Ahuusca huafaimun mia cayahuaquin? —ishon yocaifoan.

<sup>27</sup> —Munfin mato yoiflashucai mato yoia cuscan man nicapaima. ¿Ahuuscaquin man afanan ua yocainmun? ¿Marifimun ahuun tanamisi man ipaicain? —ato huaiton.

<sup>28</sup> Fasi roaquin futsanifo. —Minfin ahuun tanamisiquin. Nonfofin Moisés tsain tanamisifoquin. <sup>29</sup> Non tapiafin Diosin Moisés fu tsainpaoniquin. Noncái a Jesús tapiamafinquin. Tii ahuu cuscararanfinquin a nocofunucai non tapiama, —huaifono.

<sup>30</sup> —Choon. Mancái tapiamafinquin raniashumain Jesús oshon. Un fushofiacun ua cayahuamaquin. <sup>31</sup> Non tapiafin yoran chaca huamisicai Diospan nicapaitiroma. Ratoran Diosin tanasharafain yoia cuscan aitonfin nanscaraofo Diosin nicatiroquin.

<sup>32</sup> Nan Diospan mai onihuani chaincái ascáran nocofunu fusho caya huaa non nicaiyomisimaquin. <sup>33</sup> Upa Diosin na nocofunu Jesús nichiyamanicai ahua ahuusca huacuanama, —huaiton. <sup>34</sup> Nicacani fasi aquí sinanifo, —Minfin chacacoin cainiquín. ¿Ascan ahuuscaquimun min noco tapimapaicain? Min chacashunifiashon. Nocon ichananti pushu muran min afanan iquitirofoma. Nunoashu cariscatahuun. Noncaicon mia afanan oinpaiyaintonfin. Afanan nuno iquicuranyamahuun, —huanifo.

### *Ratoranfoan Jesús icoinra huayamacanashu fusho cuscaraconinfo*

<sup>35</sup> Ascaiton fusho ipaoni aton ichananti pushu muranshon potaifoan Jesús nicaní. Ascashon funaquin fuchini. Fuchishon yoini, —¿Minmun na nocofunu Dios ariashu oni icoinra huaicai? —ishon Jesús yocaiton. <sup>36</sup> —¿Tsoanmun na nocofunuquin? Ua yoihoo urifi un icoinra huanon, —huaiton. <sup>37</sup> —Nan min ufu tsaincaifin unquin, —Jesús huaiton. <sup>38</sup> Nicatan, —Ifon, unfin mia icoinra huaicain. Min fasi sharacoin. Un mia noi. Un mia Ifoai. Min Diospan Facuran, —ishon yoini.

<sup>39</sup> Ascano nanno niafo Jesús ato yoini, —Uhuun Upa Dios icariashu un nuno mai ano oni ratofoanmain ua icoinra huayamaino ua icoinra huacanicain un puashoshquin. Ascan tsoa Upa Dios fu ipaifiaquin tapiama ahuuscumain atiroquin nanfo fusho cuscaraflashon ua icoinra huaashucái afanan fusho cuscara itirofoma oinsharatiro Upa

Dios fu ipashcaquin. Futsafoan shinancaquin tapisharafiahocai tapisharafoma. Ua icoinra huayamaifo. Nanfo fusho cuscaracoin. Funoshcaquin,—ishon Jesús yoini.

<sup>40</sup> Nanno Fariseofo Jesús yoiai cuscan nicakashon a yocanifo, —¡Cuu! ¿Min noco yoimun non fushocun? —huaifoan.

<sup>41</sup> Ato yoiquin, —“Nonfin fusho cuscarafquin. Man non funoa. Non chaca huamisiran,” ishon man yoaition un maton chaca soashocuana. Mancaí ascata-marocon, “Nonfin oinsharatiroquin. Noncaí funoama. Nonfin sharaquin. Noncaí chacamaran,” man imisi. Ascan maton chaca soatama man funocoianshu Upa Dios icano nocopacunacamaran,—ishon Jesús ato yoini.

## 10

### *Chashoanfo cushimaishuunoa afincion ahuunoa Jesús ato yosini*

<sup>1</sup> Ascataín Jesús ato tapimani namain aton cushimaiscoinshofin. Chashoan cushimaítion ahuun chashoanfo cushimaítiro. Nanscarifi aquin Jesús ahuunshon icoinra huafó cushimaointiro. Nannori Jesús ato yoini isca huaquin, —Iconcoín un mato yoinon. Pasoatoshon yoran chashoanfo cunushotiro iquimashquin raqui fononfoma. Nan cunu caincaiti ya. Ascan tsoa caincaiti murannoashu iquitama pochininnoashu iquiafin nan yomutsoquin.

<sup>2</sup> Ascan nan tsoa caincaiti cunu muran iquimamisifin nancaifin ato cushimaíquin. <sup>3</sup> Caincaiti ano nocoaiton nan nocofunun caincaiti cushimaítion fupushotiro chashoan cushimaítion iquimapacunon. Ascan chashoan cushimaísi iquiaiton ahuun chashoanfoan ahuun oi onanti huanifo. Nantifi ahuun chashoanfo anu futsapacuni. Aton anun cunapacuaino chashoanfoan mufainifo. <sup>4</sup> Aton cushimaísi rucun caino chashoanfoan cunu muranshon mufainifo. Ahuun oi onancoincashon mufainifo. <sup>5</sup> Futsan cunafiaitocai chashoanfoan ahuun oi onannifoma. Ahuun oi onainyamacani amaqui ichotiroran,—ishon Jesús ato yoini. <sup>6</sup> Jesús ahuunoa ato yoiflaiton tsoan tapinima.

### *Jesús nocon cushimaíramisi*

<sup>7</sup> Ascano Jesús afanan ato shafacafi yoini, —Un mato iconcoín yoinon. Nan chashoanfo cunu muran iquipaicaní shoi fusti muran iquitirofo. Unfin nan shoi cuscaraquin. Tsoa Upa Dios icano iquipai uhuunoashu fusti ari iquitirofoquin. <sup>8</sup> Un matoquí nocoataíma futsafoanri yoia isca huaquin, “Un mato tapimatiro ahuuscashumain Upa Diosqui man nocotiro afu nipashquin,” ishon yoifiamisishacaquin afoancaifin paramisifoquin. Yomutso cuscarafo. Diospan yora parapaicaní ato yonomapai. Asca huapaifiainfoan Diospan yorafoancái na cuscarafo nicapaicanima. <sup>9</sup> Unfin na shoi caincaiti cuscaraquin. Tsoa Upa Dios icano ipapaiquin uhuunoashu fusti ari iquitiro afu ipashquin. Natianri uhuunoashu isharatirofo ahuatocai aton nomuran fucash huatiroma.

<sup>10</sup> Futsafoan uhuun yorafo parapaicaní. “Ua tanacahuun. Un mato tapimasharanon,” ishon ato yoifiaquicai nanfoanfin uhuun yorafo umaqui imapaicaní. Yomutso cuscarafo. Ua icoinra huafó shara huapaicanima. Ato shara huatamarocon ato chaca huapaifain ato rutupaicaní. Asca ato huafiainfoocai un ascarama. Ua tanamisifo un ato imasharafain un ato unimamashquin. Nanscaifin un oniquin.

<sup>11-13</sup> Ua icoinra huafó chashoan cuscarafo. Cushmaní yopacani. Unfin nan chashoanfo cushimaísi shara cuscaraquin. Ascan na nocofununcái chashoanfo ifoshomacai ato cushimaírama. Chashoanfo futsan cushimaishofin ifoan aton pui inantiroquin. Ascan chashoanfohuunoa shinantamarocon pui fusti shinain. Ascaino masharo chashoanfoqui nocoaino nan cushimaísi futsan ato cushimaíratama ato potafaini ichotiro. Shinanquin isca huatiro, “Na masharo fasi musucoin. Nan chashoanfocai uhuunacoinmafinquin. Ascan na masharonun ato piquin nanscanon.

Uncai ahuisca huatiroma un ato numapanan. Unfin atomaqui ichoicaicain masharonun ua ahuisca huanonma,” ishon shinantiro. Chashoanfoan aton ifocoincei ascariroma. Afifin ahun chashoanfo cushusharatiroquin masharonun ato pinonma. Shinantiro isca huaquin, “Uhuun chashoanfihuunoashucaifin un natiroquin. Nanfocairocon ahuiscanonma,” ishon shinantiro.

<sup>14-15</sup> Unfin na chashoanfo cushumisi shara cuscaraquin. Cushmanisin ahun chashoanfo onancoin ato cushusharamisi. Urifi ua icoira huafo un ato cushusharamisi. Uhuun Upa Diosin ua onancoin. Urifi uhuun Upa un onancoian. Nanscarifiai ua icoira huafo un ato onancoin. Nanfoanrifi ua onancoincaniquin. Un atohuunoashu naashquin. <sup>16</sup> Yora futsafoanri ua icoira huashquicani. Afocai Israelifoma. Nanforifi un uhuun Upa icano iyotiroquin. Nanfoanri mai ano niyocashon ua nicasharayoshcami. Ascan Israelifo yafi mani futsafoanri ua icoira huacanashu fusti cuscaracon iishcaniquin. Nantifi nan icoira huafoti Upa Diosin yorafu iishcaniquin. Urusu fusti un aton cushmanisi un iishquin.

<sup>17</sup> Un ato cushusharashu un atohuunoashu naashquin. Ascan uhuun Upa Diosin ua noiaino naashu un afanan funishquin nipashquin. <sup>18</sup> Ua icoira huafihuunoashu napaivamainocai tsoan ua namatiroma. Uhuun Upa ua yononi cuscan un atohuunoashu naicain. Uhuun Upa Diosin ua yononi cuscan un atohuunoashu nayoflashu un afanan funitiro nipashquin,—ishon Jesús ato yoini.

<sup>19</sup> Nicacashon atirifi nocon caifoan icoira huaifoanno atirifoancai tsoan icoira huanima. <sup>20</sup> Atirifoan yoquin isca huanifo,—Aafin nisocoinquin. Yoshin chaca ahun nua. ¿Ahuuscaquitsi non na nocofunu nicatiro? —ishon yoinifo.

<sup>21</sup> Atirifoanri yoini,—Aacai yoshin chaca ahun nuama. Yoshin chacanuncui nocofunu fusho afanan oinmatiromaran,—ishon yoinifo.

### *Israelifo aton niaifofoancai Jesús icoira huanifoma*

<sup>22-24</sup> Ascano Jesús nocon caifo Dios fu tsanti pushu Jerusalén ano non cani. Oi pacutian non cani. Nanno tapasi uhuaparasi muran fonifo. Nantianri nocon caifo Israelifoan nocon fusitin ahun anu tuqui huani isca huaquin,—Dios fu tsanti pushu onihuashararan,—ishon anuni. Nanno pushun facu ahun anurifi tuquihuani,—Salomonran,—huanifo. Nannori Jesús ini. Nocon caifo niaifofo aqui funifo a yocacani.—Minmain Cristoquin nocon shafacafi yoihoo. ¿Ahuuscaimun min noco shafacafi yoiyamacaiquin? ¿Ahuutiatsi min noco shafacafi yoicain? —huaifoan.

<sup>25</sup> —Un mato yoifiamisicun man ua icoira huaama. Uhuun Upahuunshon un yorafu tsoan atiroma cuscan un huafafaini. Nanfo un mato isma unmain Diospan Facushofin.

<sup>26</sup> Ascafia mancái Upan Diosin ahun yorama. Man ua icoira huama. <sup>27</sup> Ua icoira huafuan ua nicasharatiro. Un ato onancoianno ua tanafo. <sup>28-30</sup> Omitsiscapanacafo muran focanima. Ua tanaifocai ari fonacafoma. Ascatamarocon un ato Upa Dios ya imapacunaca. Upa Diosin ato ua inan. Upan nantifi finoncoian. Upa Dios fu un fusti cuscaracon. Ascancunfin tsoancai ua tanamisifo unmaqui yafi Upamaquiri imapacunacamaran,—ishon Jesús ato yoini.

<sup>31</sup> Nicacani afanan Israeli niaifofoan toquiri uhuapa ficatan Jesús tsacapainifo rutupaicaquin. <sup>32</sup> Asca huafiaifoan Jesús ato yoini,—Upa Diosihuunshon tsoa futsan atiroma cuscan un mato ismafiamisi. ¿Ascan ahuanhuunshocaimun man ua toquirinin tsacaicain? —huaiton.

<sup>33</sup> —Nanfihuunshocai non mia toquirinin tsacaima. “Tsoa futsacai Diosima,” anori Diosin tsain cununi. Minrifi nocon cuscara nocofunuquin. Ascanflashu mian yoia mirifi Diosiran min icaquin. Ascan min Dios chaca huai. Ascacufin non mia toquirinin tsacaicain,—huaifoan.

<sup>34-36</sup> —Diospan tsain mato cunushoni isca huaquin, “Un mato yoi manfin Dios cuscaraconinfoquin,” ishon ato yoini. Diosin yoini cuscacai tsoan, “Chaniran,” huatiroma.

Ascan nan Diosin anori yoiaino ahuuscain man yoiai “Un Dios chaca huaran,” ishon. Nantofin ua catonshon nai arishon nuno mai ano ua nichiniquin. Ascancunfin un icon yoitiro unfin Diospan Facuquin.

<sup>37-38</sup> Mancai ua icoira huaima. Uhuun Upan Diosin aca cuscan un huayamaiton ua icoira huayamacahuun. Ascafiaquin uhuun Upa acai cuscan urifi nanscasi huaiton ua icoira huacahuun. Uhuun Upan acai cuscan urifi nanscasi un huaiton man tapitiro Uhuun Upa ufu ica. Unrifi uhuun Upa fu un icaran, —ishon Jesús ato yoini. <sup>39</sup> Nicacashon afanan Jesús achipaifiainfoanno atomaqinnoashu caitocai tsoan achinima.

<sup>40</sup> Atomaquinoashu caiunu Jordán ari cani. Nannoshon Juanpan tau huaquin yorafo unu muran iquimapacuni. Nanno chaimashta Jesús iyoni. Unu cusumunri iyoni. <sup>41</sup> Ascaino yorafo aquifucashon. Yoinifo isca huaquin, —Jesús Diosihuunshon ahuamamishti noco isma. Juanpacaiasca huamisima. Ascafashon Juanpan Jesushu-unoa iconcoin. Yoia cuscan nanscacoin huamisiran, —icashu yoinannifo. <sup>42</sup> Asca huacanashu nanno yora ichaparasiton, —Icon Jesusfin Diospan Facuquin, —icashon icoira huanifo.

## 11

### *Lázaro nani cuscan*

<sup>1-2</sup> Ascatan nocofunu Lázaro isinin icai. Ahuun pushu Betania ano ini. Nan Lázaro isinin icaiton ahuun poi rafu María yafi yioa Marta nannori inifo. Nan María Jesusqui motica murannoia inti sharacapa Jesús tau pumancayan ocatan ahuun foon otucuru aniquin. <sup>3</sup> Nan poi rafutan Jesús tsain fomaquifin, —Ifon, nan min ahuun noiaifin isinin iquiquin, —ishon yoimanifo. <sup>4</sup> Jesús nicatan yoiquifin, —Nan Lázaro isinincaicain naimafinquin. Isinin icaifin yorafoan oicaniquin Dios sharacun. Unmain Diospan Facuquin un ahuamamishti huaiton tapicashon icoira huanonfo, —ishon Jesús ato yoini. <sup>5</sup> Jesús Lázaro yafi poi rafu atohuun noicoinni. <sup>6</sup> Lázaro isinincaiton nicafiai nanno osha rafuyoni. <sup>7</sup> Ascaiton —Non Judea ano afanan nasononcahuun, —ishon noco yoini. <sup>8</sup> Ascaiton non cumaquin, —Tapimamisiton, nocon niaifofo Judea anoshon ramashta mia rutucuanafa. ¿Ascan ahuuscain min afanan ano capaimun? —ishon non yocainton.

<sup>9</sup> —Shafatan non oinsharatiro. Farin chashaino non oinsharatiro pacushquima. Nan-scarifiai shafatifi uhuun Upa Diosin ua amapaiyai cuscan ua tapimamisi. Ua cushuano un funotiromaquin. Uricai un musutiroma. <sup>10</sup> Ascafia faquishiano chashamatiyamaino yora pacutiro. Nanscarifiai tsoan Dios fu rafuyamatocai tapisharatiroma ahuuscashu-main isharatiroquin. Asca funotiro, —ishon noco yoini.

<sup>11</sup> Nannori noco yoitan Jesús afanan yoini isca huaquin, —Nocon yorahuan Lázaro oshafiacun un moimanicain, —huaiton.

<sup>12</sup> Non afu rafumisifoan nicashon non yoiniquin, —Ifon, oshacoianfinquin naama. Chipo cayasharatiroran, —huanifo.

<sup>13</sup> Man nacoinfiacun, —Osharan, —ato huaiton. Chipo moiran ishon shinannifo. Jesús man arusu onanfashon ato yoicoinnima.

<sup>14-15</sup> Ascan noco shafacafi yoini, —Lázaro man nacoinfiano un unimai naino un ano icama. Ascan man chipo oinquen man fasi ua icoira huashquin. Ascafia natian non Lázaro ano fononfocahuun, —ishon Jesús noco yoini.

<sup>16</sup> Ascan nicatan Tomás nan rafanacani Jesús fu rafumisi futsan noco yoini, —Non canon. Norifi afu non nannon, —ishon noco yoini.

### *Jesús fustiton naafo funimatiro nipanono*

<sup>17</sup> Ascatan Betania ano nococashon Jesús nica man Lázaro naita. Osha rafu non rafuri finoan ini mai huaitafo. Mahua quini muran mai huaitafo ini.

<sup>18</sup> Betania Jerusalén chaíma ini. <sup>19</sup> Nocon caifo Israelifo ichapa María yafi Marta icano funifo aton ointi shinanmasharashopai poi naano. <sup>20</sup> Martan Jesús oaiton nicai aqui nocoicai cani. María pushu muran nichifaini.

<sup>21</sup> Jesusqui nocotan yoini, —Ifon, min nuno anocai uhuun ushton ua nashocuanitamafinquin. <sup>22</sup> Un tapiafin natianri min ahuara futsa Dios yocaitofin mia ashonrisca huatiroquin, —huaiton. <sup>23</sup> —Ushtofin afanan funiquin, —huaiton. <sup>24</sup> —Un tapiafi ahuun unutani nan naafo funiaifoannorifi funitiroquin, —huaiton. <sup>25</sup> Ascaiton Jesús cumaquin, —Unfinquin uhuunoashu naafoti funicani. Uhuunoashufin nantifi niafoquin. Nan ua icoinra huaafin nafiafin afanan funiafin ahuuscanacamaquin. <sup>26</sup> Niyoshon ua icoinra huashucay nanacama. ¿Nan mianmun icoinra huaicai? —huaiton.

<sup>27</sup> —Ai, Ifon, unfin mia icoinra huaicai. Minmain Cristocufin Diospan Facu. Nocon caifoan mia manamisi. Nocon shunicaifoanrifi mia manapaonifoquin, —huani.

### *Lázaro mahua quini muran maia anoashu Jesús uaini*

<sup>28</sup> Yoitan Martan chipocun María yoicai cani. Nocoquin oian afu rafuafo María fu uaicaifoan oinquin Marta chipocun fusti mushannantan yoiquin, —Nocon tapimamisifin oaquin. Mia yoimana, —ishon yoini. <sup>29</sup> María nicatan funinaca huantan cai aqui nocoriscani. <sup>30</sup> Jesuscái pushurasi muran nocoatai inima. Nan Marta fu tsaincanoashu oataima ini. <sup>31</sup> María fu uaicaifoan oin atofu uaifiain funinaca huatan caiton oincaquin María poi maia anoashu uaiqui cairafain nocon yora Israelifo mufainifo.

<sup>32</sup> María Jesusqui nocotan tauicopacufoan yoini, —Ifon, min nuno anocai uhuun ushto ua nashocuanitamafinquin. Iscainofin uhuun ushto ua nishoan icuanaquin, —huaiton. <sup>33</sup> Jesús María oian uaicaiton nocon caiforifi María fu fucanashu afu uaicaifoan ato oinfin Jesús arifi atohuun ramapaitan ato shinantaquin. <sup>34</sup> Ato yocani, —¿Ranimun man mai huatanquin? —ato huaiton. Cumacaquin, —Ifon, oinyopon, —huanifo. <sup>35</sup> Oinyopon huaifono, Jesús uaini.

<sup>36</sup> Uaicaiton oincaquin nocon caifoan, —¡Oincapon! Lázaro fasi noi ahuunoashu uaiquin, <sup>37</sup> ¿Nan fusho cayahuani cuscarifi huaquimun nunoshon Lázaro cayahuacuanti? —huanifo.

### *Jesús Lázaro funimani*

<sup>38</sup> Ascatañ afanan Jesús ahuun ointi muran fasi shinancoinquin maia ano nocotan. Maiano toquirinhuan quini ano nocoshon yoiquin, <sup>39</sup> —Toquiri fupucahuun, —huaiton. Nicaquin poi Marta yoiquin, —Ma, Ifon, manfin osha rafu non rafuri finoanquin a naita. Natianfin man pisiaquin, —huaiton. <sup>40</sup> Nicaquin Jesús yoiquin, —¿Un mia yoiaiton min nicamamun? Mian icoinra huafin Diosin ahuara shara tsoan atiroma cuscan huaiton min ointiroquin, —huani. <sup>41</sup> Ascaiton nicacaquin fupunshonifo. Fupushonafoanno nai foisinfoantan, —Upan, un mia cufia cuscan mian nicai. Un mia aicho huai.

<sup>42</sup> Un tapiafin mian nicafafainmisiquin. Ascan nuno niafoan mia icoinra huacashofin un mia cufiai cuscan mia huacaniquin, —Jesús apa cufini.

<sup>43</sup> Asca huatan Jesús yoiquin oi ashcafchin, —Lázaro, quini murannoashu funicuruahuun, —huaino. <sup>44</sup> Funicurani, —Ahuun rashuafo pucacahuun cainshara curanon —Jesús ato huani.

### *Israelifo aton niaifofoan Jesús rutupainifo*

*Mt 26.1-5; Mr 14.1-2; Lc 22.1-2*

<sup>45</sup> Ascaiton a nocon caifo María fu rafuafoan oincaquifin Jesús icoinra huanifoquin.

<sup>46</sup> Ascaiton oincanifin atirifi Fariseoqui chani focani fonifoquin. <sup>47</sup> Ascaiton nica-canashufin Fariseofo yafi nocon yorafohuunshon Dios cufimisi niaifofo ichanannifoquin. Ichancashon yoicaquifin, —¿Nonmun ahuusca huaicai? Jesús tsoan atiroma

cuscara ahuarao huaiquin. <sup>48</sup> Non ahuuscara huaiyamafin nantififain icoinra huacaniquin. Ascano Romanonfoan nocoasca huatirofo. “Mancaí afanan niaifofoya itiromaran,” ishon noco yoitiro. Nocon ichananti pushuri paon huatiro,—nocon caifo Israelifo niaifo inifo.

<sup>49</sup> Ascaiton nocon yorafohuunshon Dios cufimisi niaifocoinchi Caifás ato yoiquin,—Mancaí ahua tapiamafinquin. <sup>50</sup> ¿Man tapiamamun na nocofunu fusti nocon yorafohuunoashu naashquin? Nancafin sharaquin. Arus fusti nashquin tsoashtamaquian,—ishon yoini. Ascacufin Caifás inon pacuai cuscan yoiniquin. <sup>51</sup> Caifás yoiquicai afin shinanfain yoinima. Diosin ahuun shinanpan shinanmanainofin yoiniquin. Nocon yorafohuunshon Dios cufimisi niaifocoinchi Diosin ahuun shinanpan shinanmana Jesús nantifi ahuun caifohuunoashu nanonpacoiran, ishon yoini. <sup>52</sup> Jesuscái nocon caifo fustihuunoashu naimafinquin. Nantifi manifotichin icoinra huafohuunoashufin noco naashoshquiquin. Ascano nantifi Diosin facu inonfo. Noinancoincani. Nan yora fusti cuscara ishcaquin. <sup>53</sup> Nan Lázaro funiatianfin shinanquin tau huanifoquin,—¿Ahuuscashomain non Jesús rututiroquin? —icashon nanscasi huaquin shinanriapaonifo.

<sup>54</sup> Rutupaiyaifoan tapiashu Jesús afanan nocon caifo ichapafo icano cayonima. Yorahuanrasi ano catamarocon pushu fustirasi ano cani. Nan pushu fustirasi Jerusalén chaimashta ahuun anu Efraín. Nanno non afu rafumisi.

<sup>55</sup> Nocon caifo Israelifo nocon fusitin shafatan Diospan oinmati nan afu nai muran imisiton nocon shunifoan aton furonanfacufo iyoafofosi finonmani shinanshcaquin nocoti chaima. Nantianri yora ichapafo pushurasi ano chai icanashu Jerusalén ano funifo. Jerusalén anoafó Moisés aton shunifo yononi cuscan atorifi huamapai aton chaca soamapai ichananti pushu muran iquinifo.

<sup>56</sup> Ascaifoanno nocon caifo niaifofoan Jesús funanifo. Dios fu tsainti pushu ano chifi niafo yocananannifo,—¿Ranimun Jesús? ¿Man shinanmun nocon fusitin Jerusalén ano oimamun? —ishon yocanonannifo. <sup>57</sup> Asca huacanashu nocon yorafohuunshon Dios cufimisi niaifofo yafi Fariseofoanri ato yononi isca huaquin,—Jesús fuchishon noco tapimacahuun non achinon cunu muran iquimashquin,—ishon ato yononi.

## 12

*Ainfoan Jesús shinanquin inintin shara ahuun tau pumancaya ocani  
Mt 26.6-13; Mr 14.3-9*

<sup>1</sup> Ascano seis osha fusitin nocoti chaima Jesús no fu Betania ano cayoni. Nanno Lázaro ica ini. Nan Lázaro naacun Jesús funimani. <sup>2</sup> Naannoshon Jesús pimapaiquin tushu pichashonifo. Ascan Lázarorifi nanno atofu ini. Marta ato pimani. <sup>3</sup> Piaifono María Jesusqui oano ahuun ininti shara moticaquinoa Jesús ahuun tau pumancaya ocani. Ocashon ahuun foon otucurani. Asca huaiton nan pushu murannoafan nan ininti sharacoin shutunifo.

<sup>4</sup> Ascan Jesús afu rafumisi futsan nan Judas Iscariote nan Simonpan facu nanton chipo Jesús achimashquin yoini, <sup>5</sup> —¡Cuu! ¿Ahuuscaquimun na ainfoan ininti shara potaquin? Ahuun rafanan pui ichapa fishon noco inancun ahuuomafo non inancuana. Ascan shara icuanaran,—ishon Judaspan yoini. <sup>6</sup> Anori shinanfiaquicai ahuuomafo shinancoinnima. Afi yomutso iniquin. Nocon pui nanuti cushupaoni. Cushucoinpaonima. Ahuara fipaiquin nannoai pui onupaoni.

<sup>7</sup> Ascano Jesús Judas yoini,—María fucash huayamahuu. Un samamashta nai tapishon uqui ininti ocaquin. <sup>8</sup> Nan yora ahuuomafo matofu ipanaca. Ascacufin ato afanan inansharatiroquin. Ucai matofu nuno mai ano ipanacama. Ascaiton María natian ua shara huaran,—ishon Jesús yoini.

*Nocon caifo nocon niaifofoan Lázaro rutupainifo*

<sup>9</sup> Ascano Jesús nicafuracani nocon caifo Israelifo ichapa aqui funifo. Lázaro funia nicacani yora ichapa aqui funifo. Jesús fusti oinpaicanimaquian Lázaro nacoinfiacun Jesús funimana oinpaicani funifo. <sup>10-11</sup> Lázarohuunoa nicacaquin nocon caifo ichapafoan afanan nocon yorafohuunshon Dios cufimisi niaifofo tanatama Jesús fusti icoinsra huanifo. Ascaino nocon niaifofo yoinannifo, —Nan rafu non rutunon. Jesús fusti maquian. Lázarori non rutunon, —icashu yoinannifo.

*Jesús Jerusalén ano nocotoshiniquin*

*Mt 21.1-11; Mr 11.1-11; Lc 19.28-40*

<sup>12</sup> Man ascano iyoconaino nocon caifofo nocon fusititan yorahuanrasi Jerusalén ano inifo. Jesusrifi nocoaiton nicacani aqui funifo. <sup>13</sup> Upufo ya aqui fucaquin oi ashcafinin isca huanifo,

*¡Aicho! Nocon Numamisi oiquin. Nonfin Israelifoquin. Minfin nocon niaifoquin.*

*Nocon Ifo Diosin mia nocoqui nichini. Min fasi sharacoin. Upa Diosin mia shara huapapainonran*

ishon yoinifoquin. <sup>14-15</sup> Nannori yoiaifono Jesús burro cahuashara camaqui tsaoinacahuatan cani. Diosin tsain yoini cuscain iscani,

*“Jerusalén ano icafoan ratuyamacahuun. Maton Niaifo matoqui oshquiquin.*

*Burro cahuashara camaqui matoqui oshquiran,”*

ishon cunuyoni cuscan.

<sup>16</sup> Nantian nanfohuunoa oinfiaquicai icai cuscan non tapiyonima. Chipo Jesús afanan Apa ari nai muran cani afu niaifocoin iquicai non shinanni isca huaquin, —Jesús mai anoshon amisi cuscan nannoricoín Diosin tsain ahuunoa cunuyonifo. Nocon shunifoan Jesús caiantaima inonpacocai cuscan aqui cunuyoniforán, —ishon nocon nomuran non Jesús shinanni.

<sup>17</sup> Jesús Jerusalén ano nocoaiton nicacaquin nantianri yorahuanrasifoan a mananifo oinpaicaquin. Atirifoan Jesús Lázaro naafiacun funimanaiton oinnifo. Oincanifin futsafoqui chaninifoquin arifi oinnoño. <sup>18</sup> Nocofunu man nacoinfiacun funimana nicacaquin nanfoanri oinpainifo. Ascashon fai anoshon Jesús mananifo. <sup>19</sup> Ascano Fariseofo aqui yoinannifo, —¡Cuu! ¡Shinancapon! Noncái ahuusca huatiroma Jesús isca huanonma. Tsoancai noco nicapaicanima. Nantifi yorafoan Jesús nicapaicaniran, —icanashu yoinannifo.

*Jesús inon pacocai cuscan yoiyoni isca huaquin, —Ua rutushquicaniran, —ishon yoini*

<sup>20</sup> Nantianri Jerusalén ano yorahuanrasi muran nocon caifomafori nocon yora fut-safo fusitín ano funifo. <sup>21</sup> Nococatan Felipe ano fonifo yocain focani. Nan Felipe Galilea mai ano nan pushurasi ahuun anu Betsaida anoashu cainni. —Non Jesús fu tsainpai. Noco ihuushohuun non afu tsainon, —ishon Felipe yoinifo. <sup>22</sup> Nicashon yoiafo cuscan Andrés tapimani. Ascan nan rafutan Jesús yoinifo.

<sup>23-24</sup> Nicaquin Jesús ato yoini, —Unfin samamashta uhuun Upa Diosin nai muran icano un caicain afu niaifo iqui cai. Ascanfia uhuun Upa ari cataima un yorafotihu-unoashu un nayoshqui. Isca huaquin un mato tapimashquin man tapinon. Shuqui furo fusti non fanayamacai foatiroma. Ascatamarocon nan shuqui furo fusti fanano ahuunoashu furo shara ranan caintiro. Nanscarifiai un matoihuunoashu nayamacai tsoa futsa un nimapacutiroma. Urus fusti un nipatiro. <sup>25</sup> Tsoan iscariro “Diosin ua imapaiyai cuscacai un apaima. Ufi apaiyai cuscan fustifin un shinaincani,” ishon anori shinanshu funocointiro. Ascafia tsoan isca huaquin shinain, “Un nuno mai ano niyoshon ufi apaiyai cuscan un shinanpaitamarocon Diosin ua imapaiyai cuscan fusti un shinanpairan,” ishon yoitan Upa Dios fu ipasharatiro.

<sup>26</sup> Ascan tsoa uhuunoa yonomisi ipaiqui uhuun tsain nicacointan un yoia cuscan huatiroma. Ua tanashu un icano arifi nannori ufu ipatiroquin. Uhuun yonomisi un yonoa

cuscan ua ashoinquin Uhuun Upa Diosin futsafo aton ointaifi ahuunoa yoishquin isca huaquin, “¡Aicho! Min uhuun Facu Jesús nicamisi sharacoin. Min shara huamisiran,” ishon Upa Diosin ahuunoa yoisharatiro.

### *Jesús rutushquiaifo cuscan yoini*

<sup>27</sup> ¡Ohua! Natian uhuun nomuran un fasi omitsiscai. ¿Un raquiri huatiromun? Ucái yoitiroma isca huaquin, “Upan, ua numahuu un natian omitsiscanonma,” ishonai un anori yoitiroma. Upa Diosin ua nichini un natian ato omitsiscashonon. <sup>28</sup> Upan, Uhuunshon ato oinmahuu min fasi shara, —ishon Jesús yoini.

Yoititon nai muranshon oi ashcafínin Apa Diosin cumani, —Un minhuunshon un ato ismafafaini un shara. Nanscarifi un afanan huai, —ishon yoini. <sup>29</sup> Nan yorahuanrasí nannoshon nicacani atirifoan yoinifo, —Man turuicaran, —inifo. Atirifoanri yoinifo, —Upan Diosin ahuun oinmati afu nai muran icaton Jesús yoiaran, —ishon yoinifo.

<sup>30</sup> Ascan Jesús ato yoini, —Nan oi nai murannoá man rama nicaicain ua tapimanama matofin nicamapaiaquin. <sup>31</sup> Natian nan icoínra huamafoti Diosin ato onaintimaicóinni. Aton ifonri nan yosín chaca Satanás arifi nantiantari Diosin potashquin afanan aton niaifo inonma. <sup>32</sup> Ascafiatan ihui coyan iquinanqui ua mastashon uaya finifoanshcáni. Nanhuunshon un nantifi yorafo uqui omashquin, —ishon ato yoini. <sup>33</sup> Nannori ato yoini ahuuscashumain nashquicai tapinonfo.

<sup>34</sup> Nicacashon yorahuanrasifoan nanno nishon yoinifo, —Diosin tsain cununi cuscan noco yoimisi isca huaquin, “Cristo, nan Diosin catoanfin nípanacaquin. Nanacamáran. Ascacufín ahuuscashomain, Diospan Facu ihui coyan iquinanqui uaya finifoanshcáni,” min noco huaran. Tsohuunnoamun min yoicain, —ishon yoinifo.

<sup>35</sup> Jesús ato yoiquin, —Uncaí mato chashamashoriaima. Un mato yoia cuscan nicascharacahuun funoshcaquima. Chashamati yamaino faquish itiro yora funonon. Tsoa faquish muran caquin fai funomatiro. Rani caimancaí tapitiroma. <sup>36</sup> Un matofu icano ua icoínra huacahuun funoshcaquima. Man ua icoínra huacun un mato chashamashotiro man shafacafi inon. Unfin chashamati cuscaraquin. Ua tanashon manrifi futsafo chashamashotiro matohuunshon uari tananonfo, —ishon Jesús ato yoini. Ahuun tsain yoiqui anaititan atomaquinoashu cani. Ascaitocai afanan oinnifoma.

### *Israelifoan Jesús icoínra huanifoma*

<sup>37</sup> Jesús aton ointaifi yoran atiroma cuscan ato oinmafiacun tsoan icoínra huanifoma nan Diospan Facucoinfiacun. <sup>38</sup> Nannori Isaías atohuunoa inonpacoai cuscan yoiyoní isca huaquin,

“Ifon, non min tsain ato yoifiainocai tsoan noco icoínra huama. Yoran atiroma cuscan min ato ismafaciun tsoamun mia icoínra huaiquin,”  
ishon Isaías inonpacoai cuscan cunuyoniquin. <sup>39</sup> Diosin ato yoipaoni cuscan nicacashmanifo. Ascashon icoínra huapainifoma. Ascacufín afanan atohuunoa inonpacoai cuscan cunuyoni isca huaquin.

<sup>40</sup> “Icoínra huayamaifoan Upa Diosin fusho ointsa ato imapacushquin. Diosin tsain iconcoin oinfacashon icoínra huaiyamaifoan Diosin aton shinantimahuatani shinansharanonfoma. Diosin tsain oinfacacaquin oianma shi-nantsacani. Nicafiacanashon shinansharatirofoma tapishcaquin. ‘Muafó aton chaca shatucasmacani uqui funonfo un ato cainmasharanon,’ ishon Diosin yoini.”

Nannori Jesushuunoa Isaías inaca cuscan cunushoni. <sup>41</sup> Jesús fasi sharacoin inon pacoai cuscan Isaías oinquín tau huani. Ascacufín nannori ahuunoa yoiyoní.

<sup>42-43</sup> Nocon caifo Israeli niaifofo atirifoan Jesús icoinra huayamafaino atirifoan icoinra huanifo. Icoinra huafiacani Fariseofoqui musunifo. Fariseofoan yoinifo, —Tsoan Jesús icoinra huaicai nocon ichananti pushu muran afanan iquitromaran, —ishon yoinifo. —¡Ohua! Jesús icoinra huaran non icaiton nocon ichananti pushu muran-shon noco potashcani afanan atofu non ichanannonma, —ishon yoinifo. Ratucinnifo. Ascacuncai non Jesús icoinra huaran inifoma. Upa Dios ato yoishara icai fuchipaitama atohuunoasi fuchipainifo.

*Jesús ahuun tsainhuunshon yorafoti tapimatiro chaca huayamaraquinmain shara huaquin*

<sup>44</sup> Ascatan Jesús oi ashcafchin ato yoiquin isca huani, —Tsoan ua icoinra huaquin nan ua nichiniri man icoinra huatiro. <sup>45</sup> Nanscarifi aquin ua oinfain nan ua nichiniri man oian. <sup>46</sup> Nuno mai ano faquishihuan cuscara. Ascacufin Uhuun Upa Dios icanoashu un nuno mai ano oniquin chashamati cuscara iquiyoi. Ascan un mai ano oni afanan yorafoan chaca huafafaintamarocon ua icoinra huashon Upa Dios tanasharanonfo shafacafi icoinsharashcaquin.

<sup>47</sup> Tsoan uhuun tsain nicafiaquicai un yoia cuscan aimar uncai ato onaintimaima. Un mai ano oni yorafo onaintimatamarocon ato numaiyoi un oni. <sup>48</sup> Ascaficiacai tsoan ua ifo huapaimisima uhuun tsainri nicacasmacaquin nanscarao onaintimaitian Upa Diosin ato yoipacushquin isca huaquin, “Min niyoshon uhuun Facun ahuun tsain min nicacas-mamisi. Min omitsiscapanacafo muran ipanacaquin,” ishon yoishquin. <sup>49</sup> Uhuun Upa Diosin ua yonoa cuscan nannoricoin un mato yoimisiquin. Ufi shinanfaincái un mato yoima uhuun Upa Diosin ua shinamanai cuscan un mato yoimisiquin. <sup>50</sup> Mun tapian Upa Diosin yonoa cuscan icoinra huashu man nipatiro. Ascacufin un mato yoimisi cuscan uhuun Upa Diosin, “Nannori ato yoihoo,” ua huamisi, —ishon Jesús ato yoini.

## 13

*Jesús afu rafumisifo ochonpacuni*

<sup>1</sup> Diosin oinmati nan afu nai muran icaton nocon shunifoan aton facu iyoafofosi finonmani ato rutunonma nan fusitin chaima. Jesús onanni iyoconaino rutuaifo. Mai anoashu Apa ari caanon. Non afu rafumisifo nuno mai ano niyoshon noco noiyopaoni cuscan natian noco isma nocohuun noi finacoinquin.

<sup>2</sup> Jesús futan non afu rafumisifoan fari caino non pini. Non piataima Satanás yoshin chaca Simón futsan ahuun facu Judas Iscariote ahuun nomuran yoini isca huaquin, —Ato tapimahuu ahuuscashomain Jesús achitirofoquin, —ishon ahuun nomuran yononi.

<sup>3</sup> Ascatan Upa Diosin ahuun Furun yoini, —Nantio nai murannoá non mai anoafori min ato yonotiro. Min ato iforan, —ishon Upa Diosin yoini cuscan Jesús tapiyoni. Upa Dios ariashu oni afananri aqui nasoshquin nanri tapiyoni. <sup>4</sup> Ascacufin piquin anaititan Jesús funinaca huan ahuun sahuuti pucatan ahuun turuitinin piracomuni. <sup>5</sup> Ascatan unu tasoqui manushon non afu rafumisifo noco ochonpacushquin. Ochontan ahuun turuiti piracomuaton noco otucuruapani. <sup>6</sup> Ascatan Pedrori apaiyaiton, —¿Ifon, ahuuscain min uhuun Ifoflashon mian ochonpaiyain? —huaiton.

<sup>7</sup> —Un mato acai cuscan natian min tapiama. Ascafia min chipo tapishquin, —huaiton.

<sup>8</sup> —Ma, Ifon. Miancái ochonpacunacama, —huaiton. —Un mia ochonyamainocai min ufu rafutiroma, —huaiton.

<sup>9</sup> —Ascaiton, Ifon tauquisimaquian ua muchofain ua machonhuun, —huaiton.

<sup>10</sup> —Rama yora nashia ahuun tau fusti non ochotiro. Mantsi chostanayamacun. Ahuun caya afanan chostanama. Nantificai man choshtama. Ascafiaflashu atifin-coinmaquian, —ishon Jesús noco yoini. <sup>11</sup> Mantsi tapiamashon ratotomain achi mashquicain. Ascacun nannori noco yoini.

<sup>12</sup> Man noco ochopacutan nasocain ahuun sahuuti sahuuni. Sahuutan afanan tsaoti camaqui tsaoni. Ascashon noco yoini, —¿Man man tapiamun un mato ashohan cuscan?

<sup>13</sup> “Tapimamisiton,” huafain “Uhuun Ifon man ua huaquin.” Iconquiquian. Unmain-quifin. <sup>14</sup> Ascatac unmain maton Ifocain maton tapimamisishofin unmain mato iquin-shofin. Ascashon un mato ochopacua maton oinmati cuscara iishquin. Ascan un mato ochonpacua cuscari mafi ranan oinmati cuscara huua tananshu ochononancahuun.

<sup>15</sup> Un mato oinmana un aca cuscari marifi man anon. Ua cuscara icahuun. <sup>16</sup> Un mato icon yoi. Yonomisitocai ahuun ifo finontiroma. Nanscarifiai futsan futsa nichian ahuun tsain ato tapimashonon. Nan tsain fomisitoncai nichimisi finontiroma. <sup>17</sup> Un aca cuscan man man tapia. Ascan man man tapia cuscan aaquin unimacointiroquin.

<sup>18</sup> Uncai nantifi matohuunoa yoima. Un tapian ahuutimain un catoanquin. Ascafia-cun Diosin tsain yoia cuscacoin non icoinra huatiro.

“Nuno u futan piyai futsan ua chaca huaashquin.”

<sup>19</sup> Icataima un mato yoiyomisi. Ahuutiaran icai cuscan un mato yoiyomisi. Chipo icai cuscan un Cristo Diospan Facu man icoinra huanon. <sup>20</sup> Un mato icon yoi. Nan un nichian uhuun tsain ato yoinon. Nanrifi icoinra huashofin uarifi man icoinra huatiroquin. Ascataci ua icoinra huashofin un nichiali man icoinra huaicai, —ishon Jesús ato yoini.

### *Jesús Judaspan ato achimashquiae cuscan ato yoini*

*Mt 26.20-25; Mr 14.17-21; Lc 22.21-23*

<sup>21-22</sup> Yoiquin anaititan Jesús fasi afiri shinamucoinni. Ascashon fasi shafacafi nichifain noco yoini, —Un mato iconcoin yoi. Ratoran man futsafin ua ato achimashquiquin, —icaiton nicaquin non oiancufainni nofi ranan fuuisinan acufainni. Tapitsi non huaashu. <sup>23</sup> Unquian afu potasinanshu tsaoan. Fasi uhuun noicoian. <sup>24</sup> Ascaiton Pedronun oi nomashta ua yoini. —Tsoanmain achimashquicain yocahuun, —ua huani. <sup>25</sup> Ascaiton aqui tasicain un yocani, —¿Ifon, tsahuunoa min yoimun? —ishon un yocaiton.

<sup>26</sup> Jesús ua cumani, —Nan misi torushtan pocotan un futsa inaintonfin man tapicain nantofin ua ato achimashquiquin, —ishon ua yoini. Ascano nanscacoin huaquin Simón futsan ahuun facu Judas Iscariote inanni. <sup>27</sup> Inantanaino Judashuun yoshin chaca Satanás nuuriscatani. Ascaiton Jesús Judas yoini, —Nan min acai cuscan ariscahuu, —huani.

<sup>28</sup> Non tsashon piairanuncai non tapinima ahuuscamaín huacanicain. <sup>29</sup> Ascaiton atirifoan shinannifo Jesús Judas nichian shafain fusititian non yopai cuscan fi-icaishafain. Atirifoanri shinannifo Jesús ahuuomafo yopai cuscan ato inantahuun huaashafain non ini. Nan Judasfin pui cushumisi iniquin. <sup>30</sup> Nan Jesús misi pocotan Judas inantapaiyaino funinaca huan caicainni. Man yamuaino.

### *Tsain funa shara noco yononi cuscan*

<sup>31-32</sup> Ascatac nomaquinoashu man caano Jesús noco yoini, —Un naitian Upa Diosin mato ismai unmain ahuun Facu sharacun. Un acaiton man oian cuscan Upa Dios fasi shararan huashcani. Samamashta Upanri ato tapimai unmain ahuun Facu sharacufin. Unmain a cuscacoinconfin.

<sup>33</sup> Uhuun facufoan uncai nuno matofu iqui chaima. Man ua funashquin. Un nocon caifo Israelifo yoia cuscan natian un matori yoi un cai aricai man catiroma. <sup>34</sup> Tsain funa futsa un mato yoicain, “Noinancahuun. Nan un matohuun noiai cuscari huafain marifi noinancahuun.” <sup>35</sup> Man noinainno nantifi yorafoan tapitiro man ufu rafuaiton man uhuunshon tapishara, —Jesús noco huani.

*Pedronun,—Un Jesús oinmisimaran,—ishquiai cuscan Jesús yoini  
Mt 26.31-35; Mr 14.27-31; Lc 22.31-34*

<sup>36</sup> Ascaiton Pedronun yocani, —¿Ifon, raqui min caimun? —yocaiton. Yoiquin, —Uncai aricai natian min ufu cayotiroma. Chipo min ua mufaintiro, —huaiton. <sup>37</sup> —¿Ahuuscain natian un mifu catiromamun, Ifon? Natianfin mun itisharaquin mihuunoashu naashquin, —huaiton.

<sup>38</sup> —¿Iconmun min itishara uhuunoashu naashquin? Iconquin un mia yoi. Na yamu tacaranun acataima, “Uncai Jesús oinmisimaran,” ishon min ato yoiquin rafu non fusti huairan, —ishon Jesús yoini.

## 14

*Jesusfin fai cuscaraquin. Nan fustihuunoashu non Upa Dios ari nocotiroquin*

<sup>1</sup> —Maton ointi fucashniyamacahuun. Upa Dios icoinra huafain uarifi icoinra huacahuun. <sup>2</sup> Uhuun Upa icanofin cunu ichaparasiquin. Un mato itishara huashoin caicain. Ascarayamacucain un mato yoicuanama. <sup>3</sup> Cayoshon un mato itishara huashoicaicain. Itishara huatani un afanan matoqui nasoshquin un icano mato ihuiyoi. Ari ufu man ipanon. <sup>4</sup> Man manfin un cai ari fai tapiaquin, —ato huaiton.

<sup>5</sup> Ascaiton Tomás cumani, —Ifon, noncai a min cai ari fai tapiamafinquin. ¿Ahuuscashomun non tapitiroquin? —huaiton.

<sup>6</sup> Ascaiton Jesús cumani, —Unfin na faiquin. Unfin iconmisiquin. Uhuunoashufin yorafo nipatirofoquin. Tsoacai afi uhuun Upa icano nocotirooma. Uhuunoashu fustifin uhuun Upa ari nocotirofoquin. <sup>7</sup> Ua onancoinshofin uhuun Upari man onantiroquin. Natian non chipori man uhuun Upa onancoin cai. Nan ua oinquifin man uhuun Upa oianri man huaicain, —huaiton.

<sup>8</sup> Ascaiton Felipe cumani, —Ifon, noco Upan Dios ismapun. Min noco Upa Dios ismaino non unimacointiro, —huaiton.

<sup>9</sup> Ascaiton Jesús cumani, —Felipen, Un fasi matofu ipaifiamisicun. ¿Ahuuscain mian onanyomisimamun? Nan tsoan ua oinquifin uhuun Upari oinquin. ¿Ahuuscain ua “Upa oinmahuu” mian huaimun? <sup>10</sup> Un uhuun Upa fu imisi. Non fusti cusracoinquin. ¿Nan min icoinra huaimamun? Un mato yoiai cuscacai uhuunoacoin un mato yoima. Uhuun Upahuunoafin un mato yoicain. Nai arishon Upa Diosin mai ano apaiyai cuscafin ua huamaiquin. <sup>11</sup> Un mato yoi uhuun Upa fu rafuaino urifi uhuun Upa fu un rafumisiquin. Ua icoinra huacahuun. Uhuun tsaincoin icoinra huayamaquima. Un acaiton man oian cuscan ua icoinra huacahuun.

<sup>12</sup> Iconquin un mato yoi. Tsoan ua icoinra huashon un acai cuscan arifi huashquin. Uhuun Upa ari un caiyoano. Ascacufin un aca cuscan finonmacaifain ashquicani. <sup>13</sup> Ahuara uhuun anuhuunshon Uhuun Upa man yocaiton un mato asholtiro. Ascaiton yorafoan “Upa Dios shararan,” huanonfo. <sup>14</sup> Ahuara futsa uhuun anuhuunshon man yocaiton un mato asholtiro.

*—Upa Diosin ahuun Yoshin Shara un matoqui nichishquin, —ishon Jesús ato yoini*

<sup>15</sup> Ua noifin un mato yonoai cuscan man aicai <sup>16-17</sup> Un Upa Dios yocain mato futsan nichishonon maton ointi fucash huanonma man isharanon. Maton tapimamisi inon. Amain Diosin Yoshin Sharashofin. Aafin iconmisiquin. Mato fu ipashquin. Icoirra huafoanmacai a onantirofoma. Ascarifi atacai ahuamain huaincái tapitirofoma. Ascan manfin onanmisiquin mato fumain icufin. Ascatari maton nomuran matofu rafui.

<sup>18</sup> Uncai matomaqui iquima. Un mato potacoinma. Un matoqui afanan nasoshquin.

<sup>19</sup> Un nuno iqui chaima. Ua icoinra huafoma ua oinyoshcanima. Ascan manfin ua oinshquicai. Nan un nipaino marifi man nidanaca. <sup>20</sup> Un funiaiton man tapitiro unmain Upa Dios fu ipanacacufin. Ascarifi atan marifi man ufu icaquin. Urifi un matofu icaino. <sup>21</sup> Un mato yonoa cuscan ua nicacoinshonfin ua fasi noicoinquin. Ua

noicoiainton uhuun Upari ahuun noi. Ascaino urifi un ahuun noi. Un shinain cuscan u ato tapimairan,—ishon Jesús noco yoini.

<sup>22</sup> Ascaiton Judas futsan Iscariotemaquian yoini, —¿Ifon, ahuuscain mia icoinra huafoma min shinain cuscan yoitama noco fusti min tapimai? —ishon yocaiton.

<sup>23</sup> Jesús cumani,—Tsoan ua noi un mato yosiain cuscan ua nicacointiro. Uhuun Upa ahuun noiaino urifi un ahuun noi. Non afu rafupacushquin. <sup>24</sup> Ua noiamacai un yosian cuscan ua nicaima. Na tsainfo man nicaicain uhuunacoinma. Uhuun Upa tsain un mato yoi.

<sup>25</sup> Un matomaqui cataima un mato yoiyofafaini. <sup>26</sup> Ascan Upa Diosin ahuun Yoshin Shara uhuunshon matoqui nichi mato futan afain maton ointi fucash huanonma man ishara. Nantifi un mato tapimafain un mato yoiai cuscan un mato shinanmai man ointiaquimanonma.

<sup>27</sup> Un matomaquinoashu caquiaquin un maton ointi mato unimamashquin man isharanom. Icoinra huafaanmacai maton ointi mato unimamatiroma mato imasharanon. Mato anori yoifiaquin ipaitsi mato yoi. Uncai ato cuscarama un mato icon yoi. Ascacun shinanchacayamafain ratuyamacahuun.

<sup>28</sup> Un mato yoia cuscan man man nica, “Un matomaquinoashu caicain. Ascafashu un afanan matoqui ooshquin.” Ua noicoianshu man uqui unimatiro umain Upa ari caiton. Upa main ua fasi finoncoincufin. <sup>29</sup> Nan un mato rama yoia cuscacoin aiton man icoinra huatiro. Ascacun un mato yoiyomisi. <sup>30</sup> Yoshin chacafoan aton niaifo Satanás uqui oi. Ofiashocai ua iquintiroma. Ascacun un matomaquinoashu cai. Afanan un mato yoiquin chai huaima. <sup>31</sup> Un Upa Diosin fasi noicoin ascacun nan ua yoia cuscan un acoinmisi. Ascaiton nantififain tapicani un fasi ahuun noiaiton. Funicahuun. Nunoashu non canon,—ishon Jesús noco yoini.

## 15

### *Jesús nan fimi ahuun anu uva ahuun caya cuscaracoin*

<sup>1</sup>—Unfin fana uva ahuun caya cuscaracoinquin. Uhuun Upafin uva fana ahuun Ifo cuscaracoinquin. <sup>2</sup> Manfin uva ahuun poyan futsan cuscaraoquin. Rato poya futsanmain fimiomafoquin Uhuun Upa nanfo poshtushon potashquin. Ascafia poyan futsa fimiapro aton tushpa futsafo chacamishti poshtutiro poyan sharafo mutininon fimi sharashquin. <sup>3</sup> Nanscarifi aquin manfin uhuun tsain nicaquin maton chaca potaquin isharashcaquin. <sup>4</sup> Umaquin pashcayamacahuun. Nan un matofu ica cuscariai. Poyan fustisicai fimitiroma ahuun cayamaisi. Nanscarifiai umaqui icashucat un mato imapaiyai cuscan man atiroma.

<sup>5</sup> Unfin nan fana ahuun caya cuscaraoquin. Ascan manfin ahuun poyanfo cuscaraoquin. Tsoa ufu rafucoincacainaino urifi un afu rafucoiaiua cuscaracoinri itiro. Ua maisicai marusu man ahuuscatiroma. <sup>6</sup> Ahuun poyan futsa chaca fimioma poshtushon potashquin tsasinon. Tsasicun poyafo icha huatiro coashquin. Nanscarifiai tsoa ufu rafutama umaquin icun nanscarao chipo icha huashon chi urumanhuan muran ato potashquin. <sup>7</sup> Man ufu rafucoinshon uhuun tsain maton nomuran shinanfafainquin man ahuarashta cufia cuscan Upa Diosin mato asholtiro. <sup>8</sup> Un mato imapaiyai cuscan man afafainnifin man ufu rafumisi itiroquin. Man ascaitonfin mato ointirofoquin Upa Diosimain sharacoincunfin.

<sup>9-10</sup> Uhuun Upa Diosin ua noicoian cuscan nanscarifi huaquin un matohuun noi. Nan shinanfafaicahuun. Unuyamacahuun. Uhuun Upa Diosin ua yonoa cuscan un amisi. Ascan ua noia cuscan un shinanfafaini. Nanscarifiai un mato yonoa cuscan man aiquin un mato noiaiton man shinanfafaitiro. <sup>11</sup> Un mato yoia cuscan man aino un matoqui unimatiro. Marifi fasi man unimacointiro. <sup>12</sup> Isca huaquin un mato yonoi, “Un matohuun noiai cuscan noinancahuun.” <sup>13</sup> Tsoan afu rafua futsan noicoinfin

ahuunoashu natiroquin. A noiai cuscacai tsoan finontiroma. <sup>14</sup> Un mato yonoai cuscan man aifin ufu rafumisi man itiroquin.

<sup>15</sup> Nan ufu rafuafosi un shinain cuscan un ato tapimatiro. Manfin ufu rafumisiquin. Ascan nantifi uhuun Upan ua yoimisi cuscan un matori tapimana. Ascacucai man afanan uhuun oinmatiforun un mato huaima. Man ufu rafumisiran un mato huashquicain. <sup>16</sup> Man ua catonyamafiaiton ufi un mato catoan ua cuscara man inon matohunshon futsafoanri ua icoinra huanonfo. Nanfoan ua tanapacunacafo ufu ipashcaquin. Asca huaino man ahuarashta Upa Dios uhuun anuhuunshon yocaiton mato ashotoiro. <sup>17</sup> Afanan un mato yononon. Noinancahuun.

### *Icoinra huamafoan Jesús fu rafumisifo noicasmacani*

<sup>18</sup> Icoinra huamafoan mato noicasmaifoan shinancahuun. Uacaifin noicasmaquin tau huanifoquin. <sup>19</sup> Marifi man ua icoinra huayamaiton matori noicuanafo. Afi ranan noinanfo cuscan matori noicuanafo. Ascafiai man ato cuscarama. Un mato catonni icoinra huama cusrarao man inonma. Ascacun icoinra huamafoan mato noicasmacani.

<sup>20</sup> Un mato yoia cuscan shinancahuun. Un mato yoia isca huaquin, “Yonomositocai ahuun ifo finonmatiroma.” Ua omitsiscamacauquin matori omitsisca huashquicani. Un ato yosian cuscan acashon marifi man ato yosaiton matori nicacoincani. <sup>21</sup> Man ua tanaiton ua amisifo cuscan matorifi huashcani. Upa Diosin ua nichifianicai tsoan onancoinmisima. Ascan matori asca huashcani. <sup>22</sup> Un atoqui oyamani Diosin tsain un ato yoiyamaino tapicuanafoma. Ascan chaca huafiaquicai tapicuanafoma. Tapiyamaifoanoncrai atohuun nuama. Ascafiaiun oni un ato Diosin tsain yoishquin. Ascacucai natian tsoan yoitiroma isca huaquin, “Uncai nicataima. Ascacun un chaca huama,” ishoncai anori icon yoitirofoma. Man nicafiamisishaquin aton chaca shatuafoma. Ascan aton chaca atohuun nau.

<sup>23</sup> Tsoan ua noicasmai uhuun Upari noicasmai. <sup>24</sup> Diosihuunshon tsoa futsan atiroma cuscan un ato ismamisi. Ascafiai aton chaca shatuafoma. Un ato ismayyamaino aton chaca atohuun nuucuanama. Tsoa futsan atiroma cuscan un ato ismafafaini. Man oinfia cashon ua noicasmafain uhuun Upari noicasmafo. <sup>25</sup> Diosin tsain cununi cuscan mun acoinna. Diosin tsain uhuunoa cununi isca huaquin,

“Un ahua chaca huayamafiacun ua noicasmacaniran,”  
ishon uhuunoa cununi.

<sup>26</sup> Matori noicasmafiaifoan uhuun Upa Diosin arishon ahuun Yoshin Shara matoqui nichishquin. Nanton maton ointi unimamatiro isharashcaquin. Afin icommisiquin. Uhuunoa mato yoishquin. <sup>27</sup> Un aton Diosin tsain yoiqui tau huanitian marifi man ufu imisiquin. Ascashonfin marifi uhuunoa nantishon tapiquin man ato yoitiroquin, —ishon Jesús yoini.

## 16

<sup>1</sup> Ascano Jesús noco yoini isca huaquin, —Man omitsiscataima un mato yoiyoa man nunori shinanonma. “¿Ahuuscaimun Jesús uhuun Numamisifiano un omitsiscái?” ishon man anori shinankin man ua potapaishquin afanancai man ua icoinra huashquima. <sup>2</sup> Tapicahuun. Maton caifo nan ua icoinra huamafoan chipo yonoi man nocon ichananti pushu muran afanan iquinonma. Un mato icon yoinon. Chipo amaquiri shinancani isca huaquin, “Diosin apaiyai cuscan non huashonon. Non Jesús icoinra huafu rutunon,” ishon anori shinancani. <sup>3</sup> Uhuun Upa onanyamafain uarifi onancoianfoma. Ascacun mato asca huashcani.

<sup>4</sup> Man ua tanaquin tau huanitiancai man chipo omitsiscashquiran un mato huanima. Un matofu iyofiaflashocai un mato yoiyonima. Natian un matomaqui caiyoicai. Ascan man omitsiscaitian un mato yoiyomisi cuscan huaquin man shinantaniran, —ishon Jesús noco yoini.

*Diosin Yoshin Sharapan acai cuscan*

<sup>5</sup> Afanan Jesús noco yoini isca huaquin, —Uhuun Upan ua nichini. Natian un afanan aqui caicain. Ascafia man ratoran futsan ua yocama, “¿Min raqui caimun?” man huama. <sup>6</sup> Un mato yoia cuscan maton ointi muran man fasi nocoi. <sup>7</sup> Un mato icon yoinon. Un mato shara huahuunshon matomaqui caiyoicai. Un cayamainocai Diospan Yoshin Shara matoqui otiroma mato cushusharafain mato ashoshquin. Ascafia matomaquinoashu caquin uhuun Yoshin Shara un matoqui nichifainicai. <sup>8</sup> Afi oshon a icoindra huamafoan chaca huamisifo ato tapimai oshquin Diosin amapaiyai cuscan huafain tapimai oshquin. Diosin icoindra huafoma ato onaintimai cuscan ato tapimai oshquin. <sup>9</sup> Ua icoindra huatama chaca huafoma cuscan ato tapimai oshquin.

<sup>10</sup> Unfin uhuun Upan ua amapaiyai cuscan un huamisiquin. Ascan uhuun Upa icano un caicain ua afanan man oinonfoma. Nanri Diospan Yoshin Sharapan ato tapimai oshquin. <sup>11</sup> Nantianri icoindra huafoma aton niaifo Satanás Diosin man onaintima afanan ahua yoinonma. Nanri Diosin Yoshin Sharapan ato tapimai oshquin.

<sup>12</sup> Un mato fasi paratama tapimapaiointocai man natian tapitiroma. <sup>13</sup> Ascafian Diospan Yoshin Shara matoqui oshon mato ahuarashta Diosin tsainhuunoa mato tapimashquin. Aafin iconmisicoinquin. Ahuunshon mato yoitama uhuun Upa yoia cuscan nannorico mato tapimai. Inonpacoai cuscari mato tapimai. <sup>14</sup> Un yoiai cuscan Diospan Yoshin Shara mato tapimai uhuunshon man uhuunoa shinansharanon. <sup>15</sup> Nan uhuun Upaforifi uhuunariquin. Un mato yoimisi cuscan uhuun Upa Diosin ahun Yoshin Sharapan mato tapimashquin.

<sup>16</sup> Ascan uncain matofu iyoima. Uacai man oinyoshquima. Ascafia ahuitishomatan man afanan ua oinshquiran,—ishon Jesús noco yoini.

*Jesús fu rafumisifo aton ointi nocoyofiacanashu chipo unimacoinnifo*

<sup>17-18</sup> Nicacatan atirifi non yoinanni,—Ahuuscain noco isca huaimun, “Uhuun Upa ari un cai. Ascan uncai matofu iyoima. Uacai man oinyoshquima. Ascafia ahuitishotama man afanan ua oinshquiran,” ishon noco yoi. Noco yoiai cuscacai non tapiamaran,—icashu non yoinanni.

<sup>19</sup> Nanfohuunoa non yocapaiyainton Jesús onanni. Ascanshon noco yoini, —¿Un mato yoiai cuscan man tapiashma man yocanonaincain? <sup>20</sup> Un mato shafacafi yoinon. Un omitsiscaino ua icoindra huamafo fasi unimashcani. Manca ascashquima man ua manoshquin uaiquin. Uaifiashu chipo fasi man unimashquin.

<sup>21</sup> Ainfon facu cainti chaima tau isin huaino isinyotiro. Chipo ahun facu cainshon afanan ahun isin shinantiroma. Unimacointiro ahun facu cainsharashu. <sup>22</sup> Nanscarifiai un matomaquinoashu caitian maton ointi muran man omitsiscalyofiashu un afanan matoqui oano ua oin man fasi unimashquin. Man unimaitocai tsoan mato umaqui imatiroma man unimanonma. <sup>23</sup> Un funiaitian un afanan matofu iyamano man afanan ahuara ua yocaima. Un mato icon yoinon. Uhuun anuhuunshon man Upa Diosin yocatiro. Ahuarashta uhuun anuhuunshon man Upa yocaiton mato inanshquin. <sup>24</sup> Uhuun anuhuunshoncái man Upa yocayomisima. Ascan uhuun anuhuunshon Upa yocacahuun. Man yocaiton Upa mato inanshquin. Mato inainno man fasi unimashquin.

*Jesucristo fustitofin nantifi chacafo finoncoian*

<sup>25</sup> Un mato yoiaifo tapifiashocai atirifi man tapiataima. Un mato shafacafi yoicoiantaima. Ascafia un chipo mato yoicoin Upa Diosihuunoa shafacafi man tapinon.

<sup>26-27</sup> Man ua noi. Un Diosin ariashu matoqui oni man ua icoindra huamisi. Ascan Upa Diosin matori noicoin. Ascacufin un matomaquinoashu caitian un matohuunshon Upa yocainmacai mafincoin uhuun anuhuunshon Upa yocashquincahuun. <sup>28</sup> Un Upa

ariashu oni nocofunucoin mai anoashu cainshquin. Natian un mai anoashu afanan Upa ari caicain,—ishon Jesús noco yoini.

<sup>29</sup> Yoaiton non afu rafumisifoan non cumaniquin,—¡Aicho! Natian min noco afanan fomainma. Natian min noco fasi shafacafi puashoan. <sup>30</sup> Natian man non tapia min nantifi tapicoian. Mia yocataima min rufofo onanyoi mia yocapaiyai cuscan. Ascacun min Dios ariashu onicun non mia icoinra huai,—ishon non yoaiton. <sup>31</sup>—Inoncai man ua icoinra huai. <sup>32</sup> Ascafia chipo umaquinoashu man pashcafainicai. Maton pushu ano man cai. Icon natian man ua potafainicai. Tsoacai ufu nituima. Man ascafainocai urusu un nituima. Man umaqui cuyofofiaino uhuun Upa fu un patanain. <sup>33</sup> Un mato yoiro uhuunshon maton ointi man unimamafain man isharanon. Nuno icoinra huafoma murannoashu omitsiscafiacaquin shinanchacayamacahuun. Un Satanás yafi icoinra huafomati finoncoianquin. Ascan un mato cushuicai,—ishon Jesús noco yoini.

## 17

### *Jesús ahuunoa Apa Diosi cufini*

<sup>1</sup> Asca huatan Jesús nai foisinifoantan yoini,

“Upan, natian un nanon ato tapimahuun un min Facu sharacoinquin. Min uqui unimai ato tapimahuun. Min anori ato tapimanaino urifi un ato tapimatiro min fasi sharacoincun. <sup>2</sup> Mian yonoa un atoti yonopacunon. Mian inanti un ato nimapacunon. <sup>3</sup> Mirus fusti min Diosincoin. Unfin Jesucristoquin nan mian nichini. Tsoan noco onancoianfin nipanacafoquin. <sup>4</sup> Min ahuu cuscara sharamainquin nuno mai ano niyoshon un ato puashoan. Nan mian yonoa cuscan mun aca. <sup>5</sup> Ascan Upan, un mifu iyopaoni cuscan afanan ua imahuu. Non mai oni huataima u mifu niaifo shara iyopaoni. Afanan nanscara mia ya ua imahuu un min Facu shara nantififain ua tapinonfo.”

### *Jesús a fu rafumisifo cufishoni*

<sup>6</sup> “Nuno mai anoa ufu rafumisifo mian inanni un ato ismanon min ahuu cuscara sharamainquin. Na ufu rafumisifo minafofiacun mian ato inanni. Min tsain mia nicacacoianfo. <sup>7</sup> Mian yoia cuscan nantifi un ato yoimisi. Nanfo tapicoianfo. <sup>8</sup> Mian yoia cuscan un ato yoaiton ua icoinra huacoinnafo. Un miariashu fotoniri tapicoianfo. Mian nichinicun icoinra huacoinnafo. <sup>9</sup> Un mia ato cufishofafaini. Uncai a icoinra huafoma ato cufishonima. Nan mian inannifosihuunshon un mia cufifafaini. Un mia ato cufishofafaini nanfomain minafocufin. <sup>10</sup> Nan uhuunaforifi minaquin. Ascan nan minaforifi uhuunaquin. Ua icoinra huafohuunshon onantirofo unmain ahuu cuscara sharaquin. <sup>11</sup> Uncai afanan na mai ano iyoima. Unfin miqui caicain. Afofin na mai ano nitucaniquin. Upan, min fasi sharaquin ato cushusharahuu. Min curushhuunshon ato cushusharahuu. Mian inanfoti ato cushusharahuu. Nonfin nan fusti cuscara coinquin. Nanfori no fu nan fusti cuscara ifi ato imahuu. <sup>12</sup> Un atofu iyoshon un ato cushushara. Minhuunshon un ato cushushara. Un tsoanshta funoama. Nan Satanás ahuun facu fusti funoa. Min tsain yoiyoni cuscan nan fusti funoa.”

<sup>13</sup> “Natian un mi ari caicain. Un cataima un yoiyoi nan un icai cuscari unimacoinnonfo. <sup>14</sup> Mian yoia cuscan un ato tapimamisi. A icoinra huafomanma ato noicasmaifo. Ato cuscara focutsi ascacun ato noicasmafo. Ascarifi atan unricai ato cuscarama. Ascan uarifi noicasmafo. <sup>15</sup> Uncai mia yocama mai anoshon min icari min ato ihuion. Ascatamarocon un mia yocain nuno mai anoshon min ato cushushara nan yoshin chaca Satanás ato ahuisca huanonma. <sup>16</sup> Nanfoancrai icoinra huafoma aton yorama. Unrificai un aton yorama. <sup>17</sup> Min tsain iconcoin. Min tsainman ato shara huamahuu mia

cuscara shara inonfo. <sup>18</sup> Mian yorafoqui nichini cuscan nanscarifi aquin un ato yorafoqui nichicain. <sup>19</sup> Mian yoia cuscan mun atohuunshon aca afoanri ascarifi huanonfo.”

### *Jesús nantifin a icoingra huafu cufishoni*

<sup>20-21</sup> “Uncai ato fustihuunshon cufifafainima. Nantifi aton tsainhuunshon ua icoingra huanonfo un ato cufishofafaini nan non shinain cuscarafosi arifi shinanonfo. Min ufu icacainai cuscan aforifi no fu ifafaincami mian nichini icoingra huamafoan icoingra huanonfo. <sup>22</sup> Min ufu imisi cuscan urifi un atofu imisi. Ascan non shinain cuscarafosi arifi shinannonfo. <sup>23</sup> Min ufu icacainai cuscan urifi atofu icacaini. Ascan min ipaiyai cuscan nanscarafosi non shinantiro. Min ointi cuscarafosi non itiro. Nan oincaquin icoingra huamafoan tapitirofo mian nichinicun mian noia cascarifi ua icoingra huafohuunri min fasi noicoin.”

<sup>24</sup> “Upan, nan mian inanfo un mifu icano un atorifi iquinpai un mifu ishara cuscan oinonfo. Non nan mai oni huataima min ua noicoinyopaoni. Ascan min yononi cuscan un mifu imisi nantifi min iquinon.”

<sup>25</sup> “Upan, min shara fustisi imisi. Icoinra huamafoancai mia onanfoma. Ascan un mia onancoin. Min ua nichini ufu rafumisifoan tapiafo. <sup>26</sup> Min ahuu cuscaramainquin un ato ismamisi. Nansiasi aqui un ato ismafafaini min ua fasi noimisi cuscan afoanrifi munonfo un atofu icacainaiton,” ishon Jesús Apa cufini.

## 18

### *Jesús achinifo*

*Mt 26.47-56; Mr 14.43-50; Lc 22.47-53*

<sup>1</sup> Ascatain Apa cufinquin anaitiano non afu rafumisifo shushan Cedrón yamu pocufainiquin. Nanno fanafoan ahuun anu olivo. Nan fanafo muran non iquitoshini.

<sup>2</sup> Nannorimain Jesús noco iyomisicunfin. Ascano Judas nanton Jesús ato achimaniton tapini raquimain non foquin. <sup>3</sup> Nannori Judaspan ranushumuafu non nocon yorafohuunshon Dios cufimisi niaifofoan futsafo afu nichini non Fariseofo iyoni Jesús achimaicaquin. Chiifo ya nopu non coshatifo non ashifo yari funifo.

<sup>4</sup> Ascaiton Jesús onanni ahuuscamain huacanicain. Onanshon ato yocani, —¿Man tsoa funaimun? —ishon yocaiton. <sup>5</sup> —Jesús Nazaret anoa non funairan, —huaifoan. —Unfinquin, —ato huaiton. Nan ato achimaicai Judas nanno atofu ini. <sup>6</sup> —Unfinquin —Jesús ato huatanaino chitucuri ifainpai cani pacui fustunifo. <sup>7</sup> Ascashon Jesús afanan ato yoca futsani, —¿Tsoan man funaimun? —huaiton. —Jesús Nazaret anoa non funairan, —huaifoan. <sup>8</sup> —Munfin mato yoiaquin. Unfinquin. Ua funacaquin na ufu icafo ato nichicahuun, —ato huani. <sup>9</sup> Inonpacoai cuscan Jesushuunoa cunuyoni isca huaquin, —Uncai mian inan un fustishta funoamaran, —ishon cununi. Nan cununi cuscan Jesús rama Apa Dios cufini.

<sup>10</sup> Ascaino Pedronun ahuun nopu chinushumua ahuun ona murannoia tsucainifoantán nocon yorafohuunshon Dios cufimisi niaifocoinin ahuun oinmati pashtufain rurani. Nan oinmati ahuun anu Malco ini. <sup>11</sup> Ascaiton, —Min nopu ahuun ona muran huahuu. Upa Diosin ua amapaiyai cuscan un aicai, —Jesús Pedro huani.

### *Jesús Anás ano iyonifo*

*Mt 26.57-58; Mr 14.53-54; Lc 22.54*

<sup>12-13</sup> Ranushumuafu aton niaifofoya nocon caifo Israelifo niaifofoyashon osicashon Jesús munushnifo. Munushushon Anaspan pushu ano iyonifo. Nan Anás Caifás ahuun raisi anifo ini. Caifás nantian nocon yorafohuunshon Dios cufimisi niaifocoin ini.

<sup>14</sup> Nanton nocon caifo Israelifo yoini,—Nocofunu fusti nantifi yorafihuunoashu naafin shara itiroquin,—huani.

—*Unci Jesús oinmisimaran, —ishon Pedronun yoini*  
*Mt 26.69-70; Mr 14.66-68; Lc 22.55-57*

<sup>15</sup> Jesús iyoafono Pedro yafi afu rafumisifo futsanri acachori fonifo. Pushu ano unmanti nocotan afu iquifainnifo. A fu rafua futsa niaifoan onanshon iquimani Jesús iquicainaino. <sup>16</sup> Pedron shoi caicainti ano nituni. Ascano nan niaifoan oinmisishaqui nasocura shomayaton caincaiti cushua yoini,—Pedrori iquimahuu,—huani.

<sup>17</sup> —¿Mirifi min Jesús fu rafuamun? —ishon shomayaton Pedro yocaiton. —Ma. Unci afu rafumisimafinquin,—huani. <sup>18</sup> Matsinacoincani nantifi chiin yoonifo. Niaifofo yafi oinmatifori yoonifo. Pedrorifi ato fu yooni.

*Nocon caifoan aton niaifoan Jesús yocani*  
*Mt 26.59-66; Mr 14.55-64; Lc 22.66-71*

<sup>19</sup> Ascatan nocon yorafihuunshon Dios cufimisi niaifocoinin Jesús yocani. —Mi fu rafumisifohuunoa ua tapimahuu. ¿Ahua min ato yosiamun? —huaiton. <sup>20</sup> —Uncai onuyoiama. Nantiffain ua nicanonfo un yoimisi. Un nocon ichananti pushu murannoaofo yafi nocon Dios fu tsainti pushu murannoari un nocon caifo yosimisi. Uncai uhuun tsain fustishta un fomanmisima. <sup>21</sup> Ahuuscain mian yocain. Ua nicamisifo yocahuun. Un yoimisi cuscan nanfoan tapicoianfoquin,—Jesús huaiton.

<sup>22</sup> Ascaiton ranushumua afu niaton tapastan. —¿Ahuuscain nocon niaifo min anori aquimun? —huaiton. <sup>23</sup> —Ahua un amaqiri yoiamainquin ua yoihuu. Ascan uhuun tsain iconfiacun ahuuscain mian tapasain,—huani. <sup>24</sup> Anori icaiton nicaquin Anás ahuun raisi Caifás ano Jesús nichini. Caifás nocon niaifocoin ini. Ahuun munushumua ya nichini.

*Ascano Pedron afanan yoaini, —Unci Jesús oinmisimafinquin —ishon yoini*  
*Mt 26.71-75; Mr 14.69-72; Lc 22.58-62*

<sup>25</sup> Ascaino afianoashu Pedro atofu yooriani. Ascaiton afanan Pedro yocanifo, —Mirififin min afu rafumisi futsaquin,—ishon yocaiton. —Unmafinquin. Uncai afu rafuamaquin,—huaiton.

<sup>26</sup> —¿Un mia oianmamun? Nan miafin un oianquin. Fanafo mapoa muranno Jesús yafi un mia oian. Min racafinquin,—nan nocon yorafihuunshon Dios cufimisi niaifocoinin ahuun oinmati pashtuaton ahuun yoran Pedro huaiton. <sup>27</sup> —Ma. Unmafinquin,—Pedron huaino tacara cuoinacahuani.

*Ascano niaifon Pilaton ano Jesús iyonifo*  
*Mt 27.1-2, 11-14; Mr 15.1-5; Lc 23.1-5*

<sup>28</sup> Ascano funamanrishta Caifás ahuun pushu anoshon Pilato niaifo ano Jesús iyonifo. Nanfin Romanon iniquin. Ascafashcái Pilato ahuun pushu muran iquinifoma aatsi Israelicun. Shinanpaonifo, —Non a muran iquiashu non chaca itiroran,—icashu ascashu iquicasmanifo. Afocai Israelifomaran icashu. Diosin oinmati nan afu imisiton nocon shuninfoan facu iyoafifo ato finonmani nan fusitin icaitian shinantacani. Nan-scacun Pilato ahuun pushu muran iquicasmanifo. A muran iquiashu non chacacoin itiroran fusi muaimuran non iquitrioma. —A muran iquishocai nocon caifo futan non chashoanun facu pitromaran,—ishon shinannifo. <sup>29</sup> Ascaino chifi cainacahuán Pilato ato yocani,—¿Ahua chaca huacunmun na nocofunu uano man ihuuaquin? —ishon ato yocaiton. <sup>30</sup> —Ahua chaca huayamacuai non miqui ihuucuanamaran,—ishon huaifoan.

<sup>31</sup> —Mafi iyotacahuun. Maton shuninfoan yononi cuscemain chaca Israelifoan huaquin. Nanfin maton fuyamisiquin. Ahuamain chaca huaquin mafi ahuuscara huacahuun,—huaiton.

—Maton yorafoan yononifo cuscacai non tsoa mastatiroma naanon —icashon yoinifo. <sup>32</sup> Jesú yoyoni cuscan nanscacoan huaquin. Mastashquicani naanon.

<sup>33</sup> Ascano Pilaton ahuun pushu muran Jesú iyoni yocanon. —¿Minmun Israelifoan aton niaifon? —huaiton. <sup>34</sup> —Mifimun min anori shinaincái. Futsanfoanraca mia uhuunoa yoiafo, —huaiton.

<sup>35</sup> —¿Min shinamun urifi un Israeli? Min yorafo futan maton yorafohuunshon Dios cufimisi niaifofoan mia uqui ihuuafó. ¿Min ahua chaca huacunmun mia uqui ihuuafóquin? Ua yoihúu, —huaiton. <sup>36</sup> —Uhuun yorafocai na mai anoafoma. Un nuno mai anoa niaifocun ua numacuanafó Israelifo ua achinonfoma. Uhuun yorafo futsa ari icafo —huaiton.

<sup>37</sup> Ascaiton Pilato cumani, —¿Iconmun min niaifo? —ishon yocaiton. —Mian yocain cuscafin unquin. Niaifo icain iconcoin yoipacushaquin un cainni. Tsoan iconcoin nicapaiquin ua nicamisifo, —Jesú huaiton.

<sup>38</sup> —¿Ahuamun iconquin? —Pilato cumani.

### *Niaifoan ato yononi Jesú rutunonfo*

*Mt 27.15-31; Mr 15.6-20; Lc 23.13-25*

Asca huatan chifi cainacahuani Israelifo yoishquin, —Un na nocofunu yocafiacai un ahuunoa ahua chaca nicama. <sup>39</sup> Natian maton fuyamisi nocano man imisi cuscan maton caifo cunu murannoia iquiafo fusti cainmafafainmisi. Maton shunifoan aton facu iyoafifo finonmani shinantaquin nantianri fusti mato cainmafafainni. ¿Ascan Israelifoan, maton niaifo Jesú un mato cainmashotiron? Casharanon, —Pilaton ato huaiton.

<sup>40</sup> Oi ashcafinin cumanifo, —Ma. A caimatama Barrabás caimahuun, —huanifo. Nan Barrabás nocon caifo shinanchacamanaino mucai futsucashon futsa rutunifo.

## 19

<sup>1</sup> Ascashon Pilaton ato yononifo Jesú fichiqui cuno tuchiaton coshanonfo.

<sup>2</sup> Ascano ranushumuafoan mosha chainipafo maiti huacashon maimanifo. Aqui cashupaiqui sahuuti nanhuainqui pocoa ointsa sahúumanifo. <sup>3</sup> Ascashon aqui cashucaquin. —¡Aicho! Minfin Israelifoan aton niaifoquin. Min chai niyopacupainon, —huatan fupasiriani.

<sup>4-5</sup> Ascano Pilato Jesú chifi cainquifainni oinonfo. Jesú sahuuti nanhuainqui pocoa ointsa sahúumatán mosha chainipafo maiti huashotan sahúumanifo. Ascashon Pilato, —Oicapon na nocofunu. Ucai ahuunoa ahuashta nicayomisima un chaca huapanan, —huaiton.

<sup>6</sup> Ascafaiton nocon yorafohuunshon Dios cufimisi non niaifo futsafoanri oinquin Jesusqui tsain chipunifo. Ascashon oi ashcafinin —¡Mastahuun! —huanifo. —Ascaiton mafi iyoshon mastatacahuun. Uncai ahuunoa ahuashta nicayomisimafinquin un chaca huapanan, —Pilaton ato huani. <sup>7</sup> Ascaiton nocon caifoan cumanifo, —Ma. “Unfin Diospan Facuquin,” Jesú noco huamisi. Ascacun nocon niaifofoan yonon, “Tsoa anori icafin naiquin. Nayamacaiyaima,” —huaifoan.

<sup>8</sup> Ascaifoan níca Pilaton fasi ratui finacoinni. <sup>9</sup> Ascashon Jesú ahuun pushu muran afanan iyoni. Iyoshon yocani, —¿Raniamun minquin? —ishon yocani. Yocafia inocai Jesú pusinima. <sup>10</sup> —¿Mian cumaimamun? ¿Min tapiamamun un mia caimaiyamaraquin un mia mastamatiro? —huaiton.

<sup>11</sup> —Diosin mia yonoyamainocai mian ahuusca huacuanama. Ascacun nan mian chaca huanon mi ano ihuuafó nanfoancafin ua chaca huaquin finacaniquin, —huani.

<sup>12</sup> Ascaiton nicaquin Pilatonun Jesú caimapairiani. Ascafaino nocon caifo Israelifoan tsain isininpator yoinifo, —Tsoa, “Unfin niaifoquin,” icafin Romanonfoan niaifocoin Cesari chaca huaquin. Ascan min na nocofunu Jesú caimanacai nocon niaifocoin Cesari min ahuun yorahuancuinma, —icashon oi ashcafinin yoirianifo.

**13-14** Nicatan afanan Pilatonun Jesús chifi cainmani. Nantianri nocon caifo Israelifo fusiti iyocoshquin icaino. Nan Diosin oinmati nan afu imisiton aton shunifoan facu iyoafofo finonmani shinantanfafainpaonnifo. Fari masafinin racano Pilatonun Jesús iyoní anoshon aton shara aroshofafainmisi. Ano tsaoshon yocanshquin chaca huaya-maraquin shara huacun. Nannoshon ato yonotiro onaintimaiyamaraquin nichimisi. Nanno anuni —Toquiri saparan, —huapaonifo. Nocon caifo Israelifoan ahuun tsain-man, “Gabataran,” huanifo. Pilaton tsaoshon aton ointaifi Jesús cainmani. Cain-mashon, —jOincapon! Naafin maton niaifoquin, —Pilaton ato huaiton.

**15** Ascafaiton, —Iyoshon mastatahuun nanon. Ihui coyan iquinanquin mastahuun, —oi ashcafinin huaifoan. —¿Iconmun unmun maton niaifo mastaicai? ¿Manmun mastanpaicai? —Pilaton ato huaiton. —Cesari fustifin nocon niaifoquin. Nocon niaifo futsa yamai, —ishon nocon yorafihuunshon Dios cufimisi niaifofoan yoinifo.

**16** Asca huatan inoncái Pilaton atoqui Jesús caimani. Ranushumuafaon iyocashon ihui coyan iquinanquin mastai focaquin iyonifo.

*Jesús ihui coyan iquinanquin mastanifo*

*Mt 27.32-44; Mr 15.21-32; Lc 23.26-43*

**17** Ascano iyoaifoanno afincoin ihui coyan iquinan iyashon foni. Anoshon mastaiifoanno noconi. Nanno ahuun anu mapo shaoran huanifo. Israelifoan tsainmanfin Gólgotaran huapaonifoquin. **18** Jesús yomutso rafu yafi mastanifo. Yomutso rafutan naquihuano Jesús mastanifo. **19** Ascan mastacashon Pilaton yonocun Jesús ahuun mapo manaonrishta aqui cununifo.

**JESÚS NAZARET ANOA ISRAELIFOAN ATON NIAIFOCOINRAN**

ishon Pilato ato cunumani. **20** Jerusalén anoashu mani futsafo ya osiafo ichapacoin inifo. Jesús nanno chaimashtashon mastanifo. Ascanofin Pilatonun aton tsain futsa futsatapafo ato cunumani isca huaquin, —Jesús Israelifoan aton niaiforan —ishon tapinonfo. Nocon tsain cunufain Griegofoan aton tsainri cunufain Romanonfoan aton tsainri cununi. **21** Nan oincatan nocon yorafihuunshon Dios cufimisi niaifofo Pilato ano fonifo. Yoifocani, —“Jesús nocon niaifocoinran,” huacaquima “Unfin Israelifoan un mato niaiforan, Jesús icaran,” ishon cunuhuu, —huaifoan. **22** —Un cunumana cuscan nannorico un cunua. Uncái ahua futsan afanan tuqui huaimaran, —ishon Pilaton ato cumani.

**23** Ranushumuafaon Jesús mastaifono ahuun sahuuti fianpacunifo. Pashcananpacushon mani rafu non rafuri machinifo. Ascano ahuun sahuuti chainipa ashcapari chichia tushu huayonifo. **24** —Fashnuyamacahuun. Nanscara muma shara non finon. Non aya cashutihuun aqui numero nuupacua potashon futsa shuhuianton ahuun sahuuti ashcapari chichia fitiroran, —icashu yoinannifo. Nannori Diosin tsain Jesushuunoa inonpacoai cuscan aqui cunuyoni isca huani,

“Uhuun sahuutifo aya cashutihuun aqui numero nuupacua potashon futsa shuhuianton uhuun sahuuti finonran,”

ishon inon pacoai cununi. Ascano ranushumuafaon nanscacoin huaquin.

**25** Jesús mastafo chaimashta ahua non ahuun achin nan Cleofaspan ahuin non María Magdalena non afo nanno chaimashta ninifo. **26** Un non Jesús ahuari chaimashta non nia ini. Jesús nocó oinquin yoini, —Uhuashtan, natian Juan min facu iquiran, —ishon yoini. Ua noiquivin anori huaniquin.

**27** Asca huatan —Naafin min uhuaquin, —ishon ua yoiaiton nicaquin uhuun pushu ano un iyoni cushusharashquin.

*Jesús nani cuscan*

*Mt 27.45-56; Mr 15.33-41; Lc 23.44-49*

<sup>28</sup> Jesushuunoa Diosin tsain cunuyonifo cuscacoin acoincun onanshon Jesús yoini,—Un nomicoinran,—ato huani. <sup>29</sup> Ascano fimiunu focash muran nanupacufoantan faca tahuashatun finifoantan Jesús inanpaini. <sup>30</sup> Jesús muushon yoini,—Natian uhuun Upan ua yonoa cuscan mun acoinna,—huani. Ascata nai fupopacucahuani.

### *Ranushumuaton Jesús ashin pishi chachini*

<sup>31</sup> Iyoco futsaino nan fusititian Diosin oinmati nan afu imisiton nocon caifo Israelifo aton shunifoan facu iyoafifo finonmani shinantanfafainpaonifo ini. Ascano Jesús yafi yomutso rafu ihui coyan iquinanqui nanno mastifoanno nocon niaifofoancai fusititian oinpainifoma. Ascanofin Pilato ano fonifoquin,—Funamanri nocon fusititian. Jesús yafi yomutso rafu ato fitucucahuun nariscanon. Mai huariscanonfo nocon fusititian mastifo anno ninonma,—ishon nocon niaifofoan Pilato yoinifo. <sup>32</sup> Ascan Pilato ato yonocun ranushumuaoan yomutso rafu ato fitash shao tucunifo nariscanon. <sup>33</sup> Ascano Jesusqui fucaquin oianfo man naacoinna ini. Ascaiton fitucunifoma.

<sup>34</sup> Ascaiton man naa oinquin ranushumuaton ahuun ashin pishi chachiaino imi focain unu foni. <sup>35</sup> Unfin nan oinni cuscan un mato yoiaiton marifi man icoira huanon. Unfin icon yoiquin. <sup>36</sup> Diosin tsain yoimisiton inonpacocai cuscan cunuyoni isca huaquin,—Ahuun shaocai tucushquimafinquin,—ishon cununi. <sup>37</sup>—Pishi chachiaitonfin oinshcaniquin,—Diosin yoimisi futsan inonpacocai cuscan Jesús naiyoataima cunuyoni.

### *Jesús mai huanifo*

*Mt 27.57-61; Mr 15.42-47; Lc 23.50-56*

<sup>38-39</sup> Ascano José Arimatea anoashu cainni nan Pilato ano cani,—Jesús ihui coyan iquinanmaquinoa un fotomapai mai huashquin —ishon Pilato yocani. Ascaiton,—Ahuu,—Pilato huani. Nan José Jesús icoira huatanafiaflashocai tsoashta yoinima. Nocon caifo niaifofoqui musuquin ato yoipainima. Nan Nicodemo futan José Jesús ihui coyan iquinanmaquinoa fotomani mai huashcaquin. Nan Nicodemo arifi Jesusqui yamu oni yocaicain. Afi ininti shara ichapa treinta kilo cuana funi Jesús ahuun caya raishashquin funa payocononma. Nan ininti rafu osinan huani tuipa yafi ofucoin. Nan ininti ahuun anu rafu mirra yafi aloes.

<sup>40</sup> Ascano José yafi Nicodemo inintinin pano osho shara ahuun raishashon ahuun raconifo. Nocon caifo Israelifoan nocon yora mai huaquin amisifo cuscan huanifo.

<sup>41</sup> Nii funuamamishti mapoa anoshon afi ano chaimashtashon Jesús mastanifo. Nan-nori mahua quini funa tsoacai a muran maiyomisima. <sup>42</sup> Nocon caifo nan Israelifo nocon tunutitian iyocoshquin icaino fari iquiataima Jesús mai huariscapainifo. Ascan nan mahua quini chaimashtacun a muran Jesús mai huariscanifo.

## 20

### *Jesús mahua quini muran man mai huafiafo afanan funini*

*Mt 28.1-10; Mr 16.1-8; Lc 24.1-12*

<sup>1</sup> Ascano Domingoaino shafataimashta María Magdalena Jesús maia mahua quini ano cani. Caquin oian mahua quini ahuun fupoitan man fupucua ini. Nan toquirininhuan man fupucua ini. <sup>2</sup> Ascaiton oinfainnici María ichoni Pedro yafi ua chanhuaicai, Jesús uhuun noimisi noco chani huaicai ichoni,—Nocon Ifoan ahuun caya quini murannoa man raquieran onuafononcatai tapa, —icaiton nicai.

<sup>3</sup> Pedro fu non maia ano ichoni. Mahua quini muran oincai. <sup>4</sup> Un Pedro shonconfaini un rufofo noconi. Chipo Pedro nocotoshini. <sup>5</sup> Rufofo nocotan mahua quini tucupacucahuatan un naistoshini. Naistoshquin oian ahuun racoitmania pano mania ini. Ascafiancái iquitoshinima. <sup>6</sup> Ascaino Pedro ucachiori nocotoshitan mahua quini muran iquicaintan oinquin oian ahuun rashuitafo mania ini. <sup>7</sup> Ahuun foraconitafo fosoitaquiri

mania ini. <sup>8</sup> Ascaino unfincoin quini muran iquicaini. Iquicaiquin oinquin un icoingra huani Jesús funia. <sup>9</sup> Oinyoshomacai Diosin tsain yoia cuscan, —Jesús funishqui ain, —non tapiyonima. <sup>10</sup> Ascaiton ointan nocon pushu ano non nasocurani.

*Mariaqui Jesús niriscatani*

*Mr 16.9-11*

<sup>11</sup> Non cafiainocai María canima. Mahua quini cachiori niashu uaiqui arifi quini tucucain naisquin oian. <sup>12</sup> Diosin oinmati rafu afu ica sahuuti oshopa sahuucanashu tsaoafu ini Jesús rataintanfoanno futsan fosoitaquiri icaino futsan ahuun tau iquitaquiri tsaoafu inifo. <sup>13</sup> —¿Ahuuscain min uaicain? —oinmati Dios fu imisiton rafutan huaifoa. —Uhuun Ifo man ahuun caya raquira onuafo uncai tapiama ahuuscara huaforan, —huatan. <sup>14</sup> Ifiacucahuaquin oian Jesús acachori nifiacucai onannima. <sup>15</sup> Jesús arifi yocaquin, —¿Ahuuscain min uaicain? ¿Min tsoa funaimun? —huaiton. Afía fasi oromisi shafain, —Minmain uhuun Ifoan ahuun caya rani huaquin ua yoihoo. Un afanan nuno mai huanon, —huaiton.

<sup>16</sup> Jesús, —Maria, —yoini. Ascaiton foisini foanquin oian nan Jesús ahuun fusoco- incun. Israeli tsainman, —Rabuni, —huani. <sup>17</sup> —Ua muyamaquin. Uhuun Upari un cataimacai. Ascan ua muquima. Uhuun yorafo ua ato yoishotacahuun isca huaquin, “Uhuun Upa ari un caicain. Nan uhuun Uparifi maton Upaquin. Nan uhuun Diosifin mato Diosiquin,” ato huatahuun, —huani. <sup>18</sup> Ascashu cai María nocoshon yoiquin, —Munfin nocon Ifo un oianquin, —ishon. Noco yoini nan Ifoan yoia cuscan huafain noco yoipacuniquin.

*Jesús afu rafumisifoqui niriscatani*

*Mt 28.16-20; Mr 16.14-18; Lc 24.36-49*

<sup>19</sup> Asca huatan tunutitian iyoconaino man fari caino non afu rafumisifoan nocon niaifofoqui musuquin non cunu fupoti futaonshacanashu non ichanan ano noco nushmancayan Jesús niriscatani. Ascaiton noco yoiquin, —Maton ointi fucashcaquima isharacahuun —ishon noco yoini. <sup>20</sup> Yoitan noco ismaquin a piriconun mastaitafo tsuhuu ismaquin mushanshotan ashin pishi chachitan noco ismaniquin. Noco ismaiton non oinni fasi nocon Ifoqui unimacoinni. <sup>21</sup> Afanan Jesús noco yoiquin, —Maton ointi fucashcaquima isharacahuun. Nan uhuun Upan ua nichini cuscan huafain natian un matorifi nichiran, —ishon yoini. <sup>22</sup> Ascashon nocoqui ashaintaquin, —Uhuun Upa ahuun Yoshin Shara ficahuun. <sup>23</sup> Ratoran futsan man aton chaca rauhuacufin Diosin aton chaca soashoshquin. Man aton chaca rau huamafin atohuun nuaquin, —ishon Jesús noco yoini.

*Jesús afanan atoqui niriscatanaino Tomásri atofu ini*

<sup>24</sup> Ascashon noco yoiainocai Tomás fusti ano inima. Nan Tomás arifi Jesús fu rafumisi futsa ini. Ahuun anu futsa Gemelo huapaonifo. <sup>25</sup> Ascashon Tomás Jesús oinshoma yoini, —Un ahuun mucu natan pirico tsuhuu uhuun mutotinin muifain ahuun pishi tsuhuu pimuishofin un icoingra huatiroquin. Un asca huayamashocai man Jesús oincoian un icoingra huashquimaran, —ishon Tomás noco yoini.

<sup>26</sup> Asca huatan ocho osha finontan non afanan cunu muran ichananfono Tomásrifi nanno no fu ini. Cunu fupoti futaonshacafono afanan Jesús nocoqui niriscatani. Ascashon afanan noco yoiquin, —Maton ointi fucashcaquima isharacahuun, —huatan.

<sup>27</sup> Jesús Tomás isca huani, —Ua min mutotinin uhuun mucu natan muifain ua piiimuihuu. Afanan ua icoingmaran huaquima. Ua icoingra huahuu, —huaiton. <sup>28</sup> Ascaiton Tomás cumaquin, —Minfin uhuun Ifoquin. Minfin uhuun Diosiquin, —huaiton.

<sup>29</sup> —Ua oinquisifin mian icoingra huaicai. Ascan ua oianmafianquin ua icoingra huafofin fasi unimashcaniquin, —ishon Jesús yoini.

*Ahuuscashomain Juanpan Jesushuunoa cunushoniquin ato tapimani*

<sup>30</sup> Ascatan ahuamamishti tsoa futsan atiroma cuscan ahuara futsafo Jesús noco oinmani. Afohuunoacai un mato cunushonama. <sup>31</sup> Upan Diosin Jesús catonni. Afin Diospan Facuquin. Un mato cunushona cuscan nan man icoinra huanon. Icoinra huaashu man Dios fu ipanon.

## 21

### *Ian cusumun Jesús afu rafumisifoqui noconi*

<sup>1</sup> Ascano Jesús afanan nocoquin noconiquin. Ianmanhuan Galilea cusumun noconi. Un mato yoinon ahuuscashumain Jesús nocoqui oniquin. <sup>2</sup> Pedron yafi Tomás nan ahuun anu futsan Gemelo non Natanael nan Canan murannoa Galilea anoa non Zebedeo facufo nonri afu rafumisi non ichananni. <sup>3</sup>—Unfin nushuicaicain,—Pedro icaiton.—Non mifu cairan,—non huani. Ascashu focani shasho nanufain nushushifiaquin non shiman fustishta finima.

<sup>4</sup> Shafa cuaino ian cusumun Jesús nia ini. Nifiacun non onannima. <sup>5</sup>—Uhuun facufoan man shiman achiamamun,—noco huaiton.—Ahuashta non fiamaran,—non huaiton. <sup>6</sup> Ascaiton noco yoquin,—Shashon rushti cayacafi potacahuun. Ascashonfin man fitiroquin,—noco huaiton nicacaquin. Nan noco yoia cuscan non potani shashon rushti cayacafi potashon non muia fospicoian ini. Shimanoanfo ihuucircun shasho muran nanupaiquin non rananni. <sup>7</sup> Unfinquin ua Jesús noicoinmisi. Ascacun un Pedro yoini,—Nanfin nocon Ifoquin,—un huani. Ascaiton nicaquin Pedron samamashta ahuun sahuuti sahuacufoantan shasho naquinoashu ian muran fotocaini ahuun Ifoqui nocoriscapai. <sup>8</sup> Ascaiton atirifiton non shashon mufaini. Nocon nushuti fospicun shashoqui nushashon non aya tohuufoni. Ian cushan chaima shara. Cien metrocuana.

<sup>9</sup> Non cusumun nocoquin oian chi cutuai ini shiman shoi yafi yoa chi cusumun raca ini. <sup>10</sup> Ascatan Jesús noco yoquin,—A man rama shiman fia futsan fucahuun,—huani. <sup>11</sup> Ascaino Pedro shasho naqui nanupacucuhuan noco nushuti cusumun sharashon. Non oian shimanoanfo nushuti fospicoian. Ciento cincuenta tres shimanoanfo fospicoinfiashocai nushuti fashnunima. <sup>12</sup> Ascaiton Jesús noco yoquin,—Piyoi fucahuun,—noco huaiton. Nicacaquin. —¿Min tsoamuncai? —non huanima. Man nonmain tapishofin nocon Ifocun. <sup>13</sup> Ascanshon Jesús noco pimaquin noco nantifi yoa yafi shiman inanni. <sup>14</sup> Man funitashaquin nocoqui oi rafu non fusti ya ini.

### *Jesús Simón Pedro fu tsainni*

<sup>15</sup> Piquin anaititan Jesús Pedro yocani,—Pedron minfin Juanpan facuquin. ¿A mifu rafuafoan ua noicoiainfo finonmafain mian noicoianmun? —huaiton.—Aifain Ifon. Man minfin tapiaquin un minhuun noicoiai,—huaiton.—Ua noisharashon ua rama icoinra huafori ato cushusharahuu ua tanasharanonfo,—huani. <sup>16</sup> Afanan Jesús Pedro yoini,—Pedron, minfin Juanpan facuquin. ¿Iconmun mian fasi noicoiai? —huaiton.—Aifain Ifon. Man minfin tapiaquin un mihiun noicoiai,—huaiton.—A ua noisharashon ua tanamisifori ato cushusharahuu ua tanasharanonfo,—huani. <sup>17</sup> Ascaiton afanan yoca futsani,—Pedron, minfin Juanpan facuquin. ¿Mianmun noiquin? —huaiton. Yocariaiton Pedronun fasi ointi noconi.

Ascashon afanan cumani,—Ifon, minfin ahuamamishti tapiaquin. Man min tapiari un mia fasi noicoin,—huaiton.—Ascan ua tanamisifo cushusharahuu ua tanasharanonfo. <sup>18</sup> Pedron, iconcoin un mia yoinon. Pushcoshon nan min apaiyai cuscan min huua. Ascari nan min capaiyaiquiri min camisi. Ascan min anifo ano futsafoan mia yonoshquicani. Min capaiyamaiquiri mia iyoshquicani,—huani. <sup>19</sup> Jesús Pedro tapimayoni ahuuscemain naiyaicain. Pedro ahuun Ifohuunoashu naicain tapishquin,—Upa Dios shararan,—huashquicaniquin. Ascano Jesús Pedro yoini—Ua tanasharahuu,—huani.

<sup>20</sup> Asca huaino Pedron ifiacucahuan ua oinni un ato mufainaiton. Ua fasi Jesús noimisi, Jesús nataima no futan yamu piyoquin un Jesús yocani, —¿Ifon, tsoancai mia achimashquimun? —ishon un yocani. Nan ucaifin yocaniquin. <sup>21</sup> Ascaiton Pedron ua oinquin yocani, —¿Ifon ahuuscama Juan naiyaicain? —huaiton.

<sup>22</sup> —Un nimapaiyaino niyoi nan un nasoaitianri. Inon. Shinanyamahuu. Ascatama ua tanacoinfafainhuun, —huani. <sup>23</sup> Ascano afu rafumisifo yoinannifo, —Juancai nay-oimafinquin, —uhuunoa huanifo. Ascafiai Jesú anori yoinima. Yoini isca huaquin, —Un Juan nimapaiyaino niyoi nan un nasoaitianri. Inonpun shinanyamahuu, —ishon nan fusti Jesús anori ani.

<sup>24</sup> Unfin Jesushuunoa yoimisiquin. Jesús ahuarao huai cuscan mun oinmisiquin. Nanfo un mato cunushoni. Ascacun uhun tsain man icoinra huatiro. Nantififain man man tapia un ahuunoa yoiaiton nan iconcoin.

<sup>25</sup> Ahuarao Jesús ani cuscacai non afoqui cunuqui nocotiroma. Unquian Juan un mato cunushoni. Nanti.

## Jesús Fu Rafuafoan Apaonifo Cuscan (Hechos)

*Jesús ato yoiyoni cuscan,—Diospan Yoshin Shara matoqui oshquiran,—ishon yoini*

<sup>1-2</sup> Unquian, Lucas, un afanan mia cunu fomai min tapinon. Uhuun yora Teófilo, Jesús mai ano iyoshon ani cuscan huafain yosini cuscari Apa Dios ari cainitian nanfohuunoa un mia cunushoni min tapinon. A fu rafuafo catonni ato Diospan Yoshin Sharahuunshon tapimashquin. Apa Dios ari cayoataima ato tapimaiyofafainpaoni. <sup>3</sup> Atohuunoashu nayoaitian cuarenta oshatan Apa ari cani. Cayoataima atofu iyopaoni. Ato ahuamamishti oinmayoni afanan funia cuscan icoingra huanonfo. Nantianri Diosin nantifi ato iquinai cuscan ato tapimani. <sup>4</sup> Ichanancashon piyaifoan ato yoini,

—Un mato yoimisi cuscan uhuun Upa Diosin mato tapimayoni ahuun Yoshin Shara matoqui nichishquin. Nocoataima Jerusalén anoashu foriyamacahuun. Manayocahuun. <sup>5</sup> Juanpan ato unu muran iquimapacuni aton chaca shatushon oinmanonfo. Ascano samamashta Upa Diosin ahuun Yoshin Shara mato ya imapacunon, —ishon Jesús ato yoini.

*Jesús Apa ari nai muran cani*

<sup>6</sup> Ascatañ chipo afanan afu ichanancashon yocanifo,—¿Ifon, min natian yonoimamun nocon caifo Israelifo nocon niaifo fusti inon Romanofoan aton niaifoan afanan noco yonononma? —huaifoan. <sup>7</sup> —Ahuitian iquimancaí mancaí tapitiroma. Nocon Upa Diosin fustiton yonotiro ahuitianmain ishquicain. <sup>8</sup> Ascafia Diospan Yoshin Shara matoqui oshon ahuun curushu mato inanshquin. Ahuun shinanhuanshon uhuunoa man ato yoifoanfafainon. Un amisi cuscan huafain un yoimisi cuscari man man oinmisi man nicamisi cuscan nantifi uhuunoa man ato yoitiro. Nuno Jerusalén anoa yoifain nantio Judea muran yoifain Samaria anoa yoifain nantifi manifotiton uhuunoa man yoifoanfafainon, —ishon ato yoini.

<sup>9</sup> Yoiquin anaititan aton ointaifi nuinacahuani. Oiainfono nai coin muran ihuacainaiton afanan oinnifoma. <sup>10</sup> Foiscaquin oianfo nocofunu sahuuti oshopacoin sahuua rafu atoqui niriscatanifo. <sup>11</sup> Ascashon ato yoini,—Galilea anoafoan, ahuuscain man nai ari foisain. Jesús man nai muran caa nanscacion acurani afanan oshquiquin, —ishon Diosin oinmati afu imisiton rafutan Jesús fu rafuafo yoinifo.

*Matías catonni Judas imisi cuscari anon*

<sup>12</sup> Ascatañ machi Olivo anoashu Jerusalén anoa nasofainifo. Nan machi Olivo Jerusalén chaimashta ini. <sup>13-14</sup> Nococatan pushu osa futsa fomancayan inacashon Upa Dios cufinifo. Nanno Pedro non Jacob non Juan non Andrés non Felipe non Tomás non Bartolomé non Mateo non Jacob futsa Alfeopan facu non Simón nanton ahuun caifo futan Romanofo cachiquiri huapainifo, non Judas Santiagon facu non Jesús chipocufo non ahua María non ainfo futsafori nanno inifo. Ichanancashon shafa rananun Dios cufinifo.

<sup>15</sup> Cufiaifono nanno ciento veinte yorafo atofu ichanannifo. Ichananfono Pedronun ato nastui nishon yoini. <sup>16</sup> Isca huaquin, —Uhuun yoramishtichin ua nicacahuun. Judaspan ato tapimaita ahuuscashomain nocon Ifo Jesús achicanicain. Nocon shuni David Diospan Yoshin Sharahuunshon inonpacocai cunuyoni cuscan Judaspan man aca. <sup>17</sup> No fu rafupaoni. Nocon Ifoan noco yonoai cusrarifi huaquin nan Judasri yonopaoni. <sup>18</sup> Nocon Ifo tanayopaonifiashon fasi chaca huani. Nocon Ifo ato achimacun ahuun rafanan pui inannifo. Nan puihuushon mai fitan nanno fomancayan inashu aficoin

tunushumutan pacucuranpai ari rononi. Chipo ahuun posto farashutan musiriquicahuan pacuni. Pacuaino ahuun posto toshatani. Ascaino ahuun poco arasiquifutsuni. <sup>19</sup> Nantififain Jerusalén anoshon nicafo. Ahuun imi focun nanno anunifo, “Imi mairan,” huani. Yora futsan aton tsainman Acéldama. Nocon tsainman imi mai. <sup>20</sup> Nocon shuni David Judashuunoa inaca cuscan aquin cunuquin isca huani,

“Ahuun mai ano tsoa afanan ano inonma, Ahuun yono nocofunu futsan finon cushumisi inon,”

ishon David ahuunoa inonpacoai cuscan cununi. Ahuun cunu anunifo Salmos, huanifo.

<sup>21-22</sup> Ascacun non futsa catononcahuun. Judaspan ahuun yono finon. Nan Juanpan yorafo unu muran iquimapacunitian non Jesús nomaqi Apa ari canitian no fu itiani non catononcahuun. Nan no fu cahuascapaoni non catontiro. Non Jesús nican cuscan huafain non oinyomisi cuscan arifi huamisi ahuunoari yoinon. No futan yorafo yoinon, “Jesús funia mun oincoianran,” ishon ato yoinon, —Pedro huani.

<sup>23</sup> Nicakashon nocofunu rafu catonnifo. Nan fusti anu rafu non fusti ya ini. José Barsabás ahuun anu futsa Justoran huashon anunifo. Nocofunu futsa catonnifo ahuun anu Matías. <sup>24</sup> Aton catoncashon Upa Dios cufinifo, —Ifon, nantifi nocon nomuran non shinain cuscan min tapicoian. Noco tapimahuun ratocaimain nan nocofunu rafu min catonpaicain mifu rafumisi no fu inon. <sup>25</sup> Judas min yononi cuscan man pota faquishihuan muran canon. Nanno ipanon. Ascan futsan ahuun yono fianon mifu rafua inon, —ishon cufishonifo. <sup>26</sup> Cuficatan toquiri tocoro rafuhuun anu nutanifo. Ascashon motica muran nanushon napacufoanni. Ascashon oianfo ratocaimain Jesús fu rafumisi iquicain. Ascashon oianfo. Matías ahuun anu nuucun. Nan catonnifo Jesús fu rafumisi atofu inon.

## 2

### *Upa Diosin ahuun Yoshin Shara atoqui oni cuscan*

<sup>1</sup> Ascano Israelifoan aton fusititian ahuun anu Pentecostés ini. Nantianri Jesús tanamisifo pushu fusti muran ichanannifo. <sup>2</sup> Ichanancatan pushu muran tsaocashon nicafo samamashta nai ariashu fuhuan nicatsain nicanifo. Pushu muran fuhuan rupifurannaiton nicanifo. <sup>3</sup> Nocotoshiaino ana ointsa chi rucun maratamufafainafo oinnifo. <sup>4</sup> Ascaino Diospan Yoshin Shara aton nomuran nanutanaino nantifi tsain futsanman ipaitama inifoannifo. Nantifi ascai futsunifo.

<sup>5</sup> Ascaino nantianri Israelifoan Dios tanasharapaicani manifoti anoashu Jerusalén ano funifo. Fusititian Jerusalén ano funifo. <sup>6</sup> Ascan fuuhuanun oi cuscara nicafuracani Jesús tanamisifo ichananfo ano ichotoshinifo. Yorahuanrasi nocotoshinifo. Nococatan yoinannifo, —¡Aira! ¿Ahuuscashucon iscaimun? ¿Ahuuscain na yorafo nocon tsainman icanimun?

<sup>7-8</sup> Na yorafo Galilea anoafofiacashon nocon tsainman noco shafacafi yoi. Nan noco tsainman noco yoicani. <sup>9</sup> Nonfin tsain futsa futsatapa yafo. Atirifi Partia anoashu caiyainfono, atirifi Media anoashu caiyainfono, atirifi Elam anoashu caiyainfono, atirifi Mesopotamia anoashu caiyainfono, atirifi Judea anoashu caiyainfono, atirifi Capadocia nan Ponto muran anoashu caiyainfono, atirifi Asia anoashu caiyainfono. <sup>10</sup> Atirifi Frigia anoashu caiyainfono, atirifi Panfilia anoashu caiyainfono, atirifi Egipto anoashu caiyainfono, atirifi Africa nan Cirene orima futsa anoashu caiyainfono, atirifi Roma anoashu caiyainfono, atirifi Israelifo yafi mani futsafoan Diosin tanapainifo. <sup>11</sup> Atirifi Creta anoashu caiyainfono, atirifi Arabia anoashu caiyainfono. Nonfin manifoti anoashu nuno ichanain fuaquin nan Galileafoan nocon tsainman noco yoicani. Ahuara sharafo Diospan huua noco yoiafo, man non nicaí. <sup>12</sup> ¿Ahuuscain na yorafoan nocon tsain tapiamafashion noco tsainman noco yoicanimun? —inifo. <sup>13</sup> Ascano futsanfoan ato cashu mutsama huaifoan, —Na yorafo pauncaniran, —ato huanifo.

### *Pedro ato yoini cuscan*

<sup>14</sup> Ascan Jesús fu rafuafo once ato nastui nishon Pedronun oi ashcafinin isca huaniquin. —Uhuun yoramishtichin Israelifoan nunoa Jerusalén anoafu futan ua nicasharacahuun. Un mato cayacafi yoinon. <sup>15</sup> Atirifiton man shinan raca non pauin. Ma. Noncái pauinma. Man shuni cuyainano nocon yorafo paunmisima. <sup>16</sup> Non pauntamarocon man oiain cuscan nocon shuni Joel inonpacoai cuscan yoiniquin. Diosinhuushon isca huaquin yoini, <sup>17</sup> Upa Diosin nocó yoi isca huaquin,

“Uhuun facu oti chaima un manifoti anoafu uhuun Yoshin Shara atoqui nichishquin. Ahuunshon maton facufo nocofunufo non ainfofori inonpacoai yoishcaquin. Maton pushcoaifo namapan cuscara un ato ahuarafu ismai. Maton anifofoanri uhuunshon aton namapan cuscara ahuarafu shara oinshcani. <sup>18</sup> Ua yonoshonafori nocofunufo yafi ainfofo uhuun Yoshin Shara un nantianri atoqui nichishquin inonpacoaifoanri uhuun tsain yoishcani. <sup>19</sup> Ahuamamishti tsoan oinyomisima cuscara un nai aria yafi mai ano un ato ismai. Imi yafi chi urumanhuan non coinmahuan ishquin. <sup>20</sup> Uhuun facu nan maton Ifon fasi sharashtacoin matoqui oaiton man oinshquin. Oataima faquishihuancoin ishquin. Oshuri imi ointsa oshicoine ishquin. Afanan oaitian ahuamamishti tsoan oinmisima cuscara nantifiton oinshcani. <sup>21</sup> Ascanfashion ratoran futsan isca huaquin, ‘Ifon, Jesús, uhuun ramapaihuu. Ua numahuu,’ huaiton Diosin numaiquin,”

ishon Joel Diospan tsain inonpacoai cuscan yoini.

<sup>22</sup> Uhuun yora Israelifoan ua nicasharacahuun. Jesús nan Nazaret anoaton Upa Diosin aqui unimani mato isma. Tsoan atiroma cuscan huafain tsoan oinyomisima cuscara huafain ahuamamishti futsafori ahuunshon Upa Diosin mato isma. Man man tapia non iconcoin. <sup>23</sup> Ascafia Upa Diosin inon pacoai cuscan shinanni cuscan mato ahuun Furun inanni man rutunon. Manfin nocofunu chacafu futan ihui coyan iquinanqui mastaitaqui nanon. <sup>24</sup> Naafiacun Upa Diosin funimana afanan omitsiscacai nanonma. Jesuscái tsoan namapacutiroma. <sup>25</sup> Nocon shuni David niaifoan Jesushuunoa yoini isca,

“Mun tapian uhuun Ifo ufu ipanaca. Ua potapacunacama. Ua cushui. Ascan tsoancai ua ahuasca huatiroma ua ratupaiquin. <sup>26-27</sup> Ascacufin uhuun nomuran un fasi unimacoin. Un nantifi ato yoitiro uhuun Ifoan ua cushuaino un unimai. Uhuun Ifo ua isca huaa, ‘Uhuun Ifon, Diosin, un nacuncái uhuun yoshin namisifo muran mian potaima. Mincái uhuun caya payocomaima. Ascan mun tapi un niyoano mian cushusharayoi’ ishon ua huani. <sup>28</sup> Ahuuscashumain un nipasharatiroquin mian tapimana. Un miqui nocono mian unimamacoinshquin,”

ishon nocon shuni David cununi.

<sup>29</sup> Uhuun yoramishtichin, un tapicoian cuscan mato yoi. Nocon shuni David nani. Man maifiani nanno natianri non ointiro. <sup>30</sup> Ascafiano David inonpacoai cuscan Diosin tsain yoiyopaoni. A Diosin yoiyotiani cuscan tapia ini. Diosin yoiyoni chipo ahuun funari niaifocoin ishqui oi. Nocon caifo Israelifo a cuscarrari nocon niaifo inon. “Un mia icon yoi min funa chipo mia cuscarrari min caifoan aton niaifocoin inon,” ishon Upa Diosin David yoini. Diosicái tsoa paratiroma David tapini.

<sup>31</sup> Ascano David chipo fari ichapa inaca cuscan yoini. Cristo funinonpacoai cuscari yoini. “Naacucai Apan naafo muran potanonpacoinma. Ahuun cayaricai payoconacamaran,” ishon yoini. <sup>32</sup> Icon, Upa Diosin Jesús funimaita nipanon. Nantififain man non oian. <sup>33</sup> Natian Apa Dios fu niaifocoin nantifi iquina. Apa yoiyotiani cuscan Jesús ahuun Yoshin Shara noocoqui nichian. Ascacufin natian man oian cuscan huafain man nica cuscan Diospan Yoshin Sharapan aca. <sup>34-35</sup> Ascan nocon shuni Davidcái Dios ari ahuun cayafo ya nai muran canima. Ascashorifi yoini,

“Ifon uhuun Ifo yoini isca huaquin, ‘Min ufu niaifo itiro nantifi iquinshquin. Mia noicasmaifori min ato finoncointiro afanan mia chaca huanonfoma. Atorifi min iquini. Un mia amashquinran,’”

ishon yoini.

<sup>36</sup> Ascacufin nantifi Israeli anoafaoan maton nomuran tapisharacahuun. Jesús man ihui coyan iquinanqui mastaitafo Diosin yonoa nocon Ifo Cristo inon. Nan Apan catonni,—ishon Pedro yoini.

<sup>37</sup> Nicaquin aton ointi noconifo,—¡Ohua! Non chaca huaita,—ishon shinannifo. Pedro non Jesús fu rafuafo futsanfo yocanifo,—Nocon yoramishtichin, non mato nica. ¿Non ahuuscatiromun? —ishon yocaifoan.

<sup>38</sup> —Man chaca huamisi cuscan shatucahuun. Afanan chaca huatamarocon Dios shinancahuun. Jesucristo Ifo huacahuun. Man Ifo huaino mato unu muran iquimapacutiro maton chaca soafain Upa Diosin mato numanon. Asca huano Diosin ahuun Yoshin Shara matoqui nichishquin matofu rafucoinon. <sup>39</sup> Jesús yoquin isca huaita, “Ratoran futsan nuno nocon Ifo Diosin catoan ahuun Yoshin Shara mato ya rafumashquin. Maton facufo ya chai manifoannafori ato ya rafumashquin,” —ishon Pedronun ato yoini.

<sup>40</sup> Yoitan afanan Pedronun ato tsain ichapa yoini. Ato yoquin isca huani,—Maton chaca shatucahuun, uhuun yoramishtichin. Nocon caifo futan mani futsanfoanri man fasi chaca huamisifo. Ascarao iyamacahuun. Jesús icoira huacahuun mato numanon,—ishon Pedronun ato yoini. <sup>41</sup> Nicacaquin tres mil yorafoan icoira huanifo. Ascano ato unu muran iquimapacuni.

<sup>42</sup> Ascatac Jesushuunoa tapipaiyaifoan Jesús fu rafuafo ya ichanancashon ato tapismafain ato futan pifain Upa Dios cufinifo. Asca huapaonifo.

### *Jesús icoira huaquin tau huanifo cuscan*

<sup>43</sup> Nantifain Jesús shinancoinnifo. Ahuun tsain noiquicai ahua futsan shinanpainfoma. Nantianri Jesús fu rafuafoan atofu inifo. Doce Jesushuunshon afu rafuafoan tsoan atiroma cuscan huafain oinyomisifoma cuscarafo ato oinmanifo. <sup>44</sup> Ascatac Jesús icoira huamisifo shafatifi ichanannifo. Nantifi aton ahuarafoya cuscan pashtanapacunifo. <sup>45</sup> Aton mafo non ahuarafoya inanmitsacashon ahuun rafanan pui ficashon yopaifo ato inanshcaquin.

<sup>46</sup> Shafatifiri Dios fu tsainti pushu muran ichanannifo Dios cufincani. Aton pushu muranri fasi unimacoinyanan ichananshon pishcaquin. Picaquin,—¡Aicho! Upa Diosin min noho shara huafafainiran,—ishon yoinifo. <sup>47</sup> —Upa Diosin min shararan,—ishon huapaonifo. Nantifain atohuunoa yoinifo,—Jesús icoira huafuan shararan,—huanifo. Ascatac nocon Ifohuunshon shafatifi futsafoanri ato futan Jesús icoira huanifo. Ato fu ichanannifo.

## 3

### *Chato chatotiani cayani cuscan*

<sup>1</sup> Ascatac Dios fu tsainti pushu ano Pedro yafi Juan yatapacu Dios cufani fonifo. Yatatifir Dios cufi focani fopaonifo. <sup>2</sup> Nocofunu chato chatotiani nanscarapan cainni nan anosi shafatifi tsao tsao tiani. Atirifiton iyopaonifo anoashu pui yocacanon. Ascano Dios fu tsainti pushu shuinshcaian tsaoshon iquifurafafainaifoan ato pui yoca yocatiani. A caincaitinin ahuun anu sharashta. <sup>3</sup> Pedro yafi Juan iquifainpaiyainfoan oinquin,—Ua pui inancapun,—ato huafaiton. <sup>4</sup> Pedro futan Juanpan fuuiscaquin Pedronun yoini.—Noco fuuisihuun,—huaiton. <sup>5</sup> —¡Aicho! Ua pui inancaniran,—ishon ahuun nomuran shinanni. Ascanshon ato foisini.

<sup>6</sup> —Uncai pui yamafinquin. Ascafiaquin un aya cuscan un mia inanon. Jesucristo nan Nazaret anoahuunshon funinaca huahuun. —Pedronun huani. <sup>7</sup> Mananquiri mutsoinfoannaino funinaca huatan. Mua ahuun oposhco yafi ahuun tau muma

curushu shara ini. Pedronun funaiquimashta mutsoinifoanpaiyaino afin fianshinacahuani. <sup>8-9</sup> Ascatan man chaima catan. —¡Aichoran! —icashu, fia flashuita unimani. Ichotiritiritan. Dios fu tsainti pushu muran atofu cani. Ato fu cashon, —¡Aichoran! Diosin muan caya huaquin. Dios shararan, —icashu ichotiritirini. Nantififain Israelifoan ichananti pushu anoshon oinquin futsanifo. <sup>10</sup> Onancashon, —¡Aira! ¡Oincapon! Nan chato chatotiani caincaiti ahuun anu sharashtaran ano tsaoashu pui yocacamitsamisi. ¿Ahuuscashumun cahuacacainniquin? Noncái ascara oinyomisimaran, —icashu ahuun yoinnanifo.

*Cunu futsan ahuun anu Salomón anoshon Pedronun ato yoini*

<sup>11</sup> Ascano nanno cunu futsan ahuun anu Salomón muranshon nocofunu chato chatotiani Pedro yafi Juan poyatani. Nantififain a oinpai atoqui ichonifo. Nocotoshiqui oianfo, —¡Aira! ¿Ahuuscaimun? —icashu yoinannifo. <sup>12</sup> Atoqui ichoainfoan Pedronun ato oinquin. Yoini, —Nocofunu Israelifoan ua nicacahuun. ¿Ahuuscain man mustairimun? ¿Ashuuscaquimun man noco shararan ishon oincain? Na nocofunu chato chatotiani caya huaran ishon. Non sharacuai nocohuunoashu cayama. Nocon curushhuunshocai cayama.

<sup>13</sup> Noncái acama. Nocon Upa Diosin ahuun oinmati Jesushuunshon caya huua. Nocon shunifo Abraham non Isaac non Jacobori Upa Dios aton Dios. Nan nocon Diosin mato oinmapai ahuun facu Jesús sharacoin ahuamamishti huatiro. Manfin Jesús achimanitaquin futsafoan rutunonfo. Niaifon Pilaton a nichisharapaifaiton “Nacái nocon niaifomaran,” man Pilato huaita.

<sup>14</sup> Jesuscái ahua chaca huamisima. Sharacoinfiacun mancái caimapaitama. “Jesuscái caimatamarocon rutumitsamisi Barrabás caimahuun,” man iquita. <sup>15</sup> Jesús fustichin yora nimatirofiacun man rutuita. Man rutufiata Upa Diosin funimanita. Non ointa Jesús funaiton. <sup>16</sup> Man man tapia na nocofunu chato chatotiani imisi. Natian muma shara. Non Jesús icoinra huano ahuunoashu man caya. Man man oian.

<sup>17</sup> Uhuun yoramishtichin, mun tapia man Jesús onanshoma rutua. Mato niaifofoanricai onanfoma. <sup>18</sup> Man aca cuscan tapiamafiaquin Upa Diosin nocon shunifo nan ahuun tsain yoishomisifoan inon pacoai yoiquin isca huanifo, “Cristo Diospan Furun omitsiscairan,” ishon inonpacoai cuscan yoinifo. <sup>19</sup> Ascacun man chaca huamisi cuscan shatucahuun. Chaca huatamarocon Upa Dios shinancahuun maton chaca soashonon. <sup>20</sup> Man ascaiton Upa Diosin mato unimamatiro. Ahuun Furun Jesús catonni maton numamisi Cristo inon. Matoqui afanan onon. <sup>21</sup> Ahuun yonoshomisifoan nan inon pacoai Jesushuunoa yoinifo isca huaquin, “Upa Diosin yoiyotiani, ‘Un chipo nantifi funa shara imai. Afanan ahua chaca inonma. Un asca huayoai chain uhuun facu ufu nai muran iyoiran,’” inonpacoai cuscan Diospan tsain yoinifo.

<sup>22</sup> Nocon shuni Moisés arifi yoini, “Nocon Ifon Diosin noco caifo futsa catonshquin noco inon pacoai yoimisi inon. Ua cuscara inon. Nantifi mato yoiai cuscan a nicasharacahuun. <sup>23</sup> Tsoan a nicacasmai afo amaquishon potatiro ariashu omitsiscapanon,” yoini. <sup>24</sup> Samuel Diosin tsain yoiquin tau huani. Nan inonpacoai cuscan. Ascano chiporifi Diosin tsain yoimisifoan nannoricoinri yoinifo cuscacoin man aa. Nantififain Jesushuunoasi yoinifo. <sup>25</sup> Manfin aton funafoquin. Ascan Diosin nocon shunifo yoiyotiani cuscan matori ashoshquin. “Min funahuunshon nantifi manifoti anoafu un ato shara huairan,” ishon Upa Diosin Abraham yoini. <sup>26</sup> Ascan ahuun Furun Jesús matoqui nichini ahuun oinmati inon. Matoqui nichiqui tau huani mato shara huanon maton chaca man cachiquiri huapanon, —ishon Pedronun ato yoini.

<sup>1</sup> Ascatan Pedro futan Juanpan ato yoiaifoanno yorafohuunshon Dios cufimisifo Dios fu tsainti pushu cushumisifoanri aton niaifo non Saduceofori atoqui funifo. <sup>2</sup> Upa Diosin Jesús funimanaran ishon Juan futan Pedronun ato yoiaino aton nomuran shinanchacanifo. <sup>3</sup> Ascano man fari caino ato achinifo nan yamutan cunu muran ishinifo. <sup>4</sup> Ascaflashon ato Jesushuunoa yoiaifoan yorahuanrasifoan icoinra huanifo. Cinco mil nocofunufoan nantian icoinra huanifo.

<sup>5</sup> Iyoconaino Israelifoan aton niaifo non Moisés cununi cuscan tapimamisifo Jerusalén ano ichanannifo. <sup>6</sup> Nannori aton yorafohuunshon Dios cufimisi niaifocoin Anás yafi Caifás non Juan futsa non Alejandro non aton yorafori nanno inifo. <sup>7</sup> Pedro yafi Juan caincurannaiton niaifofoan cusutumushon yocanifo. —¿Tsoan mato yonoamun man aca cuscan man huanon? ¿Tsohuunshon man acaya huamun? —ishon niaifofoan yocanifo.

<sup>8</sup> Asca huaifoan Pedronun Diospan Yoshin Sharahuunshon ato cumani, —Niaifofoan un mato yoisharanon. <sup>9</sup> Man noco yoca tsoa na chato chatotiani shara huamainquin. Man tapipai ahuuscashumain cayaqui. <sup>10</sup> Un mato cayacafi yoinon. Man nantififain uhuun caifo nan Israelifo yashon tapisharacahuun un mato yoinon. Jesucristo nan Nazaret anoahuunshon man caya muma shara inon. Manfin Jesucristo ihui coyan iquinanqui mastaitaquin. Man naafiacun Upa Diosin funimana.

<sup>11</sup> “Pushu yonomisifoan toquiri quishi shara potano pushu oni sharatiroma. Man potafiafo pushu ifoan catonni toquiri quishi shara nichishquin pushu mutsisipacoin inon,”

ishon Diosin tsain cununi. Jesucristo nan toquiri quishi cuscara. Manfin pushu yonomisifo cuscara man man potafia Upa Diosin a catonni ahuunoashu man ahuun yorafo inon. <sup>12</sup> Tsoa futsacai noco numatiroma. Manifotifoan tsoa futsahuunoashucai non ipatiroma. Jesucristo fustitofin nocon chaca soatiroquin non Upa Dios fu nipanon, —ishon Pedron ato yoini.

<sup>13</sup> Ascan nicacani mustairinifo. Niaifofo yoinannifo, —¿Ahuuscaquimun na rafutan ahuamafashion ranotama noco yoiquin? Cunu tapiamafiamisishaquin noco shafacafi yoi. Jesús fu rafumisishaqui noco anori yoiquin, —icashu yoinannifo. <sup>14</sup> Ascano chato chatotiani cayasharashu atofu nia ini. Ascaitocai niaifofoan, —Cayamaran, —ishon yoitiroma ini. <sup>15</sup> Ascashonrifi Pedro yafi Juan cunu futsa muran nichinifo atohuunoa yoishcaquin.

<sup>16</sup> —¿Non ahuasca huaimun na nocofunu rafu? Nantifi Jerusalén anoafaoan tapiafo na rafuhuunoashu nocofunu chato chatotiani man caya. Ascaria tsoan oinyomisima. ¿Nonmun ahuasca na nocofunu rafu huaicai? Noncái futsafo fomantiroma. Cayamarancái non huatiroma. <sup>17</sup> Ascanshon non ato yoinon afanan Jesushuunoa tsoan yoiyamacahuun. Ascan futsafoanricai Jesushuunoa nicatirofomaran, —icashu yoinnanifo.

<sup>18</sup> Ascatan ato cunu futsa murannoá cunani funonfo. Fuafaoan ato yoinifo, —Afanan Jesushuunoa tsoan yoiyamacahuun. Ahuunoa yosiyamacahuun, —ato huaifoan.

<sup>19</sup> Asca huafiaifoan ato cumanifo, —¿Non mato nicayamaraquin Upa Diosin noco yonoa cuscan non nicatiromun? ¿Rato sharamun? Mafin shinancahuun. ¿Non mato nicaino Diosin nocoqui unimatiro iyamarai afin noco yonoa cuscan non yoiaino unimatironmainquin? <sup>20</sup> Non oinmisi cuscan huafain non nicamisi cuscari non mato yoitiroran, —ishon Pedro futan Juanpan cumanifo. <sup>21-22</sup> Nicacani ato onaintimapiaifiaquin nica nantifi yorafo, —¡Aicho! Upa Diosihuunshon chato chatotiani cuarenta fari aqui caa nanscarapan caini man cayahuamaforan, —ishon yoinifo. Ascan niaifofoan ato onaintimatamarocon ato yoinifo, —Man afanan Jesushuunoa yoiaiton non mato asca huatiroran, —ishon yoinifo. Yoicatan ato nichinifo.

*Jesús icoinra huaifoan Upa Dios cufini ahun curushu ato inanon*

<sup>23</sup> Nocon yorafohuunshon Dios cufimisi niaifofo non Dios fu tsainti pushu cushumisi-foan ato nichiano Pedron yafi Juan Jesús tanamisifo fu ichanannifo. Ichancashon niaifofoan ato yoia cuscan chanipacunifo. <sup>24</sup> Nicacaquin Dios cufinquin isca huanifo. — Nocon Ifon, min nantifi iquinaquin. Min nai onihuafain mai onihuafain ununhuan min onihuani. Nantio nai murannoa yafi mai anoa non unuhuan murannoa min onihuani.

<sup>25-26</sup> “¿Ahuuscaimun nan Israelifoma manifoti Diosqui fiishquicaniquin? Ipaitsi ichanancani chaca huapaicani. Manifoannati aton niaifofo ichanancani nocon Ifo Dios yafi Furun Cristo cuyopacaniran,”

ishon nocon shuni nan min oinmati David min Yoshin Sharahuunshon yoini.

<sup>27</sup> Nanscarifi atan nan niaifo rafu Herodes yafi Poncio Pilaton Israelyamafashu nocon caifo Israelfo fu ichanaintafo min Furun nan min oinmati Jesús min catonni chaca huashcaquin. <sup>28</sup> “Uhuun facun nantifi yorafu omitsiscashoshquin ato nashonon,” ishon min shinanni. Min ahuamamishti huatiro. Ascan min shinanyoni cuscan huaitafo.

<sup>29</sup> Ascan nocon Ifon, shinanhun. Nonfin min oinmatifoquin. Noco ati ati huacaniquin. Min curushu noco inanhun non min tsain ranotamacoin ato yoinon. <sup>30</sup> Min oinmati sharacoin nan Jesushuunshon tsoan atiroma cuscan huahuu. Ahuunshon isinin icaifo caya huafain tsoan oinyomisima cuscara sharafo ato oinmahuu, Upan,—ishon cufinifo.

<sup>31</sup> Cuficatan ichananfono mai naiyanaiyaini. Ascata nantifi nanno Diospan Yoshin Sharapan ato iquini ahuun tsain cayacafi ranotama yoinifo.

### *Nantifi ahuarafo nantifina ini*

<sup>32</sup> Nantififain Jesús icoinra huamisifoan aton nomuran nannorisí shinannifo. Tsoan ahuara futsa shinantanima. —Nan uhuunarifi matonaquin. Un aya cuscan man yopaiton un mato inantiroran,—icashu yoinannifo.

<sup>33</sup> Ascata nantifi nan doce Jesús fu rafumisifoan, —Nocon Ifon Jesús noco nashoashu funiaran,—ishon Diospan Yoshin Sharapan ahuun shinansharahuunshon aton caifo yoinifo. Ascata nantifi nan icoinra huafu Upa Diosin ato shinamashara unimacoinonfo. <sup>34-35</sup> Aton mai inanmitsafain aton pushu inanmitsanifo ahuun rafanan pui ficashon a Jesús fu rafumisifo doce pashcashoshcaquin. Yopaifoan pashcashonifo. Ascata nantifi atan tsoa ahua yopatanima.

<sup>36</sup> Nantianri nanno nocofunu aton caifoan ahuun anu José. Nanton aton shuni Levipan funa. Unu nushmancayan rafu mai tomahuan ahuun anu Chipre anoashu cainni. Jesús fu rafumisifoan anu futsa tuqui huani Bernabé. Onicoinnin tsainman yorafu aton fupihuanmapaimisi shinansharamapaimisiran. <sup>37</sup> Ahuun mau inanmitsashon pui fishon Jesús fu rafumisifo inan yopatanaifoan pashcashopacunifo.

## 5

### *Ananías yafi ahuin Safira chaca huani cuscan*

<sup>1</sup> Ascano Ananías futan ahuin Safira mai inanmitsacashon ahuun rafanan pui finifo. <sup>2</sup> Nanscatanfin atirifi pui tushu huafleshocai cuyoinanima. Atirifi Jesús fu rafumisifo foshoni. Ato fomani, —Nantifi pui un mato cuyoinaran,—ishon ato shinamapaini. Aca cuscan ahuinin arusu tapini.

<sup>3</sup> Ascaiton Pedronun yoiquin isca huani, —¿Ananías, ahuuscaimun Satanás min nomuran yonoaino min Diospan Yoshin Shara paraincain? Min mai inanmitsashon pui fia atifincái min noco inanma. Atirifi min mucua mina inon. <sup>4</sup> Min inanmitsataima minacoin iyoa. Min atirifi mucupaiquin min noco yoia shara icuana. Ascata marocon min noco fomanpai. Mincaí noco fuparanima. Minfin Dios fuparanicai,—ishon yoini.

<sup>5</sup> Asca huatapaiyaino Ananías nayacucahuani. Asca nantifi anoafu ratucoinnifo. <sup>6</sup> Ascano pushcofoan rashunifo mai huai foshcaquin. <sup>7</sup> Man ascano tapiamaino ahuinri nocotoshini. <sup>8</sup> Nocotoshiaiton Pedronun yocani,—¿Man mai inanmitsashon rafanan pui

fiamun? ¿Man man nantifi nocu inanmun? —ishon yocaiton. —Ai. Mian yocai cuscafin iconquin, —ishon yocaiton.

<sup>9</sup> —¡Ohua! Ahuuiscain min funu futan tsoan tapimaran ishon “Diospan Yoshin Shara man fomanpaiyain. Tsoan tapimaran,” ishon man shinan. Man shinan raca Diospan Yoshin Sharapan tapiama. ¡Oinpon! Na pushcohuaifoan min funu mai huatacani fucani miarifi mai huacaniran, —ishon Pedronun yoini. <sup>10</sup> Asca huatapaiyaino Safira Pedro nia naman pacuriscatani. Ascatacharish acucahuani. Ascatapaiyaino iqui furapaiquin oianfo man naa fuchitositan ihuifainifo funu patashari mai huai foshcaquin. <sup>11</sup> Ascaiton nicacani Jesús icoira huafo yafi futsafori ratucoinnifo.

### *Jesús fu rafumisifoan doce isca huani, —Iscaracai tsoan oinyomisimaran, —huanifo*

<sup>12</sup> Ascano ichananti pushu ahuun anu futsan Salomón Jesús icoira huafo nantifi nanno ichanannifo. Nannori afu rafumisifo doceton Diospan Yoshin Sharahuunshon tsoan atiroma cuscan huanifo. Yorafoan aton ointaifi. <sup>13</sup> Icoinra huamafoan ato oinquin yoinifo, —Jesús icoira huafo yora shararan, —ifiacatan Jesús icoira huayamashu atofu rafunifoma. Musunifo. <sup>14</sup> Ascafaino nocofunufo yashon ainfofoanri shafatifi icoira huaranifo. Ascashu atofu ichanannifo.

<sup>15</sup> Ascano yora isinin icaifo ato shuhua narataston ihuunifo. Ascashon nanfo fai cusumun ratani cahuaquin, —Pedron ahuun yora faquishi ihuafainaino raca cayatiroati, —ishon shinannifo. <sup>16</sup> Yorahuanrasi Jerusalén patashari icafo isinincaifo ato ihuunifo. Atirifi yoshin chaca atohuun nushon ato fucashni huaiton ihuunifo. Ascanshon nantifi ato caya huemapacunifo.

### *Jesús afu rafumisifo doce omitsisca huanifo*

<sup>17</sup> Jesús fu rafumisifo acaifo cuscan huafain yoiaifo cuscan, —¡Aicho! Na yorafo shararan, —icashon yoinifo. Ascano Israelifoan aton yorafohuunshon Dios cufimisi niaifocoin yafi niaifo futsafoan nicacaquin shinannifo, —Atohuun noiai cuscacai nocohuun noima. Atohuunoa yoisharai cuscacai nocohuunoari yoimisimaran, —ishon shinannifo. Curafiamisifo Jesús fu rafumisifoqui fiishquinifo. <sup>18</sup> Ascano ato achimacashon cunu muran iquimanifo. <sup>19-20</sup> Iquifiafoan yamu nacucahuaino Diospan oinmati afu nai muran icaton atoqui nocoshon ato yoini, —Dios fu tsainti pushu anoshon ato yoitacahuun. Ahuuscashomain nocon Ifo Jesús ato nimapacutiroquin ato yoitacahuun, —ato huani. Yoitan ato cunu fupotifo fupushoni. Fupushonano cain furanifo.

<sup>21</sup> Shafaino Dios fu tsainti pushu muran iquitoshicashon ato yosiacufainifoquin. Israelifoan aton niaifo ichanancashon cunu cushumisifo aton niaifo ato nichinifo Jesús fu rafumisifo doce ihuitanonfo. <sup>22</sup> Ascano cushumisi niaifo nococashon oian tsoa anomia oincani. Ascan naso furan niaifofoqui chaninifo. <sup>23</sup> —Non ato matoqui ihuupaifia cunu fupotifo fupocoian. Nannoshon ranushumuafaoan ato cushua. Non fupotifo fupushon cunu muran oian. Ano tsoa yamairan, —icashu cushumisi ranushumuafao aton niaifo uhuapafoqui chaninifo. <sup>24</sup> Nicacani nocon yorafohuunshon Dios cufimisi niaifocoin non ranushumua aton niaifocoin non nocon yorafohuunshon Dios cufimisi naifo futsafori mustairinifo, —¡Ohuashta! ¿Ahuuscain ascamun? ¿Ahua finoanmun? ¿Non ahuuscatiromun? —ishon fasi shinanchacatanifo.

<sup>25</sup> Shinainfoanno futsan atoqui nocoshon yoini, —¡Oincapon! Na nocofunufo man cunu muran iquimafia natian Dios fu tsainti pushu muranshon yorafo yosicaniran, —ishon ato yoini. <sup>26</sup> Nicacani ranushumua niaifon yafi niaifo patasharifo ato ihui focani. Fofiacashon curushcain ihuunifoma. —Non ato curushcain ihuaiton yorafo sinatirofo nooco toquirinin tsacatiroforan, —ishon yoinifo.

<sup>27</sup> Ato ihuunifo Israeli aton yorafohuunshon Dios cufimisi niaifocoin ato yocanonfo, <sup>28</sup> —Non mato cayacafi yoita Jesushuunoa man yosinonma. Ascafia man Jerusalén

anoafó atoti man yoiacufaina. Man ato shinanmapai nonmain na nocofunu Jesús rutumaitaquín. Noco rafancaniran, —huaifoan.

<sup>29</sup> Ascan Pedro futan Jesús fu rafumisi futsafoanri cumacaquin. —Nocofunun noco yonoa cuscan nicatamarocon Upa Diosin noco yonoai cuscan non nicacointiro. <sup>30</sup> Manfin Jesús ihui coyan iquinanqui mastaitaquín rutushquin. Manasca huafia nocon shunifoan aton Diosin Jesús funimaita. <sup>31</sup> “Ua cuscara onihuafotí iquihuún aton Ifo inon,” ishon Apa Diosin Jesús yoini. Ascano Israelifo nocon Numamisi inon non chaca shatunon a ifo huashquin nocon chaca noco soashonon. <sup>32</sup> Non mato yoiái cuscan non afohuunoa yoimisi. Diospan Yoshin Sharapanri nannori yoimisi. Tsoan Dios nicacoianfin ahuun Yoshin Shara aquí nichishquin afu nípanon, —ishon yoiaifoan.

<sup>33</sup> Nicacani fasi atoqui fiishquinifo. Ato rutupaicani. <sup>34</sup> Ato rutupaifiaifoan Fariseo ahuun anu Gamaliel ato nastui nishon ato yoini, —Oinfain. Ato chifi nichiyocahuun un mato yoinon, —ishon yoini. Nan Gamaliel Moisés cununi cuscan tapimamisi. Nantifain ahuunoa yoimisifo, —Gamaliel fasi nocofunu sharacoin. Fasi tapicoianran, —ishon ahuunoa yoinifo. Ascashu nanno ichanannifo a nicapaicani. <sup>35</sup> Ato yoiquin isca huani, —Uhuun yoramishtichin Israelifoan ua nicasharacahuun un mato yoinon. Man nocofunufo rutupaicain. Oinfain. <sup>36</sup> Shinancapon. Fari futsan nocon caifo futsan ahuun anu Teudas, “Unfin mato niaifo itiroquinran,” ishon noco shinanmapaipaoni. Ascano cuatrocientos nocofunufoan a tanapaonifo. Ascafia futsafoan Teudas rutunifo. Ahuun tanamisifo pashcafainifo. Ahua finontama.

<sup>37</sup> Chipo nocon caifo futsa Galilea anoashu noconi. Ahuun anu Judas. “Non niaifofo potanoncahuun,” noco caifo huani. Nanrifi rutunifo. Ascan nantifi ahuun tanamisifori pashcafainifo. <sup>38-39</sup> Ascacufin un mato yoicain ua nicasharacahuun. Jesús tanamisifoan apaiyai cuscan anaitiriscatiroquin. Diosin shinan cuscan yositamarocon nocofunun afi shinan cuscan yoiquin ipaitsi yositirofo. Ascayiamiton Diosin ato yonoaitocai tsoa ato shatumatiroma. Man ato shatumapaiquin Dios fu chaca huan tanain cafiscái man huaicain. Ascacufin ato ahuusca huayamacahuun. Ato nichicahuun, —ato huani.

<sup>40</sup> Nicacani, —Ahuun tsain cayacafi. Noco yoia cuscan non anon, —huanifo. Ascano Jesús fu rafumisifo iquifuranifo. Iquifuranaifoan fichiqui tuchiaton ato fasi coshaqui futsanifo. Coshatan, —Afanan Jesushuunoa tsoa yoiyamacahuun, —ato huanifo. Yoitan ato nichinifo.

<sup>41</sup> Atomaqui focatan —¡Aicho! Upa Diosin nocoqui shinansharaquin non Jesushuunoashu non omitsisca. Ahuunshon niaifofoan nocohuunoa shinanchacaran, —icashu unimanifo. <sup>42</sup> Ascano shafatifi Dios fu tsainti pushu ano yafi pushufotirifi tsain shara yoinifo, —Nocon Ifo Jesusfin nocon Cristonquin. Diospan Furunmun, —ato yosiaino. Ato yoiquin unupaonifoma.

## 6

### *Siete ato futan yonoafó catonni*

<sup>1</sup> Ato yosiainfoanno yora ichapafoan icoínra huacashon Jesús tanamisicinfo inifo. Yora ichapafoan icoínra huariapaonifo. Nantianri nanno Israelifo Griego tsainman inifo. Shoco futsafo Israeli tsainmansi inifo. Nan Griego tsain yoimisifoan tsain chipunifo. —Nocon caifo aton tsain fusti yoimisifoan shafatifi tushu pashcanan huacashon aton ainfo funuomafo inain cuscacai nocon ainfo funuomafo atori ati inanmaran, —ishon tsain chipunifo. <sup>2</sup> Ato nicacani Jesús fu rafumisifo doce nantifi Jesús tanamisifo ichanancashon ato yoinonfo. —Non mato Diospan tsain yoifafaini. Noncái unutiroma mato tushu pashcashoshquin.

<sup>3</sup> Ascan nocon yoramishtichin, matón murannoá nocofunufo siete catoncahuun mato tushu pashcanan huanonfo. Man tapia ratofomain Diospan Yoshin Shara fu rafucain shinansharamisiquin. Nan cuscarao catonhuun non ato yononon mato tushu

pashcanan shara huanonfo. <sup>4</sup> Ascan nonfin shafatifi Upa Dios cufifafainicain ahuun tsainri yoishquin,—ishon yoinifo.

<sup>5</sup> Nicacani nantifi unimanifo. Ascashon Esteban catonnifo. Nanton fasi icoingra huamisi. Diospan Yoshin Sharapan a iquina ini. Felipe non Prócoro non Nicanor non Timón non Parmenas non Nicolás afo catonnifo. Nan Nicolás Israelifomafiashon nanfoan Diosin icoingra huua cuscan arifi anorisi acaifo cuscan shinanni. Antioquía anoashu cainni. <sup>6</sup> Aton catoncashon Jesús fu rafumisifo ano iyonifo. Ascan nan doce ato manmancashon Upa Dios cufishonifo.

<sup>7</sup> Ascatac Diosin tsain mai futsafoanriri yoifoanfafainifo. Jerusalén anoshon sama-mashta icoingra huanifo Jesús tanamisifo ica ini. Israelifoan aton yorafohuunshon Dios cufimisifo ichapaoanri Jesús icoingra huacashon ahuun tsain nicacoinnifo.

### *Esteban achinifo*

<sup>8</sup> Esteban Upa Diosin shinanmasharani ahuun curushu inanni. Ascan ahuunshon ahuamamishti yora atiroma cuscan ato ismani. <sup>9</sup> Ascano Israelifoan aton ichananti pushu futsa nanno ichananshon ato anunifo. —Apaiyai cuscan huatiroforan, —ishon atohuunoa yoimisifo. Nanfocai afanan oinmatifoma. Nanfoan aton mai Cirene anoashu non Alejandría anoashu non Cilicia anoashu non Asia anoafori. Nanfo Esteban fu fochismanantanannifo. <sup>10</sup> Fochismanantanapaifiaifoan Diospan Yoshin Shara Esteban shinansharamani. Cayacaficoatо yoiaino tsoan cumanima.

<sup>11</sup> Ascano fustirasi yoianpacunifo. Tsoa futsa nicanonma. —Estebanhuunoa tsain chaca yoitacahuun. Nanton Moisés yafi Diosqui tsain chaca huaaran, —ishon ato yoitacahuun. Estebanhuunoa chani yoinifo.

<sup>12</sup> Ascan ahuunoa chani nicacani yorahuanrasi Estebanqui fiishquinifoqui. Ascano niaifo patasharifo non Moisés tsain tapimamisifoanri Esteban achinifo niaifoano iyoshcaquin. <sup>13</sup> Ahuunoa chani yoinifo, —Na nocofunun nocon Dios fu tsainti pushuhuunoa yafi Moisés noco yononi cuscahuunoari tsain chaca huariai. <sup>14</sup> Man non nicamisi yoiaiton, “Jesús Nazaret anoaton nocon Dios fu tsainti pushu paoanshquin. Moisés noco yononi cuscari fiananan huairan,” —ishon chani yoinifo.

<sup>15</sup> Ahuunoa chani yoicashon niaifofoan fuiscaquin oianfo ahuun fuso. Diospan oinmati afu nai muran ica ointsa fupishtacoin ini.

## 7

### *Esteban ato cumasharani cuscan*

<sup>1</sup> Ascatac Israelifoan aton yorafohuunshon Dios cufimisi niaifocoin yocani, —¿Mihuunoa chaca huafu cuscan iconmun? —huaiton.

<sup>2</sup> Esteban cumaquin isca huani—Uhuun yorafaoan ua nicacahuun. Nocon shuni Abraham Harán ano icataima Mesopotamia ano ini. Nantianri Upa Diosin fasi chashacoinshon oinmaquin yoini isca, <sup>3</sup>“Min mai anoashu non min yorafu anoashuri catahuun. Un mai futsa ari mia ismaicai. Nanno un mia iyoiran,” ishon Upa Diosin Abraham yoini.

<sup>4</sup> Ascatac Caldeamaquinoashu canishaquin Harán ano ini. Anoashu apa nani. Naacun non icano Upa Diosin nichini. <sup>5</sup> Nuno nichifiashocai maishta inantaima. “Chipo min non min funafori un na mai inain matona inon,” ishon Upa Diosin yoiyotiani. Anori yoiai cuscacai Abraham facu yatai inima. <sup>6</sup> Yoiari “Min funafo yora futsafoan mai ano iiishquicanquin. Aton maima ano iiishquicanquin. Nanno cuatro ciento fari aton yonomisifo iiishquicani. Ato fasi curushcai yonomashcaquin. Fasi omitsiscashcani.

<sup>7</sup> Ascacufin un nan yora futsafo onaintimai. Ascatac chipo aton mai anoashu focani nuno nocoshon ichananfafainshcaquin ua cufishcaniran,” ishon Upa Diosin nocon shuni Abraham yoini.

<sup>8</sup> Ascan Upa Diosin Abraham yononi isca huaquin “Min furonanfacufo ato foshqui rupa shatuhuu. Ascan huatanfin min tapitiroquin. Unfin maton Upa Dios ipanacaquin.

Un mato cushufafaini min funafo ichaparasi inon.” Ascacufin Abraham ahuun facu Isaac caintan ocho osha finontan facu ahuun foshqui rupa shatuni. Ascan Isaac nocofunuaitian man facu yari anuni Jacob. Ascan Jacob nocofunuaitian ahuun facu furonanfacu doce. Nanfo nocon shunifo. Afohuunshon nocon caifo anumisi.

<sup>9</sup> Nocon shunifoan aton ushto José noicasmacaquin yora futsa inannifo ahuun rafanan pui fishcaquin. Ascan José Egipto ano iyono nanno aton yonomisi inon. Asca huafiainfoan Upa Diosin José potanima. A fu imisi. <sup>10</sup> José omitsiscafaiton Upa Diosin numani ahuun nomuran shinansharamani. Ascano Egipcio niaifoan Faraón fasi José fuchipaipaoni. “Min niaifo patashari itiro. Nantifi uhuun yorafo non uhuun caifo min ato nantifi yonotiroran,” ishon Egipcio niaifoan José yoini.

<sup>11</sup> Asca huatan nantifi Egipto anoafori non Canaán anoafori fonico omitsiscapaonifo. Nocon shunifo tushuoma inifo. <sup>12</sup> Nantianri nocon shuni anifoshta Jacob arifi tushu yamaino nica Egipto anoafori man shuqui ichapa ya inifo. Asca ahuun facufo nanfo nocon shunifo nichini Egipto ano shuqui finonfo. <sup>13</sup> Asca huatan chipo afanan Egipto ano fonifo tushu ficani. Nantianri José ahuun ochifo futan chipocuton onannifoma. Onainyamafiainfoan “Uquian, José un maton ushto,” ishon ato yoini. Ascata Egipciofo aton niaifo Faraón arifi José ahuun yorafohuunoa nicani. <sup>14</sup> Chipo José apa tsain fomani, “Upashtan, uqui ohuu. Un nunoshon mia cushusharanon. Nocon yorafori uqui ihuuhuun. Nan setenta cinco yora uqui ihuuhuun, upashtan” ishon José yoini.

<sup>15</sup> Ascata Jacob yafi ahuun yorafori Egipto ano fonifo. Nannoashu nocon shunifo ya nai cuyonifo. <sup>16</sup> Naacun aton caya Siquem ano iyono mai huanonfo. Nocon shuni Abraham mai fiini. Nocofunu ahuun anu Hamor mai inanni pui finon. Nanno mahua quini muran nocon shunifo mai huanifo.

<sup>17</sup> Ascan Upa Diosin Abraham yoiyoní cuscan ato Egipto anoashu cainti chaima. Nantianri nocon shunifo Egipto ano fasin ichapacoin ini. <sup>18</sup> Nantianri Egipciofoan aton niaifo funapacai nocon shuni Joséhuunoa nicayomisima. <sup>19</sup> Nanton nocon shunifo parafafaini. Ato omitsiscamani. Fasi curushcain ato yonomani. “Maton facufo rama caincun potacahuun nanonfo,” ishon ato yononi.

<sup>20</sup> Nantianri nocon shuni Moisés cainni. Caianshu rato facu futsacai a cuscarama. Upa Diosin aqui unimai. Oshu rafu non fusti apa yafi ahua pushu muran onunifo Egipciofoan fuchinonfoma. <sup>21</sup> Oshu rafu non fusti finontan facu chifi cainmafiashon shihuatinin fuposhon unu cusumun tsaoni a murannoashu uaicaiton niaifoan facu shomayaton fuchishon ihuini ahuun facucoin cuscara inon. Ascanshon pushconi. <sup>22</sup> Ascata Egipciofoan tapiafo cuscan Moisés yosinifo. Fasi ahuun mapo shara. Egipciofoan tapini cuscan arifi tapiniquin. Ahuun tsainri cayacafi shara. Niaifo sharapan atiro cuscan arifi asca huapaoni.

<sup>23</sup> Ascan Moisés cuarenta fari aqui caano ahuun nomuran shinanni isca huaquin, “Un natian uhuun caifo nan Israelifo ato oin cai atohuunoa tapishquin,” ishon shinanni. <sup>24</sup> Atoqui nocoshon nocofunu Egipcion Israeli coshaiton oinni. Ahuun caifo numapaiquin curushcain Egipcio coshaquin namani. <sup>25</sup> Asca huatan ahuun nomuran shinanni “¡Aicho! Un aca cuscan uhuun caifoan nicacanquin tapitiro Diosin ua yonoa un ato numanon,” ishon shinanni. Anori shinanfiaino ahuun caifoanci anori shinannifoma. <sup>26</sup> Nan ifainaca shafatan oinpaiquin oian ahuun caifo rafu sutunainfoan oinquin. Ato numapaiquin, “Unucahuun. Manfin yorahuan tananquin. ¿Ahuuscaimun man sutunaincain?” ishon yoini.

<sup>27</sup> Ato numapaiafiaiton ahuun caifo futsan sutuaiton cumaquin chaca huani. “Mifin ihuu. Mincaí ahuama. ¿Tsoan mia yonoamun min nocon niaifo inon min noco iquinon? <sup>28</sup> ¿Min Egipcio nocofunu rutuita cuscan uarifi mian rutupaimun?” ishon yoini. <sup>29</sup> Nicatan Moisés mai futsari ichoni. Nan mai Madián ano ichoni ato muran iyoni. Nannoshon ahuun facu furonanfacu rafu ani.

<sup>30-31</sup> Ascano cuarenta fari finoanno Diosin ahuun oinmati afu nai muran ica Moisésqui nichini. Nantianri Moisés machi ahuun anu Sinain chaimashta cani. Nanno pushu yamacain nii yamai. Fasi yafi chofo uhuapama fusti nanno. Nii cuyamamishti urufiainocai coonima. Moisés oinni. Oiainno mustairini. Ascan tapipai ahuuscain nii cuyamamishti urufiashucal nocaima chaimashta cashon. Oinni nii cuyamamishti uruai muran Upa Diosin ahuun oi nicani. <sup>32</sup> “Unfin min shunicaifoan aton Diosiquin. Abraham non Isaac non Jacobori un aton Diosiran,” ishon yoini. Nicatan Moisés ratui taritarini. Afanan uru oinyamafiain aqui ratuni.

<sup>33</sup> “Unquian un nuno ica. Ahuara chaca ufu itiroma. Ascan min sapato pucahuu un mia yoinon. <sup>34</sup> Uhuun yorafo Egipto ano omitsiscal cuscan mun oian. Man pashapaiyaifoan mun nica. Ascan un fotoa ato caimashquin. Natian un mia Egipto ano afanan nichicai.”

<sup>35</sup> Nan Moisés nocon shunifoan a nicacasmanifo. “¿Tsoan mia yonoamun min nocon niaifo inon noco iquinshquin?” ishon yoifiafo Upa Diosin Moisés catonni nocon shunifoan aton niaifo inon ato numanon. Nan nii cuyamamishti uruai anoshon Upa Diosin Moisés afanan Egipto ano nichini nocon shunifo numanon. <sup>36</sup> Nanno Dioshuunshon ahuarashta tsoan oinyomisima shara ato ismani yoran atiroma cuscan ato ismani. Unuhuan ahuun anu oshin anori tsoan atiroma cuscan Dioshuunshon ato ismani. Tsoan istaipamashon nanscasi huapaoni.

<sup>37</sup> Nocon shunifo Israelifo yoini “Chipo Upa Diosin nocofunu ua cuscara matoqui nichishquin. Nocon caifo ishquiquin. Inon pacuai cuscan mato yoishquin a nicasharacahuun,” ishon Moisés ato yoini. <sup>38</sup> Moisés tsoan istaipama ano nocon shunifo fu ipaoni. Machi Sinain anoshon Diospan oinmati afu nai muran icaton a yoini cuscari nocon shunifo tapimani. Nan Diospan tsainman noco nimapacutiro ishon ato yoini.

<sup>39</sup> Yoifiaiton nocon shunifo Moisés nicacasmanifo. “Min nocon yonotiromaran,” ishon shinanni. Aton nomuran Egipto ano nasopaicani. <sup>40</sup> Ahuun ochin Aarón yoinifo “Dios futsan cuscara noco rami huashohuun. Nanton noco tapimatiro non raqui caimancai. Moisés noco Egipto anoshon iyoafiacun ahua finoanmun noncái tapiama. Machi mamaqui inacun non afanan oianmaran,” ishon yoinifo. <sup>41</sup> Nantian Aarón ato moipan facu cahua shara ointsa rami huashoni aton Dios inon. “¡Aicho! Nan moipan facu cahua shara ointsa non rami huaa. Nan nocon Dios. Non ichananshotiro moi futsa rutushoshquin a fufori ratashoshquin nocoquin unimanon. ¡Aicho! Non rami huaa cuscan shararan,” ishon yoinifo.

<sup>42</sup> Ascano Upa Diosin afanan atoqui unimanima. Ato potayoni “Ua afanan tana-paicanima. Ascacuncal un ato numaima. Aton diosicoimma ipaitsi aton nomuran shinantirofo. Fishifo ipaitsi shinantiro aton diosiran,” ishon Diosin yoini. Nocon shuni Amós inonpacoi cuscan Diosin tsain yoimisi ini. Diosin atohuunoa yoini cuscan cununi isca huaquin,

“¿Man cuarenta fari pushu yamai ano cahuacacainnai ua yoina rutushon ua inanpaicani. Ahuara futsari ua inanpaicanimun? <sup>43</sup> Ma. Mancaí maton nomuran ua shinancoianma. Man yoimisi isca huaquin, ‘Nocon dios Moloc yafi nan fishi Refán,’ man huamisi. Ahuara futsan man rami huashon. Noco diosiran man huamisi. Ascan un mato caifo futsa ano mato nichicai. Mato achinonfo aton yonomisifo man inon. Babilonia mai orima futsa ano fasi chai un mato nichicain.”

<sup>44</sup> Nocon shunifo tsoan icamano foanfafainpaonifo pano pushu fonifo a muranshon Dios cufinifo atofu inon. Ascan man isma Upa Dios aton Dios aforifi ahuun yoraquin. Upa Diosin nocon shuni Moisés oinmani cuscan pano pushu onihuani.

<sup>45</sup> Ascatañ fari ichapa finontan nocon shunifoan nan pano pushu fonifo. Nantianri aton niaifo ahuun anu Josué ato iyoni mai futsa finonfo. Diosihuunshon caifo futsafo

nan mai anoafó potanifo aton mai inon. Nan Josué niaifo taupaonino man fari ichapa finontan Davidrifi yositirofo pano pushu muran ichananpaonifo Upa Dios cufishcaquin. <sup>46</sup> Upa Diosin David fasi noi aqui unimaicoinni. David Upa Dios cufinquin yoini, “Upa Diosin, min nocon shuni Jacob ahuun Dios nocon Diosiri, un mia pushu futsa shara huashoin. Ihui yafi toquiri pushu un mia onihuashopai a muran un non uhuun yorafo mifu inon mia cufishcaquin,” ishon yoini. <sup>47</sup> Anori cufifiainton furun Salomón pushu huanshoni.

<sup>48</sup> Ascanfiacai Diosin yora pushu huaa muran itiroma. Diosin nai muran icanoshon nantifi finoncoian. Diosihuunshon nocon shunin inonpacoai cuscan yoini isca huaquin.

<sup>49</sup> “Nai muran un ica. Nannoshon un nantifi oni huati un iquini. Nan mairi un onihuani. Nai muranshon un mai oinfafainni. Nanri uhuuna. Nantifi onihuafoti nai murannoaa yafi mai anoafoti uhuuna. ¿Ascanahuuscashocon man ua pushu huashotiro mun un a muran fusti inon futsa ano cayamashquin?

<sup>50</sup> ¿Un nantifi onihuanimamun?”

ishon Diosin yoini.

<sup>51</sup> Manfin maton shunifo cuscaracoinquin. Fasi nicayosmashunifo. Upa Diosin tsain nicapaicoincanima. Man icoingra huacoinmisima. Diospan Yoshin Shara mato yoimisi cuscacai man nicacoinmisima. <sup>52</sup> Maton shunifoan nantifi Diosihuunshon inon pacoai yoimisifo man ato omitsiscamapaoni. Inonpacoai yoimisi futsafoan yoinifo, “Nocon Numamisi isharamisi nocoqui oshquiquin,” ishon yoipaonnifo. Nanfoanri nocon shunifo man rutunifo. Man yoinifo cuscan nocon Numamisi shara nocofiacun nanrifi man rutuafó. <sup>53</sup> Upa Diosin ahuun oinmati afu nai muran icafo nichini ahuun tsain mato inanfiafocai man nicapaimaran, —ishon Esteban ato yoini.

### *Esteban nani cuscan*

<sup>54</sup> Nicacani fasi fiishquinifo. Aqui sinacoincani. <sup>55</sup> Ascano Diospan Yoshin Shara Esteban rafuquinaino nai muran foisini Diosin chashamanaiton ointapaiquin oian Jesús Apa fu nia ini. Nan rafutan ahuamamishti huaifoan oinni. <sup>56</sup> Oinshon yoini, —¡Oincapon! Un nai muran oin. Nanno Jesucristo Diospan furun nocoqui nichini afu nia. Un oinran, —ishon ato yoini.

<sup>57</sup> Nicacani aqui sinacoincani. Mucanifo. Ahuun tsain nicacasmacani pafopomunifo. Aqui ichonifo. <sup>58</sup> Achicashon pushurasi pasotainri sharafonifo. Aton sahuuti pucashon ointiaca ahuun anu Saulo nia naman machinifo. Ascacatan toquirifoan Esteban tsacaquin futsanifo.

<sup>59</sup> Toquirinin tsacaifoanno Esteban iscani, —Ifo Jesús, uhuun yoshin mi ari ihuihuun, —ishon yoini. <sup>60</sup> Yoitan ratoconun mai chachishon oi ashcafín yoini, —Ifon, ua chaca huafiaifoan ato numahuu. Ato rau huahuun, —ishon yoini. Yoitan nani.

## 8

<sup>1</sup> Naacun Saulo ato yoini, —Manfin shara huaqui rutuaquin, —ato huani.

### *Saulo icoingra huaifo omitsiscamani*

Nan shafatanri icoingra huamafoan Jesús icoingra huafó Jerusalén anoshon fasi ato omitsisca huanifo. Ascano Judea ari non Samaria mai ariri pashcafainnifo. Nan doce Jesús fu rafumisifocai atofu fonifoma. Jerusalén ano nitunifo. <sup>2</sup> Ascano nan Dios tanasharapaiyaifoan Esteban mai huanifo. Noicani fasi uainifo. <sup>3</sup> Ascantan Saulon Jesús icoingra huaifo fasi ato noicasmani. Ato cuyopaiquin. Fasi ato omitsisca huan. Pushuti iquicahuacacaini ato achishon cunu muran iquimashquin. Ainfofo yafi nocofunufori ato asca huan.

### *Tsain shara Jesushuunoa Samaria anoa yoinifo*

<sup>4</sup> Ascatan nan Jerusalén anoashu pashcafainnifo. Diosin tsain Jesucristohuunoa ato yoifoanfafaini. <sup>5</sup> Nocofunun ahuun anu Felipe Samaria mai ano cani. Nanno pushurasi futsan anoshon ato Cristohuunoa yoini. <sup>6</sup> Yorahuanrasifoan nicanifo. Dioshuunshon tsoan atiroma cuscan ato ismani. Ascaiton oincani fasi nicapaicani aqui taisinifo. <sup>7</sup> Yoshin chacafo yorafomaquinoa potani. Atomaqui potaino fisifainifo. Yoratishon charishi futsuafo non chato chatotianifo Felipe Jesushuunshon ato caya huani. <sup>8</sup> Asca huano nantifi pushurasifoti unimacoinnifo.

<sup>9</sup> Ascan nanno Samaria mai ano nocofunu ahuun anu Simón. Nanton yoshin chacahuunshon yoran atiroma cuscan huapaoni,—Tsoa futsacai ua cuscarama. Unfin fasi uhuapa sharaquin,—ishon cacapaimisiton yoini. <sup>10</sup> Ascano nantifi yorafoan nan niaifofo yafi yora ahuamafo a nicacoinnifoquin. —Nan nocofunu Simón fasi ahuamamishti huatiro. Diosihuunshon yora atiroma cuscan noco ismairan,—ishon yoinifo.

<sup>11</sup> Yoshin chacahuunshon yora atiroma cuscan huaiton oincaquin ahuamamishti acaiton nan fusti fari ranan tanannifo. <sup>12</sup> Ascafainfoan Felipen ato tsain shara Jesucristohuunoa yoaiton Upa Diosin yorafo iquinai cuscan a icoinra huanifo. Icoinra huaifoan ato unu muran iquimapacuni. Nocofunufo yafi ainfofori iquimapacuni. <sup>13</sup> Nan Simón arifi icoinra huacun unu muran iquimani. Ascano Felipen Jesucristohuunshon ahuamamishti yoran atiroma cuscan huaiton oin fasi mustairini. Ascashon Simón Felipe mufoanfafainni acaiton oinquin.

<sup>14</sup> Ascano Jesús fu rafumisifo doce Jerusalén anoafaoan Samaria anoafao Diospan tsain icoinra huaifoan nicacaquin Pedro yafi Juan ato ari nichinifo. <sup>15-16</sup> Nococashon nan rafutan oian Samaria anoafaoan nocon Ifo Jesús fusti icoinra huanifo. Ahuun Yoshin Sharahuunoa tapiataifoma. Ato iquinataima. Unu muran iquimapacuano Jesús fusti ifoancoinnifo. <sup>17</sup> Ascano Pedro futan Juanpan manmanyana Upa Dios cufishonifo ahuun Yoshin Shara ato iquinon.

<sup>18-19</sup> Jesús fu rafumisifo rafu Pedro futan Juanpan ato manmanni Diospan Yoshin Shara ato iquinaiton Simón oinni. Oinshon yoini isca huaquin,—Uarifi tapimahuun man aca cuscan un ratoran yora mayatashon Diospan Yoshin Shara ya un ato imanon. Man ua tapimacun un mato pui inanon,—ishon ato yoini.

<sup>20</sup> —Ma. Min shinan raca non puihuushon Diosin noco inanpaiyai cuscan non fitiro. Anorimafinquin. Ascano minfin min pui ya min maicain. <sup>21</sup> Min nomuran min Diosihuunoa shinansharama. Ascacucain non Dios yonoshonai cuscan min no futan atiroma. <sup>22-23</sup> Min nomuran min shinanchaca cuscan mun onan. Mincai Diospan yonomisifoan atiro cuscan min atiroma. Ascan min chaca mimuran fospicoian. Chaca min ifo. Ascan nocon Ifo Jesús cufihuun min nomuran min shinanchaca cuscan rau huanon,—ishon Pedron yoini.

<sup>24</sup> —Ua Ifo Jesús cufishohuun min ua yoia cuscan ua Diosin onaintimanonma,—ishon Simón cumani.

<sup>25</sup> Ascatan Pedro futan Juanpan Samaria anoafao nocon Ifo Jesús tsain ato yoicatan Jerusalén ano nasofainifo. Focaquin pushurasifo ano ato tsain shara Jesushuunoa yoifonifo.

### *Felipe yafi Etiopía niaifo patashari*

<sup>26</sup> Nantianri nocon Ifo Jesús ahuun oinmati afu nai muran icaton Felipe yoini,—Na fai tapiaquiri nii yamai Jerusalén yafi Gaza nushmancayan catahuun,—huani. <sup>27</sup> Caquin nocofunu Etiopía anoa oaiton oinni. Nan nocofunun ahuun caifo aton niaifo patashari. Ahuun niaifoncoin ainfoan. Ahuun caifo aton pui cushushomisi iniquin. Jerusalén anoshon catani Upa Dios cufitani. <sup>28</sup> Nasocurani oi ahuun inapan aya ninifoaino ahuun

taramuti chinutamuashu cayacafi cani. Tsaoshon Diospan tsain Isaías cununi cuscan oinfoli aya caino.

<sup>29</sup> Oinfoicai Felipe fu noconanni. Noconanshon Diospan Yoshin Shara Felipe yoini, —A taramutiyahuun aqui catanhuan —huani. <sup>30</sup> Aqui ichotan nican Isaias nan inon-pacoai Diosin tsain cununi cuscan anufoaiton. Nicaquin yocani, —¿Min oiain cuscan min tapiamun? —yocaiton.

<sup>31</sup> —Ma ¿Ahuuscashorocon un tapiafin? ¿Tsoan ua yosiamaiton? —huaiton. Ahuun iyomisi nitumatan. —Mapuinifoanhuun. U fu tsaoinacahuahuun, —huani.

<sup>32</sup> Mapuinifoantán oinni Isaias cununi cuscan oinquín. Cunuquin isca huani,

“Nan chashoan iyoshon rututirofo cuscan arifi iyonifo rutushcaquin. Chashoanun facu ahuun rani shatuainfoanno furoitiroma cuscarifiai arifi pusinima.

<sup>33</sup> Rafini huanifo ahua chaca huua nicayamafiacashon niaifofoan numapainifoma. Numatamarocon rutunifo. Chaca huacoinnifo cuscacai non cainmatiroma, tsoancai atirifi noco tapimatiromaran,”

ishon Isaias cununi cuscan oinni.

<sup>34</sup> Ascashon Felipe yocani, —¿Isaias cununi cuscan ahuunoa cununi iyamaraimun futsahuunoa cununi? Ua yoipun, —ishon Etiopía niaifo patashari yocaiton.

<sup>35</sup> Cumaquin, —Isaias Jesushuunoa cununiran, —ishon cumani. Nan tau huaquin yoiaino Diospan tsain futsafori ismani a Jesushuunoa cununi. Diosin tsain shara ahuunoa oinmani. <sup>36</sup> Caino atoqui unu noconi nocofunun etiope yoini, —Oinpon unu. ¿Mian na unu muran iquimatiromun un Jesús icoinra huacoinnai cuscan un ismanon? —ishon yocaiton. <sup>37</sup> —Jesucriston Diospan Furun min ointi muran min icoinra huacoinnaiton un mia iquimatiroran, —ishon Felipe yoini.

<sup>38</sup> Asca huatan ahuun iyomisi nitun huani. Nitun huano Felipe fu fotocani unu muran iquimanon. Ascano iquimapacufoantán cainmani. <sup>39</sup> Unu cusumun nocofonfo Diosin ahuun Yoshin Sharapan mai futsari Felipe iyoriscatani. Nocofunun oinni Felipe yamariscatanaiton afanan oinnima. Ascafashu fasi unimai ahuun mai ari cani.

<sup>40</sup> Ascanrifiatan Felipe mai futsa ahuun anu Azoto ano nitariscani. Nanno yafi nantifi pushurasi Cesarea fai anori cashon tsain shara Jesushuunoa ato yoifoanfafaini.

## 9

### Saulo Jesús ifoanquin shinan futsacunfoanni

Hch 22.6-16; 26.12-18

<sup>1-2</sup> Nantianri Saulo nantifi Jesús icoinra huafo rutupaiyai. —Un nantifi Jesús tanamisifo un rutuicain, —ishon yoini. Ascan Israeli aton yorafohuunshon Dios cufimisi niaifocoin ano cashon yoini, —Ua cunushohuun un nantifi ichananti pushu Damasco ano ismanon min ua yonoa un Jesús icoinra huafo nocofunufo non ainfotri fuchishon Jerusalén ano un ato cunu muran iquimanon, —ishon yoini. <sup>3</sup> Ascanofin Jerusalén anoashu cai Damasco ano nocoti chaima samamashta nai arishon chashatanaino pacuni. <sup>4</sup> Pacuquin ahuun oi nican, —Saulo, Saulo, ¿Ahuuscaquimun mian omitsisca huaiquin? —huaiton.

<sup>5</sup> —Ifon, ¿Minmun tsoaquin? —ishon yocaiton. —Unquian Jesús. Mian omitsisca huai.

<sup>6</sup> Funihuu. Pushurasi Damasco ano catashquin nannoshon min ahua huaimancain un mia yoinon, —huani.

<sup>7</sup> Yoiaino afu foafo puusinifoma. Ahuun oi nicaquiaquin tsoan oinnifoma. <sup>8</sup> Saulo funinaca huapai fushoacucahanaiton mutsoinfoannifo. Ascashon Damasco ano iyonifo. <sup>9</sup> Nannoshon osha rafu non fustitan oinyamafain ayayamafain piqui tununi.

<sup>10</sup> Asca huatan nanno Damasco ano Jesús tanamisi futsan ahuun anu Ananías namapan cuscara Jesús yoini, —Ananías, —huaiton —Unquian, Ifon, —huaiton.

<sup>11</sup>—Fai Cayacafiran huamisifohuun catahuun. Ari cai Judaspan pushu ano catahuun. Nocoshon min ato yocatiro nocofunu Saulo Tarso anoashu cainni nanno pushu muranquin. Nannoshon Saulo ua cufinquin. <sup>12</sup> Ahuun namapan cuscara mia oian min manmainno afanan oinsharanon, —huaiton.

<sup>13</sup>—Ifon, tsain ichapa ahuunoa mun nicamisi. Nantonfin mia icoira huafo Jerusalén anoafó ato chaca huamisiquin. <sup>14</sup> Natianri mun nica Jerusalén anoashu nuno oi. Nocon yorahuunshon Dios cufimisi niaifofoan a yonoa nantifi mia icoira huafo cunu muran iquimaniran, —huaiton.

<sup>15</sup> Yoifiaiton, —Un mia yoia cuscan catahuun. Un na nocofunu catoan Israelifoma non aton niaifofo non Israeliforifi uhuunoa ato yoinon. <sup>16</sup> Uhuunoashu fasi omitsiscái un oinmacoинshquiran, —ishon yoini.

<sup>17</sup> Ascatacnicafainicai Ananías cani. Cai pushu muran iquini. Iquicain Saulo fuchitan manmantoshini. —Mun oa. Uhuun yorashtan, min fain oquin nocon Ifo Jesús oian. Nanton ua nichian min afanan oinsharafain ahuun Yoshin Sharapan mia iquinon, —ishon yoini.

<sup>18</sup> Yoiaino ahuun furo murannoashu pusu cuscara fupacumuni. Ascashon oinsharacufaini. Ascatafin Jesús icoira huashu unu muran iquitan funinaca huaniquin. <sup>19</sup> Iquitan cainnacahuan pini. Pitán muacai afanan shaca fuanima. Ascatac mutsisinacahuani. Shafa ranan Jesús tanamisifo fu Damasco ano iyoni.

### *Saulo Damasco anoshon ato yosini*

<sup>20</sup> Anoashu ichananti pushu ano nocoshon ato yoini isca huaquin, —Jesús Diospan Furunquin, —ishon ato yoini. <sup>21</sup> Nicacani mustairinifo. —Ahuuscaquitsi Jerusalén anoa Jesús tanamisifo ato chaca huafain. Nunoari ahuun tanamisifo munushushon nocon yorafihuunshon Dios cufimisi niaifofoqui ano iyónon natianrifi, “Jesús Diospan Furunquin” noco huaiquin, —icashu yoinannifo.

<sup>22</sup> Ascano Saulo Jesushuunoa fasi tapiquin finacoinni. Ahuun curushu Jesús inanni ahuunoa ato yoinon. Ascan cayacaficoín ato yoini, —Jesús Diospan Furun nocoqui nichiran, —ishon tsoa futsacai anori yoiaiton nicayomisifoma. Ascaiton shinancaquin, —¿Ahuuscashocaicon na nocofunun tapicolianmun? —ishon ahuun caifoan Israelifoan shinannifo.

### *Saulo ato rashquimafainni*

<sup>23</sup> Ascano shafa rananun ichananshon Israelifoan shinapainifo ahuuscashomain Saulo rutumatirofoquin. <sup>24</sup> Ascano futsan Saulo yoini, —Mia rutupaicaniran —ishon tapimani. Yonoafono shafatishon yafi yamutishon cushushinifo Saulo oaiton rutushcaquin. Pushurasi aton caincaiti anoshon cushunifo. <sup>25</sup> Asca Saulo caicuranaiton rutupaifiaifoanno fomancayan pochinin tsuhuu anori futanmanhuan muran nanushon yamutan tanamisifoan fotomapacufoannifo.

### *Saulo Jerusalén ano ini*

<sup>26</sup> Fotomafo Jerusalén ano cani Jesús tanamisifo fu iquicai. Iquicafaiton aqui musunifo. —Nacai Jesús tanamisicoinmaran, —icashu yoinannifo. <sup>27</sup> Ascafaino Bernabé icoira huacoinni Saulo tanasharacun. Ascashon Jesús fu rafumisifo doce ano iyóni ahuunoa shara ato tapimanon. —Damasco fain caquin Saulo ano caiton nocon Ifo Jesús oian. Ascano Damasco anoshon noco Ifohuunoa ranotama ato yoifafainiran, —ishon ato yoini. <sup>28</sup> Nicacaquin icoira huanifo Saulo atofu Jesús tanamisi ica. Ascano atofu iyopaoni. Jerusalén anoafori ranotama nocon Ifo Jesushuunoa ato yoini. <sup>29</sup> Ahuun caifo Israelifoflashon Griego tsain tapinifo ato Jesushuunoa yoiaino fochishmanantanannifo. Ascashon a rutupainifo. <sup>30</sup> Nannori Jesús icoira huafoan nicacatan Cesarea ano iyónifo. Anoshon Tarso ano nichinifo.

<sup>31</sup> Ascaino Jesús icoinra huafoan Judea anoafó non Galilea anoafó non Samaria anoafori isharanifo. Nantian tsoan ato omitsiscamanima. Diospan Yoshin Sharapan ato mutsismana Jesús tanasharashu aton nomuran fupi huamani. Nanscaino parata-mafain Jesús icoinra huanifo. Icoinra huacashon Dios nicasharapainifo.

### *Eneas caya huamani cuscan*

<sup>32</sup> Nantianri Pedronun ato yosifoanfafaini. Icoinra huafo Lida anori oinmitsai cani. <sup>33</sup> Nanno nocofunu ahuun anu Eneas fuchini. Charishi futsua ini. Ocho fari aqui caa funitiroma ini. <sup>34</sup> Fuchishon Pedronun yoini,—Eneas, Jesucristo mia caya huamaquin. Funihuu min oshati shara huahuu,—ishon yoini. Asca huaino samamashta funina cahuani. <sup>35</sup> Nantifi Lida anoafó non Sarón anoafowanri oincashon nocon Ifo Jesús icoinra huanifo.

### *Dorcus man nacoinfiacun Jesushuunshon Pedro funini*

<sup>36</sup> Ascata Jope mai futsari ano ainfo ahuun anu Dorcas ica. Ahuun anu futsa Tabita. Nan ainfo Jesús tanasharamisi. Shara huamisi ahuomafori ashomisi. <sup>37</sup> Nantianri isinin ipapacucahuashu naani. Nacun rashucashon pushu fomancayan ratanifo. <sup>38</sup> Ascano Jesús tanamisifoan nicafo Pedro Lida chaimanoa. Nicacaquin yora rafu Pedroqui nichinifo yoinon,—Oinrisca huayonon,—Pedro huanifo.

<sup>39</sup> Nicatan atofu cani. Nococatan pushu fomancayan mapufainifo. Nanno ainfo funuomafo uainifo.—Oinpon. Nocon yora yamashtan nocon sahuutifo icushushomisi. Niyoshon noco shara huamisiran,—icashu uaiquin Pedro yoinifo.

<sup>40</sup> —Chifi cainfaintacahuun, —Pedronun ato huani. Foainfono ratoconun mai chachipacufoantan Dios cufini. Ainfo yamashta oinquin yoini,—Tabitan, funinaca huahuun,—huaino. Fupuinacahuatan Pedro oinni. Ointan tsaoинacahuani. <sup>41</sup> Ascaiton Pedronun mutsoinfoanni. Mutsoinfoantan Jesús tanamisifo yafi funuomafo cunani Tabita man funia ato oinmashquin. <sup>42</sup> Oincani nantifi yorafo Jope ano chanifoan-fafainifo. Ascaiton nicacani yora ichapafoan nocon Ifo Jesús icoinra huanifo. <sup>43</sup> Ascata Pedro Jope pushurasi ano nituyoni. Nocofunun ahuun anu Simón nan fichi shinan huamisi ahuun pushu muran iyoni.

## 10

### *Pedro yafi Cornelio*

<sup>1</sup> Nantianri nocofunun ahuun anu Cornelio mai futsa Cesarea ano ini. Afin ranushumuafoan aton niaifo. Nan ranushumuafaoan anumisi —Italianoran, —huamisifo. <sup>2</sup> A non ahuun yorafori Diosquiri shinansharamisifo. Nocofunu fasi shara. Ahuuomafo ato inanmisi. Dios cufifafainmisi. <sup>3</sup> Ascan shafa futsan fari nai pochinin racano oshashoma namapan cuscara Diospan oinmati afu nai muran ica aqui oaiton oinni,—Cornelion, —huaiton. <sup>4</sup> Fasi ratucoinquin oinni, —¿Ahua min ua yoipaimun Ifon? —huaiton. —Diosin mia oian min shafatifi cufiainton min yora ahuuomafo pui inanmisi. <sup>5-6</sup> Ascan nocofunufo Jope ano nichihuun. Nanno nocofunu Simón ahuun anu futsa Pedro ihuinon. Nan fichi shinan huamisi ahuun anuri Simón ahuun pushu muran ica. Ahuun pushu unuhuan cusumunriran,—ishon Diosin nai oinmatin yoini.

<sup>7</sup> Yoitan amaquinoashu cani. Ascan Cornelio ahuun oinmati rafu non ranushumua ahuun cushumisi nanton Dios shinamisi cunani. <sup>8</sup> Diospan nai oinmatin yoa cuscan nantifi ato tapimani. Tapimashon ato Jope ano nichini.

<sup>9</sup> Ascan iyoconaino fari masafinin racano Jope chaimashta noconifo. Nantianri Pedron pushu manmancaya cashon Upa Dios cufi caicani. <sup>10</sup> Fonaincaiton futsan pichashoni. Pichanqui anaitiataima Pedron oshashoma namapan cuscara ahuara futsa oinni. <sup>11</sup> Nai fupuicano pano putanmanhuan cushtocoin nai murannoashu fotopacu-cahuani. <sup>12</sup> A muran yoina futsa futsatapafo non ronofo non mai ano sharatirofo non

puiyafori. <sup>13</sup> Oinquin ahuun oi nica isca huani,—Pedron, funihuu. Rutushon piishquin,—huaiton.

<sup>14</sup> —Ma, Ifon. Ascaracai un pimisima. Moisés noco yononi na cuscara non pitiroma. Suya chacaran,—huaiton.

<sup>15</sup> Afanan ahuun oi nica,—Diosin na cuscarafo imashara. Ascan afanan nan chacaran huayamahuu,—huani.

<sup>16</sup> Rafu non fusti nanscaracoin oinni. Ahuun unutaqui afanan nan pano putanman-huan nai muran cani.

<sup>17</sup> Ascano Pedronun ahuun nomuran fasi shinanpaini,—¿Ahua ua Diosin yoipaimun? —ishon shinanni. Anori shinanquin nan nocofunufo Cornelio nichian Simón pushu caincaiti ano nococashon yocanifo. <sup>18</sup> —¿Nocofunu Simón ahuun anu futsan Pedro nunomun? —ishon yocanifo.

<sup>19</sup> Nantianri Pedro namapan cuscara shinainno Diospan Yoshinin yoini,—Nocofunu rafu non fustiton mia funai fuaforan. Un ato miqui nichian. Ascan shinanchayamahuu. <sup>20</sup> Fotopacucahuatan atofu catahuun,—huani.

<sup>21</sup> Ascaino Pedro atoqui fotoni. —¿Man ua funai fuamun? ¿Ahuuscaquimun man ua funaicai? —huaiton.

<sup>22</sup> —Nocon niaifo ranushumuaton noco nichian non mia ihuunon. Nanton nocofunu shara. Diosquiri shinanfafaimisi. Cornelio nocofunu shararan min caifo Israelifoan huamisifo. Diospan oinmati sharapan afu nai muran icaton yonoa, “Pedro min pushu ano ihuitahuun mia yoisharanon,” ishon yoitan. Ascan “Ua ihuisheratihuun,” noco huaiton. Non mia ihui oaquin—huanifo.

<sup>23</sup> Nicaquin,—Iqui fucahuun. Non pinon. Nuno oshayoshcaquin,—ishon Pedro ato yoini. Iyoco futsaino atofu cani. Icoinra huafu Jope anoafori atofu fonifo.

<sup>24</sup> Focanashu iyocofutsaino Cesarea ano noconifo. Nannoshon Cornelio ato cunano ahuun yorafo ahuun pushu ano ichanannifo Pedro manacani. <sup>25</sup> Pedro pushu muran iquiano Cornelion fuopacucahuatan,—Min fasi shararan—ishon yoini. <sup>26</sup> —Funihuu. Uncai Diosimafinquin. Urifi un nocofunuquin. Min icai cuscarifiai un nocofunuquin,—huani.

<sup>27</sup> A fu tsainquincai cunu futsan muran caashon yorafo ichanancashon manacaquin oinni. <sup>28</sup> Ato yoini,—Man man tapian nocon shunifoan yonoa non Israelifoma fu rafutiroma. Non matofu oinmitsatiromaran, ishon noco yoini. Ascafiacon uhuun namapan cuscara Upa Diosin ua tapimaita un tsoahuunoa shinanchacatiroma. Atofin nantifi manifoannati noicoinquin. <sup>29</sup> Man ua iyopaiyainocai un cacasmama. Ascatamarocon un samamashta oa. Natian un tapipai ahuuscaquimain man ua ihuipaiaquin,—ishon Pedro yoiaiton.

<sup>30</sup> Cornelion cumani,—Osha rafu non rafuri finontan nantianri un Upa Dios cufiaino nocofunu ahuun sahuuti chashaino uqui niriscatana. <sup>31</sup> “Cornelion, min cufiain cuscan Upa Dios nica. Min ahuuomafo inainton oian. <sup>32</sup> Ascashon nocofunufo Jope ano nichihuun Simón miqui ihuunon. Ahuun anu futsa Pedro. Simón futsan nanton fichi shinan huamisi ahuun pushu muran ica. Ahuun pushu unuhuan cusumunri icaran” ishon ua yoita. <sup>33</sup> Ascano un samamashta nocofunufo nichian mia ihuunonfo. ¡Aicho min noco shara huaa! Samamashta min nocoqui oa. Ascashon man non ichanan nocon Ifon minhuunshon noco yoipaiyai cuscan nantifi non nicanon,—ishon Cornelion yoiaiton.

### *Pedronun Cornelio pushu muran icafo ato yoini*

<sup>34</sup> Ascaiton Pedronun nishon yoini,—Nantian mun tapia iconquin. Upa Diosin nantifi yorafo nan manifoti anoafu noicoian. Upa Diosinciai toon huatan noima nanscasi huaquin noicoin. <sup>35</sup> Manifoti ahuun tsain nicapaicani shara huan tanammisifofin Upa Diosin ahuun facufo itirofoquin. <sup>36</sup> Diospan Furun Jesucristo manifoti anoafuan

aton Ifo. Ahuunshon Upa Diosin afanan noco onaintimaima. Man nicaino fasi unimacoincaquin. Nannori Upa Diosin uhuun caifo Israelifo tapimani. <sup>37</sup> Judea mai anoa ica cuscan man man nicamisi Galilea ano ato yoquin tauhuani. “Maton chaca shatucahuun Dios icoinra huacahuun un matounu muran iquimanon,” ishon Juanpan ato yoini. <sup>38</sup> Ascan man man nicamisi Juan cachiori Jesús oni. Upa Diosin ahuun Furun Jesús ahuun Yoshin Shara nichian afu rafunon ahuunshon ahuamamishti yora atiroma cuscan anon. Ahuara sharafo huafoanfafaini. Upa Diosin afu imisi nantifi yora yoshin chaca ato yonoaiton atomaquinoa potani.

<sup>39</sup> Nantifi nan aca cuscan uhuun caifo Israelifo mai anoa yafi Jerusalén anori man non oinmisi. Ihui coyán iquinanqui mastayamuafó. <sup>40</sup> Asca huafiafo osha rafu non fustitan Upa Diosin mai murannoá funimaita noco oinmana. <sup>41</sup> Atirifoancai oinyamuama. Ratoranfo nan Upa Diosin catoanfoansi oinyamuafó. Mai murannoá funiano non a futan pifain ayayamua. <sup>42</sup> “Manifoti anoafo uhuunoa ato yoitacahuun. Upa Diosin ua catonni nantifi yorafoti nan niafo nan naafori un ato yoitiro ratofomain un icano nipatiro iyamarai omitsiscapanaca muran focanicain. Ato yoifoanfafaincahuun,” Jesús noco huayamua. <sup>43</sup> Diosin tsain yoishomisifoan isca huani ahuunoa cununifo. “Tsoan a icoinra huacun ahuunshon Upa Diosin aton chaca soatiro rau huanon,” ishon cununifo. —Pedronun ato yoini.

### *Israelimafoan Diospan Yoshin Shara finifo*

<sup>44</sup> Yoiaifono nantifi ahuun tsain nicaimisifo Diosin ahuun Yoshin Sharapan ato muran nanucoinni. <sup>45-46</sup> Ascano anori tsain nicayamafiamisishacaquin Diosin Yoshin Sharahuunoashu tsain futsanman iqui futsunifo. Ascaifoan nicacani Israelifoan nan icoinra huafó nanno mustairinifo. —¡Aira! Nan yorafó nocon caifomafiaflashu Upa Diosin ahuun Yoshin Shara atoti nanumanaran, —ishon yoinifo. Ascano Pedron ato yoini. <sup>47</sup> —Non Diospan Yoshin Shara fia cuscan afoanrifi fiafo. ¿Ascan ahuuscaimun unu muran iquimamutiromaqun? —ishon Pedro yoini.

<sup>48</sup> Ascano, —Jesucristo icoinra huafó ato unu muran iquimapacuhuun, —ato huani. Ascata, —No fu iyopun, —Pedro huanifo.

## 11

### *Pedronun icoinra huafó Jerusalén ano ato tapimani*

<sup>1</sup> Ascano Jesús fu rafumisifo doce non icoinra huafó Judea anoafoanri nicanifo Israeli anoamafoanri Diospan tsain icoinra huanifo. <sup>2-3</sup> Ascano Pedro Jerusalén ano noconi ahuun caifo nan Israelifoan aqui tsain curushu yoinifo, —Min mani futsa muran cashon aton pushu muran iquia ato futan min piaran, —ishon yoinifo.

<sup>4</sup> Ascan nantifi ahuara finoan cuscan ato shafacafi yoquin isca huani.

<sup>5</sup> —Un Jope anoshon Dios cufiaino namapan cuscara un oian. Panomanhuan ronoashu nai murannoashu uqui fotoaiton un oian. <sup>6</sup> A muran yoina futsa futsatapafo non shafo cuscara mai ano sharatiofo non puiyafori mun oian. <sup>7</sup> Un oiainno un ahuun oi un nica ua yoia, “Funihuu. Rutushon piishquin,” ua huaa.

<sup>8</sup> “Ma, Ifon. Uncái ahua chaca pitíroma. Moisés noco shunifo yononi cuscacai na cuscara non pitíroma. Ascan afocai un pimisima,” huani.

<sup>9</sup> Nai muranshon afanan ua yoia, “Nan Diosin shararan huaafin nan sharaquin. Acai sharamaran min huatiroma,” ua huaa. <sup>10</sup> Nai murannoashu panomanhuan fotoi rafu non fustia. Ascata afanan nai muran caa.

<sup>11</sup> Nantianri nocofunu rafu non fusti Cesarea anoashu pushu ano nocooafó. <sup>12</sup> Ascano Diospan Yoshin Sharapan, “Min caifoyamafiacun shinanchacayamahuu. Natian atofu catahuun,” ua huaa. No futan icoinra huafó seis ufú foafo. Non Cornelio pushu muran iquia. <sup>13</sup> “Uhuun pushu muran Diospan oinmati afu nai muran ica uqui nocoita. ‘Min

yorafo Jope ano nichihuun Simón ahuun anu futsan Pedro miqui ihuunon. <sup>14</sup> Aafin mia tsain shara yoinon. Ahuun tsain nicaino min non min yorafori Dios fu nipatiroran,’ ishon ua huaitaran,” ishon Cornelio ua yoita.

<sup>15</sup> Un ato yoiaino Diospan Yoshin Shara nocoqui nocoyamua cuscan atoquiri nocoa. <sup>16</sup> Ascano nocon Ifo Jesús noco yoini cuscan un shinapacutana, “Juanpan mato unu muran iquimapacuni maton chaca shatushon man oinmanon. Ascafia Upa Diosin ahuun Yoshin Shara matoqui nichishquin mato ya imapacunon,” ishon noco yoini cuscan uhuun nomuranshon un shinan. <sup>17</sup> Upa Diosin ahuun Yoshin Shara noco inanni cuscan atorifi inainta. Ascacuncain ahuuscaquin “Ato inainyamahuu” un Diosin huatiroma. Uncai anori yoitiro, —ishon Pedron ato yoini.

<sup>18</sup> A nicacashocai afanan tsoan —Min aca cuscan afanan huayamahuu, —huanifoma. Ascatamarocon, —¡Aicho Upa Dios shararan! Nocon caifomari ato shinan futsamana afu nipanonfo, —ishon yoinifo.

### *Icoinra huafo Antioquía ano ichanannifo*

<sup>19</sup> Ascano Esteban rutuaifotian ato omitsiscamaifoanno Jesús icoingra huafo pashcafaifafainifo. Atirifi Fenicia ano foaino atirifi Chipre ano foaino atirifiri Antioquía ano fonifo. Nococashon aton caifo Israelifo fusti tsain shara Jesushuunoa yoifoanfafainifo. <sup>20</sup> Ascafia canashu atirifi Chipre yafi Cirene anoashu Antioquía ano fonifo. Tsain shara Jesucristohuunoa Israelifomari yoifocani. <sup>21</sup> Upa Diosin ahuun Yoshin Shara atofu ini. Aton tsainhuunshon Israelimafoan ichaparasiton nocon Ifo icoingra huanifo.

<sup>22</sup> Ascano Jesús icoingra huafo Jerusalén anoa nicacaquin Bernabé Antioquía anoshon nichinifo. <sup>23</sup> Nocoshon Diosin ato shara huua cuscan atohuun ramapaiyaiton oinni. Oin ahuun nomuran fasi unimani. —¡Aicho! Natian man Jesús icoingra huua. Ascan nocon Ifo tanasharacahuun. Maton nomuran ahua futsa shinanyamacahuun, —ato huani. <sup>24</sup> Nan Bernabé nocofunu fasi shara. Diospan Yoshin Sharapan rafuquimisi. Fasi Jesús icoingra huani. Ascacufin ahuunshon yora ichapafaoan nocon Ifo Jesús icoingra huanifoquin.

<sup>25</sup> Ascatan chipo Bernabé Antioquía anoashu Tarso ano cani Saulo funaicai. <sup>26</sup> Aqui nocoshon Antioquía ano ihuuni. Ascano nanno fari fusti nan rafu Jesús icoingra huafo ichapa fu ichanannifo ato Diosin tsain tapimanifo. Antioquía ano Jesús tanamisifo ato anu futsaqui tau huanifo, —Cristoforan —ishon ato anunifo.

<sup>27</sup> Ascaino nantianri Diosin tsain inon pacuai cuscan yoimisifo Jerusalén anoashu Antioquía ano funifo. <sup>28</sup> Ascan icoingra huafo ichanancanashu ato nicapai futsan ahuun anu Agabo Diospan Yoshin Sharahuunshon ato yoini isca huaquin, —Nantifi maitio Romanofoa ato yonoafu tushu cuyoiran, —ishon ato yoini. Icon nan Romano Claudio niaifotian tushu cuyocionni. <sup>29</sup> Nicacatan icoingra huafo Antioquía anoafaoan pui ichanan huacashon icoingra huafo Judea mai anoa yopaifoan fomanonfo. Nan inainton inannifo. <sup>30</sup> Asca huacatan Bernabé yafi Saulo inannifo Jerusalén ano fomanonfo. Nanno Jesús tanamisifo aton niaifofo inanno pashcananonfo.

## 12

### *Santiago rutufain Pedro cunu muran iquimanifo cuscan*

<sup>1</sup> Ascatapaiyaino Herodes niaifoan atirifi Jesús icoingra huamisifo achimani cunu muran iquimashquin ato omitsiscamanon. <sup>2</sup> Ascashon Juanpan iyoa Santagori achimani nopun tushtunon. <sup>3</sup> Tushtumana nicai Israelifo aqui unimanifo. Ascanori Israelifoan aton fuusititian ahuun anu misi farashati maisi pimisifor an huanifo nantianri Herodes yonocun Pedro achinifo. <sup>4</sup> Achimashon cunu muran iquimanifi. Ascashon ranushumua dieciseis cushuriapaonifo. Nantianri Israelifoan aton fuusititian Diosin nai oinmatin aton shunifoan facu iyoafofosi finonmani shinanshcaquin. —Nan fuusititian cuyoano un Pedro cunu muranno a cainmayoshquin ahuun caifoan oinonfo. Ascano un

yoishquin nanton chaca huaquin rutucahuun un ato huashquinran, —ishon Herodes shinanniquin.

<sup>5</sup> Ascano Pedro cunu muran iquimanaiton Jesús icoinra huafoan fasi Upa Dios cufishonifo.

### *Diosin cunu murannoaa Pedro cainmani*

<sup>6</sup> Herodes iyoco futsaino Pedro rutupai. Nan yamutan Pedro fasi osha murancoian ini. Cunopan munushushon ocuma rafutan ranushumu rafushon aton mucu rafuqui nushashon cushushinifo. Atiri ranushumuafu ahuun cunu caincaiti anoshon cushushinaifoanno. <sup>7</sup> Ascantapaiyaino Diosin ahuun oinmati afu nai muran ica cunu muran niriscatani. Faquishfiashu punariscatani. Ascaino Pedro moinpaiquin pipasni, —Funiriscahuun, —huaino ahuun cuno mupucumuriscatani. <sup>8</sup> Ascashon, —Min sahuuti yafi min sapato sahuufain min nanushumutinin nanushumuhuu ufu cashquin, —ishon Diosin oinmati afu nai muran icaton Pedro yoini.

<sup>9</sup> Ascaino cunu murannoashu afu caicainni. Caicainquin ahuun nomuran shinanni, —Uncai cacoinnima. Uhuun namapan raca un caicatin, —ishon shinanni. <sup>10</sup> Ascanshu cunu rafu mapai cainni. Ranushumua cushuafo finonfaini. Ascatac ahuun cuno fupoti ano nococaquin oian man fupucua ini. Ascaino cainnacahuatan fai tanafainifo. Chaimashta afu catan Diosin oinmati afu nai muran ica amaqi yamariscatani.

<sup>11</sup> Ascaino Pedronun shinanni, —Iconfinquin. Uhuun Ifo Jesús ahuun oinmati nai muranshon ua nichian ua numaque. Herodes yafi uhuun caifo Israelifoan ua rutupaifiaifoan ua numaran, —ishon ahuun nomuran shinanni.

<sup>12</sup> Ahuun nomuran tapicoinfaini cani Diosin ashooan cuscan. María pushu ano cani. Nan María ahuun facu Juan. Ahuun anu futsan Marcos ini. Nanno yora ichapa ichanancashon Upa Dios cufiaifono. <sup>13</sup> Caincainti ano nocotan Pedronun cunu fupoti tooto huani. Ascaino oinmati shomaya ahuun anu Rode fupoti ano caquin. <sup>14</sup> Pedro ahuun tsain onantan fasi unimacoinquin samamashta nasocain ato chani huani. Cunu fupuyotama. —Pedro man oashu. Caincainti ano niaran, —ishon ato yoini. <sup>15</sup> —Ma. Mimun nison, —huaifoan. —Ma. Nancoinfquin, —iriani. —Man rutuafono ahuun oinmati Diosfu imisi nocoqui oaran, —ishon shinannifo.

<sup>16</sup> Ascafiainfo afi Pedronun tooto huariani. Fupuacufoan oianfo nancoin ini. Fasi mustairinifo.

<sup>17</sup> Fasi tsainaifoan, —Tsainyamacahuun. Nocon Ifoan ua cunu murannoaa caimana cuscan un mato tapimanon, —ato huani. —Un mato yoiai cuscan Santiago yafi nocon yora a futan icoinra huamisifo ato yoitacahuun, —ato huani. Yoitan pushu futsa ari cani.

<sup>18</sup> Ascatac man shafaino Pedro yamaino fuchicanashu ranushumuafan fasi mucanifo. —¿Ahuuscashucon Pedro yamaimun? —icashu yoinannifo. <sup>19</sup> Herodes nicatan, —Funariscahuun, —ahuun ranushumuafu huani. Fuchiyamaifoan Herodes cushumisifo fasi yocariani. Tsoancai tapinima raquimain Pedro caaquin. Ascaiton ranushumua futsafo ato yononi a nantifi nan cushumisifo rutunonfo. Ascano Herodes Judea anoashu Cesarea ano cani. Nanno osha rananni.

### *Herodes niaifo nani cuscan*

<sup>20</sup> Nantianri Tiro anoafu yafi Sidón anoafouqui Herodes atoqui sinacoinni. Ascafiainfo rau huapaicani aficoin aqui fonifo yoisharapaicani. Herodes ahuun oinmatinin ahuun anu Blasto yoiai cuscan fasi icoinra huani. Ascano yoicaquin, —Blaston, niaifon Herodes noco yoishohuun non afu tsainon. Nocoqui sinaiquin. Non afu ipaisharaicai afanan nocoqui sinanonma. Nocoqui sinaquin ahuun yorafo yonotiroquin afanan noco tushu yafi non yopai cuscan noco inanonma, —ishon Tiro anoafu non Sidón anoafoonri Blasto yoini. Nicatan yoiaifo cuscan ahuun niaifo tapimani.

<sup>21</sup> Ascaiton, —Ato yoihuu un samamashta atofu tsainnon, —ishon yoini. Chipo aqui funifo. Sahuuti sharacapacoin niaifoan sahuumisi cuscara sahuuashu tsaoan ini. Ahuun tsaoti ano tsaoni ato yoishquin. Tsain ichapa ato yoini. <sup>22</sup> Yoiquin anaititapaiyaino nantififain oi ashcafinitisca huanifo, —Nacai nocofunuma. Nafin Dioscoinquin. Diosin ahuun oi cuscaracoinran, —ishon yoinifo. <sup>23</sup> Herodescái, —Un Diosinma. Dios fustifin shararan, —inima. Asca huaifoannocai Diosin oinmatinin afu nai muran ica yonoa isinin imariscatani. Noinmanhuarasi ahuun shaqui muran fospitanaino nariscani.

<sup>24</sup> Ascafíaino Diospan tsain shara Jesushuunoa manifotiyoiacunifo. Paratama yorafoan icoinra huanifo.

<sup>25</sup> Ascaíno Bernabé yafi Saulo icoinra huaf Jerusalén anoafato shara huani Jerusalén anoashu Antioquía ano nasofuranifo. Juan ahuun anu futsan Marcos arifi atofu cani.

## 13

### *Bernabé futan Saulo Diosin tsain yoiquin tau huani*

<sup>1</sup> Ascatan Antioquía anoashu Jesús icoinra huaf ichananfafainifo. Atirifi Diosin tsain inonpacoai cuscan ato yoifain. Atirifi ato yosipacunifo. Nanfo futsa Bernabé non Simón ahuun anu futsa Negro non Lucio nan Cirene yafi Manaén nan Herodes niaifo fu pushconi non Saulo. <sup>2</sup> Ascan shafa futsaino nanfo ichananshon piqui tununifo nocon Ifo Jesús cuficani. Asca huaifono Diospan Yoshin Sharapan yoini, —Un Bernabé yafi Saulo catoan ua yonoshononfo. Ato cufishocahuun. Ascan un ato tapimatiro un ato yonomai cuscan, —ishon ato yoini.

<sup>3</sup> Ascatan piqui tununifo Upa Dios cufinquin anaiticashon Bernabé yafi Saulo manmanshon cufishonifo. Ascashon ato nichinifo futsafo Diosin tsain yoitanonfo.

### *Bernabé yafi Saulo Chipre ano ini*

<sup>4</sup> Asca huatan Diospan Yoshin Shara ato Seleucia ano nichini. Anoashu shashon pocufainifo Chipre mai ano ocuma rafuunu tapia rafu nushmancayan mai mapafainifo.

<sup>5</sup> Nanno Salamina pushurasi ano noconifo. Nococatan Israelifoan aton ichananti pushu muran iquinifo ato Diospan tsain yoishquin. Juanpan ahuun anu futsa Marcos atofu cani. Ato futan ashoicai.

<sup>6</sup> Nannoashu nantifi nan mai natoroti ocuma rafuunu tapiano foanfafainifo. Ascano pushurasi ahuun anu Pafos ano noconifo. Nanno Israeli shointian Barjesusran, ishon anuniquin. Inaca cuscan yoipaifaquin icon yoinima. <sup>7</sup> Nan niaifo Sergio Paulo fu imisi. Niaifoan ahuun mapo fasi shara. Shinansharamisi. Bernabé yafi Saulo nicapaiquin ato cunani Diospan tsain nicashquin. <sup>8</sup> Ascafí Barjesús ahuun anu futsan Elimas nan shointian ahuun niaifoan Diosin tsain nicatima huani, —Niaifo Sergio Paulo, nan Bernabé yafi Saulo aton tsain nicayamahuu. Mia amaquiri yoitiroquin, —ishon yoini.

<sup>9</sup> Ascaiton Saulon ahuun anu futsa Pablo Diospan Yoshin Shara iquinano aasi oinquin yoini, <sup>10</sup> —Min nan yoshin chaca Satanás ahuun facu. Nan sharafoti min noicasmai. Minfin chanimisiquin. Min fuparapaimisi. Nocon Ifoan yorafo cayacafi tapimatiyo afihuunoa min ato amaquiri yoimisi. ¿Ahuutian min unuimun? <sup>11</sup> Natian nocon Ifoan mia onaintimai. Ipaitama min fusho acuhuani. Fari chashaino min afanan oinyoimaran, —ishon Pablonun yoini. Asca huatapaiyaino fushoriscatani. Ascashon cunacufaini, —Ua mutsoyopun ua iyoshquin, —ishon yoini. <sup>12</sup> Ascaíno niaifo mustairini nocon Ifoan tsain fasi curushcoin oin. Ascaiton oinquin arifi nocon ifo Jesús icoinra huani.

*Pablo yafi Bernabé pushurasi ahuun anu Antioquía ano ini nan Antioquía Pisidia mai  
ano ini*

<sup>13</sup> Ascashu Pafos anoashu Pablo yafi afu rafuafoan unu pocufaini Panfilia mai mapafainifo. Nanno pushurasi ahuun anu Perge ano noconifo. Nannoashu Juan Marcos atomaqui nituni. Nituashu Jerusalén ano nasoni. <sup>14</sup> Perge anoashu Pablo yafi Bernabé Antioquía futsa ano fonifo. Nan Antioquía Pisidia muran ini. Nanno Israelifoan aton tunutitian ichananti pushu muran iquicanashu tsaonifo. <sup>15</sup> Moisés Diosin tsain cununi cuscan yafi inon pacuai yoimisifoan Diosin tsain cununi cuscan yoicatan niaifofoan atori yoimanifo, —Nocon yoramishtichin, man nocon ointi fupi huamatiro noco yoicapun, —ato huanifo.

<sup>16</sup> Ascatac Pablo nuncian ahuun ato mushanshon yoini, —Uhuun yorafo Israelifo futan imafifoan no futan Upa Dios cufipaiquin ua nicayocahuun un mato yoisharanon.

<sup>17</sup> Nonfin Israelifoquin. Upa Diosin nocon shunifo catonni ahuun yorafo inonfo. Egipto ano iyoshon ato shara huani. Ahuun curushhuunshon Egipto anoshon ato iyoni.

<sup>18</sup> Tsoan istaipamashon cuarenta fari ato cushusharayopaoni. <sup>19</sup> Siete mani futsafo aton mai muranshon ato potani. Nocon shunifo inanni atona inon. <sup>20</sup> Nocon shuni Abraham ahuun mai anoashu cainitian yafi nocon mai ano nocon shunifo funifotian cuatrocientos cincuenta fari finonni.

Ascano Diosin yononi nocon shunifo futsan nocon caifo aton niaifo inon. Samuel niaifoataima nocon shunifoan aton niaifo ichaparasi iyopaoni. Samuel inonpacuai cuscan yoimisi ini. <sup>21</sup> Ascatac nocon shunifoan Samuel yoinifo, “Caifo futsa niaifo cuscara noco inanhun,” huanifo. Ascano Diosin Cispan ahuun facu Saulo catonni aton niaifo inon. Aafin cuarenta fari Israelifoan aton niaifo ipaonquin. Saulofin Benjamín ahuun funa iniquin. <sup>22</sup> Upa Diosin Saulo unumashon nocon shuni David tuqui huanquin. Ahuunoa yoini isca huaqui, “Isaipan facu David ua noicoin. Uhuun ointi muran un fuchipaiyai cuscan arifi fuchipaiquin. Un yonoa cuscafín atiroquin,” ishon yoini.

<sup>23</sup> David ahuun funafo futsahuunshon Upa Diosin Jesús cainmani nocon numamisi inon. Noco yoiyoni cuscan Israelifo muran noocoqui nichini. <sup>24</sup> Jesús nocon caifo Diosin tsain yoiataima Juanpan noco caifoti yoini isca huani, “Maton chaca shatucahuun. Ascano un mato unu muran iquimanon,” ishon ato yoini. <sup>25</sup> Ahuun yono anaiticuantan Juanpan ato yocaquin, “¿Man shinamun un tsoanquin? Uncai maton Numamisima. Ascafia Upa Diosin samamashta noocoqui ahuun Furun nichishquin. Ua fasi finoan. Un ahuun oinmati ipaifiashucái Upa Diosin uhuun chaca soayamanocai un itiromaran,” ishon ato yoini.

<sup>26</sup> Uhuun yoramishtichin, manfin Abraham ahuun funafoquin. Uhuun caifomafishon Dios icoinra huatan marifi ua nicacahuun. Upa Diosin ahuun Furun nichini nocon Numamisi inon. Na tsain shara Jesushuunoa manifoti Upa Diosin yoipai.

<sup>27</sup> Diosin tsain inonpacuai yoimisifoan cununifo isca huaquin, “Nocon numamisi rutushcaniran,” ishon cununifo. Tunutitiansin na cunu noco yoifafaini. Ascafiai nocon Numamisi noocoano Jerusalén anoa icafo futan nocon niaifofoanri a onannifoma. Ascan Diosin tsain inonpacuai yoimisifo cununifo cuscan nancacoin huaquin. Nocon Numamisi Jesús rutunifo. <sup>28</sup> Ahuashta chaca huaiton oianmafiacaquin, “A rutucahuun,” niaifofo futan yorahuanrasifoan Pilato huanifo. <sup>29</sup> Ahuunoa nocon shunifoan cununi. Nantifi ahuunoa cununifo cuscan huakashon ihui coyán iquinanmaquinshon fotomashon mahua quini muran mai huanifo.

<sup>30</sup> Asca huafaintafo Upa Diosin mai muranno funimani nipanon. <sup>31</sup> Ascano man samano Galilea anoashu Jerusalén ano afu foafoan oinnifo. Nanfo ahuunoa natian nocon yorafo yoitiro.

<sup>32-33</sup> Nan tsain shara ahuunoa non mato yoi. Upa Diosin nocon shunifo yoiyoni cuscan nonfin aton funafoquin noco ashaoan. Jesús funimana. Diosin tsain nan Salmo rafu yoini isca huaquin,

“Min uhuun facu. Natian un nantifi un ismai un mihiun noiai cuscan oinonfo un min Upacun,”  
ishon cununi.

<sup>34</sup> Diosin ahuun Furun yoini cuscan Isaías inon pacoai cunuquin isca huani,

“Ahuara shara tsoan oinyomisima un mia ashoshquin. Nannori un David yoiyoni cuscan un mia inanon,”  
ishon yoini.

Ascan cununi cuscan Upa Diosin ashoni. Ahuun Furun naafiacun mai murannoaa funimani afanan nanonma. <sup>35</sup> Nanscara Diosin tsain futsan aqui cununi,

“Upa Diosin ahuun Facu shara cushusharani payocononma,”  
ishon cununi.

<sup>36</sup> Davidhuunoacai cununima. Man non tapia Diosin yonomani cuscan David ahuun yorafo ashоquin. Anaititan naani. Ahuun shunifo maini ano arifi maini. Ascano ahuun caya payoconni. <sup>37</sup> Ascafiacon Upa Diosin Furun funimayamua payocononma.

<sup>38-39</sup> Ascacufin uhuun yoramishtichin, un mato tapimapai Jesushuunshon Upa Diosin nocon chaca soashotiro noco rau huanon. Nan mato yoi. Moisés noco yononi cuscacai nocon chaca soatiroma. Ascafialeshu tsoan Jesús icoingra huaiton Upa Diosin ahuun chaca soashotiro. <sup>40</sup> Oinfain nan inon pacoai yoimisifoan cununi cuscan man anonma.

<sup>41</sup> “Nicacapon. Man niyoaichain un ahuara sharacoin mato ashocain. Ahuara un mato ashooai cuscan futsan mato yoiaiton mancái icoingra huaima. Man yoishquin, ‘¡Cuu! ¿Tsoan na tsain icoingra huatiromun? Nonmaquian,’ ishon man yoishquin. ‘Ascan nanonquin,’”  
—ishon Diospan tsain cununi.

<sup>42</sup> Ascatan tsainqui anaititan ichananti pushu murannoashu Pablo yafi Bernabé fonifo. —Man noco tapimapaiyai cuscan afanan tunuti futsaino no fu ichanancahuun noco afanan tapimashquin, —ishon yoinifo. <sup>43</sup> Ascano nantifi ichananti pushu murannoashu fonifo. Israelifo yafi futsafoanri Upa Diosin tana cuscan afoanrifi tanapaicani atofu fonifo. Pablo yafi Bernabé mufainifo. Ascashon ato yoini, —Nocon yoramishtichin, Diosin mato shara huashoiain cuscan shinancahuun. Unuyamacahuun, —ato huani.

<sup>44</sup> Ascatan semanan futsan aton tunutitian nantifi yorafo nan pushurasi anoafó ichanannifo nocon Ifoan tsain nicashcaquin. <sup>45</sup> Fasi yorahuanrasi ichanannifo ato nicacani. Israelifoan oincani Pablo yafi Bernabequi sinanifo. Ascano yoiafo, —Pablónun noco yoiai cuscan chacacoin. Jesuscái Diospan facumaran, —ishon yoinifo. Ato roanifo.

<sup>46</sup> Asca huafiainfoanno ranotama ato cumanifo, —Non Diosin tsain Jesushuunoa mato yoiqui tauhuai yoi non oa. Ascafiaiton man nicacasmai. Nicacasmashucái man Upa Dios fu ipatiroma. Ascacun non nocon caifoma yoicai. <sup>47</sup> Nocon Ifoan noco yononi isca huaquin,

“Un mato yonoi man chashamati cuscara man inon. Man manifotifo oinmai ahuuscashumain man ufu ipatiroquin,”  
—ishon yoini.

<sup>48</sup> Nicacani Israelifoma fasi unimanifo. —¡Aicho! Nocon Ifoan ahuun tsain fasi shararan, —inifo. Tsoan Upa Diosin catoan afu nipashquin icoingra huanifo.

<sup>49</sup> Ascano nan mai anoafóan nocon Ifoan tsain Jesushuunoa yoinifo. <sup>50</sup> Yoifiainfoan Israelifoan atoqui tsain chaca huanifo. Pablo yafi Bernabé omitsiscamanifo. Atoqui tsain chaca huacatan nan ainfofo Dios tananpaiyaifo non niaifofoanri Antioquía anoshon aton nomuran Pablo yafi Bernabequi shinanchacashon aton mai anoshon ato rafu potanifo. <sup>51</sup> Ato potaifoanno aton sapato potapota saquin Jesushuunoa nicacasmaifoan

ismaifo. Ascatac Iconio ano fonifo. <sup>52</sup> Nan Antioquía ano icafo rama Jesús icoinra huacanashu fasi unimanifo Diospan Yoshin Sharapan ato iquinano.

## 14

### *Pablo yafi Bernabé Iconio ano ini*

<sup>1</sup> Iconio anoshon Pablo futan Bernabé amisifo cuscan pushurasi futsa anoshori ato yoinifo aton ichananti pushu muranshon. Ato shafacafi Jesushuunoa yoiaifoan Israelifo non yora futsafoan ichaparasiton icoinra huacoinnifo. <sup>2</sup> Ascanfiainfoan Israeli atirifoan icoinra huafoma atoqui tsain chaca huanifo. Ato chaca huaifoan yora futsafoanri aton nomuran atoqui shinanchacanifo. <sup>3</sup> Atoasca huafiainfoanno Pablo yafi Bernabé nanno iyopaonifo. Nocon Ifohuunshon ranotama ato Jesushuunoa yoinifo. —Nocon chaca soashotiro Dios fu ipanon, —ishon ato yoinifo. Ahuunshon ahuarao fasi sharafo tsoan oinyomisima cuscara fusti ato ismanifo. Asca huaifoan Diosin ato oinmani ahuunshon ato yoinonfo.

<sup>4</sup> Ascafiainfoan Iconio anoafaoan anorisi shinannifoma. Ascashon Pablo futan Bernabé ato yoiai cuscan atirifoan icoinra huanifo. Ascafiaiton Israelifo nan icoinra huamafoan ato yoishonai cuscan icoinra huanifoma. <sup>5</sup> Ascano Israelifo yafi futsafo aton niaifofori ichanannifo yoinanshcaquin, —Non Pablo yafi Bernabé omitsisca huanon. Non ato toquirinin tsacanon rutushquin, —icashu yoinannifo. <sup>6-7</sup> Ascaifoan nicacani anoashu Licaonia mai ari ichonifo. Nanno pushurasifoan aton anu rafu Listra yafi Derbe anoshon. Ato tsain shara Jesushuunoa yoinifo.

### *Pablo Listra anoshon toquirinin tsacanifo*

<sup>8</sup> Listra ano nocofunu chato chatotiani nanscarapan cainni cahuascamisima. <sup>9</sup> Pabloun ato yoiaino arifi nicacoinni. Ascaiton fuisquin Pabloun ahuun nomuran shinanni, —Na nocofunu Jesús caya huamatiro icoinra huanon, —ishon shinanni.

<sup>10</sup> Ascashon yoiquin, —Funihuu, —huaino. Nicatapai aficoen fianshinacahuani. <sup>11</sup> Ascaiton oincani yorahuanrasi tsain futsan man inifo. Licaonia tsainman inifo.

—¡Aicho! Diosifo nocouqui fotoa. Nocofunu ointsaflashu dios rafu nocouqui fotoaran, —icashu yoinannifo.

<sup>12</sup> Bernabé anu futsa tuqui huaquin Zeusiran huanifo. Pabloun aton tsain ichapa yoiaiton anu futsaqui Hermes huanifo. <sup>13</sup> Pushurasi patashari pushu huanifo Zeus aton dios cufishcaquin. A muranshon Zeus yonoshomisiton Pablo yafi Bernabé shinanmaqui charofo ya moi funufo ihuunshoni. —Man diosiran, —ishon ato moi rutishopainifo ato inanshquin. <sup>14</sup> Man acai cuscan nan rafutan oincaquin aton sahuuti fashnunifo aton nomuran ointi isincoincquin ato oinmapaiquin. Ato muran ichotanonfo,

<sup>15</sup> —Nocofunufoan. ¿Ahuuscain man nocouqui isca huashopaiyain? Noncái Diosimafquin. Nonrifi maton cuscara nocofunu rafuquin. Non mato tsain shara yoi oa. Non mato yoimisi Dioscoinma shinanyamacahuun. Ahuarao Dioscoinma potacahuun nan Dioscoinfín niaquin. Nan icoinra huacahuun. Nanton nantifi onihuaniquin. Nantifi nai muran onihuafain maitio onihuafain yorafoti onihuafain unuhuanri nantifi a murannoari onihuaniquin. <sup>16</sup> Ipaoni maifoti anoafaoan man apaiyai cuscan Upa Diosin ato shatumanataima. <sup>17</sup> Ascafiaflashu afincuin ahuu cuscaramainquin ato ismamisi. Tsoacai “Diosin ahuu cuscaramainquin ua ismamaran,” itiroma. Diosin nantifi manifoti anoafao shara huapai ato isma. Ascan maton mai ano oi fumamisi maton fanaflo foaisharanonfo. Mato tushu ichapa inanmisi maton ointi unimanonfo, —ishon ato yoini.

<sup>18</sup> Pablo futan Bernabé ato yoisharapaifaiton ina rutishopainifo. Nocon Diosiran huapaicaquin. <sup>19</sup> Ascatapaiyaino Israelifo Antioquía yafi Iconio anoashu atoqui funifo. —Pablo yafi Bernabé fasi chacaflo. Mato amaquiri yoipai, —ishon ato yoinifo.

Nicacaquin shinan futsa acufoantan ato chaca huanifo. Pablo toquirinin tsacaquin futsanifo. Ascan huacashon, —Man naaran, —huanifo. Ascashon pushufo pasoato shara fonifo ratai focaquin. <sup>20</sup> Jesús tanamisifoan Pablo naqui huanifo. Ascano funinaca huan pushurasi ano naso curani. Iyoco futsaino Bernabé fu Derbe ano cani.

<sup>21</sup> Naannoshon tsain shara Jesushuunoa ato yoinifo. Ascaiton nicacani yorahuan-rasiton Jesús icoira huanifo ahuun tanamisi ishcaquin. Ascano Listra non Iconio non Antioquia anori nasonifo. <sup>22</sup> Nanno Jesús tanamisifo Diosin tsain yoinifo aton ointi fupihuamashquin Jesús tanaquin finacoinnonfo. —Diospan tsain cachiquiri huayamacahuun. Jesús fusti icoira huacahuun. Upa Diosin nantifi iquina ano non nocoataima non niyoashu non fasi omitsiscatiroran, —ishon ato yoini. <sup>23</sup> Ichananti pushuti anoshon Pablo futan Bernabé Upa Dios icoira huafihuunoa cufifain piqui tununifo aton cushumisifo catonshcaquin. Ascaino, —Upa mia icoira huacaniquin ato cushusharahuu, —ishon cufinifo.

### *Pablo yafi Bernabé Antioquia ano nasonifo nan Antioquia Siria mai muran ini*

<sup>24</sup> Ascano anoashu focani Pisidia yafi Panfilia mapaifainifo. <sup>25</sup> Anoashu Perge ano nococatan nanno nituyonifo Diosin tsain yoishcaquin. Ascatan anoashu Atalia ano fonifo. <sup>26-27</sup> Atalia anoashu unuhuan pocufaini focani Antioquia ano nasonifo. Nococashon icoira huafo Pablo futan Bernabé ato ichanan huani. Atomaqui cataima ato Upa Dios cufishonifo Diosin ato mutsismafain ahuunshon yoisharanonfo. Ascan nantian Diosin ato yonoa cuscan anaiticashon nantifi acafo cuscan ichanancashon ato yoinifo. —Nantianri nocon caifoma yora futsan icoira huafo Upa Diosin atorifi ahuun yorafo imaran, —icashon ato yoinifo. <sup>28</sup> Ascano Pablo yafi Bernabé Jesús tanamisifo fu iyopaonifo.

## 15

### *Jerusalén ano icoira huafo ichanannifo*

<sup>1</sup> Ascano nocofunufo Judea anoashu Antioquia ano funifo. Nococashon yoinifo, —Nocon shunifo ipaonifo cuscan non amisi. Nocofunufo foshqui rupa shatuama Dios fu ipatiromaran, —ishon Moisés noco tapimani cuscan yoinifo. <sup>2</sup> Ascaiton nicacani Pablo futan Bernabé, —Aririmaran, —icashu atofu fochishmanantanannifo. Ascano icoira huafoan Pablo yafi Bernabé non futsafori catonnifo. Ascashon ato Jerusalén ano nichinifo. Jesús fu rafumisifo doce non cushumisi futsafori ato yocanonfo iconmainquin.

<sup>3</sup> Ascano icoira huafoan ato nichiafo. Focani Fenicia mai ano yafi Samaria mai anori mapaifainifo. Ascashon ato yoinifo, —Israelimafoan Jesús icoira huashon ato chaca shatuaforan, —ishon ato yoinifo. Icoinra huafo anoafaoan nicacani fasi unimanifo.

<sup>4</sup> Ascatan Jerusalén ano nocoafono Jesús fu rafumisifo doce non cushumisi futsafori nantifi Jesús icoira huafoti iscanifo, —¡Aicho! Man nocoqui fuafoquin, —ishon yoinifo. Ato fu ichanancashon Diosihuunshon afoanfafainafo cuscan ato yoinifo. <sup>5</sup> Nicacashon atirififoan icoira huafo Fariseofoan yoinifo, —Nocon caifomafiashon Moisés yononi cuscan aton nocofunufori non foshqui rupa shatupacutiro, —ishon yoinifo.

<sup>6</sup> Asca huaifoan Jesús fu rafumisifo doce yafi icoira huafo aton cushumisifoanri tiri futsan ichanancashon nanfihuunoa yoinanshcaquin. <sup>7</sup> Tsain ichapa yoinainfoanno Pedron ninacahuaino nishmapacufoanaifoan ato isca huani,

—Uhuun yoramishtichin, ua nicacahuun. Man man tapia noco futsan Diosin ua catonni mani futsanfo muran ua nichishquin ahuun tsain shara Jesushuunoa un ato yoinon icoira huanonfo. <sup>8</sup> Diosin yorafoan aton nomuran shinain cuscan tapicoian. Nanton noco ismani nocon caifoyamafiacun ato iquina ahuun yorafo inonfo. Ahuun Yoshin Shara noco inan cuscan atorifi inan. Ascan non tapitiro Diosin atorifi fuchipai.

<sup>9</sup> Nan non icoira huaiton nocon chaca soashona cuscari afoanri icoira huaifoan

atori chaca soashona. Nanscarasi huaquin noco fuchipai. <sup>10</sup> Nan iconquin. Moisés noco yononi cuscacai nocon shunifo non norifi non ascatiroma nipashquin. ¿Ascacufin ahuuuscaín norifi non atiroma cuscan man Jesús tanamisifo yonomapai? Asca huaquin man ato ointi ihuumatiro. <sup>11</sup> Ma. Aririma. Nocon Ifo Jesús nocohuun ramapaiyaino non Upa Dios fu ipatiroquin. Nan non icoinra huai. Afoanri icoinra huacanashu Dios fu ipatirorán, —ishon Pedro ato yoini.

<sup>12</sup> Asca huatan Bernabé yafi Pablónun ato yoiaifono nantifi nanoashu ichanancanashu pusinifoma nicapaicani. Diosin atohuunshon tsoan oinyomisima cuscara ahuarafó fasi shara Diosin fustiton atiro cuscan Israelimafo muranshon huanifo.

<sup>13</sup> Aton tsain anaitiano Santiago ato isca huani,

—Uhuun yoramishtichin ua nicayocahuun. <sup>14</sup> Pedro noco rama yoia cuscan ahuuscashomain Upa Diosin nocon caiforma catoanquin ahuun yorafo inonfo. <sup>15</sup> Nannorifosi Diosin tsain inon pacoai yoimisifoan yoinifo. Isca huaquin cununi,

<sup>16</sup> “‘David ahuun caifoan ua potaino urifi un ato potayoni. Ascafia un ahuun funafo afanan atoqui nasoshquin ato caya huanon uhuun yorafo afanan inonfo. <sup>17</sup> Ascacun manifotifoanri ua cufishcani uhuun yorafori un ato anupacushquiran,’ ishon Upa Diosin yoini. <sup>18</sup> Diosin ahuamamishti tapian. Icataima inonpacoai cuscan yoiyoniran,” ishon cununi.

<sup>19</sup> Ascancufin un shinanquin isca. Nocon caiforma Dios tanapaiyaifoan non ato ahuara curushcai non yonotiroma. <sup>20</sup> Ascatamarocon non ato cunu fomatiro yoiquin isca huaquin, “Dioscoinma aton Diosiran huacashon tushu tamanchinafo. A oincaquin tushu piyamacahuun. Man ascara piaíno futsafoanri mato oincaquin shinantiro marifi ato futan dioscoinma man fuchipai cufishquin. Ascan chaca itiro. Maton ahuinmari chotayamacahuun. Maton funumari chotamayamacahuun. Yoina yafi ina tumosishon ahuun imi foyamaino ahuun nami piyamacahuun. Imiri ayayamacahuun.” <sup>21</sup> Nanfohuunoa nocon ichananti pushu muranshon tunutitian yoimisifo. Afo ascayamacahuun. Nocon shunifoanri nannori yoimisiforán, —ishon Santiago ato yoini.

### *Israelifoma cunu fomani*

<sup>22</sup> Ascataín Jesús fu rafumisifo doce non Jesús icoinra huafó non cushumisifo non icoinra huáa futsafori ato futan rafu catonnifo Judas ahuun anu futsa Barsabás yafi Silas catonnifo Pablo yafi Bernabé fu Antioquía ano fononfo. Nan rafu icoinra huafóan nicacinnifo. <sup>23</sup> Ato cunu inanquin isca huani,

—Nonquian Jesús fu rafumisifo doce non cushumisi futsafori non nantifi Jesushuunoa yoimisifoan non mato cunu fomai man tapinon. Nocon yoramishtichin Antioquía anoafó yafi Siria anoafó non Celicia anoafó man nocon caifoyamafiafashon no futan man Jesús icoinra huamisi. Non mato tsain shara yoinon.

<sup>24</sup> Man non nica futsafo noco anoashu mato ano foitaucashon mato yoicaquin maton nomuran fucashmana. Non ato nichiamá. Mato yoia cuscan noncái ato yonoama.

<sup>25</sup> Ascacun non ichanan nannorifosi non shinan nocofunu futsafo catonshquin Pablo yafi Bernabé fu mato ano nichishquin. Pablo yafi Bernabé non atohuun noicoin. <sup>26</sup> Nan rafutan nocon Ifo Jesushuunoa futsafo yoipaifiaifoan atirifoan ato rutupaifiafoancai yoiquin ununifoma.

<sup>27</sup> Ascano non Judas yafi Silas matoqui nichian non mato cunushona cuscan nannoricoín mato yoinon. Ato tsainhuunshonri man tapitiro iconcoín.

<sup>28</sup> Dióspán Yoshin Shara shinan cuscan norifi nannori non shinan. Nanfohuunoa non mato cunushona. Man ahuara futsa yopaima isharashquin. Nan fusti man yopai. <sup>29</sup> Dióscionma tushu tamanchinafo piyamacahuun. Imí ayayamacahuun. Yoina yafi ina tumosishon imí foamano ahuun nami piyamacahuun. Maton ahuinma

chotayamacahuun. Maton funuma chotamayamacahuun. Nan fusti non mato yoipai. Nantisi non mato yoi. Non cunua cuscan aashu man isharacointiroran, —ishon cununi.

<sup>30</sup> Ascano Jerusalén anoshon ato nichinifo. Antioquía ano nococashon icoinra huafó ichanan huashon ato cunushoni cuscan inanni oinnonfo. <sup>31</sup> Oincani fasi unimanifo, —¡Aicho! Noco cunushona cuscan nocon ointi roamaroama sharairan, —icashu yoinannifo. <sup>32</sup> Ascata Judas yafi Silas nan rafutan Diosin tsain inonpacoai cuscan yoimisi inifo. Jesushuunoa yoiai cuscan icoinra huanifo. Nicacoinmisifo aton ointi fupi huamani ato mutsismanon Jesús tanasharashcaquin. <sup>33-34</sup> Nanno osha ranan atofu ichanannifo. Ascata Antioquía icanoafoan ato nichinifo, —¡Aicho! Non fasi unimai noco yoisharamisifo. Natian afanan Jerusalén ano fosharacahuun. Nan icoinra huafó nanno nocoaino ato yoisharashohuun, —huanifo. <sup>35</sup> Ascafainocai Pablo yafi Bernabé atofu fonifoma. Antioquía ano nitunifo futsafo futan Diosin tsain tapimanifo.

Pablonun afanan cai futsacai Jesushuunoa pushurasifoti ato tapimani <sup>36</sup> Ascaifoan chipo, —Icoinra huafó pushurasi futsa anoafó non oin canon. Non ato nocon Ifoan tsain yoini. Man natian tanasharafomainquin non oin canon, —ishon Pablonun Bernabé yoini.

<sup>37</sup> —Ai. Non canon. Juanrifi no fu canon, —Bernabé huani. Nan Juanpan ahuun anu futsan tuqui huani Marcos. <sup>38</sup> —Ma. Noncái Marcos iyoicaima. Noco Panfilia anoshon potani. No fu afanan yonotiroma. Afanan noco potatiroraca, —ishon Pablonun yoini. <sup>39</sup> Fasi fochishmanantanancanashu pashcananfainnifo. Bernabé shashon Marcos Chipre ano iyoni. <sup>40</sup> Ascano Pablonun Silas catonni afu yononon. Antioquía anoashu foataifoma icoinra huafó atofu ichanannifo. —Nocon Ifon, Pablo yafi Silas cushusharahuu mihuunoa yorafo yoinonfo, —ishon ato cufishonifo. <sup>41</sup> Ascata anoashu focashon Siria yafi Cilicia anoafó Jesushuunoa ato yoifoanfafainifo. Icoinra huafó pushurasifoti shinanmasharani Jesús tanasharanonfo.

## 16

### *Timoteo Pablo yafi Silas fu cani*

<sup>1</sup> Ascano Derbe ano Pablo yafi Silas noconifo. Anoashu chaimashta Listra ano fonifo. Nanno Jesús tanamisi futsan ahuun anu Timoteo ini. Ahuari Israeli shafo ini. Arifi Jesús icoinra huani. Apa Griegofo ini. <sup>2</sup> Icoinra huafóan Listra anoa non Iconio anoafóan, —Timoteo nocofunu shararan, —huanifo. <sup>3</sup> Ascacun Pablo ato ya Timoteo iyopaini. Iyoataima shinanni, —Nantifi uhuun caifo nan Israelifoanri tapiafo Timoteo apa Griego. Ascan uhuun caifoan amisifo cuscan un Timoteori foshqui rupa shatumatiro ahuunoa shinansharanonfo, —ishon shinanni. Asca huano atofu cani. <sup>4</sup> Pushurasiti mapaicainicai Jesús fu rafumisifo doce non cushumisi futsanfori Jerusalén ano yononifo cuscan ato tapimani yoafo cuscan huanonfo. <sup>5</sup> Ascano nicacashon fasi icoinra huaquin finacoinnifo. Paratama yorafoanri icoinra huanifo.

### *Pablonun namapan cuscara nocofunu Macedonia anoa oinni*

<sup>6</sup> Asia mai ari Jesushuunoa yoifopaiyaifoan Diospan Yoshin Sharapan, —Asia mai ari foyamacahuun, —ato huani. Ascaíno Frigia yafi Galacia ano mapaufaini fonifo. <sup>7</sup> Anoashu Misia mai pasoato ano noconifo. Anoashu pushurasi futsan Misia anoashu Bitinia ano fopaiyaifoan, —Ari foyamacahuun, —Jesús ahuun Yoshin Sharapan ato huani. <sup>8</sup> Ascano Misia finonfaincái Troas ano noconifo. <sup>9</sup> Nococashon nan yamutan Pablonun ahuun namapan oinni nocofunu Macedonia anoaaton, —Macedonia ano ohuu. Noco tapimashquin, —ishon yoini. <sup>10</sup> Moishon Pablonun noco yoini, —Natian Upa Diosin noco Macedonia ano nichipai tsain shara Jesushuunoa non ato tapimanón, —ishon noco yoini. Ascano non ati shara huani samamashta afu cashquin.

*Pablo yafi Silas Filipos ano inifo*

<sup>11</sup> Ascan Troas anoashu shashon nanucaini non cani. Mai ano ocuma rafu unu tapia rafu ahuun anu Samotracia ano cayacafi non pocufaini cani. Anoashu iyoco futsaino non pushurasi Neápolis ano noconi. <sup>12</sup> Anoashu non pushurasi ahuun anu Filipos ano cani. Nan Macedonia mai ano. Macedoniafoan aton niaifofo nanno icafo ini. Nanno non osha rananyoni. <sup>13</sup> Tunutitian pushurasi pasoato non unu cusumunri cashon. Non nica nanno ichananmisi Upa Dios cuficani. Nocoshon man non oian ainfofo nanno ichananfo. Ascan tsaoshon non ato Diosin tsain tapimani. <sup>14</sup> Nannoshon ainfo futsan noco nica ahuun anu Lidia. Pushurasi ahuun anu Tiatira anoa ini. Pano mapash inanmitsamisi. Dios cufimisicoin. Pablonun Jesushuunoa yoiaiton nocon Ifohuunshon ahuun nomuran icoinra huani.

<sup>15</sup> Ascaiton icoinra huaino ahuun yorafoanri icoinra huanifo. Icoinra huaifoan ato unu muran iquimani Jesús aton Ifocun ismashcaquin.

—Man tapia unrifi nocon Ifo Jesús un icoinra huaquin uhuun pushu ano fucahuun un mato pimanon. Nanno man itiroran, —ishon Lidia noco yoini.

<sup>16</sup> Ascatan shafa futsan non afanan cufimisi ano foanno shomaya nocoqui noconi. Futsafoan aton oinmati yoshin chaca ahuun nua. Nanton inonpacoai cuscan yoshin chacahuunshon ato onanshopaoni. Onanmafoan ato yoini. Ato yoiaiton ahuun ifofu pui inannifo. <sup>17</sup> Nanton Pablo yafi noco mufoquin oi ashcafinitin yoifoni,

—Nan nocofunufofin nan Diosin nantifi finoanton ahuun oinmatifo. Ahuunscashu main non Dios fu ipatiroquin noco yoi fuaforan, —ishon yoini.

<sup>18</sup> Shafa ranan noco ascasi huafoanfafaini. Noco fucash huamisi. Pablonun afanan tunuyamacaiquin ifiacucahuan yoshin chaca shomaya fu imisi isca huani,

—Jesucristohuunshon un mia yonoicai. Na shomayamaquinoashu catahuun, —huani. Ascan huatapaiyaino samamashta amaquinoashu cani.

<sup>19</sup> Shomayaton ahuun ifofoan oincaquin shinannifo, —¡Ohua! Nocon yonoticai afanan yoshin chaca afu icama. Afanancai inon pacoai cuscan yoitiroma. Ascan tsoancai afanan ahuunshon noco pui inainmaran, —ishon yoinifo. Ascashon Pablo yafi Silas achinifo. Achishon aton niaifofoan pushu ano ato sharafonifo.

<sup>20</sup> —Nan nocofunu rafutan Israelifoan nocon pushurasi ano yorafo fucash huamacoain ato shinanchamacani. <sup>21</sup> Noco amapaiyai cuscacai Romano niaifofoan noco yonomisima. Noncái afanan ascatiromaran, —ishon aton niaifofo yoinifo.

<sup>22</sup> Yorahuanrasifoan nannorisi yoinifo. Ascano niaifofoan yonocun aton sahuuti pucashon ihuin ato coshaqui futsanifo. <sup>23</sup> Man coshaquin futsatan cunu muran ato iquimanifo. —Na rafu cushusharahuu. Chifi ichoaoanno non mia rututiroquin, —ishon niaifofoan ranushumua cushumisi yoinifo. <sup>24</sup> Ascan huaifoan nicaquin fasi ocu murancoin ato iquimani. Ihui rafu oyucuruamashon aya ato tsaoni.

<sup>25</sup> Ascano yamunacucahuaino Pablo yafi Silas Upa Dios cufinyanan fanainnifo. Ascaiton atofu iquiafoan nicanifo. <sup>26</sup> Ascatanaino fasicoain mai nayanaiyainacahuani. Ascaino a cunu ahuun quishifo tsucu tsucusini. Ascatanaino cunu fupotifo afincoin fupucui futsuni. Ascatapaiyaino cunopan ato munushafo afincoin oshoriquitan mushorimuni. <sup>27</sup> Ascaino ranushumua moinacahuaquin oian a cunu fupotifo man fupucui futsua ini. Ascaiton oin ahuun nopus tsitscumutan afiri chachipaini.

<sup>28</sup> Ascaiton Pablonun oi ashcafinitin yoini,

—Ascayamahuu. Mifiri rutuyamahuu. Tsoa raqui caamaquin, —huani.

<sup>29</sup> —Chi otashon ua fushoriscahuun, —ranushumuaton futsa huani. Otafurani Pablo yafi Silasqui ichoni ato naman tsitsaotoshini. Fasi tari tari yanan. <sup>30</sup> Funinaca huan ato rafu chifi caimani.

—¿Ahuuscashomun uhuun chaca un shatutiroquin Upa Dios fu ipashquin? —ishon ato yocani.

<sup>31</sup> —Nocon Ifo Jesucristo icoinra huashu min non min yorafori man Dios fu ipatiroquin, —ishon Pablo futan Silaspan yoinifo.

<sup>32</sup> Asca huacatan nocon Ifo Jesús ahuun tsain a yoifain pushu anoafori ato yoini.

<sup>33</sup> Asca huacashon unu fitan coshafo ano puchoquein futsafoanno a pushu muran icaftot ato unu muran iquimapacuni icoinra huacashon ismanonfo. <sup>34</sup> Asca huano ranushumuaton ahuun pushu muran iquimani ato pimashquin. A yafi ahuun yorafoti Dios icoinra huashu aton nomuran fasi unimanifo.

<sup>35</sup> Ascano man shafano ahuun niaifofoan aton niaifo patasharifo aqui nichinifo, —Pablo yafi Silas caimanonfo ato yoitacahuun, —ishon ato nichini. <sup>36</sup> Ranushumuaton Pablo yoini,

—Niaifofoan yonoa natian man casharatiroran, —ishon ato yoini.

<sup>37</sup> Nicaquin Pablonun ranushumua niaifofo yoini, —Norifi non Romanofofiacun noco yocashoma yorafoan ointaifi noco coshamanafo. Non ahua chaca huayamafiacun ascan natian tsoa yoishoma noco caimapaicani. Ma. Noncai ascaran tapipaimaficain. Niaifofo aafi funonfo noco caimashquin. Nannori ato yoitacahuun —Pablonun ato huani.

<sup>38</sup> Yoiaifo cuscan ranushumuafoan aton niaifofoqui chaninifo. Pablo yafi Silas Romanofori nicacani niaifofo fasi ratucoinnifo. —¡Ohuashta! Nocon niaifofoan anori nicacaquin nocoasca huatiroran, —ishon yoinifo. Musucani. <sup>39</sup> Ascano ato ano fonifo ato yoisharapai focani. —Nocon pushurasi anoashu fosharatacapun, —ato huanifo. <sup>40</sup> Ascano cunu murannoashu focani Lidia pushu ano fonifo. Nan anoshon icoinra huaflo Jesushuunoa yoisharanifo aton ointi fupi huanonfo. Yoicatan atomaquinoashu fonifo.

## 17

### Tesalónica anoashu mucanifo

<sup>1</sup> Ascatacun focani Anfípolis yafi Apolonia mapaifainifo. Tesalónica ano noconifo. Nanno Israelifoan aton ichananti pushu ini. <sup>2</sup> Ahuun fuyamisi cuscan iquishon tunuti rafu non fustitan Pablonun ato Diosin tsain yoini.

<sup>3</sup> —Cristo noco omitsiscashoni. Naafiacun funimani. Jesushuunoa un mato tapimai nanfin Cristoquin. Upa Diosin catonni nocoqui nichishquin, —ishon Pablonun ato yoini.

<sup>4</sup> Nicacaquin atrifi Israelifoan ato futan icoinra huanifo. Griego ichapafo non ain-ifoanri nicacoinpainifo afoanri icoinra huanifo. <sup>5</sup> Ascano Israelifoan aton niaifofoan Pablo yafi Silas nicacoiainfoan oincani fasi ato rafuqui sinacoinnifo. Ascashon a inanmitsamisifo anoa focashon nocofunu shanishunifo fuchinifo. —Pablo yafi Silasqui tsain chaca huatacahuun yorafoanri nicashon afori atoqui sinanonfo, —ishon ato yononi. Asca huacatan fonifo yoifocani. Ascashon Pablo yafi Silasqui tsain chipunifo. Yorahuanrasi fasi mucanifo. Mucacatan nocofunu ahuun anu Jasón pushu ano fonifo Pablo yafi Silas achipaifocani. Yorahuanrasi muran caimapaicaquin atoasca huanonfo. <sup>6</sup> Ato fuchiyamacquin Jasón yafi icoinra huua futsafo achinifo. Achicashon niaifofo ano ato iyonifo. Iyoshon isca huanifo,

—Pablo futan Silaspan manifoti anoaflo shinanchacamamisifo. Natian nuno nocon mai anori man fuafo. <sup>7</sup> Nan Jasón ahuun pushu muran ato iquimana. Nan rafu nocon niaifo Cesari noco yonomisi cuscan nicacasmanifo. Ascashon yoiafo, “Nocon niaifo futsan. Ahuun anu Jesusran,” ishon nan rafutan yoiaforan, —ishon oi ashcafchin yoinifo.

<sup>8</sup> Nicacani niaifofo yafi yorahuanrasiton aton nomuran fasi shinanchacanifo. Ascashu mucanifo. <sup>9</sup> —Noco pui inancahuun mato nichinonran, —ishon niaifofoan Jasón yafi futsafo yoinifo. Ascaiton ato inainfoan ato nichinifo.

*Pablo yafi Silas Berea ano ini*

<sup>10</sup> Ascacashon icoingra huaa futsafoan Pablo yafi Silas yamutan ato Beria ano nichinifo. Nococatan nan rafu Israelifoan aton ichananti pushu muran iquinifo. <sup>11</sup> Iquicaintan ato Jesushuunoa tapimani. Bereafocai Tesalonicafo cuscarafoma. Pablo futan Silaspan ato yoiai cuscan fasi nicapainifo. Nicacatan shafatifi Diospan tsain oinnifo iconmain Pablonun ato yoiaquin. <sup>12</sup> Ascano Israelifoan icoingra huanifo. Griego ainfofoanri nicacoinpainifo afoanri icoingra huanifo. Griego nocofunufoanri icoingra huanifo. <sup>13</sup> Ascaifoan Pablonun Bereafo Diosin tsain tapimani Tesalónica ano nan Israelifoan icafo nicacani. Berea ano focashon aqui tsain chaca huanifo. Yorahuanrasi nicacani aqui tsain chaca huua. Ascano aton nomuran shinanchacamanifo Pablo nicanonfoma. <sup>14</sup> Ascano Jesús tanamisifo nanno musucaquin Pablo unuhuan csumunri nichinifo chaca huanonfoma. Cafiashu Silas yafi Timoteori Berea ano nituyonifo. <sup>15</sup> A fu focani Atenas ano iyonifo. Nannoashu afanan nasofainifo. Pablonun ato cunu inanno Silas yafi Timoteo inanonfo,—Uqui furiscacahuun,—ishon ato cunushoni.

*Pablo Atenas ano ini*

<sup>16</sup> Nannoshon ato manaquin oian Atenas anoafoan ahuaraofo fasi ichaparasi rami huacashon,—Nocon diosiran,—huaifoan. Oinquin ahuun ointi fucash huariapaoni,—¡Ohua! Ahuuscaquin Diosicoinmafo icoingra huacanimun,—ishon ahuun nomuran shinanni. <sup>17</sup> Ascaino Israelifoan aton ichananti pushu muran iquini ahuun caifo yafi Griegofoan Diosin icoingra huapaiyaifoan Jesushuunoa ato yoini. Ichantanti pushu muranno fustima chifinoa inanmitsamisifori shafatifi nan nicapaiyaifori ato yosini.

<sup>18</sup> Ato yoiaino futsafo aqui noconifo afu fochishmanantanancani. Atirifoan shinannifo non apaiyai cuscafin non huatiroquin noco unimamanon. Nanfoan anu tuqui huani Epicureofo. Atirifoanri shinannifo ahuara ahuuscarafaino non tunutiroran ishon shinannifo. Nanfo anu tuqui huani Estoicos. Nan rafu Epicureofo non Estoicofori Pablo fu fochishmanantanannifo. Yoinifo,

—Nan tsainmisi fahua cuscara. Raquiri noco yoipaimun,—ishon atirifiton yoinifo.

—Dios futsafo noco icoingra huamapairan,—ishon atirifoanri yoinifo. —Pablonun noco Jesushuunoa yoia. Naafiashu funini noco yoian, —ishon yoinifo.

<sup>19-20</sup> Yoifiacashon Areópago ano Pablo iyonifo. Nanno ichananmisifo ahuaraofo futsahuunoa nicamisifo. —Min noco tapimapaiyai cuscan tsoa nicamisima. Non tapipaicain. Min yoiai cuscan funacoin. Tsoacai anori nicayomisima. Ascan afanan noco yoihuu nonri tapinon,—ishon yoinifo. <sup>21</sup> Nantifi nan Atenas ano icafo non yora futsafori ichananmisifo yoinanshquin. Ahuaraofo tsoan anori nicayomisima yoipaicani. Atirifiton nicashon atirifi yoinifo. Ahua futsacai huanifoma.

<sup>22</sup> Ascaifoanno nan ichananmisifo ahuun anu Areópago anoashu Pablonun aton ointaifi ninacahuan ato yoini.

—Atenasfoan ua nicacahuun un mato yoinon. Mun oian manfin Diosihuunoa fasi tapipaimisifoquin. <sup>23</sup> Nuno man icano un cahuacacainquin mun oian man cufimisi anoshon man cunuquin isca huua,

“Dios futsa tsoancai onanmisima non cufipairan”

ishon man cunua. Mancai nan Dios onanmisima. Ahuunoa natian un mato tapi-maicain.

<sup>24</sup> Diosin nantifi mai anoafoti non nai murannoati onihuaniquin. Aton ifon inon. A yorafoan pushu huua murancai Diosin icama. <sup>25</sup> Atofin yorafoti nimafain noco shacaimaquin. Asca acai ahua yopaimafinquin. Non yorafoancai non ahua Dios ashotoroma ahuatsi yopaiton.

<sup>26</sup> Diosin nocofunu onihuauquin tau huani. Na nocofunuhuunoashu manifoti caicani. Aafin yononi raquifomain icanicain. Ahuuti farimain itirofoquin arusu fusti tapia.

<sup>27</sup> Nantifi asca huani manifoti afu ipainonfo. A funaquin fuchishcaquin. Ascafia nocoti chai huaama. <sup>28</sup> Ahuunoashu fusti non nitiro. Noco nimayamainocai non ahuuscatiroma. Arusu noco nimatiro. Maton tapimamisifoan cununi cuscan, “Non Diospan facuforan,” ishon cununi.

<sup>29</sup> Iconcucain nocofununcai afin Dios oni huatiroma. Cuno chashna faca facaitsa iya-marai cuno oshopa iyamarai toquiri nocofunufoan rami huafatirocái Diosin ascarama.

<sup>30</sup> Ascapaonifiashocai Dios onammisifoma. Ascafiaifoan ato onaintimapaponima. As-

cafia natian nantifi manifoti anoafó ato yonoa aton chaca shatushon icoinra huanonfo. <sup>31</sup> Jesús naafiacun funimani. Ascancunfin non tapitiroquin Upa Diosin a catonni nantifi yorafoti cayacafi shara yoinon afu ipaiyamarai omitsispacunacafo muran focani. Upa Diosin inonpacocai cuscan shinanni ahuitianmain iquicain,—nicacaquin ato huani.

<sup>32</sup> Jesús nafashu funini nicacani atirifi shuchinifo. Atirifoanri yoinifo isca huaquin, —Shafa futsan afanan noco yoihuu non nicanon,—ishon Pablo yoinifo.

<sup>33</sup> Ascatan ichananmisifo anoashu Pablo cani. <sup>34</sup> Nocofunu fustirasiton Jesús icoinra huacashon Pablo tanacoinnifo. Futsan ahuun anu Dionicio. Nan Areópago ano atofu ichananmisi ato yoi. Ainfo futsa ahuun anu Dámaris. Futsafoanri icoinra huanifo.

## 18

### *Pablo Corinto ano ini*

<sup>1</sup> Ascano chipo Pablo Atenas anoashu Corinto ano cani. <sup>2</sup> Nocoano nocofunu yafi ahuin nantianri mai futsariashu noconifo. Nocofunu ahuun anu Aquila. Israeli Ponto anoashu cainni. Ahuin Priscila arifi Israeli shafo. Nan rafu Italia ano imisifo. Ascan Italiafoan aton niaifon ahuun anu Claudio potani isca huaquin,—Nantifi Israelife Roma anoashu fotacahuun,—ato potani. Ascanofin Aquila yafi Priscila Italia anoashu Corinto ano ramashta noconifo. Pablonun atohuunoa nicafaini aton pushu ano cani. Ato onaincái. <sup>3</sup> Nan rafutan pano pushu icushaino. Pablonunrin ato futan icushpaoni. Ascano nanno nituyoni ato futan yonoi. <sup>4</sup> Asca huacatan tunutitiantifin Israelife aton ichananti pushu muran iquini Jesucristo icoinra ato huamapai.

<sup>5</sup> Ascano Silas yafi Timoteori Macedonia anoashu aqui funifo. Nocoafono Pablonun Israelife Jesushuunoa yoifoanfafaini. Nan fusti yoini. Ahua futsan yoinima. —Jesús Diosin catonni, nanton ahuun facuran, —ishon ato yoini. <sup>6</sup> Ascafia Pablonun ato yoifaino nicatimanifo. Aquitsain chaca huanifo. Ascaifoan aton ointaifi ahuun sahuuti pucatan tatan ani aton fuyamisi cuscara ato oinmaquin. Diosin tsain nicacasmaifoan ato oinmaquin.

—Man ua nicacasmái. Ascan man omitsiscainocai uhuun nuama. Matohuunfin nuaquin. Diosin ua yonoa cuscan un mato yoifaino man ua nicacasmái. Ascan un afanan mato yoitamarocon un nocon caifoma un yoi cairan,—ishon ato yoini.

<sup>7</sup> Yoitan aton ichananti pushu murannoashu chaimashta Ticio Justopan pushu ano cani. Nanton Upa Dios noicoinquin cufipaoni. <sup>8</sup> Ascan ichananti pushu niaifoan ahuun anu Crispo arifi Jesús icoinra huani. Nantifi ahuun yorafoanri icoinra huanifo. Corinto anoafaoanri icoinra huaifoan ato unu muran iquimanifo. <sup>9-10</sup> Ascano yamu futsan Pablo ahuun namapan nocon Ifo Jesús yoini, —Ratuquima uhuun tsain ato yoifoanfafaincahuun. Shatuquima. Un mifu icaquin. Tsoan mia ahuusca huanonma. Nuno nan pushurasi ano uhuun yorafo ichaparan, —ishon yoini. <sup>11</sup> Ascano nanno Corinto ano nituyoni. Fari fusti yafi nushmancayan Diospan tsain ato yosipaoni.

<sup>12</sup> Ascatac Acaya mai anoa Galión aton niaifo. Nantianri Israelife ichanannifo Pablo achishcaquin. Achishon ato niaifo ano iyoshquin.

<sup>13</sup> —Na nocofunu yorafo amaquiri yosifoanfafaini. Nocon shunifoan noco yononi cuscan ato anorima shinamaniran,—ishon yoinifo.

<sup>14</sup> Pablonun cumapaifaino niaifo Galión ato yoini,

—Israelifoan man ua yoicun na nocofunumain onanshta chaca iyamarai fasi chaca huacoinnamainquin un mato nicacuana. <sup>15</sup> Ascatamarocon maton shunifoan yosini cuscahuunoa ua yoifain maton caifoan aton anuhuunoa yoifain maton caifo yonoa cuscan ua yoipai. Uncai afihuunoa nicapaima. Mafin man afo arotiro. <sup>16</sup> Umaquinoashu fotacahuun,—ato huani.

<sup>17</sup> Foaifoan Sóstenes ichananti pushu ifo achinifo. Achicashon niaifofoan aton ointaifi sutunifo. Asca huafiaifoanno niaifon Galión ato pusanima. Atohuunoa tapipainima.

*Pablo Antioquía ano nasoni. Nannoshon afanan Jesushuunoa ato yoifoanfaini, cai rafu non fustini*

<sup>18</sup> Ascatan Pablo Corinto mai ano shafa ranan nituyoni. Nanno iyoano Upa Diosin yoiyoni cuscara a cushusharanon ahuun caifoan aton fuyamisi cuscara ahuun fo marucuni. Upa Diosin cushusharano cataima marucuyoni. Ascatan Priscila yafi Aquila fu Pablo cani. Icoinra huafomaquinoashu Corinto anoashu shasho nanufaini fonifo.

<sup>19</sup> Efeso ano nococatan Priscila yafi Aquila shasho naqui nichifaini cai Israelifoan aton ichananti pushu muran Pablo iquini ahuun caifo fu yoinanshquin. <sup>20-21</sup> —Cariyamahuun. Nuno nituyohuun noco Jesushuunoa paratama yoiyoshquin, —ishon yoinifo. Ascaiton ato yoini. —Ma, Uncai natian nitutiroma. Ascafia Upa Diosin ua nichipaiyaino un matoqui afanan otiroran, —ishon ato cumani.

Yoitán Efeso anoashu shasho nanucaini cani. <sup>22</sup> Cesarea ano mapufaini anoashu Jerusalén ano cani. Icoinra huafu fu ichanain ato yoisharani. Ascatan ato anoashu Antioquía ano cani. <sup>23</sup> Nanno nituyoni. Ascatan nannoashu cahuancacaiquin ato Jesushuunoa yoini. Galacia yafi Frigia mai ano cahuancacaini Jesús tanamisifotí ato yoisharai Jesús tanaqui finasharanonfo.

*Apolos Efeso anoafó Jesushuunoa ato yoini*

<sup>24</sup> Israeli futsan Alejandría anoashu cainni ahuun anu Apolos. Nantianri Efeso ano oni. Diosin tsain fasi tapicoinni. Tsain fasi shafacafi yoimisi. Yorafoan nicapainifo.

<sup>25</sup> Nocon Ifo Jesushuunoa Apolos nicapaoni. Tapini cuscan fasi cayacafi yosini. Jesushuunoacai atirifi tapishara inima. Juanpan yosini cuscan fusti tapini. —Maton chaca shatucahuun. Diosin icoinra huacahuun,—ishon. Nan fusti ato yoini. <sup>26</sup> Ascatan ichananti pushu muranshon ato ranotama yoisharani. Ascaiton Priscila futan Aquila nicacoinnifo. Ascashon, —Nocon pushu ano ohuu,—huanifo. Oano Jesushuunoa fasi paratama yosinifo.

<sup>27</sup> Ascano Apolos Acaya mai ano capaini ato Jesushuunoa yoipai. Icoinra huafu nicacani, —¡Aicho! Min shinan cuscan shara. Non Jesús tanamisifo ano cunu fomatiro mia nicasharanonfo, —ishon yoinifo. Ascatan atoqui nocoshon Diosihuunshon ato Jesushuunoa yoisharapaoni. Ascaiton nicacaquin icoinra huafuan aton ointi unimacoinnifo. <sup>28</sup> Ascafia atirifi Israelifoan, —Jesuscái Diospan furunma. Upa Diosincái nichinima. Nocon Cristomafinquin, —ishon yoinifo. Ascaifoan —Man shinain cuscacai anorima. Un mato tapimai Diospan tsainhuunshon Jesusfin Diospan Furunquin. Aafin nocon Cristoquin, —ishon Apolos yorafoan ointaifi shafacaficoin ato yoini. Ascaitocai tsoan cumanima.

## 19

*Pablo Efeso ano ini*

<sup>1</sup> Ascatan Apolos Corinto ano iyoashu Pablo machi fai tapiaton cai afanan Efeso ano noconi. Nocoshon Jesús tanamisifo fuchini.

<sup>2</sup> —¿Man icoinra huashon man ahuun Yoshin Shara fiamun? —ishon Pablonun yocaiton. —Ma. Noncai ahuunoa nicayomisima,—huaifoan.

<sup>3</sup> —¿Ascashon man unu muran iquipacunitian man raquiri yoiamun? —ishon ato yocaiton.

—Juanpan noco yosiaino noco unu muran iquimani cuscan non yoiaran, —ishon yoinifo.

<sup>4</sup> —Juanpan yoini isca huaquin, “Maton chaca shatucahuun Diosin tanasharashquin un mato unu muran iquimanon.” Ascatac yoiari “Chipo Jesús oshquiquin icoínra huacahuun,” ishon Juanpan noco yoiniran, —ishon Pablonun ato yoini.

<sup>5</sup> Nicacatan —Norifi nocon Ifon Jesús non icoínra huairan, —ishon yoinifo. Yoiaifoan ato unu muran iquimani. <sup>6</sup> Ascashon Pablonun ato manmainno Diospan Yoshin Sharapan ato imaino tsain futsanman info. Diospan tsainri yoipacunido. <sup>7</sup> Doce icuana info.

<sup>8</sup> Ascano Pablonun Israelifoan ichananti pushu muran iquishon ranotama ato Jesushuunoa yoini. Oshu rafu non fusti ato yoipaoni. Upa Diosin ato iquinahuunoa ato yoipaoni. Nicacaquin atirifoan icoínra huanifo. <sup>9</sup> Ascafiaíno atirifoanri nicacasmanifo. Icoínra huacasmacaquin, —Jesushuunoashucai non Upa Dios fu ipatiromaran, —ishon yoinifo. Ascaifoan nicai Pablo atomaquinoashu cani. Afanan atofu ichanannima. Pushu futsa ano tapimamisifo ano cani. Nan pushu anu tuqui huanifo Tiránorán, huanifo. Jesús tanamisifo afu iquinifo ato shafatifi tapimanon. <sup>10</sup> Fari rafutan nan pushu muranshon ato Jesushuunoa tapimaní. Ascano Israelifo futan yora futsafoan Asia mai ano icafoan nocon Ifo Jesús tsain nicanifo.

<sup>11</sup> Nantianri Upa Diosin Pablohuunshon tsoan oinyomisima cuscara ato ismani.

<sup>12</sup> Isinin imisifo yafi yoshin chaca atohuun nuufafaina ahuun panuela iyamarai ahuun sahuutifo muncanashu cayariscatanifo. Yoshin chacafo atomaquinoashu cuyofoni.

<sup>13</sup> Ascaifono Israelifo futsafoan nicacani Jesús icoínra huayamafiamisishaqui pushur-asiti foanfafainnifo Jesús ahuun anuhuunshon yoshin chaca atomaquinoa potapaicani. Isca huanifo, —Pablonun Jesushuunshon yoimisi. Ahuunshon un mato yonoi atomaquinoashu fotacahuun, —huanifo.

<sup>14</sup> Nocon yorafohuunshon Dios cufimisi niaifo futsan ahuun anu Esceva ahuun facufo sieteton asca huapainifo. —Jesushuunoashu amaqinoashu catastuun, —huanifo.

<sup>15-16</sup> —Jesús onanfain. Pablori mun onan. ¿Manmun tsoaquin? —yoshin huani. Yoshin chacapan yoiaíno nocofunu yoshin chacayaton ato achini. Ato fasi sutupacuni aton sahuuti fashnufain ato imi tohuuni. Ascaíno pushu murannoashu chitoria ichonifo-quin. <sup>17</sup> Atohuunoa Efeso anoafó Israelifo non yora futsafori nicacani ratui futsunido. —Nocon Ifo Jesús fasi shararan, —huanifo.

<sup>18</sup> Ascashon Jesús icoínra huafoan aton ointaifi chaca huafo cuscan yoinifo.

<sup>19</sup> Yofufoan aton yofu shatushon Jesús ifoannifo. Aton libro murannoá cununido cunufo ahuuscashomain yoshin chacanun yonotiroquin cunupaoni. Asca nan cunufo ichanan huacashon aton ointaifi coanifo. Shinanniquin nan cunufo nantifi fasi chicoin. Cincuenta mil aton pui nuua ini. Ascafiacun coanifo. <sup>20</sup> Asca huacashon maifoti anoafóan nocon Ifo Jesús tsain nicanifo. Ahuun tsainhuunshon finacoinnifo icoínra huafoan Jesús tanacoinnifo.

<sup>21</sup> Ascatac Diosin ahuun Yoshin Sharapan Pablo shinamanaino yoini, —Un natian Efeso anoashu Jerusalén ano cai. Caquin un Macedonia yafi Acaya ano un mapufainicai. Jerusalén ano nituyoshquin un anoashu un chipo Roma ano cairan, —ishon shinanni.

<sup>22</sup> Ascano afu yonomisi rafu Timoteo yafi Erasto Macedonia ano nichiyoni. Afincoin Asia muran nituyoni.

### *Efeso anoafó mucanifo*

<sup>23</sup> Nantianri Efeso anoafóan Jesús fustihuunoashu Apa Dios ari nocotiro nicacani atirifo fasi mucacaquin tsain chipunido. <sup>24</sup> Isca huaquin. Nanno nocofunun ahuun anu Demetrio. Ahuun yono ahuarafó rami huapaoni. Cuno oshopafo huapaoni. Nan

cuno oshopari ainfo ointsa ramihuani. —Nan nocon diosiran, —ishon, —Ahuun anu Artemisa, —huanifo. Futsafori afu cuno oshopa ainfo ramihuafu uhuapamafori, —Artemisa ointsaran, —huanifo. Ascan inanmitsashon ahuun rafanan pui finonfo.

<sup>25</sup> Ascano Demetrio nantifi ascarañ yonomisifo ichanan huani ato tapimashquin. —Uhuun yoramishtichin, man man tapia non nocon dios Artemisa rami huaa non inan mitsashon ahuun rafanan pui ichapa non fimisi. <sup>26</sup> Ascafia man man nicamisi na nocofunu Pablonun noco yora ichapafo Efeso anoafao amaquri shinanmana. Non rami huafocai diosima. Ahuamafinquin ato huamisi. Ascan yoimisi cuscan atirifiton icoinra huafo. <sup>27</sup> Pablonun yoiai cuscan musucoin. Nocon yorafoan icoinra huacashocai afanan rami huafo rafananci non pui fitiroma. Non funotiro. Nocon pui fusticai non funoima. Tsoancai afanan nocon dios Artemisa pushu muran ichananpaitiroma. Nantifi manifoti Asia muran natian Artemisa cufiafo. Ascan Pablonun yosian cuscan icoinra huafoan yoitirofo, “Artemisacai ahuama. Nocon diosimafinquin,” ishon yoitirofo. Ascano nocon dios Artemisa non funotiro, —ishon Demetrio ato yoini.

<sup>28</sup> Nicacatan fasi sinacaquin oi ashcafinin yoinifo, —Artemisa tsoa futsa cuscarama. Nonfin Efesofo nocon diosinran, —ishon oi ashcafinin yoirianifo.

<sup>29</sup> Ascaiton pushuhuanrasi anoafaoan nicanifo. Samamashta fasi mucanifo fucash tapinifo. Ascashon Pablo fu foanfafainmisi rafu Gayo yafi Aristarco achinifo. Ichanti pushu uhuapa ano ato iyoriscanifo. <sup>30</sup> Nicatan Pablo nan pushu uhuapa muran iquipaifialton Jesús tanamisifo futsafoan a iquimacasmanifo. Pabloqui musucaquin. <sup>31</sup> Nan Asia mai anoa aton niaifofoanri Pablo noicaquin cunu fomanifo, —Pablonun ichanti pushu uhuapa muran iquiyamapun miaasca huatirofoquin, —ishon cu-nunifo.

<sup>32</sup> Ascaino yorahuanrasi ichanti pushu uhuapa murannoashu fasi muai fut-sunifo. Atirifoan futsanori shinainno fasi shinanquin futsanifo. Atirifi yorafoan, —¿Ahuuscaimun non ichanti pushu uhuapa muran non iquiamquin? —huanifo.

<sup>33</sup> Israelifoan ahuun anu Alejandro fuchicashon putsiqui putsiqui anifo. —Ato yoi-huu matsipacunonfo, —huanifo. Ascaifoan ato mushanshon inacahua ato yoini, —Pusiyamacahuun. Un mato cayacafi yoisharanon, —ishon Alejandron ato yoini.

<sup>34</sup> Ascafia, —Nan nocofunu Israeliran, —huacashon tsoan nicapaima. Tsain chipuquin hora rafu oi ashcafinin oi fusti nicatsa yoirianifo, —Nonfin Efesofoquin. Nocon dios Artemisa ahuamamishti huatiroran, —ishon oi ashcafinin yoirianifo.

<sup>35</sup> Ascaifoan niaifo futsan ato, —Tsainyamacahuun, —mushanshoquin huani. Ascaino pusinifoma. —Efeso nocofunufoan ua nicacahuun. Nantifi manifoti anoafaoan tapicani nonfin Efesofoquin. Non Artemisa pushu cushushomisi. Ahuun rami huati nai murannoashu pacuaran inifo. Nanrifi non cushushomisiquin.

<sup>36</sup> Tsoancai, “Aririmaran” huatiroma. Ascacun ahuuscain man mucain. Puusiyamacahuun. Man mucaquin man chaca huatiroquin. <sup>37</sup> Nan nocofunufoancai ahua chaca huamisima. Ahua onuyamafain nocon dios Artemisaqui tsain chaca huayamafiamisi-foan ato nuno ihuua. <sup>38</sup> Demetrio yonomisifo futan tsoan tsain chaca futsaqui huapai. Nocon niaifofo yoicahuun nicanonfo. Atoqui yonotiro. <sup>39</sup> Ahuara futsan yoipaiqui niaifocinfo yoitiro afoan arotirofo. <sup>40</sup> Man natian chaca huua cuscan niaifofoan nicashon nocoasca huatirofo. Na yorafoan ahua chaca huayamafiamisishaquin man tsain chipuin man muai. Ascan niaifofoan noco yocaifoan ahuuscain mucacanimun noncái raquiri huatiroma, —ishon niaifoan ato yoini. <sup>41</sup> Anori yoitan niaifoan ato nichian fonifo.

<sup>1</sup> Ascano mucacani matsiaifoanno Pablonun Jesús tanamisifo cunani aqui funonfo. Aqui fuaifoan ahuun tsainhuunshon aton ointi fupi huamani. —Natian un mato shinan fainicairan,—ishon ato yoitan atomaquinoashu Macedonia ano cani. <sup>2</sup> Caashon tsain shara Jesushuunoa atoti yoiacuni aton ointi unimanon. Asca Grecia mai ano nocotoshini. <sup>3</sup> Nanno oshu rafu non fusti nituyoni. Ascatan Siria ano pocufaini capaifiaquin nica ahuun caifo Israelifoan rutupaiyaifoan nicai shinan futsashu Siria catamarocon Macedonia ano nasocainicani. <sup>4</sup> Futsafo afu fonifo. Aton anufo futsan Sópater Berea anoa apa Pirro caino futsanfori Aristarco yafi Segundo Tesalónica anoafo foaino Gayo Derbe anoa caino rafunon fustiri Timoteo non Tíquico non Trófimo Asia anoashu afu fonifo. <sup>5</sup> Nanfo rucun Troas ano fonifo nannoshon noco manacani. <sup>6</sup> Ascainofin fusititian misi faranshashoma piinifo. Nan fusititian anaititan non Filipos anoashu pocufaini focani mucus fustiti oshan finontan non atoqui Troas ano noconi. Nocoashu siete oshatan nanno oshayoni.

### *Troas ano oinmitsaicai Pablo cani*

<sup>7</sup> Ascano Domingoaino non ichanan Jesús noco nashoni shinantani non misi torupacuashu pashcanain futsunon. Asca Pablonun ato Diosin tsain yoini. Iyoconaino cashquin yamunacucahuana ato yoquin ununi. <sup>8</sup> Nan pushu cuyacoin ahuun osa rafu non fusti. Nan osa manaon ichananni. Atirifoan aton otatifo funifo. Fomancayanri otai futsuni. <sup>9</sup> Ahuun cunu pushfan ano tsaoashu pushcohuai ahuun anu Eutico. Pablonun fasi chai ato yoiriaino oshani. Fasi osha muranshu pacuni. Cuyacunoashu osa rafu non fusti anoashu pacuni. Pacuashu naani. <sup>10</sup> Asca Pablonun aqui fotoshon icoancufoanni. Icoacufoan ato isca huani,

—Na pushcohuaihuunoa shinanchacayamacahuun. Man niaquin,—ishon ato yoini.  
—Yoiacuscan icon afanan man niaran,—inifo.

<sup>11</sup> Ascatan afanan Pablonun inacaitan misi torupacushon ato inan pacuni ato futan piishquin. Ascatan afanan ato yoquin shafa huani. Shafaino atomaquinoashu cani.

<sup>12</sup> Ascano nantifi anoafo fasi unimaquin pushcohuai ahuun pushu ano iyonifo.

### *Troas anoashu Mileto ano cani*

<sup>13</sup> Ascatan Pablonun noco yoini,—Manfin shashon pushurasi ahuun anu Aso ano foicai. Unfin fain caicain matoqui chipo nocoshquin,—ishon noco yoini. <sup>14</sup> Aso ano nocotan no fu shasho naqui nanupacucahuani. Nannoashu non Mitilene ano fonifo. <sup>15</sup> Iyoconaino anoashu pocufaini non Quío cusumunri noconi. Shafa futsari non Samos cusumunri nocoshon nannoashu non Mileto pushurasi ano noconi. <sup>16</sup>—Non Efeso ano rutiatiro. Non Jerusalén ano nocoriscapai fusititian ahuun anu Pentecostés icaitian non nocopai. Asca Asia ano non Efeso anori non rutatiromaran,—ishon Pablonun ato yoini.

### *Jesús icoira huafu aton cushumisifo Efeso anoafo Pablonun aton tsain shara yosini*

<sup>17</sup> Mileto anoshon Pablonun nocofunu Efeso ano nichini icoira huafu aton cushumisifo ihuunonfo. <sup>18</sup> Nocoafaoan Pablonun ato yoini isca huaquin,—Un mato muran nocoi tauashu un cani cuscan man man uhuunoa tapian. <sup>19</sup> Nocon Ifo Jesús un yonoshona. Nocon caifo Israelifoan ua asca huapaifiaifoanno un mato muran isharamisi. “Pablo tsoa futsan cuscaramaranca,” un mato huamisima. Uncai mato anori shinanmapaimisima. Uaiyananrocon Upa Diosin ua yonoa cuscan un mato tapimapaoni. <sup>20</sup> Ranotama un Diosin tsain mato tapimapaoni man Jesús tanasharanon. Ichantipu muran non pushufoti un mato tapimapaoni. <sup>21</sup> Nocon caifo non nocon caifomari un tapimapaoni isca huaquin, “Maton chaca shatucahuun Dios shinanshquin. Nocon Ifo Jesús icoira huacahuun,” un ato huapaoni.

<sup>22</sup> Ascano natian Diospan Yoshin Shara ua yonoa cuscan un Jerusalén ano cai. Anoashumain un ahuuscai caicain uncai tapiama. <sup>23</sup> Diospan Yoshin Sharapan ua yoia pushurasiti anoshon ua cunu muran iquimanaifo ua omitsiscamashcani. Nan

fusti mun tapia. <sup>24</sup> Ascafia un nocon Ifo Jesús yonoshoyamaino un nipaitiroma. Ua yonomapaiyai cuscan nan fusti un shinain. “Nantifi yorafoti Upa Diosin atohuun ramapai atohuun noicoin nan tsain shara ato yoitacahuun,” ua huani. Ua yononi cuscan un anaitipai.

<sup>25</sup> Upa Diosin ato iquina anomain ahuu cuscaraquin un mato tapimamisi. Un mato tapima cuscan nicaflashocai man afanan ua oinnacama. <sup>26-27</sup> Nantifi Diosin mato amapaiyai cuscan un mato yoimisi. Uncai shatumisima. Ascacun un mato Diosin tsain yoimisi cuscan nicacasmamisifo omitsiscapanacafo muran fotirofiacai uhuun nuama. Mun ato yoiyomisi.

<sup>28</sup> Diospan Yoshin Shara matori yonoa Jesús icoinra huafo yoisharanon. Ascan oinfain. Isharacahuun. Diospan yorafo cushusharacahuun. Jesús ato nashoaino ahuun imi foni ahuun yorafo inonfo. <sup>29</sup> Mun tapia un matomaqui caano amaqiri yosimisifo matoqui fucani mato funomacani. Masharo pofupan inafo cuyopaitiro cuscan. Nanscarifi aquin afaoanrifi mato funomapaicani. <sup>30</sup> Mato muranshonri mafin ranan chipo Diosin tsain iconquin amaqiri yoitirofo aton tanamisi inonfo. <sup>31</sup> Ascacun ¡Oinfain! Un mato yosimisi cuscan ointiaquimayamacahuun. Fari rafu non fusti un mato shafatifi yosifafainpaoni Jesús tanasharanon. Uaiyanan un mato yosifafainpaoni man funononfoma.

<sup>32</sup> Natian un Upa Dios cufin mato cushusharanon. Mato noiai cuscan ahuun tsain maton nomuran tapimanon. Nanfohuunshon ahuun curushu mato inantiro ahuun tsain tanasharanonfo. Asca huatan Diosin ahuun yorafo catonni cuscan ahuunari man inon. Ato inansharapaoni cuscan matori nanscarifi huatiro man afu ipanon. <sup>33</sup> Tsain futsari mato yoinon. Uncai maton pui yafi maton sahuutifo un fipaimisima. <sup>34</sup> Man man tapia un non u futan yonomisifo yopamisi cuscan unfin yonocain ahuun rafanan fishquin un yonomisi.

<sup>35</sup> Man man tapian mato muran icashu un curushcai yonopaoni mato oinmashquin marifi curushcai yonoshon ahuun rafanan fishon ahuuomafoya isinincaifori man inantiro. Nocon Ifo Jesús yoini cuscan un ointiaquimama. Yoiri isca huaquin “Futsan noco ahuara inainno non unimafatiro non futsafo inainno non mimacai unimatiroran,” ishon nocon Ifoan yoini. —Nannori Pablonun Efesofo ahuun tsain unutaqui yoini.

<sup>36</sup> Ahuun tsain yoquin anaititan ato futan ratoconun mai chachishon Upa Dios cufinifo. <sup>37</sup> Cufincatan uaiyanan Pablo icoacufoannifo. <sup>38</sup>—Mancaí afanan ua oinnacamaran, —ato huaiton shinannifo. Fasi aton ointi noconifo. Ascashu afu unu cusumun fonifo. Pablo shasho naqui nanucainaíno.

## 21

### *Pablo Jerusalén ari cani*

<sup>1</sup> Ascano atomaquinoashu pashcapaiyamafiae non atomaqui pashcani. Shashon unuhuan pocufaincani non cayacafi pushurasi Cos ano non cani. Nannoashu iyoco futsaino pushurasi Rodas ano fonifo. Anoashu foi pushurasi Pátara ano noconi. <sup>2</sup> Nannoá non shasho uhuapa futsan fuchini Fenicia ari caiton. Ascano ahuun nanufainifo non atofu cani. <sup>3</sup> Caquin non oian mai nushmancayan toomanhuan ahuun anu Chipre. Fari oai patashari finonfaini non Siria mai ano noconi. Nanno unuhuan cusumunri pushurasi ahuun anu Tiro. Ascano shasho naquishon aton mafo mapumanifo. <sup>4</sup> Mapuinifoan non Jesús tanamisifoqui noconi. Non atofu osha siete nanno non nituyoni. Nanfoan Diospan Yoshin Sharahuunshon Pablo yoinifo, —Jerusalén ano cayamahuu, —huanifo. <sup>5</sup> Jesús tanamisifo aton ainfofo ya aton facufori no fu pushurasi murannoashu unuhuan cusumunri fonifo. Nannoshon non nantififain ratoconun mai chachishon Upa Dios cufini. <sup>6</sup> Ascatañ —Non mato shinanfainnicairan, —ishon

yoicatan munininantanannifo. Ascatac shasho nanufainifo. Ascaino aton pushu ari nasofainifo.

<sup>7</sup> Ascatac Tiro anoashu foi non pushurasi Tolemaida ano noconi. Nanno non Jesús icoira huua futsafo fuchitan non atofu osha fustiyoni. <sup>8</sup> Iyoco futsaino non Cesarea ano noconi. Felipe pushu ano non afu iyo. Siete nan futsan catonni Felipe ato futan tushu pashcanan huafafainon. Ascafia ahuun yono cuyoano Felipe Jesushuunoa yoifoan-fafainmisi inon. <sup>9</sup> Ahuun facu shomaya rafu non rafuri Diospan Yoshin Sharahuunshon ahuun tsain yoipaonifo. Nanfo funuomafo ini.

<sup>10</sup> Nanno non shafa ranan ini. Ascano Diosin tsain inonpacocai yoimisi ahuun anu Agabo Judea anoashu nocoqui noconi. <sup>11</sup> Nocotan Pablonun ahuun nanushumuti fiantan ahuun munushumucain onushumushon yoini, —Nan nanushumuti Ifofin Israeli niaifofoan isca huashcaniquin. Ascashon niaifo futsafoanno iyoshcani. Anorifi Diospan Yoshin Shara ua yoiaquin, —Agabo ato huani.

<sup>12</sup> Noco yoiai cuscan nicacaquin non Pablo yoini, —Jerusalén ano cayamahuu, —non huani. <sup>13</sup> Noco cumani,

—¿Ahuuscain man uaiquimun? ¿Uarifi man uaimapaimun? Ua munushfain ua onushtiro. Jerusalén anoafaoan ua rutufiatiro uhuun Ifo Jesushuunoashu mun itishara apaiyaifo cuscan ua huatirofo. Munfin itisharaquin uhuun Ifohuunoashu nashquin, —ishon Pablo noco yoini.

<sup>14</sup> Noco nicayamaitocai non afanan ahua yoitiroma.

—Nocon Ifoan mia amapaiyai cuscan min huatiroran, —ishon non yoini.

<sup>15</sup> Ascatac iyoco futsaino itishara huatan non Jerusalén ano cani. <sup>16</sup> Jesús tanamisifo Cesarea anoafao no fu fonifo. Mnasón pushu ano noco iyonifo. Nan Chipre mai anoa ini. Nannoshon Mnasón futsafo futan Jesús icoira huaquin tau huani. Ahuun pushu muranshon ato ashomisi cuscan ato tapimani.

*Pablonun Santiago oincai cani*

<sup>17</sup> Non nocoaino Jesús icoira huafu nocoqui fasi unimanifo. —¡Aicho! Man man oaquin, —noco huanifo. <sup>18</sup> Iyoco futsaino non Pablo fu Santiago icano cani. Icoira huafu aton cushumisifori nanno inifo. <sup>19</sup> —Uhuun yoramishtichin non fasi unimai matoqui nocoashu, —ishon Pablonun ato yoini. Ascano Diosihuunshon aton caifoma muranshon ato ashomisi cuscan ato tapimani.

<sup>20</sup> Ascaiton nicacani, —¡Aicho nocon Diosin shararan! —huanifo. Ascano Pablo yoinifo, —Nocon yorashta non mia yoisharapai. Man min oian nocon caifo Israelifo ichapafoan Jesús icoira huafu. Nocon shuni Moisés noco yononi cuscari fasi tanashara-paicani. <sup>21</sup> Futsafoan ato yoiafo min nocon caifo Israelifo mai futsa ariafo min ato amaquiri yosi. Min ato yosian Moisés yononi cuscan afanan tananonfoma. “Nocon caifoan fuyamisi cuscara afanan tanayamacahuun. Maton facufo afanan aton foshqui rupa shatuyamacahuun,” ishon min ato yoiaiton nicacani miqui musuafu. <sup>22</sup> Min nocoqui nocoa nicashcani. ¿Ascan non ahuuscatiromun?

<sup>23</sup> Non shinain cuscan acahuun. Nocon nomuran non shinain isca huaquin. Noco-funu rafu non rafuri Dios yoiafo isca huaquin, “Upa Diosin min noco yonon ahuscan non airan,” ishon yoiafo.

<sup>24</sup> Ascano na nocofunufo Dios fu tsainti pushu muran ato iyotahuun. Nocon fuyamisi cuscara ato futan huahuu nantifi chaca soanon. Min pui inanhun nocon fuyamisi cuscan ato maruhun. Min ato asca huaiton oincashon tapinonfo, “Iconma min Moisés yononi cuscan pota. Ascatamarocon Moisés nocon shunifo yononi cuscan mirifi min tanairan,” ishon shinanonfo. <sup>25</sup> Tsain futsari Jesús icoira huafu nan nocon caifomahuunoa mia yoinon. Non ato yoiama, “Moisés noco caifo yononi cuscan marifi acahuun,” noncái anori ato huaama. Non ato cunu fomani isca huaquin, “Dioscoinma aton diosiran huacashon tamanchinafo. A oincaquin tushu piyamacahuun. Man

ascara piyaino futsafoanri mato oincaquin shinantiro marifi ato futan dioscoinma man fuchipai cufishquin. Ascan chaca itiro. Imi ayayamacahuun. Yoina yafi ina tumosishon ahuun imi foamano ahuun nami piyamacahuun. Maton ahuinmari chotayamacahuun. Maton funumari chotamayamacahuun,” ishon non ato cunushoniran, —ishon Pablo yoinifo.

### *Pablo Dios fu tsainti pushu muranshon achinifo*

<sup>26</sup> Ascan man yoia cuscan Pablo nan rafu non rafuri nocofunufo Dios fu tsainti pushu muran iyoni ato futan ahuun caifoan fuyamisi cuscan anon. Aton chaca soashcaquin. Dios fu tsainti pushu niaifofo yoini, —Siete oshatan non nuno nituyoi nocon chaca soanon. Anaititan non Dios inanpacushquin. Non Upa Diosin yoita cuscan non anon, —ishon Pablunun ato yoini.

<sup>27-29</sup> Siete oshano man anaiticuanaino Israelifo Asia anoafoan Dios fu tsainti pushu murannoa Pablo yafi nocofunu rafu non rafuri fuchinifo. Fuchicashon aton caifo cu-nanifo, —Noco caifomishtichin noco futan acapun. Nan nocofunun Pablunun manifoti ano cahuacacainquin noco yorafoqui tsain chaca yoifain nocon shuni Moisés noco yononi cuscan nicayamacahuun ato huafain nocon Dios fu tsainti pushuhuunoari tsain chaca huamisi. Natian iquia nocon caifoanmari iquimana nocon Dios fu tsainti pushu chaca huairan, —ishon oi ashcafínin yoinifo. Nan Trófimo Efeso anoa ini. Pablo futan pushurasi anoa oinnifo. —Nocon caifomafiacun Pablo nanton Dios fu tsainti pushu muran iquimanaran, —ishon shinannifo. Ascafiacai Trófimo ano inima.

<sup>30</sup> Ascano nantifi nanno ichanancashon ato Pabloqui tsain chaca huanifo. Fasi tsain fucash huanifo pushurasi anoafoti mucacaniquin. Nicacatan pushufotifi aqui maoconifo. Pablo achicashon Dios fu tsainti pushu muranshon chifi ninifainifo. Ascatanaino fupoti fuporiscatani. <sup>31</sup> Pablo rutupaifiaifono Romano ranushumuaflo niaifoan mucaifoan nicani. Nantifi Jerusalén ano icafo mucaifoan nicani. <sup>32</sup> Nicaquin niaifo patasharifo non ahuun ranushumuafifi mucaifoanno ichonifo. Niaifo yafi ranushumua futsafo fuchicatan Pablo sutufiacaquin unuriscatanifo.

<sup>33</sup> Niaifoan ahuun ranushumuaflo yonoano Pablo cuno pono rafutan munushnifo. —¿Na nocofunumun tsoaquin? —ato yocani. <sup>34</sup> Oi ashcafínin futsan futsa anori yoiaino futsanori yoinifo. Fasi mucaifoannocai niaifoan Pablohuunoa ahua tapinima. Ascano ahuun ranushumuaflo yononi Pablo aton pushu muran iyononfo. <sup>35</sup> Paiti ano nocotoshiaifoan ahuuscashoma achipaiquin cufuntoshinifo rutupaicaquin. Ascaifoan ranushumuaflo Pablo finifoanni atomaqi iyai inifoannifo atoqui musu huaquin rutunonfoma. <sup>36</sup> Mufaincatan, —Ruturiscahuun, —oi ashcafínin huarianifo.

### *Pablunun yoini ahuunoa shinanchacanonfoma*

<sup>37</sup> Aton pushu muran iquimapaiyaiton Pablunun niaifo yoini,

—¿Un mia yocatiromun? —huaiton.

—¿Min Griego tsain tapiamun? <sup>38</sup> ¿Minmun Egipcioma? Nan nocon niaifo potapai 4,000 rutumitsamisifo tsoan istaipama ano iyoni. ¿Nanmun min? —ishon yocaiton.

<sup>39</sup> —Uncái aamafinquin. Unfin Israelifoquin. Un Tarso anoashu pushurasi uhuapa Cilicia murannoashu un caini. Natian ua yoipun un nan yorahuanrasi yoinon, —huaiton.

<sup>40</sup> —Ato yoihoo, —niaifoan huaiton. Pablo paitinin mapuinifoantán ato mushashoni. Ascaíno mucafiacani nishmapacufoannifo. Ascano aton tsainman ato yoiniquin.

## 22

<sup>1</sup> —Uhuun yoramishtichin ua nicacahuun un mato yoinon. Ua chaca huaflo cuscan un mato cayacafi yoipai afanan uqui chaca shinanonfoma, —ishon ato yoini.

<sup>2</sup> Nan Hebreo tsainman ato yoiaiton nicacani fasi puusinifoma. Ascano afanan ato yoini,

<sup>3</sup> —Unrifi un Israeliquin. Un Tarso pushurasi Cilicia murannoashu un cainni. Ascano nuno Jerusalén anoashu un pushconi. Nocon yorashtan Gamaliel ua yosipaoni. Nocon shunifoan noco yonopaoni cuscan nanti ua yosipaoni. Manfin fasi Dios tanapaisharai cuscan urifi nansca huapaipaoni. <sup>4</sup> Un Jesús tanapaiyaifo fuchishon un ato omitsiscamapaoni namapaiquin. Un nocofunufo non ainfofori achimapaoni ato cunu muran iquimashquin. <sup>5</sup> Un mato yoiai cuscan nocon yorafohuunshon Dios cufimisi niaifocoin non nocon Dios fu tsainti pushu cushumisifoan mato yoitiro iconquin. Ua cunu inanni ahuun yorafo Damasco ano inannon Jesús icoinra huafo anoashu Jerusalén anoa ihuushon ato cunu muran iquimanon.

### *Pablonun Jesús ifoa cuscan ato tapimani*

*Hch 9.1-19; 26.12-18*

<sup>6</sup> Ascashu un Damasco fain caino fari masafinin racano nocoti chaima samamashta nai ariashu chashariscatani. <sup>7</sup> Chashamanhuan acucahuanaino un pacuni. Pacuquin un ahuun oi nicani. “Saulo, Saulo, ¿Ahuuscaquimun mian omitsiscahuaicain?” ua huaiton. <sup>8</sup> “¿Min tsoamun, Ifon?” un huaiton. “Unquian. Jesús. Un Nazaret ano iyopaoni. Min ua omitsisca huairan,” ua huaiton. <sup>9</sup> U fu foaifoancai chashamanhuan oinfiaquimun ua yoiai cuscan tsoan nicanima. <sup>10</sup> Ascaino un isca huani, “¿Ifon, un ahuacai huaimun?” ishon un yocaiton. “Funihuu. Damasco ano cayotahuun. Nannoshon min ahua huaimancain futsan mia tapimanon,” ua huani. <sup>11</sup> Chashamanhuanun ua fuiconacai un catiro inima. Un fu fomisifoan ua mutsoshon Damasco ano iyonifo.

<sup>12</sup> Non nocono nocofunun ahuun anu Ananías ua oin oni. Nanton nocon shuni Moisés noco yononi cuscan tanamisicoin. Nantifi nocon caifo Israelifo nanno icafoan yoimisifo, “Ananías nocofunu shararan,” huamisifo. Ahuun noiafo. <sup>13</sup> Uqui nocoshon ua yoini, “Uhuun yorashtan Saulo, afanan oinhuun,” ua huani. Yoiaino un fupuinacahuani. <sup>14</sup> Ascashon ua yoini, “Nocon shunifoan aton Diosin mia catoan mia amapaiyai cuscan min tapitiro. Ahuun Furun shara oinfain ahuun tsain nicashquin. <sup>15</sup> Min oian cuscan huafain min nicai cuscari yorafoti min ato yoishquin. <sup>16</sup> Ascacun afanan manayamahuu. Funihuu miaunu muran iquimanon min chaca soashonon nocon Ifo Jesús icoinra huashon ismashquin,” ishon ua yoini.

### *Upa Diosin caifo futsan muran Pablonun ato tapimani*

<sup>17-18</sup> Ascatañ Jerusalén ano nasocurani nocon Dios fu tsainti pushu muran iquini. Dios cufinquin namapan cuscara un nocon Ifo oinni. “Nuno afoan min ato uhuunoa yoiai cuscan mia icoinra huacanimaquin. Nuno Jerusalén anoashu cariscatahuun,” ua huani. <sup>19</sup> “Ifon, nuno icafoan tapiafo un mia icoinra huafoti omitsiscamapaoni. Un ichananti pushufo ano cahuanscapaoni ato cunu muran iquimani ato coshaquin futsunonfo. <sup>20</sup> Ascarifiatan Esteban minhuunshon rutuaifono unrifi nannorisi shinanquin un ato yoini. Futsafoan Esteban rutuaifono un aton sahuutifo cushushoniran,” ishon un nocon Ifo yoini. <sup>21</sup> “Cayotahuun. Un min caifo futsa muran mia nichi uhuunoa ato yoinon,” ishon ua yoiniran, —ishon Pablonun ato yoini.

### *Romano niaifoan Pablo cushuni*

<sup>22</sup> Nicasharayonifo. —Un caifo futsan muran cairan —ato huaino afanan nicipainifoma. Oi ashcafchin cunganifo, —Nan nocofunun chacashuni. Rutucahuun afanan ninoma. Nanon, —ishon tsain fucashni huanifo. <sup>23</sup> Asca huacatan aton sahuutifo foman caya potainifoancatan mapori foman caya saanifo. Fasi mucainifoannifo. <sup>24</sup> Ascaino ranushumuafaoan aton niaifoan yonoano Pablo aton cunu muran iquimanifo, —Iquimacahuun. Coshaqui futsashon. Fichin coshaquin yocacahuun isca huaquin “¿Ahuuscain miqui fasi sinacanimun?” ishon yocahuun nonri tapinon, —ishon niaifoan

ato yoini. <sup>25</sup> Asca huatan mushanhuanhon puchi coshapaiyaifoan Pablonun ranushumua niaifo patashari yoini,

—Unfin Romanoquin. Ua chaca huati huaafiahocai tsoan ua yocama iconmainquin. ¿Ascan isca huaquin min niaifoan mato yonoamun ua man isca huanon? —ishon yoini.

<sup>26</sup> Nicatan ahuun niaifo ano cariscani,

—¿Ahuuscain min na nocofunu coshamamun? Nanfin Romanoquin, —ishon yoini.

<sup>27</sup> Nicatan niaifo Pablo ano cani,

—¿Iconmun. Min Romanomun? —ishon yocaiton.

—Ainfain, Unfin Romanoquin, —huaiton.

<sup>28</sup> —Unfin Romano ipaiquin un pui ichapa niaifo inanni ua Romano imanon, —huaiton. —Ascafashu uncai tsoa pui inanmisima. Unfin Romano cainniquin, —ishon Pablonun yoini.

<sup>29</sup> Nicacani ranushumuafaan fichein coshabaifiacani amaquinoashu foriscanifo. Ni-aifo arifi ratuni. —¡Ohua! Na nocofunu Romanofiacun un cuno pono rafutan munushua, —ishon shinanni.

### *Israelifoan niaifofo aton ointaifi Pablonun yoini*

<sup>30</sup> Ascano Israelifo Pabloqui sinaquin aqui tsain chaca huanifo ahuiscaimun iscaquin ishon ranushumua niaifoan tapipaini. Ascano iyoco futsaino Pablo ahuun cuno pucashon nocon yorahuunshon Dios cufimisi niaifofo yafi Moisés cununi cuscan tapimamisifo yononi, —Ichanancahuun Pablo maton ointaifi man yocanon, —ishon ato yoini. Asca huatan Pablo ato ano iyonifo.

## 23

<sup>1</sup> Ato oinquin Pablonun ato yoini, —Uhuun yoramishtichin, Upa Diosin ua yonoa cuscan facuashu un tauni cuscan natianri un ascamisi. Un mato yoiai cuscacoin uhuun nomuran un icoira huai, —ishon ato yoini.

<sup>2</sup> Ascaiton aton yorafohuunshon Dios cufimisi niaifocoin Ananiasin futsafo Pablo chaimashta niafo yoini, —Apasihuun, —huaiton,

<sup>3</sup> —Min fuparapaimisi. Upa Diosin mia coshatiro. Min futsafo shinanmapai Moisés yononi cuscan un aamaran ishon. Ascan mincairocon ascama. Moisés yononi cuscacai chaca huaa tapishoma non yora onaintimiroma. Asca ahuascai min futsa min yonoamun ua apasinon, —ishon Pablonun niaifo yoini.

<sup>4</sup> Chaimashta niafoan yoinifo, —Ahuuscaimun min nocon yorafohuunshon Dios cufimisi niaifocoin min tsain chaca huaquin, —huaifoan.

<sup>5</sup> —Uhuun yoramishtichin, un onanma nanton nocon yorafohuunshon Dios cufimisi niaifocoin. Diospan tsain cunuquin isca huani, “Maton niaifofo ato tsain chaca huayamacahuun,” —ato huani.

<sup>6</sup> Ascano Pablonun samamashta shinan futsani. Ahuun caifo nanno ichananfo atirifi Saduceofo non atirifi Fariseofo. Ascano ato yoini,

—Uhuun yoramishtichin, unfin Fariseoquin. Uhuun upa non uhuun shuniforifi Fariseofoquin. Yora naashu funicun un icoira huaicain. Ascan uhuunoa tsain chaca huai na shafatan ua asca huapaicaniran, —ishon ato yoini.

<sup>7</sup> Ascaiton nicacanashu Saduceofo non Fariseofo fochishmanantanannifo. Niaifofoancai anorisi shinannifoma. <sup>8</sup> —Non naashucai non funitiroma. Nocon yoshin yamai. Diosin oinmati afu nai muran icafori yamairan, —ishon Saduceofoan yoinifo. Ascafaino Fariseofoan yoinifo, —Non naashu non funitiroma. Nocon yoshin nipanaca. Upa Diospan ahuun oinmati afu nai muran ica ichaparasiran, —ishon yoimisifo.

<sup>9</sup> Ascano nanno ichananhu fasi mucanifo. Fariseo futsanfoan Moisés yononi cuscan tapimamisifoan nishon yoinifo,

—Na nocofunu Pablocai ahua chaca huama. Noco ahua chaca yoiama. Itsairaca yoshin shara iyamarai Diospan nai oinmatinin Damasco fai anoshon Pablo yoiniran, —ishon yoinifo.

<sup>10</sup> Ascaino fasi mucariacaquin. Pablo achitan nininain futsunifo. Ascaiton ranushumua niaifoan oin Pabloqui musuni, —;Ohuashtal! Pablo nininain futsucani un numaiyamaino rututirofoquin, —ishon ahuun ranushumuaflo yononi. —Numanon. Nocon pushu muran iyocahuun, —ato huani.

<sup>11</sup> Nan yamutan nocon Ifo Jesús Pabloqui noconi. —Pablon shinanchacayamahuu. Jerusalén anoaflo min ato uhuunoa yoimisi cuscan huafain Roma anoafori nanscarifi huaquin yoihuu, —huani.

### *Pablo rutushquin itisharanifo*

<sup>12</sup> Ascan iyoco futsaino Israelifo ichanancashon yoinifo, —Non Pablo rutuataima non piqui tunufain non ahua ayaima. Non asca huayamaino Diosin noco asca huanonran, —ishon yoinannifo. <sup>13</sup> Cuarenta nocofunufoan anori yoinifo. <sup>14</sup> Asca huacatan nocon yorafohuunshon Dios cufimisi niaifofo non Dios fu tsainti pushu cushumisifo ano fonifo chani huai focani,

—Non yoia non Pablo rutuataima non piqui tunufain non ahua ayatiroma. Non asca huayamaino Upa Diosin noco asca huanon. Non nantififain anori yoi. <sup>15</sup> Ascan natian niaifofo patashari matofu ichananfitafo aton ranushumuaflo niaifo fuparashocahuun. Yoicahuun isca huaquin, “Noco Pablo ihuushotacahuun non afanan yocasharanon cayacafi ahuunoa tapicoinnon,” ishon yoihuu. Ascaiton oinquin cahuanaiton achishon non rutunon, —ishon yoinifo.

<sup>16</sup> Ascano yoiaifo cuscan Pablonun ahuun piacan nicatan ahuun cocaqui chanini. <sup>17</sup> Nicashon Pablonun ranushumua niaifo patashari cunani, —Uhuun piacan ahuara min niaifo yoipai. Ascan min niaifo ano iyoriscahuun, —huani.

<sup>18</sup> Ascano niaifo ano iyoni. Nocoano,

—Niaifoan, Pablonun ua cuna. “Uhuun piashtan, min niaifo ano iyoriscahuun ahuara yoinon,” —ishon ua yoia.

<sup>19</sup> Ascashon niaifoan pushcohuai mutsoinifoan chaimashta iyoni, —¿Ahua min ua yoipaimancain? Ua yoihuu, —huaiton.

<sup>20</sup> —Uhuun caifofo nan Israelifoan mia fuparapai fucani. Mia isca huacani, “Noco Pablo ihuushotahuun non afanan yocapaicai ahuunoa cayacafi non tapinon,” mia huai fucani. <sup>21</sup> Ato icoinra huayamahuu. Uhuun coca atoqui iyoyamahuu. Cuarenta nocofunufoan fai cusumunshon cushuafoqui uhuun cocan ato finoainton achishon rutushcaquin. “Non Pablo rutupaiyaichaincái non ahua piyamafain non ahua ayayoima. Non asca huayamaino Upa Diosin noco rutupainonran,” ishon yoiafo. Natian samamashta miqui fucani mia yocai fucaniran, —ishon furonanfacun yoini.

<sup>22</sup> Nicatan ranushumua niaifoan, —Mian yoia cuscan tsoa futsa tapimayamahuu, —huatan furonanfacu nichini.

### *Pablo niaifo Félix ano nichinifo*

<sup>23</sup> Nichitan niaifo patashari rafu cunani, —Doscientos ranushumuaflo nichifain setenta ranushumuaflo caballo camaqui nichifain doscientos ranushumuaflo ashin ya un nichicain. Ato yoicahuun itisharanonfo Pablo na yamu a las nueve Cesarea ano iyocaniquin. <sup>24</sup> Pablori caballo inanyohuu niaifo Félix ano iyosharanonfo, —ishon ato yononi. <sup>25</sup> Yoitan ranushumua niaifoan ahuun niaifo cunu fomani isca huaquin,

<sup>26</sup> —Unquian Claudio Lisias. Un mia cunu fomai min tapinon.

<sup>27</sup> Un nocofunu ahuun anu Pablo miqui nichishquin. Ahuun caifoan Israelifoan achicashon rutucuanaflo. Mucaifoan nicaquin uhuun ranushumuaflo futan un Pablo numaita. <sup>28</sup> Ahua chaca huamainquin tapipaiquin Israeli niaifofo ichanain ano un

iyoa. <sup>29</sup> Afoan yoiai cuscan nicashon mun tapia na nocofununcai ahua chaca huama. “Nocon caifoan yononi cuscacai Pablo amísima,” ishon nan fusti ahuunoa yiafo. Ascan ahuacai chaca huamafinquin iquimafain rutupananfoan.

<sup>30</sup> Futsa uqui chania Israelifoan ua fuparapaicani Pablo rutushcaquin. Tapishon un miqui nichirisca. A chaca huafori un yonoa miqui focani Pablomain ahua chaca huaquin mia yoinonfo. Nanti uhuun niaifon Félix, —ishon cunushoni.

<sup>31</sup> Ascano aton niaifoan ato yonoa cuscan yamu Pablo Jerusalén anoshon Antípatris ano iyonifo. <sup>32</sup> Iyoco futsaino atirifi aton pushu ano naso furanifo. Ranushumuafó caballo ya fusti Cesarea ano iyonifo. <sup>33</sup> Cesarea ano nococashon Pablo niaifo ano iyonifo. Ranushumua niaifo ahuun cunuri niaifo Félix inanni. <sup>34</sup> Cunu oinquin yocani, —¿Min rani icamun? —huaiton. —Unfin Cilicia ano aquin, —Pablonun huani.

<sup>35</sup> —Mia chaca huafó nocoaifotian un mia cunashquin non ichananon man ua yoinon, —ishon yoini. Yoitan nan Herodes niaifo icano nichini, —Pablo cushusharacahuun, —ahuun ranushumuafó yononi.

## 24

### *Pablonun Félix niaifo yoini ahuunoa shinanchacanonma*

<sup>1</sup> Ascantan osha mucu fustiti finontan Israelifo aton niaifocoin Ananías Cesarea ano cani. Aton ichananti pushu niaifofori afu fonifo. Nocofunu futsa ahuun anu Tértulo arifi atofu cani. Nanton Romano niaifofo yononifo cuscan fasi tapicoinni. Nococashon niaifo Félix nanfo yafi Pablo ichanan huani aqui tsain chaca huafóan nicanon. <sup>2</sup> Ascantan Tértulo yoini isca huaquin,

—Nocon niaifoan, min noco iquina fasi sharacoin. Min niaifo iyopaonitian non natianri noco tsoan fucash huaama. Min niaifoataimacai non isharamisima. Natian ascatamarocon mihuunoashu non fiananan non ahua yopaima. <sup>3</sup> Ascano non mia aicho huai. Nantifi uhuun caifoti miqui unimacoin. Min noco shara huamisi.

<sup>4</sup> Ascafia un mia chai yoiriapaima min fucashnonma. Un mia ichapama yoipai noco nicayopun, niaifoan. <sup>5</sup> Nan nocofunu Pablonun fasi nocon caifo Israelifo fucash huamisi. Icafoti mucamamisi. Nocon caifo amaqiri shinanmapaiyaifoan aton anufo Nazarenonfo. Pablo aton niaifo. <sup>6</sup> Nocon Dios fu tsainti pushu chaca huapaiyaiton non achitan. <sup>7</sup> Nocon caifoan yononi cuscan non onaintimacuanita ranushumuafó aton niaifoan Lisias cushuyamacun curushcain yonoano nocomaquishon numaita. <sup>8</sup> Mifi yocashon min tapitiro ahuunoa chaca non yoia cuscan iconcoinran, —ishon yoini.

<sup>9</sup> —Niaifoan. Nocon yora Tértulo Pablohuunoa yoia cuscan iconcoinran, —ishon Israelifo nannoafaoan yoinifo. <sup>10</sup> Yoicatan niaifoan mushashonaiton Pablonun a yoini,

—Niaifoan, uhuun caifo futsa chaca huapaiyaifoan min nicamisi. Fari ichapa min ato nicamisi. Icon iyamarai iconma min yoimisi. Ascan ranotama uhuunoa un mato yoi min tapitiro uncai ahua chaca huamisi. <sup>11</sup> Futsafoan mia yoitiro osha doce finontan un Jerusalén ano caita nocon Dios fu tsainti pushu muranshon Upa Dios cuficai. <sup>12</sup> Nunoshon ua chaca huapaiyaifoanci Dios fu tsainti pushu murannoashu un tso fu fochishmanantanamisima. Un nocon ichananti pushu muranshon yorafo mucamama. Jerusalén anoafaoancai un yorafo mucamama. <sup>13</sup> Afoancai ahua oinmatirofoma un chaca huacun.

<sup>14</sup> Icon, un ranotama mia yoitiro nocon shunifoan aton Dios urifi noiquin un cufimisi. Nocon Ifoan noco yosipaoni cuscan un tanamisi. Un non futsafoan tana cuscan amaqiriran man huamisi. Nocon shuni Moisés yononi cuscan nantifi un icoinra huaiquin. Nocon caifon Diosin tsain yoimisifoan cununi cuscan nanfori un icoinra huaicain. <sup>15</sup> Diosin yoini cuscan yora sharafo yafi chacafori funimashquin uhuun caifo nuno nanfo icoinra huaifo cuscan urifi un icoinra huamisi. <sup>16</sup> Ascacun un isharapaimisi cuscan uhuun nomuran un tapin un Dios yorafo chaca huamisi.

<sup>17</sup> Fari ranan un Jerusalén ano icama. Ascan natian un nassoita uhuun yora ahuuomafo pui inashquin Upa Dios fu tsainti pushu muranri un iquita Upa Dios ahuaraofo inanshquin. <sup>18</sup> Nocon Diosin tsain noco yononi cuscacoin un huaa. Un Upa Diosin ahun ointaifi chaca huatamarocon un iisharaquin. Nanscara uhuun caifofoan Dios fu tsainti pushu muran ua fuchiafo. Yorahuanrasicai ufu icafoma. Tsoacai mucama.

<sup>19</sup> Uhuun caifo Asia anoafaoanraca un ahuara chaca huaiton oianfo ahuuiscain miqui fuafomamun mia yoishcaquin. <sup>20</sup> Uhuun caifo nunoafaoanri ua oianfo nocon niaifofoan aton ointaifi un ato yoiaiton. ¿Ahuuscain afoanrifi uhuunoa ahua chaca yoiafomamun? Uncain ahua chaca huama. Ascan uhuunoa ahuacai chaca yoitirofoma.

<sup>21</sup> Ahuara fustishta nocon caifo niaifofoan ointaifi un ato yoia, Oi ashcafinit un ato yoita, “Yorafoti naacanashu afanan furnishcani.” Ascacun ua miqui ihuuafu min ua nicanon. Afoanri mia yoipaicani mianasca huanon, —ishon Pablonun niaifo yoini.

<sup>22</sup> Nicaquin Félixpan nantifi nanno ichananfo ato yoini. —Natian non unuyonon, —ishon ato nichini. Arifi Jesús icoinra huafaoan amisifo cuscan tapisharamisi.

—Ranushumua niaifo Lisias nocoafono un mia ahuusca huaimancai mia yoitiro, —ishon niaifoan Pablo yoini.

<sup>23</sup> Ascacun niaifoan ranushumua yoini, —Cunu muran Pablo iquimafashion ahuusca huanonma. Ahuun yorafoan oinpaiyaiton ato iquimahuu Pablo pimasharanonfo. Yopai cuscan inanonfo, —ishon Félixpan ranushumua niaifo yoini. Yoitan Cesarea anoashu mai futsa ano cani.

<sup>24</sup> Shafa ranan finontan Cesarea ano nasocurani. Ahuun ahuin Drusila afu oni. Nan ainfo Israeli shafo. Nococashon Pablo cunganifo nicashquin. Ahuuscashomain Jesucristo icoinra huatirofoquin Pablonun Félix yafi ahuin yoini. <sup>25</sup> Futsafoanri ahuara futsa ato yoini. Upa Diosin noco imasharatiro yoifain ahuuscashomain non chaca huapaiyai cuscan non potatiroquin yoifain Upa Diosin nantifi noco yoishquin ratofomain afu ipatiroquin atirifi omitsiscapanacafo muran focani. Pablonun afohuunoa yoini. Nicai Félix fasi ratuni.

—Nanscanon. Nanti. Min natian catiro. Un ahuara futsa huayamaquin un mia afanan cunatiro, —ishon yoini.

<sup>26</sup> Yoiaifono ahuun nomuran shinanni, —Pablo cunu murannoashu cainpaiquinf ua pui inantiroquin un caimanon, —ishon shinanni. Ascacun cunafafainpaoni afu tsashquin. <sup>27</sup> Israelifoan ahuunoa shinansharanonfo ishon Félixpan Pablo cunu murannoashu cainpaina. Fari rafu nanscan huapaoni. Ascan fari rafu finonmani niaifo futsa tuquihuani, ahuun anu Porcio Festo.

## 25

### *Pablonun Festo niaifo fu fusoiquinanshu yoinanni*

<sup>1</sup> Ascaino Festo nocotoshitan niaifoni. Nocoashu osha rafu non fusti finontan Cesarea anoashu Jerusalén ano cani. <sup>2</sup> Nocoano nocon yorafohuunshon Dios cufimisi niaifo non Israeli niaifo futsafoan aqui funifo Pabloqui tsain chaca huai fucani. <sup>3</sup> Festo fuparapaiquin yoinifo, —Niaifo Festo, ranushumuafo yonohuun Pablo nuno ihuunon. Noco ashopun, —huanifo. Fai pochininshon Pablo cushupainifo rutushquin. Rutupaicaquin niaifo fuparapainifo. <sup>4</sup> Ato cumani, —Pablo cunu muran Cesarea ano ica. Urifi samamashta un ari cai.

<sup>5</sup> Ahuara chaca huacun maton niaifofo yoitacahuun ufu canon. Nannoshon na nocofunu man yotti huatiroquin, —huan.

<sup>6</sup> Ascan huatan atofu osha mucu rafuti iyoni Cesarea ano nasocurani oni. Iyoconaino ato ichanan huani. —Pablo uqui ihuucahuun, —ishon Festopan ato yononi. <sup>7</sup> Nococun ahun caifo Israeliifoan Jerusalén anoashu fucashon yotti huanifo. Yoiflaitocai tsoan ismacoinnima iconmainquin. <sup>8</sup> Ascaiton Pablonun ato cumani isca huani,

—Aririma. Uncai ahua chaca huama. Uhuun caifo Israelifo nocon shunicaifoan yononi cuscacai un potamisima. Nocon Dios fu tsainti pushu un a muranshon ahua chaca huayamafain Romanofoa yonomisi cuscaricai un yoitima imisima, —ishon Pabloun yoini.

<sup>9</sup> Ascatan niaifo Festopan Israelifo ahuunoa shinansharamapaiquin Pablo yoini,

—¿Min Jerusalén ano catiromun min caifofoan mia yoitihuai cuscan nannoshon uhuun ointaifi min cumatiro? —huaiton.

<sup>10</sup> Ma. Nuno Romanofo aton niaifoan yoitiro un chaca huua iyamarai un chaca huama. Minfin tapisharaquin uncai uhuun caifo Israelifo un chaca huamisima.

<sup>11</sup> Un ahuara chaca huacun ua rututirofo. Ascafashucai uqui chaca huafu cuscan iconyamaino tsoancai ua atoqui nichitiroma ua rutunonfo. Unfin niaifocoin Cesar ano capaicain uhuunoa yoishquin, —ishon yoini. <sup>12</sup> Nicatan Festopan afu niaifofo patashari yoinannifo. Tsainquin anaititan yoini,

—Mihuunoa min niaifocoin Cesar yoipai. Ascacufin min Cesar ano catiroquin, —ishon niaifoan Pablo yoini.

### *Pablonun Agripa niaifo fu fusoiquinanshu yoinanni*

<sup>13</sup> Ascano shafa ranan finontan niaifo futsan ahun anu Agripa yafi ahun chico Berenice Cesarea ano funifo niaifo Festo oinfucani. <sup>14</sup> A futan shafa ranan finoanno Festopan niaifo futsa Pablohuunoa tapimani.

—Nocofunun futsa nuno ica. Nan Félixpan cunu muran iquimani. <sup>15</sup> Un Jerusalén ano cayamua Israelifoan ahun yorafohunshon Dios cufimisi niaifofo non Dios fu tsainti pushu cushumisifo uqui fucashon nan nocofunu ahun anu Pablo ua yoitihuamanonfo. “A onaintimahuu,” ua huayamuao.

<sup>16</sup> Un ato yoia non Romanofoa nocon fuyamisicai ascarama. Nocofunu ahuara chaca yocashomacai non onaintimatiroma. <sup>17</sup> Ascano ufu fuyamuafu nuno Cesarea anoshocai un ato manayamuama. Iyoconaino un ato ichanan huama. Nocofunun ahun anu Pablori un iquimani. <sup>18</sup> Ascaiton ahun caifofo un yoia, “¿Natian ua yoihuahua chaca huamun?” un ato huaa. Uhuun nomuran un shinan na nocofunun ahuara fasi chaca huaa. Ascafaciay uanori cumacanima. <sup>19</sup> Ascatamarocon atofu Diosihuunoa fochismanantanancani yoifain nocofunun Jesushuunoari ua yoiafo. “Nan Jesús naafiahu man funini,” Pablonun yoia. <sup>20</sup> Afihuunoacai un tapiama. Un mun ahuuscaicain uncai tapitiroma. Ascacun un Pablo yocan, “¿Min Jerusalén ano ufu catiro min caifofo muran mia chaca huafu cuscan min ato cumanon?” ishon un yocan. <sup>21</sup> “Ma. Unfin niaifo Cesar ano capaicain uhuunoa yoicai,” ua huaita. Ascan un yonoa Pablo cunu murannoa ranushumuafu cushunonfo Cesar ano un nichiaitian, —ishon ato huani.

<sup>22</sup> Nicatan, —Urifi na nocofunu nicapairan, —ishon Agripanun Festo yoini.

—Funamanri min nicai, —huani.

<sup>23</sup> Iyoconaino niaifofo ichanancashon niaifocinchu Agripa yafi ahun chico Berenice pushu muran iquiafono manutifo chaan chaan acaino nantifi funinifo nan niaifo tsaoaitian. Ascan Festopan yonoa Pablo iquimani.

<sup>24</sup> Iquishon Festo yoini,

—Uhuun niaifo Agripa yafi no fu ichananfo na nocofunu ahun yorafu nan Israelifo Jerusalén anoafu non Cesarea anoafuan ua yoiafo, “Nan Pablo rutuhuu,” ua oi ashcafchin yonoafu. <sup>25</sup> Asca huafainfonocai un ahuunoa un tsain chaca yoiaifoan un nicama. Ascashon ahun tsainri un nica. Tsain chaca huafu cuscan yafi ahun tsainri nicashon un shinan ahuacai chaca huayamafain naashquin. Un cunu muran nichipaifia, “Un niaifo Cesari yoipai uhuunoa tapinon,” ishon ua yoia. Ascan un Roma ano nichicain. <sup>26-27</sup> Ascafia ahua chaca huayamacuai un ahuunoa Cesar niaifo cunushotiroma. ¿Nocofunuai ahua chaca huua non yoitiroma? ¿Ahuuscai non niaifon Cesar ano nichitiromun? Un shinan un asca huacai sharama. Ascan mato ointaifi un na

nocofunu iquimani man non nocon niaifo Agripa man nicaiton man yoitiro ahuarafu raquirimain un niaifo Cesar un cunushonicain,—ishon Festopan ato yoini.

## 26

### *Pablonun Agripa niaifo yoini cuscan*

<sup>1</sup> Ascatan niaifo Agripa Pablo yoini,  
—Min noco yoipaiyai cuscan noco yoihhuu,—huaiton. Ascano Pablonun mushainac-ahuan ato yoini ahuunoa shinanchacanonfoma. <sup>2</sup>—Niaifo Agripa un unimai uhuunoa un mia yoitiro. Uhuun caifo nan Israelifoan ua chaca huafo cuscan un natian mia yoitiro uhuunoa yoiafo cuscan min icoinra huanomma. <sup>3</sup> Min uhuun caifo imisi cuscan nocon shunifoan noco yonopaoni cuscan nanfo min tapicoian. Ascan niaifoan funaquima ua nicasharapun un mia yoinon.

### *Pablo Jesús ifoataima ipaoni cuscan*

<sup>4</sup> Un furonanfacu ipaonitian natianri uhuun caifoan uhuunoa tapi sharafo. Un cainni anoafaoan yafi Jerusalén anoafaoanri un icai cuscan tapisharafo. <sup>5</sup> Fari ichapa ua onanmisifo. Nocon shunifoan noco yononi cuscan un tanasharapaoni. Uhuun caifoan Diosin tsain tanasharacun Fariseoran, huamisifo. Urifi Fariseo ipaoni. Un mia yoiai cuscan uhuun caifoanri tapiafo. Unmain icon yoicain mia yoipaiyaifo cuscan mia yoitirofo.

<sup>6</sup> Upa Diosin nocon shunifo yoyotiani cuscan un icoinra huamisi. Ascancunfin ua chaca huafoquin maton ointaifi na shafatan ua ihuuao. <sup>7</sup> Uhuun yorafo nan shoco doce maniafo shafatifi yonofafaincany Diosin nocon shunifo yoyioni cuscan fishcaquin. Uhuun niaifoan, uarifi fuchipaifiaiton, “Na nocofunun chaca huaran,” ishon uhuun caifoan ua chaca huafo. <sup>8</sup> Yora naashu funitiro un icoinra huua. ¿Nan un icoinra huaino chacamun? ¿Marifi shinamamun Diosin nan ahuamamishti huatiro ahuun curushhuunshon naafo funimatiro? ¿Man icoinra huatiromamun Upa Diosin naafo funimatiro?

### *Pablonun Jesús icoinra huafo omitsiscamapaoni cuscan*

<sup>9</sup> Ipaoni urifi Jesús Nazaret anoashu pushconi ahuun tanamisifo un fasi chaca huapaoni. <sup>10</sup> Jerusalén anoashu un ascapaoni. Nocon yorafohuunshon Dios cufimisi niaifofoan ua yonoai cuscan un Jesús icoinra huafo cunu muran iquimapaoni. Ato rutuaifono, “¡Aicho! Ato rutuhuu,” un huapaoni. <sup>11</sup> Nocon ichananti pushuti muran un iquipaoni Jesús tanamisifo omitsiscamai. “Jesús sharamaran,” un ato huapaoni. Anori yoyamaifoan un ato omitsiscamapaoni Jesús afanan tanapaimaran inonfo. Nocon caifoma anori un capaoni Jesús tanamisifo omitsiscamai.

### *Jesús ifoan cuscan Pablonun afanan yoini*

*Hch 9.1-19; 22.6-16*

<sup>12</sup> Un Damasco ari cani ato omitsiscamaicai. Nocon yorafohuunshon Dios cufimisi niaifofoan ua cunu inanni un ato achimashon cunu muran iquimanon. <sup>13</sup> Uhuun niaifoan, un Damasco fain caino fari masafinin racano nai murannoashu fasi chashariscatanaiton un oinni. Fari chashatiromaquia fasi chashacointani. U fu foainfoanno chashariscatani. <sup>14</sup> Un pacuriscataquin un ahuun oi nican. Uhuun tsainman Hebreo ua yoini, “Saulo, Saulo. ¿Ahuuscaquimun mian omitsiscamaquin? Mifi min omitsisca huamuaquin,” ua huaiton.

<sup>15</sup> “¿Ifon, min mun tsoaquin?” huaiton. “Unquian Jesús. Mian omitsisca huamamisi. <sup>16</sup> Funihuu. Un mia oinmanaquin. Un mia catoan uhuun oinmati min inon. Min uhuunoa natian oian cuscan futsafo yoifain chipo mia oinmai cuscari min ato yoitiro. <sup>17</sup> Min caifoan mia rutupaishquin. Yora futsafo muran un mia nichi. Afoanrifi mia rutupaifiaino un mia cushusharatiro. <sup>18</sup> Uhuunoa min ato yoishquin. Natian faquish

murán ica shinantsa. Uhuunoa min ato yoishquin afanan faquish itamarocon shafa muran inonfo. Natian Satanás aton ifon ato iquina. Uhuunoa min ato yoishquin afanan ato ifo itamarocon Diosin ato Ifo inon. Ascano ua icoinra huacashon aton chaca rauhuatiro Diosin ato catoan ahuun yorafo fu ipanonfo,” ishon ua Jesús yoini.

### *Upa Diosin ahuun namapan cuscara yoini cuscan Pablo man aa*

<sup>19</sup> Asca huatan, niaifon Agripa, ua nai muranshon yoini cuscan cai un yoitimamisima. <sup>20</sup> Maton chaca shatucahuun Diosiquiri shinanshquin. Isharashcaquin mato icoinra huanonfo maton chaca shatucoinshon Dios tanacahuun. Nannori un Damasco anoafó yoifain Jerusalén anoafó yoifain Judea mai anoafoti yoifain uhuun caifomari un ato nantifi yoimisi. <sup>21</sup> Ascano uhuun caifoan Dios fu tsanti pushu muranshon ua achiafo ua rutushquin. <sup>22</sup> Ua rutupaifiaifoan Upa Diosin ua cushusharamisi un natian nia. Ascano un nantifi yoifoanfafainmisi. Nocon shuni Moisés yafi Diosfin inonpacoai cuscan yoimisifoan yoipaoni cuscan urifi nannoricoin un yoimisi. <sup>23</sup> “Nocon Cristo omitsiscái. Naafishu funi tauniquin. Funishon uhuun caifo nan Israelifo yafi Israeli-foma yoishquin ahuuscashumain Upa Dios fu ipatirofoquin,” ishon ato yoipaoni. Urifi nannorisi un yoimisiran,—ishon Pablonun yoini.

### *Pablonun Agripa shinanmapaini arifi Jesús icoinra huanon*

<sup>24</sup> Yoliaiton Festopan Pablo tsainfiaiton shutinifoanni. Yoiquin,—Pablon, min fari ichapa cunu tapifafainmisi. Ascacun natian min nison cuscara,—ishon Festopan yoliaiton.

<sup>25</sup> —Ma. Niaifo Festo uncai nison cuscarama. Un mato yoia cuscan iconcoin. Yorafoan shinansharaifo un mato yoia cuscan icoinra huatirofo. <sup>26</sup> Un mato yoia cuscan niaifo Agripa nicamisi. Ascan un shafacafi afihuunoa yoitiro. Un shinan arifi afihuunoa nicamisi. Man onan. Un mato yoia cuscacai onutirofoma. Nantifiton nicacuanifo. <sup>27</sup> ¿Niaifo Agripa, min Diosin tsain inon pacoai yoishomisifo icoinra huaimun? Mun tapia min ato icoinra huairan,—ishon Pablonun yoini.

<sup>28</sup> —¿Man min shinain min samamashta ua Criston ahuun yora imatiromun? —niaifoan huaiton.

<sup>29</sup> —Samamashta iyamarai chipo un icai cuscan min non futsafo nuno ua nicaifori ua cuscara ipainonfo munushumutama. Nannori un mato Dios cufishonaran,—ishon Pablonun yoini.

<sup>30-31</sup> Nicashon niaifon Agripa futan niaifo patashari non Berenice cunu murannoashu cainfurantan yoinannifo,

—Na nocofununcai ahua chaca huama cunu muran iquicain napanan.

<sup>32</sup> Na nocofunun, “Un Cesar ano capairan,” iyamaiton non nichisharacuanaran,—ishon Agripa Festo yoini.

## 27

### *Pablo niaifoan Roma ano nichini*

<sup>1</sup> Ascano niaifoan yononi noco shashohuan muran Italia mai ano nichinon. —Pablo yafi afu cunu muran iquiafo Italia ano iyotahuun,—niaifoan afu niaifo ranushumua ahuun anu Julio yononi. <sup>2</sup> Ascaiton non Adramitio anoashu nanufaini Asia mai ano fonifo. Nocofunu ahuun anu Aristarco no fu cani. Nanton ahuun mai Tesalónica Macedonia muran. Unuhuan non pocufaini. <sup>3</sup> Cai iyoco futsaino non Sidón ano noconi. Nocoshon ranushumua niaifo Julionun Pablo shara huapaiquin yoini,—Min nuno maputiro min yorahuan nuno icafoan min yopai cuscan mia inantiroforan,—ishon yoini. <sup>4</sup> Ascatan chipo Sidón anoashu non unuhuan pocufaini. Fuuhuanun noco catima huaino mai nushmancayan toomanhuan ahuun anu Chipre turocomucaini non cani. Ocuma futsan fuuhuanun noco catima huani. Noco mushquihiuri fonifo. <sup>5</sup> Ascatan

Cilicia mai cutanfoicai Panfilia mai futsari cutancuicai Mira pushurasi ano non noconi. Nan Mira Licia muran ini.

<sup>6</sup> Nanno ranushumua niaifoan shashohuan fuchini. Alejandría anoashu shasho muran noconifo Italia ano focani. Ascano ranushumua niaifoan shashon ifo yocani. —Non shashohuan muran mifu Italia ano capai. ¿Min noco iyotriromamun? —huani.

<sup>7</sup> Non caino fuuhuanun noco catima huaino funainquimashta non cafoni. Fasi man shocunashu non Gnido cusumunri nocopaifiai non nocotiroma. Ascan fuun afoforinnoashu fuaino mai nushmancayan toomanhuan ahuun anu Creta ahuun mushquiori noco catima huani. Salmón pushurasi finonfaini cusumun non foyacuni cusumunri non foyacupaiyaino fuun noco catima huani. <sup>8</sup> Ascatac noco catima huafaino fasi yonocoin cai non pushurasi ahuun anu Buenos Puertos ano noconi. Nan Buenos Puertos pushurasi futsan Lasea pushurasi chaima ini.

<sup>9</sup> Non nanno osha rananyoni. Oi pacutian capaifiaino fasi unuhuan fuchomanhuain musunicoinni. Ascano Pablonun shasho niaifofo yoini,

<sup>10</sup> —Niaifofoan, mun tapia non natian caino musucoin itiro. Noco mafo non nocon shashori non funotiro. Norifi non asai futsutiroran, —ishon ato yoini.

<sup>11</sup> Yoifiano shasho ifo non chiatamisiton yoinifo, —Ma. Musuma. Non nocosharatiroman, —huaifoan. Nicatan ranushumua niaifoan Pablonun ato numapaiyai cuscan nicatamarocon shasho ifoan non chiatamisi nicani. <sup>12</sup> Oi pacutiancái Buenos Puertos ano itiroma. Unuhuan cusumun fuchomanhuatiro. Shasho chacana huatiro. Atirififoan yoinifo, —Non pushurasi Fenice ano canon. Nanno mahua ocu rafu ahussca huatacái fuchomanhuantiroma. Shara itiro. Ascano non oi pacutian ari nituyotiroran, —ishon yoinifo. Nan pushurasi Fenice Creta mai ano ini.

### *Unuhuan fuchomanhuanni*

<sup>13</sup> Funainquimashta fuu nocoaino, —Non casharanon. Nan fuu sharapan non casharatiroran, —ishon yoinifo. Ascaíno Buenos Puertos anoashu non pocufaini Creta cusumunri cutan acuni. <sup>14</sup> Samamashta fuuhuan furani. Fuuhuan furanquin. —Nocachiorinoashu fuuhuan fuiran, —huaniquin. <sup>15</sup> Ascafia non cusumunri capaifiaiton noco catima huani. Ascano fuuhuanun noco iyoai ari non cani. <sup>16</sup> Mai nushmancayan raca uhuapamashta ahuun anu Claudia finonfain. Nanno finoainfono non fasi yonocain non shasho uhuapama chinutamua shashohuan muran naratainifoannifo. <sup>17</sup> Asca huashon shasho pinushusho finifoannifo. —Furo itama shara canon. Sumucainicai non Sirte ano minhuanmanhuanquin mai tsacanonma nanno musuni non suotiroran, —inifo. Ascashu nan, —Fuun noco iyoai ari non catiroran, —inifo. <sup>18</sup> Iyoco futsaino afanan fasi fuuhuan curushpacoin nocon shashohuan fuchomanhuaquin iquimapaityaiton mafo potaquin futsunifo. Shashohuan shacatanon ishon. <sup>19</sup> Afanan puna futsan fuuhuan nishmayamacaiyaiton shashohuan murannoia aton ahuamamishti potaquin anaitinifo aton rusfifo ya. <sup>20</sup> Ascafia inocai fuuhuan nishmanima. Shafa rananun nai faquishihuancuin fari punaiyamaino fishiforicai cainnifoma. Fuchomanhuan unuyamacaiyaino, —Man non nai futsuiran, —icashu ratucoinnifo.

<sup>21</sup> Man non piqui tunuqui rananhuan. Ascashon Pablonun ninacahuantan yoiquin, —Uhuun yoramishtichin ua nicayocahuun. Un Creta anoshon un mato yoiaiton man nicafin shara icuanaquin. Ahuuscacuanama. Ascaíno cai ahuarafó nocon shashoricaí funcuanama. Manricai omitsiscacuanama.

<sup>22</sup> Ascafia ratuyamacahuun. Man naimacai. Shashohuan fusti funocoin. <sup>23</sup> Un mato yoiai cuscan Diospan oinmati afu nai muran icaton ua yamu tapimana. Unfin Diosin ahuun yoraquin. Un ahuun oinmati. Yamu ahuun oinmati nai muranshon uqui nichian ua yoinon. <sup>24</sup> “Pablon, ratuyamahuu. Min niaifo Cesar ano nocotiro mia chaca huafo cuscan min cayacafi cumasharanon. Upa Diosin min cufiaín cuscan mia nica. Na mifu rafuafocai nan shashohuan murannoashu ahuuscaíma,” ishon ua yoia.

<sup>25</sup> Ascano uhuun yoramishtichin, ratuyamacahuun. Upa Diosin ua yoia cuscan aiquin un icoinra huai. Tsoacai asaimafinquin. <sup>26</sup> Ascafia mai nushmancayan toomanhuan racani anoashu nocon shasho toshacaishquiran, —ishon Pablonun ato yoini.

<sup>27</sup> Quince osha finontan nan ununhuan ahuun anu Adriático anoshon fuuhuanun noco iyofoi cai. Yamu nacucahuaino shashohuan muranshon yonomisifoan yoicaquin, —Man non mai ano nocoiran, —icashon yoinifo. <sup>28</sup> Anori shinancanashu unuhuan ahuun noa tapipai caquin rusfinquin plomo tuchishon potanifo. Ahuun noa treinta seis metros. Ascashon afanan ori futsa ano ahuun noa tananni veinte siete metros ini.

<sup>29</sup> Ascaino man non toquirinin huaquin non nocoicairan ishon. Ratucaquin ahuun cuno ihuu rafu non rafuri rusfipan nushashon rusfipan shashoqui nushashon noa muran potanifo. Nanno shasho nitunon. —Toquirinhuan tsacatani shasho toshatiiran, —icashu. Ascashon ratucoincaquin cufinifo samamashta shafanon. <sup>30</sup> Ascaino shashohuan muranno yonomisi futsafoan shasho uhuapama naratamua fotomapaiaifoan. —Shasho nitunon. Non cuno ihuu potapairan, —ishon yoinifo. Fuparapaicaquin. Fopricaquin. <sup>31</sup> Pablonun ato fuchishon ranushumua niaifo yoini,

—Na shasho uhuapama man nitu huayamafin nantifi man asai futsutiroquin, —ishon yoini.

<sup>32</sup> Anori yoitan ranushumuafoan ahuun rusfin shatuafono shasho nonocaini cani.

<sup>33</sup> Ascatac man shafano Pablonun ato yoini, —Man osha quince piqui tunua. Man ratucaquin. <sup>34</sup> Ascan pii fucapun. Man piafin shara itiroquin. Non ahusscaimaran, —ishon yoini.

<sup>35</sup> Asca huatan misi tsomashon aton ointaifi Apa Dios cufiyoni, —Upa Diosin, ¡Aicho! Min noco cushusharamisi, —huatan misi pini. <sup>36</sup> Ascashon piyaino afanan ratunifoma oincaquin shasho murannofoanri piinifo. Pablonun oincaquin ato ointi afanan ratunima. <sup>37</sup> Nan shashohuan muran non doscientos setenta y seis yora. <sup>38</sup> Ascano nantifi misi picani mayancoinnifo. Ascashon ushufo forusafo muran finifo shashohuan muranshon unu muran potaquin futsanifo. Shasho shacainacahuianon.

### *Shashohuan iquini*

<sup>39</sup> Shafacuaino mai fuchiflashocai tsoan onannima. Ascashon unuhuan patontana nannori mainfin fuchicatan ano nocopainifo. —Catiro oinquifin non tanafaintiroquin, —ishon aton nomuran shinannifo. <sup>40</sup> Tanapaicaquin shinancatan, —Rusfinquin tuchi aquin nushua rafu non rafuri non shatunon cacoinni canon, —icashon shatuafono aton shashohuan nonoinacahuaino fooshcaquin. Ahuun chifishtatinin rusfi shoshan huanifo. Ascatac afanan panomanhuan futsa rushtiquiriri afanan rotanifo. —Fuun iyo sharanon, —icashon. Ascatac tanafainifo. <sup>41</sup> Chaicushon oianfo unu tapia ointsacun tanafaipaicaquin mai tsacatoshinifoquin. Shasho rushti fasi coraintoshini. Man fuchomanhuanquin chinahuaquin shasho tsispaquiri cuaque futsani.

<sup>42</sup> Ascaino ranushumuafoan shinannifo, —Na shasho murannofo ichotirofoquin Non ato rutunoncahuun, —ishon yoinifo. <sup>43</sup> Ascanfainton aton niaifoan Pablo rutupaiquima. Ascacun ato nitun huani rutunonfoma. Shasho murannoafoti niaifoan yonoa, —Atiriton man topiqui tapiaquin topifaifafaincahuun maiqui nocotacahuun. <sup>44</sup> Atirifiri ihui sapao yatacanashu maiqui nocotacahuun. Ahuara futsafo shasho muran nonotiro nonofaifafaincahuun mai ano nocosharashcaquin, —ishon ato yononi. Ato yonoa cuscan nanscasi anifo. Nantifi cusumun nocosharai futsunifo.

### *Pablo toomanhuan ahuun anu Malta ano ini*

<sup>1</sup> Ascashon nantifi non unuhuan cusumun nocosharani. Nanno icafoan, —Nocon mai nushmancayan toomanhuan ahuun anu Malta, —icashon yoinifo. <sup>2</sup> Noco fasi

shara huanifo. Nannori oi furiapaoni fasi yotanmahuanquin. —Fucahuun chi cutu huashu yooshcaquin, —noco huanifo. <sup>3</sup> Ascano Pablonun caro ya iconfuran tan chi cutu huapaiyaiton shana muuqui a muranshon shano cuscaraton mucun nasani. Munastan aya rono inacahuani. <sup>4</sup> Ascaiton oincani, —¡Uru! Na nocofunu rutumitsamisiraca. Unuhuan ariashu nocosharafaiton Diosin onaintimanaran, —unu tupusumuni anoashu yoinannifo.

<sup>5</sup> Ascaino mutashquiri itaquin chi muran potani. Isinin inima. <sup>6</sup> Ascashon, —Farashinacahuantan nairan, —icashon oinquin futsanifo. Manariacaquin paunyamacaiyaiton oinquin yoinifo, —¡Oincapon! Nacai rutumitsamisimafinquin. Naafin dios futsaquin, —ishon yoinifo.

<sup>7</sup> Ascatan nanno chaimashta niaifo Publio ahuun mai. Ahuun pushu muran noco iquimani. Noco pimasharafain noco shara huani. <sup>8</sup> Apa isinin icoinni yonacain imi chishoi. Oshati muran racani. Tapitan Pablonun ahuun cunu muran iquicaini Upa Dios cufishonicai. Cufishotan ahuun mucuman mamanni cayanon. Ascaino cayariscatani. <sup>9</sup> Nan mai anoafaoan nicacani nan isinin icaifoti aqui funifo ato caya huamanon. Nantifi ato caya huapacuni. <sup>10</sup> Ascatan noco ahuara ichapa inancoinnifo. Non itisharaquin ato anoashu shashohuanun cashquin non yopai cuscan noco inancoinnifo.

### *Pablo Roma ano noconi*

<sup>11</sup> Oshu rafu non fusti finontan non afanan shashohuanun Malta anoashu cani. Shashohuan anunifo Rafanacaran ishon anunifo. Dios rafuran huashon shinannifo. Ascashon ato rafu anu futsanifo. Futsan ahuun anu Cástor huafain futsan ahuun anu Pólux. Ascan shashohuan rushtiquiri aton ointsa rami huani. Alejandría anoshon shashohuan onihuanifo. Oi pacutian Malta ano nan shashohuan iyoni. Nanuinfoan non unuhuanun non cani. <sup>12</sup> Focani non Siracusa pushurasi ano noconi. Nanno non osha rafu non fustiyoni.

<sup>13</sup> Anoashu focashon unuhuan cutafain non Regio pushurasi ano noconi. Iyoco fut-saino fuaifoquirinoashu fuuhuan furani. Afanan iyoco futsaino non Puteoli pushurasi ano mapuinifoanni. <sup>14</sup> Nanno Jesús icoira huafu non fuchini. —No fu osha siete iyopun, —noco huanifo. Ascano non chipo atomaquinoashu Roma ano cani. <sup>15</sup> Jesús icoira huafu Roma anoafaoan Pablo oaiton nicacani nocoqui funifo. Atirifi pushurasi Foro de Apio nocoqui noconannifo. Atirifiri pushurasi futsan Tres Tabernas anoashu nocoqui noconannifo no fu Roma ano foshcaquin. Pablonun ato oinquin, —¡Aicho! Upa Diosin, min ua yorafoqui nichiaran, —huani. Ahuun ointi fasi fupihuacoanni. <sup>16</sup> Ascano pushurasi ichapacoin ahuun anu Roma ano nocoafono niaifoan yononi Pablo arusu pushu futsan muran isharati. Ranushumua fustiton cushusharanon.

### *Pablo Roma ano ini*

<sup>17</sup> Ascatan osha rafu non fusti finontan Pablonun ahuun caifoan aton niaifofo cunani aqui funonfo. Aqui ichafoan ato yoini.

—Uhuun yoramishtichin, ua nicasharacahuun un mato yoisharanon. Uncai nocon caifo Israelifo chaca huamisima. Nocon shunifoan aton fuyamisifori un chaca huaya-mafiacun ua Jerusalén anoshon achicashon Romanofo ano ua nichinifo. <sup>18</sup> Nanfoan ua nicacani ahua chaca huamaran, ishon shinannifo ua nichisharapainifo.

<sup>19</sup> Ascafaino nocon caifofoan yoinifo, “Nichiyamacahuun. Onaintimahuu,” ua huafainfoan copiquiri uhuun caifoqui un tsain chaca huama. Ascatamarocon un Romano niaifo patasharifo yoini, “Unfin maton niaifo Cesar ano capaicain uhuunoa cayacafi yoishquin un ahua chaca huama tapinon,” ishon ato yoini. <sup>20</sup> Ascacun un mato cuna matofu tsainshquin. Nocon caifo Israelifoan non Diospan facu nan nocon Numamisi non manamisi. Unrifi icoira huamisi. Un icoira huahuunshon nocon caifo ua Romanofo ano nichini. Ascashon man oiaín cuscan ua munushuafoquin, —ishon Pablonun ato yoini.

<sup>21</sup> Nicacashon cumanifo, —Mihuunoa tsoan noco cunu fumama. Jerusalén anoashu funifo tsoancai mihuunoa tsain chaca yoimisima. <sup>22</sup> Non nicamisi manifoti anoafaoan Jesús icoinra huafouqui tsain chaca huafo. Ascan min icoinra huai cuscan non tapi-pairan, —ishon yoinifo.

<sup>23</sup> Ascatan —Non chipo mifu ichantaniroran, —huanifo. Ascano yora ichaparasi Pablo icano funifo nicacani. Funamanri yoitiashon ato yamu huani. Upa Diosin iquinaino ato yoifain Moisés cununi cuscan yafi Diosin ahuun yoishomisi futsafoanri Jesushuunoa cununifo cuscan ato icoinra huamapaiquin. <sup>24</sup> Nicacatan atirifiton icoinra huaino atirifoan icoinra huanifoma. <sup>25</sup> Tsoancai nannorisi shinannifoma. Ato yoiai cuscan fochismanantanannifo. Amaquinoashu foataifoma Pablonun ahuun tsain unutaquin ato yoini isca huaquin,

—Nocon shuni Isaías nanton inonpacoai yoimisi Diospan Yoshin Sharahuunshon nocon shunifo iconquin yoini isca huaquin,

<sup>26</sup> “Min caifo nan Israelifo ano catahuun ato yoiquin isca huatahuun, ‘Man nicafafafiaquicai man tapinacama. Ahuara sharafo man oinfiaquicai matton nomuran man nanucoiantaima.’ <sup>27</sup> Aton ointi mutocoianfo. Iiconcoin nicafiaquicai nicacorianfoma. Oinfiaquicai tapipaicanima. Iiconcoin oinfain iconcoinri nicaifoan un ato chaca soashocuana ufu nipanonfo,”

ishon Diosin Isaiasihuunshon nocon caifo yoini. <sup>28</sup> Ascaino marifi Upa Diosin noco numapaiyai cuscan man nicapaiyamaino un caifo futsafo ahuun tsain yoicain. Afoan-fin nicacaniquin, —ishon Pablonun ahuun caifo yoini. <sup>29</sup> Yoitan amaquinoashu fo-canashu fasi fochishmanantanannifo.

<sup>30</sup> Ascatan Pablo nanno fari rafu iyoni. Pushu ifo pui inanni a muran iishquin. Ascatan tsoa ahuun pushu ano fuafuan ato iquimani yoisharashquin. <sup>31</sup> Upa Diosin iquina cuscan huafain nocon Ifo Jesucristohuunoa ranotama ato yosini. Tsoancai ahuun tsain shatumanima. Nanti.

## Pablonun Roma Anoafo Cunu Fomani

### *Jesús icoinra huafu Roma anoafu Pablonun cunu fomani*

<sup>1-3</sup> Uhuun yoramishtichin, Roma anoafuan un mato cunu fomai man tapinon. Unquian Pablo unfin Jesucristo ahuun oinmatiquin. Ua catonni un afu rafumisi un inon. Upa Diosin ua nichini ahuun tsain shara Furunhuunoa un yoinon. Jesús David ahuun funa ini. Caiantaima Diospan tsain shara inonpacoai cuscan ahuunoa cunushonifo.

<sup>4</sup> Ahuunoa cununi cuscan Diospan Yoshin Sharapan ahuun curushhuunshon nocon Ifo Jesucristo maiya anoa funimani. Funimashon noco tapimani nan Diospan Furun Shara nocon Ifoan ahuamamishti huatiro. <sup>5</sup> Non ahuara shara huahuunshocai Upa Diosin noco catonnima. Ahuun Furunhuunoashu nocohuun ramapaiquin noco catonni afu rafumisi inon. Noco nichini nocon caifomari non ahuun tsain yoinon ahuun Furun Cristo icoinra huanonfo. <sup>6-7</sup> Upa Diosin manifoti icoinra huemapai. Mato Roma anoafori noiquin mato catonni maton chaca man shatunon Furun Jesucristo ahuun yorafo man inon. Upa Diosin nocohuun ramapaiquin nocon ointi shinansharacoinon. Furun futan Apamain matoasca huashopainon.

### *Pablon Roma ano oinmitsai capaini*

<sup>8</sup> Tau huaquin un mato yoisharapai. Man Jesucristo icoinra huacun manifotiton nicamisifo. Ascacun un mato shinanquin un Jesucristohuunshon —¡Aichoran! Upa Diosin, —ishon un yoimisi. <sup>9-10</sup> Upa Diosin ua yonomapaiyai cuscan un curushcain yonoshomisi ahuun tsain shara Furunhuunoa un ato yoinon. Upa Diosifin ua oinquin un mato shafatifi cufishofafainahton. Nan un cufiaiin cuscamaain Upa Diosin mato muran ua nichi huuati ishon un cufifafaini. <sup>11-12</sup> Un fasi mato oinpai mato Diosin tsain yoipaiquin. Ahuun Yoshin Sharahuunshon man icoinra huanon man yoinonansharanon Jesús tanasharashquin. Un icoinra huaino marifi man icoinra huainofin non unimanantanantiroquin.

<sup>13</sup> Uhuun yoramishtichin tapicahuun. Uhuun caifomari un ato Jesushuunoa yoimisi tanasharanonfo. Nanscarifi un mato huemapai. Mun catacatamisi ifiacuanano ahuara futsa huai un camisima. <sup>14</sup> Jesús ua yonoa ahuunoa manifoti un yoinon. Ua yonoa cuscan ayamai un yoitima itiro. Ascan nantifi un yoipai. Uhuun caifomari yoifain nahuafori yoifain cunu tapiafori yoifain cunu tapiamafori un yoinon. <sup>15</sup> Ascashori un mato tsain shara Jesushuunoa Roma anoafu yoi capaimisi.

### *Nan tsain shara Jesushuunshonfin ahuamamishti huatiroquin*

<sup>16</sup> Nan tsain shara Cristohuunoa Upa Diosin ahuun curushhuunshon icoinra huafoti ato numatiro afu nipanonfo. Uhuun caifo Israelifoan nicaquin tauhuanifo. Natiarifi mani futsafoan nicacani Upa Dios fu nipashcaquin. Ascacufin un ranotama manifoti ahuun tsain shara un ato yoicain. <sup>17</sup> Nan tsain sharafohuunoa Upa Diosin noco tapimana ahuuscashumain non isharatiroquin ahuun tsain tanasharashquin. Nan non Jesús Ifo huaquin tau huanitian non Upa ari caitianri nanscasi huaquin non icoinra huatiro isharacoinsquin. Diospan tsain cununi isca huaquin, —Nan Diosin aton chaca soashonafoanfin icoinra huamisifoquin, —ishon cununi.

### *Upa Diosin icoinra huamafo ato onaintimashqui*

<sup>18</sup> Ascafiai atirifo ascarafoa. Diosihuunoacai shinanpaicanima. Icoinra huapaicanima. Chacasi shinamisifo. Chaca fustisi tanapaicaniquin. Diospan tsain iconcoin tapifiacashon nicacasmamisifo. Nantifi nanscarafosi Upa Diosin atoqui sinacquin. Nai muranshon ato onaintimaquin finacoinsquin. <sup>19</sup> Upa Diosin ahuu cuscaramainquin tapipaiquifin tapicuanafouquin. Upa Diosin ato shafacafi ismani.

<sup>20</sup> Nantifi onihuaquin tau huanitian natianri ato shafacafi ismamisi. Mai yafi nai onihuani cuscan nantififain oinmisifo. Diosin ahuamamishti huatiro oinmisifo. Ascacun,—Uncai tapiamama ahuu cuscaramain Diosiquin,—itirofoma. Nan tapiamafofin atohuun nuaquin.

<sup>21</sup> Ahuunoa tapifiacashon yoicasmanifo. —Min nocon Diosin. Min fasi shara. Non mia noi. ¡Aicho! Min noco shara huafafainiran,—ishoncayoinifoma. Ascacun ahuunoa amaquiri ipaitsi shinannifo. Aton nomuran afanan ahuunoa shafacafi shinantamaroon nisopan shinantiro cuscan shinannifo. <sup>22</sup> —Nonfin fasi tapisharaquin,—ifiacatan tativashunifo.

<sup>23</sup> Nocon Diosincayon nanacama. Ifiacashocai isca huaquin yoinifoma,—Upa Diosin, tsoa futsacai mia cuscara shara imisima. Min ahuamamishti huatiro. Non mia noiran,—ifiacashon anori yoitama ahuara futsafo rami huanifo. Na nocofunufo naashu payocofiafo nan ointsa rami huafain puiyafa rami huafain yoinafo rami huafain rono cuscarafori rami huanifo. —Nanfo nocon Diosiran,—ishon yoipaonifo.

<sup>24</sup> Ascacun Upa Diosin ato potaquin futsani aton nomuran chaca huapaiyai cuscan huanonfo. Afanancayon ato numanima. Afi ranan chaca huaa tanannifo futsan namanhoa ainfo fucashni huaifoan. Ainfofori ascarifiaifoanno. <sup>25</sup> Upa Diosin tsain icoinra huatama chani fusti catonni. Diosin nantifi onihuani. Nan Diosicai cuvitama nan onihuafio cuvinifo. Ascatama Diosin shararan ishon yoipacupainonfo.

<sup>26</sup> Ascacufin aton nomuran chaca huapaiyafioan tapishon Upa Diosin ato potani. Afanancayon ato numanima. Upa Diosin noco onihua cuscan nocofunufo ainfo ya icaino ainfofori nocofunufo ya inonfo. Ascatamaroon ainfofo afiran fuchinanpaicani. Aforanansi iquinannifo. Chaca huatanannifo. <sup>27</sup> Nanscarifiai nocofunufo ainfo tanatama afi ranan iquinanpaicani. Ascashu chaca huantanancatan aton nomuran aton cayari omitsisca huapaonifo.

<sup>28</sup> Ascacurifi Upa Dios onanpainifoma amaqi inifo. Ascacurifi arifi ato potani aton nomuran afiran shinanpaiyafio cuscan chaca huan tananonfo. <sup>29</sup> Chaca fustisi shinancani chaca huan tananonfo aton ahuinma ya icaifoanno ainfofori ato funumafo yari ipaonifo. Aton namari fipaifain. Fasi chacaflo icain mafo noiriamisi icain futsafoqui shinanchacamisifo icain fashimitsamisifo icain rutumitsamisifo icain fochishmanantanancatan sinai fuyamisifo icain paramitsafoanfafainmisifo icain noimati huamitsamisifo icain yoiti huamitsamisifo icain <sup>30</sup> futsafo yoiti huafain Dios noicasmafain roanmitsamisifo icain cacapaimisifo icain aton nomuran chaca fustisi shinamisifo icain aton apa yafi ahua nicacasmafain <sup>31</sup> ahuara shara shinanpaimisifoma icain tsoashtacai ato icoinra huatirofoma icain tsoanshtahuun noiyamacain chaca huapaimisifo icain rauhuaquin tapiamaflo icain tsoanshtahuunca ramapaimisifoma icain. <sup>32</sup> Upa Diosin ahuun tsain shara yoiquin isca huani,—Futsafoan ascaran chaca huaiton un ato namairan,—ishon. Yoini cuscan man tapifiacashon aton chaca shatupainifoma. Ascarifiatan futsafoanri nan acaifo cuscan huaifoan oincaquin,—¡Aichoran! Nanscaricon chaca huatanacahuun,—ato huanifo.

## 2

### *Upa Diosin ato iconquin onaintimai*

<sup>1</sup> Ascano man shinanraca,—Nan cuscara yora fasi chacacoin. Upa Diosinmain ato onaintimapainonran,—ifiashon marifi man asca huamisiquin. Ascashu, mafiri man yoimui cuscarafo. Matori onaintimati. <sup>2</sup> Nan non ahuara chaca huamisi cuscan nantifi Upa Diosin man tapicoian. Ascan man non tapian nan chaca huamisifo iconcoin ato onaintimai.

<sup>3</sup> Mancaj Upa Diosin cuscarama. Marifi man nocofunufiashon man yoiquin isca huamisi,—Nan chaca huamisifomain Upa Diosin ato onaintimapainonran,—ifiashon marifi man asca huamisi. ¿Ascacun man shinanmun Upa Diosin matori onaintimaimaquin?

<sup>4</sup> Upa Diosin matohuun noiiquicai mato funa ahuuasca huarima. Man chaca huafaiton mato shara huafafaini. Mato funa onaintimaima. ¿Man tapiamamun matohuun ramapaiquin maton chaca shatumapai man tanasharanon? ¿Nanfohuunoamun man shinanpaimacai? ¿Diosiqui man ointi mutoimun?

<sup>5</sup> Upa Diosin mato shara huafaintocai man shinan futsapaima maton chaca shatushquin. Diosquiricai man shinanmisima. Man chaca huaa cuscan Upa Diosin ointiaquimaima. Ascan chaca huaquin man unuyamaiton Diosin sinaitian mato onaintimashqui. <sup>6</sup> Upa Diosin nan niyoshon amisifo cuscan atoti inanpacushquin.

<sup>7</sup> Nan tsoaran Diosin ato imapaifyai cuscan amisiton futsafo shara huafafaini tsain shara Upa Diosin atohuunoa yoisharaiton nicapaicani. Isca huaquin, —¡Aicho! Un mia yonoa cuscan min amisi. Un miqui unimai. Min ufu ipasharatiroran, —ishon nicapaicani. Afu ipashquin. Nan cuscarao Upa Diosin aya ato imapacunaca. <sup>8</sup> Ascafia ratoranfoan afi apaiyai cuscan fusti shinainfoan aton nomuran fucash huamisifo icain Diospan tsain iconcoin tanatama ahuara chacafosi tanaifoan. Nan cuscaraoqui Upa Diosin ahun nomuran sinacoinquin ato onaintimashqui. <sup>9</sup> Nan ratoran futsa Israelifo iyamarai mani futsafoan chaca huamisishaquin fasi aton nomuran omitsiscai finacoinshcanni. <sup>10</sup> Ascacun ratoran futsa sharamisicun Diosin sharapan ato yoishquin, —Mian nicamisicun. Un miqui unimairan, —ishon ato yoishquin. Aton nomuran unimacaquin ahua fucash huanonfoma. Israelifo iyamarai mani futsafo isharaifoan Upa Diosin ato shara huaiquin. <sup>11</sup> Ascacun Diospan nantifi noco nanscarafosi oin.

<sup>12-15</sup> Nantifiton chaca huamisicun ato onaintimashqui. Uhuun caifo Israelifoanma atirifiton Upa Diosin tsainquin cununifo cuscan oinyamafiamisishaquin ahuara shara aton nomuran tapiafo. Tapifiacashon shara huamisifoma. Chaca huafiacatan aton nomuran shinanquin isca huamisifo, —Un chaca huaran, —iyamarai, —Uncai chaca huamaran, —ishon shinancani. Ascacun chaca huaifoan ato onaintimashqui. Ascashu omitsiscapanacafo muran foshcanni. Ascan uhuun caifo Israelifoan Upa Diosin yononi cuscan noco cunushoni cuscan non aya. Tsoan man tapifiashon chaca huaiton nan yononi cuscan huaquin ato onaintimaicain nan omitsiscapanacafo muran foshcanni. Diosin tsain cununi cuscan nicafiaflashucai ascacoianfoma ato imasharanon. Ascano Diosin yononi cuscain ato yoishquin, —Min shararan, —ishon ato yoishquin. <sup>16</sup> Nantififain aton nomuran shinanmisifo cuscan Upa Diosin tapicoian. Nan shinanmisifo cuscan fomanfiainfoan nocon Ifoan nantifi ato puashoshquin. Upa Diosin ahun Furun Jesucristohuunshon ato onaintimashqui. Nannori Diospan tsain sharahuunoa un mato yoi.

### *Diosin yononi cuscan Moisés Israelifo tapimani*

<sup>17</sup> Uhuun yoramishtichin, Upa Diosin yononi cuscan noco cunushopaoni. Nan noco cunushonicun man shinanraca, —Upa Diosin non Israelifo noco fusti catonni futsafocai catonnima. Non fustifin ahun yoraquin, —ishon man shinanmisiquin. <sup>18</sup> Mato amapaiyai cuscan man man tapia. Tapimamisifoan ahun tsain mato tapimana. Ascan ahuara shara nicashon, —Iconran, —ishon man yoimisi.

<sup>19</sup> Man yoiquiri isca huaquin, —Nocon caifoma fusho cuscarao. Ahuuscashomain Diosin tsain tanasharatiroquin tapiafoma. Nonfin ato tapimatiroquin. Faquish muran ica shinantsa aaflo. Nonfin chashamati cuscara ato chashashotiroquin Diohuunoa tapinonfo. <sup>20</sup> Upa Diosin noco yononi cuscan iconcoin. Ahuun tsainhuunshon non tapicoian. Ascacun tsoa futsacai tapiataima aton chaca shatushcaquin non aton facufo ya tapimatiroran, —ishon man shinanmisi.

<sup>21</sup> Man futsafo tapimamisi ¿Ahuuscain mafiri man tapimamuimanmun? Futsafo man yosimisi, —Ahua onuyamacahuun, —man huamisi. ¿Marifimun man onumisima?

<sup>22</sup> —Maton ahuinma fu iyamacahuun. Maton funuma furi iyamacahuun, —man ato huamisi. ¿Ascafiahu marifi maton ahuinma fu man icamun? —Ascan Diosicoinma

cufiyamacahuun. Dios fusti noicoincahuun, —man ato huamisi. ¿Mannun Upa Dios fusti tanacoincai? <sup>23-24</sup> —Upa Diosin noco yononi cuscan man non tapicoian, —nan cacapaimisi cuscara man tsainfafaini. Man futsafo yoifiatacái marifi Diosin yononi cuscan man aimá. Ascan matohunshon nocon caifomafoan yoiquin isca huamisifo, —Diosin ahuun yorafocai isharafoma. Ascan arificai sharamaran, —ishon yoimisifo. Ascan matohunshon Dios chaca huafo. Nannorifi Diospan tsainquin cununi.

<sup>25</sup> Upa Diosin noco yononi cuscan non aafin nan Israeli sharafo cuscara noco imatiroquin. Ascafia noco yononi cuscan ayamashu nan yora chaca cuscarafo non itiro.

<sup>26</sup> Yora futsafo Diosin yononi cuscan amisicun Upa Diosin noco shara huashopaiyai cuscan atorifi shara huashotiro. Noco inanpaiyai cuscari atori inanshquin. <sup>27</sup> Nanfo Israelifomafashion Diosin tsain nicasharacoincani. Manfin Israelfoquin. Diosin mato yononi cuscan tapicoinflashu man yoitimamisi. Ascan nanfo isharafiainocai man isharamisima.

<sup>28</sup> Diospan yoracoinin ahuun tsain tanasharatiro. Nanfomin Israelicoinfoquin. Futsafo Israelicoinfo cainfianishaquin Diosin yononi cuscacoin acanima. Afocai Diospan yoracoinfoma. Ascafiaflashucai Israelifocoinma. Nocon fuyamisi cuscara furonanfacu rama caian non foshqui rupa shatumisi. Ascan tapitirofo nanfo Israelcoin. Ascafia noco yononi cuscan non ato foshqui rupa shatufiacai ahuun tsain icoinra huafomacai Diospan yora itirofoma. <sup>29</sup> Diospan Yoshin Sharahuunoashu nocon nomuran fianantan-tiro non Diosiquiri shinansharanon. Ascashu Diospan yoracoin iishquin. Non ascaino yorafoan nocohuunoa yoisharayamafaino Upa Diosin nocohuunoa yoisharashquin.

### 3

<sup>1</sup> Ascan nonfin Israeliri cainniquin. Ascan non ahuaraya cuscacai futsafo ayama. ¿Non amisi cuscan nocon facufo non aton foshqui rupa shatuainomun shara itiro? Ainfain. <sup>2</sup> Uhuun yoramishtichin, shinancapon. Upa Diosin manifoti yoipaiyai cuscan nocon caifo yoiqui tau huani. Noco tapimani cuscari non mani futsafori tapimanon.

<sup>3</sup> Icon, atirifi nocon caifocai Upa Diosin yononi cuscacoin acanima. ¿Icoinra huayamafashion Upa Diosin noco yoini cuscumun noco ashaimacai? <sup>4</sup> Ma. Ascacunacama. Nantifi yorafoan noco paratirofiancái Upa Diosin noco parapacunacama. Nanfin iconcoin fustiquin. David cunuquin isca huani,

“Yorafoan Upa Diosin tsain icoinra huayamafashion ahuun tsain cayacafi iconcoin manifoti ato tapimashcaniran,”  
ishon cununi.

<sup>5</sup> Futsan shinanquiraca, —Upa Dios fustifin sharaquin. Noncái ascaranma. Ascan non chaca huaiton futsafoan noco oinquín Upa Dios noco cuscarama aafin sharaquin. Ascan tapitirofo Upa Dios mimacai sharacoincun. Nocon chacahuunshon futsan tapitirofo Upa Dios sharacoincun. Diosincái iconquin noco onaintimatiromaran, —ishon anori shinantirofoquin. <sup>6</sup> ¡Ohua! Fasi amaquiri shinancani. Upa Diosicai non chaca huaa cuscan ointiaquimatiroma. Non chaca huafaiton Upa Diosin noco onaintimayamaitocai ahuuscashon non tapitiroma afananasca huashquima. Diosin chacafo onaintimayamaino ahuuscashomain yorafoti yoitiroquin afu ipayamarain omitiscapanacafo muran focanicai.

<sup>7</sup> Ascan futsafoanraca shinancani, —Un chani yoimisicun futsafoan tapitirofo Upa Diosin iconcoin fusti yoimisi. “Upa Diosin sharacoinran,” ishon yoishcani. Ascan uhuun chanihuunshon futsafoan mima huaquin Dioshuunoa shinansharashcani. ¿Ascan ahuuiscain, “Min chaca huamisicun un mia onaintimairan,” ua Diosin huatiromun? —Nannorí man shinanraca. <sup>8</sup> Nan cuscara yorafoan fasi amaquiri chaca shinanpaicani. Isca huaqui yoipai, —Non chaca huanoncahuun. Ascan Dioshuunoa shinansharatirofoquin, —ishon yoipaicani. —Pablonunri anori yoimisiran, —ishon yoicani. Chanimisifo. Uncai anori yoimisima. Upa Diosin iconquin na cuscarafo onaintimashqui.

### *Tsoafutsacai non isharamisima*

<sup>9</sup> ¿Ascan yora futsafo chacafaino noncai ato cuscaramamun? ¿Norus fustimun non shara? Ma. Anorima. Un mato tapima cuscan nantifi yorafocai nocon caifomafoan norifi non Israelifoanri man non chaca huamisi. <sup>10</sup> Nunorifi Diosin tsain cunuquin isca huaniquin,

“Diosin noco yononi cuscacai tsoashta amisima. <sup>11</sup> Diosin noco yononi cuscan tsoancai tapicoinmisima. Mancai Upa Dios onanpaicoanma noco yononi cuscan tapishquin. <sup>12</sup> Manifoti anoafaoan Upa Dios cachiquiri huaafó ato isharamapaiyai cuscan atamarocon chacacoin tapiafo. Tsoacai shara tapimisima. Tsoa fusticai isharamisima. <sup>13</sup> Yora naacun mai huashon non fupuaino pisin tohuutiro cuscan nanscarifiai aton ashfan muranshon tsain fasi chacacoin yoimisifo. Nan rono paupaton noco nasa non mutiro cuscan aton tsainmanri noco omitsiscamatiro. <sup>14</sup> Roanmitsamisifo icain tsain isininpatorn yoimisifo. <sup>15</sup> Samamashta yora rututirofo. <sup>16</sup> Nan cahuan-cacainaishon yora chaca huafafainmisi ato omitsisca huafafainmisi. <sup>17</sup> Diosin nocon ointi shinansharamapaiyai cuscacai afoan mumisima. <sup>18</sup> Dioshuunoa shinamisifoma. ‘Aacai ahuamaran,’ ishon shinamisifo. Aquicai ratucanima,”

ishon Diosin tsain inonpacoai cuscan yoimisifoan cununi.

<sup>19</sup> Man non tapia Upa Diosin yononi cuscan Moisés noco cunushoni. Noco yononi non chaca huanonma. Noco yononi cuscacai non amisima. Ascan tsoancai yoitiroma isca huaquin,—Diosin yononi cuscan un amisiran,—ishoncay yoitiroma. Iconquin nantifi noco onaintimatiro. <sup>20</sup> Ascacucay Upa Diosin tsahuunoa yoitiroma isca huaquin,—Un mato yononi cuscan man amisi. Man ahua chaca huamisaran,—noco huatiroma. Diosin noco yononi cuscan man non tapicoinflashon nanhuunshon non shinantiro,—¡Ohua! Upa Diosin yononi cuscacoincay un amisima. Urifi un chaca huamisaran,—ishon non shinantiro.

### *Jesús icoinra huaashu non Dios fu ipatiro*

<sup>21-22</sup> Upa Diosin noco yononi cuscan Moisés noco cunushoni. Noco cunushoni cuscan non apaifiai non itiroma Diospan yora iishquin. Ascafia ahuuscashomain nocon chaca noco soashotiroquin a cuscara shara non inon Upa Diosin natian noco tapimana. Nannori Moisés yafi Diospan tsain yoimisi futsafoanri cununifo. Ratoranfo nocon caifo Israelifo iyamarai nocon caiforma non Jesucristo icoinra huacun nocon chaca noco soashotiro a cuscara noco imasharashquin. <sup>23</sup> Manifoti anoafaoan nantififain man non chaca huamisi. Upa Diosin noco imapaiyai cuscacai tsoa acoinmisima.

<sup>24</sup> Ascafia Jesucristo noco nashoni nocon chaca soashoshquin. Non icoinra huacun afanan chaca nocon ifo itama Jesucristo acoin nocon Ifo inon. Non ahuara shara huahuunshoncay noco numanima. Ahuun Furunhuunshon nocohuun noiquin noco numani.

<sup>25</sup> Ahua chacacai Upa Dios fu itiroma. Ascan Furun nichini nococairocon onaintimata Furun onaintimani nocohuunoashu nashon nocon chaca soashonon. Ascan ahuun imi foyanan noco nashoni non icoinra huaiton Upa Diosin noco onaintimaima. Ascan Furunmun noco nashoantaima iyopaonifoanri chaca huapaonifo cuscan. Tapiyonifo chipo Furun atohuunoashuri nashquiai. Ascano icoinra huafaoan aton chaca iconquin Furunhuunshon soashotiro afori afu ipanonfo. <sup>26</sup> Natianri Diosin ato ismapai chaca huafiamishaquin Jesús icoinra huacun ahuun yorafo ato imatiro. Man raca shinain,—¿Ahuuscain chaca huamisifo ato onaintimaima Upa Dios fu ipatirofomun?—ishonraca shinancanquin. Anorimafinquin. Furunmun ato nashoni aton chaca soashoshquin. Ascan nan icoinra huacatan Upa Dios fu ipatirofo. Iconquin ahuun yorafo ato imatiro.

27-28 Non ahuara shara huahuunshoncái nocon chaca noco soashonima. ¿Ascan tsoancai yoitiroma isca huaquin? —Upa Diosin noco yononi cuscan un nantifi amisi. Ascacufín un afu ipatiroquin, —ishon tsoancai anori yoitiroma. Ascarafó shinainno cacapaimisi itiro. Upa Diosin noco yononi cuscan non nicamisihuunshocái noco numanima. Furún icoinra huaitón noco numatiro. Nannori non mato yoimisi. <sup>29</sup> ¿Upa Dios nocon caifo Israelifoan nocon Dios fustimun? Ma. Caifo futsanfoanri aton Diosiri. <sup>30</sup> Upa Diosin noco nanscarasi huai. Nocon caifo yafi nocon caifomari Jesús icoinra huaitón nocon chaca noco soashotiro afanan noco chacahuunoa shinanonma. <sup>31</sup> ¿Ascano non Jesús icoinra huacun Diosin Moiséshuunshon noco yononi cuscan non yopaimamun cununi cuscan aquin? Ascatama non Jesús icoinra huaitón Upa Diosin noco yononi cuscan non atiro. Jesushuunshon fusti non atiro.

## 4

### *Abrahamhuunoa Pablo noco ahuara futsa tapimani*

1-2 Ascatan natian un nocon shuni Abrahamhuunoa mato yoi. ¿Diosin yononi cuscan aimun ahuun chaca soashoni sharacoin inon? Ma. Anorima. Abraham asca huaitón yoicuana, —Unfin Diosin yononi cuscan un amisiquin, —ishon yoicuana. Ascafiaflashu nanoricai yoimisima. Upa Diosin ahuun ointaificai ascatiroma. <sup>3</sup> Ahuunoa Diospan tsain cununi isca huaquin, —Abraham Upa Dios icoinra huamisi. Ascaino Upa Diosin ahuun chaca soashona a cuscara isharanon, —ishon cununi.

4-5 Non yonoaino ifoan noco cashman inainma. Noco nifishon noco inantiro. Nanscarifai non ahuara shara huatiroma Upa Diosin noco nifinon nocon chaca noco soashonon non afu ipanon. Nonfin chaca huamisifoquin. Ascafiaflashon non Jesús icoinra huacun Upa Diosin noco yoishquin, —Un maton chaca soashona. Man uhuun facuhuunoashu isharanon, —ishon noco yoishquin. <sup>6</sup> Nannori nocon shuni David yoini. Noncái ahua shara huatiroma Upa Diosin noco unimamanon. Afin noco yoitiro, —Un min chaca mia soashona. Ascan min ua cuscara shara iquiran, —ishon noco yoiaino non unimatiro. <sup>7</sup> David isca huaquin yoini,

“Tsoan ahuun chacafo Upán Diosin rau huaa afanan afohuunoa shinanya-máinio fasi unimatiro. <sup>8</sup> ¡Aicho! Upa Diosin isca huaquin yoishquin, ‘Min chaca huaa cuscan un afohuunoa afanan shinancunacama. Natian min chaca huamisima cuscara min itiroran,’ ishon yoiaino fasi unimacointiro,” ishon David yoini.

<sup>9</sup> ¿Upa Diosin Israelifo fusti unimamatiromun? Ma. Israelirifomari aton chaca soashotiro a cuscara shara imashquin. Abraham Diosin icoinra huacun ahuun chaca soashona a cuscara shara imashquin. Nannori non mato yoimisi. <sup>10</sup> Foshqui rupa shatuataima ahuun chaca soashoni a cuscara shara imashquin. <sup>11</sup> Abraham foshqui rupa shatuataima Upa Dios icoinra huaqui tau huani. Ascacun ahuun chaca soashoni a cuscara shara inon.

Ascaino chipo fari ranan finoanno Upa Diosin Abraham yononi, —Min non min yorafori foshqui rupa shatucahuun. Nan foshqui rupa shatushunfin min shinantiro isca huaquin, “Icon Upa Dios un icoinra huacun uhuun chaca ua soashona ua shara huapanaca Upán Diosin ua yoiyoniran,” —ishon Diosin Abraham shinanmani. Ascacufín tsoafo foshqui rupa shatuataima Dios icoinra huashu Abraham ahuun upa cuscara itiro. Afin foshqui rupa shatuataima Upa Dios icoinra huaquin tau huani. Ascacun ahuun chaca soashoni a cuscara shara inon. <sup>12</sup> Foshqui rupa shatuafori Abraham cuscara itirofoquin. Aafin foshqui rupa shatuataima Dios icoinra huanquin. Afoanri arifi Jesús icoinra huacanashu Diospan yora itirofoquin. Ascan Abraham aton upa cuscarrari itiro.

### *Abraham Diosin yoiyoni cuscan icoinra huashon ahuunoa fini*

<sup>13</sup> Upa Diosin Abraham yoini isca huaquin, —Min non min funafori nan maitio un mato inannon matonna inon, —ishon yoiyoni. Upa Diosin icoindra huacun aton chaca soashona a cuscara shara inonfo. Ascacufin ato yoiyoni cuscan ato inanshquin. <sup>14</sup> Futsafoan icoindra huayamafashion shinanquin isca huaa, —Diosin yononi cuscan un aiton uqui unimatiro noco inanpaisai cuscan ua inanshquiran, —ishon shinantirofo. Nanfo Diosin yoiyotiani cuscan fiaino non ipaitsi icoindra huaa. <sup>15</sup> Ascafiai anorima. Diosin noco yonoyamaino tsoacai yoitima icuanamafinquin. Ascafia noco yononi cuscan apaifiaicai tsoa ascamisima. Diosin chacafoqui sinai yoitimamisifo onaintimashqui.

<sup>16</sup> Ascan non ahuara shara huaacucal Upa Diosin noco yoiyotiani cuscan noco inainma. Non icoindra huaiton noco cashman inanshquin. Ascan nan Israelifo yononi cuscan tanaifo iyamarai nan tanaifoanmari Upa Dios icoindra huacanashu ahuun yorafo itirofo. Ato yoiyotiani cuscan cashman inanon. Abraham icoindra huani cuscan afoanri icoindra huashu ahuun funafo cuscara itirofo. <sup>17</sup> Nannori Diosin tsain cunushoni isca huaquin, —Manifoti min aton upa cuscara. Un mia imashquinran, —ishon Upa Diosin Abraham yoiyoni. Abraham tau huaquin Upa Dios icoindra huani. Ascan norifi non chipo icoindra huashu nocon upa cuscara itiroquin. Upa Diosin noco oin non Abraham ahuun facufo cuscacun. Diosin yora nacun funimatiro ninon. Icataima rufofo Upa Diosin yoiqui tau huani.

<sup>18</sup> Ascano Abraham anifoshta afanan facu atiromafashion Dios icoindra huaacun. —Min chipo facu yashquin. Min funafori ichaparasi cainshquiran, —ishon Upa Diosin yoiyoni cuscan icoindra huani. Ascan yora ichapafoan aton upa cuscara ica. <sup>19</sup> Tapini anifoshtacoin cien fari aqui caa. Ahuin Sararifi noventa fari aqui caa afananricai facu nanutiroma. Ascan man tapifiashon Diosin yoiyoni cuscan icoindra huani. Icoindra huaa cuscacai afanan amaqui ipainima.

<sup>20-21</sup> —Un anifocoinno uhuun ahuinri yoshafoflashon Upa Diosin ua yoiyoni cuscan ua facu inantiroran, —ishon shinanni. Mimacaiquin icoindra huani. —¡Aicho! Upa Diosin, mian yoiyoni cuscan mian inanshquin. Min curushhuunshon mian yoiyoni cuscan mian ashottiroran, —ishon yoini. <sup>22</sup> Icoindra huaiton Upa Diosin ahuun chaca soashoni a cuscara shara inon. <sup>23-24</sup> Upa Diosin tsain yoini isca huaquin, —Abraham Upa Dios icoindra huani. Icoindra huahuunshon ahuun chaca soashoniran, —ishon cununi. Abraham fustihuunshocai cununima. Norifi nan icoindra huafoti noco cunushoni. Nocon Ifo Jesús naacoinfiacun Upa Diosin funimani nipanom. Nan non icoindra huaiton nocon chacari noco soashonon a cuscara shara non inon.

<sup>25</sup> Nocon Ifo Jesús namani nocon chaca noco soashonon. Nantori funimani Upa Diosin noco rau huanon a cuscara shara non iishquin.

## 5

### *Tsoan nocoquí patatiroma*

<sup>1</sup> Upa Diosin nocon Ifon Jesucristohuunshon noco rau huaa nocomaqui afanan iquima no fu ipashquin. Ascano nan icoindra huashu non afu isharapacutiro. <sup>2</sup> Non icoindra huacun Upa Diosin noco noiaino non afu shafatifi rafutiro. Ascano unimacoinquin non tapitiro noco imapaisai cuscan shara non atiro.

<sup>3</sup> Ascatari non Jesushuunoashu omitsiscafiaquin non shinanchacaquima Jesús tununi cuscan non tunuointiro. Ascatan non unimatiro. <sup>4</sup> Non tunuaino Upa Diosin nocoquí unimatiro non Jesús cuscara isharashquin. Non isharaquin non tapitiro non chipo afu ipasharashquin. <sup>5</sup> Upa Diosin ahuun Yoshin Shara nocoquí nichini. Ahuunshon non tapitiro noco fasi noicoin. Nan tapishocai non shinanchacatiroma. Noncái iscaciroma, —¡Ohushta! Un ipaitsi Jesushuunoashu un omitsisca. Ua yoiyoni cuscan ua ashoshquimaran, —ishoncái non anori shinantiroma.

<sup>6</sup> Shinancapon. Noncai ahuuscashon nocon chaca soatiroma Upa Dios cuscara isharashquin. Non ascara chaca icaino nantianri Cristo oni noco nashoshquin. <sup>7</sup> Non isharafatiro tsoan noco nashotiro. Itsairaca yora sharahuunoashu fustirasi noco nashotiro. <sup>8</sup> Ascafia un non Diosquiri chaca huafainton nantianri Cristo nocohuunoashu nani. Ascano Upa Diosin noco ismani fasi nocohuun noicoinquin.

<sup>9</sup> Ahuun imi foyanan Criston noco nashoni Upa Diosin noco rau huanon a cuscara shara non inon. Ascacun icoira huamafoqui Upa Diosin sinaquin ato onaintimaitian noco mimacai huaquin numashqui non omitsiscapanacafo muran canonma. <sup>10</sup> Non Upa Dios noicasmayopaonitian Furunmun noco nashoni noco humano non afu ipanon. Natian Jesús niahuunshon mima huaquin noco numanon Upa Dios fu non ipasharanon. <sup>11</sup> Ascano natian nocon Ifo Jesucristo noco Apa Dios ya imapacushquin non ahuunoashu unimacoinon.

### *Adán yafi Cristo*

<sup>12</sup> Ascatan tapicahuun. Adán chaca huaqui tau huani. Chacahuunoashu nani. Ascacufin ahuunshon nantifi manifotifain chaca huamisifoquin. Ascano nantifi nai fut-sushquin. <sup>13</sup> Moiséshuunshon Upa Diosin yorafo yonoataima nantifi manifoti anoafaoan chaca huapaonifo. Moisés yononi cuscan tapishoma Diosin nanfohuunshoncái ato onaintimanima nannonfo. <sup>14</sup> Ascafiaquin Adán niyopaonitian non Moiséstianri yorafoti nai futsunifo. Upa Diosin Adán yonofia nicayosmani chaca huani. Adán Dios chaca huani cuscan futsafoan huayamafiacanashu nai futsunifo. Adán onihuaquin tau huani. Chipo Cristo arifi mai ano oni Adán cuscara nocofunu ishquin. Ascafiaflashuai Adán cuscara coinma.

<sup>15</sup> Nan nocofunun Adán ahuun chacahuunoashu nantifi yorafo nai futsucani. Ascan nan nocofunun Jesucristo fusticai ascanima. Ahuunshon yorafohuun ramapaiquin Upa Diosin ato rau huatiro aton chaca soashquin. <sup>16</sup> Adán chaca huaahuunshon Upa Diosin nantifi namaqui futsai. Ascafia Cristohuunshon aton chaca soashotiro natamarocon afu isharapacunonfo. <sup>17</sup> Adán ahuun chaca fustihuunoashu nantifi namisifono mimacaiquin Jesucristo fustihuunshon Upa Diosin noco rau huatiro. Noco rauhuano non afu ipasharanon a cuscara shara iishquin.

<sup>18</sup> Ascano Adán chaca huanihuunoashu fusti nantifi namisifo. Nanscarifiai Jesús ahuun sharahuunoashu fusti nantifi aton chaca soashotiro ato omitsica huatamarocon ato nimapacunon. <sup>19</sup> Nan nocofunun Adán Diosin nicacasmaquin tau huanino ahuunshon chaca huapamisifo. Nanscarifiai nan nocofunun Jesucristo fusti Apan yoini cuscain. Ascano Apa nicacoinshon ahuunshon yora ichapa imasharatiro Apa fu ipanonfo.

<sup>20</sup> Upa Diosin yorafo yonopaiyai cuscan Moisés cunushoni a chaca huamisifo cuscan tapinonfo. Nanhunshon non tapitiro non fasi chaca huamisi. Mimacaiquin non tapitiro Upa Diosin nocohuun ramapaiquin noco rau huatiro nocon chaca soashoshquin.

<sup>21</sup> Ipaoni chaca fustisi yorafoan aton ifo icaino ato namaquin futsani. Ascafiaflashuai natian Upa Diosin nocohuun ramapaiyaino nocon Ifo itiro. Nocon Ifo Jesucristohuunshon nocon chaca noco soashotiro a cuscara shara non inon afu ipashquin.

## 6

*Non Cristo fu nani cuscara coin afanan chaca nocon ifo inonma Cristo nishon nocori nimapacunon*

<sup>1</sup> Ascan atirifoanraca shinanquin isca huacaniquin,—Non chaca huafafainfainoraca Upa Diosin nocohuun ramapaiquin. Nocon chaca noco soashonaran,—ishon amaqiri shinanmisifo. <sup>2</sup> ¡Ai timafin! Ascayamapacushapainonran. Jesús noco nashoni nocon chaca afanan nocon ifo inonma. Yoran nashocai afanan futsa nicatiroma a furicai afanan rafutiro. Futsan ahuun iforicai itiroma. Nanscarifiai non Jesús fu naa

cuscaracoin chaca afanan nocon ifo inonma. <sup>3</sup> ¿Man tapiamamun man nonfin unu muran iquimamuaquin Jesucristo ahuun yorashon ato oinmashquin? Ascacun Jesús noco nashoni nocon chaca soashoshquin. Norifi afu naa cuscaracoinshon non afanan chaca huanonma. <sup>4</sup> Ascano Jesús maini cuscan norifi non chaca huapaoni afu nani cuscaracoin. Ascashon Upa Diosin ahuun curushhuunshon Furun funimani afu ipasharanon. Nanscarifi aqui nocorifi funini cuscaracoin non afu ipasharanon non chaca huapaoni cuscan afanan non anomna.

<sup>5</sup> Naino non ahuun yoracoin ini afu yora fusti cuscara iishquin. Nacun afincoin funimani isharapacunon. Norifi ahuun yoracoianshu a cuscara funa shara non itiro. <sup>6</sup> Jesús mastaifono norifi afu masta cuscaracoin. Non chaca huapaoni cuscan cuyonon. Non Jesús ifoataima chaca nocon ifo ipaoni. Non afu masta cuscaracoin afanan chaca nocon ifo inonma. <sup>7</sup> Shinancapon. Tsoan nashocai afanan chaca huapaitiroma. Marifi Jesús fu naa cuscaracoinshocai man afanan chaca huapaishquima. Afanan chacapan mato yonotiroma mato chaca huamapaiyai cuscan anomna.

<sup>8</sup> Non Cristo fu naa cuscaracoinshon non icoinra huashu non afu ipasharatiro. Nanri non icoinra huai. <sup>9</sup> Man non tapia iconcoin Cristo funimani afanan nanonma. Ahuashtatocai afanan Cristo namatiroma. Auuun ifo itiroma afanan namanonma. <sup>10</sup> Nai fustinishaquin nocon chaca noco soashoni afanan chaca nocon ifo inonma. Ascano natian Apa Dios fu isharapacunaca.

<sup>11</sup> Nanscarifi aquin natian man shinantiro isca huaquin, —Un chaca ipaoni cuscan man cuyo. Afanan ua ahussca huatiroma. Natian un Jesucristohuunoashu Upa Dios fu rafucacaini ua amapaiyai cuscan aashquin, —ishon anori shinancahuun.

<sup>12</sup> Ascacufin afanan chaca maton ifo imayamacahuun mato chaca huamapaiyai cuscan ayamacahuun <sup>13</sup> Isca huaquin shinancahuun, —Yoshin chacan, mian chaca huamapaiyai cuscacai mian amatiroma. Uhuun cayacai minama mian chaca huampanan, —ishon yoicahuun. Man chaca ipaoni cuscan man naa cuscaracoin. Ascafashu natian man funa cuscaracoin Upa Dios fu ipashquin. Ascano Upa Dios yoicahuun isca huaquin, —Upa Diosin, unfin minaquin. Mian shara huamapaiyai cuscan ua huamahuu. Uhuun caya non uhuun nomuranri mina mian amapaiyai cuscan ua huamahuu, —ishon yoicahuun. <sup>14</sup> Moisés yononi cuscacai non atiroma Upa Dios fu ipashquin. Nocon ifocai itiroma non nipanon. Ascatama Upa Diosin matohuun ramapaiquin arusu mato numatiro mato ifo iishquin. Ascano chaca afanan mato ifo itiroma.

### *Upa Diosin mato shara huamapaiyai cuscan man ahuun oinmati inon*

<sup>15</sup> Moisés yononi cuscacai non atiroma noco imasharanon Upa Dios fu ipashquin. Ascan Diosin nocohuun ramapaiquin noco imashara. Nan fusti nocon ifo itiro noco numanon. ¿Ascanocai non chaca huafafaintiromun Diosin nocohuun ramapainon noco chaca soashonon? Ascayamapacupainon. <sup>16</sup> Man tapian mafi man catontiro ratofomain mato ifoquin. Upa Dios man nicacointiro ahuun oinmati ishquin iyamarai chaca catontiro ahuun oinmati ishquin. Chaca catoanshu man omitsiscapashquin. Ascan man Upa Dios nicacoiantsu man afu isharapacunaca. <sup>17</sup> Man chaca catonpaoni ahuun oinmatiflashon natian Upa Diosin mato yoimisi cuscan maton nomuran man nicacoi. ¡Aicho! Upa Diosin mato imasharamisi. <sup>18</sup> Ascanocai chaca afanan maton ifo itiroma mato yonoshquin. Natian ahuara shara fusti maton ifo itiro. Manfin ahuun oinmatifoquin.

<sup>19</sup> Man oinmati yafi ifohuunoa man tapicoian. Ascan atohuunoa un mato yoipaiyai cuscan un mato yoi man shafacafi tapinon. Chaca futsa futsatapafo man huapaoni. Ascacun chaca mato ifo ipaoni. —Ua chaca huamapaiyai cuscan un aashquin. Fasi finacaiari un chaca huairan, —ishon man shinancaoni. Afanan asca huayamacahuun.

Natian Upa Diosin yoicahuun man ahuun oinmatifo. Afanan chaca huatama ahuara shara fusti ahuun oinmati man itiro.

<sup>20</sup> Ipaoni chaca maton ifo icaino mancái ahuara shara shinanpaonima maton ifo inon. <sup>21</sup> ¿Man ipaoni cuscan sharamun? ¿Mato imasharamun? Ma. Ipaoni cusca-cái afanan afohuunoa man shinanpaima. Afohuunoa man shinainno man rafitiro. Nan chacafo shatuyamaino man naitian man omitsiscapanacafo muran man catiro. <sup>22</sup> Ascafia natiancái chaca afanan maton ifoma Upa Diosin maton ifo. Manfin ahuun oinmatifoquin. Man ahuun oinmatifocun mato shara huafafaini a cuscara shara man inon man afu ipanon. <sup>23</sup> Tsoa chaca ahuun ifono ahuunshon ato omitsiscapanacafo muran potashquin. Ascafia nocon Ifo Jesucristohuunshon Upa Diosin noco cashman humano non afu ipanon.

## 7

### *Nocofunu fu ainfo fiananfihuunoa cuscara ahuara futsan ato tapimani*

<sup>1</sup> Uhuun yoramishtichin, un mato yoipaiyai cuscan man man tapicoian. Moisés noco yononi cuscan man man tapia. Non niyoano noco yonotiro. Non nano noco afanan yonotrioma. <sup>2</sup> Iscara un mato tapimapai. Ainfo funun fianocai nocon caifoan yononi cuscan funu niyoano unutiroma. Ascacun funu nanocai afanan tsoan afanan yonotrioma. <sup>3</sup> Funu nano futsan fitiro. Asca huaquicai chaca huatiroma. Ascafia funu niyoanocai futsa fu fianantiroma. Futsan fiaino furoma chaca itiro. Nannori nocon caifoan yononi.

<sup>4</sup> Uhuun yoramishtichin, nanscarifi aquin Moisés yononi cuscan maton funu cuscara nan maton ifo ipaoni. Ascafia Jesús mastanifotian marifi man afu naa cuscaracon. Naashu afanan Moisés yononi cuscan maton funu cuscara itiroma. Cristo naafishu funini cuscan marifi afu funini cuscaracon funa cuscara iishquin. Natianfin man Cristonaquin maton ifo inon a cuscara shara ishcaquin. <sup>5</sup> Jesús man Ifo huataima chaca maton ifon ipaoni. Moisés mato yonopaiyai cuscan atama yoitimacoinkhon man fasi chaca huapaoni. Nan chacafohuunoashu non natiro omitsispacunacafo muran noco imatiro. <sup>6</sup> Non ascafiaapaonishaquin non Jesús fu naa cuscaracon.

Ascanocai Moisés cununi cuscan nocon ifo afanan itiroma. Nococai shinanmatiroma isca huaquin, —Min Moisés cununi cuscan ayamashu min nipatiromaran, —ishoncái noco yonotrioma. Noncái afanan ahuun oinmatima. Natian non Diospan Yoshin Sharahuunoashu non unimacoincain non Upa Dios yonoshotiro.

### *Chacapan ua ifoahuapai*

<sup>7</sup> ¿Ascano Upa Diosin Moiséshuunshon yononi cuscan chacamun? Ma. Anorima. Amaquiri shinanyamacahuun. Moisés cununi cuscan un oinyamashon un chaca huamisi un tapicuanama. Uhuun nomuran un chaca fuchipaipaoni cuscan uhuun ointi un noconi. Moisés cununi cuscan un oinyamashon uhuun ointi muran un shinancuanama. <sup>8</sup> Ascafia Moisés cununi cuscan oinfiaquicai un chaca shatutama un finacaipaoni. Fasi finonmafain un chaca noipaoni. Upa Diosin noco yonoyamanicai non yoítima icuanama.

<sup>9</sup> Diosin noco yononi cuscan un tapipaonima un chaca huafiaquicai un mupaonima. Ascafia Diosin noco yononi cuscan un nicacoinshon un ahuunshon tapini unfin chaca huamisiquin. Un tapiniri chaca huamisifo omitsiscapanacafo muran focani. <sup>10</sup> Un shinanpaoni isca huaquin, —¡Ohushta! Upa Diosin noco yononi cuscacai un aimá. Ua yononi cuscan un aiton ua nimapacucuana. Un ascayamacun ua omitsiscapanacafo muran ua camashquinran, —ishon un shinanpaoni. <sup>11</sup> Chacapan ua parapaoni. —Upa Diosin noco yononi cuscan un airan, —ishon un amaquiri shinanpaonima ascafiaqui un apaonima. Ascacun un tapipaoni uhuun chacahuunoashu un nai omitsiscái. <sup>12</sup> Man non tapia Upa Diosin noco yononi cuscan shafacafi sharacoin.

<sup>13</sup> Sharafiacuai un ascamisima. Ahuunshon ua tapimapaoni non chaca huamisi cuscan fasi chacacoincun. Upa Diosin yononi cuscan sharacoinfiacun ahuunshon mun tapini un ascayamashu un omitsiscacaini nai.

<sup>14</sup> Man non tapian Moisés cununi cuscan Diosin ahuun Yoshin Sharapan shinaman. Nan sharafianocai un sharama. Chaca uhuun ifo. Unfin ahuun oinmatiquin.

<sup>15</sup> Ahuuuscain un iscamisimun uncai tapiama. Un shara huapaiyai cuscacai un aama. Un asca huapaiyamafiaquin un amisi. <sup>16</sup> Un asca huafiaquin uhuun nomuranshon un shinan, —Upa Diosin Moiséshuunshon noco yononi cuscan sharacoinran, —ishon un shinain. Moisés yononi cuscan nannorico un shinain. <sup>17</sup> Nannori shinanfiaquicai un chaca huai cuscan un shatutiroma. Ufico un apaiyamafiaquin chaca uhuun ifono uhuun nomuran ua shinanchacamamisi.

<sup>18</sup> Mun tapia Upa Diosin ufu iyamaino un chacacoin. Diosimaisicai un ahuara shara shinantiroma. Un sharapaifiaicai un itiroma. <sup>19</sup> Un sharapaiyai cuscan atama un chaca huamisiquin. Un chaca huapaiyamafiaquin un amisi. <sup>20</sup> Ascano un tapitiro ufico un chaca huapaiyamafiaquin chaca uhuun ifon icaino ua yonomisi cuscan un shatutiroma.

<sup>21</sup> Ufi amisi. Un sharapaifiaiton chacapan ua amaquiri shinanmapai un shara shinanonma. Un ascamisi. <sup>22-25</sup> Uhuun nomuran, —¡Aicho! Upa Diosin ua yonoa cuscan shararan, —ishon shinanfiai un nicayosmamisi. Ua yonoa cuscan mun tapifiashu un nicayosmamisi. Chaca uhuun ifono ufi sharapaiyain cuscan un atiroma. Uncai chaca shatutiroma. Ascano un tapitiro uhuun nomuranshon un Upa Diosin oinmati ipai ua yononi cuscan aashquin. Ascafia un Dios ifo huayamaino un chacapan ahuun oinmati itiro ua yonomapaiyai cuscan aashquin. ¡Ohuashta! Uhuun nomuran un omitsiscai. Unfin chacaquin. ¿Tsoan ua numatiromun chaca afanan uhuun ifo inonma? Nocon Ifo Jesucristohuunshon Upa Diosin noco numani chaca afanan noco ifo inonma. ¡Aicho! Upa Diosin, min noco shara huamisi.

## 8

### *Diospan Yoshin Sharahuunoashu non ica*

<sup>1</sup> Ascano Jesucristo nocon Ifono nonfin ahuun yoraquin. Ascacuai Upa Diosin —Min chacaquin un mia onaintimanon. Umaquinoashu omitsiscapanacafo muran catahuun, —noco huapanacama. <sup>2</sup> Jesucristohuunshon Diosin ahuun Yoshin Sharapan ahuun curushhuunshon noco nimashara afanan chaca nocon ifo inonma non omitsiscapanonma.

<sup>3</sup> Moisés yononi cuscan non tapifiacai aton noco isharamatiroma nocon chaca soashquin. Ascan Upa Diosin shinanni cuscan ahuun Furun nai muranshon mai ano nichini arifi noco cuscara yora inon. Noco cuscrafashocai non chaca huamisi cuscan huamisima. Noco nashoni afanan chaca nocon ifo inonma. <sup>4</sup> Ascano natian non Diospan Yoshin Shara tanashu Moisés yononi cuscan non atiro. Nocon nomuran chacapan noco shinanmapaiyai cuscan non afanan nicayamashon non Diosin tsain tanasharatiro.

<sup>5</sup> Non chaca shatuyamashu nan chacapan noco amapaiyai cuscan nan fusti non shinantiyo. Ascan Diospan Yoshin Shara noco iquinano noco amapaiyai cuscan nan fusti non shinantiyo. <sup>6-8</sup> Diospan Yoshin Shara nocon nomuran iquinano nocon ointi fasi unimacointiro. Ascashu non Upa Dios fu ipasharatiro. Asca ratoranfo chacapan aton ifo icaino Diosihuunoa shinansharatiroma. Aton nomuran shinanchacamisifo Upa Dios noicasmaifoan. Ascan ato yonomapaiyai cuscan nicacasmamisifo. Chaca shinancaquin Diosin tsain nicatirofoma. Nicayamashu Upa Dios fu ipatamarocon omitsiscapanacafo.

<sup>9</sup> Ascafia mancái aton cuscarama. Chaca afanan maton ifoma. Diosin ahuun Yoshin Sharafin mato fuqui. Nantofin mato yonomisiquin. Ointiaquimayamacahuun. Tsoan Jesús ahuun Yoshin Shara fu iyamaino ahuun yora itiroma. <sup>10</sup> Jesús matofu rafufiaino

chacahuunoashu maton caya naashquin. Maton caya nafiacun maton yoshin Criston fiananan huai shara man inon afu ipashquin. <sup>11</sup> Jesúz naafiacun Upa Diosin Yoshin Shara funimani. Nan Yoshin Shara matofu rafuaino matori funimashquin maton caya afanan nisharanon.

<sup>12</sup> Ascacun uhuun yoramishtichin, Diospan Yoshin Shara no fu rafuaino Upa Diosinhuunoa non shinantiro noco amapaiyai cuscan aquin. Non chaca huamisi cuscacai non afanan shinanpaitiroma noco amapai cuscan aquin. <sup>13</sup> Chaca nocohuun nuano non omitsiscapanaca nai. Ascafia Diospan Yoshin Sharahuunshon non chaca huamisi cuscan non shatuaino afanan chaca nocohuun nutiroma non Upa Dios fu nisharapacunon.

<sup>14</sup> Diospan Yoshin Shara ato amapaiyai cuscan nicasharamisi. Nanfofin Diospan yorafoquin. <sup>15</sup> Ahuun Yoshin Shara noco shinansharamapai non afanan ratunonma. Nonfin Diospan Yoshin Shara fiacun nanton ahuun facufo noco ima. Ahuunshon non yoitiro isca huaquin, —Upa Diosin min uhuun Upashtaran, —ishon non yoitiro.

<sup>16</sup> Nocon nomuranshon Diospan Yoshin Sharapan noco yoi isca huaquin, —Min Upa Diosin facucoinran, —ishon noco yoi. <sup>17</sup> Non ahuun facufocun Apan ahuun facucoin inantiro cuscan nocori inanshquin. Criston ahuun Furuncoinin noco fasi omitsiscashoni. Omitsiscafianishaquin natian Apa Dios fu isharapacunaca. Nantifi Apanari ahuuna. Ascano norifi ahuunoashu natian non omitsiscafiai norifi chipo non afu Upa Dios ano isharapacunaca. Apan Cristo inan cuscari norifi non ahuun facufocun nocori inanshquin.

### *Chipo norifi Upa Dios yafi Cristo fu nisharapacunaca*

<sup>18</sup> Shinancapon uhuun yoramishtichin. Natian non ahuunoashu omitsiscafiaquin non shinanchacanonma. Non aqui noocoaino a cuscara shara noco imai. Non omitsiscai cuscan cuyoshquin. Ascan noco imashara cuscacai unupacunacama. <sup>19</sup> Upa Diosin ahuun facufo funimashquin a cuscara sharacoin imashquin. Ascan nan onihuanifoan manacani fasi oinsharapaicaquin ahuu cuscaramain non chipo ishquicain.

<sup>20-21</sup> Onihuanifocai payocopaiyamafiai Diosin yononi cuscan payococani. Ascafiaquicai Upa Diosin noco funimanaitiancai onihuaniti afanan payoconacafoma. Nantianri non afu isharamisi afanan ahua chaca finontama. Nanscarifiai onihuanifoti sharashtacoin icani afanan chacanatiroma.

<sup>22</sup> Man non tapia ainfoan facu cainquin isin mui pashapaitiro. Nanscarifiai nan Diosin onihuanifo omitsiscacaini nashcani. Natianri nanscasi acani. <sup>23</sup> Norifi non Diospan facufo ahuun Yoshin Shara no fu rafuaino non tapitiro non chipo Dios fu isharatiroflashu natian non isinin itiro pashapaicain. Ascaquin non manasharatiro Upa Diosin icano noco ihuinan non ahuun facufocun a cuscara shara noco imanon. Natianri nocon caya funa sharacoin afanan isinin iyamacain nonricai afanan natirona. <sup>24</sup> Noco a cuscara shara imai cuscacai icataima. Ascafia non icoira huaiton noco numatiro a cuscara shara non inon. Icoira huashon unimayanan non manasharatiro funaquinma non aqui nocoaitian. Aqui nocoshocai non afanan manatiroma. Manmain oinquifin. <sup>25</sup> Ascafia noco ihuiataima funaquinma non manasharayotiro.

<sup>26</sup> Nanscarifi aquin Upa Diosin ahuun Yoshin Sharapan noco ashosharafanfainni. Ahuuscashomain non Upa Dios cufisharatiroquin noncrai tapiama. Ascan ahuun Yoshin Shara nocohuunshon noco cufishotiro. Nocohuun ramapaiquin noco cufishonai cuscan sharacoin tsoancai aaton cufiai cuscan huatiroma. <sup>27</sup> Ahuun Yoshin Sharapan shinain cuscan Upa Diosin onancoian. Nantifi nocon nomuranri non shinain cuscan tapicoian. Upa Diosin noco amapaiyai cuscan nannori ahuun Yoshin Sharapan icoira huafoti cufishomisi.

### *Jesushuunshon non nantifi finoncointiro*

<sup>28</sup> Ascano non tapia Upa Diosin noco catonni noco amapaiyai cuscan non anon. Non Upa noiaino ahuarao ahuuscara afiaino afohuunshon Upan noco shara huashoin.

Norifi non icoindra huai. <sup>29</sup> Non Jesús Ifo huataima Upa Diosin tapiroton ratofoanmain icoindra huaicain. Icoindra huaafotaima shinanni isca huaquin, —Nanfo uhuun facu cuscara un ato imashquinran, —ishon shinanyoni. Ascashon Furun Jesús funimaqui tau huani. Ascashon nocorifi funimashquin a cuscara non inon ahuun chipo facufo inon icai. <sup>30</sup> Onanyoni non ahuun facufo ishquinon. Ascano noco nomuranshon noco yoini, —Uhuun facu icoindra huahuu. Tsoan anori yoiatton un ato chaca soashoni isharanonfo, —ishon Upa Diosin yoini. Aton chaca soashonano ahuun Furun sharashtacoin cuscara inonfo.

<sup>31</sup> ¿Noco asca huasharaino non raquiri yoitiromun? ¿Upa Diosin noco shara huafafainaino futsafoan noco raquiri huatiromun? <sup>32</sup> Upa Diosin nocohuun noiquin Furun numanima noco nantifihuunoashu nashonon. Ascanishaquin ahuara futsa non yopai cuscan nanfori noco inanshquin. <sup>33</sup> Upa Diosin noco catonni nocon chaca soashonano Furun cuscara shara non inon. ¿Ascano tsoanmun, —Min chacaran, —noco huatiroquin?

<sup>34</sup> Jesucristo noco nashocun Apan funimani. Apa Dios icano ato nantifi iquinon. Natiánri Upa Dios noco cufishofafaini. Nan iconcucain tsoan, —Min chaca huamisiquin. Asca omitsiscapanacafo muran mia potanon, —noco huatiroma. <sup>35</sup> Tsoancai noco Cristomaqui imatiroma noco noinonma. Non omitsiscacain nocon nomuran fucash huafain non Jesushuunoa yoiatton noco omitsiscamafain non fonicain nocon sahuuti yopacain noco musumafain noco rutupaifain noco huafiaquicai noco Cristomaqui imatirofoma noco noinonma. <sup>36</sup> Diosin tsain cununi isca huaquin,

“Upa Diosin, shafatifi non itisharai mihuunoashu naashquin. Chashoanfo yosicun Ifoan ato rutumamisi. Nanscarifi aquin nocori rutupaicaniran,”  
ishon cununi. <sup>37</sup> Noco asca huafafainfiaifoan Jesús noco noiaino ahuunshon non ato finoncointiro. <sup>38-39</sup> Jesucriston nocon Ifonocai ahuashtaton Upa Diosmaqui noco pashcamatiroma noco noinonma. Nan un icoindra huacoinni. Upa Diosin nocohuun noiainocai ahua ahuuscatiroma nocohuun afanan noinonma. Non nafiancuai amaqi noco pashcamatiroma. Non niyo anoricai amaqi noco pashcamatiroma. Ahuun oinmatifoanricai amaqi noco pashcamatiroma. Yoshin chacafoanricai noco amaqi pashcamatirofoma. Ahuarafo natian icai cuscariacai noco amaquinoa pashcamatiroma. Inonpacoai cuscariacai noco amaqi pashcamatiroma. Ahuara chacafo aton niaifo-foanri amaquinoa noco pashcamatiroma. Nan nai ariafo yafi mai anoafaoanricai noco amaqi pashcamatiroma. Upa Diosin nocon Ifon Jesucristohuunshon nocohuun noi. Ascano nantifi onihuafoanricai amaqi noco pashcamatirofoma afanan noco noinon.

## 9

### *Upa Diosin Israelifo catonni ahuun yorafo inonfo*

<sup>1-3</sup> Uhuun yoramishtichin un Cristohuunshon iconquin un mato yoi. Un muai cuscan mun tapia uncai mato paraima. Un mato iconquin yoi. Diospan Yoshin Sharan ua shinamanai cuscan un iconquin yoicain. Uhuun caifo Israelifoanbai nocon Numamisi icoindra huafoma. Ascacun uhuun nomuran un atohuunoashu omitsiscacaini. Un ato fasi shinancoinmisi. Uhuun caifo uhuun nomuran un ato shinamisi isca huaquin, —Upa Diosin uhuun yora Israelifo un ato numapai mifu nipanonfo. Ascano ato Cristom-aqui omitsiscapanacafo muran potatamarocon uacai potahuu un ato numanon, —ishon un anori shinanfiainocai Upa Diosin ascatiroma. <sup>4</sup> Upa Diosin ato catonni ahuun yorafo inonfo. Ato fu iyoshon ato ismapaoni ahuu cuscaramain aaquin. Ato shara huapaiyai cuscan ato yoiyoni. Ascashon ato yononi isharanonfo. Ato yosini ahuus-cashomain ichananshon cufitirofoquin. Ascarifi atan ahuara sharacoin ato ashoin cuscan yoiyoni. <sup>5</sup> Maton shunifofoan Upa Dios tanasharafafainpaonifo. Nocon Ifo Cristo arifi Israeliri ini. Nocon shuni Abraham non Isaac non Jacobori aton funa. Aafin

natian nantifiton aton ifoquin ato iquina. Ascan Upa Dios fasi shararan non huapanon. Amen.

<sup>6</sup> Upa Diosin noco yoisharayoni cuscan uhuun caifo Israelifoan icoinra huayamafiaifoan ahuun tsain iconcoin. Ahuun yorafo yoiyoni cuscan ashquiquin. Ahuun yorafo shara huafainocai atirifi Israelifo Diospan yorama. <sup>7</sup> Nanscarifi aquicain Abraham acai cuscan ahuun funa atirifoan icoinra huamisima. Afocai Diospan yorama. —Abraham ahuun facu futsafoyaflacun Diospan tsain cununi cuscan ahuun facu Isaac yafi ahuun funafo nanfosi Upa Diosin yoiyoni cuscan fitiroran, —ishon cununi.

<sup>8</sup> Ascano non tapitiro atirifi Abraham funafocai Diospan yorama. Diosin Abraham yoiyoni ahuun facu chipo cainsquiai. Yoiyoni cuscan Abraham icoinra huani. Nan icoinra huafosi Diospan yoraquin. Abraham facu cuscarafo. <sup>9</sup> Abraham ahuin Sarapan facu nanuataima Upa Diosin yoiyoni isca huaquin, —Fari futsan un miqui nasoshquin. Nantianri min ahuin Sarapan facu furonanfacu cainsquiai, —ishon yoini.

<sup>10-13</sup> Ascano man fari ichapa finontan Sarapan facu Isaac ahuin Rebeca rafanacani. Caiantaima Upa Diosin yoini isca huaquin, —Min facu Esaú Cain taui. Afu rafanaca Jacob. Chipocuton oinmati cuscara iyoa ishquiran, —ishon yoini. Caiantaimacai ahua chaca huafain shara huatian inima. Ascafian Diosin yoiquin, —Jacob un noiquin un ashoin. Un iyoa Esaucai un noiquinasca huaima, —ishon Diospan tsain cununi. Ascano non tapitiro Diosin inonpacoai shinanyoni cuscan atiroquin. Esaú futan Jacob amisifo cuscacai shinanyonima. Aafin apaiyai cuscan yoiyoni.

<sup>14</sup> ¿Ascano Upa Diosin shinancoinmamun? Ma. Anoricai non shinantiroma. <sup>15</sup> Upa Diosin yoini isca huaquin,

“Nan un noipaiyaifin un noitiroquin. Nanscarifai nan un ahuun ramapaiyai-huurifi un ramapaitiroquin,”  
ishon Upa Diosin Moisés yoini.

<sup>16</sup> Ascano non tapitiro futsan shinanquin, —Diosin ua shara huashopainon, —ishon shinantiro iyamarai, —Un Upa Dios yonoshosharatiro ahuun rafanan ua inansharatiros, —ishon non shinanfiatirocái anorima. Upa Diosin afin nocohun ramapaiquin noco catontiro non ahuun yorafo non inon noco inansharashquin. <sup>17</sup> Ascano Upa Diosin Egipciofo aton niaifo yoini, —Un mia niaifo imashquin nantifi manifotí anoafaoan un ahuamamishti huatiro minhuunshon tapinonfo, —ishon yoini. <sup>18</sup> Ascacun non tapitiro Upa Diosin futsa ahuun ramapaiyaihuunri ramapaitiroquin. Nanscarifi aquin futsan chaca huafafaina cuscan shatuamashu ointi mutocoin imati.

<sup>19</sup> Man futsan ua yoiraca isca huaquin, —Ascacun non chaca huaiton noco shatumana nocon ointi mutocoin imashquin. ¿Ascafia ahuuscain Upa Diosin nocohuun nuamun? Afin apaiyai cuscacai tsoan atima huatiroma, —itsairaca amaqiri yoiquin. <sup>20</sup> Ma. Asca huayamacahuun. ¿Ahuuscain min Upa Dios tafipaimun? Minfin nocofunuquin. Aafin Diosiquin. Ahuara onihuamuatocai yoqui isca huatiroma, —¿Ahuuscain mian iscara onihuamun? —huatiroma. <sup>21</sup> Cutin onihuamisiton mapo nan apaiyai cuscara shara cutin huatiro. Futsa amuran ahuara chaca nanuti huafain futsa amuran ahuara shara nanuti huatiro.

<sup>22</sup> Nanscarifai Upa Diosin nantifi yora onihuafiacun atirifoan ahuun tsain nicasmamisifo. Funainquimashta ato yoiyofiaiton nicayamacaiyaifoan inoncái atoqui sinaquin. Ato potatiro chacani fustisi tapiaifoan. Asca huaquin ato ismatiro ahuamamishti huatiro cuscan. <sup>23-24</sup> Ascafiai non ato cuscarama. Nocohun ramapaiquin noco tapimamisi. Ascacu noco itisharamai unimacoincái non afu ipanon. Noco Israeli fusti catonnima non afu ipanon. Mani futsafori catonni. <sup>25</sup> Oseas nan inonpacoai yoimisiton Diosin tsain cununi isca huaquin,

“Futsafo Israelifomari un catonshquin uhuun yorafori inon. Tsoancái ato noiyomisimafiacun un ato yoishquin. Un mato noirán,”

ishon Upa Diosin yoini cuscan Oseas cununi. <sup>26</sup> Afanan ato yoini iscahuaquin,

“‘Mancai uhuun yoramaran,’ ishon Diosin mato yoiaran, huanifo. Ascafia chipo atohuunoa yoishcaquin, ‘Upa Diosin niaton man ahuun facuforan,’ ishon yoishquicani.”

<sup>27</sup> Isaías nocon caifo Israelifohuunoa yoini,

“Israelifo ichaparasi ishquicani tsoan ato tanan huatiromafiaшу fustirasiton icoinra huashquicani Upa Dios fu ipashcaquin. <sup>28</sup> Yoini cuscan iconcoin. Yoiyoni cuscan manifoti anoafoan nan icoinra huafoma nocon Ifoan ato onaintimariscashquin. Afanan ato manashquima,”

ishon Isaías cununi. <sup>29</sup> Ascashon Isaías afanan yoiyoni cuscan nanscacoiai. Isca huaquin,

“Upa Diosin ahuamamishti huatiro. Nocon caifo Israelifo fustirasi numani atifi cuyononfoma. Asca huayamaino non Sodoma yafi Gomorra cuscarafo icuana. Nonrifi non cuyocuanaran,”

ishon Isaías cununi.

### *Israelifo yafi nan tsain shara Jesushuunoa*

<sup>30</sup> ¿Ascano afihuunoa non raquiri yoitiromun? Nan Israelifoanmacai aton chaca shatucasmamisima Upa Diosin icoinra huashquin aton chaca soashonon. Ascafia natian atirifoan Jesús icoinra huaifoan Upa Diosin aton chaca soashona a cuscara shara inonfo. <sup>31</sup> Ascafia uhuun caifon Israelifoan Upa Diosin Moiséshunshon ato yononi cuscan sharapaicaquin. Ascafiacai Moisés yononi cuscahuunoashu shara inonfoma. <sup>32</sup> ¿Ahuuscain iscaimun? Un mato yoinon. Nanfoancai Diospan Furun Jesús icoinra huaafoma aton chaca soanon. Ascatamarocon Moisés ato yononi cuscahuunoashu isharapaiifo aton chaca soashquin. Un mato ahuara futsa nicamapai. Toquiri fasi uhuapa fai naqui raca finonpai aqui oroshcomutiro.

<sup>33</sup> Nanscarifi aquin Jesús finonpaiyaifoancai icoinra huacanima nipashcaquin. Nan-nori inonpacoai cuscan Isaías Diospan tsain cunuyoni isca huaquin,

“Un Israelifo aton fai naqui toquirinhuan ratain. Ahuunoashu yorafo pacunonfo,”

ishon cununi.

“Nanscarifi aquin Upa Diosin Jesús Israelifoqui nichini tsoan icoinra huayamashu funocoincani nipashcaquima,”

ishon cununi isca huaquin,

“Ascafia tsoan icoinra huacoinshon shinanchacanacamaran,”

ishon Diospan tsain Isaías cununi.

## 10

<sup>1</sup> Uhuun yoramishtichin, uhuun nomuran uhuun caifo un fasi shinain. Un atohuunshon Dios cufifafaini Jesús icoinra huanonfo Dios fu nipashcaquin. <sup>2</sup> Mun tapia nanfoanfin Upa Dios fusti fasi tanapaisharafiaquin amaqiri shinanfoquin. <sup>3</sup> —Nonfin Moisés noco yononi cuscan non aino Upa Diosin nocoqui unimatiro noco numanonran, —ishon shinanpaonifo. Ascano Upa Diosin ato Jesushuunshon imasharapaiyai cuscan afu ipashcani. Ascafia nicacasmaponifo. <sup>4</sup> Moisés yononi cuscan Criston mai ano niyoshon nantifi apaoni. Ascano Moisés noco yononi cuscacai non afanan yopatiroma nocon chaca soanon Upa Dios fu ipashquin. Tsoan Cristo icoinra huaiton aton chaca soashotiro afu ipasharanon.

<sup>5</sup> Moisés isca huaquin cununi, —Upa Diosin noco yononi cuscan nantishon tapiquin non chaca huayamashu Upa Dios fu non nipatiroquin, —ishon cununi. <sup>6</sup> Ascafia non Jesús icoinra huashon non isca huaquin yoitiro, —Maton nomuranshocai man isca huaima, “¿Tsoamun nai muran catiroquin Cristo fotomashquin noco numayonon?”

<sup>7</sup> Iyamarai, “¿Tsoamun mai muran catiroquin Cristo funishquin?” —ishon yoiyamacahuun. <sup>8</sup> Anorimaquin. Man Cristo icoira huaiton mato numatiro. Nannori non mato yoimisi. —Mancaí raqui cayotiroma Cristo fu ishquin. Natian man Cristo yoitiro matofu rafunon. Maton nomuranri man icoira huacun matofu rafutiroran, —ishon Moisés cununi. <sup>9</sup> Ascano, —Jesús uhuun Iforan, —huafain man shinanquin isca huai, —Jesús nafiacun Apa Diosin funimaniran, —ishon maton nomuran man icoira huaiton maton chaca soashotiro afu man ipanon.

<sup>10</sup> Ascan maton nomuranshon man icoira huacun Upa Diosin maton chaca soashotiro man isharanon. Man futsafo, —Jesucristo uhuun Iforan —ishon yoiaiton mato imapacunaca. <sup>11</sup> Nannorifi Diospan tsain cununi, —Tsoan Criston Diospan Furun icoira huaashucai rafipacunacafoma, —ishon cununi. <sup>12</sup> Israelifo iyamarai mani futsafoan icoira huaifoan aton Ifo itiro. Diosinacai ahua rafuma. Nanscarafosi. Nan icoira huafoti aton Ifon. Fasi atohuun noiquin ato ya imapacunon. <sup>13</sup> Ratoran nocon Ifon icoira huashon yoiqui isca huaiton, —Ifon, ua numahuu, —huaiton afu ipatiroquin.

<sup>14</sup> ¿Ascafia ahuuscashocon, —Jesús ua numahuu, —huatirofomun icoira huacatama? Ahuunoa nicamisimashaquicai ahuuscashon icoira huatiroma. ¿Futsan Jesushuunoa ato yoiyamaino ahuuscashocon nicatirofomun? <sup>15</sup> ¿Ahuuscashocon yoifotirofomun futsan ato nichiamaino? Nannori Diosin tsain cununi isca huaquin, —Nan tsain shara futsafo yoifononfo nan fasi sharacairan, —ishon Isaías cununi. <sup>16</sup> Ascafia nan tsain shara atirifi Israelifoan icoira huacanima. Nannori Isaías afanan cununi isca huaquin, —¿Ifon, non ato yoia cuscan tsoan icoira huamun? —ishon yoini. <sup>17</sup> Ascano tsain shara nicaquin icoira huatirofo. Nan tsain shara Jesucristohuunoa.

<sup>18</sup> ¿Uhuun caifo Israelifoan nan tsain shara Jesushuunoa nicamisimun? Ai, man nicamisifo.

“Manifoti anoafaoan nan tsain shara man nicafo,”  
ishon David cununi. <sup>19</sup> ¿Uhuun caifoan tapinimamun nan tsain shara Cristohuunoa nicacasmaifoan Upa Diosin caifo futsafo yoitiro ato numaquin? Ai, man nicamisifo. Moisés niyoshon ato Diosin tsain yoini isca huaquin,

“Uhuun yora Israelifoan un afanan ato uhuunoa shinanmapai. Ascan un caifo futsafo uhuunoa un shinanmai Cristohuunoa shinanonfo ato numanon. Nan oincani Israelifori uqui nasopaitiroran,”  
ishon Diosin yoini cuscan Moisés cununi. <sup>20</sup> Chipo Isaías ranotama yoini isca huaquin,  
“Mani futsafoan ua funayamafiacaquin ua icoira huafio. Uhuunoa yocaya-mafiamisishaquin un ato uhuunoa onanmanaran,”  
ishon Diosin yoini cuscan Isaías cununi.

<sup>21</sup> Ascafia uhuun caifohuunoa yoini,  
“Un shafatishon un ato cuna uqui fucahuun. Un ato huafiacai uqui fupaicanima. Yoitimamisiforán,”  
ishon Upa Diosin yoini cuscan Isaías cununi.

## 11

### Ascan Upa Diosin Israelifo catonni

<sup>1</sup> Ascano un mato yocanon. ¿Upa Diosin ahuun yora Israelifo potapacunacamun? Ma. Anorima. Unrifi Israeliquin. Abraham non Benjamín uhuun shunifo. <sup>2</sup> Upa Diosin ahuun yora inonpacocai cuscan onanshocai ato potamisima. Shinancapon. Nocon shuni Elías Israelifohuunoa Upa Diosin yoini isca huaquin, <sup>3</sup> —Ifon, min tsain inonpacocai cuscan yoimisifo rutuafó. Mia a muranshon cufiti choquiaquin futsafo. Uru fusti un tushufiacun uari rutupaicaniran, —ishon Elías Upa Diosin yoini.

<sup>4</sup> ¿Ascan Upa Diosin raquiri Elías cumanimun? Isca huaquin cumani, —Ma. Mirus fusticai min tushuama. Siete mil min yora futsafoanri ua noiafo ahua futsacai ifoanfoma. “Baalcai uhuun diosiran,” huamisifomaran, —ishon Diosin Elías cumani. <sup>5</sup> Nanscarifi aquin natianri Upa Diosin uhuun caifo fustirasi catoan atohuun rama-paiquin. <sup>6</sup> Ahuara shara huua rafanancai ato catoanma. Atohuun noiquin ato catoan. Dios non yonoshonaitocai noco catoanma. Ahuara yonoshomacai non cashman fitiroma. Ascanfiacai non Upa Dios yonoshotiroma noco catonon. Noco cashmancoin catoan.

<sup>7</sup> Ascano uhuun caifo Israelifo Moisés yononi cuscan apainifo aton chaca soanon Diospan yora ipaifiashucái ahuun yorafo icafoma. Diosin catoanfosi aton chaca soashona ahuun yorafo inonfo. Nan futsafoan aton ointi mutonifo. <sup>8</sup> Nannori Diosin tsain cununi isca huaquin,

“Upa Dios nicacasmafo. Ascan ato oshamana cuscara shinantsa afo ahuunoa shinanonfoma. Oinfacani fusho cuscarafo. Nicapaicoinnifoma. Ascaiton ahuun tsain shara ato tapimanima. Natianri nanscacani,”

ishon Moisés cununi. <sup>9</sup> Nannori nocon niaifo shuni ipaoniton David yoini isca huaquin,

“Nan nicacasmamisisifo onaintimapainon. Tushu ichapayafo futan mafo ichapayafoanriraca shinanco Upa Diosin atoqui unimai. Ascarama. Amaquiri shinanshu omitsiscapainonfo. <sup>10</sup> Ato fusho cuscara imapainon. Ato cacoapainon aton ointi ihuu ipainonran,”

ishon David Dios nicacasmamisisifoahuunoa yoini.

### *Israelifoanmari Jesús icoinra huacanashu afu nipanono*

<sup>11</sup> ¿Ascano uhuun caifo Israelifoan nicacasmamisisifoquin Upa Diosin ato potapacu-nacamun? ¡Ma! ¡Anorima! Chaca huaoan Jesús nicacasmacani. Ascacun mani futsafo Jesushuunoa yoi icoinra huanonfo afu ipashquin. Nanfoan Jesús icoinra huaiton uhuun caifo Israelifoan oincashon shutitan ifoanpaitirofo. Nannori Upa Diosin ato shinanmapai. <sup>12</sup> Uhuun caifofoan chaca huapaonifo Jesús ifoanpaiquinma. Ascano Upa Diosin manifoti anoaflo Jesushuunoa tapimanano icoinra huashu nipanono. Ascano isharafo. Diosin ato shara huashoan. Ascafia uhuun caifori chipo Jesús icoinra huacanashu nantifi manifoti anoaflo mimacai unimashcani.

<sup>13</sup> Man uhuun caifoyamafiacun Upa Diosin ua mato muran nichini Jesushuunoa un mato yoinon. Un Jesús fu rafumisi. Ascashon un ahuunoa mato yoi. Un fasi unimai Upa Diosin ua catonni un mato yoinon. <sup>14</sup> Uhuun caifori un yoimisi Upa Diosin ua matoqui nichini. Man unimaiton oincani afoanri mato shutipaitirofo Jesús icoinra huapaicaquin. <sup>15</sup> Shinancapon. Afoan Jesús ifoanpaiyamaifoan. Mani futsa anoaflo Upa Diosin ato tapimani. Nicacashon Jesús ifoannifo. Nan sharafiahu uhuun caifoanri Jesús icoinra huaifoanno fasi sharacoin iishquin. Yora naashu funia cuscara itiro. <sup>16</sup> Uhuun caifoan Jesús icoinra huashu tau huanifo. Ascan nocon funafori chipo Diospan yorafo iishcani. Fanafo ahuun tapo sharano ahuun poyanfori shara itiro. Nanscarifi aquin Upa Diosin Israelifo catonni ato shara huashu. Ascano aton funafori catonshquin aforifi imasharashquin ahuun yorafo inonfo.

<sup>17</sup> Un mato iscara tapimapai man tapinon. Israelifo ihui fana poyan cuscarafo. Abraham Dios icoinra huashu tau huanifo. Ahuun funafori Diospan yorafo ipaonifo. Nanfomin ihui fana poyan cuscarafoquin. Natian Upa Diosin ihui fana poyan fimioma poshtushon potani. Nanscarifi aquin Israelifoan Jesús icoinra huayamaiton ato pota. Manfin nan ihui poyan futsa cuscarafoqui. —Ihui olivoran, —ishon anuni. Nan ihui fana olivo ahuun poyan futsaqui tuchia. Abraham fana futsa poshtushon futsaqui tuchia cuscara. Nanscarifiai uhuun caifoan man icoinra huayamaiton Diosin mato ihui ahuun facufo man inon. Diosin Abraham yoini cuscan natian marifi man ahuun yorafo inon.

<sup>18</sup> Ihui fanacai ahuun tapomaisi nitrioma. Tsasitiro. Ihui fana ahuun poyanfo non ahuun tapohuunoashu nipatiro. Poyafoancai ahuun tapo nimatiroma. Nanscarifiai mancái Jesús nimapacutiroma. Nantocaifin mato nimapacutiroquin. —Noncái futsafo cuscarama. Nonfin Diospan yorafoquin, —iyamacahuun. Cacapaimisi iyamacahuun.

<sup>19</sup> Man shinanraca. Fana poyan chacaran ishon man poshtushon potatiro. Nanscarifi aquin Israelifoan icoinra huayamaifoan ato potani. Ascano non ahuun yorafo inon. Ascacun, —Non shararan —ishon man shinanquin. <sup>20</sup> Nan iconfiashu oinfain. Nan Israelifoan icoinra huayamaifoan Upa Diosin ato potani. Man icoinra huashufin ahuun yorafo man iquicai. Ascan cacapaimisi itama, —Non Jesús icoinra huayamashu non funotiroran, —ishon shinancahuun. <sup>21</sup> Israelifoan icoinra huaquin tau huafianisha-caquin chipo aton funafoan icoinra huayamaifoan Diosin ato potani. Manrifi man icoinra huayamaiton matori potatiro.

<sup>22</sup> Ascacun shinancapon. Upa Diosin matohuun ramapaiquin ahuun yorafo mato imai. Israelifoan icoinra huayamaifoan ato onaintimaquin ato potani. Ascan matohuun ramapaiyai cuscan shinanfafaicahuun. Icoinra huafafaincahuun. Man ascaya-maiton matori potatiroquin. <sup>23</sup> Uhuun caifofoan afanan chaca shinainyamaifoan Jesús icoinra huaifoan afanan ahuun yorafo Upa Diosin ato imatiro. Fana poshtushon afanan poyan tuchitiro cuscan atorifi huatiro ahuun yorafo inonfo. <sup>24</sup> Ifoancai ihui olivo fanamisima ahuun poyan shatushon fana futsaqui tuchini foisharanon. Nanscarifi aquin man Diospan yora ipaonima. Ascan natian Upa Diosin mato ihuia man ahuun facufo inon. Ascacun mimacaiquin uhuun caifo afanan ihuitiro ahuun yorafo inonfo. Jesús icoinra huaifoan ahuun yorafo ato imatiro.

### *Upa Diosin Israelifo numashqui ahuun yorafo inonfo*

<sup>25-26</sup> Uhuun yoramishtichin, tsain futsanhunoa man shinamisima un mato tapimai maton nomuran man shinanon. Nan tapianshu cacapaimisi man inonma. Icon natian uhuun caifo Israelifoan aton ointi curushu Diospan tsain shara Jesushuunoa nicacasmacani. Ascafia uhuun caifomafoan ahuun unutaqui Jesús icoinra huaifoan Upa Diosin ahuun yora imashquin. Nantianricai afanan uhuun caifoan nicacasmamisi ishcanima. Ascano nantifi Israelifoan Jesús icoinra huaifoan Upa Diosin ato numai ahuun yorafo inonfo. Nannori nocon shuni Isaías cununi isca huaquin,

“Nocon Numamisi Sión ano icaquin. Afin Israelifo numai oi afanan chaca huanonfoma. <sup>27</sup> Nantianri un yoini cuscan un aton chaca soashoshquiran,” ishon Diosin yoini cuscan Isaías cununi.

<sup>28</sup> Uhuun caifofoan tsain shara Jesushuunoa nicacasmacani. A noicasmacaquin. Ascacun Upa Diosin mato shara huashoan. Ahuun tsain shara Jesushuunoa man icoinra huanon. Mato shara huafiano uhuun caifoan nocon shunifo Abraham non Isaac non Jacob yoini cuscan ointiaquimama. Ascacun atohunshon aton funa Israelifori ato noi. <sup>29</sup> Upa Diosin nocon caifo inanopacoai cuscan yoionishaquin afanan shinan futsanpacunacama.

<sup>30</sup> Mancai Upa Dios nicapaipaonima. Ascafia cu Upa Diosin uhuun caifo shara huapaiyai cuscan ato shara huatamarocon matohuun ramapaiquin mato shara huai.

<sup>31</sup> Nan man nicacasmaponi cuscarifi uhuun caifofo nanscarafosi. Ascafiano matohuun ramapaiyai cuscan aforifi chipo Upa Diosiqui nasoshcani atohun ramapainon. <sup>32</sup> Upa Diosin yoini cuscan nantifi maniafotiton chaca huamisifo. Ascafia cu atohun ramapaiquin ato numanon.

<sup>33</sup> ¡Aicho! Nocon Dios fasi sharacoin.

Nantifi yorafohuun ramapai unupacunacama.

Aafin apaiyai cuscan tapicoianquin.

Nantifi tapicoian inonpacoai cuscan tapifain aafin noco ashaoi cuscan tapicoian.

Ahuun nomuran yorafohuunoa shinain cuscan non tapipaifiaquicai tsoanshta tapi-tiroma.

Aaton acai cuscan tsoan tapitiroma.

<sup>34</sup> ¿Tsoamun nocon Ifoan shinain cuscan tapitiroquin?

Tsoancai Dios tapimatiroma ahuun tapimamisi inon.

<sup>35</sup> Tsoancai Dios ahuara inantiroma ato nifinon.

<sup>36</sup> Arusu ahuun nomuran shinain cuscan nantifi onihuani.

Ahuun curushhuunoashufin nantifi itiro.

Nantifi ahuuna.

Nantifi onihuafotiton ahuunoa yoisharapacunacaf.

Ascacun,—Diosin sharacoinran,—huapanonfo.

Amen.

## 12

### *Ahuuscashumain Diospan ahuun yonomati non itiroquin*

<sup>1</sup> Uhuun yoramishtichin un mato yoisharapaiyai cuscan acapun. Upa Diosin matohuun ramapaiquin mato shara huamisi. Ascacun marifi matohuunoa inancahuun mato ifo inon ahuun yonomati ipashcaquin. Man ascaino afanan chaca maton ifo itiroma ahuunacoin man inon. Shinancapon. Man cayacafi shinansharacoinquifin matohuun noiai cuscari marifi man ahuun noitiroquin. Man ascaino Upa Diosin fasi matoqui unimacoin. <sup>2</sup> Ahuaraoan Upa Diosimaqui mato imapaiyaifo cuscan atama shinan futsancahuun Diosin mato imapaiyai cuscan aashquin. Man shinanpaoni cuscan afanan shinanyamacahuun. Natian Diosin maton nomuran shinan futsama sharapaiyai cuscan shinancahuun. Man ascaquin man tapitiro Upa Diosin mato imapaiyai cuscan sharacoin. Mato imapaiyai cuscan man aino matoqui unimacointiro. Ahua futsacai man yopatiroma.

<sup>3</sup> Upa Diosin uhuun ramapaiquin ua maton muran nichini un mato tapimanon. Ascan un nantifi mato yoisharapai. Cacapaimisi iyamacahuun. Diosin mato imapaiyai cuscan fusti shinancahuun. Ahua futsa ipaiyamacahuun. Man Dios icoinra huatiro cuscan afin mato shinamanaino cayacafi shinansharacahuun. Man icoinra huaa cuscan nan fusti Upa Dios ashocahuun. <sup>4</sup> Un mato ahuara futsa yoipai isca huaquin. Nocon cayan fustifiano non pashcoi futsua. Afocai ascarafosima. <sup>5</sup> Nanscarifiai nocon Ifon Jesús fusticoin. Nonfin ahuun yorafoquin. Non ahuun cayan cuscarafoashu non yopanonainquin.

<sup>6</sup> Upa Diosin nocohuun noiqui cashman noco imapaiyai cuscan non ahuunshon futsafo ashosharatiro. Noco imapaiyai cuscacai non ascarafosima. Upa Diosin man atirifi catoan ahuun shinanhunshon icoinra huaa futsafori ahuun tsain yoinon. Mato catoncun man icoinra huashon mato yoia cuscan futsafori ahuun tsain yoicahuun. <sup>7</sup> Ratoranfo catoncun ahuun shinanhunshon futsafori ashosharanon ato shara huashofafainaahuun. Ratoranfo catoncun ahuun shinanhunshon ahuun tsain ato tapimasharacahuun. <sup>8</sup> Ratoranfo catoncun ahuunshon futsafo ointi fupi hua-mafafainaahuun. Ratoranfo catoncun yopaifo inanquin ato unimacain inansharacahuun. Ratoranfo ahuun shinanhunshon futsafo yononon Diosin shinanma cuscan ato yonosharacahuun. Nan mato catoncun ahuun shinanhunshon omitsiscaifohuun ramapaiquin unimaquin ato ashosharacahuun.

### *Futsafihuun noicoincahuun*

<sup>9</sup> —Un mato noiran,—ifiacatan parayamacahuun. Atoqui shinanchacayamacahuun. Yorafohuun noicoincahuun. Ahuara chacafu noicasmacahuun. Ahuara shara fasi noicahuun. Afo potayamacahuun. <sup>10</sup> Nan man icoinra huafoti noinancahuun. Maton yoracoinfo man noimisi cuscan huafainri futsafo ya noinancahuun. Yoinansharatanancahuun. <sup>11</sup> Nocon Ifo yonoshoni shaniyamacahuun. Diospan Yoshin Sharahuunshon

unimacain yonoshosharacahuun. <sup>12</sup> Upa Diosin mato shara huashoshquiai cuscan shinancahuun. Nanfo shinain unimacahuun. Ascan omitsiscafiain funayamacahuun. Upa Dios cufinquin unuyamacahuun. <sup>13</sup> Diospan yorafo yopai cuscan ato inancahuun. Futsafo pimashharacahuun. Pushu yopaifoan maton pushu muran ato iquimacahuun. Ato cushusharacahuun.

<sup>14</sup> Mato omitsiscamaifoan ato copiyamacahuun. Ato roayamacahuun. Asca huatama ato shara huacahuun. —Upa Diosin mia shara huairan, —ishon ato yoicahuun.

<sup>15</sup> Unimaifo ya unimacahuun. Uaicaifo ya uaicahuun. Omitsiscaifoan ato shinancahuun. <sup>16</sup> Ahuu iquinan tananquima. Upan Diosin mato shinanmapaiyai cuscan nanorisi shinancahuun. Oinanmitsapaimisi iyamacahuun. Niaifo yasi rafucaquima. Ahuuomafo yari rafucahuun. —Un tapia cuscacai futsafoan tapiafomaran, —ishon anori shinanyamacahuun. Curafiayamacahuun.

<sup>17</sup> Mato chaca huafiainfoan ato copiyamacahuun. Aton ointaifi isharacahuun.

<sup>18</sup> Nantifi yorafo ya rafupaisharacahuun. Man asca shara huapaifiaino futsan matofu isharapaiyamainocai matohuun nuama. <sup>19</sup> Uhuun yoramishtichin, futsan mato chaca huafiainton ato copiyamacahuun. Upa Diosin yoini,

“Mato chaca huaifofin unfin ato onaintimaicai,”

ishon Diosin yoini. Diosifin chacafo ato onaintimashquiquin. Mancai ato onaintimaima.

<sup>20</sup> “Ato copitama nan mato noicasmaifo fonaincaifoan ato piimacahuun. Nonmaincaifoan ato ayamacahuun. Man ascaiton oincani noco copimaran,”

icashu rafipainonfo. <sup>21</sup> Ascan futsafoan mato chaca huapaiyaifoan marifi copiquiri ato chaca huayamacahuun. Chaca ifo huayamacahuun. Ascatama shara huafafaincahuun. Asca huaquin man chaca potatiro.

## 13

<sup>1</sup> Upa Diosin yononi cuscan manifoti anoaflo niaifo catononfo. Ascan nantifi niaifo uhuapafo yafi patasharifori nicacoincahuun. <sup>2</sup> Tsoan ato nicacasmaquin Diosinri nicasmacani. Nan nicacasmaifoan ato onaintimashqui. <sup>3</sup> Non isharashucui non niaifoqui musutiroma. Chaca huashufi non atoqui musutiroquin. Niaifoqui musushquinma isharacahuun. Man ascaiton mato chaca huatama matohuunoa yoisharanonfo. <sup>4</sup> Niaifofin Upa Diosin oinmatifo cuscarafoquin mato shara huashcaquin. Ascafia chaca huaashu ratucahuun afocai cashman niaifoanma. Yorafo onaintimatirofo. Nanfofin Diospan oinmatifo cuscarafoquin chaca huaifoan onaintimashcaquin. <sup>5</sup> Asca mato yonoaifoan nicacoincahuun mato onaintimanonfoma. Maton nomuran isca huaquin shinannonfoma, —¡Ohushta! Upa Diosin yononi cuscan un aamaran, —ishon shinanshcaquima.

<sup>6</sup> Diospan oinmatifo cuscara mato shafatifi yonoshcaquin man isharanon. Ascacun mato pui yocaifoan ato inancahuun ahunshon mato shara huashononfo. <sup>7</sup> Man ato nifian cuscan inancahuun. Atohuunoa shinansharafain yoisharacahuun.

<sup>8</sup> Tsoa nifyamacahuun. Ascatama noinancahuun. Noinain unuyamacahuun. Nantifi non noiquin Upa Diosin yononi cuscacoin non huatiro. <sup>9</sup> Noco yoiqui isca huani, —Maton ahuinmafo ya iyamacahuun. Ainfofori mato funuma furi iyamacahuun. Rutumitsapaiyamacahuun. Ahuara onuyamacahuun. Futsana fipaiyamacahuun, —ishon noco yononi. Ahuara futsafori noco yoini. —Non yorafo noifin Upa Diosin noco yononi cuscan non aicain, —ishon noco yononi. <sup>10</sup> Non futsafo noicoinshocai non ato chaca huatiroma. Ascan non nantifi noicoinshofin Diosin yononi cuscan non atiroquin.

<sup>11</sup> Un mato yoiai cuscan acahuun. Nocon Ifo Jesús oti chaima. Non icoins huaquin tau huani chain. Oshapaimisi cuscara iyamacahuun. Oshapaicai non yonosharatiroma. Nanscarifiai shanicaquima. Jesús yonoshosharacahuun itisharashcaquin. <sup>12</sup> Shafacuaino samamashta shafatiro. Nanscarifiai man chaca huai cuscan

cuyocuanaino natianri nocon Ifo man oti chaimaquin. Ascashu faquish muran ica shinantsa ayamacahuun. Chaca shatucoincahuun. Jesús ica cuscan marifi shafacafi icahuun. Chaca huaquima.

<sup>13</sup> Isharacoinkahuun. Shafatan non oinsharatiro pacushquima. Nanscarifi aquin Jesús tanashu non isharatiro chaca huatama. Ascan futsafo monoaifo muran atoqui foyamacahuun chaca huashquima. Chaca futsa futsatapafo huayamacahuun. Paunya-macahuun. Ascatori maton ahuinma chotayamacahuun. Ainfofoanri maton funuma chotamayamacahuun. Ahuara chaca futsafo shinanyamacahuun. Fochishmanantananyamacahuun sinashquima. Futsa shutipaimisi iyamacahuun. <sup>14</sup> Ascatama nocon Ifo Jesucristo icai cuscan acahuun. Ahuaraoan mato chaca huamatiro afohuunoa shinanyamacahuun chaca huashcaquima.

## 14

### *Jesús icoinkra huaa futsafo tsain chaca huayamacahuun*

<sup>1</sup> Tsain futsari un mato yoi. Tsoan Jesús Ifo huafiahocai ahuun tsain shara atirifi tapisharataima matofu ichanainton, —¡Aicho! No fu ichananhun, —huacahuun. Man shinain cuscan shinanyamaiton afu fochishmanantananyamacahuun. Aqui tsain chaca huayamacahuun. <sup>2</sup> Mato muran ishon futsan yoitiro isca huaquin, —Un Jesús icoinkra huashon nantifi tushu shara un pitiroran, —ishon yoitiro. Ascan futsan yoiquin isca huatiro, —Unfin Jesús icoinkra huakin uncai nami pitiroma. Yonosifin un pitiroquin, —ishon yoitiroquin. <sup>3</sup> Man nantifi pitiroquin a yonosi pitirohuunoa shinanchacayamacahuun. Nanscarifi aquin man yonosi pimisiquin a nami pimisihiunoa isca huaquin shinanyamacahuun, —Atofin chaca huaiquin, —ishon yoiyamacahuun. Upa Diosin nantifi nanscarafosi noco imani non ahuun facufo non inon. Ascacun futsaqui tsain chaca huayamacahuun.

<sup>4</sup> Jesús icoinkra huafocai maton oinmatima. Upa Dios fustina. Ascacun atoqui tsain chaca huayamacahuun. Upa Diosin ato tapimatiro cayacafi shinanyamaraquimain amaquiri shinancaniquin. Afin ato tapimatiroquin isharanonfo.

<sup>5</sup> —Moisés nocon caifo yononi rato shafatamain non ichanantiroquin Upa Diosihuunoa shinanshquin, —atirififain Jesús icoinkra huaoan anori shinancani. Ascafia atirififain anorisi shinancanima. Shafatifi ichananfo Upahuunoa shinanshcaquin. Ascacun nantifiton maton nomuran man shinain cuscan acahuun. <sup>6</sup> Atirifoan shinanco rato shafatamain ichananti shafa shara itiroquin Upa Diosihuunoa shinanshquin. Nanfoanri nocon Ifon Jesús shara huapaicani. Ascan futsafoancai anori shinancanima. —Shafatifi nanscarafosi non Diosihuunoa shinantiro. Ascatori nan ratoran shafatafin non nami pitiroquin. ¡Aicho! Upa Diosin min noco nami inanquin non pinon, —ishon shinantirofo. Nanfoanrifi nocon Ifo Jesús shara huapaicani. Ascashon futsafoan nami piyamaifoan yonofosi pitiro. Nanfoanri noco Ifo Jesús, —¡Aicho! —huatirofo. Nanrafutan Dios shinansharapaicani.

<sup>7-8</sup> Non niyoshocai nofin non apaiyai cuscan fusti non shinantiroma. Upa Diosin nocon amapaiyai cuscan non shinantiro. Nonfin ahuunafoquin. Nanfin nocon Ifonquin. Noncái nofin catontiroma rato shafatamain non naicain. Ascan niyoshon iyamarai non naitianri nocon Ifonna. Niyoshon non nocon Ifo tanasharapai noocoqui unimanon. Non naitian nocon Ifo shinantiro non ahuunacoin.

<sup>9</sup> Criston nocon nashoni. Maia murannoashu funicainshquin. Ascan natian man nia. Non niano yafi non nano nocon Ifo iishquin. <sup>10</sup> ¿Ahuuscain icoinkra huaa futsan ahuun ifo man ipaiyai chaca huayamaraquin shara huairan huashquin? ¿Ahuuscain futsahuunoa man shinanchacamun? —Aacai ahuamaran, —ishon man shinan. Ointiaquimaya-macahuun nantifi non chipo Dios icano aqui noocoicaicain. Nantian nocon yoishquin

nonmain shara huayamaraquin non chaca huamisiquin. <sup>11</sup> Nannori Diosin tsain Isaías cununi isca huaquin,

“Iconcoin un niaquin. Iconcoinri nantififain manifoanna anoafu uqui nocoshcani ua ratoconun mai chachishon yoishcani, ‘Diosin, icon min Diosinran,’ ishon nantififain ua yoishcaniquin.”

<sup>12</sup> Ascan nantififain non Upa Diosin ointaifi non amisi cuscan noco yoifain non shinamisi cuscari noco yoipacushquin.

### *Futsafo chaca huayamacahuun*

<sup>13</sup> Ascacun afanan icoinra huafohuunoa tsain chaca huayamacahuun. Noncái ahua chaca huaima noco oincashon arifi chaca huanonfoma.

<sup>14</sup> Jesús uhuun Ifocun un mato yoisharapai. Mun icoinra huacoinna nantifi yonosharafo non nami sharari non picuaci noco chaca huaima. Ascafia tsoan ahuun nomuran shinanquin isca huai, —Un na tushu piquin un chaca huatiroran, —ishon shinanquin atocai tushu pitiro. —Un pishon uhuun nomuranshon un shinanchacatiro, —ishon yoitiro. <sup>15</sup> Mi futan Jesús icoinra huaton ointaifi a nami min pitiro. Piyamacahuun ahuun nomuran shinanchacanonma. A noishocai min ahuun ointaifi min pitiro. Nocon Ifon Cristo ahuunoashuri nani. Ascan a pitiro piquin min futsa shinanchacatiro. Ascacun ahuun ointaifi piyamacahuun Jesús cachiquiri huanonma funoshquima.

<sup>16</sup> Man acai cuscan man shinanraca sharacoin. Ascan futsafoan oinquin shinanchacanonfoma shaturiscacahuun matoqui shinanchacanonfoma. <sup>17</sup> Ascano shinancapon. Non pifain aqui ayafain non huatocai nocon nomuran noco shinansharamatiro. Upa Diosin noco iquinano non ahuun Yoshin Sharahuunshon Jesús cuscara isharacain nocon ointi non unimacointiro. <sup>18</sup> Nocon Ifo Jesús non yonoshosharaino Upa Diosin noocoqui fasi unimasharatiro. Yorafoanri nocohuunoa shinansharatiro.

<sup>19</sup> Ascacun icoinra huaa futsafo ya icoinsharacahuun. Jesushuunoa shinanmatanancahuun a cuscara shara iishcaquin. <sup>20</sup> Icoinra huaa futsafoan tushu futsa piyamaiton aton ointaifi a tushu piyamacahuun. Diosin yoini nantifi tushu sharafiacun aton ointaifi piyamacahuun. Man piquin aton nomuran man shinanchacamatiroquin. Ascaquin man ato pacumatiroquin afanan Jesús tananonfoma. <sup>21</sup> Ascan icoinra huaa futsafoan shinanquin isca huaquin, —Diosin yononi cuscan un nami pitiro. Un ahuara pauri ayatiromaran, —ishon shinanquin shatucahuun ato pacumashquima. Ahuarafoan ato pacumatiro shatucahuun pacunonfoma. <sup>22</sup> Ascano afihuunoa man icoinra huaa cuscan marusu maton nomuran shinancahuun. Upa Diosin fustifin man yoitiroquin. Man man tapian nantifi man acai cuscan nanfo sharacoin. Ascafia facai atirifoan tapisharataicanima. Ascano pifain ayafain huaquin mato nomuran man shinantiro man chaca huaa cuscan. Ascafia shatucoianshufin maton nomuran man unimatiroquin. <sup>23</sup> Ascashon tsoan ahuun nomuran shinanquin isca huai, —Afo piquiraca un chaca huacati, —anori shinanfiaquin piriaquin chaca huatiro. Tapishoma shara iyamarai chacafiacun un pia. Ahuara futsan tapishoma aquiraca, —Un chaca huacati, —ishon shinantiro. Tapishoma aaqui chaca huai.

## 15

### *Mafin man apaiyai cuscan huatama futsan apaiyai cuscan huashocahuun*

<sup>1-2</sup> Non icoinra huaitin Diosin noco yoini non nantifi tushu pitiro. Ascan icoinra huafoma non ato funiquimashta yositiro atofu fochishmanantantanama. Nofin non apaiyai cuscan fusti non atiroma. Nan icoinra huaa futsafohuuri non ramapaitiro shinansharan non nocon Ifo non ato tanamasharatiro. <sup>3</sup> Shinancapon. Nocon Ifon Cristo afin apaiyai cuscan fusti shinanpaonima. Ascano ahuunoa Diospan tsain cunuquin isca huani, —Upa, un mia nicacoin. Ascan mia chaca huapaicaquin uari roacaniran,

—ishon cununi. <sup>4</sup> Nantifi Diosin tsain cunupacuni noco tapimashquin. Cununiri non icoindra huashon ahuara chaca finonfiaquin non tunucoinnon. Ahuun tsainhuunshon nocon ointi non fupi huamashon non tapitiro nocon Ifo fu nai muran chipo afu ipashquin afanan ahuara chaca finonshquima. <sup>5</sup> Upa Diosin non chaca finoainton noco mutsismatiro nocon ointi unimacain nocon Ifon Jesucristo man tanasharaino mato nannorisi shinanmatiro. <sup>6</sup> Ascano nannorisi shinanquifin non nocon Ifo Jesucristo ahun Apa nan oi fusti nicatsa non ahuunoa yoisharatiro.

### *Nan tsain shara Jesucristohuunoa Israelifoma yoini*

<sup>7</sup> Criston noocoqui unimaquin noco iquina ahuun yorafo non inon. Ascan marifi futsafo ya yorahuatanancahuun. Man ascaino Diosihuunoa futsafoan shinansharatiro.

<sup>8</sup> Un mato yoicain Jesucristo mai ano oni Israelifoan aton oinmati cuscara iquiyoi. Ascano Upa Diosin nocon shunifo yoini cuscan iconcoincun non tapitiro. <sup>9</sup> Mani futsafoanri icoindra huashon yoishcani isca huaquin, —¡Aicho! Upa Diosin nocohuun ramapaiquin ahun Furun noocoqui nichini. Noco numanon. Upa Dios shararan, —ishon mani futsanfoan yoishcani. Nannori Diosin tsain cununi isca huaquin,

“‘Ascan un mani futsafo mihuunoa un yoisharatiro. ¡Aicho Dios shararan!’  
ishon un mihiunoa ato yoishquin. ‘Un mihiunoashu fanainsharatiro,’  
”

ishon cununi. <sup>10</sup> Afanan Diosin tsain cunuquin isca huani,

“Mani futsafoan nan Israelifo ya unimatanancahuun. Marifi man atofu Diospan yora iishquicai,”

ishon cununi. <sup>11</sup> Afanan cununi isca huaquin,

“Mani futsanfoan, nocon Ifohuunoa yoisharatiro. Nantifi manifoti anoashu nanscasi aqui fanain ishocahuun,”

ishon cununi. <sup>12</sup> Isaías arifi isca huaquin cununi,

“Nocon shuni Isaí ahuun funapan manifoti ato iquishquin. Shinanquin isca huashquin, ‘Nan fusti nocon Numamisi inonran,’ ishon yoishquicani,”

ishon Isaías cununi.

<sup>13</sup> Ascan Upa Diosin fustiton maton nomuran imasharafain mato unimamatiro man afu ipanon icoindra huashu. Ascano ahun Yoshin Sharapan ahuun curushhuunshon nocon yoini cuscan nantifi nocon ashonon, ishon man fasi icoindra huapainon.

<sup>14</sup> Uhuun yoramishtichin, un icoindra huai un oianfin man noinantanancoianquin. Jesushuunoari tapishara futsafori ato tapimashquin. <sup>15-16</sup> Ascacun un ranotama afanan afohuunoa un mato shinansharamana. Diosin uhuun ramapaiquin ua catonni Jesucristo ahun oinmati un inon nan tsain shara ahuunoa un mato tapimanon. Ascan ua nichini un mato Jesús icoindra huamanon. Diospan Yoshin Sharahuunshon maton chaca man shatua a cuscara shara iishquin. Ascano Upa Diosin matoqui unimacoinqui ahuun yorafo mato imai.

<sup>17</sup> Ascacun un fasi unimaicai nocon Ifo Jesucristo ua catonni Upa Dios un yonoshonon ahuunoa uhuun caifomafori un ato yoinon. <sup>18</sup> Criston ahuun curushu ua inan uhuun caifomafoan Diosin tsain nicacoinon. Un ato yoimisi cuscan Upa Dios nicacoinmisifo. Un Cristo yonoshona cuscan fusti un tapia. Futsafoan Criston yonoshonahuunoa uncai tapiama. <sup>19</sup> Ahuun Yoshin Sharapan ahuun curushhuunshon tsoan oinyomisima cuscara un ato isma. Ascan un nan maitio Jerusalén anoshon yoifainquin Iliria ano un nantifi nan tsain shara Jesucristohuunoa yoiquin rupian. <sup>20</sup> Uncai futsan Jesushuunoa yoimisi anori un capaimisima. Tsoan Jesushuunoa nicayomisima anorifi un capaimisi ato tapimashquin. <sup>21</sup> Nannori Isaías Diospan tsain cununi isca huaquin,

“Tsoan ahuunoa nicayomisima nicacaquin tapinonfo,”

ishon cununi.

### *Pablonun Roma ano cashquin shinanni*

<sup>22</sup> Ascacun un mato ari capaimisi. Ascafia un mato oin capaifiai un camisima. Ahuara futsan finoanshu un nituri niturimisi.

<sup>23</sup> Ascafia natian mun cashcu futsa ato Jesushuunoa yoiqui anaitian. Ascan mun itishara mato ari cashquin. Un fari ichapa camisima. Nantishon tapiquin un mato ari capaimisi. <sup>24</sup> Un España ari caquin mato ano rutiacashu un matofu tsainshquin. Non yoinonansharanon. Mato anoashu un caiton ua tushu inanshcaquin un España ari nocosharanon.

<sup>25</sup> Ascafia natian un Jerusalén ano cayoicai. Jesús icoinra huafoan ua nichini icoinra huaa futsafo un ato pui inanon. <sup>26</sup> Macedonia yafi Acaya anoafu unimacain icoinra huaa ahuuomafo Jerusalén anoa ato pui inanpainifo. <sup>27</sup> Unimacaquin ato inanpaquin. Yoinifo isca huaquin,—Jerusalén anoa Jesushuunoa yoimisifoan noocoqui nichini. Noco nichiamacun na tsain shara non nicacuanama. Ascacun nan non aya cuscannofiri non ato inanpai ato shara huaquin,—ishon yoiaifoan. <sup>28</sup> Ascan un ato inanfaini un España ari caquin un mato oinfaini cai. <sup>29</sup> Mun tapian un mato ano nocoshon nocon Ifohuunshon un mato yoisharashqui maton nomuran man unimanon.

<sup>30</sup> Tsain futsari un mato yoipai. Man nocon Ifo Jesucristo noishon ahun Yoshin Sharahuunshon uari noiquin ua Upa Dios cufishocahuun un yonosharashonon ahuatton ua nitun huanonma. <sup>31</sup> Ua cufishocapun Upa Diosin ua cushunon Judea anoa icoinra huamafoan ua ahuusca huanonfoma. Ua cufishocahuun un icoinra huafo Jerusalén anoafu pui un ato inainno unimacoincefinonfo. <sup>32</sup> Nan ato inanquin anaititan Upa Diosin ua nichiano un unimacoin matoqui nocotiro. Ascashu non yoinonansharatiro nocon ointi non unimatananon. <sup>33</sup> Diosin nocon ointi nooco shara huashomisi matofu isharanon. Nanscarari ipainon.

## 16

### *Pablon ato tsain shara fomani*

<sup>1-2</sup> Nocon yorahuan Febe Cencrea anoashu matoqui nococun shara huacahuun. Nan ainfoan nocon Ifo tanasharacoianquin. Cencrea anoa icoinra huafo shara huamisiquin. Yorafo shara huamisiquin. Uari shara huamisi. Fasi nocon Ifohuunoashu yonosharamisi. Ascacun yopai cuscan ashocahuun.

<sup>3</sup> Priscila futan Aquila u futan Jesucristo yonoshosharamisifo. Ua ato yoisharashocahuun. <sup>4</sup> Futsafoan ua rutupaiyainfoan nan rafutan ua numaifoan ato rutuqui rashquinifo. Uhuun caifomari Jesús icoinra huafoan ichanancashon yoimisifo isca huaquin,—Priscila yafi Aquila non fasi atohuun noiran,—ishon yoimisifo.

<sup>5</sup> Ato pushu ano ichananshori ua ato yoisharashocahuun.

Uhuun yorashta Epeneto ua yoishocahuun. Nantofin Asia anoshon Jesús icoinra huaquin tau huani.

<sup>6</sup> María mato yonosharashomisiri ua yoishocahuun.

<sup>7</sup> Uhuun yoran rafuri Andrónico yafi Junias ua yoishocahuun. Nan rafu ufu cunu muran iquinifo. Jesús fu rafumisifoan atohuunoa yoisharamisifo. Un Jesucristo icoinra huataima nan rafutan icoinra huaquin tau huanifo.

<sup>8</sup> Ampliatohuun un noi. Arifi nocon Ifon catonni. Ua yoisharashocahuun.

<sup>9</sup> Urbano u futan Jesús yonoshomisi nanrifi ua yoisharashocahuun uhuun yorashta Estaquiri ua yoisharashocahuun.

<sup>10</sup> Apeles fasi nocofunu shara. Upa Diosin aqui unimai. Atori Jesús yonoshosharamis. Nanrifi ua yoisharashocahuun.

Aristóbulo yafi ahuun yorafori ua yoisharashocahuun.

<sup>11</sup> Uhuun yorashta Herodión ua yoisharashocahuun.

Narcisco yafi ahuun yorafoan nocon Ifo icoinra huafo atorifi ua yoisharashocahuun.

- <sup>12</sup> Trifena yafi Trifosa non nocon yorashta Pérsida ua yoisharashocahuun. Nan ainfo-foan nocon Ifo fasi yonosharashomisifo.
- <sup>13</sup> Nocon Ifoan Ruforifi catonni. Ahua uhuun uhuacoin cuscara. Ua cushusharamisi. Nan rafuri ua yoisharashocahuun.
- <sup>14</sup> Asíncrito non Flegonte non Hermes non Patrobas non Hermas non icoinra huaa futsafo atofu icafo ua yoisharashocahuun.
- <sup>15</sup> Filólogo non Julia non Nereo yafi ahun poi non Olimpas non nantifi icoinra huaa futsafo atofu icafori ua yoishosharacahuun.
- <sup>16</sup> Nantifi noinancanashu munininantanancahuun. Nantifi Jesús icoinra huafoan ichananshon maifoti anoashon mato yoisharanonfo.
- <sup>17</sup> Uhuun yoramishtichin oinfain. Mato fu ichananmisifo futsafoan mato shinanchacamapai afanan Jesushuunoa man nannorsi shinanonma. Non mato cayacafi tapima cuscan nanfoan anorama mato tapimapai. Mato amaquiri shinanmapai afanan icoinra man huanonma. Atomaqui icahuun. <sup>18</sup> Afoancai nocon Ifo Cristohuunshon yonomisifoma. Nanfoan ahuara fipaiyaifo fustisi shinanfo. Diosin tsain tapisharafoma aton tsain fustihuunshon ato parapaicani ato amaquiri shinanmashcaquin. <sup>19</sup> Nantifiton nicafo man nocon Ifo tanasharacoincun. Asca un matoqui unimacoinni. Ahuara sharafohuunoa tapicoincahuun. Manmain ahuara chacahuunoa tapiroamapainon. Afihuunoa shinanyamacahuun.
- <sup>20</sup> Upa Diosin nocon ointi isharamai cuscan nanton samamashta matomaquinoa Satanás anaiticoin mato afanan ahuusca huanonma. Nocon Ifo Jesús mato shara huashopainon.
- <sup>21</sup> Timoteo un futan Jesús yonoshomisiton mato yoisharapai. Lucio non Jasón non Sosípater nanfo uhuun yorafoan mato yoisharacani.
- <sup>22</sup> Unquian, Tercio, un natian Pablo cunushoni. Urifi nocon Ifohuunshon mato yoisharapai.
- <sup>23</sup> Un Gayo pushu muran icun ua cushumisi. Icoinra huaa futsafori ahun pushu muran ichanamisifo. Afoanri mato yoisharafo. Erasto yorafoan aton pui cushushomisi nocon yorahuan Cuartori mato yoisharapai.

### *Ahuun unutaqui Dioshuunoa yoisharani*

- <sup>24</sup> Nocon Ifo Jesucristo matohuun ramapai. Nanscari ipainon. <sup>25-26</sup> Upan Diosin mato cushusharanon. Un Jesushuunoa mato yoimisi cuscan afi ahun curushu mato inantiro man tanasharanon. Ipaoni tsoancai Jesucristohuunoa tapiroponifoma. Natian nantifain tapitirofo Upa Diosin nan nipanacaton noco nichini Furun Jesucristohuunoa non yoinon. Ishquiai cuscan Upa Diosin ato yononi cuscan nannoricoin cununifo. Manifoannatifoan Jesús icoinra huafain nicasharanonfo. <sup>27</sup> Nocon Diosin fustitofin nantifi tapicoianquin. Nocon Ifon Jesucristohuunshon nantifain ahuunoa yoisharapacunonfo. Nanscasi ipanon. Amen. Nanti uhuun tsain unutaqui un mato yoi.

Pablo

## Pablonun Corinto Anoafu Cunu Fomani

### *Pablonun Jesús icoinra huafu Corinto anoafu ato cunu fomani*

<sup>1-2</sup> Uhuun yoramishtichin un mato cunu fomai. No futan Jesús tanamisi Sóstenes u futan mato cunu fomai. Upan Diosin ua catonpaiquin ua catonni Jesucristo fu rafunon ahuun tsain Jesucristohuunoa un yoifoanfafainon. Ascan Jesucristo ua nichini un ahuun tsain shara nantifi manifoti un ato yoifoanfafainon. Corinto anoafuan manfin Diospan yorafoquin. Man ichananfafainmisi Diospan tsain tapisharashquin. Diosin mato catonni Jesucristohuunoashu man ahuun yora sharafo inon. Ascacun un mato cunu fomai. Mato fustisima un futsafori cunushoni. Nocon Ifo Jesucristo Ifo huacun un atorifi na cunu un ato tapimapai. Nan nocon Ifofin aton Iforiquin.

<sup>3</sup> Un fasi mato shinain. Diosin matohuun ramapaicain, maton nomuran shinamasharanon. Upa Diosin futan Furun Jesucristo nanfo mato ashoni.

### *Cristo ahuara sharafo noco ashotoiro*

<sup>4</sup> Mun tapian Jesucristo matohuun noiquin ahuarafo mato tapimani ahuun ointi cuscara shara man inon. Nanscara tapishon un Upan Dios cufinquin isca huafafainni, —¡Aicho! Upa Diosin, min Corinto anoafu ahuara sharafo Jesucristohuunshon min ato tapimanaran, —ishon un cufifafainni. <sup>5</sup> Icon Cristo matofu rafuaino ahuunshon man tapisharacoian. Ascan ahuun shinanhunshon shafacafi man yorafo Cristohuunoa yoisharatiro. <sup>6</sup> Non mato Jesushuunoa yoini cuscan Diosin maton ointi fiananan huua ahuun ointi cuscara shara man inon. Ascacun man Jesús icoinra huashon man oinmana.

<sup>7</sup> Ascashu Upa Diosin Yoshin Sharahuunshon mato imapaiyai cuscan man man iquina. Icoinra huua futsafoan iquina cuscan marifi man man iquina maton nomuran Diosin shinansharamanon. Natianri nocon Ifo man fasi oinpai afanan oaiton.

<sup>8</sup> Aqui nocoaitian mato cushusharayoshquin. Ahuun curushu mato inanyoshquin man tanasharanon. Ascano nocoshon ratofomain afu ipacanicain yoifain ratofomain omit-siscapanacafo muran focanicai nantifi yoipacushquin. Nantiantari mato yoishquin isca huaquin, —Un maton chaca soashoni. Ascano tsoancai “Manfofin chacaforan,” mato huatiroma. Ua cuscara shara un mato imairan, —ishon Jesús mato yoishquin. <sup>9</sup> Upa Diosin mato catonni Furun nocon Ifo Jesucristo fu man rafunon. Upan noco yoia cuscan man aicain.

### *Jesús icoinra huua Corinto anoafuancai anorifosi shinancanima*

<sup>10</sup> Uhuun yoramishtichin un mato yoisharapai. Nocon Ifo Jesucriston ua yonoaino un mato yoi nannorifosi man shinanon. Shinan futsacaquima Jesucristo mato shinanmapaiyai cuscan nannorifosi shinancahuun.

<sup>11</sup> Uhuun yoramishtichin Cloé ahuun yorafo uqui fucashon ua tapimanafu man fochishmanantanafafainaiton. <sup>12</sup> Atirifoan yoiafo, —Nonfin Pablon tanamisifoquin non shinain cuscafín cayacaficoinquín. Futsafoancai cayacafí shinancanimaran, —ishon man yoia. Futsafoan yoiafori, —Nonfin Apolos tanamisifoquin, —ishon yoiaifono. Futsafoanri, —Nonfin Pedro tanamisifoquin, —ishon yoiaifonori. Futsafoanri, —Nonfin Cristo tanamisifoquin, —ishon man yoifafaini.

<sup>13</sup> Uhuun yorafoan ascacai sharama. Cristocai nocon ointi rananya imapaima futsa futsa huaquin non shinanon. Cristo tsain cayacafí fusti. Mato pashcanan huaima futsa futsa huaquin man shinanon. Uncái ihui coyán iquinanhunoashu mato nashonima. Man unu muran iquimamupacunitian Jesús tanacoinshon man futsafo ismashquin chaca shatushon Jesús Ifo huashquin. Uncái tsoa unu muran iquimanama ua tanafain

ua ifo huanon. <sup>14</sup> Un unimai. Uncai tsoa futsaunu muran iquimanama. Crispo yafi Gayo nan rafusi ununu muran iquimani. <sup>15</sup> Ascacucuai tsoan yoitiroma isca huaquin, —Ununu muran iquimamua Pablo tanamisi ishquiran, —ishoncái tsoan yoitiroma. <sup>16</sup> ¡Aira! Nantian mun shinain. Estéfanas yafi ahuun yorafori un ato unu muran iquimani. Un shinanfin un tsoa futsaunu muran iquimanamaquin. <sup>17</sup> Cristocai ua yononima un yorafo unu muran iquimapacunon. Ua yonoa un ahuunoa tsain shara yoinon. Ufin shinanfaincái un mato yoiama. Ufi shinanfaincái un mato Jesucristo icoinra huamatiroma. Uhuun shinanpan mato yoiaiton nancaí Diosin ahuun curushma Jesucristo mato ihui coyan iquinanhunoashu nashoni maton chaca soashoshquin. Nan tsain fustihuunshon Upa Diosin ahuun curushhuunshon mato numatiro.

*Upan Diosin nantifi tapicoian ahuara futsa apaiquin atiro Cristohuunshon noco oinmapacumisi*

<sup>18</sup> Ascashon Jesús ato nashoni nicacani a icoinra huamafoan isca shinancani, —¿Tsoanco icoinra huatiromun Jesús ihui coyan iquinanqui noco nashoni nocon chaca soashoshquin? Na tsaincái ahuama, —ishon yoicani. Ascashu nanfo funocoincani. Omitsiscapanacafo muran focani. Ascan nonfin icoinra huaicai. Ascano noco nimapacunaca non afu ipanon. Diosin ahuun shinanhunoashu Jesucristo noco nashoni nocon chaca soashoshquin. Ahua futsacai noco nimapacutiroma non afu ipanon. <sup>19</sup> Diosin tsain cunuquin isca huani,

“Nan ua icoinra huamafoan shinancaquin isca huacani, ‘Non tapicoian. Nocon mapon shinansharafain non ahuara huatiro nonfin tapisharaquin,’ ishon shinancani. Ascafashion ahua tapiafoma. Unfin un ato oinmanicain. Afoan shinainfo cuscacai un ato huaimaima. Ipaitsi shinanforan,”

ishon Diosin yoini.

<sup>20</sup> Ascan cunu tapisharafiacashon Diosin shinain cuscacai huacanima. Nanfotin Diosin atoti oinmaniquin amaquiri shinainfo cuscan. —Nonfin ahuamamishti tapisharaquin, —ifiaifoan Diosin ato ismai afoancái ahuashta tapiafoma.

<sup>21</sup> Tsoanshtacai aton shinanpan Dios onantirofoma. Diosin fustitofin nantifi tapisharacoianquin. Icoinra huamafoan yoiquin isca huafo, —Jesús icoinra huaoan ahuunoa yoiafo fasi amaquiriran, —ishon yoifiafo Diosin nocon chaca soashona non afu nipanon nonfin icoinra huaicai. <sup>22</sup> Ascano uhuun caifo Israelifo iscamisifo, —Diosin nai muranshon noco ahuamamishti oinmanaiton Jesushuunoa yoiafo cuscan non icoinra huatiroman, —ishon shinancani. Nan Israelimafori iscamisifo, —Noco Jesucristohuunoa yoiafo cuscacai non tapitiroma. Ascacun non icoinra huatiroma. Nan ahuara non tapiafin non icoinra huatiroquin, —ishon yoimisifo. <sup>23</sup> Anori ifiainfoanno non isca huamisi, —Jesucriston ihui coyan iquinanqui noco nashoni nocon chaca soashoshquin, —ishon non yoimisi. Ascafiacon uhuun caifo Israelifoan yoiquin isca huafo, —Ihui coyan iquinanqui mastancái nocon Cristo itiromaran, —ishon shinancani. Israelimafoan Cristohuunoa nicacani aquicashupaicani, —Tsoancái nanscara icoinra huatiroma. Futsan noco nashoni nocon chaca noco soashoshquin, —ishon yoimisifo. <sup>24</sup> Ascafiainfoanno nan icoinra huafoti Diosin noco catonni. Israelifo yafi mani futsafo Cristohuunshon nocon chaca soashonano non afu ipanon. Non tapia Cristohuunshon Upa Diosin ahuamamishti huamisi. Ahuun curushhuunshon noco numani. Atofin nantifi tapicoianquin. Cristohuunshon noco numani non afu nipanon. <sup>25</sup> Icoinra huamafoan yoiqui isca huafo, —“Jesucristo noco nashoni,” ishon noco yoifiacau fasi amaquiricoin icoinra huafo. Yora mapo sharayatoncái anori shinantiroma, —ishon icoinra huamafoan yoimisifoquin. Anori yoifiainfo Dioin ahuun shinanhunoashu Jesucristo noco nashoni. Diospan ahuun shinancái a icoinra huamafoan aton shinan cuscarama. Atofin fasi cayacafi shinammisiquin. Icoinra huamafoan yoimisifo isca huaquin, —Non fasi tapicoianran, —ishon

yoifiacaquicai icon yoicanima. Fasi amaqiri shinancani. —Nonahuamamishti huatiroran, —ifiamisishacaquin afocai afin numatiroma. Ascafiatan aforicai afin chaca soamutirofoma. Upa Diosin fustitonahuamamishti huatiro.

<sup>26</sup> Uhuun yoramishtichin shinancapon. Diosin mato catoantaima ahuu cuscaramain man iyomisiquin. Man fustirasiton man cunu tapiaino maton muranri niaifo fustirasi. Nan Jesús icoindra huamafoan yoiquin isca huafo, —Afocaiahuamaran, —ishon matohuunoa yoicani. <sup>27</sup> Nanfoan shinancai manahuama. Ascafia Diosin mato catoan tapicanashu chipo rafipaitirofo. Shinanfo isca huaquin, —Nonfinahuamamishti huatiroquin. Jesús icoindra huafaofan futsa futsa huaquin shinantiroforan, —ishon shinanfo. Ascari yoyafo isca huaquin, —Non shinantiro cuscacai afoanri shinantirofoma, —ishon yoyafo. Anori shinanfiacashon chipo tapitirofo Dioshuunshon nonahuamamishti huatiro cuscan. Tapicanashu rafipaitirofo. <sup>28</sup> Ascafia catan shinancaquin isca huafo, —Afocai sharamafinquin non ato oinpaimaran, —ishon matohuunoa yoifiaifono Diosin mato catonni. Mancaihuaashtamaran mato huafiaifono Diosin mato catoan man ato oinmanon afocairoconfinahuamaquin.

<sup>29</sup> Ascano tsoanshtacai Diosin ointaifi, —Un tsoa cuscaramaran, —ishon yoitiroma. <sup>30</sup> Dioshuunoashu Jesucristo ahun yorafo man inon. Cristohuunshon nooco cayacafi tapimafain ahun ointi cuscara nooco imashquin nooco nashoni nocon chaca soashoshquin non afu nipanon. <sup>31</sup> Ascashon non Jesús icoindra huashucui non caca-paimisi itiroma. Diosin tsain cunuquin isca huani, —Tsoancai yoitiroma isca huaquin, “Unahuamamishti un tapiaran,” ishoncayoitiroma. Anori itamarocon, “¡Aicho! Nocon Ifo Jesús ua numa. Ascacun natianahuunshon un tapisharatiroran,” —ishon yoitiro.

## 2

### *Cristo ihui coyan iquinanqui mastanifo cuscan yoinifo*

<sup>1</sup> Uhuun yoramishtichin un matoqui nooco funashon Cristohuunshon UpanDiosin mato ashoni cuscan unfin shinansharafaincui un mato yoiama. Diosin ahun shinan fustihuunshofin un mato yoaquin. Diosin ua shinamanaino un mato yoia. <sup>2</sup> Un matoqui nocoataima un shinanquin isca huani, —Uncaihua futsa ato yoishquima. Jesucristo nooco ihui coyan iquinanhuunoashu nooco nashoni cuscan. Nanhuunoa fusti un ato yoishquiran, —ishon un shinanni. <sup>3</sup> Ascano matoqui oshon uncaihinanqui isca huama, —Unfincoin un ato cayacafi yoitiroran, —ishoncayoitanma. Diospan Yoshin Sharahuunshon un mato yoiamaquicai un mato cayacafi yoisharacuanama. Unahuun Yoshin Shara fasi yopacoiai cuscan un mato cayacafi yoinon. Ascano un ratuyamua ua Diosin yona cuscan un ayamaishafain marifi man funocuana. Uhuun nomuran un shinanchacatana un ayamai shafain. <sup>4</sup> Ascashon un mato Jesucristohuunshon yoimisi cuscan uhuun mapon shinanfainsi un mato yoitamarocon Diospan Yoshin Sharapan ua shinanmapaiyai cuscan un mato yoia. Un mato yoiaino ahun curushhuunshon man icoindra huani maton ointi fiananahuashquin ahun ointi cuscara iishquin. <sup>5</sup> Ascan nocofunun shinanpancui man icoindra huama. Diosin shinanhuanshon man icoindra huua.

### *Diosin Yoshin Sharahuunshon non shinansharatiro*

<sup>6</sup> Ascan Diospan tsain nicasharaifoan man tapiago non Diospan Yoshin Sharahuunshon cayacaficoin yoiiton. Ascan futsafoanri cunu tapisharafashion Diosin shinain cuscacai tsoa anori shinainma. Aton shinanpancui non mato yoiama. Aton niaifoifoan shinainfo cuscacai non mato yoiama. Ascashufi afo funocaniquin. Nan shinainfo cuscan man cuyoi futsui. Ipaitsi shinancani. <sup>7</sup> Non mato Diosihuunshon yoimisi cuscan huafaincui tsoan tapiyopaonima. Cristoyorafotihuunoashu nashoshquiai cuscan Diosincui ato tapimayopaonima. Diosin mai onihuataima shinanquin isca huani, —Uhuun Furumun ato chipo nashoshquin nan a icoindra huafoti ato nimapacushquin, —ishon

shinanyoni. <sup>8</sup> Un na tsain mato yoiai cuscacai niaifofoan tapyopaonima. Ascashon Jesús rutunifo. Tapicashocai tsoan nocon Ifo Jesús Diospan furun sharacoin masta cuanifoma. <sup>9</sup> Ascan Diospan tsain cunuquin isca huani,

“Tsoan Dios noicoiainton ahuamamishti shara ato ashoin, tsoan oinyomisima cuscara sharafo ato ashofain tsoan nicayomisima cuscarari ashofain. Tsoanshta aton nomuran shinanyomisifoma sharashtacoin ato itishara huashoan,”

ishon Diosin tsain cununi. <sup>10</sup> Ascashon non Dios noiaiton ahuun Yoshin Sharapan noco tapimai. Ahuun Yoshin Sharapan nantifi tapicoian. Upa Diosin shinain cuscan ahuun Yoshin Sharapan tapicoian. <sup>11</sup> Yorafoan aton nomuran shinainfo cuscacai tsoa futsan tapitiroma. Arusu fusti tapitiro. Nanscarifiai Upa Diosin shinain cuscan ahuun Yoshin Shara fustiton tapicoian. <sup>12</sup> Nan Upa Diosin ahuun Yoshin Shara nocoqui nichini noco tapimapaiyai cuscan noco tapimanon. Nan icoingra huamafoan Diosin tsain shinancanima. Ascashori afoan shinain cuscacai Diosin noco tapimanima.

<sup>13</sup> Ascashon yorafoan noco tapima cuscan non mato yositamarocon Diosin ahuun Yoshin Sharapan nocon nomuran noco tapimana cuscan huafain non mato tapimai. Ahuun tsain iconcoin fusti. Ascan norifi ahuunshon non mato iconcoin tapimai. <sup>14</sup> Ascano ratoranfon Diospan Yoshin Shara atofu iyamaino nanfoanfin Diosin Yoshin Sharapan yoia cuscan nicacasmacani. Ascashu iscatirofo,

“Tsoantsi nan tsain icoingra huaiquin. Nan tsain fasi amaquiriran,”  
ishon shinancan. Diosin Yoshin Sharapan shinain cuscacai tsoan tapiama. Nanscacun atofu iyamainocai yoia cuscan tapiafoma. Diosin Yoshin Shara fustiton ato tapimatiro. <sup>15</sup> Ascaino ratoran futsa Diosin Yoshin Shara afu icaino Diosin ato tapimapaiyai cuscan tapitirofo. Ratocaimain chaca iyamarai sharaquin Diosin Yoshin Sharapan ato tapimai. Ascafashu Diosin Yoshin Shara fu rafuamatocai a Jesús icoingra huafo onantiroma. <sup>16</sup> Diosin tsain cunuquin isca huani, —Tsoancai nocon Ifoan ahuun nomuran shinain cuscan huafain tapitiroma. Tsoanricai Dios tapitatiroma, —ishon cununi. Ascafia nan non icoingra huafo Criston shinain cuscan huafainri noco tapimana.

### 3

#### *Nonfin Diospan oinmatifoquin*

<sup>1-3</sup> Facu rama caiantocai tsain tapiama. Yosishon tsain nicatiro. Nanscarifi aquin Jesús rama icoingra huafofin facu rama caian cuscarafoquin. Diosin aton Upafiacucai tsoan ahuun tsain atirifi tapisharataima. Manfin nanscarafaquin. Rama Jesús ifo huayamaflashu man nanscasi aamisiquin. Diosin tsain man man nicafiaicai a yoia cuscan man aama. ¡Ohuashta! Uhuun yoramishtichin manfin Diospan tsain nicamisima cuscarafoquin. Rama Jesús icoingra huafio cuscara. Nan Diospan Yoshin Shara ato iquinafoanfin ahuun tsain nicasharatirofo. Manca ascarafofoma. Ascan un mato Diosin tsain yoipaiyai cuscacai atirifi un mato yoitiroma. Facushtan shoma fusti aiyotiro namicai piyotiroma. Nanscarifiai atirifi Diosin tsain man nicafiaquicai ahuun tsain man tapiyotiroma. Nanscacun un ichapamashta mato yoiyotiro. Ahuun tsain futsafori un mato yosipaifia manca tapisharataima. Ascano manca itisharama paratama nicashquin. Manfin Diospan Yoshin Shara fu rafuama cuscarafoquin. Ascashu futsafo ahuaraya cuscan man ato fuchipaifain fochishmanantanainsi man ica. Nanscarafaocai Diosin tsain nicacanima. Marifi man nanscarafa. Ascashufin Diospan yorama ointsa man aaquin. <sup>4</sup> Atirifi isca huafio, —Nonfin Pablo tanaquin. Ascan noncái Apolos non tanama, —ishon anori yoiaifoanno. Atirifiton yoicaquin, —Nonfin Apolos tanaquin. Ascan noncái Pablo tanama, —ishon anori yoiafo. Anori yoiquin man ato oinmanaquin nan Diospan Yoshin Shara matoya rafuama cuscarafo.

<sup>5</sup> Ahuuscaimun atirifiton man isca huaquin,—Non Pablo yafi Apolos tanairan,—man ica. Apolos fucai un ahuama. Nonfin nocon Ifo Diosin ahuun oinmatiquin. Nocohuunshonfin man Jesús icoinra huaniquin. Diosin noco catonni noco yonomapaiyai cuscan noco yonoshquin Furunhuunoa man tapinon.

<sup>6</sup> Un mato isca huaquin yosipai. Futsan tauhuaquin shuqui fanatiro. Futsari amaqui orotiro foaisharanon. Ascafashocai nan rafutan shuqui foaimatiroma. Diosin fustitofin shuqui foaimatiroquin. Nanscarifi aquin un mato tauhuaquin Jesucristo icoinra huamani. Chipo Apolos Cristohuunoa mato yosini ahuun tsain man tanasharacoinon. Non asca huafiaino Diosin fustitofin maton nomuran mato shinansharamatiro ahuun tsain man tanasharacoinfafaionon.

<sup>7</sup> Ascashon un mato yoiai cuscacai un Apolos fu ahuama. Diosin fustitofin yorafo aton nomuran shinanmasharatiro ahuun tsain tanasharacoinonfo. <sup>8</sup> Tsoaran futsan tau huaquin ato Jesús icoinra huamafin nan chipo ato yosiaitori ato tsain nannorifosi ato tanamasharanon. Nan rafutan nannori shinancani. Ato Jesushuunoa yoishcaquin a tanasharanonfo. Ascacufin Diosin a yonoshonaifo cuscan futsa paratama inanfain futsa ichapama shara inanshquin. Ahuuscamain yonoi aafquin.

<sup>9</sup> Manfin Diosin ahuun mau cuscaraquin. Ahuun pushu cuscaraifi. Mau ifo fustifiano futsafoanrifi yonoshotirofoquin. Aafin maton ifoquin. Nonfofin ahuun yonomatifoquin a futan non mato yonoshotiro. Nanscarifiai pushu ifo fustifiano futsafoanri yonoshotirofo. Nanscarifiai manfin Diosin ahuun mau cuscaraquin. Ahuun pushu cuscaraifi. Diosin fustifin maton Ifoquin. Nonfofin ahuun yonoshomisifoquin. Noco yonoa cuscari non maton nomuran non mato shinansharamatiro ahuun tsain man tanasharanon.

<sup>10</sup> Pushu yonomisiton iquisi quishi mutsisipa shara fitiro. Chipo futsafoan pushu anaititiro. Nanscarifiai Diosin ua catonpai ua cashman catonni. Ascashon ua tapimashara cuscan un tau huaquin cayacaficoin un mato Jesushuunoa tapimamisi. Un mato tapimayoni cuscan futsafoan natian nannoricoinri paratama mato yosicani. Ascaiton futsafo un yoishquin isca huaquin,—¡Oinfain! Ato cayacaficoin yosisharacahuun,—ishon un ato yoishquin. <sup>11</sup> Un mato yoiquin tau huani cuscacai tsoa futsan mato yositiroma isca huaquin,—Un mato tsain futsa tapimai man Dios fu ipanon,—ishocai mato icon yoitiroma. Jesucristo fustitofin noco imasharatiroquin non Dios fu ipanon.

<sup>12-15</sup> Nocofunun ahuun pushu samamashta coatanfin amurannoashu ichocaintiroquin naashquima. Ascan ahuun pushu coaino amurannoafu ahuun cuno shara cotiroma. Ascan ahuara cunomafo coi anaitimui futsutiro. Pushu huaquin iquisi quishi curushu shara nichishon ahuun oro amuran nutafain atirifi cuno futsa oshopa sharashta non chicoin cuno mapash faca facaitsa nanfo fasi chicoin ahuun pushuhuun nutatiro. Ascafia coainocai afo cotiroma. Nanfo cotamarocon nufutsutiro. Ascashon pushu huaquin cano mapofain shupa shuhuafain pishin nutacuano pushu coaino afo cotiro. Afo munoi futsutiro.

Nanscarifiai nantifi Jesús icoinra huafu futsafo yonosharaifoanno atirifi yonosharamisima. Jesús icoinra huafoti nantifi noco ichanan huaitian noco ismaicai non ashomisi cuscan ipayamarain cuyoriscatiromainquin. A yonoshosharafofai aton yono funopacunacama. Ascan a yonoshosharafofai aton yono cuyoi anaitimui futsutiro. Tsoan yonoshoshara ato inansharacointiro. Asca nan yonoshosharama ato inainma. Afu ipatirofofiacanashu man maitsisi yonoi futsucani. Man funocani.

<sup>16</sup> ¿Asca man tapiamamun man Diosin pushu cuscaraquin? Ahuun Yoshin Shara matofu ica. <sup>17</sup> Diosin icanocai ahua chaca itiroma. Mato fu ipashquin Diosin mato catonni ahuun yorafo man inon. Nan icoinra huafoti ato imasharai. Ascan futsan ato amaqiri yoiaiton Diosin copiqui ato onaintimashqui.

<sup>18</sup> Mafiri paramuyamacahuun. Icoinra huamafoan ahuara tapiafo cuscaraca marifi man tapishara. Anori shinanyamacahuun. Icoinra huamafoan shinanqui isca huafo, — Nan Jesús icoinra huaoan fasi amaquiri shinanfo. Fasi nison cuscaracoinforan, —ishon nocohuunoa yoimisifo. Matohuunoa anori shinanfiaifoanno Diosin mato cayacafi shinansharamapaiyai cuscan man shinantiro.

<sup>19</sup> Nan Jesús icoinra huamafoan shinanquin isca huafo, —Non cayacafi shinanshararan, —ifiaifoan Diosin yoia, —Afoancai cayacafi shinansharacanima. Ipaitsi shinanforan, —ishon Diosin atohuunoa yoini. Ascashon futsafo shinanmapaicanisca huaquin, —Afoanfin tapisharaquin, —ishon ato shinanmapai. Ascafia afoancai Dios paratiroma. Ascan aton chanihuunshon ato onaintimai funononfo. <sup>20</sup> Diosin tsain cunuqui isca huani, —Nonfin fasi tapisharaquin, —ifiainfoan nocon Ifo Diosin ato onancoinshon yoiquin isca huatiro, —Nafoancai ahua cayacafi shinantirofoma. Ipaitsi shinancaniran, —ishon ato yoitiro.

<sup>21</sup> Ascacun afanan yoiquin isca huayamacahuun, —Na nocofunun nocon tapimamisi ahuun tsain fusti cayacaficoirran, —ishon afanan yoiyamacahuun. Diosin ato shinamayamainocai tsoan cayacafi shinancuanama. Diosihuunshonfin non mato cayacafi yositiroquin. Ascan Diosin mato inan nantifi man yopai cuscan huafain. <sup>22</sup> Un non Apolos non Pedro nonfin Jesushuunoashu ahuun oinmatifoquin ahuun tsain non mato yosishquin man nicoinsharanon. Naashu man afu ipanon. Nantifi ahuunafin matonariquin. Ahuara icai cuscan afohuunshon Diosin mato shara huashoi. Nan chipo icaifori mato shara huashoi. Nantifi Diosin onihuani cuscan mato shara huashoshquin. <sup>23</sup> Manfin Cristonafoquin. Cristofin Upa Diosinaquin.

## 4

### *Cristo fu rafumisifoan a yonoshomisifo*

<sup>1</sup> Ascashon man nocohuunoa shinanquin isca huatiro, —Nafofin Cristo oinmatifoquin, —ishon nocohuunoa shinancahuun. Tsain Cristohuunoa tsoan nicayomisima cuscara Upa Diosin nocon nomuran noco tapimana cuscan non matori tapimanon.

<sup>2</sup> Ascan non Cristo oinmatifocun Diosin noco yononi isca huaquin, —Un mato yoiai cuscan huafain ato yoicahuun. Yoiyamacaqueima, —ishon noco yononi. <sup>3</sup> Diosin fustitofin tapicoianquin nan ua yonoa cuscemain un aaquin. Man uhuunoa shinain cuscacai un shinainma. Futsafoanri uhuunoa shinain cuscacai un shinainma. Unricai tapiama. <sup>4</sup> Uhuun nomuran un shinain isca huaquin —Ua Diosin yononi cuscan un airan, —ishon un anori shinain cuscan nocon Ifo fustiton ua onancoian. Ascashon yoitiro, —Nan un yonoai cuscacoin airan, —ishon ua yoitiro.

<sup>5</sup> Jesús icoinra huafoti Upan Diosin noco ichanan huataima. Ascan isca huaquin yoiyamacahuun —Nacai Diosin yonoa cuscan aimaran, —ishon anori shinanyamacahuun. Oinyocaquin. Nocon Ifoan noco ichanan huaitian nantifi noco puashoshquin nantifiton ointaifi ratofaanmain icoinra huaa iyamarai icoinmaran huaaquin. Ascatari nan non ichanaintian nantifiton ointaifi nocon nomuran non shinamisi cuscan huafain nocon Ifon Jesucristo noco puashoshquin. Afanancrai nantiantan non ahuashta fomantiro ishquima. Diosinmain nantifi onancoincufin. Nan non ahuara futsa shara huashopaifain onushta ahuara non chaca huafiamisi nanfori Diosin noco puashoshquin. Nantianri non shara huacun Diosin yoiquin isca huashquin, —¡Aicho! Un mia yonoa cuscan min amisi. Min shara huamisiran, —ishon noco yoishquin.

<sup>6</sup> Uhuun yoramishtichin uhuunoa yafi Apoloshuunoa un mato tapimana ahuara futsa man tapinon. Un mato yosipai man iscanonma, —Pablonun noco tapimana cuscan Apoloscai tapiamaran iyamarai Apolos noco tapimana cuscacai Pablonun tapiamaran, —ishon yoiyamacahuun. Diosin tsain noco cunushoni non anori yoinonma. Nan tsain nicaquicai non shinanquin isca huatiroma, —Na nocon yosimisi fasi sharacoin.

Futsafocai a cuscaramaran, —ishon non shinantiroma. <sup>7</sup> Diosinfin nantifi noco onihuaniquin. Ascanofin Diosihuunshon non ahuara huatiroquin. Ascasho —Un acai cuscacai tsoan huatiromaran, —iyamacahuun. Ascashu curafiapaimisi iyamacahuun.

<sup>8</sup> Manfin shinanquin isca huaquin, —Non Diosin tsain tapicoian. Non futsafo fasi finoncoian. Ascan noncai tsoa futsa yopaima noco tapimanon. Nonfin niaifo cuscarafoquin, —ishon man shinan. Iconpainon. Man niaifocoin icaino nantian norifi non matofu niaifo icuana. Asca tsoatsi niaifocoin. Nonmaquian. <sup>9</sup> Cunu uhuapa cunu acua muran iquimanifo ato rutunonfo. Yora ichapafoan ointaifi rutumatiro oinnonfo. Nanscarifiai norifi non Jesús fu rafumisifo non ato cuscaraquin. Diosin noco yonoa non Jesushuunoashu omitsiscafiaino nantifi yorafo non ahuun oinmati afu nai muran icafoanricai oincani. <sup>10</sup> Nonfin Cristo fu rafumisi. Ascacun noco isca huamisi, —Nanfoanfin fasi amaquiri shinanmisifoquin. Mutsisipamaforan, —ishon nocohuunoa icoinra huamafoan yoimisifoquin. Asca matohuunoacai yoiquin asca huamisifoma. Matohuunoafin man shinanquin isca huaquin, —Non fasi tapicoian. Nofifin non isharamisiquin. Tsoan noco finontiromaran, —ishon maton nomuran man shinanmisiquin. Man non tapia non Jesús maisishocai non ahua huatiroma. Ascafia man shinanquin isca huamisi, —Uffin un ahuara huatiroquin, —ishon man shinanmisiquin.

<sup>11</sup> Ascan nonfin foniyanan nomicain sahuuti chocacoin sahuufain noco coshafain pushuomacainri Diosin tsain fusti yoi non cahuancacaimisi. Natianri non omitsiscai. <sup>12</sup> Ascashu non curushcai yonotiro non yopai cuscan ahuun rafanan fiishquin. Ascarifiatan yorafoan noco tsain chaca huafaiton copitamarocon non isca huamisi, —Jesús mia shara huapainonran, —ishon non yoimisi. Noco omitsisca huafiaifoan non tunuointiro. <sup>13</sup> Ascashori noco roaifoan rahuinmafain non tsain shara ato yoitiro. Ascacun natianri noco chaca huafquin. —Manfin nan tanama cuscarafoquin, —ishon nocohuunoa yoimisifoquin.

<sup>14</sup> Ascacucai un matoqui cunuai cuscan un mato rafimapaima. Ascan manfin uhuun facucoin cuscarafoquin. Un matohuun fasi noi. Ascacun un mato yoi afanan man amaquiri shinanonma. <sup>15</sup> Yorafoan mato Cristohuunoa tapimatirofia ascan unfin tauhuaquin mato Cristohuunoa tapimanquin. Ascanofin man Cristo icoinra huaquin. Uhuunoashuri man Diospan facufoquin. Ascatan un maton upa cuscaracon. Futsafoan Cristohuunoa mato tapimatirofia afocai maton upa cuscara itiroma. Urus fustifin un maton upa cuscaraconquin. <sup>16</sup> Ascacun un mato yoi ua cuscara icahuun. Un Dios tanashara cuscan nanscarifi acahuun. <sup>17</sup> Ascacun un Timoteo matoqui nichicai. Un Timoteo Cristo icoinra huamaquin tau huani. Ascafín nan uhuun facu cuscaraquin. Un fasi ahuun noi. Nocon Ifo Jesús yonoa cuscacoain. Un Jesucristo tanai cuscan Timoteon arifi mato tapimashquin man ointiaquimanonma. Nan icoinra huafó pushufoti anoafó un ato tapimai cuscan nannori Timoteo matori tapimai.

<sup>18</sup> Mun tapia man atirifiton shinanquin isca huaa, —Pablonun Timoteo nocoqui nichi. Ascan afinmain nocoqui musuifin. Ascashufin afincoin nocoqui oamaran, —ishon man shinan. Manfotin curafiapaimisisifoquin. <sup>19</sup> Anori man shinanfiaino ufcion samamashta un mato ari caicain. Diosin ua yonoaino un samamashta mato ari cai. Nan un nocoaitian un tapicashquin nan curafiapaimisisifoan Jesús ahuun curushhuunshon yoiyamarain afincoinmain yoicanicai. Ipaitsi yoicanimainquin. <sup>20</sup> Diosin nocon Ifo icaino non tsain fustimansi ipaitsi yoitamarocon ahuun curushpan non isharatiro.

<sup>21</sup> Ascashu un nocoaitian ahuun curushpan un matoqui nocoshquin. Ascashofin man ica cuscan huafain un tapitiroquin. Man chaca shatuyamacun Diosihuunshon un mato onaintimatiro. Asca maton chaca man shatucun un matohuun fasi noiquin un oi tsii huasharafain mato yoishquin. Ascan mafi catontiroquin ratocaimain un aquicai. Maton tsainhuunshon onaintimai iyamarai oi tsii huasharafain mato yoishquin.

## 5

*Jesús icoinra huafiacashon chaca huaf*

<sup>1</sup> Mun nicamisi mafi ranan man fasi chaca huaa tanancun. Apa ahuin ahua futsafia afu icacaini. Nanscara chacafocai nan icoinra huamafoan tsoa ascamisima. <sup>2</sup> ¡Ai timafin! Nan tapifiashu man curafiapaimisi. Nan nocofunun mato muranshon chaca huai ahuun rafipaitama, —Non sharacoinran, —man ica. ¿Ahuun rafitama man man tapifiashon nan nocofunun chaca huamisi ahuuscai matofu ichanainton man potamamun?

<sup>3-5</sup> Un matofu iyamafashion un mato fasi shinain. Un anoyamafiano nan nocofunu ahuusca huaimancai mun tapicoian. Un mato anoshon yoiquin isca huacuana, — Afanan ichanainfoanno Jesucristo ahuun shinanhunshon na nocofunun apa ahuin ahua futsa fu imisi matomaquinoa potacahuun. Ascacuai afanan Diosin cushuima. Satanás a amapaiyai cuscan aashquin. Manasca huaiton Satanás nan nocofunu omitsiscamatiro. Ascashon omitsiscamaiton mui ahuun chaca shatupaitiro Jesusqui nasoshquin afanan omitsiscashquima. Ahuun chaca man shatuano ahuun yoshin Jesús fu ipatiroran, —ishon un matofu ishon un mato yoicuana.

<sup>6</sup> Timafin man iscamisi, —Non shararan, —man ifiamisi mancái na nocofunun chaca huamisi mato murannoá man potataima. ¿Man tapiamamun fustiton maton muranshon chaca huaiton man shatumayamaino nanhuunoashu nantifi man chacai futsutiro? <sup>7</sup> Ascaiton mato anoshon nan nocofunun chaca huai potacahuun. Ascanofin afanan Jesusqui nasotiroquin tanasharacoinshquin. Cristo Upan Diosin ahuun chashoan cahuashara cuscara noco nashoni non afanan chaca huanonma a cuscara shara non inon.

<sup>8</sup> Ascashon non chaca huapaoni cuscacai afanan non shinantama Cristo ahuun ointi cuscara shara non iishquin. Ahuun tsain shara non shinanon. Futsaqui afanan shinanchacayamafain tsoa afanan parayamafain tsain iconcoin fusti non yoinon.

<sup>9</sup> Ascacun un matoqui cunui tsoa ahuun ahuinma fu icain ainfofo nanscarifiafono aton funuma fu icaino afanan ascarao fu rafuyamacahuun. <sup>10</sup> Jesús icoinra huamafohuunoacai un cunuima. Nanfofin Satanás aton ifoquin. Ascashocai aton chaca shatuafoma. Chaca futsa futsatapafo huamisifoquin. Ascashon aton ahuinma fu imisifo. Ainfofo nanscarifiaifoanno aton funuma furi imisifo mafo ichapa fusti fipaifain. Atonama fipaicoimisifo yomutsofo non nan diosicoimafafin, —Nocon diosiran, —icafoquin. Noncái atofu pashcanantiroma. Non icoinra huamafo fu pashcananpai nan maitio non cuyofotiro. Icoinra huamafoan acaí cuscacai non ato futan atiroma. Ascafiacon non atofu imisiquin.

<sup>11</sup> No futan icoinra huafohuunoa un mato cunushoni. Tsoan yoiquin isca huai, —Urifi matofu Jesucristo ahuun yoraran, —ishon anori yoifiatan ahuun ahuinma fu icaino ainfofori nanscarifiaifoanno aton funuma fu icaifoanno mafo ichapa fusti fuchipaifain atonama fipaimisifo icain diosicoimma tanapaifain yora futsa chaca huamisi icain paunmisi icain yomutso icain. Ascarao fu rafuyamacahuun. —Un Jesús icoinra huairan, —ifiacatan ahuara chaca huariaifo fu rafuyamacahuun.

<sup>12-13</sup> Nan icoinra huamafo non ato yonotiroma aton chaca shatunonfo. Ascarafocai Diospan yorama. Diosifin ato onaintimashquiquin. Ascafiaino Diosin noco yonoa nan icoinra huafu futsan chaca huacun non ato yoitiro aton chaca shatunonfo. Ascashon nan nocofunun mato muranshon chaca huamisicun yoicahuun afanan matofu ichananonma ahuun chaca shatucoaintian matofu afanan ichanantiro.

## 6

*Jesús icoinra huaa futsan mato chaca huaiton nahua niaifo ano iyoyamacahuun*

<sup>1</sup> Ahuuuscaimun mafi ranan fochishmanantanfiashon man shara huapaimacain. Mafi ranan shara huatanantama nan icoinra huamafoan aton niaifo ano man iyopai, —Noco shara huashononran, —ishon. ¡Ai timafin! Ascaracai sharama. <sup>2</sup> ¿Ascan man tapiamamun nonfin Diospan yorafquin? ¿Ascashon a futan non nantifi yora manifoti chipo yoishquin ratofoanmain chaca huamisifoquin ascashon ato onaintimanon? ¿Ascan ahuuuscain ichapama man fochishmanantanfiashon mafi ranan man shara huatanantiromamun? Man nanscasi amisi. <sup>3</sup> Man tapiamamun non Dios futan yoishquin ahun oinmati afu nai muran icafomain chaca huafio iyamarai shara huafquin. Nonasca huainofin nuno mai anoafio fasi mimacai yoiquin finatiro ratofomain chacafio yafi sharafoquin. Nanscacufin non fochishmanantananshon nofin ranan non arotiroquin.

<sup>4</sup> Ascacufin man fochishmanantanain cuscan mafiranan arosharacahuun. Ascacun ratoran futsafo catoncahuun a mato futan icoinra huama aquima. Nan mato futan icoinra huaa acahuun mato arosharashonon. Nan ahua yamafiacun man catontiro mato arosharashonon. <sup>5</sup> ¡Ohushta! Un mato rafimapai man afan an ascanonma. ¿Manmun ratoran futsacai shinansharatiromamun a fochishmanantanainfo cuscan arosharashononfo? <sup>6</sup> Ascaquimarocon mafi ranan man fochishmanantananshon man shara huatananyamacun. Ascashu ranushumuafoan aton niaifoqui man chani. Nanahuama ointsa man aa. Nan icoinra huamafoan aton ointaifi man Jesús ahun yora futsa man chaca huaa. ¡Ai timafin! Nan fasi chacacoin.

<sup>7</sup> Mafin ranan man yoiti huatananshu ranushumua niaifoqui man chaniano. Manascaifin ato ointaifi man ato oinmana mafi ranan noinantama. Ascashofin man Jesús tanasharamaquin. Man funocoiafo. Nan Jesús icoinra huaa futsan mia chaca huacun ranushumua niaifoqui chaniyamacai man puusicama shara icuana. Jesús icoinra huaa futsan ahuara mato onunshon nasocasmaiton man ranushumua niaifoquin chaniyamacain man puusicama shara icuana. Futsan mia chaca huafiacun icoinra huamafoan ointaifi min ahua chaca oinmanama. <sup>8</sup> Man ascaquifin mafi ranan onunonanquin man chaca huaa. Ascan matofu Diospan yorafiacun man chaca huatanan.

<sup>9</sup> Man tapiamamun a yora chaca huamisifo Diosin niaifo ari itirofoma. Mafiri paramuyamacahuun. Nan maton ahuinma fu man icaino ainfofori aton funuma fu icaifoanno diosiyamafiacun fuchipaifain nan nocofununri afu nocofunu futsa fu icaino nanscarifai afu ainfo fu futsa fuchinanpaiquin chaca huatananashu ainfofosi afo ranan iquinainfo icain <sup>10</sup> yomutsofo icain aton nama fipaifain paunmisi icain roanmitsamisi icain yoiti huamitsamisi icain ahun ahuara futsan fiatianshon futsa sutufain. Ascarafocai Dios icano noconacafoma. <sup>11</sup> Atirifi man ascafiapaonishacaquin natian Jesucristo yafi Upa Diosin ahun Yoshin Sharahuunshon maton chaca soashona. Maton chaca soashonano a cuscara shara maño ima. Ascasho ahun ointi cuscara shara mato ima. Chaca huamisifoma cuscara man inon.

### *Mafiri chaca huamuyamacahuun*

<sup>12</sup> Ascan man yoiaraca isca huaquin, —Cristo uhuun Ifono un apaiyai cuscan un huatiroquin, —ishon man yoiái. Ai. Nannori. Ahuara sharafoti non huatirofiacon ahuara futsacai ua amatiroma nan un acai fusti un atiro. Uncaí ahuara futsahuunoashu aton oinmati un ishquia. <sup>13</sup> Man futsan raca yoiquin isca huaa, —Diosin nocon shaqui onihuashoan non tushu pinon. Ascashon tushuri onihua nocon shaqui muran non huanon, —ishon yoimisifo. Iconfiashu non piyanhuanshuni itiroma. Chipo Diosin tushu yafi nocon shaquiri cuyoi. Icon Diosin noco onihuani non afu rafupacunon. Diosicai nocon ahuinma fu non inon ishoncái noco onihuani. Ainfofori aton funuma fu inon ishoncái ato onihuani. Ascatama Diosin nocon caya noco onihuashoni non afu rafupacunon.

<sup>14</sup> Nocon Ifo Jesús man nafiacun Upan Diosin ahun curushhuunshon funimani. Nanscarifi aquin ahun curushhuunshon nocori funimashquin. <sup>15</sup> ¿Man tapiamamun non

Cristo icoinra huashu non ahuun yoracoin? Non Jesús ahuun yora mumacoin cuscara. Ascano non ainfo furoma chotashu Cristocai afin aca shinantsan non huamatiro. Asca huapayamacahuun. <sup>16</sup> Diospan tsain cunuquin isca huani, —Nocofunu ainfo fu icaino nan rafu yora fusti cuscara coin, —ishon cununi. ¿Man tapiamamun man ainfo furoma fu icaino afu yora fusti cuscara itiro? Fusti cuscara coin. <sup>17</sup> Ascafian tsoan nocon Ifo fu rafuaino nan rafu fusti cuscara itiro. Diosin Yoshin Shara ahuun shinanpan ahuun nomuran nanumashquin.

<sup>18</sup> Ascacufin maton ahuinma iyamaraiyainfofori maton funuma fu ipaiyamacahuun. Ascaria shinanyamacahuun. Man ascapaiyamai ichorisatacahuun asca huashquima. Maton ahuinma fu iyamarai maton funuma fu man icun nan chacapanfin. Maton nomuran fucashuni huafain matori omitsiscamatiro. Nan chaca futsafocai un yoiai cuscarama. Man ascashufin maton yora mumacoin caya yafi maton nomuran maficoin man chaca huamuaquin.

<sup>19</sup> ¿Man tapiamamun Diospan Yoshin Shara no fu ica? Nocon caya fi ahuun pushu cuscara coinquin. Nanno ica. Upa Diosin ahuun Yoshin Shara matoqui nichini. Nan pushu ifofin fusticoin. Nanscarifiai Diospan Yoshin Shara fusti maton Ifo. Mafincoinciai man ifohuamutiro. Manfin ahuunafoquin. <sup>20</sup> Jesucristo mato nashoni maton Ifo iishquin. Ascan manfin ahuunafoquin. Ascano Diosifin nocon Ifoquin. Ascashu nocon caya ahuunari. Nan mato yoiai cuscan acahuun. Maton cayahuunshon Diosin shara huapayamacahuun. Man ascaiton futsafoan oincaquifin, —Diosin shararan, —huatirofoquin.

## 7

### *Ahuuscashumainfunu fu ahuin isharatirofoquin*

<sup>1-2</sup> Man ua cunu fumaita ua yocashquin. Ascacun man ua yoca cuscan nanfohuunoa un mato yoisharapai man tapinon. Nocofunun ainfo fiyamashu shara ifiatiro chaicushosi ainfo fu ipaiquin chaca huatiro. Ascashufin nan nocofunuti ahuinyatiroquin. Ainfofori funuyatirofo. Nanscafin sharaquin.

<sup>3-4</sup> Nocofunun ainfo fiajinocai afanan ahuun caya ahuuna fustima. Ahuun caya ahuinnari itiro. Nanscarifiaiyainfon fununfiajinocai afanan ahuun caya ahuuna fustima. Ahuun caya fununari itiro. Ascataricai ahuinin funu afu ipaiyaitocai funu ranintiroma. Nanscarifiai funu afu ipaiyaitocai ahuinin ranintiroma. <sup>5</sup> Raninonanyamacahuun. Ascashon man chipo shinanquin isca huatiro, —Natian non Upa Dios cufiyonon. Shafa ranan non iyoimacai. Chipo afanan non inon, —icashu man unuyotiro. Ascafashon chai manariyamacahuun. Man ascaraino Satanás mato chaca huamatiroquin. Funu ainfo futsa fu ipaitiro. Nanscarifiai ahuin nocofunu futsa fu ipaiquin chaca huatiroquin.

<sup>6</sup> Un mato, —Fianancahuun, —ishon un mato yoima. Ascan man fiananpaifin man fianantiroquin. <sup>7</sup> Ascatan un shinanquin isca huua. Nantifi nocofunufo ua cuscara ahuionmafo shara icuana. Diosihuunoashu un ahuionma isharatiro. Un shinanchacaima. Un unimatiro. Ascafia Diosin ua ima cuscacai atifi ato imama. Futsafoan Diosihuunshon ahuin fitiro. Futsafoi ahuionmafiaflashu nan un icai cuscari unimatirofo. Non yopai cuscafin Diosin tapiaquin. Ascashon noco inantiro.

<sup>8</sup> Ascatan natian un funuomafo non ahuionmafo yafi ainfofoan aton funufo atonmaqui namisifohuunoa un mato ahuara futsa yoipai man tapinon. Ua cuscara icafo shara icuana. Nocofunun afanan ainfo fiyamainocaiyainfoanri afanan funu fiyamashu shara icuana. <sup>9</sup> Ascafia man fasi fiananpaimancaiyainfoanri nocofunu fipai fianasharacahuun. Man ahuionmafiaflashu fasi ainfo fu man ipai ascaracai sharama. Man ahuinya shara icuana. Nanscarifiai man funuomafiaflashu fasi nocofunu fu ipai ascaracai sharama. Ascacufin man funuya shara icuanaquin.

<sup>10-11</sup> Ascan natian un funuyafohuunoa yafi ahuinyafori un mato yoisharapai. Ufi un mato yonoima. Nocon Ifohuunshon un mato yonoi isca huaquin, —Ainfoancai funu unutiroma. Fununricai ahuin unutiroma. Ascashon funun unuano afanan futsa fu fianantiroma. Afanan funucoin aqui nasoano shara itiroran, —ishon un mato yoi.

<sup>12</sup> Ascacun natian un mato yoisharapai. Nan na tsain un mato yoiaifocai Diosin ua yonoyamafiacun unfi cayacaficoin shinanfain un mato yoi. Asca man Jesús icoinra huaa futsacai maton ahuinin Jesús Ifo huataiyamafiahocai funu potapaima. Ascatan rahuinmafain funu noi. Nanscarifiai fununricai ahuin potatiroma. <sup>13</sup> Nanscarifiai yainfoan Jesús Ifo huafiahocai funun Ifo huayamafiacun ahuin potapaiyamainocaiyainfoanri funu potatiroma.

<sup>14</sup> Nocofunun icoinra huayamafiano ahuinin icoinra huashon ahuinhuunshon Diosin nan nocofunu shara huamatiro. Ascashon funun ahuin oinquiraca ahuunshon Jesús icoinra huatiro. Nanscarifiai yainfoan icoinra huayamafiano funun icoinra huashon funuhuunshori Diosin nan ainfo shara huamatiro. Ahuinin funu oinquiraca a ahuunshon Jesús icoinra huamatiro. Ascan nan rafu ununainno aton facufoancai Jesús Ifo huaima. Ascafia nan rafu ununanyamaino aton facufoanri icoinra huatiro Diospan facu sharafo iishcaquin.

<sup>15</sup> Ascashon nocofunun Jesús icoinra huayamacun ahuinin icoinra huashon unupaicoquin unutiro. Capaicoinyaiton ato nitu huayamacahuun. Catanon. Man nitu huaino fucashni tapitiroquin. Nanscarifiai yainfoan Jesús icoinra huayamacun funun icoinra huashon unupaicoquin unutiro. Capaicoiainton nitu huayamacahuun. Catanon. Man nitu huaino fucashni tapitiro. Diosin noco catonni nocon nomuran ahuashtaton fucash huatamarocon nocon ointi noco imasharacointiro. <sup>16</sup> Ainfoan Jesús icoinra huacun ahuun funu man Jesushuunoa yoiaitocai tapitiroma fununmain icoinra huaicai. Nanscarifiai funun Jesús icoinra huacun ahuun ahuinin man Jesushuunoa yoiaitocai tapitiroma ahuininmain icoinra huaicai. Ascan mato potapaiyaiton inonquin ishon. Shinanchacayamacahuun.

<sup>17</sup> Nan nocon Ifo Jesús mato yononi cuscan nanscasi acahuun. Jesús mato yonoaitian Upa Diosin mato catonni. Ascantari nan icoinra huafoti Dios fu tsainti pushurasi anoaflo yafi maifoti nanscaracoin un ato yononi. <sup>18</sup> Isca huaquin. Israelifo Diosin ato yononi cuscacoin aton furonanfacufo foshqui rupa shatupacunifo. Ascatan furonanfacu yosishon Jesús Ifo huatan chipo shinanquin isca huaraca, —Natian un Jesús Ifo huaa. Nan fusti un yopai uhuun chaca ua soashonano un ahuun yora iishquin. ¡Ohua! Un foshqui rupa shatumuyama shara icuanaran, —ishon shinanyamacahuun. Asca mia foshqui rupa shatufiani nanscanonquin. Shinanchacayamacahuun. Ascatan man Jesús Ifo huaa man foshqui rupa shatumisima. Ascashon shinanquin isca huayamacahuun, —Un Israelifo aton shunifoan ato yononi cuscan un yopai. Un foshqui rupa shatumutiro Moisés yononi cuscan un airan, —ishon anori shinanyamacahuun. Mancaí ascara yopaima.

<sup>19</sup> Man foshqui rupa shatumisi iyamarai man shatumisima nanscara rafufinquin. Man ascaitocai mato shara huamatiroma. Man asca huayamaricai mato chaca huamatiroma. Nan Israelifo imisi cuscacai man yopaima. Ascaquimarocon Diosin mato yononi cuscan aashu nan fusti man yopacoin.

<sup>20</sup> Nan Diosin mato catoaintian man ini cuscan nanscasicoin acahuun. <sup>21</sup> Diosin mato catonnitian man futsan ahuun oinmati icashu shinanchacayamacahuun. Ascafiaitan maton ifoan mato nichipaiyaino amaquinoashu fotacahuun afanan tsoan oinmati ishquima. <sup>22</sup> Man ratoran futsa Diosin mato catoaintian futsafoan aton oinmati man iquin. Ascafiaflashucai afanan Satanás maton ifo itiroma mato chaca huamashquin. Atiri mato catoaintian tsoan oinmaticai man imisima. Ascanfiashu natianfin man Jesús ahuun oinmati.

<sup>23</sup> Upa Diosin Furun Jesucristo nichini noco nashonon noco Ifo iishquin. Ascashufin manfin ahuunaquin. Nan fusti maton Ifocoin. Nan fustiton mato cayacafi shinamatiro. Ascacun futsafoan oinmati iyamacahuun mato yonononfoma. Jesús fusti tanacahuun maton Ifo inon. <sup>24</sup> Ascatan uhuun yoramishtichin Diosin mato catoanno ahuara man yonopaoni cuscan nanscasi acahuun. Upa Diosin mato futan aashquiquin.

<sup>25</sup> Ascacun natian afanan ahuara futsan un mato yoipai. Ainfofu nocofunu fu imisifomahuunoa un mato yoi. Un mato yoiai cuscan nocon Ifoan ua yonoyamafiacun uhuun ramapaicain ua yononi cuscan un amisi. Ascashon un mato yoiai cuscan man icoinra huatiro. <sup>26</sup> Natian ahuara ahuuscaraqui noco omitsiscamai. Nanscacun man ahuionmafo ica shara icuana. Icoinra huamafoan noco omitsiscamatirofo. <sup>27</sup> Ascacun ahuinyacashon mato ahuin unuyamacahuun. Ascafia catan ahuionmashon ainfo funayamacahuun fipaiquin. Nanscanon. <sup>28</sup> Ascafia caiyainfo finquin man chaca huaima. Ainfo fori funuya iyamafiamisishacaquin funuyainocai ahua chaca huaima. Ascafia man funuyafo yafi ahuinyafoan manfin fucashni tapiquin. Nan funuomafo yafi ahuionmafo ica finonmafain man ahuara futsa finoin. Nanscacun un mato yoisharapai man fucashni tapinonma.

<sup>29</sup> Ascatari uhuun yoramishtichin un mato isca huaquin yoipai. Nocon Ifo Jesús otichaima. Nocon Ifo yonoshoque non chai huaima. Nanscacun non nocon Ifo yonoshosharacoinpai. Ascacun maton ahuin shinanfiaquin Jesuscairocon fasi finonmafain shinancahuun. Nocon Ifo yonoshosharacahuun. <sup>30</sup> Ascatari ahuara futsafoan mato omitsiscamafaiton nocon Ifo yonoshoque unuyamacahuun. Omitsiscacaquima nanscasi unimacai nocon Ifo yonoshosharacahuun. Ahuara yopayamafiacaque nocon Ifo cachiquiri huayamacahuun. Yonoshosharacahuun. <sup>31</sup> Nocon Ifo Jesús otichaima. Ascacun nuno mai anoshon yonosharafafaincahuun man yopai cuscan fiishcaquin. Ascashon mafo fustisi shinancaquima. Nocon Ifocairocon finonmafain shinancahuun. Nantifi mai anoaflo icai cuscan cuyoshquin. Nanscacufin Jesús shinanquin non finatiroquin noco yonopaiyai cuscan ashquin. <sup>32-35</sup> Un mato anori yoi maton nomuran ahuaton fucash huanonma. Un mato ahuinyacain funuyayamacahuun huaima. Un mato cayacafi imapai nocon Ifo fusti finacoinquin man shinanfafainon. Ahuaton maton nomuran fucash huanonma.

Un mato yoisharapai. Un mato yoi maton nomuran omitsiscamashquimaquian. Ascaquimarocon un mato shara huapai Dios fusti man yonoshosharanon. Man ahuara futsa shinanonma. Ascashon un mato yoia cuscan nocofunun ahuionmaton ahuun Ifo unimamapaishquin. Ascan nocofunun ahuinyashon ahuinri unimamapai. Nan ahuinin ahuara yopai cuscan huafain fununri nannoricoin shinantiro. Nanscarifi aquin ahuun Ifo fustitocai shinantiroma. Ascashofin ahuun Ifo unimamapaifain nantianri ahuinri unimamapai. Ascacun ainfo funuomatton ahuun Ifo Jesús fusti yonoshosharapai. Ahua futsacai shinainma. Ahuun Ifo fusti tanashquin. Diosin imapaiyai cuscan huafain nan fusti shinainquin. Ascan ainfon funuyashon ahuun funuri unimamapaiquin ahuara futsafori shinantiro ahuun Ifo fustisima.

<sup>36</sup> Ascatan nocofunun ainfo fu iyamafiamisishaquin fasi afu ipaiquin. Ascashu afu fianantiro. Ascaquicai chaca huacanima. <sup>37</sup> Ascafia nocofunu futsan shinanquin isca huai, —Uhuun Ifo Jesús un yonoshosharapaiyai cuscan un ainfo fishon un huatiroma. Nanscacucai un ainfon fiimaran, —ishon anori shinanshara. Tsoancai curushcái ascabuu huama. Afinco nannori shinansharashu ica. <sup>38</sup> Ascan nan ainfo tsoacai afu iyomisima nan nocofunu finquin shara huaa. Asca aquin nan ainfo fucai tsoa afu iyomisima nocofunu fiananyamafi nanscaquirocofin fasi shara huaquin ahuun Ifo Jesús yonoshoque finacointiro.

<sup>39</sup> Ascatan tsain futsari un mato yoi. Ahuun funu naamanocaiyainfoan funu unutiroma futsa fu fiananshquin. Ascashu funu naano futsa fu fuchinanpai afu

fianantiro. Ascafiacun ainfoan Jesús Ifo huashon nocofunun a Ifo huacuma fitiroma. <sup>40</sup> Ascatari un shinanquin isca huaa. Funu naano afanan futsa fiyamano nanscarafin fasi sharacoin itiro. Un shinain cuscan huafain Diosin Yoshin Sharapan a nannoricoin mato yoi.

## 8

*Diosicoinma onihuacashon cufipaonifo. Nanscaraf ointsaiyamarai ahuara futsa cuscara ramihuacashon tushu inanpaonifo. Nanfihuunoa Pablon ato yosini*

<sup>1</sup> Ascatari tsain futsa mato yoinon. Nan nocofunufoan Diosimafiacun yora ointsaiyamarai ahuara futsa cuscara ramihuacashon, —Diosiran, —icashon tushu inanfo. Ascashon piyamaiton oinquín afanan nan tushu ficashon inanmitsamisifo. Ascacun natian un mato yosi nan tushu inanmitsafo non pitiroshima iyamarai non pitiroquin. —Nantifi man non tapiaran, —ishon man yoimisi. Ascan nan man icoinra huaa futsafoan man yoiquin isca huamisi, —Unfi tapiaquin. Nan un shinain cuscafin un cayacafi shinainquin, —ishon shinancani. Ascaraf shinancanifin curanfiapaimisi itirofoquin. Ascaraf non shinancucai noco imasharatiroma. Ascaquimarocon non yorafohuun noishonfin non ato Jesús tanamasharacointiroquin a cuscara shara inonfo.

<sup>2</sup> Ascan tsoan shinanquin isca huai, —Unfi ahuamamishti tapisharaquin, —ishon anori yoifiaquicai atirifi ahua tapiataima. <sup>3</sup> Asca tsoan Dios noicoincunfin nanscarifi aquin Diosin ahuunoa yoitiroquin isca huaquin, —Un na onancoian, Nanfin uhuun yoraquin, —ishon yoitiro.

<sup>4</sup> Ascashofin non Dios noicoiainton noco tapimatiro nan ahuara futsa ramihuacashon tushu inanfo non pitromainquin. Ascacun man non tapia ahuara futsan ramihuafocai ahuama. Acaí Diosincoinma. Nan aafin ramihuaoancai ahua tapiama. Acaí ointiya iyamacain ahuun maponricai ahua shinantiroma. Nanscarafocai Dios itiroma. Diosfin nan fustiquin. <sup>5</sup> Jesús icoinra huamafoan yoiquin isca huamisifo, —Dios ichaparasi. Nai muranno yafi mai ano Dios ichaparan, —ishon yoimisifo. <sup>6</sup> Anori yoifiamisifocai anorima. Man non tapia nocon Upa Diosifin fustiquin. Futsa yamai. Nantonfin nantifi onihuani. Nocofori onihuani non ahuun facufo inon. Ascashu non Ifo fustiya. Jesucristo fusti. Futsa yamai. Ahuunshon nantifi onihuani. Ahuunoashu non nitiro.

<sup>7</sup> Nan un mato yoiai cuscan atirifi yorafoan tapiafoma. Shinanfofin nan ahuarafo futsa ramihuao niaquin. Niamaficun nannori shinanfo. Nan facushtashon nicainifoannafo nan ahuara futsa ramihuao nicun. Ascatai isca huaquin shinanfo, —Nan tushu ahuara futsafo ramihuashon inanfo. Ascacun un na tushu piatoraca un Diosicochaca huairan, —ishon shinantirofo. Ascatai pishon, —Un chaca huaran, —ishon afi aton nomuran shinanchacatirofo. <sup>8</sup> Anori shinanfiafonocai non ahuara piatocai Diosimaqui noco imatiroma. Nan tushu ahuara futsafo ramihuacashon inanfo non piamatocai noco imasharatiroma. Ascatai non piatocai noco chaca huamatiroma. Nanscara rafu.

<sup>9-12</sup> Ascafia oinfain. Man shinanquiraca isca huua, —Unfin nantifi pitiroquin. Ahuara ramihuacashon Diosicoinma tushu inanpaiafo nanfori un pitiroquin. Un piquicai un Dios chaca huaima, —ishon man shinan. Man anori shinanfiaino Jesús icoinra huua futsafoan anori tapiataima. Nan tushu min piaiton oincaquin mihuunri caocani. —Nantori Jesús icoinra huafashion ahuara ramihuacashon tushu inanfo pitiro. Asca urifi un pitiroquin, —ishon shinantiro. Asca man tapifiashon man piaiton oinquín arifi man acaí cuscan huaquin pishon nanscarifi huatiro. Ascan man pishonfin chipo ahuun nomuran shinantiro isca huaquin, —¡Ohua! Na tushu mun pishon uhuun Ifo Jesús chaca huaran, —ishon shinantiro. Ascashofin ahuun nomuran afin shinanchacatiroquin. Man acaiton oinquín arifi aca. Ascacufin matohuun nuuaquin. Man man tapia ahuara ramihuacashon tushu inanfo nan pishocai man chaca huama.

Ascano futsafoancai tapiafoma. Afoan shinanfin nan tushu pishon man chaca huatiroquin. Jesusri ahuunoashu nafianicun. Ascan matohunshon shinanchacaquin. Man piamaainocai arifi picuanama. Shinanchacacuanama. Man man tapian piquin man chaca huai shafain futsa arifi shinantiro pishon man ahuun noicoianma shinantsain. Ascan man na tushu piyama shara icuana. Pishon man futsa chaca huamatana. Man asca huaquin Cristorifi man chaca huamai. <sup>13</sup> Ascacufin un tushu futsa piquiraca un Jesús tanamisi futsa un chaca huamatiro uncai na cuscara tushu afanan pinacama futsa chaca huamashquima. Un aca cuscan huaquin un tsoa chaca huamashquima. Un futan Jesús tana futsa un ahuun noiquivin un ahuara chacasha shinanmapaima.

## 9

*Jesús fu rafumisifoan atirofo cuscan Pablonun ato yosini*

<sup>1</sup> Dios fustifin uhuun Ifoquin. Nan ua yonopaiyai cuscan un atiro. Tsoanricai aton shinanpan ua yonotrioma. Jesús ua catonni un afu rafumisi inon. Nocon Ifo Jesús oincoinfain nan ua yonoa cuscan un mato yoimisi man Jesucristo icoingra huanon. Ascacun nocon Ifo yonoshonahuunshon man icoingra huua.

<sup>2-3</sup> Futsafoan shinanquiraca isca huamisifo,—Diosincia Pablo nichinima Jesushuunshon noco tapimanon,—ishon anori raca shinanfo. Anori futsafoan shinanfiamisicuncái man anori shinanyamapainon. Uhuunshon man nocon Ifo icoingra huua. Ascacun nantifiton tapitirofo Jesús ua catonni un afu rafunon.

<sup>4</sup> Uhuun yoramishtichin shinancapon. Unrifi Jesús fu rafumisi. Ascan Jesús fu rafumisi futsafoanri amisifo cuscan urifiasca huapaiquivin un acuanaquin. Afoan Jesús icoingra huua futsafo ato Jesushuunoa yosiaiton nicacaquin cashman ato pimamisifo.

<sup>5</sup> Pedro non nocon Ifo Jesús ahuun chipocufo non atirifi Jesús fu rafumisi futsafoanri ainfo Jesús icoingra huafu fu fianancashon Jesushuunoa ato yoifoanfafainaifono aton ahuinfofori atofu foanscamisifo. ¿Nanfoan ainfo Jesús icoingra huafu fu fianan cuscariai urifi ainfo Jesús icoingra huua fu un finantiromamun unfu cahuacacainon? <sup>6</sup> ¿Ascan ahuuscain Bernabé futan non mato yosifain nofin yonocain ahuun rafanan non yopai cuscan non fia? Ascan atirifoan mato yosiquicai ahua yono futsa acanima. Mato yosiaifoan man yopai cuscan ato inancoian. Ascafiaiun non yopai cuscacai man noco cashman inanmisima. Nan non ahuara yopaitihuunshon non yonomisi fiishquin.

<sup>7</sup> Un iscara mato tapimapai. Ranushumua futsacai cashman yonomisima. Ahuun caifo cushucufin nan yorafoan aton pushurasihuunoa pui niaifoan ato inanmisiquin. Nanscarifi aqui mau fanamisiton ahuun mau foisharanon afin ahuun yono pitiroquin. Chashoanfo cushionisitori ahuun chashoanfoan shoma ayatiro.

<sup>8</sup> Un mato yoai cuscacai nocofunufoan aton tsain fustisima. Nannorifi Diospan tsain cununiquin. <sup>9-10</sup> Moisés Diospan tsain cunuquin isca huani,—Moipan tarati huayacuquin mato yonosharashotiro. Shuqui roro cuscara machi acuaino atiri ahuun chacafo fuutan potaino shuqui roro cuscara ahuun shaca nanno manitiro. Ascaiton maton moi runushuyamacahuun nanno tarati huayacuquin acafiri pinon,—ishon cununiquin. ¿Diospan nannori yoaino moihiunoa fusti yoinimun? Ma. Nan yonoshonaifohuunoa yoifain nocohuunoari yoini. Ratoranfoan mau chituquin shinantiro isca huaquin,—Un chitutan un yopai cuscan fitiroran,—ishon shinantiro.

<sup>11</sup> Nanscarifiai non mato Jesushuunoa cashman tapimafafainaiton copiquiri non yopai cuscan man noco cashman inantiroquin. <sup>12</sup> Futsafoan Jesushuunoa mato yosiaiton nicaquin nan yopaifo cuscan man ato inanmisi. Ascacun un mato tau huaquin yosimisi. Nanscacufin nococaifin finonmafain iconquin man noco inantiroquin. Man noco inantirofiacuncái non mato ahua yocamisima. Ahuaraoan noco ahuuscara huafialino non tunucoinmisi man Jesushuunoa nicasharanon. Un mato yosiaiun rafanan un pui fiaitonraca ua afanan nicapaicanimaquin. <sup>13</sup> ¿Man tapiamamun nan Dios fu

tsainti pushu muran tushu fuafu nan muranno yonomisifoan nan tushu cashman pimisifo? <sup>14</sup> Nanscarifi aqui Diosin yononi isca huaquin, —Tsoan uhuun tsain shara futsafo yosiaiton nicaquin nan nicafoan ato pimatiroran, —ishon Diosin yononi.

<sup>15</sup> Diosin ua yononi cuscan urifi mato ahuara yocapaiquin un mato yocacuanaquin. Nannori Diosin yononifiacun un mato ahuashta yocamisima. Mato Diosin tsain yoifafainfiaquin, —Un ato cunu fomai ua pui inanonforan, —ishoncay un shinamisima. Ascarifi atacai tsoan yoiquin isca huatiroma, —Pablonun aton pui fianpaiquin ato Jesucristohuunoa yoimisiran, —ishoncay tsoan uhuunoa anori yoitiroma. Ascan tsoan uhuunoa anori yoiaino un naafin shara icuanaquin. Nanscacufin tsoanshtacai uhuunoa anori yoinacama.

<sup>16</sup> —Un mato ahua yocatama Jesushuunoa yoimisishaqui un sharaquin, —ishoncay un yoitiroma. Diosin ua catoncun ua yononi un Jesushuunoa yoifafainon. Asca un Jesushuunoa yoifafainyamaiton Diosin ua onaintimatiro. <sup>17</sup> Un yoiquin isca huafiacun, —Upa Diosin, min Furunhuunoa un yoipairan, —ishon un yoicun Upa Diosin ua inantiroquin. Ascafiai anorima. Diosifin afi ua catonquin tauhuashon ua yononi Jesushuunoa un yoinon. Nanscacufin nan ua yononi cuscan un aicai.

<sup>18</sup> ¿Asca un Diosin tsain yoimisishomun ahua un fiiquin? Ato yoishocai un ahua ato yocamisima. Ascashoricai un ato yoimisima isca huaquin, —Diosin mato yonocun Jesushuunoa un mato yoifafainaiton un yopai cuscan ua inanforan, —ishoncay un yoimisima. Nonri yoipaiquin un yoisharacuana. Ascafiai un anori yoipaima. Jesushuunoa yoiquin un tsoa ahua yocamisimashaquin un fasi unimai. Un Diosin tsain yoiquin ahua un mato yocashma un unimai. Ahuun rafananri Diosin fasi uqui unimacoin. Nanscarifi aqui ua unimamafafaini.

<sup>19</sup> Uncay tsoa futsan oinmatima. Jesús fustifin uhuun Ifoquin. Uhuun Ifo futsa yamai. Ascafia nantifi yorafo un ato shara huapai ato Jesús icoinra huamashquin. Nanscacufin un nantifi yorafoan aton oinmati cuscaraquin. <sup>20</sup> Uhuun caifofo Israelifo ya un icashu nan icafo cuscan unrifi un ato cuscara ica afoan Jesús icoinra huanonfo. Nocon shuni Moisés nocon caifo yonopaoni cuscacai natian afanan yonotiromafia Moisés yonopaoni cuscan nicamisifo fu icashuri urifi ato futan Moisés yononi cuscain ato Jesús icoinra huamashquin.

<sup>21</sup> Nanscarifiai nan Moisés yononi cuscan tanafoma fu un atofu icaino un ato cuscararifi un Moisés yononi cuscan aimia ato Jesús icoinra huamashquin. Un nanscafiamisicun Criston ua yononi cuscain un nicasharafafaini. Nan festicai un cachiquiri huatiroma. <sup>22</sup> Jesús icoinra huafu atirifi Jesús yononi cuscacai tsoan tapisharataicanima. —Non Jesús tanasharaino non na cuscarafo atiromaran, —ishon shinancani. Ascafia cuai Jesús nocon anori yonoama. Un atofu icashu un ato cuscarari itiro. Jesús nocon tapimana cuscan paratama un ato tapimashquin. Ascano ratoran futsafo fu un icashu un aton cuscarari itiro. Nanscashon un ratoran futsafoan uhuunshon Jesús icoinra huashu nipasharacani.

<sup>23</sup> Un asca huaquinfin un ato Jesucristohuunoa tapimasharashquinca. Icoinra huaifono urifi un atofu finacai unimacointiro.

<sup>24-25</sup> Man man tapiari nan pushcoaifo nannorasi ichofiacaque fustiton shonontiro. Ascaifoanfin yorahuanrasiton ato oiainfono pushcohuaifo ichocani. Shonononanpaicani. Nan shonoanfin aqui unimaqui ahuara shara futsa niaifoan inanmisi. Ascacufin nantifi curushcay ichocaniquin futsafo shononpaicani. Tsoa ichoataima taui afi ranan ichoyofafainafo fuyahuashcaquin sumu ichosharashcaquin atsanashcaquima. Nanscarifi acaquin nocon Ifo Jesús curushcay yonoshosharacahuun. Ahuara chacafo huayamafain Diosin mato yonoama cuscan ayamacahuun Jesús tanaquin fuyahuashcaquin man aqui nocoaitian mato ahuara shara inanshquiquin.

Ascatari nan ichoaifoan niaifoan ato inan cuscan cuyotiro. Asca Diosin noco ahuara inancai cuyopacunacama. <sup>26</sup> Ascacuncai un Jesús yonoshoni un cuparamuima. Un ipaitsi cashman yonoshonima. Pushcohuifo ichocani shonononanpaicani cayacaficoi ichotirofo. Nanscarifiai un cayacafí ica. Uhuun Ifoan ua yonoa cuscacoiai aquí nocosharashquin. <sup>27</sup> Ufin un apaiyai cuscacai un aama. Uhuun Ifoan ua amapaiyai cuscan un aquí. Un tunupaquiaquin un tunuima Jesús tanasharashquin. Un atsanafiaquin un tunuima Jesushuunoa yoifafainquin. Jesús fustitofin ua yonotiroquin. Nanscacufin un futsafo yoifafainicai Jesús Ifo huashon yonosharashononfo. Ascafashion Diosin ua yonoa cuscan un ayamai ufiri un funotiro. Un afanan Dios yonoshotrioma. Diosin afanan ua yonomatiroma. Un funopaima. Nanscacufin un apaiyai cuscan un aimá. Uhuun Ifoan ua amapaiyai cuscan nan fustisi un aquí.

## 10

### *Israelifoan Dios chaca huapaoni cuscan ayamacahuun*

<sup>1</sup> Uhuun yoramishtichin tapicahuun. Nocon shunifo Egipto anoashu fonifo. Ascatari Dios atoqui nai coinmahuan cuyama shara fotomapacufoanni tapinonfo atofu ica. Nantifi nocon caifo Israelifo nai coin cai cuscan acho fonifo. Diosin nan coinhuunshon ato iyopaiyaiquiri ato iyoni. Ian mahuanun ahuun anu Oshin ano nocotoshinfo. Ascashori nantifi nocon caifo Israelifo Diosin ato ian mahuan nushmancayan rafu ocuma rafu unufiano nan nushmancayan mai muto huatanaino ahuun pocufainifo. <sup>2</sup> Moisés ato rucun tanashoni. Nantifi nocon caifo Israelifo Moisés acho fonifo. Nan Moisés icoínra huacashon nantiffain tanacoinnifo. Nantianri tauí Moisés aton niaifoanno nantiffain tanacoinnifo.

<sup>3-4</sup> Ascatari Diosin nai muranshon ato tushu potashoni nantiffain pinonfo. Nan noshori unu yamacoinyaino Moisés toquirinhuan ahuun poquitinin tsacaino unu tsosia sharacoin tohuashu furani nantiffain ayanonfo. Ascano Cristo ahuun Yoshin Shara atofu caino ahuunshon ayanifo. <sup>5</sup> Asca huafiainfoanno Upa Diosicai atifiquicai unimanima. Ahuun tsain nicapaiyamaifoan. Ascashufin tsoan istaipama foan-fafaincanisi nicayosmacani nai cuyonifoquin. Nan tsoan istaipama ato mai huaquin futsanifo. Diosin ato namaquin cuyoano.

<sup>6</sup> Ascashofin nanfoan chaca fuchipaipaonifoquin. Ascacufin nanfohuunoa Diosin Yoshin Sharapan noco tapimaniquin chacafo fuchipaipaonifo cuscan norifi non ascaran fuchipainonma inifo cuscan omitsiscashquima. <sup>7</sup> Afoan chaca huapaoni cuscan huayamacahuun. Ascashon nanfoanri ahuara futsan ramihuacashon, —Nocon diosiran, —ishon yoipaonifo. Asca huacashon fuusi huashofain aquí pifain ayafain icashon ahuara futsan ramihuadoan ointaifi chaca huacaquin pauncain mononifo.

<sup>8</sup> Ascan oinfain. Ato cuscara iyamacahuun. Atirifi aton ahuinma fu inifo. Nanscarifiaiyainfofori aton funumafo fu inifo. Ascaifoan oinquin Diosin veintitres mil ato namariscatani. Nan shafatan fusti ato namariscatani. <sup>9</sup> Aton cuscara chaca huayamacahuun. —Diosincai nocoqui funa sinatiroma. Ascan un chaca huafiacuai ua onaintimaimaran, —ishon anori shinanyamacahuun. Nocon shunifoan Dios chaca huariainfoan Diosin afanan tunuyamacaiquin ato onaintimani. Ascashori rono paupafo ato muran nichini nanfoan ato nasano atirifi nani. Ascacun ¡Oinfain! Man Dios chaca huariaiton afanan tunuyamacaiquin matori onaintimatiyo. <sup>10</sup> Ascashon nanfoanri tsain chipuriaifoan Diosin nai oinmatinin atirifi ato namani. Ascacun oinfain marifi tsain chipuyamacahuun matori onaintimanonma.

<sup>11</sup> Nan nocon shuni Israelifoan chaca huapaonifo cuscan noco cunushoni norifi non aton cuscara inonma omitsiscashquima. Natianri nocon Ifo Jesús oti chaima. Ascacun non itisharanoncahuun nocon Ifo nocoaitian non aton cuscara chaca inonma.

<sup>12</sup> Asca tsoan shinanquin isca huai, —Uncai aton cuscara chaca huatiroma. Unfi cayacafi fusti itiroquin, —ishon anori shinainno oinfain. Marifi man Jesús tanasharaya-maino aton cuscara chaca man itiroquin. <sup>13</sup> Satanás mato chaca huamapaiyai cuscacai marus fusti man̄ mumisima. Man muai cuscari nantifi icoinra huafoan man̄ mumisi. Ascafiacon Diosin mato yoimisi cuscan man̄ icoinra huatiro. Matori cushusharatiro man chaca huanonma. Satanás mato chaca huamapaiyai cuscan Dioshuunshon mato atima huatiro man chaca huanonma. Ascashori Diosin mato tapimai ahuuscashomain man chaca huanonma.

<sup>14</sup> Ascacufn uhuun yoramishtichin ahuara futsa ramihuacashon, —Noco diosiran, —icashon icoinra huaifono atomaquinoashu pashcafaintacahuun. <sup>15</sup> Man shinansharatiromainquin un mato yoiai cuscan shinancahuun. Un mato iconma yoiamaraquin iconcoin un mato yoicai. <sup>16</sup> Man man̄ tapia non Diospan tsain nicashquin ichananmisitian nan non ayai cuscan non shinamisi Jesús noco nashonicun. Nan cucho fustiquinoa non ayapacumisi. Nantifiton ayaquin non shinantiro Jesús noco nashocain ahuun imi foni non afu nipanon.

Ascacun non yoitiro isca huaquin, —¡Aicho! Upa Diosin, min Furunmun noco nashoni non afu min facufo inonran, —ishon non yoitiro. Nanscarifi aqui misi torupacushon nofi ranan non uhuapamashta inanonanpacumisi Jesucristo ahuun caya nocohuunshon mastanifo non afu rafupacunaca shinanshquin. <sup>17</sup> Misi fusti torupacushon nantifiton pimisifo cuscan. Nanscarifiai Cristo fustifiano nantifi icoinra huafo non ahuun yora fusti cuscara ishquin.

<sup>18</sup> Ascashon nocon caifo Israelifohuunoa shinancahuun. Nanfoan aton inafo rutucashon Dios inanmisifo aton chaca soapaiquin. Aton ichananti pushu murannoa yonoshomisifoan nan nami pimisifo. Asca huacanifin nan fusti shinantsa acaniquin. Piyanan Dios cufimisifo. <sup>19</sup> Ascacun un mato yoi nan ahuara futsa ramihuafocai nancaí ahuama. ¿Ascatari ahuara futsa ramihuacashon tushu inanfomun ato shara huamatiro? <sup>20</sup> Ma. Anorima. Jesús icoinra huamafoan Diosicoin inantamarocon ahuara futsa ramihuacashon tushu inanpaicaquifin yoshin chaca inanpaicaniquin. Nanscacuacai un mato yoshin chaca ya imapaima.

<sup>21</sup> Man nocon Ifo Jesús fu rafupaicain a yoshin chacafo fu man rafutiroma. Ascashuri nan rafu man̄ ositiroma. Man Jesús icoinra huafu fu ichanancashon man ato futan ayafain Jesús noco nashoni cuscan shinanshquin. Man asca huatacái nantianri aa Jesús icoinra huamafo fu man̄ ichanantiroma nan yoshin chacafo shinanshquinma. <sup>22</sup> Nocon Ifo Jesús fu rafupaifiatan non yoshin chaca fu rafupai non asca huaquinfin nocon Ifo Jesús non sinamatiroquin. Non asca huaiton noco onaintimatiro. ¿Asca nonmun Jesús curushcai finontiromun noco onaintimanonma? Ma. Anorima. Jesús noco onaintimaitian tsoan noco numatiroma.

### *Jesús icoinra huafu non noicoianshu nan fustiton yona cuscan non atiro*

<sup>23</sup> Icon non Jesús icoinra huashon Diosin noco yononi cuscan nantifi non pitiroquin. Nantifi nami shara non pitiro. Nan tsain iconfiacun Jesús icoinra huafu futsafoan shinantiro isca huaquin, —Un na cuscara nami pitiromaran, —ishon shinaintonfin ato ointaificai nan cuscara nami non pitiroma ahuara chaca shinanshquima. Non nantifi yorafo Jesusquiri shinanmapai. Non ato shinamashara fustipai. <sup>24</sup> Ascacun man apaiyai cuscan fusti shinanyamacahuun. Futsafihuunoari shinansharacahuun. Ato shara huafafaincahuun.

<sup>25</sup> Ratoran futsan mato nami inanpaiyaiton man fitiro piishquin. —¿Rania min fiamun? —ishon yocayamacahuun maton nomuran shinanchacashquinma. Diosin tsain yoia isca huaquin, —Nantifi man̄ pitiroquin, —ishon noco yoini. <sup>26</sup> Nocon Ifoan nantifi onihuani. Nantifiri ahuuna nan onihuaniti noco inanpai norifi non unimacai non aya inon.

<sup>27</sup> Ascan Jesús icoinra huamaton mato pimapaiyaiton a futan picahuun. Ascashon isca huaquin yocayamacahuun, —¿Rania na nami min fiamun? Ahuara ramihuacashon, “Nocon diosiran,” ishon ato nami inanfo. ¿Nan cuscara nami mian pimapaimun? —ishon yocayamacahuun. Man yocayamaiton unimacai pinon.

<sup>28-29</sup> Ascafiaflashon ratoran futsafoan mato yoiquin isca huai, —Un na nami mia pimai ahuara ramihuacashon inanqui tau huafo. Un chipo fiaran, —ishon mato yoiaiton nan nami piyamacahuun. Ascashon piquin isca huaquin aton nomuran shinantiro, —¡Aja! Na nocofunun Jesús icoinra huafiaflashon ahuara ramihuacashon aton diosin nan nami inanqui tau huafo man piaran. Asca nanton Jesús tanasharamaran, —ishon ahuun nomuran shinantiro. Marifi man pishonraca ahuun nomuran shinan, —Mun chaca huaran, —ishon. Manfin tapiaquin nanfo non pitiro. Ascan futsafoancai tapiataicanima. Afoan shinanracaascaquin non chaca huatiro. <sup>30</sup> Man yoquiraca isca huua, —Un nantifi tushu pishon Dios, “¡Aichoran!” un huatiroquin. Un asca huacun ahuuiscain futsan uhuunoa shinanchacatiromun, —ishon man shinanraca. <sup>31</sup> Un mato tapimasharanon. Ahuara man pifain ayafain man ahuarashta futsa huai cuscari acafiri futsafoan Diosihuunoa shinansharanonfo.

<sup>32</sup> Ascacun man acai cuscan huaquin tsoa shinanchacamayamacahuun. Nocon caifo Israelifo iyamarai mani futsafo nantifi Jesucristo icoinra huafo ato shinanchacamaya-macahuun matohunshon nocon Ifohuunoa shinanchacanonfoma. <sup>33</sup> Nanscarifi aquin urifi nantifi yorafo un ato shara huashopai unimanonfo. Ascacuncui un apaiyai cuscan fusti un huaima. Futsafoan apaiaifo cuscan un ato huashopai Jesucristo man icoinra huacashon chaca shatucanashu afu ipanonfo.

## 11

<sup>1</sup> Un Cristo tanai cuscan marifi ufutan tanacahuun.

—*Ichananshon non Diosquiri shinainno nocofunu yafi ainfomain ahuuscatirofoquin, —ishon Pablon ato yosini*

<sup>2</sup> Man ua shinanfafaimisicun. Un mato aicho huai. Un mato yosimisi cuscan huafain man nicafafaini. <sup>3</sup> Natian uhuun yoramishtichin un ahuara futsa mato shinanmapai man tapinon. Cristofin nantifi yorafoan nocon Ifoquin. Ascataliainfofoan aton ifofin aton funufoquin. Ascan Cristo ahuun Ifofin Upa Diosiquin. <sup>4</sup> Ascashu man icoinra huafo ichananmisitian ratoran nocofunun Dios cufifain ahuun tsain yoipaiquin iquisi ahuun maiti pucatiro. Ascashon maton fuyamisi cuscan ismashcaquin Diosihuunoa shinansharaquin. Ascacun maiti mapacumutan ismatiro Cristo fusti ahuun Ifocun. Ahuun maiti mapacumuyamacun futsafoan oinquin shinantiro, —Natocai Cristo Ifo huapaima, —ishon shinantirofo.

<sup>5</sup> Ascataliainfofoan Dios cufipai yamaraquin ahuun tsain yoipaiquin iquisi maiti nutatiro ismashquin nocofunu ahuun ifocun. Ascaqui maton fuyamisi cuscara ismashcaquin aton funuhuunoa shinansharashcaquin. Ahuun maiti nutancasmaquicai funu ifoancoinnama cuscara itiro. <sup>6</sup> Nan ainfofoan Dios cufipaiquin maiti nutancasmacun nocofunu cuscara marucumutiro. Ascafiaflashu ainfo marucumuashu rafipaitiro. Nan yorafoan oinquin yoitirofo isca huaquin, —Na ainfofoan chaca huaran, —ishon yoitirofo. Ascacufin ainfofoan Dios cufipaifain ahuun tsainri yoishquin maiti nutantiroquin.

<sup>7-9</sup> Ascafiaflashu nocofunun Dios cufifain ahuun tsain yoishquin maiti nutantirofo. Diosin nocofunu onihuani a cuscara inon. Ascacun uhuun yoramishtichin non Dios nicacionshu ahuun ointi cuscara shara non itiro. Nanscarifaiyainfofoan aton funu nicacoincanashu Diosin ointi cuscara sharari itirofoquin. Diosifin nocofunu onihuakin tauhuanquin. Chipofin ainfo onihuakin. Nocofunuhuunoa Diosin ainfo onihuani. Ainfoluhunoacai Diosin nocofunu onihuanimma. Nocofunuhuunoa nan ainfo onihuani afu rafucain afu yonosharapacunon unimayanan.

<sup>10</sup> Ascacun nocofunufoan ainfo iquintiro. Ainfofoanri aton funu nicacointirofo. Ascashu icoinra huafo ichanainno ainfoan ahuun maiti nutatiro ahuun funu nicacoinshon ismashquin. Manasca huaiton Diosin oinmati afu nai muran icafoan oinquin yoitiro isca huaquin, —Diosin yononi cuscan nan na ainfoan ahuun funu nicashara. Nanfin sharacoinquin, —ishon yoitirofo.

<sup>11</sup> Ascashon Diosin noco onihuani ainfofo yafi nocofunufo yopanonanono. <sup>12</sup> Diosin tau huaquin nocofunun ahuun anu Adán onihuani. Ascashon ahuunoari ainfoan ahuun anu Eva onihuani. Ascataanno ahuunoashu nocofunufo yafi ainfofo cainpacumisiquin. Ascafia nan ainfofo yafi nocofunufori nantifi Diosin onihuani.

<sup>13</sup> Nanscacun mafin shinancapon iconmainquin. ¿Ainfoan matofu ichananquin Dios cufipaiquin maiti nutashoma Dios cufia ascara sharamun? Ma. Ascaracai sharama. Manascaquicai ato ifo nocofunufo oinmapaicanima. <sup>14</sup> Man man tapiari nocofunufo aton fo fasi chai huaa chaca itiro. Nannori nantififain non shinamisi. Nanscafin rafipaitiroquin. <sup>15</sup> Ascataama ainfofoan aton fo chai huafin maiti sharashta ointsa itiroquin. <sup>16</sup> Un na mato yoiai cuscafin ratoran icoinra huaa futsa ua fochishmapaiyaitocai un ahua futsa yoipaima. Ascashocai non ahua futsa yosimisima. Nan un mato yoimisi cuscari Jesús icoinra huaa futsafo afi ranan ichanancashon nanfori nannori fusti yoimisifoquin.

*Nocon Ifoan noco nashonihuunoa shinain ichanancashon nantianri Corinto anoafaoan ahuarao chaca huaifo cuscan Pablonun ato yosini afanan ascanonfoma*

<sup>17</sup> Ascashon ahuara futsari un mato yoipai. Un nica man atirifi ichanansharama. Ascataamarocon man fasi chaca huai. <sup>18</sup> Futsafo mato anoashu uqui fucashon ua yoiavo nan man ichanainticai man futsa chaima man tsaopaitiroma. Man ichananshon nocon Ifo Jesús mato nashoni shinanpaifiain mafi ranan man noinancasmatanain. Ascacufin un matohuunoa nicaí cuscan un shinan atirifiracafin iconquin.

<sup>19</sup> Man shinanraca, —Nan man fochishmanantanquin man tapitiro ratofoanmain cayacafi shinancanicai, —ishon man shinan. ¡Ohushta! Anorima. Man fasi amaquiricoin shinan. <sup>20</sup> Man ichananshoncái Jesús mato nashoni man shinainma. Nan shinantamarocon man pifain ayafain nan fusti man shinain. <sup>21</sup> Un nica man ichananshon pifiaquincaí a tushuomafori man pashcashomisima. Ato pashcashotama mafi ranancairocon ayafain ahuun man paunmisifo. ¡Ai timafin! Ascafin fasi chacaquin. <sup>22</sup> Pipaiquin ichananti ano man cataima iquisi maton pushu anoshon piyocahuun. Ascataamarocon Dios fu ichananti pushu ano oshon man ichapa pifafainmisi. Tushuomafo man rafimaiquin. ¡Ai timafin! ¿Unmun matohuunoa yoisharaiquin? Ma. Uncai matohuunoa yoisharatiroma. Nan mato futan icoinra huaa futsafo man chaca huacun. Ascaracai sharamafinquin.

*Jesús noco nashoni cuscan pifain ayaquin non shinantiro*

<sup>23-24</sup> Ascatari nocon Ifo Jesús afincion ua yoini cuscan un afanan mato yoinon. Ua tapimani cuscari un mato tapimai. Nocon Ifon Jesús Judaspan ato achimanataima afu rafumisifo fu ichananni. Ascashon ato futan piquin. Misi finifoantán Apa Diosin yoini isca huaquin, —Upa Diosin min fasi sharacoin. Mirifi min nantifi tapicoian. ¡Aichoran! —huatan misi torupacushon atoti inanni. —Naafin uhuun caya cuscaracoquin. Unfin matohuunoashu chipo naicain. Nan man ichanaintian man misi piaiti ua shinanfafaicahuun, —ato huatan.

<sup>25</sup> Ascashon piyafioan afanan cuchori finifoantán ato ayamapacuquin yoini, —Na ayatihuunoa ahuara funa shara un mato yoiquin isca huai. Uhuun imi foyanan un matohuunoashu nai man ufu Upa Dios ari ipanon. Nan na non acai cuscan chipo nan man ichanainti ua shinanfafaicahuun, —ishon ato yoini. <sup>26</sup> Ascashori man ichanancashon Jesús mato nashoni cuscan shinancahuun. Misi pifain ayafain huacashon nanscasi

huacaquin, —Nocon Ifoan noco nashoniran, —ishon shinanfafaicahuun. Nan Jesús afanan oaitian nanscasi huafafaincahuun.

*Ahuuscashomain Jesushuunoa nani cuscan shinantaqui non pitiroquin*

<sup>27</sup> Ascacufin nan man ichanain anoshon misi pifain ayaiti ayafiaquicai maton chaca shatucasmafain manri chaca huaa. Nocon Ifoan noco nashoni ahuun caya fasi omitscacain imi foynan noco nashoni. Nanscarofo man tapifiashocai nocon Ifohuunoa shinantamarocon chaca huaquin man afanan nocon Ifo omitsiscamai. <sup>28-32</sup> Ratoranfoan misi pifain ayafain nocon Ifo omitsiscacain ato nashoni cuscan shinanyamaifoan Upa Diosin ato onaintimashquin. Atirifoan nan na un yoia cuscanasca huacani.

Ascashufin nanfo iramanashtafo atirifi isinin icain atirifi onihuanifotifain. Nanscun man ichanaintian oinfain. Misi pifain man ayataimari ahuara chaca huashon iquisi Upa Dios yoiyocahuun maton chaca soashonon mato onaintimanonma. Jesús icoingra huamafo Diosin ato onaintimai cuscacai noco onaintimaima. Afocai ahuun facufoma. Ascacun nanfo ato omitsiscapanacafo muran potashquin. Ascan nonfin ahuun facufoquin. Nocon Ifoan noco oinmafiaquicai noco omitsiscapanacafo muran potatamarocon noco tapimashquin non afanan chaca huanonma. Nanscacufin man ichanaintian Jesús noco nashoni shinanshquin pifain man ayataimari iquisi maton nomuran shinancahuun manmain chaca man fomaincái. Ahuara chaca huashon shinanquin Upa Dios yoiyocahuun maton chaca mato soashonon. Ascashofin man pifain ayatiro Jesushuunoa shinansharashcaquin.

<sup>33</sup> Ascacufin uhuun yoramishtichin man ichananshon Jesús noco nashonihuunoa shinancaquin oinyocaquin atirifi icafofiacun. Ascashon misi torumishti yafi aqui ayaquin man shinantiro Jesús noco nashonihuunoa. <sup>34</sup> Ratoran futsa man fonainquin iquisi maton pushu anoshon ichananshma man piyotiro. Man ascaitocai Diosin mato onaintimaima. Ascacun un matoqui nocoshon ahuara man fucashnaiton un mato shara huashoshquin.

## 12

*Diosin Yoshin Sharapan icoingra huafoti ato amatiro ahunshon icoingra huaaf futsafo shara huanonfo*

<sup>1</sup> Uhuun yoramishtichin natian ahuara futsa un afanan mato yoisharapai. Nan non ahuarafo Diosin Yoshin Sharahuunshon non atirohuunoa un mato tapimai. Nanfohuunoa iconcoin man tapinon. <sup>2</sup> Man manfin tapiaquin Jesús man icoingra huataima ahuarafo rami huashon man icoingra huapaoni. Ascafia afoancai ahua shinantiroma. Ascashocai ahuashta mato yoitiroma. Nanscaquin nanfohuunoa man amaquiri shinanpaoni.

<sup>3</sup> Ascatan futsafo matoqui nocoshon yoishquin isca huaquin, —Un mato Diosin tsain yoi oaran, —ishon mato yoiquin. ¿Ahuuscashomun man tapitiroquin Diospan Yoshin Sharahuunshon mato yoiyamarauquin afin shinanfain mato yoiaiton? Nanscacun un mato tapimai ahuuscashomain man tapitiroquin. Tsoan Jesusqui tsain chaca huafin acai Diospan Yoshin Sharahuunoashu tsainquima. Ascashon, —Jesusfin uhuun Ifoquin, —ishoncái tsoanshta afin yoitiroma Diosin ahun Yoshin Shara fustihuunshon yoitiro.

<sup>4</sup> Upa Diosin nan icoingra huafoti ahun Yoshin Sharapan ato amapaiyai cuscan huaquin futsa futsa huashon arusu fusti noco shinamatiro non ahunshon icoingra huaaf futsafo shara huanon. <sup>5</sup> Ahunshon futsa futsa huaquin afiaquin nocon Ifo fusti non ashotoiro. <sup>6</sup> Ascano Diosin nan icoingra huafoti nocon ointi muran futsa futsa huaquin noco tapimai ahunshon non ahuara ashonon. Ascatan nan Diosin fustiton nantifi nocon nomuran noco tapimafafaini non a cuscara inon.

<sup>7</sup> Ascano Diosin Yoshin Sharapan ahun yono ismatiro isca huaquin. Icoingra huafoti ato amatiro futsafo shara huanonfo. <sup>8</sup> Futsan Diospan Yoshin Sharahuunshon tsain

fasi cayacafi shara noco yoiaino futsanri Diospan Yoshin Sharahuunshon Diosihuunoa noco yoisharaino. <sup>9</sup> Futsanri Diospan Yoshin Sharahuunshon finonmacaifain icoinra huaquin finacoiyainno. Futsanri Diospan Yoshin Shara fustihuunshon yorafo caya huamaino. <sup>10</sup> Futsanri Diospan Yoshin Shara fustihuunshon tsoan atiroma cuscan atiro. Futsanri Diospan Yoshin Shara fustihuunshon nan Diosin yoiai cuscan noco yoiaino. Futsanri Diospan Yoshin Shara fustihuunshon tapitiro futsamain noco Diospan Yoshin Sharahuunshon yoiyamaraquimain yoshin chacahuunshon noco yoicain. Futsanri Diospan Yoshin Sharahuunshon nan tsain futsanman yoifain nan tsain futsaman yoiai cuscan huafain futsan nicayoyamafiamisishaqui Diospan Yoshin Sharahuunshon nan tsain yoia cuscari noco tapimatiro. <sup>11</sup> Nanfofin Diosin Yoshin Sharapan ahuun yonoquin. Nan icoinra huafotifin Diosin Yoshin Sharapan ato amapaiyai cuscan acaniquin. Naantofin nan noco amapaiyai cuscan noco huamatiroquin.

### *Nonfin nocon caya fusti cuscaraquin*

<sup>12</sup> Nocon caya fustifiano non pashcoi futsua. Nanscarifiai Cristo fustifiano nonfin ahuun yora ichapaquin. <sup>13</sup> Cristo fustifiano nonfin nantifi ahuun caya cuscarafoquin. Atirifi non Israelifo non mani futsafori non nocofunufoan aton oinmatifo non atirifi nocofunufoan tsoa aton ifoma icaino. Nan non Cristo icoinra huafoti Diosin Yoshin Sharapan nocon ointi noco fianananhuano Cristo ahuun yorafo non itiroquin. Non ahuun caya cuscara. Ascafia Diosin Yoshin Sharahuunshon nan icoinra huafoti ahuun cayacoin cuscara noco ima.

<sup>14</sup> Nocon caya fustifiano non pashcoi futsua. <sup>15</sup> Ascatari nocon tauncai yoiqui isca huai, —Uncai mucuma. Ascan uncai cayan pashcoi futsutiroma, —anori yoifiaino nocon cayahuu nuua. <sup>16</sup> Ascataricai nocon pafinquinin yoiquin isca huai, —Uncai furoma. Ascan uncai cayan pashcoi futsutiroma, —ishon yoifiai nanri nocon cayahuu nua. <sup>17</sup> Nocon cayahuu furo fustiacumun ahuuscashon non nicacuanaquin. Nanscarifiai nocon cayahuu pafiqui fustiacumun non ahuuscashon shutucuanaquin. <sup>18</sup> Ascafiai Diosin noco ascara onihuanima. Nanfin apaiyai cuscan noco onihuaniquin. Ascashon nan noco tuchipaiyaino nocon cayahuu noco tuchiqui futsani. <sup>19</sup> Nocon caya ahuara fusti ya icainocai shara icuanama. <sup>20</sup> Nan iconcoin. Nocon caya fustifiano non pashcoi futsuaquin.

<sup>21</sup> Ascan furoncái mucus isca huatiroma, —Uncái mia yopaima, —ishon yoitiroma. Mapónricai tau isca huatiroma, —Uncái mia yopaima, —ishoncái yoitiroma. Ascan isca huaquin shinanyamacahuun, —Un mia yopaimaran, —ishon futsa yoiyamacahuun. Diosifin nan icoinra huafoti noco noicoinquin. Nanscarifiai nofi ranan non noinanoncahuun. <sup>22</sup> Nocon caya pashcoi futsafo mutsisipamafiashu nanfori non fasi yopacoin. <sup>23</sup> Nan raniran futsan non pashcoashta nan non musu huatiro futsafoan oinonfoma. Nanfori non ihuasharatiro rafishquima.

<sup>24</sup> Diosin nocon caya noco onihua cuscan huafain fasi non cushushara. Ascashon non yoitiro isca huaquin, —Un na yopacoinran, —ishon. Nanscarifi aqui ratoran Diosin yorafofiacun nacai ahuamaran huafiafo nancaifin Diosin ahuun fasi noiquin. Ascacun atohuunoa non yoisharafain non ato yopacoin. <sup>25</sup> —Diosifin noco onihuaniquin nan icoinra huafoti nantifi non yopanonancoinran, —ishon shinanonfo. Ascacun nantifi non cushunonansharatiroquin isharashquin. Nannorisi shinanshquin. Nantifi cushunonansharacani. <sup>26</sup> Nofiri raniran non moshaqui chachishon non mutiro nantifi nocon caya non omitsiscuai nanhuun non isincointiro. Nanscarifiai Jesús icoinra huaa futsa omitsiscaiton nantifi nan non icoinra huaoan ahuunshon non mutiro afu omitsiscuai shinantsa. Nanscarifiai Jesús icoinra huaa futsafori shara huacun non nantifi afu icoinra huafori non afu unimacointiro.

<sup>27</sup> Ascashufi non Cristo ahuun caya cuscaraquin. Nantifi non ahuun caya pashcoi futsua cascarari. Nantifi non Diosin yoracoinfo. <sup>28</sup> Ascan nantifi nan Jesús

icoinra huafoti Upan Diosin noco catonni ahuunshon ahuara futsa futsa huaquin non ashonon. Cristo nuno mai ano niyoatian futsafo catonni afu rafunonfo. Ascashori ato nichini ahuun tsain ato yosifoanfafainonfo. Cristo afu rafumisifo catonquin tau huani. Ascashon chipo Diosin tsain yoimisifo catonfain Diosin tsain tapimamisifo catonfain tsoan oinyomisima cuscara ahuunshon atirofo catonfain Jesushuunshon isinincaifori cayahuamafain futsafo ashofafainmisifo catonfain futsafo yonosharamatirofori catonfain futsafoan nan tsain futsaman ahuun Yoshin Sharahuunshon yoitirofo nanfori Diosin ato catonni. Nantifi catoan ahuunshon yorafo ashonsharanonfo.

<sup>29</sup> Diosincai atifi noco yonoama non ascarasi huanon. Nantificai yonoama ahuun tsain yoifoanfafainnonfo. Ascashoricai nantifi yonoama tsoan oinyomisima cuscara ahuunshon atirofo. <sup>30</sup> Nantificai yonoama Jesushuunshon isinincaifo cayahumanonfo. Nantificai yonoama nan tsain futsaman ahuun Yoshin Sharahuunshon yoinon. Nantificai yonoama nan tsain futsaman noco tapimanonfo. <sup>31</sup> Ascacun Diosin mato imapaiyai cuscan huafain nan icoinra huaa futsafo man shara huafafainon. Diosin Yoshin Sharapan noco amapaiyai cuscan nanfo fuchipaicahuun. Ascan nanfo sharafia un ahuara fasi shara finacaia natian un mato yoinon. Ua nicasharacahuun fasi shara finacaia Diosin noco imapaiyai cuscan huafain un mato tapimanon.

## 13

### *Non Diosinhuunshon futsafo noiafin nanca shara finacaiaquin*

<sup>1</sup> Un mani futsafoan tsainman yoifain Diospan oinmati afu nai muran icafoan yoia huaquin un yoifiatiro Diosihuunshon un futsafo noihamashuai un ahuama. Ascashu uhuun tsain achacoin nicatsa itiro. Futsafo fucashni huai cuscara itiro. <sup>2</sup> Diosin futsafo yoipaiyai cuscan un tapicoinshon yorafoan ahuara tapipaifiaquicai tsoan tapiamaifoan un tapishon un fasi Dios icoinra huaquin finacoian un na machi shucusaitahuun un huaino shucusaitiro unasca huafleshocai un futsafo noiyamainocai nanca uhuuna ahuama. <sup>3</sup> Nantifi un aya cuscan un ahuuomafo un inancoinfiaquicai un nan futsafo noihamashu nanca uhuuna ahuama. Un Diospan tsain shara yoititon nanscacun nicasmacaquin ua coaifoanno un naafleshuai un futsafo noiyamashu nanca uhuuna ahuama. Un ipaitsi natiro.

<sup>4</sup> Non futsafohuun noicoincrai non funatiroma. Non ahuun ramapaitiro. Ascatan futsafohuun non noiricai non futsafo shutiacufoanpaitiashu non sinamisi iyamacain cacapaimisi iyamacain nonricai curafiapaimisi itiroma. <sup>5</sup> Non futsafohuun noicoinquiricai futsafoan ahuara huapaifiaiton non ato shutiacufoantiroma. Ascaquicai non ato rafimapaima. Ascashoricai nofin apaiyai cuscan fusti non shinantiroma. Fushnuicamitsamisi iyamacain futsan noco chaca huafiacun non shinanchafatiroma. Afo shinantamarocon rahuinmafain non ahuun noitiro. <sup>6</sup> Non futsafohuun noicai ahuara chaca oin non unimatiroma. Ahuara icon shara nicai non unimacointiro. <sup>7</sup> Ascatan ahuara ahuuscarafaino Dios noiquicai nocon nomuran non shinanchacatiroma. Ascashon non tunuointiro. Futsahuun noicoinquicai ahuunoa ahuara chaca nicafiaquin non icoinra huatiroma. Futsafohuunoa chaca nicafleshon non tapiyoshomacai non icoinra huayotiroma. —Ascayamapainonran, —ishon non shinantiyo ahuun noiquin. Non Diosin noicoinquicai ahuara ahuuscarafaino non tunuointiro.

<sup>8</sup> Noinain unupacunacama. Ascafianocai Diosin tsain yoimisifoanci ratoran shafatan afanan tsoan yoishcanima. Ascashori tsoancain ascara tsain nicayomisima afanan yoipacunacama. Tapimamisifoanri afanan noco tapimapacunacama. Nanfocai nocon Ifo oaitian non afanan yopashquima. <sup>9</sup> Ascacun natian Diosin noco tapimapaiyai cuscacai atirifi non tapisharataima. Diosin tsain noco yoimisifoan tapiafo cuscan noco tapimasharafatirocái atirifi tapiafoma. <sup>10</sup> Ascaino Jesucristo nocoaitian non a cuscara shara iishquin. Afifin nantifi tapiaquin. Afin tapia cuscan nocori tapimashquin.

Ascano ahuara futsa futsa huaquin Diospan yorafoan noco ashomisi cuscan non afanan yopapacunacama. Man nanfo cuyoshquin.

<sup>11</sup> Ascano un facuashu uhuun tsain facu tsain cuscara iyopaoni. Facufoan mutiro cuscan unrifi un muyopaoni. Facufoan shinantiro cuscan unrifi un shinanyopaoni. Ascafia un yosinishaquin facufoan shinantirofo cuscan un afanan shinainma. Facufoan ichapama tapia. Ascan un nocofunuaitian facufo itiro cuscan un afanan aama. Natian nocofunufoan shinain cuscan un aaqui. Facufo itiro cuscan mun cachiquiri huacoinna.

<sup>12</sup> Fuisiti matacoiannocai nocon fuso cuscacoin non ointiroma. Nanscarifiai natian Jesús icai cuscacoincaí non onancoiantaima. Chipo aqui nocoshon ahuun fusocoínon non oincointiro. Nantiantari aficoínmain ua onancoiaintofin urifi un onancoinyaino.

<sup>13</sup> Ascashon non Dios icoína huai cuscacai cuyopacunacama. A icoína huashucái non amaqai ipanacama. Nanricai cuyopacunacama. Nan rafu sharacoinfia Dioshunshon non futsafo noicoiaínno nancaífin shara finacaiaquin. Nanricai cuyopacunacama.

## 14

### *Diosin Yoshin Sharapan noco yonopaiyai cuscan Pablonun yoini*

<sup>1</sup> Ascan Diosin noco noiai cuscan huafairi futsafohuun noifafaincahuun. Nancaricon fuchipaicahuun ascashcaquin. Ascashon Diosin Yoshin Sharapan futsa futsa huaquin mato yonopaiyai cuscan nanfori fuchipaicahuun. Diospan Yoshin Sharahuunshon nan Diosin yoia cuscan fasi fuchipaicahuun icoína huaa futsafo yoishcaquin.

<sup>2</sup> Ascatan futsan tsain futsaman yoiaitocai nicatirofoma. Dios fustitofin nicatiroquin. Diosin Yoshin Sharahuunshon yoifiaitocai tsoa futsan nicatiroma. <sup>3</sup> Ascashon tsoan Diosihuunshon ahuun tsain shara yoiquin noco tapimasharashon Jesús cuscara noco imafain nocon ointiri noco shara huashotiro ahuuscarafiaquin nocon ointi non unimacointiro. <sup>4</sup> Ratoranfoan tsain futsaman yoiquin afiri nicamutiro Diosin imapaiyai cuscan aquin. Ascafia nan ratoran futsan Diosihuunshon ahuun tsain yoiaiton nantifi Jesús icoína huafan nicatirofo Diosin noco yoipaiyai cuscan nicasharashu Jesús cuscara shara itirofo. <sup>5</sup> Manmain nantifiton nan tsain futsaman Diospan Yoshin Sharahuunshon man yoipainon. Nanscara sharafiahu tsoan Diosin tsain mato tapimasharai nancaífin fasi shara finacaiaquin. Nantifimain man ascapainon. Ratoran futsa nan tsain futsaman yoiaiton. Ascashon ichananshon futsan maton tsain futsanman yoifiaitocai man nicatiroma futsan mato yoiyamaiton. Acai ahuama. Ascafiaiton yoia cuscan futsan tapimaino nantifi unimacointiro. Diosihuunoa shinancani.

<sup>6</sup> Ascacun uhuun yoramishtichin un matoqui nocoshon tsain futsaman un mato yoiai cuscan man nicayamacai acai matona ahua itiroma. Ascacun Diosihuunshon un mato tsaincoinman un mato yoi Diosin mato yoipaiyai cuscan man nicanon. Maton tsainman un mato tapimanaiton man nicacointiro. Ascashon Diosin mato imapaiyai cuscan man tapitiro. <sup>7</sup> Un iscara mato tapimai. Manuti amaquri manuaiton non nicasharatiroma ratocaimain shafacafi manuicai. <sup>8</sup> Ranushumua futsan aton cushumisiton ahuun manuti manutiro ato chani huaqui afu ranushumua futsafo itisharanonfo ato noicasmaifoan ato rutunonfoma. Ascafia manuti cayacafi manuyamaiton tsoancai tapitiroma itisharashcaquin ato rutunonfoma. <sup>9</sup> ¿Nanscarifi aqui nan tsain futsaman man futsafo yoiaino ahuuscashotsi man yoiai cuscan tapitirofo? Man ascara tsain yoiqui ipaitsi man ato yoi. <sup>10</sup> Icon nan maitio tsain futsa futsatapafo. Nantifi tsain shara. Ascafia nan aton caifoansi aton tsain nicacatiro. <sup>11</sup> Ascan uhuun caifoan ua tsain futsaman yoiaitocai un tapitiroma. Nan uhuun caifoma cuscacoin itiro. Un ahuun tsain nicayamaino un ahuun caifoma cuscacoin itiro. <sup>12</sup> Ascacun Diosin Yoshin Sharahuunshon man futsa futsa huaquin mato yonopaiyai cuscan nanfo man fasi fuchipai. Man fuchipaiyaifo nan man Diosin Yoshin Sharahuunshon icoína huaflo aton ointi fupi huamatiro Jesús fasi tanasharanonfo. Nan cusrarofo fasi fuchipaiacahuun Dios yonosharashoshcaquin.

<sup>13</sup> Ascacufin nan tsain futsaman yoiquin Upa Dios cufihuun man yoiai cuscan mafiri tapifain ichananfori ato tapimashquin shafacafi nicasharanonfo. <sup>14</sup> Ascashon un Upa Dios cufinquin ahuun Yoshin Sharahuunshon nan tsain futsaman uhuun nomuran cufifiaquicai un cufia cuscan un tapitiroma.

<sup>15</sup> ¿Ascacun unmun ahuuscaicain? Un tsain futsaman Diospan Yoshin Sharahuunshon Upa cufifain nan tsain nantifiton nicanonfo un cufiaiton. Ascatari un nan tsain futsaman Diospan Yoshin Sharahuunoashu urifi fanainshquin. Nan tsain nantifiton nicatirofoanri un fanainshquin. <sup>16</sup> Man Diospan Yoshin Sharahuunshon nan tsain futsaman Upa Diosihuunoa man yoifaiton ahuuscashocai matofu ichananfoan yoiquin, —Ascapainon, —mato huatirofoma nicatsi huacani. <sup>17</sup> Man Dios, —¡Aichoran! —huasharafiaquicai futsanfo nicasharatirofoma aton ointi unimashquin. Maton tsaintsi nicaifoan.

<sup>18</sup> Uhuun yoramishtichin un Upa Dios aicho huai. Ascashon un yoi, —Upa Diosin, min Yoshin Sharahuunshon tsain futsaman un yoia cuscan atirifiton yoifiaquicaiasca huafoma cuscan. Un minhuunshon tsain futsaman un ato finoinnifoan yoimisi, —ishon un Dios yoimisi. <sup>19</sup> Ascafia icoinra huaa futsafoya ichananshon un aton tsainman ichapamaton ato yoiaiton nicatirofo. Nanscafina sharaquin. Un ato ichapa tsain futsaman yoiaitocai nicatirofoma. Nanscaquin nicafo.

<sup>20</sup> Uhuun yoramishtichin, un mato tapimai cuscan tapisharacahuun. Facushtan ahua tapisharataima. Ascashon nanfoan shinain cuscan marifi shinanyamacahuun. Cayacafi shinancahuun. Ascafia iyoafuan shinanchacatiro cuscacai facufoan shinanchacayotiroma. Nanscahu ato cuscara icahuun. Chaca tapipaiyamacahuun. <sup>21</sup> Isaías Diospan tsain cununi isca huaquin,

“Nan Israelifo un ato yoifaiton ua nicacasmamisifo. Ascacun un ato ipaitsicoin yoimisi. Ascaifoan caifo futsafo un ato muran nichishquin uhuun tsain ato yoishquin nicanonfo. Ato yoifiaifoancai ua nicayoshcanimaran,”

ishon Diosin yoini cuscan Isaías aqui cununi.

<sup>22</sup> Ascashon tsainmanscái a icoinra huaafó non ato yoima Diosin ahuamamishti huatiro cuscan tapinonfo. Ascatamarocon icoinra huamafo non ato yoitiro Diosin ahuamamishti huatiro cuscan huafain tapinonfo. Ascatai ichanancashon futsan aton tsainman Diosin tsain yoiaino nanfin man icoinra huafainsi Diospan Yoshin Sharahuunshon nicasharatirofoquin. Ascan nan icoinra huamafoancai tsoan nicasharatataicanima. <sup>23</sup> Ascashu ichanancanashu tsain futsa futsatapafaoan tsaincafo man icoinra huamafo iyamarai man tapia cuscan tapiataifoma matofu ichanancashon shinantirofo isca huaquin, —¡Ohuashta! Na yorafo nisoncoinforan, —ishon yoitirofo.

<sup>24-25</sup> Ascafiaquin man ichananshon mato tsainman Diosin tsain yoipacuaino icoinra huaama futsan iyamarai man tapia cuscan tapiataifoanmari mato nicacashon shinantirofo isca huaquin. —¡Ohua! Urifi Diosin tsain cununi cuscacai un aama. Diosin nantifi tapicoian. Nocon nomuran non ahuarashta fomanpaimisi nanfori Diosin man tapian. Chipo ua puashoshquiran, —ishon shinantirofo. Ascashon shinainfono aton nomuran nocotiro. Nannori shinancatan ratoconun mai chachitiro Upa Dios cufinquin isca huashquin, —Upa Diosin min fasi sharacoin. Min na icoinra huafó fu ica. Urifi mia yopacoinran, —ishon cufitiro.

### *Man ichanainno nicatimayamacahuun*

<sup>26</sup> Uhuun yoramishtichin, un mato tapimapai isca huaquin. Man ichanainno futsan mato fanainmafain futsan mato Diosin tsain yosifain futsan Diosin ahuun nomuran yoia cuscan mato tapimafain futsari Diospan Yoshin Sharahuunshon tsain futsaman mato yoia cuscan huafain futsanri Diospan Yoshin Sharahuunshon mato tapimatiro a yoia cuscan huafain. Ascashon nan un yoiai cuscan non nansca huapaitiro nantifi nan ichananfoanno Diosin mato amapaiyai cuscan man huanon. Ascashu a cuscacoin

man inon. <sup>27</sup> Man ichanainno yora rafutan iyamarai rafu non fustifain tsain futsaman mato yoitirofo. Ascaiton nan futsan maton tsain futsan man yoia cuscan huafain futsan maton tsainman mato shafacafi tapimatiro Diosin mato yoipaiyai cuscan man nicasharanon. <sup>28</sup> Nan tsain futsaman man yoipaiqui tsoan mato tapimayamaino a ichananfo murannoashu man pusitiroma. Ascatac maton pushu anoashu marus fusti nan tsain futsaman man Upa Dios fu tsaintiro.

<sup>29</sup> Ichananshon rafutan iyamarai rafu non fustifain Diosin aton nomuran shinamanai cuscan huaquin mato yoitirofo. A yoiai cuscan nicacashon nan Jesús icoinra huafoan shinantirofo isca huaquin,—Diospan Yoshin Sharahuunshon noco yoiaran,—ishon shinanyamaraquin. —Afin shinanfain noco yoia. Diosicai anori noco yoiamaran,—ishon shinantirofo. <sup>30</sup> Ascashon futsan mato Diosin tsain yoiaino futsan ahuun nomuran Diospan Yoshin Shara nanumanaino futsan yoiai cuscan tsaoshon nicayotiro. Ascan na yoiquin tau huatan anaititiro futsan acafiri a ichananfo yoinon.

<sup>31</sup> Asca huacashon fustirasiton Diosin Yoshin Sharapan ato shinanmanai cuscan futsan yoicun futsan yoicun huapatirofo. Nan ichananfoan nantififain tapinonfo. Ascashon aton ointi fupuanonfo. <sup>32</sup> Nan Diosin tsain yoimisiton ato yoipaiyai cuscan man ahuun tsain yoiquin anaitishon afin ahuun nomuran shinantiro isca huaquin,—Natian un ununon. Futsanri Diosin tsain yoipaiquin un manatiro. Aton yoiqui anaitiano unrifi ato yoitiroran,—ishon ahuun nomuran shinantiro. <sup>33</sup> Ascashu ichanainfo anoshon futsan ahuun tsain chai yoiriaino futsa mato tsain futsaman yoiai cuscan tsoancai mato tapimaima ipaitsi aton ointi fucash huacani. Ascaracai Diosin fuchipaima. Diosin fuchipai nan ichananfo anoshon aton ointi unimanonfo.

<sup>34</sup> Ascatac ahuara futsari un mato tapimasharapai. Nantifi icoinra huaa futsafo ichanainfo ainfofo tsaintiroma. Diospan tsain cununi isca huaquin. Nan ichanainfotiancai Diospan tsain futsan yoainocaiyainfo pusitiroma. Tsaintamarocon Diosin tsain yoimisiton yoiai cuscan nicacointiro nan yoiai cuscan aashquin. <sup>35</sup> Nan nica cuscahuunoa yocapaiquin manatiro nan aton pushu ano nocoshon funu yocatiro funun tapimanon. Ascacun ¡Ai timafin! Man ichanaintian man tsaincacai sharama.

<sup>36</sup> ¿Nantifi icoinra huaa futsanfoan ichanancashon amisi cuscan marifi man asca huapaimamun? ¿Man shinanmun Upa Diosin yoipaiyai cuscan mato fusti tau huaquin tapimani? ¿Ascan manraca marus fusti Diosin tsain mato fusti tapimanamun? Ma. Ascashon amaquiri shinanyamacahuun. <sup>37</sup> Ratoranfo man futsan yoiquin man isca huatiro,—Non Diospan tsain yoimisi ascayamarai non Diospan Yoshin Sharahuunshon icoinra huafo non ahuara ashottiroran,—man icun. Nanscarifi aquin man tapitiro nan nafo un mato cunushonai cuscan nocon Ifoan mato yonoi. <sup>38</sup> Tsoan anori shinanpaiyamai afu ipaiyamacahuun.

<sup>39</sup> Ascacufin, uhuun yoramishtichin man ichanain anoshon Diosin tsain ato yoipaichahuun. Nan fasi shara. Ascafia futsan tsain futsaman Diospan Yoshin Sharahuunshon mato yoipaiyaiton shatumayamacahuun. <sup>40</sup> Ascatac man ichanannoshon futsan yoicun futsan yoicun huacahuun man yoiai cuscan nicasharanonfo. Man asca huaino ato ointi fucash huatirofoma.

## 15

### Cristo nafianishaquin afanan funini

<sup>1-2</sup> Uhuun yoramishtichin natian tsain shara Jesushuunoa un mato yoimisi cuscan un afanan mato shinanmapai. Un mato Jesushuunoa yoiaino man icoinra huani. Man icoinra huaiton Jesús maton chaca soashona man afu ipanon. Ascan un mato yoini cuscan mancaínan cachiquiri huamisima. Man cachiquiri huashon nanscaquin ipaitsi man icoinra huacuana.

<sup>3-7</sup> Diospan tsain yoini cuscan Cristo noco nashoni nocon chaca soashoshquin. Yoiari Cristo osha rafu non fusti maiyon. Ascatan afanan funini. Funiashu Pedroqui nocoi tauni. Chipo afu rafumisifo docequi noconi. Ascayotan chipori quinientos icoindra huafoqui noconi. Ascan natian nantificuana niyoaf. Fustirasi naino. Ascashu chipori Santiagoqui noconi. Ascashu chipo afanan afu rafumisifo doce noconi. Nannori ua tapimani cuscan urifi matori tapimayoni.

<sup>8</sup> Ascashu ahuun unutani uqui Jesús noconi. Uncai ahuunoa ahua nicatiamano afu rafumisi futsafoan icoindra huaquin tauhuanifo. Facu cainyama cuatan caintirofo cuscan un afiaiton. Ascashon uncaicoinra huacuanima. Samamashta ua icoindra huamariscatani.

<sup>9</sup> Icoindra huaa futsafoancai un acai cuscan chaca huacaicaimisifoma. Un Jesús icoindra huao omitsiscamayopaoni. Un Diospan yorafo chaca huayopaonifiacun Jesús uhuun ramapaiquin ua catonni un afu rafumisi inon. <sup>10</sup> Diosin uhuun ramapaiyaino unrifi un afu rafumisi. Ascashon ua imapaivai cuscacai un ayamama. Mun aca. Un nanscaquicai ua ipaitsi catonima. Un ascashu un afu rafumisifoan yonoshonaifo cuscan uncaifin fasi yonoshoquin finacoindrahuacuan. Ascafia ufciai un ahuun yonoshomisi icama. Uhuun ramapaicai ua catonni un ahuun yonoshomisi inon. <sup>11</sup> Ascacun un iyamarai Jesús fu rafumisi futsafo futan nannorisi non mato Jesushuunoa yoimisi. Non mato yoimisi cuscan man icoindra huaa.

### *Nan naafo funishquiai cuscan*

<sup>12</sup> Non mato yoimisi isca huaquin, —Cristo noco nashofianishaquin man afanan funiniran, —ishon non mato yoimisi. ¿Ascan ahuuscaitirifiton man yoimisimun? —Yora naashu afanan funitiromaran, —ishon man yoimisi. <sup>13</sup> Yora naashu funiyamanicuncuai Cristori funicuanama. <sup>14</sup> Cristo funiyamanicun non mato ahuunoa ipaitsi yoicuana. Funiyamanicun marifi man ipaitsi icoindra huacuana.

<sup>15</sup> Ascatan Cristo funiyamanicun non mato Dioshuunoa paracuamisi. Non yoimisi isca huaquin, —Upan Diosin Furun Jesús funimaniran, —ishon non mato yoimisi. Yora naashu funiyamainocai Cristoricai Upa Diosin funimacuanama. <sup>16</sup> A naafo funiyamainocai Cristori funicuanama. <sup>17</sup> Cristo funiyamainocai man ipaitsi man icoindra huacuana. Maton chaca mato soashocuanama. <sup>18</sup> Ascashu Cristo funiyamainocai nan icoindra huao nacanashu funcani. Omitsiscapashcaquin. <sup>19</sup> Nuno mai ano niyoshon non shinanquin isca huamisi, —Un naashu Cristo funini cuscan uari Diosin funimashquiran, —ishon non shinanfiashu iconyamaino non fasi funcuana. Ascashon non ipaitsi icoindra huacuana. Cristo funini iconyamacun tsoanmamishti aca finonmafain nocohuun ramapaitiro.

<sup>20</sup> Ascafia anorima. ¡Aicho! Iconcoin Cristo funini. Aafin funi tauniquin afanan nashquima. Ascan nantifi icoindra huao funitirofo afu ipashcaquin. <sup>21-22</sup> Ascashon nocofunu Adán Diosin onihuaquin tauhuani. Adán tauhuaquin chaca huani. Ahuun chacahuunoashu nani. Ascan nan nocofunuhuunoashu nantifi napamisifo. Nanscari-fiai nan nocofunu Cristohuunoashu nantifi icoindra huao funitirofo afu nipashcaquin. <sup>23</sup> Ascashu Cristo funi tauni nipashquin. Afanan mai ano nasoaitian nantifi ahuun yorafo funimashquin afu nipanonfo.

<sup>24</sup> Ascainocai ahuara chacafoan afanan noco fucash huatirofoma nantifi cuyopacunaca. Nantianri nantifi Cristo noicasmapacunacama yafi Satanás yoshin chacafoan aton niaifo non nantifi yoshin chacafo ato omitsiscapanacafu muran potai afanan tsoashta yonononfoma. Ascaiton Criston Apa Dios yoiquin isca huashquin, —Upan, natian min yorafo nantifi min ato yonomatiro. Afanancai tsoan mia nicacasmapacunacama. Ato iquipacuhuun, —ishon Criston Apa yoishquin.

<sup>25</sup> Ascashon Criston nantifi nan noicasmamisisifo ato finoaintian afanancia a noicasmamisisocai ahuashta ishcanima. Nantifitsi ato iquiyamaiton. <sup>26</sup> Nan ahuun unutaqui a noicasmamisisifo ato namaqui cuyoshquin. Ascashucai afanan tsoa nanacama.

<sup>27</sup> Ascacufin Diosin Furun Cristo yononi cuscan nantifi ato iquinon. Apa Dios fusticai Furunmun iquinama. Apahuunshon nantifi ato iquina. <sup>28</sup> Man nansca huatan Furunmun Apa yoishquin isca huaquin, —Upan uarifi mian yonotiroran, —ishon. Ascaiton Apa yoiai cuscan fustisi nicapaicoin. Ascashon Apa Diosin fustiton nantifi iquinaquin.

<sup>29</sup> ¿Ascashu yora naashu funiyamaifoannocai ahuuscain futsafo atohuunoashuunu muran iquimamumisishaquin? ¿Ascan ahuusciamun huacaniquin? ¿Ascashu yora naafio afanan funinacamanocain ahuuscain futsafoan ato unu muran iquimamisifomun?

<sup>30</sup> Ascacun nocohuunoari natian non shinanon. ¿Naafio funiyamainocai ahuuscaimun shafatifi Cristohuunoashu non musuni tapiaquin?

<sup>31</sup> Ascacuri un futsafo matohuunoa yoisharamisi man nocon Ifo Jesucristo tanasharaino. Uhuun yoramishtichin iconcoinri ua Cristohuunshon shafatifi rutupaicani. <sup>32</sup> Nocofunufo Efeso anoaoanri ua rutucuanifo. Un naashu funiyamaicai un ipaitsi nacuani. Un nuno mai ano niyoai chain Jesús ua imasharai ahua musunicai uqui noocoama. Ascatacun naashu afanan funiyamainocai acai uhuuna ahuama. Non naashu non afanan funinacama non apaiyai cuscan non huanoncahuun. Ascatacun chipo non afanan ahua ahuusca huanacama. Noncun tapiama ahuitian non naimancai. Ascashon futsafoan yoia isca huaquin,

“Non pifain aqui ayafain non Dios shinantama non apaiyai cuscan non nataima non unimanoncahuun,”  
ishon shinancoama.

<sup>33</sup> Asca anorimafinquin. Ascashon amaqiri shinanfafaiyamacahuun. Tsoa anori shinanfafainaifo fu rafuyamacahuun. Yora chacafo fu non rafuaino nocori chaca huamatiro. <sup>34</sup> Man amaqiri shinamisi cuscan afanan anori shinanyamacahuun. Cayacafi shinancahuun. Chaca huaquin shatucahuun. Timafin man atirifitocai man Dios onansharataima. Ascashu man rafipaitiro.

### *Non naashu afanan non funiaitianmain nocon caya ahuu cuscara ishquicain*

<sup>35</sup> Ascashon futsanraca yoishquin, —¿Ahuuscashumain man naashu non afanan funiatioquin? ¿Afanan funiashurimain ahuu cuscara yoraya non afanan iquicain? —ishon yoicaniraca. <sup>36</sup> Anori yocaino fasi amaqiri shinantiro. Non ushu fana payocoyotiro. Chipo ahuun ushu foaifiashuquin payocoyamashu foaitiro. <sup>37</sup> Non ahuara fanaquicai non ahuun cayafoya fanatiroma. Ahusun ushushta fusti non fanatiro. <sup>38</sup> Ascashon non ahuun ushu fanafia Diosin foaimatiro. Afi apaiyai cuscan fana futsa futsatapafo huua. Nanscashori ahuun tashofo yafi ahuun caya cuscarafo ato onihua.

<sup>39</sup> Nanscarifiai nocon cayacai yoinaton caya cuscarama. Nocon caya futsa cuscarafo. Yoinana futsa cuscrafono. Puiyafonari futsa cuscrafono. Shiman nafori futsa cuscrafono. Nanscarafosicai Diosin noco onihuani.

<sup>40</sup> Nai murannoafao ahuun caya futsa cuscrafono. Nuno mai ano non niyoano nocon cayari sharafiacai nan nai murannoafao na cuscarama. Nanri fasi sharashta finacoiyain. <sup>41</sup> Nanscarifiai fari non oshu non fishifori sharashtafashu ascrafosima.

<sup>42</sup> Nanscarifiai yorafo naino aton caya payocotirofo. Afanan non funiashucai nocon caya payoconacama. Nanscara sharasi non ipanaca afanancia non nanacama. <sup>43</sup> Nocon caya maiyaino chacacoin ishquin. Ascan non funiaitian sharashtacoin ipanaca. Non nuno mai ano niyoashu non iranmannapacuashu non natiro. Non afanan funiashucai non ascara itama mutsisipa shara non ipanaca. <sup>44</sup> Non naanocai nocon caya nai murannoafao nan cuscara itiroma. Ascan funiashu norifi Dios fu icafoanri non iishquin. Upa Diosin Yoshin Sharapan nocon caya mutsisimafain noco iquipacusharanaca. Non nuno mai ano niyonon ishon Diosin nocon onihuani. Ascatacun non aqui nocoaitian

noco caya futsa cuscara onihuashofain nocon furo yoshin afu ipanon. <sup>45</sup> Ascan Diospan tsainhuunoa cunuquin isca huani,

“Nocofunun Adán Diosin onihuaquin tau huani. Ahuun cayaqui Diosin ashain tanaino nocofunun ninacahuani. Arifi ninon,”

ishon. Ascan Cristo arifi Adán cuscarafiacun ahuun Yoshin Sharapan noco nimapacutiro. <sup>46</sup> Diosin nocofunun Adán onihuaquin tau huani arifi ninon. Chipo Cristo cainmani ahuun Yoshin Sharahuunshon noco nimanon. <sup>47</sup> Diosin nan nocofunun Adán onihuaquin tau huani. Mai mapohuunoa onihuani. Cristori nocofunufiacun afin nai murannoashu nocoqui fotoni. Tsoancai onihuanima. <sup>48</sup> Nantifi nuno mai anoashu non caianshu nocon caya Adán caya cascarari. Ratoranfoan Jesús arifi Ifo huacanashu nan cascarari ishcáni. <sup>49</sup> Non nuno mai anoashu caini non Adán cuscaraconinfo. Ascan Jesucristo nanton Dios icariashu fotoni non a cuscaraconinfo inon.

<sup>50</sup> Uhuun yoramishtichin un mato tapimai nonmun ahuuscashquicain. Non noco yora mumacoin Diosin niaifo icano non afu itiroma. Nocon caya paiyocotiro. Ascacufin non na cuscara yora yashucái Dios fu non itiroma. <sup>51</sup> Tsoancai nicayomisifoma cuscara tsain shara un mato yoi. Tapipaiquin ua nicasharacahuun. Asca noncái atifi naima. Ascafía non nantifi fiananain futsushquin. <sup>52</sup> Ascantan non fianananriscashquin. Futso itani cafiscái non fianananriscatashquin. Nocon mai cuyoaitian Diospan nai oinmatinin ahuun manuti chaan chaan acaino Jesús icoínra huaashu namisifo funiriscatanonfo. Ascashucái afanán nanacafoma. Nantianri nantifi icoínra huafotí fianananriscatashquin. <sup>53</sup> Non natian naino nocon caya payocotiro. Ascafía Diosin nocon caya fiananan huashoshquin non afanán naima non afu ipanaca. <sup>54</sup> Diospan tsain cununi cuscan iconcoin iishquin.

“¡Aicho! Afanancái Diospan yorafo nanacama. Cristohuunoashu non afu isharapacutiro,”

ishon cununi. <sup>55</sup> Ascashu afanancái ahuaton noco namatiroma. Afanancái non nai omitsiscatiroma. <sup>56</sup> Non chaca huamisihuunoashu non nai non omitsiscatiroma. Noco fiananan huatiancái afanán non chaca huatiroma. Non afanán chaca huayamafain nonricái afanán nashquima. Diospan tsainhuunshon non tapitiro non chaca huamisi. Ascantan non fianananshu Jesús cuscara shara non ishquin afanancái non chaca huatiroma. Diospan tsain afanán noco yoishquima isca huaquin,—Min chaca huaracai,—afanán noco huashquima. <sup>57</sup> Noco asca huaiton non yoitiro,—¡Aicho! Upa Diosin, nocon Ifo Jesucristohuunshon nocon chaca non shatutiro a cuscara shara ishquin. Ascashucái afanán non nanacama,—ishon non yoitiro.

<sup>58</sup> Ascacun uhuun yoramishtichin futsa futsa huaquin shinanyamacahuun. Diosin noco imapaiyai cuscan nan fusti shinansharacahuun. Jesús tanasharacahuun. Nocon Ifo Jesús yonoshosharafafaincahuun. Man man tapia nocon Ifo futan yonoicai ipaitsi non yonoshotiroma.

## 16

### *Nan icoínra huaoan pui ichanan huashon icoínra huaa futsafo fomani*

<sup>1</sup> Natian ahuara futsanhunoa un mato yoi. Diospan yorafo Jerusalén anoafó ahuuoma. Atohuun ramapaiquin man ato inansharapai. Ascan nan icoínra huao Galacia anoafó un ato yoia cuscan marifi nanscarifi acahuun. <sup>2</sup> Yonoshon ahuun rafanan pui fishon nan man fia cuscan ahuutiran Domingotifin ichananti muranshon pui huafafaincahuun. Chipo un Jerusalén ano nocoshon nan pui un ato foshotiro man ato inanon. Diosin mato inan cuscari atirifi inancahuun. Mato ichapamari inancun atirifi ichapamari man inantiro. Ascan mato ichapa inancun paratamari inancahuun. Ua manaquima pui ichahuafafaincahuun. Asca huafafainshocai un nocoaino man afanán fipaitiroma.

<sup>3</sup> Ascashon mafin nocofunu sharafo catoncahuun aya pui fomashcaquin. Ascan un matoqui nocoshon ufico un ato cunushoshquin man ato foshotanon. Ascano Jerusalén anoafan man tapinon tsoan puimain mato foshoafquin. <sup>4</sup> Diosin ua nichipaiyaino nan nocofunu man catoanfo unfu fotirofo.

### *Pablon cahuacacainna cuscan ato tapimaní*

<sup>5</sup> Macedonia finonfaini cai un matoqui Galacia ano nocoicai. <sup>6</sup> Itsairaca un matofu iyotiro. Ascayamarai uraca oipacutian un mato muran iyonon. Ascashon un caiton un aya catanon un yopai cuscan man ua inanqui futsanon. Ascatan man ua nichian un casharanon. <sup>7</sup> Un mato atsamaiyofainnicai. Diosin ua nitumayopaiyaino un matofu iyotiro.

<sup>8</sup> Ascafia un nuno Efeso ano iyoí nan nocon fuyamisi ahuun anu Pentecostés icaitian. <sup>9</sup> Nunoa yorafoan nocon Ifohuunoa nicapaicani. Ascacun un nunoshon nocon Ifohuunoa yoisharai yoi. Ascano icoinra huanonfo. Un ascafaiton nantianri atirifiton ua shatumapaicani un Jeseshuunoa yoinonma.

<sup>10</sup> Ascano un nocon Ifo yonoshona cuscari arifi Timoteo yonoshona. Ascan matoqui nocaiton cushusharacahuun. Nocoaino aqui unimacahuun. Man ascaiton tapinon a man fuchipaiyai. <sup>11</sup> —Acai ahuamaran, —huayamacahuun. Caiton nichisharacahuun unimai uqui noconon. Icoinra huua futsafo fu uqui nocoyoi. Un afanan atofu rafusharanon.

<sup>12</sup> Ascatari natian nocon yorahuan Apoloshuunoa un mato yoi. Un yoia isca huaquin —Corinto anoaf oinyotahuun, —un Apolos huamisi. Ascafia ua yoimisi, —Un natian cayotrioma. Diosin ua nichipaiyaitian un catiroran, —ishon ua yoia.

### *Pablonun ahuun tsain unutaquin Corinto anoaf a tosain fomani*

<sup>13</sup> Oinfain. Jesús shinanfafaicahuun chaca huacaquima. Nocon Ifo icoinra huacahuun. Cachiquiri huayamacahuun. Jesús icoinra huashu ahuara ahusscara afaiton oincani ratuyamacahuun. Diosihuunoashu fupuinfoancahuun. <sup>14</sup> Ahuarao man acai cuscan nanfohuun noiquin ashosharacahuun.

<sup>15-16</sup> Estéfanas ahuun yorafo Grecia mai anoafan Jesús icoinra huaquin taucoin huanifo. Man manfin ato oinmisiquin. Man man tapia nanfoan Diosin ahuun yorafo shara huamisifo. Nan cuscarafo nicasharacahuun. Nan atofu yonoafori nicasharacahuun.

<sup>17</sup> Un fasi unimacoin Estéfanas non Fortunato non Acaico afo uqui nocoafono. Mancaí ashotoroma man fasi chaicoin ica. Man ua ashotoroma cuscan nan rafu non fustifain ua ashoanfo. <sup>18</sup> Nan rafu non fustifain uhuun ointi ua fupuamafo. Maton ointi man fupuaca cuscan uari fupuamafo. Ascatan atohuunoa yoisharacahuun.

<sup>19</sup> Nan Jesús icoinra huafio ichananmisifo Asia anoafan mato yoisharapaicani. Nocon Ifohuunshon Aquila futan ahuin Priscila mato yoisharapaicani. Fasi mato shinancani. Aton pushu muran atofu ichananfoanri mato yoisharapaicani. <sup>20</sup> Nantifi icoinra huafio ufu nunoafan mato yoisharapaicani. Ascacun yoinonnansharacahuun.

<sup>21</sup> Unfin Pabloquin uhuun tsain unutaquin rafushtacoin uhuun mucuoinnin un mato cunushoni man tapinon unfincoin un mato yoisharashquin.

<sup>22</sup> Tsoan nocon Ifo noiyamashon afin shinantiro, —Ufin un apaiyai cuscan un aicai. Ua Diosin amapaiyai cuscan nanscanonquin, —ishon shinantirofo. Nanscarao Diosin ato onaintimapainon. Omitsiscapanacafo muran potashquin.

Ifo Jesús nocoqui ohuu. <sup>23</sup> Nocon Ifo Jesús matohuun noiai cuscan mafi rananri man noinanpainon.

<sup>24</sup> Un nocon Ifo Jesucristohuunshon un nantifi matohuun noi. Nanscasi ipanon. Amen. Nanti.

## Pablonun Corinto Anoafu Afanan Cunu Fomani

### *Pablonun Corinto anoafu yoisharani*

<sup>1</sup> Uhuun yoramishtichin un mato cunu fomai man tapinon. No futan Jesús tanamisi Timoteo futan un mato cunu fomai. Upan Diosin ua catonpaquin ua catonni ahuun tsain Jesucristohuunoa un ato yoifoanfafainon. Un Jesucristo fu rafumisi. Nantori ua nichini.

Icoinra huafo Corinto anoafuan yafi Diospan yorafo Acaya mai anoafori un mato nantifi yoisharai. <sup>2</sup> Nocon Upa Diosin futan nocon Ifo Jesucristo matohuun ramapaicain maton ointi unimamanon.

### *Pablon omitsiscani cuscan*

<sup>3-4</sup> Non Upa Dios yoisharanon. Isca huaquin, —Upa Diosin, min noco shara huafafaini. ¡Aichoran! —ishon non Upa yoinon. Nanfin nocon Ifo Jesucristo apaquin. Nanrifi nocohuun ramapai. Non omitsiscafiaiton nocon nomuran shinanmasharatiro. Ascano non mua cuscan huafain futsa omitsiscaiton non ahuun ramapaiquin ahuun nomuran non shinanmasharatiro. Ahuara futsan omitsiscamai cuscan non yoisharatiro ahuun nomuran shinanmasharanon. <sup>5</sup> Nocon Ifon Cristo no fu rafuano nan omitsiscani cuscan norifi non omitsiscatirofiaflashu nanton nocon nomuran noco shinanmasharatiro. <sup>6</sup> Ascacun non mato yoisharapai nocon Ifo Jesús icoinra huashu afu ipanon. Ascacufin noco omitsiscamafiaifoan noco Ifo Jesús nocon nomuran shinanmasharatiro. Man manfin oinquin Diosin nocon nomuran shinanmasharamisi. Ascacun man man oian nocon nomuran non shinansharaiton. Nanscacun norifi non maton nomuran shinanmacoian. Ascan non omitsisca cuscan marifi man omitsiscafiaquin man funaquima tunucoian. <sup>7</sup> Man non tapia non omitsisca cuscan marifi mannofu omitsiscafiaiton Upa Diosin nocon nomuran shinanmashara cuscan matona shara huaa man shinansharanon. Ascan non matohuunoa shinanmisi cuscan nannorico. Man omitsiscafiaquin tunuaiton maton nomuran shinanmashara.

<sup>8-9</sup> Uhuun yoramishtichin non Asia mai anoashu omitsisca cuscan un mato yoi man tapinon. Nocon ointi fasi ihuu ica. —Noncái tunutiroma. Non omitsiscái nairan, —ishon nocon nomuran non shinanni. —Nofincái non numatiroma. Upa Diosin fustitofin noco numatiroquin. Nantofin yora nacoinna funimatiroquin, —ishon nocon nomuran non shinanni. <sup>10-11</sup> Ascashu non fasi omitsiscái nacuafaiton Upa Diosin noco numani. Afananri noco numashqui. Man non icoinra huacun noco numafafainshquin. Noco nansca huaino icoinra huaa futsafoan nocohuunoa shinanquin isca huashcani, —¡Aicho! Upa Diosin, min Pablo yafi afu rafumisifo min nica ato numashqui. Min fasi sharacoinran, —ishon ichapafoan Upa Dios cufishcani.

### *Pablon shinan futsashu Corinto ano canima*

<sup>12</sup> Man non tapia manifoti iconcoin yoimisishaquin nocon nomuran non unimacinni. Non mato murannoashu isharacoinmisi. Non Dioshuunoashu a cuscara shara-coin non imisi. Noncái mato paramisima. Icon fusti non mato yoimisi. Icoinra huamafoan shinanmisi cuscacai non mato ismamisima. Upa Diosin noco shinanmashara cuscan huafain non mato oinmana. <sup>13-14</sup> Un mato cayacafi icon fusti cunushomisi. Un mato cunushona cuscan nannorico. Uhuun tsaincái rafuma. Mancaí uhuunoa atirififain tapisharataima. Ascaflashon chipo ua onancoinshon man ua shinansharapainon. Ascatan nocon Ifo Jesús nocoaitian man yoitiro isca huaquin, —¡Aicho! Pablonun noco shara huamisiran, —ishon man yoitiro. Nanscarifi aqui un matohuunoa nantianri yoisharashquin.

<sup>15-16</sup> Un shinan man ua icoinra huaishafain Jesús ua nichini un mato tapimanon. Ascashon un shinanquin isca huani, —Un Macedonia ano un caitian un mato ano

mapuyoshquin afanan un mato yoisharashquin maton ointi man unimamanon. Ascatan afanan Macedonia anoashu un nasoaitian afanan u mato ano maputiro matofu iyoshquin. Chipo ua Judea ano nichitiroforan, —ishon un shinanni. <sup>17</sup> Nannori un shinanfiacun man shinanquiraca isca huaa, —¿Pablonun nannori shinanflashuasca ahuuuscai noco icon yoiashuma oamamun? Noco ahuara yoiflashu ahun nomuran man shinan futsashon ahuara huatiro. Icoinra huamafoan noco foman cuscan arifi nanscarifi huaquin noco fomain. Ointi rananyaran, —ishonraca man uhuunoa shinan.

<sup>18</sup> Ascacun anorimafinquin. Man Upa Dios icoinra huaa cuscarifi un mato yoimisi cuscan man icoinra huatiro. Uhuun tsaincrai rafuma. Un mato yoimisi cuscan cayacaficoin. Ahuacai un mato parayomisima. Uricai ointi rananyama. <sup>19</sup> Timoteo yafi Silas futan un mato Jesucristo Diospan Furunhuunoa un mato yoimisi. Nanton tsaincrai rafuma. Ahuun tsain cayacaficoin. Icon fusti. <sup>20</sup> Upa Diosin noco yoiyotiani cuscan nantifi Cristo man noco ashomisi. Ascacun non nantifi yoimisi isca huaquin, —Non Jesús icoinra huashon. Noco yoia cuscan aquin non yoitiro. ¡Aicho! Nocon Ifo fasi sharacoinran, —ishon non yoimisi.

<sup>21</sup> Ascatarifi Upa Diosin mato yafi ua mutsismana non Cristo tanasharanon. Ahuun Yoshin Shara noco ya rafumana. <sup>22</sup> Ratoran futsan aton mafohuun aton anu nutatirofonanfo ahuunacun futsan tapinon. Nanscarifi aqui Upa Diosin ahuun Yoshin Shara noco ya rafumacun nanhuunshon yora futsafoan noco ointirofo non ahuun yorafocun. Nammal nocon Ifocun. Noco yoiyotiani cuscan ahuun Yoshin Shara noco ya rafumaquin tau huani. Ascacufin non tapitiroquin ahuara futsa noco yoiyotiani cuscan iconcoin noco inanshquin.

<sup>23</sup> Ascacun man tapitiro Upa Diosin iconmisiquin. Nanscacun urifi un Diosin oinmati-  
cun man tapitiro un mato icon yoimisi. Un mato yoiamua cuscan mato ari un capaifiai  
un cataima. Upa Diosin ua onancoainton un iconicymacun ua onaintimatiro. Un mato  
ari cacuana. Ascafia un shinan, —Un ato ari cashon un fasi ato asca huatiro, —ishon  
un shinan. Ascashon un mato ointi ihuumapaima un mato ari caama. <sup>24</sup> Un mato asca  
huapaitama urocon mato unimamapaisharai. Uncai maton ifo ipaima man mantsi a  
icoinra huayamacun. Icoinra huashon man man Jesús tanashara. Ascacun un mato  
futan Jesús yonoshopai man mimacai unimanon.

## 2

<sup>1-2</sup> Ascacun uhuun nomuran shinanquin un isca huayamua, —Un Corinto ari capaifiai  
un caima. Un cashon, “Man chaca huai cuscan shatucahuun,” ishon un ato yoiquicai  
un ato unimamatiroma unrocon aton ointi ihumatiroran, —ishon un shinanyamua.  
¿Un maton ointi ihuumaiton tsoan futsancaimun ua unimamatiro? Marus fusti Corinto  
anoafoan man ua unimamatiroquin. Ascafia un mato ointi un ihuumaiton tsoa futsacai  
ua unimamatiroma.

<sup>3</sup> Ascacun un mato cunushonai cuscan un matoqui nocooataima man chaca shatunon  
man afanan uhuun ointi ihuumanonma. Man ua noiquicai uhuun ointi man ihu-  
umaima uarocon man unimamatiro. Iconcoinquin un shinan, —Un unimaino marifi  
man unimatiroquin, —ishon un shinan. <sup>4</sup> Un mato cunushonaino un muyamua uhuun  
ointi fasi ihuucuin. Uaiyanan un mato cunushoni. Ucai maton ointi ihuumapainima.  
Ascataama un mato cunushoni un fasi matohuun noicoiai cuscan man tapinon.

### *Tsoan noco chaca huaiton non rau huatiro*

<sup>5</sup> Nan nocofunun chaca huatocai ua fusti uhuun ointi ua ihuunmanama. Nantifi  
man icoinra huafoti matori mimacai maton ointi ihuuman. Ascafia uncái nan  
nocofunu onaintimaquin finapaima. <sup>6</sup> Ascafia man nantificuanaton man tapipaima  
nan nocofunun a chaca huaa cuscan. Nanscacun man man onaintima. Nanscanon.  
Man man acaquin. <sup>7</sup> Ascataan man aca cuscan afanan huacaquima rau huacahuun.  
Ascashon yoisharacahuun. Ahuun ointi unimamashcaquin afanan omitsiscanonma.

Man yoisharayamaino afanan fasi ahuun nomuran omitsiscrai finacaitiro afanancrai shinansharatiroma.

<sup>8</sup> Ascashon un mato yoiai cuscan ua nicasharacahuun. —Non mia noicoinran, —ishon afanan yoicahuun tapinon. <sup>9</sup> Nantifi un mato cunufoma cuscamaain ua nicacoincrai. Tapishquin un mato cunu fomayamua. <sup>10</sup> Man futsa rau huacun unrifi un nan rau huatiroquin. Ua nantori chaca huiton Cristohuunshon urifi un rau huatiro. Un asca huaino marifi man unimanon. <sup>11</sup> Non ascainocai Satanás nocofunfuparatiroma. Ascatac non asca huayamaino nocohuunoashu nan nocofunu funoi omitsiscacuana. Satanás nocofunfuparatiroma. Non rau huayamaino fasi omitsiscatiro.

### *Pablo pushurasi Troas ano nocofashion ahuun ointi unimanima*

<sup>12</sup> Ascan un mato uhuunoa afanan tapimai. Un pushurasi Troas ano tsain shara Cristohuunoa ato yoicai un cani. Ahuunoa nicapaicoinnifo. Ascano nocon Ifoan nanno ua atoqui nichini un ato yoinon. <sup>13</sup> Ascafia no futan Jesús icoinra huaa nocoyora Titocai anoa un fuchinima. Fuchiyamashu uhuun ointi un unimanima. Ascashon un fasi shinanni. Ascatac, —Mun cairan, —ishon Troas anoa icoinra huafu un ato yoita oi Macedonia ano un noconi.

### *Cristohuunshon non nantifi finontiro*

<sup>14</sup> ¡Aicho! Upa Diosin, mihiushocai ahuaraoan nocoshatumatiroma min nocohuunoa shinanniaquin uhuun nomuran un shinanni Upa Diosin nocoyofoafainai cuscan non Cristo fu rafumisi. Ascatac Jesús nocon Ifono ahuun curushhuunoashu non isharatiro futsafori ahuunoa yoishquin. Ascashon nocohuunshon manifotifain nocon Ifo Cristo onantirofo.

<sup>15</sup> Upa Diosin nocohuunoa shinanquin isca huaa, —Nafo uhuun facu Cristo cuscarao. Ascashon nanfohuunshon uhuun facu Cristo onantirofoquin, —ishon shinanni. Non nantifi Cristohuunoa ato yoimisi. Atirififain nocon tsain icoinra huaifoan Jesús ato numa Dios fu nipanonfo. Atirifiton icoinra huayamashu funoshcani omitsiscapanacafu muran fooshcani. <sup>16</sup> Ascashon icoinra huamafoan nocohnicaquin yoitirofo isca huaquin, —¡Ohushta! Nan na tsainmun iconcati non omitsiscapanacafu muran catiro, —ishon shinancani. Ascafia nan icoinra huafaoan nocohnicaquin yoitirofo isca huaquin, —¡Aicho! Noco yoiaifo cuscan non icoinra huashu non Upa Dios fu nipatiror, —ishon shinancani. ¿Ascacun tsoan Diospan tsain Jesushuunoa futsafo yoisharatiromun?

<sup>17</sup> Futsafoan Diospan tsain yoiahuunshon pusi fipaicani. Ascan noncái ato cuscarama. Man non tapia non ahuun tsain yoiaiton Upa Diosin nocoshafacafioinco. Nantofin afincion nocohnichiniquin. Ascan non ahuun tsain yoiquicai non tsoa fuparamisima. Non ato icon fustisi yoimisi.

## 3

### *Jesús ato tsain funa yoiyotiani cuscan*

<sup>1</sup> ¿Ascan uhuunoacai un mato isca huaquin shinanmapaima? —Pablo fasi nocofunu shara. Fasi tapishararan, —ishoncái un mato anori shinanmapaimisima. Noncái ato cuscarama. Man manfin nocohniciniquin non matofu itiani. Ascan nan cuscara cunucai man nocohuunoa yopaima. ¿Iconmuni? Non mato anoashu caitianricai non nan cuscara cunu yopaima futsafo ismashquin. <sup>2</sup> Ascan manfin nocon cunu cuscarafoquin. Ascashufin matohuunoa nocohnomuran cunu cuscara. Nantififain oinonfo non mato tapima cuscan man aiton. <sup>3</sup> Ascacun futsafoan mato ointirofo man nan Cristo aficoin cunu cuscarafo. Ascashon mato tapitirofo non mato tapima cuscan Jesús cuscara man inon. Toquiri sapaqui cunuahuunshoncái ato oinmanama. Maton nomurancái

ahuaton cunuama. Upa Diosin nipamisiton ahuun Yoshin Sharapan mato imashara nantifiton mato oinonfo.

<sup>4</sup> Cristohuunshon non Dios icoinra huashon non mato yoiai cuscacoin man ai. <sup>5</sup> Ascafashion uncai mato isharamatiroma. Uncai anori shinamisima. Upa Diosin ahuun curushhuunshonsi un futsafo tapimatiro isharanonfo. <sup>6</sup> Ahuun curushu noco inanno nan tsain funa Jesucristohuunoashu Dios fu nipatirofo non ato tapimatiro. Moisés cununi cuscahuunoacai non ato tapimamisima isharanonfo. Asca nonfin Diospan Yoshin Sharahuunoashu non isharatiroquin. Moisés cununi cuscan fusti tanashu non funotiro. Naashu omitsiscapanacafo muran non catiro. Ascan Diosin Yoshin Sharapan noco nimapacutiro non afu nidan.

<sup>7-8</sup> Shinancapon. Upa Diosin nocon caifo Israelifo ato yonopaiyai cuscan toquiri sapaqui ato cunushoni. Ato yononi cuscan nicayamacanashu natirofo omitsiscapashcaquin. Upa Diosin ato yononi cuscan Moisés ato yoiaino Diosinhuunoashu ahuun fuso fasi chashaqui nocon shuni Israelifo ointima huani. Chashafashi funainquimashta nishmapacuni. Ascatac Upa Diosin Moisés yononi cuscan fasi sharashtacoinfiashu natianfin ahuun Yoshin Sharapan noco yonoai cuscan fasi finacaia ahuun yono sharashtacoin man noco ismaquin.

<sup>9</sup> Ascacun Moisés yononi cuscan fasi sharafiacun nicayamacanashu natirofo. Ascan natian Furun Cristohuunshon nocon chaca soashotiro non afu isharanon. Nan fasi shara finacaia. Ahua futsacai nan cuscara sharama. <sup>10</sup> Upa Diosihuunshon Moisés noco yonoquin tau huani cuscan fasi sharashta. Ascafia natiancái nan ahuama. Upa Diosin Jesushuunshon noco ashoni cuscan fasi shara finacaia. <sup>11</sup> Upa Dioshuunshon Moisés yononi cuscan sharafashi itiashmashtafi man cuyo. Ascano Upa Diosin Jesushuunshon noco ashoni cuscacai cuyopacunacama. Ascan nan fasi shara finacaia.

<sup>12</sup> Ascacufin man non tapia Upa Diosin Jesushuunoa yoini cuscacai cuyopacunacama. Ascacun ranotama non Jesushuunoa yorafo yoitiro. <sup>13</sup> Moisés ahuun fuso fasi chashatanaino fufopomuni nocon shuni Israelifoan oinonfoma. Ascashu fufopomuaino itiashmashtafi ahuun fuso chashai nishmapacuni. Noncái Moisés cuscarama. <sup>14</sup> Moisés fufopomuni cuscan uhuun caifofo nanscarafori. Ascashocai Diospan tsain oinsharatirofoma. Cristo fustitofin ato shinamasharatiroquin afanan fufopomua cuscara inonfoma.

<sup>15</sup> Natianri futsan ato Moisés cununi cuscan yoiaino nan fufopomua cuscarafo. Ato ointi curushu anocai tsoan shinansharatiroma. Ascashon isca huaquin shinancani,— Moisés noco yononi cuscain non Upa Dios fu nipatiroran,—ishon shinancani. <sup>16</sup> Ascafia tsoancái natian afanan Moisés cununi cuscan shinantama nocon Ifo icoinra huashon ahuunoa tapisharatiro. Afanan fufopomua cuscara iishquima.

<sup>17</sup> Nanscacufin nocon Ifoan Yoshin Sharapan noco nimapacutiro. Nan nocon Ifoan ahuun Yoshin Shara no fu icanocai ahua futsa nocon ifo itiroma noco yonoshquin.

<sup>18</sup> Ascan noncái fufopomua cuscarama. Nocon Ifoan tsain non oinsharatiro. Nonfin fuisiti cuscarafoquin. Futsafoan noco oinquín nocon Ifo Jesús fasi shara ointirofo. Ahuun Yoshin Sharapan nocon nomuran noco iquifain nocorifi fiananan huaa non nocon Ifo cuscara shara non inon.

## 4

<sup>1</sup> Ascashon Upa Diosin nocohuun ramapaiquin noco yononi non ahuun tsain shara Jesucristohuunoa yoifoanfafainon. Non ascaicain nocon ointi ihuu icama. <sup>2</sup> Noncái tsoa fomanmisima. Ascara chacafocai non tapipaima. Diosin tsain yoia cuscan fustisi non mato yoimisi. Noncái ahuun tsain amaquiri yoimisima. Cayacaficoi non mato yoimisi. Ascan Upa Diosin noco oincoin maton nomuran non nocohuunoa mato shinanmapai isca huaquin,—Diosin tsain cununi cuscan Pablonun nantifi noco cayacaficoi yoimisiran,—ishon mato nomuran non mato shinanmapai. <sup>3</sup> Nan tsain shara

Jesushuunoa non yoimisi cuscan tsoan nicapaiyamainocai nafoan icoingra huafoma. Nanfomin nan fufopomua cuscarafoquin. Ascashu omitsiscapanacafo muran focani.

<sup>4</sup> Nanfomin yoshin chaca Satanás aton ifoshofin ato yonomisiquin. Ascashon aton nomuran fufopomua cuscara ato huamano tsain shara Jesushuunoa tapimonfoma. Jesús ato oinmapai arifi Apa Dios cuscara coin icoingra huanonfo. Nan tsain fasi shara iconcoinfacun Satanás ato fusho cuscara huama aton nomuranshonri icoingra huanonfoma.

<sup>5</sup> Ascan noncái nofiri nocohuunoa non mato yoimisima. Ascatamarocon non mato yoimisi Jesucristo maton Ifo inon. Noco Ifocun non ahuun noishon a yonoshosharapai. Ascan nonfin maton oinmati cuscaraqui Cristohuunoa mato tapimashquin. Nannori non mato yoimisi. <sup>6</sup> Diosin shafa oni huataima yoiquin isca huani, —Faquishcun shafan inonran, —ishon yononi. Nanscarifiai non Jesús ifoantaimano nocon ointi nan faquish cuscara chaca ipaoni. Ascan Diosin Jesucristohuunshon nocon ointi muran chashamana non ahuunshon tapinon ahuu cuscara sharamainquin.

### *Non Jesús icoingra huashu non isharatiro*

<sup>7</sup> Nan Diosin sharacoianshu no fu icaquin. Mai cuticai ahuashta ahuun nuama. Samamashta moshifiatiro amuran ahuara chicoin non nanutiro. Nanscarifiai noncái mutsisipamafia Jesús mutsisipashu no fu rafua. Nanscano Diosin ahuun curushpan fut-safo ismatiro ahuamamishti huatiro cuscan. Ascan nan curushcái noconama ahuuna fustifinquin.

<sup>8</sup> Ascashon non imisi cuscan natian un mato yoi man tapinon. Noco fucash huafafainfiaifono non unumisima. Non finoain cuscacai non tapiama ahuuscamaí non aiquin. Noco asca huafiaifoancai non shinamisima isca huaquin. —¡Ohushta! Noncái ahuuscatiroma. Man non funoarancai, —non imisia. <sup>9</sup> Noco omitsisca huafiainfoancai Upa Diosin noco potapacunacama. Noco rutupaifaifoanri Upa Diosin noco numa non nánonma.

<sup>10</sup> Jesús niyoano rutupaipaonifo cuscan nocorifi nanscarifi rutupaifafaincái. Non ascaiton nantifiton noco ointirofo Jesús nocon muran ica. <sup>11</sup> Non Jesús yonoshonaiton shafatifi noco rutupaicani. Icon nanscacun non Jesushuunoashu nai. Non ascaiton ointirofo Jesús ahuun curushhuunoashu non nicun. <sup>12</sup> Ascacun Jesushuunoa non mato yoiaiton futsafoan noco rutupaifaifoanno non mato yoimisi man icoingra huashu afu nípanon.

<sup>13</sup> —Un icoingra huai. Ascashon un matori yoiran, —ishon nannori Diospan tsain cununi. Nanscarifi aquí norifi Diosin tsain icoingra huashon non matori yoimisi.

<sup>14</sup> Ascashon man non tapia nocon Ifo Jesús man nafiacun Upan Diosin afanan funimani afu ipanon. Ascacun Apan Jesús funimani cuscan mato yafi nocorifi funimashquin non afu ipanon. <sup>15</sup> Nanscacufin norifi non omitsiscacai mato icoingra huamaicain. Man icoingra huashon paratama man tapinon Upa Diosin nocohuun ramapaicain noco numani. Non mato yoiai cuscan tapishon yoitirofo isca huaquin, —¡Aicho! Upa Diosin, min noco shara huamisiran, —ishon yoitirofo. Nanscashon Diosihuunoa shinansharatirofo.

<sup>16</sup> Ascacun non omitsiscafiaquicai non shinanchacaima. Nocon Ifocai non cachiquiri huamisima. Icon non isinin ipashu nafiaiton nocon Ifoan nocon nomuran fiananan huafafaini ahuun ointi cuscara non inon. <sup>17</sup> Non natian niyoashu omitsiscái cuscan fasi curushcoinma. Samamashta finontiro. Ascan non Jesushuunoashu omitsiscaiton noco fasi sharacoin imai cuscan tsoancái ascaran shara oinyomisima. Nanfori cuyopacunacama. <sup>18</sup> Ascano natian noco omitsisca huai cuscan non shinantamarocon nan non oinyomisima cuscara non shinain. Diosin icanoshon noco unimamapacunon non shinain. Ahuaraton noco omitsisca huai cuscan samamashta cuyotiro. Ascan Diosin chipo noco imai cuscan noco unimamai cuscacai cuyopacunacama.

## 5

<sup>1</sup> Ascano man non tapia non naashu Diosin nocon caya funa onihuai. Iscara un mato tapimai. Pushu shuniaino paon icashu payocotiro. Nanscarifai nocon caya non naino cuyotiro nocon yoshin afanan amuran itiroma. Asca tsoa futsacai nocon caya funa oni huatiroma. Diosin icarishofin caya funa sharacoin afanan nocon caya funa oni huashoshquin. Nan cayacai cuyopacunacama. <sup>2</sup> Natiancai nocon cayari fiananantaima. Nanscacun afohuunoa shinain non shacaina cahuatiro. Ascashon shinanquin non isca huatiro, —¡Ohua! Diosin ua imapaiyai cuscacai un ataima. Un fasi Dios ari capaicoin afanan omitsiscashquima caya funa sharacoin ua onihuanon, —ishon non shinantiro. <sup>3</sup> Non Dios ari noconashucui non yoshin fustia ishquima. Diosin nocon caya funari nocon caya funa oni huashoshquin.

<sup>4</sup> Natian non mai ano niyoashu non omitsiscatiro. Ascafia noncái nocon yoshin cayaoma ipaima. Non Jesús ari nocoriscapai ahuun caya cuscara iishquin. Non niyoano nocon caya isinin itiro. Non naino nocon caya payocoí cuyoshquin. Ascafia Diosin nocon caya funa shara chipo nocon inanshquin. Nancaí cuyopacunacama. Isharapacunaca. <sup>5</sup> Upa Diosin nocon onihua non afu ipanon. Non caya funa yaitian Jesús cuscaracoin non inon. Noco yoiyotiani cuscan ahuun Yoshin Shara nocon inan. Ascashon non tapitiro ahuara futsafori nocon yoiyotiani cuscan nocon chipo inanshquin.

<sup>6</sup> Nanscacufin non shinansharafafaini non nuno mai ano niyoashu nocon Ifo Jesús icari non noconataima. Nan man non tapia. <sup>7</sup> Icon Jesús icano non oiantaimafiaquin nuno mai anoshon non icoinra huafafaini. Ascashon non chipo oinshquin. <sup>8</sup> Man non tapia naashu nocon Ifo fu non ipashquin. Nanscafin sharaquin. Ascacufin non naicain non ratuima.

<sup>9</sup> Ascano nuno mai ano non niyoashu iyamarai Upa Dios icari non noconaitian nocon Ifoan nocon yonopaiyai cuscan non aiton oin noconqui fasi unimacoinshquin. Nanfin non fasi ashapaicai. Non asca huashoaiton oinfin nocon Ifo noconqui unimaiquin. Nanquiri fustisi non shinain. <sup>10</sup> Ascan nan non icoinra huafoti Cristoqui non nocoshquin. Nantianri nocon yoipacushquin non mai ano niyoshon shara huayamaraquinmain non chaca huamisiquin. Non ahuara shara huamisicun ahuara sharacoin nocon inanshquin. Asca non ahuarashta chaca huamisicun ahuara shara nocon inanpaifiaquicai nocon inantiroma. Ascashu funoshcani.

### *Cristohuunoashu non Dios fu rafutiro*

<sup>11</sup> Ascacun Diosin nocon yonoa cuscan non ayamashu non ratutiro. Ascatan futsafori non yoipai Diosin ato yonoa cuscan anonfo. Diosin nocon onancoian nonmain cayacafi yoiaitofin. Noncái tsoa futsa fuparapaima. Marifi man man nocon onancoian. Nonricai mato paramisima. Nocon tsain cayacafi fusti. Manmain nocohuunoa maton nomuran nannorifosi shinanpainon.

<sup>12</sup> Ascan noncái afanan mato shinanmapaima isca huaquin, —Pablo yafi afu yonoafó fasi sharaforan, —ishoncái non mato nocohuunoa yoimapaima. Non mato cayacafi fusti yoimisi. Man man tapia. Futsafoancai mato yoicoianma. Mato fuparapaina. Mato yoia cuscacai amisifoma. Ascashon aton nomuran shinanchacamisifo. Cacapaimisifo. Nonfin mato icon fusti yoimisi. Ascan man man nocon onancoinmisi man nocohuuri noiquin man ato nocohuunoa yoisharatiro. <sup>13</sup> Icon Dios noiquivin un curushcái yonoshofaonfafaínmisiquin ahuunoa futsafoan shinansharanono.

Ascan futsafoan nocohuunoa yoiafo isca huaquin, —Pablón yafi afu yonoafó nison cuscaraforan, —ishon nocohuunoa yoiafo. Man manfin tapiaquin non matohuun noiquin cayacaficoín shinanfain non Diosin tsain mato yoimisi. Marifi man cayacafi shinanon. <sup>14-15</sup> Cristo nocohuun noiquin nocon yonoi non ahuun tsain shara mato yoinon. Cristo nantifi yorafohuunoashu naani. Ascashu nantifi non afu nai cafiscái afanan non ipaoni cuscan aashquima. Cristo nafiašhu afanan nocohuunoashu

noco noi funinaca huani. Norifi naashu ahuunoashu non afanan funitiro a cuscara iishquin. Ascan nofin non apaiyai cuscan fustisicai afanan non shinantiroma. Cristo noco amapaiyai cuscan nan fusti non shinantiro nocoqui unimanon. Nanfo non icoingra huamisi.

<sup>16</sup> Ascacufin icoingra huamafoan futsafihuunoa shinainfo cuscacai un afanan atohuunoa anori shinanpacunacama. Unri anori shinanpaonifashiucui un afanan ascapanacunacama. Cristohuunoari un amaqiri shinanpaoni. Unci afanan ahuunoa anori shinainma. <sup>17</sup> Ratoran Cristo Ifohuaashu afn fiananancoian yora funacoin ishquin. Ipaoni cuscacai afanan aimia. Nantian Cristo ahuun nomuran afanan funacoin cuscara huai.

<sup>18</sup> Ascano Upa Diosin Cristohuunshon noco fiananan huaa afanan non noicasmanonma. Ascan natian Cristohuunoashu non ahuun yorafo inon. Ascatac noco yonoa norifi ahuunshon yorafo yoiquin isca huanon,—Cristo Ifo huacahuun. Afanan Diosimaqui iyamacahuun ahuun yorafo iishcaquin, —ishon non yoitiro. <sup>19</sup> Upa Diosin Cristohuunshon afanan nantifi yorafo a ya rafumapai afanan amaqi inonfoma. Cristo noco nashoniano Upa Diosin nocon chaca afanan shinainma. Nocon chaca soashona non afu ipanon. Upa Diosin noco yonoa cuscan nannoricoi non mato yoimisi.

<sup>20</sup> Nanscacun Cristo noco nichini non ahuun tsain mato yoinon. Non ahuun tsain mato yoiquifin nan Upa Diosicoinin mato yoia huaquin. Upa Diosifin nocohuunshon mato yoiquin. Cristo mato yoipaiyai cuscari non mato yoi. Ascacun noco nicacoincapun. Cristo mato nashoni chacafo mato soashoshquin. Ascacun maton chaca shatucahuun afanan Upa Dios fu rafushcaquin. <sup>21</sup> Cristocai ahua chaca huayamafiamisicun Apa Diosin nocon chacafo amuran cuyoimani. Ascan ahuunoashu nan cuscara shara non inon.

## 6

<sup>1</sup> Ascashon non Dios fu yonoi mato shara huamashquin. Nanscacun nicacoincahuun. Diosin matohuun ramapai. Cristohuunshon man maton chaca soashoni a cuscara shara inon. Diosin matohuun noicoinfiaiton potayamacahuun funoshcaquima. <sup>2</sup> Nan Diosin tsain yoimisi Isaías ahuun tsain inonpacoai cuscan cunuquin isca huani,

“‘Noco numahuu,’ ishon man ua yoia. Un mato nicafain un matohuun ramapaicai un mato numaran,”

ishon Diosin yoini cuscan Isaías inonpacoai cuscan cununi. Ascacun nicasharacahuun. Diosin natian matohuun ramapaiquin. Cristohuunshon mato numanon. Natian nicasharacahuun.

<sup>3</sup> Noncái tsoan chaca ismamisima Diosin noco yonomapaiyai cuscan shinanchacanonfoma. <sup>4</sup> Ascatamarocon non nantifi Dioshuunshon non aca cuscan huafain non mato oinmana nonmain ahuun oimatifoshon. Ahuara ahuuscarafiaiton non tunucoinmisi. Noco shinanchacampai noncái tapiama ahuuscaquimain noco chaca huacanicaí. Ascafiaiton non tunucoin.

<sup>5</sup> Ascashon noco coshafain cunu muran noco iquimafain noco huamisifo nan sinamisifo nocoqui fucashon noco chaca huashcaquin nanscamisifoquin. Ascan nonrifi curushcain yonoi atsanacain yamu ichapa oshayamacai fonyianan non ascamisiquin. <sup>6-7</sup> Noco asca huafaino chaca huatamarocon nocon nomuran non ahua chaca shinainma. Non Cristo fu rafuaiton noco yosimisi cuscan man non tapia. Noco chaca huafainfoancai non atoqui sinayamacai funaquima non tunucoinmisi.

Ascashon futsafihuun ramapaicain non ato shara huafafainmisi non Diospan Yoshin Sharahuunshon non ato nansca huamisi fuparatama non atohuun noicoinmisi. Non icon fusti yoimisi. Non Diospan curushhuunshon Jesús yonoshomisi. Non nanfo nansca huafafainquin non mato nantifi ismatiro nonmain Diospan oimatifoshon. Satanás noco chaca huamapaifiaiton Upa Diosin ahuun Yoshin Sharapan nan Dios cuscara noco imaino ahuun curushhuunshon non ahuara chacafo potatiro.

<sup>8</sup> Ascashon futsafoan nocohuunoa tsain shara yoifiaino futsafoan nocohuunoa tsain chaca yoimisifo. Ascan futsafoanrifi, —Pablon nocofunu shararan, —ua huafiainfo futsafoan noco roamisifo. Un iconcoin yoifiamisicun, —Pablofin fuparamit-sapaimisiran, —ishon uhuunoa futsafoan yoimisi. <sup>9</sup> —Pablocai ahuama. Noncai na nocofunu oinpaima, —ua huafiaifono Diosifin ua onancoinshon ua noiquin. Futsafoan ua namapaifiaifono un nia. Ua rutuquirashquifiacaqui ua tsoan rutucoianma. <sup>10</sup> Uhuun nomuran un omitsiscafiai uhuun Ifo Jesushuunoashu un unimamisi. Un ahuuomafiashu un Dioshuunshon futsafo un imasharamisi. Un ahuuoma shinantsa afiai nantifi Diosinari uhuunari.

<sup>11</sup> Uhuun yoramishti Corinto anoafaoan uhuun nomuran un muai cuscan un mato tapimamisi. Un mato fomanma. Nantifi uhuun nomuran un muai cuscan mato tapima man tapinon. <sup>12</sup> Ascacun uncai matoqui ointi mutomisima. Manfin uqui ointi mutomisiquin. <sup>13</sup> Nanscacun un mato yoi. Manfin uhuun facu cusracainfoquin. Ascacun uqui ointi mutoyamacapun. Un mato noiai cuscan uari noicapun.

### *Icoinra huafoma fu rafufafainyamacahuun*

<sup>14</sup> Icoinra huafoma fu rafufafainyamacahuun. Sharafoan shinainfo cuscacai cha-cafoan anorisi shinancanima. Shafa yafi faquishcái osinantiroma. <sup>15</sup> Nanscarifiai Cristo futan Satanascái anorisi shinantirofoma. Cristo icoína huafóan fuchipaíyaifo cuscacai nan icoína huamafoan fuchipaícanima. <sup>16</sup> Cristo icoína huafó ichanancashon Upa Dios cufitirofo. Nantianricai icoína huamafo atofu ichanantirofoma ahuara ramihuacashon cufishcaquin. Nan rafucái ositirofoma. Futsafoancai Upa Dioscoin cufipaícanima. Ascan nonfin Diosin pushu cusracauquin. Nocon Diosfin natian niaquin. Diosin yoini isca huaquin,

“Unfin atofu iquicai. Ato fu rafucacaishquin. Un aton Dios icano. Nanfo uhuun yorafo inonfo. <sup>17</sup> Ascano icoína huamafo icaifo cuscan ayamacahuun. Ato fu rafufafainyamacahuun. Ahua chaca huayamacahuun. Man ascaino un matofu iishquin. <sup>18</sup> Ascátan un maton Upa inon. Man uhuun facu nocofunufo yafi ainfofo inon,”

ishon nocon Ifo Diosin yoini. Nan onihuafoti ato iquinaquin.

## 7

<sup>1</sup> Uhuun yoramishtichin Upa Diosin noco nannori yoiyotiani cuscan shara. Ascashu non isharanon. Nantifi nocon chaca non shatunon. Ahuarafoan nocon caya iyamarai nocon nomuran noco chaca huamatiro nanfo non shatucoianshu nan cusrara shara non itiro. Non Upa Dios noicoianshu a cusrara shara fusti non ipainon.

### *Corinto anoafao Jesushuunoashu fiananansharafo cuscan*

<sup>2</sup> Noncai mato chaca huamisima. Ascashori non mato chaca ismamisima marifi man chaca inon. Ahuara matona fipaiquicai non mato fuparamisima. Ascan maton ointinin nocohuunoa shinansharacapun. <sup>3</sup> Uncai nan un mato yoi cuscan un matoqui tsain chaca huashquin yoimisima. Urocon matohuun noicoin un matofu ipapai nan un naitian. Nannori un mato yoimisi. <sup>4</sup> Unfin mato icoína huaicain nan un mato yoi cuscatsi man ayamaiton. Un matohuunoa nantifi yorafo yoisharapai matohuunoa shinansharanonfo. Man uhuun ointi ua fupuashoan. Un omitsiscafiai matohuunoashu un unimacoinni.

<sup>5</sup> Non Macedonian ano nocoshocai non tununima. Nannoshon noco fasi fucash huanifo. Fochishmanantananaquin. Nocon nomuran non ratucoinni man Jesús tanasharatama man funoaiton oin. <sup>6</sup> Ascafia Upán Diosin nan nomuran ihuuaifo aton nomuran shinamasharatiro. Ascacun noco Tito nichishoni nanton nocon nomuran shinamasharanon. <sup>7</sup> Nocoqui nocoshon nocon nomuran shinamashara. Noco yoiá isca huaquin, —Corintofoan uhuun ointi ua unimamaran, —ishon Titopan noco

tapimana. Ascara un nicaquin nocon ointi unima. Noco yoiari man uhuunoa yoia isca huaquin, —Non Pablo fasi noi. Nocoqui samamashta nocopainon. Noco cayacafi cunushoni nanton nocon chaca shatumanon. Ascashori nocon ointi non nocoa. Icon non chaca huaa. Noncai afananasca huapaima. Non fasi Pablo shinainran, —ishon man yoia cuscan Titopan ua tapimana. Un nanscara nicaino uhuun ointi fasi finacai unimacoian.

<sup>8</sup> Un mato cunushona cuscan maton ointi ihuumana. Un mato cunu fomaiqui tau huaa mato ointi ihuu huemapaiquima. Cahuanquisi un mato ointi ihuumana. Ascafia uhuun cunu oinquin man chaca shatua. Ascacun un mato cunu foma cuscacai un ramapaima. <sup>9</sup> Maton ointi ihuuaiton nicaicain uhuun ointi unimaima. Man Diosqui afanan nasoaiton nicaifin un fasi unimacoianquin. Upa Diosifin maton ointi ihuumana man chaca shatunon. Nanscacoifin man man aaquin. Ascan un mato cunushoni cuscahuunshocai un mato funomanama.

<sup>10</sup> Ascashon non shinanqui isca huai, —¡Ohua! Un chaca hua cuscan Diosirifi un chaca huaran, —ishon shinanquin non nocon chaca shatupaitiro Upa Diosqui nasoshquin. Non ascaiton Upa Diosin noco numatiro non afu rafupacunon. Ascashocai chipo non shinantiroma isca huaquin, —¡Ohua! Uhuun chaca un shatuyamashu shara icuana. Un Diosqui nasoyamari shara icuana, —ishoncai non anori shinanpacunacama.

Ascacun icoindra huamafoan non shinain cuscacai tsoan anori shinanfoma. Isca huaquin shinanfo, —¡Ohua! Un chaca huaran, —ishon shinanfiacaquin aton ointi ihuu itirofiacai Diosquiri shinanpaicanima. Ascashu naashucal Upa Dios fu nipatirofoma.

<sup>11</sup> Ascan mancái ascarama. Shinancapon. Man maton ointi ihuuano man Diosqui nasoshon. Shinanqui man isca huaa, —Non fasi Diosqui nasopai afanan a cuscara shara ishquin. Noncái afananasca huaquin chaca huapaipacunacama. Ratoran no fu ichananmisiton chaca shatucasmai non potayotiro no fu afanan ichanainyonomna. Nonasca huayamaino Upa Diosin noco onaintimatiro. Norifi Pablo noicoin. Afanan no fu ipainon. Noco cunushoni cuscan ratoran non futsan chaca shatuataima non onaintimatiro chaca shatunon non isharashquin, —ishon man yoia. Ascan afanacai tsoan yoitiroma, —Chaca shatuafomaran, —ishon tsoanricai ahua chaca matohuun nutatiroma.

<sup>12</sup> Ascacun man tapitiro uncai nan apa ahuin ahua futsa fu ica nan nocofunuhuunoashu ointi ihuuahuunoaricai un mato cunu fomanima. Upa Diosin ahuun ointaifi man nocohuun shinansharamisi. Nanscacun un mato cunushoni man tapinon. <sup>13</sup> Man nocohuun shinansharaiton nicaquin uhuun ointi un fupuasharacoinna.

Nocon yorahuan Tito arifi matohuunoashu unimacoinyamua. Ascan Tito unimaiton oin norifi non unimacoinyamua. <sup>14</sup> Ascano Titopan tapia un matohuunoa tsain shara yoiai cuscan iconcoin. Un matohuunoa yoiai cuscan nanscacoin man huau. Mancaí ua rafimanama. Nantifi un matohuunoa yoiai cuscan iconcoin afi tapitiro. <sup>15</sup> Tito matoqui nocoshon oian man iscaiton, —Titopan noco yoiai cuscan nan Diospan tsain. Non nicacoinpaiyaiton oin Tito matoqui unimaco. Matohuun noi finacoin. <sup>16</sup> Urifi un matohuun noicoin. Un natian mato icoindra huacointiro nan un mato yoia cuscan man aiton. Ascano un fasi unimai.

## 8

—Ahuara ashon futsafori inansharacahuun, —ishon Pablonun Corintofo yoini

<sup>1</sup> Ascan un tsain futsari mato yoi man tapinon. Icoindra huaflo Macedonia anoaflo Upa Diosin aton nomuran shinanshara futsafo inansharanfon. <sup>2</sup> Nan ahuuomafo Macedonia anoaflo fasi omitsiscafiacaquin Diosihuunshon unimacoinkaquin nan ahuuoma futsafori ato inansharafo. <sup>3</sup> Nan un oian cuscan un mato yoi. Nanfoan futsafo inantiro cuscan paratamacoin ato inancoian. Nanfoanfin inanpaiquin ato inanquin.

<sup>4</sup> Yoiafo isca huaquin, —Jesús icoinra huaa futsafo yopaifo cuscan non ato inanpai. Ascacun Judea anoafó non ato pui fomaicai noco foshocapun. Non nocon nomuran unimacoinquin non ato inainran, —ishon noco yoinifo.

<sup>5</sup> Non shinanyamua noco pui fusti inainfoshafain non Judea anoafó foshicanon. Ascafíacai ascara iyamuama. Noco pui inantaifoma ichanancashon noco ointaifi cu-fiyoyamuafó isca huaquin, —Nocon Ifon, nonfin min yoraquin. Min noco yonopaiyai cuscan min noco yonotiro. Nonfin minaquin, —ishon yoiyamuafó. Nannori yoicatan nocori yoiyamuafó isca huaquin, —Diosin matohuunshon noco yonopaiyai cuscan noco yonotiro. Norifi non mato nicacointiro, —ishon noco yoiyamuafó. <sup>6</sup> Titopan tau huaquin mato yoiyoní isca huaquin, —Maton puifo ichanan huacahuun ahuuomafo Jerusalén anoafó ato inanshcaquin, —ishon yoiyoní.

Ascaiton non Tito yoiyamua, —Min yoimisi cuscan afanan ato yoihúu nan ahuuomafo Jerusalén anoafó ato pui inanonfo. Man atohuun noiquin ato man inantiro. Corintofo ato yoihúu, —ishon non Tito yoiyamua. <sup>7</sup> Man fasi finacaiquifin Jesús icoinra huafain Diospan tsain cayacafi yoifain, ahuun tsain tapisharafain iconcoin Jesús yonoshosharafain man nocohuun noishara. Man nanscara sharafo huaa cuscan nanscarifi huaquin nan yopaifori man ato inansharatiro. Diosihuunshon man ato noicoinquin unimacain ato inansharacahuun. Asca huacaquin tapisharacahuun.

<sup>8</sup> Uficai un mato yonoima man ahuuomafo pui inanon. ¿Un tapipai futsafoan ato fasi inanpaiyai cuscan marifi man ato inanpaimun? ¿Tsain fustiton ato inainran ishon man yoiyamaraquin atohuun noicoinquin man ato inanpaimun? <sup>9</sup> Man man tapiari nocon Ifo Jesucriston nai murannoashu mai ano fotoataima nantifi ahuuna ipaoni. Ahuacai yopapaonima. Ascafia nocohuun noicoinquin nantifi ahuunafo potayoni. Ascashu nocohuunoashu ahuuoma iyopaoni non ahuunoashu isharapacunon.

<sup>10</sup> Ascan un shinain un mato shara huapaiyai cuscan nanfihuunoa un mato yoi man tapinon. Ascan manfin fari fusti finoanquin tsoa futsacai man afanan pui ichanan huashon man ato inantaima. Tau huaquin man ahuuomafo noiquin man ato fasi inanpaicoinquin ato inanqui tau huati. <sup>11</sup> Man tau huaquin unimacoincain ato inanqui tau huati cuscan natianri unimayanan ato inancahuun afanan yopanofoma. Man inanpaiyaiti ato inancahuun. <sup>12</sup> Ascacun man ato paratama inanpaifaiton man Diosin tapia. Manascaino matoqui unimai man afanan ayashoma man ato inantiroma. Ahuatsi ato inanshquin.

<sup>13-14</sup> Uncai mato isca huaquin yoima, —Ato ichapa inancahuuncai un mato huaima. Nanfocai ayaino man yopaitiro, —ishoncái un mato yoima. Ascan natianfin man ichapayaquin. Ascacun yopaifo man ato inantiroquin. Manracafin chipo yopaicain nanfo ichapayashori mato inantirofo. Manascaifin mafriran cushiononansharashu man ascapiroquin tsoa futsa yopanofoma. <sup>15</sup> Nannori Diosin tsain cununi isca huaquin, —Ratoran futsan ahuun yono ichapa chitunfiacai tushushotiroma ratoran futsari yopaimain inaintonfin. Ascan futsan ichapama chitufiashocai afanan yopatiromaran, —ishon Diospan tsain cununiquin.

### *Tito yafi afu rafuafó*

<sup>16</sup> Un matohuunoa shinansharai cuscari Titopan arifi ahuun nomuranshon matohuunoa shinain. Diosin ahuun nomuran shinanmana cuscan non, —¡Aicho! Upa Diosin min fasi shara min Tito shinamashararan, —ishon non yoimisi. <sup>17</sup> Ascashon non yoiyamua isca huaquin, —Corintofo afanan ato oinyotahuun ato yoisharashquin, —ishon non Tito yoiyamua. Non nannori yoiaino fasi unimaiyamua. —¡Aicho! Unfin ato ari caicain. Un ato yoisharapai cairan, —ishon noco yoiyamua. Un shinain nocon tsain fustihuunoashucái caima. Afin matoqui capaisharai cai.

<sup>18</sup> Ascacun no futan Diosin tanamisi futsan yafi Tito non matoqui nichishquin. Nan nocon yorahuan fasi shara. Jesushuunoa arifi yoipaimisi. Ahuunoa nantifi icoindra huafoan shara yoimisifo. <sup>19</sup> Nan icoindra huafoti ichanancashon nan nocofunu catonnifo no futan nan pui yopaifo non foshonon. Non ato ismapai pui non ato inain cuscan nocon Ifo shararan huanonfo. Non ato shara huapaiyai cuscan tapinonfo.

<sup>20-21</sup> Nan ahuuomafo non ato pui fomasharapai. Ascacun nantifi yorafoan ointaifi non ato oinmasharapai nocoqui shinanchacanonfoma. Nan pui paratama non fosshosharapai. Ascano noco isca huanonfoma, —Nocon pui atirifi noco onuanforan, —inonfoma. Ascano nocon Ifoan ointaifi nantifi yorafoan ointaifiri non ato oinmapai non cayacafi ica cuscan.

<sup>22</sup> Ascacun nan nocon yorahuan Jesús tanamisi futsan non mato ari nichishquin. Man nonfin nan nocofunu oinmisquin fasi Jesús icoindra huacoinnaiton. Noco futan Jesús yonoshosharamisi. Ascashon matohuunoa nicamisi man Jesús tanasharashon man ahuuomafo inansharaiton. Fasi mato ari capaimisi mato futan ato shara huashquin.

<sup>23</sup> Man manfin Tito onancoianquin. Nantonfin u futan mato yonoshosharamisquin. U fu rafumisi Jesús yonoshoshashquin. Nan Jesús icoindra huaa futsafoi afu mato ari focani. Nan Jesús icoindra huafo ichanancashon ato catonnifo mato ari fononfo. Nan futsafoan ato oinquin yoimisifo, —¡Aicho! Nan na yoran ahuu cuscaramain Cristoquin noco oinmana. Atohuunshon man non tapia Cristo fasi shararan, —ishon yoimisifo. <sup>24</sup> Ascacufin matoqui nocoaifoan man ato ismatiro man atohuun noicoinquin. Man asca huaino un matohuunoa yoisharamisi cuscan iconcoin icoindra huafotifain tapitirofo.

## 9

### *Icoindra huafu Corinto anoafaoan nan icoindra huaa futsafo ahuuomafo ato pui fomanifo*

<sup>1-2</sup> Mun tapia Jesús icoindra huaa futsafo yopaifo cuscan man ato inanriscapai. Nan-nori un Macedonian anoafao matohuunoa yoia isca huaquin, —Corinto anoafao fari fusti iquisi itisharafo Jerusalén ano ahuuomafo ato inanshcaquin, —ishon matohuunoa un ato yoia. Man unimayanan ahuuomafo ato inanpaisaiton nicacaquin arifi ato inanshquicanquin. Ascacun mancái uhuun cunu fusti yopaima nan pui yopaifo ato fomashquin.

<sup>3</sup> Ascafiacon un Tito yafi afu rafuafoi matoqui nichishquin un matohuunoa un yoisharamisi cuscan iconcoin tapinonfo. Uncai matohuunoa tapinonfo ipaitsi yoimisima. Un ato yoimisi isca huaquin, —Corinto anoafao man iquisi itisharafo. Man atoqui nocoaifton mato pui inanshcani nan ahuuomafo man foshonon, —ishon un matohuunoa ato yoia. Ascacun itisharacahuun maton pui inantaifoma.

<sup>4</sup> Ascan Macedonia anoa futsa ipaishoma ufu focaquin non mato oian man pui ichanan huayamacun un mato icoindra huashon un ato yoita cuscan man pui itishara huacuma un matohuun rafipaiyaino marifi man rafipaitiro. <sup>5</sup> Nanscacun un shinan Tito yafi afu rafua rafu iquisi rufofo un mato ari ato nichiqui tau huai pui ichanan huashon nan ahuuomafo fomashquin iquisi man itishara huanon. Ascan un chipo ufcion un matoqui nocoshon ufu foafoan tapitiro tsoan curushcái mato yonoama man ato pui inanno ishon. Ascatama man ato inanpaisharaquin man ato inan.

<sup>6</sup> Ascacun ointiaquimayamacahuun. Tsoan fimi ushu fustirasi fana fustirasiri ahuun fimi fitiro. Tsoan ushu ichapa fana yono ichapari fitiro. Nanscarifiai tsoan futsafo ichapama inancun nanrifi Diosin ichapama inanshquin. Ascan tsoan unimaquin ichapa futsa inainton ichapari arifi fitiro. <sup>7</sup> Nantifiton aton nomuran shinainfo cuscan huafain futsafo inantirofo. Ascashocai yoitiroma isca huaquin, —¡Ohua! Un paratama inanpaisyamafiaiton ua yocariaiton un inain.

Ascan un inanyamaino uqui shinanchacatiro. Un inain uhuunoa shinanchacanonfomaran, —ishon anori shinanyamacahuun. Asca huatama unimayanan inancahuun.

Nan futsafo unimayanan inanmisi nanfin Diosin fasi ahuun noiquin. <sup>8</sup> Man ascacun nan man yopai cuscan paratama Diosin mato shara futsatapafo inantiro man yopanonma. Futsafo yopaifo cuscan man ato inanon. Diosin nantishon tapiquin mato shara huafafaintiro marifi man ato shara huapanon. <sup>9</sup> Diospan tsain cunuquin isca huani,

“Nocofunu sharapan ahuuomafo ichapa inansharamisi. Atohuun ramapaiyai cuscan huafain nan nocofunuhuucal Diosin ahuun ointiaquimapacunacamaran,”

ishon cununi.

<sup>10</sup> Diosin nantifi ushu onihuani. Ascacun yoran ushu fanatiro. Chipo Diosin ahuun yonofo foaimashotiro pisharanon. Nanscarifiai man yopai cuscan Diosin mato inanshquin. Paratama mato inantiro man unimaquin futsafori man shara huafafainon. <sup>11</sup> Icon Diosin mato ichapa inanpacui manri futsafo ichapa inanon. Ascan nan yopaifo man ato inain cuscan non ato fomashquin fasi unimaquin yoiqui isca huashcani, —¡Aicho! Upa Diosin min fasi sharacoinran, —huashcani.

<sup>12</sup> Man ato shara huai cuscan nan ahuuomafoan fiishcani. Ficashon unimacai yoishcani, —¡Aicho! Upa Diosin min noco shara huamisiran, —ishon yoishcani. <sup>13</sup> Man ato shara huaa cuscan nan ahuuomafo fasi unimashcani man ato inansharano. Ascashon yoiquin isca huashcani, —¡Aicho! Upa Diosin nan noco inanfoan min tsain nicasharacoincani. “Jesús nocon Iforan,” mia huamisifo. Min ato yonoa cuscan noco inansharafo. Futsafori nanfoan ato inansharamisifo. Ascancunfin noco coin man non oian iconcoin min Furun Jesús aton Ifocoinran, —ishon nan ahuuomafoan yoishcani.

<sup>14</sup> Ascan mato Upa Dios cufishoshcani. Man ato Dioshuunshon shara huaa cuscan. Ascashon yoiqui isca huashcani, —Upa Diosin, minhuunshon nafoan noco shara huaa. ¡Aicho! Upan non fasi atohuun noicoin. Atori shara huahuu, —ishon mato cufishoshcani. <sup>15</sup> ¡Aicho! Upa Diosin ahuun Furun Jesucristo noco inansharaconni. Ascashon nocoqui nichini no fu rafupacunon. Afin fasi sharacoinquin. Paratamari ahuunoa yoipaisharafia noncαι tapiama ahuuscashomain non yoisharatiroquin.

## 10

### *Pablonun ato tapimana Diosihuunshon ato yonoshomisi Jesushuunoa yosishquin*

<sup>1</sup> Natian un tsain futsari mato yoisharapai. Uhuun yoramishtichin ua nicasharacapun. Cristocai tsain curushpan noco yoima. Nocohuun noishon funainquimashta noco yoisharai non ahuun tsain nicasharanon. Nanscarifi aqui un Cristohuunshon mato funainquimashta yoisharapai man tapinon. Man atirififain yoiquin isca huamisi, —Pablon no fu icun non oinmisi ahuun tsain shacashta noco yoimisi. Ascafia noco cunushomisi cuscan ascaracaima ratutama cayacafico noco curushcain cunushomisiran, —ishon uhuunoa yoimisifo. <sup>2</sup> Un matoqui nocoshocai curushcain mato yoipaima man ua nicanon.

Atirififoan shinanqui isca huafio, —Pablonun nan icoira huamafoan shinainfo cuscan noco yoi. Diosin ahuun shinanpacai noco yoiamaran, —ishon yoiafo. Un matoqui nocoshon un ato ismatiro nan icoira huamafoan shinain cuscacai un mato yoimisima. Diosin shinain cuscan fusti un mato yoimisi. Nocoshon un ato tsain curushu yoishquin tapinonfo. <sup>3</sup> Icon nuno non mai ano ica. Ascafiashu icoira huamafoan futsafo finonmapaiyai cuscan noncαι asca huamisima noco noicasmaifo finonshquin. <sup>4</sup> Nan icoira huamafo ashi futan piyan rutunancani. Ascan noncαι ascara ashi non piya non ahuara futsafoyashon nan noco noicasmaifo yoshin chacafo non unumatiroma. Ascatama Diospan curushhuunshon nan noco chaca shinanmapaiyaiifo non ato cuyotiro.

<sup>5</sup> Ahuarafoan nocon nomuranshon noco amaqiri shinanmapai non Diospan curush-huunshon non aflo potatiro afanan noco anori shinanmanonma. Nanfoanfin Dioshu-unoa noco shinanmapaicanima. Non mato yosimisi cuscan nicacasmaifo. Nanscaraflo no fu fochishmanantanpaicani. Noco Dios onanmapaicanima. Cacapaimisifoan Dios finonpaifia non Diosin curushhuunshon nanfo non potatiro afanan ascarafo inonma. Non nocon Ifo cufitiro isca huaquin, —Nocon Ifo Cristo, nantifi uhuun shinanpan aton ifo ihuun. Un shinain cuscan mirus fusti ua shinanmahuu un mia tanasharanon, —ishon anori nocon Ifo Cristo non yoitiro. <sup>6</sup> Man Jesucristo nicacoinshon afanan ahua chaca huayamaino un afanan oaitian nan yoitimaflo un ato oinmapacushquin. <sup>7</sup> Un mato muran imisi cuscan shinancahuun. Man futsa yoiqui isca huaa, —Pablocai ahuama. Acai mutsisipamaran, —ishon yoiafo. Yoiafori, —Nonfin Cristo ahuun yorafocoin, —ishon yoia. Iconquin shinantirofo urifi Cristo yoracoinran.

<sup>8</sup> Nocon Ifo Jesús ua yononi cuscan un mato yonotiro mato chaca huamatama nocon Ifo un mato tanasharamafain maton ointi fupi huamanon. Un anori mato yoimisiflashucai un cacapaimisi itama un mato shara huemapai. Un mato anori yoicai un rafipaiyama. <sup>9</sup> Uncai uhuun cunupan mato musumapaima. <sup>10</sup> Atirififoan uhuunoa yoiquin isca huafo, —Pablonun nocouqui cunua cuscan fasi shafacafi mutispacoin. Ascafia afincion no fu icun man non oimisi aacai ahuama. Ahuun tsain ahuamaran, —ishon uhuunoa yoimisifofio.

<sup>11</sup> Nannori uhuunoa yoimisifofiano un samamashta mato ari cashon uhuunoa un mato tapimashquin. Un mato cunushomisi cuscan nannorico un nocoshon un mato yoishquin.

<sup>12</sup> Futsafoan mato yoimisifo isca huaquin, —Unfin fasi ahuara tapicoianquin. Un mato tapimasharatiroran, —ishon yoimisifo. Ascarafo ichanancanashu afi ranan yoinancani, —Tsoa futsacai noco cuscara sharama. Norus fusti non tapisharacoianquin, —ishon nan cacapaimisifo ascamisifo. Nanscashon nanfoan fasi amaqiri chaca shinanmisifo. Uncai yoitiroma un sharacoin. Ascashu un aton cuscara itiroma. <sup>13</sup> Noncái anori yoipaitiroma. Diosin noco yonoa cuscan nan fusti non mato yoitiro. Noco yononi non mato ahuun tsain shara yoinon. Nan fustisi non shinanmisi. <sup>14</sup> Non yoia cuscan iconcoin. Noncái cacapaimisima. Diosin noco yonoa cuscan nan fustisi non mato yoitiro. Diosin noco yonoqui tau huani non mato ahuun tsain shara Jesucristohuunoa yoinon.

<sup>15</sup> Futsafoan mato yonoa cuscacai, —Non mato yonoaran, —ishon non yoimisima. Nonfin mato yoiaquin nan non mato ashomisi fustihuunoa. Futsafoan mato ashomisi-huunoacai non yoimisima. Manmain paratamari Jesús icoira huapainon. Ascan Diosin noco yononaiton non mato paratama yositiro. <sup>16</sup> Man nanscaino nan tsain shara Jesucristohuunoa nan chai icafori yoitiro. Nan chai icafo man futsan ato yoianocai un ato yoiaran un itiroma. Noncái futsa yono shutipaimisima.

<sup>17</sup> Ascan Diosin tsain cunuquin isca huani, —Ascan man ratoran futsa mafiri yoisharapaitama nocon Ifo Jesushuunoarocon yoisharacahuun, —huani. <sup>18</sup> Futsan afiri yoisharaicai acai ahuama. Ascaiton nocon Ifo Jesús ahuunoa yoisharaino non icoira huatiro na nocofunu shara imisi.

## 11

*Pablon Jesús fu rafucoinmisi futsafoancai Jesushuunoa tapiamafiacashon ahuunoa futsafo tapimapai*

<sup>1</sup> Un mato natian yoi. Nan yoran shinansharayamaiton shinantiro cuscan nannori un mato yoifiaquicai nanscaracoin un yoima. Ascacun man ua nicamisi cuscan natianri ua nicasharacapun. <sup>2</sup> Nocofunu ahuin futsa fu icun fasi fashicointiro. Un Cristo yoiyonri arus fusti maton funu cuscara mato iquinon. Manfin ainfo nocofunu futsa fu imisima

cuscarauquin. Cristo fusti mato Ifo itiroran ishon un yoiyon. Man ascayamaino urifi uhuun ointi nocotiro.

<sup>3</sup> Ascacun un matohuun musui Satanás Eva parani cuscan futsafoan matorifi maton nomuran parapaicani man Jesús afanan tanasharayamafain Cristo fusti man noinonma. <sup>4</sup> ¡Ohuashta! Futsafoan samamashta mato parapaicani. Non Jesushuunoa mato yoimisi cuscan futsafoan matoqui nocoshon ahuunoa yoicoianmafiaifoan mancái ato shatumapaitama manrocon ato icoinra huai. Non Diospan Yoshin Sharahuunshon tsain shara Jesushuunoa mato yoimisi cuscan nanfoan yoicoianmafiaifoan manfin ato icoinra huaquin. Jesushuunoa amaquiri mato yosifiaifoan man ato shatumanama. Man ato nicaquin yoimisi, —¡Aicho! Man nocofu ipainon, —man ato huamisi.

<sup>5</sup> Ascacufin nanfori afiri yoisharafiai nanfoancai ua finoanfoma. Ascashon mato isca huaquin yoicani, —Diosin noco nichian non mato yosinon, —ishon ifiacashoncai ua finoanfoma. <sup>6</sup> ¿Man shinanmun un mato Diosin tsain yoiquin uhuun tsainman mato yoisharatiroma? Ascanfia unfin Diosin tsain tapisharaquin. Nan un mato yoiai cuscan cayacafico. Manfin ua onancoianquin. Man man tapian un mato Diosin tsain shafacafi yoimisi. Nanscarai un mato ismafafaini.

<sup>7</sup> Un Diosin tsain yoiai chaincai un mato ahuashta yocamisima. Uncai mato ahua fiamisima. Ucai mato pui yocama. Ascan un mato chaca huaraca. Ascafia ascaracaima. Mancái ichananshon nan Diosin tsain yoimisicai man inanqui fuya huamisima. Nanscaracai man tapiataima. Un mato Diospan tsain shara Jesushuunoa yoimisi mato shara huaquin man Diospan facufo inon. Un asca huaquicai un mato ahua yocamisima. ¿Ascan man uhuunoa shinanchacaimun? —Pablocai ahuamaran, —ishon man uhuunoa shinanraca. <sup>8</sup> Un matofu icai chaincai nan icoinra huafó mani futsa arishon ua inannifo ahuun rafanan un yopai cuscan un finon. Maficairocon man ua inanshara icuana. Ua inanfo rafanan un yopai cuscan un fia aiyashon un mato Diosin tsain yoishquin. <sup>9</sup> Un matofu ipaoni chaincai un ahuara yopafiaquin un mato fucash huapaonima. Nantianri Macedonian anoia icoinra huafó nocouqui nococashon un yopai cuscan ua inannifo. Un mato ano ica chaincai un tsoa ahua yocamisima. Uncai tsoa ahua yocapacunacama.

<sup>10</sup> Ascacufin un mato Cristohuunshon icon fusti yoimisi. Nanscacun ahuun tsain iconco un mato ahuun nomuran un nanua. Tsoa Acaya mai anoaoancai un mato yoiai cuscan ua shatumatiroma. <sup>11</sup> ¿Un mato anori yoiquinmun un mato noiama? Ma. Anorimafinquin. Diosin tapian un matohuun noicoin.

<sup>12</sup> Nanscacun un mato yonoshonai chaincai un mato ahua fiapaimisima. Natianricai un mato ahua yocaima. Nanscasi huaquin un mato yonoshonicai nan paramisifo afanan man icoinra huanonma. Nan un yonoai cuscan futsafoan yoimisifo isca huaquin, —Norifi non Pablón yonoai cuscan non yoniran, —ifiamisifo nanfocai un yonoai cuscan tsoan yonomisima.

<sup>13</sup> Nanfoan paramisifo. Un icai cuscan apaifiacanicaí tsoa ascacoianfoma. —Cristo noco yonoaran, —ishon mato shinanmapaifiacani nanfocai Cristo fu rafumisifoma.

<sup>14</sup> Icon Satanás nocouqui nocotiro nan Diosin ahuun oinmati afu nai muran ica shara ointsa. Ascashon yoitiro, —Unfin mato shafacafi yositiroquin, —ishon noco fuparapaitiro. <sup>15</sup> Ascacun Satanás yonoshomisifori nan cuscara itirofo. Chacafofiacanashu Diospan yora shara ointsa itirofo. —Norifi non Dios yonosharashomisiran, —ishon noco shinanmapaicani. Ascafiaifoan ahuun unutaquin Diosin ato onaintimaquin finacoinshquin. Nanfoan chaca huacanashu omitsiscapanacafo.

### Pablón Jesús fu rafumisi omitsiscanci cuscan

<sup>16</sup> Un mato yoia cuscan afanan mato yoinon. —Pablón ahua tapiamaran, —ishon uhuunoa shinanyamacahuun. Ascafia uhuunoa shinanpaiqui ua nicayocahuun. Nan man yora futsa ahua tapiama man nicatiro cuscan uarifi nicasharayocapun. Ufiri un

ichapama yoimusharanon. <sup>17</sup> Un mato yoiai cuscan ufiri un yoimuishara cuscacai uhuun Ifoan ua yonoama. Un mato yoishquiai cuscan nan ahua tapiamafaon yoimisifo.

<sup>18</sup> Icoinra huamafaon afiri yoimuishara cuscan futsafoanri mato yoimisifo. Ascacun nantian un mato yoi ufiri un yoimuisharai cuscan. <sup>19</sup> Mafí man shinamun man tapi-coian. Nanscashon nan ahua tapiafoma man ato nicatiro. Mato amaquiri yoifiaifoan mancái ato shatumanama.

<sup>20</sup> Nan ratoran futsan mato curushcai yonoai cuscan man nicacointiro. Man ahuun oinmatifo cuscaracun mato nanfoan yonoa. Ascashori mato yonocani man ato cushusharanon. Mato fucash huafain mato roamisifo. Matoasca huamisifo. <sup>21</sup> Matoasca huariaquin shinanfo racafi,—Nofin mutsisipafaoquin,—ishon shinanmisifo. ¡Ohua! Uncái anori shinanmisima. Ascan uncaí icaifo cuscan ufiri yoimuisharatiro. Man shinanracafin un mutsisipamaquin. Nanfoan mato aca cuscacai un matoasca huamisima. Ascacun un rafipaitiro. Ascafia nanfo afiri yoimushara cusracifiai nanfoan mato ahuara yoiafo cuscahuunoari ufin un yoimuisharatiro. ¡Ohua! Nan ahua tapiafoma cuscan afanan un mato yoi.

<sup>22</sup> ¿Nanfoan yoiafomun, —Non Hebreo sharafo, —ishon? Unrifi un Hebreoquin. ¿Nanfosimun Israelifo? Urifi un Israeliquin. ¿Nanfosimun Abraham ahuun funafo? Urifi un ahuun funaquin. <sup>23</sup> ¿Nanfosimun Cristo ahuun oinmatifo? Uncaifin ahuun oinmati shara finacaiaquin. ¡Ohua! Unasca huaquin yoipaiyamafiaquin un mato yoiai cuscan shinancapon. Nan paramisifoan mato yoiquin isca huacani, —Nonfí fasi curushcai Jesús yonoshonaquin, —ishon mato yoiafo. Uncaifin fasi yonoshoque finacaiaquin. Nanfoanraca yoiqui isca huamisifo, —Jesushuunshon noco cunu muran iquimanaforan, —ifiamisifo uacaifin cunu muran iquimaquin finacaimisifoquin. Uacaifin fichin coshaquin finacoinmisifoquin. Ua coshafotici un tanan huatiroma. Mun nari cuamisi.

<sup>24</sup> Uhuun yora Israelifoanfin ua mucus fustiti coshaqui huafquin. Nan ua coshaifotifi ua treinta nueve huafain ua coshamisifoquin. <sup>25</sup> Romanonfoanri ua coshaquin rafu non fusti huaifo. Ascashon uarifi uhuun caifoan toquirinin tsacaquin fusti huanifo. Shashohuanun non pocufainaino man uqui shashohuan cashcui rafu non fustiaino mun asa cuani. Man shashohuan ua ya cashcuano un yamu fusti non shafa fustiri unuhuan naquinoashu un ahuun naoti yatanni asashquima. <sup>26</sup> Un cahuancacainaichain manifoti Jesushuunoa yoishquin nan unu coshicoain fasi musucoin muran icain ua yomutsofan achicashon ua musuni tapifain uhuun caifoncoinchi ua musuni tapifain nanscarifi aquin uhuun caifomafoan ua musuni tapifain. Pushurasifo anoafaoanri ua musuni tapifain tsoan istaipama anoafaoanri ua musuni tapifain unuhuan musuni muran futsafoan yoiquin isca huaf, —Norifi non Jesús Ifo huaran, —ifiacashon parafo. Nanfoanri ua musuni tapifain. <sup>27</sup> Un isin mufiain un fasi curushcai yonomisi nan un yamu ichapa osha tunufain un foniyanan nomicain piqui tunufain fasi un matsinacain sahuutiamicaín.

<sup>28</sup> Ascatarifi nantifi Jesús icoínra huafio ichananti pushu anoshon ahuara ato fucashni huai cuscan urifi un atohuunshon uhuun ointi nocomisi. Shafatifi un ato shinamisi. <sup>29</sup> Un nica futsan Jesús tanasharapaifiai ratuaino urifi un atohuun ramapaitiro. Nan futsan chaca huacun un ahuunshon urifi mutiro. Futsan futsa chaca huamacun urifi uhuun ointi atohuunshon un nocotiro.

<sup>30</sup> Ascan un mato rama yoia cuscan un afanan yoimuisharinocai, —Un Jesusmaisi ahuara huatiromaran, —ishon man tapinon. Un omitsiscamisi cuscan un mato yoi.

<sup>31</sup> Non isca huanon, —Upa Diosin min shararan, —non huapanon. Nan nocon Ifo Jesucristo ahuun Apa nannori non yoipacunon. Nantofin man tapiaquin. Uncái mato paraíma. <sup>32</sup> Nan pushurasi ahuun anu Damasco ano niaifoncoinnin Aretas ahuun niaifo patashari yononi nan pushurasi Damasco ano cushushon ua achinonfo.

<sup>33</sup> Ascacun nan Jesús icoinra huafoan ua futanmanhuan muran onucashon cunu foman cayashon ua fotomanifo un casharanon.

## 12

### *Pablon ahuun namapan cuscara Diosin tapimani*

<sup>1</sup> Ufin un yoimuisharai. Ascara tsain uhunua un yoimuainocai ahuacoinma. Nanscafiacun nocon Ifo Jesús ua oinmana cuscan un mato yoinon. Ascano namapan cuscara ua oinmana. Tsoan nicayomisima cusrarifi ua tapimana. Nannori un mato yoi. <sup>2</sup> Catorce fari man finoan Diosin nai muran icano ua ihuiriscatani. Un Cristo fu rafuaiton oinquin ua ihuiriscatani. Uncai tapiama uhun yoshin fusti nai muran caniyamarai uhun cayafoya un caniraca. Diosin fustitofin tapiaquin nan un ini cuscan.

<sup>3-4</sup> Diosin nan icano ua ihuiriscatani. Un mato yoia cuscan afananri un mato yoi. Uhun yora mumacoin iyamarai uhun yoshin fustisimain caniquin uncai tapiama. Diosin fustitofin tapiaquin nan un ini cuscan Diosin icano ua ahuara nicamani cuscacai un tsoa futsa yoitiroma. Ascashon ua yoiquin isca huani, —Un icano min oian cuscan tsoashta yoiamahuu, —ishon ua Diosin yononi.

<sup>5</sup> Un oian cuscan huafain un futsa yoitiro isca huaquin, —Diosifin ua fusti nan icari ua oinmaniquin, —ishon un yoitiro. Ascafiaucui un anori yoipaima. Asca huaquin yoiahu un cacapaimisi itiro. Uncai ufiri yoimuisharapaima. Uruscai un ahua huatiroma. Unfin Diosinhunshon un ahuara huatiroquin. Nanscacufin nan fusti un yoimisi. <sup>6</sup> Ufiri un yoimuisharapaifin un yoimuitiroquin. Un anori yoiquicai yora tapiamafoan yoitiro cuscan un yoima. Un iconcoin uhunua yoisharatiro. Ascafia uncai ufiri yoimuisharapaima uhunua shinanquin finacoinnonfoma.

<sup>7</sup> Upa Diosin icari ua ismani cuscan tsoa futsacai oinmisima. Ascano Diosin shinanni ua oinmanihuunoashu ufiri yoimuisharaino un cacapaimisi itiro. Ascacufin Diosin Satanás nitun huamayamaino yoshin chacan uqui nichini ua fucash huariamisi un cacapaimisi inonma.

<sup>8</sup> Ascacun un cufinquin isca huani, —Ifon, ua cayahuapun, —ishon un yocaquin rafu non fusti huani. <sup>9</sup> Un asca huafaiton nocon Ifoan ua cumaquin isca huani, —Un mihiun noi. Uhun curushhuunshon nan pau min tunutiro. Un mifu rafucacaini. Nan fusti min yopai. Min mutispamafiacun un minhuunshon un ato ismatiro un ahuamamishti huatiroran, —ishon ua cumani. Ascacufin unimaquin un yoifafainicai isca huaquin, —Un mutsisipamafiacun uhun Ifo ahun curushu ua inantiroran, —ishon un yoishquin. Ascano Cristo ahun curushu ua inantiro.

<sup>10</sup> Ascano un mutsisipamafiashu Cristohuunoashu un unimai. Ascashon ua roafain ahuara chaca finoin omitsiscamafain ahuaraoan ua fucashni huafiaino un unimaquin tunutiro. Un asca huaquifin un mutsisipamafiashon Cristohuunshon un ahuamamishti huatiroquin.

### *Pablonun icoinra huafo Corinto anoafio fasi shinanni*

<sup>11</sup> Nan yora ahua tapiamafoan yoitiro cuscan un mato rama yoia. Un mato anori yoifiafin matohun nuaquin. Asca ufiri yoimuisharatama mancairocon uhunua yoisharafin shara icuanaquin. Nan futsafoan mato paran. —Nonfin Jesucristo fu rafumisisharaquin, —ishon mato parafiamisifo man ato icoinra huamisi. Ascan uacaifin man icoinra huaquin finacaitiroquin. Un ahuamafiacuai afoan ua finoncoianfoma.

<sup>12</sup> Un Jesucristo fu rafumisicoinhofin un mato ismamisiquin. Un ahunshon mato ahuara sharafo isma man Jesús icoinra huanon. Un ahunshon mato isma cuscan yoiafo, —¡Aira! ¡Oincapon! Diosin ahuamamishti huatiroran, —ishon yoimisifo. Ahunshori ascapainifo un mato isma Diosin ahuamamishti huatiro tapinonfo. Funaquima un afo mato ismacoinmisi.

<sup>13</sup> ¿Ascan ahuuscaquimun man isca huaquin shinanquin? —Pablonun icoinra huaa futsafo shara huaa cuscacai nocorifi shara huashoanmaran, —ishoncai man uhuunoa yoitiroma. Un icoinra huaa futsafo ato shara huashoan cuscan nanscarifi huaquin un mato shara huafafaini. Uncai mato ahua fianpaimisima. Unricai mato fucash huamisima. —Ua pimafain ua sahuumacahuuncai, —un mato huamisima. Ascacun ua rau huacapun.

<sup>14</sup> Munfin mato ano cai rafuaquin. Mun itisharashu natian afanan un mato ari cai. Un amisi cuscacai afanan un mato yocaquin fucash huaima. Uncai matona fipaitama unocon mato fuchipaico. Shinancapon. Facufoancai apa yafi ahua pimamisima. Ascan ahua futan apacaifin aton facufo pimamisiquin. Ascan manfin uhuun facuinfo cuscaraquein. Ascan uncaifin mato Diospan tsain tapimasharaquin uhuunoashu man isharanon.

<sup>15</sup> Ascancunfin nantifi un ahuara ya cuscan un mato inanfain ufiri un inanmuí man Jesús tanasharanon. Ascacun un mato noiquin finacoinfiaitocai man ua noiquin finacoinma. <sup>16</sup> Atirifoan uhuunoa yoquiraca isca huafo, —Icon Pablon noco ahua yocaya-mafiaquin noco paran. Noco ahua fianyamafiaflashon noco fomanran, —ishonraca man yoimisi. <sup>17</sup> ¿Nan nocofunufo un matoqui nichini nanfohuunshon unmun mato paran maton pui fianshquin? <sup>18</sup> Un Tito yoini isca huaquin, —Corintoano catahuun, —un huani. Noco futan icoinra huaa futsafori un matoqui nichian. ¿Titopamun mato paran matona fianshquin? Ma. Man manfin tapiaquin Titopacai matona fianpaimisima. Un matofu imisi cuscan arifi matofu ica. Non nanscara rafu matohuun noiquin. Mato shara huashopai Diospan Yoshin Sharahuunoashu noco rafu non matofu imisi.

<sup>19</sup> —Man shinan raca un mato yoiai cuscan man uhuunoa shinansharanon, —ishon un mato yoi. Ma. Anoricaima. Upa Diosin nan un yoiai cuscafin ua nicaquin Cristo ua yoimai cuscan un mato yoiaiton. Uhuun yoramishtichin nan un mato yoia cuscan un mato shara huapai Jesús shinain cuscan huaquin marifi nannorisi man shinanon.

<sup>20</sup> Ascacun un matoqui nocoshon oinpai man chaca shatushon Jesús tanasharanon. Un matoqui nocoshon oian man chaca shatuyamacun uhuun nomuran un omitsiscatiro. Un matoqui chipo nocaitian manraca fochishmanantananci futsa finonmapai aqui sinacai samamashta sinacucahuanmisifo icaiasca huaquiraca, —Norus fusti tapishara. Tsoa futsafoancai non tapishara cuscan tapiafomaran, —icain. Nannori yoitiacanashu chaca huatanancain yoiti huatanancain cacapaimisi icain man nannorisi shinanquima. Man nansca huainofin un ratuicain. Man asca huaquin chaca shatuyamashu man ua oinpaiyai cuscacai un ascatiroma. Man uqui unimaquin ua oinpaiquiaquin man chaca huaino un matoqui unimatamarocon un fasi mato shinain omitsiscatiro. Man nanscaiton un mato oinmanaquin.

<sup>21</sup> Man asca huainofin un matoqui nocaitian un ratuicain. Maton nomuran man ahuarao shinanchacafain maton nomuranshon man chaca huapaiyai cuscan huariaino. Nocofunufoan aton ahuinma fu icaifoanno ainfotofori aton funuma fu icaifoanno. Nanscara chaca futsa futsatapafo huafain man maton chaca shatuashma Diosiqui man afanan nasoyamaino. Un matoqui nocoshon oian man asca huaino un ratutiro. Maton ointaifi uarifi Diosin matohuunshon ua rafimashquin. Man acai cuscahuunoashu un fasi omitsiscatiro. Ascacun un uaiyanan mato oinmai.

## 13

### *Pablonun afanan chaca huanonfoma ishon ahuun unutaquin ato yoini*

<sup>1</sup> Mun mato oinqui rafu huaa. Natian un afanan mato oincay. Diospan tsain noco yoiquin isca huani, —Tsoan yoiquin isca huai, “Nanton chaca huaran,” ishon yoiaino. Rafu non fustiton nannorifosi yoiaino iyamarai rafutan nannorisi yoiaino non icoinra huatiro, —ishon Diosin tsain cununi. <sup>2</sup> Un matofu iyoshon un mato yoini man chaca

huanonma. Natianrifi un afanan mato yoi. Un matoqui nasoshon oian tsoan aton chaca shatucunma un ato oinmashquin. Tsoashtacai un finonmashquima.

<sup>3</sup> Manraca tapipaicai Criston uhuunshon mato yoaiton. Iconquifin man tapicai. Man samamashta tapitiro. Un mato shafacafi ismatiro. Uncai mato ipaitsi yoima Cristohuunshon un mato yoi. Cristocai mato fuparanima tapimanama mutsisipaco-incain mato tapimai man maton chaca shatunon. <sup>4</sup> Icon Cristo nocohuunoashu ihui coyan iquinanqui mastafono nocofunu fupashcoin ini. Nocohuunoashu naicain afin numanima. Naflanishaquin natian Diosin ahuun curushhuunoashu man afanan nia. Nanscarifiai nonricai mutsisipama. Afin omitsiscani norifi omitsiscatirofiahu Cristo mato shara huashoan cuscan norifi Diosin curushhuunshon mato shara huafafaini.

<sup>5</sup> Ascacun maton nomuranshon shinancahuun. ¿Iconmun man man Jesús icoinra huaa maton chaca shatucoianshu Upa Dios fu ipashcaquin? ¿Man tapicoianmun Jesucristo matofu rafua? ¿Man mumisimun? ¿Man mafiri fuparamuamun? —¿Unfin Jesús ahuun yoracoinquin,—ishon man yoiflashucai man ahuun yoracoinmamun? <sup>6</sup> Man manfin ua oinquin tapiaquin un Cristo ahuun yoracoincun. Nan man icoinra huapainon. <sup>7</sup> Un mato Upa Dios cufishomisi man chaca huanonma. Nocohuunoa shinansharanonfo ishoncái un Upa cufimisima. Isca huaquin futsafoan nocohuunoa shinantirofo,—Pablon yafi afu rafuafoancai ato yonoshosharafomaran,—ishon nocohuunoa yoifiacanashu. Ascacun marifi man Jesús tanasharaino fasi sharacoin itiro.

<sup>8</sup> Noncái ahuara iconcoin shatumatiroma. Non asca huapaitamarocon Diospan tsain iconcoin non afohuunoa futsafo yoisharapai. <sup>9</sup> Ascano non ahuamaran ishon shinanfiacaquin man Jesushuunoashu isharacoiaianno non fasi unimacointiro. Ascan non mato Upa Dios mato cufishona man nan cuscara sharacoin inon. <sup>10</sup> Ascacufin un mato isca huaquin cunushona cuscan. Un matoqui nocoshon oian man Cristo tanasharacoincun un ointoshinon. Uficoín un mato muran cayamaquin un mato cunushoquin isca huai man nicasharanon. Ascan un matoqui nocoshocai Diospan shinanhunshocai un mato curushcain yoishquima. Diosicai un mato oimanon ua yonoama. Uroco mato Jesushuunoa shinansharamani.

<sup>11</sup> Uhuun tsain unutaqui un mato yoisharapai. Jesús cuscara shara fusti ipaicahuun. Ua nicasharacapun. Nannorisi shinancahuun. Isharacahuun. Man ascaíno Diosin matohuun noicoincain mato imasharanon. Ascashon maton ointi unimamanon matofu ishon. <sup>12</sup> Nantifi yoinonansharacahuun. <sup>13</sup> Nantifi Jesús icoinra huafu ufu icafoan mato yoisharapai. <sup>14</sup> Nocon Ifo Jesucristo matohuun ramapai. Nocon Diosiri matohuun noicoin. Diospan Yoshin Shara matofu rafupacunon. Nanti.

Pablo

## Pablonun Galacia Anoafo Cunu Fomani

### *Pablonun Galacia anoafon nan icoindra huafoti cunu fomani*

<sup>1</sup> Unquian Pablo un mato cunu fomai. Unfi Jesucristo fu rafumisi. Un mato ari caitocai nocofunufoan ua nichinifoma Jesucristo futan Apa Diosin ua nichinifo. Man Furun naafiacun Apa Diosin funimani. Nan rafutan ua mato ano nichinifo. <sup>2</sup> Nan icoindra huafon nuno ufu icafoan nantififain Jesús icoindra huafon Galacia anoafo mato tsain shara fomai. <sup>3</sup> Un mato fasi shinain. Nocon Upa Diosin futan Furun Jesucristo matohuun ramapai. Maton ointi mato unimamanon. <sup>4</sup> Ascacun non chaca huamisihuunoashu Jesús nani noco chaca soashoshquin. Nan maifoti ano yora chacafo muran non ica. Upa Diosin afin apaiyai cuscan nan chacafo murannoatian Jesús noco numai. <sup>5</sup> Ascacun,—Dios sharacoinran,—huapanonfo. Amen.

### *Jesús fustiton noco chaca soashonano ahuunoashu fusti non Upa Dios ari nocotiro*

<sup>6-7</sup> Ascan Cristo matohuun ramapaiyaino Upa Diosin mato catonni. ¿Upa Diosin mato catonfianicun tsain futsa nicaquin ahuuscain man samamashta Upa Dios potaimun? Nancaí Jesucristohuunoa cuscarama. Nanscaracai tsain futsa sharama. ¡Ohua! Man ascaiton nicai un matohuunshon ointi nocoi. Un shinanraca futsafoan mato amaquiri yoishonafo mato funomashcaquin. Nan tsain sharacai Cristohuunoa cayacafi mato yosiafoma. <sup>8</sup> Un nan tsain shara mato cayacafi yosimisi. Ascan tsoan mato amaquiri yosiamun un iyamarai ratoran futsan iyamarai Diospan oinmati afu nai muran icaton amaquiri yosiashu omitsiscapanacafo muran fopainonfo. <sup>9</sup> Un mato yoimisi cuscan un afanan mato yoi. Un na tsain shara Jesucristohuunoa un mato yoimisi cuscan man man icoindra huaa. Ratoranfoan mato amaquiri yosipaiashu omitsiscapanacafo muran fopainonfo.

<sup>10</sup> Unci ufire curafia huamupaima. Ascatama un Upa Diosin uhuunoa shinamasharapai nanton ua amapaiyai cuscan huaashquin. Un yorafo uhuunoa shinamasharapaiyaino uncaí Cristo oinmati itiroma.

### *Ahuuscashucon Pablo Jesús fu rafumisi inimun*

<sup>11</sup> Uhuun yoramishtichin un mato shafacafi tapimapai. Na tsain shara Jesucristohuunoa un mato yoimisi cuscacai nocofunufoan aton shinanma. <sup>12</sup> Na tsain shara un mato yoimisi cuscacai nocofunun ua tapimanima. Tsoa futsacain ua yosiam. Ascatamarocon Jesucristo uhuun nomuran ua shinanmana cuscan un mato yoimisi.

<sup>13</sup> Nocon shunifoan noco yonopaoni cuscan anunifo Judaismon. Urifi nan un tanacoinyopaoni. Nanfin man man nicamisi. Man man tapia nan Jesús icoindra huafon Dios tanasharapaiyaifo un fasi curushcain ato omitsiscampaoni. Un ato cuyopaicoinpaoni.

<sup>14</sup> Noco shunifo nan Judaismon noco tapimapaiyai cuscan un fasi finonmafain tafafainpaoni. Uncain fasi finonmafain tapifoanfafafainpaoni. Uhuun faritiri un ato finonmacoinpaoni. Un fasi tapiquin finacoinpaipaoni.

<sup>15-17</sup> Un caiantaima Upa Diosin ua fasi ramapaiquin ua catonni un ahuun yonoshomisi inon. Upa Diosin ua yoimamapaiyai cuscan uhuun caifoma un ato Furun Jesucristohuunoa tapimanon. Unci nocofunu futsa fu tsainnima ua tapimanon. Upa Diosin afin ua catonnitan un Jesús fu rafumisifo ari catama. Unrocon Arabia mai ano cani. Nannoashu un chipo Damasco pushurasi ano nasoni.

<sup>18</sup> Ascano fari rafu non fusti finonyotan un Damasco anoashu ari cani Pedro oinpai. Un quince oshatan un afu iyoni. <sup>19</sup> Nan Jesús fu rafumisifo docecaí un atoqui nocoyonima. Santiago nan noco Ifoan Jesús chipocu fusti un oinni. <sup>20</sup> Uhuun yoramishtichin

ua Diosin oiaainno un mato icoinra huamapaifain un mato cunushonai cuscan nan iconcoinc. Uncai mato paraima.

<sup>21</sup> Tapicahuun un chipo Siria yafi Cilicia mai ano cani. <sup>22</sup> Nan Cristo icoinra huafu Judea anoafancoai ua oinyomisifoma. <sup>23</sup> Ua oinyamafiamisishaquin uhuunoa yoiaifoan nicamisifo isca huaquin,—Na nocofunun Pablonun noco omitsiscamapaoni non afanan Jesús icoinra huanonma ishon. Nocorifi cuyopaipaoni. Ascafia natian arifi man Jesús icoinra huaa. Ascashon futsafori icoinra huemapairan,—ishon yoinifo. <sup>24</sup> Ascashon uhuunoa yoinifo isca huaquin,—Pablonun man Jesús icoinra huaa. ¡Aicho! Diosin fasi sharacoin. Ahuamamishti huatiroran,—ishon yoinifo.

## 2

### *Jesús fu rafumisi futsafoan, —Pablo no fu inonquin, —huanifo*

<sup>1</sup> Ascano fari catorce finontan afanan un Bernabé fu ari cani. Tito arifi no fu cani. <sup>2</sup> Diosin uhuun nomuran ua shinanmanai cuscan un atoqui noconi un nocon caifomari nan tsain shara Jesucristohuunoa un ato tapimani. Atirificai un yoinima. Aton niaifofo fusti un ato yoyioni. Un ato yocani isca huaquin,—¿Un Jesushuunoa yoimisi cuscan man shinan cayacafimun? ¿Unraca ipaitsi yoimisi? Man shinain cuscan ua tapimacahuun,—ishon un ato yoini. <sup>3</sup> —Shara. Min ato yoia cuscan cayacaficoiran, —ishon ua yoinifo. Tito ufu oaiton Israelicuma, —Foshqui rupa shatuhuu, —tsoan huanima. <sup>4</sup> Futsafoan nannoshon yoinifo isca huaquin,—Norifi non Jesús icoinra huaran,—ifiacashocai tsoan icoinra huacoinnafo inima. Nanfoanri yoinifo isca huaquin,—Tito arifi foshqui rupa shatutiroran,—ishon yoinifo. Anori yoiyamafoannocai tsoan anori shinan icuanima. Nanfo no fu ichanannifo. —Norifi non mato cuscararan,—ishon noco shinanmapaicani. Ascashon noco fomanpaicani. Non Jesús icoinra huashu noncai ahua futsa yopaima isharashquin. Ascafia nanfoan yoinifo isca huaquin,—Noncai Moisés cununi cuscan ayamashu non Dios fu itiromaran,—ishon noco yonopaicani. Ascashon nanfoan afanan noco oinmati cuscara imapaicani non Jesucristo fustisi tananonma. Moisés yononi cuscan tananonfo ishon. <sup>5</sup> Nanfoan noco yonopaiyaifo cuscacai non ato tsain fusti non nicayoama man iconcoinc Jesucristohuunoa tapiai cuscan funononfoma.

<sup>6</sup> Uncai catontan niaifofosi noima ahuamafori nanscari huaquin un noicoin. Nanscarifi huaquin Diosicai nocon fusohuunshon noco onainma noco shafacafico onancoin. Ascacun Jesús fu rafumisifoan ua isca huacani,—Min Jesushuunoa yoimisi cuscan shara tsain futsa yopaimaran,—ishon ua yoinifo. <sup>7</sup> Ascan Diosin Yoshin Sharapan Pedro catonni Jesús fu rafumisi inon. Ascashon nocon caifo Israelife Jesushuunoa ato tapimanon. Nanscarifi aquin uarifi catonni un afu rafumisi inon. Ascashon uhuun caifoma urifi un ato yoinon.

<sup>8</sup> Ascashon Upa Diosin Pedro catonni afu rafumisi inon. Nocon caifo muran nichini. Jesushuunoa ato yoliaiton Upa Diosin Pedro mutsismani ahuun curushhuunshon ato yoinon. Nanscarifi aquin ua catonni afu rafumisi inon. Ascan nocon caifoma muran nichini un ato yoinon. Un ato yoliaiton ua mutsismani ahuun curushhuunshon un ato yoinon. <sup>9</sup> Ascano Upa Diosihuunshon un nocon caifoma yoliaiton nicaquin nan Santiago non Pedro non Juan atishon ua Bernabé yafi muninifo. Ascashon nocon yoiquin isca huanifo,—¡Aicho! Non nocon caifo Jesushuunoa yoimisi cuscan marifi futsafo yoitiro. Nocon Ifo yonoshosharatacahuun. Nonfin nocon caifo fusti ano camisi ato yoishquin. Ascan manfin caifo futsafo ari catiroquin. <sup>10</sup> Man nunoashu nasoaitian ahuuomafohuun ointiaquimayamacahuun. Nan pui non mucua foshotiroran,—ishon noco yoiafo. Nicai un unimacoian. Untsi nanscari huapaiyamai.

*Pablonun Pedro Antioquía anoshon yoini, —Min chaca huairan, —ishon*

**11-14** Ascanfiashon Pedro Antioquía pushurasi ano nocotan chaca huatishoni. Noco caifoma futan piyoni. Chipo Santiago fu rafuafo Antioquía ariashu nocoqui funifo. Nocotoshiaifoanno Pedronun afanan ahuun caifofosiyashon pini. Pedronun ahuun nomuran shinanquin isca huani, —Uhuun caifo Santiago anoashu funifo. Ascashocai nocon caifoma futan piinifoma. Ascan uhuun caifoma futan un piyaino uqui shinanchacatirofo. Ascano un afanan ato futan pitromaran, —ishon Pedronun amaquiri shinanni. Ascaiton oinquin un nantifiton ointaifi Pedro yoini isca huaquin. —Mirifi min Israelifiashu nocon shunifoan yonopaoni cuscan man min aquima. Min nocon caifoma cuscara imisi. ¿Ascan ahusscain natian min nocon shunifoan yonopaoni cuscan min nocon caifomafo min ato tanamapaiyain? —ishon Pablonun Pedro yoini.

*Israelifo yafi Israelimafoan ato chaca shatucanashu Jesús icoinra huacanashu Dios fu nipatirofo*

**15-16** Ascan noncai mani futsa cainnima. Nanfoanfin chaca huamisifo. Nonfin Israelifo cainniquin. Ascafia man man tapia Moisés noco yononi cuscahuunshocai non nocon chaca soatiroma noco Diosin onaintimanonma. Ascatama non Jesucristo icoinra huaiton nocon chaca soashotiro. Non ascaitocai noco onaintimashquima. Moisés yononi cuscan non aitoncai noco chaca soashotiro. Ascan non Jesucristo fusti icoinra huaiton noco onaintimashquima.

**17** Nonfin Cristohuunshon noco chakan soatiroquin noco onaintimanonma. Nanscara man non tapifiashunofiri non chaca huamisi. ¿Non chaca shatucoinyamacumun Cristo noco chaca huemapaiquin? Ma. Ascaria shinanchacapacuyamacahuun. **18** Moisés noco yononi cuscan man non tapian. Ahuunoashucai non Dios fu nipatiroma. Jesús fustiton nocon chaca soashotiro non afu nipanon. Nan non icoinra huai. Ascano Moisés cununi cuscan afanan nasopaiashu non funotiro Dios fu ipashquin. Non afanan nasoquin non oinmani non noco chaca shatucoinshoma.

**19** Ascan Moisés yononi cuscan ayamaquin mun tapini uncai afohuunoashu isharatiroma. Un ascainocai Upa Diosin uqui unimatiroma. Ascacun nanfohuunshon un tapini Cristo fusti un icoindra huaino Upa Diosin uqui unimatiro. Ascashu un ahuun yora itiro. Ascan natiancái un afanan Moisés yononi cuscahuunoa shinanpainacama ua nimapacunon. Afanan ascaria shinantama un Dios fusti fu rafui isharashquin.

**20** Nocon Ifo Cristo ihui coyan iquinanqui mastafaoanno nani cuscan urifi un afu naa cuscaracon ini. Ascacucái natian un ipaoni cuscan un afanan aimá. Un Jesús icoindra huataima un ipaoni cuscacai un afanan aimá. Cristo Diospan Furunmun ua noicoin afín ipaiyai cuscan ua nashoni. Ascacun un icoindra huaino natian Cristo unfu rafucacaini a cuscara ua imashquin. **21** Ascan Upa Diosin Furunhuunshon uhuun chaca ua soashoni un afu nipasharanon. Uncái ahua futsa shinamisima nipasharashquin. Nan fusti un shinamisi. Moisés cununihuunshon nocon chaca non shatutiroanocai Dios fu nipanon Cristo noco nashocuanima. Ipaitsi noco nashoncuani.

### 3

*Moisés yononi cuscan tanayamaraquin non Jesús icoindra huacun noco chaca noco soashotiro*

**1** Uhuun yoramishtichin Galacia anoafaoan manfin nison cuscarafoquin. ¿Tsoan mato amaquiri yosiamun? ¡Ohua! ¿Tsoan mato paramun man afanan shinansharanonma? Ascan nonfin mato cayacaficoín yoimisi Jesucristo mastafaoanno matohuunoashu nani. Non mato tapimasharafiamisicun mancaifin tsain amaquiri shinamisi.

**2** Nan fusti un mato yocapai man ua cumasharanon. ¿Moisés noco cunushoni cuscan tanashon man Diospan Yoshin Shara fia iyamarai nan tsain shara Jesucristohuunoa man icoindra huashon man fiamun? **3** Man Diospan Yoshin Sharahuunoashu Jesús mato imapaiyai cuscan man ayopaoni. Ascafia natian man shinanqui isca huua, —Moisés

noco yononi cuscan aashu non isharatiroran,—man ica. ¡Ohuashta! ¿Ahuuscaín nisofoan shinamisi cuscan man shinainmun?

<sup>4</sup> Man Jesús tanasharaiton mato omitsiscamapaonifo. Ascashon man Diospan Yoshin Sharahuunshon Jesús tanasharamisi. Natian afanan Jesús fusti tanayamaino man ipaitsi Jesushuunoashu man omitsiscapaoni. Ascayamapainon. <sup>5</sup> Man nicamisi cuscan man man icoínra huua. Ascacun ahuun Yoshin Shara mato inanfain tsoan oinyonima cuscara shara mato ashomisi. Moisés cununihuunshomaquian.

<sup>6</sup> Nocon shuni Abrahamhuunoa shinancapon. Abrahamfin Diosin yoiyoni cuscan icoínra huanquin. Ascaiton Diosin yoini, —Mian icoínra huacun un min chaca soashona min ufu ipanon, —ishon yoini. <sup>7</sup> Ascacun tapisharacahuun. Nan icoínra huafoti Abraham facu cuscarafo. <sup>8</sup> Upa Diosin inonpacoai cuscan tapiroíni nocon caifomafoanrifi Dios icoínra huaifoan aton chaca soashofain ato imasharashquin. Ascaifoanno atoqui fasi unimacoinni. Diosin Abraham yoiyoni isca huaquin, —Un min-huunshon manifoti un ato shara huashquiran, —ishon Diosin tsain cununi. <sup>9</sup> Ascashon Abraham icoínra huamisicun Upa Diosin a shara huashomisi. Nanscarifi aquin icoínra huafoti ato shara huashomisi.

<sup>10</sup> Ascan Diosin tsain cununi isca huaquin, —Moisés cununi cuscan ayamacanashu omitsiscái unupacunacafomaran, —ishon cununi. Tsoacai Moisés cununi cuscacoin amisima. Ascacufin ratoran futsan shinanquin isca huai, —Moisés cununi cuscan un aino Upa Diosin uhuun chaca ua soashotiro un afu ipanon, —ishon anori shinanfi-aicai ascacointiroma. <sup>11</sup> Tsoan Upa Dios icoínra huaitonfin ahuun chaca soashofain imasharatiroquin. Ascan tsoan Moisés yononihuunshon aton chaca soapaiquin shinantiro isca huaquin, —Moisés yononi cuscan non ainton nocó imasharatiroran, —ifiaifoancaí Upa Diosicai Moisés yononi ahuunshon ato imasharatiroma. <sup>12</sup> Ascacun man nonfin tapiaquin Jesús fusti non icoínra huashu non Upa Dios fu ipatiro. Ascan Moisés nocó yononi cuscahuunoacai ascarama. Moisés nocó tapimaquin isca huani, —Nantifi Diosin nocó yononi cuscan nantishotapiquin non acacainyamai non Dios fu itiromaran, —ishon cununi.

<sup>13</sup> Ascan Moisés nocó cunushoni cuscan non ayamaiton Upa Diosin nocó onaintimashquiran ishon cunufiani nococairocon finonmacufoantan Furun onaintimani. Nocohuunoashu omitsiscáni. Diospan tsain cununi isca huaquin, —Ratoran futsa ihuiqui mastaifo nanrifi Upa Diosin onaintimai omitsiscánon, —ishon cununi. Ascan non chaca huamisiano Cristo nocohuunoashu ihui coyan iquinanqui nani. Noco nashoyamanicun non omitsiscapacuana. <sup>14</sup> Ascan Upa Diosin Abraham shara huani cuscan Israelimafori Jesucristohuunshon ato shara huashquin. Ascacun nan icoínra huafoti ato yoiyoni cuscan ahuun Yoshin Shara ato ya rafumatiro. Ascan Cristo nocó nashoni Apa Dios fu non ipanon. Nantifi Diosin Abraham yoiyoni cuscan icoínra huua Israelimafori ato inanshquin.

### *Moisés yononi cuscan yafi Diosin Abraham yoiyoni cuscan*

<sup>15-16</sup> Ascacun uhuun yoramishtichin natian non amisi cuscahuunoa un mato iscara tapimai man tapinon. Afu nocofunu ahuara yoiyoshocai shinan futsatiroma manmain ahuun anu cunushon. Nanscarifiaí Upa Diosin Abraham yafi ahuun funa fusti yoiyoni. Ahusun funa ichapafohuunoacai yoiyonima. Abraham funa Cristo fustihuunoa yoiyoni.

<sup>17</sup> Un mato shafacafi yoinon. Upa Diosin Abraham yoiyoni cuscan cuatro ciento treinta fari finontan Diosin Moisés yononi. Diosin Moisés yonofiani Abraham yoini cuscan ointiaquimama. Nan yoini cuscafin aiquin. Ascashocai Upa Diosin shinan futsanima. Nan yoiyoni cuscafin man amisiquin. <sup>18</sup> Upa Diosin Abraham yoiyoni cuscan icoínra huaiton chipo Upa Diosin Abrahamhuun noicoinquin cashman ashoni.

<sup>19</sup> Ascan nanscaracumun ahuuscaí Moiséshuunshon Upa Diosin nocó yononimun? Un mato tapimanon. Upa Diosin Abraham yoiyoquin tau huani. Ascashon chipo Upa

Diosin yononi cuscan Moisés cununi nantiffain tapinonfo. Ascafia yononi cuscacai tsoa ascamisima. Ascatama yoitimashunifo. Ascafia nan Moisés yononi cuscafin tanamisi-foqui nan Jesús oaitian. Nanhunoafin Upa Diosin Abraham yoiyoniquin. Ascan Upa Diosifin ahuun oinmati afu nai muran icafo tapimaquin tau huani nanfoanrifi Moisés tapimanon. Nan ato yonopaiyai cuscan anonfo.<sup>20</sup> Ascafia Upa Diosicai Abraham ascara yoinima. Ahuun nai oinmatifohunshon yoiyamafain yora futsafohunshonricai yoinima. Upa Diosicoinin afi Abraham yoipaiyai cuscan yoini.

### *Ahuuscashomain Upa Diosin Moiséshunshon ato yononiquin*

<sup>21</sup> ¿Ascan Upa Diosin inonpacoaifo yoiyoni cuscan yafi Moisés yononi cuscan ascara-coin shinainmamun? Ma. Upa Diosin tsaincai rafuma. Upa Diosin Moisés yononi cuscahuunshon nooco nimapacutirocun nanfohuunshon nocon chaca soashocuana non a cuscara shara inon. <sup>22</sup> Ascafia Upa Diospan tsain cununi isca huaquin, —Nantifi manifotifoan man non chaca huamisi. Ascashu nantifi yorafo nocon chacahuunoashu non cunu muran iquia cuscara-coin, —ishon cununi. Jesucristo non icoinra huacun arus fusti nooco caimatiro afanan chaca nocon ifo inonma. Nanscaracoinfin cununi.

<sup>23</sup> Ascashon noncái icoinra huayonima. Ascacun Cristo oataima Moisés nooco yononihuunoashu non cunu muran iquimamua cuscara-fo. Ascan nan Cristo oaitian non icoinra huacun nooco caimanano afanancaí non cunu muran iquia cuscara-fo itiroma. <sup>24</sup> Ascacun non tapitiro Upa Diosin apaiyai cuscan Moisés nooco yononi nocon Ifo cuscara iyopaoni. Nanhunshonri non tapiyoni non icoinra huacun nocon chaca soashofain nooco imasharashquin. <sup>25</sup> Non ascafia paoniano Cristocoin noocoanocai non afanan Moisés yononi cuscan nocon Ifo itiroma nooco iquinon.

<sup>26</sup> Natian nantifi Jesús icoinra huafio Diospan facufo. <sup>27</sup> Man manfin unu muran iquimamua-quin maton chaca shatuashu Jesús cuscara shara iishquin afu ipashquin.

<sup>28</sup> Upa Diosin Cristohuunshon nantifi manifoti anoafó nooco nanscarafosi oin. Uhuun caifo Israelifo yafi Israelifoma non yonomatifo yafi yonomatimafori non nocofunu yafi ainfofori nanscarafosi nooco oin. Jesucristo nooco Ifo icaino non ahuunoashu yora fusti cuscara itiro. Ascan nantifi icoinra huafotifin non ahuun yorafo. <sup>29</sup> Ascan man Cristo ahuun yorashu marifi man Abraham funafo itiro. Ascaíno nantifi Upa Diosin Abraham yoiyoni cuscan matonnari itiro.

## 4

<sup>1-2</sup> Ascatañ un mato afanan ahuara futsa mato tapimanon. Apa naano furunmun nantifi fitiro. Ascafia facu yosiyocuma iyoafifoan yonotirofo. Nantifi apana ahu-unarifiacun non facu yonomati cuscara iyotiro iyoafifoan yonomayotiro. Apan mai cushumisifoan facu pushco yonoyotirofo nan apan yoini cuscan ahuun fari noocoano pushcoaitian. <sup>3</sup> Nanscarifi aquí non Cristo Ifo huataima norifi non facu cuscara. Nocon shunifoan nooco yonopaiyai cuscan nooco yonoyopaoni. Ascashu non aton yonomati cuscara non ipaoni. Nan icoinra huamafoan amisifo cuscan nooco nanscarifi huamapaonifo non aton yonomati cuscara inon.

<sup>4-5</sup> Ascatañ Upa Diosin nan yoinitian Furun nichini nooco cuscara cainon. Ainfoan shaqui murannoashu cainni. Moisés nooco yorafo yononi cuscan arifi nicapaoni. Ascafia nanrifi nuno mai ano oni nocon shunifoan nooco yonopaoni cuscan non afanan ato yonomatifo cuscara itamarocon Diosin ahuun facu iyoafifo cuscara nooco imanon. Nanscacufin mai ano oniquin. <sup>6</sup> Icon manfin natian Diospan facufoquin. Nanscacun ahuun Yoshin Shara noocoqui nichini ahuunshon nocon nomuranshon Dios yoitiro isca huaquin, —Upashtan minfin ahuun Upacoinquin, —ishon non yoitiro. <sup>7</sup> Ascacucaí man afanan yonomatifo cuscarama. Natianfin man ahuun facufoquin. Ascan Upa Diosin ahuun facufo inain cuscan matorifi inanshquin. Jesucristohuunshon nooco inain.

*Pablon Jesús icoinra huamisifo ato shinanni*

<sup>8</sup> Man iscpaoni Diosicoin tapiyoashuma. Ahuaraflo diosicoinmafiacun nanfoan aton yonomati man ipaoni. <sup>9</sup> Man ascafiaapaoni natian man man Dioscoin onancoian. Ascan Upa Diosin finacoinquin mato onancoian. Man man Dios onanfiashu ahuuscain afanan man ipaoni cuscan man afanan aton yonomatifo man ipaicain. Nanfoancai mato imasharatiroma. <sup>10</sup> Maton shunifoan yononi cuscan man man afanan amisi. Ascashu man aton fusiti shafa fusicain fusiti oshuri fusicain fusitidian fusicain aton fusiti fari noocoano atofu man fusimisiquin. Man shinanquin isca huaa, —Non fusititi atofu fusiaiton Upa Diosin noocoqui unimatiro nocon chaca noco soashoniran, —ishon man fasi amaquiri shinamisi. <sup>11</sup> Ascacun ¡Ai timafin! Un matohunshon shinancoin. Un mato curushcain yonoshopaoni. Un mato Jesushuunoa tapimafiani unraca ipaitsi mato tapimapaoni.

<sup>12</sup> Uhuun yoramishtichin ua nicasharacapun. Uncai Moisés cununi cuscan afanan tanaima uhuun chaca soanon Dios fu ipashquin. Man Jesús icoinra huaitian Moisés cunushoni cuscacai afanan tanatama Jesús icoinra huaa cuscan urifi nansca huaa. Un Jesús tanai cuscan uhuunri caocahuun. Un matofu ipaoni chaincái man uhuunoa shinanchacapaonima manrocon ua shara huafafainpaoni.

<sup>13</sup> Un isinin iquin matoqui nocoi tauni. Upa Diosin ua nitun huani un mato Jesushuunoa yoinon. <sup>14</sup> Un isin chacacoin fuchifianocai man umaquin ipainima. —Pablon ahuun isin suyacoin. Noncái afu ichanainmaran, —mancái anori imisima. Ascatama man ua noicoinmisi. Un mato yoiai cuscan man ua nicasharapaoni. Ascashon nan Diosin oinmati afu nai muran ica nan Jesucristocoin noia huaquin man ua shara huamisi manri ua fasi cushusharapaoni. <sup>15</sup> Un mato yosini cuscan man fasi unimacoinpaoni. Ascan ahuuscaimun natian man ipaoni cuscan man unimaimacai. Man man shinainmun man ua noipaoni. Un ahuara yopaishta man ua inanpaoni. Asca atisharacun maton furo futsucumutan man ua inancuapaoni. <sup>16</sup> ¿Un mato icon yoifiamisimun non noincasmatanaincái?

<sup>17</sup> Moisés cununi cuscan futsafoan mato yosipaicaní. Nanfoan amaquiri shinainfo cuscan fasi matori amaquiri shinanmapaicaní man ato cuscara inon. Nanfoan apaiyai cuscacai matona sharama. Ascashon nanfoanri noco paschcanan huapaicaní man afanan ua nicatamarocon nanfoan mato yosiafo cuscan man fasi ato tananon.

<sup>18</sup> Ratoranfoan mato shara huaifoanno shara itiro. Un matofu iyamafiano mato shara huafori fasi sharacoin itiro. Jesushuunshon mato shara huafori sharacoin itirofo.

<sup>19</sup> Uhuun facufoan un fasi mato shinancoin. Ascacun un mato tapimai. Ainfo facu caintaima isin muyotiro. Ahuun facu caishocai afanan isin mutiroma. Unimai. Nanscarifi aquin man Cristo tanasharacoinyamaiton un matohunshon isin mutiroma. Criston ahuun Yoshin Shara maton nomuran man nanucoianno afanancái un matohunshon isin mutiroma. <sup>20</sup> Un tapiama ahuuscaquimain man afanan amaquiri shinaincain. ¡Ohuashta! Un matofu ipainon un mato yoipaiyai cuscan cunun yoitamarocon uficoín un mato yoicinnón.

*Agaryafi Sara inifo cuscan atohunshon ahuara futsan yosini*

<sup>21</sup> Moisés cununi cuscan tanapaimisifoan afanan ua nicacahuun un mato yoinon. ¿Moisés noco cunushoni cuscan man tapiamamun? <sup>22</sup> Isca huaquin cununi. Abraham facu rafuya ini. Futsa ahuun yonomati futan facu ani. Nan futsa ahuincoin futan facu ani. Nan ahuincoincái tsoan yonomati inima. <sup>23</sup> Nan yonomati ahuun anu Agarcái yoshafoatai inima. Nantifi facu cainmisifo cuscari ahuun facuri caini. Abraham ahuincoin yoshafoshtan facu nanutiroma. Ascafiacon Upa Diosin Abraham yoiyoní isca huaquin, —Min ahuinin chipo furonanfacu nanushquin. Ascashu cainsharashquiran, —ishon inonpacocai cuscan yoiyoní.

<sup>24-25</sup> Diosin ainfo rafuhuunoa nocu ahuara futsa yosipai. Ato shara huashononpacocai cuscan ato yoiyoni. Nanscarifi aquin yorafoti shara huashopai. Ascano Moiséshunshon Israelifo yonopaiyai cuscan ato yononi. Ascashon machi ahuun anu Sinain anoshon ato yononi ahuun tsain tanasharanonfo. Moisés yononi cuscan tanasharapaifiacani tsoacai ascacoinmisima. Ascashu ahuun yonomatifo cuscara icafo. Nanfo Agar cuscarafo. Nanrifi yonomati ipaoni. Nan machi ahuun anu Sinain Arabiafoan anu futsa tuqui huanifo Agar huanifo. Agar ari icafo ahuun facufo cuscara. Nanfoan Moisés yononi cuscan tanapaifiaquicai anifoma. Ascashu nanfo ahuun yonomati cuscarafo. Nan pushurasi Jerusalén ano icafoan aton ahua cuscara.

<sup>26</sup> Ascafia Upa Diosin icari anuqui futsan Jerusalén funaran ishon anunifo. Nanri Sara cuscara yonomatima. Ahuun facuforicai yonomatima. Nan Jerusalén funafin nocon uhua cuscaraquin. Nonfin ahuun facu cuscaraquin. Non ahuun facufo icainocai non yonomati itiroma. Moisés yononi cuscariacai nocon ifo itiroma. <sup>27</sup> Nannori Diospan tsain cununi isca huaquin,

“Ainfon minfin toosmaquin. Min facuoma. Miacai facu isin huaiton min mumisima. Ascafia natian min unimatiro. Min oi ashcafinin unimaquin min ato yoitiro. Un chipo mato facu ichapa inanshquin. Nan ainfo yonomati facufoyafia mincaifin finacaia facu ichapayacoin ishquiran,”

ishon cununi.

<sup>28</sup> Ascatan uhuun yoramishtichin manfin Isaac cuscaraquin. Upa Diosin Abraham yoiyoni cuscan ahuun facu Isaac chipo cainni. Nanscarifiai Upa Diosin yoiyoni cuscan man ahuun facufo iishquicai. <sup>29</sup> Nan yonomati Agar yoshafoataima ahuun facu Ismael cainni. Ascano nan toosma Sarapan chipo yoshafoataflashon Diospan Yoshin Sharahuunshon Abraham facu nanumanano Isaac cainni. Ascafia Agar ahuun facu Ismael iyoafiashon Sarapan facu Isaac fucash huaquin omitsisca huapaoni. Nanscarifiai non Diospan Yoshin Sharahuunoashu non Diospan facufo icaino futsafoan Diospan facumafoan nocu omitsisca huatirofo.

<sup>30</sup> Ascan Diospan tsain cunuquin isca huani, —Min facu Isaac un inanshquiai cuscacai Agarpan facun fitiroma. Ascacun mato anoshon ahua yafi ato nichicahuun afanan matofu inonfoma, —ishon Upa Diosin Abraham yoini. <sup>31</sup> Ascacun norificai non Moisés yononi cuscahuunoashu non ahuun yonomatima. Noncái nan ainfo ahuun yonomati cuscarama. Nonfin ainfo yonomatima nan Sara ahuun facu cuscara. Non Dios icoinra huashu non tsoa yonomati itiroma. Non ahuun facufo itiro.

## 5

### *Cristohuunoashu isharacahuun*

<sup>1</sup> Ascacun Cristo nocohuunoashu naani afanan Moisés cununi cuscan non tananonma. Ascatacái afanan cununihuunoashu ato yonomatima. Cristo fustihuunoashu non isharatiro. Ascacun Cristo cachiquiri huayamacahuun. Man ipaoni cuscan afanan ayamacahuun. Nocon shunifoan cununi cuscan afanan afoqui nasoyamacahuun ato yonomatifo iishcaquima.

<sup>2</sup> Un mato yoiai cuscan ua nicasharacahuun. Manraca shinanquin isca huai, —Un foshqui rupa shatucuma uhuun chaca ua soashotiroma un Upa Dios fu nipanon, —ishonraca man shinan. Man anori shinaintocai Jesús mato chaca soashotiroma Upa Dios fu man nipanon. <sup>3</sup> Afanan un mato shafacafi yoipai. Ratoran futsa man foshqui rupa shatupaimun Dios fu nipashquin. Tsoan anori shinanquifin nan Moisés cununi cuscan tanacointama onanshta amaquiri shinan tanashucai Dios fu nipatiroma.

<sup>4</sup> Moisés cununi cuscan fusti man tanaiton maton chacafo soashotiroma. Ascashu man afanan Cristo fu rafuima. Upa Diosin matohuun ramapaifiaino man man Cristo pota. Ascacuacai mato ahuusca huatiroma mato chaca soashona man afu ipanon.

<sup>5</sup> Ascatama. Diospan Yoshin Sharahuunshon man non tapia Cristohuunshon nocon

chaca soatiro Diosin nocohuun shinansharanon. Nan non icoínra huamisi. <sup>6</sup> Non foshqui rupa shatu iyamarai shatuama nanscara rafu. Afoancai nocon numatiroma Cristo cuscara non inon. Non Jesucristo icoínra huashon non futsafo noicointiro. Nan fusti non yopai.

<sup>7</sup> Man Jesús tanasharayopaoni. ¿Ascan tsoan mato amaqiri shinanmamun un mato icoñcoín tapimapaoni cuscan man afanan nicasharanonma? <sup>8</sup> Diosincai mato anori yosiamá. Diosin mato yoimana Furun man icoínra huanon isharashquin. <sup>9</sup> Mato muranshon fustiton amaqiri mato yosiaino nan fustihuunshon nantifi mato shinanchacamatiro. <sup>10</sup> Un Diosin cufifain Jesús icoínra huaiton marifi un shinain cuscan afanan shinanshquicain. Tsoan mato amaqiri yosiquin fucash huaifin Diosin onaintimashquiquin.

<sup>11</sup> Uhuun yoramishtichin atirifiton man uhuunoa yoiqui isca huaa, —Nan Pablorifi yosimisiquin non foshqui rupa shatuamashucai Diosin yononi cuscacai non aimaran, —ishon yoiafo. Ma. Ascaracaima. Uncái anori yosimisima. Un anori yoiaiton ua omitsiscamacuanafoma. Ascafia un yoimisi Jesucristo ihui coyan iquinanqui mastanifo. Noco nashonihuunshon nocon chaca soashonon Upa Dios fu nípanon ishon un yoimisi. Atirifi nan nicaquin ua omitsiscamamisifo. <sup>12</sup> Ascan futsafoan mato yoimisifo isca huaquin, —Man foshqui rupa shatuyamashocai man Dios icoínra huaimaran, —ishon mato shinanchacamamisifo. Nannori yoiqui mato fucash huamisifo. Afanan matofu iyampainonfo.

<sup>13</sup> Uhuun yorafoan Jesucristohuunshon ahuun tsain fusti natian tanacahuun. Ahua futsan mato yonotrioma man yonomatifo inon. Ahua futsan mato yonoyamafiaiton chaca huayamacauquin. Jesús mato numafiano, —Natian nofin apaiyai cuscan non huatiroran, —iyamacahuun. Ascan noinancahuun. Ahuun noiquin shara huacahuun. <sup>14</sup> Non yorafo ya noinanshu nantifi Diosin noco yononi cuscan non aicai. Diosin noco yononi isca huaquin, —Mafiri man musu huamuai cuscan nantihuun noicoincahuun, —ishon cununi. Nan manascaifin nantifi Diosin yononi cuscan man aicai. <sup>15</sup> Man nantifia noinanyamashu chaca huamisi man iquin. Ascan oinfain. Yoiti huamitsayamacahuun. Chaca huaa tananyamacahuun. Man ascainocai afanan ichananpaitirofoma. Ascashon Jesús cachiquiri huatirofo. Chaca huatanashu man funocointiro omitsiscashquin.

### *Noco nomuran non chaca huapaimisi cuscan yafi Diospan Yoshin Sharahuunoashu non isharatiro*

<sup>16</sup> Ascan un mato yoi Diospan Yoshin Shara nicacoincahuun ahuunoashu isharashquin. Afin mato yoitiro raqui cacaimain man ahuuascaicain. Nicacoinshocai afanan man apaoni cuscan maton nomuranshon ahuara chaca huapaifiaquicai man aquima.

<sup>17</sup> Non nocon nomuranshon non chaca huapaiyai cuscacai Diosin Yoshin Sharapan anori shinantiroma. Ascashon ahuun Yoshin Sharapan noco amapaiyai cuscan noco nomuranshon non shinanchacafain noncái ascapaitiroma. Nocon nomuranshon non shinanpaoni cuscacacai Diosin Yoshin Sharapan ahuun shinan cuscarama. Asca nofin non apaiyai cuscacai non huatiroma. Non chaca shinanpaoni cuscan non ayamaquin Diosin Yoshin Sharapan nocon nomuran yoia cuscan non nicacointiro. <sup>18</sup> Ascafia Diosin Yoshin Shara no fu rafuaino Moisés yononi cuscan afanan nocon ifo itiroma noco yonoshquin.

<sup>19</sup> Noco nomuran non shinanchacamisi cuscan nantifi shafacafi ointiro. Nan chacafo non tanashu non chaca huaquin isca huatiro. Furomacoin icain ahuara chacafosi nocon nomuran shinanfafaimisi icain rafitama ahuinma fu icain ainfofori ascarifi ainfofono aton funumafo ya imisifo icain <sup>20</sup> Diosicoinma, —Nan uhuun Diosiran, —ishon yoifain shointi fusti tapifain noincasmamitsacain yoiti huaquisi futsafo pashcaquin fut-safain futsafo finonmapaimisi icain ipaitama sinacucahuamisi icai afi apaiyai cuscan

fusti shinanmisi icain tsain chipumisi icain tsoa futsacain noco cuscaramaran ishon yoifain futsafo noisharayamafain. <sup>21</sup> Futsan ahuara fianpaifain, rutumitsamisi icain, paunmisi icain, monoyanan pauncain nanscarafaofansifin chaca huacaniquin. Un mato yoiyomisi cuscan oinfain. Ascar a chaca focai Upa Diosin nantifi iquina ano nocotiroma afu iishquin.

<sup>22</sup> Ascafiai Diosin Yoshin Shara noco Ifo icaino non chaca huatamarocon non ahuunshon futsafo noicointiro unimacoincain ointi isharaçain ahuara ahuuscarafaino non shinanchacatama tunufain futsafohuun ramapaimisi icain shara huapaimisi icain yoia cuscacoin amisi icain. <sup>23</sup> Ahuara tapifiashu afiri curanfia huamuyamacai tso fu iquinanpaiyamacai tsain tsii huafain yoimisi icain futsafohuun shinansharafain afin apaiyai cuscan huatama nan Diosin amapaiyai cuscan fusti huamisi. Diosin Yoshin Shara fustihuunshonfinasca huatirofoquin. Tsoaascai afanan tsain futsan yopaima. Nan Diospan Yoshin Sharapan yonoa cuscan man aiquin. Ahuatocai afanan yonotrioma. <sup>24</sup> Cristo Jesús ahuun yorafoan chaca huapaonifo cuscan ihui coyan iquinanqui man mastanifo aton chaca nantifi cuyonon. Jesús ihui coyan iquinanqui noco nashoni nocon chacafori afu mastai cafisca non a cuscara shara inon. Non chaca huapaoni cuscacai non afananasca huapaima. <sup>25</sup> Natián non Diosin Yoshin Shara fu rafuaino nanto noco yoiai cuscan non nicasharatiro. Ascashu noco amapaiyai cuscan non anon.

<sup>26</sup> Ascatan non Diospan Yoshin Shara fu rafuashucái non cacapaimisi iyamacain oinmupaimisi iyamacain non itrioma. Manascaquin futsafo man shinanchacamatiro. Ascar man chacafo shinainno man finononanpaitiro. Ascarafin chacacoinquin.

## 6

### *Futsafoya ashononantanancahuun*

<sup>1</sup> Uhuun yoramishtichin man futsan chaca huaiton oincaquin. Diospan Yoshin Shara tanasharacaquin ahuun ramapaiquin oi tsii huafain yoihoo chaca shatunon. Oinfain. Tsain curushu iyamacahuun. Mafiri man chaca huamutiroquin. <sup>2</sup> Nantifia noinantanancahuun. Cufishonantanancahuun. Futsan ahuun nomuran omitsisciton ahuun ramapaiquin ointi unimamacahuun. Ascashu cushunonancahuun. Futsan omitsisciton nan cufishocahuun Jesusquiri shinanmashquin tanasharanon. Manascaifin nantifi Cristo yononi cuscan man ai cain.

<sup>3</sup> Ascano futsan yoquin —Unfin fasi sharaquin. Uncai tsoa futsa yopaima ua Dios cufishonon, —ishon shinain. Nan cuscara yoracai ahuama. Afiri paramui.

<sup>4</sup> Ascafia nofin nocon nomuran non shinantiro non Jesús yonoshosharaimun. Ascan non yonoshosharai tapiashu non fasi unimatiro. Ascaquicai non shinanquin isca huatiroma, —Futsan chaca huai cuscacai un huamisimaran, —ishon non shinantiro.

<sup>5</sup> Nantiffain non chaca huamisi. Ascashori nantiffain nocon nomuran non shinantiro non amisi cuscan. Tsoa futsacai Diosin noco amapaiyai cuscan noco huamatiroma. Nofin non atiro.

<sup>6</sup> Tsoan mato Diosin tsain yosiaiton nan ahuara yopai cuscan inansharacahuun.

<sup>7</sup> Mafiri paramuyamacahuun. Tsoan Diosin tsain potashu, —Diosin ua yoipaiyai cuscan nanscanonquin, —icafin Diosin ato onaintimaiquin. Ahuara non fana nanscaracoin foaicun nan non fitiro. Nanscarifi aquin non Diosin tsain nicasharayamatan non chaca huashu ahuara chaca ahuuscaraino non omitsiscatiro. Ascanfia Diosin noco yoia cuscacoin ashu non isharatiro. <sup>8</sup> Ascan tsoan ahuun nomuranshon shinanchacafafainquin chipo chaca huatiro. Ascashu omitsiscuai finacointiro. Ascano Diosin Yoshin Sharapan amapaiyai cuscan tsoan nan fusti afafainni nanfin Diospan Yoshin Sharahuunoashu nisharapacunaca.

<sup>9</sup> Futsafo shara huafafainquin unuyamacahuun. Ascashon isca huaquin shinanya-macahuun, —Mun imafofo shara huayomisi. Natian unascaima. Afanan unasca hua-paima. Nanscanonquin, —ishon anori shinanyamacahuun. Non ascai unuyamacun Diosin afi noco inanpaiyaitian noco inansharashquin. <sup>10</sup> Ascan ahuuscaraiifoan oinquin nantifi shara huafafaincahuun. Finonmafain Jesús icoimra huafafaincahuun.

*Pablonun Galaciafo yoini cuscan huafain ahuun tsain unutaqui tsain shara ato fomani*

<sup>11</sup> Natian uficoiun mato cunushoni. Maficoiun oincapon uhuun cunu funupafio. <sup>12</sup> Futsafoan mato yosipaicani. Nanfoan mato isca huamisifo, —Man foshqui rupa shatuyamashu Diosin yononi cuscan man aimaran, —ishon mato yoimisifo. Nan-foancai yoipaicanima, —Jesucristo ihui coyan iquinanqui mastanifo noco nashonon. Nan fusti non yopairan, —ishoncai yoipaicanima. Ascashon shinanquin isca huacani, —Non yoiquin Jesús fustiton nocon chaca soashotiro. Ascan noncái ahua futsa yopaimaran, —ishon. Non yoititon noco omitsiscamatiro. —Ascacucai non anori yoima noco omitsisca huanonfoma, —ishon yoimisifo. <sup>13</sup> Nanfo man foshqui rupa shatufiashucai Moisés cununi cuscan tsoa ascacoinmisima. Ascaflashon matorifi sha-tumapaicani ato cuscara man inon. Marifi nan huamisifo cuscan man aiton nanfoan futsafo yoitirofo, —Nafofin nocon tanamisifoquin, —ishon yoitirofo.

<sup>14</sup> Unmain anori shinanpacuyamapainon. Unfin tsain shara fustihuunoasi yoipaifafainicain. Nan fusti yoisharapaiqui un isca huai, —¡Aicho! Jesucristo ihui coyan iquinanqui ua nashoni. Ahuunshon fustifi un chaca shinanpaoni cuscan afanan uhuun ifo itiroma. Jesús ua nashoaintian nantianrifi uhuun chaca futsa futsatapafo huapaoni cuscan nantifi nan chacafu mastani cussaracoin. Afanancái ua ahuusca huatiroma, —ishon un shinantiro. <sup>15</sup> Jesucristo ahuun yorashucai non foshqui rupa shatuyamacai non ai futsutiroma. Ascaracai ahuama. Nonricai sharatiroma. Non Jesushuunoashu fusti non shara itiro. Jesushuunoashu fusti non fiananansharacoin itiro. Nan fustiton noco imasharatiro. <sup>16</sup> Diosin Yoshin Sharapan Jesushuunoa noco yosia cuscan man acun Upa Diosin mato ointi unimamafain matohuun ramapai. Ascashu man Diospan yoracoin.

<sup>17</sup> Ascan uhuun tsain unutaqui un mato yoinon. Uhuun Ifo Jesushuunoashu un omit-siscamisi. Uhuun yoratisho toa ichaparasi oinquin man tapitiro un Jesús yonoshonaiton ua isca huamisifo. Ascacun afanancái tsoan ua fucash huayamacahuun.

<sup>18</sup> Uhuun yorafoan nocon Ifo Jesucristo matohuun ramapaiqui mato shara huafafaini. Nanscasi ipanon. Amen. Nanti.

Pablo

## Pablonun Efeso Anoafo Cunu Fomani

### *Pablonun Jesús icoinra huafaino Efeso anoafo cunu fomani*

<sup>1</sup> Unquian Pablo, Efeso anoafoan manfin Diospan yorafoquin. Man Cristo Jesús tanasharamisi. Un mato cunu fomai man tapinon. Diosin ua amapaiyai cuscan ua catonni un Cristo Jesús fu rafumisi inon. <sup>2</sup> Nocon Upa Dios futan nocon Ifo Jesucriston matohuun ramapaiqui matohuunoa shinanquin mato shara huafafaini. Ascashon maton nomuran unimamanon.

### *Non Cristo icoinra huaiton noco shara huafaintiro*

<sup>3</sup> Non Cristo ahuun yoracun Upa Dios icarishon a cuscara shara noco imano ahuun ahuara sharafoti nocori inanshquin. Ascano nocon Ifo Jesucristo Apa Dios non yoinon, —Upa Diosin min fasi sharacoin. Non mia aicho huairan, —ishon non yoinon. <sup>4</sup> Mai oni huataima Jesucristohunshon Upa Diosin noco catonni ahuun yorafo non inon. Ascacun nantifi nocon chaca soashofain nan Furun cuscara shara non inon. <sup>5</sup> Nocohuun noicoinquin afin apaiyai cuscan noco huani Jesucristohuunoashu norifi non ahuun facufo inon. Nanscara afi fuchipaiyoni. <sup>6</sup> Diosin Furunhuun noicoincain nocohuunrifi ramapai. Ascashon noco nimasharapacunaca. Ahua futsahuunoashucai nocohuun ramapaima. Aficoin nocohuun ramapai. Ascacufi, —Upa Diosin min sharacoinran, —non huaicai. <sup>7</sup> Jesús noco nashoni ahuun imi foyanan. Ascan nantorifi nocon chaca soashonano ahuunshon Upa Diosin noco rau huatiro non afu ipanon. Ascacun non tapitiro Upa Diosin fasi nocohuun ramapaicain noco shinanquin finacoinmisi. <sup>8</sup> Non yopai cuscan onancoian. Ascashon Furunhuunshon noco fasi shara huafafaini.

<sup>9-10</sup> Ascano Upa Diosin afi apaiyai cuscacai tsoa tapimayonima. Ascafia noco tapi-mana nocohuun ramapaiquin nocoqui Cristo nichini. Ascano Upa Diosin afi shinanyoni cuscan Furun Cristo nan nichipaiyaitian afanan nichishquin nantifi ahuun yorafo nai murannoaf yafi mai anoafori ato ichanan huashquin Cristo arus fusti aton Ifo inon.

<sup>11</sup> Cristohunshon Upa Diosin nocorifi catonni non ahuun yorafo inon. Nannori nocohuunoa shinanyoni. Afi apaiyai cuscacoin huashquin. <sup>12</sup> Ascano non Cristo icoinra huaquin tau huashon non yoiquin isca huanon, —Upa Diosin min fasi sharacoin. Min noco shara huamisi cuscan fasi sharacoin. Tsoa futsacai mia cuscara sharamaran, —ishon non yoinon. <sup>13</sup> Marifi man Israelyamafiashon Diospan tsain icocoin nicaquin man man Cristo icoinra huaa. Ascacun maton chaca soashona marifi ahuun yorafo man inon. Upa Diosin yoiyotiani cuscan huafain ahuun Yoshin Shara matoqui nichini mato onanti huaacoinshquin man ahuun yorafocun tapishquin.

<sup>14</sup> Ascano nonfin Diosinafoquin. Ahuun Yoshin Shara no fu rafuaiton non tapitiro ahua futsamain noco yoiyotiani cuscan noco inanshquicain. Ratoran shafatafi nan icari noco ihui oshquiquin. Nannoshon ahuara futsa noco yoiyotiani cuscan noco inanshquin. Ascano afanan Upa Dios non yoiquin isca huanon, —Min noco shara huacoinna. Min fasi shara finacoianran, —ishon non yoinon.

### *Pablonun cufini cuscan*

<sup>15-16</sup> Ascano nan un matohuunoa nicaquin tau huanitian man noco Ifo Jesús icoinra huashon man futsafo noicoinfafafoinaiton. Ascacun nan un cufiaiti un matohuunshon noco Ifo aicho huafafaini. <sup>17</sup> Ascan nan nocon Ifo Jesucristo Apa Diosifin nocon Upa Diosiriquin. Afin sharacoinquin. Nanscacin un cufifafainmisi ahuun Yoshin Sharahuunshon man shinansharafain ahuun tsainri man tapisharafain finacoinshon man Jesús onansharanon. <sup>18</sup> Ascan un mato cufishoquin isca huafafaini, —Upa, aton nomuran cayacaficoat shinanmahuu mihuunoa tapisharanonfo. Ato tapimahuun min ato catonni qui mifu ipanonfo. Ascashon min yoiyoni cuscan nan mia icoinra

huafoti min icaria tsoan oinyomisima cuscara sharacoin min ato inanshquinran, —ishon un mato cufishomisi.

<sup>19-21</sup> Diosin ahuun curushhuunshon tsoan oinyomisima cuscara ahuamamishti noco ashotiro. Nan ahuun curushpan Cristo naitian afanan funimani afu nai ariashu niaifocoin inon. Nan Upa Dios icarishon Cristo nantifi niaifo finoncoian. Nan natian niyoao yafi inonpacoaifori non nantifi mai anoa icafoti non nai muran icafotiri Jesús ato finoncoianquin.

<sup>22-23</sup> Ascan Upa Diosin Furun yononi cuscan nantifi mai anoa manifoti yafi nai muran-noafori ato iquinaquin. Ascashon Furun catonni nan icoindra huafoti aton niaifo inon. Nan icoindra huafofin ahuun yoracoin cuscarafoquin. Criston aton mapo cuscaraquin. Nocon mapon non shinantiro. Nan fustiton icoindra huafu yonotiroquin. Noco iquina ahuunshon fusti non atiroquin. Nocon mapomaisicai non nitrioma. Nanscarifi aqui nocon Ifo Jesusmaisicai tsoa nipatiroma. Nantifi icoindra huafu no fu ica. Ascashu no fu rafucacaini noco imapaiyai cuscan non anon.

## 2

### *Diosin nocohuun noiquin noco nimapacunaca non afu ipanon*

<sup>1</sup> Ascafia mato chacahuunoashuai man Diospan yora ipaonima afu ipashquin. Ascata maon chaca soashonataima yora naa cuscarafo. Omitsiscapanacafu muran man focuana. <sup>2</sup> Manfin chaca huapaoniquin. Nan icoindra huamafoan chaca huamisifo cuscan marifi man ato tanapaoni. Yoshin chacafo nai muran icafoan aton niaifo Satanás man tanapaoni. Nanton natian nan nicayosmamisifoan ato nomuran ato shinanchacamamisi. <sup>3</sup> Nantifi non nicayosmamisi cuscari ipaoni. Non ahuara chaca huapaiyai cuscan non huapaoni. Non chaca shinamisi cuscari non huapaoni. Upa Diosin nantifi nicayosmamisifo ato onaintimacoin omitsiscapanonfo. Norifi non ato cuscara chacacaifia nan icaifo cuscan non aiton nocorifi onaintimacuana.

<sup>4-5</sup> Non nocon chaca shatuataima non Diosimaqui ifiano Upa Diosin nocohuun fasi noicoincain nocohuun ramapai. Nan Cristo afanan funimani cuscan ahuunshon nocori funimatiro non afu funi cafiscashu non afu nipanon. Non ahuara shara huaa rafanancai noco numaima non omitsiscapanonma. Diosin afin nocohuun ramapaicain noco cashman numa. Ascashon nocon chaca soashona non afu nipanon.

<sup>6</sup> Upa Diosin Cristo funimanitian norifi non afu funini cuscarafo afu nipashquin. Ascacun non afu rafuano Cristo Jesús Diosin icarifia norifi non afu ica cuscarafo. <sup>7</sup> Ascan Jesucristohuunshon Upa Diosin nocohuun cashman ramapaicain noco noiquin finacoinshon noco shara huamisi. Ascashon nantifi yorafo ismapacushquin fasi nocohuun noiquin noco shara huamisi.

<sup>8-9</sup> Asca afanan un mato yoi. Non ahuara shara huahuu rafanancai noco Diosin numaima non omitsiscapanonma. Diosin afi nocohuun ramapaicoinshon noco cashman numai noco chaca soashoshquin. Ascan tsoacai iscarioma, —Ufin Dios shara huamisiquin. Ascashufi un Dios fu ipatiroquin, —ishocai tsoan anori yoitiroma. Ascata maon Jesú icoindra huaiton Upa Diosin noco numatiro non afu ipanon. <sup>10</sup> Diosin noco onihuani non Jesucristohuunshon yonosharashonon. Noco oni huataima noco amapaiyai cuscan shinanyoni non futsafo shara huashonon.

### *Cristo nocon ointi shara huashotiro*

<sup>11</sup> Ascan mancái Israelifoma. Uhuun caifoan matohuunoa yoimisifo isca huaquin, —Nafocai nocon caifoma. Nonfin Diospan yorafoquin. Nanfocai Diospan yorafoma. Diosin noco yononi cuscan nantifi furonanfacufo foshqui rupa shatupacunon ishon. Diosin noco yononi cuscan non aiton tapinonfo non Diospan yoracun. Caifo futsafocai foshqui rupa shatupacuafoma. Ascan non tapitiro afocai Diospan yoramaran, —ishon uhuun caifo Israelifoan yoimisifo.

Ascan man Jesús icoinra huataima man ipaoni cuscan ointiaquimayamacahuun. <sup>12</sup> Shinancapon. Ipaoni mancaí Cristo fu iyomisima. Upa Diosin Israelifo catonni cuscan huafainricai mato catoantaima man atofu ahuun yorafo inon. Ahuun yorafo yoiyotiani cuscan huafaincaí mato yoiataima. Man shinanqui isca huamisi, —¡Ohua! ¿Non ahuuscattiomun noco chaca soashonon non Dios fu ipanon? —ishon man shinanpaoni. Nantianri man icoinra huafoma muran iyopaoni man Dios fu rafuyamacain man onanyopaonima. <sup>13</sup> Ascashon mancaí Diosihuunoa shinanyopaonima. Ascafia Cristo Jesús matohuunoashu naino ahuun imi foni man afu ipanon.

<sup>14</sup> Ascashu Cristohuunoashufin non noinantiroquin. Uhuun caifo Israelifo yafi mani futsafo noco nannorifosi shinanmasharatiro non ahuunoashu noinantanancain afanan non noincasmatananonma. Ahuatocai afanan noco amaqui imatiroma. Natianfin non Cristohuunoashu yora fusti cuscarafoquin. <sup>15</sup> Ascano nocohuunoashu naino noco shunifoan noco yonofain noco cunushoni cuscacai afanan noco yonotiroma non Dios fu ipanon. Ascano Upa Diosin uhuun caifo Israelifo yafi mani futsafori ahuun yorafo noco imashquin non funa cuscarafoinfo non inon. Ascatañ afanan non noincasmatananonma. Ascatañmarocon natian isharacoinnonfo. Nanscarafi Upa Diosin noco huemapai yora fusti cuscara noco imashquin. <sup>16</sup> Uhuun caifo Israelifo yafi mani futsafori Jesús ato ihui coyan iquinanqui nashoni. Nanscacun Upa Diosin nan rafu man ato raunan huaa afanan afu isharanonfo. Ascashu noincasmatananyamacai yora fusti cuscara ato imanon.

<sup>17</sup> Ascano mani futsafoancai Diosihuunoa tsoan shinanyopaonima. Uhuun caifo Israelifoan Diosihuunoa shinamisifo. Ascan Jesús nan noco rafuhuunoashu mai ano oni ahuunoashu non Dios fu ipanon. Ato yoipaoni isca huaquin, —Natian Upa Diosin mato rau huatiro man afu ipanon, —ishon ato yoini. <sup>18</sup> Ascano Jesús noco nashonicun ahuun Yoshin Shara fustihuunoashu Israelifo yafi mani futsafori Upa Diosiqui funonfo afu rafupacushquin.

<sup>19</sup> Ascacun mancaí afanan yora futsafo cuscarama. Natianricai man afanan Dios onanmisima cuscarama. Natianfin man Diospan yorafoquin. Nan mani futsafori Diospan yorafoquin. Ascacun ahuun facu futsafofin maton yorafoquin. Manfin nanscarafosiquin. <sup>20-22</sup> Upa Diosin ahuun yorafofin nan pushu shara huamua cuscarafoquin. Non pushu tau huaquin quishi mutsisipacoin non yopatiro. Chipo nantifi pushun canofo non ichanan huatiro. Nanscarifi aquin Jesús fu rafumisifo futan Diospan tsain yoimisiforifi nan pushu cano shara cuscarafoquin. Pushu cano shara yamainocai non ahuuscashon fomancayan shara huatiroma. Nanscarifiai Jesús fu rafumisifo non Diospan tsain yoimisifoanri noco yoiyamainocai non ahuuscashon icoinra huacuanama Diospan yorafo iishquin.

Ascano Cristo Jesusfin nocon pushu quishi mutsisipacoin cuscaraquin. Pushu quishi yamainocai non pushu huatiroma. Nanscarifi aquin Cristo yamainocai non Diospan yora icuanama. Ahuunoashufin nan pushu shara huamua cuscara non itiroquin. Non fin nocon Ifohuunoashu pushu mutsisipacoin cuscaraquin ahuashtacai chaca amuran iquitiroma. Pushu yonomisiton ahuarao fitiro pushu huashquin. Nanscarifi aquin natian Upa Diosin icoinra huafoti ahuun Furunhuunshon noco nannorisi shinanmaino non ahuun pushu cuscara shara inon ahuun Yoshin Sharahuunoashu non afu iishquin.

### 3

#### *Diosin Pablo yononi mani futsafo Jesushuunoa yoinon*

<sup>1</sup> Uhuun yoramishtichin unquian Pablo un mato yoinon. Mancaí uhuun caifo yamafiacun un mato Jesucristohuunoa tapimamisi marifi man Diospan yorafo inon. Ascaiton oinquin Jesús icoinra huamafoan ua cunu muran iquimanifo. Ascan mato-huunshon ua iquimanifo. <sup>2</sup> Upa Diosin mato shinanfain matohuun ramapaicain mato

tapimapai. Ascashon ua catonfain matoqui ua nichini un mato yoinon. <sup>3</sup> Upa Diosin ua tapimayoni cuscacain tsoa futsan tapiyomisima. Matohuun noicoinquin ua nichini marifi man ahuun yorafo inon. Ascan nanfohuunoa un mato ichapama cunushoni. Nan man man nicamisi. <sup>4</sup> Ascan un mato cunushona cuscan oinquin un Cristohuunoa tapia cuscan huafain marifi man tapitiroquin. Tsoashta tapiyopaonima. <sup>5</sup> Ascacucai Diosin tsoa tapimayonima. Ascan natian Diospan Yoshin Sharahuunshon nan Jesús fu rafumisi sharafo yafi Diospan tsain yoimisi sharafori man ato tapimana. <sup>6</sup> Ascan nan tsain sharacai tsoan Jesushuunoa tapiyopaonima. Ascan mani futsafori Upa Diosin yorafo itirofo. Ascacun natian matorifi Diosin tapimai. Israelifo yafi mani futsafo Jesushuunoashu Diospan yora fusti cusracafo. Ascano Upa Diosin uhuun caifo Israelifo yoyotiani cuscan Jesucristohuunshon manifoti nanscarifi huaquin inantiro.

<sup>7</sup> Upa Diosin uhuun ramapaiquin ua catonni ahuun yonomati un inon ahuun tsain shara Jesushuunoa un ato yoinon. Ascashon ahuun curushu ua inanni manifoti Furunhuunoa un ato yoinon. <sup>8</sup> Shinancapon. Uncai ahuama. Nantifi Diospan yorafoan ua finoncoianfo. Ascafia Upa Diosin uhuun ramapaiquin ua catonni mani futsafo un tsain shara Cristohuunoa un ato yoinon. Aafi ahuun yorafo inain cuscan fasi sharacapacoin. Tsoancai ascara shara oinyomisima. Cristo nocu shara huaquin futsai cuscacai tsoashta tapiyomisifoma. <sup>9</sup> Upa Diosin nantifi onihuanonpacuoi cuscan afin tapiyon. Tsoashtacai Jesushuunoa tapiataima. Ascacun ua catonni manifoti Furunhuunshon un ato yoinon. Upa Diosin ua tapimani cuscacai atirifi tsoa tapimayoima.

<sup>10-11</sup> Upa Diosin shinanquin tau huani cuscan nocon Ifo Jesucristohuunshon ani. Natian Jesús icoindra huafohuunshon niaifofoan nai muran icafo futan ahuun oinmatifo nan a fu nai muran icafoanri ato tapimashquin. Ascan nicakashon yoishquin isca huaquin, —¡Aicho! Nocon Upa Diosin aca cuscan fasi sharacoin. Arus fusti nantifi tapicoian. Nanton ahuamamishti huatiroran, —ishon yoishcandi. <sup>12</sup> Ascashon non Jesús icoindra huashu non ranotama Diosqui otiro afu tsainshquin. Ascashon non tapitiro non aqui oaitocai nocu potaima. Ascano ratutama non Dios fu itiro. <sup>13</sup> Ascatan un matohuunoashu omitsiscaitian shinanchacayamacahuun. Maton nomuran omitsiscayamahuun. Nan un omitsiscai marifi man afu isharanon.

### Cristo nocohuun noi

<sup>14-15</sup> Ascan Upa Dios cufishquin un ratoco un mai chachimisi. Ascacun nantifi icoindra huafu nai muran icafo futan mai ano icafoan nocon Upaquin. Nonfin ahuun facufoquin. Ascacufin ahuunoashu nan Jesús icoindra huafoti non anu yai futsutiroquin. <sup>16-19</sup> Un mato Upa Dios cufishoquin isca huamisi, —Upa Diosin, nan ahuara sharafofin minaquin. Ascan nan mia icoindra huafu Efeso anoafu min Yoshin Sharapan aton nomuran mutsismainifoanhuan min Furun Cristo icoindra huashu mifu rafufafainonfo. Min fasi atohuun noimisi cuscan huafain ato tapimahuun.

Ihui tapo sharano fana foaisharatiro cuscan Cristofin Efesofoan aton tapo mutsisipa cusracaquin. Asca nan min atohuun noia tapicanashu nanforifi isharatirofoquin. Cristofin aton ihui tapo mutsisipacoin cusracaquin ahuunshon futsafo noicoinonfo. Upa Diosin Efesofo nantifi mia icoindra huafu aton nomuran ato shinamasharahuu Cristo atohuun noicoinmisi cuscan tapinonfo. Criston nantifi nocohuun noicoinmisi cuscan non tapifiatiro fasi finacoinquin nocohuun noicoin. Upa Diosin, un mia cufia cuscan nantifi Efesofo tapimahuun. Ascashon min ato imapaiai cuscan anonfo nantishotapiquin mifu rafufafainonfo, —ishon un mato Upa Dios cufishofafaini.

<sup>20</sup> Non Upa Dios nocon nomuranshon shinain cuscan non yocafiamisi atofin fasi finonmafain nocu ashotoquin. Ahuun curushhuunshon nocon nomuran mutsismainifoanna cuscan huafain ahuamamishti nocu ashotoiro. <sup>21</sup> Ascacun non Upa Dios yoquin isca huanon, —Upa Diosin, min fasi sharacoin. Min Furun Jesucristohuunshon min nocu shara huamisiran, —ishon nantishotapiquin non yoifafainon. Nantifi icoindra

huayopaonifo yafi natian icafo non inonpacoaifoanri Dios yoisharapacunonfo. Nanscasi ipanon. Amen.

## 4

*Diosin ahuun Yoshin Sharapan shinain cuscan icoindra huafaoan nannorifosi shinamisifo*

<sup>1</sup> Ascan un nocon Ifo yonoshonaiton ua cunu muran iquimanifo. Ascacun uhuun yoramishtichin ua nicasharacapun. Un mato cayacafi shinanmapai. Upa Diosin mato catonni man Jesucristo tanasharanon. Ascacun nan mato amapaiyai cuscan acahuun futsafoan mato oinquin nocon Ifohuunoa shinansharanonfo. <sup>2</sup> Ascashu,—Tsoa futsacai ua cuscaramaran,—ishon shinanyamacahuun. Ascatamarocon icoincain futsafohuun ramapaicahuun tsoa ahuuatama icahuun. Funaquima manasharacahuun. Futsan chaca huamisi cuscan huafaiton ahun noiquin ahun shinanchacayamacahuun. <sup>3</sup> Diospan Yoshin Sharahuunshon Jesús icoindra huaa futsafo fu isharacahuun. Unimayan an isharatanancahuun. Nantishotapiquin nanscasi huatanancahuun.

<sup>4</sup> Ascano Jesús icoindra huafosi Diospan yorafoquin. Ascan nonfin ahuun caya muma cuscarafoquin. Diosin ahuun Yoshin Shara fustiton. Afin noco cuna non Jesús icoindra huacun noco imapaiyai cuscan non tapia. Noco yoiyotiani cuscan Cristo oaitian noco inanshquin. Nan fustifin non manasharamisiquin. <sup>5</sup> Nanfin nocon Ifo fusti. Nan fusti non icoindra huaiton noco nimapacutiro. Non unu muran iquimamushon non yorafo ismano Upa Dios ahuun furumun Yoshin Shara fustiton noco iquitiro. <sup>6</sup> Nocon Dios fustifin. Nan icoindra huafaoan nocon Upaquin. Arus fustitofin nantifi noco iquimisiquin. Ascashu nantifi non ahuuna inon noco amapaiyai cuscan non anon. Nantishotapiquin nantifi nocofu rafucacaini. Aafin nantifiton nocon niaifo fustiquin. Ahuunoashu fusti nantifi non itiro.

<sup>7</sup> Ascafata Criston nantifi nan non icoindra huafoti afi futsa futsa huaqui noco imapaiyai cuscan huafain noco ima non ahuunshon icoindra huashon futsafo non shara huanon. <sup>8</sup> Ascano Diosin tsain Cristohuunoa cununi isca huaqui,

“Mai anoashu Apa Dios ari nasonitian nan icoindra huafoti ato numani afanan Satanás aton ifo inonma. Ascatama Jesús tanasharanonfo. Nantianri nantifi ahuun yorafo imapaiyai cuscan ato imani ahuunoashu shara huatananonfo,”

ishon cununi.

<sup>9</sup> Ascashon cunuquin isca huani,—Cristo afanan Apa Diosin icari nasoiran,—ishon aqui cununi. Nannori cununi non tapitiro Apa Diosin ari cataima iquisi na mai ano fotoyoni noco cuscara iishquin. Ascashu fasi omitsiscayoni. <sup>10</sup> Apa ariashu mai ano fotoyoni. Nanton nai ari icafo yafi mai anoafori ato finoinnifoanna. Ascatacun nai ariafo futan mai anoafan ato ifo iishquin.

<sup>11</sup> Nantonfin noco catonpacuni noco amapaiyai cuscan ashu non shara huatananon. Ascashon afu rafumisi futsafo ato imafain nocorifi nichini ahuunoa futsafo non ato tapimanon. Futsafori catonni afin yorafo yoipaiyai cuscan afohuunshon ahuun tsain shara ato yoinon. Futsafori catonni nan tsain shara ahuunoa yoinonfo icoindra huashcaquin. Futsafori catonni ahuun tsain shara icoindra huafio tapimafain ato cushusharanon ahuun tsain tanasharanonfo.

<sup>12</sup> Nantonfin nantifi ahuun yorafo itisharamanaquin ahuunoashu shara huatananonfo. Ascacufin finonmafain non Jesús tanasharaquin. Nofiri non pimamuaino nocon caya mutsisipa sharacoin itiro. Nanscarifiai non futsafo fu shara huatanaino Dioshuunoashu non mutsisipa sharacoin Jesús cuscara non itiro. <sup>13</sup> Ascano nannorisi non icoindra huafain non Diospan Furunhuunoa tapinon. Ahuunoa tapitacai

non afanan facu cuscara itiroma. Nan nocofunu mapo shara ya Jesús cascaracoin non itiro. Ascashu nan Cristo noco imapaiyai cuscan sharacoin non itiro.

<sup>14</sup> Non ascatacái facufo cuscara afanan non itiroma. Futsan facufo ahuarao yoiaiton icoinra huatiro. Futsan ato yosaiton icoinra huafain futsari chipo ahuarao yoia cuscan nanforifi icoinra huatirofoquin. Ascashon futsa futsatapafo icoinra huatirofo. Ascacun noncái paramisifoan noco yosipaiyaifo cuscan non icoinra huatiroma. Noco yoicaquin,—Un mia icon yosiaran,—ishon noco yoipaifiaifoan Diospan tsain anorimacun noncái ato icoinra huatiroma. Noco fuparapaicani. <sup>15</sup> Noncái ascarama. Ascataama nan icoinra huua futsafo noicoinquin non ato icon fustisi yoitiro. Nonascaifin finonmafain nocon Ifo Cristo cuscara non icacainicain. <sup>16</sup> Ahuunoashu non ahuun caya muma cuscara itiro. Afin catontiro nonmain ahuu cuscaraquin. Ahuun curushhuunshon afin noco amapai cuscan non atiro shara huan tananshquin. Non noinainno non shara huan tanantiro.

### *Cristohuunoashu non yora funa shara itiro*

<sup>17</sup> Ascano nocon Ifohuunshon un mato shafacafi yoinon. Icoinra huamafo icafo cusan afanan ascayamacahuun. Nanfoanfin ipaitsi chaca shinamisifoquin. <sup>18</sup> Ascashu yoitimashunifo. Aton nomuranshocai shinansharatirofoma Diosin ato imapaiyai cuscan aashcaquin. Afocai afu rafumisifoma ato nimapacunon. <sup>19</sup> Ahuara chacafosi huai fuyacanashucái afanan tsoa rafipaitiroma. Nanscaisai fuyafo,—Nanscanonquin. Ahuara chaca finonpaiquin finon, —ishon anori fusti shinamisifo. Chaca fustisi shinancaní. Nocofunufo aton ahuinma fu imisifoquin. Nanscarifi ainfofo aton funumafo fu icaifono. Nanscara chaca futsa futsatapafo huamisifo. Tunuyamacaina. Fasi finonmafain chaca huapaicani.

<sup>20</sup> Nanfoanfin nansca huamisifoquin. Ascafia Cristocai mato anori yosimisisima. <sup>21</sup> Ascataama Jesushuunoa mato ahuun tsain iconcoin yosaiton man man nicamisi. <sup>22</sup> Ascano mato yosimisi isca huaquin,—Marifi man man chaca huapaoni. Chaca fustisi man fuchipaipaoni. Nan chacafoan mato parafafaini. Afanan afo fuchipaiyamacahuun. Afo potacoincahuun,—ishon mato yosimisi. <sup>23</sup> Ascacun man shinanpaoni cuscan afanan shinanyamacahuun. Natian shinansharacoinpacucahuun. Jesús shinain cuscan huafain maton nomuran marifi shinancoincahuun. <sup>24</sup> Diosin sharacoin fusti cuscara funa shara icahuun. Jesús mato nashoni maton chaca soashonano Upa Dios cuscara shara man inon.

<sup>25</sup> Nonfin Cristo ahuun yorafoquin. Ascacun afanan chaniyamacahuun. Mato fu icafo icon fustisi yoifafaincahuun. Non icoinra huafofin Cristo ahuun caya muma cuscaraquin. Ascano noco murannoashu futsa chanicun ahuunshon nantififain non mutiro. <sup>26</sup> Man mua sinai matsiriscacahuun. Man ascayamaino man chaca huatiroquin. Ascacun fari cataima matsicahuun. <sup>27</sup> Man sinai unuyamacaiyaiton Satanás mato yonotiro. Man sinafiai matsiriscaitocai mato chaca huamatiroma.

<sup>28</sup> Ratoran futsan mato murannoashu yomutsoaiton a yoisharacahuun afanan yomutsononma yonoquinsharacahuun ahuun rafanan fiishcaquin. Ascan nan ahuara futsa yopaitonfin man inantiroquin.

<sup>29</sup> Ahua chaca yoitamarocon shara fustisi yoifafaincahuun. Man ato yoiaiton nicaschon futsafoan nan tsain shara nicaquin nocon Ifo finonmafain tanasharatirofo. <sup>30</sup> Diospan ahuun Yoshin Shara matoqui nichini matofu rafupacunon Jesucristo oaitian afu man ipanon. Ascacun ahuunshon tapitirofo non Diospan yorafocun. Ascano man natian icai cuscan aquin Diospan Yoshin Shara ahuun nomuran omitsiscamayamacahuun.

<sup>31</sup> Ascacun futsafihuunoa shinanchacayamacahuun. Tsain isininpator iyamacahuun. Sinayamacahuun. Sinacani mucayamacahuun. Futsa roayamacahuun. Chaca futsa futsatapafo shinanyamacahuun. <sup>32</sup> Ascataamarocon mafin ranan noinancahuun.

Nantifihuun ramapaicahuun. Upa Diosin Cristohuunshon mato rauhua cuscan huafain nanscarifiai rau huatanancahuun.

## 5

### *Ahuuscamain Diosin facufo atirofoquin*

<sup>1</sup> Manfin Diospan facufoquin. Fasi mato noicoin. Ascacun Upa Diosihuun caocahuun. <sup>2</sup> Cristo nocohuun noicoinquin noco nashoni nocon chaca soashoshquin. Upa Diosin ahuun facuhuun fasi noicoinfia unimani futsafohuunoashu naiton oin. Ascano Criston noco noimisi cuscan marifi nantifihuun noicoinfafaincahuun.

<sup>3</sup> Ascano ahuara chaca shinanyamacahuun. Ainfofoan maton funuma fu iyamacahuun. Nanscarifiai nocofunufoan maton ahuinma fu iyamacahuun. Ascatori yora futsan ahuun ahuara fianpaiyamacahuun. Diospan yorafocai ascatriofoma. Ascaraya tsainyamacahuun. <sup>4</sup> Ascarifiatan tsain mutsama iyamacahuun. Cashu mutsamaya-macahuun. Diospan yorafocai ascaraya tsaintiroma. Ascatama Dios yoisharatirofo isca huaquin, —¡Aicho! Upa Diosin min noco shara huafafainiran, —ishon yoitiro. <sup>5</sup> Natian un mato yoiai cuscan man icoindra huatiro. Ratoran futsan shinanchacamisiton ahuinma fu icaino ainfofori nanscarifiaifono funuma furi icain yora futsana fipaimisi. Nan yora futsana ahuara fianpaiquin nan Dioscoin fuchipaitama ahuara futsahuunsi nuuquin nancai fuchipaifafaini. Afanan un mato shafacafi yoi. Tsoan chaca huaicai Jesucristo Apa fu icari nocotirofoma. Nan Jesús niaifo icaricai ahua chaca afu itiroma. Ascaran chaca huamisifocai Cristo icari noconacafoma. <sup>6</sup> ¡Oinfain! Atirifoan mato amaquiri yosipaicani isca huaquin, —Nanfoan chaca huafiacanifin Dios niaifo ari afu ipatirofoquin, —ishon mato yoipaicani. Ascacun oinfain mato paracani. Chaca futsa futsatapafo huaquin shatuyamaifoan Upa Diosin atoqui sinai. Yoitimaifoan oinquen. Ato omitsiscapanacafo muran potashquin. <sup>7</sup> Ascan icaifo cuscan ayamacahuun. Ato fu rafuyamacahuun mato chaca huamatirofoquin.

<sup>8</sup> Nan acaifo cuscan marifi man chaca huayopaonifiashon natian man Diospan facufo. Ascashu ahuunoashu shafacafi isharacahuun. <sup>9</sup> Ascano Cristo matofu rafuaino icoinsharacahuun. Maton nomuranshon cayacafi shinansharacahuun. Diosin ica cuscan marifi icoinsharacahuun. <sup>10</sup> Diosin fuchipaiyai cuscan huafain tapisharacoincahuun. Nanscacoin acahuun. <sup>11</sup> Nan Jesús icoindra huamafoan chaca shinainfo cuscan atofu chaca huatananyamacahuun. Ascatarocon icoinsharaquifin a chaca huaifo man ato oinmacointiro.

<sup>12</sup> Ascan chaca huaifo cuscarahuunoa tsainyamacahuun. Nan chaca huaifo cuscan yoiquifin marifi man chaca huatiroquin. Ascashu man rafipaitiro. <sup>13-14</sup> Faquish muran chashamashon non oinsharatiro. Nanscarifi aquin yoran chaca huashon fomanpaifaiton Diospan tsainhuunshon aton chaca shafacafi tapitirofo. Ascano Diospan tsain yoini isca huaquin,

“¡Oinfain! Man Diosihuunoa shinanyamai man naa cuscaraconinfo. Afanan as-cayamacahuun. Oshapacui cuscara iyamacahuun. Funinifoancahuun. Maton chaca shatucahuun Diosihuunoa shinashcaquin. Man ascaiton Criston maton chaca soashofain shafacafi mato oinmatiro Dios man tanasharanon.”

<sup>15</sup> Ascacun ¡Oinfain! Icoinsharacahuun. Diospan tsain tapiafoma cuscara iyamacahuun. Nan Diospan tsain cununi cuscacoin acahuun. <sup>16</sup> Ascano natiantan nan icoindra huamafoan fasi ahuara chaca finonquin finacoincandi. Ascacun nan man oiainti Dioshuunshon futsafohuun ramapaiquin ato shara huacahuun ato yoisharacoinfafaincahuun. <sup>17</sup> Ascacun amaquiri shinanyamacahuun. Ascatarocon Diosin mato amapaiyai cuscan nan fusti tapicahuun.

<sup>18</sup> Ascashu paunyamacahuun. Pauncacaini man fasi chacacoin itiro. Paun-caquimarocon Diosin Yoshin Shara fu rafucain yonoshosharafafaincahuun. <sup>19</sup> Ascatan Diospan tsain shara ichapa yoinonancahuun. Nocon shuni David fanain ini cuscan

fanaincahuun. Diosihuunshon futsafo fanainshocahuun. Maton nomuranshon nocon Ifo shinancahuun. <sup>20</sup> Ahuara ahusscarafaiton nocon Ifo Dios yoquin isca huafafaincahuun, —¡Aicho! Noco Ifo Diosin, min ua shara huafafainiran, —ishon Upa Dios yoifafaincahuun. Nocon Ifo Jesucristohuunshon anori Upa Dios yoifafaincahuun.

### *Ainfoo yafi aton funufohuunoa*

<sup>21</sup> Cristo nicasharapaifain mafi rananri nicanonancoincahuun. Nantifi icoinra huafaya asca huatanancahuun. <sup>22</sup> Ainfofoan man maton Ifon Jesús nicai cuscan huafain maton funuri nicasharacoincahuun. <sup>23</sup> Nan icoinra huafaoan nocon Ifofin Jesucristoquin. Nanton noco iquifain noco cushushara. Nanrifi nocon Numamisi. Nanscarifi aquin Diosin nocofunufo yononi aton ahuinfo iquisharafain ato cushusharanonfo. <sup>24</sup> Nan icoinra huafaoan Cristo nicacoianfo cuscan nanscarifi aquin ahuinfoan aton funufo nicacointirofo.

<sup>25-26</sup> Ascan nocofunufoan maton ahuinhuun noicoincahuun. Cristo noco noiai cuscan huafain maton ahuinhuunri noicoincahuun. Non icoinra huafoti nocohuun noicoin Criston omitsiscacain noco nashoni nocon chaca soashoshquin ahuun yorafo non inon. Non ahuun tsain icoinra huaiton noco catonni nan chaca huayomisima cuscara noco imashquin. <sup>27</sup> Non ascaiton ahuutiaran nocoshon noco oinshquin non ahuun shinanshara cuscara. Nantifi noco chaca soashoshquin. Ascano tsoancal noco yoantiroma Jesús noco imasharano. Ascano Diospan yora sharafo Jesús noco oinshquin.

<sup>28</sup> Nan mafiri man musuhuamuai cuscan maton ahuinfoi cushusharacahuun. Tsoan ahuin noisharashofin afiri noimuaquin. <sup>29</sup> Shinancapon. Tsoacai afiri chaca huamumisima. Nonnofiri musu huamutiro. Fonainquin nofiri non pimai. Nanscarifi aquin Jesús ahuun yorafo cushusharamisi. <sup>30</sup> Ascan nonfin ahuun yoraquin. Upan Diosin Furun cushua cuscan huafain nocorifi Furunmun cushusharamisi. <sup>31</sup> Ascano Diosin tsain cunuquin isca huani,

“Ascacun nocofunun ainfo fiashucai afanan apa yafi ahua fu itiroma. Apa yafi ahuamaqui pashtaciro ainfo fii. Ascashu nan oshati fusti muran afu itiro. Ascano nan fusti cuscara,”

ishon cununiquin. <sup>32</sup> Nan na rama un mato Diosin tsain yoia cuscan tsoancal atirifi tapitiroma. Ascafia nan un mato yoia cuscan un Cristo yafi nan icoinra huafuoan un yoi. <sup>33</sup> Ascafia funufoan mafiri man noiai cuscan maton ahuinfohuun noicoincahuun. Ainfofoan maton funufohuunoari shinansharacoincahuun. Aqui tsain chipuyamafain ato nicasharacoincahuun.

## 6

<sup>1</sup> Facufoan maton upa yafi uhua nicasharacoincahuun. Nocon Ifon Diosin yononi cuscan maton upa futan uhuan mato iquina. Ascan man ato nicasharacianshu marifi man icoinsharatiro. <sup>2-3</sup> Ascashon Diosin Moisés yononi yorafo cunushoquin isca huanon,

“Maton upa yafi uhuhuunoa shinansharafain ato nicasharacoincahuun. Ato-huunoa yoisharacahuun,”

ishon cununi. Nan Diosin yonoquin tau huafain yoiyotiani isca huaquin,

“Upa yafi uhua man shara huacun urifi un mato shara huai. Nuno mai anoashu man unimayopacunon,”

ishon Diosin yoiyotiani.

<sup>4</sup> Natiantan un apafori yoisharapai. Maton facufoqui tsain chipuyamafain curushcain yoiyamacahuun. Man tsain isinipaton ato yoiaino matoqui sinatirofo. Asca huaquimarocon ato tapimasharacahuun chaca huanonfoma. Nocon Ifon Jesús nocohuun noiai cuscan maton facufo yosisharacahuun noco Ifo tanasharanonfo.

<sup>5</sup> Yonomatifoan maton ifofo nicasharacoincahuun. Nuno mai anoshon maton ifofoan mato yonotirofo. Maton Ifo Criston fuchipaiyai cuscan man samamashta

ashoriscapaitiro. Nanscarifi aqui maton ifon nantori mato yonopaiyai cuscan shara huashoriscacahuun.

<sup>6</sup> Maton ifoan mato oiainnosi yonoshonsharaquima matohuunoa shinansharanonfo. Mato oianmafiaifono unimacai ato yonoshosharacahuun. Man ascaiton oin unimanonfo. Man mato ifo yonoshosharaquifin nan noco Ifo Criston yonoshoshara man huaicain. Ascan nan nuno mai anoashu mato ifo fusti man unimana cuscan huafainri noco Ifo Diosin mato amapaiyai cuscan ashocahuun. Ascashu noco Ifo Jesús ahuun yonomati iishcaquin. <sup>7</sup> Ascan mato ifofo fasi unimacain yonoshoquifin nan noco Ifo Dios man fasi unimacain yonoshoshara cuscan. <sup>8</sup> Ascan man man tapia yonomatifo iyamarai oinmatifomari nan yonoshosharaifoan nocon Ifo Jesús ato inansharacoinsquin.

<sup>9</sup> Nanscarifi aquin ifofoan maton yonomatifo shara huafain ato omismati huayamacahuun. Man man tapia aton Ifon Jesús nai murannoashu nanrifi maton Ifo. Jesús noco oin nanscarafosi yonomatifo yafi ifofori atocai futsa ichapama noifain futsa fasi finonmafain noima. Ascataama nanscarafosi huaquin nantifi nocohuun noiaquin.

*Criston nan icoindra huafio noco itishara huaa noco noicasmaifoan noco ahuuasca huanonfoma*

<sup>10</sup> Ascano uhuun yoramishtichin uhuun tsain unutaquin un mato yoinon. Nocon Ifo fu rafucahuun ahuun curushu mato inannon. Man ascaifi ahuunoashu man mutsisipa shara itiroquin nan tanasharashu. <sup>11</sup> Un ahuara futsahuunoa un mato yoi man tapisharanon. Ranushumuafu aton niaifoan ato yonotiro itisharanonfo futsafoan ato ahuusca huanonfoma. Ascashon nan yopaifo cuscan ato inantiro. Aton ashi yafi piafo non ahuun cuno maiti inanfain ahuun cuno shofucumuti sahuufain ahuun cuno sapa ponutamuai ashin iquinonma. Nanscarifi aquin Upa Diosin mato inanpaiyai cuscan nantifi ficahuun yoshin chaca Satanás mato chaca huamapaiyai cuscan aashquima. <sup>12</sup> Non Jesús tanasharaitocai yorafoan noco unumatiroma. Ascataama nan yoshin chaca Satanás yafi yoshin chaca futsafoanri noco curushcain chaca huamapai. Nanfo non oinyamafatiro noco asca huapaifafaini. Nanfoan icoindra huafoma yonofafaini chaca huanonfo. Nan yoshin chaca ichapafoan.

<sup>13</sup> Ascacun Upa Diosin ahuun curushu noco inanpaiyai cuscan ficahuun mutsismashcaquin yoshin chacafoan matoqui nocoshon man itisharashu pacushcaquima. Ascano nan yoshin chacafoan mato chaca huamapaiyaiton Diospan curushhuunshon man finontiro mato chaca huamanofoma. Ascan Diosin mato amapaiyai cuscan nantifi man accinnashu man isharatiro yoshin chacafo matomaquinoa potashcaquin. Asca Jesús fu rafushon man chaca huashquima.

<sup>14</sup> Mato yoia cuscan ranushumuafu itishara cuscan marifi itisharacahuun nan yoshin chacafo matoqui nocoshon mato chaca huamapaiyai cuscan huashquima. Upa Diosin mato imapaiyai cuscan fusti acahuun itisharashcaquin. Iquisi ranushumuafu ato nanushumuti yopacani aton camisa nonoaino pacushcaquima. Nanscarifiai man ico-coiaino yoshin chacanun mato pacumatiroma. Ranushumuafuan ahuun cuno sahuuti shofucumua sahuumisifo nan noicasmaifoan aton ashin ahuun ointiqui tsacanonma. Marifi Diosihuunoashu isharacahuun yoshin chacafoan maton ointi chaca huanonma. <sup>15</sup> Ranushumuafu aton sapato shara sahuutirofo aya ichosharashcaquin ahuashta puamashquima. Nanscarifiai marifi itisharacahuun futsafoqui nocoriscashon Diosin tsain shara man ato yoaino aton ointi unimanonfo.

<sup>16</sup> Ascan ranushumuafu sapa nituhuati pia yafi ashi iquinonma tsomatiro nan noicasmaifoan aton piannonma. Nanscarifiai maton nitumati man yopai. Man noco ifo Jesús icoindra huaiton nan yoshin chacafoan maton nomuran shinanchacemapaiyai cuscacai man atiroma. Ascano non Jesús icoindra huaino nan nocon nituhuati cuscara itiro.

<sup>17</sup> Ranushumuafuan ahuun cuno maiti sahuutirofo aton mapo cushusharashcaquin nan noicasmaifoan ato mapoqui ahuusca huanonfoma. Nanscarifiai marifi man Jesús

icoinra huashu Upa Dios fu man nipatiro. Man ascaitocai yoshin chacanun mato ahuuasca huatiroma. Ranushumuafaoanri aton nopus fitirofo nan ato noicasmaifo ahuun rutushcaquin. Nanscarifiai Diospan Yoshin Shara ahuun nopus cuscara ficahuun. Nan nopus cuscarafin Diospan tsainquin. Nanrifi man yopacoin nan yoshin chacafo matoqui nocotima huashcaquin.

<sup>18</sup> Ascacun Diospan Yoshin Sharahuunshon Dios unutama cufifafaincahuun. Aqui mutoi futsucaquima. Ahuara futsa ahuuscarai cuscan Upa Dios cuficahuun. Ointiaquimacaquima. Upa Dios cufifafaincahuun. Nantifi Jesús icoinra huafo ato cufishofafaincahuun.

<sup>19</sup> Ascashon uarifi cufishocahuun Diospan Yoshin Sharahuunshon ahuun tsain shara ranotama un ato yoifafainon. Nan uhuun caifomafohuunoashuri Jesús ato nashoni un yoinon. <sup>20</sup> Ascashon nan un mato yoiai cuscan huafain un yoimisi. Ascacun Cristo ua nichini ahuunshon nantifi yorafo un yoifoanfafainon. Ascacun ua cunu muran iquimanifo. Ua Upa Dios cufishocahuun un ranotama Diosin atohuun noiai cuscan huafain un ato yoinon.

*Pablonun tsain shara ahuun unutaquin Efesofo ato fomani*

<sup>21</sup> Ascan nocon yorahuan Tíquico huun un fasi noicoin. U futan nocon Ifon Jesushuunoa yonoshomisi. Ascacun Tíquico un mato ari nichishquin. Un icai cuscan huafain urimain ahuuscaquin mato nanto tapimai. <sup>22</sup> Ascacufin un mato ano nan nichicai nonmain ahuuscaicain matorifi tapimafain maton ointi unimanon.

<sup>23</sup> Ascano nocon Upa Diosin futan nocon Ifon Jesucristo maton ointi unimanon Jesús icoinra huashu man nantifi noinain futsutiro. <sup>24</sup> Man nocon Ifon Jesucristo nantishon tapiquin man ahuun noi unupacuyamaino Upa Diosin nantifi matohuun ramapai. Unquian Pablo un mato cunushoni. Nanscari inon. Nanti.

Pablo

## Pablonun Filipos Anoafo Cunu Fomani

### *Cunu muranshon Pablonun nan icoindra huafu Filipos anoafo cunu fomani*

<sup>1</sup> Uhuun yoramishtichin Filipos anoafoan manfin Diospan yorafoquin. Un mato yafi mato niaifofo non mato cushumisifori cunu fomai man tapinon. Timoteo natian ufu nuno. Nantori mato yoisharapai. Ascan nonfin Cristo Jesús ahuun yonomati rafuquin. <sup>2</sup> Nocon Upan Dios futan nocon Ifon Jesucristo matohuun ramapaiqui matohuun shinansharaicai mato shara huafafainpainon. Ascashon maton ointi unimamapainon

### *Icoindra huafu Pablonun ato cufishofafainpaoni*

<sup>3-5</sup> Un mato fasi shinain. Nan un matohuunoa shinaintifi unimacain un mato Upa Dios cufishomisi isca huaquin. —¡Aicho! Uhuun Upan Diosin, Filipofoan min Furun icoindra huaquin tauhuanifotian yafi natiantan u futan min Furunhuunoa futsafo tapimapafafaincaniran, —ishon un matohuunoa Upa Dios cufifafaini. <sup>6</sup> Ascano un icoindra huai man Jesús Ifo huaquin tau huanitian Upa Diosin maton ointi fianananshara huani cuscan natianrifi shafatifi mato fiananan huarai cuscan nan Jesucristo oaitian man nanscasi anon.

<sup>7</sup> Ascacun un fasi matohuun noiquin. Uhuun nomuranshon nannori un mato shinanfafaini. Upa Diosin noco shara huamisi cuscan marifi man man u futan mumisi. Ascacufin ua cunu muran iquimaifotian Upa Diosin ua shara huafain uhuun ointi ua shara huashoni. Nan uhuun ointi ua shara huashoan cuscan marifi man man muumisi. Ascan futsafoan Jesushuunoa amaquiri yoifiaiton un amaquiri aton yositamarocon shafacaficoin un ato yoi tapisharanonfo. Un ato yoimisi isca huaquin, —Jesús noco nashoni nocon chaca soashonano non afu ipanon, —ishon un ato cayacafi yoinon. Upa Diosin ua shinansharamani marifi u futan un muai cuscan man munon. <sup>8</sup> Jesucristo nocohuun noiai cuscan huafain urifi un matohuun noi. Ascacun un mato fasi shinain. Urifi un matofu ipaicoinquen. Un icon yoiai cuscan Diosin ua onancoian.

<sup>9</sup> Ascacun un mato cufishoni man Dios onancoinfain ahuara iconcoin fusti man tapisharaquin finacoinsion futsafo man noicoinnon. <sup>10</sup> Ascashon man tapitiro ahua main shara iyamarai chacaquin. Ascano man Jesús fu rafuashu nan cuscara sharacoin man itiro. Tsoanshtacai matohuunoa ahua chaca ointirofoma nan Cristo oaitian. <sup>11</sup> Nanscashu marifi nan Jesucristo shara huafafainai cuscan man huatiro. Man ascaiton futsafoan mato oinquin yoitirofo isca huaquin, —¡Aicho! Nafo icoindsharamisifo. Upan Diosihuunoashu isharamisifo. Ascan Diosin fasi shararan, —ishon yoishquicani. Un nannori matohuunshon Upa Dios cufifafaini.

### *Un Cristo fu rafupaipacunaca nan fusti un shinain*

<sup>12</sup> Uhuun yoramishtichin un afanan mato yoinon. Ua cunu muran iquimanifo un afanan ato Diospan tsain shara Jesucristohuunoa ato yoiamaishafain. Ascafaino yora paratamafain Jesús icoindra huafafaincani. Nan ua chaca huafiacashon nanfoanri uhuunshon nan tsain shara Jesushuunoa nicacaquin man icoindra huafu. <sup>13</sup> Ascano nantifi ranushumuafu futan nunoa yorafoanri man tapiafo un Cristohuunoa yoiaiton ua cunu muran iquimanifo. Un ahua chaca huayamafiaiton. <sup>14</sup> Ascatacua cunu muran iquimafafocai un funamisima. Ascatamarocon ranotama futsafo Cristohuunoa un ato yoifafaini. Un ascaiton oincani Jesús icoindra huafu paratamafain ranotama Diospan tsain shara futsafoi ato yoifafainonfo.

<sup>15-17</sup> Ascano atirififain ua noicoinquen uhuunoa shinamisifo isca huaquin, —Pablon cunu muran iquimafafocai Upa Diosin tsain yoiai cuscan tsoan shatumanima ato Jesushuunoa yoiai cuscan nicasharanonfo, —ishon uhuunoa shinansharacani. Nannori Jesushuunoa shinainfoan yoimisifo. Icon atirififain nan tsain shara Jesushuunoa

un yoiai cuscan yoifiacashon nanfoan ua shutipaicani. Un icai cuscan ranotama Jesushuunoa yoipaicaquin. Nanfoancai Cristo noicoianfoma. Ascashon shinanqui isca huafo, —Pablon cunu muran iquifiashon Jesushuunoa yoimisiran, —ishon non yoiaiton nicaquin, —Ahuun ointi non isinmatiroran, —ishon uhuunoa shinanchacamisifo. <sup>18</sup> Nannori uhuunoa yoifiafonocai un shinanchacatamarocon un fasi unimai man futsafo Jesushuunoa yoimisi cuscan. Ascashon futsafoanri shinansharafain caya-cafi yoimisifo cuscan man rafucainta Jesushuunoa yoiai cuscan un fasi unimacoinni.

<sup>19</sup> Ascacun mun tapian man ua cufishonai cuscan yafi Jesucristo Yoshin Sharapan ua ashoinaun cuscan un fasi unimai. Ascatan nan ahuara ahuu cuscararan un finonfiashucain un shinanchacaima. Ascatamarocon nan un finon huain cuscan ua shara huashoin. <sup>20</sup> Upa Diosin ua amapaiyai cuscan un fasi huapaicoincai un rafitiroma. Un rafitamarocon un niyoashu iyamarai un naicain un ratuima. Un ascaiton oinquin futsafoan Jesushuunoa shinansharanonfo. <sup>21</sup> Cristo fustihuunoashu un afu ipapai. Ascashu un nairifi shara finacoin itiro unmain nanriashu afu fasi unimacoin cayamaifin.

<sup>22</sup> Ascafia un nataima iquisi futsafo Jesús icoinra huamayotiro afu ipanonfo. ¿Ascan ratocaimun sharaquin? ¿Niyoashu iyamarai un naamun shara? ¿Ascacun ratomun un catontiroquin? Uncai tapiama. <sup>23-24</sup> Nan rafu shara. Asca uncaí catontiroma. Urifi un Jesús ari capaicoincain afu ishquin. Nan fasi shara finacoinflashu un shinan man ua fasi yopacoin un mato ahun tsain shara yoinon. <sup>25</sup> Ascano man fasi ua yopaifin mun tapiaquin. Ascatari mun tapia un nayoataima un matofu iyoano man Jesús icoinra huaqui finacoianshu man fasi unimacointiro.

<sup>26</sup> Ascano un afanan matofu iyoaiton oin Cristo Jesushuunoashu man fasi unimacoinshquin. Ascashon man yoiquin isca huashquin, —¡Aicho! Jesucriston min afanan nocoquin Pablo nichian nocon cayacafi tapimasharanon, —ishon man yoishquin. Ascanshu man uhuunoashu fasi unimai finacoinshquin.

<sup>27</sup> Ascacun isharacahuun. Man isharaiton oinqui yoitirofo isca huaquin, —Jesús icoinra huafo isharacoinmisifo. Ascashon nan tsain shara Jesushuunoa iconcoinran, —ishon yoishquicani. Ascan un matofu iyoano iyamarai un chaicushon matohuunoa nicaquin un tapitiro man Jesús tanashara. Man nannorisi shinainton Diospan Yoshin Sharahuunshon futsafo man ato Jesús icoinra huamashquin. <sup>28</sup> Icoinra huamafoan mato tsain shatumapaifiaino mancái atoqui ratushquima. Rahuinmafain man ato Jesushuunoa yoifafainshquin. Ascashu man atoqui ratuyamaiton oinquin tapitirofo mato Upa Diosin numa. Ascashu nanfo funofiai nocaifai man funotama man Dios fu ipanaca.

<sup>29</sup> Upa Diosin mato shara huashoan man Cristo icoinra huafain marifi man ahunoashu omitsiscanon. <sup>30</sup> Un nocon Ifo Jesushuunoashu un omitsiscamisi. Man man maficoin ua oinpaoni natianri man ua nica ahunoashu un omitsiscaiton. Un ahunoashu omitsiscuai cuscan marifi nanscarifiai man omitsiscuai.

## 2

*Cristo nocohuunoashu omitsiscafianishaquin natian Apa Dioshuunshon nantifi finoncoian*

<sup>1</sup> ¿Man Cristo fu rafuaiton mato unimamaimun? ¿Matohuun noiquin maton ointi isharamamun? ¿Diospan Yoshin Shara matofu rafuimun? ¿Cristo matohuun shinaincain matohuunri ramapaiyaiton man man mumisimun? Icon nanfo man man mumisi.

<sup>2</sup> Nanscacun ua unimamaquin final cuscarí Cristo maton nanscarifi huaquin shinamapaiyai cuscan nannorifosi mato nomuran shinancahuun. Ascashu noinancahuun Jesús mato amapaiyai cuscan fusti aashcaquin.

<sup>3</sup> —Ufin un apaiyai cuscan fustifin un huaicain. Ascan futsafoan apaiaifo cuscacai un shinanpaima. Ascano un acai cuscumun futsafoan uhuunoa shinansharapainonforan,

—icashu cacapaimisi iyamacahuun. Anori itamarocon futsafohuunoa shinansharacahuun. Ascashon atohuunoa yoiquin isca huacahuun, —Nanfoanfin ua finontirofquin. Ascan uncai ahuama. Jesús fustiton ua imasharatiroran, —ishon futsafo finonmapaiyamacahuun. <sup>4</sup> Ascashon mafin man apaiyai cuscan fusti shinanyamacahuun. Futsafoan apaiaifo cuscari shinanshocahuun. <sup>5</sup> Ascashon nocon Ifon Jesucristo shinain cuscan marifi nannori shinancahuun. <sup>6</sup> Aafin Dioscoinquin. Apa Dios imisi cuscan arifi onihuafiacun. Ascashocai yoiquin isca huapaonima,

- Urifi un Diosquin. Nantifi uhuun Upanari uhuuna. Ascano uhuun Upan nai murannoashu ica cuscariai un nuno mai ano itiroquin. Un ascaitocai ahuaton ua chaca huatiromaran, —ishoncái Jesús anori shinanpaonima. <sup>7</sup> Arifi Dioscoinfashon nan Apa Diosin ahuun curushu yafi ahuun ahuamishti potayoni mai ano oshquin. Ascashu nocofunucoin noco cuscara ipaoni. Arifi nocofunu caintiro cuscan cainni yorafoan aton oinmati cuscara iishquin mai ano fotoni. <sup>8</sup> Ascano nocofunucoin cainfianishaquin nancaifin fasi omitsiscai finacoiniquin. Nanscaiton Apa yoini isca huaquin,
- Nantifi yorafohuunoashu min ato nashoshquiran, —ishon Apa yoini. Ascashon Apa nicacoianshu ihui coyan iquinanhunoashu noco nashoni. Ahuashta chaca huayamafiamisishaquin nai nan chaca huamisi ointsacai omitsiscacaini naani. <sup>9</sup> Ascafiacon Upan Diosin Furun afanan funimani afu niaifocoin inon. Ascacun tsoa futsacai Jesús finontiroma. Asca Upa Diosin Furun yoiquin isca huani,
- Mirus fustifi min ua cuscara. Nantifiton aton Ifo. Ascan minfin uhuun Facu Jesucristoquin. Tsoa futsancai mia finontiromaran, —ishon Apa yoini. <sup>10-11</sup> Ascanishaquin natian Jesús nantifi finoncoian. Nai muran icafo yafi mai ano icafo non naamisifo non yoshinfoanri. Aqui oshon nantififain ratoconun mai chachishon yoishquicanisca huaquin,
- Jesucristo minfin nantifiton noco Ifoquin, —ishon yoishquicanisca. Nannori Furunhuunoa yoicaquin nantianri Apa Diosihuunoa yoisharashquicanisca.

### *Jesús icoinra huafaoan a icoinra huamafo muranshon ato ismatiro ahuuscashumain isharatiroquin*

<sup>12</sup> Ascacufin uhuun yoramishtichin un matofu iyoshon un mato yoiyopaoni cuscan man nanscasi huaquin nicacoinmisi. Natianri un matofu iyamafiashon nan un mato yosipaoni cuscan unutama finacoinquin nicasharafafaincahuun cachiquiri huacaquima. Jesús mato numafain maton chaca soashona man afu nipanon. Ascashon nunori shinancahuun, —Nan ua yonopaiyai cuscan un ayamaifin musuquin. Ascashu un funotiroran, —ishon shinancahuun. <sup>13</sup> Diosin maton nomuran mato shinansharafafaini mato amapaiyai cuscan man anon. Afin apaiyai cuscan huafain matorifi nannori shinanmatiro.

<sup>14</sup> Ascacun Diosin mato amapaiyai cuscan fusti huacahuun. Nantifi man acai cuscan huaquin tsain chipufain fochishmanantananyamacahuun. <sup>15-16</sup> Man ascaiton oinquiçai Jesús tanamafoan matohuunoa yoitirofoma isca huaquin, —Nan Jesús tanamisifoflashon tsain chaca yoimisifor, —ishocai matohuunoa yoitirofoma. Man ascaitocai mato tsoan ahuashta rafantiroma. Ascatamarocon man isharaiton ointirofo man Diospan facucointfoshon. Man ahua chaca huamisima. Nan Jesús icoinra huamafoanfin ahuara chaca huamisifoquin. Ascashon shinanchaca fustimisifo. Ascasi acani man funoaf. Ascashu faquish muran icafo shinantsafo. Mancaí ato cuscarama. Ato cuscara itamarocon Diosoñuñoasi ato yoifafaincahuun icoinra huacanashu Jesús fu nipanonfo. Ascan manfin ato muranshon nan chashamatinin chasha huaiquin ato ismashcaquin a chaca huamisifoan mato oinnoñfo. Man ascaino Jesús afanan oaitian

unfi unimashquicain. Ascashon uncai ipaitsi mato Diosin tsain yoimisimaran, un nantifi yoitiro.

<sup>17-18</sup> Un mato yoisharamisi man Jesús icoine ra huacoinnon. Asca Upa Dios un yoitiro isca huaquin, —Upa Diosin, mian yononi cuscan un Filipo sofo min Furun Jesushu- unoa yoimisi. Nan icoine ra huanonfo min ato yoiai cuscan acoinonfo. Un ato mia icoine ra huamahuunshon ua rutushquicaniran, —ishon un Upa Dios yoitiro. Ascano ua rutufiafo uhuunshon man Jesús icoine ra huano un unimatiro. Ascacun marifi ufu unimacahuun Diosin ua shara huaino un matohuunoashu natiro.

### *Timoteo yafi Epaafroditu*

<sup>19</sup> Jesucristo apaiyaiton un matoqui Timoteo samamashta nichipai. Chipo u ano nasoaitian matohuunoa ua tapimanon. Nocoshon matohuunoa ua yoiatton nicaí un fasi unimacointiro. <sup>20</sup> Timoteo mato noicoinquin matohuunoa tapipai man ishara- caimain man Jesús tanasharaquin. Asca tsoa futsacai Timoteo cuscarama. Ascashu un matohuun noiai cuscari arifi matohuun noicoin. <sup>21</sup> Nantififain afin apaiaifo cuscan fusti shinamisifo. Jesucristo ato yonomapaiyai cuscacai shinamisifoma.

<sup>22</sup> Ascan Timoteocai ascarama. Maficoín man man onan. Nan uhuun facu cuscara- coinshofin. Timoteo u futan Jesushuunoa yoimisiquin. <sup>23</sup> Ascacufin un Timoteo mato ano nichiriscapaicain. Unmain ahuuscaicain un tapiataima. Ascan nan un tapiaintian un mato ari Timoteo nichiriscatiro uhuunoa mato tapimanon. <sup>24</sup> Un nocon Ifon icoine ra huai uatsi mato ari nichiyamaiton. Ua nichiaino un samamashta un mato ari caicain.

<sup>25</sup> Ascano manfin uqui Epaafroditu nichiniquin un yopai cuscan ua ashonon. Ascacun nanfin uhuun ushto cusracoinquin. U futan Diosin tsain yoifafaini. Afin fasi mato shinain. Ascan un shinanracafin afanan un mato ari nichishquin. <sup>26</sup> Epaafroditu isin- incaí mato tapimapaiyamafiano man man tapian nicaquin matohuunshon shinanqui ahuun ointi nocota. Ascashon yoiyamua isca huaquin. —Tapiánmapainonforan aton ointisin ihuutirofoquin, —ishon matohuunoa yoiyamua. Ascashu natian matofu fasi ipaicoín. <sup>27</sup> Iconfinquín Epaafroditu fasi isiniqui man naqui rashquiyamua. Ascafia Diosin ahuun ramapaicain uhuunri ramapaiyaino man cayayamua. Ascan naanofin un fasi shinain omitsiscái finacuanitaquín.

<sup>28</sup> Ascacufin un mato ari nichipaicain. Matoqui nocoino man aquí unimanon. Man ascaíno urifi un unimashquin. Mato ari Epaafroditu nocoinocai un afanan shinain omitsiscashquima. Muma sharamain matoqui nocoyamaiton. <sup>29-30</sup> Cristo yonoshoni man naqui rashquiyamua. Ascan man chai icashucái uqui man oyamaino matohuun rafanan Epaafroditu uqui oyamua. Ascafia matoqui nocoinocai fasi unimacain nocon Ifohuunshon ihui sharafain ahuun noiquin a ismasharacahuun.

## 3

### *Ahuara iconcoin shara finacoian*

<sup>1</sup> Uhuun yoramishtichin uhuun tsain unutaqui un mato yoi. Manfin nocon Ifon Jesucristo ahuun yorafoquin ascacun unimacahuun. Un mato cunushoni cuscan afanan un mato yoi. Man poshtutanonma nicafafainaifin sharaquin. Nan tsain shara man tanacucái yora futsafoan mato amaquiri yositiroyfoma.

<sup>2</sup> Ascacun jOinfain! A yora chaca huaifo fishtayamacahuun. Pashna popu cusracafquin. Nan yora chacafoan mato amaquiri yosipaicani isca huaquin, —Man foshqui rupa shatuyamashucain man Dios ari nocotiromaran, —mato huamisifo. <sup>3</sup> Asca non foshqui rupa shatuhuunshocai nocon chaca non soatiroma. Jesucristo noco nashoni nocon chaca soashoshquin. Arus fustifin nocon chaca soashotiroquin. Nan Furuhuun- shori Diosin noco ahuun facufo imatiro. Ahuun Yoshin Sharahuunshon non Dios yoitiro isca huaquin, —Non mia fasi noi. Min sharacoinran, —ishon non yoitiro. Jesucristo noco nashoni nocon chaca soashoshquin. Ascacun non aquí unimacoinni. Arus fusti

noco numatiro. Man non tapia non foshqui rupa shatuahuunshocai noco ahuuasca huatiroma.

<sup>4</sup> Futsafoan yo quiraca isca huafo, —Unfi shara fustisi huamisiquin. Ascashufin un Dios fu ipatiroquin, —ishon shinanfiafono urifi un nannori shinanpaiquin un nannori shinanquin finacuana. <sup>5</sup> Un caintan ocho oshatan ua foshqui rupa shatunifo. Asca unfin Israelifoan caifoquin. Urifi un Benjamín nami. Uncai osiama. Unfin Israelicoinquín. Diosin Moisés yoini cuscan urifi un nicacoianquin. Ascatarifi unfin Fariseoquin. <sup>6</sup> Diosin tsain tanasharapaicoinquín nan Jesús tanamisifo un ato chaca huapaoni. Unfi nantifi Moisés tsain tanasharapaoniquín. Tsoancai uhuunoa yoi qui isca huatiroma, —Pablónuncái Moisés tsain nicacoinpaonimaran, —ishocai tsoan yoitiroma. Ascashon un shinanquin isca huapaoni —Nanfoan ua imasharatiroran, —ishon un fasi amaquiri shinanpaoni.

<sup>7</sup> Ascafia natian mun tapia afocai ahuama. Afoancai ua imasharatiro. Nanfo mun potacoian Jesús fusti ico inra huashu afu ipashquin. <sup>8-9</sup> Ascano uncai afanan un ipaoni cuscan apaima. Nantifi un ipaoni cuscan mun potacoinni. Un ascaí un funoco inpaoni. Ascacun natian un shinancái nanfo ahuama. Nan ahuara chaca potamua cuscara fo. Natian uhuun Ifo Jesucristo fusti un onanpaicoin. Nancaifin shara finacaiaquin. Arus fusti ua imasharatiro. Moisés tsain yonopaoni cuscacai un afanan ascatiroma ua imasharanon. Ascata marocon un Cristo ico inra huaino Upa Diosin Furunhuunshon ua imasharatiro a cuscara shara un inon. Ascan un Diosiqui nocoaitian uqui unimatiro un Cristo fusti ico inra huacun ua imasharanon.

<sup>10</sup> Un Cristo onanpaisharacoin afu rafushquin. Diosin ahuun curushpan Cristo afanan funimani cuscan urifi nan curushu un mupai a cuscara shara ua imanon. Cristo omitsiscapaoni cuscan urifi afu rafushon un mutiro. Unrifi ascapai nan cuscara ishquin. Ascashon ua nashoni un chaca huapaoni cuscan ua soashoshquin. Ascacufin un ipaoni cuscacai afanan ascapaima. Ascafia un nan Cristo fu naa cafiscapaoni. Ascashu natian a cuscara shara iishquin. <sup>11</sup> Ascano unrifi nan funini cuscan un funipai. Cristo naafia shu afanan funini. Ascanishaquin afanan nanacama. Nanscarifiai urifi un afu funi cafiscapai. Nuno mai ano niyoshon afanan chaca huatama nan cuscara shara iishquin.

### *Un fasi Jesús tanaqui tapicoinpai un aquí nocoaitian afu ipashquin*

<sup>12</sup> Un ipaiyai cuscacai un acoinnataima. Un Jesús cuscara coin ipaifiaicai un icataima. Jesucristo uhuun ointi fiananan huani a cuscara coin ua imashquin. Ascacun un Jesús tanasharafafaini a cuscara sharacoin ishquin. <sup>13</sup> Uhuun yoramishtichin un Jesús cuscara coin icataiyamafiaicai un ipaoni cuscan afanan un shinainma. Un Jesús cuscara ipaiyai cuscan nan fusti un shinain. <sup>14</sup> Ascashon uncai ahua futsa shinainma. Nan Jesucristo fusti un tanapaicoin. Nan fusti un shinanfafaini. Ascano Diosin ua catonni un afu ipanon. Jesucristohuunoashu Upa Dios ari un nocotiro. Nocoashu a cuscara sharacoin un itiro.

<sup>15</sup> Man Jesús tanasharai nan un mato yoia cuscan marifi nannori shinancahuun. Un shinain cuscan futsan shinanyamaiton afincoin Diosin ato cayacafi tapimatiro.

<sup>16</sup> Ascashu Cristohuunoa man tapia cuscan nanscacoincahuun.

<sup>17</sup> Uhuun yoramishtichin un Jesús tana cuscan marifi uhuun caocahuun. Non icai cuscainfori oincatan nanfohuuri caocahuun. <sup>18</sup> Un mato yoimisi cuscan nannoricoin natiantan afanan uhuun nomuran uaiyanan un mato yoi. Jesucristo noco nashoni nocon chaca soashoshquin non ipaoni cuscan afanan non shinanonma. Futsafoancai nan na un mato yoiai cuscan nicapaicanima. Ato chaca shatucasmacani. Ascaifin Jesús noicasmafain icafoquin. <sup>19</sup> Jesús ato amapaiyai cuscacai shinantama nan afin apaiaifo cuscan fusti shinancani. Pifain ayafain huacaquin. Nan fusti shinancani. Ascashon nan nocofunufoan ainfofohuunoa fusti shinancani. Nanscarifi ainfofo aifono

nocofunu futsafo yasi icaifoanno. Nanscara chacafosi huacani. Nanscaisi tapiafo. Non chacaforan itama noncaifin sharaquin icafo. Afanancai tsoa rafipaitirofoma. Nanscarao nacanashu omitsiscapanacafo muran focani.

<sup>20-21</sup> Ascafia noncái ascarama. Ascatamarocon nonfin Diospan yorafoquin. Nonfin nai muran afu ipanacaquin. Nocon numamisi Jesucristo nanno ica. Nanfin non fasi manaicai. Unimayanan afanan Jesús nocooqui oaitian nocooqui nocoshon ahuun curushpan a cuscara sharacoin noco imashquin. Ascashu non nacon nocon caya chancanafaino Jesús nocon caya fiananan huashotiro non afanan ahuuscatama isharacain funa sharacoin ahuun caya cuscara non inon. Nanscarifi aquí ahuun curushpan nantifi noco iquina.

## 4

### *Nocon Ifo Jesushuunoashu unimafafaincahuun*

<sup>1</sup> Ascacun uhuun yoramishtichin un fasi matohuun noicoin. Un mato fasi oinpaisharai. Nan un matohuunoa shinaintian un mua fasi unimacoinna. Un mato Jesushuunoa yoimisi cuscan natian man man icoingra huasharacoian. Man ascaino un fasi unimacoinni uhuun yonorica funoima. Ascacun uhuun facufoshtan Jesús cachiquiri huacaquima tanasharacahuun. <sup>2</sup> Ascatori un nica Evodia yafi Síntique fochishmanantanafafainaifoan. Ascacun un ato yoi achishta rafutan, Evodia yafi Síntique un mato yoisharapai. Ahuuuscai man fochishmanantanafafaina. Cristohuunshon nannori rafu shinansharacahuun. Afanan ascayamacapun. <sup>3</sup> Uhuun yorashtan min u futan Dios yonoshomisicun un mia yoi. Nan ainfo rafu ato yosisharapun. Afanan rau huatananshu yorahuan tananonfo. Nan rafutafin u futan Jesushuunoa futsafo yoipaonifoquin. Ascano Clemente arifi u futan Jesushuunoa yoipaoni. Ascan natian yora futsanfoanrifi u futan Jesús yonoshonafo. Ascacun nanfofin Diosin ahuun libroqui nai muranshon aton anufo man cunuaquin afu nipashquinonfo. Nantifi ahuun yorafo Diosin aton anu cunua afu nipanonfo.

<sup>4</sup> Ascacun Jesús mato Ifoquin unimacahuun. Afanan un mato yoi futsai unimacahuun. <sup>5</sup> Nocon Ifo oti chaimaquin. Ascacufin isharacahuun. Futsafihuun noicoincahuun. Man ascaiton yorafoan mato oincaquin, —Isharaforan, —ishon matohuunoa yoinonfo. <sup>6</sup> Ascano shinanchacayamacahuun. Ascatamarocon ahuara ahuuscarafaino Upa Dios cuficahuun. Man yopai cuscari a yoicahuun. Man cufaino Upa Dios yoicahuun isca huaquin, —¡Aicho! Upa, min ua nicasharamisi un yopai cuscan min tapishon min ua ashosharamisiran, —ishon cuficahuun.

<sup>7</sup> Man ascaitofin maton nomuran Diosin maton ratufo potafain mato ointi isharamaiquin. Ahuara ahuuscarafaino Diosin nocon ointi isharamatiroqui. Ascan noncái tapitiroma ahuuscashomain nocon ointi noco shinansharamatiroquin. Ascafia Jesucristo non icoingra huacun nocon ointi yafi nocon nomuran noco shinansharaafafaino.

### *Ahuara sharafosi shinancahuun*

<sup>8</sup> Ascano uhuun yoramishtichin mun cunuquin anaiticuana. Un afanan mato yoi futsapai. Ahuara icon fusti shinanfain ahuara sharafosi shinanfain ahuara caya-cafi fusti shinanfain ahuara noco shinansharamatiro nan fustiri shinanfain ahuara yorafoan shara huafain cuscan shinanfain Diosin noco ashoain cuscan nanfo fusti shinansharaafafaincahuun. Ascashon nocon Ifo —¡Aichoran! —huacahuun. <sup>9</sup> Ahuara un mato yoia cuscan huafain un mato tapimana cuscan huacahuun. Ascashon ahuara futsan un acaiton man oian cuscan macafiri acahuun. Man ascaiton oinquin Diosin maton nomuran isharamatiro. Ascashu matofu ipashquin.

*Filipos anoafaoan pui ichanan huacashon Pablo fomanifo*

<sup>10</sup> Un unimacoin man ua shinanfiaquicai man ua pui fumayomisima. Man ua pui inanfiapaonishaquicai afanan man ua fumayomisima. Ua pui fumapaimisiflashucai ahuuscashuco ua fumatiroma. Ascafia natian man man afanan ua fuma. Ascacun natian un nocon Ifo, —¡Aicho! —huai. Uarifi afanan man ua cushusharamisi. <sup>11</sup> — Ascano un ahuara yopafiaquicai man ua ahua inanmaran, —un mato huamisima. Ahuarafu ahuuscarafainocai shinanchacatamarocon un unimacointiro. Diosifin nan-nori ua tapimanaquin. Ascashu un ahuara ichapaya iyamarai un ichapama ayafiaflashuri un unimatiro.

<sup>12</sup> Ascano mun tpiarihi ahuuscashumain ahuuoma non isharatiroquin. Nanri mun mumisi. Ascatah ahuuscashumain ahuara ichapayashuri non isharatiroquin. Nanrifi mun mumisi. Ascatah ahuara ahuuscarafainori un unimacointiro. Ascacun uncah shinanchacamisima. Un pii manyashu iyamarai foniquiri nanscara un mutiro. Raniran futsanoashu ahuara ahuuscarafainorica un shinanchacatiroma. Ascatamarocon un unimacointiro. <sup>13</sup> Cristo ahuun curushu ua inainton nan curushhuunshon ahuara ahuu cuscararan futsan un atiroquin.

<sup>14</sup> Ascafia cufin nan shara man uhuun ramapaicain ua shinan. Ascan manfin ua shara huaquin un omitsisca cuscan marifi man ua shinanquin ua shara huua.

<sup>15</sup> Man Filipos anoafaoan man rama Jesucristohuunoa nicaquin tau huanitian Macedonia anoashu un caiton un yopai cuscan marus fusti man ua inanni. Ascan nan icoinra huua futsafoancai tsoan ua pui yafi ahuara futsa fumanifoma. Nan man man tapia.

<sup>16</sup> Un Tesalónica ano icun un yopai cuscan man ua fumafafainpaoni. <sup>17</sup> Ascafia ufcain un maton pui fianfafainmisima. Man ua inanshara cuscan Upa Diosin oinquim matorifi ahuun rafanan shara huafafainshquin. Mato shara huaino urifi unimacoinshquin.

<sup>18</sup> Ascano natiancái afanan un ahua yopaima. Munmain ayashufin. Epafroditu uqui nocoshon man ua fuma cuscan ua inantoshiyamua. Un yopai cuscan finonmafain man ua fumayamua. Nan man Diosihuun noiai cuscan huafain uhuunrifi noiquin man ua fumayamua. Man ua inainton oian cuscan Diosin matoqui unimacoinni.

<sup>19</sup> Uhuun Diosin man yopaiti mato inanshquin. Upa Diosin ahuun ahuara sharacoinfo aya cuscacai ichapa cuyopacunacama. Furun Jesucristohuunshon mato inanshquin.

<sup>20</sup> Ascacun nan nocon Diosifin nocon Upaquin. Nan fasi sharacoin. Arus fustifin sharacoinquin. Tsoancai a finontiroma. Nan, —Nocon Ifocoinran, —non huapanaca. Nanscari inon.

### *Pablonun ahuun tsain unutaquin Filiposofo tsain shara fomani*

<sup>21</sup> Nantifi Jesucristo icoinra huafu ua yoisharashocahuun. Nan icoinra huafu ufu icafoanri mato yoisharapaicani. <sup>22</sup> Nunoa nantifi Jesús icoinra huafuan mato yoisharapaicani. Nan niaifocoin Cesar ahuun pushu anoa yonomisifoanri mato yoisharapaicani.

<sup>23</sup> Nocon Ifo Jesucristo matohuun ramapaicain maton nomuran mato shara huapanon. Nanscasi ipanon. Amen. Nanti.

Pablo

## Pablonun Colosas Anoafu Cunu Fomani

### *Pablonun Jesús icoinra huafu Colosas anoafu cunu fomani*

<sup>1-2</sup> Uquian Pablo Diosin afin apaiyai cuscan ua catonni Jesucristo fu rafushon ahuun tsain un yoifoanfafainon. Timoteo futan un mato cunu fomai. Arifi Cristo ahuun yora. Colosas anoafuan manfin Cristo tanacoianshu Diospan yorafoquin. Nocon Upa Diosin matohuun ramapaiqui matohuunoa shinanquin mato shara huashofafainpainon. Ascashon maton nomuran maton imasharapainon.

### *Pablonun Jesús icoinra huafu cufishofafainpaoni*

<sup>3-4</sup> Un mato fasi ichapa shinain. Nan nocon Ifo Jesucristo Apa Dios non mato cufishofafaini. Ascan man non nica man Jesús icoinra huacoincun. Ascashon nan Jesús icoinra huaa futsafihuun man noicoianri man non nicamisi. Ascacun non nocon Upa Diosin yoiquin isca huamisi, —¡Aicho! Upa Diosin Colosas anoafuan min Furun Jesús man tanasharaforan, —ishon mato cufishofafaini. <sup>5</sup> Nan tsain shara iconcoinc Jesushuunoa cayacaficoin man man nicamisi. —Jesucristo icoinra huashu Dios icari man afu ipasharatiroran, —ica man man nicamisi. Nan tsain icoinra huashu man futsafihuun noicoinmisi. <sup>6</sup> Nan tsain shara Jesushuunoa nicaquin tau huaquin man icoinra huani. Ascashon nicaquin man tapini nan iconcoinc. Diosin matohuun ramapaiquin Jesucristohuunshon maton chaca soashoni man icoinra huanon. Ascacufin nan tsain sharahuunoashu man fiananan. Nicacani arifi manifoti nanscarifi amisifo. <sup>7</sup> Nan Epafras nocofunu fasi shara. Un ahuun noicoin. Arifi no futan Cristo yonosharashomisi. Noncái matofu itiro ipaonima. Ascacun afincoin mato Jesushuunoa tapimayopaoni. <sup>8</sup>—Colosasfoan Diospan Yoshin Sharahuunshon futsafo noicoinran, —ishon matohuunoa Epafras noco tapimana.

<sup>9</sup> Ascacufin nan un matohuunoa nicaquin tau huaitian natianri un mato Upa Dios cufishoquicai unumisima. Ascacun un mato cufishoquin isca huafafaini, —¡Aicho! Upan Diosin, Colosas anoafu min Yoshin Sharahuunshon min ato tapimapaiyai cuscan huafain ato tapimahuu. Min ato tapimanai cuscan aton nomuranshon tapicoinfain mia tanasharanonfo, —ishon un mato cufishomisi. <sup>10</sup> Ascashon nan mato amapaiyai cuscan man aiton oin Dios matoqui unimacoinshquin. Ascatacun nan mato yonomapaiyai cuscan acai man isharashu ahuun facu cuscaramain man itiro. Ascano man futsafo shara huashofafainquin. Man Dios onanquin finacoinfaintiro. <sup>11</sup> Ascan Upa Diosin ahuamamishti shara huatiroquin. Ahuun curush mutsisipacoin mato inantiro ahuara ahuuscarafiaino marifi ahuunshon man tunucoinnon. Nanscafiaquin man tunutiro funaquima unimasharacain.

<sup>12</sup> Ascano unimacain man Upa Dios aicho huatiro. Nantofin noco imasharafain ahuun yorafo inanpaiyai cuscan huafain nocorifi inain. Norifi non ahuun yorafocun noco inanshquin. A icano shafa fusti faquishicai imisima. <sup>13</sup> Ascacun noco numa non afan faquish muran inonma. Ascan nan Satanás icanofin fasi faquishcoinquen. Nannoashu funocani. Upa Diosin nannoai noco numa ahuun Furun shara fu non ipanon. Nanto Furun fasi noicoin. <sup>14</sup> Nocon chaca soashona ahuunshon Upa Diosin noco rau huatiro afu non ipanon.

### *Jesús noco nashonihuunoashu non Dios fu isharapacunaca*

<sup>15</sup> Ascan noncái Upa Dios non ointiromafiano Furun Jesús mai ano oni. Ascashon Furunmun noco tapimani ahuu cuscaramain Apa Diosiquin. Ascan Furun Jesusfin nan Apa cuscaramain. Ahuun ointi cuscaramain. Ahuashtacai oniataima Apa Dios fu nai muran iyopaoni. <sup>16</sup> Ascan Criston nantifi onihuani. Nai murannoafu yafi mai anoafori

ato onihuapacuni. Nan non oinmisifo yafi non ointiromafori ascashon nantifi onihuani. Ahuun oinmatifo nan afu icafo onihuafain yoshinfoan aton niaifofori onihuani Upa Dios Furun Cristohuunshon nantifi onihuani. <sup>17</sup> Ahuashtacai oniataima Cristo iyopaoni. Ahuun curushpan nantifi cushusharamisi. Ascashon fishifo cushufain fari cushufain oshuri cushufain nocon mai cushufain. Ascan nantifi cushuyamaino cuyo futsucuanafa. Nai yafi mai choquiqui futsucuanafa. <sup>18</sup> Tsoancai Jesús finontiroma. Ahuashta oniataima nantifi finonyopaonishaquin. Natianrifi nantifi finoncoian. Aafin ahuun yorafo nan icoinra huafo ato Ifocoinquin.

<sup>19</sup> Ascacun Upan Diosin yoiquin isca huani, —Un imisi cuscacoin nanscarifi uhuun facu imisiquin. Ascashu arifi ufu Dioscoin. Nonfin nanscara rafuquin, —ishon unimacain Upa Diosin yoini. <sup>20</sup> Jesús ihui coyán quinanqui mastofoanno ahuun imi focain nooco nashoni nocon chaca soashoshquin. Ascacufin ahuunoashu non Upa Dios fu afanan isharatiro. Ahuunoashu nantifi mai anoaflo yafi nai murannoafori afu isharatiro.

<sup>21</sup> Maton nomuranshon man Dios noicasmafain man fasi chaca huapaoniquin. Ascashucai man Dios fu rafuyamacai marificai man ahuun yorafo ipaonima.

<sup>22</sup> Ascafiacon Furun Jesucristo nai muranshon mai ano nichini nocofunucoin iquiyonon. Ascashu ihui coyán iquinanhunoashu nooco nashoni. Ahuunoashu natian Diosin matofu rafucain maton chaca soashotiro a cuscara shara man inon. Ascano man aqui nocoaitian matohuunoacai ahuashta chaca shinantiroma. Ascashocai mato yoitiroma isca huaquin, —Min chaca huamisiran, —ishoncái mato yoipacunacama.

<sup>23</sup> Ascano nan tsain shara Jesucristohuunoa icoinra huashon man ahuara futsa shinanyamaitocai Upa Diosin matohuunoa yoipacunacama isca huaquin, —Min fasi chaca huamisiran, —ishoncái yoipacunacama. Ascatamarocon man icoinra huaquin unuyamaiton oinquín nan mato yoiyotiani cuscaíno mato ihuishquin man afu ipanon. Man Jesushuunoa tsain shara nicaquin tau huani cuscaí nannorico un manifoti ato tapimani. Ascacun unquian Pablo un Upa Diosin tsain yoifoanfafainmisi Jesushuunoa ato yoishquin.

### *Diosin Pablo yononi Jesús icoinra huafo yonoshonon*

<sup>24</sup> Ascacun un fasi unimai un matohuunoashu omitsiscamisi marifi man ahuara ahuuscarafaino Cristo tanasharanon. Cristo nocohuunoashu omitsiscani cuscaí urifi afu rafumisifo nan Diospan yorafohuunoashu omitsiscamisi. Un matohuunoashu omitsiscainf nantianri un Cristohuunoashu omitsiscainf.

<sup>25</sup> Ascacun Diosin ua catonni maton oinmati cuscara un inon. Ahuun tsain shara un mato yoinon. Ascashon ua yonoquin isca huani, —Nan manifoti anoa yorafo uhuun tsain shara Jesucristohuunoa ato yoifoanfafainhuun, —ishon ua yononi. Ascashon nan uhuun caifomafo muran ua nichini. <sup>26</sup> Nan tsain Jesucristohuunoacai nooco shunifoan tapiyopaonifoma. Diosin tsoa tapimayopaonima. Natiantan Diosin rama shara nooco tapimani. Non ahuun yorafocun. <sup>27</sup> Upa Diosin Cristohuunoa yoiyotiani cuscaí nantifi matori tapimashquin. Uhuun caifo fustisicai tapimanima nan uhuun caifomaforifi ato tapimai isca huaquin, —Uhuun Facu Cristo matofu rafucacaini. Ascacufin man icoinra huatiroquin un icano man unfu iishquin. Ascashu Cristo shara fustisi ica cuscaí urifi un mato nanscara imashquinran, —ishon mato tapimai.

<sup>28</sup> Ascano Jesucristohuunoa non yoifoanfafainmisi. Diosin ahuun shinapan un ato yosifoanfafainmisi. —Ascacun Diosin tsain nicasharacoincahuun man funoshcaquimaran, —ishon un ato yoimisi isharanonfo. Ascan nan non Cristo icoinra huamisifo nantifain Diosin ointaifi non oinmapai a cuscara shara iishquin.

<sup>29</sup> Ascacufin un Dios fasi yonoshofafainicain. Ahuun Yoshin Sharapan uhuun nomuran ua yosiaín cuscaí huafain un mato yonoshofafaini. Man Cristo cuscacoin icai Upa Dios ari man nocoshquinon.

## 2

<sup>1</sup> Uhuun yoramishtichin, un mato tapimapai. Matohuunshonfin curushcain un mato Upa Dios cufishofafaini Laodicea anoafu futan futsafoanri ua oianmafiamisifoan nanfori un ato Upa Dios cufishofafaini. <sup>2</sup> Ascashon un mato cufishomisi mato nomuranshon man shinansharafain mafigranan man noinancoinon. Asca huatananshu man Upa Dioshuunoa shafacafi tapisharatiro. Ipaoni tsoancai Cristohuunoa tapiyopaonima. Ascacun natian ahuunoa mato shafacafi tapimapai man onancoinsharanon. <sup>3</sup> Nantofin nantifi onancoinfain tapicoianquin. Apa Diosin tapia cuscan arifi ahuun nomuranshon tapicoianquin. Ascan Upa Dios ahuarao shara aya cuscan Cristohuunshon marifi man tapitiroquin.

<sup>4</sup> Un mato nannori yoi futsafoan mato paranonfoma. Isca huaquin, —Non mato shafacafi tapimaniran, —ifiacanashu nanfocaifin chanimisifoquin. Ascashon mato shafacafi yoicafiscamisifoquin fasi amaqiri mato yosipaican. <sup>5</sup> Ascacun un matofu iyamafashion shafatifi fasi un mato shinain. Mun nica matohuunoa man nannorifosi Jesushuunoa cayacafi shinanfain man Jesús icoinra huafafainaiton nicai un fasi unimacinni.

*Cristo mato funa cuscara shara ima marifi man nan cuscara shara inon*

<sup>6</sup> Man Jesucristo icoinra huaquin tau huashon man Ifo huacoinna. Ascacun shafatifi afu rafufafaincahuun. Ahuun tsain nicacoincahuun. <sup>7</sup> Ahuara fimi fanano ahuun tapo chaicoin foanno cai fana tucuitiroma. Mutsisipacoin itiro. Nanscarifai Jesusfin nan tapo cuscara sharaquin. Ascacun afu rafufafaincahuun chaca huatamarocon a cuscara shara ishcaquin. Epafras mato tapimamisi cuscan shafatifi finacoinquín Jesús icoinra huafafaincahuun. Ascashon shafatifiri Upa Dios aicho huacahuun.

<sup>8</sup> Oinfain futsafoan mato paranonfoma. Amaqiri mato tapimashcaquin. Man cayacafi Jesús icoinra huai cuscacai mato ascara tapimapaina canima. Ascashon nan mato yosipaiyaito cuscan man ato nicashu ipaitsicoin man icoinra huatiro. Ascan nanfoanbai Diospan tsain Cristohuunoa yoicoianfoma. Ascashon nan aton fuyamisi cuscan mato tapimapaifain nan icoinra huamafoan shinainfo cuscan fustisi mato icoinra huamapaican.

<sup>9</sup> Ascano Cristo yafi Apa Dios nanscara rafu. Cristo noco cuscara nocofunucoinfashu Dios imisi cuscan arifi nanscamisi. <sup>10</sup> Aafin nantifiton aton niaifocoinquín. Nantifi niaifo yafi yoshinfori ato finoncoian. Ascashon ato iquimisi. Ascacufin man Jesús fu rafushocai man ahua futsa yopaima. Nan isharamisi cuscan marifi man nanscatiro.

<sup>11</sup> Man Cristo Ifo huaitian maton nomuran mato fiananan huashoni man chaca huapaoni cuscan afanan man ascanonma. Ascan nocofunufoan aton fuyamisi ipaoni. Ascafia man cunotinin foshqui rupa shatutocai maton chakan soashotiro. Cristo fustitofin maton ointi fiananan huashotiroquin. Ahua futsanmaquia. Nan fustitofin maton chaca soashotiro afanan man chaca huapaoni cuscan man atama nan cuscara shara man inon.

<sup>12</sup> Ascano man unu muran iquimamuaitian maton chacafo man chaca huapaoni cuscan nanfo mai huamua shinantsai. Ascan non Jesús mainitian man chaca huapaoni cuscan nan chacafoi mai huamua shinantsatiro. Man unu muran iquimamuashu funinaca huanni man Jesús fu funi cafiscatiro a cuscara funa shara iishquin. Diosin ahuun curushhuunoashu Jesús afanan funini nan non icoinra huua. Ascano Jesús mai murannoashu funinitian marifi man afu funi cafiscatiro a cuscara funa shara iishcaquin.

<sup>13</sup> Man Jesús Ifoataima nan yora naa shinantsa man apaoni. Ascashon man chaca huapaoni. Ascafia Upa Diosin Cristo funimani afu nipanon. Nanscarifi aqui matorifi ahuunshon nimapacutiro. Ascashon nantifi nocon chacafo man rau huua. <sup>14</sup> Shinancapon. Nantifi non chaca huamisi cuscan noco chacafo Upa Diosin noco soashoni. Afanan

afohuunoa Diosin shinanonma. Ascano Diosin yononi cuscan nicatama ahuara futsa non chaca huapaoni. Nanfo nantifi non chaca huamisifo cuscari cunupacua. Ascafia nan cunupacui cuscan ihui coyan iquinan ano Jesús mastanihuunshon nanfo noco soashoni.<sup>15</sup> Ascano Jesús ihui coyan iquinanhunoashu noco nashonishaquin Satanás yafi nantifi yoshin chacafio finoncoian. Ascacucai afanan noco ahuusca huatirofoma. Nanforicai afanan noco ifo iyamacain noco iquitirofoma. Ascacufin Jesús ihui coyan iquinanhunoashu naiton Diosin manifoti ismani nan yoshin chacafocai afanan ahuashta ahuun curushu ayamaran ishon ato ismani.

*Jesús icaria sharacoin nan fustisi fuchipaicahuun*

<sup>16</sup> Ascacufin ratoran futsan mato yosipai isca huaquin, —Nocon shunifoan yononi cuscan nantifi nanscacoincahuun. Ahua futsa piyamafain ahua futsari ayayamacahuun. Fuosititian fuusiyamashu man chaca huai. Ascan nan oshu ina funatianri fuusicalahuun. Tunutitian fusti noco shunifoan yononi cuscan man atiroran, —ishon mato amaquiri yonopaiyaifo cuscan ato nicayamacahuun.<sup>17</sup> Cristo nocoataima nanfohuunoa noco tapimayopaonifo. Ascafia afincoin mai ano oanocai non afanan nanfo yopaima. Nan Cristo fusti non yopai.

<sup>18</sup> Oinfain. Futsafoan mato shinanmapaiyaifo cuscan man ato nicashu nan Upa Diosin mato inansharapaiyai cuscan man funotiro. Ascacun ato nicayamacahuun. Mato amaquiri yoipaiquin isca huacani, —Uhuun namapan cuscara Diosin ua isma cuscan fasi sharacoin. Uncai ahuayamafiacun Diosin ua isma cuscan tsoa futsacai oinyomisima. Ascan un oian cuscan miarifi Diosin oinmanaino shara itiroran, —ishon cacapaimisiton mato amaquiri yoipaicani. Mato yoipairi isca huaquin, —Non Diospan oinmati afu nai muran icafo cufitiroran, —ishon mato parapaicani. Nanfoan aton nomuranshon futsa futsa huaquin shinainfo cuscan fusti matorifi yosipaicani ato cuscara cacapaimisifori man inon. Diosin shinan cuscacain shinantama afin shinantirofo cuscan fusti shinancani. Nanscashu nanfo curafiapaimisifo.

<sup>19</sup> Nanfocai Cristo fu rafuyamacai aton ifomari. Cristofin nan nocon mapo cusscarariquin. Nonfin ahuun caya nato cusscarariquin. Nocon cayanofiri non cushumusharashu non mutsisipacoin itiro. Ascan nocon nami pono uhuapao yafi nami pono futsafo nocon cayahuu nannorasi ichanatirofo. Nanscarifi aquin Criston ahuun yorafo cushusharacoinmisi. Ahuuscayamacain isharacain mutsisipa non inon. Noco nannorifosi shara noco shinanmamisi. Non Cristo fu rafucoincun Upa Diosin finacoinquin Furunhuunshon ahuu curushu noco inantiro a cuscara non inon. Nanscarafin noco Diosin ashopaiquin.

<sup>20</sup> Cristo mato nashonitian marifi man afu naa shinantsapaoni. Ascan natiancái man chaca huapaoni cuscan afanan man ascaima. Ascatamarocon man isharacoinmisi. Man ascanocai nan icoingra huamafoan mato yonotirofoma. ¿Ascacufin ahuuscaí man ato nicamun mato yonopaiyaifo cuscan aashcaquin? Ascacun ato nicayamacahuun.

<sup>21</sup> Ascashon nanfoan mato yonoquin isca huapaicani, —Mato tushu inainfo cuscan fiyamafain nanrififi piyamacahuun, —ishon mato yonopai. <sup>22</sup> Ascano nanfoan mato yosipaiyaifo cuscacai Diosin ato yonoama. Nan nocofunufoan shinainfo cuscan fusti mato yonopai. Ascan nan mato yonopaiyaifo cuscan nanfo cuyoi futsushqui afanancaí ascashquima. Ascacun ato nicayamacahuun. <sup>23</sup> Icon yorafoan shinanquin isca huacaquin, —Nanfoan ato yosiainfo cuscan shararan. Ascano nanfoan fasi tapicoianfo. Diosin noco yononi cuscari fasi tapicoianfo. Ascashon Diospan nai oinmatifo cufifafaincane. Ascacanashu tsoashtacai raquiri huamisima cuscarafo. Ascataricai aton caya afiri musu huamuafoma. Ascashu nanfo fasi sharacoinran, —ishon atohuunoa shinanmapaicani. Ascafia afocai isharacoinmisifoma. Ahuaraflo chaca huaifo cuscacai shatutirofoma. Icon nanfofin cacapaimisi shunifo.

### 3

<sup>1</sup> Upa Diosin Furun Cristo funimani cuscan nanscarifi matori afu funimani cafisca huai man funa shara icain a cuscara shara icashu man afu rafunon. Cristo natian Apa fu ica a futan nantifi iquina. Ascacun ahuunoa shinanfain mato amapaiyai cuscan nanfohuunoari shinancahuun. <sup>2</sup> Ascacun Diosin fuchipaiyai cuscan nan fusti shinancahuun. Nanscacoinschcaquin. Ascan nuno mai ano yorafoan chaca huapaiyaifo cuscan marifiasca huapaiyamacahuun.

<sup>3</sup> Afanan un mato yoi Cristo nocoo nashoni. Ascan manfin afu naa shinantsayoniquin. Natianfin man Cristo fu rafucain Upa Dios furi man icacaini. Nanscarifiai mato furi Upa Dios icacaini. Man ascafaitocai tsoanshta ointirofoma man Cristo fu rafuai cuscan afu isharashcaquin. <sup>4</sup> Ascano Cristo afanan mai ano oaitian nantifiton ointirofo non afu rafumisifo nocoo nimapacunaca. Ascashu Cristo shara fusti ica cuscain norifi non a cuscara sharacoin iishquin nantifi yorafoan oinshquicani.

*Non chaca iyopaonifiashu natian non funa sharacoin Jesús cuscara man non ica*

<sup>5</sup> Ascacun man chaca huapaoni cuscan afanan asca huayamacahuun. Ascarao shi-nanyamacahuun. Ascatari maton ahuinma furi iyamacahuun. Nanscarifiaiyainfofoan maton funuma furi iyamacahuun. Ascashon shinanchacayamacahuun. Nocofunufoan maton ahuinma fuchipaiyamacahuun. Ainfofoan maton funumari fuchipaiyamacahuun. Ahuara chacafo fuchipaiyamacahuun. Mafin man fuchipaiyai cuscan fusti fuchipaiyamacahuun. Man ascaquicain Dios man noicooinma ahuara futsa fusti man noicooin. <sup>6</sup> Nanscara chacafoai Diosin oinpaima. Ascacun nanscara chacafoqui Diosin fasi sinacoin. Nan yoitimamisifo ato onaintimashqui. <sup>7</sup> Ascano marifi man Dios nicacoiantaima man nanscara chacafo huapaoni.

<sup>8</sup> Man nansca huapaonifiashon natian nan chacafo shatucoincahuun. Ascatari afanan sinayamacahuun. Tsain fushnuicamitsamisi iyamacahuun. Futsafo noicas-macani aqui sinayamacahuun. Ascashon futsafoi roayamacahuun. Tsain mutsama yoiyamacahuun. <sup>9</sup> Man chaca huapaoni cuscan man man potacoian. Ascashu paranonanyamacahuun. <sup>10</sup> Man ipaoni cuscan afanan atanma natian man Jesucristo catoan a cuscara shara iishquin. Ascan Upa Diosin mato nomuran onihua funa. A cuscara shara finacoinquin mato imafafainshquin ahuunoa finonmafain onansharnon. <sup>11</sup> Non Cristo ifoacun Diosin nantifi nanscarasi huaquin nocoo oin. Israelifo yafi Israelifoma cunu tapiafo yafi cunu tapiamafori onicoinfo yafi nahuafon non yonomatifio yafi yonomatifomari Diosin nanscarafosi nocoo oin. Nantifi non Jesucristo ahuun yorafocun. Nan fusti non yopai.

<sup>12</sup> Ascashon matohuun fasi noiquin mato catonni ahuun yorafo man inon. A cuscara shara mato imashquin. Ascacun futsafohuun ramapaicain ato shara huafafaincahuun. Iquisi futsafohuunoa shinanfain nan mafi man apaiyai cuscan shinantamarocon futsafoan apaiyaifo cuscari shinanshocabuun ato oi tsii huafainri yoifafaincahuun. <sup>13</sup> Futsan mato chaca huafaiton ato copitamarocon yoisharafain rau huariscahuun. Nocon Ifoan mato rau huau cuscan huafain futsafo ya rau huatanancahuun. <sup>14</sup> Ascano un mato yoia cuscacoin acahuun. Nanfo sharaflashu non nantifihuun noiainofin fasi shara finacayaquin. Ascatan non noinanshu non isharacointiro. Ahuara futsa sharafoi nocon Ifoan yononi cuscan non noinanshu non nanscacoointiro.

<sup>15</sup> Ascacun Cristo nicacoinsharacahuun maton ointi sharamanocai man fochish-manantanantiroma. Ascatamarocon ahuunoashu isharacoincain ahuun yora fusti cuscara man itiroquin. Ascacun Upa Diosin mato catonni ahuunoashu isharacain futsafoqui man shinanchacanonma. Ascaquin man Upa Dios yoitiro isca huaquin, —¡Aicho! Upa Diosin min uhuun ointi shara huashoran, —ishon yoifafaincahuun.

<sup>16</sup> Cristo nocoo tapimani cuscan huafain mato nomuran nanucoincahuun. Nantofin mato iquinaquin. Ascan ahuun tsain tapisharashon futsafo yari tapimatanancahuun

isharashcaquin. Mato nomuranshon Diosin aicho huafain David fanainni cuscan fanain ishocain ahuun tsainhuunoari fanaincahuun. <sup>17</sup> Manfin nocon Ifo Jesús ahuun yorafoquin. Ascano nantifi man yoiai cuscan huafain man acai cuscan nantifiri yorafo ato ismacahuun matohuun caononfo. Ahuunshon Upa Dios yoinonfo isca huaquin, —¡Aicho! Min ua shara huashomisiran, —ishon yoifafaincahuun.

*Non Jesús icoinra huafomain non ahuunoashu non ahuuscatiroquin*

<sup>18</sup> Ainfofoan nocon Ifoan mato yononi cuscan maton funufoan maton yoiai cuscacoin acahuun.

<sup>19</sup> Nocofunufoan maton ahuinfohuun noicoincahuun. Ato tsain curushcain yoiyamacahuun.

<sup>20</sup> Facufoan maton upa yafi uhua nicasharacoinfafaincahuun. Man ascaino Diosin matoqui unimacoinon.

<sup>21</sup> Upafo yafi uhuafuan maton facufo tsain isininpaton yoiyamacahuun. Ascan maton facu man tsain isininpaton afafainnaino shinanquin isca huatiro, —¡Ohua! Uncai ahuuscatiroma uhuun upa yafi uhuun uhua uqui unimanon. Ua tsain isininpaton afafainnaino, —ishon facu shinantiro. Ascano upafo futan uhuafuanasca huaquifin mato facufo man aton ointi ihuumatiroquin.

<sup>22</sup> Ascano yonomatifoan maton ifofo nicasharafain atori parayamacahuun. Ascan mato oiainfono fusti ato yonoshosharacuima. Mato oianmafiaifono ato yonoshosharacahuun. Nan maton Ifocoin Jesucristohuun man noiaino matoqui unimanon ato yonoshosharacahuun. <sup>23</sup> Ahuarashta yonocaquin nocon Ifoan curushhuushon yonoshosharacahuun. Nocofunufo fustihuunoashucai man yonoima. Nocon Ifo Jesús nantifi noco oin. Ascan nocon Ifo yonoshosharacahuun. Anori shinanfain yonoshosharacahuun. <sup>24</sup> Ascashu ointiaquimayamacahuun nocon Ifo Cristo man yonoshosharaino afin chipo nocoqui nocoaitian mato inansharashquin. Nan aya cuscan huafain mato inain. Aafin maton Ifocoquin. Ascan manfin nan yonoshoniquin. <sup>25</sup> Man chaca huaiton Diosin mato onaintimai. Diosin nanscarafosi noco oin. Ascan ratofoanmain chaca huaiquin nanfo ato onaintimai.

## 4

<sup>1</sup> Ascan ifofoan maton yonomatifo inansharafain ato parayamacahuun. Man man tapia marifi man ifoya. Maton Ifoan nai muranshon matori oinfafainni.

<sup>2</sup> Ascacun Upa Dios cufinquin unuyamacahuun. Cufinquin ahuara futsa shinancaquima. Upa Dios iconcoin fusti cufinquin isca huafafaincahuun, —¡Aicho! Upa Diosin min ua shara huafafainiran, —ishon cuficahuun. <sup>3</sup> Ascashori nocori cufishocahuun Upa Diosin mani futsafoanri noco nichiano non Cristohuunoa ato yoinon. Nannoicafoanci tsoan Cristohuunoa nicayomisima. Ascan un Cristohuunoa tsain shara un yoiaiton ua futsafoan cunu muran iquimanifo. <sup>4</sup> Ua fasi cufishofafaincahuun Jesucristohuunoa shafacafico un yorafo ato yoinon.

<sup>5</sup> Ascashon Jesús icoinra huamafo fu icaquin ato ismasharacahuun man ishara cuscan. Ascashon man atoqui nocoaitifi Jesushuunoa yoisharafafaincahuun. <sup>6</sup> Ato fu tsainaquin shara fusti ato yoifafaincahuun. Cayacafico ato yoicahuun aton nomuranshon shinanchacanonfoma. Man ascaquifin nantifi yorafo cayacafico man cumasharatiro.

*Pablonun ahuun tsain unutaquin Colosas anoafó tsain shara fomani*

<sup>7-8</sup> Ascano nocon yorahuan Tíquicohuun un fasi ahuun noicoin. Nanton u futan nocon Ifo Jesús yonoshomisiquin. Ascacun un Tíquico mato ari nichicain un icai cuscan mato tapimafain urimain ahuuscaquin mato tapimanon. Ascashon mato yoiaino shinansharafain maton ointi man unimanon. <sup>9</sup> Ascan uhuun yorahuan futsarifi Onésimo nanrifi mato ari nichi. Nanfin matofu ipaoniquin. Ahuunrifi un fasi noi.

No futan nocon Ifo Jesús yonoshoquicai unumisima. Nan rafu matoqui nococashon nonmain nunoashu ahuuscaquin mato tapimanonfo.

<sup>10</sup> Ascano noco yora Aristarco yafi ua cunu muran iquimanifo. Nantonrifi mato tsain shara fomai. Ascan Marcos arifi mato yoisharapai. Nanfin Bernabé ahuun chaiquin. Ascacun nan Marcos matoqui nocoiton un mato yoia cuscan ihuisharafain cushusharacahuun. <sup>11</sup> Ascan nocon yorahua futsan ahuun anu Jesús nanrifi ahuun anu futsa Justo atorifi mato yoisharapai. Nanfoan uhuun caifo Israelifo u futan Dioshuunoa yoimisifo. Nanfoanri ua unimamamisifo. Ascan uhuun caifo futsafoancai u futan nunoshon Dios yonoshomisifo. Nan un mato yoiaifo futan Dioshuunoa un yoimisi.

<sup>12</sup> Epafras matofu iyopaoniton arifi mato yoisharapai. Nanrifi nocon ifo Jesucristo ahuun oinmati. Ascashon nanton mato Upa Dios cufishoqui isca huafafaini, —Upa Diosin min ato amapaiyai cuscan nantifi ato amahuu ahua futsa shinanonfoma. Ascashu min Furun Jesús ointi cuscara shara inonfo, —ishon nannori un mato Upa Dios cufishoquin huafafaini. <sup>13</sup> Ascacun un mato yoiai cuscan man icoinra huatiro. Epafras matofu yafi Laodicea anoafon Hierápolis anoaforifi mato fasi Upa Dios cufishofafaini. <sup>14</sup> Ascano nan nocon yorahuan Lucaspan yorafo cayahuamamisi. Nanhuunrifi un fasi noicoin. Nan Lucas futan Demaspan mato yoisharapaicani.

<sup>15</sup> Jesús icoinra huafu Laodicea anoafon ua ato yoisharashocahuun. Ascashon nan icoinra huaa futsafo Ninfapan pushu muran ichananmisifori ua ato yoisharashocahuun.

<sup>16</sup> Ascan un na cunu mato fomai cuscan oinqui tau huashon nan icoinra huaa Laodicea anoafori ato fomacahuun arifi oinonfo. Ascan nan un ato cunushona cuscari marifi oincahuun.

<sup>17</sup> Ascashon Arquipo ua yoiquin isca huaquin, —Upa Diosin mia yonoa cuscan acoinhuun, —ishon nannori ua yoishocahuun.

<sup>18</sup> Unquian Pablo un mato cunu fomai. Futsan ua cunushofiamisi natian uficoín ahuun unutaquin un mato cunushoni. Ascacun uhuun ointiaquimayamacahuun. Man man tapia ua cunu muran iquimanifo. Diosin matohuun ramapaicain matohuunoa shinansharapainon. Nanti.

Pablo

## Pablonun Tesalónica Anoafo Cunu Fomani

*Pablon futan Silvano Timoteo nan rafu non fustifain Tesalónica anoafo tsain fomani*

<sup>1</sup> Uhuun yoramishtichin Tesalónica anoafoan unquian Pablon un mato cunu fomai. Manfin Upa Diosin ahuun facufoquin Jesucristo maton Ifo. Ascan nuno Silas yafi Timoteo ufu icafo nan rafutan mato tsain shara fomai. Ascashon nocon Upa Diosin matohuun ramapaicain maton ointi shara huashonon.

*Tesalónica anoafoan Jesús icoinra huacoinnafo cuscan ato ismani*

<sup>2-3</sup> Un matohuunoa shinaintifi Upa Dios cufinquin un isca huafafaini, —¡Aicho! Upa Diosin Tesalónica anoafo min ato shinamashara. Ascan mia icoinra huacashon mia fasi noicoianfo. Ascashon mia yonosharashomisifo. Ascata nocon Ifo Jesús funaquima manasharamisifo nocoqui afanan nasoshquiran, —ishon un shafatifi un mato Dios cu-fishofafaini. <sup>4</sup> Uhuun yoramishtichin Diosin matohuun fasi noicoinquin mato catonni man ahuun facufo inon. <sup>5</sup> Ascan noncái nocon tsain ipaitsi mato yoimisima. Ascata-marocon Diospan Yoshin Shara futan ahuun curushhuunshon non mato Jesushuunoa tsain yoimisi. Ascacun man man icoinra huacoinni. Ascashon marifi man man tapian non mato muran matofu isharapaoni. Ascaiton marifi man Jesús icoinra huacoinni.

<sup>6</sup> Asca noco Ifohuun nocohuunri man caomisi. Mato futsafoan fasi omitsiscamafiaiino non mato nan tsain shara Jesushuunoa yoiaiton Diospan Yoshin Sharahuunshon man unimacoincain nicasharapaipaoni.

<sup>7</sup> Asca huacanashu nantifi icoinra huafu Macedonian anoafo non Acaya anoafori man ato oinmashara matohuun caotiro nocon Ifo Jesús tanasharanonfo. <sup>8-9</sup> Macedonia anoafo futan Acaya anoafoan matohuunshon nocon Ifoan tsain nicaquin tau huanifo. Non matohuunoa ato yoiataima noco yoimisifo isca huacaquin, —Tesalónica anoafoan nocon Ifo Jesús fasi icoinra huacoinafo. Ascan Pablo yafi afu rafuafu fasi ato shara huafain yoiaifo cuscan ato nicasharapaicani. Ascashocai afanan ahuara futsa rami huacashon cufitirofoma. Nan Dios natian niacoin icoinra huafain man manayanan yonoshosharatiro. <sup>10</sup> Ascan nantian Apa Diosin nan chaca huamisifo manifoti ato onaintimaitiancai nan chaca huamisifo acai cuscan nocoasca huaima. Ascata-marocon nocon numai norificai non atofu omitsiscaimaran, —ishon matohuunoa nantiffain yoiafo.

## 2

*Pablonun Tesalónica anoshon Jesús yonoshoni cuscan*

<sup>1</sup> Uhuun yoramishtichin man man tapia noncái ipaitsi matofu ipaonima. Non mato Jesushuunoa tapimasharapaoni. <sup>2</sup> Man man tapia non matoqui nocoataima Filipos anoafoan noco omitsisca huafain noco roapaonifo. Ascashon noco shatumapaifiaquicai Upa Diosin ahuun curush noco inanno non ranotiroma nan tsain shara Jesushuunoa un mato yoini cuscan noco tsoan shatumanama. <sup>3</sup> Ascano man man tapia un mato iconcoin Diospan tsain yoiquicai un mato fuparamisima. Ascashon unricai mato yoimisima isca huaquin, —Uhuunshon Tesalónica anoafoan shinansharaforan, —ishocai un yoimisima.

<sup>4</sup> Ascata-marocon Upa Diosin ua catonni un ahuun tsain shara Jesushuunoa mato yoinon. Ascacun noncái yorafo nocohuunoa shinansharamapaitiroma. Ascata-marocon Dios fusti nocohuunoa non unimamapai. Nan fustiton nocon nomuranshon non shinain cuscan nantifi tapicoian. <sup>5</sup> Man man tapia uncaí matohuunoa tsain shara yoimisima marifi man uhuunoa shinansharaforan. Unricai mato fuparamisima ua

ahuara inansharanonfo ishon. Un mato iconcoin yoimisi cuscan Upa Diosin tapicoian. Nanto ua oinfafainni.

<sup>6</sup> Noncai tsoa futsafo curafia huamapaipacunacama. <sup>7</sup> Ascafia non Cristo fu rafumisicun noco nichini ahuun tsain mato yoinon. Ascacufin non mato yonopaiquin non mato yono cuamisi man noco nicasharafain non yopai cuscan man noco inanon. Ascafiai non asca huapaipaonima. Non matofu ipaoni nan facu yomushta ahuan cushusharatiro cuscan nanscarifi non mato huapaoni. <sup>8</sup> Non mato fasi noicoinquin unimacain non mato Diosin tsain shara yoifiai nan fusti non mato inanmusharapaoni fasi matohuun noiquin. <sup>9</sup> Uhuun yoramishtichin manmun ointiaquimamanmun un mato murannoashu curushcain yonopaoni. Ascafiaqui un ahuara yopaifiaquicai cashman un mato yocaquin fucash huapaonima. Ascatamarocon mato Diosin tsain shara yoiyanan shafatifi yafi yamuri un yonopaoni un yopai cuscan fishquin.

<sup>10</sup> Ascano man Jesús icoinra huaa muran un matofu icai chain man man oinyopaoni. Jesús cuscara isharacain unricai ahua chaca huapaonima. Un ascaiton maficoi unhuunoa man man oinpaoni. <sup>11-12</sup> Apan ahuun facufo noicoinquin ato yoisharatiro isharanonfo. Nanscarifi aquin un mato yoisharapaoni man isharacain maton ointi man unimanon. Ascashon Upa Diosin mato imapaiyai cuscan a cuscara man inon. Nantorifi mato catonni afu man Jesús cuscara shara ipanon.

<sup>13</sup> Un mato Diospan tsain yoiaino man yoini isca huaquin,—Nan tsain shara min noco yoiai cuscacai nocofunun tsainma. Nan Diospan tsainran,—ishon man yoini. Icon non mato Diospan tsaincoin yoimisi. Ascaiton ahuun tsain nicaquin man icoinra huaiton mato fiananan huaa Jesús cuscara man inon. <sup>14</sup> Uhuun yoramishtichin Diospan yorafo nan Dios fu tsainti pushu anoaflo ichananmisifotí Judea anoafoluun man man caoa. Ascano matorifi maton caifoan mato omitsisca huamisifo cuscan nanfoanrifi Jesucristo icoinra huaifoan oinquin aton caifo Israelifoan ato omitsisca huamisifo. <sup>15-16</sup> Ascashon nocon Ifo Jesús rutufain ahuun tsain yoimisifori rutunifo. Ascano nocorifi atomaquishon potanifo. Noco asca huaifoan oincai Upa Diosin atoqui unimaima. Nantifi yorafo chaca huapaicani. Nocori shatumapaicani non nocon caiforma Jesushuunoa yoinonma ato numapaiquin Dios fu ipanonfo. Ascashocai Dios chaca huaquin unumisifoma. Ascaifoan oinquin Diosin afanan tunuyamacaiquin ato fasi onaintimai.

### *Pablonun afanan Tesalónica anoaflo oinpaini*

<sup>17</sup> Uhuun yoramishtichin non matomaquinoashu canishaquin non mato fasi shinanfafaini. Afanan matofu ipaiquin. Ascan afanan non mato oincapaifiaiun non catiroma. <sup>18</sup> Un mato ari fasi capaicacaifiaiun Satanás noco catima huamisi. <sup>19</sup> Non mato yosimisi Jesús cuscara shara man inon. Ascano Jesucristo nocoitian nantififain tapitirofo man Jesús tanacoinmisi. Nantian Jesús ahuun ointaifi non matohuunoashu unimacoinsquin non mato yosipaoni cuscan man nicacoinmisi. <sup>20</sup> Icon nocohuunshon man Jesús icoinra huacoincun non unimai. Ascano Upa Diosin arifi noco aicho huatiro.

## 3

<sup>1-3</sup> Un fasi matohuun noi. Mato ari fasi capaifiaquicai un tapinima ahuuscashumain un mato ari catiroquin. Fasi un mato ari capaifiaquicai afanan un tunutiroma matohuunoa tapipai. Ascan un shinan ufcion Atenas ano un nituyoi. Ascashon Timoteo un matoqui nichishquin. Arifi no fu Diospan facu. Ascashon no futan Upa Dios yonoshouquin tsain shara Cristohuunoa yoifoanfafainmisi. Ascacun un Timoteo matoqui nichini mato yoisharanon man Jesús tanasharaquin finacoianshu man omitsiscafiaquin man tunucoinnon.

<sup>4</sup> Asca tsoa futsan omitsisca huataima non mato yoini isca huaquin,—Non Jesús tanasharatton nan Jesús noicasmaifoan noco omitsisca huashquiran,—ishon non mato yoiyon. Non mato yoifafainpaoni cuscan man nanscacoian. Nantian man man tapia

non icocoin Jesushuushon noco omitsisca huamisifo. <sup>5</sup> Ascacun un matohuunoa fasi tapipaifain. Un mato fasi shinancoinpaoni. Ascashon un Timoteo mato ari nichini man Jesús icoinra huapaoni cuscan nantianrifi man nansca huamun ua tapimashquin. Uhuun nomuran un ratuni Satanás mato chaca huemapaiyai cuscan man nansca huaimainquin. Ascashon man Satanás tanaino non mato ipaitsi yosipaoni itiro.

<sup>6</sup> Ascafia ascarama. Timoteo afanan mato anoashu nocoqui nocotoshishon matohuunoa tsain shara noco yoia. Man Jesús icoinra huafain man nantifihuun noicoin. Ascatac nocohuunoari man shinansharafain fasi nocorifi man oinpaicoian. Nanscarifi aquin norifi non mato fasi oinpaicoain. <sup>7</sup> Ascacufin uhuun yoramishtichin noco Jesushuunshon omitsisca huafain ahuara futsafoanri noco fucash huapaifiaifono man Jesús icoinra huacoinnaino non shinansharatiro. <sup>8</sup> Ascan man manfin Jesús tanasharaquin. Mancaí ahua futsan afanan shinainma. Nan non tapiaitiam non fasi unimacoincain non isharatiro. Ahuara ahuuscarafiaino non tunutiro. <sup>9</sup> Non matohuunoa shinanquin non Upa Dios cufiaitiam nocon nomuran non fasi unimacoincain. Non matohuunshon Dios cufinquin aicho huafafaini. <sup>10</sup> Shafatifi yafi yamutifi non mato Dios cufishofafaini noco mato ari nichiano non mato afanan oinon. Ascano man ahuarao tapisharatayamaiton un mato tapimashquin man Jesús icoinra huaquin finacoinon.

<sup>11</sup> Asca nocon Upa Dios futan nocon Ifo Jesucriston matoqui afanan noco nichipainon. <sup>12</sup> Nocon Ifoan mato shinansharaino man noinain finacoinshcaquin. Futsafo man noisharanon. Non matohuun noicoian cuscan marifi nantifi yorafo man finacoinquin noisharapainon. Non mato noiari cuscan man nantifiri noicinnon. <sup>13</sup> Man ascaiton Diosin maton nomuran mato mutsismai Jesús tanasharafain man ahua chaca huanonma. Ascaino nocon Ifo Jesús ahuun yorafoya oaitian marifi man a cuscara shara Upa Dios ointaifi man ishquin.

## 4

### *Ahuuscashumain non isharatiroquin Upa Diosin nocoqui unimanon*

<sup>1</sup> Uhuun yoramishtichin uhuun tsain unutaqui un mato yoinon. Non mato yosipaoni ahuuscashumain man itiroquin Diosin matoqui unimanon. Nan non mato yosipaoni cuscan man man nanscacoian. Ascacun afanan non mato yoi noco nicacoincapun. Man Dios tanashara cuscan nocon Ifo Jesushuunshon fasi finacoinquin tanasharacahuun.

<sup>2</sup> Man man tapian nocon Ifo Jesús noco yononi cuscan nannoricoin non mato tapimapaoi. <sup>3-5</sup> Ascano noco Upa Diosin mato a cuscara shara imapaia man maton ahuinma fu iyamacain ainfoori aton funuma fu inonfoma. Ascan man ascaino nan Jesús icoinra huayamafain Dios onanmisimafoan chaca huamisifo cuscacai huatamarocon nan Diosin yononi cuscan maton ahuin fusti fu man isharatiro. <sup>6</sup> Nannori Upa Diosin yononi, —Futsafoan aton ahuin fu ipaiyamacahuun. Tsoa fomanyamacahuun futsan ahuin fu ishquin, —ishon Diosin yononi. Ascan non mato yosini cuscan tsoa ascayamaquin chaca huaiton Upa Diosin ato onaintimacoin. <sup>7</sup> Upa Diosicai noco catonnia non furoma inon. Ascataamarocon noco catonni non a cuscara shara inon. <sup>8</sup> Ascacufin tsoan un mato yosimisi cuscan nicayamai atocai nocofunu fustisi nicacasmaima. Dioscoinrifi nicacasmamisi. Nanton ahuun Yoshin Shara mato inan mato amapaiyai cuscan man tapinon.

<sup>9</sup> Uhuun tsaincái man yopaima noinanshquin. Upa Diosifin afin mato tapimaicain man noinanon. <sup>10</sup> Man non tapia man nantifi icoinra huafio Macedonia anoshon man noicoian. Ascacufin non mato yoisharapaicain fasi finacoinquin man ato noicinnon. <sup>11</sup> Ascacun isharacahuun maton nomuran ahuatón fucash huanonma. Futsan acai cuscahuunoa shinanchacashoyamacahuun. Diosin mato amapaiyai cuscan fustisi acahuun. Nannori non mato yoimisi. <sup>12</sup> Man asca huaiton icoinra huamafoan mato

oinquin matohuunoa shinansharatirofo. Man yopai cuscan mafi man fitiroquin. Ascan mancái futsafona ato yocaima.

### *Jesús afanán oaitian*

<sup>13</sup> Uhuun yoramishtichin, un mato yosain cuscan huafain nicasharacahuun. Jesús icoinra huafó naashumain ahuuscacanimainquin un mato tapimai icoinra huamafoan ahuun yora naacun manoifo cuscan marifi man ato cuscara iquima. Afoan shinancani ato yora naacun non afanán ato oinnacamaran icashu. <sup>14</sup> Jesús nafiašhu afanán funini. Nan non icoinra huai. Ascan Jesús afanán oaitian icoinra huafó nan namisifo Upa Diosin atorifi funimashquin afu inonfo.

<sup>15</sup> Non mato yoia cuscan nan Diosin tsaincoin. Nocon Ifo nai ariashu oaitian nan niyoafocai nocon Ifoqui nocoi tau canima. Ascafia Jesús icoinra huacanashu nan niyoafó yafi namisifo nannoranan nocon Ifoqui nocoshcani. Nanscafin anonpacoiquin.

<sup>16</sup> Ascashon noco nai muran ichanan huashquin. Tau huaquin Diosin ahuun manuti fasi chaan chaan aashquin. Chaan chaan acaino Diospan oinmatifo nan a fu imisifo aton niaifoan oi ashcafínin cunashquin isca huaquin,—Nan man Jesús icoinra huafotí nan namisifo yafi niyoafori fucahuun. Jesús fu nai muran ichananshquin, —ishon ato yonoshquin. Nanscatapaiyaino nocon Ifo Jesús nai murannoashu fotoriscashquin. Ascano nan Jesús icoinra huashu namisifo funtaushcani.

<sup>17</sup> Ascan non nuno mai ano niyoafori non atofu funi caishqui nai coin muran nocon Ifo Jesús fu ichananshquin. Ascashu nantishotapiquin non afu ipanaca. <sup>18</sup> Ascacun nan tsain shara futsafo ya yoinancahuun maton nomuran unimashcaquin.

## 5

<sup>1-3</sup> Uhuun yoramishtichin ahuutianmain Jesús oshquicain tsoashtacai tapiama. Ascacun nanfihuunoa un mato tapimayoi. Man man tapia yomutson pushu muran iquiataimacain pushu muran icafo ato tapimayotiroma. Rato yamumain iquiriscatoshinicai tsoancai tapitiroma. Nanscarifiai nocon Ifo Jesús mai ano oaitiancai tsoan tapiyotiroma. Nocoti chaima icoinra huamafoan isca huashcani, —Nonfin isharacoianquin. Ahuatocai noco ahuisca huatiromaran, —ishon yoishquicani. Anori yoiaifono nantianri samamashtacoin omitsiscatashcani. Ascan ainfoan facu nanuashu caiyaintian isin muriscatiro. Nanscarifiai omitsiscai nocoaitian tsoan futsancái nan omitsiscai finontiroma. Raquiricai onutiroma omitsiscashquima.

<sup>4</sup> Ascafia uhuun yoramishtichin mancái icoinra huamafo cuscarama. Man man shafacafí tapia nocon Ifo nocoriscái cuscan. Ascacun man iquisi itisharatiro. Ascashucái nan nocoaitian man mustairitiroma. <sup>5</sup> Icoinra huamafo faquish muran icafo cafiscái. Ascashon ahuarao chipo iishquiai cuscacai tapiafoma. Ascan mancái ato cuscarama. Marificai man faquish muran icafo cafiscáima. Ascatamarocon manfin nan shafa muran iqui cafiscáiquin. Jesús inonpacocai noco yoipaoni cuscan man tapia.

<sup>6</sup> Ascacun noncái itisharafoma cuscarama. Nanfoan niyoashu nan oshan muran cuscarafo. Jesús oaitianhuunoacai shinanfoma itisharashquin. Ato cuscara iyamacahuun. Nantishotapiquin Diospan tsain nicasharacahuun Jesús oaitian man itisharashcaquin. Ahua chaca shinantamarocon afin mato amapaiyai cuscan fusti shinancahuun.

<sup>7</sup> Icoinra huamisimafoan yamu ifafainaifo cuscara. Nan oshamisifo yamu pauncani.

<sup>8</sup> Ascafia noncái nan cuscrafoma. Nonfin yora nan shafatoca ishara cuscrafafóquin. Ascano Diosin mato amapaiyai cuscan shinanfafaicahuun. Jesús icoinra huacoincahuun. Futsafihuun noicoincahuun. Man ascainocai yoshin chacafoan mato chaca huamatiroma. Jesús noco numani afanán chaca nocon Ifo itamarocon afin noco Ifo inon non afu ipashquin. Nanfo man tapicoian cuscan huafain shinancahuun. <sup>9-10</sup> Diosicai noco catonnima nocoqui sinaquin omitsiscapanacafó muran noco potashquin. Ascatamarocon noco catonni Jesucristohuunshon nocon chaca soashoshquin non afu

nipanon. Ascano nan noco nashoni oaitian non niashu iyamarai naashu non afu ipanon. <sup>11</sup> Ascacufin futsafoan aton nomuran unimamacahuun. Mun tapian manfin nanscacoimisiquin. Ascashon nanscasi huariacahuun. Jesús tanamatatanacahuun.

### *Pablonun ahuun tsain unutaquin ato yosisharani*

<sup>12</sup> Uhuun yoramishtichin un mato yosisharapai. Ua nicasharacapun. Upa Diosin nan tapimamisifo catonni ahuun tsain mato yosinonfo. Nanfoan mato curushcain yonosharashomisifo nocon Ifo man tanasharanon. Ascan atohuunoa shinansharafain ato nicasharacahuun. <sup>13</sup> Nocon Ifohuunshon mato yonosharashomisifo. Ascacun atohuunoa shinansharafain ato noicoincahuun mafiranayochishmanantanyamacain isharacoincahuun.

<sup>14</sup> Uhuun yoramishtichin ua nicasharacapun. Nan shanimisifo yoicahuun shaninonfoma yonosharashcaquin. Aqui tushcuimisifori yoisharacahuun nocon Ifo mutsisipa tanasharanonfo. Nan samamashta chaca shinamisifo ato oinmasharacahuun man atohuun noiquin man ato cufishotiro chaca huanonfoma. Nantihuun noicoincaquin ato oitsii huasho yoisharacahuun. Ascatah ahuara ahuuscarafaino atohuun patsicain ato yoisharacahuun.

<sup>15</sup> Futsan mato chaca huaiton ato copiyamacahuun. Ascatamarocon nantishotapiquin shara huatanancahuun. Nantifi yorafo shara huacahuun.

<sup>16</sup> Unimafafaincahuun. <sup>17</sup> Dios fu tsainfafaincahuun. <sup>18</sup> Ahuara ahuuscarafaino yoiquin isca huacahuun,—¡Aicho! Upa Diosin, min ufu icacainiran,—ishon yoicahuun. Manfin Cristo Jesús icoingra huamisiquin. Ascan Upa Diosin nannori mato shinanmapai. Man asca huaiton Diosin fuchipai.

<sup>19</sup> Diosin Yoshin Sharapan mato amapaiyai cuscan shatuyamacahuun. <sup>20</sup> Futsafoan Dioshuunshon mato yoiatton,—Nanton yoiayi cuscacai ahumaran,—ishon shinanya-macahuun. <sup>21</sup> Ahuara futsan mato yosipaiyaiton Diopan Yoshin Sharahuunshon a yocacahuun nan tsain yoiayi cuscacai icon iyamarai iconmaquin. Ascano nan tsain icon fusti tanasharacahuun. Tsain iconma icoingra huayamacahuun. <sup>22</sup> Ahuara chaca fishtayamacahuun.

<sup>23</sup> Diosin fustiton nocon nomuran isharamatiyo noco fucashhuanonma. Nantofin mato imasharacoinquin ahuun ointi cuscacai man inon. Ascashon maton cushusharafain maton nomuranri cushushara ahuara shara fusti man shinanon. Upa Diosin mato nanscacoim huaino nocon Ifo Jesucristo afanan oaitian matoqui shinansharashquin. <sup>24</sup> Diosin mato catonni man icoingra huanon. Diosin noco ahuara yoiayi cuscacai noco paratiroma. Noco ashoshquin.

### *Pablonun ahuun tsain unutaquin ato cunushoni*

<sup>25</sup> Uhuun yoramishtichin noco Upa Dios cufishocahuun.

<sup>26</sup> Nantifi yoinonansharacahuun.

<sup>27</sup> Ascashon Upa Diosin mato yona cuscan nicasharacahuun. Nan man icoingra huafoti un mato cunu fomaicai ato nicamacahuun.

<sup>28</sup> Nocon Ifo Jesucriston mato shara huamayai cuscan mato asca huamapainon. Nanti.

Pablo

## Pablonun Tesalónica Anoafo Afanan Cunu Fomani

### *Pablonun Jesús icoinra huafu Tesalónica anoafu cunu fomani*

<sup>1</sup> Unquian Pablo un mato cunu fomaino Silvano futan Timoteo mato yoisharapaicani. Nan rafu nuno ufu icafo. Ascacun uhuun yoramishtichin Tesalónica anoafuan manfin Diospan facufoquin. Ascano Furun Jesucristo mato Ifocoin. Man ichananmisi ahuunoa shinanshcaquin. <sup>2</sup> Apa futan man yopai cuscan mato inantiro ahuun Yoshin Sharapan matohuun ramapaiqui mato nomuran mato shinansharamatiro. Matoasca huanon.

### *Cristo nasoaitian nan icoinra huamafo Upa Diosin ato onaintimashqui*

<sup>3</sup> Uhuun yoramishtichin man Jesús icoinra huaquin tau huani cuscan natian man fasi finacoinquin icoinra huashu fasi man noinancoinna. Ascan un mato Dios cufishonaitian un cufinquin isca huafafaini, —¡Aicho! Upa Diosin min yorafo Tesalónica anoafuan fasi mia tanasharacoianforan, —ishon un mato cufishomisi. <sup>4</sup> Ascacun un mai futsafo ari cashu nan icoinra huafu fu un ichanaintian matohuunoa un ato yoisharamisi isca huaquin, —Nan icoinra huafu Tesalónica anoafu ahuun caifo futsafoan ato omitsisca huamisifo. Ascafia ahuara chaca futsa finonfiacaquicai aton nomuranshon shinanchacatamarocon Jesús icoinra huacashon tunucoianfo, —un yoimisi. <sup>5</sup> Ascacufin Jesushuunoashu omitsiscaquin man tapitiro Diosin cayacafi shinanquin mato itishara huaa afu man ipanon. Ascashu natian man omitsiscaflashu chipo man afu isharapacu-naca.

<sup>6</sup> Diosin iconcoin fustisi. Ascacufin ahuunoashu man omitsiscaquin nan mato omitsisca huaifofin aafin aton chipo onaintimaquin omitsiscamacoinsquin. <sup>7-10</sup> Ascashu nocon Ifo Jesús mai ano nasoaitian noco numai oshquin non afanan omitsiscapanonma. Nan oaitianri ahuun oinmati mutsisipafori nai ariashu afu fotoshcani. Ascaino nantifi ahuun yora nan cuscara sharacoinfo aqui unimacaquin ahuunoa non yoiquin isca huashquin, —¡Aicho! Nocon Ifo Jesús tsoa futsacai mia cuscarama. Min nantifi finoncoian. Min sharacoin. Non mia noiran, —ishon non yoishquin. Ascan non mato Jesushuunoa yoipaoni cuscan man man icoinra huaa. Ascashu nan Jesús nocaitian marifi man noco futan yoisharashquin. Ascan nantianri Apa Dios icoinra huayamafain ahuun tsain shara ahuunoa yoiaifo cuscan nicacasmisisifo omitsiscapanacafo muran ato potashquin. Anoashucui tsoa raqui fopanacama. Nocon Ifo Jesús icanoricai nocopacunacafoma. Ahuun curush shararicai tsoan oinnacama.

<sup>11</sup> Ascacufin non mato cufishoquin isca huafafaini, —Upa Diosin min ato imapaiyai cuscan ato imahuu. Mia icoinra huashon futsafoi shara huapaiyaifo cuscan min curush ato inanhun, —ishon Upa Dios un nantishon tapiquin mato cufishomisi. <sup>12</sup> Non mato nannori Upa Dios cufimisi futsafoan mato oinquín arifi nocon Ifo Jesushuunoa yoisharanonfo isca huacaquin, —Jesús ahuamamishti huatiro. Ascashon ahuun yorafo nan cuscara sharacoinfo ato imaran, —ishon ahuunoa yoisharanonfo. Ascano Upa Dios futan noco Ifo Jesucriston matohuun ramapaiyaino mato nanscara shara huatiroquin.

## 2

### *Na nocofunu chacahuunshon Dios nicacasmisisifoquin ishon ato yoi*

<sup>1-2</sup> Ascan nocon Ifo Jesucristo afanan oaitian nantian nan icoinra huafoti non aqui noconain futsui afu ipashquin. Ascafia futsafoan maton parapaicani isca huaquin, —Jesús man oshon inonpacoai cuscan ua tapimanaran, —ishon futsan mato yoiaraca. Ascan futsanriracan mato yoi isca huaquin, —Man non nica Jesús man oaran, —ishon futsan yoialino futsanri yoi Pablonun noco cunu fuma, —Jesús man oaran, —ishon mato yoifiashucui icoinma. Ascacun mustairiyamacahuun. Un mato yoinon. Jesús mai

ano nocoinra nantifi icoinra huafu afu ichananshquin. Ascashu afu ipanaca. Mato yoisharapaiyaiton nicasharacahuun. <sup>3</sup> Nan chanimisifo icoinra huayamacahuun. Jesús oataima iquisi nan manifoti anoshon Upa Diosin tsain potacani afanan nicapaicanima. Fasi finacaia yoitima ishcaquin. Nantianri nocofunun chaca finacoian yorafoan ointirofo. Nantocaifin Diosin yononi cuscan nicacasmacoinquin. Nanfin Satanás yoraquin. Ascafia chipo omitsiscapanacafo muran caashquin. <sup>4</sup> Ascan niyoshon nan nocofunun chaca yoishquin isca huaquin, —Un nantifi finoncoian. Nan man yoia, “Nocon Diosiran,” ishon cufimisifo. Ascan nancai Diosimaran, —ishon ato yoishquin. Ascatan Dios fu tsainti pushu muran iquishon ato yoishquin isca huaquin, —Ahuara futsa cufiyamafain ahuara futsari noiyamacahuun. Unfin Diosiquin, —ishon ato paranshquin.

<sup>5</sup> ¿Man ointiaquimanamanmun un matofu iyoshon nanfohuunoa un mato yoipaoni? <sup>6</sup> ¿Ascan man shinanmamun un mato yoini isca huaquin, —Nan nocofunu chaca-coin Upa Diosin nitumayoi. Ascashon nan Upa Diosin nitun huayamaino caashquin yorafoan oinonfo, —ishon un mato yoini? <sup>7</sup> Nan noicasmamisi nitumayoicai oataima. Chipo Upa Diosin afanan nan nocofunu Satanashuunshon chaca huamisi nitun huaya-maino nocoshquin. Acai nocataimafia nan Satanashuunshon natianri chaca huafia-caquin fomanpaicani. <sup>8</sup> Chipo nan nocofunu chacacoin Satanashuunoashu yonomisi nocoshquin. Ascaiton nocon Ifo Jesús ahuun tsainman rutushon omitsiscapanacafo muran potashquin. <sup>9</sup> Nan rutuataima Satanás curushhuunshon nan nocofunu chaca-coinni tsoan oinyomisima cuscara Satanás yonopan nanscarao huashquin yorafo parashquin. <sup>10</sup> Nan nocofunun icoinra huamafo aton parashquin. Ascashon chaca futsa futsatapafo huaiton oinquín nan icoinra huacanashu arifi nanfo omitsiscapanacafo muran foshquicani. Nanfoancai Diosin tsain iconcoin nicapaiyamafain tsoanricai nan tsain shara noimisifoma Dios fu ipashcaquin. Ascashu omitsiscapanacafo muran foshcani. <sup>11</sup> Ascacufin Diosicai afanan aton nomuran nitun huaima nan paramisifoan ato yoiafo cuscan icoinra huanonfo. <sup>12</sup> Ascashon nanfoanricai Diospan tsain icon-coin fusti icoinra huayamafain tsoanri noipaimisima. Ascatamarocon chaca fustisi fuchipaiyaifoan Upa Diosin ato omitsiscapanacafo muran potashquin nan paramisi futsafo fu ipanonfo.

### *Diosin noco catonni nocon chaca soashu afu non ipanon*

<sup>13</sup> Ascafia uhuun yoramishtichin mancái ascarama. Nocon Ifo matohuun noicoquin Upa Diosin mato catonni. Ascano mancái omitsiscapanacafo muran catamarocon ahuun Yoshin Sharapan ahuun tsain iconcoin man man icoinra huaa. <sup>14</sup> Ascano ahuun tsain shara Jesucristohuunoa non mato yoiai cuscan nocohuunshon man man tapian. Ascashon marifi man icoinra huaiton Furun Jesucristo funimani cuscan matorifi funimashquin a icano man afu ipanon.

<sup>15</sup> Ascacufin uhuun yoramishtichin, non mato iconcoin yosimisi cuscan nan fusti tanasharacoincahuun. Ascan man oian ahua futsa ascarayamacun afo tanayamacahuun. Non mato yoipaoni cuscan nan fusti icoinra huafain non mato cunushoni cuscarí nanrifi shinancahuun. <sup>16</sup> Nocon Ifo Jesucriston futan nocon Upa Diosinri nocohuun noifain nocohuun ramapaiquin. Nocon nomuran noco unimapacunaca. Ascacun non tapitiro nococai potapacunacama non afu ipanon. <sup>17</sup> Ascacun maton nomuran unimafain ahuun curush mato inanpainon ahuara ahuuscarafaiino man yorafo yoisharafain ahuara man ato ashosharafafainon.

<sup>1</sup> Ascan uhuun yoramishtichin uhuun tsain unutaqui un mato yoinon. Ascano noco Upa Dios yocashocahuun nocon Ifoan tsain shara man nica cuscan huafain noco Ifohuunoa nantifi futsafori yoicahuun arifi onihuaoanricai futsafori samamashta yoiaifoan icoingra huanonfo. <sup>2</sup> Ascano atifitocai nocon Ifo Jesús icoingra huacanima. Ascacun noco Upa cufishocahuun noco numanon nan yora shinanchacamisifo futan nan isharamisifoanmari noco ahuusca huanonma. Ascashon Jesushuunoa non tsain shara yoiai cuscan noco shatumanonfoma.

<sup>3</sup> Ascafia nocon Ifo no fu icacaini. Ascashon nocon yoimisi cuscan noco huashoshquin. Nan yoshin chaca Satanás noco omitsiscamapaifaiton nocon Ifoan noco mutsismafain noco cushusharafafaini. <sup>4</sup> Non matohuunoa shinansharamisi cuscan non icoingra huai. Ascashon non mato yononi cuscan man nanscasi amisi. Natianrifi man nanscasiariai. Nan non icoingra huai. <sup>5</sup> Upa Diosin fasi matohuun noiai nocon Ifoan mato tapimapainon. Cristo ahuara ahuuscarafaino tunucoinni cuscan marifi ahuunshon man tapisharapainon.

### *Nantiffain non Jesús yonoshosharanon*

<sup>6</sup> Uhuun yoramishtichin nocon Ifo Jesucristohuunshon un mato yonoi. Icoingra huaa futsanfoan noco nicacasmatai yonocasmai shanimisifo fu rafuyamacahuun. <sup>7</sup> Man man tapishara non maton muran icashu non shanitamarocon non yonosharapaoni. Non yonoai cuscan marifi nocon fu yonosharacahuun. Nocohuun caoncahuun. <sup>8</sup> Non matofu icai chaincai maton tushu non cashman mato pianpaonima. Ascatamarocon nantishotapiquin curushcain non yonopaoni ahuun rafanan pui fishon norifi piishquin. Ascano marifi marus fusti maton pui man ichapa potanonma. Non yonoi nanscapaoni.

<sup>9</sup> Diospan tsain yononi isca huaquin, —Nan mato Diosin tsain yoimisifo yopaifo cuscan ato inancahuun, —ishon cununi. Ascan un mato yocapaiquin iconcoin un mato yocacuana. Ascafia non mato oinmasharapaiquicai non mato ahua cashman yocamisima. <sup>10</sup> Man man shinainmun non mato muran ishon non mato yoini isca huaquin, —Tsoan yonoshomacai pitromaran, —ishon mato yoini.

<sup>11</sup> Ascashon matohuunoa noco yoiafo isca huaquin, —Atirifi onihuanifoti yonocas-macani. Ascashu cahuascaquin chani fusti yoifoanfafaincaniran, —ishon matohuunoa noco tapimanaf. <sup>12</sup> Ascano nocon Ifo Jesucristohuunshon non mato na cuscarafo non yoi man afanan ascanonma. Uncai uhuun tsain fustiton un ato yoi fustima. Unrifi mato yonoi. Ascacun afanan ascayamacahuun. Afanan foanfafainyamacahuun. Ascata-marocon yonosharacahuun ahuun rafanan pui fishon man yopai cuscan fishcaquin.

<sup>13</sup> Ascacun uhuun yoramishtichin nan man yonosharamisifo un mato yoisharapai. Man futsafo shara huamisi cuscan unupaiyamacahuun. <sup>14</sup> Ascan tsoan un mato yonoa cuscan nicacasmaiton oin afu rafuyamacahuun. Man ascaino rafipainon Diosin tsain nicacasmashu. <sup>15</sup> Nanscara yora fucai tsoan rafutiroma. Ascafia shinanqui isca huayamacahuun, —Un noicasma cuscara, —ishon anori shinanyamacahuun. Ascashon nan mato yoracoinhuun man shinain cuscan atohuurifi shinancahuun.

### *Pablonun ahuun tsain unutaquin ato cunushoni*

<sup>16</sup> Nocon Ifoan arus fusti nocon ointi unimamatiro. Shafatifi ahuara ahuuscarafaino maton ointi mato unimapainon. Nocon Ifo nantifi matofu isharanon.

<sup>17</sup> Unquian Pablo nantian uficoingra uhuun mucupan un mato cunushoni. Ascano oinquin man tapitiro uficoingra un mato cunushoni. Ascan nan un cunuaiti un nansca huamisi. <sup>18</sup> Nocon Ifo Jesucriston nantifihuun matohuun ramapai. Nanti.

Pablo

## Pablonun Timoteo Cunu Fomani

### *Pablonun Timoteo cunu fomani*

<sup>1</sup> Unquian Pablo un mia cunu fomai min tapinon. Upan Diosin ua catonni Furu fu rafunon ahuun tsain Cristo Jesushuunoa un yoifafainon. Nan nocon Numamisi Jesucristo futan ua yononi manifoti isca huaquin un yoinon, —Jesucriston noco nashonishaquin arus fusti noco Upa Dios ari iyoshquinran, —ishon un ato yoinon. <sup>2</sup> Ascano un mia Jesucristohuunoa yoiaiton min icoinra huani. Ascacun min icoinra huahuunshon min uhuun facu cuscaracoin. Un mihiun fasi noi. Nocon Upa Diosin futan nocon Ifo Cristo Jesús mia noiquin mia cushusharafain mihiunrifi ramapaia. Ascashon min ointi mia main huamanon.

### *Futsan amaqiri mato yosiaiton icoinra huafu yoihuu ato nicanonfoma*

<sup>3</sup> Ascan un Macedonia ano caquin un mia yoini isca huaquin, —Efeso anoashu cariyamahuun. Anoa futsafoan ato Diospan tsain amaqiri yosimisifo. Ato yoihuu afananasca huaquin yosinonfoma, —ishon mia yoini. <sup>4</sup> Non Diosin tsain yosiquin futsafo non yoitiro Jesús icoinra huanonfo. Ascan nan amaqiri yosimisifoanasca huatamarocon shunipafo yafi aton shunifohuunoari yoafo. Non yosiquiasca huaitocai Diosin noco icoinra huamapaiyai cuscan tsoan tapitiroma. Nicafiacani afohuunoa fochishmanantanantirofo. Ascashon ato yoihuu afanan shunipafo yoinonfoma. Aton tsain shatumahuu.

<sup>5</sup> Un nannori yonoa noinanfo. Ascashucai non nocon ointi muran ahuashta shinanchacatamarocon shinanshara fustifain nocon nomuranshori non nocohuunoa ahuacai chaca shinanyamafain non Jesús icoinra huacoinnai cuscan non futsafo noicointiro.

<sup>6</sup> Atirififainca asca huacanima. Ascatamarocon Diosin yonoa cuscan man cachiquiri huaafu. Ascashon tsain ahuama ipaitsi yoimisifo. <sup>7</sup> Ascashon Moisés nocon yononi cuscan futsafo tapimapicaqui nanfoan yoimisifo isca huaquin, —Moisés yononi cuscan man non fasi tapicoinran, —ishon yoifiamisisshacaquicai yosipaiyaifo cuscan tapicoianfoma.

<sup>8</sup> Man non tapia Moisés yononi cuscan shara yosimainquin cayacafico futsafoan nicasharatiro isharashcaquin. <sup>9</sup> Man non tapia tsoa isharamisi Diospan tsain fusti tanasharashucal Moisés yononi cuscan yopacanima isharashquin. Ascan nan Diosin yononi cuscan nicacasmamisifo tapimapai chaca huamisifo cuscan shatuyamaifoan ato onaintimashqui.

Ascashu nanfo isca huamisifo. Diosin yononi cuscan nicacasmamisifo icain Diosin ato shinanmapaiyai cuscan shinancasmafain chaca futsa futsatapafo huamisi icain aton apa yafi ahua chaca huafain rutumitsamisi icain. <sup>10-11</sup> Aton ahuinma non aton funuma fu icain nocofunufo yafi ainfo chaca huatananmisi icain futsa curushcain aton yonomati imafain chanimisifo. Ascacanashu ahuara futsa Diosin noco sharacoin yononi cuscan nicacasmacani. Nanscarao Diosin ato nicamapai nan yononi cusca-coin anonfo. Ascafia chaca huamisifo cuscan shatuyamaifoan ato onaintimashqui tapinonfo. Upa Diosin ua yononi cuscan ahuun tsain sharacoin nantifi yorafo un ato yoinon. Nocon Dios fasi sharacoincun.

### *Diosin ahuun ramapaicun Pablonun aicho huani*

<sup>12-14</sup> Noncái Diospan Furun onanyopaonima. Ascashon un yoipaoni isca huaquin, —Jesuscaí Diospan facuma. Aafin chanimisicoinquin, —un huapaoni. Ascashon ahuun yorafori un fasi ato omitsisca huapaoni. Un nocofunu fasi musucoin ipaoni. Un tapipaonima un Diospan Furucuin chaca huafiaquin. Un asca huafiaiton uhuun

ramapaiquicai ua onaintimanima. Cristo Jesús ua noiquin ua shara huashofain ua tapimani ahuuscashomain un icoinra huatiroquin.

<sup>15</sup> Un natian mato icon yoiai cuscan man icoinra huatiro. Cristo Jesús nai ariashu mai ano fotoni yora chacafo numashqui afu ipanonfo. Ascan unfi chaca huaqui finacaimisiquin. Tsoa futsacaiasca huamisima. <sup>16</sup> Ascacun uhuunshon Upa Diosin nantifi yora ismatiro nan chaca finacaia ahuun chaca soashotiro afu ipanon. Isca huaquin shinantirofo,—Shinancapon, Pablonun fasi chaca huapaonifiacun Jesucristo fasi Pablo noiquin. Jesús uarifi noitiro. Pablo numaquifin uarifi numatiroquin un afu nipanon,—icashon shinantirofo. <sup>17</sup> Ascano nocon Dios Niaifocoin nipanaca. Arus fusti Dios futsa yamai. Tsoancai Dios ointiroma. Nantifain non ahuunoa yoisharapacunaca isca huaquin,—Mirusu fustiton nantifi tapicoian. ¡Aicho! —ishon non yoipacunon.

<sup>18</sup> Timoteon min uhuun facushtan. Un mia yoiai cuscan nicasharahuu. Min Dios yonoshonataima mihuunoa iquisi inonpacocai cuscan yoisharayoni. Ascan natian afanan un mia yoisharai. Mihiunoa yoisharani cuscan nanscasi huafafainhuun. Satanás nocochaca huamapaifaiton a nicatamarocon Dios fusti tanasharafafainhuun chaca huashquima.

<sup>19</sup> Min Jesús icoinra huacoinmisi cuscan unuyamahuu. Ahuunoa shinanfafaihuun. Ahuara chaca huashon Upa Dios yoiriscahuun min nomuranshon ahua chaca afanan shinanshquima. Atirifiton chaca huafiacashon Upa Dios yoimisifoma arus fusti shinaniacauquin shafacafi cainmacasmacaquin. Ascashon tsoan Dios yoipaimisima aton chaca soashonon. Asca chaca huarialfoan afanan icoinra huacanima. ¡Ohua! Afananciaton nomuran shinansharamisifoma. <sup>20</sup> Noco yora rafu nanscara rafuquin. Himeneo yafi Alejandro un ato Satanás inan ato onaintimanon. Ascashon tapinonfo afanan noco Ifo Jesús chaca huanonfoma.

## 2

### *Ahuuscashomain non Dios cufitiroquin*

<sup>1</sup> Natian tsain futsa un mia yoinon. Ua nicasharapun. Upa Dios cufifafaihuun. Nanfin fasi shara finacoianquin. Ahua futsacai ascarama. Nantifi yorafohuunshon Upa Dios cufihuun ahuun Yoshin Shara yopaifo cuscan ato cufishohuun. Diosin atohuun ramapainon cufishofain Diosin ato amapaiyai cuscan cufihuun nanscasi huanonfo. Atohuunoa Upa Dios yoihhuu isca huaquin,—¡Aicho! Upa Diosin min na yorafo shara huashoshquiran,—ishon cufinquin nannori yoihhuu. <sup>2</sup> Nannoricoin nan niaifocoin yafi ahuun niaifo patasharinoafori ato Upa cufishohuun noco iquisharanonfo ahuaraton noco fucash huanonma. Ascano Dioshuunoa non shinanfafaitiro a cuscara sharacoin iishquin.

<sup>3</sup> Ascacun nan nocon Numamisi Dios noco oian non isharaiton oin unimacointiro. Nanscara fuchipai. <sup>4</sup> Nantofin nantifi yorafo numapaiquin. Ascashon aton chaca soashona afu ipanonfo. Cristohuunoa iconcoin tapisharanonfo. <sup>5-6</sup> Iiconcoin Diosifin fustiquin. Futsa yamai. Afin sharacoinquin. Yorafocai a cuscara foma. Nantifain man non chaca huamisi. Ahuara chacacai Dios fu itiroma. Nan Jesús nocon cuscara noco-funuquin. Arus fustitofin noco nashoniquin nocon chaca soashoshquin non Dios fu ipanon. Nantifi yorafo numapaiquin noco nashoni. Upa Diosin yorafo tapimapaiquin Furun Jesús mai ano nichini noco nashoshquinon. <sup>7</sup> Ascacun Upa Diosin ua catonni Jesús fu rafucain ahuunoa uhuun caifomafo un yoinon. Atorifi un Jesushuunoa icon yoiaiton icoinra huanon. Ascan uncai mia paraima. Icon fustisi mia yoi.

<sup>8</sup> Ascano nantifi manifotifainmain Upa Dios cufipainonfo. Ahuara chaca yoicani fochipamanantanyamacain sinatamari Jesús tanasharaquin mushainacahuan Dios cufipainonfo.

<sup>9</sup> Ainfofori un yoisharapai non ichanaintian isca huaquin shinanonfoma, —Uhuun saya sharashtacoin sahuufain fusoqui cunucain uhuun foo shara huafain nantififain ua oinonforan, —ishon ascacaquin man icai cuscan matohuunoa futsafo shinansharamapaiyamacahuun. <sup>10</sup> Ascatamarocon ato futan ahua futsa shinancaquima Upa Dios fusti shinancoincahuun. Man yoimisi isca huaquin, —Non Dios noicoinran, —ishon. Manmain icoincain futsafo shara huashofafaincahuun. Un ainfofo anori yoisharapai.

<sup>11-12</sup> Ascano Diospan tsain nicashquin man ichanantiro. Ascacun mun yoimisi ainfofoancai nocofunufo yonotrioma. Diospan tsain yoimisiton yoiaiton puusiquima ainfoan nicasharatiro yoiai cuscacoin tapifain nan yoiai cuscacoin aashquin. <sup>13</sup> Diosin Adán onihuakin tau huani. Chipo Evari onihuani. <sup>14</sup> Ascacufin Satanascái Adán parayonima. Eva paraquin tau huani. Nanto chaca huaquin tau huani. Diosin ato yononi cuscacai nicanima. Ascano ichanainfotian ainfofoan nica fustitirofo. <sup>15</sup> Ascafiacon ainfofoan facu caiyaintian isin muyotiro. Ascafiacon Jesús icoinra huashon noifain a cuscara shara icanashu Dios fu ipatirofo.

### 3

#### *Ahuu cuscaramain ichananfo cushumisifo itiroquin*

<sup>1</sup> Icon tsoan Diospan yorafo cushumisi ipaiquin yonoshosharafafainpaitiro. <sup>2</sup> Nan nocofunu cushumisi shara fusti itiro.

Ascano ahuara chaca ahuunoa shinainfocain cushumisi itiroma.

Ahuin fusti ya icain

pau fuchipaimisi iyamacain  
ahuara ahuuscarafaino shinansharamisi icain  
ahuara shara fustisi shinanpaimisi icain  
ahuun pushu muran yora iquimasharamisi icain  
futsafo Diospan tsain tapimasharatiro icain.

<sup>3</sup> Paumisi iyamacain

sutumitsapaimisiri iyamacain  
futsafo yoisharapaimisi icain.  
Ascataricai fochishmanantanpaimisi iyamacain  
pui noipaimisiri iyamacain.

Nan cuscara nocofunu catonhuun icoinra huafo ato cushumisi inon.

<sup>4</sup> Ahuin yafi ahuun facufori ato ismasharatiton

ahuun facufoan ahuunoa shinanshrafain nicasharanonfo. <sup>5</sup> Ascano ahuin yafi ahuun facufo nicamasharayamaino ahuuscashomun nan Diospan yorafo ichananmisifo ato nicamasharatiroquin.

<sup>6</sup> Ascacun nocofunun rama Jesús Ifoatocai ichananmisifo cushumisi itiroma. Nan cuscara man catoanfin shinanqui isca huatiroquin, —¡Aicho! Unfin fasi sharaquin. Ascan ua samamashta catoanfo un ato cushumisi inon. Ascan uncai futsafo cuscarama. Un ato finoncoianran, —icashon cacapaimisi itiro. Nannori Satanás noco shinanchacamapai.

<sup>7</sup> Ascacun isharaiton oinmisishacaquin nan icoinra huamafoanri ahuunoa shinansharacashon catontirofo nan ichananmisifo cushumisi inon. Nanscara iyamaiton Satanás ahuun nomuran shinanmatiro nan chaca huamisi cuscan. Ascashon nan chaca huamisifohuunoa shinanquicai a ichananmisifo tapimasharatiroma.

#### *Ahuu cuscaramain ichananfo shara huashomisifo itiroquin*

<sup>8</sup> Nanscarifiai ichananfo aton shara huashomisifo isharamisifo futsafoan atohuunoa shinanshrafain icon fustisi yoimisifo. Nan cuscarafo ichananfo aton shara huashomisifo itiroquin. Iscarari itirofo.

Paumisi iyamacain

pui noimisiforcai itiroma. <sup>9</sup> Ascashon tsoancai Jesushuunoa tapiyopaonima. Natian ahuunoa Diosin noco tapimanai cuscan tsoan nan icoira huafoan shara huashomisi itiroquin. Ascano fasi finacaiquin Jesushuunoa tapipaicoian nan cuscarafin ichananfo aton shara huashomisi itiroquin.

<sup>10</sup> Tsoan ichananfo ato shara huashomisi ipaiyaiton iquisi oinsharayotirofo. Isharacoincaimain ahua chaca huamaquin. Ascan oianfo isharacoincaina itiromon nan cuscara ichananfo shara huashomisi itiroquin.

<sup>11</sup> Aton ahuinfori isharacoinmisi icain yoiti huamitsapaimisi iyamacain paunmisiricai itiroma. Ahuara shara futsa aquifin Jesushuunshon asharamisi itiroquin.

<sup>12</sup> Nan ichananfo aton shara huamisifori  
ahuin fustiyao itirofo.

Ascashon ahuin yafi ahuun facuforifi onihuaniti. Nanfoanri Jesús tanasharanonfo.

<sup>13</sup> Nanscara shara huashomisi ichananfoan ahuunoa yoisharatirofo. Ascashon nanton nocon Ifo Jesucristo icoira huaquin finacointiro.

### *Tsoan Jesucristohuunoa nicayopaonima cuscan Pablonun cunushoni*

<sup>14-15</sup> Uhuun facushtan Timoteo un mi ari cariscapaifiai un funa caiyamaquin un mia tapimai ahuuscashumain ichananmisifo isharatirofoquin. Uhuun cunuhuunshon un mia tapimayoi. Jesús icoira huafo ichananmisifo nanfotin Diospan yorafoquin. Ascan nan Dios ipanaca. Ahuun tsain iconcoin ahuun yorafo nan ichananmisifohuunshon fut-safori tapimaiquin. <sup>16</sup> Icon atirifitocai tsoan Diospan tsain tapiataima isharashcaquin. Ascafia Jesushuunoashu non isharatiro.

Aafin Apa Dios icariashu mai ano fotoni nocon cuscara yoracoin iishquin.

Ascatarifi Diosin Yoshin Sharapan ismapaoni Jesuscái ahua chaca huamisima icon fustisi imisi.

Diospan oinmati afu nai muran icafoanri oinnifo.

Ahuunoashu manifoti futsafoan yoiqui isca huamisifo, —Jesús Upa Diosin facu.  
Ascashon arus fusti maton chaca soashotiroran, —ishon yoifoanfafainmisifo.

Yoiaifoan nicacanashu atirifi manifoti anoshon icoira huacani.

Ascashu Jesús naafiaшу mai murannoashu funini.

Chipo afanan Apa icano nuinacahuani arifi nantifiton aton niaifocoin iishquin.

## 4

### *Atiriffain afanan Jesús icoira huayamafiacashon futsafo iconma yoipaicani*

<sup>1</sup> Diosin Yoshin Sharapan noco cayacafi tapimayoni atirifiton Jesús potaifo cuscan. Ascashocai afanan icoira huapaitama nan yoshin chacafohuunshon ato yoipaiyaifo ato tanacani funoshcaquin. <sup>2</sup> Nan paramisifoan chanihuunoasi shinanfafaimisifo cuscan nannorifi futsafoi tapimashcani. Nanfoan chani fustisi yoifafaincaquicai afanan ahuara iconcoin shinantirom. Chani fustisi tapiafo.

<sup>3</sup> Ascashon fasi amaquiri futsafo yosicaquin isca huacani, —Mancaí fianantirom. Atirifi tushu man pitiromaran, —ishon ato parapaicani. Anori yosipaifiaifoan Upa Diosin nantifi tushu onihuani cuscan non nanfo unimacain pitiro. Ascashon piquin non Upa Dios, —¡Aicho! —huatiro. Ascan non Diospan tsain icoira huashon ahuara iconcoin non tapitiro.

<sup>4</sup> Ascan nantifi Diosin onihuani cuscan sharacoin. Non ahuara potatirom. Nantifi Diosin onihuafu non piquin, —¡Aicho! —huatiro. <sup>5</sup> Diospan tsainhuunshon non Upa cufiaino nantifi Diosin onihuani cuscan sharacoin itiro.

### *Jesucriston yonoshomisi shara*

<sup>6</sup> Uhuun facushtan Timoteo un mia tapimanai cuscan min icoira huaa futsafo mirifi min ato tapimashu min Jesucristo yonomati shara itiro. Nan tsain shara Jesushuunoa

min icoinra huamisi. Facushon min Diospan tsain icon nicamisi cuscan nanscacoин min tanasharacoинmisi. Shafatifi nan tsain shara min nomuran nanuhun futsafori tapimasharashquin.

<sup>7</sup> Ascafia futsafoan shunipafo cuscara ato tapimapaina. Ascan nanfocai Diospan tsainma. Ascacun ato nicayamahuu. Aton nicatamarocon Diospan tsain fusti oinsharahuu a cuscara shara iishquin. <sup>8</sup> Non ejercicio huaino noco caya non shara huatiro mutsisipa iishquin. Nanscarifai non Dios cuscara ipaiquin ahuun tsain nocon nomuran non nanuaiton ahuun curushu noco inanshquin. Nancaifin shara finacoianquin. Natian noco shara huatiro. Ascashon non Jesusqui nocoaiton noco imasharapacunaca. <sup>9</sup> Nancaifin min icoinra huatiroquin. <sup>10</sup> Ascano non fasi curushu yonoshofafainicain man non omitsiscamisi futsafo nan tsain shara icoinra huanonfo. Nonfin tapia nocon Dios napanacaton nocori nimapacutiroquin. Afin nantifi yorafo nashoniquin. Ascafia icoinra huafoti afu nipatirofo.

<sup>11</sup> Nanfo un mia tapimanai cuscan huafain un mia yonoai cuscari futsaforifi tapimafain ato yonohuun Diospan tsain icoinra huanonfo. <sup>12</sup> Timoteo icoinra huaa futsafo ato ismahuu min Jesushuunshon ato yoisharafain mirifi isharacain min Jesús icoinra huashon atohuun min noitiro. Ascacun ahua chaca huapaitama Jesús cuscara isharahuu. Pushcofiashu min ascaitocai mihiunoa tsoa ahua chaca yoitirofoma. <sup>13</sup> Un miqui nocoaitian atofu min ichananshon Diospan tsain yoia cuscan ato anushoquin yoisharafain yosisharahuu. <sup>14</sup> Ichananfo ato cushumisifoan mia manmanshon cufisbonaifono nantianri Diosin mia amapaiyai cuscan mia ashoni min icoinra huaa futsafo tapimasharafain min ato cushusharanon. Ascan Upa Diosin mia cashman tapimani cuscan huafain futsafori shara huashofafainquin shatuyamahuu.

<sup>15</sup> Un mia yonoa cuscan nantifi huafafainhuun ato ashosharashquin. Ascaifin min shafatifi itisharatiroqui. Ascaquin ahua futsa shinantaquima nan min acai fustisi asharafafainhuun. Min ascaiton oinquin yoitirofo man min fasi itisharacoian. <sup>16</sup> Ascacun oinfain. Nantishotapiquin min isharacain min ato cayacafi Diospan tsain tapimasharanon. Min ascaiton Diosin mihiunshon ato numatiro afu ipanonfo chaca huashcaquima. Mirifi min Jesús fu rafucacaintiro. Ascaquin min nomuran unimashquin.

## 5

### *Ahuuscashumain icoinra huaa futsafo fu non isharatiroquin*

<sup>1</sup> Ascashon nocofunu iyoafu tsain curushu yoiyamahuu. Ascatama min upa min yoisharatiro cuscan huafain iyoafu futsafo yoihu. Min ushtocoinfo min yoisharatiro cuscan huafain nanscarifi chipocu futsafo yoihu. <sup>2</sup> Ainfo mustufori min uhuacoin min shara huatiro cuscan huafain atorifi shara huahuun. Ascashon min chico yafi chipi min shara huamisi cuscan huafain shomayafori shara huahuun. Ato furi ipaiyamahuun. Ascatama atohuunoa shinansharahuun.

<sup>3</sup> Ainfo funuomacoin facuomacain fayaomacai nan icoinra huafu ichananfoan cushusharatirofo. <sup>4</sup> Ascafia funuoma futsan facufo ya iyamarai fayaomashon nanfoan cushusharatirofo. Jesús tanasharapaiyaifoan nansca huatirofo. Diosin nanscara fuchipai. <sup>5</sup> Ainfo funuoma ahuun yoraomashon Dios fusti shinanquin. Isca huaquin cufitiro,—Upa Diosin ua cushusharahuu,—ishon cufitiro. Shafatifi yafi yamutifiri Upa Dios cufafaintiro.

<sup>6</sup> Ascafia funuoma futsafocai ascatiroma. A futsan shinain cuscan huaquin shi-nantiroma. Futsa afin apaiyai cuscan fusti shinanfafaitiro. Ascaquicai Dioshuunoa shinansharatiroma. Ascashon pushuti chani yoifoanfafaitiro. Nan cusrarafoan chaca huafafainicai Dios fu nipatirofoma. Ascashu nifiashu man naa shinantsafo.

<sup>7</sup> Timoteon nanti un mia yoiayi cuscan funuomafohuunoa ichananmisifori tapimahuu.

Min ato tapimanai cuscan icoinnaifoan tsoancai atohuunoa yoitiroma isca huaquin, —Timafin. Nafoan aton funuomafo cushusharayamaifoan ato chaca huacaniran, —ishocai atohuunoa tsoan yoitiroma.<sup>8</sup> Tsoan ahuun yorafo cushusharayamafain ahuun afocoinri cushusharayamaicai Diosin tsain cununi cuscan aima. Nancaifin Jesús icoinra huafoma cuscara finacaiaquin.

<sup>9</sup> Ratoran funuoma futsa ahuun fari sesenta nocoataima ahuun funu niyoano furoma ipaonicai. Nanscaracai ichananfoan cushutiroma. <sup>10</sup> Ascan funuoma isharamisi futsafoan ahuunoa isca huaquin yoitiro, —Nan ainfo funuomaton futsafo shara huafafainiran, —ishon ahuunoa yoifain ahuun facufo tapimasharamisiran huafain futsafo ahuun pushu ano nococun ato shara huamisi icain Jesús icoinra huafoto shara huafain futsafoan ahuara chaca finoan atori shara huamisi icain futsafo ato shara huamisicain ascara funuomafo ichananfoan ato cushusharatiro.

<sup>11</sup> Ascafia funuoma yoshafoataima nan ichananfoan cushutirofoma. Rucun yoiyomisi, —Cristo fustihuunoa shinanquin un yonosharashopairan, —ishon. Ascafia chipo anori afanan shinanyamaquin fasi nocofunu fipaiquincai a yoiyoni cuscan afanan shinainma Jesús yonoshosharashquin.

<sup>12</sup> Ascacanashu Jesús yoiyoni cuscan ayamashu omitsiscaquin. Aton nomuran shinantirofo isca huaquin, —¡Ohua! Un Jesús yoiquin tau huani cuscacai un aama. Natiancai uqui unimaimaran, —ishon shinantiro. <sup>13</sup> Ascashon pushuti chani yoifoanfafaini. Yonotama shafatishon funocointiro. Nanscara man fuyamisi. Chaca yoimisi cuscan yolama shara icuana. <sup>14</sup> Ascacufin ainfofo yoshafoataifoma un ato yoisharapai isca huaquin, —Man afanan shara itiro. Ascan man mato facucoin ayashon cushusharafain maton funuri pichasharashon man shara huashotiroran, —ishon un ato yoi. Man ascaitocai yoshin chacafoan matohuunoa tsain chaca yoitiroma. <sup>15</sup> Ascafia atirififoan Jesús potayoni Satanás tanashcaquin.

<sup>16</sup> Ratoran ainfoan Jesús tana amaqi funu nacun nan ichananfoan cushuamarocon ahuun yoracinfoan cushusharatiro. Ascan nan ainfo tatuoma ahuun yorafomacun nan Jesús icoinra huafohan cushusharatiro.

<sup>17</sup> Ichananfoan cushumisifo ato inansharatiro. Nanfoanrifi tanasharamisifoma yonosharashomisifo. Nan Diospan tsain yoimisifo non ahuun tsain yosimisifori inansharatiro yopai cuscan finonfo. <sup>18</sup> Nannori Diospan tsain cununi isca huaquin, —Moipan trigo camaqui puamafoanfafaini ahuun shacafo tsosaiton a runushcaquima shara huacahuun. Ahuuscashon pitiromaqun. Asca huaquima piimacahuun, —ishon cununi. Ascashon cununi isca huaquin, —Tsoa yonosharaiton oinqui ahuun rafanan inansharacahuun, —icashon Diospan tsain cununi. Cununiri isca huaquin, —Mato cushumisifo non mato shara huashofafainmisifori ato inansharacahuun yopaifo cuscan finonfo, —ishon cununi.

<sup>19</sup> Futsan cushumisi yoiti huaiton a nicayamahuu. Ascano yora rafutan iyamarai rafu non fustifain nannorisi futsahuunoa yoiaifoan man icoindra huatiro.

<sup>20</sup> Ascan chaca huaa iconcun nan ichanaintian nantififain ointaifi yoihu. Man ascaiton nicai ratucani ahuun caononfoma.

<sup>21</sup> Timoteon nocon Upa Diosin futan Furun Jesucristo non ahuun oinmati shara afu nai muran icafoan noco oin. Ascacun aton ointaifi un mia yoinon. Nanti nan un mia yonoa cuscan ahuu. Nannorisi nantifi yoihu. Isca huaquin shinanyamahuu, —Nan uhuun yoracinfoan chaca huafoto cuscacai un futsafo yoima. Ascashon cushumisiton chaca huacucai un tsoa tapimaimaran, —ishon anori shinanyamahuu. Ascaquima nantifihuunoa nannorisi shinanhuan.

<sup>22</sup> Ascano ichananfo aton cushumisi catonriscayamahuu. Iquisi oinsharayohuu Jesús tanasharamisi iyamarai tanasharamamainquin. Tsoan ahuun chaca fomanpairiai

cushumisi catonyamahuu. Ascaran min catoanfin mirifi min ahuun chaca foman-shonni cafiscaiquin. Ascacun ascayamahuu. Jesús cuscara isharacoinhuun. Ahua chaca huayamahuu.

<sup>23</sup> Natian tsain futsa un mia yoisharapai. Min shaquipan imisi. Ascacununu fustisi ayaquima ichapama pau fata ayahuun cayasharashquin.

<sup>24</sup> Ascano atirifi yorafoan chaca huamisi cuscan nantifiton tapishocai. Tsoan nan-scarafo catontiroma cushumisi inon. Ascan atirififain chaca huamisi cuscan tsoan tapicuma. Nanscarafoan fomanmisifo. Ascafia chipo Diosqui nococun a chaca huamisi cuscan puashoshquin nantififain ahuunoa tapinonfo. <sup>25</sup> Nanscarifiai futsafoan fut-safori shara huamisi cuscan nantififain nanhuunoa man tapiafo. Ascan futsafoan arus fusti oianmafiano futsa shara huaquin ashomisi cuscan nanforifi chipo Diosin puashoshquin nantififain tapinonfo.

## 6

<sup>1</sup> Ascan tsain futsa afanan un mia tapimanon. Nan yonomati Jesús icoinra huafoan aton ifo yonosharashofain ato nicasharacoinon. Asca huaifoan oinquicai icoinra huamafoan atohunshon Diosqui shinanchacatirofoma. Ascashon non Jesushuunoa yosimisi cuscan shinanchacanonfoma. <sup>2</sup> Rato yonomatinin Jesús icoinra huano ahuun ifoan arifi Jesús icoinra huacun nicasharacointiro, —Nicayosma iyamacahuun. As-catamarocon nicasharapaifafaincahuun, —ishon ato yoihu. Nanscara yonomati yafi afo Diospan facufo. Ascashu yora huatananfo. Yonomatinin ahuun ifo noiquin yonoshosharaino nan Upa Diospan facu sharacoin yonoshosharai.

### *Ahuaraton noco imasharacointiro*

Ascacun un mia tapimanai cuscan huafain futsafori tapimasharahuun. <sup>3-4</sup> Un mia tapimana cuscan cayacafi sharacoin. Nannorifi nocon Ifo Jesús yosipaoni. Ascan tsoan anori yosiamananton amaquiri yosia. Nan cuscara cacapaimisi. Aatocai ahua tapiama. Ahuun nomuranshon shinanchacaquin samamashta futsa fu fochishmanantanapaitiro. Ascatacrai unimatiroma. Ascaquin futsafo ahuara ya cuscan fuchipaifain futsahuunoa tsain chaca huafain futsahuunoa shinanchacamisi. Futsan aquí oshon futsahuunoa yoiai cuscan samamashta icoinra huashon ahuun nomuran shinanqui isca huamisi,

—Nanto ua chaca huaaran, —ishon shinanchacafafainmisi. <sup>5</sup> Nan cuscara yorafoan chaca fustisi shinanfafaimisifo. Ascatali fochishmanantanafafainmisifo. Ascashon afanancal tsoan ahuara icon yoitirofoma. Chani fustisi tapiafo. Ascashon isca huaquin shinanmisifo, —Non nan tsain shara Jesushuunoa tanaicai non afanan ahua yopatiroma. Non fasi ichapayatiroran, —ishon amaquiri chaca shinanmisifo.

<sup>6</sup> Ascano non aya cuscan ichapaya iyamarai non ahuuomafashori non unimacain Diosihuunoa shinanfafaini nancaitofin pui finoan shara finacaiaquin. Nanfin iconquin unimacai non isharaino nocon nomuran non unimatiro. <sup>7</sup> Non caincái non pui yafi mafo ya cainima. Ascatala ahuuoma non Caini. Nanscarifiai non naacun noco mai huaifotiancai non ahuara fotiroma. Nantianri nocon furo yoshincái ahua fotiroma. <sup>8</sup> Ascacufin non tushu yafi sahuutiyyashu non unimatiro. <sup>9</sup> Ascafia tsoan pui yafi mafo ichapa fipaiquin samamashta shinanchacatirofo. Pui ichapa fipaiquin futsafo chaca huaiton pui fiishquin. Ascashon Satanás ato chaca huamaino amaquiri shinanchaca-fainatorifi omitsasca huatiro. Ascatalan ahuun unutaqui omitsiscapanacafo muran nocoshcani. <sup>10</sup> Ascatalan pui noicaquin chaca futsa futsatapafo huatirofo. Atirifi fasi pui fipaicaquin Jesús cachiquiri huacoincani. Asca huacanashu aton nomuran omitsiscái finacoinmisifo.

<sup>11</sup> Ascafia Timoteon Upa Diosin mia catonni min ahuun yora inon. Ascacufin nanfoan pui fusti yafi chaca fustisi shinanfo cuscan shinanyamahuu ato cuscara ishquima. Ascatamarocon Upa Diosin mia imasharapaiyai cuscan nan fusti fuchipaihuu. Ascashu Jesús cuscara shara ipaicain a icoira huafain Dios yafi futsafori noicoinhuun. Ascashon ahuara ahuuscarafaino Jesús icoira huashon min tunutiro. Ascatan nantifi yorafohuun ramapaihuu.

<sup>12</sup> Ichananfo ano min ato cayacafi shara yoini isca huaquin,—Un Jesús icoira huai. Afin uhuun Iforan,—ishon min ato yoini cuscan yora ichapafain mia nicanonfo. Ascacun ahuara ahuuscarafaino nantishotapiquin Jesús icoira huacoinhuun. Ahuaraoan mia shatumapaiyai cuscan nicatama Jesús fusti icoira huafafainhuun. Ascashu shafatifi Jesús fu rafuhuun. Jesushuunoashu min Dios fu nipatiro. Ascano natian nan min naitianri ahuara chacafo potahuu Jesús onancoinshquin. <sup>13</sup> Nan oni huati Upa Diosin nantifi ato nimai. Ascano Romanon niaifoan ahuun anu Poncio Pilato yocaiton Jesús ahuunoa yoisharani. Nan Dios futan Furun Jesusin ointaifi un mia yonoi.

<sup>14</sup> Un mia yonoai cuscacoin fusti acacainhuun. Ascashon ahuashta chaca huaquima un mia yonoa cuscan fusti nocoo Ifo Jesucristo oaitian huahuun. <sup>15</sup> Upa Diosin nichipaitian nocon Ifo Jesucristo afanan nocouqui nocoshquin. Nantianri non oinshquin. Nocon Diosin arus fusti nantifi iquisharafain nantifi niaifoan aton niaifocoinri. Ifofoan aton ifocoinri. <sup>16</sup> Arus fusti niaifocoin ipanaca. Nanca napanacama. A icarifi chashacoianquin. Ascano tsoacai aqui nocotiroma. Tsoanricai ointamari ointiroma. Ascacun non ahuunoa yoisharanon. Aafin curushcoin ipanacaquin. Nanscasiai.

<sup>17</sup> Nan pui ichapayafo yoihoo cacapaimisi iyamacain isca huaquin shinanonfoma,—¡Aicho! Un pui ichapayashu nantishotapiquin un isharacoincái,—ishon yoinonfoma. Ato yoihoo ascanonfoma. Tsoancai tapiama ahuutiamain aton mafo yafi ato pui cuyoriscaicai. Ascatama Dios fusti non icoira huacun nocoo nimapacusharatiro. Nanton ahuarao non yopai cuscan nocoo inan non afoqui unimanon. <sup>18</sup> Ato yoihoo futsafo fasi shara huafafainonfo. Yopaifo ato fishcoyamafain unimacoincái ratoran shafatan ato cashman inansharanonfo. <sup>19</sup> Ascashu chipo Diosiqui nocoaifotian ato inain cuscacai cuyopacunacama. Ascatari Dios fu isharapacutirofo.

### *Pablonun ahuun tsain unutaqui Timoteo yononi*

<sup>20</sup> Ascano Timoteon Diosin ahuun tsain sharapan mia tapimani futsaforifi min ato yoinon. Ascacun oinfain. Ahuun tsain oinsharayohuu futsafo cayacafi tapimashquin. Futsafoan Diosin tsain amaqiri yoimisifo. Afiranan yoinonancaquin ipaitsicoin yoicaquin. Nanfoan yoimisifo non tapicoianran ifiacashocai tapiafoma. Ascacun atofu iyamahuu. <sup>21</sup> Atiriffain nanscara shinanfo,—Non fasi tapicoianran,—ishon. Ascacanashu Jesús nocoo icoira huamapaiyai cuscan afanan tsoan icoira huacanima.

Upa Diosin mihuun ramapainon. Nanti.

Pablo

## Pablonun Timoteo Afanan Cunu Fomani

### *Pablonun Timoteo yoisharani*

<sup>1-2</sup> Uhuun facushtan Timoteo unquian Pablon afanan mia cunu fomai min tapinon. Un Jesucristo fu rafumisi. Apa Diosin ua nichipaiyai cuscan ua nichini manifoti ato tapimashquin ahuunshon Furun icoinra huashu non Dios fu ipatiroquin. Nannori Upa Diosin yoiyoni. Nocon Upa Diosin futan nocon Ifo Jesucristo mihiun noiquin mia cushusharafain mihiuri ramapaia. Ascashon min nomuran mia unimamanon.

### *Pablonun Cristohuunoa yoini*

<sup>3</sup> Ascan uhuun shunifoan Upa Dios yonoshonifo cuscan huafain urifi nansca huamisi. Uhuun nomuranshon ahuashta uhuunoa chaca shinantama un yonoshoni. Ascashon un Upa Dios mihiunoa cufinquin un, —¡Aicho! Upa Diosin, —huafafaini. <sup>4</sup> Un mimaqui pashcaino min uaini. Ascan nancai un ointiaquimamisima. Ascacun un mia fasi shinain mia afanan oinpai uhuun ointi unimashquin. <sup>5</sup> Ascan min nocon Ifo Jesús icoinra huacoinna cuscan min chichi Loida yafi uhua Eunice nannoricoín icoinra huamisifo. Ascano nan rafutan icoinra huaqui tau huani cuscan mirifi min chipo icoinra huacoinni. Nanfohuunoacai un ointiaquimamisima.

<sup>6</sup> Ascacun un mia afanan shinanmapaiyai cuscan fusti shinanhun. Un mia mayatasho Upa Dios cufishoni nantianri afin mia amapaiyai cuscan min huanon. Ascashon min ahuun Yoshin Sharapan ahuun tsain yoisharafain min ato cushumisi inon. Ascacun aqui tushcuyamahuu. Upa Diosin mia amapaiyai cuscan fusti unimacain ahuu. Non chi cutu huasharayamaino nocatiro. Nanscarifai Upa Diosin noco amapaiyai cuscan non huayamai non funotiro. Ascashocai non afanan ahuun tsain yoisharaima. Ascafia non chi cutu huasharaino afanan urutiro. Nanscarifai Diosin noco amapaiyai cuscan non afanan acaino non ato yoisharatiro.

<sup>7</sup> Ascafia Diosin ahuun Yoshin Sharapacai noco nichinima non rafipainon. Ascata-marocon ahuun Yoshin Shara futan ahuun curushhuunshon ranotama ahuun tsain shara yoicai non yoraqui ratuyamacain atohuunrifi non noitiro. Ascashon norifi non shinansharatiro.

<sup>8</sup> Ascacun noco Ifohuunoa futsafo yoi rafipaiyamahuun. Un cunu muranfiano uhuun rafipaiyamahuun. Un ahuun tsain shara yoiaiton ua omitsisca huashcani. Ascafia Diospan curushhuunoashu min ufu ahuunoashu omitsiscashotiro. <sup>9</sup> Ascano Upa Diosin noco numani non ahuun Furun cuscara shara inon. Non ahuara shara huqa rafananci noco numanima. Afin apaiyai cuscan noco numani. Nocohuun noiquin noco numani. Ahuarao oni huataima Jesucriston nocohuun ramapaicain nocohuun noia. <sup>10</sup> Ascano nocon Numamisi Jesucristo noconi. Ascacun natian ahuunshon non tapitiro fasi nocohuun noi ahuatoncai noco namapacutiroma. Ascacun ahuun tsain sharahuunshon non tapitiro nocon chaca soashonano non afu ipanaca.

<sup>11</sup> Upa Diosin ua catonni Jesucristo fu rafumisi icain ahuun tsain shara Jesushuunoa un futsafo yosinon. <sup>12</sup> Ascan nan ua yononi cuscacoin un huamisi. Ascacun ua omitsisca huamisifoquin. Un omitsiscafiai un rafifama. Rafitamarocon un Jesús onancoinfain un icoinra huai. Ascan un Jesús yoini isca huaquin, —Ifon ua cushusharahuu. Un chipo mifu isharapacunon, —ishon un yoini cuscan natian nan oaitian ua ashoshquin. Nan un icoinra huacoinna.

<sup>13</sup> Un mia cayacafi tapimana cuscan icoinra huacoinhuun funoshquima. Nocon Ifo Jesucristo icoinra huafain ahuunri noicoinhuun. Ascacun ahuunshon nantifi noicoin-huun. <sup>14</sup> Upa Diosin min nomuran ahuun tsain shara mia nanumana cuscan afohuunoa shinanfafaihuun funoshquima. Ascano ahuun Yoshin Shara nantishotapiquin no fu

rafui. Ahuunshon Diosin mia tapimana cuscan min nomuranshon min mucusharatiro funoshquima. Futsafori tapimashquin.

<sup>15</sup> Man min tapian nantifi icoinra huafo Asia mai anoafaoan ua potafo. Ascashocai tsoan afanan ua oin fupaicanima. Ascano Figelo futan Hermógenes nan rafutari ua potafo.

<sup>16-17</sup> Onesiforocai ato cuscara inima. Acai uqui oi rafipainima. Ascashu Roma ano noconi. Nanno nocoshon funafafainquin cunu murannoa ua fuchini. Ascashon ua oinyoi ocacainmisi. Ascacun ahuun afofihuunrimain Upa Diosin ramapainonran.

<sup>18</sup> Man minrifi tapishara un Efeso ano ipaonitian nanton ua shara huafafainpaoni. Ascano nocon Ifoan noco ichanan huaitianmain Onesíforo shara huacoinpainon.

## 2

### *Jesucriston ahuun yorafo nan ranushumua shara cuscara itiro*

<sup>1</sup> Timoteon uhuun facushtan Jesucristo ahuun curushhuunoashu min isharatiro chaca huashquima. <sup>2</sup> Un futsafori Jesucristohuunoa yoimisi cuscan mirifi man min nicamisi. Ascano nocofunufoan min icoinra huaa cuscan arifi icoinra huafoan ato catonhuun. Min nicamisi cuscan atorifi tapimahuun nanfoan futsaforifi cayacafi tapimasharanonfo.

<sup>3</sup> Ranushumua shara omitsiscatirofia ahuun niaifoan yoiai cuscan nicasharatiro a yoia cuscacoin aashquin. Nanscarifiai mirifi min no fu Jesucristohuunoashu omitsiscatiro. <sup>4</sup> Ranushumua sharapan ahuun niaifo ahuunnoa unimamapaitiro. Ascan afu ranushumuaufoma fucai yonotiroma. Ascashon ahuun niaifoan yonopaiyai cuscan fustisi nicatiro. Nanscarifiai Jesús fusti nocon Ifo icaino arus fusti noco yonotiro. Ascashon noco amapaiyai cuscan non aashquin.

<sup>5</sup> Afanan un iscara un mia tapimai. Tsoa futsafo fu cashupai iquisi yonoaifo cuscan nicafain itisharatiro. Ascan itisharayamashocai atirifi shonontiroma. Nanscarifiai Upa Diosin noco inansharapaiyai cuscan fipaiquin iquisi ahuun tsain non nicasharatiro noco yoiai cuscacoin aashquin. Ascano itisharashu chipo non aqui nococun noco inansharapaiyai cuscan non fitiro.

<sup>6</sup> Mau yonomisiton fasi curushcain ahuun mau yonoshon afi ahuun yono finquin tau huashon chipo futsafo inantiro. Nanscarifi aquin mirifi nocon Ifo Jesús curushcain yonosharashohuun mia inansharapaiyai cuscan fishquin. <sup>7</sup> Un mia yoiai cuscan shinanhun. Ascan min shinainton nocon Ifoan min nomuran mia tapimashquin.

<sup>8</sup> Ascacun ointiaquimayamahuu Jesucristo naafiacun Upa Diosin funimani. Nan David ahuun funa. Nannori nan tsain shara Jesushuunoa un yoimisi. <sup>9</sup> Nan un yoiaiton ua omitsisca huamisifo. Ua cunu muran iquimaquin ua yoimisifo isca huaquin, —Min chaca huamisicun non mia cunopan munushuiran, —ishon uaasca huamisifo. Ascafiai Diospan tsain tsoan munushtiroma. <sup>10</sup> Ascashon Diospan tsain nicasharatirofo. Ascaifoan atorifi Diosin catonshquin. Ascacufin nuno cunu muranshon un tunuicain futsafoan Jesucristo icoinra huanonfo afu ipashcaquin.

<sup>11</sup> Un mia yoiai cuscan iconcoin.  
Non Jesushuunoashu naashu  
non afu nipashquin.

<sup>12</sup> Non ahuunoashu omitsiscai.  
Ascafia non chipo a futan futsafo iquimashquin.  
Non yoiquin isca huaiton, —Jesuscái uhuun ahuamaran, —ishon non yoiaiton arifi yoishquin norificai non ahuunama.

<sup>13</sup> Non afanan Jesús icoinra huayamafiaitocai aacai ascarama.  
Noco yoiyomisi cuscan afanan shinan futsatiroma.  
Yoiyoní cuscan iconcoin fusti. Atocai chani yoitiroma.

Ahuun tsain iconcoin fusti.  
Aacai ointi rananyama.

*Afu yonoa cuscan aiton oin Diosin unimai*

<sup>14</sup> Nan un mia yoia cuscan mifu ichananfo yoifafainhuun nicasharafain ointi aquimanonfoma. Nocon Ifohuunshon ato yoihuu tsain mutsamayamacain fochishmanantanfonfoma. Ascaiton tsain mutsama yoicaquin ato shinanchacamatirofo. <sup>15</sup> Uhuun facushtan, Diosin tsain shafatifi oinsharahuu Dios yonosharashoshquin miqui unimanon. Minascaifin ahuun yonoshomisi shara min iishquicain. Ascashon ahuun tsain iconcoin cayacafi shara futsafo min tapimatiro. Min ascacun Diosin mia oiainnocai min rafitiroma.

<sup>16</sup> Ascano yorafoan Dioshuunoa yoicoinyamafiaquin ipaitsi tsain mutsama yoiaifoanno atofu iyamahuu. Nan cuscaraoan aton nomuranshon fasi shinanchacaquin finacointirofo. <sup>17</sup> Nanfoanri futsafo tapimapaiyai cuscan fasi chacacoin. Ascano yorafoan ato nicacanashu aton ointi fasi isincointirofo. Nocon caya muran coo ichapacoinyashu nantifi nami payocotiro. Nanscarifiai tsain amaquiri futsan yosiahunoashu yora ichapafoan aton nomuran fucash huatirofo. Ascashocai afanan icoinra huapaitirofoma. Nan Himeneo yafi Fileto nanscara rafu. <sup>18</sup> Nan rafutan fai shara funoaflo. Afanancal Diospan tsain iconcoin yoiafoma. Ascashon yoimisifo isca huaquin, —Upa Diosin nooco funimanai cuscan man finoan. Afanancal icoinra huaflo funitirofomaran, —ishon amaquiri yosiafo. Anori yoiaifoancal nicaquin atirififain afanan icoinra huacanima. Ascashon man cachiquiri huaaflo.

<sup>19</sup> Ascafia Diosin tsain iconcoin. Toquirinhuancai tsoan rafutiroma. Diospan tsain nanscarari tsoancai fiananan huatiroma. Icon yoimisi cuscan nannorico. Toquirinhuanqui yora cunuacai tsoan soatiroma. Nanscarifiai Diospan tsain cununi isca huaquin, —Nocon Ifoan ahuun yorafo onancoian. Ascano ahuun yoracinfoan chaca huamisifo cuscan potatiroforan, —ishon cununi.

<sup>20</sup> Nocofunun pui ichapayaton pushu uhuapa shara huaa. Amuran puratofo yafi cuchofo sharashtacinfo. Ascano futsafo ahuun pushu ano nococun pushu ifoan nan purato yafi cucho sharashtafoquin ato pimatiro. Ascafia ahuun pushu muranri nanno ahuun shihuati aqui chaca potati itiro. <sup>21</sup> Ascano mirifi min chaca potacoinyashu nan shihuati chaca aqui potati cuscara itamarocon min nan purato sharashtacoin cuscara itiro. Ascan min Jesús cuscara shara icaino Upa Diosin mia yonosharamapaiyai cuscan min ahuunshon ahuara futsafo shara huatiro.

<sup>22</sup> Ascan pushcofoan chaca huapaimisi cuscan mirifi asca huayamahuu. Nan chacafo huaifoan oin atomaquinoashu ichoriscatahuun chaca huashquima. Chaca huapaiquimarocon iscaraofo fuchipaihuu. Jesús cuscara shara ipaiquin nan icoinra huafain futsafo noicoinfain isharacoinhuun. Futsaforifi Jesús aton chaca soashona aton nomuranshon shinansharaifoan Diosin tanasharapaiyai. Nanscarao fu rafuhuun. <sup>23</sup> Ascatari futsafo tsain mutsama yoitiacanashu fochishmanantanancain samamashta sinatirofo. Ascarao fu atofu iyamahuu mirifi ato cuscara iishquima.

<sup>24</sup> Nocon Ifoan ahuun yonomati sharacai fochishmanantanamisi itiroma. Ascatama nantifi yorafo shara huatiro. Ascashon funainquimashta oi tsii huafain nan amaquiri shinainfo ato tapimasharatiro atohuunoa shinanchacanonfoma. <sup>25</sup> Diospan tsain iconshara nicacasmaifori oi tsii huafain ato tapimasharahuu Diosin aton nomuran shinanma futsaino ahuun tsain iconcoin tapinonfo. <sup>26</sup> Ascatacail afanan amaquiri shinantiropoma. Cayacafi shinantiropoma. Ascano Satanasfin nan masharo cunu muran iquimana cuscan ato huamapaimisi ato chaca yonopaiyai cuscan anonfo. Ascafia nan cayacafi Diospan tsain nicaquin finacoianfotin. Nan masharo cunu muran iquimamua cuscan finontirofoquin iquishcaquima.

## 3

*Jesús oti chaimamain yorafo ahuu cuscara ishquicanicai*

<sup>1</sup> Un mia tsain futsari yoinon. Ascacun un mia yoiai cuscan min nomuran shinanhuan. Jesús oti chaima ahuara chacacoin finonshquin. Ascano non omitsiscatiro. Ascafia non icoinra huaaf. Noco musu huamapaifafainshcani. <sup>2</sup> Chaca iscarafu huashcani. Futsafu shinantama afiri fusti noicain futsafu noiama icain pui fusti noifain afiri fusti yoimusharacain curafiapaimisi icain roanmitsamisifo icain aton apa yafi ahua nicacasmamisifo iishquican futsafuan ato shara huashoan cuscan ato, —¡Aicho! —huayamafain atohuunoa fusti shinanchacaquin. Ascaquicai Diosihuunoa ahuara sharafo shinansharatiroma.

<sup>3</sup> Tsoa noiamafain futsafuan chaca huua cuscan futsafu rau huayamai icain pushutifi cahuancacaini yoiti huamitsacahuancacaimisi icain ahuun nomuranshon shinanchacai cuscan shatuyamafain pofucuin icain ahuara sharafo noicasmafain. <sup>4</sup> Ascatari fuparamitsamisi icain afu rafumisifo fomanquin ato chaca huamisi icain ointi rochitiamisifi icain cacapaimisicoin icain ascashofin Dios noicointama afin apaiyai cuscan fustisi shinancani. <sup>5</sup> Futsafu ichananfiaquicai Diosin ahuamamishti atiro cuscan icoinra huacanima.

Ascacun nanscarafu iyamahuu. <sup>6-7</sup> Ascatari ainfofoan chaca huamisifo cuscacai Dios yoimisifoma ato chaca soashonon. Anoricai itama afananri ahuara chaca futsa fut-satapafo huapaicaquin shinanfafaimisifo. Ascaquin ato ointi nocaofo chaca huamisifo shinancaquin. Ascashon nanscarafu ainfofoan yoimisifo isca huaquin, —Un tapipai ahuuscashumain un isharatiroquin, —ishon yoifiaquicai Jesucristohuunoa Diospan tsain iconcoin nicafiaquicai tapicoianfoma. Ascano nan yora chacafoan nanscarafu ainfofo ato pushu muranshon iquimisifo ato tsain shara nicatsa yoiquin. Ascafia ato tsain shara yoiamafiaqui. Ascan ato yoiaifo cuscan fasi amaquiricoin. Ascashon ato iquipaicani.

<sup>8</sup> Nan nocofunufo nan Janes yafi Jambres cuscarafo. Nan rafu Egipcio shointian rafu. Ascano Moisés yorafo Diosin tsain tapimapaiyai cuscan nantianri nan rafutan ato yoini isca huaquin, —Moisés mato yoiai cuscan nicayamacahuun, —ishon yoinifo. Nanscarafuan Diospan tsain iconcoin futsafu nicamapaima. Ascashon aton nomuran fasi chaca fusti shinanmisifo. Ahua cayacaficai shinantirofoma. Nocon Ifo Cristo icoinra huapaicanima. Ascashon Diosin potacoianfo. <sup>9</sup> Nan Janes futan Jambres ato amaquri chaca yosipaiyaifoan tapinifo. Nanscarifi aquin nan chaca huamisifo ato parapaiyaifoannori tapishquican. Ascashon tapitirofo nanfoan afi ipaitsicoin shinanmisifocun. Ascacun, —Ahua tapiafomaran, —ishon atohuunoa yoishquican.

*Pablonun ahuun tsain unutaqui Timoteo yononi*

<sup>10</sup> Ascafia Timoteon min tapia unca ato cuscarama. Un imisi cuscari man mian tapicoian. Un futsafu tapimana cuscan min nicamisi. Ascashon man min tapia nocon Ifo Jesús ua amapaiyai cuscan nan fusti un apaiyaiton. Min oinmisiri urifi un Jesús icoinra huacoinshon futsafuan amaquri shinanchacafiaiunocai atohuunshon un shinanchacatamarocon un futsafuhun noicoinquin. Ahuara ahuuscarafaino un tunumisi.

<sup>11</sup> Ascashon uarifi omitsiscamamisifo. Un ahuara futsafu chaca finoainton mificoiun man min oinni. Ascaquin uhuun nomuran un nocomisi ua omitsiscahuiaifoanno. Ascan un finoan cuscan man min tapian nan Antioquia ano non Iconio ari yafi Listra anoashumain un ahuuscaquin. Ascafia nanfuhunoashu un omitsiscafiaiton nocon Ifoan ua numani. <sup>12</sup> Icon. Ratorafu nocon Ifo Jesucristohuunoashu isharapaiyaifo omitsica huashcani. <sup>13</sup> Ascano nan yora chaca huamisifo yafi paramisifori chaca finacoinya ishquican. Futsafu paraifoan atorifi futsafuanri parashcani.

<sup>14</sup> Ascafiaifonocai min ato cuscara ishquima. Mia tapimamisifo cuscan yafi min icoindra huacoinmisi cuscan nanscacoainrifi huafafainhuun. Nan mia tapimamisifo man min tapicoian. <sup>15</sup> Nan facushtashon min Diosin tsain shara tapinifoanna. Nanfoan mia shinansharamatiro min Jesucristo icoindra huashu afu ipashquin.

<sup>16</sup> Nantifi Diospan tsain cununifo cuscan afin ahuun shinanpan futsafo shinanmana cayacaficoin cunushononfo. Ascano cununi cuscahuunshon noco tapimai ahuamain iconcoin fustiquin. Ascafia non chaca huaiton Upa Diosin tsain cununihuunshon noco tapimatiro non afanan chaca huanonma. Ascan ahuara ahuu cascararan amaqiri non acaitoriahuun tsain sharanun noco cayacafioinmatiro non tanasharaquin finacoinfain ahuuscashumain non a cuscara shara itiroquin. <sup>17</sup> Ascacun ahuun cunuhuunshonri noco tapimai non itisharashon nantifi ahuun yorafo ahuara shara futsa futsatapafo non yorafo huashofafainon.

## 4

<sup>1</sup> Upa Dios futan Jesucriston noco oinfafainni. Nantofin nantifi yora niafo yafi nan namisifori ato yoipacushqui niyoashumain ahuu cuscara imisiquin. Nanrifi chipo noocoqui oshon nantifi yorafo iquishquin. Ascacun un mia cayacafiyonoi ua nicas-harahuu. <sup>2</sup> Diospan tsain futsafo yoihuu. Ascashuri itisharahuun nantishotapiquin ato yoishquin. A min oian nicapaisharaifoan ato yoihuu. Ascan min oianri nicacasmaifoan nanforifi yoihuu. Ato cayacafiyisharahuu amaqiri shinanonfoma. Ascashon ahuara chaca huaifoan ato shafacafiyisharahuu aton chaca shatunonfo. Ascatari ato tsain shara yoihuu aton nomuran unimanonfo. Ato oi tsii huashon yoifafainhuun unimasharanonfo.

<sup>3</sup> Ascacun ato yoisharahuu ratoran shafatacái tsoan afanan Diospan tsain icon-coin nicapaishcanima. Ascatama nanfoan nicapaiyaifo cuscan fusti nicashcani. As-cashon tapimisi ichapafo funafafainscana Diospan tsaincoinma nicapaiyaifo cuscan ato yosinonfo. <sup>4</sup> Ascashocai Diospan tsain cununi cuscan afanan nicapaishcanima. Shunipafo cuscara fusti nicapaishcani. <sup>5</sup> Asca huafiaifono Diospan tsaincoin fustisi tanafain. Nan fustiri icoindra huahuun. Min omitsiscatianri tunuhuu. Diospan tsain yoimisiton ato yoisharamisi cuscacoainrifi cuscan nantifi ashosharahuun ahuun yonomati shara ishquin.

<sup>6</sup> Ascano natian uhuunoa un mia yoinon. Uncai afanan chai nipatiroma. Ratoran shafata Jesushuunoashu un naicain. Un samamashta mai anoashu Jesús ari cai. <sup>7</sup> Ascacun nantishotapiquin un Jesús tanasharapaimisi. Ua amapaiyai cuscacai unumisima. Natian ua yonomapaiyai cuscan nantifi mun icoindra. Un nantishotapiquin Jesús icoindra huamisi. <sup>8</sup> Nocon Ifo shara Jesús ua inansharapaiyai cuscan ua mu-cushona. Ascashon afin nocohuunoa tapicoian. Ascan noco inanshquiai cuscan iconcoin. Nan oaitian afu rafumisifo isharamisifo noco inansharashquin. Ua fusti inanshquiai. Tsoan Jesús noicoinquín fasi oinpaifain manasharamisifo atorifi inansharashquin.

### *Pablonun ahuunoa tsain futsa Timoteo yoini*

<sup>9-10</sup> Tsain futsari un mia yoi. Demas natian mafo yafi ahuara futsafo yorafo aya cuscan noicoinquín ua potafaini Tesalónica ano man caa. Crescente arifi Galacia ano man caa. Tito arifi Dalmacia ano man caa. Ascacun uqui oriscahuu ufu iishquin. <sup>11-12</sup> Natian Lucas fusti ufu icai. Min uqui oaitian ua Marcosri ihuushohuun. Un Tíquico Efeso ano nichitan. Ascan min oquin ua Marcos ihuushohuun u futan nocon Ifo yonosharashonon. <sup>13</sup> Un Troas ano uhuun tsahuuti ashcapari chichia Carpo pushu muran un huayoni. Nanrifi oquin ua fushohuun. Uhuun librofori un yopai. Ascafia nanfo finonmafain uhuun documentofo un yopacoin. Ua nanfo fushohuun.

<sup>14</sup> Asca Alejandro nan ahuun cuno yonomisiton ua fasi chaca huaa cuscan Diosin nan onaintimashqui. <sup>15</sup> Non nocon Ifo Jesushuunoa yoimisi cuscan nanto fasi nicacas-mamisi. Ascacun mirifi oinfain miarifi chaca huapaitiro.

<sup>16</sup> Ascan ua tau huaquin niaifoano iyonifo tsoancai uhuunoa yoisharanima. Nantifi ratucaquin ua potafaini focaquin. Ascacun Upa Diosin ato onaintimayamapainon. <sup>17</sup> Asca huafiaifoanno nocon Ifo ufú ica. Ahuun curush ua inan un fasi chai ahuun tsain shara uhuun caifoma un yoiaiton cayacaficoi nicasharanonfo. Ascashon nocon Ifoan ua numani masharofo muran ua potanonfoma. <sup>18</sup> Nanscarifi aquin ua chaca huafiaifoan nocon Ifoan nantishotapiquin ua cushusharashquin. Ascashon ahuun unutaqui a icano ua iyoshquin ahuun yorafo fu un isharapacunon. Non ahuunoa yoisharapacunon. Nanscari inon.

*Pablonun ahuun unutaqui ato tsain shara fomani*

<sup>19</sup> Ascano Priscila yafi Aquila ua yoisharashohuun. Onesíforo yafi ahuun aforananri ua yoisharashohuun. <sup>20</sup> Nan Erasto Corinto ano nituni. Trófimo isinin icaino un Mileto ano nitun huani. <sup>21</sup> Oi pacuataima uqui ohuu. Ascano Eubulo non Pudente non Lino non Claudia nanfo futan nantifi Jesús icoinra huafoan mia yoisharafo.

<sup>22</sup> Nocon Ifo mifu icain. Mia shara huashofafainon mihuun ramapainon. Nanti.

Pablo

## Pablonun Tito Cunu Fomani

### *Pablonun Tito yoisharani*

<sup>1-2</sup> Unquian Pablo un mia cunu fomai min tapinon. Unfin Jesucriston ahuun yonomati yafi afu rafumisiquin. Ascashon ua nichini nan Diosin catoanfo un ato tapimanaino Ifo Jesús icoinra huanonfo. Nocon Upa Diosicai chanitiroma. Nantofi ahuara oni huataima yoiyoniquin isca huaquin, —Tsoan uhuun tsain iconcoin uhuun facu Jesushuunoa icoinra huaiton unfu ipatiroran, —ishon yoiyoni.

<sup>3</sup> Ascan afin yoipaiyaitian nan tsain shara Furunhuunoa ato tapimana. Ascano nocon Numamisi Diosin ua catonshon ua yononi un Jesucristohuunoa futsafo yoinon. <sup>4</sup> Tito, un mia nocon Ifo Jesucristo icoinra huamani cuscan min Jesús icoinra huashu min uhuun facu cuscaracoin. Un Jesús icoinra huaa cuscan mirifi min nansca huani. Ascacun nocon Upa Diosin futan nocon Numamisi Jesucristo mihuun ramapaicain mia nomuran unimamanon.

### *Titopan Creta mai ano yononi cuscan*

<sup>5</sup> Un mia Creta mai tomahuan ano nichifaini non ato yonoshoni cuscan min anaitinon. Ascacun un mia yoini isca huaquin, —Nan pushurasifotí cushumisifo catonhuun ichananfo cushusharanonfo, —ishon un mia yoini. <sup>6</sup> Cushumisi iscarafó catonhuun. Nan nocofunu ishara fusticoinmisi cushumisi itiro. Ahuunoa ahuara chaca yoiaifocai cushumisi itiroma. Ahuin fusti ya icain ahuun facufoanri nocon Ifo Jesús icoinra huafó. Ascan tsoancai atohuunoa yoiquin isca huatiroma, —Cushumisiton ahuun facufoan fasi chaca huamisiforá, —ishocai yoitirofoma. Ascanocai ahuun facufo yoitimamisifori itirofoma.

<sup>7</sup> Ascano nan cushumisiton Diosin yonoshona. Ascashon nan Dios fu tsainti pushu murannoafó ahuun yorafo cushushara. Ascacufín nantifain ahuunoa yoisharafo atón cushumisi inón. Ascashu cacapaimisi iyamacain ointi rochitímani iyamacain paumisi iyamacain sutumitsapaimisi iyamacain futsafo parashon ato pui fianmisiricai itiroma.

<sup>8</sup> Ascacumarócon iscará cushumisi itiro. Yora shara huashopaimisi icain ahuara sharafo fustisi noifain ahuara ahuuscarafaino shinanchacatama shinanshara fustimisi icain isharashu Jesús cuscara Diospan tsain shara fusti tanafain. Ascano ahuara amaquríifo futan chacafoan ahuun nomuran shinanchacamapaiyai cuscan atamarocoñan nan Diosin amapaiyai cuscan fustisi amisi. Nanscarafó cushumisi shara itiro. <sup>9</sup> Ascacun Diospan tsain non icoinra huatiro nan iconcoin. Non Diospan tsain yoiaiton fasi icoinra huafafainmisi nan cuscara cushumisi shara itiro. Ascashon arifi futsaforí nan tsain sharahuunshon atón ointi unimamatiro. Ascafia futsafoanri Diospan tsain nicacasmaifoan atorifi nan tsain sharahuunshon cushumisiton ato oinmatiro amaqurí shinainfo cuscan.

<sup>10</sup> Ascashon yora ichapafoan Diospan tsain nicacasmafain nan Dios fu tsainti pushu murannoafó cushumisifori ato nicacasmacani. Ascashon tsain mutsama ipaitsi yoiafo. Nan Moisés yononi cuscan tanamisifo atirififo nanscarafó. <sup>11</sup> Pui fusti fipaicaquin futsafo fasi amaqurí chacacoin tapimacani. Ascacun atohuunshon ahuun yorafoyashon Jesús cachiquiri huafo. Ascacun atón tsain shatumahuu afanan futsafo amaqurí yosinonma.

<sup>12</sup> Nocofunun arifi Creta ano ica, —Nanto inonpacoai yoimisiran, —ishon ahuunoa ahuun yorafo yoimisifo. Ascacun nanton yoiquin isca huaa, —Uhuun yorafo Cretafofín chanimisifoquin. Yoina pofu cuscarafo. Piqui fustisi tapiafo. Pitsishunifo icain shanishuniforá, —ishon yoini. <sup>13</sup> Nan yoini cuscan icon. Ascacun ato cayacafi yoisharahuu afanan chaca huatamarocoñan Jesús icoinra huacashon tanasharanonfo.

<sup>14</sup> Ascataan afanan uhuun caifo Israelfioan aton shunipafo cuscara tanayamafain nan Diosin tsain iconcoin nicacasmamisifoan futsaforifi yonomisifo cuscan nicanonfoma.

<sup>15</sup> Ascan ratoran futsa Jesús aton chaca soashona ahuun nomuran shinanshara fustiquin. Nantifi Diosin onihua cuscan shinantiro isca huaquin, —Nantifi ahuarao sharacoinran, —ishon shinantiro. Ascafia nan icoindra huamafoan aton nomuranshon shinanchacamisifo. Ascashon nantifihuunoa shinanchacamisifo. Aton nomuranshon chacacoin fusti shinanfo. Ascashocai afanan shinansharatirofoma. Tapiadoma ratomain shara iyamarai chacaquin. Ascashon chaca fustisi shinantirofo. <sup>16</sup> —Nonfin Dios tapicoianquin, —ishon yoifiamisifo man acai cuscahuunshon non tapitiro nancoancaí Diosihuunoa tapicoinmisifoma. Ascashon fasi chacacoin fustisi shinancani. Ascaquicai ahua shara huatirofoma.

## 2

### *Pablonun Tito cayacafi shara yosini arifi futsafo yosisharanon*

<sup>1</sup> Ascano Diospan tsain futsafo yosisharahuu isharanonfo. <sup>2</sup> Ascashon nocofunu iyoafifo yosihuú isca huaquin. Ahuara ahuuscarafaino shinanchacatama shinanshara fustifain isharafo cuscan futsafoan atohuunoa yoisharatirofo icain ascashon cayacaficoín Diospan tsain tapicoinshon icoindra huacoinnafo icain futsafuhun noicoinfain ascataan ahuara chaca finoin omitsiscifiashon tunucoinonfo. Nannori nocofunu iyoafifo yosihuú.

<sup>3</sup> Nanscarifiaiyainfo iyoafofori ato yosihuú isca huaquin. Ainfo iyoafifo Jesús tanacoianshu isharanonfo. Ascashucai futsafuhunoari chani yoifoanfafainmisi iyamacain paumisi iyamacain. Ascatamarocon ahuara shara fustisi futsafo tapimashquin. <sup>4</sup> Ascashon shomayafori yositiro aton funufo yafi aton facufori noisharanonfo. <sup>5</sup> Ascataancaí ahuara ahuuscarafaino shinanchacatama shinanshara fustifain ahuara chacafo shinantama aton nomuranshon shara fustisi shinansharatiro icain aton pushu ano yonoshara fustifain futsafo tsain shara fustisi yoiquin ahuun nomuran shinansharamatiro icain funun aton yoiai cuscan nicasharatirofo. Ascan nan ainfo iyoafifoan yoiquin isca huaifoannocai atohuunshon tsoan Diosin tsainhuunoari tsain chaca huatiroma.

<sup>6</sup> Ascatari pushcofori tapimasharahuu ahuara ahuuscarafaino shinanchacatama shinanshara fustinonfo. <sup>7</sup> Tito mirifi ato ismasharahuun nantifi min acai cuscan shara fustisi huahuu. Min ascaíno minhuun caononfo. Min ato yosiaitian cayacaficoín shara ato yosihuú arifi isharanonfo. Ato yosiyanan cashuyamahuu. Cashutama ato yoicoinhuun. <sup>8</sup> Ato cayacaficoín yosihuú isharacoinnonfo. Ascano min ato yoia cuscacai tsoancaí min tsain chacacoinran huatiroma. Ascatama mia nicacasmashu rafitirofo. Ascashocai tsoan nocohuunoa ahua chaca yoitirofoma.

<sup>9</sup> Ascan yonomatifo yosihuú aton ifofoan ato yonoai cuscan nantifi nicasharanonfo. Ascashon ato unimamafain ato tafiyamafain. <sup>10</sup> Ahuun ifo ahua onuntama nansca huaquin ato ifofo oinmatirofoascaifoan ato icoindra huacointiro. Yonomatifo ascaifoan futsafoan yoitirofo isca huaquin, —¡Oincapón! Nan yonomatifo isharacoinmisi. Nanfoan Jesús ifoacoinnafo. Ascan aton Numamisi Diospan tsain sharacoin. Ascacun norifi ahuun tsain non nicanon, —ishon yonomatihuunshon Diospan tsainhuunoa shinansharatirofo.

<sup>11</sup> Ascan Upa Diosin nantifi tapimana atohuun ramapaiqui Furunhuunshon yorafoan aton chaca soashotiro afu ipashquin. <sup>12</sup> Ascano nan tsain non icoindra huaiton nocorifi tapimai non afanan Diosimaisi inonma. Ascashocai non chaca huapaoni cuscan non afanan atiroma. Ahuaraton noco shinanchacamapaiyai cuscacai non afohuunoa shinantiroma. Ascatama ahuara ahuuscarafaino non isharatiro. Natian Upa Diosin noco amapaiyai cuscan fusti non atiro.

<sup>13</sup> Non nanscara Diospan tsain tanasharashon man non tapia nocon Diosin ahuamamishti huamisi nan nocon Numamisi Jesucristo chipo nocoqui oi. Nan oaitian nantifiton oinshquicani nocon Ifon ahuu cuscara sharamainquin nantifi finoncoian. Ascacun non fasi oinpaiquin non manasharai. <sup>14</sup> Nanto noco nashoni non afanan chaca huamisi iyamacain non yoitimamisi inonma. Afanan ahuara chaca nocon ifo itamarocon nan noco imasharacoia cuscan ahun yorafo non inon. Ascashu norifi a cuscara fasi shara huapaimisi non itiro.

<sup>15</sup> Nanfohuunoa futsafo yosihu. Nocon Ifoan mia yonoa cuscan ranotama min ato cayacaficoi shara yositiro. Ascashon min aton nomuran unimamafain ahuara chaca huaifoan min ato yonotiro afananasca huanonfoma. Futsan mia yoiquin min ahuamaran mia huafaiton ato nicayamahuu.

### 3

#### *Nan icoinra huafoan atirofo cuscan*

<sup>1</sup> Ascano nantifi icoinra huafo ato yoihuhu niaifofo nicasharafain yoitimamisifo inonfoma. Ascashon atorifi yoihuhu itisharacashon ahuarafo sharafo huafafainmisirifi inonfo. <sup>2</sup> Ascashon ato tapimahuun futsahuunoa tsain chaca huanonfoma. Ascatan fochishmanantananyamacain futsafohuunoa shinansharafain nantifi yorafo ahun nomuranfo yora shara huafafainmisi iishquin.

<sup>3</sup> Norifi nocon nomuranshon non amaquiri chaca shinanpaoni. Ascashu non yoitimacoin icain chaca futsa futsatapafo non huapaiyai cuscan huafafain nocon nomuranshon non shinanchaca cuscan nannoricoinri non huapaoni. Nanfo nocon ifo ipaoni. Ascatarifi non iscara ipaoni. Non futsafohuunoa shinanchacafafainmisi icain futsafo aya cuscan fianpaitiashu non aqui shinanchacamisi icain non futsafo noicasmafainnofiranri non noicasmatanampaoni. Non nanscara chacafo huapaoni.

<sup>4-5</sup> Non asca huafiaipaonishaqui Upa Diosin nocon Numamisi nocohuun ramapaicain nocohuun noiquin noco numani. Ascashon noco chaca soashoni non afanan chaca ipaoni cuscan inonma. Non ahuara shara huaa rafananci noco numanima. Afifin nocohuun ramapaiquin nocon chaca soashoniquin. Noco ointi chocatsa cuscara non funa sharacoin inon. Ahuun Yoshin Sharahuunshon noco ointi oni ocomafain nocon nomuran onihua funa.

<sup>6</sup> Upa Diosin ahuun Yoshin Shara nocoqui nichini noco iquinon. Nocon Numamisi Jesucristohuunoashu nantifi yorafo fu rafucacaini. <sup>7</sup> Ascano Diosin nocohuun ramapaiquin yoini isca huaquin, —Uhuun facu mia nashoni. Min chaca mia soashoshquin. Ascacufin natiancái mihiun ahua nuamaran, —ishon yoini. Ascacun norifi non ahuun facufo icaino non afu ipatiroquin.

<sup>8</sup> Nan un mia yoiai cuscan non icoinra huatiro. Ascan nanfo ato yoifafainhuun. Ascacun un mia yosia cuscan icoinra huaa futsafoan futsaforifi shara huashofafainon. Tsoan asca huaifin fasi shara huacoinquin. Ascano aton ointi unimamaquin isharnonfo. <sup>9</sup> Futsafo tsain mutsama yoitiacanashu fochishmanantanamisifo. Ascatan aton shunifohuunoashuri fochishmanantanafain Moisés yononi cuscahuunoashuri fochishmamantanamisifo. Ascacanashu ipaitsi yoinancani. Tsoan anori futsa yoiqui shinansharamatiroma. Afo fu iyamahuu.

<sup>10</sup> Ascan futsan ahuun tsainhuunshon icoinra huafo pashcanan huamaiton nan ichananmisifo aton cushumisifoan yoitiro afanan ascanonma. Asca man yoifia afanan ahuun tsainhuunshon ato pashcanan huaiton yoicahuun afananasca huanonma. Man man yoiqui rafu huafia nicayamafain ato pashcanan huaiton nanscarafo fu afanan iyamahuu. <sup>11</sup> Nanscara yoran ahuun nomuranshon amaquiri shinanchacamisi. Ascashon afiri man tapia a chaca huai cuscan.

*Pablonun ahuun tsain unutaqui yoini*

<sup>12</sup> Uhuun tsain unutaqui un mia yoinon. Un miqui Artemas iyamarai Tíquico nichitian uqui Nicópolis ano oriscahuu. Un nanno oipacutian iishquin. <sup>13</sup> Ascan Zenas nan abogado yafi Apolos nan min acai cuscan ato ashosharahuun yopaifo cuscan ato inanhuan ahua yopatama fosharatanonfo. <sup>14</sup> Noco yorafo nan icoira huafo yoihuun shara huafafainonfo. Ascacanashu futsafo yopaifo cuscan ato inansharatirofo. Ascayamaquicai futsafo shara huashotirofoma isharashcaquin.

*Ahuun unutaqui ato yoisharani*

<sup>15</sup> Nantifi ufu icaifoan mia yoisharacani. Nantifi uhuun yorafo nan icoira huafo mia ari icafo nanfo ua yoisharashohuun. Nocon Ifoan mato nantifi ramapainon. Nanti.

Pablo

## Pablonun Filemón Cunu Fomani

### *Pablonun Filemón cunu fomani*

<sup>1-2</sup> Uquian Pablo un mia cunu fomai. Uhuun yorahuan Filemón un fasi mia shinancoin. Man min tapia un Jesucristohuunoa yoifafaini. Ascacun ua cunu muran iquimanifo. Nocon yora Timoteo ufu ica. Arifi mia tsain fomapai. Ascan minfin no futan Jesucristo yonoshomisiquin. Nan Jesús icoira huao min pushu muran ichananmisifo ua atori yoishohuun. Nocon shafo Apia yafi Arquipori nan Arquipo arifi noco futan Jesucristohuunoa yonoshomisi nan rafuri non ato tsain fomai. <sup>3</sup> Diosin matohuun ramapaiquin. Maton ointi unimamanon. Upa Diosin futan Furumun nocon Ifo Jesucristo mato asca huashonon.

### *Filemón Jesús icoira huashu nantifi atohuun noini*

<sup>4-5</sup> Un nica min nocon Ifo Jesús icoira huacoinfain min ahuun noicoin. Nantifi ahuun yorafori min atohuun noicoainton un nicaquin un cufiaitlan Dios un yoimisi isca huaquin, —¡Aicho! Upa Diosin, Filemón mia tanasharacoianran, —ishon un mihiunnoa cufimisi. <sup>6</sup> Ascashon un mia cufishomisiri min Jesús icoira huaa cuscan mirifi min futsafo tapimanaiton arifi icoira huanonfo. Min asca huaquifin finonmafain Cristohuunoa non aya cuscan min tapitiroquin. Nannori un mia cufishona. <sup>7</sup> Uhuun yorashtan min ua noiai cuscan un unimacai unrifi mua uhuun nomuran un fasi unimacinni. Ascashon min Diospan yorafori shara huafafaini mihiunshon arifi ato nomuran unimanonfo. ¡Aicho!

### *Pablonun Onesimohuunoa Filemón yocani*

<sup>8</sup> Min Cristohuunoashu uhuun yorahua. Ascacufin ahuunshon un mia yoipaiyai cuscan ranotama un mia yonotiro. <sup>9</sup> Ascafiaquicai un mia yonomapaima. Un fasi minihuun noicoinquin mia yonotamarocon un mia yocai. Ufin Pabloqui natian un anifo. Un Cristohuunoa yoimisicun ua cunu muran iquimanifo. <sup>10</sup> Ascacun un mia Onesimohuunoa yocai. Nanrifi uhuun facucoin cuscaraquin. Un nuno cunu muranshon un Onésimo Jesús icoira huamani. Ascashon natian Jesushuunoashu un ahuun upa cuscara.

<sup>11</sup> Ascashon nantocai mia yonoshosharapaonima. Ascafia natian mia yafi ua shara huatiroquin. <sup>12-13</sup> Un Onésimo nitun huanpai ufu inon. Un fasi ahuun noi. Ascashon nichiqui un fasi shinanshquin. Ascan mincái ufu itiroma nan tsain shara Jesushuunoa futsafo yoishquin. Un nuno cunu muranshon un shinan Onésimo mihiun rafanan ufu itiro u futan yonosharashquin. <sup>14</sup> Ascafia un mia yocayoataimacai un ahuara huapaima. Ascashon min ahuara ua shara huashoain cuscacai un mia curushcain yonotiroma mianmain min apaiyai cuscan fusti min acaitonfin. <sup>15</sup> Itsairaca Onésimo mimaqui pashcayoni. Ascashu afanan chipo mifu ipashquin. <sup>16</sup> Un mia yoia cuscan un fasi ahuun noi. Ascano min finacoinquin ahuun noitiro. Ascafia natiancái min yonomati fustisi ishquima. Nanto arifi man Cristo icoira huaa. Ascacun natian min ahuun yoracoin cuscara.

<sup>17</sup> Ascashon min shinan un mifu Jesushuunoashu rafumisi. Ascacun Onésimo miqui nococun min ua shara huacuana nanrifi nanscarifi huaquin shara huahuu. <sup>18</sup> Mia chaca huacun iyamarai mia nificun ua tapimahuu un mia inanon. <sup>19</sup> Ascan natian uficoín un mia cunushoni. Unquian Pablo Onésimo mia nifian cuscan un mia inanshquin. Ascafia man min tapia un mia Jesús icoira huamani uhuunoashu min Jesús fu nípanon. Ascashu min nifian shinantsa aquin. <sup>20</sup> Uhuun yorashtan un mia yoca cuscan ua

ashopun. Min Onésimo shara huaa cuscan urifi uhuun nomuran un unimashquin. Jesushuunshon nanscacoин ua huashopun.

<sup>21</sup> Man min tapia un mia yoca cuscan huafain mian ashoshquin. Paratama min ua ashoshquin. Ascan mia cunushquiain mun tapia min ashquiain cuscan. <sup>22</sup> Tsain futsari un mia cunushoni min tapinon. Min ua Upa Dios cufishomisi afanan un miqui nocoshquinon. Ascacun min pushu ano ua cunu futsa itishara huashohuun. Ascan mian cufishona cuscan Diosin nica. Ascashon miqui ua nichishquin. Ascapainon.

*Pablonun ahuun tsain unutaquin ato yoisharani*

<sup>23</sup> U fu rafumisi nuno cunu muran nan Epafras mia yoisharai. Nanto arifi Jesucristo-huunoa yoiaiton cunu muran iquimanifo. <sup>24</sup> Ascano Marcos non Aristarco non Demas non Lucas nanfoan u futan Jesús yonoshomisifo. Ascashon nanfoan mia tsain shara fomapai.

<sup>25</sup> Nocon Ifo Jesucristo mia cashman shara huashofafainon. Nanti.

Pablo

## Jesushuunoa Futsan Hebreofo Cunushoni

### *Diosin Furunhuunoashu no fu tsainni*

<sup>1</sup> Uhuun yoramishtichin un mato cunu fomai man tapinon. Upa Diosin noco shunifo yoipaiyai cuscan ahuun tsain yoishomisifo yoiyopaoni ato tapimanonfo. Namapahuunshon ato yoifain namapan cuscarahuunshon ato yoifain ahuun nai oinmatihuunshon ato yoifain ahuun oicoinin ato yoipaoni. <sup>2</sup> Asca huapaonifiashu natian noco yoipaiyai cuscan Furunhuunshon noco yoia. Furunhuunshon nantifi nai murannoaf yafi mai anoafori onihuani. Furun catonni nantifi nai murannoaf yafi mai anoafoti ahuuna inon.

<sup>3</sup> Nanton Apa Diosin cuscaracoin. Noco ismacoin ahuu cuscaramain Apa Diosiquin. Apa shara imisi cuscan arifi nanscaracoin. Furunmun ahuun tsainmansi ahua-mamishti huatiroquin. Ascan ahuun curushhuunshon ahuun tsainmansi onihuafoti yonotiro afín apaiyai cuscan anonfo. Ahuun tsainmansi nantifi onihuafoti cushusharafafainmisi. Nanfin nocohuunoashu nani nocon chaca noco soashoshquin non a cuscara shara inon. Ascashu Apa ari cani a futan nantifi iquifafainshquin.

### *Upan Diosin Furumun ahuun oinmati afu nai muran icafo finoncoian*

<sup>4</sup> Afin Apa Dios ahuun Furuncuinquin. Oinmati afu nai muran icafocai Upa Diosin furuncuinfoma. Furun Apa Dios fu niaifocoin. Oinmatifocai ascarafoma. Ascan ato finoncoian. <sup>5</sup> Upa Diosin ahuun oinmati afu nai muran icafocai yoiqui,

“Man uhuun facunatoncoinforan,”  
ato huamisima. Furun fusti yoiqui isca huani,

“Unfin min upaqin. Minfin uhuun facucoinquin,”  
ishon Furun yoini. Ahuun oinmati afu nai muran icafohuunoacai anori yoimisima.

<sup>6</sup> Ascashon Furun mai ano nichini yoracoin inon ahuun oinmati nan afu nai muran icafo yoini isca huaquin,

“Nantifi uhuun oinmati ufu nai muran icafoan, uhuun facu Jesús noicoinc-  
ahuun. ‘Min uhuun Iforan,’ yoicahuun,”  
ishon anori ato yoini. <sup>7</sup> Ascatan ahuun oinmati afu nai muran icafohuunoa yoiquin isca huani,

“Fuu foanriscatiro. Nanscarifai uhuun oinmati ufu nai muran icafo un ato  
yoiai cuscan ua ashoriscatirofo. Nanfori chi urumanhuan cuscarafo. Un ato  
yonoa cuscan yorafo onaintimariscatiroran,”  
ishon Upa Diosin yoini. <sup>8</sup> Ascashon Furu yoiquin isca huani,

“Minfin uhuunfin cacoinnaquin. Mirifin min Diosiquin. Min yorafo iquipa-  
cunaca. Min ato niaifocoin icainocai min unupacunacama. Min ato iconcoin  
yonosharapacunaca. Min icanori shara fusti ipanaca. <sup>9</sup> Ascashon minfin  
ahuara shara fustisi noicoinquen. Ahuara chaca min noicasmai. Ascacufin  
Diosin, nanrifi min Diosin, nanton mia catonni. Mia unimama cuscacai tsoa  
futsan ascara mumisima. Mirus fustiton min nantifi finoncoian. Min ato  
Niaifocoinran,”

ishon un mia yoini. Uncai mifu rafuafo anori yoimisima. <sup>10</sup> Afanan Upa Diosin Furun yoini,

“Minfin uhuunfin cacoinnaquin. Mirifi min nantifain ato Ifo. Ahuashta  
oniataima nan maitio yafi nai murannoafoti min onihuauquin tau huani.  
<sup>11</sup> Sahuuti chocanashuai afanan shara itiroma cuyotiro. Nanscarifai nantifi  
maitio yafi nai murannoafori cuyoshcani. Ascafia mincái ascarama. Min-  
fin ipanacaquin. <sup>12</sup> Sahuuti chocanacun potatirofo futsa funa fiishcaquin.

Nanscarifiai maitio yafi nantifi nai murannoafanan shara focuma min ato cuyomatiro, afanan mai yafi nai fiananan huashquin afanan funa shara inonfo. Ascan mincái mai yafi nai cuscarama. Mincái fianananpacunacama. Nanscasi min apanacaran,”

ishon Upán Diosin Furún yoini. <sup>13</sup> Afanan Upán Diosin Furún yoiquin isca huani, “Min ufu niaifoaitiancai nan mia noicasmafoan afanan mia ahuusca huatirofoma. Minfin nantifi ato iquiniran,”

ishon yoini. Asca anoricai ahuun oinmati afu nai muran icafo yoimisima. Ascashon Furún fusti catonni nantifiton aton Ifo inon. <sup>14</sup> Ascáno Upá Diosin nan ahuun oinmati afu nai muran icafo yononi noco cushusharanonfo. Ratoranfoan Jesús ifoancanashu afu ipatirofo. Diosin yononi nanfo ahuun oinmati afu nai muran icafoan ato cushusharanonfo.

## 2

*Jesús nocohuunoashu nanishaquin noco imapacunaca. Nanhuunoa shinanfafaicahuun cachiquiri huashcaquima*

<sup>1</sup> Ascacun nan tsain icocoin shara Diospan Furunhuunoa non nicamisi cuscan noco nomuran non nanucoinfafainon cachiquiri huashquima. <sup>2</sup> ¡Shinancapon! Diosin nocon shunifo oinmatifo afu nai muran icafohuunshon ato tapimani. Ascafia ato yoini cuscan tsoan nicayamaiton Diosin ato onaintimacoínni. <sup>3</sup> Diospan nai oinmatifoan ato yoini cuscan nicacasmaifoan ato onaintimani. Nanscarifi huaquin Furún nan nocon Ifo Jesús noco yoini cuscan non nicayamacaiyaiton mimacai huaquin noco onaintimashqui. Ascan nantorifi yoini nocohuunoashu chipo nashquiai. Ascashon noco chaca soashonano non afu ipanon. Ascáno yoiatón nicacashon afu rafumisifoan nannori noco tapimani. <sup>4</sup> Ascátarí nanfohuunshon Upá Diosin futsafo ato ismani nanfoan yoinifo cuscan icocoíncun. Ascashon tsoan oinyomisifoma cuscara isinincái futsa futsatapafo ahuun curushhuunshon ato caya huapacuni. Ahuun Yoshin Sharapanrifi nanfo ato tapimani yonoshononfo. Ascashon afín ato catonpacuni ahuun yono futsa futsa huaquin yonoshononfo. Ratoranfo catonpái afín ato catonníquín ahuun yono anonfo.

*Jesucristo arifi Diosifiashu noco cuscara yoracoin ica*

<sup>5</sup> Non mato yoimisi Upá Diosin nantifi oni huanitiacai ahuun oinmatifo afu nai muran icafo yoinima isca huaquin,—Manfin nantifi mai anoafaoan ato ifo ishquiran,—ishoncái ato yoinima. <sup>6</sup> Ascacun David yoini isca huaquin,

“Upá Diosin, minfin nantifi yorafo onihuaniquin. Ascan noncái ahuama. ¿Ascacun ahuuscái min nocohuun noifain min noco shinanguin min noco cushusharamun? <sup>7-8</sup> Ascashon min yononi cuscacoin min oinmati mifu nai muran icafoan noco finonyoni nan min Furún afanan nocouqui nocoitian. Ascacun min yorafo onihuasharani mia cusrarari inonfo. Ascashon nan min onihuaniotifain ato ifo non iishquin.”

Min anori yonofianicai atirifi yorafoan aton ifo icataima. <sup>9</sup> Ascan Jesús arifi noco cuscara iyopaoni. Nantian Diospan oinmati afu nai muran icafoan Jesusri finonyopaonifo. Nocohuunoashu omitsiscacain noco nashoni. Upá Diosin nocohuun ramapaiyaino Furún Jesús nantifi manifotihuunoashu nani. Ascáno noncái afanan napanacama. Upá Diosin nantifi yorafo yononi ahuunoa

<sup>10</sup> Upá Diosin nantifi onihuani ahuunoashu nantifi ica. Ascashon yorafori onihuani ahuun facufo icain afu ipanonfo. Ascacun Furún Jesús nichini nocohuunoashu omitsiscano non afu ipanon. Furún fusti nocohuunoashu omitsiscatiro noco chaca soashoshquin. Nan iconcoin Upá Diosin yononi Furunmun noco omitsiscashoano noco Ifo sharacoin inon. Ascashon Apa Dios icari noco iyoano non afu ipanon. <sup>11</sup> Jesuscái

ahua chaca huamisima. Ascashon nocori chaca soashona non a cuscara shara inon. Ascashon rafitama nocohuunoari yoiquin isca huai,—Nanfo uhuun yoraforan,—ishon yoitiro. Ascatan Jesús ahuun Apa Dios nanrifi noco Upa. <sup>12</sup> Nan icoindra huafihuunoa Jesús Apa Dios yoiquin isca huani,

“Upa Diosin, mihuunoa uhuun yorafo un yoisharashquin. Un atofu mihu-  
unoashu fanainshquinran,”

ishon yoini. <sup>13</sup> Ascashon yoiquiri isca huani,

“Uhuun Upa Dios un icoindra huairan,”

ishon yoini. Afananri yoiquin isca huani,

“Shinancapon Upa Diosin ua icoindra huafu ua inan uhuun facufo inonfo,”

ishon Jesús yoini.

<sup>14</sup> Ascano facufo namiyacain imiya. Nanscarifiai Jesús arifi noco cuscara yoracoin cainni. Yoracoin cainnishaquin noco naashoni afanan Satanás noco ifo iyamacain noco namapacunonma. Nocohuunoashu Jesús naitian Satanás ahuun curush shatuni afanan noco ahuusca huanonma. <sup>15</sup> Ascano nocohuunoashu nataima yorafo napaicani ratucoinfafainpaonifo. Ascafia nocohuunoashu naitian noco numani. Ascano non nashquiahuunoa shinaincai non afanan ratuima. Ascatacái ratu afanan noco ifo itiroma. <sup>16</sup> Ascano man non tapia Jesuscái ahuun oinmati afu nai muran icafo ashoyoi onima. Ascatamarocon Abraham ahuun funafo nan icoindra huafoti ato ashoyoi oni.

<sup>17</sup> Ascacufin Jesús noco cuscara yoracoin ini. Nan non mumisi cuscan arifi muuy-  
opaoni. Ascacun nocohuun ramapaitiro. Nan Apa Diosin yonoa cuscacoin amisi noco numashqui. Nocohuunoashu nani noco chaca soashoshquin. Ascacun nocohuunoa Apa Dios yoitiro isca huaquin, —Upan, un ato nashoni aton chaca soashoshquin. Ascan nan ua icoindra huafu aton chaca soashofain ato rauhuahuu, —ishon Apa yoitiro. Ascashu nocohuunshon Dios cufimisi niaifocoin itiro. <sup>18</sup> Nanscarifi aquin Satanás chaca huamapaipaoni. Ascan Jesús omitsiscafiaquicai chaca huamisima. Ascacun nocorifi Satanás chaca huamapaiyaitian Jesús nocohuun ramapaitiro. Non muumisi cuscan arifi muuyopaoni. Ascashon noco numatiro non chaca huanonma.

### 3

#### *Jesusfin Moisés finoncoianquin*

<sup>1</sup> Ascacufin uhuun yoramishtichin matorifi Upa Diosin catonni ahuun yora sharofo icain man afu ipanon. Upa Diosin Furu Jesús nichini no fu ishon ahuun tsain shara noco tapimanon. Ascatan nocon numamisi icain nocohuunshon Apa Dios cufimisicoin. Ascacun maton nomuran Jesushuunoa shinanfafaicahuun. <sup>2</sup> Upa Diosin Israelifo tapimapaiyai cuscan tau huaquin Moisés yoiyon. Ascacun arifi Moisés ahuun caifofo nan yoiyon cuscan ato tapimani. Ascashu nan Upa Diosin yononi cuscacoin Moisés apaoni. Nanscarifi aquin Upa Diosin Jesús catonni ahuunoa ahuun yorafo tapimanon. Ascashu nan Apa Diosin yononi cuscacoin arifi Jesús acoinmisi.

<sup>3</sup> Pushu sharahuunoa yoisharatirofofia nan pushu huamisihuunoa finacoinquin yoisharatiro. Nanscarifiai Moiséshuunoa yoisharatirofofia nan Jesushuunoacaifin fina-  
coinquin yoisharatirofoquin. <sup>4</sup> Pushufo ratoran futsan afin oni huatirofia Upa Diosifin nantifi onihuaniquin. <sup>5</sup> Ascan Moisésfin Upa Diospan oinmatiquin. Upa Diosin ahuun yora nan Israelifo ato yonopaiyai cuscan iquisi Moisés yoiyon. Ascacun arifi nantifi ato yoinon. Inon pacuai ato yoipaiyai cuscan Moisés tapimayoni ahuun caifori ato yoinon.

<sup>6</sup> Ascafia Jesuscái Upa Diospan oinmatima. Ascataama nancairocofin Furuncuin-  
quin. Ascashu ahuun yorafoan ato Ifocoin. Nan Apa yononi cuscan ahuun yorafo cushusharacoinmisi. Ascacun Upa Diosin tapipai nonmain Jesús icoindra huashon noco yoiyotiani cuscan non ratutama manasharaicai nan Jesús afanan oaitian. Ascashu non nanscacoiahuun non ahuun facufo ipatiroquin.

*Diospan yorafoan ahuunoashu aton ointi unimatiro afanan fucashuni inonma*

7-8 Ascan Diosin Yoshin sharapan yoiquin isca huani,

“Upa Diosin mato yoiai cuscan nicasharacahuun. Tsoan istaipama mato shunifo icaftian un atohuunoa tapipaoni uamain nicasharafain ua nicacas-macaniquin. Ascashon nanfoan ua nicacasmaphaonifo. Ascacun ato cuscara iyamacahuun. Maton ointi mutoyamacahuun. Ascatamarocon Jesús mato yoiai cuscan fusti nicasharafafaincahuun.”

9 “Maton shunifo tsoan istaipamanoashu icaino yoitimafiaifoan funaquima uhuun yono un ato ismapaoni. Tsoan oinyomisima cuscara shara cuarenta fari un ato ahuamamishti ismasharapaoni.”

10 “Un ato ahuara ismafiaitocai ua tsoan nicapaonima. Uarocon nicacasmaphaonifo. Ascaifoan oinquin un mato shunifoqui sinapaoniquin. Nantianri un yoini isca huaquin, ‘Nanfoan aton nomuran amaqiri shinanchacamisifo. Ua tanatama. Un ato shinanmapaiyai cuscacai tsoan tapipaonima.’

11 Ascano atoqui sinaquin un yoini isca huaquin, ‘Nan na Israelifoan ua nicacasmacani. Un aton nomuran unimamapaiyai cuscacai un ato ashopacunacamaran,’”

ishon Upa Diosin noco shunifohuunoa yoiniquin.

12 Uhuun yoramishtichin oinfain. Nocon shunifo cuscara iyamacahuun. Maton nomuran man Jesús icoingra huayamashu man chacacoin itiro. Manascaicai nan Dios ipamisi fu man ipaima. Ascashon man cachiquiri huatiroquin. 13 Ascatamarocon shafatifi yoinonansharafain noco Ifohuunoa shinanmatanansharafafaincahuun. Ahuara chacafoan noco paratirofo. Ascafia non shinanmasharatana innocai nocon ointi non mutotiroma. 14 Non tau huaquin Jesús icoingra huacoinni cuscan non nansasi unuyamashu non afu ipatiroquin. 15 Ascano un rama mato cunushona cuscan afan mato yoi,

“Upa Diosin mato yoiai cuscan fusti nicasharafafaincahuun. Maton shunifo Upa Dios nicacasmacani aton ointi mutopaonifo. Ascacun ato cuscara iyamacahuun. Maton ointi mutoyamacahuun. Ascashu yoitimashuni iishcaquima,”

ishon Diospan tsain cununi.

16 ¿Ascan tsoafoanmun Dios nicacasmafain ahuun tsain cachiquiri huapaonifoquin? Nantifi nocon shunifo Moisés ato Egipto mai anoashon yoni. Nanfoanfin Dios nicacasmaphaonifoquin. 17 ¿Tsoafoquimun Upa Diosin cuarenta fari sinaniquin? Ascano nanfoanfin Dios nicacasmafain chaca huapaonifoquin. Ascaifoan Upa Diosin tsoa istaipamashon nantifi ato namapacuni. 18 Tsoacon Diosin yoinimun isca huaquin,—Un mato nomuran unimamapaiyai cuscacai un afananasca huapanacamaran,—ishon yoini. Nan nicayosma shunifo ato yoini. 19 Ascan Upa Diosicai tsoan icoingra huanima. Ascashu Diosin ato iyopai anocai tsoa iquinifoma yora futsafoqui musucani.

## 4

1 Ascano Upa Diosin ato yoini cuscan norifi non icoingra huashu non afu rafucun nocon nomuran unimamatiro. Ascacun oinfain. Marifi Diospan tsain man icoingra huayamashu mato imasharapaiyai cuscan man funotiro. 2 Upa Diosin nocon shunifo tsain shara yoiquin isca huani,—Un mato numai. Mato fu mai shara ano ishquin un mato iyoicai. Nannoashu man ufu rafuaitocai afanan tsoa futsan mato ahuuasca huatiroma. Nannoashu man isharacoinon,—ishon ato yoini. Ato yoiai cuscan nicafiashocai icoingra huanifoma. Nancashofin ipaitsicoin nicanifoquin. 3 Ascafia non Jesús icoingra huacun Upa Diosin nocon ointi imasharatiro afu rafucain non isharanon. Ascan nocon shunifocai ascanifoma. Ascacun Upa Diosin ato yoini isca huaquin,

“Na Israelifoancai ua icoinra huacanima. Ascaifoanno un atoqui sinaquicai mai shara futsa ano ato imapacunacama anoashu isharanonfo,”  
ishon ato yoini. Nannori yoifianishaquin Upa Diosin nantifi onihuaquin anaitishon tununi. Nanscarifiai nantian yafi natianrifi ahuun yorafo imasharapai afu isharanonfo.  
<sup>4</sup> Afanan Diospan tsain cununi isca huaquin,

“Siete oshatan Diosin yononi nantifi onihuaquin anaitishon tununiran,”  
ishon cununi. <sup>5</sup> Ascano Upa Diosin nocon shunifo fu rafupaini ato mai shara futsa ano imapaiquin anoashu isharanonfo. Ascafia Diospan tsain afanan cununi isca huaquin,

“Un ato imapai aricai un afanan ato imapacunacama anoashu isharanonfo,”  
ishon Upa Diosin yoini. <sup>6</sup> Ascano nannori yoifiani futsafoan chipo icoinra huaoan Upa Diosin ato iquimatiro afu rafucain aton nomuran unimacain isharanonfo. Ascan nocon shunifoan icoinra huayamashucai iquinifoma. <sup>7</sup> Ascano Upa Diosinhunshon afanan David yoini isca huaquin,

“Natian Diosin tsain man nicafiai maton ointi mutoyamacahuun. Ascashu yoitimari iyamacahuun,”  
ishon David yoini. <sup>8</sup> Ascashon Josué ahuun caifofo aton mai ano iyoni nannoashu isharanonfo. Ascafia nan maicoinhuunoacai Diosin chipo noco yoima. Nan Israeli maihuunoa yoiquiricai isca huacanima, —Natian man ua nicasharaquicai afanan man shinanchacaima. Ascatamarocon maton nomuran unimacain ufu man rafuacaiashquinran, —ishoncái yoi cuanima.

<sup>9</sup> Ascacufin natiali Upa Diosin ahuun yorafo aton nomuran unimamapai isharanonfo. <sup>10</sup> Upa Diosin nantifi onihuaquin anaitishon unimayanan tununi. Nanscarifiai non Upa Dios fu rafuicai non iyopaoni cuscan non afanan ascapaitiroma. Non ipaoni cuscan nantifi non shututiro. Ascashu non Dios fu rafuaiton nocon nomuran unimamanon. <sup>11</sup> Ascacufin non Dios nicasharashu a cuscara isharacain nocon nomuran unimai cuscan non muunon. Ascan nocon shunifo yoitimashuni. Diosin ato mai shara iquimapiafiaquicai icoinra huayamaifoan ato iquimanima. Ascan noncái ato cuscara ipaima Diosin noco imapaiyai cuscan non funoshquinma.

<sup>12</sup> Upa Diosin nípanaca. Nanscarifiai ahuun tsaincái unupacunacama mutsisipacoin. Ahuun tsainhuunoashu non isharatiro. Nopu cunocoinnin ahuara cashcushon amuran non oincointiro. Nopu cunocoinfia Diospan tsain mimacaya fasi cunocoin cuscara. Ahuun tsainhuunshon non imisi cuscan yafi non shinanmisi cuscan nantifi noco puashotiro. Ascashon nocon nomuran onancoian. Non shara iyamarai non chaca shinanmisi cuscan ahuun tsainhuunshon noco puashotiro. <sup>13</sup> Nantifi onihuani Upa Diosin onancoian. Tsoancai otayamafain tsoanricai fomantiroma. Nantifi non amisi cuscan huafain non shinanmisi cuscamaín Diosin onancoiaiton. Ascan chipo ahuun ointaifi non aquí nocooaitian nantifi non amisi cuscan huafain non shinanmisi cuscan noco puashopacushquin.

*Futsafoan nocon Upa Dios cufishotirofo. Ascafia Jesuscaifin ato finoncoianquin. Nantorifi noco Apa Dios cufishomisi*

<sup>14</sup> Ascacufin Jesús Diospan Furun nocohuunshon cufimisi nai muran cani. Nantofin nantifi Upa Dios cufimisifo ato finoncoianquin. Ascashon non yoimisi isca huaquin, —Jesús noco Iforan, —ishon non yoimisi cuscacai non cachiquiri huapanacama. <sup>15</sup> Nantifi finoncoian nocohuunshon Dios cufimisi Jesusfin non muai cuscan arifi muyopaoni. Ascan ahuaraton noco shinanchacapaiyai cuscan arifi nansca huayopaoni. Ascacun nocohuun ramapaitiro. Satanás nan yoshin chacapan noco chaca huamapaityai cuscan nanrifi chaca huamapaifiaitocai anima. Jesuscái ahua chaca huamisima. Nantifi non mutiro cuscan arifi muyopaoni. Non omitsiscamisi cuscan arifi muyopaoni. Ascacun nocohuun ramapaitiro.

<sup>16</sup> Ascacufin Diosiqui ranoquima non yoipaiyai cuscan non yoinon. Non yoiaiton Jesushuunshon Upa Diosin nocohuun ramapaicain noco ashoshquin.

## 5

<sup>1</sup> Israelifoan aton caifo futsa catonnifo Upa Diosin ato yoipaiyai cuscan ahuunshon ato tapimanon. Ascacun nanfoanrifi Upa Diosin yoipaiyaifo cuscan nan nocofunuuhunshon yoinonfo. Nanrifi ato cuscara nocofunu ini. Ascashon nan catonnifo atohuunshon Diosin yoimisi niaifocoin inon. Nanrifi Diosin yoishomisi futsafoan aton niaifo inon. Moisés ato yononi cuscan Israelifoan Dios fu tsanti pushu muranshon inafo inapacunifo. Ascashon nan Diosin yoishomisi niaifoan nan inafo ato rutushonaino ahuun imi foaiton oinquin Diosin aton chaca soashoni. <sup>2</sup> Nan Israelifoan yorafohuunshon Dios fu cufimisi niaifoan atoasca huashoaitian atohuunri ramapaitiro. Ascafia arifi ato cuscara nocofunu. Ahuun caifofoan amaqiri shinanquin Dios tanasharamisifoma cuscan arifi nansca huamisi. Ascafashon chaca huamisifo cuscan nicai arifi atohuun ramapaitiro. <sup>3</sup> Ascashon inafo ato rutushotiro Upa Diosin aton chaca soashonon. Arifi chaca huamisi. Ascafashon arifi ahuun ina rutuni Upa Diosin ahuun chaca soashonon.

<sup>4</sup> Tsoacai afiri catonmutiroma ahuun caifofoan ato Dios yoishomisi niaifo iishquin. Ascano Upa Diosin Aarón catonni cuscan atorifi catontiro. <sup>5</sup> Nanscarifiai Cristocai afiri catonmunima yorafohuunshon Dios cufimisi niaifocoin iishquin. Ascatama Apa Diosin catonquin isca huani,

“Min uhuun facucoin natian un mia catoan nantifiton aton Ifo min inon,”  
ishon Apa Diosin yoini. <sup>6</sup> Ascashon afanan yoiquin isca huani,

“Minfin nan niaifo Melquisedec cuscaraquin. Nantofin yorafohuunshon ua  
yoimisi ipaoni. Ascan mirifi min nanscasi apanacaran,”  
ishon Apa Diosin furun Jesús yoini. <sup>7</sup> Jesús mai ano iyoashu omitsiscapaoni. Ascashu  
nocohuunoashu naitian oi ashcafnin uaiyanan Apa Dios cufinquin isca huani, —  
Upashtan, mian numapaiquin mian numatiro un nanonma. Ascafia un apaiyai cuscan  
huaima nan mian amapaiyai cuscan fusti ua huahuun, —ishon Apa Dios yoini. As-  
cashon nan Apa amapaiyai cuscan fustisi shinanquin cufiai cuscan nicacoinni.

<sup>8</sup> Ascashu Diospan facucoinflashu omitsiscani. Omitsiscafiaquin Apa nicacoinni. As-  
cashori arifi muyopaoni ahuara ahusscarafaino Apa nicacoinpaoni. <sup>9</sup> Nocohuunoashu  
omitsiscafiaquin Apa Diosin yoiai cuscan nicacoinni. Ascashon yorafo ismani ahua  
chaca huamisima. Ascashu ishara fustimisi. Ascashu nocon Numamisi sharacoin itiro.  
A nicasharaifoti Upa Dios fu ipatiroquin. <sup>10</sup> Ascano Upa Diosin Furun Jesús catonshon  
yoiquin isca huani, —Minfin nan Melquisedec cuscara iquicai. Ascashon yorafohuunoa  
ua cufimisi niaifocoin min ipatiro ato numashqui. Ascashon nantifi yorafohuunoa ua  
yoimisifo min ato finoncoianran, —ishon Apa Diosin yoini.

*¡Oinfain! Man Jesús cachiquiri huaa fasi musucoin itiro*

<sup>11</sup> Ascan nan rama un mato yoia cuscan nanfohuunoa un mato paratama shafa-  
cafi tapimapainaocai man nicasharamisima. Ascashon man funa tapisharamisima.  
<sup>12-13</sup> Ascan mancái na rama Diospan tsain nicama. Man man fari ranan nicafiami-  
sishaquicai man tapi sharataima. Man tau huaquin Jesucristohuunoa tapini cuscan  
man man ointiaquimamisi. Ascaquicai man futsafo tapimatiroma. Ascatama man-  
cairocofin futsafo yopaiquin man tau huaquin Jesushuunoa tapini cuscan afanan mato  
tapimanonfo. Ascashufin man facufo cuscaraquin. Facushta shoma fusti ayotiro.  
Shoma fusti acaiton non tapitiro yosiataima. Tushucoincai piyotiroma. Nanscarifiai  
mancái atirifi Diospan tsain tapisharatama. <sup>14</sup> Ascan tsoan Diospan tsain shafatifi  
oinfafainni cununi cuscan aashquin. Nanton tapitiro ahuara shara afainmain ahuara  
chaca aquimaquin. Nan cuscarafoan fasi paratama Diospan tsain tapi sharatirofo.

## 6

<sup>1-2</sup> Ascan noncái facufo cuscarama. Facufoancai ichapa tapiama. Ascan iyoafofoa paratama tapisharafo. Nanscarifiai non tau huaquin Jesucristohuunoa tapini cuscan nan fusticai non shinafafainima. Ascasho non tapini non ahuara shara huahuunshoncái nocó chaca soashotiro Upa Dios fu non ipanon. Non tapiniri Dios icoinra huayamashucai non afu ipatiroma.

Ascatan non unu muran iquimamua nocon chaca soashonano non Jesús ifoashon futsafo ismatirohuunoa tapifain nan icoinra huafu futsafo non ato manmanshon cu-fishotiro Diosin ato yonomapaiyai cuscan anonfo nanrifi tapifain yora naashu funitiro-huunoari tapifain icoinra huafoma Diosin ato omitsiscapanacafo muran potashquiai nanfohuunoa man non tapiyoní. Ascan afanan noncái tapimamisi yopaima nanfohuunoa nocó tapimanon. Ascano afanan ascatamanoficairocon non paratama Diospan tsain shara tapinon Jesús tanasharashquin. <sup>3</sup> Ascan natian Upa Diosin ahuara futsafo nocó tapimapaiyai cuscan ahuun tsainhuunoa non nicasharanon nanscacoain aashquin.

<sup>4-6</sup> Tsoan Diospan tsain shara Jesucristohuunoa tapiyoní Furun Jesús aquí nichini ahuun ifo icaino ahuun nomuran mumisi. Ascashori Diospan Yoshin Shara fu rafucain ahuun tsain shara nocó cunushoni iconcoin oinquin ahuun nomuran muumisi. Ascatan Jesús oaitian ahuun curushhuunshon ahuamamishti tsoan oinyomisima cuscara man aashquiai man ahuun nomuran muumisi. Ascan nantifi ahuara sharafo ahuun nomuran mufiamisishaquin Jesús cachiquiri huacoinshon nocon Ifo Jesús afanan masta cafisca huai. Ascashon futsafoan Jesushuunoa shinanchacatirofo. Ascaran yorafoancai afanan shinan futsatiroma aton chaca shatushon Jesús ifoashquin.

<sup>7</sup> Shinancapon. Diosin oi fumariaino oian mau fupuatiro yonofo foai sharanon. Ascano mau yonomisifo unimatirofo yono foaisharano pisharashcaquin. Ascacufin na mau Diosin shara huaquin. Nanscarifiai tsoan Diosin tsain nicafafaini isharatiro futsaforifi shara huashoshquin. <sup>8</sup> Ascafia mau futsan ifoan fanayamaino yono foaitamarocon totoshmoshafosi foaitiro. Nanscara mau chaca foaitiro. Ascashon afanan tsoan fipaiquima coatiro coonon. Nanscarifiai tsoan Diosin tsain nicafafafiai yoia cuscan atama ahuun tsain cachiquiri huacoincun nanscarafo Diosin omitsiscapanacafo muran potashquin.

*Non tapitiro non Jesús icoinra huashucai non funotiroma*

<sup>9</sup> Uhuun yoramishtichin, un mato na rama cunushona cuscacai un anori matohuunoa shinainma. Ascan mancái ascarama. Un icoinra huai mancái nocon Numamisi Jesús cachiquiri huamisima. A tanasharashon nan mato yoia cuscacoin man amisi. <sup>10</sup> Upa Diosin icon fustisi. Amaquiri ahuashta shinantiroma. Ascashon mato shinanfafaini. Man ahuun noiquin ahuun yorafo man shara huashomisi. Ascaquin man Dios ismai man noiai cuscan. Ascashori man unutama ato shara huafafainmisi. Man ato shara huua cuscan Upa Diosin mato oiainnocai ointi aquimapacunacama.

<sup>11</sup> Man yorafohuun noiai cuscan unupacuyamacahuun. Ato shara huafafaincahuun tushcuicaquima. Nan Jesús oai chain natianri Dios yonosharashocoinfafaincahuun. Manascafin nan man manamisi cuscan Upa Diosin mato inanshquin. Ascashu man Jesús cuscara shara iiishquin. <sup>12</sup> Ascacun tushcuicaquima nan Diospan yora futsafoan Jesús icoinra huacoincashon ato yoiyotiani cuscan manasharamisishacaquin man ahuun Yoshin Shara fiafo aton nomuran unimamanon. Ascan marifi atohuun caocahuun Jesús tanasharacoinshcaquin.

<sup>13-14</sup> Nocon shuni Abrahamrifi nanscaracoin ipaoni. Ascashon Upa Diosin yoiyoní isca huaquin, —Unfi Diosicoinquín. Tsoancai ua finontiroma. Urusu fustifin un iconmisicoinquín. Uncái chanitiroma. Ascacun un mia shara huaquin ahuara yoipaiyai cuscan mian icoinra huatiro. Ascashon min funafo ichaparasi un mia ato

cainmashoshquin. Ascan mincai ato tanan huatiromaran, —ishon Diosin Abraham yoiyoni. <sup>15</sup> Ascaiton nicaquin Abraham funaquima mana sharapaoni. Nan yoiyotiani cuscan furun Isaac ahua cainni.

<sup>16</sup> Ascacufin non tapitiro Diosin nan yoiai cuscacoin huamisi. Ascan futsan noco ahuara yoiquin icoinra huemapaiyai cuscan nan futsan finoncoiaiton nannoricoirifi noco yoiaihuunshon non icoinra huatiro. Ascan tsoancai, —Anorimaran, —ishon fochishmatiroma. <sup>17</sup> Ascacun Diosin noco tapimapai ahuun tsain iconcoin fusti noco yoiquin isca huatiro, —Un mato yoiyotiani cuscan ashofin man ua icoinra huatiroquin, —ishon Diosin yoini. Ascacun non tapitiro noco yoiyotiani cuscan nannoricoincun. Ahuun tsain fiananantiroma. Ascashon yoiyotiani cuscan afanan yoiquin isca huani, —Unfin Diosicoinquin. Tsoancai ua finontiroma. Ascacun un mato yoiai cuscan man ua icoinra huatiroran, —ishon yoini icoinra huanonfo. <sup>18</sup> Diosin nocon icoinra huemapaiquin nannoricoin noco yoiyoni. Ascacun non tapitiro nan shinain cuscan Diosin nannoricoin noco yoiaiton. Man non tapia Diosincai chanitiroma. Noco yoiyoni Furun nocoqui nichishquin noco numanon. Ascacun non icoinra huatiro nan yoiyotiani cuscan Furunmun noco humano non afu ipanon.

<sup>19</sup> Ascashu fianananyamacain afananricai shinan futsatiroma. Ahuara ahusscarafiquicai noco Jesusmaqui imatiroma. Ahuunoashu fusti non nai muran Upa Dios fu ipatiroquin. <sup>20</sup> Jesús taui Apa Dios ari cani. Nannoshon nocohuunoa apa cufishofafaini noco numanon. Ascan Jesusfin nan Melquisedec cuscara noco Dios cufishomisi niaifo ipanacaquin.

## 7

### *Nan Dios yorafohuunshon cufimisi ahuun anu Melquisedec*

<sup>1</sup> Ascatarifi natian un Melquisedechuunoa mato yoinon. Nanfin Salem pushurasi anoafaoan aton niaifo iniquin. Nanrifi nantifi yorafohuunshon Dios cufimisi futsafo finoncoian ini. Nanfin Abrahamqui noconiquin. Nan mucu fustiti niaifofo yomutso chacafu ato ichoshon ahuun piaca mafofo yafi futsafoan maforifi afanan ato fishotani Abraham oaino nan Melquisedec Abrahamqui fai pochinin noconi ahuun pushu ano naso curani oaino. Ascashon isca huaquin yoisharani, —Abraham, Diosin mia shara huairan, —ishon yoini. <sup>2</sup> Nannori yoiaiton Abraham ahuun mafo yafi ahuun tushuforifi atirifi Melquisedec inancoinni. Tsain futsa *la décima parte* inancoinni. Nan Melquisedec ahuun anu futsafin iconcoin yoifain isharacoinmisiran huanifo. Nan Salem pushurasi murannoa aton niaifocoin ipaoni. Ascano nan Salem onicoinnin tsainmanfin aton nomuran unima sharairan huanifo. Nan Melquisedec ahuun anu futsari nomuran unima sharai niaiforan huanifo. <sup>3</sup> Naanfin uhuaomacain upaomari iniquin. Ahuun shunifohuunoacai tsoan tapiyopaonima. Tsoancai cainnitian yafi naitian tapipaonifoma. Aafin Diospan Furun cuscara Dios yorafohuunshon cufimisi ipanaca.

<sup>4</sup> Uhuun yoramishtichin shinancapon. Nan Melquisedec niaifocoin. Tsoa cuscarama ipaoni. Ascan nan Abrahamfin Israelifoan aton shuni iqui tauniquin. Nocofunu fasi sharacoin. Ascashon Melquisedec ahuun caifoyamaflacun ahuun mafofo yafi ahuun tushu la décima parte inancoinni. Ascacun non tapitiro Melquisedec Abraham finoncoian. <sup>5</sup> Israeli shoco futsafo Leví ahuun funafo. Nanfotin Upa Diosin catonniquin ahuun yorafohuunoa ato cufishomisi inonfo. Nan Levifoansi aton caifohuunshon Dios cufifafainmisi ipaonifo. Ascafia Dioshuunshon Moisés Israelifo yononi cuscan nantifi ato tushufo non ato ahuarafori futsa futsa huaquin nan Leví ahuun funafo la décima parte inanpacunifo. <sup>6</sup> Ascano Diosin Abraham yoiyoni ahuun funafo chipo ichapacoin ishquiain. Ascafia Melquisedec Levipan ahuun funayamafiacun Abraham nantifi ahuun ahuara futsa futsa huaquin Melquisedec la décima parte inancoinni. Ascacun

Melquisedec Abraham yoini isca huaquin, —Abraham, mia Diosin shara huairan, —ishon yoini.

<sup>7</sup> Icon nantifain man non tapicoian tsoan futsafo finoncoinshon ahuun tsainman ato shara huatiro. Ascacun non tapitiro Melquisedec Abraham finoncoian. <sup>8</sup> Ascacun ahuun caifo Israeli shoco futsafoan. Nan Leví ahuun funafo ahuarafu futsa futsa huaquin la décima parte ato inanfianifo nanfo man naamisifo. Ascano arifi Melquisedec Abrahamna futsa futsa huaquin la décima parte fiini. Ascacun Diospan tsain cununi cuscan Melquisedec natian nia. <sup>9-10</sup> Levipan ahuun funafoan aton shuni Abraham. Ascashon Abraham Melquisedec ahuarafu inaintian nantianrifi Levifoan arifi inain cafisca huanifoquin. Nan Abraham Melquisedec inaintiancái ahuun funa Leví caiantai inima. Chipo Abraham ahuun funa Leví cainni. Ascacun non tapitiro Melquisedec fustiton aton shuni Abraham yafi atorifi finoncoian.

<sup>11</sup> Uhuun yoramishtichin shinancapon. Upan Diosinhuunshon Moisés noco yononi cuscan yafi Leví funafoan nocohuunshon Dios cufimisifoan noco numatiroanocai Diosin Furun nichicuanima nocohuunshon Apa Dios cufimisi inon. Cristocai Aarón nan Leví ahuun funa cuscarama. Aafin Melquisedec cuscaraquin. <sup>12-14</sup> Taui Leví ahuun funa Aarón. Nan Aarónfin yorafohuunshon Diosin cufimisi futsafoan aton niaifo ipaoniquin. Ascan nocon Ifo Jesuscái Leví ahuun funama shoco futsa. Ascashucai Aarón cuscarama. Nocon Ifo Jesusfin Judápan ahuun funaquin. Nan Levipan ahuun chipocu Judá. Ascano Judápan yorafoanri yorafohuunshon Diosin cufimisifo itiroforan ishoncái Moisés yoimisima. Ascacun non tapitiro Upa Diosin Furun nichini afanan ahuun yorafo yoi futsanon. Ascatarifi Moisés yononi cuscan fiananan huashquin. Ascashon yononi Judápan ahuun funa Jesús nocon cufishomisi niaifo inon.

<sup>15</sup> Ascacun afanan un mato cayacafi yoisharapai. Natian shafacafi man non tapishara Diosin ahuara futsa yononi cuscan nocon Dios cufishomisi funa Melquisedec cuscara nocoqui noconi. <sup>16</sup> Moisés yononi cuscacoin Leví ahuun funafo fustifin Dios cufimisifo itirofoquin. Ascafia Jesuscái Moisés yononi cuscahuunoashu noco Dios cufishomisi icama. Aafin Diospan curushhuunoashu nipanacaquin. Ascashu noco Dios cufishomisi ica. <sup>17</sup> Nannori David Diospan tsain Jesucristohuunoa cunuquin isca huani,

“Min Melquisedec cuscara yorafohuunshon Dios cufimisi ipanacaran,”  
ishon cununi. <sup>18-19</sup> Ascacun non tapitiro Moisés yononi cuscacai non afanan tanaima. Nanfoancai noco ahuusca huatiroma noco imasharanon non Dios cuscara ishraphquin. Nanfohuunshoncái nocon chaca soashomisima non Dios fu ipanon. Ascan Jesuscái ascarama. Aafin fasi shara finacoian. Upa Diosin nocoqui nichini ahuunshon non tapinon non afu ipatiro.

<sup>20-21</sup> Ascari Upa Diosin Furun yoini cuscacai Levipan ahuun funafo anori yoimisima. Ascacun Furun Jesús yoiquin isca huani,

“Unfi nantifiton aton ifocoinquín. Un mia yonoai cuscan min nantifi yorafo atohuunshon ua cufimisi ipashquin. Ascashon un mia yoia cuscacai un afanan shinan futsapacunacamaran,”

ishon Furun yoini. <sup>22</sup> Ascan Apa nannori yoinicun non tapitiro Jesushuunoashu non Upa Dios fu ipatiro. Ascano Leví ahuun funafocai ascarafoma. Nanfohuunoashucai non Diospan yora itiroma. Ascan Upa Diosin Moiséshuunshon Levipan ahuun funafo yononi cuscan sharafiašhu nan furun Jesús yononi cuscan fasi shara finacoianquin.

<sup>23</sup> Nanfo ichapaofia aton caifohuunshon Dios cufimisifocai ipatirofoma. Nan futsa naitian futsarifi catontirofo arifi aton yorafohuunshon Upa Dios cufimisi inonfo. <sup>24</sup> Ascafia Jesuscái ato cuscarama. Aafin nipanacaquin. Nanrifi noco Upa Dios cufishomisi unupacuyamacain nanscasi apanaca. <sup>25</sup> Ascan non ahuunoashu Apa Dios fu ipapaiyaiton nocohuunshon Apa Dios yoifafaini isca huaquin, —Upa Diosin, un ato nashoni aton chaca soashohuun. Ascashon mi ano ato imahuu, —ishon nocohuunoa

Apa yoishquin. Ascatac nocohuunoa Apa yoia cuscan nanscaco coin noco huashoshquin non afu ipanon. Ascaicai non funopacunacama.

<sup>26</sup> Ascan nan Jesusfin nocohuunoa Dios yoimisiquin. Yoimisi futsafo finoncoian. Aafin Diosin cuscara sharacoinquin. Tsoancai ahuunoa ahuashta chaca yoitiroma. Aatocai ahua chaca shinanyamafain yora chacafo cuscarama. Ascashon Apa Dios icanoafori finoncoian. Ascashon non yopai cuscarifi noco ashotoiro. <sup>27</sup> Yorafihuunshon Dios cufimisi niaifo futsafoflashucu ascarafoma. Nanfoan shafatifi inafo rutupaonifo Upa Dios ismaquin ato chaca soashonon. Ascashon Upa Diosin aton chaca soashonano futsafihuunoari nanfoan inafo rutushopaonifo Upa Diosin atori chaca soashonon. Ascafia Jesuscái ato cuscarama. Ato fasi finoncoian. Atocai ina rututiroma aton chaca soashonon. Ascatamarocon nancaifin nantifi yorafihuunoashu nashoniquin nocon chaca soashoshquin. Ascano nancaí afanahua futsa yopaima noco chaca soashoshquin. Ascashon nan fustiton nocon chaca soashonano non Upa Dios fu ipatiroquin.

<sup>28</sup> Ascan Upa Diosihuunshon Moisés yononi cuscan yorafihuunoa Upa Dios cufimisifo non aton niaifofori catonnifo. Ascan nanfotin noco cuscarafoquin. Ascashon nanfoanri chaca huamisifo. Shara ipaifiacaquin samamashta chaca huapaonifo. Ascacun Diosin ahuun tsain yoiyoni cuscan Furun Jesús chipo catonni nocohuunshon Dios cufishomisi ipanon. Aatocai ahua chaca huamisima. Aafin shara fusti imisiquin.

## 8

*Upa Diosin ahuun tsain futsancái anori noco tapimaiyopaonima cuscan natian noco tapimani Jesús fustihuunoashu non afu ipatiro*

<sup>1-2</sup> Ascan nan Jesusfin Apa Dios niaifocoin icari afu icaquin. Ascashon non yopai cuscan nocohuunoa Apa yoipacushquin. Aafin noco yoishomisi niaifocoinquin. Nan icaricai tsoa futsan onihuanima. Dios fustiton nanri onihuani. Nanriashu nocohuunoa Apa fu tsaincacaini. Nan ica ari Dios fu tsainti pushu cuscacoin. Ascano un mato cunushona cuscan nanfo man shafacafi tapi.

<sup>3</sup> Nan nocon yorafihuunshon Dios cufimisi niaifocoin nantifi ato catonnifo ahuaraflo Dios inanfain ina rutucashon aton chaca shoashonon. Ascano nocohuunshon Dios cufimisi nan Jesús arifi ahuara futsan inanniquin. <sup>4</sup> Moisés yononi cuscan Leví ahuun funafosi Israelifo aton Dios cufimisi itirofo. Nanfoanfin inafo rututirofo aton chaca soashonon. Ascano Jesuscái Levípan funama. Ascashu Jesús nuno mai ano icashucái nocohuunshon Apa Dios cufimisi icuanama. <sup>5</sup> Ascano nuno mai anoshon nan Leví funafoan Dios fu tsainti pano pushu muranshon yonoshopaonifo. Nannoshon ahuun caifo Israelifo tapimapacaquin Dios icarimain ahuu cuscaraquin. Ascafia ascaracoin tsoan tapiyonima. Ascacun Upa Diosin Moisés yononi isca huaquin, —Un mia tapimanai cuscan nanscaco coin ufu tsainti pano pushu huahuun. Man min shinainmun un mia machi anoshon tapima cuscan nanscaco coin rifi ufu tsainti pano pushu huahuun. Ascacun yonomisifo tapimahuun nan un mia yoia cuscacoin huanonfo, —ishon Upa Diosin Moisés yononi.

<sup>6</sup> Ascafia Diosin Furun Jesús yononi cuscan nan Moisés yononi cuscan finoncoian. Ascacun Jesús Apa icarishon nocohuunoa Apa cufifafaini nocon chaca soashonano non afu ipanon. Ascan Levípan funafoanai asca huapaonifoma. Upa Diospan Furun Jesús yoiyotiani cuscacai ato yoimisima. Ascano atorifi yoiyotiani cuscan sharafishu nan Furun yoiyotiani cuscacaifin fasi shara finacaiaquin.

<sup>7</sup> Upa Diosin Moisés yoiyotiani cuscahuunoashu non isharacain ahuara futsa non yopayamatirocuai nan Jesushuunoa ahuara futsa fasi shara finacaia noco yoicuanima.

<sup>8</sup> Ascafia Upa Diosin yoini Moiséshunshon ato yoifianicai tsoa ascacoinmisima. Ascashucai isharayamacain yoitimacoin imisifo. Ascacun nocon Ifo Diosin yoini isca huaquin,

“Un chipo Israelifo nan Judápan ahuun funafori tsain funa shara futsa un ato yoishquin. Nan un ato sharacoin ashaoi cuscan un ato tapimashquin. <sup>9</sup> Un ato shunifo Egipto anoshon iyoni. Nantianri un ato yoisharani uhuun tsain nicasharaifoan un ato cushusharafafainon. Un atoasca huafiaino uhuun tsain cachiquiri huanifo. Ascaifoan un ato potayoni. Ascacun ato shunifo un yoini cuscacai un ato funafo anori yoishquima. Ascatamarocon uhuun tsain shara futsa un ato yoishquin ua nicasharanonfo.”

<sup>10</sup> “Un Israelifo yoishquiai cuscacai cunu fustihuunshon un ato tapimashquima. Ascatama aton nomuran uhuun tsain shara nanumafain aton nomuran cunui cafisca huaano. Nan un ato yonoai cuscacoin anonfo. Ascano un ato Upa Diosincoin iishquin. Nanfo uhuun yorafo iishcani.

<sup>11</sup> Nantififain ua onancoinshcani. Yora ahuuamafoan ua onainfoanno niaifofoanri nansca huaquin ua onancoinshcani. Ascashon tsoa futsacai uhuunoa aton yora futsafo tapimashquicanima. Aafimain nantifiton ua onancoinyainfoan.”

<sup>12</sup> “Un atohuun ramapaishquin. Chaca huafiainfoan un ato chaca soashofain un ato rau huashquin. Ascashocai chaca huafo cuscan un afanan afo shinanpacunacamaran,”

ishon Diosin yoini. <sup>13</sup> Ascacun Diosin afanan ato yoini isca huaquin, —Un mato tsain funa shara yoiran, —ishon ato yoini. Ascan Moiséshunshon ato yononi cuscacai tsoa afanan yopatiroma. Nan Moiséshunshon ato yononi cuscan fasi tsain shunicoin. Tsoancai afanan afohuunoa yopaiyamaino nan tsain cuyocointiro. Ascashu nanfohuunoa shinanmaquipacunacafo.

## 9

### *Pano pushu cunu futsa ocu murancoin Jesús iquitamarocon Apa Dios icaricoi iquini*

<sup>1</sup> Upa Diosin Moisés tapimani ahuuscashomain ahuun yorafoan nan na mai anoshon pano pushu muranshon cufitirofoquin. <sup>2</sup> Ascan nan amuranshon Dios cufiti pano pushu cunu rafuya iniquin. Nan cunu taua muran anuqui isca huanifo, —Nuno shara fustisi itiroran, —ishon anunifo. Nan muranrifi faro nia ini. Cuno chashna faca facaitsa tushpacua ahuun shoimishti muran shuni ocapacushon otapaonifo. Nannori sapa acamaquishon piti ini. Nan sapa camaqui misi sutu huashon huafafainpaonifo. Ascashon Diosin atofu ica cuscan ato oinmashquin. <sup>3</sup> Pano cushtopan futsan fupoa cunu ocu murancoin anunifo isca huaquin, —Nuno fasi shara finacoianran, —ishon anunifo. Israelifohuunoa aton Dios cufishomisi niaifo fusti nan cunu futsa muran iquitiro ini.

<sup>4</sup> Nan Dios cufiti cunu muran nantio cuno chashna faca facaitsa sharaishtan puraishica ini. Ascashon nan cufiti camaqui ahuara coanifo ahuun coin tipoaino nohuu inin sharayacoin inon. Nan coin tipoaino Dios ismapaonifo a cufifafaincaquin. Nannori cashon uhuapa ini. Nan ihui casho cuno chashnanpan puraishacafa faca facaitsa sharacoin ini. Nan cashon muranri tutso chashna faca facaitsa muran misi torumishti anucaquin, —Mananran, —huapaonifo. Nan casho muranri Aarón ahuun poquiti yafi toquiri sapa rafu nanunifo. Nan poquiti casho muran nanuataifoma Upa Diosin charo shachoco onihuariscatani. Ascashon nan toquiri sapa rafuqui Upa Diosin Israelifo yonopaiyai cuscan ato cunushoni.

<sup>5</sup> Ascan nan casho camaqui Diospan nai oinmati ointsa rafu nimanifo. Ato putaon rafutan aton mapo manaon mutiquinanfo. Ascano nan nai oinmati rafuhuunshon Diosin fasi sharacoin ato cushusharamisi ato ismanon. Ascacun nanno anuquin isca

huanifo, —Nunoshon Diosin nocon chaca soashonaran, —ishon nan casho anunifo. Ascafia nanfohuunoacai un mato natian paratama yoiyotiroma.

<sup>6</sup> Ascashon nan amuranshon Dios cufiti pano pushu ocu murancoin iquisi itishara huacashon nan aton caifofohuunshon atohuunoa Dios cufimisifo cunu umainti cainifo nannoshon Upa Diosin ato yononi cuscan aashcaquin. <sup>7</sup> Ascano nan cunu futsa ocu murancoin ahuun yorafohuunshon ato Dios cufishomisifoan aton niaifocoin arus fusti nan faritifi iqui fustipaoni. Nanno iquicai moipan imimaisi iquipaonima. Ascano moipan ahuun imi foshon ahuara chaca huamisi cuscan ahuunoa afri yoimucain ahuun yorafohuunshori yoiaiton Upa Diosin aton chaca soashoni. Ahuara chaca huafiaquin tapishoma acafo cuscan nanfori soashonon.

<sup>8</sup> Ascacun nanfohuunshon Diosin ahuun Yoshin Sharapan noco shafacafi tapimani nan pano pushu ipaonitian ahuun caifohuunshon Dios cufimisi niaifon fusti cunu osa futsa ocu murancoin iquipaoni Dios fu tsainshquin. Ascano nan cunu ocu murancoin anunifo, —Nuno fasi shara finacoianran, —ishon. Nantiancai tsoan tapiatai inima chipo Jeshuunshon nantifi Diospan yorafo afu tsaintirofo. <sup>9</sup> Un na rama yoiai cuscarafohuunoa natianrifi noco nanscara tapimatiro. Ipaoni Moisés ato yononi cuscan Dios fu tsainti pano pushu muranshon ahuarao Dios inanfain moifori rutushopaonifo ato chaca shoashonon.

Ascafia afihuunshocai aton nomuran unimapaoonifoma. Nanfoancai aton nomuran shinanmapaoonima isca huaquin, —Natian Upa Diosin uhuunoa ahua chaca ointiroma. Un natian shara. Un natian Upa Dios fu itiro afu tsainshquin, —ishocai tsoan anori shinantiro ipaonima. <sup>10</sup> Ascan Moisés ato yononi cuscan ahuun caifofohuunshon Dios cufimisifoan ato nansca huashonifo. Ascashon ahuara futsafori ato tapimanifo. Ahua pifainmain ahuari ayatirofoquin. Ascatan ahuuscashurimain muchoquimutirofoquin Diosin ato nicacoinon. Ascafia nanfoancai aton chaca soashocointirofoma. Cristo oataima nannori Diosin ato yoiyoni. Nan Cristo naitian ahuunoashu man nantifi fianananshara. Ascanocai Moisés ato yononi cuscan afanan tsoashta yopatiroma.

<sup>11</sup> Upa Diosin ahuara sharacoin noco yoiyotiani isca huaquin, —Un maton chaca soashoni man ufu isharacoinon, —ishon yoini. Ascano nan Israelifohuunshon Dios cufimisi niaifofoancai noco nan yoiyotiani cuscan tsoan ascacoin huatiro ipaonima. Ascafia Cristo mai ano oaitian aficoин nocohuunshon Apa Dios cufimisi niaifocoin man ica. Ascashon nantifi ahuara sharacoin noco yoiyotiani cuscan noco ashoshquin. Ascan nan naashu pano pushu ocu murancoin iquitama. Cayacafi Apa Dios icaricoirocon iquini. Nannocai Diosin mai onihuani cuscarama. Nocofunufoan pano pushu onihuafianifo. Ascan Dios icaricaifin fasi shara finacoianquin. Ahuashtatocai ari finontiroma. <sup>12</sup> Ascan Cristocai chashoanfo futan moipan facufoan aton imi Apa Dios icari fonima. Ascatalamocon afincion noco nashoaintian ahuun imi foni. Ascanocai Upa Dios icari ahuashta chaca iquitiroma. Ascafia Cristo noco nashoin fustini nocon chaca soashoshquin non Apa Dios fu ipanon. Ascashucai afanan nanacama.

<sup>13</sup> Ascan ratoran futsa Diosin yoiyoni cuscan ayamashu ahuun yorafohuunshon Dios cufimisi niaifo yoitirofo ipaoni. Ascano nanfoan chashoanfo futan moipan ahuun imi fifain iquisi moipan facu coayopaonifo. Ascashon ahuun maapo yafi imi osishon yoraqui fasha fashapaonifo ahuun chaca soashonano Diospan yora shara icashu afu iishcaquin. <sup>14</sup> Nanfo iconfia fasi mimacaia Cristo noco nashonihuunshon chaca noco soashotiro. Ascashon atocai ahuashta chaca huapanacama. Ascan nan Diosin Yoshin Shara nipamisihuunshon Apa yoini isca huaquin, —Upa un atohuunoashu nai. Ascacun uhuunshon min aton chaca soashotiro min yorafo inonfo, —ishon Jesucriston Apa yoini. Ascan non chaca huamisi cuscan non unuyamashu omitsiscapanacafo muran non cacuana. Ascafia non afananasca huatamarocon Cristo noco nashonihuunshon non afanan chaca shinanonma. Ascashu nocon nomuran chocatsa shara cuscara itiro. Ascashon Upa Dios nipanaca non yonosharashotiro.

<sup>15</sup> Moisés ato yononi cuscan sharaflacucai tsoan nicafafainpaonima. Nantianri nantififain chaca huapaonifo. Ascano nanfoan chaca huapaonifo cuscan Cristo fustiton aton chaca soashotiro. Ascafoancai Moisés ato yononi cuscan afanan ato yonotrioma. Ascacun natian Cristo atohuunoashu nani ato chaca soashoshquin. Nanfin ato Numamisi sharaquin. Ascan Cristo icoinra huafoti Upa Diosin ato yoitiro isca huaquin,—Uqui fucahuun uhuun facuhuunoashu uhuun yorafo iishcaquin,—ishon yoitiro. Nanto noco yoiyotiani cuscan Furunhuunshon noco catontiro ahuun yorafo non inon.

<sup>16-17</sup> Natian ahuara futsa un mato tapimapai man tapinon. Nocofunun nataima cunutiro isca huaquin,—Un naanomain tsoan uhuun ahuarao fitiroquin un mato iquisi tapimaiyoiran,—ishon cunutiro. Ascacun ahuun ahuarao futsa inanpaiyai cuscan nataishoma iquisi nan yoiyomisi cuscan cunushotiro. Ascan nan nocofunu niyoanocai ahuun ahuarao tsoan fianyotiroma.

<sup>18</sup> Nanscarifiai Diosihuunshon Moisés ahuun caifo Israelifo yononi moi yafi chashoanfo rutuaifono ahuun imi fonon. Ascan aton imi foyamainocai ato yoiyoni cuscacoin Diosin ato ashotoroma. Ascacun nan moi yafi chashoanfo rutucashon Dios ismafain tapipaonifo chipo Cristo ato nashoshquiai cuscan. Cristo atohuunoashu nataimacai Diosin aton chaca soashocoiponima afu ipanonfo. <sup>19-20</sup> Upa Diosin Israelifo yonoai cuscan nantificoin Moisés ato tapimafain ato yononi. Ascashon nantifi ato tapimaqui anaitishon nii uhuapamashta futsan ahuun anu hisopo ahuun ponya uhuapamashta fini. Fishon moipan facun ahuun imi yafi unu osishon nan hisopo ponyamishti pishtanufain chashoanun rani amuran pocotan Diosin yononi cuscan ahuun papio cunuaqui imin fasha fashafain Israelifoquiri imin ato fashacuni. Ascashon ato yoini isca huaquin,—Nan imihuunshon man tapitiro Upa Diosin noco yoiyotiani cuscacoin ashu non afu ipatiro. Ascashu non ahuun yorafo itiroran,—ishon Moisés ahuun caifo yoini.

<sup>21</sup> Nanscarifi aqui Dios cufiti pano pushuqui Moisés moipan imi fasha fashafain nantifi amurannoafquiri imi fasha fashani. <sup>22</sup> Nan Upa Diosin Moisés yononi cuscacoin nantificuana ato imin fashacuni ato chaca soashonano isharanonfo. Ascan imi foyamainocai Diosin noco rau huacuanama nocon chaca soashoshquin.

### *Cristo nocohuunoashu nani nocon chaca soashoshquin*

<sup>23</sup> Dios cufiti pano pushu muranno ahuarafo nan Dios icaria cuscacoinfo. Ascan nanfoqui Moisés imin fashacuni shara inonfo. Ascan amuran sharafia nan moifoan aton imifohuunshoncái nocon chaca soashocointiroma. Ascatamarocon nan Cristo nocohuunoashu nai fustinihuunshon nocon chaca soashotiro. Noco nansca huashoano non Dios icari catiro a cuscara shara afu ipashquin. Nannocai ahuashta chaca iquitrioma. Ascatan nannoricai Dios cufiti pano pushu cuscacoinma. Aricairocofin fasi shara finacoianquin.

<sup>24</sup> Ascan nan Dios fu tsainti pushufin nocofunufoan onihuaniquin. Amuranno ahuarafo nan Diosin icaria cuscacoin. Ascan Cristocai funinaca huatan amuran iquitama. Apa Diosin icaricoirocon cayacafi iquini nocohuunoa Apa Dios cufishofafainshquin. <sup>25</sup> Ascan nan ahuun yorafohuunshon Dios cufimisi niaifo pano pushu cunu futsan ocumuranco arus fusti faritifi iqui fustipaoni amuranshon Dios cufishquin. Ascashon ahuun imicoin ya a muran iquitamarocon inapan imi ya iquipaoni. Ascan Cristocai a cuscarama. Aacai faritifi noco nashofafainmisima Dios icari caashquin.

<sup>26</sup> Ascamisicucai nan Diosin ahuarafo onihuani chain nocohuunoashu omitscafafainmisi icuana. Ascafiacai ascarama. Satanás ahuara chacafo aton curush cuyomanaitian Cristofin nocohuunoashu nai fustini nocon chaca soashoshquin afanan chaca nocon ifo inonma. <sup>27</sup> Ascan nantifi yorafo non nai futushquin. Noncái nofiri yoitrioma ahuutianmain non naicain. Diosin fustiton yoitiro. Naashu nantifi non aquí

nocoaiton niyoshon non amisi cuscan noco yoishquin. Noco yoiano nan Jesús icoinra huafoti afu ipasharatirofo. Nan icoinra huamisifoma ato omitsiscapanacafo muran potashquin.

<sup>28</sup> Ascashu Cristo aafiri inanmu Cain noco nashoin fustini. Yora ichapafohuunoashu omitsiscacai noco nashoni. Ascafia chipo afanan ahuun yorafoqui mai ano nasoshquin. Ascanishaquin nantian afanan nocohuunoashu naima nocon chaca soashquin. Ascata-marocon ratoranfo aqui unimacai manaifoan ato numashqui afu ipanonfo.

## 10

<sup>1</sup> Diosin Moisés yononi cuscahuunshon non tapitiro Cristocaifin noco ahuara shara huashoshquin finacoinshquin. Ascacun Moisés ato yononi cuscacai noco ascacoin huatiroma. Nantorifi ato yononi cuscan nan faritifi atohuunshon Dios cufimisi-foan moi yafi chashoanfo rutushomisifo aton chaca soanonfo. Ascano nan Moisés yononi cuscahuunshoncai ato numayamafain ato imasharamisima Dios fu ipanonfo.

<sup>2</sup> Ascamisicucai Israelfohuunshon moi yafi chashoanfo ato rutushopaonifo cuscan tsoan unu cuamisima. Ascashon nan Dios tanapaicoinmisifori ato chaca soashoshquin fusti huua cuani. Ascashon tsoancai aton nomuran shinanquin isca huaacuanama, —¡Ohuashta! Un chaca huamisiran, —ishocai tsoan anori shinancuanafoma. <sup>3-4</sup> Ascafia cai ascarama. Nan faritifi moi funufo yafi chashoanfo ato rutushonaifotian nan chaca huamisifo cuscan fasi ato shinanmapaonifo. Ascafiaquicai nan inapan imihuunshon tsoan ato chaca soashopacunacama Dios fu ipanonfo.

<sup>5</sup> Ascacufin Criston Apa Dios icariashu mai ano fotoataima iquisi Apa yoiquin isca huani,

“Upan, mincái fuchipaima moipan imihuunshon chaca soanonfo. Ascacun mian chipo yorafoan caya cuscara onihuashoin un mia ufiri inanmunon. Ascashu yorafoti un naashoshquin ato chaca soashoshquin. <sup>6</sup> Min yorafoan moifo rutucashon coafain ahuara futsafori mia inancaquin. Nan miacoin inain cafisca huamisifo aton chaca soashcaquin. Ascan miancái ascarafo fuchipaima. <sup>7</sup> Upan, un mi ariashu nuno mai ano fotoa min ua amapaiyai cuscan aashquin. Nannoricoin uhuunoa min tsain cunuyoniran,”

ishon Cristo yoini. <sup>8</sup> Úhuun yoramishtichin, shinancapon. Cristo Apa yoiquin tau huani isca huaquin, —Upan, Moisés ahuun caifofo yononi cuscacai min afanan nanfo fuchipaima. Ascan nanton ato yonoquin isca huani, “Moi yafi chashoanfo rutuafono aton imi foaihuunshon min ato chaca soashonon,” huani. Ascashon ahuara futsafori mia inanpaifain ina futsafori rutushon coafain nan miacoin inain cafisca huamisifo aton chaca soashcaquin. Ascano nanfoancai mia unimamatirofomaran, —ishon yoiquin tau huani.

<sup>9</sup> Ascashon afanan yoiquin isca huani, —Upan, un mi ariashu nuno mai ano fotoni min ua amapaiyai cuscan ashquin, —ishon Jesucristo yoini. Ascan Cristo noco nashoni nocon chaca soashoshquin. Ascacun Moisés ato yononi cuscacai non afanan yopaima noco chaca soashonon. Nanfo Jesús man shatumani. <sup>10</sup> Ascashu Apa amapaiyai cuscan Jesucristo afiri inanmu Cain noco nashoni nocon chaca soashoshquin non a cuscara shara inon. Ascacun noncái afanan ahuara futsa yopaima. Nanton noco nashoin fustini. Ascanishaquicai afanan nanacama.

<sup>11</sup> Ascan nan atohuunshon Dios cufimisi Israelfoan shafatifi inafo rutupaonifo Upa Diosin aton chaca soashonon. Ascashon nanfoanrifi shafatifi aton yorafohuunshon ahuaraflo Dios inanfafainpaonifo. Ascafiaquicai nanfoan ato chaca soashopacunacama. <sup>12</sup> Ascafiaifono nan nocohuunshon Apa Dios cufimisi nan Jesusfin afiri Apa inanmuniquin noco nashoshquin. Ascashu nai fustini. Ascanocái non afanan ahuara futsa yopapacunacama nocon chaca soashonon. Ascan nocohuunoashu naacaini Apa

Dios ari cani afu nantifiton aton niaifocoin iishquin. <sup>13</sup> Ascashu nan Apa ari noconitian yafi natianrifi ato manaiyoi nan noicasmaifo Apa Diosin aton curush shatumaitian afananahuushta inonfoma. Ascano nantianri Jesús fusti nantifiton aton Ifocoin iishquin.

<sup>14</sup> Ascashu afiri Apa inanmui festicai nocu nashoni nocon chaca soashoshquin. Nan icoindra huafoti non a cuscara shara inon. Ascashocai afanan Diosin nocohuunoa ahuashta chaca oinpacunacama. Manmain Furunmun nocu chaca soashocun. Cristocai ahuashta chaca huamisima. Ascacun norifi non a cuscara sharacoin iishquin. <sup>15-16</sup> Nannori Diosin Yoshin Sharapan yoiquin tau huani isca huaquin,

“Uhuun yorafoan ua icoindra huacun aton nomuran uhuun tsain ato nanumafain aton ointi muranri uhuun tsain cunui cafisca huashquin ua ointi aquimaiyamacai ua tanasharanonfo,”

ishon yoini. <sup>17</sup> Ascashon afanan yoiquin isca huani,

“Man ahuara chaca huamisi cuscan yafi uhuun tsainrifi man nicacasmamisi nanfocai un afanan shinanpacunacamaran,”

ishon Diosin Yoshin Sharapan yoini. <sup>18</sup> Ascashon nocu chaca soashofain nanfohuunoa afanan nocu shinanshonima. Ascacucai non afanan ahuara futsa inantiroma nocu chaca soashonon.

### *Non Upa Dios fu rafucoinon*

<sup>19</sup> Dios icaricai ahuashta chaca itiroma. Ascacun Jesús nocu nashoni nocon chaca soashoshquin. Ascacun uhuun yoramishtichin, Jesushuunoashu ranotama non Dios fu itiro. <sup>20</sup> Ipaoni nocohuunshon Dios cufimisifoan pano cushto pochimua fupuacufoan nan faritifi iqui fustipaonifo Dios cufishcaquin. Ascafia noncái afananasca huapacunacama. Natian ahuara futsan funa sharacoin Jesús nocu ashoni. Ascashon ahuun caya mastafotian nan pano cushtopan fashnui cafiscani. Ascacun Jesushuunoashu non Dios icano iquisharatiro. <sup>21</sup> Nocon Ifo Jesusfin nocohuunshon Apa Dios cufimisi niaifocoinquin. Ascashu aafin nantifi Diosin yorafoan aton Ifoquin. <sup>22</sup> Ascacun non Jesús icoindra huacun nan nocu nashonihuunshon nocon ointi funa sharacoin huashotiro. Ascashocai non chaca huamisi cuscan afanan non shinantiroma nocu nomuran unimacoinon. Ascashon nocu nan unu tsosi sharapan nashimana cafisca nocu huatiro. Non afanan ahuashta chaca nocon nomuran shinanonma. Ascan nan iconcoin Upa Dios fu rafuashu non afu tsainshquin.

<sup>23</sup> Ascan non yoiquin isca huamisi, —Jesús uhuun Ifo. Upa Diosin nocu yoiyotiani cuscan nocu ashoshquiran, —ishon non yoimisi. Nan iconcoin. Ascacun ahua futsa shinanyamacahuun. Nan fustirocon shinanfafacahuun. <sup>24</sup> Diosin nocu shara huamisi. Ascacun norifi non shinanon ahuuscashumain futsafo non shinanmatiroquin noinantanancain non shara huatananshquin. <sup>25</sup> Man man tapia Jesús oti chaima. Ascacun ichanain unupaifafainyamacahuun. Dios cufiyanan ahuun tsainri nicafain fananshofafaincahuun. Jesushuunoa man shinain cuscan futsafoya yoinonancahuun maton ointi unimashcaquin. Atirificai afanan ichananfafainmisifoma. Ascacun ato cuscara iyamacahuun.

<sup>26</sup> Ratoran futsafoan tapiafo Jesús ahuunoashu naani ahuun chaca soashoshquin. Nanscara man tapifiashon chaca huariaquin nocon Ifo Jesús cachiquiri huacoincun. Ascarafocai afanan ahuun chaca soashotiroma. Jesús fustiton nocon chaca soatirofia nanton man Jesús cachiquiri huacoinna. <sup>27</sup> Nanscaraflo Diosin ato onaintimacoinshquin. A noicasmamisifocaifin fasi onaintimaquin finacoinshquin. Nantianri nan cachiquiri huamisifo fasi omitsiscapanaca. Ascashu Diosin ointaifi nococani fasi ratucoinfiaifoan Diosin ato yoiquin isca huashquin, —Umaquinoashu omitsiscapanacafo muran fotacahuun, —ishon ato yoishquin. <sup>28</sup> Ipaoni yora rafutan iyamarai rafu non

fustifain nannorisi futsahuunoa tsain chaca niaifofo yoicaquin isca huapaonifo, — Natocai Moisés noco yononi cuscan acama. Fasi chaca huaran, —ishon yoiaiton niaifoan nicaquin iconcoincun ahuun ramapaitama yononi nan rutumanifo.

<sup>29</sup> Ascano nan Moisés yononi cuscan nicacasmamisifo rutumapaonifo cuscan nanscarifi huaquin ratoranfoan Jesús nicacasmamisifocun ato onaintimaquin finacoinshquin. Ascashon nanscarafaon shinanquin isca huanmisi, —Mun nicamisi Jesús ua nashoni. Nan naino ahuun imi foni. Ascashon ua catonni ahuunoashu un Diospan facu inon. Ascan un shinan nanfocai ahuama. Ascacun uncai Jesús icoinra huapaimaran, —ishon anori shinain nantonfin Jesús nicacasmamisicoinquin. Ascara tsain yoiquin Diospan Yoshin Sharaqui tsain chaca huamisi. Ascafia nan Diosin Yoshin Sharapan yorafohuun ramapaiquin Jesushuunshon aton nomuran fianan huashotiro a cuscara shara inonfo. Ascafia nan nicaiyosmashunifocaifin fasi ato onaintimaquin finacoinshquiquin omitsiscapanonfo.

<sup>30</sup> Ascan man non tapia Diosin aficoín yoiquin isca huani, —Tsoan futsa chaca huaiton unfin ato onaintimaiquin, —ishon yoini. Afanan Diospan tsain cununi isca huaquin, —Nocon Ifoan ahuun yorafoan chaca huaifoan nanfori Diosin ato onaintimashquiran, —ishon cununi. <sup>31</sup> Ascan ratoranfoan nocon Ifo Jesús cachiquiri huashon chaca huaraiifo fasi musucoin. Ascacun nanscarafaon nan Diosin nípanacaton achishon ato fasi onaintimacoinshquin.

<sup>32</sup> Shinancapon uhuun yoramishtichin. Man tau huaquin Jesushuunoa tapifain man ifo huapaoni cuscari ointiaquimayamacahuun. Futsafoan mato Jesús tanatima huafaino manrocon nocon Ifo Jesús man tanasharacoinpaoni. Ascashon mato omitsisca huafiainfo nanscara tunufain man nocon Ifo tanasharacoinmisi. <sup>33</sup> Ascashon man Jesús tanasharaiton futsafoan ato ointaifi mato roafain mato omitsisca huamisifo. Nanscarifiai man muumisi cuscan Jesús tanamisi futsafo arifi omitsiscaifoan oin atofu rafucain man ato tsain shara yoitiro ato ointi unimamashquin.

<sup>34</sup> Jesús icoinra huaa futsafo cunu muran iquimanifo. Ascacun atohuun noicai man atohuunri ramapaiquin cunu muran ato oincai man cani ato shinansharamapaifain aton ointi unimamashquin. Ascan nantianri nan icoinra huamafoan maton mafo onuquin cuyocoinnifo. Mato asca huafafocai shinanchacatamarocon man man tapini Upa Diosin nan icarishon mato ahuara shara finacolianfo mato mucushona nanfocai funopacunacama. Nanscara tapiashu man unimacoinni.

<sup>35</sup> Ascacun man Jesús icoinra huaa cuscan cachiquiri huayamacahuun. Man cachiquiri huayamacun Upa Diosin mato fasi shara huashquin. Ascashon mato inain cuscan tsoan ascara shara oinyomisima. <sup>36-37</sup> Ascan Diospan tsain cununi isca huaquin,

“Jesús oti chaima. Matoqui samamashta nocoshquin. Nantonfin afin tapiaquin ahuutianmain nocoqui ooshquicain. Ascashu oicai ichaipacushquima,”  
ishon cununi. Ascacun man Jesús tanasharai cuscan omitsiscafiaqui tunucahuun. Unupaiyamacahuun Diosin mato amapaiyai cuscan ashon nan mato yoiytiani cuscan man fishquin. <sup>38</sup> Ascashon afanan Diospan tsain cununi isca huaquin,

“Nan un imasharaiton ua icoinra huamisi. Naantofin ua tanasharashquiquin.  
Ascan tsoan ua cachiquiri huacucai un aqui unimashquimaran,”  
ishon Diosin yoini. <sup>39</sup> Nanscarafaon Jesús cachiquiri huacoincanashu omitsiscapanacafu muran focani. Ascan noncái ascaima. Ascatama non Jesús icoinra huacoincun noco numa non afu ipanon.

## 11

### *Icoínra huamisifohuunoa*

<sup>1</sup> Ascan non Upa Dios icoinra huacoinshon noco yoiytiani cuscan noco ashoataiyamafiacun non icoinra huai. Chipomain noco ashoaiton. Nanscarifiaquin noco yoiyoní

cuscan non oiantaiyamafiaqui ahuun tsainhuunshon non icoinra huai. Non nanscara shinanquifin non icoinra huaiquin. <sup>2</sup> Ascacun nocon shunifoan Diosin ato yoini cuscan fasi icoinra huacoinpaonifo. Upa Diosin atoqui unimacoinquin atohuunoa tsain shara yoini.

<sup>3</sup> Ascan icoinra huashon non tapitiro Diosin ahuun tsainmansi nantifi nan mai yafi nai ariafori onihuani. Non ointiro cuscarafohuunoacai Diosin ahuardo onihuanim. Ascataima ahuun tsainmansi nantifi onihuani.

<sup>4</sup> Nocon shuni Abel Dios icoinra huashon chashoanun facu inanquin nan Dioscoin inain cafisca huani. Ascan Diosin aqui unimacoinni. Ascan ahuun ochin Caincái ascara inima. Nan Caín icoinra huayamaitocai nantori inanpaisayai cuscan Diosin fuchipainima. Ascan ahuun ushto Abel icoinra huacoincun ahuunoa Diosin yoiquin isca huani,—Min ua inanshararan,—ishon yoini. Abel man Dios icoinra huashu man naafianicun non ahuun caoaino nocoupi Diosin unimacointiro.

<sup>5</sup> Nocon shuni Enoc arifi Dios icoinra huacoinnashu afu rafucoinpaoni. Ascan naya-mafiacun nan icari Diosin ihuiriscatani. Ahuunoa Diospan tsain cununi isca huaquin,—Un Enoc yoiai cuscan ua nicacoinmisi. Ascacun un aqui unimacoinran,—ishon Diosin yoini. <sup>6</sup> Ascan non icoinra huayamaquicai non Dios unimamatiro. Ratoran futsan Dios fu ipaicoinquen icoinra huatiro natian Dios nia. Ascashori tsoan fasi onanpaicoinquen icoinra huaiton naanfin aqui nocaiton Dios fasi shara huashquiquin.

<sup>7</sup> Nocon shuni Noé arifi Dios icoinra huacoinpaoni. Ascan iquisi Diosin Noé yoiquin isca huani,—Un oihuanrasi fumai faitahuan foran fucuaino asai futsunonfo. Ascacun shashohuan pushu ya huahuun. Min non min ahuin non min facu rafu yafi min fan-fanhua rafuya asashcaquima. Un mia yoiai cuscan huahuun,—ishon Diosin Noé yoini. Ascan tsoancai ascara oinyomisimafia Noén icoinra huafain shashohuan huani ahuun facufo ya asashcaquinma. Nantonfin Dios icoinra huafain isharacoimisiquin. Ascan nan icoinra huamafocai ascanifoma. Ascataima nanfoan chaca huafafainpaonifo. Ascacun Noéhuunshon non tapitiro icoinra huamisifo isharaifonocai nan icoinra huamaflo isharamisifoma. Ascashon Dios fu Noén rafuaiton a cuscara sharacoin imani.

<sup>8</sup> Nocon shuni Abraham arifi Dios icoinra huacoinpaoni. Ascan Diosin Abraham yoiquin isca huani,—Nan un mia iyopaiyaiquiri min catiro. Ascan min cainni anoashu catasthuun. Nanno un mia mai inain mina inon,—ishon Upa Diosin yoini. Ascaran tapiataima ini raquiricaimain caiquin. Ascafia nan Diosin yoia cuscacoin ani.

<sup>9</sup> Ascashon nan Diosin yoiyotiani cuscacoin icoinra huashu nan Diosin nichian mai ano nocashu Abraham nan mai futsa aria yora futsa ahuun caifo cuscarama iyopaoni. Nannoashuri pano pushu tapasi cuscara muran iyopaoni. Ascan ahuun facu Isaac yafi ahuun shota Jacoborifi nanscara muran iyopaonifo. Upa Diosin Abraham yoini cuscan nan rafu nannoricojni ato yoini. <sup>10</sup> Diosin Abraham yononi cuscan nan mai ano iyoflashon tapipaoni chipo Dios icari afu ipashquiain cuscan. Nanno Diosin nantifi onihuani sharashtacoinfo nanfori ahuunari ipanaca. Diosin icaricai ahuashta cuyopacunacama. Nanscasi apanaca. Ascacun Abraham manayopaoni chipo nanno afu ipashquin.

<sup>11</sup> Diosin Abraham yoini isca huaquin,—Min ahuin Sarapan chipo furonanfacu nanushquin. Ahuunoashu min funafo ichaparas iishquiran,—ishon yoini. Nannori yoifiano Abraham anifoshta ahuun yoshafoshta toosma ini. Ascacun Abraham ahuun nomuran shinanquin isca huani,—Upa Diosin ua yoiyonii cuscan ua ashoshquin. Nantonfin nan yoia cuscacoin huamisi,—ishon Abraham Dios icoinra huani. Ascashu ahuin Sarapan facu caianno Abraham facuya ini. <sup>12</sup> Ascano Abraham anifoshta afananci chai nitromafia ahuun funafo fasi ichaparasico. Tsoancai ato tanan huatiroma. Fishifo yafi mai furomishticai non tanan huatiroma. Nanscarifiai Abraham ahuun funafocai tsoan tanan huatiroma.

<sup>13</sup> Nantifi na rama yorafihuunoa mato yoia cuscan afanan atohuunoa un mato yoi. Diosin ato yoiyoni cuscan fiashuma naanifo. Fiataiyamafiaquin Dios icoinra huanifoan chipo fiishcaquin. Ascacun Diosin ato yoiyoni cuscan aton nomuranshon oincoin cafcasai unimacoinnifo. Ascashon yoinifo isca huaquin, —Nunocai non ipanacama. Na mai anoashu nan mai futsa aria yora futsa cuscarafo nonran, —ishon yoinifo.

<sup>14</sup> Ascan nannori yoiaifoan non tapitiro nanscara yorafo nuno mai ano ipaitama Diosin icari capai afu ipashcaquin. <sup>15</sup> Ascan aton mai ipaoni shinantacani nasopai ari naso cuanifo. <sup>16</sup> Ascan ari nasopaitama Dios icarirocon fasi shinannifo ari nocopaicaquin. Nanfoan tapinifo nanno fasi shara finacoian. Ascashon Upa Diosin nan icari ato itishara huashoano afu ipanonfo. Ascacufin atohuunoa ranotama yoini isca huaquin, —Unfin ato Diosiquin, —ishon yoini.

<sup>17-18</sup> Afanan Abrahamhuunoa un mato yoinon. Upa Diosin tapipaini Abraham icoinra huafainmain nan yoia cuscacoin aiquin. Ascashon yoiquin isca huani, —Min ina ua rutushotamarocon min facu fustishta Isaac ua rutushohuun, —ishon Diosin yoini. Upa Diosin iquisi tapimani ahuun facu fusti Isaachuunshon ahuun funafo ichapa iishquiai cuscan. Ahuara sharafo Diosin Abraham yoiyoni cuscan ahuun facu Isaachuunshon nantifi ashoshquin tapimaiyon. Nannori Upa Diosin Abraham yoiaiton ahuun facu fustishtacoinfia rutushon Dios inancuani. Ascano Dios icoinra huacoinshon nan yoini cuscacoin ani.

<sup>19</sup> Ascashon ahuun nomuran shinanquin isca huani, —Upa Diosin ua yoia isca huaquin, “Min facu Isaac ua rutushohuun,” ua huaiton un shinan Diosintsii ahua-mamishti huatiroquin. Ascan uhuun facu naafiacun Upa Diosin samamashta funimatiroquin, —ishon shinanni. Icon ahuun facu naa cuani. Ascacun Abraham shinanni, —Uhuun facu man naafiacun Diosin funimana shinantsairan, —ishon shinanni.

<sup>20</sup> Ascan Isaac arifi Dios icoinra huacoinpaoni. Ascacun Diosin ahuun nomuran shinanmani furun rafu chipo ato shara huashononpacoai cuscan icataima yoiyioni.

<sup>21</sup> Nanscarifiai Jacob arifi Dios icoinra huacoinpaoni. Ascacun nataima Diosin ahuun nomuran shinanmanai cuscan ahuun shota nan Josépan facu rafu Diosin ato shara huashononpacoai cuscan ato yoini. Ato yoitan ahuun poquitiqui cucusamushon Dios cufini.

<sup>22</sup> Ascan José arifi Dios icoinra huacoinpaoni. Ascashon natichaima ahuun yorafio yoiquin isca huani, —Chipo Upa Diosin nocon funafo nan Israelife Egipro anoshon ato iyoshqui. Focaquin uhuun shaofori foshcaquin. Nan man icaino afanan ua mai huashcaquin, —ishon ato yoiyoni.

<sup>23</sup> Moisés apa futan ahuari Dios icoinra huacoinpaonifo. Moisés cainyaintian apa futan ahua oianfo aton facu sharashtacoin ini. Ascashori tapinifo Moisés nocofunucoiantian Upa Diosin yonosharashoshquiai cuscan. Ascacun Egipcio niaifoan ato yononi Israelifoan aton facu yomumishti nantifi rutunonfo. Ascafainocai nan Moisés apa futan ahua ratuquimarocon Diosin icoinra huashon oshu rafu non fustitan aton facu onunifo niaifoan ato Moisés rutumanonma.

<sup>24</sup> Ascashon Moisés arifi Dios icoinra huacoinpaoni. Egipciofo futan ahuun caifofo atirififain shinanpaonifo Moisés Faraón ahuun chata. Ascacun Faraón facu shomayaton ahuun facuran, huapaonifo. Ascafia Moisés nocofunucoiantian Dios icoinra huashon ato yoini isca huaquin, —Uncái niaifon Faraón ahuun chatama. Ahuun facuricai uhuun huacoinmaran, —ishon yoini.

<sup>25</sup> Ascan Moisés aafin tapini Egipcio niaifo icashu fasi isharacain arifi ato futan fari ranan unimacain chaca huatiro. Ascafiai Moisés ascapainima. Ascacuamarocon shinanquin isca huani, —Uncái Egipciofo futan chaca huapaima. Ascacuamarocon shinanquin isca huani, —Uncái Egipciofo futan chaca huapaima. Ascacuamarocon shinanquin isca huani, —Uncái Egipciofo futan chaca huapaima. Ascacuamarocon shinanquin isca huani, —Uncái Egipciofo futan chaca huapaima. Ascacuamarocon shinanquin isca huani, —Uncái Egipciofo futan chaca huapaima. Ascacuamarocon shinanquin isca huani, —Uncái Egipciofo futan chaca huapaima.

<sup>26</sup> Ascashon tapiyopaoni chipo Cristohuunoashu omitsisciafiashu Upa Dios

ari noocoaiton ahuara sharacoin inanshquin afu ipanon. Ascacun Egipciofo ato ahuara ichapa fiapaiquin ato fia cuani. Ascafiacai anori shinantama shinanquirocon isca huani, —Un Cristohuunoashu omitsiscacun ua fasi imasharatiro. Ascan un Egipto anoashu ahuara ichapayatirofia nanfocai uhuuna ahuamaran, —ishon shinanni.

<sup>27</sup> Ascan Dios icoinra huafain Egipto anoashu ahuun caifofoya Moisés cani. Egipciofoan aton niaifo aqui sinafainocai aqui ratutama nan niaifoan ahuun mai anoashu cani. Dios tsoan ointiromafia Moisés mupaoni Dios afu rafucoincun. Nan oincoin cafisca huapaoni. Ascashon nan Diosin yononi cuscan huaqui unupaonima.

<sup>28</sup> Ascan Egipto anoashu Israelifo foataima iquisi Diosin Moisés yoiquin tau huani isca huaquin, —Min caifofo yoihoo chashohuanun facu rutunonfo. Ascashon ahuun imin aton pushuti ahuun caincaiti ocuma rafu yafi amanaonri raishaquin futsanonfo. Man asca huacun Diospan nai oinmatinin Egipciofoan aton facu iyoafifo namaitian mato facufo finonmanon nanonfoma, —ishon Diosin yoini. Ascacun Moisés arifi nan Diosin yoiaiton nica cuscan icoinra huashon ahuun caifo Israelifo yononi. Ascanocai Israelifoan facu iyoafifo fustishta naanima.

<sup>29</sup> Ascacun Israelifoan Dios icoinra huanifo. Ascan nan unuhuan anunifo isca huaquin, —Unuhuan Oshinran, —ishon anunifo. Ascashon nan unuhuan oshin pocufainifo. Upa Diosin unuhuan nushmancayan mai muto sharacoin ato huashoriscatanaino Israelifoan pocufainaifoanno ato cachiori Egipciofoan ato rutupaiquin ato mufainifo. Arifi ato futan pocupaicaquin. Ascashu man nushmancayan caiyainfoan Diosin atoqui unuhuan tiiantanaino asai futsunifo.

<sup>30</sup> Ascashon Upa Diosin Israelifo yononi pushurasi ahuun anu Jericó cachiori siete oshatan tarati huayacunonfo. Nan pushurasi cachiori toquiri cunu fasi cuyacoin masoa cunuacua ini. Ascan Israelifoan ahuun unutani cahuacuainfoanno nantifi toquiri sapa cunuacuaflo paoinquiran ishon Diosin ato yoini. Ascacun nan Diosin ato yoia cuscan icoinra huafoan nanscacoiai cunufo paoinqui futsunifo.

<sup>31</sup> Ascan nantifi Jericó anoaflo nai futsunifo. Ascafia nan Rahab ainfo furoma fusti ahuun yorafoya nanima. Ahuun caifoancai Dios icoinra huanifoma. Arus fusti Dios icoinra huacoinni. Ascan Jericó anoafaoan aton toquiri cunu paoincataima. Israelifoan ato niaifo Josué onanti huamisi rafu Jericó ano ato nichini atohuunoa tapishquin. Nan onanti huamisi rafu Rahab ahuun pushu muran ato iquimani ato shara huaquin. Ascacucai ahuun caifo rutucaquin Rahab rutunifoma.

<sup>32</sup> ¿Ascan ahua futsamun un mato yoitiroquin? Yora ichapafoanri Upa Dios icoinra huapaonifo. Nanfohuunoa un mato yoipaifiaquicai un mato yoiqui nocotiroma. Nan Gedeón non Barac non Sansón non Jefté non David non Samuel non Israelifo Dios yoia cuscan yoimisi futsafohuunoari un mato yoipanan uncai yoiquin nocotiroma.

<sup>33</sup> Ascashon nanfoan Dios icoinra huacashon ahuun ranushumuaflo yononifo ato noicasmaifo rutunonfo. Ascacun ato noicasmaifo rutuqui finoncoinnifo afanan ato ahuisca huanonfoma. Atirifi niaifo ishon ahuun yorafo cushusharapaoni isharononfo. Diosin ato yoiyoni cuscan fiicoinnifo. Ascano atiri nan icoinra huamafoan ato masharofo muran potafiacun Diosin masharofo cotushcuru imano ato ahuisca huanonma.

<sup>34</sup> Ascan atirifi niaifo chacapan futsafo yonocun ato chi uru muran potamafiafo Diosin ato cushushara coinni coononfoma. Atirifi ato nopun rutupafiaquicai tsoan ato anima. Ascano atirifi shaca fuacai isininfiaifoan Diosin ato mutsismani. Ascanocai nan ato noicasmaifoan ahuun ranushumuaflo atoqui fufiaifoan nanfoancairocon Diosin curushhuunshon ato ichonifo ato ahuisca huanonfoma.

<sup>35</sup> Ainfofoanri Dios icoinra huacun aton yorafo man naafiacun Diosin ato funimani afanan ninonfo. Ascano futsafoanri Dios icoinra huacoinnafoan nan icoinra huamafoan ato omitsisca huanifo nan naifotian. Ascashon ato yoiquin isca huanifo, —Man Upa Dios potaiton non mato ahuisca huaima man casharatanon. Asca man Dios

potayamaiton non mato rutuiran, —ishon ato yoinifo. Ato asca huafiaifoancai tsoan Dios potapainima. Ascacun ato rutunifo. Ato rutuafotaima shinanquin isca huanifo, —Noco rutufiafo Upa Diosin samamashta noco funimatiro non afu ipasharanon, —ishon shinannifo.

<sup>36</sup> Ascano icoindra huua futsafoquiri atoqui cashu mutsamacain fichi ato coshafain atirifi cunopan munushfain onushfain ato cunu muran iquimanifo. <sup>37</sup> Ascashon atirifi toquirinin tsacaqui ato rutufain atirifi nisatinin ato shatufain nopurifi ato rutunifo. Atirifi ahuuomafoan chashoanun fichi sahuuti huasho sahuunifo. Ato omitsisca huaquin nansca huanifo. <sup>38</sup> Ascashu tsoan istaipama ano yafi machi ano non mahua quini muran non mai quini muranri iquifaifainifo. Ascan nan icoindra huafioan icoindra huamafo shara huafiaflashon copiquiri ato fasi chaca huafafaipaonifo. Ascan sharafo cutsi Diosin ahuun yorafoya ato ima.

<sup>39</sup> Ascashu nanfo omitsiscafiaquin Dios icoindra huacoinpaoonifo. Ascacun Diosin atohuunoa yoiquin isca huani, —Nafoan ua icoindra huacoinnafo. Ascacun un atoqui fasi unimacoinni. Omitsiscafiaacani fasi isharacoinmisforan, —ishon Diosin atohuunoa yioni. Ascafiaquicai Diosin ato yoionti cuscan tsoan fiatai inima. <sup>40</sup> Ascashon Upa Diosin ato manamayopaoni. Ascacun norifi non icoindra huashu non atofu Jesús icari nocoshquin. Nantianri yora fusti cuscara non iishquin a cuscara shara noco imaino. Ascano unimaquin nanfocai no fu ahua futsa afanan yopapacunacafoma.

## 12

### *Non Jesushuunoa shinanfafainon*

<sup>1</sup> Ascan noco shuni ichapafohuunoa rama non nica. Nanfoan Dios icoindra huapaoonifo. Ascacun norifi non atohuun caononcahuun. Ascashon ahuarashta noco nitumapaiyai cuscan nanfo non cachiquiri huacoinnon. Ascatan ahuara chacafoanri samamashta noco curushcain chaca huamapaitiro. Nanfori non cachiquiri huacoinnon Diosin noco amapaiyai cuscan fustisi huashquin. Ascacun funaquia non ashofafainon.

<sup>2</sup> Ascacun non Jesús fusti shinanfafainoncahuun. Nanfin noco Ifoco noco tapimamisicoinquin. Ascan nanton noco ismaquin tau huani ahuara ahusscarafaino non Dios icoindra huacoinnon. Ascashon Apa yoia cuscacoin huacoinpaoon. Ascacun norifi non ahuun caononcahuun. Ascashon nan mastacaquin yorafoan ointaifi rafini huanifo. Asca huafiaifoanno fasi omitsiscafiaquin tunucoinni manmain tapiashu chipo nocon Numamisi icain. Nanscaria tapiashu fasi unimacoinni.

<sup>3</sup> Yora chacafoan fasi chaca huafiainfoan tunucoinni. Ascashu nocohuunoashu omitsiscani cuscan man shinanquicai matorifi omitsisca huaifotian man shinanchacayamafain man ointi mutotiroma. Ascaquicai Diosin mato amapaiyai cuscan man unuttiroma.

<sup>4</sup> Curushcain maton nomuranshon man chaca shinanquin man potapaifafainmisi ointiaquimashon chaca huashquinma. Man asca huafafainaino Jesucristo nocohuunoashu naani noco chaca soashoshquin. Ascan mancái ascamisima. Ascatamarocon shafatifi curushcain man chaca shatufiaflashucái Jesús ini cuscan tsoa nataima.

<sup>5-6</sup> Ascafia nan noco yoia cuscacoin non ayamaiton oinquín Upa Diosin nocohuun noíquin noco onaintimatiro noco tapimashquin. Ahua futsa shinantama nancairocon non tanasharanon. Ascashon nantifi ahuun yorafo ato nansca huashoan. Ascacun nanfoan tapinonfo Diospan facufocun. ¿Man man ointiaquimanamun Diosin maton nomuran unimamapai man ahuun facufocun mato tapinonfo? Ascan ahuun tsain cununi isca huaquin,

“Uhuun facushtan unfin min Ifocoquin. Ascacun un mia onaintimai min tapinon afanan mian tanasharanon. Ascacun nan mato onaintimaitian

tapicahuun afanan ascashcaquima. Matoasca huaitian mato nomuran shinanchacayamacahuun. Mato cayacafico tapimapaiquin,” ishon cununi.

<sup>7</sup> Upa Diosin mato tapimapaiyai cuscan funaquima tapicahuun. Ascashu omitsiscaficaquin shinanchacatamarocon tunucoincahuun. Ascano omitsiscaquin man tapitiro man Diospan facufo. Apafoan ato facu tapimatirofo cuscan nanscarifiaquin Upa Diosin nooco cayacafi tapimani. ¿Rato facumun apan onaintimatiromaquin tapimasharashquin? <sup>8</sup> Nantifi facufoan aton apa ato onaintimaiton man muumisifo. Nanscarifia Upa Diosin nooco tapimayamainocai non ahuun facucoin iyamacain nonricai ahuun yoracoinfo itiroma.

<sup>9</sup> Nocon upafoan non facufocun nooco onaintimapaoni. Ascacun non atohuunoa shinansharafain nonrifi ato nicacoinmisi. Ascan nocon Upa Diosin nooco onaintimaiton non tunuquin finacointiro. Ascashon nooco tapimapaiyai cuscain non fasi unimacain non isharatiyo. <sup>10</sup> Nocon upafoan afi shinanshara cuscan aton facufo onaintimamisiso a nicasharanonfo. Ascan non yosaitiancai afanan noocoasca huamisima. Nanscarifi aqui Upa Diosin cayacafi fustisi shinanquin nooco shara huapaiquin nooco onaintimamisi non a cuscara shara inon. <sup>11</sup> Nan icon nooco onaintimaitiancai non musharatiroma. Non isincoin mui non pashapaitiro. Ascaflashon chipo ointi nocoshon non shinantiro Diosin nooco tapimasharapaiqui nocon nomuran unimamafain Furun Jesús cuscara shara nooco imai.

### *Non Dios nicacasmaifasi musucoin*

<sup>12</sup> Ascacun ahuara ahuuscarafaino shinanchacayamacahuun. Upa Diosin mato tapimapaiyai cuscan nan fusti tapicahuun. Ascashon Jesús tanaquin unupaitama nicasharafafaincahuun. Ascari ahuun tsain sharaquin mutoyamacahuun. <sup>13</sup> Ascashu cayacafi isharaco incahuun Jesús tanasharashcaquin. Man ascaiton oin nan icoindra huasharafoma matohuun caopaitirofo Jesús cuscara shara iisharashcaquin.

<sup>14</sup> Ascacun fochishmanantanapaitamarocon nantifi yorafo fu isharapaifafaincahuun. Ascari Jesús cuscara shara ipaifafaincahuun. Ascan tsoa Jesús cuscara shara iyamaino nantocai nocon Ifo oinnacama. <sup>15</sup> Upa Diosin nocohuun ramapaiquin Furunhuunshon nooco shara huafafainmisi. Ascacun oinfain Diosin nooco shara huapaiyai cuscan huafafaincahuun funoshcaquima. Ascari oinfain mato ointi mutoyamacahuun. Ascan mato nomuran man mutocacaiquin futsafori man chaca huamatiro arifi nanscara inonfo.

<sup>16</sup> Ascatan maton ahuinma fu iyamacahuun. Ainfofoan maton funuma furi iyamacahuun. Ascashon Diosin mato inanpaiyai cuscan fiicasmaquima nancairocon ficahuun. Ascashu Esaú ini cuscan ayamacahuun. Aatocai Diosihuunoa shinanpaonima. Diosin Esaú inansharapafaiton fasi fonicoquin ahuun ushto inanni ahuun rafanan tushu fiishquin. Nan piai fustihuunshon nantifi Diosin inanpaiyai cuscan funocoinni. Ascacun marifi ascayamacahuun. <sup>17</sup> Man man tapia apa inansharapaiyai cuscan fipaifiaquin finima. Ascashon apa yocaquin isca huani, —Upashta, mian inanpaiyai cuscan ua inanpun, —ishon uaishofiaitocai inannima man main chipocuton fiamacun. Ascacun oinfain Diosin mato inanpaiyai cuscan maton chaca man shutuyamashu marifi man Esaú cuscara itiro. Ascashon Diosin mato inanpaiyai cuscan man funocointiro.

<sup>18</sup> Upa Diosin nooco shunifo yononi cuscacai mato yonomisima. Ato yoini machi ahuun anu Sinaí tunanman fotanonfo. Nannoshon ahuara futsa ato yoishquin. Ascashu nan ato yoia cuscan nocoafono Upa Diosin oi uhuapacoinin ato yoinquin isca huani, —Nan machi ano mapuyamacahuun. Man mapuashu man nariscairan, —ishon ato yoini.

Nantianri nan machi ano chi urumanhuan oinfain shafatafia nannori faquishihuan-coin icain ninhuunhuan yafi cana piishicain <sup>19-20</sup> manuti fasi chaan chaan icain Diospan ahuun oi uhuapacoinin ato yoiai cuscan nicacani fasi ratucoinnifo. Ascacun Moisés

yoinifo isca huaquin,—Non afanan Diospan oi nicapaima. Ipaishoma non nariscatiro. Ascan Upa Diosin noco yoiquin isca huaa, “Mato inafu machi ano mapuaifoan toquirinin tsacacahuun naanonfo,” ishon noco yoia. Ascacun Dios yoihhuu noco yoipaiyai cuscan noco yoitama miarocon yoiquin tau huanon. Min chipo noco yoitiro. Aafin noco yoiaino non nariscatiroquin, —ishon Israelifoan Moisés yoinifo. <sup>21</sup> Moisés arifi oian cuscan ato yoini isca huaquin,—Urifi un fasi ratucoin taritari iquinran, —ishon yoini.

<sup>22</sup> Ascafia mancái Dios fu tsainpai na machi Sinaí ano man oima. Ascatama nan machi Sión ano man cai. Nan Jerusalén futsa Dios icari. Ascan nan Diosin ipamisi. Nannoashu ahuun oinmati afu nai muran imisifo ichanancashon Dios shararan huafafaincani. Nan ahuun oinmatifocai tsoan ato tanan huatiroma fasi ichapacoinfo. <sup>23</sup> Nannori nantifi Jesús icoinra huafu afu icafo. Ascan nan Dios icari aton anufo cunupacua afu ipanonfo. Ascacufin marifi man Diosiqui oaquin. Ascan nanton yoishquin ratotomain icoinra huacoinnashu afu ipanaca iyamarai icoinra huamisimaquin. Ascashu icoinra huashuma afu ipanacama. Nan icoinra huafotisi ato a cuscara shara imai chaca huamisima cuscara inonfo.

<sup>24</sup> Ascan man man Jesusqui fua. Nanton noco nashoantaimaci tsoa futsan noco nashonima. Ascacun natian ahuunoashu non Dios fu ipasharatiro. Nocon shuni Caín ahuun ushto Abel rutuni. Ascacun Upa Diosin Caín yoini isca huaquin, —Cain, ahuscaquimun min ushto rutuaquin. Natian un mia curushcai onaintimairan, —ishon Diosin yoini. Ascafia Jesús rutuaifotiancái anori yoinima. Afimain nocohuunoashu naiton noco chaca soashoshquin. Ahuunoashu non Dios fu ipasharatiroran ishon noco yoini.

<sup>25</sup> Ascacun ¡Oinfain! Diosin mato yoipaiyai cuscan nicatimayamacahuun. Nan mai anoshon nocon shunife Moisés ato yoini cuscan nicayamaifoan Upa Diosin ato onaintimani. Ascashu na mai anoashu Moisés noco cuscara cainni. Ascan Jesuscái ascarama. Apa Dios icariashu nocoqui fotoni. Nanton noco yoiai cuscan non nicayamaino fasi musucoin. Ascan non Furun nicayamacaiyaiton Upa Diosin noco onaintimaquin fina-coin. <sup>26</sup> Ascan Upa Diosin Moisés yafi noco shunife machi Sinain anoshon ato yoiaitian ahuun tsainmansi mai nayanaiyaimani. Ascashori yoini isca huaquin, —Chipocai un mai fustisi nayanaiyaimaima. Un mai yafi nairifi fasi curushcai un nayanaiyaimairan, —ishon Diosin yoini. <sup>27</sup> Ascacun nan noco yoini cuscahuunshon non tapitiro nan ahuara ipatirofoma Diosin nanfo cuyoriscatashquin afanan ahua inonma. Ascan nan ahuara Diosin imapacunacafo fusti itiro.

<sup>28</sup> Ascataricái Diosin icari mai nayanaiyaitiroma. Nannoshocai ahuashta non chaca finontiroma. Ascashu nanno non afu ipasharatiro. Ascacun non Diosin aicho huafafainon. Nantonfin ahuamamishti huatiroquin. Ascacun ahuunoa non shinansharafain non cufifafainon. Ascashon noco amapaiyai cuscan non ashooaino nocoqui Upa Diosin fasi unimacoinsquin. <sup>29</sup> Ascan man man tapiari nocon Diosin nan chi urumanhuan cuscara. Ascan tsoan ahuun tsain shara cachiquiri huacoincun Diosin ato chi urumanhuan muran potashquin amurannoashu omitsiscapanonfo.

## 13

### *Ahuuscashomain non Dios unimamatiroquin*

<sup>1</sup> Manfin Cristo ahuun yorafoquin. Ascashu noinanfafaincahuun. <sup>2</sup> Diospan yorafo mai futsa ariashu matoqui nococun ato shara huacahuun. Ascan futsafoan Diospan yorafo atoqui nococun oinyamafiamisishaquin ato shara huaquin tapinifoma nanfo Diospan oinmati afu nai muran icafofiacun.

<sup>3</sup> Nan cunu muran iquiafo shinancahuun. Ascashu atohuun ramapaicoincahuun. Marifi atofu cunu muran iquimamua shinantsa acahuun. Futsafo Jesushuunoashu

omitsiscacoinnafo nanfohuunri ramapaicahuun. Ascashu marifi atofu omitsiscamuai shinantsacahuun.

<sup>4</sup> Nocofunufoan maton ahuinfoya noinancahuun. Ascashu shinanmasharatanancahuun. Ascatari maton ahuin non maton funu fusti fu icaahuun. Ascafia ratoran futsa aton ahuinma non aton funuma fu icaifoan Diosin nanscarafo ato onaintimashqui.

<sup>5</sup> Pui noiyamacahuun. Man aya cuscan fustia unimacahuun. Upa Diosin yoini isca huaquin,

“Uncai matomaqui ipayamacai uricai mato potanacamaran,”  
ishon yoini. Ascacun nan tapiashu non fasi unimacointiro. <sup>6</sup> Ascan iconcoin non yoitiro isca huaquin,

“Un ahuara huaiton uhuun Ifoan uari ashomisi. Ascacufin un ratuima. ¿Upa  
Diosin ua cushuainocai nocofunufoan ua ahuusca huatiromun?”  
ishon non yoitiro.

<sup>7</sup> Dios fu tsanti pushu muranshon Diosin tsain yoimisifoan mato yosinifo cuscan atohuunoa shinancahuun. Nanfoan futsafo shara huafafainmisi. Ascashon fasi noco Ifo Jesús icoinra huamisifo. Ascacun atohuun caocahuun Jesús tanasharafafainshcaquin.

<sup>8</sup> Ascashu Jesucristo ipaoni cuscan natian icai cuscan yafi ishquiae cuscari nancaí fianananpacunacama. Nanscasipacunaca.

<sup>9</sup> Ascan atirififoan mato amaquiri yosipaicaní. Tsoancai anori nicayomisima cuscarao mato yosipaicaní. Ascacun ato tanayamacahuun. Mato yosipaicaní isca huaquin, —Nocon shunifoan noco yononi cuscan non nami futsafo piaino nocon nomuran noco shinanmasharatiroran, —ishon mato yoimisifo. Ascafiai tushucai nocon nomuran noco shinanmasharatiroma. Ascatama Diosin noco noiahuunshon noco imasharatiro non a cuscara inon.

<sup>10</sup> Ascacun nan non icoinra huamisi Jesucristo ihui coyán iquinanhunoashu noco nashoni nocon chaca soashoshquin. Tsoan Jesuscairocon icoinra huatama nan Moisés yononi cuscan fustisi icoinra huafó. Nanfoancai no futan aton chaca soatiropoma.

<sup>11</sup> Ascan Moisés ato yononi cuscan ahuun yorafohuunshon Dios cufimsi niaifon fusti nan cunu futsa ocu murancoin iquipaoni. Nan muran inapan imi focun nan imi oinquin Upa Diosin ato chaca soashonon. Ascashon inafoan ato caya pushurasi pasoato foshon coapaonifo. <sup>12</sup> Nanscarifiai Jesús Jerusalén pasoatonoashu noco omitsiscashocai ahuun imi focai ahuun yorafohuunoashu nani nocon chaca noco soashoshquin non a cuscara shara inon.

<sup>13</sup> Ascan norifi Jesús ipaoni cuscan non anoncahuun. Ascashon ahuun yorafoan nan potanifo cuscan huaquin nocorifi noco yorafoan noco potatiro. Ascashon Jesús roanifo cuscan nocorifi ahuunshon noco roatirofo. Ahuunoari shinanchacamisifo cuscan nocorifi ahuunshon nocohuunoari shinanchacatirofo. <sup>14</sup> Nuno nan mai anoashu non omitsiscaliaquicai non shinanchacaima. Man nonmain tapiashu nuno nan mai ano non ipanacama. Ascata man non tapiari chipo Dios icari nocoashu non afu ipashquin. Ascacun nan non manasharamisi.

<sup>15</sup> Nocon shunifoan apaonifo cuscacai afanan Diosin fuchipaima. Noncaí afanan inafo rutuima nocon chaca soashonano Upa Diosin nocoqui unimanon. Ascatamarocon Jesús noco nashonihuunshon non Upa Dios aicho huai. Ascan non yoiquin isca huanon, —¡Aicho! Upa Diosin, min Furun Jesús uhuun Ifo. Ahuunshon un mia aicho huairan, —ishon non yoifafainon. <sup>16</sup> Yoiquin asca huatan yora futsafuhun ointiaquimayamacahuun ato shara huashquin. Ascan Jesushuunshon man yorafo shara huafain man aya cuscan futsan yopaiton man inanquin. Asca huaquifin man Dios unimamacointiroquin.

<sup>17</sup> Ichananti pushu anoshon maton Diosin tsain yoimisifo nicasharacoinfafaincahuun. Ascashu mato yoiaifo cuscacoin acahuun. Nanfoanfin mato cushufafainquin man Jesús tanasharanon. ¿Ascan nanfoanri tapiafo chipo Diosqui nocoaiifoan ato

yoishquin isca huashquin, —Man man uhuun tsain ato tapimasharamisimun? —ishon ato yoishquin. Ascacun ato nicasharacahuun man ato nicasharaino unimanonfo. Ascan man ato nicayamaino aton ointi ihuu itiro. Ascashu marifi man funocointiro.

<sup>18</sup> Nocori Upa Dios cufishocahuun. Diosin nocon amapaiyai cuscacoin man non huamisiquin. Ascashocai nocon nomuran non ahua chaca shinainma. Non isharapai fusti. <sup>19</sup> Uarifi Dios cufishocapun matoqui ua samamashta nasomanon.

*Ato Dios cufishotan ahuun tsain unutaqui ato yoini*

<sup>20-21</sup> Upa Diosin nocon ointi unimamamisi nocon nomuranshon non ahuashta shinanchacanonma. Nocon Ifo Jesús nocohuunoashu man naafiacun Apa Diosin funimani. Nantifi finoanshu nocon Cushumisi shara inon. Jesús nocon nashonihuunoashu non Upa Diosin ahuun yorafo ipashquin. Ascacun man ahuara shara yopai cuscan Upa Diosin mato inantiro mato amapaiyai cusan man anon. Furun Jesucristohuunshon nocon nomuran nocon shinanmasharashu noocoqui unimacoinsquin. Ascacun nantiffain non Jesushuunoa yoisharapacunaca. Nanscari inon.

<sup>22</sup> Uhuun yoramishtichin un mato cunushona maton nomuran mato shinansharmashquin. Un mato chitoshta cunushona. Ascacun funaquima un mato cunushona cuscan ua nicasharacapun. <sup>23</sup> Un mato tapimapai nocon yorashta Timoteo natian man cunu murannoashu man caian. Ascan samamashta uqui nocoashu u afu mato ari cai.

<sup>24</sup> Nantifi ichananfo maton Diosin tsain yoimisifo non cushumisifo non nantifi Diospan yorafo ua yoisharashocahuun. Italia anoaofanri mato yoisharafo.

<sup>25</sup> Upa Diosin matohuun noiquin nantifi mato shara huashofafainon. Nanti.

## Santiago Icoinra Huafu Cunushoni

### *Santiago ato tsain shara yoini*

<sup>1</sup> Uhuun yoramishtichin man manifoti pashcananni. Unquian Santiago un mato yoisharapai. Ascan un mato cunu fomai man tapinon. Upa Dios futan nocon Ifo Jesucriston un ato yonomatifin unquin.

### *Upa Diosin noco cayacafi shinamasharatiro*

<sup>2-3</sup> Uhuun yoramishtichin ahuara ahuuscarafaino man shinanchacatamarocon man Jesús icoinra huaquin finacoinsion funaquima man tunutiro. Man asca huaino Jesús mato imapaiyai cuscan man atiro. Ascan ahuaraoan mato chaca huamapaifiaino unimacoincahuun. <sup>4</sup> Man ascashu Jesús cuscara ahuun tanamisicoin shara man itiro. Ahua futsacai man yopaima isharashquin.

<sup>5</sup> Ratoran man futsan man ahuashta tapishoma Dios yocacahuun mato tapimanon. — Ua fucashni huayamacahuun, —ishoncai mato Upa Diosin yoinacama. Man tapipaiyai cuscan nantifi unimacainrocon mato tapimashquin. <sup>6</sup> Ascan man Dios yocafiatan ointi rananya iyamacahuun. Shinanquin isca huayamacahuun, —Un Dios yoca cuscan ua tapimai iyamarai itsairaca ua tapimaimaran, —ishon anori shinanyamacahuun. Ascatama icoinra huacoincahuun. Tsoan icoinra huacoinyamashu nan fuitan ihui focutatiro cuscan. Ascashu fuuhuanquin ihui focuacaiton non tapitiroma raquiricaimain focuaquicai. Nanscarifi aquin tsoan Dios yocafiaquin icoinra huacoinyamashon futsa futsa huaquin shinantiro. <sup>7</sup> Man ascaiton, —Nocon Ifoan noco ahuarashta huashoinran —ishon shinanyamacahuun. <sup>8</sup> Ascan, —Uncai tapiama Diosin ua ashoyamaraquinmain ua ashoicain, —ishon shinanyamacahuun. Ascarafocai Diosin ato ahuashta huashoshquima. Nanfoan ointi rananyashon futsa futsa huaquin shinamisifo.

<sup>9</sup> Ascan atirifi Diospan yorafo nan ahuuomafohuunoa icoinra huamafoan shinantirofo isca huaquin, —Nan ahuuomafoai ahumararan, —ishon atohuunoa shinantirofia nanfocaifin Diospan facufoquin. Ascafia nan ahuuomafoan shinantirofo isca huaquin, —¡Aicho! Unfin Diospan facucoinquin. Un Jesús yafi Dios fu ipashquiran, —ishon shinantirofo. <sup>10</sup> Nanscarifiai ratoran Jesús icoinra huaa futsan mafo ichapayashon shinantiro isca huaquin, —Uhuun mafocai ua imasharatiroma. Urifi un Jesús fasi yopacoin uhuun Ifo inon ua imasharanon. Jesús ua numayamaino urificai un ahuashta itiromaran, —ishon shinantiro. Charo samamashta tsasiashu niriqui futsutiro. Nanscarifiai yora mafo ichapaya samamashta natiro. <sup>11</sup> Farin fanafo tsacaino samamashta tsasitiro. Ascashu niriqui futsutiro afanancai shara itiroma. Nanscarifiai nan mafo ichapaya ahuun mafo inanmitsapaifiaino samamashta nariscai amaqi cachitiro.

### *Ahuara chaca non finonfainton Diosin noco tapipai nonmain tanasharaquin*

<sup>12</sup> Tsoan omitsiscafiaquin tunucoianfin nanfin unimacoin itiroquin. Ascacun Upa Diosin ahuunoa yoiyon i sciaquin tunucoianfin nanfin unimacoin itiroquin. Mian nicasharafain niyoshon mian noimisi. Ascashufin natian min ufu ipatiroquin, —ishon yoini. <sup>13</sup> Tsoancai yoitiroma isca huaquin, —Un chaca huapaiyai cuscan Upa Diosin afin ua chaca huamapairan, —ishocai yoitiroma. Tsoanshtaricai Dios chaca huamatiroma. Arificai tsoa chaca huamapacunacama.

<sup>14</sup> Ascatamarocon ratoranfoan chaca huapaiyai cuscan atohuun nua. Afin ahuun nomuranshon chaca huapaiyai cuscan nanscacoain huatiroquin. <sup>15</sup> Un mato ahuara futsa yoi. Tau huaquin nocofunun ainfo facu nanumana. Funainquimashta ahuan shaqui murannoashu yosiactiro. Caiyaintian facu caintiro. Nanscarifi aquin tau

huaquin nocon nomuranshon non ahuara chaca shinanfafaitiro. Ascashon chipo non chaca huatiroquin. Ascatan chaca huaraiacai non Dios fu rafutiroma. Nocon chacahuunoashu amaqui non ipanaca.

<sup>16</sup> Ascacun uhuun yoramishtichin mafiri paramuyamacahuun. <sup>17</sup> Nocon Upa Diosin nai muran ifiashon nuno mai ano noco shara huashofafaini. Nantofin nantifi noco oni huashosharaniquin. Fari non oshu non fishifo non nantifi chashaifoti Upa Diosin onihuani. Ahuara shara futsaforifi nantifi noco onihuashoni. Noco shara fustisi onihuashoni. Nanscarifai fari tsacaino nocon yoshin samamashta fiananantiro. Asca Diosincai fiananapacunacama. Ascataricain ointi rananya ipanacama. Nanscasipacunaca. <sup>18</sup> Upa Diosin noco catonni ahuun tsain iconcoinhuunshon noco cainma futsa a cuscara shara non inon. Nonfin Jesús icoinra huaquin tau huanquin. Ascashu Diosin nantifi onihuanifotihuunoashu non ahuun facu iyoa cuscara.

### *Diosin tsainfin cayacaficoinquen nicashu nanscacoinceahuun*

<sup>19</sup> Uhuun yoramishtichin un mato yoiai cuscan nicasharacahuun. Futsan mato ahuara yoiaiton funaquima nicasharayocahuun. Tsain ichapa yoimisi iyamacahuun. Samamashta sinayamacahuun. <sup>20</sup> Upa Diosin Furun cuscara shara noco imapaifiaino non sinaitocai noco imapaiyai cuscan noco imatiroma. <sup>21</sup> Ascacun ahuara chaca maton nomuran man shinamisi cuscan huafain ahuara man chaca huamisifori shatucahuun. Ascatan Diospan tsain mato nomuran man nanushon. Mato yoini cuscan nicasharacoincahuun. Man Diosin tsain nicasharashufin man afu ipasharatiro.

<sup>22</sup> Diospan tsain nica fustiquima. Nan cununi cuscacoin acahuun. Man nicafiai ascayamashufin man mafiri paramuiquin. <sup>23-24</sup> Futsan ahuun fuso fuisitinin oinfashu samamashta oian cuscan ointiaquimai. Nanscarifai man Diosin tsain oinfashu nan oian cuscacoin aimai. Ato yononi cuscan man tapifiashucal ascacoianfoma. <sup>25</sup> Futsafocai ascarama. Diosin tsain shara fustisi oinsharashu nan yoia cuscacoiaino. Shafatifi Diosin tsain tanacoiancai ahua futsa afanan ahuun ifo itiroma. Ascashu ishara fusticoincain ahuun ointi unimatiro.

<sup>26</sup> Ascan tsoan yoiquin isca huai, —Unfi Diosin tsain nicacoinmisquin, —ishon anori yoifiaqui tsain chaca yoiquin shatuamashu nanscara yorafin afiri paramutiro.

<sup>27</sup> Ascafia nan facu uhuaomacinfo yafi ainfo funuomafo non cushusharaicai. Nan icoinra huamafoan acaifo cuscan non huaima non ascaino Upa Dios nocoqui unimai.

## 2

### *Nantifi yorafohuunoa nannorifosi shinansharacahuun*

<sup>1</sup> Uhuun yoramishtichin nocon Ifo Jesucriston Upa Diosin cuscacoin. Nanfin man icoinra huamisquin. Ascacun yorafohuun nannorifosi shinansharacahuun. Nan man futsafori shara huamisi cuscan huafainri futsafohuun shinanchacayamacahuun. Shara huacahuun. <sup>2</sup> Itsairaca nocofunu mafo ichapaya matofu ichanainno anio chashna shara sahuuti sharacapacoin sahuufain matofu ichanantiro. Ascan nantiantari nocofunu ahuuoma sahuuti chocashta sahuuashu arifi matofu ichanantiro. <sup>3</sup> Ascaiton nan nocofunu mafo ichapaya samamashta man yoitiro isca huaquin, —Uhuun yorashtan, nuno tsaoti shara ichananti pushu muran tsaoyohuun, —ishon man yoiaino nantianri ahuuomashta nocotiro. Ascashon man yoiquin isca huai, —Min cachiori nitiroran huayamaraquin tapa camaqui tsaohuu, —ishon man yoiquin chaca huai. <sup>4</sup> Man asca huaquicai yorafohuun nannoris man shinainma. Ascaquin man chaca shinain. Nan yora mafo ichapaya man shara huafiaquicai yora ahuuomashta man chaca huamisi. Ascaicai mafi ranan man nannorifosi shinanonainma.

<sup>5</sup> Ascacun uhuun yoramishtichin ua nicasharacapun. Un matohuun noicoinshon un mato cayacafí shinamasharapai. Yora ahuuomafohuunoa nan icoinra huamafoan shinamisifo isca huaquin, —Nan ahuuomafofai ahuamaran, —ishon shinancani. Upa

Diosincai atohuunoa anori shinainma. Nanffin yora ahuuomafo catoan Jesús icoínra huacoinonfo. Ascacun nan ahuuomafoan Upa Diosin noicoiainfoan ato yoiyoni cuscan nantifi ahuunafori atona iishquin.<sup>6</sup> Nannori Diosin yoifiano mancái ahuuomamishtifo sharacoin huamisima. Shinancapon. Nan ahuuomafoan mato chaca huamaforocon nan mafo ichapayafoan mato paramisifo. Ascashon mato curushcain ranushumuafaoan aton niaifocoin ano iyomisi.<sup>7</sup> Nanfoanrifi nocon Ifo Jesusqui tsain chaca huamisifoquin.

<sup>8</sup> Ascan nocon Niaifoan Diospan noco yononi cuscan man ashufin man cayacafi isharatiroquin. Noco yononi isca huaquin, —Mafiri man noimuai cuscan huafain futsafohuunri noicoincahuun, —ishon Diospan noco yononi. <sup>9</sup> Ascafia man asca huatamarocon nan mafo ichapayafoi man shara huamisi cuscacai nan ahuuomafo man shara huamisima. Manascaicain Diosin yononi cuscan man aimá. Ascaquifin man chaca huai.<sup>10</sup> Ascashon mancái shinanquin isca huatiroma, —Diosin noco yononi cuscan atrifi un nicacointiro. Asca fustishtacai un tanapaimaran, —ishon anori man shinainno yoitimacoin man itiro. Ascashu nantifi Diosin yononi cuscan man nicacasmai cafiscatiro. <sup>11</sup> Upa Diosin yononi cuscan, —Nocofunufoan aton ahuinma fu iyamaifoanno ainfofori nanscarifi aton funumafo fu itiromaran, —ishon yonofain Diosin yonoquirifi isca huani, —Tsoa rutuyamacahuun, —ishon noco yononi. ¿Ascashon maton ahuinma iyamaraiyainfoforifi maton funuma fu iyamafiacashon man futsa rutua namnun shara? Ma. Man futsa rutuacai Diosin noco yononi cuscan man aimá. Ascashu man yoitima itiro.

<sup>12</sup> Diosin noco yononi cuscan noco imasharapai afanan ahua chaca noco Ifo itama non afu isharacoincacainon. Non chipo Diosiqui nocoaiton noco yoishquin nonmain nicasharamisi iyamarai nonmain nicacasmamisiquin. Nannori noco yoishquin. Ascacun oinfain. Shinansharafain isharacoincahuun. <sup>13</sup> Ascashon Diosin nantifi yorafo puashoshquin. Ascan niyoshon man futsafohuun ramapaipaonimacun Diosiri matohuunri ramapaishquima. Ascan niyoshon man futsafohuun ramapaipaonicun Upa Diosin matohuunri ramapaishquin. Ascashocai mato onaintimaima. Ascatama manrocon afu ipasharatiro.

### *Tsain fustisi yoicaquima nan man yoimisi cuscacoin acahuun*

<sup>14</sup> Uhuun yoramishtichin un mato yoisharapai. Man futsafo yoiquin isca huamisi, —Un Jesús icoínra huairan, —ishon yoifiashocai futsafo man shara huamisima ipaitsicoin man yoimisi. Un Jesús icoínra huairan ishon yoifiashu maton nomuracai fiananancoianma. ¿Nanscarao Dios fu ipatiromun?<sup>15-16</sup> Natian iscara un mato tapimapai man tapisharanon. Itsairaca mato yorahua sahuutiromacun tushuomacuri oinquin man yoitiro isca huaquin, —¡Aicho! Uhuun yorashtan Diosin mia shara huaiquin. Sahuuti shara sahuuhuu matsinashquima. Ascatari pisharahuun. Un chipo mia shafa futsan oinshquinon. Casharatahuun, —ishon yoifiaqui yopai cuscan man inanyamaino nancaí ahuama. Mancaí ashosharama.<sup>17</sup> Nanscarifi aquí man yoiquin isca huai, —Un Jesús icoínra huairan, —ishon yoifiatan man futsa shara huayamaino acaí ahuama. ¿Tsoanco mato icoínra huatiromun a man Jesús icoínra huacun?

<sup>18</sup> Itsai raca futsan yoitiro isca huaquin, —Min Jesús icoínra huai min ahuara futsa yopaima Upa Dios fu ipashquin, —ishon yoitiro raca. Ascafia man futsafo shara huayamacun tsoancai tapitiroma man Jesús icoínra huaa. Unfin Upa Dios yonoshona cuscan nantififain man ointiro un Jesús icoínra huacoinnamainquin.<sup>19</sup> Nan Dios fustifin man icoínra huamisiquin. Nanfin sharaquin. Ascan yoshin chacafoanri man tapiafo Dios fusticoin. Ascashu fasi aquí ratucoincani tari taricani.

<sup>20</sup> Man ratoran futsan icoínra huafashion Diosin yononi cuscan man ayamashucái mancái ahuama. Ascan Diosin yononi cuscan man ayamashucái man icoínra huacoinnama. Tatimafafainyamacahuun.<sup>21</sup> Shinancapon. Upa Diosin nocon shuni Abraham

yononi cuscacoin ani. Ascashon nicasharacoincun Diosin yoini, —¡Aichol! Un mia yoia cuscan min aa. Min fasi shararan, —ishon yoini. Diosin yononi cuscan Abraham ahuun furun Isaac rutucuani Dios inanshquin. <sup>22</sup> Abrahamfin Dios icoingra huafain yoia cuscan aniquin. Diosin yoini cuscan huacoinshon non tapitiro a icoingra huacoinshon. <sup>23</sup> Icoingra huacoincun Upa Diosin ahuunoa yoini, —Abraham minfin sharacoinquin. Ascashu min ufu isharatiroran, —ishon yoini. Diosin Abraham yoiniri, —Abraham minfin ufu rafusharacoinmisquin, —ishon Diosin yoini.

<sup>24</sup> Ascashon man tapitiro non icoingra huaa fustihuunoashuai non Dios fu ipatiroma. Non icoingra huacoinfain noco yoia cuscan acoinnashu non afu ipatiro.

<sup>25</sup> Nanscarifiai nan ainfon furoma ahuun anu Rahab. Nan Israeli rafu Rahab ahuun caifoan pushurasi muran noconifo ahuu cuscaramainquin tapipaicani. Ascashu chipo Rahab ahuun pushu murancoin iquinifo. Ascacun nanton ahuun pushu muran nocon caifo rafu onuni ato ahuusca huanonfoma. Ahuun pushu muranshon ato fai futsan nichini ahuun caifo futsafoan ato fuchinonfoma. Upa Diosin Rahabhuunoari yoini, —Min ua icoingra huashon nan rafu min shara huaa. Ascacun un mia imasharairan, —ishon Upa Diosin Rahab yoini. <sup>26</sup> Afanan un mato iscara tapimasharanon. Nocon furo yoshin nomaqui caanofin nocon caya natiroquin. Afanancai shara itiroma. Nanscarifi aquin non Diosin icoingra huafashion noco yononi cuscan non futsafo shara huayamainocai nancai ahuama. Nonascaicai non shara itiroma.

### 3

#### *Nocon tsainhuunoa cununi cuscan*

<sup>1-2</sup> Uhuun yoramishtichin un mato ahuara futsa yoinon. Maton muranfin tapimamisi fustirasi itiro. Nantifinton man non ahuara amaqiri chaca huafafainmisi. Ascafia Diospan tsain tapimamisifoan amaqiri yosicun Upa Diosin ato onaintimaquin finacoinshquin. Ascan nan ahuara chaca yoimisima nancaifin isharacoinmisquin. Ascashu shara fustisi itiroquin.

<sup>3</sup> Un mato afanan ahuara futsan tapimapai. Nan caballo ahuun cunopan anushushon fichiqui rusfi chichishon cayacafi casharai canon non ninifoanfafaitiro. Caballo uhuapacoinfiacun nan ahuun anushumutinin uhuapamashtacoinfashion nan non nini-aquiri catiro.

<sup>4</sup> Shinancapon. Shashohuan uhuapafiacun ahuun chifishtati uhuapamashtafashion nan non iyopaiyaiquiri iyotiro. Fuuhuanun shashohuan catima huafatiro ahuun chifishtatinin nan non iyopaiyaiquiri iyotiro. <sup>5</sup> Nanscarifiai nocon ana uhuapamafashion nocon tsainmanri non futsafo fasi chaca huatiro. Nofiri non chaca huamutiro. Ascan parito ushu uhuapamashtacoinfiano mau uhuapacoin cotiro. <sup>6</sup> Nanscarifiai nocon ana uhuapamashtacoinfia chi cuscara. Nocon tsainhuunoashunofiri non chaca huamucointiro. Ascashucai non afanan isharacointiroma. Nocon tsainhuunshon non nantifi chacana huatiro. Yoshin chacahuunshon non ahuara chaca yoitiro futsafori omitsiscamashquin.

<sup>7-8</sup> Asca yoina futsa futsatapafo yafi puiyafu non mupash cuscara non unu muran icafore non onaonma huatiro. Ascafia noco anancai tsoanshta non onaonma huatiroma. Ascashon nocon tsainman non chaca futsa futsatapafo yoitiro. Nocon tsainfin nan rono pau cuscaraquin. Nocon tsain chacahuunshon non futsafo namatiyo.

<sup>9-10</sup> Nanhuunri nocon Ifo Upa Diosihuunoa non tsain shara yoitiro. Nantofin yorafo onihuaniquin a cuscara inonfo. Ascafia nan noco anari non futsafo tsain chaca yoimisi. Nanhuunri non tsain shara yoitiro. Ascacun uhuun yoramishtichin ascaramafinquin. <sup>11</sup> ¿Unu rufoquinoashu tsosi afainocai unu saoya ositiromun? Ma. Ascaracai itiroma. <sup>12</sup> ¿Uhuun yoramishtichin non manian fanamun shopa foaitiro? Ma. Ascaracai foaitiroma. Non ahuara fanafin nanscaracoin foaitiroquin. Nanscarifiai unu rufoquinoashu afainocai sao ya afatiroma. Ascatai tsain shara yafi chaca ositiroma.

### *Diosin noco iconcoin shinanmatio*

<sup>13</sup> Tsain futsari un mato yoinon. Nan mafi ranan man cayacafi shinanmumisi cuscan. Futsafori man ashosharamisi. Ascashon man ato ismasharatiro. Tsoa chaca huamisima nan Diosin yonoaiyai cuscan fustisi huamisi. Manascaiton nantiffain ointirofo man Dioshuunshon cayacafi shinansharacun. <sup>14</sup> Ascan man isharatamarocon maton nomuran fucashcoin icain futsa aya cuscan fipaifain man shinanchacafain mafi man apaiyai cuscan fustisi futsafo yonoquin. Anori shinanquin isca huayamacahuun. —Un Diosin tsain tapicoian. Un ahuun ointi cuscaracoinran, —iyamacahuun. Anori yoiquifin man futsafo paraincain maton nomuran man chaca shinain cuscan fusti huafain man ato fomanpai. Ascashufin man cacapaimisicinfoquin.

<sup>15</sup> Anoricai Upa Diosin mato tapimamisima. Jesús icoingra huamafoan shinanchacamisifo. Man ascashon Satanás yoshin chacapan mato amaquiri shinanchacamamisi. <sup>16</sup> Isca huaquin mato shinanmatio. Futsa aya cuscan fipaifain futsaqui shinanchacafain mafi apaiyai cuscan fustisi shinanfain futsafo matohuunoa man shinanmapai ato yonoshquin. Ascashufi man cacapaimisifoquin. Manascaifin fasi man fochishmanantanantiroquin. Ascaquin man ato fucash huatiro chaca futsa futsatapafo huaquicai tsoan cayacafi shinantiroma.

<sup>17</sup> Ascan Upa Diosin cayacafi shara shinammisi cuscan matori shinanmapai isca huaquin. Maton nomuran shinanshara fustifain futsafo fu shara huatanan Cain fochochmanantanapaitama futsafo shara huashofain futsafoan mato yoia cuscan nicasharafain futsafo shutiacufoanpayamafain futsafohuun ramapaiquin ato shara huashofafainmisi icain, nantifiton nannorisi shinansharafain ointi rananya iyamacain fomanpaimisiri itamarocon cayacafi fustisi yoimisi. <sup>18</sup> Ascashon nannorifosi man shinainno futsafori man shinanmasharatiro isharacoinnonfo Jesús cuscara shara ishcaquin.

## 4

### *Icoinra huamafoan apaiyaifo cuscan noiyamacahuun*

<sup>1</sup> ¿Ahuuscain mafi ranan man fochishmanantanantiashu man sutunainmun? Maton nomuran shinanchacashufin manascaicain. Chaca fusti fuchipai. <sup>2</sup> Man ahuaraofo fuchipaifiaquicai man fitiroma. Ascashon fasi fuchipaiquin man futsa rutupaitiro fianpaiquin. Ascashu man fochochmanantanain tsain isininpaton man iquinonain. Ahuaraofo fipaiquin man fipaiyai cuscacai man Dios yocamisima mato inanon. <sup>3</sup> Ascashon Dios cufifiaquin man amaquiri yocaitocai. Asca Diosin mato ahua inantiroma. Mafi man apaiyai cuscan fustisi amupaimisi. Manascaitocai mato ahua inantiroma.

<sup>4</sup> Afin mato amapaiyai cuscacai nancairocon shinantama nan mafi ranan man apaiyai cuscan fustisi man shinamisiquin. Ascaquicai man Dios noicoianma. ¿Man tapiamamun nan icoingra huamafoan fuchipaiyaifo cuscan marifi man fuchipay. Ascaquicai man Dios noicasmamisi itiro? Asca man icoingra huamafo cuscara icashufin Diosin noicasmamisi man itiroquin. <sup>5</sup> Diospan tsain cununi isca huaquin, —Uhuun Yoshin Shara un mato ya rafumaniran, —ishon cununi. ¿Man shinanmun ipaitsi noco cunushoni? Man ahuara futsafo noiaiton oinquen ahuun Yoshin Shara fasi ahuun ointi isincointiro. <sup>6</sup> Ascan afanan Diospan tsain noco cunushoni isca huaquin,

“Ratoran futsan Upa Dios nicacasmal afin apaiyai cuscan fustisi huai nanfin cacapaimisicinfoquin. Ascaraquicai Diosin unimaima. Ascashon ato onaintimashqui. Ascafia nan ratoran futsan Jesús cuscara ipaicoinquifin nantonfin tapiaquin fasi Jesús yopacoin isharashquin. Nanscarafohuunfin Diosin ramapaiquin ato shara huashoshquin finacoinschquin ahuun curushu ato inanshquin tanasharanonfo,”

ishon cununi.

<sup>7</sup> Ascacun Upa Diosin mato yoimisi cuscacoin acahuun. Nan yoshin chaca Satanás mato amapaiyai cuscan nicayamacahuun. Ascashon yoiquin isca huacahuun, —Satanás, Jesucristo uhuun Ifoquin. Umaquinoashu catahuun, —ishon yoicahuun man asca huaino matomaquinoashu ichoriscatanon. <sup>8</sup> Ascatali Dios fu rafucahuun a cufifafaincahuun. Man ascaino matofu rafucacaitiro. Man chaca huamisi cuscan shatucahuun. Ascashu afanan ointi rananya iyamacahuun. Man Dios tanafiaflashon nantianricai nan icoira huamafoan acai cuscan man huatiroma. Ascaquicai man tanasharatiroma. Ascashon maton nomuran man shinanchacamisi cuscan shatucoincahuun.

<sup>9</sup> Man chaca huamisi cuscan shinancasmacahuun. Ascashon man chaca huamisi cuscan shinantani uaicahuun. Afanan afo shinancani shuchitamarocon uaicahuun.

<sup>10</sup> Ascashon nocon Ifo Jesús yoiquin isca huacahuun, —Ifon un fasi mia chaca huamisi. Ascacun ua numahuu, —ishon yoicahuun. Man asciton Upa Diosin matohuun ramapaiquin maton chaca soashotiro man afu ipanon.

### *Futsahuunoa yoiqui chaca huayamacahuun*

<sup>11</sup> Uhuun yoramishtichin Diospan tsain noco yoiquin isca huani, —Noinancatan yoiti huatananyamacahuun, —ishon cununi. Man ascayamacai Diosin noco yononi cuscan man aimai. Ascaquifin, —Diospan tsain amaqiriran, —ishon man yoicai. Ascashon mancái yoitiroma, —Diospan tsain cayacafi iyamarai amaqiriran, —ishon yoitamarocon ahuun tsain man nicacointiro. <sup>12</sup> Diosin fustiton noco yonopaiyai cuscan noco cunushoni. Arus fustifi tapicoianquin tsoamain isharacoian iyamarai chaca huaquin. Nanton arus fusti tapia noco numa iyamaraimain noco omitsiscapanacafo muran potaicai. ¿Ascan ahuuscain man futsafihuunoa yoiqui chaca huamisimun?

### *Ahuara ahuuscara afiaitocai non tapitiroma*

<sup>13</sup> Natian un mato tsain futsa yoiaiton ua nicasharacahuun. Atirifain man yoimisi isca huaquin, —Na shafata iyamarai funamanri non pushurasi futsa ari canon. Nan-noshon non fari fusti finonyoicanon ahuara inanmitsashon ahuun rafanan non pui ichapa finon, —ishon man yoimisi. <sup>14</sup> Ascafashocai man tapiama funamanrimain ahuuscantanquin. Nan man cainitian yafi man naitian nishfo cuscara. Man oinfaino samamashta yamafoaintiro. Nanscarifiai mancái chai nipatiroma.

<sup>15</sup> Ascacun anori shinantamarocon man shinankin isca huatiro, —Upa Diosin ua nimapaiyaino un niyotiro. Nantonfin ahuara apaiyai cuscan ua huamatiroquin, —ishon man yoitiro. <sup>16</sup> Ascafia mancái ascara shinamisisima. Ascatalamarocon man yoiquin isca huamisi, —Ufin un apaiyai cuscan un huatiroran, —ishon man shinamisi. Ascashu man cacapaimisi. Man ascafín fasi chacacoinquin. <sup>17</sup> Ascashon ratoran futsan Diosin amapaiyai cuscan tapifiashon futsa ashosharayamaino nantofin chaca huaiquin.

## 5

### *Mafo ichapayafo Santiago ato yoini ascanonfoma*

<sup>1</sup> Mafo ichapayafoan ua nicasharacahuun un mato cayacafi yoinon. Ascan natian man ahuashta yopayamafiai chipo man fasi omitsiscashquin uaiquin. <sup>2</sup> Man ichapa aya cuscan chipo payocoi futsui. Maton sahuuti sharacapacoinfo coroisifoan piquin futsashcani. <sup>3</sup> Maton pui afanan ahuashta ahuun nuima. Man maton pui ichapacoin mucua oinquin futsan yoitiro, —Mifin min yoashicoin. Mina fusti min shinain. Ascashocai man futsafihuun ramapaimisisima. Ascacun Diosin mato onaintimashqui. Maton ointi ihucoin mui. Man ahuuscampaishquin. Man fasi ratucoin nan tapiashu chipo man omitsiscashquiran, —ishon ato yoi. Nanfin ahuun unutaniquin.

<sup>4</sup> Shinancapon. Mancai maton yonomamisifo inansharamisima. Man ato fuparamisi finonmafain fiifiaquin. Upa Diosin ahuamamishti atiroquin. Man ato chaca huamisi cuscan nanton oian. Fasi yonoi atsanacani piniaifoan Diosin man ato nica.

<sup>5</sup> Mato yonomisifo omitsisca cuscan mancai ascatamarocon man niyoashu man fasi isharamisi. Ahuashtacai man yopamisima. Moipan ichapa pii shoatiro. Tapiama shoacun ifoan rututiro pinonfo. Nanscarifiai mancai niyoashu isharamisi. Unimacain ahuara apaiyai fustisi man amisi. Man tapiama ascara chaca huafashi samamashta man nai omitsiscai futsushquin. <sup>6</sup> Yora tatimamishtifiacun man ato chaca huamisi. Atohuunoa tsain chaca man huai niaifo ato achimashquin. Man ato chaca huaino ahuuscashucai afinri numatirofoma. Ahua chaca huayamafashi nan maton tsainhu-unshon man ato rutumani.

### *Omitsiscafiaquin tunufain Dios cuficahuun*

<sup>7</sup> Uhuun yoramishtichin man omitsiscafiaquin tunuyocahuun nan nocon Ifo Jesús oaitian. Funayamacahuun. Natian un mato ahuara futsa yoipai. Mau fanashon ifoan funainquimashta manasharatiro nan funusharaitian. Oi pacutian manasharatiro funushonaitian. <sup>8</sup> Nanscarifi aquin manayocahuun. Nocon Ifo man oti chaimaquin. Ascacun ahuun tsain cachiquiri huacaquima tanasharacahuun.

<sup>9</sup> Uhuun yoramishtichin nocon Ifo man oti chaimaquin. Tapicahuun nan chacafo on-aintimayoi oiquin. Ascacun futsaqui tsain chipuyamacahuun matori onaintimanonma. <sup>10</sup> Nocon shunifoan nan nocon Ifo ahuun tsain yoimisifoan fasi omitsiscafiaquin funatama nocon Ifohuunoa ato yoipaonifo. Nan ipaonifo cuscan atohuun caocahuun. <sup>11</sup> Man man tapia nanfoan omitsiscafiaquin funatama tunucoinpaonifo. Nanscarafofin unimatirofoquin ishon non yoimisi. Nocon shuni Jobhuunoa man man nicamisi. Fasi omitsiscafiaquin nocon Ifon icoinra huacoinni. Ahuun tsaincاي cachiquiri huanima. Ahuun unutaqui Upa Diosin fasi shara huashoni nan funoni cuscan afanan inancoinni. Ascan non tapitiro nocon Ifon nocohuun ramapaicain nocohuun noicoin.

<sup>12</sup> Ascan man man tapia Upa Diosin nocohuun noiquin noco cushusharamisi. Ascan Diosin noco shinanmafafaini nan man tapicoian cuscan futsafo ismacahuun. Maton tsainhuunshon ato ismacahuun. Man futsafo matohuunoa icoinra huemapaiqui isca huaquin yoiyamacahuun,—Diosin ua oiainno un mato icon yoiran,—ishon yoiyamacahuun. Mato tsain,—Ai iyamarai ma,—ishon yoicahuun. Icon fustisi yoicahuun. Man ascaiton maton tsainhuunshon man chaca huatiroma Diosin mato onaintimanonma. Ascar shinancahuun.

<sup>13</sup> Asca man ratoran futsan chaca finonshon Upa Dios cuficahuun. Man ratoran futsan unimaquin Dios fanainshotiro isca huaquin, —¡Aicho! Upa Diosin min shararan, —ishon fanainshocahuun. <sup>14</sup> Nan ratoran futsa isinincaiton nan ichanamisifo aton cushumisifo cunacahuun a cufishononfo. Nocon Ifo cufishquin ichapamashta shuniyashon fumanfain nocon Ifo Jesús anuhuunshon Upa Dios cufishocahuun. <sup>15</sup> Man icoinra huacoinshon isinincailo man cufishonaino cayasharatiro muma shara itiro. Nanton chaca huamisicun Upa Diosin a caya huafain ahuun chaca soashotiro. <sup>16</sup> Ascacun man chaca huaa cuscan yoinonancahuun Upa Diosin maton chaca soashonon mato caya huanon. Ratoran futsan Jesushuunoashu isharashon nanton mato Upa Dios cufishonaiton nicasharashquin nan cufiai cuscan ahuamamishti huashotiro.

<sup>17</sup> Ascan nocon shuni Elías nan nocofunu noco cuscarari ipaoni. Non muai cuscarari arifi mupaoni. Ascafiaquin Upa Dios fasi cuficoiaiunno fari rafu non fusti nushmancayan oi fuyonima. Cufinquin isca huani,—Upa Diosin uhuun yorafoan mia cachiquiri

huafquin. Ascacun oi fumariamahuu uhuun yorafoan afanan mia tanasharanonfo,—ishon cufini. Asca huano fari rafu non fusti nushmancayan oi fuyonima.<sup>18</sup> Ascan chipo afanan cufaino oihuanrasi funi. Nantianri yonofo foisharani.

<sup>19-20</sup> Uhuun yoramishtichin mafin ranan Diosin tsain tanacashon futsan Diosin tsain cachiquiri huacun afanan Jesús tanayamaiton futsan yoiquin,—Min chaca huamisi cuscan shatuhuu Jesús afanan tanasharahuu,—ishon anori man yoiaino nicashon ahuun chacafo shatucoianshu Jesusqui afanan nasotiro. Omitsiscapanacafo muran cacuana futsan numayamaino. Asca huashon ahuun chacafo cachiquiri huamacoинshon Diosin ahuun chaca rau huashotiro futsan numacun. Ascacun afanan Diosincai ahuun chaca ahuunoa shinainma manmain ahuun chaca shatumacoинshonfin. Nanti.

Santiago

## Pedronun Icoinra Huafó Cunushoni

### *Pedronun ato tsain shara fomani*

<sup>1-2</sup> Unquian Pedro un Jesucristo fu rafumisishon ua yonopaiyai cuscan un ashoshquin. Un mato cunu fomai man tapinon. Man Jesús tanaino maton mai Jerusalén anoshon mato potanifo. Ascan man maitio paschcai futsufaini. Atirifi man Ponto ano foaino atirifiri man Galacia ano foaifoanno atirifi Capadocia ano foaifoanno atirifi Asia ano foaifoanno atirifiri man Bitinia ano foni. Upa Diosin inonpacoai cuscan mato catonni ahuun facufo man inon. Jesucristo mato nashoni maton chaca mato soashoshquin ahuun Yoshin Sharahuunshon mato chaca shatufain man tanasharanon. Ascano Upa Diosin matohuun ramapaiquin maton nomuran fasi unimafafaini.

### *Non Diospan facufoshon non tapitiro non afu ipashqui cuscan*

<sup>3</sup> Ascacun nocon Ifo Jesucristo Apa non aicho huapanon. Upa Diosin ahuun Furun Jesús mai muranno funimani ahuunoashu nocon nomuran fiananan huai a cuscara funasharacoin non inon. Ascan ahuunoashu non nipai aqui non nocoaitian afu ipashquin. <sup>4</sup> Ascashon Upa Diosin noco yoini cuscan noco numapacunaca non afu ipanon. Diosin ica cuscariifiai norifi non aqui nocoaitian a cuscara shara iishquin. Noco imapacuai cuscan unupacunacama icain chacapacunacama icain sharapacunaca fusti. Charofo sharashta iyoflashu chipo tsasi futsutiro. Ascan noncái charo cuscarama. Chipo noco Diosin imashquin cuscacai fianananpacunacama. Non afu isharapacunaca. <sup>5</sup> Ascan non icoindra huacun Upa Diosin ahuun curushhuunshon noco cushusharafafaini Jesús oaitian. Nantianri noco imashquiai cuscan nantifi noco inanshquin ahuashtacai non funoshquima.

<sup>6</sup> Ascan natian niyoashu man omitsiscafiai man chipo Jesús fu ipasharashquin. Ascacun omitsiscafiai fasi unimacoincahuun. <sup>7</sup> Diosin nocohuunoa onanpai nonmain Jesús icoindra huacoinnaquin. Un mato ahuara futsa tapimapai. Cuno nan oro chi muran coashon non tapitiro nan orocoainmainquin. Nan orocoianshuai cotiroma. Nan-scarifiai omitsiscafiai man Jesús cachiquiri huayamacun Diosin onantiro man Jesús icoindra huacoinnamainquin. Nan oro chicoinfia man Jesús icoindra huacoinna nancaifin fasi shara finacoianquin. Ascan Jesús oaitian omitsiscafiai man icoindra huacoinmisicun mato yoiquin isca huashquin, —¡Aicho! Min omitsiscafiai min isharamisi. Ascacun un miqui unimacoinni. Min ufu rafusharapacushquinran, —ishon mato Jesús yoishquin.

<sup>8-9</sup> Man nocon Ifo Jesús oinmisimafiashon man ahuun noi. Natianri man oiantaimafiashon man icoindra huacoinna. Ascashu man fasi unimacain maton ointi roama roamamisi. Ascashon man icoindra huacun Diosin mato imasharapacunaca.

<sup>10-11</sup> Nocon shunifoan nan inon pacoai cuscan Diosin tsain yoimisifoan ahuun Yoshin Sharahuunshon Jesushuunoa yoipaoni isca huaquin, —Nocon Numamisi nocoqui os-hqui. Mato omitsiscashoshquin man ahuunoashu isharanon, —ishon cununi. Ahuunoa cunupaoni cuscan nanfoanri fasi tapipai tsoamain nocon Numamisi iishquicain ahuitiarimain oshquicain. <sup>12</sup> Diospan Yoshin Sharapan ato tapimani man inonpacoai yoini nanfoan niyocashon oinyotirofoma. Ascatamarocon afoan oinyamafaino mancaifin oinshquiquin. Ascan nan tsain shara Jesushuunoa nantifain man non nicamisi. Upa Diosin icanoshon ahuun Yoshin Shara nichini ahuun curushhuunshon mato Jesushuunoa yoimisi. Nan man nicamisi cuscari Diospan oinmati afu nai muran icafoanri tapipaicoancani.

*Upa Diosin noco yononi non Cristo cuscara shara inon*

<sup>13</sup> Ascan maton nomuran cayacafi shinansharacahuun. Jesucristo oaitian Upa Diosin mato shara huashoshquiai cuscan itisharacahuun mato yoini cuscan fiishcaquin. Ascacun ahuara futsan shinanyamacahuun. Afin mato amapaiyai cuscan fustisi shinancahuun. <sup>14</sup> Manfin Diospan facufoquin. Ascan Upa Dios nicasharacahuun. Mato amapaiyai cuscacai man tapiyopaonima. Man chaca huapaoni cuscan afanan shinanyamacahuun. <sup>15</sup> Ascatamarocon natian Upa Diosin mato isharamapaiyai cuscan fustisi acahuun. Nanfin shara fustiquin. Ahuacai chaca huamisima. Ascacun marifi a cuscara shara icahuun. Nan man afafainnai cuscan isharacahuun. <sup>16</sup> Diospan tsain cununi isca huaquin, —Unfi isharamisiquin. Ascan marifi isharacahuun, —ishon Diosin yoini cuscan cununi.

<sup>17</sup> Ointiaquimayamacahuun man nocon Upa Dios cufifafainai cuscan nanton noco nantifi oinfafainni nanscarafosi. Nanscacun Diosin nanscasi huaquin nocohuun noi. Upa Diosin nan yonoshomisifo cuscan atoti inanpacushquin. Nan yonoshosharamisifosi ato paratama inanpacushquin. Ascan nan yonosharamafo funoshcani. Ascacun oinfain. Nuno mai ano niyoshon Diosquiri shinansharacahuun mato yonomapaiyai cuscan ashocahuun funoshcaquima. Man nonfin tapiaquin non nuno mai ano ipanacama. Non chipo Diosqui nocoshquin.

<sup>18</sup> Man manfin tapiaquin nocon shunifoan noco tapimapaoni cuscacai afoan noco numapacutiroma non afanan chaca inonma. Nan pui paratamacoinflashocai noco numatiroma non afanan chaca huanonma. Nan pui chicoinflashu nanfori cuyoi futsushquin. <sup>19</sup> Cristo fustitofin noco numatiroquin. A fustitocai ahua chaca huancama. Nan chashoan facu muma sharacoin cuscara. Jesús aficoin noco nashoni ahuun imi fonihuunshon noco numashqui non afanan chaca inonma. <sup>20</sup> Upa Diosin mai oni huataima Furun Jesús catonni noco Numamisi inon. Ascafia futsafoancai tapiyopaonima natiantan Diosin mato tapimana. <sup>21</sup> Cristohuunshon man Diosin icoira huamisi. Criston naafianicun Apa Diosin funimani afu nantifiton aton niaifocoin inon. Ascan manfin Dios icoira huafain man man tapia chipo man afu ipashquin.

<sup>22</sup> Man non Jesús icoira huashon ahuun tsain iconcoin cununi cuscari man nica-coinmisi. Ascashu man a cuscara shara imisi man icoira huaa futsafori noicoinmisi. Fomanonantama noinainshara finacoincahuun. <sup>23</sup> Man chaca ipaoni cuscacai man afananascaima. Diospan tsainhuunshon mato fiananan huaa. Ahuun tsainhuunoashu non ipasharati. Ahuun tsaincai cuyopacunacama. Nocon upa futan nocon uhua noco cainfiani non chipo natiro. Ascafia Diospan tsainhuunshon noco cainma funa. Ascashu ahuunoashu non afu ipati.

<sup>24</sup> Un mato ahuara futsa tapimapai man tapisharanon.

“Faasi taui foaisharaflashu chipo samamashta tsasitiro. Charofori taui sharashtacoin iyoflashu chipo samamashta tsasitiro afanancai non ointiroma. Nanscarifiai nantifi yoraforicai chai nipatirofoma. Nantifi non nai futsushquin. <sup>25</sup> Ascafia nocon Ifoan ahuun tsaincai ascarama. Nocon Ifoan noco yoia cuscan nan iconcoin cuyopacunacama.”

Nan tsain shara Jesushuunoa futsafoan mato yoimisi.

## 2

<sup>1</sup> Ascacun nantifi man chaca huamisi cuscan unucahuun. Futsafohuunoa shinanchacayamacahuun ato chaca huafain ato parayamacahuun atori fomanyamacahuun. Futsa aya cuscan fipaiquin ato noicasmafain ato yoiti huayamacahuun. Atohuunoari tsain chaca yoiyamacahuun. <sup>2-3</sup> Ascatamarocon Diospan tsain shara fuchipaicahuun. Facu rama caianton shoma apaitiro cuscan huaquin marifi Diospan tsain shara fuchipaicahuun. Man man mumisi nocon Ifoan noco shara huashoaiton. Ascacun mato imapaiyai cuscan fustisi tapisharacahuun.

### *Cristofin nan toquiri mutsisipa cuscaraquin*

<sup>4</sup> Ascan man toquiri pushu huaino toquiri ichapa yopafain nan uhuapa shara fusti man yopai pushu mutsisipa huashquin. Atirifi uhuapamafo afuchi putsainicani. Nanscarifiai nocon Ifo Jesusfin nan toquiri uhuapa shara nia cuscaraquin. Icoinra huamafoan nocon Ifo fuchipaicanima shinanquin isca huacani, —Aacai ahuama. Noncái a yopaimaran, —ishon yoifiaifoan Upa Diosin nocon Ifo Jesús catonni. Fasi ahuun noicoinquin. —Tsoa futsacai a cuscarama, —ishon Diosin yoini. Ascacun aqui fucahuun maton toquiri mutsisipa cuscara shara imanon.

<sup>5</sup> Man aqui oashu nan toquiri uhuapama nia cuscarafo man itiro. Nan Diosin pushu huatiro cuscai. Iquisi toquiri mutsisipa uhuapa shara fia. Nanfin nocon Ifo Jesús. Apan catonquin tau huani chipo nocorifi catonni Jesús cuscara shara non inon. Ascan Jesushuunoashu norifi non Diospan pushu cuscara. Tsoa na pushu muran opai ishara-cointiro. Ascan nonfin ahuun pushu anoa ahuun yonomatifoquin. Ascashon noco amapaiyai cuscan fusti non Jesushuunshon ashosharatiro. Non Diosin Furuhuunshon isharamisi. Ascacun non yonoshonai cuscan Upa Diosin nocoqui unimacacaini. <sup>6</sup> Ascan Diospan tsain cununi isca huaquin,

“¡Oincapon! Un Cristo oian arus fustifin sharacoinquin. Ascacufin un catoan-quín uhuun yorafoan ato ifo inon. Afin pushu quishi toquiri mutsisipa cuscaraquin. Ascacun uhuun yorafo afu isharanonfo. Tsoancai Cristo icoína huashon shinan futsapacunacama. Ascatamarocon afu unimapu-coinnacaran,”

ishon Diosin yoini.

<sup>7</sup> Icon tsoan Cristo icoína huashon ahuunoa shinantiro isca huaquin, —Tsoa futsacai Jesús cuscara sharama. Un fasi ahuun noicoinran, —ishon yoitiro. Ascafia tsoan icoína huayamaino Diospan tsain atohuunoa cunuquin isca huani,

“Pushu yonomisifoan quishi toquiri uhuapa shara potaifoan pushu ifoan yoiquin isca huatiro, ‘Nan quishi toquiri fasi shara. Un fuchipai nahuun uhuun pushu shara huashquin,’ ishon yoitiro. Nanscarifi aqui nan nicayos-mashunifoan Cristo potafianifo Diospan catonni ahuun yorafoan aton Ifo ipanon,”

ishon yoini. <sup>8</sup> Afanan Diosin tsain yoini cuscan huafain un maton yoi isca huaquin,

“Toquiri uhuapa fai namancaia racafiano oinsharatamacai otisicaini non pacutiro. Nanscarifi aqui tsoan nocon Ifo Jesús icoína huacoianshma pacui cafiscashu funotiro Upa Dios icari nocopaifiai omitsiscapanacafo muran focaniran,”

ishon Diospan yoini. Diosin yonofiani Cristohuunoa nicacasmafain yoitimashu funopacunacafo. Nannori Diospan tsain yoiyoní.

<sup>9</sup> Ascafia Diosin noco catonni ahuun yorafo non inon. Afin niaifocoinquin non yonoshotiro futsafori cufishoshquin Jesushuunoa ato tapimashquin. Noco a cuscara sharacoin imaino non ahuun yoracoinfo itiro. Ascashon ahuunoa futsafo yoisharashquin. Non faquish muran ica shinantsa apaoni. Ascafia afincion noco catonni ahuun yoracoinfo non inon afu shafacafi shara ipashquin. <sup>10</sup> Mancaí ahuashta nicayopaonima. Ascafian natian man Diospan yoracoinfo. Diosin matohuun ramapaifaiton mancaí muyopaonima. Ascafia natian Diosin matohuun ramapaifyaitofin man man mumisiquin.

### *Diosin yonomati sharofo icaahuun nantishotapiquin*

<sup>11</sup> Uhuun yoramishtichin un mato yoisharapaiyai cuscan ua nicasharacapun. Non icoína huamafo muran ifiashucái non atofu ipanacama. Noncái aton yoracoinfoma. Ascafia nan icoína huafoma icaifo cuscan ayamacahuun. Mato amaquiri shinanchacampaifiaifoan ascara shinanyamacahuun. Nanfoan maton nomuran mato

chaca huamapaicani. <sup>12</sup> Ascacun ato murannoashu Jesushuunoashu icoinscharacahuun. Nan man niyoano matohuunoa tsain chaca yoifiamisifo chipo Diosin nantifi noco ichanan huaitian nanfoan tapitirofo mancau ahua chaca huatama man icoinshamisi. Ascashon yoitiro isca huaquin, —¡Aicho! Nanfoan Dioshuunshon futsaf shara huashomisi. Ascacun Dios sharacoinran, —ishon yoishquicani.

<sup>13-14</sup> Nocon Ifoan apaiyai cuscan nantifi niaifofoan mato yonoaiton nicasharacahuun. Niaifocoin nicasharafain niaifo patasharinoafori nicasharacahuun. Nanfo Upa Diosin nichini chaca huamisifo onaintimatan a nicasharaifo aton yoisharanonfo.

<sup>15</sup> Ascan futsaf fasi tatemacoinkshon amaqiri shinamisifo. Ascashocai Diospan tsain tapipaicanima. Ascan ahua tapiamafiacashon mato isca huaquin yoipaicani, —Man Jesushuunoa yoimisi cuscan amaqiricoinran, —ishon yoimisifo. Ascan Upa Diosin mato yonomapaiyai cuscan futsaf man shara huashofafainaihuunshon man ato shatumatiro.

<sup>16</sup> Jesús fusti maton Ifocoin. Ascan ahua futsa shinantama isharacahuun. Diosin mato amapaiyai cuscan fustisi huafafaincahuun. Ascashucai ahua futsa maton ifo itiroma. Ahua chaca huatama Diospan yonomatifo ifafaincahuun. <sup>17</sup> Ascacun nantifi yorafohuun shinansharacahuun. Nantifi Jesús icoindra huafo noicoincahuun. Diosihuunoa shinancahuun isca huaquin, —Un Dios noicoinquin ua yonopaiyai cuscan un nicapaicoin. Uncau yoitima ipaima ua onaintimanonma, —ishon Diosihuunoa anori shinancahuun. Mato niaifofo nicacasmaquia ato nicasharacahuun.

### *Cristo noco omitsiscashoni cuscan norifi non ahuunoashu omitsiscatiro*

<sup>18</sup> Yonomatifoan maton ifo nicasharacahuun mato yoaifo cuscan ashcaquin. Ato nicacasmaquia atohuunoa shinansharacahuun. Nan mato shara huashomisifo fusti shinancaquia. Nan mato chaca huamisifori aton ismasharacahuun, <sup>19</sup> Man chaca huayamafiacun mato ifoan mato omitsiscamafiaino Diosihuunshon shinamquin tunucahuun. Man tunuaiton Upa Diosin matohuunoa yoisharashqui. <sup>20</sup> Ascacun man chaca huahuunshon maton ifoan mato coshaino man tunuanocai matona ahuama. Man shara huahuunoashucai man omitsiscaima. Ascan man shara huafiacun maton ifoan mato coshaino man tunucun nocon Ifo Diosin matohuunoa shinansharashquin. <sup>21</sup> Cristofin nocohuunoashu omitsiscacoinniquin. Ascacun norifi non ahuunoashu omitsiscatiro. Non ahuun caotiro a cuscara shara iishquin.

<sup>22</sup> “Ascan nantocai tsoa chaca huayamafain tsoa paramisima.”

<sup>23</sup> Futsafaoan roafainfoannocai pusinima. Omitsisca huafainfoancai ato yoiquin isca huanima, —Un mato chipo copishquiran, —ishocai yoimisima. Ascatamarocon Apahuunoa shinamquin isca huani, —Upa man min uhuunoa onancoian. Nanscarifi huaquin min ato onancoian. Ascan min ato ashquiai cuscan iconcoinran, —ishon shinanni. <sup>24</sup> Jesusfin noco ihui coyán iquinanquinoashu noco nashoniquin. Nantifi nocon chacafo amuran cuyoinanni non afanan chaca huatamarocon non a cuscara shara ipanon. Nan isi muahuunshon noco caya huamai non afu ipanon. <sup>25</sup> Ascan manfin nan chashoanfo funoa cuscarafo ipaoniquin. Ascafia natian man mato cushima Jesús qui nasoa mato cushima fainshquin man afu rafupacunon.

## 3

### *Ahuuscashumain funu fu ahuin isharatiroquin*

<sup>1</sup> Ascan nanscarifiai ainfofoan maton funufo nicasharacoincahuun. Atirifi mato funufoan Diospan tsain icoindra huayamafia ato nicasharafain ato Jesushuunshon shara huashofafaincahuun ipaishomari arifi nanto nocon Ifo icoindra huatiroquin. <sup>2</sup> Maton funufoan mato yoaifton nicatimacaquia nicasharafain man Jesús cuscara isharaiton oin atirifoan nocon Ifo icoindra huatirofo. <sup>3</sup> Foaromucai tuhuuti sahuufain sahuuti sharacapacoin sahuuhuunshoncui maton funu man icoindra huamatiroma.

<sup>4</sup> Ascataamarocon maton nomuran shinansharafain man futsafo tsain tsii huafain yoisharamisicun nanscarafa Upa Diosin fasi fuchipaico. Nanscarafa oinquin, — Nan fasi shararan, —ishon yoitirofo. —Na cuscara ainfofin ahuun ica sharacoinquin, —ishon Diosin ahuunoa oinquin yoitiro. <sup>5</sup> Nanscarra nocon shunifo ainfofoan Diosin icoingra huafain isharamisifo. Diosin ato nomuranshon shinamasharaino aton funufori nicasharapaonifo. Ascashon aton funu nicasharacoianfoanno ato funufoan atohuunoa shinantirofo isca huaquin, —Uhuun ahuinin ua shara huashofafaini. Ascafin fasi sharacoinquin, —ishon funufoan shinantirofo. <sup>6</sup> Nocon shuni Abraham ahuun ahuin Sara nanscapaoni. Ascashon ahuun funu fu tsainquin isca huapaoni, — Uhuun iforan, —ishon yoipaoni. Marifi ratutama isharacain nan Sara ipaoni cuscan man shinainno ahuun facufo cuscara man itiro.

<sup>7</sup> Nocofunufoan marifi nanscarifiai maton ahuinshtafo fu isharacain shara huafafaincahuun. Atohuunoa shinansharacahuun. Ainfofocai nocofunu mutsisipa cuscarafoma. Ascashon ato cushusharacahuun. Diosin matohuun ramapaiyaino man afu ipanaca. Maton shara huaa cuscari Upa Diosin maton ahuinfori nanscarafosi sharashta huashoshquin afu ipanonfo. Ascan ato shara huacahuun man Dios cufiain cuscan mato ashonon.

### *Man futsafo shara huafaiton mato omitsiscamacani*

<sup>8</sup> Ascan nan un mato yoia cuscan. Nantififain nannorisi shinansharafain futsafoan ahuara finoncun atohuun ramapaiquin noicoincahuun. Shara huatanancahuun. Capaimisi iyamacahuun futsafohuun ramapaiquin shara huafafaincahuun. <sup>9</sup> Ascan futsafoan mato chaca huafain mato roafaiton ato copitamarocon ato shara huacahuun. Nanscarra Diosin noco yononi. Non futsafo shara huaiton oinquin Upa Diosin noco fasi shara huashquin. Noco Diosin catonni noco shara huaquin. <sup>10</sup> Diospan tsain cununi isca huaquin,

“Man isharapaiquin ahuara chacafo yoiyamafain futsafo parayamacahuun.

<sup>11</sup> Ahuara chaca huaifo muran foyamacahuun mato chaca huamatirofoquin. Ascataamarocon futsafo shara huafafaincahuun. Futsafo fu fasi isharapaicoincahuun. Fochishmanantanancaquima. Maton nomuran tsii huatanancahuun. <sup>12</sup> Ascashu man isharaiton oinquin Upa Diosin matoqui fasi unimaicain mato cushusharashquin. Ascashon man ahuara yocaiton mato nicatiro. Man yocai cuscan mato ashoshquin. Ascan tsoan chaca huamisicun Upa Diosin ato nicaima ato shatumashquin,”

ishon huani.

<sup>13</sup> ¿Non futsafo shara huamapaiyaitomun tsoan noco chaca huamatiroquin?

<sup>14</sup> Ascafia ipaishoma man isharaiton mato omitsiscamatirofo Upa Diosin mato shara huashquin. Diospan tsain cununi isca huaquin, —Icoingra huamafo musua cuscan musuyamacahuun. Ratuyamacahuun, —ishon noco yoini.

<sup>15</sup> Ascataama maton nomuranshon nocon Ifo yoiqui isca huacahuun, —Criston minfin uhuun Ifocoinquin. Mincai ahuashta chaca huamisima. Minfin shara fustiquin, —ishon yoicahuun. Ascataari futsafoan mato yoiquin isca huai, —Ahuuscashocon min tapiain min Dios fu ipashquiain, —ishon mato yocaiton iquisi itisharacahuun ato tapimasharashquin. <sup>16</sup> Ascashon ato oi noma cumasharacahuun. Ato fu fochishmanantanancuima ato nicacoinsharacahuun. Man ahuara chaca huaa cuscan man fomainno mancái futsafo Jesushuunoa cayacafi yoitiroma. Ascashon man chaca huashon Dios yoiriscacahuun Jesushuunoa yoisharashcaquin. Mato chaca huafiacanashu man isharaiton oinfin rafipaitirofoquin.

<sup>17</sup> Ascan non chaca huahuunoashu non omitsiscacai sharama. Man nonmain chaca huashufin nonfin omitsiscatiroquin. Ascan non shara huaashu Upa Diosin noco amapaiyai cuscan non omitsiscai nanfin sharaquin. <sup>18</sup> Cristocai ahua chaca huamisima.

Nan fustifin sharaquin. Nantiffain man non chaca huamisi. Cristo ahua chaca huayamafiamisishaquin nocohuunoashu nani nocon chaca noco soashoshquin. Afanancai nanacama. Noncai afanan ahua yopapacunacama nocon chaca soashonano. Man naafishu Apan ahuun Yoshin Sharahuunoashu funini. Ascashon Apa Dios icari noco iyoshquin.

<sup>19</sup> Ascan Jesús naino ahuun Yoshin Shara nan a namisifo icanoo cani. Nanfo nan cunu muran ica shinantsa apaonifo. Ato ano cani ato ahuun tsain shara yoishquin. <sup>20</sup> Ascan nan Noén shashohuan huai chain Diosin funaquima yorafo manayopaoni aton chacamain shatucaniquin ahuun tsain icoinra huashcaquin. Ascan Noén fustiton ahuun yorafo yashon nicacoinnifo. Ocho yora shashohuan muran iquinifo asashcaquima. Ascaino atirififoancai tsoanshta Dios nicapainima. Ascano faitahuan noocoaino asai futsunifo. Cristo funiataima aton yoshin icafo muran cani ahuun tsain ato yoishquin.

<sup>21</sup> Noé unu faitahuaino shashohuan muran iquiashucai asanima. Faitahuan no-cofianocai Noé yafi ahuun yorafo shashohuan murannoashu asanifoma. Nanscarifiai futsan noco unu muran iquimanaino funishon non yorafo ismai Cristo Jesús noco funimani non afu ipanon. Nan unu muran non iquiaiainocai non yorafo ismaima noco caya non nashimana afanan choshta inonma. Ascatalamarocon non ato ismai nocon chaca soashocun Cristofin noco funimaniquin noco numashqui. Ascan non afanan shinanchacatamarocon non Jesushuunshon shinansharanon Dios fu ipashquin. <sup>22</sup> Ascan natian Criston Apa fu ica niaifocoin ipashquin. Tsoashtacai finontiroma. Ahuun oinmati afu nai muran icafo non nantifi yoshinfo non aton niaifofori nantifi ato yoiai cuscan aashcaniquin.

## 4

### *Upa Diosin noco ahuun curush inain cuscan huafain non futsafo shara huashoshquin*

<sup>1</sup> Criston niyoashu omitsisicapaoni. Ascacun nanton shinanni cuscan marifi nannori shinancahuun. Arifi omitsisca cuscan marifi man omitsiscatirofia ahuun curushhuunoashucai chaca afanan mato ifo itiroma. <sup>2</sup> Anori shinanquicai man afanan chaca shinainma Upa Diosin mato amapaiyai cuscan fustisi man huapaitiro. <sup>3</sup> Fari ichapacoin man funoa Jesús icoinra huamafoan amisifo cuscan man huapaoni. Man chaca huapaiyai cuscan fustisi man huapaoni. Yamutifi monocain ayafain maton nomuran shinanchacafain maton ahuinmafo ya ipaicain ainfofori aton funumafo ya ipaiyaifono paunmisicoin icain futsafo ya ichananshu atofu monoshquin mucayanan Dios noitama ahuara futsafo man noipaoni. Nan chacaofin Upa Diosin noicasmacoianquin. Ascacun afanan ascayamacahuun.

<sup>4</sup> Ascan nan man chaca huapaoni cuscan man shatuano matofu rafupaonifoancai ahuuscashon tapitirofoma. Ascashu matohuunoa yoiquin isca huatirofo, —¡Aira! ¿Ahuuscain afanan na yorafo no fu ichananpaicanimamun monoyanan non atofu paunpaoni? ¿Ahuuscain afanan ascapaicanimamun? —ishon yoicanashu mustairiscatirofo. Ascashon mato roatirofo. <sup>5</sup> Anori shinanfiatirofo Diosifin noco niaifocoinquin. Nan muma niafo futan naafoan. Nantifiton ahuun ointaifi yoiquin isca huashquin, —Ahuuscain uhuun facu man icoinra huayamafain niyoshon man chaca huapaiyai cuscan fustisi man huamisimun, —ishon ato yoishquin. Ascashon ato onaintimacoinshquin. Futsafoan yoishquin isca huaquin, —Min uhuun facu icoinra huacoinmisiquin. Ascan natian min ufu ipatiroran, —ishon ato yoishquin.

<sup>6</sup> Ascacun Upa Diosin ahuun tsain yoishomisifo nichini nantifi yorafoan ahuun tsain shara Jesucristohuunoa nicasharanonfo. Nan naamisifoanri niyocashon man nicayopaonifo. Nantifi man nai futsumisifo. Ascafia nan ratoran futsafoan Jesús icoinra huacun Upa Dios nia cuscan atorifi nimapacushquin afu nipanonfo.

<sup>7</sup> Ascacun tsain futsari un mato yoinon. Shinancapon. Nantifi manifoti man cuyoti chaima. Ascacun cayacafi shinansharacahuun. Ahua chaca shinantamarocon Upa Diosin mato shinanmapaiyai cuscan nan fusti shinancahuun. Ascashon Upa Dios cufifafaincahuun. <sup>8</sup> Ascashu noinancoincahuun. Nan non noinancaifin shara-caiquin. Futsan noicoinshon non ato rau huatiro noco chaca huai cuscan afanan shinanonma. <sup>9</sup> Futsafo maton pushu ano noocoaiton aqui unimacai mato pushu muran iquimasharahuu. Mato nomuran aqui mutoquima.

<sup>10</sup> Ascan Upa Diosin noco ahuaraofo futsa futsa huaquin tapimashara cuscari nan icoingra huaa futsafori non ato shara huashofain non atorifi curafia huanon. Man ascaiton oinquin Upa Diosin ahuun yorafo noicoiai cuscan huafainri man atohuun noicointiro. Ascai unuyamacahuun.

<sup>11</sup> Ascan ichananshon Diospan tsaincoin ato yoicahuun. Diosicoinchu yoicafisca huaquin. Ascan Diospan curushhuunshon futsafo shara huashocahuun. Ascacun nantififain Jesucristohuunshon Upa Dioshuunoa yoisharanonfo. Man ascaiton oinquin nantifi yorafoan yoitirofo isca huaquin, —¡Aicho! Upa Diosin fasi shara. Furun Jesucristohuunshon ahuamamishti huatiroran, —ishon yoishquicani. Nocon Ifo Jesucristo arus fusti shara huamisi. Nantocai ahuashta chaca huapanacama. Arus fusti ahuun curushhuunshon ahuamamishti huapanaca. Asca huapacuquicain ununacama. Nanscasi huapanaca.

### *Jesús icoingra huafio omitsiscatiro. Futsafoan ato omitsiscamamisifo*

<sup>12</sup> Uhuun yoramishtichin omitsiscafiai mustairiyamacahuun. Shinanchacayamacahuun. Man tunucoainton oinquin Upa Diosin tapitiro man Jesús tanacoian. Ascacun shinanqui isca huayamacahuun, —Ahuuscain un omitsiscaimun, —ishon anori shinanyamacahuun. <sup>13</sup> Anori shinantamarocon unimacahuun. Man Cristo fu omitsiscuai cafiscai. Natian marifi man mua ahuunoashu omitsiscafarihu chipo man aqui noocoaitian nan isharamisi cuscan marifi man afu ipasharapacunaca. Ascacun omitsiscafiai fasi unimacoincahuun.

<sup>14</sup> Ascan man Cristo tanacun Upa Diosin mato shara huashoin. Ascashon ahuun Yoshin Shara mato ya rafumapacushquin. Ahuunshon man mutiro Jesús matofu ica. Ascan mato roafiaifoanno unimacoincahuun. <sup>15</sup> Ascan futsafoan chaca huamisisha-caqui ato chacahuunoashu omitsiscatirofo. Ascashu rutumitsamisifo icain yomutso icain pofucoin icain ahuunoamafia futsanhunoa ahuara yoipaimisi. Ascacanashu ato chacafohuunoashu omitsiscatirofo. Ato cuscara iyamacahuun omitsiscashcaquima. <sup>16</sup> A man mua nocon Ifo Jesús icoingra huashu rafiyamacahuun. Ascaquima. Upa Dios yoicahuun isca huaquin, —¡Aicho! Upa Diosin un min Furun Jesús ahuun yora. Ascacun nan icoingra huamafoan ua omitsiscamaifoanno un Jeshuunoashu omitsiscamisi. ¡Aicho! —ishon yoicahuun.

<sup>17</sup> Ascan nonfin Diospan yorafoquin norifi natian non omitsiscayoi. Non omitsiscaiton nocon Ifo Criston noco yoipai isca huaquin, —¿Uhuun yorashtan ua mian noicoianmun? —ishon noco yocatiro. Ascafia natian non omitsiscafiaiton Upa Diosin tapitiro nonmain Jesús icoingra huacoinnaquin. Chipo nantifi nan maifoti cuyoaitian nan Diospan tsain Jeshuunoa nicacasmamisifo Upa Diosin ato onaintimashqui. Ascan natian norifi non omitsiscayofi chipo nan Jesús icoingra huamafo mimacoin-can omitsiscapanacafoquin. <sup>18</sup> Diospan tsain yoini isca huaquin,

“Nan icoingra huafio isharamisifo Dios ari noocoataima omitsiscayotirofo. Ascafia Dios ari nocoashuai afanan tsoa omitsiscapanacama. ¿Ascashon Dioshuunoa shinantama chaca huamisifo ahuuscacanimun? Nanfotin fasi omitsiscapanacafoquin,”

ishon cununi. <sup>19</sup> Ascacun Diosin mato yonoai cuscan omitsiscafiaquin shinanchacayamacahuun. Nanton mato onihuaniquin. Ascacun nan yoiquin isca huacahuun,—Upan Diosin min ua amapaiyai cuscan shara fustisi un huapai. Mirus fustifin min ua yonotiroquin,—ishon Dios yoicahuun. Ascashu isharafafaincahuun. Nantofin mato yoimisi cuscacoin huamisiquin.

## 5

### *Pedronun icoinra huaf yosisharani*

<sup>1</sup> Ascan natian ichananfo cushumisifoan un mato yosipai. Ua nicasharacapun. Ascashon maton nomuran uhuun tsain nanucoincahuun. Urifi Jesús icoinra huaf un ato cushumisi. Nocon Ifo Cristo omitsiscaiton un oinni. Chipo afanan nasoshquiaitian urifi un afu isharapacushquin tsoan oinyomisima cuscara sharashtacoin nantifiton oinshquicani. Ascan nantifiton nocon ifon iishquin.

<sup>2</sup> Ascacun un mato yoi nan Jesús icoinra huaf ichanainno Diosin mato yononi cuscan ato cushusharacahuun. Ato Diosin tsain yoisharacahuun isharanonfo. Ascashon shinanquin isca huayamacahuun,—¡Ohua! Un ahuara futsa huapaifiaquin un Diosihuunshon ato cushuiran,—ishon shinanyamacahuun. Ascatamarocon yoiquin isca huacahuun,—¡Aicho! Diosin ua amapaiyai cuscan un ahuun yorafo cushusharairan ahuun tsain tanasharanonfo,—ishon anori man shinainno Upa Diosin matoqui unimacoinni. Ascafia maton nomuranshon man shinanquin isca huai,—Un ato cushuaihuunshon ua pui inantirofo,—ishon anori shinanyamacahuun. Pui fustihuunoa shinanyamacahuun. Ascatama Dios fasi yonoshosharapaiquin ato cushusharacahuun.

<sup>3</sup> Ascacun ichananfoan ato niaifo cuscara iyamacahuun. Ato yonoyamacahuun nan mafin man apaiyai cuscan arifi huanonfo. Ascatama ato Jesushuunshon ismasharacahuun matohuun caononfo. Man ascaino arifi Jesús cuscara inonfo. <sup>4</sup> Nan nocon cushumisicoinfin nocon Ifo Jesucristoquin nan nocoitian mato yoishquin isca huaquin,—¡Aicho! Man mai ano niyoshon ua icoinra huaf man ato cushusharamisi. Ascan nantifi un iquinafo ya man ufu ipatiro niaifo patashari iishquin. Man ufu ipaiyai cuscacai unupacunacamaran,—ishon mato yoishquin.

<sup>5</sup> Nanscarifiai pushcofoan iyoafifo nicasharacahuun mato yoiaifo cuscan aashcaquin. Pushcofoan iyoafofoya shara huatanancahuun.

“Upa Diosicai cacapaimisifo cuscara tapipaima. Ascashon nan cacapaimisifo ato onaintimashqui. Ascan nan tsii huatananmisifofin shara huashoshquiquin. Nan cuscarafohuun Upa Diosin atohuun ramapaiquin ato shara huashofafainshquin,”

ishon Diospan tsain cununi. <sup>6</sup> Ascacun nan Upa Diosin fustiton ahuamamishti atiro. Nanton mato amapaiyai cuscan unimacai acahuun. Shinanqui isca huacahuun,—Un Upa Dios fasi yopai. Diosinmaisicai un isharatiromaran,—ishon anori shinanchahuun. Man ascaiton Diosin nan apaiyaitian mato amasharashquin man afu ipanon.

<sup>7</sup> Ascashon matohuunoa shinanfafaini mato cushusharashquin. Ascan man ahuaraf shinanchaca cuscan Upa Diosin yoicahuun maton nomuran unimamanon.

<sup>8</sup> Masharo fonainquin cahuancacaiquin ahuaraf funafoanfafainni piishquin. Nanscarifiai nan nocon noicasmamisi yoshin chaca Satanás cahuancacaini tsoan Diosihuunoa shinanyamaifo ato chaca huamafain ato omitsiscamashquin afanan Diosihuunoa shinanonfoma. Ascacun oinfain. Ahuara chacahuunoa shinanyamacahuun. Upa Diosin mato shinanmapaiyai cuscan nan fusti shinancahuun Satanás mato chaca huamanonma. <sup>9</sup> Nan man omitsiscrai cuscan icoinra huaa futsafo manifoti anoafori omitsiscacani. Ascacun Satanás mato chaca huamapaiyaiton nicayamacahuun. Maton Ifo fustisirocon icoinra huacahuun. Ahuara chaca tunufafaincahuun.

<sup>10</sup> Ascan man omitsisca cuscan anaitiano Upa Diosin a cuscaracoin mato imasharafain ahuun curush mato inanshquin. Diosin matohuun ramapaicoin. Ascashon mato mutsismanaino nan ahuara ahuuscarafiaino man Jesús icoinra huacoinnon. Ascashon nan fustisi man shinainton mato catonni man afu ipanon. Nannoshon nantififain ointirofo nocon Ifo Jesús sharacoincun nanrifi nantifiton ato niaifocoin. Nantianri man afu ipashquin. <sup>11</sup> Nantofin ahuamamishtifo huapanacaquin. Nan fustiton atiro cuscacai tsoa futsan huatiroma. Nanscasi huapanaca.

*Ahuun unutaquin Pedronun ato yoisharani*

<sup>12</sup> Unfi Silvanohuunoa shinansharamisiquin. Unfi nan icoinra huatiroquin Diosin amapaiyai cuscan huamisicun. Un tsain ichapama cunua maton nomuranshon man shinansharanon. Un mato cunushona cuscan Upa Diosin matohuunoa shinansharamisi. Ascan ahuara ahuuscarafiaino Dios fustihuunoasi shinansharacahuun.

<sup>13</sup> Jesús icoinra huafu ichananmisifo murannoa Babilonia anoafaoan mato yoisharafo. Uhuun facushta Marcos arifi mato yoisharapai. <sup>14</sup> Marifi man noinantanain yoinonansharatanancahuun. Manfin Cristo yorafoquin. Ascacun maton nomuran unimacahuun. Nanti.

Pedro

## Pedronun Afanan Icoinra Huafu Cunushoni

### *Pedronun ato yoisharani*

<sup>1</sup> Unquian Simón Pedro un mato cunu fomai. Unfi Jesucristo ahuun oinmatiquin. Un afu rafumisi. Ua nichini un futsafo ahuun tsain shara yoinon. Un mato shinain. Nocon Diosin nan nocon Numamisi Jesucristo un icoinra huaa cuscan marifi nanscarifi aquin man icoinra huamisi. Ascashon icoinra huacashon man mumisiri nan fasi shara finacoian. Diosin fasi sharacoin matori icoinra huamani. <sup>2</sup> Ascan man Upa Dios yafi Furun Jesús nan nocon Ifo man onancoincun matohuunoa shinansharaquin matohuun ramapaiqui maton ointi unimamatiro.

### *Cristo ahuun yorafo icafo cuscan*

<sup>3</sup> Jesús noco catonni a cuscara shara icain non afu ipanon. Nantofin ahuamamishti huatiroquin. Non Jesús onancoincun non yopai cuscan ahuun curushhuunshon noco inanshquin. Ascashon noco imapaiyai cuscan non anon. <sup>4</sup> Noco yoiyotiani cuscan ahuun curushhuunshon ahuara futsafo sharacoin noco ashoshquin a cuscaracoin non inon. Ascan nan icoinra huamafoan afin chaca huapaiyai cuscan huamisifo. Ascafiajuncun Jesús nocori numai non aton cuscara chacafo inonma. <sup>5</sup> Ascacun nan mato imapaiyai cuscan fusti ipaicahuun. Icoinra huashu a cuscara sharacoin ifafainaahuun. A cuscara shara man icaino Dioshunoashu finonmafain mato amapaiyai cuscan fustisi tapicahuun. <sup>6</sup> Ascan mafi man apaiyai cuscan fusti shinancaquima ahuunoashu isharafain ahuara ahuuscarafaino tunufain Dioshunoa fusti shinanfafaicahuun. <sup>7</sup> Ascatari nantifi yorafo shara huafain ato oi tsii huashon ato noifafainaahuun.

<sup>8</sup> Man asca huafafaini nocon Ifo mimacaiquin man onancointiro. Ascashon mato amapaiyai cuscan man yonoshosharatiro. <sup>9</sup> Ascafia man ascayamai nan fusho cuscara man iishquin. Mato amapaiyai cuscacai man ointiroma. Ascacun man chaca huapaoni cuscan Jesús mato chaca soashonano man man ointiaquima.

<sup>10</sup> Ascacun uhuun yoramishtichin Upa Diosin mato amapaiyai cuscan nantifi achiun. Ascashon man tapicointiro mato catonnicun ahuun yorafo man inon afu ipashquin. Ascashucai man chaca huapaoni cuscan man afanan nasopacunacama.

<sup>11</sup> Ascan nocon Numamisi Jesucristo ahuun yorafo iquina ari marifi man nocotiro. Man nococun mato isca huashquin, —¡Aicho! Iquiyohuu. Min niyoshon uhuun tsain nicacoinmisquin. Ascan natian min ufu isharapacuiquin, —ishon Jesús mato yoipacushquin.

<sup>12</sup> Nan un mato yoia cuscan man man tapicoian. Un icon yoimisi cuscan. Ascashon nantishotapiquin nanfohuunoa un mato shinanmashquin man ascapacunon. <sup>13</sup> Un niyoatian nannori mato shinanmafafainshquin. Uafin nocon Ifoan yonoquin un mato yosinon. <sup>14</sup> Nocon Ifon Jesucristo ua cayacaficoi tapimana un samamashta nai. Ascacun un mato nanfohuunoa nantishotapiquin shinanmai marifi man u futan nannorisi shinanon. <sup>15</sup> Un mato yoiri mun nafiano un mato yosimisi cuscan man ointiaquimanonma.

### *—Cristo Diospan Furun chashapacuahuaiton non oinniran, —ishon Pedro yoini*

<sup>16</sup> Ascacun nonfin mato tapimamisi nocon Ifo Jesucristo ahuamamishti huatiro, —Afin chipo nocoqui nasoshquiran, —ishon non mato yoimisi. Non mato yoimisi cuscan nocofunufoan aton nomuranshon shunipafo onihua cuscacai non mato yoimisima. Noficoi non oinmisi cuscan non mato tapimana. Upa Diosin Jesús chashapacufoan-naiton man non oinni. <sup>17</sup> Nantianri Upa Diosin nai muranshon Furunhuunoa yoini isca huaquin, —Nanfin uhuun facucoinquin. Un ahuun noicoin. Un aqui unimacoinniran,

—ishon Upa Diosin nan ahuamamishti huatiroschaquin Furunhuunoa yoini. Tsoa futsacai a cuscara sharama. Arus fustifi icoincharamisiquin. Furun ahuu cuscara sharamainquin ishon nan machi anoshon Upa Diosin noco ismani. <sup>18</sup> Nan machi ano norifi non afu ini. Nan machi Upa Diosin catonni nannoshon ahuun yono shara noco ismani. Nai muranshon Furunhuunoa yoiai cuscan norifi ahuun oi non nicacoinni.

<sup>19</sup> Ascan Diospan tsain yoimisifoan inonpacocai cuscan Jesushuunoa cununi cuscan natian non icoindra huaquin finacointiro. Ascacun marifi icoindra huacoincahuun. Nan tsainhuunoa shinanfafaicahuun. Natian man faquish muran ica shinantsa ain. Ascafia Jesús mato chashamashotiro nantishon tapiquin man tanasharanon. Nan yamutishon man manamisi afanan shafaitian faquish inonma. Nanscarifiai Jesús afanan nocoaitian man manai afanan faquish cuscara muran ishquima. Nantianricai afanan ahua chaca shinantama maton nomurancairocon man fasti unimai finacoinshquin. <sup>20-21</sup> Ascacun tapicahuun isca huaquin. Diospan tsain yoimisifoancai afin aton nomuranshon shinanfain cunupaonifoma. Ascatama Diospan Yoshin Sharapan ato shinanmana cuscan nannoricon cunupaonifo. Ascashon Diosin ato yonoa cuscan cunushonifo.

## 2

### *Futsafoan chani fusti ato yosipaonifo*

<sup>1</sup> Ascafia nantianri futsafoan Diosihuunoa amaquiri yoipaonifo isca huaquin, —Upa Diosin noco yoia cuscan non mato yoiran, —iflacakon parapaonifo. Nanscarifiai nan cuscara paramitsamisifoan mato muranshon yoishcani isca huaquin, —Upa Diosin mato yoipaiyai cuscan noco tapimana non mato yoinon, —ishon mato yoifacan chanimisifo. Mato fomanpaicani. Mato amaquiri yosiaifono afanan nannoris cayacafi man shinanonma. Ascacun un mato yosin tsoan ato tanashufin funotirofoquin omitsiscapashcaquin. Nocon Ifo Jesús ato nashoni afanan chaca aton ifo inonma. Ascafia nocon Ifoan noco tapimapaoni cuscacai icoindra huafoma. Nanfoan Jesús ifoacasmacani. Ascacun nanfoascaifoan Upa Diosin ato onaintimariscashquin omitsiscapanonfo. <sup>2</sup> Nanfoan fasti chacacoin ato tapimanai cuscari yora ichapafoan ato tanashcani. Ascashon Diospan tsaincoinhuunoa shinanchacatirofo. Ascacashu Diosin ato shinanmapaiyai cuscan funoaf. <sup>3</sup> Nan chanimisifoancai futsafo shara huapaicanima. Nanfofin yoashicinfoquin. Diospan tsaincoin ato tapimatamarocon aton nomuranshon amaquiri shinainfo cuscan fusti mato tapimashcani. Ascashon maton pui fianshcani. Ascataan mato parashquicani. Ascafia Diosin ato oin chaca huaifo cuscan ointiaquimashquinma. Ratoran shafata ato onaintimashqui omitsiscapanonfo.

<sup>4</sup> Upa Diosin ahuun oinmati afu ica atiriffoan chaca huapaoni. Ascaifoancai Diosin ato rau huanima. Ascafia Diosinmaquinoashucat tsoa raquishta ichotirofoma. Ascashon ato faquishihuan muran potani raqui fononfoma. Nanno faquishihuan muranshon mananonfo Diosin nantifi nan Jesús icoindra huafoma onaintimaitian atorifi fuopacufoannafo muran potashquin. <sup>5</sup> Nanscarifiai nan yorafo Noé niyoatian Diosin tsain nicacasmapaonifo. Ascan Noé ato yoini isca huaquin, —Dios sharacoin. Ascan maton chaca shatucahuun a cuscaren shara inonran, —ishon ato yoini. Ascafiaflashucai tsoan Dioshuunoa nicacasmapaonifo. Ascacun Diosin yonoa faitahuanun nantifi yorafo manifoti anoaflo ato cuyoni asai futsunonfo. Noé yafi ahuun yorafo siete tushunifo. Diosin ato numaino asanifoma.

<sup>6</sup> Nanscarifi aquin nan Sodoma yafi Gomorra ano icafoan fasti chacasi huapaonifo. Ascacun Diosin yoini, —Un ato onaintimacoinskir, —ishon yoini. Yoitan nai muranshon chi urumanhuan potani ato coaino nai cuyononfo. Nanno chi mapo fusti ini. Nanscarifi aquicai Diosinhuunoa futsafoan shinammisifoma. Nanscacun ato musu huapaifiaino atirifain chaca shatuyamashu omitsiscapashcani.

<sup>7-8</sup> Ascan nan Sodoma yafi Gomorra coataima nan nocofunun Lot Diosin yononi cuscan tanacoianshu isharapaoni. Ascan nanno icafoan chaca fustisi shinanpaonifo. Ascaifoan shafatifi Lotpan ato oinni chacanisi tapiaifoan. Ascaifoanno ahuun nomuran fasi fucash mupaoni. Nocofunufoan shafatifi tsain mutsama yoifafainafoaino nicai ahuun nomuran fasi ihuucoin muuni. Ascacun Diosin nan fusti numani chaca huamisifoya nanonma.

<sup>9</sup> Nanscarifi aqui nocon Ifoan ahuun yora sharafotisi numatiro ahuaraoan noco chaca huamapaifafainnai cuscan non anomma. Ascashon nan chaca huamisifori ato onaintimashqui ahuun unutaqui ato omitsiscapanacafu muran potashquin afanan ariashu funonfoma. <sup>10</sup> Nan aton nomuran shinanchacamisifoan ahuara chaca fusti huapaiyaifo cuscan huamisifo. Nanfoan noco Ifo Cristo nicacasmamisifo. Ascan nan cuscara yorafo Diosin ato onaintimaquin finacoinsquin. Nan cacapaimisifoan shinanquin isca huamisifo, —Tsoancai noco yonotiroma, —ishon shinanfafaimisifo. Diospan nai oinmati sharafori roafiaicai tsoa musutirofoma.

<sup>11</sup> Asca huafiaifoanno Diospan oinmatifo nan Dios fu icafoai ato cuscarama. Nanfoanfin ato finoncoianquin. Nan cacapaimisifocai Dios oinmatifoan ato curush cuscarama. Ascafia Diospan oinmatifoancal Diosin ointaifi nan yoshin chacafoqui tsain chaca huamisifoma. <sup>12</sup> Nan chaca huamisifocai Diosin nai oinmatifo cuscarama. Ahuarafuhunoa tapiamafiacanashu roanmitsapaimisifo. Nanfofin nan yoina pofu cuscarafoquin. Nan cuscara yoinatocai shinansharatiroma. Ahuara chaca huapaiyai cuscan fusti nanscasi huafafaintiro. Nan yora chacafofin nanscarafoquin. Ascacufin Diosin ato achishon namashquin omitsiscapanonfo.

<sup>13</sup> Nanfoanfin futsafo omitsiscamamisifoquin. Ascan Diosin copiquiri ato omitsiscamapacunaca. Shafatifi nanscara yorafoan faquishiataima chaca huapaiyaifo cuscan fusti huacani. Ascan manfin noinancoianquin ichananshon pishcaquin. Ascan nan paramitsamisifori matofu ichananfo. Jesús icoinra huacoianmafiacanashu mato muran iquiafo mato futan pianan mato parapaicani. Nantianri nan chaca huamisifo cuscari huacani. Nanscara fusti fasi fuchipaicani. <sup>14</sup> Nan ratorashta ainfo ointani afu ipaitiro. Chacasi huapaifafaini. Ainfoan Jesús tanasharayamashon ato chaca huamai atofu iishquin. Atonama fuchipaimisifo. Nanscasi aifin fuyamisifoquin. Diosin nan cuscara yorafo onaintimai omitsiscapanonfo.

<sup>15</sup> Nanfofin Balaam cuscarafoquin. Balaam Beorpan furumun Dios cachiquiri huani. Pui fiishquin yorafo ato chaca huapaoni. Nan chaca huai cuscan fusti noipaoni. Nanscarafoan mato paramisifoquin. <sup>16</sup> Diosin yonoafin Balaam ahuun burro nan yora tsaintiro cuscan ani. Ascashon ahuun ifo yoini, —Ahuuscaquimun min ua coshaiquin, —ishon nan muropan Balaam yoini. Ascaino Balaam nan yora nison cuscarafoquin ini. Fasi amaquiricoin shinanni.

<sup>17</sup> Nanscara nocofunufoancal Diospan tsain noco tapimacoin sharama. Isca atohuunoa mato yoinon. Nanfofin pozoa nutsoa cuscarafoquin. Pozo ano nocouin nonmaincoinquin nan pozoa nutsofashu non nomi shatutiroma. Nanscarifi aquin atohuunshon non Dioshuunoa tapitiroma. Coin fisopan oinquin non shinantiro, —¡Aicho! Natian oi fui. Nocon mai mutocoincun muchana huashoin nocon yonofo foai sharanon, —ishon non shinantiro. Ascan coin fisopan oinquin non shinantiro, —ishon non shinantiro. Nanscarifiai nan yorafoan noco shinanmapai Dioshuunoa noco tapimaifiai atohuunshon non ahua tapitiroma.

<sup>18</sup> Nan chanishunifo fasi cacapaimisifo. Ascashon yoitirofo isca huaquin, —Non tapia cuscacai tsoa futsan tapiama. Nan futsafoan atirofoma cuscafin non huatiroquin, —ishon ipaitsi yoifiacanashu chanimisifoquin. Futsafoan ato chacan ramashta shatufiacanashu nan paramisifoan ato yoitiro isca huaquin, —Min futsan ahuin fu ipaiyai

cuscafin sharaquin. Ahuunfin min fasi unimatiroquin. Non anoncahuun, —ishon futsan iyotiroquin futsa afanan chaca huamashquin.

<sup>19</sup> —Man ahuara shara huahuunoashucai man Dios fu ipatiroma. Ascacun nan man ahuara chaca huapaiyai cuscan huacahuun. Man apaiyai cuscan tsoa mato shatumatiromaquin. Unimacai acahuun, —ishon ato yoifiaquin ato fasi amaquiri yosiafo. Ascafia naforicai isharamisifoma. Afiri paramucani. Nan chaca fustifi ato ifoquin. Nanfo Satanás ahuun oinmatifo. Ahuaraofo iyamarai tsoaran futsa nocon ifocun non ahuun oinmati itiro.

<sup>20</sup> Tsoan nocon Ifo nan nocon Numamisi Jesucristo icoinra huashocai nan icoinra huamafoan chaca huamisifo cuscan afanan chaca huaima. Nan chacafomaquinoashu pashcatiro afanan ato ifo ishquima. Ascafia afanan ahuun chaca aqui nasoaino nan ipaonima cuscara fasi chaca finacoian iishquin. <sup>21</sup> Man Jesús fu rafumisifiashu chipo man cachiquiri huashu afanan man aqui nasocasmai. Ascacun man Jesús tanayamamisifin shara icuanaquin. Nan Jesús icoinra huamafo Diosin ato onaintimashqui. Ascafia tsoan Jesús Ifopaonifiashu chipo cachiquiri huafoan ato onaintimaquin fina-coinshquin.

<sup>22</sup> Nanscarifiai nocon shunifoan iconcoin Diosin tsainhuunoa cununifo isca huaquin, “Pashnafin nan pashnacoinquin ahuara futsama. Pashna nan imisi cuscan anantiro. Ascashu chaimashta cayotiro. Ascatan afanan nasocuratan ahuun anan afanan pitishotiro. Yahuarifi nan yahuacoinquin ahuara futsama. Yahua nan imisi cuscan michanpan ipaitiro. Nashifiashu afanan michan ano nasotiro nannoashu afanan michanashquin,”

ishon cununifo. Nanscarifiai tsoan Diospan Yoshin Sharahuunshon ahuun ointi finanan huataimashufin Satanás ahuun yoracoinquin. Ahuara futsa cuscarama. Ahuun chaca shatuyotirofia nan chaca huamisi cuscan afanan ahuun chacaquin nasotiro.

### 3

#### *Nocon Ifo Jesús afanan nasoshquin*

<sup>1</sup> Uhuun yoramishtichin afanan un mato cunu foma futsai. Nan na cunun un mato shinansharama futsapai man afanan ointiaquimanonma. <sup>2</sup> Diosin tsain yoimisi sharafo nan nocon shunifoan yoipaonifo cuscan norifi nocon Numamisi Jesús non afu rafumisicun noco yonopaoni cuscan huafain un nanfohuunoa mato shinanmapai.

<sup>3</sup> Iquisi un mato tapimapai Jesús man oti chaimacoin. Nantianri atirifi yorafoan chaca huapaiyaifo cuscan fusti huashquicani. Nanscarafotin matoqui cashu mutsamatirofoquin. <sup>4</sup> Ascashon mato yoiquin isca huacani, —¿Diosin yoini cuscumun a Jesús oa raniquin? Nocon shunifo nayopaonitancai ahuashta fianananma nanscara fustisi. Diosin mai onihuani chaincai ahuashtari fianananma. Nanscasi airan, —ishon yoishquicani. <sup>5</sup> Man tapifiacashocai tsoan shinanpaicanima Diosin unuhuan nushmancayan mai onihuani. Ascashu unuhuansi iyopaoni. Ascafia Diosin ahuun tsainmansi unuhuan nushmancayan mai onihuariscatani.

<sup>6</sup> Unuhuanunri mai fupoaino nantifi yorafori asai futsunifo. <sup>7</sup> Nanscarifi aquin ahuun tsainmansi nai yafi mai yoiayi cuscan mucuyotiro chipo nantifi coashquin. Nantianri Jesús icoinra huamafo nan chaca huamisifo Diosin ato onaintimashqui omitsiscapanonfo.

<sup>8</sup> Ascacun uhuun yoramishtichin ointiaquimayamacahuun man non yoimisi mil farifi fasi chaicoinquin. Ascafia nan shafa fusti non yoimisi chaimashtacoin. Ascashon non shinain cuscacai Diosin shinainma. Diosin nanscarasi nan rafu oinfafainni. <sup>9</sup> Ascafia atirifioan shinancaquin isca huacani, —Nocon Ifoan yoiyotiani cuscan icataima. Ascafia man yoini cuscan finonpacucoinran, —ishon shinancani. Ascaquimarocon Diosin nocohuun ramapaicoin. Tsoacai omitsiscapanacafo muran potapaima. Funaquimafin

ato mana sharamisiquin nantifiton aton chaca shatunonfo ahuun tsain nicasharashcaquin omitsiscapashcaquima.

<sup>10</sup> Ascafia nocon Ifon Jesús samamashta nocoriscrai. Yomutso yamu noco pushuano nocoriscaitocai tsoan tapitiroma ahuutiacaimain nocoriscaina. Nanscarifiai tsoancai tapiama ahuutianmain nocon Ifo nocoriscatanicain itisharafoma mustairiscatacana. Nan nocon Ifo nocoaitian achahuancion iishquin. Nantiantan nai murannoaf cooi cuyotanaino yamariscatashquin. Mairifi nantifi mai anoafori cooi cuyotanaino yamariscatashquin.

<sup>11</sup> Na rama un mato yoiai cuscan nantifi ishquiai tapicashon nocon Ifo nicasharacoincahuun. Nanscara shara icahuun. Non itisharashuai non ipaoni cuscan non afanan ashquima. Afin noco imapaiyai cuscan fusti non anon. <sup>12</sup> Jesús ratoran shafata nocoriscataniquin shinanfafacahuun. Ascacun futsafo Jesushuunoa yoicahuun icoira huanonfo aton chaca shatunonfo Jesús samamashta oquin. Icon Jesús oaino nantifi nai muran cooi chii huancoinni fasi mushan mushancoin huai. <sup>13</sup> Ascafia Diosin yoini cuscan nanfo coano nai yafi mai funa futsa oni huashquin icoira huafo fusti nanno iishquicani. Ahuara chacacai ano itiroma. Shara fustisi itiro. Ascacun nan non mana sharanoncahuun.

<sup>14</sup> Uhuun yoramishtichin man Jesús manaquin maton nomuran shinansharafafaincahuun. Ahuara chaca shinanyamacahuun. Man ascaiton Diosin mato ointiro ahuun Furunhuunoashu man sharacoin icun. Diosiqui ratuquimarocon shinanquin isca huafafaincahuun,—Upa Diosin ahuun Furunhuunshon ua noi. Unrifi un Dios noi afu rafupacushquin—ishon nannori shinancahuun. <sup>15</sup> Ascacun ointiaquimayamacahuun. Nocon Ifo oataima funaquima non manasharanoncahuun. Non futsafo ahuunoa yoiaiton aton chaca shatucashon Jesús ifoanonfo afu ipasharashcaquin. Nan nocon yorashtan Pablon nannori Upa Diosin a tapimanicun noco cunushoni. <sup>16</sup> Nan cunuaiti ahuun cunu Pablonun nannoris cunumisi nocon Ifo afanan oshquiai cuscan ahuunoa cununi. Non atirifi a cununi cuscacai non funa tapiyotiroma. Non fasi nan fusti shinainno Diospan Yoshin Sharahuunshon non tapitiro. Ascafia nan Diosin tsain tapiafoma shinan futsamisifoan Pablonun cununi cuscan amaquiri yosiafo. Nanscarifiai Diosin tsain futsafori amaquiriri yosimisifo. Ascacanashu omitsiscapatirofo.

<sup>17</sup> Un mato yoia cuscan man man tapia. Ascacun oinfain marifi nan Diosin tsain nicacasmafoan mato amaquiri yosaino man nicanonma. Man Jesús icoira huacoinnaiton mato cushusharatiro. Ascafia nan amaquiri yosimisifo man nicaino marifi man funotiro. Ascashon man afanan amaquiri shinantiro. <sup>18</sup> Ascatamarocon nocon Ifo Jesucristo ahuun tsain nicacoinfafaingahuun nan onanquin finacoinshcaquin. Mato shara huamapaiyai cuscan a cuscara shara ishcaquin. Maton nomuran tapisharaquin finacoinshcaquin. Nan fusti non Jesucristo yoiquin isca huatiro,—Minfin nocon Ifo. Minhuunshon fusti non ahuara shara huatiro. Mirus fustifin min sharacoinquin,—ishon natian yafi nan inonpacoai cuscan non yoipacunon. Nanscasi ipanon. Amen. Nanti.

Pedro

## Juanpan Icoinra Huafu Cunushoni

### *Diosin tsainman noco nimapacutiro*

<sup>1</sup> Unquian, Juan, un mato cunu fomai man tapinon. Jesucristohuunoa un mato tapimani. Un nicatain un oinyanan un mucuman mucoinmisi cuscan un ahuunoa mato yoi man tapinon. Ahuashta oniataima Jesús apa Dios fu iyopaoni. Upa Diosin ahuun tsain noco yoipaiyai cuscan Jesús noco tapimapona. Ascashon ahuunshon non Diosin tsain tapitiro noco nimapacu. <sup>2</sup> Apa Dios fu ifiashu nocoqui fotoni. Nanton noco nimapacutiro. Ascashon non oian cuscan un mato yoi.

<sup>3</sup> Upa Dios futan Furun Jesucristo shinainfo cuscari norifi atohuunshon non shinamisi. Shinainfo cuscan non huai. Non atofu rafumisi. Ascashon non oian cuscan huafain non nica cuscari un mato yoi marifi nannorifosi man shinanon. Ascashu man no fu rafusharati. <sup>4</sup> Un mato cunu fomai non unimai cuscari marifi man unimanon. Non natian unimayofiai man marifi nannorifosi shinainno non fasi mimacai unimatiroquin.

### *Jesushuunshon chacapan afanan nocon ifo itiroma*

<sup>5</sup> Ascan Diospan Furun yoini cuscan nicashon non mato yoi. Noco isca huani,—Farin chashainocai faquishtiroma. Nanscarifai Diosin shara fustisi icanocai ahua chaca afu itiromaran,—ishon noco yoini. <sup>6</sup> Ascafia non yoiquin isca hua,—Non Diosin shinain cuscari norifi nannorifosi non shinamisi. Non afu rafuaran,—ifiashon non chaca huashu non chania. Diosin iconquin yoimisi cuscan non aim. <sup>7</sup> Ascatamarocon ahuun tsain yoini cuscacoin non aafin fasi sharacoin itiroquin. Nanton shinain cuscan norifi nannorifosi shinanshquin afu rafushquin. Non ascaiton nocon chaca noco soashotiro. Jesús Upa Diospan Furunmun ahuun imi foyanan noco nashoni nantifi nocon chaca noco soashoshquin.

<sup>8</sup> Ascafia non yoiquin isca hua,—Uncai chaca huama,—ifiatan nonnofiri paramumisi. Jesús iconquin yoimisi cuscan nocon nomuran non nanucoianma.

<sup>9</sup> Ascatamarocon nocon chaca non yoaiton Upa Diosin yoini cuscan noco rau huati. Non chaca huamisi cuscan afanan Upa Diosin shinantiroma Furumun noco nashoni nocon chaca soashoshquin. Upa Diosin sharacoinshon noco yoini cuscan nanscaco huai. Nantifi nocon chaca noco soashotiro non chaca huamisima cuscara non inon. <sup>10</sup>—Nantifi yorafoan chaca huamisforan,—Diosin huani. Ascafia non yoiqui,—Uncai ahua chaca huamisimaran,—ishon non futsafo shinamati.—Diosin noco pararan,—ishon anori yoiquicai noncái ahuun tsain icoingra huacoinnama.

## 2

### *Criston Apa Dios nocohuunoa yoisharatiro noco onaintimanonma*

<sup>1</sup> Uhuun yora mishtichin, un mato cunushoni man oinshon ahua chaca huanonma. Ascafia ahuara non chaca huacun Jesucristo apa noco yoishotiro nocon chaca soanon. Yoiquin isca huati. —Upa, un ato nashoniquin. Aton chaca soashohuun, —Apa huati. Atoncái ahua chaca huamisima. Afin shafacafi icaquin. Ascan Apa Dios noco yoishotiro nocon chaca soashonon. <sup>2</sup> Noco nashonishaquin nocon chaca noco soashotiro. Noco fustima. Nantifi manifotihuunoashu noco nashoni nocon chaca soashoshquin.

<sup>3</sup> Ascan Jesús noco yoimisi cuscan aquin non tapitiro non afu rafui. Nanton shinain cuscan non tapitiro norifi nannorifosi shinanshquin. <sup>4</sup> Futsan shinanshquin isca huati. —Un Jesús fu rafuiran,—ifiatan yoitimacoin. Ahuun tsain nicacasmai. Nan cuscara yorafin chanimisiquin. Jesús icon yoimisi cuscan ahuun nomuran nanucoianma. <sup>5</sup> Ascan

ratoran yoran ahuun tsain nicacoinquifin Dios noicoinquifin. Ascashofin tapitiroqui afu rafucoiai. <sup>6</sup> Ascan futsan shinanquin isca huai, —Un Jesús fu rafucoinran, —icafin Jesús icai cuscari arifi itiroquin.

### *Noco yononi cuscan tsain funa shara*

<sup>7</sup> Ascan un mato cunushonai cuscan man man nicamisi. Jesús maton ifo iqui taunitian mato yononi man man nicamisiquin. Mato yonoa cuscan mato tapimani. <sup>8</sup> Ascafia ahuun tsain tsoan nicayomisima cuscara un mato cunushoni. Noco yonoquin isca huani, —Yorafohuun noicoincahuun, —noco huani. Manascai man chaca huapaoni cuscan afanan man atiroma. Jesús shafacafi ica cuscan marifi ahuunoashu man shafacafi itiro.

<sup>9</sup> Ascafia ratoran yoran yoiquin, —Un Jesushuunoashu shafacafi icaran, —ifiatan yora noicasmashu aacai shafacafi icama. Atoncái Diosin tsain nicacoiantaima. <sup>10</sup> Tsoan yorafohuun noi aafin shafacafi icaquin. Oinsharaicai non pacutiroma. Nanscarifi aquin tsoan shafacafi ishoncai ahua chaca huafafaintiroma. <sup>11</sup> Ascafia ratoran futsan futsa noicasmaicai aacai shafacafi icama. Chaca huafafaini. Chaca huafafainquicai ahuun nomuran shinantiroma ahuun chaca shatushquin. Ascafia tapiama man fasi funocoian.

<sup>12</sup> Uhuun facumishtichin maton chaca Jesushuunshon Upa Diosin man soashona afanan afo shinanshquima. Ascacun un nannori mato cunushoni.

<sup>13</sup> Ahuashta oniataima Upa Dios iyopaoni.

Anifomishtichin, ahuu cuscaramain Upa Diosiquin man man tapia. Tapishon man icoingra huamisi. Ascan un matori cunushoni.

Pushcohuaifoan Satanás mato amapaiyai cuscacai man amisima Jesús tanasharashquin. Ascan un matori cunushoni.

Uhuun facufoan marifi nocon Upa Dios ahuu cuscaramainquin man man tapia. Tapishon man icoingra huai. Ascan un matori cunushoni.

<sup>14</sup> Anifomishtichin, un cunua cuscan ahua oniataima Upa Dios iyopaoni. Nanmain ahuu cuscaraquin man man tapia. Ascan un nannori mato cunushoni.

Pushcohuaifoan, Satanás mato amapaiyai cuscacai man amisima. Jesús tanasharashquin. Ascan Jesushuunoashu man mutsisipacoin. Diospan tsain maton nomuran man man nanua icoingra huafafainshcaquin.

<sup>15</sup> Ascantan ahuaraoan Upa Diosimaqui noco imapaiyai afo noiyamacahuun. Ahuarao yora chacafoan aton nomuran shinainfo cuscan afo noiyamacahuun. Afo noiquicai man Dios noicointiroma. <sup>16</sup> Ahuara chacafo aton ifono yorafo imisi cuscan un mato tapimai. Ahuara chaca fuchipaifain ahuara chaca oinquin mupaimisi icain — Un ahuarayashufin un isharaquin un futsafo finoncoian. Uncai futsafo cuscarama, —icashu cacapaimisi. Ascará chacafo Upa Diosin noco amapaima. Ascará chacafoan yoshin chacahuunshon noco amapai. <sup>17</sup> Ascafia ahuara chacafo cuyoi futsui. Ahuara chacafo yorafoan fuchipaiyai cuscati nanfori cuyoi futsui. Asca Diosin noco amapaiyai cuscashu nanfo Upa Dios fu ipashquicani.

### *Iconmisihuunoa yafi chanimisi*

<sup>18</sup> Ascan uhuun yoramishtichin un tsain futsari mato yoi man tapinon. Diosin nantifi maitio nan chaca huamisifo onaintimayoi. Man nocoti chaima. Man man nicamisiri nan nocofunun Cristo noicasmai arifi oshquin. Natianri Cristo noicasmai nococani. Ascacun non tapitiro Upa Diosin nan chaca huamisifo onaintimaitian nocoti chaima.

<sup>19</sup> Nan yorafoan no futan Cristohuunoa nicayofiapaonishaquin noco potafo. Ascaifoan non tapitiro no futan Cristo icoingra huacoinmisima. Noco potafo. Ascaiton non tapitiro afocai no fu Cristo yorama.

<sup>20</sup> Ascafia mancái ato cuscarama. Upa Diosin ahuun Yoshin Shara matoqui nichini matofu rafupacunon. Asca ahuunshon man iconcoin tapia. <sup>21</sup> Mancái icon tapiamama.

Ascacucai un mato cunushonima. Ahuara icon iyamarai iconma man Diospan Yoshin Sharahuunshon tapicoian. Man tapiari nan chanimisifoancai noco icon yoitirofoma. <sup>22</sup> Ratofo main chanimisiquin un mato tapimai. Tsoan isca huai, —Jesuscái Cristoma. Diospan Furunmafinquin, —icafin chanimisiquin. Nanscarafoan Cristo noicasmacani. Upa Dios yafi Furun icoinra huafoma. <sup>23</sup> Ascataan tsoan isca huai, —Criston Diospan Furunmaran, —icacai Upa Diosin yora itiroma.

<sup>24</sup> Ascataan Jesushuunoa man nicaquin tauhuani cuscan cachiquiri huayamacahuun. Shafatifi ahuun tsain maton nomuran nanusharacahuun. Man ascafín Upa Dios yafi Furun fu man rafupacunacaquin. <sup>25</sup> Noco yoiyotiani cuscan non afu ipasharatiroquin.

<sup>26</sup> Futsafoan mato amaquiri tapimapai. Ascan un atohuunoa mato cunushoni man tapinon. <sup>27</sup> Ascafiaquin Upa Diosin ahuun Yoshin Shara matoqui nichini matofu rafupacunon. Natianri ahuunshon man iconcoin tapia. Nan fusti non yopai noco tapimanon. Afin mato tapima cuscan shafatifi maton nomuran ahuun tsain nanucoincahuun afu rafushquin.

<sup>28</sup> Uhuun yoramishtichin, Jesús mato tapima cuscan cachiquiri huayamacahuun. Shafatifi nicacoincahuun yoia cuscan aqui. Ascan Jesús nocoina man aqui rafipaitiro. Ascataamarocon ahuun ointaifi ahuara chacafo man huamisi shinanshma man Jesús fu isharatiro. <sup>29</sup> Dios isharacoinmisi ahuashtacai chaca huamisima. Man man tapia. Tsoa isharamisi nanfin Upa Diosin imapacunacaquin ahuun facu inon. Nanri man tapia.

### 3

#### *Diospan facufo*

<sup>1</sup> Upa Diosin nocohuun fasi noicoin. Nocohuun shinansharamisi. Ascanshon noco yoiquin isca huatiro, —Manfin uhuun facufoquin, —ishon yoitiro. ¡Aicho! Shinancapon. Iconcoin nonfin Diospan facufoquin. Ascafiaflashon icoinra huacoinyamashon Upa Dios onanmisifoma. Ascan non Diospan facufofiacun tapiafoma. <sup>2</sup> Uhuun yoramishtichin icon natian nonfin Diospan facufoquin. Noco chipo imai cuscan tsoan tapiataima. Ascafia Jesús oaiton oin non a cuscacoin ishquin. Nan man non tapian. <sup>3</sup> Tapiashu non a cuscara sharacoin ipaitiro. Ascashon nocon chaca non potatiro a cuscara sharacoin iishquin.

<sup>4</sup> Tsoan chaca huafafainicai Diosin noco yononi cuscan aimá. Noco yonoa cuscan ayamashu chacacoin iqui. <sup>5</sup> Man man tapia nocon Ifo Jesús noco cuscara nocofunuri ini nocon chaca noco soashoshquin. Atocai chaca huamisima. Apa Diosin yonoa cuscan fustisi huapaoni. <sup>6</sup> Tsoan afu rafushocai chaca huafafaintiroma. Jesushuunoa tapiama. Ahuunoa onancoiantaima.

<sup>7</sup> Uhuun yoramishtichin, futsafoan mato amaquiri yoipaicani nocon Ifo tanatima huaquin. Ato nicayamacahuun. Tsoan isharamisi nocon Ifon cuscara shara itiro. Noco imasharatiro a cuscara isharamisi non inon. <sup>8</sup> Upa Diosin yora oni huataima yoshin chaca Satanás chaca huayopaoni. Ascan tsoan chaca huafafaini arifi Satanás ahuun yoraquin. Ascacufin Diospan Furun oniquin Satanás ahuun yono cuyo futsunon.

<sup>9</sup> Upa Diosin noco nimapacunaca ahuun facufo non inon. Ascan tsoa ahuun facushocai chaca huafafaintiroma. Non ahuun yora ipaiquicai non chaca huamisi itiroma. <sup>10</sup> Ascan ratofo main Diospan facufo iyamarai Satanás ahuun yorafoquin non tapitiro. Tsoa Diosin yoia cuscan aimacai ahuun facu itiroma. Tsoan futsafo noiamacai arifi Diospan facu itiroma.

#### *Nantifi noinantanancahuun*

<sup>11</sup> Jesús ifoaquin tau huashon man nicamisi isca huaquin, —Noinancahuun, —ica man man nicamisi. <sup>12</sup> Caín cuscara iyamacahuun. Cainfin Satanás yora iniquin. Chipocu isharamisicun afi ascayamaquin chipocu rutuni.

<sup>13-15</sup> Non futsafo noishon non tapitiro Upa Diosin noco fiananan huaa non afan omitsiscapanaca muran catanmarocon non afu ipanon. Tsoan futsafo noiyamashu omitsiscapanacafo fu ipatiroquin. Tsoan futsa noicasmai aafin rutumitsamisi itiroquin. Man man tapia rutumitsamisicai Dios icano nocotiroma. Ascan icoinra huamafoan mato noicasmaino mustairiyamacahuun. <sup>16</sup> Jesucriston fasi nocohuun noiquin noco nashoni. Afi nocohuunoashu napai noco nashoni. Futsafo noicoing atohuunoashuri non natiro. <sup>17</sup> Ascatari futsa ahuara yopacoinfiaiton non atohuun ramapaiyamashucai Upa Diosin ato noiiai cuscan non ato noiama. <sup>18</sup> Ascan uhuun yoramishtichin, futsafo noicoincahuun. Non isca huashu, —Un minhuun noiran, —ifiatan yopaifo cuscan non inanyamacai sharama. Non ato shara huacoinsion non ato noicointiro.

<sup>19</sup> Ascaquin non tapitiro Jesús iconcoin noco tapima cuscan non ai. Ascan ahun ointaifi ratutama nocon nomuran unimatiro. <sup>20</sup> Ascafia nocon nomuran non shinanquin isca huai, —Un ahua chaca huamaran, —non ifiaiton Diosin nocon nomuran nantifi tapicoian. <sup>21</sup> Ascan uhuun yoramishtichin, nocon nomuran non shinain cuscan non chaca huayamashucai Diosqui rafipaitiroma. Non aqui ranotamarocon non afu isharapai. <sup>22</sup> Non anori shinainfin Upa Diosin noco yonoai cuscan non aicain. Non ascaino nocoqui Upa Diosin unimatiro. Ascatac non yocai cuscan noco inantiro. <sup>23</sup> Noco isca huani, —Uhuun Facu Jesucristo icoinra huacahuun. Noinancahuun, —noco huani. <sup>24</sup> Ascan tsoan Upa Diosin yononi cuscashu afu rafumisi itiro. Upa Diosin ahun Yoshin Shara nocoqui nichini. Ahuunshon non tapitiro Upa Diosin no fu icacainaiton.

## 4

### *Ratomun Diospan Yoshin Shara iyamarai Satanás yoshin chaca non tapitiro*

<sup>1</sup> Uhuun yoramishtichin, ratoran futsafoan mato yoiquin isca, —Un mato Diospan tsain yoiran, —ifiacaquin atrifioan paramisifo. Ascaiton ato nicashon man Diosin tsain ointiro. Aton tsain ascacoinyamaiton man tapitiro Diospan Yoshin Sharahuunshon mato yolama. Diosin ato yonoama. <sup>2</sup> Ascan tsoan yoiquin isca huaquin, —Jesucristo nan Diospan Furun Apa ariashu mai ano oni nocofunucoin ishquin, —ishon mato anori yoiaiton Diospan Yoshin Sharahuunshon mato yoiaiton man tapitiro. <sup>3</sup> Ascan tsoan mato Jesushuunoa yoipaiyamaiton man tapitiro aacai Upa Diospan yorama. Diosihuunshon mato yoitamarocon Jesús noicasmaifohuunoa mato yoi. Man man nicamisi nan cuscara yorafo manifoti foanfafaincani. Natianri nantifi mai ano icafo ascacani. Yoshin chacapan Jesús noicasmaquin ato yonoa.

<sup>4</sup> Mancaí ascaranma uhuun yoramishtichin. Manfin Diospan facufoquin. Diospan Yoshin Shara matofu ipanaca. Atofin Satanás finoncoianquin. Ascacun marifi ahunshon Jesúis noicasmafotí man finoncoianquin. Nanfo Satanás ato iquina. Mato amaqiri tapimapacani. Ascafiainfoan ato tanatamarocon Jesús tsain man nicaquin finacoian. <sup>5</sup> Nanfoancai icoinra huacanima. Diosin shinain cuscacai shinancanima. Jesús icoinra huamafoan shinainfo cuscan futsafori tapimapacani. Ascan icoinra huamafoan nannorisí shinanquin ato nicapaicaquin. <sup>6</sup> Ascashon non tapitiro ratofoanmain Diospan Yoshin Sharahuunshon noco icon yoyamaraquin yoshin chacahuunshon noco parapaicain. Non tapitiro isca huaquin. Nonfin Diospan yorafoquin. Tsoan noco nicapai afín Diospan yoraquin. Ahuun Yoshin Sharahuunshon noco icon yoi. Ascan tsoan noco nicapaima aacai Diospan yorama. Yoshin chacahuunshon noco parapaitiro.

### *Non futsafo noicoinquín tapitirofo non Diosi fu rafumisicoin*

<sup>7</sup> Uhuun yoramishtichin, Upa Dioshuunshon non yorafo noitiro. Ascashu non noinanoncahuun. Tsoa Diospan facuashu afu rafui. Ascanshon futsafo noicointiro.

<sup>8</sup> Upa Diosin noimisiquin. Ascan tsoan Dios noiyamaquin onancoiantaima. <sup>9</sup> Upa Diosin nocohuun noiquin noco ismani isca huaquin. Ahuun Furun fusti manifoannatihuunshon nichini ahuunoashu non afu nipanon. <sup>10</sup> Mai ano nichini nocohuunoashu noco nashonon nocon chaca soashoshquin. Nan shinanquin non tapitiro Upa Diosin noco noicoinmisi. Noiaicoin futsacai ascaramma. Noncái futsafo noifiai ascatiroma.

<sup>11</sup> Ascan uhuun yora mishtichin, Upa Diosin noco fasi noicoin norifi non noinanoncahuun. <sup>12</sup> Tsoan Upa Diosin oinyamafiamisishaquin noinanquin non tapitiro no fu ica. Non asca huafafainquin Diosin noco noiai cuscan norifi ahuunshon futsafori non noitiro. <sup>13</sup> Ahuun Yoshin Shara nocoqui nichini. Ascacun non tapitiro no fu ipanaca. Ascarifiai non afu ipanaca. <sup>14</sup> Non oinni cuscan non mato yoi. Upa Diosin Furun nichini manifoannati aton numamisi inon. <sup>15</sup> Ascan tsoan yoiquin isca huai, —Jesusfin Diospan Furunquin, —huafin Upa Diosin afu ipanacaquin. Ascarifiai Upa Dios fu ipatiroquin.

<sup>16</sup> Ascan noco noicoainton non mumisi. Natianri noco noiyaiton non icoira huatiro. Diosin nantihuun noimisiquin. Tsoan afu rafushon futsafori noicoinmisi. Ascarifiai Upa Diosin afu rafupacunaca. <sup>17</sup> Non afu rafuashu noco amapaiyai cuscan non noinanointiro. Ascatan non Upaqui nocoaitian non ranotiroma. Noco yoia cuscain non ratutamarocon non unimatiro. Nantianri Upa Diosin manifoannati ato yoishquin ratofoanmain chaca huayamaraquin nicasharamisiquin. <sup>18</sup> Noco noiai tapiashucu non ratutiroma. Non noiyamashu, —Upa Diosin ua onaintimairan, —icashu non ratutiro. Tsoan anori shinainciai Diosin noco noiai cuscan aimia. Ascafashu Diosin noco noiai cuscan aquin non ratu potatiro.

<sup>19</sup> Non Upa Diosihuun noiataima afincion nocoahuun noitauni. Nocohuun noiaino norifi natian non Upahuuri noicointiro. <sup>20</sup> Tsoan yoiqui isca huai, —Un Upa Dios noicoinran, —ifiashon futsa noicoianma. Aafin chanimisiquin. Futsa oinfiaquin noiyamashocai Diosiri oinyamaquin noicointiro. <sup>21</sup> Upa Diosin noco isca huaqui yononi, —Ua noishon futsafori noicoincahuun, —ishon yoini.

## 5

### *Non Jesús icoira huacoinquin non ahuunshon futsafo noitiro*

<sup>1</sup> —Jesús Diospan Furun. Diosin catonni nocon Numamisi inon, —tsoan icoira huaiton Upa Diosin ato funa cuscara imatiro ahuun facufo inonfo. Ascan tsoan Upa Dios noiquin ahuun facuri noitiro. <sup>2</sup> Ascan non Dios noishon noco yonoa cuscan aquin non tapitiro ahuun facufori non noicoin. <sup>3</sup> Upa Diosin noco yoia cuscan aquin non ahuunshon Dios noicointiro. Noco yonoa cuscacai curushma. Upa Dios noiashu noco yonoa cuscan non unimatiro. <sup>4</sup> Non Upa Diosin facushoncai ahuara chacafoan noco shinanchacemapaiyai cuscan afoancai noco funomatiroma. Diospan Furun Jesucristo icoira huashu ahuaraoan noco chaca huemapaiyai cuscan non finontiro. <sup>5</sup> Ahuara chacafoan noco funomapai Diosin noco imapaiyai cuscan non anonma. Ascafia Jesucristo Diospan Furun non icoira huashon ahuunshon na chacafo non finontiro chaca huashquima. Nan icoira huafansi finontiro.

<sup>6</sup> Man non tapia Diospan Furun nocofunu ini. Un oinmisi cuscan un mato yoi man icoira huacoinnon. Nan Jesús unu muran iquimamuaino Upa Diosin yoini isca huaquin, —Naafin uhuun facuquin, —ishon yoini. Jesús naitianri ahuun imi foaino Apa Diosin noco tapimani nanton ahuun Furumun. Ahuun Yoshin Shara iconmisi arifi nocon nomuran yoimisi Jesús Diospan Furun.

<sup>7</sup> Ascan rafu non fustiton nannorisi yoiquin Jesús nocofunu nan Diospan Furuquin. <sup>8</sup> Jesús unu muran iquimanitian yoifain naitian ahuun imi foni cuscan tapimafain Diospan Yoshin Sharari noco yoimisi. Nannori fosi yoiquin rafu non fusti huani. <sup>9</sup> Ascan yorafoan noco ahuara yoihaiton icoira huatan Upa Diosin noco yoiai cuscan mima huaquin non icoira huacointiro. Acaí yora cuscarama. Aafin Dioscoinquín. Ascan

ahuun Furunhuunoa noco yoiaiton non icoinra huacointiro. <sup>10</sup> Tsoan Diospan Furun icoinra huashon Apan Diosin ahuunoa yoini cuscan ahuun nomuran icoinra huatiro. Ascafiaqui ahuun Furunhuunoa yoimisi cuscan tsoan icoinra huayamashon nanton,— Dios chaniran,—ishon yorafo shinanmapai.

<sup>11</sup> Isca huaquin Upa Diosin yoini,—Uhuun facuhuunshon un mato nimapacutiroran,—ishon yoini. <sup>12</sup> Tsoa Furun fu rafuafin nipanacaquin. Ascafia tsoa Furun fu rafuamacai nipatiroma.

### *Ahuun unutaqui ato yoisharani*

<sup>13</sup> Jesús Diospan Furun man icoinra huaa. Ascan un mato nanfo cunushoni man nipanaca man tapinon.

<sup>14</sup> Non Upa Dios cufiai cuscan arifi asca huapaiquin noco ashontiro. Ascaino ranotama non Upa cufitiro. Noco ashoin cuscan tapicoinsquin. <sup>15</sup> Noco nicaiton non tapisharatiro ahuara non yoca cuscan noco ashoiton.

<sup>16</sup> Ascan tsoan Jesús icoinra huafashion chaca huaiton oinquin non Upa cufishotiro chaca shatunon. Ascan Upa Diosin ato numatiro nipanonfo ato imasharatiro. Ascafia futsafoan ipaitsi Jesús ifoancoinna ointsa iyofashion chipo potacoian. Chaca shinan-fafainquin Dios cachiquiri huacoinnafo. Ascarafocai tsoashtan numatiroma nipanon. Naashu omitsispacunacafo muran focani.—Ahuunoa Upa cufishocahuun,—ishoncái un mato anori yoima. <sup>17</sup> Upa Diosin noco amapaiyai cuscan ayamashu chacacoin itiro. Nan chacafo huaifoan non Upa cufishotiro aton chaca shatunonfo Upa Dios fu ipashquin.

<sup>18</sup> Ascan non tapia ratoranfo Upa Diosin ahuun yoracoinshocai chaca huafafantiroma. Diospan Furunmun ato cushusharatiro nan yoshin chakanun ato achinonma chaca huamashquin. <sup>19</sup> Man non tapiari non Diospan facufo. Nan icoinra huafoma ahuun facufoma. Manifoannati nan yoshin chaca ato iquina. <sup>20</sup> Diospan Furun oni Dios iconmisiton noco tapimanon. Ahuunoashu non Upa Dios nan iconmisi fu non ipatiro. Furunri Diosicoin no fu ipanaca. Ascan noco nimapacutiroquin. <sup>21</sup> Ascano uhuun facufoan, ahuaraofo Diosicoinma shinanyamacahuun. Nanti.

Juan

## Juanpan Afanan Icoinra Huafu Cunushoni

### *Juanpan ato yoisharani*

<sup>1-2</sup> Unquian, Juan, un fari ichapa icoinra huafu un aton cushumisi. Un mato cunu fomai man tapinon. Tsain icon non nicamisi cuscan nocon nomuran non nanupacunaca. Ascan nanno ichananfo Upa Diosin mato catonni urifi matohuun noicoin. Urus fustima. Jesús icoinra huaa futsanfori matohuun noicoin. <sup>3</sup> Upa Diosin Furun Jesucristo futan iconquin nocohuun noi. Ascan noco cashman shara huafain nocohuun ramapaicain nocon nomuran shinanmashara nocon nomuran non unimacoinon.

### *Upa Diosin noco yononi non nantifi noicoin*

<sup>4</sup> Upa Diosin noco yononi ahuun tsain iconcoin tanasharanonfo. Atirifi Upan yononi cuscan aiton nicai un fasi unimai. <sup>5</sup> Uhuun yoramishtichin, na un mato cunushonaicai tsain funama. Man Jesús icoinra huaquin tau huani cuscan man man nicamisi. Nocon Ifoan noco yoimisi cuscan un afanan mato yoi non noinanoncahuun. <sup>6</sup> Noco yononi cuscan non ahuun noicain non futsafohuunri noicinnon. Man tau huaquin nicamisi cuscan noco yononi isca huaquin,—Shafatifi non noinanoncahuun,—ishon yoini.

### *Ratofomain Jesucristo icoinra huai*

<sup>7</sup> Ascan tsain futsari mato yoi. Fuparapaimitsamisi manifoannati pashcanain futsucani,—Jesucristo nan Diospan Furun apa ariashu mai ano oni nocofunucoin ishquin,—ishoncay yoipacanima. Ascaraoan mato fuparapaimisifo Cristo noicasmafain icafo. <sup>8</sup> ¡Oinfain! Atohuun caoyamacahuun. Man funotiroquin. Upa Dios yonoshofiaqui man atohuun caohuaino mato inanpaiyai cuscan man funotiroquin. Ato nicayamacahuun nantifi Upa mato inanpaiyai cuscan fishcaquin.

<sup>9</sup> Tsoan Cristo yoini cuscan atama futsa tanashu acai Diospan yorama. Ascan Cristo yosini cuscan nan fusti tanacoin Apa Diosin yafi Furun fu rafui. <sup>10</sup> Tsoan Cristo tsain cayacafico yosiyamaiton maton pushu muran iquimayamacahuun. Aqui unimayamacahuun. <sup>11</sup> Maton pushu muran iquishon futsafori amaqiri yosiaino matohuunri nutiroquin.

### *Ahuun tsain unutaqui*

<sup>12</sup> Un mato paratama cunushopaiflaiun unfincuin matoqui nocopai non yoinonanon. Ascan non natian unimafiai un matoqui nocoaino fasi mimacai non unimanantanantiro.

<sup>13</sup> Nan pushu futsano ichananfo Upa Diosin atori catonni ahuun facufo inonfo. Nanfoanri mato yoisharapaicani. Nanti.

Juan

## Juanpan Gayo Cunushoni

### *Juanpan Gayo tsain shara yoini*

<sup>1</sup> Uhuun yorashtan Gayon, unquian, Juan, un fari ichapa icoinra huafo un ato cushupaoni. Un mia cunu fomai min tapinon. Un mia noicoin.

<sup>2</sup> Uhuun yorashtan un mia Upa Dios cufishona min nomuran shinansharafain min muma shara ipainon. Min isharapainon. <sup>3</sup> No futan Jesús icoinra huaa futsafo mia anoashu uqui noocoaf. Nocoshon mihuunoa ua yoiafo, —Gayon nocon Ifo tanacoinfafaini. Shafatifi nocon Ifoan tsain icon yoini cuscan nannori imisiran, —ishon mihuunoa ua yoiafo. Nicai uhuun nomuran fasi unimai. <sup>4</sup> Uhuun facufoan Jesús tanacoainton nicai un unimacoinni. Ahua futsancai ua unimamaquin ascacai huatiroma.

<sup>5</sup> Uhuun yorashtan, un nica min icoinra huaa futsafo oinyamafiamisishaquin min ato cushufafaini. Ato cushuquin min unumisima. <sup>6</sup> —Gayo noco noisharamisiran, —ishon mihuunoa ichananshon yoiafo. ¡Aicho! Upa Diosin ato shara huapaiyai cuscan mirifi min atoasca huafin sharacai itiroquin. Nan yopaifo cuscan min ato inantiro fosharatanonfo.

### *Nan paramisifo*

<sup>7</sup> Nanfo foanscamisifo Jesushuunoa yoifoanfafaincani. A ahuara yopai fiaquicai icoinra huafoma yocanifoma. <sup>8</sup> Jesús ahuun tsain iconquin yoimisifo. Ascacun non ato futan ashquin.

<sup>9</sup> Min icoinra huafo fu ichanan ano un mato cunu fomayamua. Ascafashion Diótrefes ua nicacasmaquin. Aafi icoinra huafo iquinpai. Fasi cacapaimisi. <sup>10</sup> Matoqui nocoshon man ichanan muranshon noco chaca huamisi cuscan un mato tapimashquin. Noco-huunoa tsain chacari yoifain chaniri yoifain. Nocon yorafori matoqui nocofiacun ato iquimapaima Diosin tsain mato yoinonfo. Futsafoan ato iquimapafiaiton atorifi pota. Afanan atofu ichananonfoma.

<sup>11</sup> Uhuun yorashtan, Diótrefes chaca huamisi cuscan ahuun caotamarocon ahuara shara fustisi min huapaitiro. Tsoan shara huamisi nan Diospan yora. Ascan tsoan chaca huamisi Diosquiri shinamisima.

<sup>12</sup> —Demetrio nocofunu shararan, —ishon nantifi yorafoan yoiafo. Aafin iconmisiquin. Norifi ahuunoa non yoisharamisi. Man min tapia non icon yoimisi.

### *Ahuun tsain unutani*

<sup>13-14</sup> Un mia paratama yoipaafiaquin un afanan mia cunushotamarocon un miqui nocopai non yoinonantanano.

<sup>15</sup> Min nomuran unimanon. Nocon yorafoan nunoshon mia yoisharapaicani. Min icanoa uhuun yorafo ua yoishopacuhun. Nanti.

Juan

## Judaspan Icoinra Huafó Cunushoni

### *Judaspan ato tsain shara fomani*

<sup>1</sup> Uhuun yoramishtichin unquian Judas un mato cunu fomai. Unfin Jesucristo ahuun yonomatiquin. Un Santiago ahuun ushto. Nocon Upa Diosin matohuun noiquin mato catonni. Ascan nocon Ifo Jesucristo mato cushufafaini. <sup>2</sup> Nocon Ifoan matohuun ramapaicain maton nomuran unimamanon. Ascatari matohuun noicoinnon. Mato mima huaquinasca huanon.

### *Nan chanimisifo chaca hua cuscan Judas ato asca hua*

<sup>3</sup> Uhuun yoramishtichin nocon Ifoan noco nashoni cuscan yafi nantianri noco imapaiyai cuscan non chipo afu ishquiai cuscahuunoari fasi nanfohuunoa mato cunushopafiai mun nica man tsain futsa yopacoin. Ascacun un mato cunushoni man Jesucristo icoinra huai cuscan man shinanfafainon. Nannori Upa Diosin Furuhuunshon noco tapimani. Furuhuunoa noco tapimani cuscan nan fusti non yopai tanasharashquin. Ascan tsain futsa mato amaqiri yosipaiyaifoan aton tsain nicatamarocon nan mato tapimamisi cuscan nan fusti icoinra huacahuun.

<sup>4</sup> Futsafoan mato muran nocoi tau cashon man tapicuma mato fomanfo chaca huamisificashon. Ascashu nanfocai Diospan yorama. A furicai imisifoma non chaca huamisi cuscan non yoiaiton Upa Diosin Furuhuunshon noco soashona non afu ipanon. Nan fusti non yopai isharashquin. Ascafia nanfoan fasi amaqiri chacacoin mato tapimapacani. Isca huaquin mato yoipai, —Man Jesús icoinra huashon man apaiyai cuscan man atiroqui. Maton ahuinma fu icain ainfofori aton funuma fu itirofo. Ascashon ahuara chaca futsafo man huapaiyai cuscan man atiro. Non asca huaitocai Dios noco onaintimaimaran, —ishon fasi amaqiri mato yosipaicani. Nocon Ifo Jesucristo fusti nicacasmacani. Nan cuscarafohuunoa Diospan tsain cunuyoni. Ato onaintimaicoinshquin.

### *Diosin chaca huafó onaintimai*

<sup>5</sup> Un natian mato cunushoni cuscan man man tapiyofianicun un afanan mato yoi futsai nan chacafohuunoa man tapinon. Nocon Ifoan nantifi nocon shunifo Egipto anoshon caimafianicun atirifiton icoinra huayamaifoan nan icoinra huafomati chipo namaqui cuyo. <sup>6</sup> Ointiaquimayamacahuun Diospan oinmati afu nai muran icafori tau cani isharacoinyopaonifo. Ascashu Diosin ato yonoai cuscan acoinyopaonifo. Ascafashion chipo Diosimaqui ipanifo. Ascacun Upa Diosin ato faquishihuan muran munushushon ato manamayoi. Ascashon chipo nantifi icoinra huafoma onaintimaitian ichanan huashon omitsiscapanacafo muran ato potashquin. <sup>7</sup> Diospan oinmati a fu nai muran icafoan chaca huapaonifo cuscari Sodoma yafi Gomorra chaimashon nanscara chaca huapaonifo. Nocofunufoan aton ahuinma chotaifoanno. Ainfofoanri aton funumafo chotamapaonifo. Nocofunufori afi ranan chotananpaiyaifoanno ainfon tanatama. Ascacani chakanisi tapipaonifo. Ascacun atohuunshon non tapitiro nan chaca huamisifo omitsiscapanacafo muran focani. Nanhuunoari ointiaquimayamacahuun.

<sup>8</sup> Nanscarifiai nan chanimisifoan chaca fustisi huafafaincani. Ascacanashu futsafo fu chaca huatananmisi icain niaifofori nicacasmafain. Diospan nai oinmatifori roamisifo.

<sup>9</sup> Ascashon nai muran icafo Diospan oinmati niaifo patashari ahuun anu Miguel nantocai chaca huafó cuscanasca huamisima. Ascashu Satanás fu fochishmanantananni Moisés naitian Satanás Miguel nitun huapaini Moisés ahuun caya mai huanonma.

Ascafiai Miguelcai nan Satanás roanima. Roatamarocon yoini isca huaquin, —Nocon Ifoan mia asca huairan, —ishon yoini. <sup>10</sup> Ascafia nan chanimisifoan ahuaraofo tapiyamacun nanfihuunoa atoqui tsain chaca huamisifo. Ascatai afi apaiyai cuscan fusti huafafainmisifo. Yoinaton shinansharatiroma cuscan. Ascacanashu afiri chaca huamuafquin omitsiscapashcaquin.

<sup>11</sup> ¡Ai timafin! Fasi omitsiscapashcaquin. Caín chipocu rutuni. Nanfori nanscarafo. Balaam cuscarafo. Nan Balaam pui fusti shinanquin chaca huani. Nanfoanri nansca huamisifo. Coré cuscarafo. Nan Coré ahuun niaifo Moisés nicacasmipaoni. Ascacufin Diosin nan namaniquin arifi nicacasmacanashu nai omitsiscapashcaquin.

<sup>12</sup> Ascan manfin noinanshu ichananmisquin nocon Ifohuunoa shinanfain pishcaquin. Nanfori ranotama matofu ichananfiacashon nocon Ifohuunoacai shinancima. Futsafihuunoaricai shinantama aficairocon shinanmufustiafo, —Non mato yosiquin mato cushusharatiroran, —ifiacaquin tsoa ahua yosisharamisifoma.

Nan coin oi maisinincái mai muto muchana huatiroma fanafo foasharanon. Mai mutoano coin choshtacuashu oi fuaino fanafo foaimasharatiro. Nanscarifiai nanfo coin oi maisi cuscarafo. Nan cushumisi ointsaifiacashocai nocon Ifohuunoa tsoacai tapiafoma. Fana ahuun tapofo ya tsucucain tsasiashu fimioma itiro. Man nai rafua cuscara. Nanscarifiai nan chanimisifoancai tsoan Jesús icoinra huamatiroma nipanonfo.

<sup>13</sup> Ascashu unuhuan fuchomanhuan cuscarafo ahuara sharacai mainfin ano potatiroma. Fuchoquin facosh cusumun cutsispotiro. Ascashu chipo fuerasiqui futsutiro. Nanscarifiai nan chanimisifoancai ahua shara huashotiro. Fishi pacui chashapacuahuatan faquish acuncahuatiro. Ascaitocai non afanan oinshtatiroma. Nanscarifiai nan chanimisifoan Dios cachiquiri huacanashu faquishihuan muran focani. Diosin nanscarafo chipo onaintimacoinsquin omitsiscapanonfo.

<sup>14</sup> Ascan Adán nan Diosin onihuaquin tau huani. Anoashu siete facu pacuafó. Ascano ahuun unutani ahuun anu Enoc ini. Nan Enoc nan chanimisifohuunoa inonpacuai cuscan yoiquin isca huani, —¡Oincapón! Nocon Ifo oi. Nan afu nai muran icasharafo ichapacoin afu fucani. Tsoancai ato tanan huatiroma. Nantian nantifi yorafo yoipacushquin niyoshon man amisi cuscan. <sup>15</sup> Nantifi manifoti anoafaoan nocó Ifoqui fucani. Ratofomain ahuun yorafo afu ipanacafó iyamarai ratofomain icoinra huayamashu omitsiscapanacafó muran focaniquin. Nan afu rafumisifomacai ahuun yorafoma. Ascan nan chaca huafoti ato yoifain niyoano Dios maisi ipaoni cuscan yoifain nantifi nan tsain chaca aquí huamisifori ato yoishquin.

<sup>16</sup> Nanfoanri tsain chipumisifo icain futsahuun ahuara chaca nuutapaimisifo. Nan chaca huapaiyai cuscan fusti tanafafainmisi icain afiri yoimusharamisifo. Ascacanashu cacapaimisifo icain futsahuunoa tsain shara yoiamaquiaquin futsa cuncun huapaimisifo, “Ua shara huanon,” ato huamapairan, —ishon Enoc huani.

### *Nan icoinra huafó ato yoini isharanonfo*

<sup>17</sup> Asca huafiaifoan nocon Ifo Jesucristo fu rafumisifoan mato yoinifo cuscan ointaquimayamacahuun. <sup>18</sup> Ascan mato yoini isca huaquin, —Jesús oti chaima icoinra huamafoan mato cashu mutsama huapaicani. Nanfoan tanatama afi chaca huapaiyafó cuscan fusti tanafafaincaniran, —ishon yoinifo. <sup>19</sup> Nan cuscara nocofunufoan mato paschcanan huapaimisifo. Ahuara chacafo fusti fuchipaicaquin. Ascarafó fucái Diospan Yoshin Shara icama.

<sup>20</sup> Asca chaca huafiacanashu. Uhuun yoramishtichin man Jesús icoinra huaa cuscan Upa Diosin mato shinanmana. Ascacun ahuunshon finacaiquin tapicahuun man icoinra huahuunoashu nan cuscara shara ishcaquin. Diospan Yoshin Sharahuunshon Upa Dios cuficahuun mato imapaiyai cuscan tapishcaquin. <sup>21</sup> Jesús tanasharacahuun Upa Diosin mato noicoiain cuscan man mufafaintiro. Nocon Ifo Jesucristo nocohuun

ramapaiquin non naafiacun noco nimapacuaino non afu ipanon. Ascacun funaquima manasharacahuun afu ipashcaquin.

<sup>22</sup> Futsafoan isca huaquin shinantirofo, —Jesús ua nimapacutiro icon iyamarai iconmaran, —ishon. Nanscarafohuun ramapaicahuun. <sup>23</sup> Ascan futsafohuunoa un mato yoinon isca huaquin. Ahuara non coapaiyamafiaino chi muran pacuaiton non nushfiriscatiro cononma. Nanscarifi aqui futsan chaca huafafainmisi cuscan shatataicumia numariscahuun. Ascashon ato yoicahuun aton chaca arifi shatuyamashu chi muran iquinonfoma. Ascan futsafoanri fasi chacacoin huamisifo. Nanscarafohuunri ramapaicahuun. Ascafia oinfain marifi man ato cuscara chaca huamisi iishcaquima. Atohuun ramapaitan nan ahuarashta chaca huaifo cuscan noicasmacoincahuun.

### *Ahuun unutaqui Dioshuunoa yoisharani*

<sup>24</sup> Ascan uhuun tsain unutaqui nocon Dioshuunoa un mato yoisharapai. Nanton mato cushusharatiro man chaca huanonma. Unimacoincain ahuun ointaifi mato imasharatiro. Nannoshocai tsoan matohuun ahua chaca nuutatiroma. Ascashu unimacoin man aqui nocoshquin. Nantofin mato nansca shara huashotiroquin. <sup>25</sup> Nan fusti noco Dios. Nantonrifi nocon Ifo Jesucristohuunshon noco numani. Ascashon nantifi finoncoian tsoa futsacai a cuscarama. Arusu fusti niaifocoincain manifoti iquina. Ascashon ahuamamishti huatiroquin. Ahuashta oni huataima nanscaracoin iyopaoni. Natian ishquiai cuscari. Nansca huapanaca. Nanscasi ipanon. Amen. Nanti.

## Jesucriston Juan Oinmani Cuscan (Apocalipsis)

*Ahuara ahuuscaran ashquiai cuscan Jesucriston Juan tapimani*

<sup>1</sup> Uhuun yoramishtichin natian un mato cunu fomai man tapinon. Unquian Juan un mato cunu fomai. Upa Diosin Jesucristo yonoa samamashta ahuara ahuuscaran huariscashquiai cuscan ahuun yorafo tapimashquin. Ascacun iquisi ua oinmayoa. Jesús ahuun oinmati nan nai muran ica uqui nichian. Upa Diosin ahuun yorafo tapimapaiyai cuscan ua tapimayoa. Ascacun nan ua tapimana cuscan un mato yoi. <sup>2</sup> Upa Diosin Furun Jesucristohuunoa yoia cuscan nan iconcoin. Ascashon nan ua yoia cuscan ua oinmana cuscan huafain nantifi un cunua. <sup>3</sup> Ascafia un cunua cuscan icataima. Inon pacuai cuscan iquisi un mato cunushona. Un cunua cuscan futsafo yoi arifi unimaino nan nicaifori icoindra huafain nanfori unimashcani. Un mato cunushonai cuscan samamashta iishquin.

*Juanpan Diospan yorafo siete mai futsafo aria ichananmisi ato cunu fomani*

<sup>4-5</sup> Ascan Asia mai ano man icati pushurasi siete nan Jesús icoindra huafio ichananmisifo un mato cunu fomai cuscan nicasharacahuun. Nocon Upa Diosin niyopaonishaquin natianrifi nicain nipanaca. Ahuun Yoshin Sharari afu ipamisi. Nan Upa Diosin yafi ahuun Yoshin Sharapan non Furun Jesucriston matohuun ramapaiyaino maton nomuran mato shinansharamapainonfo. Ahuatón maton nomuran fucash huanonma. Nocon Ifo Jesucriston Diospan tsain noco yoimisi cuscan non icoindra huatiro. Nan Diospan Facucoinfiacun rutunifo. Rutushon mai huafiafo Apa Diosin funimani afu ipashquin. Tsoa futsacai ascayomisima. Ascan Apafu ishon nantifi niaifofo maifoti anoaflo ato iquishquin. Nanton noco noicoin. Ascashu ahuun imi focain noco nashoni ahuara chaca afanan nocon ifo inonma.

<sup>6</sup> Ascacun ahuara chaca nocon ifo itamarocon ahuunoashu Apa Diosin ahuun yorafo man non ica. Ascashon noco yonomapaiyai cuscan non anon. Ascan non ahuun yorashon futsafori non Upa Dios cufishotiro. Nanscarao nocon Ifo Jesucriston man noco ima. Ascacun nantifi yorafoan ahunshon isca huaquin yoipacupainonfo, — ¡Aicho! Tsoa futsacai Jesús cuscara sharama. Arus fusti nocon Ifo ipanaca. Arus fustiri nantifi yorafo ato iquipacunaca, —ishon yoipacupainonfo. ¡Amen!

<sup>7</sup> “Shinancapon. Nocon Ifo Jesús cooin camaqui afanan oaiton

nantifi yorafo niafo futan namisifoanri oinshquicani.

Nan mastamisifoanri oinshquin.

Ascashu nocoaiton nantifi manifotifain ratucaquin

yoishcani isca huaquin,

‘¡Ohuashta! Diospan Furun Jesús non chaca huamisishaquin non aqui ratucoinran,’  
ishon yoishquicani.

Nanscafin aashquiquin. ¡Amen!’

<sup>8</sup> Jesús yoiquin isca huani, —Unfin ahuara oniataima iyopaoniquin. Urifi un ipamisi. Ahuutiamain nocon mai cuyoicai urus fusti un ato yoitiro. Unfin ahuamamishti huatiroquin. Un niyopaoni cuscan un ipanacaran, —ishon nocon Ifoan yoini.

*Nocon Ifo Jesucristo aficoin Juan oinmani*

<sup>9</sup> Unquian Juan un matofu Jesús ahuun yora. Ascacun man uhuun yorafo. Nantifi non icoindra huafio noco iquinashu no fu rafupacunaca. Man Jesushuunoashu omit-siscafiaquin man tunumisi. Man mumisi cuscan urifi un mumisiquin. Un Diosin tsain yoifain Jesushuunoari ato yoimisi. Ascacun aton niaifofoan ranushumuaflo yonoa

ua achicashon ua mai futsan ahuun anu Patmos ano ua nichinifo. Nan mai unu toomanhuan ano. <sup>10</sup> Nanno domingo futsaino Diosin Yoshin Sharapan ua iquifain nan tapimapaiyai cuscan ua tapimashquin. Ascashon ahuara namapan cuscarahuunshon man ua ismacoian. Ascaiton ucachiorinoa tsain achacoin un nicariscatana. Nan manuti nicatsa un nica.

<sup>11</sup> Ascashon ua isca huaquin yoia, —Min oiain cuscacoin futsafu cunushohuun. Nan cunu Jesús icoinra huafu ichananmisifotu ato fomahuu. Nan ichananmisifo Efeso anoafu fomafain Esmirna anoafu fomafain Pérgamo anoafu fomafain Tiatira anoafu fomafain Sardis anoafu fomafain Filadelfia anoafu fomafain Laodicea anoafori min oiain cuscacoin cunushon ato fomahuu, —ishon ua yoia.

<sup>12</sup> Tsoamain ufu tsainquicai nicatan ifiacucahua oinpaiquin un oian lamparina cuscara otati siete oro ointsa un oian. <sup>13</sup> Nan otafo nushmancayan nocofunu ointsa nanno nia. Ahuun sahuuti ofan ofaicai sahuufain ahuun nanushumuti putacoin ahuun shochi ano nuua oshin oro ointsa faca facaitsa sahuua. <sup>14</sup> Ahuun foo oshopacoin yoa rama furoa ointsa. Ahuun furorifi chi shahuacai ointsa. Ascan faquishfiano chi uruaino non oinsharatiro. Nanscarifai yorafoan fomanpaiquin ahuara onupaifiaiton Jesús onantiro. <sup>15</sup> Ahuun taurifi cuno faca facaitsan ointsa. Ahuun oi uhuapacoin shushan tuporo iqui nicatsa. <sup>16</sup> Ahuun mucu mumihuuri fishi ointsa siete tsoma. Ahuun ashfan muranri nopus ocuma rafu cunocoin asuonmua ointsa. Ahuun fusorifi fari chashaquin finai ointsa. Nanscara nan nocofunu un oian.

<sup>17</sup> Nan ointani un ananman pacua nan naa shinantsai. Ascaiton ahuun mucu mumi-huurishon manmainyanan ua yoiquin isca huaa, —Ratuyamahuu. Ahuara oniataima un iyopaoni. Nanscarifai un ipanaca. Uncai unupacunacama. <sup>18</sup> Unfi ipamisiquin. Mun nafianishaquin un afanan funini. Ascashu un nipanaca. Yorafo naitian urus fusti un ato numatiro. Un shafi cuscara aya. Un fupotiro omitsiscapanacafo muran fotamarocon Upa Dios icari fononfo. Ascafia ascayamaifoan un fuputiro omitsiscapanacafo muran fononfo. Unfin nipanacaquin.

<sup>19</sup> Ascacufin rama min oiain cuscan huafain chiporifi un mia oinmashquiain cuscan cunuhuu. <sup>20</sup> Ascashon natian min oian cuscan un mia yoi min tapinon. Nan fishi siete non nan lamparina siete oro ointsa nanfohuunoa un mia tapimanon. Nan fishifo un tsoma nanfofin nan ichananfo Diosin tsain ato tapimamisi cuscarafoquin. Ascan nan lamparinafo oro ointsafo nanfofin ichananti pushu ano Jesús icoinra huafu cuscarafoquin, —ishon Jesús ua yoia. Nan siete ichananti pushu anoa icoinra huafu ato tsain shara fomani.

## 2

### *Jesús Efeso anoa icoinra huafu ichananti pushu muranno ayo yoini cuscan*

<sup>1</sup> Ascatain Jesús ua yoiqui isca huaquin,

—Ua icoinra huafu Efeso anoa aton Diosin tsain yoimisi un yoipaiyai cuscan ua cunushoquin isca huai. “Unquian maton Ifo Jesús un nantifi Uhuun Upa Diosin tsain yoimisifo un atofu icacaimisi ato cushusharashquin. Ascacun un mato yoipaiyai cuscan ua nicasharacahuun. <sup>2</sup> Man imisi cuscan mun tapia. Man manfin uhuunoashu fasi yonosharamisiquin. Ahuara ahuuscarafaino man tunucoinmisi. Yora chaca huamisifo fu man rafucasmamisi. Ascan ratoran futsan yoimisi isca huaquin, ‘Cristo ua nichian. Ascacun un mato yosinon,’ ishon mato yoiaifoan. Man yoimisi isca huaquin, ‘Non tapinon. Aton tsain non nicayonon iconmainquin,’ man huamisi. Ascashon ato nicacacaquin man ato onamisi uhuun tsain mato yositama aafin chaniaifoan.

<sup>3</sup> “Ascan uhuunoashu omitsiscafiaquin man tunucoinmisi. Mancaí ua tanaquin unupaimisima. <sup>4</sup> Man asca sharafiamisi un tsain futsan mato yoisharapai. Man fasi ua noiquin tauhuani cuscacai natian man ua noiquin asca huaima. Man mutoi futsui.

<sup>5</sup> “Man ua noiquin tau huani cuscan shinancahuun. Nanscacoин huaquin ua noicahuun. Man noinain tauni cuscan afanan noinancoincahuun. Chii tsoan tanama samamashta nocatiro. Nanscarifiai marifi man chi nocacuana cuscara. Ascashon man ua tanasharayamaiton oinquin tsoan afanan mato tanaima. Ascashu man ichanainno afanan tsoa matofu ichanainma. Man chaca huai cuscan shatupaiyamafain uquiri man nasopaiyamaino un matoqui oshon un mato shatumatiro. Man afanan uhuun tsainy-oimisi inonma. Man ascaitocai tsoan afanan matohunshon ua tanapaishquima. <sup>6</sup> Asca huafiaquin ahuara futsan man shara huamisi. Nan Nicolaítafoan amaquri yosiaifoan atirifiton mato muranshon tanafo nanfoan chaca huamisi cuscan un noicasma. Un nan chaca noicasma cuscan marifi man noicasmai.

<sup>7</sup> “Ascacun man pafiquiyaquin Diosin Yoshin Sharapan nan icoinra huafu ato yoiai cuscan nicasharacahuun. Ascan Satanás mato chaca huamapaimisi. Ascafia tsoan uhuun curushhuunshon Satanás yafi ahuara chacafori finoncoian naantofin ua cachiquiri huatamarocon ua tanasharacoianquin. Naanfin Upa Dios icano un iquimashquiquin ufu ipasharanon,” —ishon Jesús nan icoinra huafu Efeso anoafu yoia.

### *Jesús Esmirna ano icoinra huafu ichananti pushu murannoafu ato yoini cuscan*

<sup>8</sup> Ascatan afanan Jesús ua yoiqui isca huaa,

—Ua icoinra huafu Esmirna anoa aton Diosin tsain yoimisi un yoipaiyai cuscan ua cunushoquin isca huai. “Unquian, un maton Ifo Jesús, un mato yoisharapai man tapinon. Ahuara oniataima un iyopaoni. Urifi ipanaca. Uncai unupacunacama. Mun nafiacun Upa Diosin ua funimani. Ascashucai un afanan napanacama. Unrocon napanaca. Ascacun un mato yoiqui isca huai.

<sup>9</sup> “Man omitsiscai cuscan mun tapia. Mun tapiari man ahuuoma. Man ahuuomafia un matofu icano man ua cuscara shara itiro. Ascacun un maton nomuran fupuashotiro man unimanon. Uricai mato potapacunacama. Ascano uhuun Upa Diosin ica ari nantifi un aya cuscan nanfori matona iishquin. Ascacufin man ahuuomafo ointsaфia manfin ichapayaquin. Ascafia mun tapia futsafu Judío cainfianishaquin ua icoinra huafoma. Ascacufin nanfocai Diospan yorafoma. Ascashon matohuunoa tsain chaca yoimisifo. ‘Norifi non Diosin tanamisiran,’ ishon yoifiafocai iconma. Ascashu nanfoan Satanás tanacanashu ahuun yoracoinfo ica.

<sup>10</sup> “Ascano inon pacuai cuscan un mato yoionon. Satanás atirifi mato cunu muran iquimashquin manmain ua cachiquiri huamainquin tapipai. Ascacun ahuutiaran man omitsiscashquiai cuscan ratuyamacahuun. Ua cachiquiri huatamarocon isca huakin shinancahuun, ‘Ua rutufiaifoannocai un ratuima. Ua chaca huafiainfoanri un tunuointiro. Uncai uhuun Ifo potapacunacama. Ascacun uhuun Ifo un tanaqui finacoinfafaini,’ ascashu man naiton un mato nimapacunaca man ufu ipanon.

<sup>11</sup> “Ascacun man pafiquiyaquin Diosin Yoshin Sharapan nan icoinra huafu ato yoiai cuscan nicasharacahuun. Ascan tsoan omitsiscashquiai ua cachiquiri huayamai nantofin Satanás uhuunshon finoncoianquin. Ascatan naashucai omitsiscapanacafu muran canacamaran,” —ishon Jesús nan icoinra huafu Esmirna anoafu yoia.

### *Jesús Pérgamo anoa nan icoinra huafu ichananti pushu murannoafu ato yoini cuscan*

<sup>12</sup> Ascatan afanan Jesús ua yoiqui isca huaa,

—Ua icoinra huafu Pérgamo anoa aton Diosin tsain yoimisi un yoipaiyai cuscan ua cunushoquin isca huai, “Unquian un maton Ifo Jesús, un mato yoisharapai man tapinon. Uhuun tsain nan nopu ocuma rafu cunocoin cuscara. Ascashon uhuun tsainmansi uhuun yorafo cushusharafain nan ua noicasmamisifo un ato onaintimatiro. <sup>13</sup> Mun tapia man pushurasi Pérgamo ano ica. Nannoshori Satanás yorafo iquimisi. Ascafiaino rafitama man ua tanasharamisi. ‘Jesús uhuun Iforan,’ man ato huamisi. Nannori ua tanamisi futsan ahuun anu Antipas nanton uhuunoa ato yoifafainmisi. Ascacun nan man rutuafu. Nanscara man tapifiashocai man ua potama. Manricai ratuima.

Ascashon maton nomuran man shinanquin isca huaa, ‘Noco rutufiaifoannocai nocon Ifo Jesús non icoinra huaquin shatuimaran,’ ishon man shinanmisi.

**14-15** “Nanscara shara. Ascafia ahuara fustirasi man chaca huamisi cuscan un mato yoi man afananasca huanonma. Shinancapon. Ahuuscashomain Israelifo non chaca huamatiroquin ishon niaifo Balac nan nocofunu Balaam yocani. Ascaiton Balaam nan yosini. Ascacun nan Balac Israelifo chaca huamani aton ahuinma chotamafain ainfofori aton funumafoya ato imani. Ascashon nan ua icoinra huamafoan ahuara futsafo rami huacashon nocon Diosiran ishon tushu inanmisifo. Nan tushu Israelifo atofu ichanancashon nan piinifo. Nanscarifaquin matofu ichananmisi atirifi nan Balaam chaca yosini cuscan nanfoanri natian nansca huacani.

**16** “Ascacun nan Balaam ato chaca huamani cuscan marifi afanan ascayamacahuun. Ascan ratoranfoan chaca shatuyamacaiyaino un atoqui samamashta nocoriscashquin. Ascashon uhuun tsainmansi un ato onaintimashqui. Uhuun tsain nan nopu cunocoin cuscara.

**17** “Ascacun man pafiquiyaquin Diosin Yoshin Sharapan nan icoinra huafo ato yoiai cuscan nicasharacahuun. Ascafia Satanás mato chaca huemapai. Tsoan ua cachiquiri huatama uhuunshon Satanás finoncoian nantonfin ua tanasharacoianquin. Ascacun un cushusharashquin. Un Israelifoan aton shunifo fariña cuscara fata shara nai muranshon shafatifi un ato niriashopaoni. Nan anuquin manánran huapaonifo. Ascan tsoancai tapipaonima ahuuscashomain un ato niriashoicain. Nanscarifi aqui un nan manán futsa cuscara un ato inanshquin nancai tsoan ointiroma. Nanfihuunshon un ato shara huapanaca. Ascari tsoan chaca huatama ua tanafafainnaiton un ato toquiri osho sharashtacoin inanshquin. Tsoa futsacai nan anu onantiroma. Ascan nan toquiri fiafin ufu ipasharatiroquin,” —ishon Jesús nan icoinra huafo Pérgamo anoafyo yoia.

### *Jesús Tiatira anoa nan icoinra huafo ichananti pushu murannoafu ato yoini cuscan*

**18** Ascatan afanan Jesús ua yoiqui isca huaa,

—Ua icoinra huafo Tiatira anoa aton Diosin tsain yoimisi un yoipaiyai cuscan ua cunushoquin isca huai. “Unquian, un maton Ifo Jesús, un mato yoisharapai man tapinon. Uhuun furo chii shahuacai cuscara. Ascacun un mato onancoian. Uhuun tau nan cuno faca facaitsan cuscara. Ascacun un mato yoiqui isca huai. **19** Mun tapifain mun onancoian man shara huamisi cuscan. Ascashu man noinancoian. Ua icoinra huafain man ua tanacoinmisi. Uhuunshori futsafo man shara huamisi. Ascatan omitsiscafaquiri uhuunshon man tunucoinmisi. Ascacufin man ua icoinra huaquin tau huanitian man futsafo shara huamisi. Ascafia natiancaifin mima huaquin man ato shara huafafainiquin.

**20** “Ascashon man ato shara huamisi. Ascafia ahuara futsan man chaca huamisi cuscan un mato yoi man afananasca huanonma. Nan ainfon Jezabel ipaoni cuscara matofu ichananmisiton yoimisi isca huaquin, ‘Unfi Diosin tsain mato yoitiroquin,’ ishon mato yoifiamisi nantocai uhuun tsaincoin yoimisima. Aafin chanimisi. Ascashu nan ainfo fasi chacacoin. Mato amaqiri yosimisi. Ascafiaitocai ahuun tsain man shatumamisima. Ascashon ua yonoshomisifo paramisi aton ahuinma chotanonfo. Nanscarifi huaquin ainfofo aton funuma chotamamisi. Ascashon mato yoimisi isca huaquin, ‘Ahaura futsa non rami huanon nocon dios inon. Nan non tushu inanon. Ascano marifi man atofu ichananshon nan tushu man pitiroran,’ ishon nan ainfoan mato chaca yoimisi.

**21** “Asacafia nan ainfoan chaca huamisi cuscan un yoifafainmisi uamain icoinra huashon ahuun chaca shatuicai. Ascafiafacai ahuun chaca shatupaimisima. **22** Ascacufin un isininmaquin finacoinquin racashu omitsiscanon. Ascano ratoran futsafo a cuscara furomacoinkhon aton chaca shatuyamaifoan nanforifi un ato onaintimaquin finacoin omitsiscanonfo.

<sup>23</sup> “Ascano ahuun tanamisifori un namaquin cuyoshquin. Un asca huaiton nantifi ua icoinra huafo maifoti anoafaoan tapitirofo un nantifi yorafo onancoian. Ascashon aton nomuran shinainfo cuscan un onancoian. Tsoancai ahuashta ua fomantiroma. Ufimain un nantifi onancoincun. Ascacufin nan shara huamisi urifi un ato shara huashquin. Ascan ratoran futsan chaca huamisi nanrifi un onaintimashqui.

<sup>24</sup> “Uhuun yoramishti Tiatira anoafaoan mancái atirifiton nan ainfoan mato chaca yosipaiyai cuscan man tanamisima. Ascan nan ainfoan ahuun nomuran Satanás shinanchacamanai cuscan ahuun tanamisifo fustisi ato tapimamisi. Ascafia mancái anori tapipaimisima. Ascacun un mato yoisharapai. Ahuara futsacai un mato yonoima.

<sup>25</sup> Ascacun uhuunshon man tapimisi cuscan nanfohuun ointiaquimayamacahuun. Un mato ihuiyoaitian nanfo cachiquiri huapaiyamacahuun.

<sup>26</sup> “Tsoan Satanás finoncoinfain nan ainfoan chaca yosiai cuscan tanatama nan naitian uhuun tsain tanasharacoianshu unfu ipashquin. Ascan naanfin niaifo patashari itiroquin. Nan maifoti anoafao ato iquishquin <sup>27</sup> Ascano Upa Diosin tsain uhuunoa cununi isca huaquin, ‘Cristo maifoti anoafao ato iquina. Ascan tsoan ahuun tsain shara nicacasmaiton ato onaintimashquin. Mai cuti curushcain non potaino moshi futsutiro. Noncái afanan ahuuscashon shara huatiroma. Nanscarifi aquin nan yoitimamisifo ato onaintimanaitiancai tsoashta ato numatiroma naanonfoma,’ ishon uhuunoa cununi. Upa Diosin ua yononi cuscan nanscarifi huaquin un mato yonoi maifoti anoafaoan aton niaifo man inon. Ascashon man ato yoiai cuscacoin anonfo.

<sup>28</sup> Shafaino ishtumanhuan fustiton chashaiton nantififain ointirofo. Nanscarifiai un afanan oaiton nantififain ua oinshcani. Ascano nantianrifi un ato yonoshquin afanan tsoashta chaca huatama uacairocon tanasharanonfo. Ascashu ufu isharapacunacafó.

<sup>29</sup> Ascacun man pafiquiyaquin Diosin Yoshin Sharapan nan icoinra huafo ato yoiai cuscan nicasharacahuun,” —ishon Jesús nan icoinra huafo Tiatira anoafao yoia.

### 3

#### *Jesús Sardis anoa icoinra huafo ichananti pushu murannoafó ato yoini cuscan*

<sup>1</sup> Ascatan afanan Jesús ua yoiqui isca hua,

—Ua icoinra huafo Sardis anoa aton Diosin tsain yoimisi un yoipaiyai cuscan ua cunushoquin isca huai. “Unquian, un maton Ifo Jesús, un mato yoisharapai man tapinon. Diosin Yoshin Shara ufu rafumisi. Ascacun nan Diosin tsain yoimisifo un iquimisi. Ascacun un mato yoi isca huaquin. Man amisi cuscan mun tapicoian. Yorafoan matohuunoa yoimisifo isca huaquin, ‘Nan Sardis anoafaoan Jesús icoinra huafain isharacoinmisiforán,’ ishon matohuunoa yoimisifo. Man isharamisifo ointzacun. Ascafia mancái matohuunoa yoiaifo cuscan man amisima. Mancaí ua tanacoiannya.

<sup>2</sup> “Ascashu man uqui ointi mutoa. Afanan ascayamacahuun. Man shinanyopaoni cuscan nannori afanan shinancahuun. Ascafia mun tapia Upa Diosin mato imapaiyai cuscan man ascacointaima. Ascashon un mato yona cuscan afiaquin atirifi man ascacolianma. Ascacun maton nomuran afanan shinansharacahuun man uhuunoa tapimisi cuscan nantifi funononma.

<sup>3</sup> “Ascacufin man uhuun tsain icoinra huafain man nicapaoni cuscan afanan nannori shinancahuun. Man chaca huaa cuscan afanan aşca huatama uarocon tanasharacahuun. Ascan afanan man uqui nasoyamacaiyaino un matoqui samamashta nocoriscatiro mato onaintimashqui. Pushu muran icafoan tapitirofoma ahuitianmain yomutso aton pushu muran iquiriscatiroquin. Nanscarifiai mancái tapiama ahuitiaran un matoqui nocoriscatashquin mato onaintimashqui.

<sup>4</sup> “Ascafia matofu ichananmisifo fustirasi Sardis anoafaoan chaca huamisifoma. Noncon sahuuti choshtacoincun non pucatiro futsa funa shara sahuushquin. Nanscarifiai

atirifi man chaca shinanpaoni cuscan man potacoинshon uhuunoa fusti man shinan-fafainaino un matoqui nocoaitian sahuuti oshopa sharashtacoin un mato inanshquin man ufu ipanon. Ascan isharamisishaquin man unfu ipanaca ua cuscara shara iishcaquin.

<sup>5</sup>“Ratoran futsafori maton cuscara uhuun tsain cachiquiri huatama ua tanasharafain uhuunshon Satanás finoncoincun nanfofin unfu isharapacunacafo. Ascashu ua cuscara shara iishcani. Nanforifi un ato sahuuti oshopa sharashtacoin inanshquin ufu ipanonfo. Ascan Uhuun Upa Diosin nan ua icoinra huafoti aton anufo man libro muran cunua nantififain tapinonfo ufu ipashquiaifo. Ascan nanfo fusti afu nipatirofo. Asacashocai un aton anu soapacunacama. Uhuun Upa Diosin futan ahuun oinmati afu nai muran icafoan ointaifi un ato yoishquin isca huaquin, ‘Nafofin uhuun yoracoinfoquin,’ ishon un ato yoishquin. <sup>6</sup> Ascacun man pafiquiyaquin Diosin Yoshin Sharapan nan icoinra huafio ato yoiai cuscan nicasharacahuun,” —ishon Jesús nan icoinra huafio Sardis anoafio yoia.

*Jesús Filadelfia anoa nan icoinra huafio ichananti pushu murannoafio ato yoini cuscan*

<sup>7</sup> Ascatan afanan Jesús ua yoiqui isca huua,

—Ua icoinra huafio Filadelfia anoa aton Diosin tsain yoimisi un yoipaiyai cuscan ua cunushoquin isca huai. “Unquian un maton Ifo Jesús, un mato yoisharapai man tapinon. Unfin ishara fustumisiquin. Uhuun tsainrifi iconcoin. Pushu ifo shafiya arus fusti pushu fuputiro yorafo iquimai iyamarai fupotiro futsafo iquinonfoma. Nanscarifiai maton niaifo David shafi cuscara ipaoni. Tsoa ahuun mai ano imapai iyamarai ato nitun huapaoni iquinonma. Nanscarifiai unfi David funaquin. Urus fusti un yoitiro upa Dios icano tsoa iquitiro iyamaraimain iquitrioma. Ascacun un mia yoi isca huaquin. <sup>8</sup> Man amisi cuscan mun tapicoian. Un mato yonoa cuscan man futsafo uhuunoa yoimisi. Ascacucai un mato yonoa cuscan tsoan mato shatumatiroma. Man ascaiton futsafoan matohuunoa yoiafo nafocai ahuamaran mato huafiaifoanno mancái uhuun tsain cachiquiri huamisima. Ua cachiquiri huatamarocon Jesús nocon Iforan man huamisi.

<sup>9</sup>“Futsafo arifi Judío Cainfianishaquicai ua icoinra huafoma. Ascan nanfocai Diospan yorama. Nanfo chanimisifo. Ascacun un ato yonoshquin mato fuoshopacufoan yoinonfo isca huaquin, ‘Icon. Diospan Furun matohuun noicoin,’ ishon matohuunoa yoishcani. <sup>10</sup> Ascano omitsiscfiai un mato yonoa cuscan funaquima man tunucoinmisi. Uhuun tsain nicafain ua tanasharashori man ua cachiquiri huamisima. Ascacun chipo nantifi yorafo manifoti anoashu fasi omitsiscfiai ratofomain Diospan ahuun yoracoinfoquin tapishcani. Ascashu nantifi icoinra huamafo omitsiscfiai un mato cushusharashquin nanfo omitsiscfiai cuscan man omitsiscfiai.

<sup>11</sup>“Ascacun un samamashta oshquin. Ascan man ua icoinra huaa cuscan potayamacahuun. Ascatamarocon Upa Dios tanasharacahuun mato inansharpaiyai cuscan futsan finonma. <sup>12</sup> Tsoan omitsiscfiai uhuun tsain cachiquiri huatama tunucoinfain ua tanasharacoinshon nantonfin Satanás finoncoianquin. Ascashufin uhuun Upa Dios icano un ato impacusharashquin. Nannoashu raqui canacafoma.

“Ascacun un nantifi tapimashquin nanfo Uhuun Upa Diosin ahuun yorafocun. Ascashon un ato yoiquin isca huashquin, ‘Nan nuno uhuun Upa icano man no fu ipanacaran,’ un ato huashquin. Diospan yorafo Jerusalén ano ipaonifo. Asca natiánrifi Upa Diosin icano ahuun anu Jerusalén funa. Chipo nan Jerusalén funa Upa Diosin icariashu nocoqui fotoshquin. Ascan tsoan ua cachiquiri huamisima nanno ipanaca. Ascashon uhuun anu futsa tsoan nicayomisima nanrifi nan un ato anu tuqui huashshoshquin. Ascashu un isharapacunaca cuscan arifi ufu isharapacunacafo.

<sup>13</sup>“Ascacun man pafiquiyaquin Diosin Yoshin Sharapan nan icoinra huafio ato yoiai cuscan nicasharacahuun,” —ishon Jesús nan icoinra huafio Filadelfia anoafo yoia.

*Jesús Laodicea anoa nan icoinra huafio ichananti pushu murannoafio ato yoini cuscan*

<sup>14</sup> Ascatañ afanan Jesús ua yoiqui isca huaa,

—Ua icoinra huafio Laodicea anoa aton Diosin tsain yoimisi un yoipaiyai cuscan ua cunushoquin isca huai. “Unquian, un maton Ifo Jesús, un mato yoisharapai man tapinon. Upa Diosin ua amapaiyai cuscan fustisi huamisishaquin uhuun tsain un mato yoinon. Urifi nan icon fustisi un yoimisi. Ascan Upa Diosin nantifi onihuanifoti aton niaifofin unquin. Ascacun un mato yoiquin isca huai.

<sup>15-16</sup> “Man amisi cuscan mun tapia. Ua cachiquiri huacoinyamafashion un mato amapaiyai cuscacai man fuchipaicoianma. Ascashu ichananfiaicai ichananpaitocanan man ichananma. Man fasi mutoi futsua. Ascaracai sharama. Ahuara matsisharacoin niscaquin non unimacai ayatiro. Ahuara shana shara matsinaqui non unimacai ayatiro. Ascafia ahuara catsacai non unimacain ayatiroma. Catsa muquin non michotiro. Nanscarifiai atirifi yorafo nan ahuara shana cuscarafo. Ua tanasharacoianfo. Ascan atirifi ahuara matsi cuscarafo. Uhuun tsain tapisharataicanima. Ascacun un atohuun ramapaicoin. Ascafia mancái shana yafi matsi cuscarama. Ascara itama manfin nan ahuara catsa cuscaraquin. Man uqui mutocoian. Ahuara catsa muuquin non michotiro cuscan urifi un mato nansca huai. Ascashon un mato potashquin.

<sup>17</sup> “Ascan man yoimisi isca huaquin, ‘Diosin ua tapimapaiyai cuscan nantifi mun tapia. Uncai ahua futsa yopaimaran,’ ishon man anori shinanfiai mancái tapiama man chacafo huamisi. Ascacun un mato yoi. Timafin. Ua yopafiai man fasi cacapaimisi. Diosin Yoshin Sharapan mato imapaiyai cuscacai man tapiama. Manfin ahuuoma cuscarafoquin. Man imisi cuscari mun tapia. Ascan uncai ascara fuchipaima. Ascafia un matohuunoa shinain cuscacai man tapiama. Manfin nan fusho cuscarafoquin. Fushocai ahuara ointiroma. Nanscarifiai man chaca huai cuscacai man tapiama. Ascashu man yora chitoria cuscarafoflashocai man tapiama. Nanscarifiai ua yopafiaquicai man tapiama.

<sup>18</sup> “Ascacun un mato yoisharapai man chaca huamisi cuscan huafain afanan chaca huaquima. Ua yocacahuun un mato tapimanon ahuuscashumain man ua cuscara shara itiroquin. Ascafia man chitoria cuscara. Ascacun un mato sahuuti sahuumasharai man afanan rafinonma. Nanscarifiaquin man chaca huamisi cuscan un shafacafi oincoian. Ascacun uhuunoashu fusti man maton nomuran fiananan huatiro ua cuscara shara iishquin. Man fusho cuscarafoinrifi imisi. Ascacun ua yocacahuun un mato cayahuamafain uhuun tsain mato tapimasharanon. Ascan oinsharafain ua tanasharashcaquin.

<sup>19</sup> “Ascan un mato noiyamaquicai anori un mato yoicuanama. Ascafia nan un noicoiainfo fusti un ato onaintimashqui chaca shatunonfo. Ascashon nanfori un ato yoisharapai ua tanasharanonfo. Ascacun man chaca shinanmisi cuscan afanan anori shinanyamacahuun. Natian uhuun tsain nicacoincahuun un mato yoiai cuscacoin ashcaquin. <sup>20</sup> Shinancapon uhuun yoramishtichin. Un matofu rafupaicoin un matoqui nocoa. Yora pushu muran iquipaiquin iquisi pushu ifo cunatiro iquimanon. Nanscarifiai un matoqui nocoa mato yoiquin isca huashquin, ‘Un mifu rafupairan,’ ishon un mato yoipacumisi. Ascano tsoan ahuun nomuranshon ua nicaquin ua yoiquin isca huai, ‘Ifon, uqui ohuu. Un mia fuchipaifain un mia yopacoinran,’ ishon yoiaino un afu rafui. Arifi ufu rafuaino.

<sup>21</sup> “Ascano tsoan chaca huamisi cuscan shatufain ua tanasharacoian naanfin uhuun Upa Diosin icari ufu ipasharatiroquin. Ascafia un niaifocoin icaino nanfin niaifo patashari itiroquin. Unfin Satanás yafi yoshin chacafo finoncoianquin. Uhuun Upa Dios icariashu uhuun Upa fu un niaifocoin ica. Nanscarifiai tsoan ahuun chaca cachiquiri huafain ua tanasharacoianshu un icanoashu arifi ufu niaifo ipatiroquin.

<sup>22</sup> Ascacun man pafiquiyaquin Diosin Yoshin Sharapan nan icoinra huafio ato yoiaino cuscan nicasharacahuun,” —ishon Jesús nan icoinra huafio Laodicea anoafo yoia.

## 4

*Dios icarishon ahuunoa yoisharapacunacaf*

<sup>1</sup> Ascashon nannori ua yoifain Diosin Yoshin Sharapan ahuara futsa ua oinmanaino nan namapan oian un huaa. Ascashon un oian Upa Diosin icaria caincaiti nan un oinyaino nan oi un nicaquin tau huaa nanrifi un afanan nica. Nan manuti nicatsa achacoin. Ascano ua yoiquin isca huaa,—Nuri uqui ohuu. Ahuarafo chipo ahuuscar aashquiai cuscan un mia oinmayoiran,—ishon ua yoia. <sup>2</sup> Ua yoitapaiyaino samamashta Diosin Yoshin Sharapan ua shinanmatana. Ascashon ua iquipaiyai cuscan ua iquina. Ascatari nan oi un nica ari ua iyoa. Nanno niaifoan tsaoti uhuapa shara un oian. Nocon Ifo Diosin tsaoan.

<sup>3</sup> Nan nocon Ifo fasi sharashtacoin iscara un oian. Toquiri rafutan aton anu jaspe yafi cornalina nan rafu sharashtacoin faca facaitsa rafu. Nan jaspe oshoshara. Ascan cornalina oshin chushushara. Nanscarifai nocon Ifo sharashtacoin faca facaitsa ointsa. Nahuan fai tonan shara cuscaramon a tsaoano tarati huaa. <sup>4</sup> Nannori nocon Ifon tsaoano veinte cuatro nocofunufo tsaoti tarati huashu tsaoñifo. Nan nocofunufoan Jesús tanamisifo. Nanfoan icoinra huafo aton cushumisi ipaoni. Sahuuti oshopa sharashta sahuufain maiti oro faca facaitsa sharashta maiafo.

<sup>5</sup> Ascatañ nocon Ifo tsaoano canan facaiqui ointsa icain turuica nicatsari un nica. Nanscara nicaquin non tapitiro Diosin ahuamamishti huatiro. Tsoa futsacai ahuun curush cuscarama. Ascatañ nan Upa Diosin tsaoano siete lamparina uruaiton un oian. Nanfo uruai cuscan huaquin Diosin Yoshin Sharapan nan siete icoinra huafo ichananti pushufoti murannoafao futsafo tapimafain oinmatirofo ahuu cuscaramain Diosiqui arifi tapinonfo. <sup>6</sup> Nannori un oian ununhuan ointsa tsosi sharacoin. Ascano nocon Ifoan ahuun tsaoti anori nan onihuani rafu non rafuri niafo. Furo ichapaya. Fusquie yafi puchihuuri furo ichapaya.

<sup>7</sup> Futsarifi masharo ointsa icaino futsa moi funu ointsa ica. Ascano futsan ahuun fusori nan nocofunun fuso ointsa icain futsari nan tutumanhuan noyai ointsa ica.

<sup>8-10</sup> Nan cuatro putao ya seis putao ya. Nan ato putao ocuma rafu furo ichapayari. Shafatisho yafi yamutishori nan rafu non rafuri fanainquin iscafafaincani,

“Nocon Ifo Dios fasi sharacoin. Shara fustisi huapanaca. Nantofin ahuamamishti huatiroquin. Iyopaonishaqui natianri ipamisi. Ascashuri ipanacaran,”  
icashu nan rafu non rafuri fanainriacani. Ascashon yoiafori isca huaquin,  
“Nocon Ifon Diosin mirus fusti min nocon Ifocoin. Tsoa futsacai mia cuscara sharama.  
Min isharapacunaca. Ascacufin non mia fasi noiquin aicho huai. Min noco shara huafafaini,”

ishon nan rafu non rafuriton yoiriaifoanno nan icoinra huafo cushumisifo veinte cuatrofain nocon Ifo Diosin ahuun tsaoti camaqui tsaoa naman fuoshopacufoan aton maiti oro ointsa sharashtacoin nocon Ifo tsaoa afofori nannosi huacashon yoiafo isca huaquin,

“Nocon Ifo Diosin min noco maiti inan cuscan non mia afanan nasoin. Man min noco inanfiacun non mia fasi noiquinocino noco maitifo non mia afanan nasoin. Ascan mirus fustifin min noco iquitiroquin. Min nocon Numamisi. Ascashu mirus fusti min nocon Ifocoin. <sup>11</sup> Ascan minfin isharamisiquin. Ascacun mihiunoa fusti non yoitiro isca huaquin. Min nocon Ifocoin. Min nocon Dios. Tsoa futsacai mia cuscara sharama. Min isharapacunaca. Ascacufin non mia fasi noiquinocino. Ascan minfin min shinanpasi ahuamamishti huatiroquin. Min nantifi ahuamamishti onihuani. Min apaiyai cuscan fusti nantifi min onihuani. Ascacun minhiunoashu fusti nitiroforan,”

ishon nan Jesús tanamisifo veinte cuatro yorafoan yoiafo.

## 5

*Jesús nan chashoan facu cahuashara cuscaraton cununi cuscahuunshon noco tapimani*

<sup>1</sup> Ascatac afanan un oian cuscan un mato tapimai. Nocon Ifo Diosin ahuun tsaoti camaqui tsaoshon ahuun mucu mumiori papel ocuma rafu cunua sufishon tsoma. Ascashon siete tashna huatinin tashna huaa. <sup>2</sup> Ascashon un oian Diosin oinmati mutsisipacoin nan afu nai muran ica. Nantori oi ashcafínin cunaquin isca huaa, —Na cunu non oinpai. Ascan chaca huamisima fustiton na tashna huatifo fuputiro na cunu non oinon. ¿Ascan tsoan chaca huamisimamun na cunu ahuun tashna huatifo noco fupushona non oinon? —ishon oi ashcafínin yoia. <sup>3</sup> Ascafia nan nai murannoafó futan mai anoafó non Diosin oinmatifo afu ifiashocai tsoashtacai cunu fupushotiroma amuran oinonfo.

<sup>4</sup> Ascacun uaiyanan un yoia, —¡Ohuashta! Chaca huamisimacai tsoan fuchiama na cunu noco fupushonon amuran non oinon, —ishon un shinan. Ascacun un fasi uairia.

<sup>5</sup> Ascaiton nan veinte cuatro icoinra huafó aton cushumisi futsan ua yoiquin isca huaa, —Uaiyamahuu. Oinpon. Nocon Ifo nia. Cristo nanfin nocon niaifocoquin. Rato yoinacai nan masharo uhuapa cuscara mutsisipacoinma. Nanscarifiai Cristo Israelifoan aton niaifo mutsisipacoin. Nanton ahuamamishti huatiro. Tsoa futsacai a cuscarama. Ascacun anu futsamisifo isca huaquin, “Judápan funafo nan masharo curush cuscarama,” huamisifo. Ascacufin nocon yorafoan aton niaifo David ipaoniquin. Ascan nan David ahuun funa natian nuno Upa Dios fu ica. Ascacun nanton nan siete tashna huamua noco fupushotiro nan cunu non oinon. Ascacun afanan uaiyamahuu, —ua huaa.

<sup>6</sup> Ascatac nannori chashoan cahuashara fusticia ahuun masho siete nantirifi ahuun furo un oian. Rutuafó ointsaia Diospan tsaoti ano nia ica. Nannorifi nan rafu non rafuri Diosin onihua yafi nan veinte cuatro icoinra huafó cushumisifoan tarati huayacunafo. Tsoa futsacai a cuscarama. Nanton ahuamamishti huatiro. Diosin Furun manifoti ano nichian ahuun Yoshin Sharahuunshon nantifi yorafo onancoinon. <sup>7</sup> Ascan Upa Diosin nan cunu ahuun mucu mumiori tsomacun nan Jesús chashoanun facu cuscaraton man fia. <sup>8</sup> Fishon nan rafu non rafuri Diosin onihuani yafi nan veinte cuatro icoinra huafó cushumisifoan fuoshopacufoan manuti guitarra cuscarafo yafi tutsofo nanfoan tsomafo. Nan tutsofo oro faca facaitsa. Nanfo muran fiin otano ahuun coin tipoi ininsharayacoin. Nanscarifiai Diospan yorafoan a cufiaiton Upa Dios nan icarishon ato nicamisi.

<sup>9-10</sup> Ascano nantianri nanfo fanainti funapan fanainquin iscafo,  
“Min chaca huayamaflamisicun mia rutunifo.

Ascashu nantifi yorafo manifoti min noco nashocai min imi foni  
Satanás afanan nocon ifo itama

Upa Diosin ahuun yorafo non inon.  
Ascacufin mirus fusti nan cunu Upa Diosin tsoma min fitiroquin.

Ascashon ahuun tashna huamuafó  
min noco fupushotiro  
amuran cunua cuscan noco tapimashquin.

Mihuunshon mia icoinra huafotí  
Diospan yorafo itirofo.

Ascano nanfoanri futsafo  
min tsain shara ato tapimanano min ato amapaiyai cuscan anonfo.  
Ascacun non maifoti anoafóan  
niaifo patashari iishquiran,”

icashu fanaincafo.

<sup>11</sup> Ascatac un oianri Diosin oinmatifo afu nai muran icafo ichaparasicoín tsoancái ato tanan huatiroma. Nanfo fanaincafoan oinfain un ato nica. Diosin tsaoti ano

tarati huayacunafo nan Diosin onihuani rafu non rafuri non nan Jesús icoira huafu cushumisifo veinte cuatro naqui huayacunafo. Ascashu nanfo ya osiashu Diosin oinmatifo fu fanaincaifoan un nica. <sup>12</sup> Fasi oi ashcafinin fanaincansi iscafo, "Diospan facu Jesús chashoan cahuashara cuscara sharashtacoin man rutunifo.

Ascafia natian nantifi manifoti ato iquifain  
nantifi nai murannoafoti yafi mai anoafori ahuuna iquin.

Naantofin nantifi tapicoianquin  
ahuun curushhuunshon ahuamamishti huatiro.  
Ascacun nantifiton min sharacoinran mia huapanonfo.

Mirus fustifin min nocon Ifo iquicain.

Ascacun ¡Aicho! Min nocon Ifo ishara fustipacunacaran,"  
icashu fanaincansi.  
<sup>13</sup> Ascatafin un nica nantifi nai murannoafoto fanaincaino mai anoafori fanaincaino unuhuan anoafori fanaincansi iscafo,  
"Upa Diosin ahuun tsaoi ano tsaoa.

Furun Jesús chashoan facu cuscara sharashta  
nan rafu nocon Ifo ishara fustipacumisifo.

Ascacun nantifiton man sharacoinran ato huafain  
man fusti nocon Ifocoin  
ahuamamishti man huatiroran, ishon yoipacunonfo,"  
icashu fanaincansi.

<sup>14</sup> Ascata nan rafu non rafuri Diosin onihuanifoan yoiquin isca huafu, —¡Aicho! Nan-scasi ipanon. Amen, —icaifoanno nan veinte cuatro Jesús icoira huafu cushumisifo nan Dios yafi Furun nanman fuopacufoannafo. Nanfoanrifi Upa Dios yafi Jesushuunoa yoisharafo.

## 6

### *Nan tashna huati siete*

<sup>1</sup> Ascata un oian nan Jesús chashoan facu cuscaraton nan cunu tashna huamua siete tsoma. Ascashon fusti fupua. Fupuaino un nica nan rafu non rafuri Diosin onihuani futsan ahuun oi ashcafinin yoia cuscan nan turuica nicksatton yoia, —Ohuu, —yon. <sup>2</sup> Ascacaino caballo oshopa ua chaima nocotoshiaiton un oian. Nan caballao camaqui tsoaran piyacati tsomashu tsaocon niaifoan maiti maimana. Man maimanano nannoashu caballo camaqui man caa. Nantorifi futsafo iquipaiyai cuscan man iquini caa. Ascaitocai tsoashta nitun huatiroma. Nantomain nantifi finoncoincun.

<sup>3</sup> Ascata Jesús Diospan facu nan chashoan facu cuscaraton afanan nan cunu tashna huamua futsan fupua. Fupuaino un nica nan rafu non rafuri Diosin onihuani futsan afanan yoia isca huaquin, —Ohuu, —yon. <sup>4</sup> Ascaino caballo futsari oshininpia nocotoshia. Nan caballo camaqui tsaocon nopus chainipa inanfain yonoa mai ano catanon. Ascata nocoshon maifoti anoa ato shinanmana afanan unimasharatamarocon noicas-matanancanashu rutunanonfo.

<sup>5</sup> Ascata Jesús chashoan facu cuscaraton afanan nan cunu tashnahuamua futsari fupua. Nan fupuaino un nica nan rafu non rafuri Diosin onihuani futsan afanan yoia isca huaquin, —Ohuu, —huaino caballo futsa fisopari nocotoshiaiton un oian. Nan caballo camaquiri tsoanra tsaocon ahuun ihuu tananti tsoma ica. <sup>6</sup> Ascaino nantianri un oi nica nan rafu non rafuri Diosin onihuani nastumai un nica yoiquin isca huaiton, —Tushu yamaicuana iishquin. Nan aya cuscafia fasi chicoin. Nocofunun shafa fusti yonoshon ahuun rafanan trigo kilo fusti fitiro ascayamarai arroz kilo rafu non fustisi fitiro. Afanan fipaifia ahuun pui tushuama ahuara futsa afanan fipan. Ascacun shuni yafi nan fimi uva ahuun unu chacana huayamahuu, —ishon yoia.

<sup>7</sup> Ascano afanan Diospan facu nan chashoanun facu cuscaraton afanan nan cunu tashna huamua futsari fupuaino un nica nan rafu non rafuri Diosin onihuani futsan

afanan yoiquin isca huaa,—Ohuu,—huaa. <sup>8</sup> Ascan caballo futsa fasi pashicoin noco-toshiaiton un oian. Nan caballo camaqui futsari tsaoa ahuun anu Namamisi. Nanton yorafo namatiro. Ascashon nantori yoia isca huaquin,—Un yorafo namapairan,—huaiton Diosin yoia,—Ai. Min atiroran,—huaa. Nan Namamisi cachiori futsan oa. Ahuun anu Namisifoanno ica. Ascano nan namamisihuunoashu mani futsafoya futsafo rutunancani atirifi tushuoma fonican i naifoanno atirifi pau futsa futsatapafoan ato namaino atirifi yoinafoan ato rutua nacani. Ascashu fasi yorahuanrasi nashcani. Tsoan ato tanan huatiroma un oian.

<sup>9-10</sup> Ascatac afanan Jesús nan cunu tashna huamua futsa fupua. Fupuaino un oian nan Jesús icoingra huashu namisifo. Niyopaonifotian Diospan tsain futsafo yoifain Jesushuunoari yoifoanfafainpaonifo. Ascaifoan ato rutunifo. Ascashu nanfo Jesushuunoashu nani. Natian un oian aton furo yoshinfoan Dios cufiti ano ichanancashon oi ashcafchin yoiafo isca huaquin,—Nocon Ifo Diosin, min nantifi onancoian. Min ahuamamishti huatiro. Min isharafustimisi. Mincai ahuashta chaca huamisima. Min iconmisi. Nan mia icoingra huamafoan mai anoshon noco rutunifo. Ascacun ahuutianmun min ato onaintimaicain,—ishon yoiaifoan. <sup>11</sup> Ato yoiqui isca huaquin,—Manayocahuun. Funacaquima. Futsafo mato cuscarafori uhuunshon uhuunoa yoimisifo iishcani. Ascacun nanfo mato cuscara uhuun oinmatifo arifi iishquicani. Nanforifi uhuunshon yora chacafoan ato rutushcani. Ascan ahuun unutaqui ato rutuafono mato ano nocoshcani,—ishon nocon Ifoan ato yoia. Yoitan sahuuti osho chainipa sharashtacoin ato inan. Nanfoanmain mai ano niyoshon Upa Diosin tanasharamisicun ato inanyama.

<sup>12</sup> Ascatac Jesús nan chashoan facu cuscaraton afanan nan cunu tashna huamua futsari fupuaiton un oian. Fasi curushcrai mai nayanaiyaicain farin afanan chashayamaino nan sahuuti cushto fisopaton fupoa cuscara faquishcoin icain osho oshicoin imi ointsa icain. <sup>13</sup> Nihuu curushpacoin nocoquin fana higuera ahuun fimi oshianfo unutaquin niriatiro. Nanscarifiai fishifo nai murannoashu mai ano pacuaf. <sup>14</sup> Nainhuan miscoacunfoanni ointsa yamariscatanaino machihuan yafi mai toomanhuan naiyanaiyaicaino futsa ano shucucaina.

<sup>15</sup> Ascaino nantifi mai anoafu ratucoianfo. Manifoti aton niaifofo non niaifo patasharifo non ranushumuafaon ato niaifofo non mafo ichapayafo non yora mutsisipafo non oinmatifo non ifomaisifori nantifi ratucoianfo. Ascano atirifi mahua quini uhuapa muran ichoafu onupaicani. Atirifiri machi cuya ano ichoafu toquirininhuan ananmanri onupaicani. <sup>16-17</sup> Ascatac fasi fiisiyanan yoiafo isca huaquin,—¡Ohuashta! Upa Diosin nai murannoaton ahuun Furun Jesús nan chashoan facu cuscara natian nocoqui sinacoin. Ascacun non ahuuscatiromun omitsiscashquima. Tsoashtacain Diosin numatiroma noco onaintimanonma. Ascacun na machi cuyafo yafi toquirininhuan noco camaqui pacupainon Diosin noco fuchishon noco omitsisca huanonma,—ishon nan nicacas-mamisifoan yoiafo.

## 7

### *Diosin ciento cuarenta y cuatro mil ahuun yorafo cushushquiai cuscan*

<sup>1</sup> Ascatac afanan un oian cuscan un mato tapimai. Diosin ahuun oinmati rafu non rafuri afu nai muran imisifo un oian. Futsa fari oaiquiri niaino futsari fari caiquiri nia. Ascan futsa fari oai istafari niaino futsari fari cai istafari nia. Ascaino nihuu nishmapacufoanna. Afananricai nantifi maifoti anoa nii puifo puricama. Unuhuanri afanan fuchaima pusiquima raca. <sup>2</sup> Nan rafu non rafuri Diosin ato yonoi mai yafi unuhuan chacana huatirofo. Ascano Diosin oinmati afu nai muran ica futsari nan fari oaiquirinoashu oaiton un oian. Nocon Upa Diosin nan nipanacaton ahuun sello

ya oa. Nan Diosin yonocun ahuun yorafotihuun nutatiro nantififain tapinon Diospan ahuun yorafocun.

<sup>3</sup> Nan oquin Diosin oinmati rafu non rafuri ato oi ashcafinin yoia isca huaquin, — Manayocahuun. Diosin tanamisifo iquisi fumananqui un ato Diosin anu nutayonon nanfo Diospan yorafocun nantififain tapinonfo. Ascacun non acataima ahuara mai anoaf yafi unuhuan anoafori chacana huariyamacahuun, —ishon ato yoia. <sup>4</sup> Uun nica 144,000 Israelifoan aton fumananqui Diosin oinmatinin Diosin ahuun anu man ato nutan. <sup>5-8</sup> Nocon shuni Israeli ahuun facufo doce furonanfacufo cainni. Iyoaton ahuun anu Judá.

Judá cachiori Rubén.

Rubén cachiori Gad.

Gad cachiori Aser.

Aser cachiori Neftalí.

Neftalí cachiori Manasés.

Manasés cachiori Simeón.

Simeón cachiori Levi.

Leví cachiori Isacar.

Isacar cachiori Zabulón.

Zabulón cachiori José.

José cachiori chipo facucoin Benjamín.

Nan doce fustirasi pashcanain futsuashu icafo. Ascan nan shoco futsafo anoashu caiafo aton funafo doce mil Diosin ato catonni.

### *Yorahuanrasifain ato sahuuti oshopa sahuuaf*

<sup>9</sup> Ascatan Upa Diosin yafi Furun nan chashoanun facu cahuanshara cuscara tsaoano yorahuanrasi niafo tsoancai ato tanan huatiroma. Nan maifoti anoaf manifotifain sahuuti oshopa chainipa sahuucashon upu tsomafo. <sup>10</sup> Nanfoan oi ashcafinin yoiafo isca huaquin,

“Nocon Upa Diosin futan Furun Jesús noco nimapacuaf. Nocon Ifo Jesús nan chashoan facu cahuanshara cuscara nocohunoashu nani nocon chaca soashoshquin non afu nipanon,”

ishon yoiafo. <sup>11-12</sup> Ascatan Nocon Ifo tsaoano ahuun oinmatifo afu nai muran imisifo non Jesús tanamisifo ato cushumisifo yafi nan rafu non rafuri Diosin onihuani nanfo nanno niafo. Ascashon ratioconun mai chachishon fuoshopacufoantan Dios yoisharaquin isca huafo,

“¡Aicho! Mirus fusti min icocoin. Min isharapacumisi. Mirus fustirifi min noco imasharatiro. Min nantifi onancoian. ¡Aicho! Non yopai cuscan min noco ashomisi. Ascacun nantififain min sharacoinran mia huapanacafo. Minfin ahuamamishti huatiroquin. Min nanscasi huapanaca. Nanscasi ipanon. Amen,”

ishon yoiafo.

<sup>13</sup> Ascacun Jesús tanamisifo aton cushumisiton futsan ua yoca isca huaquin, —¿Na yorafo sahuuti osho chainipa sahuuaf raniashu fuafomun min tapiamamun? —ishon ua yoca. <sup>14</sup> Ascaiton un cuma, —Ma. Uncai tapiama. Minfin tapiaquin. Minfin ua yoitiroquin, —un huaiton. —Nanfo fasi omitsiscani. Ascaifoan Diospan Furun nan chashoan facu cahuanshara cuscаратон ato nashonihuunshon ato chaca soashona ato imasharanon. Nanscacun ato sahuuti oshopa shara sahuumana.

<sup>15</sup> Ascashu Upa Diosin icano afu imisifo. Afu ishon nan Upa Diosin ato yonoa cuscan ashopacunacafo. Ascacun ato cushufafaini ahuara chacafo atoqui nocononma.

<sup>16-17</sup> Diospan Furun nan chashoan facu cahuanshara cuscara Upa Dios fu imisi naanfin ato cushumisi ipashquiquin. Ascanocai afanan tsoa foniyamacai nomipacunacafoma. Afananricai farin ato tsacaima. Ascashon Jesús ato iyoaino unimapacunacafo. Ascacun Upa Diosin aton ointi fupuashoshquin afanan uainonfoma, —ishon yoia.

**8***Nan tashna huamuaflo Jesús ahuun unutaqui fupua*

<sup>1</sup> Ascatan ahuara iishquai cuscan ua oinmayoa. Jesús Diospan facu nan chashoanun facu cahuanshara cascaraton cunu tashna huamua siete man fupuquin tau huayoa. Ascan natian ahuun unutaquin futsari fupuaiton un oian. Diosin icano nai murannoashu nantifi media hora puusiyoafoma.

<sup>2</sup> Ascatan Diosin ahuun oinmati siete afu nai muran icafoan atoti manuti inanpacua chipo ato yoiaitian chaan chaan ashquinonfo.

<sup>3</sup> Ascaino Diospan oinmati futsan paran uhuapamashta oro faca facaitsa tsomashu Upa Dios cufiti ano nia un oian. Nan paran uhuapamashtanun ahuara inin shara coaino fia. Ascan nantifi Diospan yorafoan cufimisifo cuscan osishon Dios cufiti camaqui huua. Nannori chaima Diosin tsaoa. <sup>4</sup> Ascano nan oinmati Dios fu nai muran imisi paran uhuapamashta tsomashon ahuun coin tipoi inin shara nai muran man foa. Nanscarifiai Diospan yorafoan cufiaifo cuscan Upa Diosin nan icarishon nicatiro. <sup>5</sup> Ascacun Upa Diosin man itishara huua maifoti anoaflo nan icoingra huafoma ato onaintimashqui. Ascashon ahuun oinmati yonoa afanan paran uhuapamashtanun cufiti sapa muran chi fospi huanon. Fospi huatan nai muranshon mai ano man pota. Ascaino mai ano fasi curushcai turuica achacoin nicafain canan piishicain mai nayanaiyaca.

*Oinmati afu icafoan manuti chaan chaan acani*

<sup>6</sup> Ascatan Diosin ahuun oinmati siete afu nai muran icafo atoti manuti inan itishara huaflo chaan chaan ashcaquin.

<sup>7</sup> Ascan futsan ahuun manuti chaan chaan acaino uno matsi tocoromishti yafi chii imia osia mai ano pacua. Ascaino mai cashcu futsa man coi cuyo. Un tercero del maitio man coi cuyo. Nantifi mai anoa fasifo yafi ihuifo man coi cuyoari.

<sup>8</sup> Ascatan Diosin oinmati futsanri ahuun manuti chaan chaan acaino machi uhuapa chi urumanhuan ointsa Diosin nai muranshon potaino unuhuan muran pacua. Ascano unuhuan cashcu futsa imi ica. La tercera del unuhuan imi ica. <sup>9</sup> Ascaino atirifi unuhuan muran icafo man nai cuyo. Atirifi la tercera de shashohuanfori man coi cuyo.

<sup>10</sup> Ascaino Diosin oinmati futsan arifi ahuun manuti chaan chaan acaino fishi uhuapacoin chi uruai cuscara nai murannoashu pacua. Atirifi unofo muran man pacua. Fishihuan chi uruai cuscara la tercera unofoqui man pacua. Ascashu uno tsosia sharafoquiri man pacua.

<sup>11</sup> Nan fishihuan ahuun anu mocacoinran huamisifo. Nan uno muran pacuano la tercera uno moca ica. Ascacun yora ichaparasi nan uno ayacanashu nai futsuaflo.

<sup>12</sup> Ascatan Diosin oinmati futsan arifi ahuun manuti chaan chaan acaino farin la tercera afanan chashasharama oshuri la tercera afanan chashama. Ascaino la tercera fishifoanri afanan chashafoma. Ascashu shafata cuatro horas faquishia. Yamuri cuatro horas fasi faquishcoin.

<sup>13</sup> Nanfo un oianino un oianri Diospan oinmati tutumanhuan cuscara fasi cuya noyaiton un nica. Naanton oi ashcafinin yoiquin isca huua, —¡Ohuashta! Diosin oinmati afu nai muran icafo rafu non fusti futsan aton manuti chaan chaan acaino mai ano icafo fasi mimacaia omitsiscashcani. Ascacun ¡Ai timafin! —ishon yolia.

**9**

<sup>1</sup> Ascatan Diosin oinmati futsan arifi ahuun manuti chaan chaan acaino Diospan tsoara futsa nai muranshon mai ano nichian. Ascan fototan nan yoshin chacafo quininhuan faquish muran icafo ano caa. Nan quininhuan fupotiya. Ascan amurannoafocai ahuuscashu caintirofoma. Ascafia nan nai murannoafotomana Diosin shafi inan quininhuan faquishi murannoafotomana ato caimanon. <sup>2</sup> Ascashon ato cainmatanaino nan mai quininhuan murannoashu coinmahuanfoya nai muran foafo. Ascaino fari

chashasharayoama. Nantio nai faquishcoin iyoa. <sup>3</sup> Ascatan nan coinmahuan muranoashu ocutsuru cuscarafo ichaparasi mai ano nichian. Diosin ato fasi pofucointima inapapia cuscara inonfo.

<sup>4-5</sup> Ascashon ato yonoa isca huaquin, —Mai anoaflo fasifo yafi fanaflo non ihuifori chacana huayamacahuun. Ascan tsoan uhuun yorafoma aton fumananquiri uhuun anu nutamuafoma nanfo fusti man ato tucatiro. Ascafia ato rutuyamacahuun. Ato rututama muci fustiti oshu man ato omitsiscahuatiroran, —ishon ato yonoa. Ascacun ato tucafoanno nan icoinra huamafo inapapia muutsa mucani fasi omitsiscafo.

<sup>6</sup> Mucu fustiti oshu nanscara mucani nan icoinra huamafo tunuyamacacaicani aafin napainafo. Ascashon yoiqui isca huaflo, —¡Ohuashta! Uncai tunutiroma. Un naafin shara itiroquin, —ishon yoiafo. Ascafia ahuuscashuaci natirofoma.

<sup>7</sup> Ascan natian nan ocutsurufo ahuu cuscaramainquin un mato tapimai. Caballo iquisi itishara huatirofo futsafo rutuifoshcaquin. Nanscarifiai nan ocutsurufo nan caballo cuscara ointsafo. Ato maiti oro cuscara sharashtacoin maiafo. Aton fusorifi nan nocofunun fuso ointsa. <sup>8</sup> Aton foo ainfoan foo ointsa ato shutarifi masharonun shuta ointsa icain <sup>9</sup> Aton shochi ano cuno ointsaton shofucumuaflo ahuaraton ato tsacapaiyaino amuran iquinonma. Ascashon aton putao pua puaiquin achacoin nan caballofoan ahuun taramuti tarafoaino futsafoya rutunain nicatsa. <sup>10</sup> Ascatan nantifi tsitsisiyafo. Naanton yorafo chachiano isin mutiro inapapia mutsa. Ascashon ato tsitsisinin yorafo omitsica huatiro. Mucu fustiti oshu ato isinmumatiro. <sup>11</sup> Nan quininhuan faquish muran yoshin chacafo icafoan aton niaifoan ahuun anu Israeli tsainman Abadón. Griego tsainmanri ahuun anu Apolión. Onicoinnin tsainman yorafo rutumisi.

<sup>12</sup> Ascan man chaca finonquin tau huaa. Ascan nan rafu nocoataima.

<sup>13</sup> Ascatan Diosin oinmati afu ica futsan ahuun manuti chaan chaan acaino. Anoshon Dios cufiti acamaqui nan rafu non rafuri moi masho ointsa oro sharashtacoin nan nushmancayanoa oi un nica. Cufimisifo ano un oi nica. <sup>14</sup> Nan oin Diosin oinmati afu icaton manuti tsoma yoiaiton un nica isca huaquin, —Nan rafu non rafuri yoshin chacafo Upa Diosin ato munushua nan unu uhuapa ahuun anu Eufrates anoa ato muputahuun fononfo, —ishon yoia. <sup>15</sup> Nanno nan yoshin chaca rafu non rafuri afin itisharamisifo. Ascan rato hora yafi rato shafatan non rato oshu non rato farimain ato caimanaitian atirifi yora mai anoaflo la tercera yorafo ato rutushcani. <sup>16</sup> Ascashon un nica yorahuanrasi dos cientos millones ranushumuaflo caballo camaqui tsaoaflo futsafo rutui foshcaquin.

<sup>17</sup> Ascatan Upa Diosin ua ismani nan ranushumuaflo yafi ato caballofo un oian iscara, Nan caballo camaqui tsaoaflo aton shochi nan chii rucun cuscara cuno oshin shara non tonancoin non chashnanpan shofucumuaflo. Ascan nan caballofoan aton mapo masharo mapo ointsa. Aton ashfan murannoashu coin yafi chii uruaino azufre ashfacanun siquin. <sup>18</sup> Nanfoan yora ichaparasi man namafo. La tercera manifoti man ato namafo. <sup>19</sup> Aton ashfa futan ato inan yorafo rututiro. Aton ina nan rono paupaton ina cuscarafo. Nanfoan yorafo omitsica huaflo nanonfo.

<sup>20</sup> Atirificai afihuunoashu nayamafiacani aton chaca shatuafoma Upa Dios tanashcaquin. Ascatararocon yoshin chacafo tanamisifo cuscan shatuyamafain oro iyamarai cuno oshopa sharashta non cuno futsan ahuun anu bronce non toquiri non ihuirifi ramihuaflo. Ascafia nanfoancai ahua oinyamafain nicatirofoma raquiri cahuascatirofoma, —Naan nocon Dios. Non ahuun noiran, —ishon yoimisifo cuscan shatuafoma.

<sup>21</sup> Ascashon chaca futsa futsatapafo huamisifo cuscan shatuafoma. Rutumitsamisifo cuscari shatuyamafain shointian cuscan shatuyamafain nocofunufo aton ahuinma fu imisifo cuscan shatuyamafain ainfofori nanscarifiaifono. Onumisifo cuscari shatuafoma. Ascashu nanfo chacacoinfiashon tsoan aton chaca shatuafoma nocon Ifo Jesucristo tanasharashcaquin.

## 10

### *Upa Diosin ahuun oinmatinin nan afu ica papel uhuapama cunua sufia tsoma*

<sup>1</sup> Ascantan un oian Diosin ahuun oinmati afu ica futsa mutsisipacoin nai murannoashu fotoaiton. Coin camaqui fotoaiton ahuun caya un oian iscara. Maiti nanhuanfai ointsa maia. Ahuun fuso fasi chashacoian fari ointsa. Ahuun quishi rafu chi ointsa.

<sup>2</sup> Ascashon papel uhuapama cunua sufia tonoshon tsoma. Ahuun tau mumiori ununhuhan fumancayan paicain ahuun tau mushquiori mai ano paia. <sup>3</sup> Ascantan oi ashcafainin cuna nan masharo uhuapaton ahuun oi nicatsa. Ascaiton nan siete turuica curushcain oi uhuapaton futsan cuma. <sup>4</sup> Ascacun nan yoiafo cuscan nicashon un cunucuana. Ascafia nai ari Dios icarishon oi futsan ua yoiqui isca huaa, —Min rama nica cuscan cunuyamahuu. Aton tsain tsoa tapimayamahuu, —ishon ua yoia.

<sup>5-7</sup> Ascantan Diosin ahuun oinmati afu nai muran icaton mutsisipacoin unuhuan yafi mai ano paishon ahuun mucusumiori mushainacahuan yoia isca huaquin, —Upa Diosin nípanacaton nai yafi nantifi nai muran icafo onihuafain mai yafi mai anoafó onihuafain unuhuan yafi unuhuan muran icafori onihuani. Nanhuunshon un yoiquin isca huai, Upa Diosicai afanan ato manaima. Ahuun yoishomisifo tapimapaoi cuscacai futsafoan tapipaonifoma. Ascafia natian Diospan oinmati afu ica futsan ahuun unutaqui manuti chaan chaancaino ato tapimayoni cuscan nantifi nanscacoinshquinran, —ishon Diosin oinmatinin ua yoia.

<sup>8</sup> Ascan nan oi nai murannoá un nicaton afanan ua yoia isca huaquin, —Nan Diosin oinmati afu ica unuhuan yafi mai ano nia. Nanno aqui catahuun. Ascashon nan papel sufia tonoshon tsoma fianhuun, —ishon ua yoia.

<sup>9</sup> Ascan cashon Diosin oinmatiqui nocoshon un yoia, —Nan papel sufia uhuapamashta ua inanhuan, —un huaiton. —Fihuu. Ascashon pihuu. Piqui min mui min ashfa muran fata sharacoin fona cuscara. Ascan man shuashon min mui min shaqui murannoashu mocacoin iquin. Ascashon min tapitiro Diosin tsain shara iconcoin. Ascari min tapitiro nan tsain yoia cuscacoin yorafo omitsiscashcani. Mirifi min tapiaino min fasi shinantiroran, —ishon ua yoia.

<sup>10</sup> Ascacun un papel sufia uhuapamashta fitan un pishon uhuun ashfa muran un mua fata shara fona mutsa. Ascafia un shuashon uhuun shaqui muran un mua mocacoin. Nanscarifiai ua yoia cuscan huafain ua isma cuscari uhuun nomuran un nanuashu un unimacoinna. Ascafia nan tsain inon pacuai yoia cuscan yorafo omitsiscashcani. Nan oinquín un fasi shinan. <sup>11</sup> Un asca huano afanan ua yoia, —Diosin ahuun yorafo yoipaiyai cuscan afanan ato yoihu. Ahuarafó iishquiai cuscan yorafohuunoa yoifain manifotihuunoa yoifain niaifofohuunoari ato yoihu, —ishon ua yoia.

## 11

### *Nocon Ifo Jesús yorafo yoipaiyai cuscan nocofunu rafutan ato yoishquicani*

<sup>1</sup> Ascantan tsiquiti cuscara tananti ua inan. Ascashon ua yoia isca huaquin, —Dios fu tsainti pushu ahuun chainipa yafi ahuun nashfa muranri tanantahuun. Anoshon Dios cufigiri tananfain ahuun yorafoan ahuutitomain nocon Ifo Dios noiquin fanainshocain a cufiafori ato tanan huahuu tapishquin. <sup>2</sup> Ascashon Upa Diosin yonoa cuscan Israelimafo pushu umainti fusti nocoshcani. Fari rafu non fusti nushmancayan Israelimafoan Jerusalén chacana huashcani. Ascan nan Israelimafoanci Jesús icoinra huafoma ascashucái Dios fu tsainti pushu muran tsoa iquitirofoma. Ahuun unmainti fusti fotirofo. Ascacun unmainti tananyamahuun. <sup>3</sup> Ascacun nantianri un nocofunu rafu Jerusalén ano nichishquin. Nanno icafo un ato yoipaiyai cuscan nan rafutan ato yoishquicani. Fari rafunon fusti nushmancayan atohuunshon nan Jerusalén ano icafo

un ato yoishqui. Ascashon nan rafutan sahuuti chocashta sahuucashon atohuun rama-paicoquin ato ismashcani. Uhuun curushhuunshonri ahuamamishti huashcaniran, —ishon Diosin ua yoia.

<sup>4</sup> Ascashon Diosin ahuun yorafo yoipaiyai cuscan nan rafutan yoimisifo. Nan rafu nii ahuun anu olivo cuscara. Nan olivo shuni ichapaya. Nanscarifi aquin nan rafutan Diospan Yoshin Shara nanuaf. Nan rafu lamparina ota cuscara. Faquishaino lamparina otacun non shafacafi oincointiro. Nanscarifiai futsafoan nocon Ifoan tsain shara tapiyamaifoan nocon Ifoan ato yoipaiyai cuscan nan rafutan ato tapimatiro. Ascashu man itisharamisifo ahuun Ifoan tsain shara yorafo yoishcaquin. <sup>5</sup> Tsoara futsan nan Diospan tsain yoimisi rafu noicasmafain chaca huapaiyaiton nan rafutan aton ashfa muranshon chii siiatanaino ato namashquin. Ascacun tsoan ato chaca huapaiyai nan yorafin naashquiquin.

<sup>6</sup> Ascashon Upa Diosin ato yonoaino nan rafutan Diospan tsain futsafo yoiaitian aton tsainmansi yoitirofo afanan oi fuyononma. Ascatac unofo yafi ianfo non unuhuan nanfori aton tsainmansiunu fiananan huariscatiro imi inon. Asca huapaiquiri aton tsaimansi pau futsatapafo yorafo fuchimatiro.

<sup>7</sup> Ascano Diosin ahuun yorafo yoipaiyai cuscan nan rafutan ato yoiquin anaitiano nan yoshin chaca quininhuan faquish murannoashu atoqui nocoshon ato rutupai oa. Ascashon man ato rutua. <sup>8</sup> Ascatac nan rafu Jerusalén anoashu naacanashu aton caya fai ano racafo. Nannoshorifi noco Ifo mastanifo. Ascacun Jerusalén ano icafo yoitirofo nan Sodoma yafi Egipto anoaflo cuscara. Nannoshon fasi chaca huapaonifo. Dios yafi ahuun yorafo noicasmapaonifo. Asca Jerusalén anoafofin nanscarafquin. Ascacun nannoashu nan rafu naacanashu aton caya fai ano racafo.

<sup>9</sup> Ascacun maifoti yafi manifoti tsain futsa futsatapafo nan Jerusalén ano ichananfo nan rafutan aton caya oinpai fuaf. Ascafia niaifofoan yonocun tsoancai aton caya mai huatiro icama. Osha rafu non fusti nushmancayan aton caya racacun oinriafo.

<sup>10</sup> Ascano nantifi yorafo fasi unimacaquin yoiafo isca huaquin, —¡Aichofain! Nan Diosin tsain yoimisi rafutan nocon omitsisca huamisifo cuscan afanan noco asca huacanimaquin, —icashu yoinanfo. Ascatac unimacaquin ahuardo cashman afiranin inanonanfo.

<sup>11</sup> Ascafiaifoanno osha rafu non fusti nushmancayan finontan Upa Diosin ato nimariscatanaino funinaca huanafo. Ascaiton oincani fasi ratucoinca fiisican. Tari-taricafo. <sup>12</sup> Ascan nai muran Upa Dios icariashu fasi oi ashcafinin ato yoiaiton. Nan rafutan nicafo. Ato yoiquin isca huaiton, —Nuri fucahuun, —ato huatapaiyaino ato noicasmaifoan oiainfoanno nan rafu atomaquinoashu coin muran Upa Dios icari foafo.

<sup>13</sup> Fotapaiyiaifoanno mai ano fasi curushcain naiyanaiyaishquin. Ascaino atirifi pushu Jerusalén anoaflo maocomushquiai cuscan un oinyoa. Ascaino siete mil yorafo man naafo. Nan tushuafo fasi ratucoianfo, —Shinancapon. Upa Diosin nai muran icaton ahuamamishti huatiroran, —icashu yoinanshcani.

<sup>14</sup> Ascatac nan mai anoashu omitsiscaiyoi rafufiashu samamashtacoin afanan omit-siscashquin.

*Diosin ahuun oinmati a fu nai muran imisiton ahuun unutaquin manuti chaan chaan aca*

<sup>15</sup> Ascaino Diosin oinmati afu ica futsan ahuun manuti chaan chaan acaino nai muran Upa Dios icarishon oi ashcafinin yoiafo isca huaquin,

“Natian nocon Ifo Diospan Facu nantonfin nantifi yora manifoti ato iquina.

Ascashu arusu fusti aton niaifo unupacunacamaran,”

ishon yoiafo. <sup>16-17</sup> Ascatac nan Jesús icoinra huaa cushumisifo veinte cuatro nocofunufo aton tsaoifoqui Dios icano tsaoaf. Ascashon fuoshonpacufoantan Upa Dios yoiafo isca huaquin,

“¡Aicho! Min nocon Ifo Dios min ahuamamishti huatiro. Min curushhuunshon natian nantifi manifoti min ato iquina. Ahuashta min oni huataima min iyopaonishaquin. Natianrifi min ipanaca. <sup>18</sup> Manifoti miqui sinamisifofia. Ascan natian mirifi min atoqui sinaquin min ato onaintimashqui. Nantianrifi mia tanamisifo min ato ahuara inansharashquin. Ascashori nan min tsain yoimisifori inansharafain mia icoingra huafoti nan min ato yoia cuscacoin amisifo inanfain ahuamaflashon mia tanamisifo yafi niaifofoan mia tanamisifori nanfo min ato inanshquin. Ascashon nantifi mia tanamisifo min ato inansharashquin mifu ipanonfo. Nantianri nan yora chaca huamisifori min ato onaintimashqui omitsiscapanacafo muran fotanonfo,”  
ishon yoia.

<sup>19</sup> Ascaino Diosin icaria Dios fu tsanti pushu fupucuaiton un oian. Nan Upa Diosin Israelife yononi cuscan cunuacua cashon muran nanuaiton un oiainno canan facaicain nai turuica curushcoin icain mai nayanaiyaicain unu matsi tocorofo nai murannoashu mai ano pacui.

## 12

### *Ainfon yafi famanhuan cuscara nai muranno Juanpan oinni*

<sup>1</sup> Ascatan afanan uhuun namapan cuscaraton ua oinmana cuscan un mato tapimai. Nai murannoah ahuara tsoan oinyomisima cuscara un oian. Ainfoan ahuun saya chashacoin fari ointsa sahuuashu oshu camaqui paia ointsa. Ascatan doce fishi ointsafo ahuun maitihuun nua maia. <sup>2</sup> Nan ainfoan facu nanuashu man facu isinhuin fasi fiisica.

<sup>3</sup> Ascatan nantianri nai murannoah ahuara tsoan oinyomisima cuscara un oian. Nan Satanás yoshin chaca famanhuan cuscarafashu oshicoin siete mapoya. Ascashon ahuun mapotifi niaifoan maiti maia. Ascatarifi mucu rafuti mashoya. <sup>4</sup> Ahuun ina sharafoaino atirifi fishi nai murannoashu mai ano pacua. Nanscarifai Upa Diosin ahuun oinmatifo Satanás atirifi ato chaca huamani. Ascan ahuunoashu a cuscara yoshin chacafori ato imano nai muranshon Upa Diosin ato potafain mai ano ato nichini. Ascacun nannoshon nan Satanás famanhuan cuscaraton ainfo facu caiyainton cushua caintanaiton facu piishquin. <sup>5</sup> Ascashu furonanfacu caian. Nan facu nantifi manifotifain aton niaifo iqui. Ato cushusharashquin tsoashta yoitima inonfoma. Ascacun Upa Diosin icano ahuun facu ihuiriscatana afu niaifo inon. <sup>6</sup> Ascacun tsoan istaipama ano Diosin nan ainfo ati shara huashoni nanno ichonon. Nan mai ano fari rafu non fusti nushmancayan Upa Diosin nan ainfo cushusharafain pimasharani ahuuscanonma.

<sup>7</sup> Ascashori un mato tapimai ahuuscashomain nai muranshon nan yoshin chaca Satanás famanhuan ointsaton nocon Ifo Diosin finonpaiquin. Ascaiton Upa Diosin ahuun oinmati afu nai muran icafoan aton niaifo ahuun anu Miguel Diosin nichian. Satanás yafi yoshin chacafo Miguel ahuun oinmatifoya potanapainifo. <sup>8</sup> Ascafia Miguel futan Diospan oinmatifoan Satanás yafi ahuun yoshin chacafo ato finoncoinnifo. Ascashon nai arishon ato potapacuni afanan ari inonfoma. <sup>9</sup> Ascacun Miguel futan Diospan oinmatifoan ato nai muranshon mai ano potani. Nan famanhuan cuscara nan rononhuan shuni ahuun anu futsa Satanás nantifi manifotí ato parafafainmisi.

<sup>10</sup> Ascatan oi uhuapa nai murannoah un nica. Isca huaquin yoiaiton,

“Nan yoshin chaca Satanás nai muranshon man potafo. Nanton Dios ano cashon Jesús icoingra huafohuunoa tsain chaca yoi isca huaquin, ‘Mia icoingra huafohan fasi chaca huaran,’ ishon nocohuunoa shafatifi yafi yamutifiri yoifafaini. ¡Aicho! Ascafia natian Upa Diosin Satanás ahuun curush man shatumacoinna afanan nan yoshin chaca nocon ifo inonma. Ascan ahuun Facu

nan nocon Numamisi Cristo afincuin nantifi man ato isma ato iquishquin. Ascacucai afanan Satanás Jesús icoinra huafoan aton ifo itiroma.

<sup>11</sup> Ascacun nocon yorafoan fasi icoinra huacoинshon yoimisifo isca huaquin, ‘Nocon Ifo Jesús Diospan facu nan chashoan facu cuscara nocohuunoashu nani nocon chaca soashoshquin,’ ishon yoifoanfafaincani. Ascashon Jeshuunoa yoimisifo cuscan yafi ahuun imi focain ato nashonihuunshon Satanás finoncointirofo afanan ato ahuisca huanonma. Ascacun yoitirofo isca huaquin, ‘Nan icoinra huamafoan noco rututirofia noncrai ratuyamacai nocon Ifo Jesús potapacunacamaran,’ ishon nan icoinra huafoan yomisifo.

<sup>12</sup> Ascacufin man nai muran Dios ari icafo unimacahuun. Nan icoinra huafoan Jeshuunoa man Satanás finoncoian. Ascashon Satanás nai muranshon man potafo. Ascafia nan mai ano icafoqui man nocoo. ¡Ohuashta! Mai anoaflo yafi unuhuan anoafori fasi omitsiscashcani. Satanás man tapia ahuitianran Jesús mai ano nocoriscashon omitsiscapanacafo muran a potashquin tsoa afanan chaca huamanonma. Nanscara man tapiashu Satanás fasi sinacoinquin nantifi manifoti ato omitsiscampai Jesús fu ipanonfomaran,”

ishon yoia.

<sup>13</sup> Ascatan a mai ano potafo man tapishon Satanás shinanquin isca huaa,—Nan ainfo furonanfacu caian un mufoicai aqui nocoshon omitsiscahuashquin,—ishon shinan.

<sup>14</sup> Ascacun Diosin nan ainfo tutumanhuanun pui chainipa cuscara inan ahuun noyacaini cashu tsoan istaipama ano iyonom. Nannoshon Upa Diosin fari rafu non fusti nushmancayan cushusharayoa nan yoshin chaca rononhuan cuscaratón ahuusca huanonma. <sup>15</sup> Ascano nan rononhuan ahuun ashfapan unuhuan nachian fai tahuain cuscara ainfoqui nocoshon asanon. <sup>16</sup> Ascafia Upa Diosin yonoa nan ainfoqui faitahuan nocotama mai muran man foa ainfon asanonma. <sup>17</sup> Ascacufin Satanás famanhuan cuscara sinatapacoin ainfo yafi ahuun funafo rutupai caa. Ascashon nan Diosin yonoa cuscan amisifo yafi Jesús noco Ifoan noco nashoniran huamisifo nanfofin ainfoan ahuun facufo. Nanfo Satanás ato cuyopai caa. <sup>18</sup> Ascan unuhuan cusumunri nan famanhuan cuscara Satanás nishon ato manai.

## 13

### *Unuhuan murannoashu yoina cuscara musucoin cainacahuana*

<sup>1</sup> Ascan uhuun namapan ointsa ua oinmana cuscan afanan un mato tapimai. Unuhuan cusumun un niano yoina cuscara musucoin unuhuan murannoashu cainacahuana ton un oian. Ahuun caya fustiflashu siete mapoya. Ascan ahuun mashori diez ya. Nan ahuun mashoti niaifoan maiti maia. Ascanshon Upa Diosiqui tsain chaca huaquin ahuun fumananfoqui cunu futsa cuscarafo nutan. <sup>2</sup> Nan yoina cuscaratón ahuun caya masharo leopardo ointsa. Ahuun tau rafu oso masharona ointsa. Ascan ahuun ashfa masharo leonna ointsa. Ascan nan Satanás yonoa ahuun curushhuunshon nan yoina pofu cuscaratón tsoan atiroma cuscan nanto huatiro. Ascashu ahuun yorafo aton ifo itiro ato yononon.

<sup>3</sup> Ascaiton nantifi yorafo manifoti anoafaoan oianfo ahuun mapo futsa amaquinoa rutuaflo shinantsafiashu man caya. Ascacun yoiado isca huaquin, —¡Aira! ¡Oincapon! Ahuuscashutsi ahuun mapo futsa man rutucoinfiafo natian afanan man niaran, —icashu yoinanfo. Yoiquin asca huacatan nanton yoina cuscacoin tanafo. <sup>4</sup> Ascan tanacashon yoiado, —¡Aicho! Satanás ahuun shinanhuan shon na yoina pofu cuscaratón tsoa futsan atiroma cuscan huatiro. Ascacun ahuunoashu nantifi yorafo yonotiro. Ascan Satanás nocon Ifocoin. Noco yoipaiyai cuscan non nicacointiro. Nan yoina pofu cuscara nocon Ifo. Tsoancai a finontiroma. Tsoa futsacai na yoina pofu cuscarama. Tsoancai a rututirofomaran, —ishon yoiado.

<sup>5</sup> Ascashu nan yoina pofu cuscara fasi cacapaimisi ica. —Tsoa futsacai ua cuscaramaran, —ishon yoia. Nantori Diosiqui fasi tsain chaca huamisi. Ascashon Satanás yonoa fari rafu non fusti nushmancayan nan yoina pofu cuscaraton nantifi yorafo ato iquina.

<sup>6</sup> Nantianri Dios roafain ahuunoa tsain chaca yoifain nan icanoahuunoa tsain chaca huafain nan icanoafoquiri tsain chaca huai. <sup>7</sup> Ascan Satanashunshon Jesús icoinra huafo mai ano icafo ato rutumashquin. Ahunshon nantifi manifoti yafi nantifi tsain futsa futsatapafo yoimisifoan aton niaifocoin inon.

<sup>8</sup> Ascan nanfoan nantififain nan yoina pofu cuscara noishcani. Ascashon yoiquin isca huashcani, —Minfin nocon Diosiquin, —huashquicani. Ascaifoancai nocon Ifo Jesús aton anu ahuun libro muran cunuima afu nipanonfo. Mai oni huataima Jesús nantifi icoinra huanonpacoaifoan ato anufo ahuun libro muran iquisi cunuyoni afu ipanonfo. Ascashu nan chashoanun facu cuscarashu nocu nashoni nocu nimapacushquin.

<sup>9</sup> “Man pachoyaquin ua nicacahuun. <sup>10</sup> Nan yoina pofu cuscaraton Jesús icoinra huamisi futsafo cunu muran iquimapaiquin iquimashquin. Ascan ato rutupaiquiri ato rutushquin.”

Ascafia uhuun yoramishtichin shinanchacayamacahuun. Nan non Jesús icoinra huafoti non omitsiscafiaquin non tunucoinshquin nocon Ifo Jesús cachiquiri huashquima.

<sup>11</sup> Ascatan un afanan oian yoina pofu futsa cuscara mai murannoashu caiyainton un oian. Chashoan facu cuscaraflashu masho rafuya. Nan Satanás famanhuan cuscaraton ahuun tsain fasi pofucuin. Nanscarifiai nan yoina futsa cuscaraton ahuun tsain pofucuinri. <sup>12</sup> Nan yoina pofu unuhuan murannoashu cain tauaton ahuamamishti huafain yorafoti iquina cuscan nan yoina pofu futsari nanscara huaa. Ascashon nantifi maifoti anoa ato yonoa isca huaquin, —Nan yoina cuscara mapo ruranfo man naacoinfiashu afanan man nia. Nancai nocu iforan nocon Diosiran huacahuun, —ishon ato yonoshquin. <sup>13</sup> Ascashon ahuamamishti tsoa atiroma cuscan ato isma. Yorafoan aton ointaifiri nai murannoah chii pacumana. <sup>14</sup> Satanashunshon nanscara huariaquin yorafo man paran Diosiran huanonfo. Ascashon ato yonoa, —Nan yoina pofu cuscara nopu cunopaton man rutufiafo afanan nimisi nan ointsa uhuapacoin ramihuacahuun, —ishon ato yonoa.

<sup>15</sup> Ascacashon ato yonocun Satanashunshon man ramihuafu nan yoina pofu cuscara ointsa man shacaimana. Ascano shacaitan nan ramihuaoan tsaincoinin yoia isca huaquin, —Ua ifoacahuun. Min Diosiran ua huacahuun. Tsoan ua noicasmaquin nannori yoicasmaiton nan rutucahuun, —ishon ato yonoa.

<sup>16</sup> Ascatan nan yoina pofu cuscara futsa nan mai murannoashu oaton yoiqui isca huaa, —Maton mucu mumiori iyamarai mato fumananqui nan yoina pofu cuscara futsa unuhuan murannoashu oaton ahuun anu iyamarai ahuun numero nantifi sellapan ato nutacahuun. Facufo nutafain iyoafofori nutafain mafo ichapaya nutafain ahuuomafo nutafain oinmatifomari nutafain oinmatifo nutacahuun. Ascan tsoashta finonmayamacahuun. Nantifi nan yoina pofu futsan ahuun anu sellapan nutacahuun matoquin, —ishon ato yonoa. <sup>17</sup> Ascan tsoa sellapan anu nutama atocai ahuara fipaifiaquicai fitiroma. Ascashuri ahuara inan mitsatiroma ahuun rafanan tushu yafi sahuuti ahuara futsa yopai cuscan fishquin.

<sup>18</sup> Ascacun shinansharacahuun. Ratoranfoan Diosihuunshon shinansharaqui tapitirofo nan yoina pofu cuscaraton ahuun numero tapifain ahuun anurifi tapitiro. Ascan nan yoina pofu ointsafiaflashu nocofunucoin. Ahuun numero 666.

<sup>1</sup> Ascatan uhuun namapan ointsa ua oinmana cuscan afanan mato tapimai. Chashoan facu cuscara nan Jesús machi ahuun anu Sión ano nia un oian. Nanno 144,000 ahuun yorafo afu nia. Ahuun anu yafi Apa Diosin ahuun anuri aton fumananqui cunua. <sup>2</sup> Nantianri un nai murannoia oi uhuapacoin nica. Unuhuan ponoain nicatsa nicafain turuica achacoin nicatsa. Nan oi uhuapa un nica yora ichapa fanaincany manuti ichapari manuafo. Nan manuti ahuun anu arpa guitarra cuscara.

<sup>3</sup> Fanainti funa tsoan nicayomisima Upa Diosin ahuun ointaifi fanainshoaf. Ascaifoanno nannori nan rafu non rafuri Diosin onihuani yafi Jesús icoingra huafoti cushumisifo veinte cuatrofoanri arifi nicafo. Nan 144,000 Jesús fu machi ano niafo. Ascan nanfoansi nan fanainti funa tapianfo. Jesús ato nashoni aton chaca soashoshquin Satanás afanan aton Ifo itamarocon nan aton ifocoin inon. Tsoa futsacai nan fanainti funapan atofu fanaintiroma.

<sup>4</sup> Nan 144,000 yorafoan nocon Ifo Jesús nan chashoan facu cuscara tanacoimisifo. Chaca shinantamarocon Jesushuunoa shinanfafaimisifo. Afin ato numani ato nashonishaquin Apa Diosin yorafo non ahuun yorafori inon. Ato catoan ahuun yorafo icaino ato yoia cuscan anonfo. Nanfoancaiyainfoqui chaca huamisima. Jesús caiquiri afu foanfafaimisifo. <sup>5</sup> —Nanfoan chani yoiaran, —ishoncái tsoan atohuunoa yoitiroma. Jesushuunoashu isharamisifo.

*Diospan Furun yafi ahuun oinmati mucu fustiti non mucu foshca fusti a fu nai muran imisiton yoiavo cuscan*

<sup>6</sup> Ascatan un oian Diospan oinmati futsan afu nai muran ica fasi cuyacoin noyaino nantifi yorafo maifoti anoafu tsain shara ato yoinon. Caifoti yoifain shoco futsafoti yoifain nantifi tsain futsa futsatapafo yoimisifoti yoifain manifotiri ato tsain shara yoinon. Upa Diospan tsain nipanacahuunoa ato yoia. <sup>7</sup> Oi ashcafínin ato yoia isca huaquin, —Diosquiri shinancahuun. Mato yonoa cuscan man ayamashu aquí ratucoincáhuun. Nicacoinsharacahuun. “Min sharacoin min ahuamamishti min atiroran,” huacahuun. Natian Diosin nantifi chacamisifo onaintimai. Nanton nai onihuafain mai onihuafain unuhuan saoya onihuafain unu tsosi sharari onihuani. Ascan a noicahuun. A yoiuu isca huaquin, “Min sharacoin min ahuamamishti atiro. Min nocon Ifon Dios shararan,” huacahuun, —ato huau.

<sup>8</sup> Ascatan Diospan oinmati futsan afu nai muran ica ahuun tsain anaitishon futsan nocotoshishon isca huaquin yoia, —Nan pushurasi uhuapa ahuun anu Babilonia. Yorahuanrasí nan pushurasi uhuapa ano ica. Nan yorafoan fasi chaca huamisi. Nanfoan chaca huamisi cuscan manifotiri chaca huama. Asca huaifoan Upa Diosin ato onaintimai afanan ipanonfoma. ¡Aichofain! Diosin ato onaintima afanan pushurasi Babilonia yamairan, —ishon Diosin oinmatin nai muran icaton yoia.

<sup>9-11</sup> Asca huatan afanan Diosin oinmati futsari nai muran icaton nocotoshishon oi ashcafínin yoia isca huaquin, —Tsoan na yoina pofu cuscara yafi ahuuna ointsa ramihua nicacoiaínno yoimisi isca, “Nan uhuun Dioscoinran,” ishon anori yoiquin aton mucu iyamarai aton fumananqui na yoina pofu cuscara ahuun anu cunua Upa Diosin atoqui sinacoinshquin. Naafoanno Diosin ato fasi curushcai onaintimacoinshquin. Chi muran ato potafiacai cuyonacama. Jesús nan chashoan facu cuscara yafi ahuun oinmatifo afu nai muran icafo ato ointaifi ato omitsiscapanacafo muran potashquin. Isin muuqui unupacunacafoma. Tsoan ato numatiroma. Nan yoina pofu cuscara yafi ahuuna ointsa ramihua ifoanfo ahuun anu aton mucu iyamarai fumananqui cunua. Ascacun shafatifi yafi yamutishonri omitsiscapacoinshcáni. Tsoan tunupacunacafomaran, —ishon Upa Diosin ahuun oinmati nai murannoaton yoia.

<sup>12</sup> Ascancunfin uhuun yoramishti maton ointi fupuima sharacahuun. Omitsiscafariquin tunucahuun. Diosin nocon yononi cuscan acahuun. Nocon Ifo Jesús cachiquiri huayamacahuun.

<sup>13</sup> Ascatan un nica oi nai muranshon ua yoiaiton, —Un mia yoiai cuscan cunuhuu. Ratoranfo nocon Ifo Jesushuunoashu nai unimacoinshtcaniran, —ishon ua yoia. —Ainfain. Iconfinquin. Naacanashu afanan omitsiscatirofoma. Upa Diosin ato ama cuscan acoinnafo. Nantianri unimacoinshtcani. Nanfoan futsafo shara huashomisi cuscan Diosin nanfo ointiaquimamisima. Ascan Upaqui nocoaifoan ato inansharashquinran, —ishon Diospan Yoshin Sharanun yoia.

<sup>14</sup> Ascatan uhuun namapan ointsa oian cuscan afanan mato yoinon. Un oian nai coin oshopa camaqui nan Diosin catoan Jesús ointsa un oian. Niaifon maiti orocoinshtcaniran nopo ushtia cunocoin tsoma. <sup>15</sup> Ascan ahuun oinmati futsan afu nai muran ica Dios icanoashu caa nocon Ifo yoishquin. —Natian man ica. Nan maifoti ano man fanafo oshian. Natian chituantian. Ascan min nopo ushtia tsomatan tashtushon ichahuahuu, —huua. Nannori yoifiaquin fanacoinhuunoa yoama. Diospan yorafohuunoa yoicoian isca huaquin, —Natian nantifi Jesús icoinra huafio ihuihuu Upa Dios icano ichananshu afu ipanacaforan, —ishon yoicoian. <sup>16</sup> Asca huatan nan nai coin camaqui tsaoshon ahuun nopo curushcrai fucoa. Diosin mai anoafio tashtua cuscan huaquin aton icha huashquin. Nopucoinhuunoacai yoama ahuun tsainhuunoa yoia. Afin yoiaitian ahuun yorafo ichanan huai.

<sup>17</sup> Ascatan un oian Diosin oinmati futsari afu nai muran icanoa caa. Arifi nopo ushtia cunocoin tsoma. <sup>18</sup> Ascatan afanan Diosin oinmati futsari Dios cufiti anoashu caa. Nanton Diosin yona cuscan chihuunshon yorafo onaintimati. A oinmati nopo ushtia cunocoin tsomashon oi ashcafinitin yoia, —Nan fimi ahuun anu uva nantifi oshiancoin. Ascan mushtushon icha huahuu, —ishon yoia. Nanscarifiai Upa Diosin ahuun oinmatihuunshon a nicacasmamisifo ichanan huashquin.

<sup>19</sup> Asca huatan nan oinmati ahuun nopo ushtia cunocoin tsomashon uvatifin shatushon prensa muran pota ahuun unu fonon. Nanscarifiai Diospan oinmatifo afu nai muran icaton Diosin tsain nicacasmamisifo ichanan huai. Ascan Diosin atoqui sinacoin ato onaintimai. <sup>20</sup> Diosin icanoshon ato onaintimanama. Futsafoan ato rutushcani aton imi ichapa foshquin. Ascaran tsoan oinyomisima. Aton imi noacoin caballo fasi tusanancoian. Ahuun chai trescientos kilometro.

## 15

*Upa Diosin ahuun oinmati siete a fu nai muran imisifo afanan ato yona mai anoafio onaintimanon*

<sup>1</sup> Ascatan uhuun namapan ointsa un ahuara futsan un oian. Tsoan oinyomisima cuscara nai murannoa un oian. Oin uhuun nomuran, —¡Uru! —un ica. Natian un oian cuscan mato tapimanon. Nicacahuun. Diosin yora yoitimashunifoqui fasi sinaiquin. Ascacun ahuun oinmati siete afu icafo ato yona nantifi mai anoafio onaintimai omitiscanonfo. Nan ahuun unutaqui Upa Diosin ato onaintimai. Afananciai atoqui sinaquin ato onaintimashquia.

<sup>2</sup> Un oian unuhuan pusiquima raca unuya chi osian ointsa. Nanno yorahuanrasi nia. Na yorafoanciai yoina pofu cuscara yafi ahuuna ointsa ramihua ahuun numero atoqui cunu nutanmisima. Nanfoan ato shuhuincionfo. Nan unuhuan pusiquima raca unuya chi osian ointsa fumancayan maniafo. Upa Diosin atoti manuti inanpacua. Nan manuti guitarra cuscara ahuun anu arpa. <sup>3</sup> Aton arpa tsomacashon Diospan oinmati Moisés yafi Jesús nan chashoanun facu cahuanshara cuscara fanainmisi cuscan atorifi nannori fanaincani isca huaquin,

“Ifon, mincaifin Diosiquin.

Min ahuamamishti atiro.

Min amisi cuscan sharacoin.

Tsoan futsacai atiroma.

Min manifoti nantifi aton niaifocoin ipanaca.

Min shinamisi cuscan cayacafi iconcoin.

<sup>4</sup> Ifon, nantififain miqui musucaquin  
mia nicasharapainonfo.

Min ahuamamishti tsoan oinyomisima min atiroquin.

Nantifi yorafoti anori yoipacunonfo.

Mirus fusticai min chaca huamisima.

Nantifi manfoti miqui funonfo.

Min shara fustisi huamisi.

Nantififain oinquin isca huashquin,

‘Min sharacoin. Min nocon Ifocoinran,’ ”  
ishon mia yoishcani.

<sup>5</sup> Ascatan afanan un nai muran Diosin icano oian. Ua fupushona Diosin icanoco coin un oinon. <sup>6</sup> Dios ica murannoashu ahuun nai oinmati siete nantifi chifi ichananfo. Nanfoan mai anoaflo onaintimai omitsiscanonfo. Sahuuti oshopa chainipa chashai sahuufain oro cuscara nonushumua sahuuaflo. <sup>7</sup> Nan rafu non rafuri Diosin onihua futsan Diosin oinmati afu nai muran icafo siete atoti oro tutso inancua. Diosin nan nipanacaton icoine ra huafoma mai anoaflo sinacoinquin nan cuchanfo muran ahuara chacacoin fospihuamua atoqui ocano omitsiscashcani.

<sup>8</sup> Ascatan nantian Diosin chashaiton ahuamamishti atiro cuscan ato ismaino nan ica muran coinmahuan fospia nashfain. Ascan mai ano nan Dios nicacasmamisifo Diosin oinmatifo afu icafoan ato onaintimai omitsiscanonfo anaitiataimanocai tsoa Dios icano iquiyotirofoma.

## 16

### *A nicayosma shunifo Diosin ato onaintimai omitsiscapanonfo*

<sup>1</sup> Ascatan Dios icaricoian oi ashcafinin un nica. Diosin oinmatifo nan siete afu nai muran icafo ato yoia isca huaquin, —Diosin a nicacasmamisifo mai ano icafo atoqui sinaquin nan tutsofo ahuara chacafo fospihuamua atoqui ocacahuun, —ishon ato yonoa.

<sup>2</sup> Nicacashon Diosin oinmati futsan tauhuaqui ahuun tutso nai muranshon mai ano oca. Nan yoina popu cuscara ahuun anu aton mucu iyamarai aton fumananqui cunuaflo yafi afin ramihuamua ointsa ifoanfono nanfo aton yoratisho coo suyacoin fuchiriscata isincoin tunutirofoma.

<sup>3</sup> Ascatan afanan Diosin oinmati futsan ahuun tutso nai muranshon unuhuan muran oca. Ocaino unuhuan fianananriscatana nocofunu rutuano ahuun imi foa ointsa. Ascanofin nantifi nan unuhuan murannoashu nai futsuaflo.

<sup>4</sup> Ascatan afanan Diosin oinmati futsan ahuun tutso nai muranshon unufoti yafi mai murannoashu unu afaifotiqui oca. Ocano unufoti yafi mai murannoashu unu afaifotiri fianananriscatana imi ica.

<sup>5-6</sup> Nantianri oinmati futsan Dios fu tsaincaiton un nica. Nan unu cushumisiton isca huaquin yoia,

“Upa Diosin tsoa min oni huataima min iyopaoni. Min ipaoni cuscan natianri min nipanaca. Min shara fustisi imisi. ¡Aicho! Nantianri mia nicacasmamisifo min ato onaintimai cuscan iconcoin. Aton chaca shatucanashu min Furun Jesús Ifocoianfo non min tsain aton yoimisifori nan icoine maran huaflo anfutuaflo. Ascacufin min icoine ra huafoma namai cuscafín iconquin. Min yoraflo fasi omitsiscamamisifo ascan min nan icoine maran huaflo onaintimai omitsiscanonfo. Min cayacafi iconcoin ato onaintimarán,”

ishon Diospan oinmatinin yoia.

<sup>7</sup> Asca huashon Dios icanoa nai muran nan cufiti ano fustishosi Upa Diosin cufinmisifo anoa un futsanfo nica yoiquin isca huaifoan,

—Nocon Ifon Diosin, min nai oinmati yoia cuscan iconcoin. Mia nicayosma shunifo min ato icon cayacafi ato onaintimairan,

—ishon yoiafo.

<sup>8</sup> Ascatan Diospan oinmati afu ica futsan Dios icarishon ahuun tutso muranno ahuara chaca fari camaqui ocashquin. Ocano farihuunoashu yorafo coa. <sup>9</sup> Farin fasi shanacoinquin yorafo coa. Coaino omitsiscafo. Man tapiamisifo Diosin ato onaintimai aton chaca shatuafoma. Dios ifoantamarocon. —Diosin noco chaca huai. Ahuun cuscaramain Diosiquin. Chacacoinran, —ishon yoiafo. —Diosifin sharaquin. Nantofin ahuamamishti huatiroquin, —ishoncái tsoan anori yoipacanima.

<sup>10</sup> Ascatan Diosin oinmati futsan Dios icarishon ahuun tutso muranno ahuun yoina popu cuscara chacacoin yafi afu icafo ato camaqui oca. Ocano nan yoina popu cuscara chacacoin ifoafó icanó faquishcoin ica. Ascan nantififain isincoin muafó tunutiroma. —Aripun, —iriafo. <sup>11</sup> —Diosin noco asca huua. Ascan nocon yoratishon coo suyacoin non isin tunutiroma. Nan nai muranno ahuun Dios chacacoinran, —ishon yoiflashu aton chaca shatuafoma.

<sup>12</sup> Ascatan Diosin oinmati futsan nai muranshon ahuun tutso muranno unu uhuapa ahuun anu Eufrates amuran oca. Ocano nan Eufrates nutsoriscatana man mutocaina. Nan niaifo rafu non fusti fari oaiquirinoashu fucani. Ascan Eufrates nutsocoian aton ranushumuafó ya pocufaitirofo. <sup>13</sup> Ascano un yoshin fasi chacafó rafu non fusti fushco ointsafo un oian. Futsan famanhuan ointsa nan Satanás ahuun ashfan murannoashu caincaina futsan nan yoina popu cuscara ahuun ashfan murannoashu caincaina futsan nan fuparapaimisiton, —Unfin Diosin tsain mato yoimisiran, —ifiashu chanimisi yoshin chaca ahuun ashfan murannoashu caincaina. <sup>14</sup> Nan rafu non fusti fushco ointsa yoshin chacafoan ahua tsoan oinyomisima cuscara ahuamamishti yorafo ismafo. Nantifi niaifofo manifoti ano focani ato ichanan huamai nocon Ifo Jesús ahuun yorafo rutunonfo. Nantianri nocon Diosin ahuamamishti amisiton ahuun yono ismashquin.

<sup>15</sup> Asca huaifoan nantianri nocon Ifo Jesús noco yoipaiyai cuscan un maton yoinon. Isca huaquin yoia, —Ua nicacahuun. Yomutson tsoan tapimaima pushu muran iquinon. Samamashta pushu muran iquiriscatiro ahuara onushquin. Nanscarifai un tsoa tapimaima nan un matoqui nocoriscaitian. Un matoqui samamashta nocoriscaquin. Tsoan itisharacacaini ua tanasharashon manasharacoian fasi unimashquin. Ascan tsoan ascatama itisharayamaino un matoqui nocoriscaitian nantifi yorafoan ointirofo tsoan ua tanasharama. Ascashu fasi rafipaitiroran, —ishon yoia.

<sup>16</sup> Nannori nocon Ifon Jesús yoiflashu nan rafu non fusti yoshin chacafoan nantifi niaifofo maifoti anoafó ichanan huua Diospan yorafo rutupaiquin. Ato ichanan huamai nan mai ahuun anu Israelifo tsainman Armagedón.

<sup>17</sup> Ascatan Diospan oinmati futsan ahuun tutso nai muranshon oca. Asca huatan Diosin icarishon Upa Diosin fasi oi ashcafínin yoia, —Mun aca. Natian man anaitiaran, —ishon yoia. <sup>18</sup> Ascatan fasi curushcoin canan pishiiriai icain ahuarafó achacoinfo yafi fasi nai turuicacoin icain mai nayanaiyaiqui curushcoin. Ascacai tsoan mumisima. Nocofunu onihuaquin tau huanitian natianri mai nayanaiyaiqui ascaitocai tsoan muyomisima.

<sup>19</sup> Ascan nan pushurasi uhuapa ahuun anu Babilonia ano nayanaiyaicaino mainhuan nantiocoin rafu non fusti toshamanhuan cainni. Maifoti anori aton pushurasifo nan mai nayanaiyaiquin maocomua. Diosin na pushurasi Babilonia anoafó chaca huamisifo cuscan ointiaquimamisima. Ascan atoqui fasi sinamanhuanquin ato onaintimacoin omitsiscanonfo. <sup>20</sup> Nantianri unu potofotin yamariscatashquin ano icafori nai futsuafo. Nantifi machifotiri yamariscatashquin. <sup>21</sup> Nantianri unu matsi tocorofo uhuapacoin aton ihuu cincuenta kilos cuana nai murannoashu yorafo fuchi pacua. Ascafía aton chaca shatutamarocon, —Diosin fasi chacacoin. Nan unu matsi tocorofo uhuapacoinun noco omitsiscamairan, —ishon yoiafo.

## 17

### *Mai futsan anoaf oainfon furoma cuscarafo*

<sup>1</sup> Ascatan uhuun namapan ointsa ahuara ahuuscaran ariscashquiain cuscan afanan ua oinmayoa. Nan Diosin oinmati afu nai muran icafo siete tutso tsomacashon futsan ua yoia, —Nuri ohuu. Nan pushu ichaparasi unufo chaimashta anoaf fasi chacacoin. Ainfo furomacoin cuscarafo. Ascano Upa Diosin ato onaintimashquin. Oinyopon. Mia oinmanon. <sup>2</sup> Nantifi niaifofo maifoti atofu inanmitsamisifo. Ascan atohuunoashu afori fasi chacacoin icafo. Nan ainfo furomacoin cuscara icafo. Ascan Diosin ato onaintimashquiain cuscan mia ismaran, —ishon ua yoia.

<sup>3</sup> Asca huashon tsoan istaipama ano Diospan Yoshin Shara ua iyoa. Nannoia un oian nan ainfo yoina pofu cuscara oshicoin camaqui tsaoa. Nan yoina pofu ahuun yoratishon anu ichapa cunua. Nantifi nan anufo Diosqui tsain chaca cunua. Nan yoina pofu mapo siete ya. Masho mucu rafutiya. <sup>4</sup> Nan ainfo saya chainipa shonan yafi oshin sahuua. Oro facafacaitsa macush cuscara sharashtan yafi futsan ahuun anu perla oshopa nanri sharashtacoin sahuua. Tutso oro tsoma amuran ahuarafu chacacoin. Amuran nanua cuscan yorafo ahuara chacacoin futsa futsatapafo chaca huama. Aton nomuran shinanchacamana. Paunmafain chanimisi imafain aton ahuinma chotamisifo imafain aton funuma chotamamisifo imafain nanscara chacafosi ato imapacumisi. <sup>5</sup> Ahuun fumananqui cunua cuscan tsoan onanmisima. Isca huaquin cunua,

BABILONIA  
 NAN PUSHURASI ANOAF  
 TSOAN FUTSA ATO CUSCARAMA.  
 AINFO FUROMACOIN CUSCARA  
 YAFI NANTIFI MAI ANOA CHACAMISHTIFO  
 ATON UHUA CUSCARARAN,

ishon cunua.

<sup>6</sup> Nan ainfo furoma cuscara Jesús icoira huafu ichapa nan Jesús uhuun Iforan huamisifo ato rutumamisi un oian. Un na ainfo oin un mustairia. Un yoia, —¡Aja! Ascaran ainfo chaca un oinyomisimaran, —ishon un yoia.

<sup>7</sup> Un ascaino Diosin oinmati afu nai muran icaton ua yoia, —¡Ahuusca min mustair-imun? Nan ainfo yafi nan yoina pofu camaqui cahuamisi nanton siete mapoya non masho mucu rafutiya tsoan atohuunoa tapimisima. Ascan natian un mia tapimai. <sup>8</sup> Nan yoina pofu min oian yoinacoinma. Afin niaifo uhuapa chacacoin. Nanscacun Dios noicasmamisi. Niyopaoni. Natian niyamafashu chipo nan yoshin chacafo icanoashu cainshquin. Nannoashu Cainfiacun Upa Diosin omitsiscapanacafu muran potashquin afanan anoashu canacama huaquin. Tsoan Jesús icoira huamacai aton anu ahuun libroqui cunuama afu ipanon. Nanfoan na niaifon yoina pofu cuscara oincashon mustairitan, “¡Aira! ¡Oincapon! Man nafiacanashu afanan oaran,” ishon yoishquicani.

<sup>9</sup> Ascan tsoan ahuun nomuran Diosihuunshon cayacafi shinantiro nanton un rama cunua cuscan tapitiro. Na yoina pofuhuunoa mato yoinon ua nicasharacahuun. Ahuun mapo siete mapocointamarocon nanfohuunshon siete niaifohuunoa nocu tapimai. Nanfo icano siete machifo. Nannori nan ainfo furoma cuscara ica. <sup>10</sup> Mucu fustiti nan niaifofo yamai. Man nanifo. Fusti natian nia. Futsan chipo iishquin. Chipo ifiashucui chai ipashquima. <sup>11</sup> Nan yoina pofu cuscara oshicoin un mia yoia cuscan arifi yoinacointamarocon niaifon chaca futsan. Nan iyopaoni cuscan natiancái icama. Arifi nan siete fu ipaonifo. Chipo afanan ifiashu omitsiscapanacafu muran cai afanan anoashu canacama.

<sup>12</sup> Ascan nan masho mucu rafuti min oian mashocoimma. Nanfohuunshon mucu rafuti niaifofo nocu ismapai. Nanfo niaifofo icataifoma. Chipo mani futsanfo mucu rafuti aton niaifofo itirofo. Na yoina pofu cuscara fu niaifo iishquicani. Ascanfiacai chai niaifo ipashquicanima. Samamashta unuriscashquin. <sup>13</sup> Ascafia unuataima nan siete

niaifofo nannorisi shinanmisifo. Nan nocofunun yoina pofu cuscara apaiyai cuscan nannorisi shinancani. “Min noco yonopaiyai cuscan non atiroran,” ishon nan muci rafuti niaifofoan nan nocofunu yoina pofu cuscara yoishquicani. Afin nantifi niaifofo aton niaifocoin iishquin.

<sup>14</sup> Ascacashon nan nocofunun yoina pofu cuscara futan nan muci rafuti niaifofoan nocon Ifo Jesús ahuun yorafoya noicasmacani. Jesús ahuun yorafo cunani ahuun tanamisifo inonfo. Ascashon ato catoan. Nanfo ahuuscarafaino nocon Ifon cachiquiri huamisima. A tanacoimmisifo. Nan yoina pofu cuscara nan muci rafuti niaifofo futan Jesús chashoan facu cahuan sharashta cuscara nan nocon Ifo yafi ahuun yorafo rutumapaishcani. Rutupaiyaitoan atorocofin Jesús ato namashquin. Nantianri ahuun tanamisifo afu iishquicani. Nocon Ifon nantifi niaifofo uhuapafo non niaifofo patashariri aton niaifocoinshon ato iquitiro. Nocon Ifon Jesús aton Ifocoinkshon ato iquitiro. Nantifi niaifofo yafi ifoafori manifoti anoafu ato iquitiro. Ascan tsoancai nocon Ifon Jesús shuhuintiroma ahuun tanamisifocai ato tsoan cuyotiroma, —ishon nan Diosin oinmati afu nai muran imisiton ua yoia.

<sup>15</sup> Ascan afanan ua yoia isca huaquin, —Min oian nan ainfo furomacoin cuscara unu fumancayan tsaoa. Nan unucuai unucuinma. Nanhuunshon caifofo non yorafo non mani futsafo non tsain futsa futsatapayafo nan ainfo furonmacoin fu icafo noco ismapai. <sup>16</sup> Nan muci rafuti niaifofo yafi nan niaifo yoina pofu cuscara ainfo furoma cuscara noicasmacoinshcani. Nantifi ahuuna man fiishquin afanan ahuuomacoin iishquin. Ascan afanan tsoacai na ainfo furoma cuscara fu ipaishquima. Ascaiton nan muci rafuti niaifofo yafi nan niaifon yoina pofu cuscara noicasmacoincaquin omitsiscamacauquin chi muran ainfo furomacoin cuscara potashcani afanan inonma. <sup>17</sup> “Min noco yonopaiyai cuscan non atiroran,” ishon nan muci rafuti niaifofoan niaifo yoina pofu cuscara yoiafo. Ascafia Diosin nannorisi ato shinanmana afin apaiyai cuscan atohuunshon anon. Ascatan Diosin yoiyomisi nan anon pacoui cuscan nanscara huashquin. <sup>18</sup> Na ainfo furonmacoin cuscara ainfocointamarocon naanfin pushurasi uhuapacoin. Nanfoan manifoti aton niaifofo iquinaran, —ishon Diospan oinmatinin afu nai muran imisiton ua yoia.

## 18

*Diosin oinmatinin afu nai muran ica yoia isca huaquin, —Natian Babilonia anoafu nai futsucani, —ishon yoia*

<sup>1</sup> Ascatan Diosin oinmati futsan nai murannoashu mai ano fotoaiton un oian. Upa Diosin yonoa niaifo patashari nanton ahuamamishti atiro. Ahuunshon maifoti chashacian. <sup>2-3</sup> Oi ashcafainin cunaquin isca huua,

“Babilonia ano icafoan fasi chaca huamisifo. Chaca fustisi shinanmisifo. Nocofunufaoan aton ahuinma chotamisifo ainfofoan aton funumari chotamamisifo. Man amisifo cuscan caifo futsafori atohuun caoafu. Ato chaca huamamisi Upa Dios tanatamarocon chaca fustisi tananonfo. Man chaca huamisifo cuscan caifo futsafori aton niaifofoan nanscarin huaquin chaca huamisifo. Nan Babilonia ano icafoan fasi mafo ichapaya. Ascan ahua yopacaquima mai futsa anoafu aton mafo inan ahuun rafanan pui fiishcaquin. Ascano futsafonri mafo inanmitsacashon ahuun rafanan pui finonfo. Asca huacanashu Babiloniahuunoashu afori mafo ichapaya icafo. Asca huacaquin Upa Dios shinanmisifoma.”

“Ascacufin Upa Diosin nan Babilonia anoafu fasi onaintmai afanan tsoan ano inonma. Ato namaquin cuyoshquin. Afanan ano yora itamarocon yoshin chaca futsan futsantapafo tsain mutsama yoifafainaifo ano icaforan,” ishon Upa Diosin oinmatinin nan afu nai muran icaton ua yoia.

**4-8** Yoiquin asca huatanaino nai murannoashu un oi futsan nica isca huaquin,

“Babilonia ano icafoan fasi chaca huamisi finacoianfo. Nan chaca huamisifo cuscan Upa Diosin ato oinshon ointiaquimanama. Ascashon ato onaintimacoинshquin, Upa Diosin, nan Babilonia anoafu futsafo chaca huamisifo cuscan mimacoin huaquin ato onaintimahuu omitsiscanonfo. Man yoiafo isca huaquin, ‘Noncái Dios yopaima. Non ahuashta yopatiroma. Nonfin isharamisiquin. Nonfin ainfon niaifocoin isharamisi cuscara. Noncái man funu amaqi naa ainfo funuoma cuscarama. Nanscara ainfo manoi omitsiscatiro. Noncái manotamarocon non isharapacunacaran,’ ishon cacapaimisifoan yoiafo.”

“Ascan, Upa Diosin, ato fasi onaintimahuu omitsiscal tununonfoma. Icoinra huafoan ua nicasharacahuun. Upa Diosin ato samamashta onaintimacoинshquin afanan isharatamarocon atirifi namafain omitsiscamafain aton tushu cuyomashquin fonainquin naanonfo. Tsoan atiroma cuscan Upa Diosin ahuamamishti huatiro. Nanton ato onaintimai ato cooai cooi futsunonfo. Ascano Upa Diosin mato yoi isca huaquin, ‘Uhuun yoramishtichin, Babilonia anoafu cuscara iyamacahuun. Ato fu rafuyamacahuun. Ato futan chaca huayamacahuun un ato onaintimai cuscan un matori onaintimanonma,’”

ishon Upa Diosin mato yoi.

**9** Ascan Babilonia coaino mai futsafoti aton niaifoan oincani uaicaquin manoshcani. Nanfoan Babiloniafo futan Upa Dios potacani chaca huanonfo. Babilonia anoafohuunshon mafo ichapa fiafo. **10** Nanfo coaino oincani niaifo fasi ratucoinquicani.

“¡Ohuashta! Babiloniafoan rato caifo futsacai mato cuscarama. Man tapicoinsharafiacun samamashta Upa Diosin mato onaintimai man coi futsunon. ¡Ai timafin!”

ishon ratucoincaquin niaifoano yoishquicani.

**11** Nanscarifiai manifoti aton inanmitsamisifo uaishcani. —¡Ohuashta! Babilonia man coi cuyo. Natian tsoan futsacai nocon mafo non nocon ahuara futsafo fitiroma.

**12** Nocon oro sharashtacoin fianmafain nocon torofo oshoshtacoin fianmafain nocon toquirifo faca facaitsa chicoin fianmafain nocon toquiri futsan ahuun anu perla fianmafain nocon pano futsa futsatapafo fianmafain nocon ihui inin sharashtacoin futsa futsatapafo fianmafain toquiri curushcoin oshopa sharashtacoin ahuun anu marfilhuunshon ahuarafo onihuafain ihui chicoinhuunshon ahuarafo onihuafain cuno ahuun anu broncehuunshon ahuarafo onihuafain cuno futsan ahuun anu fierohuunshon ahuarafo onihuafain toquiri ahuun anu marmolhuunshon ahuarafo onihua nanfo afanan fianmafain.

**13** Nocon pitiri ahuun anu canela non yochi non nan fimi ahuun anu uva ahuun unu non shuni non harina roroshta non trigori fianmafain inin shara aton anu incienso yafi futsan ahuun anu mirra non inin futsafoi fianmafain nocon inafo nan moifo non chashoanfo non caballofo fianmafain taramutiya fianmafain nocon oinmatifori noco afanan fiantirofoma.

**14** “¡Ohuashta! Babiloniafoan nan ahuarashta sharashtacoin futsa futsatapafo man fasi fuchipaimisifo afanan man fitiroma. Nantifi man aya cuscan man funocoian afanan man fipanacama. Man ahuara yopapaonima. Man acai afanan ascanacama. Nantifi matona man funoi cuyocoianran,”

ishon nan inanmitsamisifoan yoishquicani. **15** Babiloniafo fasi omitsiscal nan Babilonia anoafu yamafashion aton mafo fimsifo atohuunshon mai futsa inanmitsashon pui ichapa fimsifo fasi ratucoincaquin. Fasi uaishcani manocaquin yoiquin isca huashcani,

**16** “¡Ohuashta! Rato futsafocai Babiloniafo cuscarama. Ahuun yorafo sahuuti sharashtacoin sahuumisifo. Sahuuti shonan shara non oshin shara non oro toquiri faca facaitsa chicoin non toquiri futsa ahuun anu perla sahuutihuun

nua nanscara sahuuafo. <sup>17-19</sup> Fasi isharafiamisishacaquin samamashtacoin nantifi man funoafao. Afanan aton pushurasi yamai. Man coi cuyoi futsua. ¡Ohuashta!"

ishon nan inanmitsamisifoan yoishquicani. Nanscarifiai nan shashohuan ifofo non amuran fomisifo non shashohuanun camisifo pui fiishquin afoanri fasi shinain. Babilonia coaiton chaicushon oincani manocani fasi uaicani.

"¡Ohuashta! Rato pushurasi futsancai Babilonia cuscarama. Nanno fustishon shashoan ifofoan pui ichapa fiafo. Ascanfiacanashu samamashtacoin nantifi man aya cuscan man funoaforan,"

ishon shashoan yonomisifoan yoishquicani.

<sup>20</sup> "Ascafiaifoanno nantifi Upa Dios fu icanoafoan unimacahuun. Babiloni- afoan Jesús icoínra huafo man omitsiscamamisifo. Ascancufin Upa Diosin ato fasi onannitima omtsiscapanacafo. Nantifi Jesús icoínra huafoan non Jesús fu rafumisifoan non Diosin tsain inon pacuai yoimisifoanri unimacahuun,"

—ishon yoia. <sup>21</sup> Ascatañ Upa Diosin ahuun oinmati afu nai muran icaton futsan mutsisipacoin toquiri uhuapacoin finifoantan unuhuan muran potaquin yoia isca huaquin,

"Un na toquiri curushcai pota cuscan nanscarifiai Upa Diosin nan pushurasi anoafó Babilonia curushcai ato onaintimashqui coi munononfo. Cuyoriscatashquin afanan tsoan oinnacama. <sup>22</sup> Ascan afanan Babilonia ano manutifo nan shainti non manuti futsafori pusicanima. Tsoancai afanan ato nicanacama. Yonomisi afanan ano iyamacain afanan naniainfo nicayamafain <sup>23</sup> afanan lamparina ano otapacunacafoma. Nocofunun ainfo fiaino unimaifoan man nicamisi."

"Ascan afanan tsoan ascaran nicapacunacama. Babilonia anoa inanmitsamisifoan fasi tapicoincani. Nanfoan fasi ichapa fiafo. Aton shointihuunshon manifoti paramisifoquin. <sup>24</sup> Babiloniafoan Diosin tsain yoimisifo non Jesús icoínra huafo futsafori rutumamisifo. Manifoti anoa ato rutunifo,"

ishon Diospan nai oinmatinin yoia.

## 19

<sup>1-2</sup> Ascatañ nai muran icafo ichapacoin aton oi un nica. Oi ashcafinin un ato nica isca huaquin,

"Tsoan chaca huamisi Upa Diosin ato onaintimai. Iconquin ato onaintimai. ¡Aicho! Nocon Ifon Diosin fasi sharacoin non yoipacunon. Nanton nocon chaca soashona non afu nipanon. Ahuunoa fusti non yoitiro isca huaquin, 'Min nocon Ifocoin. Tsoa futsacai mia cuscarama. Mirus fusti min sharacoinmisiran,' ishon nantifishon yoipacunonfo. Ahuun shinanhunshon ahuamamishti huatiro. Upan Diosin Babilonia anoafó atohuunoa isca huaquin yoia, 'Nan Babilonia anoafó ainfo furomacoin cussarafo. Man chaca huamisifohuun manifoti anoafó ato chaca huama. Ascancufin ua Babiloniafoan fasi ua chaca huafo. Uhuun yorafori man omitsiscamacaní naanonfo. Ascan un ato omitsiscamacunacaran,'"

ishon Upa Diosin yoia. <sup>3</sup> Afanan oi ashcafinin nai murannoafaoan yoia isca huaquin,

"¡Aicho! Nocon Ifon fasi sharacoin non yoisharapacunon. Chaca huamisifo iconquin ato onaintimai. Ato chii urumanhuan muran potai. Nan chiicai nocapacunacamaran,"

ishon yoiafo. <sup>4</sup> Ascanori Upa Diosin tsaoa ano nan Jesús icoínra huafo aton cushumisifo nan veinte cuatro nocofunufo yafi nan Diosin onihuani rafu non rafuri anaman fuoshonpacufoantan isca huaquin yoiafo

—¡Aicho! Nanscasi ipanon. Amen. Nocon Ifon Jesús fasi sharacoin, non yoipacunon —ishon yoiafo.

<sup>5</sup> Ascatan Upa Dios tsaoa anoa un oi futsan nica isca huaquin,

“Upa Diosin oinmatifo non niaifofoanri man Diosin mato yoia cuscan nicacoinmisi. Marifi Upa Diosihuunoa yoisharacahuun isca huaquin, ‘¡Aicho! Upa Diosin min fasi sharacoinran,’”

huacahuun.

*Jesús nan Diospan chashoan facu cahuanshara cuscara ahuun yorafo aqui ihuutiro afu fusi huanonfo*

<sup>6</sup> Ascatan yorahuanrasi aton oi unuhuan ponoin achacoin cuscara yafi nai curushcain turuica nicatsa un nica yoiaifoan,

“Nocon Ifon Diosin tsoan atiroma cuscan ahuamamishti huatiro. Nanfin nantififain nocon Niaifocoinquin. Manifoti anoa noco iquinan. ¡Aicho! Nocon Ifon Diosin fasi sharacoin non yoipacunon.”

<sup>7-8</sup> “Nocofunun ainfo fiaino ainfo unimacoin itisharatiro ahuun funu fu fianain. Nanscarifiai nocon Ifo Jesús nan chashoan cahuanshara cuscara natian ahuun yorafo afu imapacui. Ascan ahuun yorafo man itisharafo afu ipashcaquin. Ainfoan ahuun funu unimamai nashitiro. Nashishon saya funa sharashtacoin patsashon sahuutiro afu fiananshquin. Nanscarifiai ahuun yorafoan itisharashon Upa Diosin aton chaca soashonon Jesús fu ipasharanonfo. Ascacun non unimanon. Tsoa futsancai mia cuscara sharamaran non nocon Ifo huanon,”

ishon yoiafo. Diospan yorafoan Jesushuunshon futsafo shara huamisi. Ascan Diosin ato sahuuti sharashtacoin sahuumana Jesús fu ipasharanonfo.

<sup>9</sup> Ascatan Diospan oinmati nan afu ica ua yoia, —Un mia yoiai cuscan cunuhuu isca huaquin, “Uhuun Facun Jesús chashoan facu cuscara natian nantifi ahuun yorafo ichanain afu ipashcaquin. Ascan ohuu. Uhuun Facu ahuun yorafo pimai minrifi ato futan pitiro afu ipashquin,” ishon Upa Diosin nannori yoi fasi unimatiro. Nannori Upa Diosin ahuun tsain. Ahuun tsain man icoinra huatiroran, —ishon ua yoia.

<sup>10</sup> Ua yoiaino un anaman fuopacua, —Min sharacoinran, —ishon yoishquin. Ascafashon ua yoia, —Asca huayamahuu. Ua anori yoiyamahuu. Unrifi nan mi futan Jesús icoinra huafo cascarari. Jesús mato yoia cuscan man cachiquiri huamisima. Un matofu ahuun oinmatiri. Nan fusti non fuoshopacutiro yoishquin, “Min fasi shara. Min uhuun Iforan,” ishon min nan fusti yoitiro. Diospan tsain yoimisifoan yoiafo cuscan unrifi un mia yoia nanscasi huaquin non Jesushuunoa non yoinon, —ua huaa.

### *Cristo afanan mai ano oshquiai cuscan yoia*

<sup>11</sup> Ascatan uhuun namapan ointsa ua oinmana cuscan afanan un mato tapimai man tapinon. Upa Diosin nai muran icanoa un oian. Fupoti fupumua pushu muran non ointiro. Nanscara Upa Diosin icari un cayacafi oian. Nanno caballo oshopa un oian. Nan caballo camaqui tsaoaton ahuun anu ichapa. Ahuun anu rafuhuunoa mato yoinon. Yoia cuscan acoinmisi. Ascan ahuun anu futsan Iconmisi. Nanton iconcoin yora chacafu onaintimai. Nan Diosin tsain nicacasmamisifo ato potashquin omitsiscapanacafu muran. <sup>12</sup> Ahuun furo chi uruai cuscara rafu. Chi uruaino faquishfiacun yoran oinsharatatiro. Nanscarifiai nocon Ifoan yorafoti aton nomuran shinain cuscan onancoian. Niaifo maiti sharashtacoin ichapa maia. Ahuun fumananqui anu cunua. Arus fusti nan anu onan.

<sup>13</sup> Sahuuti chainipa sahuua. Nan sahuuti imiqui pocoa. Ahuun anu futsari Diospan Tsainran. <sup>14</sup> Ahuun yorafo nai ariashu caballofo oshopa camaqui aton Ifo cachiori focani. Ahuun ranushumua cuscarafo. Aton sahuutifo yufan oshopa sahuufo. Na sahuuti oshopa rama patsamua cuscarafo. <sup>15</sup> Ahuun tsain nopu cunocoin cuscara.

Ahuun tsainmansi manifoti yoitimamisifo ato onaintimai. Manifoti ato iquina ratofomain yoitimamisiqui ato curushcai onaintimaquin finacoin. Ahuun tsain nicacas-mamisifocun nan Diosin ahuamamishti huatiro fasi atoqui sinacoin. Ascan Jesushunshon ato onaintimai omitsiscapanacafo muran ato potashquin. <sup>16</sup> Jesús ahuun anu futsan ahuun sahuuti chainipa mananquirinoa yafi maiquirinoahuun cunua isca huaa,

NIAIFOFO MANIFOTI ATON NIAIFOCOIN ANUFAIN IFOAFO MANIFOTITON ATON  
IFOCOINRAN

ishon cunua.

*Jesús nan yoina pofu cuscara finoncoinyaino chii urumanhuan muran potani*

<sup>17-18</sup> Ascantari un oian Diosin oinmati afu nai muran ica futsan fari tsacaino nishon oi ashcafinit puiyafu noyaiton cuna, —Fucahuun. Upan Diosin mato pimapai. Niaifocoinfo non ranushumua aton niaifocoinfo non aton niaifo patasharifo non nocofunufo mutsisipacoin non caballofo non caballo catu camaqui tsaoafu non nantifi Diosin tsain nicacasmamisifoti niaifofo non yora ahuamari nantifi Diosin ato namashquin. Ascacufin puiyafuan aton nami pi mayanshquincaniran, —ishon nan oinmatinin puiyafu yoia.

<sup>19</sup> Ascantan un afanan nocon Ifo Jesús ahuun noicasmamisifo nan yoina pofu cuscara yafi manifoti aton niaifofo uhuun namapan ointsa un ato oian. Man ichananfoan Jesús ahuun caballo camaqui tsaocun ahuun yorafoya rutupaican. <sup>20</sup> Aton rututamarocon Jesús ato achia chi muran ato potashquin. Nan yoina pofu cuscara yafi nan fuparamitsamisiton, —Unfin Diosin tsain mato yoimisiquin, —ishon yoiflashu chanimisi. Nanton yoina pofu cuscara huunoa tsoan atiroma cuscan Satanashunshon huamisi. Ascan nantifi cunua yorafu nan yoina pofu cuscara ahuun anu atoqui nua. Nanfoan yoimisi isca huaquin, —Min uhuun dios. Un mia noiran, —ishon yoimisifo. Ascarafotin nan yoina pofu cuscara qui. Ascan nan paramitsamisiton tsoan atiroma cuscan ahuamamishti acai cuscan man oianfo. Ascaquin ato paracoian. Nan rafu nan yoina pofu cuscara yafi nan paramitsamisi niyo Jesús ato chi urumanhuan muran pota.

<sup>21</sup> Nan rafutan yora tushuafo Jesús ahuun caballo camaqui tsaoashon ahuun tsainman nopo cunocoin cuscara huunshon ato rutumana nai futsuafo. Naafoanno puiyafu atoqui ichanancashon aton caya piqui mayafu.

## 20

*Jesús Satanás achishon nusha milfari*

<sup>1</sup> Ascantan Diospan oinmati Diosin icariashu fotoaiton un oian. Shafi cuscara tsoma. Nan yoshin chacafu quinhuan faquish muran icafoqui atoqui fupoti fupo. Nanno Diosin oinmati fupoti ahuun shafi cuscara yafi cuno pono uhuapa cuscara tsoma. <sup>2</sup> Tsomashon nan famanhuan cuscara achia. Diosin mai oni huataima nan rononhuan iyopaoni. Paramitsamisicoin. Naanfin yoshin chacacoin Satanás. Achishon cuno pononun nusha. <sup>3</sup> Ascashon quinhuan faquish muran pota. Potatan aqui fupocoian amuran mil fari inon afanan caifoti paranonma. Nan mil fari anaitiano cainmayoi ahuutishotama afanan mai ano cahuancacayonon.

<sup>4</sup> Ascantan niaifoan tsaotifo Upa Diosin icanoa un oian. Jesús ahuun yorafu nan tsaotifo camaqui tsaoafu. Jesús yonoano a futan futsafu yonoshquin. Ascashon nannori un oian nan Jesús icoinra huaa futsafu. Nanfo niyoano nan yoina pofu cuscara yafi ahuuna ointsa rami huati nanfoan ifoanmisima. —Minfin uhuun Ifo. Un mia noiran, —ishoncayoi misifoma. Aton anu aton mucu iyamarai aton fumananqui cunumisifoma. Ascatamarocon yoimisifo isca huaquin, —Jesús fustifin nocon Ifoquin, —huamisifo. Diospan tsain fustisi tanamisifo. Ascan nan yoina pofu cuscara atoqui sinaquin ato

tushtumana. Nai futsufiafo Diosin ato funimani. Funishon Jesús futan mai ano mil fari yorafoti iquina.

<sup>5</sup> Nanfo funi yoi. Ascan nan mil fari anaitiano futsanfori funimashquin. <sup>6</sup> Shinancapon uhuun yoramishtichin un mato yoiai cuscan. Nocorifi Upa Diosin noco funimaqui tau huashquin. Nocon catoan ahuun yorafo non inon. Upa Diosin yafi Criston noco yonomapaiyai cuscan non futsafihuunoa non Upa Dios cufimisi. Non Jesushuunoashu omitsisciamisishaquin naashu non omitsiscapanacafu muran canacama. Ascatamarocon non Cristo icanoshon a futan futsafio iquishquin. Ascashu Jesús cuscara shara icashu non fasi unimacoinshquin.

<sup>7-8</sup> Ascataan nan mil fari anaitiano Satanás quininhuan faquish murannoaa afanan cainmayoshquin nan manifoti anoafu parayonon. Ascataan Dios nicacasmafo manifoti ano ato ichanan huai Diospan yorafo rutumashquin. Ichananfoanno fasi ichaparasi. Nan Dios nicacasmafo tsoan tanan huatiroma. Aton anuquin Gog yafi Magog man huamisifo. <sup>9</sup> Manifoti cunua ato ichanan huashquin Diospan yorafo icanu ato cu-fuacufoanifo ato rutushquin. Ascafiacon Upan Diosin ahuun yorafo fasi noiquin ato numashqui. Nan yorafo Satanás ichanan huua nai muranshon ato camaqui chi urumanhuan potai nai futsunonfo.

<sup>10</sup> Ascataan nan yoshin chaca Satanás nanton yorafo fuparapaimitsamisicoin Upan Diosin chi urumanhuan muran pota. Nanno omitsiscapanaca. Nannori nan yoina popu cuscara yafi a futan yonopaoni, —Unfin mato Dioshuunoa yoimisiquin, —ishon yoifiamisishaquin Satanashuunoa ato yoimisi. Fasi paramitsamisicoin. Nan rafu non fusti chi urumanhuan muran omitsiscapashquin. Isin muuquin unupacunacafoma.

### *Jesús icoira huafoma ato onaintimashquiai cuscan*

<sup>11</sup> Ascataan tsaoti oshopa uhuapacoin un oian. Nanno Upa Diosin tsaoan. Ahuunoashu nantifi mai anoafu non nai murannoari cuyoi futsui. Ascashu nantifi yorafo nai futsui. Diosiqui onupaifiai tsoan onutiroma. <sup>12</sup> Ascataan un oian nan niaifofo non yora ahuamafori naacanashu Upa Diosin tsaoan ano niafu. Nanno niafoanno Upa Diosin ahuun librofo fupua. Libro futsari fupua. Nan libro ahuun anu nipamisifo aton anu cunua. Nan naafoan amisi cuscan librofo muran nantifi Upa Diosin man cunua. Ascan nan chaca huapaonifo cunupacua cuscan ato ismashon iconcoincun ato onaintimacoinskirian ishon ismatiro.

<sup>13</sup> Nan asafo yafi mai anoashu naamisifo nan omitsiscapanacafu muranri nantifi nan naamisifo Upa Diosin ahuun ointaifi fuafu. Nan chaca huafu cuscan atoti Upa Diosin onaintimapacua. <sup>14</sup> Nantififain nan Diosin tsain nicacasmamisifo Upa Diosin ato chi urumanhuan muran pota. Man naafiafaon natian ato chi urumanhuan muran pota. Nannoashu omitsiscapanacaforan ishon ato anupacua. <sup>15</sup> Ascan nan libro ahuun anu nipamisi. Tsoa ahuun anu nan libro muran Upa Diosin cunumisima nanfo chi urumanhuan muran pota.

## 21

### *Nai yafi mai funacoin Upa Dios afanan oni huashquin*

<sup>1</sup> Ascan uhuun namapan ointsa Upa Dios noco ashoin cuscan ua oinmana. Un oian nai yafi nai murannoafoti maifoti funacoin Diosin onihua. Nan nai yafi mai tauhuaquin onihuani yamariscatana. Nan ununhuanri yamariscatana. <sup>2</sup> Ascan un oianri Diospan yorafoan Jesús tanasharamisifo nai murannoafu Upa Dios icariashu fotocani. Nanfo icanu ahuun anu Jerusalén funa. Nan Jerusalén funaya fotoashu nanno icanu. Fotoaiton un oian fasi sharashtacoin. Ainfon ahuun saya sharashtacoin sahuua itisharashquin funu fu fianain. Nanscarifi aquin Upa Dios nan Jerusalén funa atishara huua sharashtacoin inon. Ahuun yorafo nanno afu nipasharashcani.

<sup>3</sup> Ascan Upa Dios tsaoa ano oi ashcafinin un nica. Yoia isca huaquin, —¡Aicho! Natian Upa Dios yorafo fu iishquin. Ato muran iishquin nanfo ahuun yorafo inon. Aafin aton Diosiri iishquin. <sup>4</sup> Ato cushusharashquin afanan tsoa omitsiscatiroma. Atohuun ramapai tsoa uaicai ato shinanmasharatiro aton fuon turuashontiro afanan shinanchacai cuscan pusitama unimanon. Ato cushuaino tsoashta afanan nayamacain manoyamacain uaiyamacain isin mucanimaran, —ishon yoia. Ahuara chacafo iyopaoni cuscacai afanan ascancacama.

<sup>5</sup> Asca huatan Diosin ahuun tsaoti camaqui tsaoshon yoiquin isca huaa, —Un nantifi funa onihuairan, —ishon Dios yoia. Ascashon futsan ua yoia, —Min nicai cuscan cunuhuu nan tsain nantifain icoinra huanonfo. Iconcoin nan tsain yorafoan icoinra huatirofo, —ishon ua yoia.

<sup>6</sup> Ascashon afanan Diosin ua yoia isca huaquin, —Mun aca. Natian mun yoiyonii cuscan man anaitia. Ahuara oni huataima un iyopaoni. Ahuutiamain maifoti cuyoicai urus fusti un yoitiro. Un nantifi iquina. Ufin ipamisiquin. Tsoan naaqui nomicoinquin yoitiro isca huaquin, “Unfin fasi unu yopacoincai nashquima,” ishon yoitiro. Nanscarifiai tsoa ipasharapaiquin yoitiro isca huaquin, “Un fasi numamisi yopai. Un Dios yopacoinran,” ishon anori yoiaiton un unimaquin cashmancoin nan nimapacutiro ufu nipanon. <sup>7</sup> Tsoan ua cachiquiri huatamarocon nan naitian ua tanasharacun nantonacaifin nantifi un mia yoia cuscan ahuunari iishquiquin. Naanfin un cashman inanshquin. Unfin ahuun Dios iishquin. Aafin uhuun facu iishquin.

<sup>8</sup> Ascan ratoran futsan ratutan cohuuqui uhuunoashu omitsiscapayamacun ua cachiquiri huashquin uhuun tsain icoinra huayamafain chacacoin futsa futsatapafo shatucasmafain rutumitsamisi icain aton ahuinma chotamisi icain ainfofoanri aton funumafo chotamamisi icain shointi nan yoshin chacafo fu tsainmisi icain Uacai noitamarocon ahuara futsan finaquin noicoiain icain ascaraflo yafi nantifi chanimisifori ufu ipatamarocon chi urumanhuan muran nan omitsispacunacafo muran ipashcani. Anoashucui fonacafoma, —ishon Upan Dios ua yoia.

### *Jerusalén Funa*

<sup>9</sup> Ascantan Diosin oinmati afu nai muran icafo nan siete nanfoan tutso muran ahuara chacacoin fospihuamua maifoti camaqui ocacaquin ato omitsiscamacani futsan uqui oshon ua yoiquin isca huai, —Ohuu. Un mia ahuara sharacoin ismai. Nocofunun ainfo ffi cushusharashquin. Nanscarifi aquin Jesús nan chashoanun facu cahuanshara cuscaraton icoinra huafo fia ahuun yorafo inon. Ohuu. Un ato mia ismanon, —ua huaa.

<sup>10-11</sup> Ascan Diospan Yoshin Sharapan ua iquinaiton Diospan nai oinmati ua machi uhuapa cuyacoin camaqui iyoa nantifi un oinno. Jesús icoinra huaflo nan Dios icanoafo aton chaca soashona nanfo nai muranno Upa Dios icariashu fotoaifoan ua isma. Nan machi cuyacoin anoshon ua isma. Nanfo icano ahuun anu Jerusalén funa. A muran icafo Jesús tanasharamisifo. Upa Diosiri atofu ica. Nanno fasi faca facaitsa. Toquiri faca facaitsa cuscara. Fasi sharashtacoin. Nan toquiri ahuun anu jaspe tsosia shara toquiri futsan ahuun anu cristal. Faca facaitsa cuscara.

<sup>12</sup> Cunu cushto mutsisipan cuyacoin nan Jerusalén tarati huayacuna. Nan cunu cuyacoin doce fupotiya. Fupotiti ano Diospan oinmati afu nai muran icafo doce nia cushusharashquin. Israeli ahuun facu doce facufo aton funafori tiri futsan pashcanifo. Nan fupotifot aton anu doce nutanfo.

<sup>13</sup> Nan cunu rafu non rafuri cuyacoin iyacuna cuscan fupotiya doce fari oaiquiri rafu non fusti non fari oai istafari rafu non fusti non fari cai istafari rafu non fusti non fari caiquiriri rafu non fusti fupotiya.

<sup>14</sup> Nan cunufo cuyacoin toquirininhuan doce camaqui onihua. Jesús nan cashoanun facu cahua sharashta cuscara afu rafumisifo doce aton anu toquirininhuantiqui nutan.

<sup>15</sup> Diospan nai oinmati futsan nan unfu tsainquin tananti tsoma Jerusalén funa non ahuun cunufo cuyacoin uhuapan non ahuun fupotiri tananshquin. Nan tananti facatahua chainipa cuscaraifiashu oro sharashtacoin. <sup>16</sup> Nan Jerusalén funa ahuun cunu rafu non rafuri cuyacoin nantishon fosi. Ahuun chainipa non ahuun ashfanri nantishon rafu. Ahuun cuyari nantio fosi. Diospan nai oinmati futsan tanan dos mil dos cientos kilometros ahuun chainipa non ahuun ashfan non ahuun cuyari. <sup>17</sup> Ahuun cunufo cuyacoin ahuun cushto sesenta y cinco metros tanan. Nan oinmatinin afu nai muran icaton yorafoan tananmisi cuscari arifi metronun tanan.

<sup>18-20</sup> Jerusalén funa sharashtacoin. Ahuarao amuran vidrio botica cuscara cushtocoin ocu rafu oinquin non nocotiro. Vidrio botica cuscaraifiashu oro. Nanhunoa Upa Dios onihua. Ahuun cunufo cuyacoin non cushtocoinri. Toquiri ahuun anu jaspe tonan shara ahuun cuno oshin shara faca facaitsaya osian. Toquiri sapa cushtocoin futsa futsatapafo doce putsamunia camaqui nan cunu rafu non rafuri Upa Dios onihua. Toquiri sapa fasi chainipa cushtocoin futsa futsatapafo fusti tauhuaqui fuca. Ahuun anu jaspe.

Nan jaspe tonan shara ahuun cuno oshin faca facaitsaya osian.

A fuchi toquiri sapa futsa fasi chainipa cushtocoin ahuun anu zafiro. Nan zafiro tonan sharashtacoin.

A fuchi toquiri sapa futsa fasi chainipa cushtocoin ahuun anu agata. Nan agata shonan sharashtacoin osian.

A fuchi toquiri sapa futsan chainipa cushtocoin ahuun anu esmeralda shonan sharash-tacoin.

A fuchi toquiri sapa futsa chainipa cushtocoin ahuun anu onice oshin mapash sharash-tacoin.

A fuchi toquiri sapa futsa chainipa cushtocoin ahuun anu cornalina oshin sharashtacoin.

A fuchi toquiri sapa futsan chainipa cushtocoin ahuun anu crisolito ahuun cuno oshin faca facaitsa cuscara sharashtacoin.

A fuchi toquiri sapa futsan chainipa cushtocoin ahuun anu berilo shonan mapash sharashtacoin.

A fuchi toquiri sapa futsan chainipa cushtocoin ahuun anu topacio chashna sharashtacoin.

A fuchi toquiri sapa futsan chainipa cushtocoin ahuun anu crisoprasa shonan yafi chashna mapash osian sharashtacoin.

A fuchi toquiri sapa futsan chainipa cushtocoin ahuun anu jacinto nanhuain ointsa mapash sharashtacoin.

A fuchi ahuun unutaquin toquiri sapa futsan chainipa cushtocoin ahuun anu amatista nanhuain ointsa sharashtacoin. Nan toquiri sapa doce sharashtacoin a fuchi cunu Upa Diosin nimainifoanni.

<sup>21</sup> Nan cunu rafu non rafuri ahuun fupotifo doce perlahuunshon Diosin ato onihua. Perla toquiri cuscara osho sharashtacoin. Nan perla fustihuunnoa fupoti fusti onihua. Perla fustihuunnoari fupoti fustiri onihua. Nansca huashosi nan doce fupotifo Upa Dios onihua. Nan Jerusalén funa ahuun faitifi oro sharashtacoin onihua. Nan oro vidrio botica cuscara cushtocoin ocu rafu oinquin non nocotiro.

<sup>22</sup> Ascan nanno Dios fu tsainti pushu yamai. Upa Dios nan ahuamamishti huatiro yafi nocon Ifo Jesús nan chashoan facu cahuan sharashta cuscara Jerusalén funa muran imisifo. Ascacufin yorafo atofu tsainpai pushu yopacanima. <sup>23</sup> Nanscarifiai nanno fari yafi oshu yopacanima. Upan Dios yafi Jesús nan chashoan facu cahuan sharashta cuscara atofu ica. Upan Dios nanno ishon ato chashashona. Jesusrifi aton lamparina cuscara ato otashona cayacafi oinsharanonfo. <sup>24</sup> Nanhuunshon chashaino manifoti

nifoanfafaitirofo. Niaifoanri nan Jerusalén funa muran iquishon ahuarafu shara man aya cuscan iquimashquin.

<sup>25</sup> Nanno yamuri yamai. Faquishpacunacama. Ascan ahuun fupotifo fupopacunacama. <sup>26</sup> Ascan Jerusalén funa muran manifoti anoafu iquicaquin ahuarafu shara aya cuscan amuranri iquimashcani. Aqui fasi unimacani finacoinschcani. <sup>27</sup> Ascan ahuarashta chaca amuran iquitirofoma. Nan shinanchacamisifo non chaca huamisifo non paramisifori iquitirofoma. Tsoa Jesús nan chashoan facu cahuan sharashta cuscara ahuun libro muran ahuun anu cunuano nanno afu ipatiro. Nanfosi Jerusalén funa muran iquitirofo Jesús fu ipasharashcaquin.

## 22

<sup>1-2</sup> Ascan uhuun namapan ointsa Diosin ahuun oinmati afu ica futsan Dios icanomain ahuu cuscaraquin ua isma. Upa Dios yafi Jesús nan chashoan facu cahuan sharashta cuscara tsaoa anoashu unu tsosi cristal shafacafico ointsa afain. Icafo nushmancayan unu afain. Nanno icafoan nan unu tsosi shara ayapaiyaitian ayatiro. Nannoashu nipanaca. Nannori fai nushmancayan ica. Unu ocama rafu nii shocoa. Nan nii ahuun fimi piipaiyaitian pitiro. Nanscarifai Dios no fu ipacoiaianno non ahuunoashu nipasharashquin. Nan nii oshutifi fimimisi. Ahuun pui tsasipacunacama ahuun shachoco funa shara ipanaca. Ahuunoashu manifoti non Dioshuunoashu muma funa shara ipanaca.

<sup>3</sup> Nanno Jerusalén funa Upa Diosin yafi Jesús no fu iishquin. Non aton yoracoinschon non ato noicoinschquin. Non aton oinmati cuscara iishquin. Ato fanainsharashocun ato yoisharapacunaca. Ascan nocon mai shuni ano chaca futsa futsatapafo ipaoni cuscacai nan Jerusalén funa ascarama. Ahuashta chaca amuran itiroma. <sup>4</sup> Nannoashu nocon Ifoan fuso oinfafaincani. Aton fumananqui ahuun anu nutamana. <sup>5</sup> Nocon Ifon Diosin ari icafo ato shafahuashoan. Ascan afanancai lamparina yafi fari yopatirofoma. Anocai afanan yamuima. Nanscashu afu niaifo patashari ipanacafo.

### *Jesús oti chaima*

<sup>6</sup> Ascatain Diospan oinmati afu nai muran icaton afanan ua yoia,—Nocon Ifon Diosin ahuun tsain yoimisifo aton nomuran tapimamisi ahuara ahuuscaranai cuscan aton yorafo tapimashcani. Nanscarifai natianri ahuun oinmati afu ica futsa nichian ahuara ahuuscaran arishcashquiain cuscan ahuun icoingra huafoti tapimashquin. Nan un mia yoiai cuscan icoingra. Nantifi uhuun tsain man icoingra huatiroran,—ishon ua yoia.

<sup>7</sup> Yoiquin asca huatan nocon Ifo Jesús yoia isca huaquin,—Un nai murannoashu mai ano matoqui nocoriscashquin. Man min oian inon pacuoi cuscan nanfo min cunushotiro. Tsoan nanfo icoingra huafain cachiquiri huayamashu unimacoin iishquiran,—ishon Jesús ua yoia. <sup>8</sup> Uquian, Juan, un nanfo nicafain oian un nan Diospan oinmati afu nai muran icaton un anaman nofuomupacua nan uhuun ifocoincun ismashquin. <sup>9</sup> Un asca huafaiton ua yoia isca huaquin,—Asca huayamahuu. Urifi mia cuscara. Min non Jesús icoingra huafu non ahuun tsain yoimisifo non nantifi nan min rama cunua cuscan icoingra huafu urifi mato cuscara nocon Ifon Diosin ahuun oinmati. Ascan Upa Diosin fustisi min Ifo huatiro. Nan fusti min anaman nofuomupacuahuashotiro,—ua huua.

<sup>10</sup> Ascatain afanan ua yoia isca huaquin,—Ahuuscaran arishcashquiain cuscan min rama cunua samamashta iishquin. Ascan min cunua cuscan onuyamahuu. Nantifi yorafo tapimahuun. <sup>11</sup> Ascan Jesús nocoaitian nan nicacasmamisifo fasi chaca finacoinschquicani. Yora chacacoin huamisifori mimacoin chacacoin iishquin. Nan Diosin yoia cuscan huamisifori mimacoin Diosin yoia cuscan aashcani. Nan Jesús cuscara shara imisifoanri mimacoin huaquin aton Ifo tanasharashcani,—ishon Diospan oinmatin in nan afu imisifo futsan ua yoia.

<sup>12</sup> Ascashon Jesús afanan yoia isca huaquin, —Ua nicasharacahuun. Un matoqui samamashta nocoriscai. Nocoshon un mato yoia cuscan man huacun un mato inan-sharashquin. Nan shara huamisifo un ato shara huafain nan chaca huamisifo un ato onaintimacoinsquin. <sup>13</sup> Ahuarao onihuataima un iyopaoni. Unfin ipamisiquin. Un ipashquin. Un unupacunacama. Ahuutiamain maton mai cuyoicai urus fustifin un yoitiro.

<sup>14</sup> Jerusalén funa muran iquishon nan nii ahuun fimi pipaiquin pitiro nipashquin. Nanscarifiai Upa Dios fu icaino arus fusti mato nimapacutiro. Nan ua icoindra huafio aton chaca soashona nanfo fusti uhuun Upa Diosin ato iquimatironofu ipanonfo. <sup>15</sup> Ascan nan yora chacacoin pashna popu cuscara iquimayamafain shointifo ya nan shointi icoindra huafio iquimayamafain nocofunun ahuun ahuinma chotamisi yafi ainfoanri ahuun funuma chotamamisi iquimayamafain rutumitsamisi iquimayamafain tsoan Dioscoinma noiquin ifoancun iquimayamafain nan chanimisifo nan chani noimisicai. Ascaro yorafocai Jerusalén funa muran iquitirofoma.

<sup>16</sup> Unquian, Jesús, uhuun oinmati nan unfu icaton miqui nichian un mia yoia cuscan ua icoindra huafio ichananti anori min ato tapimanon. Unquian David ahuun funa. Un fishi uhuapa shafainoshta oinmisi cuscara. Nan fishi oinquin non tapitiro samamashta shafariscatiro. Nanscarifiai un otichaima tapicanashu itisharatirofo Jerusalén funa muran ufu ipanacaforan, —ishon Jesús yoia.

<sup>17</sup> Ascano Diospan Yoshin Shara yafi Jesús ahuun yorafoonri nantifi yorafouqui isca huacani, —Jesusqui fucahuun, —yoiafoan. Tsoan nicacoiainton yoiqui isca huatiro, —Jesusqui fucahuun, —huatiro. Tsoa nomicoin unu yopai unu ano catiro ayatan ahuun nomi shatutiro. Nanscarifiai tsoan ahuun chaca shatupai Jesusqui otiro Upan Dios fu ipashquin. Ahuara inantamarocon Jesús icoindra huashu afu nipatiro.

<sup>18</sup> Unquian, Juan, ahuuscaran arishcashquiain cuscan un mato cunushona. Un mato cunushonai cuscan cayacafico. Tsoan nan tsain nica natian un mato yoipacuiai cuscan. Ua nicasharacahuun. Un mato cunushona cuscan tsoan afanan tsain futsa shinanfain cunucun nan libro muran omitsiscapanacafohuunoa cunua cuscan iconcoin Upa Diosin nantifi nanfo omitsiscamashquin. <sup>19</sup> Ascantari ahuuscaran arishcashquiain cuscan un cunua tsoan nan tsain atirifi soacun Upa Diosinri ahuun anu soashquin nan ahuun libro muranno. Ascacufin nan Jerusalén funa shara muran iquipacunonfoma. Un nan cunua cuscan nan Upan Diosin ahuarashta shara yoiyoni cuscan aya ipanaca.

<sup>20</sup> Jesús yoia cuscan nannori un mato cunushona. Nanton yoiqui isca huaa, —Icon. Un matoqui samamashta nocoriscairan, —ishon yoia. Ascaran inon. Ifon Jesús noocoqui oriscahuu. <sup>21</sup> Mancai Diospan yoraflo. Ahuara ahuuscarafaino nocon Ifon Jesús matohuun noishon maton nomuran mato fupuashoin man shara inon. Nanscasi ipanon. Amen. Nanti.

Juan